



# In cuali tajtoltzin de Dios

Highland Puebla Nahuatl New Testament

---

## Contents

ITATTANIL DE CRISTO, YEJUA IN SAN MATEO, QUIJCUILOJ NIJÍN	1
YANCUIC TAJTOLTZIN DE DIOS TEN CUALCUI NE NEMAQUIXTILIS	
ITATTANIL DE CRISTO, YEJUA IN SAN MARCOS, QUIJCUILOJ NIJÍN	88
YANCUIC TAJTOLTZIN DE DIOS TEN CUALCUI NE NEMAQUIXTILIS	
ITATTANIL DE CRISTO, YEJUA IN SAN LUCAS, QUIJCUILOJ NIJÍN	138
YANCUIC TAJTOLTZIN DE DIOS TEN CUALCUI NE NEMAQUIXTILIS	
ITATTANIL DE CRISTO, YEJUA IN SAN JUAN TEN QUIJCUILOJ NIJÍN	233
YANCUIC TAJTOLTZIN DE DIOS TEN CUALCUI NE NEMAQUIXTILIS	
IN CHIHUALISME TEN QUICHIUTINENQUE ITATTANILUAN DE CRISTO	302
IN TATTANIL SAN PABLO QUINTAJCUILOHUILIA IN TANELTOCANI	382
CAMPA PUEBLO DE ROMA	
IN ACHTO TAJCUILOLAMATZIN TEN QUIJCUILOJ IN TATTANIL SAN	422
PABLO PARA IN TANELTOCANI TEN CALYETOCQUE CAMPA PUEBLO	
CORINTO	
ICA OME TAJCUILOLAMATZIN TEN QUIJCUILOJ IN TATTANIL SAN PABLO	460
PARA IN TANELTOCANI TEN CALYETOCQUE CAMPA PUEBLO	
CORINTO	
IN TAJCUILOLAMATZIN TEN QUITAJCUILOHUILIJ IN TATTANIL SAN	484
PABLO PARA IN TANELTOCANI DE CRISTO TEN CALYETOCQUE	
CAMPA PUEBLO GÁLATAS	
IN TAJCUILOLAMATZIN TEN QUITAJCUILOHUILIJ IN TATTANIL SAN	497
PABLO PARA IN TANELTOCANI DE CRISTO TEN CALYETOCQUE	
CAMPA PUEBLO DE EFESO	
IN TAJCUILOLAMATZIN TEN QUITAJCUILOHUILIJ IN TATTANIL SAN	511
PABLO PARA IN TANELTOCANI DE CRISTO TEN CALYETOCQUE	
CAMPA PUEBLO DE FILIPOS	
IN TAJCUILOLAMATZIN TEN QUITAJCUILOHUILIJ IN TATTANIL SAN	520
PABLO PARA IN TANELTOCANI DE CRISTO TEN CALYETOCQUE	
CAMPA PUEBLO DE COLOSAS	
IN TAYECANA TAJCUILOLAMATZIN TEN QUITAJCUILOHUILIJ IN	529
TATTANIL SAN PABLO PARA IN TANELTOCANI TEN CALYETOCQUE	
TECH PUEBLO DE TESALONICA	
ICA OME TAJCUILOLAMATZIN TEN QUITAJCUILOHUILIJ IN TATTANIL	536
SAN PABLO PARA IN TANELTOCANI TEN CALYETOCQUE TECH	
PUEBLO DE TESALONICA	
IN TAYECANA TAJCUILOLAMATZIN TEN QUIJCUILOHUILIJ IN TATTANIL	540
SAN PABLO PARA IN TAPIXQUE TIMOTEO	
ICA OME TAJCUILOLAMATZIN TEN QUIJCUILOHUILIJ IN TATTANIL SAN	551
PABLO PARA IN TAPIXQUE TIMOTEO	
IN TAJCUILOLAMATZIN TEN QUIJCUILOHUILIJ IN TATTANIL SAN PABLO	558
PARA IN TAPIXQUE TITO	
IN TAJCUILOLAMATZIN TEN QUIJCUILOHUILIJ IN TATTANIL SAN PABLO	563
PARA IN TANELTOCQUE FILEMON	

IN TAJCUILOLAMATZIN DE DIOS TEN QUINILIAJ HEBREOS PARA IN TOCNIHUAN JUDÍOS TEN TANELTOCANI DE CRISTO	565
IN TACUILOLAMATZIN DEN QUIJCUILOJ IN TATITANIL SANTIAGO PARA IN TANELTOCANI DE NOCHI SENMANAHUAC	594
IN ACHTO TAJCUILOLAMATZIN TEN QUIJCUILOJ IN TATITANIL SAN PEDRO PARA IN TANELTOCANI DE NOCHI SENMANAHUAC	603
ICA OME TAJCUILOLAMATZIN TEN QUIJCUILOJ IN TATITANIL SAN PEDRO PARA IN TANELTOCANI DE NOCHI SENMANAHUAC	613
IN ACHTO TAJCUILOLAMATZIN TEN QUINIJCUILOHUILIJ IN TATITANIL SAN JUAN PARA IN TANELTOCANI DE NOCHI SENMANAHUAC	619
ICA OME TAJCUILOLAMATZIN TEN QUINIJCUILOHUILIJ IN TATITANIL SAN JUAN PARA NOCHI IN TANELTOCANI DE NOCHI SENMANAHUAC	627
ICA EXPATICA TAJCUILOLAMATZIN TEN QUINIJCUILOHUILIJ IN TATITANIL SAN JUAN PARA IN TANELTOCANI DE NOCHI SENMANAHUAC	629
IN TAJCUILOLAMATZIN TEN QUINIJCUILOHUILIJ IN TATITANIL SAN JUDAS PARA IN TANELTOCANI DE NOCHI SENMANAHUAC	631
IN TAJCUILOLAMATZIN TEN TOTAJTZIN DIOS QUIMONEXTILIJ IN ITATITANIL, YEJUA IN SAN JUAN	634



## **In cuali tajtoltzin de Dios**

### **New Testament in Nahuatl, Highland Puebla (MX:azz:Nahuatl, Highland Puebla)**

Language: Nahuatl, Highland Puebla  
Provided by: Wycliffe Bible Translators, Inc.

This print-on-demand edition of Scripture is produced and provided at cost by the Digital Bible Society in partnership with the Bible League of Canada, Open Doors International, and other missions and translation agencies. To order additional copies of this or other Bibles, please visit [www.dbs.org](http://www.dbs.org) (USA), [www.bibleleague.ca](http://www.bibleleague.ca) (Canada), and [www.opendoors.org](http://www.opendoors.org) (Europe).

#### **Copyright and Permission to Copy**

Copyright © 1975 Wycliffe Bible Translators, Inc.  
Copyright © 1975 Wycliffe Bible Translators, Inc. Scripture text used by permission.

PDF, ePub, and MOBI Bible covers and design are copyrighted 2017 by the Digital Bible Society ([www.dbs.org](http://www.dbs.org)).

---

PDF generated on 2017-08-24 from source files dated 2017-08-24.  
1e5296a7-b6f0-51d3-a34f-a9cea569cec2  
ISBN: 978-1-5313-0069-2

## ITATITANIL DE CRISTO, YEJUA IN SAN MATEO, QUIJCUILOJ NIJÍN YANCUIC TAJTOLTZIN DE DIOS TEN CUALCUI NE NEMAQUIXTILIS

### Nican in Mateo techtapohuij de ne achto huejcautetatme de Jesucristo Temaquixtijque

(Lc. 3.23-38)

**1** Nican pehua in tajcuilolamat ten cuica tocamye de neque huejcautetatme de Jesucristo; nochin yejuan panocque ya. Huan Jesucristo catca teconeu de rey David, huan no teconeu den Abraham. <sup>2</sup>Huan in tetat Abraham quiscaltij in Isaac; huan niman Isaac catca no tetat de Jacob; huan niman in Jacob catca no tetat de Judá huan iicnihuan. <sup>3</sup>Huan in tetat Judá ihuan in tenan Tamar quiscaltijque in Fares huan Zara; huan niman in Fares catca no tetat de Esrom; huan niman in Esrom catca no tetat de Aram. <sup>4</sup>Huan in tetat Aram quiscaltij in Aminadab; huan niman in Aminadab catca no tetat de Naasón; huan niman Naasón catca no tetat de Salmón.

<sup>5</sup>Huan in tetat Salmón ihuan in tenan Rahab quiscaltijque in Booz; huan niman in tetat Booz ihuan in tenan Rut quiscaltijque in Obed; huan niman in Obed catca no tetat de Isaí. <sup>6</sup>Huan in tetat Isaí quiscaltij in tetat rey David; huan in rey David ihuan isihuau de Urías quiscaltijque in Salomón. <sup>7</sup>Huan in tetat Salomón quiscaltij Roboam; huan niman in Roboam catca no tetat de Abías; huan niman in Abías catca no tetat de Asa. <sup>8</sup>Huan in tetat Asa quiscaltij in Josafat; huan niman in Josafat catca no tetat de Joram; huan niman in Joram catca no tetat de Uzías. <sup>9</sup>Huan in tetat Uzías quiscaltij in Jotam; huan niman in Jotam catca no tetat de Acaz; huan niman in Acaz catca no tetat de Ezequías.

<sup>10</sup>Huan in tetat Ezequías quiscaltij in Manasés; huan niman in Manasés catca no tetat de Amón; huan niman in Amón catca no tetat de Josías. <sup>11</sup>Huan in tetat Josías quiscaltij in Jeconías huan iicnihuan tech in tonalme cuac quinuiyacque queme presos nochi in pueblojuani de Israel hasta in país de Babilonia. <sup>12</sup>Nimampa de que quinuiyacque in pueblojuani de Israel hasta Babilonia, ijcuación in tetat Jeconías quiscaltij in Salatiel; huan niman in Salatiel catca no tetat de Zorobabel. <sup>13</sup>Huan in tetat Zorobabel quiscaltij in Abiud; huan niman in Abiud no catca tetat de Eliaquim; huan niman in Eliaquim catca no tetat de Azor. <sup>14</sup>Huan in tetat Azor quiscaltij in Sadoc; huan niman in Sadoc no catca tetat de Aquim, huan niman in Aquim no catca tetat de Eliud. <sup>15</sup>Huan in tetat Eliud quiscaltij in Eleazar; huan niman in Eleazar no catca tetat de Matán, huan niman in Matán catca no tetat de Jacob.

<sup>16</sup>Huan in tetat Jacob quiscaltij in José naquen iyoquich María. Huan María catca inantzín de Jesús, huan yejuan quitocaytijque in ioquichpilconetzín Cristo Temaquixtijque. <sup>17</sup>Huan desde ne tonalme cuac nemico in Abraham ijcuación peuque motetecpantihualajque ne majtactionnahui tetatme hasta ejcoc in tonalme cuac nemico in rey David. Huan no desde ne tonalme cuac nemico in rey David, ijcuación peuque motetecpantihualajque ocsé majtactionnahui tetatme hasta ejcoc in tonalme cuac quinuiyacque in pueblojuani de Israel queme presos hasta in país de Babilonia. Huan no desde ne tonalme cuac quinuiyacque in pueblojuani de Israel queme presos ijcuación peuque motetecpantihualajque ocsé majtactionnahui tetatme hasta ejcoc in tonalme queman yolico in oquichpilconetzín Cristo Jesús.

## Nican tajtoa de queniu yolico in oquichpil Jesús

(Lc. 2.1-7)

<sup>18</sup> Ijcón yolico in oquichpil Jesucristo: María catca inantzín de Jesucristo. Yetoya ya tajtol ya de que mosennamictisque in María ihuan in José. Huan ijcuacán ayamo sen yetoyaj. Huan mochihuac que in María cocoxcayetoya ya ica pili porín ica ne chichualis de Yecticatzin Espíritu. <sup>19</sup> Huan in José catca iyoquich in María huan catca yolmelaucatagat huan amo quinequía quipinautisquía in María senteixteno. Huan in José quinemiliaya mosecocahuas de María huan amo quinequía ma quimat-ican nión ocsé pueblojuani. <sup>20</sup> Huan ijcón yejua quinemiliaya quisecocahuas in María. Huan cuac tacochitztoya in José, ijcuacán monextilijtzinoco se ángel taquehual de Dios huan quilij ijcuín:

—José titeconeu de rey David, amo ximomouti de ticselis in María queme mosihuatzin, porín in Yecticatzin Espíritu quiscaltij ya in pili ten María quipixtoc ya. <sup>21</sup> Huan niman in María quiyolitís se iconetzin huan quitocaytis Jesús Temaquixtijque, porín Yejuatzin ne quinmaquixtis nochi in pueblojuani den senmanahuac de nintajtacoluan.

<sup>22</sup> Huan nochi nijín mochihuac para ma ijcón motamichihua in tajtol ten Totecotzin quijtojca ica por ne tanahuatijque Isaías cuac quijcuiloj ijcuín:

<sup>23</sup> Xiquitacan, se suapil ten ayamo quipía se tagat, yejua ne mopilcuis huan quiyolitís se oquichpil huan quitocaytis Emanuel, ten quijtosnequi “Totajtzin Dios tohuan yetica”.

<sup>24</sup> Huan cuac in José ixpetanic den nicochilis, ijcuacán quichihuac ijcón queme quinajnahuatico in ángel taquehual de Dios. Huan José quiselij in María queme nisihuatzin. <sup>25</sup> Pero ayamo sen yetoyaj queme namicuani hasta in tonal cuac in María quiyolitij in tayecancaoquichpil. Huan yejuan quitocaytijque in oquichpil Jesús.

## Nican tajtoa de queniu ne tamatinime magos quicalpanotoj in oquichpilconet Jesús

**2** Huan Jesús yolico tech in pueblo den monotza Belén ten de ititalanal in Judea tech in tonalme cuac Herodes catca tayecanque rey itech nojón país. Ijcuacán ejcotihualayaj tech ne pueblo de Jerusalén sequi taca semi tamatinime den hualayaj iquisayampa in tonal; huan nijinques tamatinime catcaj in magos. <sup>2</sup> Huan in magos matajtantihualajque ijcuín:

—¿Can yetoc in tayecanque den judíos ten yequin yolico? Tejuan tiquitacque nepa iquisayampa in tonaltzin se hueyi sitalin de Yejuatzin ten techualnextiliaya campa yetoc in oquichpil Jesús. Huan tejuan tihualajque nican para ticmoहुistilisque Yejuatzin.

<sup>3</sup> Huan cuac in rey Herodes quicayic nijín tajtolme, ijcuacán pehuac moyolcuejmoloa. Huan hasta nochi in tagayot den Jerusalén no moyolcuejmolojque. <sup>4</sup> Ijcuacán in tayecanque Herodes tanahuatij ma mosentilican nochi in tayecanani tiopixcame huan in tanextiliani den tanahuatil de Moisés. Huan de ompa in Herodes quintajtanilij ijcuín:

—¿Xe ipa nanquimatocque ya can yolis in oquichpil ten monotza Cristo Temaquixtijque?

<sup>5</sup> Huan yejuan quinanquilijque ijcuín:

—Tech ne pueblo de Belén ten itatilanal Judea, ompa yolis. Porín in tanahuatijque de Dios quijcuilojca ya ijcuín:

<sup>6</sup>Huan tejua pueblo de Belén, tipohui campa in Judá, tejua amo titziquitzin. Ta, tihueyichiuque ya itech in tayecanani de ne pueblo de Judá.

Porín motzalan ehua se tayecanque naquen quinyecanas nochi nopueblojcahuan de Israel.

<sup>7</sup>Ijcuacán Herodes quinichtacanotzac in tamatinime in magos huan quinyectaj-toltiaya catijyejua tonal monextij ne hueyi sitalin. <sup>8</sup>Huan de ompa in rey Herodes quintitanic in magos hasta ne pueblo de Belén. Huan quinilij ijcuín:

—Xiyacan ompa xicyectemocan xicyecmatican toni chicahualis cualcui ne oquichpil ten yequin yolico. Huan cuac nancajsisque ya ne oquichpil, ijcuacán nechnej-machtican para ma nejua no niyás huan para nicmohuistilitiu.

<sup>9</sup>Huan cuac ijcón quicaquilijque in rey, ijcuacán yajque in tamatinime in magos. Huan in sitalin ten quitacque de ne iquisayampa tonal ijcón quinyecanaya in magos huan quinajxitij huan quinnextilij campa huetztoya in oquichpil Jesús.

<sup>10</sup>Huan cuac in tamatinime in magos ejcotihualayaj ya, huan cuac quitacque ya in sitalin, ijcuacán semi moyolpacticque. <sup>11</sup>Huan cuac calactiyaj ya calijcticpa, ijcuacán quitacque in oquichpil ihuan inantzin María. Huan motancuaquetzatoj huan motentocatoj iixpantzinco para quimohuistiliayaj in oquichpilconet. Huan de ompa niman quitapojque in cajones tenica cualcuáfaj ninricojojo. Huan quitayocolijque yejua nijín taman; in oro ten cajcahuanía, huan in copal, huan sequi ajuiyacachoquilot ten monotza mirra. <sup>12</sup>Huan niman Totajtzin Dios quinnejmachtij huan quinmatiltij in tamatinime in magos itech nincochilis ma amo monequía ma panocan campa yetoya in rey Herodes. Ijcuacán in magos quitachicopahuijque in pueblo de Jerusalén huan ijcón yajque itech ninpueblo.

### **Nican tajtoa de queniu mocholotij José ihuan María huan Jesús hasta país de Egipto**

<sup>13</sup>Huan satepan cuac yajque ya in tamatinime magos, ijcuacán se ángel taquehual de Dios quionmonextilij cuac tacochitztoya in José huan quilij ijcuín:

—Ximoquetza, José, huan xicui mooquichpilconeuhuan ninantzin huan xiyacan xicholocan huan xiyetotiu tech ne país de Egipto. Huan ompa xiyetotiu hasta cuac nejua ocsepa namechnejmachtis que ximocuepacan, porín in rey Herodes quiyolnemilijtoc que quitemos in moconeuhuan para quimictis.

<sup>14</sup>Huan in José ixpetanic huan moquetzac huan quincuic iconetzin ihuan ninantzin huan yajque cayohual huan ajsicque tech ne pueblo Egipto. <sup>15</sup>Huan ompa yetoyaj hasta in tonal cuac miyic in rey Herodes. Huan ijcón mochihuac ten quijtojca ya Totajtzin Dios itencopa itanahuatijcau cuac ne quemán ya quijcuilojca ya ijcuín: “Tech ne país Egipto nicnotzac noconetzin”.

### **Nican tajtoa de queniu rey Herodes tanajnahuatía ma quinmictican in coneme**

<sup>16</sup>Huan cuac in rey Herodes momacac cuenta que in tamatinime magos quicajcayauque ya, ijcuacán yejua mohueyicualantij huan quintitanic soldados ma quinmictican nochi in telpocame de ome xihuit para tani ten calyetoyaj tech ne pueblo Belén huan no tech ne pueblos ten quiyehualojtoyaj Belén. Porín in rey Herodes quimatic que ayamo panoaya ome xihuit desde cuac quilijcaj in tamatinime in ma-

gos que yolic ya in Jesucristo. <sup>17</sup> Ijcuacón mochihuac ten quijtojca Dios itencopa itanahuatijcau Jeremiás cuac quijcuilojca ijcuín:

<sup>18</sup> Mocayic se tajtolis tech ne pueblo Ramá, ten mocaquía huan chocayaj huan yol-nejsihuáj huan moyolcocotinemíaj.

Yejua ne in tenan Raquel ten chocaya porín momiquilijque ya niconehuan. Huan amo quinequía que acsá quiyoltalisquía porín poliuque ya niconehuan.

<sup>19</sup> Huan niman miyic ya in rey Herodes; huan de ompa se ángel taquehual de Dios quimonextilij ocsepa tech icochilis José, cuac in José ompa yetoya tech pueblo de Egipto, huan quilij ijcuín:

<sup>20</sup> —Ximoquetza, xiquincui moconetzin ihuan ninantzin huan ximoquepacan tech ne pueblo Israel porín micque ya nochi ten quinequíaj quimictisque mocone Jesús.

<sup>21</sup> Ijcuacón moquetzac José huan cuiyac iconeu Jesús ihuan inantzin huan yajque ajsicque tech in pueblo Israel. <sup>22</sup> Huan in José quimatic que in tayecanque Arquelao yetoya rey tech ne tal ten pohuía Judea huan yejua tayecantoya iixpatca nitat Herodes. Huan ica ya nojón José momoutiaya huan amo quinequía calyetos ompa tech in pueblo de Judea campa yetoya ne tayecanque Arquelao. Huan Dios quinej-machtij in José ocsepa itech nicochilis ma yohui ma ompa calyetoti tech ne tal ten pohuía Galilea. <sup>23</sup> Huan cuac José ajsito ya tech ne tal de Galilea, ijcuacón ompa calyetoto ya ne pueblo monotza Nazaret. Huan ijcón mochihuac ten quijtojcaj ya itanahuatijcau de Dios cuac quijcuilojque de Jesús in Temaquixtijque ijcuín: “Yejua ne yesqui se pueblojcat de Nazaret”.

### **Nican tajtoa de queniu Juan in Taahuijque quipehualtij ne nitanojnotzalis ne campa tayiucan**

*(Mr. 1.1-8; Lc. 3.1-9, 15-17; Jn. 1.19-28)*

**3** Huan tech ne tonalme in Juan Taahuijque ajsic tech in Judea tech se tamanisyo campa tayiucan huan quitetapohuijtihualaya in yancuic Tajtoltzin de Dios ten cualcui ne nemaquixtilis. <sup>2</sup> Huan Juan quiniliaya in tacaquini ijcuín:

—Ximoyolnemilican de namotajtacoluan porín motoquijtoc ya Dios den eluiyactz-inco huan quimonequiltis quinyolyecanas huan momasoutos ica ihueyichicahualis nochi itaneltocacahuan.

<sup>3</sup> Isaías yejua itanahuatijcau de Dios quijcuilojca de nijín Juan Taahuijque cuac quijtojca ya ijcuín:

Mocaquiti se tagat ten tanajnahuatía campa tayiucan huan quijtoj ijcuín:

“Xitayectalijtiyacan ninemilispan den Totecotzin.

Huan xicmejmelauiyacan niojuan campa hual panotihualas”.

<sup>4</sup> Huan ne Juan motaquentiaya ica camellojtojmít den taijquítel, huan tajcuilpi-toya ica se cuetax huan quicuaya chapolinme huan cuoutajnecti. <sup>5</sup> Huan hualayaj miacque pueblojuani quicaquiquij in Tajtoltzin de Dios den Juan quintetapohuiaya. Huan no hualajque nochi pueblojuani ten pohuáj ne Jerusalén huan ten pohuáj ne Judea, huan nochi ten calyetoyaj campa panoaya in hueyíat Jordán. <sup>6</sup> Huan ijcón in Juan quinahuía in tacaquini ica at tech in hueyíat den monotza Jordán como yejuan moyolnemiliayaj den nintajtacoluan.

<sup>7</sup> Huan ijcón in Juan quitac que hualajque miacque fariseos ihuan in saduceos huan yejuan quinequíaj ma quinahui yejua. Ijcuacón in Juan quinilij ijcuín:



—¡Namejuan nantacajcayahuani san queme in cohume! ¿Aconi namechnej-machtij ya que monequi nanmochololtisque de ne hueyi tatzacuutilis ten hualajtoc ya? <sup>8</sup>Xichipaucanemican para ijcón ixnesis senteixteno que nanmoyolnemilijque ya de namotajtacol huan nanyolchipauque ya iixpantzinco Dios. <sup>9</sup>Huan ma amo ximoyolueyichihuacan san namejuan cuac nanquinemilíaj que namejuan nanteixuihuan den ne hueyi tanahuatijque de Dios Abraham. Porín xicmatican que amo teyica namechpalehuis ica nojón tajtólme. Porín namechyequilía que Dios cuali hueli quinchihuas ica nijín teme ocsequin teixuihuan de Abraham ten tacuautamatinemij ihuantzinco Dios.

<sup>10</sup>Huan no in Juan quinilij in tacaquini ijcuín:

—Huan axcan ya como amo nanmoyolnemilíaj de namotajtacoluan, ijcuacán namejuan nanyesque queme cuome ten amo teyi taquij. Huan nochi cuome ten amo cuicaj taquilot ten cuali, ijcón in tequitini quinnaluayojtequisque ica hacha, huan quitamotasque tech tit ma chichinahui. <sup>11</sup>Huan nejuatzin de yec melau, namechahui ica at queme se nexcuutil que nanmoyolnemilijque ya den namotajtacol huan nanyolchipauque ya. Huan naquen nechualtojtoca, Yejuatzin ne namechquemilos huan namechylpepexocaltis ica in Yecticatzin Espíritu huan namechylchipahuas de namotajtacoluan ijcón queme in tit quichipahua tensá. Huan Yejuatzin cachi quipía hueyi chichualis, huan nejua niamoteyi nichiuque, huan amo nechnamiquis ma nicuica nitegac. <sup>12</sup>Huan ne Temaquixtijque quichihuati ijcón queme tejuan ticchihuaj cuac ticchipahuaj in trigojtet ica ne tapipitzaloni. Huan ticololoaj in trigojtet huan tiquehuaj campa trigojcal huan in tajsol ticchichinoaj. Huan tejuan como titacuautamatij ihuan ne Temaquixtijque, ijcuacán Yejuatzin techsepantalía ihuantzin seco san. Huan neques ten amo tacuautamatij ihuantzin, yejuan nojonques quintamotasque campa tatzacuutilis de tit de amo queman sehuis.

### **Nican tajtoa de queniu Jesús Temaquixtijque moteahuiltij**

*(Mr. 1.9-11; Lc. 3.21-22)*

<sup>13</sup>Ijcuacán Jesús hualehuac de ne Galileajcopaca huan ejcoco campa Juan in Taahuijque tech ne atenteno den hueyíat Jordán. Huan Jesús quinequía ma in Juan ma quiahuini in Jesús mismo. <sup>14</sup>Huan cuac pehuac quilía, ijcuacán Juan amo quinequía quiahuis in Jesús. Ica ya nojón in Juan quilij ijcuín:

—¿Queyé Tejuatzin tihuala para ma nimitzonahuis? Ta, monequía ma Tejuatzin xinechahui.

<sup>15</sup>Ijcuacán in Jesús tananquilij ijcuín:

—Xicsecocahua ten tejuata ticnemilía porín semi quinamiqui ma ticchihuacan Dios itahuelitalis nochi queme Dios quimonequiltía.

Huan de ompa in Juan motemactij de que quiahuis in Jesús. <sup>16</sup>Huan cuac quiahuij ya Jesús, ijcuacán nimantzin Yejuatzin ajcopanquisac den hueyíat. Huan ijcón tatapohuic tech eluiyac huan Jesús quitac in Yecticatzin Espíritu de Totajtzin Dios ten hual temoaya queme se tototzin paloma huan calayic itech Jesús. <sup>17</sup>Huan no ijcón no mocaquic se tajtolis den eluiyactzinco ten Yejuatzin quijtoaya ijcuín:

—Yejuatzin nijín Notasoconetzin tenica semi nimoyolpaquiltía.

**Nican tajtoa de queniu in amocuali Satanás quichihuac ma  
motajtacolmacani Jesús Temaquixtijque**

*(Mr. 1.12-13; Lc. 4.1-13)*

**4** Huan de ompa in Yecticatzin Espíritu quiyecanac Jesús ne campá tayiucan huan ompa in amocuali Satanás quielehuisuij ica tajtacol in Jesús para ma motajtacolmacani. <sup>2</sup> Huan in Jesús mosahuaya nochi ne omepoal tonal huan omepoal yohual huan niman Yejuatzin quimachilij que mayanaya. <sup>3</sup> Huan in amocuali Satanás motoquij campá Yejuatzin para quielehuisuij Jesús ica tajtacol ma motajtacolmacani; huan in Satanás quilij ijcuín:

—Como melau Tejuatzin tion Teconetzin de Dios, xicnahuati nijín teme ma mocuepacan panes.

<sup>4</sup> Ijcuacón in Jesús tanaquilij ijcuín:

—Quijtoa in Tajcuilolamatzin de Dios ijcuín: “In taca ma nemican amo sayó ica in tacualis san. Ta, no ma yolpepexocatinemican ica nochi in tajtolme ten Dios techmactilijtinemi”.

<sup>5</sup> Ijcuacón in amocuali Satanás cuiyac Jesús tech ne mohuistic pueblo de Jerusalén. Huan quitejcoltij itech se tepeyo den tepepan. <sup>6</sup> Huan in amocuali Satanás quilij Jesús ijcuín:

—Como melau Tejuatzin tion Teconetzin de Dios, ximosencahua xihuetziti de nican hasta talixco. Porín no quijtoa in Tajcuilolamatzin de Dios ijcuín:

Dios quinaltitanis in ángeles taquehualme de Dios ma mitzyecpalehuican.

Huan no quijtoa in Tajcuilolamatzin ijcuín:

Ma mitzmatzacuilican in ángeles ica ninmahuan para ma amo ximometzcojoco ica in teme.

<sup>7</sup> Huan Jesús tanaquilij ijcuín:

—No quijtoa in Tajcuilolamatzin de Dios ijcuín: “Amo xictelpanoltis in tapalehuilis in Totecotzin Dios moyectencahuac de techmactilis”.

<sup>8</sup> Huan ocsepa in amocuali Satanás cuiyac Jesús tech se hueyi tepepan, huan ompa ocsepa in amocuali quinextilij Jesús nochi in pueblojme campá tayecanaj hueyi chihuanime de nican talticpac. Huan no quinextilij nochi ninueyipanchihualisme huan ninricojyo. <sup>9</sup> Huan in amocuali Satanás quilij Jesús ijcuín:

—Tacán timotancuaquetzas huan timotentocas noixpan huan tacán tinechmohuistilis, ijcuacón nochi nijín ten tiquitztoc nimitzmactilis tejuatzin.

<sup>10</sup> Ijcuacón in Jesús tananquilij ijcuín:

—Niman xiyó ya, tejua tiamocuali Satanás, porín quijtoa in Tajcuiloloamatzin de Dios ijcuín: “Ma xicmohuistiliti in Totecotzin to Dios huan sayó Yejuatzin xicmohuiscatequitolijtinemi”.

<sup>11</sup> Ijcuacón in amocuali Satanás majchihuac; huan de ompa hualajque in ángeles taquehualme de Dios huan quipalehuicoj in Jesús.

**Nican tajtoa de queniu Jesús Temaquixtijque quitzinpehualtij nitequiu**

*(Mr. 1.14-15; Lc. 4.14-15)*

<sup>12</sup> Huan cuac in Jesús quicayic ya que in Juan Taahuijque tzactoya ya tech in carcel, ijcuacón yajqui Jesús Galileajcopaca. <sup>13</sup> Pero Jesús amo mocahuac tech ipueblo Nazaret. Ta, yajqui mocaltalito tech in pueblo Capernaum campá in mar de Galilea

nochi itatilanal de Zabulón huan Neftalí. <sup>14</sup> Huan ijcón mochihuac ten quijtojca ya itanahuatijcau de Dios Isaías cuac quijcuilojca in Tajcuilolamatzin de Dios ijcuín:

<sup>15</sup> Oncas tanex para in pueblojuani ten pohuij ihuan Zabulón huan Neftalí.

Huan oncas tanexilot para in pueblojuani campa yohui ojme marcopa huan campa sentapalpa de ne iquisayampa in tonal den hueyíat Jordán.

Huan no oncas tanex para in calyetoní de Galileajcopaca ten amo pohuáj judíos.

<sup>16</sup> Huan nochi in pueblojuani ten calyetoyaj tech in tayohuayanilot den tajtacol, yejuan quitacque ya se hueyi tanex.

Huan se cualtzin tanexilot quintauij ya nochi pueblojuani ten calyetoyaj campa quinmajpachojtoya in yecahuil de miquilis.

<sup>17</sup> Huan de ompa pehuac Jesús quinnexiliaya huan quiniliaya in tacaquini ijcuín: —Ximoyolnemilican de namotajtacoluan porín motoquijtoc Dios den eluiyactzinco para ma quinyolyecanas itaneltocacahuan ica nihueyichicahualis.

**Nican tajtoa de queniu Jesús quinnotzac nahuin tamaajsini de pescados ma quitoctilican huan ma quitacamatican Jesús**

*(Mr. 1.16-20; Lc. 5.1-11)*

<sup>18</sup> Nejnentiaya ya Jesús martenojcopaca de Galilea huan quinitac ome icnime, in Simón ica cojpatocaytijque in Pedro, huan in ocsé icniu Andrés. Huan yejuan catcaj pescadojquitzquiiani huan quitamotayaj ninmatau tech in mar de Galilea. <sup>19</sup> Huan Jesús quinilij ijcuín:

—Xihuiqui nohuan, xinechtoctilican. Huan ijcón queme nantaquitzquiiani ica pescados, no ijcón Nejuatzin namechchihuas que nanquintemosque tagayot para ma nechtoctilican nejua.

<sup>20</sup> Ijcuación nimantzin in Simón huan in Andrés quicauque ninmatau huan quitoc-tilijque Jesús. <sup>21</sup> Huan queman panoc ya de ompa huel nepacatzin, ijcuación Jesús no quinitac in Jacobo huan iicniu Juan, teconehuan de Zebedeo. Huan ne icnime yetoyaj ihuan nintat tech se barco, huan ompa quitajtasaluijtoyaj ninmatau. Huan in Jesús quinnotzac ne teconehuan ma quitoctilican para quitacamatiyasque. <sup>22</sup> Huan nimantzin Jacobo huan in Juan quicauque nintetat tech in barco huan quitoctilijque Jesús.

**Nican tajtoa de queniu Jesús Temaquixtijque quinmactiaya in tacaquini**

*(Lc. 6.17-19)*

<sup>23</sup> Huan Jesús nentiaya nochi Galileajcopaca huan quinnexiliayaj in tacaquini ica in Tajtoltzin de Dios tech ne tiopanme de judíos. Huan campa hueli ajσία Jesús quinmactiaya den yancuic Tajtoltzin de que Dios motoquijtoc para ma quinyolyecanas itaneltocacahuan ica nihueyichicahualis. Huan Jesús quinpajtijtiaya ya nochi cocoyani de míac tataman den quincocoaya in tagayot.

<sup>24</sup> Huan ijcón momoyahuac ne chicahualis de Jesús nohuiyampa tech in pueblojme ten itatilanal Siria. Huan quihualcuiliayaj campa Yejuatzin nochi cocoyani ten mococoayaj ica míac tataman cocolisme, nochi cocoyani ten tajyohuiyaj ya ica míac tataman hueyi tetzaucacocolis huan yoltequipacholis. Huan no quihualcuiliayaj campa Yejuatzin nochi cocoyani den quipáj ya ninyolijtic amocuali ejecame huan den joyjolpolihuáj huan den motojtocotzoayaj. Huan Jesús quinpajtij nochi nijín cocoyani. <sup>25</sup> Huan ijcón quitoctiliayaj Jesús míac tagayot den pohuáj Galilea

huan den pohuíaj Decápolis, inuan no ten pohuíaj de Jerusalén huan ten pohuíaj sentapalpa den hueyíat Jordán.

**Nican tajtoa den tanojnotzalis de ne tepepan**

**5** Huan cuac Jesús quinitac que yetoyaj miacque tagayot, ijcuacón tejcoto tech ne talcuatipan huan ompa motalij. Huan imomachtijcahuan motoquijque ihuantzin huan quiyehualojtoyaj Jesús.

**Jesús Temaquixtjique quinmachtij imomachtijcahuan de ne taca ten tatiochihualme ya de Dios**

*(Lc. 6.20-23)*

<sup>2</sup>Huan ijcón in Jesús pehuac quinnextiliaya imomachtijcahuan ijcuín:

<sup>3</sup>—Tatiochihualme de Dios ne taneltocani ten cajsicamatij que ninyolojuan iuque, ten amo quipíaj ne yolchiphualis ten Dios quimonequiltía. Porín como ijcón quichihuaaj, ijcuacón yejuan pohuitihue campa Dios quinyolyecanas ica ihueyichicahualis.

<sup>4</sup>Tatiochihualme de Dios ne taneltocani ten moyolcocoaj porín cajsicamatij que tajtaclejque. Porín como ijcón quichihuaaj, ijcuacón yejuan Dios quinyoltalis. <sup>5</sup>Tatiochihualme de Dios ne taneltocani ten icnome tech ninyolojuan. Porín como ijcón quichihuaaj, ijcuacón Dios quintayocolis se yancuic talticpac nemilis.

<sup>6</sup>Tatiochihualme de Dios ne taneltocani ten quimachilíaj que yolmayanaj huan yolamiquij porín quiyolnejnequij chipaucanemisque. Porín como ijcón quichihuaaj, ijcuacón yejuan Dios quinyecyolpexontis ica ne chipaucanemilis.

<sup>7</sup>Tatiochihualme de Dios ne taneltocani ten teyolicnelíaj. Porín como ijcón quichihuaaj, ijcuacón yejuan Dios no quinyolicnelis. <sup>8</sup>Tatiochihualme de Dios ne taneltocani ten yolchipauque. Porín como ijcón quichihuaaj, ijcuacón yejuan yec melan quixitatihue in Totajtzin Dios.

<sup>9</sup>Tatiochihualme de Dios ne taneltocani ten quinyolyecmelahuaj ne motehuiani. Porín como ijcón quichihuaaj, ijcuacón yejuan Dios quinpuhuas iconahuan. <sup>10</sup>Tatiochihualme de Dios ne taneltocani ten tajyohuíaj porín acsame quinquejqueloaj de ninchipaucanemilis. Porín como ijcón quichihuaaj, ijcuacón Dios quinyolyecana ipan yejuan ica ihueyichicahualis.

<sup>11</sup>Nantatiochihualme namejuan cuac namechuijuicaltisque huan cuac namechtajyohuiltisque huan cuac namechijtohuilisque míac xolopijyot porín nantacautamatij itech Nejuatzin notocay. <sup>12</sup>Ijcuacón ximoyolpactican huan ximohuelitacan porín se tonal nanquiselisque se hueyi ne tetayocolil nepa eluiyactzinco. Huan ijcón queme namechtahuelitaj axcan, no ijcón quintahuelitatihualajque nitanahuatijcahuan de Dios ten nemicoj ne achtopa ya que namejuan.

**Nican tajtoa de queniu Jesús Temaquixtjique quinmachtij in tacaquini de ne istat huan de ne tanex den talticpac**

*(Mr. 9.50; Lc. 14.34-35)*

<sup>13</sup>Huan ocsepa Jesús quinmachtij imomachtijcahuan ijcuín:

—Huan namejuan nanyesque queme istat nican talticpac; nantapoyeliani den talticpacuani ica namochipaucanemilis para ma amo ongac sayó in chichicayot de tajtacol. Huan tacán in istat quipoloa nichicahualis, ¿ijcuacón quenín huelis ocsepa poyeyas, como amo quipía nipoyecayot? Huan ijcón amo teyi cualtía oc. Ta, sayó cualtía para quitamotasque calan huan quitzojtzonicsasque san.

<sup>14</sup> Huan ocsepa Jesús quinmachtij imomachtijcahuan ijcuín:

—Huan namejuan nanyesque queme in tanxilome para in talticpacuani, porín namejuan nanquinyoltahuilisque ica ne namochipaucanemilis. Namejuan nanyesque queme se pueblo ten yetoc talcuatipan ten amo hueli motatía. <sup>15</sup> Huan cuac se quixotaltía se tanex, ijcuación amo se quipantalilía se cajon. Ta, cachi cuali se quitalía campa tasempayan, huan ijcón nochi quinta huilis ne ten yetoque calijtic. <sup>16</sup> Huan ijcón no namejuan xiquintanextilican nijín talticpacuani ica namochipaucanemilis. Huan cuac yejuan quitasque ya den namocualitachihualisuan, ijcuación yejuan no quimohuistilisque Namohueyitajtzin ten yetica ne eluiyactzinco.

**Nican tajtoa de queniu Jesús Temaquixtijque  
tanextiliaya ica in tanahuatil de Dios**

<sup>17</sup> Huan ocsepa Jesús quinmachtij imomachtijcahuan ijcuín:

—Amo xicnemilican que nejua nihuala para namechxejxeloco ten Moisés namechmachtijca ya, nión no namechxejxelos den namechnextilijque ya in tanahuatiani de Dios. Nejua amo nihuala para nicuejuelos ne tanahuatil de namohuejcatatuan. Ta, sayó nicnequi namechyecajsicamatiltis de nochi ne tanahuatilme. <sup>18</sup> Porín de yec melau ten namechilía que mientras yetoc oc in eluiyac huan in talticpac amo mosecocahuas nión se letra de nochi den tanahuatilme. Ta, ma motamichihua nochi in tamachilis ten cuica in tanahuatilme, ijcón queme Dios quimonequiltía. <sup>19</sup> Ica ya nojón xicmatican, tacán acsá quisecotalía senme de nijín tanajnahuatilis, masqui tzictzin san in tanahuatil, huan tacán quinnextilía in tagayot ma amo quitacamatican, ijcuación yejua ne quipohuasque amo teyi chiuque intzalan neques ten Dios quinyolyecanas ica ihueyichicahualis. Huan tacán acsá quitacamati ne tanahuatil huan no quinmachtía in tagayot ma no quitacamatican, ijcuación yejua ne quipohuasque se hueyi chiuque intzalan neques ten Dios quinyolyecanas ica ihueyichicahualis. <sup>20</sup> Ica ya nojón no namechilía que tacán amo nanquipíaj se nemilis ten cachi chipactzin huan que ne ten cuicaj nojón fariseos huan nojón tanextiliani den tanahuatil de Moisés, ijcuación xicmatican que amo queman huelis nanpohuitihue intzalan neques ten Dios quinyolyecanas ica ihueyichicahualis.

**Nican tajtoa de queniu Jesús Temaquixtijque  
quinyecajsicamatiltij in tacaquini de ne cuálanti**

*(Lc. 12.57-59)*

<sup>21</sup> Huan no Jesús quinmachtij imomachtijcahuan ijcuín:

—Huan namejuan nanquicacque ya que ne namohuejcautatuan namechnajnahuatijque ijcuín: “Amo xitemicti. Huan ijcón naquen temictis, yejua ne quitajyohuiltisque ica ne hueyi tatzacuiltis”. <sup>22</sup> Pero Nejuatzin namechnajnahuatía ijcuín: Nochi naquen mocualantis ihuan se icnitzin, masqui amo temictía, pero no ijcón ne tahuel quitajyohuiltisque ica ne hueyi tatzacuiltis. Huan naquen quijitos se icnitzin huan quilis ijcuín: “Semi tixoxo”, ijcuación yejua ne ten quijtoj ne eijitolis in hueyi tayecanani quitajyohuiltisque ica por ne iteijitolis. Huan naquen quiquejuelos se icnitzin huan quilis ijcuín: “Semi timijmiquilot”, yejua ne ten quijtoj ne teijitolis in tayecanani quitelchihuasque ma tajyohui tech ne tit den mictan. <sup>23</sup> Ica ya nojón cuac ticuicas ne motetayocolil tenica ticnemilía ticmohuistilitiu Totajtzin Dios huan san-tajma tiquelnamiquis que mocniu mitzylcualantía, <sup>24</sup> ijcuación xicahua ompa ten

ticuiyac tenica ticmohuistilisquía Totajtzin Dios. Ta, xiyó achto xiquitati ne mocniu huan xiquiliti ma mitztapojpolui para ijcón nanmoyecahuasque. Huan de ompa cuali timocuepas huan ticmohuistilitiu Totajtzin Dios ica ne motetayocolil.

<sup>25</sup> Huan tacán acsá mitzteluilía huan quinequi mitzuicas iixpan in juez, ijcuacán nimantzin xiyó huan xitajtaniliti tech ne ojti ma mitztapojpolui para ijcón nanmoyecahuasque, huan para ma amo mitztemacti imaco ne juez. Huan tacán amo nanmoyecahuaj tech in ojti, ijcuacán in juez mitztemactis imaco in policía huan mitzcalaquitiu tech ne cárcel. <sup>26</sup> Huan de yec melau ten namechilía que amo huelis tiquisas den ne cárcel, como amo tictemaca nochi ten mitztajtaníaj.

**Nican Jesús Temaquixtijque quinajsicamatiltij in tacaquini de ne ahuilnemilis queme suapapatalis huan de tagapapatalis**

<sup>27</sup> Huan no Jesús quinmachtij imomachtijcahuan ijcuín:

—Huan namejuan nanquicacque ya que ne namohuejcautatuan namechnajnahuatijque ijcuín: “Amo xitasihuapapata”. <sup>28</sup> Pero Nejuatzin namechnajnahuatíaj ijcuín: Tacán se tagat quinixeliztinemi sihuame san, ijcuacán ne tagat moteltajtacolmacac ya itech italnamiquilis ihuan ne sihuame. <sup>29</sup> Huan tacán moixtololo den moyecmacopaca mitztepotamisquía tech in tajtacol, ijcuacán ximoquixtili ne moyequixtololo huan xictamota huejca. Porín cachi cuali sayó xicpola se moixtololo, huan ma amo xicpola nochi motacayo tech ne tit de mictan. <sup>30</sup> Huan no tacán se moyecmay mitztepotamisquía tech in tajtacol, ijcuacán xicotona huan xictamota huejca. Porín cachi cuali sayó ma polihui se moyecmay san, huan ma amo xicpola nochi motacayo tech ne tit de mictan.

**Nican Jesús Temaquixtijque quinajsicamatiltij in tacaquini de ne cacahualis den namicuani**

*(Mt. 19.9; Mr. 10.11-12; Lc. 16.18)*

<sup>31</sup> Huan no Jesús quinmachtij imomachtijcahuan ijcuín:

—Huan namejuan nanquicacque ya que ne namohuejcautatuan namechnajnahuatijque ijcuín: “Nochi naquen quinequi quiseccocahuas se isihuau, ma quimacti se amat campa ixnesi que mosesecocauque ya”. <sup>32</sup> Pero Nejuatzin namechnajnahuatía ijcuín: Tacán se tagat mocacahuaj ihuan nisihuatzin huan nisihuau amo ahuilnenque, ijcuacán ne tagat quichihua que nisihuau yesquía se sihuaahuilnenque. Huan naquen ihuan monamictis ne sihuat ten namique catca, ijcuacán ne ocsé tagat motajtacolmacas ya porín ne sihuat pohui oc ihuan ne achtopa yoquich.

**Nican Jesús Temaquixtijque quinajsicamatiltij in tacaquini de ne tajtolis: “Quitztica Dios”**

<sup>33</sup> Huan no Jesús quinmachtij imomachtijcahuan ijcuín:

—Huan namejuan nanquicacque ya que ne namohuejcautatuan namechnajnahuatijque ijcuín: “Ma amo queman xiquijto: Quitztica Dios, huan de ompa amo ticchihuas ten timoyectencahuac ya. Ta, cuac timoyectencahuas ya de que ticchihuas tensá, huan tictematiltis ica nijín tajtolme, Quitztica Dios, ijcuacán yec melau xicchihuati ten timoyectencahuac ya”. <sup>34</sup> Pero Nejuatzin namechnajnahuatía ijcuín: Amo queman xiquijto: “Quitztica Dios”, cuac ticnequi timoyectencahuas ihuan acsame. Amo queman xiquijto: “Quitztica Dios”, nión ica teyi taman tanemililis. Huan

amo no xiquijto: “Quitztica ne eluiyactzinco”, porín ompa yetica Dios imohuiscachicahualispan. <sup>35</sup> Huan amo no xiquijto: “Quitztica in talticpac”, porín nican talticpac Dios mometzmejmelauc. Huan amo no xiquijto: “Quitztica ne chipactzin pueblo Jerusalén”, porín ne pueblo pohui ihuan ne hueyi tayecanque Totajtzin Dios. <sup>36</sup> Huan amo no xiquijto: “Quitztica notzontecon”, den quijtosnequi: “Quitztica nejuatzin”, porín amo hueli ticchihuas ma mocuepa istac nión se motzontzin ten tiltic ica motajtolis san. <sup>37</sup> Pero cuac ticnequis tiquijtos “quema”, sayó xiquijto “quema”. Huan cuac ticnequis tiquijtos “amo”, sayó xiquijto “amo”. Porín cuac ticnequis ticmajmaxitis motajtolis ica ne tajtol: “Quitztica Dios”, ijcuación nenca san tictenehuas itocaytzin de Totajtzin Dios. Xicmati que nojón motajtolis huitza den amocuali Satanás.

**Nican Jesús Temaquixtijque quinajsicamatiltij in tacaquini de que ma tiqintasojtacan naquen techtahuelitaj**

*(Lc. 6.29-30)*

<sup>38</sup> Huan no Jesús quinmachtij imomachtijcahuan ijcuín:

—Huan namejuan nanquicacque ya que ne namohuejcautatuan namechnajnahuatijque ya ijcuín: “Tacán acsá mitzchihuilis mal queme yesquía mitzquixtilía se moixtololo, ijcuación tejua no timomacuepas huan tiquixtilis se iixtololo. Huan tacán acsá mitzquixtilía se motan, ijcuación tejua no timomacuepas huan no tiquixtilis se itan”. <sup>39</sup> Pero Nejuatzin namechnajnahuatíaj ijcuín: Amo ximomacuepacan cuac se tagat namechchihuilía tensá ten amo cuali. Huan tacán acsá mitzcamatatzinía moyecmacopaca, ijcuación amo ximomacuepa. Ta, xicuepa moixco ma mitzcamatatzini ocseco. <sup>40</sup> Huan tacán acsá quinequi mitzteluilis iixpan in juez huan no quinequi mitzcuilis mocamisa, ijcuación xicahuili ma cuica no motaquen. <sup>41</sup> Huan tacán acsá mitzfuertzajuía de que xicuica se tamamal se huan tajco kilómetro, queme yesquía tajco hora de ojti, ijcuación xicuica ne tamamal ocsé tanto, yesqui se hora tech in ojti. <sup>42</sup> Huan tacán acsá quinequi mitztajtanilis tensá, ijcuación xicmacti. Huan tacán acsá quinequi mitztanehuilis tensá, ijcuación amo no xiquixtopehua. Ta, xictaneuti.

**Nican Jesús Temaquixtijque quinajsicamatiltij in tacaquini de que ma tiqintasojtacan neques ten techtahuelitzinemi**

*(Lc. 6.27-28, 32-36)*

<sup>43</sup> Huan no Jesús quinmachtij imomachtijcahuan ijcuín:

—Huan namejuan nanquicacque ya que ne namohuejcautatuan namechnajnahuatijque ijcuín: “Xictasojta mocniu huan xictahuelita naquen mitztahuelita”. <sup>44</sup> Pero Nejuatzin namechnajnahuatía ijcuín: Xictasojtacan naquen namechtahuelitasque, huan xiquintapojpoluican ne naquen namechuijuicaltisque. Huan xiquinpalehuican naquen namehcualancaitasque. Huan ximotataatutilican ica por yejuan ne naquen namechquejquelosque huan ten namechtajyohuiltisque. <sup>45</sup> Huan ijcón ixnesis que namejuan nanteconehuan de Namohueyitajtzin ten yetica ne eluiyactzinco. Porín Yejuatzin quichihua ma panquisa in tonaltzin para quinpalehuis nochi naquen yolcualime huan naquen amo yolcualime. Huan Yejuatzin no cualtitani in quioutzin para quinpalehuis naquen yolchipauque huan naquen amo yolchipauque. <sup>46</sup> Huan como sayó nanquintasojtaj ne naquen namechtasojtaj, ¿ijcuación toni tetayocolil

nanquiselisque? Pues hasta in tatopaluiani yejuan ijcón quichihua. <sup>47</sup> Huan tacán sayó nanquitajpaloaj namocnihuan, ¿ijcuación toni cuali chihualis nanquichihua. <sup>48</sup> Huan namejuan xiyecyolmajsitocan ica ne tetasojtalis ijcón queme Namohueyitajtzin ten yetica ne eluiyactzinco ten no yec yolmajsitoc ya ica ne tetasojtalis.

**Nican Jesús Temaquixtijque quinajsicamatiltij in tacaquini de quenín titapalehuíaj in pobres**

**6** Huan Jesús ocsepa quinmachtij imomachtijcahuan ijcuín: —Huan amo xicchihuacan namocualitachihualis de namotaneltolalis senteixteno para ma sayó namechitacan in tagayot. Porín como ijcón nanquichihua, xicmatican que Namohueyitajtzin den yetica eluiyactzinco amo teyi namechmactis de ne tetayocolil. <sup>2</sup> Pero cuac tiquinpalehuis in pobres, ijcuación amo xictematilti nohuiyan de ne motaehuil. Porín ijcón quichihua ne naquen ixcuecuetpme de nintamachilis campa in tiopanme de judíos huan campa ojme sayó para ma quinhueyichihuacan in tagayot. De yec melau ten namechilía que yejuan quipíaj ya ne nintetayocolil. <sup>3</sup> Pero cuac tejua tiquinpalehuis in pobres ica ne ten ticpía, ijcuación ma amo aquen quimati toni ticchihuas. Amo xictematilti nohuiyan huan nión no ma quimati moopochmay ten quichiutoc moyecmay. <sup>4</sup> Ta, tejua cuac tiquinpalehuis in pobres ica ne ten ticpía, ijcuación cachi cuali xiquichtacachihua. Huan ijcón Mohueyitajtzin quitzoc ya ten tiquichtacachiutoc, huan ijcón Yejuatzin mitzmactilis ne hueyi tetayocolil senteixteno.

**Nican Jesús Temaquixtijque quinajsicamatiltij in tacaquini queniu timotatautilisque**

*(Lc. 11.2-4)*

<sup>5</sup> Huan Jesús ocsepa quinmachtij imomachtijcahuan ijcuín:

—Huan cuac namejuan nanmotatautilisque, ijcuación amo xicchihuacan queme ne naquen ixquequetpme de nintamachilis. Porín yejuan cuelitaj moquetzasque huan motatautilisque itech in tiopanme de judíos huan tech ojme den calnacastan, para ma ijcón quinitacan in tagayot. Huan yec melau ten namechilía que yejuan quiselijque ya ne tetayocolil de hueyipanchihualis ten quinmactilijque ya in tagayot. <sup>6</sup> Pero cuac tejua timotatautilis ihuan Dios, ijcuación xicalaqui tech mochantzin huan xitzacua in puerta huan ximotatautili ihuan Mohueyitajtzin Dios ten mohuan ichtaca yetica. Porín Mohueyitajtzin Dios quitzoc ya ten tiquichtacachiutoc huan ijcón Yejuatzin satapan mitzmactis ne tetayocolil senteixteno. <sup>7</sup> Huan cuac namejuan nanmotatautilisque ihuan Dios, ijcuación amo yejua san xicquejqueptocan san namotajtoluan porín ijcón nenca san namonetatautilis. Porín ne naquen amo pohuij ihuan Dios, yejuan quiquejqueptocque san nintajtoluan tech ninnetatautilis. Huan ijcón yejuan quiyolnemilíaj que Dios cachi quincaquis porín miacpa quichihua ninnetatautilis. <sup>8</sup> Huan namejuan amo xiquinnejnehuilican queme yejuan motatautilíaj porín xicmatican que Namohueyitajtzin Dios ipa cuali quimatoc ya toni namechpoloa achtopa ya que namejuan nanquitajtanisquíaj.

<sup>9</sup> Pero namejuan ximotatautilican ijcuín:



Tohueyitajtzin ten tiyetica eluiyactzinco, ma timitzonmohuistilican ica in chicahualis de motocaytzin.

<sup>10</sup> Huan ma xionuiqui huan ma xiquinyolyecana ica mohueyichicahualis motaneltocacahuan.

Huan ma mochihua nochi ten Tejuatzin ticonmonequiltía nican talticpac ijcón queme mochiutoc ne eluiyactzinco.

<sup>11</sup> Xitechonmaca axcan totaxcaltzin ten techpoloa.

<sup>12</sup> Huan xitechontapojpolui den totajtacoluan ijcón queme tejuan no tiquintapopoluijque ya naquen techmohuispoloayaj.

<sup>13</sup> Huan amo xitechonuica tech in ohuijcaoyot.

Ta, xitechonajchihui den chicahualis den amocuali. Huan timitzonhueyimohuistilíaj porín Tejuatzin san ticonpía in hueyitayecanalís, in hueyichicahualis huan Tejuatzin san Tionueyichiuque porín nesi mocualtzinyo para nachipa ijcón. Amén.

<sup>14</sup> Porín como namejuan nanquintapojpoluíaj naquen namechmohuispoloaj, ijcón no Tohueyitajtzin Dios ten yetica eluiyactzinco namechtapojpoluis. <sup>15</sup> Huan como amo nanquintapojpoluíaj ne naquen namechmohuispoloaj, no ijcón Namohueyitajtzin amo no namechtapojpoluis de namotajtacoluan.

### **Nican Jesús Temaquixtijque quinajsicamatiltij in tacaquini de ne sahuualis**

<sup>16</sup> Huan no Jesús quinmachtij imomachtijcahuan ijcuín:

—Huan cuac nanmosahuasque, ijcuacón ma amo xiyetocan xiixcocoyani ijcón queme quichihua in taca ten ixcuecuetpme de nintamachilis. Porín yejuan ixco-coxcatijtinemij para ijcón quinnextilisque in tagayot que yec melau mosahuaj. De yec melau ten namechilía, yejuan quiselijque ya ne tetayocolil de hueyipanchihualis ten quinmactilijque ya in tagayot. <sup>17</sup> Pero tejava, cuac timosahuas, ijcuacón cuali ximocuatzcacahuasui huan cachi ximoixami, <sup>18</sup> para ma amo quimatican tagayot que timosautoc. Ta, sayó para ma quimati Mohueyitajtzin ten ichtaca yetica. Huan Mohueyitajtzin cuali quimatoc ya de que toni tiquichtacachiutoc huan ticselitiu sen-teixteno ne tetayocolil ten Totajtzin Dios mitzmactilis.

### **Nican Jesús Temaquixtijque quinajsicamatiltij in tacaquini de ne melau ricojyot, de ne tech eluiyac**

*(Lc. 12.33-34)*

<sup>19</sup> Huan Jesús no quinmachtij imomachtijcahuan ijcuín:

—Amo xicsentilican namoricojyo nican talticpac campa namotilma quitetec-tocque in oculinme huan namotomin poxcautoc huan campa in tachtequini tecalijtic calaquij huan cuicaj ten nesi. <sup>20</sup> Ta, cachi cuali xicsentilican namoricojyo tech ne eluiyactzinco campa in oculinme amo hueli quitejtequisque, nión no poxcahuis den namoaxca, huan nión no tachtequini huelis mitzcalticcalaquisque huan cuicasque ten moaxca. <sup>21</sup> Porín campa yesqui yetos nochi in namoricojyo, ne eluiyactzinco oso nican talticpac, sayó ompa itech ne moricojyo nanyoltanemilijtosque.

**Nican Jesús Temaquixtijque quinajsicamatiltij in tacaquini  
den quenín toixtololohuan techtahuilíaj**

*(Lc. 11.34-36)*

<sup>22</sup> Huan Jesús cachi oc quinmachtij imomachtijcahuan ijcuín:

—Namoixtololohuan nicnejnehuililtía queme se tanex ten techtahuilía tech tonacayo. Huan tacán namoixtololohuan yec tequitij queme se cuali tanex, no ijcón cuali namechtahuilía tech nochi namonacayo. <sup>23</sup> Huan tacán namoixtololohuan amo yec tequitij porín tensá quitzajzacuilía namoixcoconeu, no ijcón amo huelis calaquís in tanex huan ijcón nochi namonacayo mocahuas tech in tayohuayanilot. Huan como ne tanex ten nanquiplasquíaj ijcón mocuepas tayohuayanilot, ijcuacón yec melau nanmocahuasque tech se tayohuayanilot ten semi tiltic.

**Nican Jesús Temaquixtijque quinajsicamatiltij in tacaquini den  
ome patrones, Yejuatzin Dios oso in tomin**

*(Lc. 16.13)*

<sup>24</sup> Huan Jesús quinmachtij imomachtijcahuan ijcuín:

—Amo aquen huelis quinquetilis ome patrones, porín como ijcón quichihua, ijcuacón yejua quitahuelitas se patrón huan quitasojtas in ocsé, oso quimohuistilis se patrón huan amo quihueyichihuas in ocsé. Amo aquen huelis quinquetilis nijín ome patrones sepa san, ijcón queme Totajtzin Dios huan in ricojyot de nican talticpac.

**Nican Jesús Temaquixtijque quinajsicamatiltij in tacaquini de que ma amo  
timoyolnemilijtinemican huan ma amo timoyolcuejmolojtinemican**

*(Lc. 12.22-31)*

<sup>25</sup> Huan Jesús no quinmachtij imomachtijcahuan ijcuín:

—Ica nijín tanejmachtilis namechilía que amo ximoyolcuejmolojtinemican de namonemilis, de namotacualis, de namoatilis. Huan amo no ximoyolcuejmolocan de namotaquen. ¿Xe cachi amo tayecantoc namonemilis huan que nijín namotacualis? Pues quema. ¿Xe cachi amo tayecantoc namotacayo huan que nijín namotilma? Pues quema. <sup>26</sup> Xiquitacan san in tototzitzin ten patantinemij ejecaixco. Yejuan amo no tatocaj, nión no cajocuij taquilot, nión no quiehua in taquilot tech sin-cal. Huan Namohueyitajtzin ten yetica ne eluiyactzinco, Yejuatzin quintamacatoc. ¿Xe cachi amo nantayecantocque namejuan ihuan Dios huan que nijín tototzitzin? Pues quema. <sup>27</sup> ¿Aconi de namejuan huelis momajxitis se molic oc para cachi huejcapantíyas, masqui cachi moyolcuejmos? Pero amo aquen huelis. <sup>28</sup> Huan, ¿queyé nanmoyolcuejmolojtinemij por namotilma? Xiquitacan quenín moscaltíaj ne milajxochime. Yejuan amo motequitilíaj nión no tajquitij. <sup>29</sup> Huan namehyequilía que nijín xochit semi cualtzin xochiyohua. Huan ne hueyi rey Salomón ica nochi nicualtzinyo motaquentiaya pero amo queman huelic quinejnehuilis cualtzin queme nijín xochit. <sup>30</sup> Huan Dios quicualnextía nijín milajxochime ten axcan moscaltijtoc huan mosta quitatis campa tachinoa. Huan namejuan, ¿xe cachi amo namehpalehús Dios huan que ne milajxochime? Pues, quema. Huan namejuan, ¿queyé amo majsitoc namotacuaumatilis?

<sup>31</sup> Huan no Jesús quinmachtij imomachtijcahuan ijcuín:

—Amo xicnemilijtinemican toni nanquicuasque mosta, huan toni titayisque, huan tonica timotaquentisque. <sup>32</sup> Porín in tagayot ten amo pohuij ihuan Dios, yejuan nojonques quitemoaj sayó de nijín taman. Huan namejuan nanquipíaj se Namohueyitajtzin ten yetica ne eluiyactzinco huan Yejuatzin nochi quimatoc ya ten namejuan namechpoloaj. <sup>33</sup> Pero namejuan ximofuerzajuican huan xictemocan achto para ma Dios namechyolyecana ica ihueyichicahualis huan no xictemocan ne yecchipaucanemilis ten Dios cuelita. Huan ijcón Yejuatzin namechyolmajxitis huan nanquiselisque nochi ten monequis ijcón queme in tacualis huan in atilis huan namotaquen. <sup>34</sup> Ica ya nojón amo ximoyolcuejmolocan den toni mochihuas mosta, porín ne tonal den mosta cualcuís ocsé ne cuejmololis. Cada se tonal quipía ne ohuijcaoyot. Huan ijcón queme hualajtoc ne cuejmololis de mosta huan mosta, no ijcón ximotatautilican mosta ihuan Totajtzin Dios ma namechpalehuijtü.

**Nican Jesús Temaquixtijque quinajsicamatiltij in tacaquini de que ma amo se quinixcomaca huan ma amo se quintelchihua acsame**

*(Lc. 6.37-38, 41-42)*

**7** Huan no Jesús quinilij imomachtijcahuan ijcuín:

—Huan amo xiquinixcomactinemican huan amo no xiquintelchiutinemican acsame, queme nanyesquíaj jueces, para ma Dios amo no namechixcomas huan amo namechtelchihuas. <sup>2</sup> Porín Dios namechixcomacas huan namechtelchihuas ica ne tamachiu tenica namejuan nanquicuij para nanquixcomacaj huan nanquintelchihuaj acsame. Huan ne taixcomacalis tenica namejuan nanquintelchihuaj acsame, no ijcón Dios quicuis para namechixcomacas huan namechtelchihuas. <sup>3</sup> Huan como tejua amo timomaca cuenta de que mitzixtazjtzacuilijtoc se hueyi cuoutzontet, queme yesquía se hueyi tajtacol, ijcuacán amo huelis ticyequitilis se teuti actoc ixtololoco ne mocnitzin, huan ne teuti queme yesquía se tajtacol ten amo semi mota. <sup>4</sup> Huan no, ¿quenín huelis tiqulilis ne mocniu: “Ma nimitzquixtili ne teuti ten ticpía moixtololoco”, cuac no ticpía se hueyi cuoutzontet ten no mitzixtazjtzacuilijtoc? Pues amo huelis. <sup>5</sup> Porín como amo ticmachilía ne ten mitzixtazjtzacuilijtoc, ijcuacán tejua tiixcueceptoc san de motamachilis. Ta, cachi cuali achto ximoquixtili ne cuoutzontet ten mitzixtazjtzacuilijtoc huan ijcón huelis ticyequitas ya ne teuti ten quipía mocniu ne ixtololoco huan ijcón huelis ya tiquixtilis.

<sup>6</sup> Huan Jesús quinnextiliaya in tagayot ica se nexcuitil de se itzcuinti huan se pitzot huan quiniliaya ijcuín:

—Amo xiquinmactilican itzcuinme ne chipactzin Tajtoltzitzin de Dios, huan amo no xiquintamacacan pitzome den tanextililis de Dios queme yesquía perlas ten semi telpatio. Porín nijín oculinme queme yesquíaj in taca ten yolchichicque ten quixtopehuasque in Tajtoltzitzin de Dios. Huan huelis yejuan quitzojtzonicasque in Tajtoltzitzin de Dios huan no mocuepasque para namechquejquetzomasque.

**Nican Jesús Temaquixtijque quinajsicamatiltij in tacaquini de ne tatatautilis huan in tanahuatil cachi chipactzin**

*(Lc. 11.9-13; 6.31)*

<sup>7</sup> Huan Jesús quinnextiliaya imomachtijcahuan ica se nexcuitil huan quiniliaya ijcuín:

—Xitajtaniclan Dios huan namechmactis ne ten monequi. Ijcón queme tensá se quiyectemoa de se quipoloa, no ijcón xictatatautilican Dios huan Yejuatzin namech-seliltis. Huan no ijcón cuac se tacacalatzá ma tatapoucan, no ijcón xicsentocacan xiquilican Dios ten monequi huan Dios namechmacas. <sup>8</sup> Porín nochi tocnihuan ten tajtanilisque, yejuan nojonques Dios quinseliltis. Huan nochi tocnihuan ten quite-mosque tensá tatiocihualis, yejuan nojonques Dios quinpalehuis para ma cajsican. Huan nochi tocnihuan ten tanotzasque, yejuan nojonques Dios quintatapohuilis. <sup>9</sup> ¿Xe acsá de namejuan huelis nanquimactilisque namoconeu se tet cuac namech-tajtanilis ximacacac taxcal? Pues amo. <sup>10</sup> Huan, ¿xe no acsá de namejuan huelis nanquimactilisque namoconeu se cohuat, cuac namechtajtanis ximacacac tzictzin pescadojnacat? Pues amo. <sup>11</sup> Porín masqui namejuan amo nanyolchipauque, pero no cuali nanquimatocque toni nanquimactisque namoconeuhan ten cuali huan den huelic. Pues cachi oc Namohueyitajtzin ten yetica ne eluiyactzinco namechmactis ne mactil ten cuali para nochi naquen quiyectajtanisque.

<sup>12</sup> Huan ijcón ipa xiquinchihuilican tocnihuan ijcón queme nanquinequij que in tocnihuan ma namechchihuilican. Porín yejua nijín in tamachilis ten technajnahuatáaj in tanahuatil de Moisés huan in Tajcuilolamatzin ten quijcuilojque in tanahuatiani de Dios.

**Nican Jesús Temaquixtijque quinajsicamatiltij in tacaquini de ne calten ten amo patahuac**

*(Lc. 13.24)*

<sup>13</sup> Huan Jesús quinmactij imomachtijcahuan ijcuín:

—Xicalaquican itech ne ojtzin de Dios campa ne calteno amo patahuac. Porín ne calten huan ne hueyi ojti semi patauque campa yajtocque in tagayot para ajsitihue tech ne xipoliuilis, huan miacque tagayot yohue tech ne patahuac ojti campa amo ongac ne nemaquixtilis. <sup>14</sup> Huan amo patahuac ne calteno huan semi pitzahuac ne ojti campa yajtocque in taneltocani para ajsitihue tech ne yec nemilis. Huan amo miacque moajsitihue tech nijín ojti de ne maquixtilis.

**Nican Jesús Temaquixtijque quinajsicamatiltij in tacaquini de ne cuohuit ten moixmati ica itaquilohuan**

*(Lc. 6.43-44)*

<sup>15</sup> Huan Jesús quinmactij imomachtijcahuan ijcuín:

—Ximoyecpiacan den ne tanahuatiani tacajcayahuani ten teilijtinemij que yejuan tajtoaj itencopa Dios. Porín yejuan hualasque sayó para namechcaycayahuasque san. Huan yejuan motasque yolcualime queme se cuali ichcat ten amo tetehuía. Pero ne iyolijtic ne tanahuatiani cualcuij yoltacajcayahualis queme in piotecuani ten ichtacayohui para tachtequisque. <sup>16</sup> Huan ijcón namejuan cuali nanquinyequixmatisque nijín tanahuatiani ica ne tachihualis ten yejuan quichiutinemij. Porín amo huelis se quitocas huitzti huan ma taqui uvas xocot ten tzopec. Pues amo no huelis se quitocas tzitzicascuohuit huan ma taqui higos xocot. <sup>17</sup> Huan ijcón nochi in cuohuit ten cuali, yejua ne quitemaca cuali taquilome. Huan nochi in cuohuit ten amo cuali, yejua ne quitemaca taquilome ten amo cualtía. <sup>18</sup> Huan in cuohuit ten cuali, yejua ne amo huelis quitemacas itaquilohuan ten amo cualtía. Huan no in cuohuit ten amo cuali, yejua ne no amo huelis quitemacas itaquilohuan ten cualtía. <sup>19</sup> Huan nochi in

cuoume ten amo quitemaca taquilot ten cualtía, in tequitini quimayohuisque huan quitamotasque tech in tit. <sup>20</sup> Ijcuacán namejuan cuali nanquinyequixmatische ya no-jón tacajcayahuani ica ne tachihualis ten yejuan quichiutinemij, ijcón queme cada se cuohuit moixmati ica itaquilohuan.

**Nican tajtoa de que Jesús Temaquixtijque quinilis ne naquen amo yec tacaumatatque ihuantzin ijcuín: Amo queman namechixmatic**

(Lc. 13.25-27)

<sup>21</sup> Huan Jesús quinajsicamatiltij imomachtijcahuan ijcuín:

—Totajtzin Dios de eluiyactzinco amo quinyolyecanas ica ihueyichicahualis nochi ne ten nechnotzasque sayó ica nintexipal san que Nejuatzin ni Nintecotzin. Ta, sayó Dios quinyolyecana ica ihueyichicahualis neques ten quichihuaj queme Notajtzin Dios ipaquilis ne eluiyactzinco. <sup>22</sup> Huan cuac ne tonal de tatzacuiltis ejcos ya, ijcuacán miacque nechlisque ijcuín: “Notecotzin, Notecotzin, tejuan tictanextiliayaj ica in chicahualis de motocaytzin. Huan no ica motocaytzin tiquincalanquixtiayaj in amocuali ejecame. Huan ica motocay ticchihuayaj miacque huejueyi mohuiscatequit”. <sup>23</sup> Pero ijcuacán Nejuatzin niquinyecquilis ijcuín: “Amo queman namechixmatic; niman ximajchihuacan, namejuan nantachihuani ica ten amo cuali”.

**Nican Jesús Temaquixtijque quinajsicamatiltij in tacaquini in ome taman tatzinehualonime**

(Lc. 6.46-49; Mr. 1.22)

<sup>24</sup> Huan in Jesús quinnextiliaya imomachtijcahuan ica se nexcuitil ijcuín:

—Naquen nechcaquilía huan quichihua nochi ten nicnajnahuatía, yejua ne nicnejnehuililtía queme se tagat ten yec yolmajsitoc ya. Huan ne tagat ten yolmajsitoc quichijchihuac ichan huan quichijchihuac in tatzinehualoni itech se hueyi tesohuil. <sup>25</sup> Huan huala se hueyi tetzaucaquiohuit huan hueyiacque in hueyiame huan elihuis taejecaya hasta quihuijuixohuaya in cali. Pero in cali amo huejuelihuc porín yec tzinijcatoya itech se hueyi tesohuil. <sup>26</sup> Huan no ijcón naquen amo nechcaquilía huan amo no quichihua den Nejuatzin nicnajnahuatía, yejua ne nicnejnehuililtía queme se tagat den ayamo yec yolmajsitoc. Huan yejua ne quichijchihuac nichan huan quitzinpehualtij campa yoca xal san. <sup>27</sup> Huan huala se hueyi tetzaucaquiohuit huan hueyiacque in hueyiame huan elihuis taejecaya hasta quihuijuixohuaya in cali, ijcuacán ne cali cacapaxhuetzito.

<sup>28</sup> Huan cuac Jesús quintaminojnotzac ya, ijcuacán in tagayot quimoucamatíaj de ne tanextililisme. <sup>29</sup> Porín Jesús quinnextiliaya in tacaquini ica chicacatanahuatil huan amo queme ne tanextiliani den tanahuatil de Moisés.

**Nican tajtoa de queniu Jesús Temaquixtijque quipajtij se cocoxque den cocotocatoya ninacayo**

(Mr. 1.40-45; Lc. 5.12-16)

**8** Huan cuac temoc ya Jesús tech ne tepelomo, ijcuacán quitoctiliayaj Yejuatzin huel míac tagayot. <sup>2</sup> Huan motoquij campa Jesús se cocoxque den inacayo cocotocatoya. Huan yejua motancuaquetzaco iixpampa Jesús huan quilij ijcuín:

—Totecotzin, ta como ticonmonequiltía, cuali tionuelis tinechonchipahuas de ni-jín pitzotic cocolis.

<sup>3</sup>Huan Jesús momatilanac huan quimatocac in cocoxque huan quilij ijcuín:

—Nínequi ma tejua xichipahuac de mococolis.

Huan cuac Jesús ijcón quilij, ijcuacán nimantzin quisac ne cocolis den inacayo cocotocatoya huan mocahuac chipactzin ne tagat. <sup>4</sup>Huan Jesús quilij ijcuín:

—Xiquita, amo aquen teyi xictapohui. Ta, sayó xiyó ximotenextiliti ihuan ne tiopixcame den judíos de que tichipahuac ya. Huan no xiquinmactiti ne tetayocolil in tiopixcame den judíos, ijcón queme Moisés tanahuatiaya para ne cocoyani ten tapajtilme ya de ne cocotoca ninacayo. Huan ijcón ixnesis ninuan mopueblojcahuan de que tichipahuac ya.

**Nican tajtoa de queniu Jesús Temaquixtjque  
quipajtj se taquehual de capitán romano**

*(Lc. 7.1-10)*

<sup>5</sup>Huan cuac Jesús calayic tech ne pueblo Capernaum, ijcuacán se tayecanque soldado romano motoquij campa Jesús huan quitatautilij ijcuín:

<sup>6</sup>—Totecotzin, notaquehual semi mococoa huan huetztoc ichan mocahuac melaxtic, huan tajyohuía ica ne tonehuilis telsenca ya.

<sup>7</sup>Huan Jesús quilij ijcuín:

—Nejua niyás nicpajtitiu.

<sup>8</sup>Ijcuacán in tayecanque soldado romano tananquilij ijcuín:

—Totecotzin, nejua amo nechnamiqui ma ticalaqui tech nochantzin. Ta, sayó xihualtanahuati campa tionyetoc, huan ijcón notaquehual pajtis. <sup>9</sup>Huan nejua no nitatacamati ten nechnajnahuatía. Huan nejua niquinnajnahuatía nosoldados ma nechtacamatican. Huan nicnahuatía se soldado ma xiyó, huan yejua yohui. Huan nicnahuatía ocsé ma xihuiqui, huan yejua huitza. Huan nicnahuatía notaquehual ma xicchihuati tensá, huan yejua quichihuati.

<sup>10</sup>Huan cuac Jesús quicayic nijín tajtolis, ijcuacán Yejuatzin quimoucacayic huan quinilij in tagayot ten cualtoctiliayaj:

—De melau ten namechilía que intzalan nochi ne pueblojuani de Israel amo aquen nicajsic ten quipía in yec tacuautamatilis queme nijín tayecanque soldado romano. <sup>11</sup>Huan no namechyequilía que hualasque de nohuiyan miac taneltocani ten amo judíos. Huan yejuan hualasque de campa iquisayampa in tonal huan de ipolihuiyampa tonal huan calaquisque huan tacuasque ihuan in huejcautetatme judíos, in Abraham huan in Isaac huan in Jacob. Huan ompa yejuan calaquisque campa Dios momasoutoc ipan itaneltocacahuan ica ihueyichicahualis huan namejuan amo nancalaquisque. <sup>12</sup>Huan namejuan in tagayot judíos ten nanopohuisquíaj campa Dios momasoutoc ica ihueyichicahualis, namejuan Dios namechcalantamotas tech ne tayohuayanilot campa nanchocatosque huan nantannanatzocatosque tech ne tajyohuilis.

<sup>13</sup>Huan Jesús quilij ne tayecanque de soldados ijcuín:

—Xiyó ya mochan huan ijcón mochihuas queme tejua titacuautamatic que pajtis motaquehual.

Huan ijcón nitaquehual pajtic ya tech ne momento.

**Nican tajtoa de queniu Jesús Temaquixtisque quipajtij imonan in Pedro**

*(Mr. 1.29-31; Lc. 4.38-39)*

<sup>14</sup> Huan huala Jesús huan calayic ichan in Pedro huan ompa quitac imonan in Pedro que huetztoya ica hueyi totonic. <sup>15</sup> Ijcuacán in Jesús quimaquitzquij in cocoxque huan ijcón niman quisac in totonic. Huan niman imonan in Pedro moquetzac huan quintamacac icalpanocahuan.

**Nican tajtoa de queniu Jesús Temaquixtisque quinpajtij míac cocoyani**

*(Mr. 1.32-34; Lc. 4.40-41)*

<sup>16</sup> Huan cuac ne tapoyahuito ya, ijcuacán Jesús yetoya oc ichan nimonan in Pedro huan ompa cualcuiliayaj míac tagayot ten quiapiayaj inyolijtic amocuali ejecame. Huan Jesús quincalanquixtilij in amocuali ejecame sayó ica se tajtol, huan ijcón no quinpajtij nochi in cocoyani. <sup>17</sup> Huan melau ijcón mochihuac ten quiucuilojca ya ne tanahuatijque Isaías cuac quijtojca ijcuín: “Yejuatzin tajyohuico para techpajtis den tocolisuan huan tajyohuico para techajchihuilis de nochi totoneucayohuan”.

**Nican Jesús Temaquixtisque quinnejmachtij in tagayot ten quinequiayaj quitoctilisque huan quitacamatiyasque Jesús**

*(Lc. 9.57-62)*

<sup>18</sup> Huan cuac Jesús quitac que míac tagayot quiyehualojtoyaj, ijcuacán Yejuatzin quintitanic imomachtijcahuan ma panocan sentapalpa den hueyíat in mar de Galilea. <sup>19</sup> Huan se tanextilijque den tanahuatil de Moisés motoquico campa Jesús huan quilij Yejuatzin ijcuín:

—Tamachtijque, nicnequi nimitztoctilis huan nimitztacamatiyás campa yesqui tiyás.

<sup>20</sup> Ijcuacán in Jesús tananquilij ijcuín:

—In cuetzitzin quipíaj in téchanti campa cochij huan in tototzitzin den patantinemij ejecaixco quipíaj in tepajsoluan, pero Nejuatzin ni Yectagatzin amo nicpíac can nimocatecas.

<sup>21</sup> Huan senme den imomachtijcahuan de Jesús quilij ijcuín:

—Totecotzin, pero achtopa de que nimitztoctilis huan nimitztacamatiyás, pues nechcahua ma niyó nictalpachoti nopapá ten momiquilij ya.

<sup>22</sup> Huan Jesús quinankuilij ijcuín:

—Xihuiqui nohuan xinechtoctili huan xinechacamatiyás. Huan xicahuacan ma quitalpachocan in ánimajme: ne naquen mictocque tech ninyolo ten amo quinequij nechtoctilisque.

**Nican tajtoa de queniu Jesús Temaquixtisque quitamatilij in hueyi tetzaucaejecat**

*(Mr. 4.35-41; Lc. 8.22-25)*

<sup>23</sup> Huan de ompa Jesús calayic tech in barco huan imomachtijcahuan quisehuicayaj. <sup>24</sup> Huan pehuaco se hueyi tetzaucaejecat huan chichahuac taejecaya huan in at mocuentecaya huan calaquía tech in barco. Huan Jesús Yejuatzin cochtaya.

<sup>25</sup> Huan imomachtijcahuan yajque quiixititoj huan quilijque ijcuín:

—Totecotzin, xitechonmaquixti porín tejuan tipolihuitij ya.

<sup>26</sup> Ijcuacón nimantzin in Jesús ixpetanic huan quinilij ijcuín:

—¿Queyé semi nanmomoutíaj? Namejuan amo yec majsitoc de namotacuautamatilis.

Huan ijcón in Jesús moquetzac huan quitacahualtij ne tetzaucaejecat huan in hueyíat. Huan in hueyíat mocahuac ijcón amanis. <sup>27</sup> Ijcuacón in imomachtijcahuan semi quimoucaitacque huan moyolnojnotzayaj se huan ocsé ijcuín:

—¿Toni taman nijín tagat? Porín in ejecat huan in hueyíat no quitacamati.

**Nican tajtoa de queniu Jesús Temaquixtijque quinpajtij in taca de pueblo Gadara ten quiplayaj ninyolijtic in amocuali ejecame**

*(Mr. 5.1-20; Lc. 8.26-39)*

<sup>28</sup> Huan ajsic Jesús sentapalpa den hueyíat in mar de Galilea, campa calyetocque in pueblojuani de Gadara. Huan de ompa quinamiquitoj Jesús ome taca ten quiplayaj ninyolijtic in amocuali ejecame. Huan ne taca hualquisque itech ne ánimajtecochme, huan catcaj semi voltahuelme. Huan amo aquen huelía panohuaya itech ne ojti.

<sup>29</sup> Huan in omen peuque tzajtzij ijcuín:

—¿Toni ticpía tohuan, Jesús, Teconetzin de Dios? ¿Xe tihuala nican para titech-tajyohuiltis tejuan achtopa que hualasquía ne tonalme de tatzacuilitis?

<sup>30</sup> Huan amo huejca yetoyaj semi míac pitzome ten tacuajtoyaj huan ixtahuanen-toyaj. <sup>31</sup> Huan in amocuali ejecame quitatautijque Jesús ijcuín:

—Como titechcalanquixti de nijín tagat, xitechcahua ma ticalaquican tech ne pitzome.

<sup>32</sup> Ijcuacón in Jesús quinnahuatij ijcuín:

—Xiyacan pos.

Huan ijcón in amocuali ejecame quisque itech ne taca huan calacque tech ne pitzome. Ijcuacón in pitzome peuque motalojtinemij huan motaquesuijque tech ne hueyíat huan ijcón nochi in pitzome moelsimijque tech in marijtic. <sup>33</sup> Huan ne naquen tapiayaj ica ne pitzome, yejuan moucacholajque huan yajque tech nin-pueblo huan ompa peuque quitetapohuiyaj nochi ten mochihuac ica por ne ome taca ten quiplayaj in amocuali ejecame. <sup>34</sup> Ijcuacón in pueblojuani yajque quinamiquitoj Jesús. Huan cuac quitacque ya, ijcuacón quitatautijque Jesús de que ma quisa de ne inplebjo copaca.

**Nican tajtoa de queniu Jesús Temaquixtijque quipajtij se cocoxque de ninacayo sepoutoc**

*(Mr. 2.1-12; Lc. 5.17-26)*

**9** Huan ijcón in Jesús calayic itech in barco huan panoc sentapalpa de hueyíat den mar de ne Galilea, huan ajsito tech ne ipueblo. <sup>2</sup> Huan ijcón mochihuac ne tonal que sequi taca cualcuilijque campa yetoya Jesús se cocoxque den nochi ninacayo tamisensepoutoc, huan amo huelía nejnemía, huan ne cocoxque huetztihualaya tech se petatzin. Huan cuac Jesús quitac nintacuautamatilis de nojón nahui taca, ijcuacón in Jesús quilij in cocoxque ijcuín:

—Ximoyolchicahua, noconetzin, porín motajtacoluan nimitzintapojpolúa ya.

<sup>3</sup> Huan ijcón sequi tanextiliani den tanahuatil de Moisés ten ipa yetoyaj ya calijtic, yejuan quiyolnemiliayaj ijcuín: “Nijín tagat quimohuispoloa Dios ica itajtoluan”.



<sup>4</sup> Ijcuacán in Jesús nimantzin quinixmatilij nintalnamiqulis de ne tanextiliani huan quinilij ijcuín:

—¿Queyé nanquiynemilíaj ten amo cuali? <sup>5</sup> ¿Catiyejua tajtol cachi amo ohui cuac niqulis ne cocoxque? Ma niqijto: “Nimitztapojpoluij ya motajtacoluan”, oso ma niqijto ijcuín: “Ximoquetza huan xiyó mochan”. <sup>6</sup> Huan nejua namechyecmatiltía que Nejuatzin ya ni Yectagatzin de Dios. Huan nicpía tanahuatil nican talticpac para niquintapojpoluis naquen motajtacolmacac ya.

Huan de ompa Jesús quilij in cocoxque ijcuín:

—Ximehua huan xicui motapech huan xiyó mochan.

<sup>7</sup> Huan ijcón in cocoxque ten amo huelía nenemía, yejua ne moquetzac huan yajqui ichan. <sup>8</sup> Huan cuac in tagayot quitacque ya toni mochihuac, ijcuacán semi quimoucaitacque huan quimohuistilijque Dios porín Dios quimactilij ya senme den talticpacuani de ne chicahualis de tapajtía ica chicauchuelilis.

### **Nican tajtoa de queniu Jesús Temaquixtijque quinotzac in Mateo ma quitoctili Yejuatzin**

*(Mr. 2.13-17; Lc. 5.27-32)*

<sup>9</sup> Huan queman Jesús panotiaya ompa, ijcuacán Yejuatzin quitac se tagat ten monetzaya Mateo tocotziutoc caltteno campa quintopaluiaya in pueblojuani. Ijcuacán in Jesús quilij ijcuín:

—Xinechtoctili huan xinechtacamatiyás.

Ijcuacán in Mateo moquetztiquisac huan yajqui quitoctilito Jesús ma momachtiti de Yejuatzin.

<sup>10</sup> Huan ijcón cachi satepan yajqui Jesús tacuato ichan Mateo. Huan no hualajque miacque tatopaluiani ihuan in taca ten amo quitacammatque in tanahuatil de Moisés. Huan ijcón sen tacuajtoyaj ihuan Jesús huan imomachtijcahuan. <sup>11</sup> Huan cuac in fariseos quitacque que in Jesús sen tacuajtoya ihuan in tatopaluiani, ijcuacán yejuan quintajoltijque ne imomachtijcahuan de Jesús ijcuín:

—¿Queyé namotamachtijcau tacuajtoc ihuan ne tatopaluiani huan in taca ten amo taticamatinemij den tanahuatil de Moisés?

<sup>12</sup> Huan queman in Jesús quicayic ijcón nijín matájtanti, ijcuacán Yejuatzin tananquilij ijcuín:

—In tagayot ten mopohuaj yolpactocque, yejuan nojonques amo monequij tepajtijque. Ta, namechilía que sayó in cocoyani monequij tepajtijque. Ica ya nojón ninuan nisentacujtoc nijín tatopaluiani. <sup>13</sup> Xiyacan huan xicyeajsicamican toni quijosnequi nijín tajtol de Tajtoltzin de Dios: “Nicnequi xiteyolicnelican huan amo nicnequi sayó xinechtayocolican tapijalme para ica nannechmohuistilisque”. Nejuatzin amo nihuala niquintemoco naquen mopohuaj yolchিপauque. Ta, sayó niquintemoco tajtaclejque para ma yejuan ma moyolnemilican den nintajtacoluan.

### **Nican tajtoa de queniu quitajoltijque Jesús Temaquixtijque cox monequi mosahuasque**

*(Mr. 2.18-22; Lc. 5.33-39)*

<sup>14</sup> Huan ijcón hualajque imomachtijcahuan den Juan Taahuijque huan quitajtanilicoj Jesús ijcuín:

—Tejuan huan in fariseos timosahuaj miacpa. Huan momomachtijcahuan, ¿queyé amo no mosahuaj?

<sup>15</sup> Huan Jesús tananquilij ijcuín:

—Amo huelis moyolcocosque nochi in taijitalme ten hualajque para moyolpactisque tech in iluit de ne namictilis, como yetoc oc in teyoquich. Pero queman hualas ne tonal cuac in teyoquich cajchihuasque, ijcuacón tech ne tonalme huelis mosahuasque nochi in taijitalme.

<sup>16</sup> Huan ijcón in Jesús quinnextilij in tacaquini ica nijín nexcuitil huan quinejnehuililtij in yancuic nemilis ihuan in yancuic tasal huan yancuic vino:

—Huan no ijcón amo aquen quijtzoma se yancuic tasal tech se tasalsol. Porín cuac se quipacas, ijcuacón yejua ne mismo in yancuic tasal motocotzos huan ijcón cachi quixcocototzas in tasalsol huan cachi hueyi tzayanis. <sup>17</sup> Huan amo no aquen quipan-teca in yancuic vino tech in cuetaxsolme. Porín in yancuic vino, yejua ne mochicahualtía huan atzitzicasquisa. Huan ijcón quitzayanas in cuetaxsol huan mimilahuís nochi in vino. Huan ijcón ijtaçahuis in cuetaxsol. Pero in yancuic vino se quitequilía tech in yancuic cuetaxme huan ijcón in vino huan in cuetaxme yejuan nojonques amo ijtaçahuisque.

**Nican tajtoa de queniu Jesús Temaquixtijque quipajtij isuapil den tayecanque Jairo, huan no quipajtij in sihuat ten quinalmatocac Jesús itasal**

*(Mr. 5.21-43; Lc. 8.40-56)*

<sup>18</sup> Huan cuac Jesús quinnextiliaya oc in tagayot de nijín tajtolme, ijcuacón huala se tayecanque den judíos huan motacuaquetzaco huan motentocaco iixpantzinco Jesús huan quilij ijcuín:

—Nosihuapiltzin yequin momiquilij, huan como Tejuatzin tiyás huan ticsohuas momatzin ipan nosihuapiltzin, ijcuacón yejua ocsepa quipías nemilis.

<sup>19</sup> Huan ijcón moquetzac Jesús huan yajqui ihuan in tayecanque den judíos huan quitocotlijque Jesús imomachtijcahuan.

<sup>20</sup> Huan no yetoya se sihuat naquen mococoaya esmeyaya majtactionome xihuit huan motoquij icampa Jesús huan quinalmatoquilij itilmajtzin in Jesús. <sup>21</sup> Porín sihuat moyolnemiliaya ijcuín: “Ta sayó nicnalmatocas itilmajtzin, ijcuacón nejua nipajtis”. <sup>22</sup> Huan Jesús mocuitapanuepac huan quisenitac in sihuat huan quilij ijcuín:

—Ximoyolchicahua, tejua sihuatzin, ica por nojón motacuaumatilis ten ticpía, tejua tipajtíc ya.

Huan ijcón tech ne momento pajtic ya in sihuat.

<sup>23</sup> Huan cuac calayic Jesús tech ichan den Jairo, yejua in tayecanque tagat den judíos, ijcuacón in Jesús quinitac in tatzotzonani ten tapitzayaj huan mías tagayot mocuejmolojtoyaj. <sup>24</sup> Ijcuacón in Jesús quinilij in tagayot ijcuín:

—Xiquisacan de nican, porín in sihuapil amo miyic. Ta, sayó coctoc.

Huan in tagayot quiquejqueloayaj san de Jesús. <sup>25</sup> Huan cuac quisque ya in tagayot, ijcuacón in Jesús calayic huan quimaquitziqij in sihuapiltzin huan yejua moquetzac. <sup>26</sup> Ijcuacón tech ne pueblojcopaca nimantzin motetapohuij itech in pueblojuani de nijín chichualis de Jesús por lo que ten quichihuac Yejuatzin.

### Nican tajtoa de queniu Jesús Temaquixtijque quintachialtij ome ixpojpayome

<sup>27</sup> Huan cuac quisac Jesús de ne ichan in Jairo, ijcuacón quitociltijque ome taca ixpojpayome huan quitzajtzilijtiyayaj huan quiliayaj Jesús ijcuín:

—Xitechonyolicneli, Tejuatzin Temaquixtijque tion Teconetzin de rey David.

<sup>28</sup> Huan queman Jesús calayic ya itech ichan, ijcuacón motoquijque in taca ixpojpayome, huan Jesús quinilij ijcuín:

—¿Xe namejuan nanquineltocej que nihuelis namechpajtis?

Ijcuacón yejuan tananquilijque ijcuín:

—Quema, Totecotzin.

<sup>29</sup> Ijcuacón in Jesús quinixmatocac huan quinilij ijcuín:

—Ma ijcón mochihua porín namejuan nanquipíaj ya in yec tacuautamatis.

<sup>30</sup> Huan niman ixpajtijque. Huan Jesús quinnajnahuatíj ijcuín:

—Xiquitacan, amo aquen xictapohuican aconi namechpajtij.

<sup>31</sup> Huan quisque in taca huan peuque quitetapohuiayaj nohuiyan tech in pueblojuani de nochi in pueblos nochi ten quichihuac Jesús.

### Nican tajtoa de quenín Jesús Temaquixtijque quipajtij se tagat ten amo huelía tajtoaya

<sup>32</sup> Huan cuac yequin quisque nojón taca ten catcej ixpojpayome, ijcuacón cualcuilijque campa Yejuatzin se tagat ten amo huelía tajtoaya huan no quipiaya iyolijtic se amocuali ejecat. <sup>33</sup> Huan cuac Jesús quicalanquixtilij ya in amocuali ejecat, ijcuacón ne tagat ten amo huelía tajtoaya, yejua ne pehuac yec tajtoa ya. Ica ya nojón in tagayot semi quimoucaitaque huan quijtoayaj ijcuín:

—Amo queman ijcón tiquitayaj se hueyi mohuiscatequit queme nijín itzalan in pueblojuani de Israel.

<sup>34</sup> Huan in fariseos no quijtoayaj ijcuín:

—Nijín tagat Jesús quincalanquixtía in amocuali ejecame ica ichichahualis den tayecanque den amocuali ejecame.

### Nican tajtoa de queniu Jesús Temaquixtijque quinyolicnelij in tacaquini

<sup>35</sup> Huan Jesús nentiaya tech nochi ne pueblojme campa ne milajyetoni huan quinxtilijtiaya itech in tiopanme de judíos, huan quinnajnotzaya ica in yancuic Tajtoltzin de que Dios momasoutoc ica ichichahualis para quinyolyecantiyás itaneltocacahuan. Huan no Jesús tapajtíaya ica nochi de míac tataman cocolisme huan nochi de míac tataman tonehuilisme ten quipiayaj in pueblojuani. <sup>36</sup> Huan cuac Jesús quinitac in huel míac tagayot, ijcuacón Yejuatzin semi quinyolicnelij porín in tagayot tajyohuijtoyaj huan tayocoyayaj queme ichcame ten cuamoyautocque huan queme ne ichcame ten amo quipíaj in tapixque. <sup>37</sup> Ica ya nojón in Jesús quinilij imomachtijcahuan ijcuín:

—Yec melau míac ongac milajtapixcalis huan amo miacque naquen tequitisque.

<sup>38</sup> Ica ya nojón xictajtaniclan Namohueyitajtzin Dios ten niaxca in tapixcalis, ma Yejuatzin quinqualtitani míac tequitini para ma quisentilican nochi nijín taquilome.

**Nican Jesús Temaquixtjque quinnotzac in majtactionome  
imomachtjcahuan ma quitociltican Yejuatzin**

*(Mr. 3.13-19; Lc. 6.12-16)*

**10** Huan Jesús quinnotzac in majtactionome imomachtjcahuan huan quinxelohuilij cada se in tanahuatil para ma yejuan ijcón huelis quincalanquixtisque in amocuali ejecame, huan para ma ijcón huelis tapajtisque ica nochi den tatamanocolisme huan toneucayome den quipíaj in pueblojuani. <sup>2</sup>Yejuan nijín tocamye den majtactionome itatitaniluan de Jesús. Achto Simón ten no cojpatocaytjque Pedro, ihuan niicniu Andrés, huan Jacobo ihuan niicniu Juan, nijín omen iteconehuan de Zebedeo. <sup>3</sup>Huan no catcaj itatitaniluan de Jesús in Felipe, huan Bartolomé, huan Tomás, huan Mateo in tatopaluijque, huan Jacobo yejua iteconeu Alfeo, huan in Lebeo ten no quitocajtjque Tadeo. <sup>4</sup>Huan no catcaj itatitaniluan de Jesús in Simón ten pohúa ihuan in taca políticos ten yolchicauque; huan no in Judas Iscariote naquen quitemactij Jesús ma quimictican.

**Nican tajtoa de queniu Jesús Temaquixtjque  
quinmactilij nintequiu imomachtjcahuan**

*(Mr. 6.7-13, Lc. 9.1-6)*

<sup>5</sup>Huan ijcón in Jesús quintitanic nijín majtactionomen huan quinyematiltij ijcuín:

—Amo xiyacan campa calyetocque in pueblojuani ten amo judíos, nión no xicalaquican tech in pueblos campa Samariajcopaca. <sup>6</sup>Ta, xiyacan achto tech ne campa pueblojuani de Israel campa in tagayot nemij queme ichcame ixuamoy-autocque. <sup>7</sup>Huan xiyacan xiquinmatiltican que Totajtzin Dios motoquijtoc ya huan quimonequiltía quinyolyecanas itaneltocacahuan ica in chichualis den eluiyactzinco. <sup>8</sup>Xiquinajtican cocoyani, huan xiquinchipahuacan naquen inacayo cocotocatoc, huan xiquinyolitican miqueme, huan no xiquincalanquixtican in amocuali ejecame. Huan ijcón queme Dios namechtayocolij ya nijín chichualis, no ijcón xictequitiltican huan amo teyi xiquintopaluiican. <sup>9</sup>Huan amo no xicuiyacan tomin de istac nión tomin de plata nión de cobre, nión ocsé taman oc. Huan amo no xicuiyacan ne tominehualoni ten mitzpalehuisquía tech in ojti. <sup>10</sup>Ta, xicuiyacan se panti san namotilma; huan amo no xicuiyacan ocsequin tegacme huan nión namotopil. Porín tacaquini quinamiquij ma quintamacacan nijín tequitini ica ne tacualis porín tanojnotztinémj ica in Tajtoltzin de Dios.

<sup>11</sup>Huan no Jesús quinilij nijín majtactionomen ijcuín:

—Huan cuac nancalaquisque tech se pueblo oso milajpa, ijcuacán xictemocan se tagat ten nanquitasque que namechtasojta, huan ompa ichan ximocahuacan hasta cuac in tonal cuac namoquepasque. <sup>12</sup>Huan cuac nancalaquisque tech se cali, ijcuacán xiquintajpalocan huan xiquinilican ijcuín: “Xiyolpactocan tohuanme”. <sup>13</sup>Huan tacán ne calyetoni namechselíaj, ijcuacán ma yetoti ninpan ne paquilis de Dios. Huan tacán ne calyetoni amo namechselíaj ica paquilis, ijcuacán xiquincautehuacan huan xiquinchicaucanajnahuatican que Dios amo quinmacas ne yolpaquilis. <sup>14</sup>Huan tacán cansica acsame amo namechselíaj huan amo no namechcaquilíaj namotanojnotzalis, ijcuacán xiquisacan de ne cali oso de ne pueblo huan ximometztzejtelocan ma huetzi nochi ne talnex ten mopiloj namometztampa para ma ijcón

ixnesis que Dios quintatzacuilitis nijín pueblojuani porín yejuan quixtopeuque ya in Tajtoltzin de Dios. <sup>15</sup>De yec melau ten namechilía que tech ne tonal cuac huetzis in hueyi tatzacuilitis de Dios, ijcuación cachi oncas tajyohuilis tech nijín pueblojme ten quixtopeuque in Tajtoltzin de Dios. Huan amo quipías hueyi tatzacuilitis in ome pueblojme de Sodoma huan Gomorra, masqui Dios quintajtamij ica tit nojón ome pueblos ne queman ya ica porín pitzotic nintajtacoluan.

**Nican Jesús Temaquixtijque quinajsicamatiltij in majtactionmomen den tajyohuilis ten hualas para in taneltocani**

<sup>16</sup>Huan no Jesús quinnextiliayaj in majtactionmomen ijcuín:

—Xiquitacan, Nejuatzin namechtitani xiyacan queme ichcame yolcualime huan xitequititij intzalan ne tagayot majyá tecuanime. Huan xitequititij ica cuali tanelmililis queme cohuat ten quimati quenín mopalehuis. Huan xitequititij ica ne yolcualtagayot ijcón queme in paloma ten sayó quinchihuilía ten cuali. <sup>17</sup>Huan no ximoyecpiacan den ne tagayot ten amo taneltocani. Porín yejuan namechtemactisque para ma namechtelchihuacan ihuan ne tequihuanime huan namechuijuitequisque itech in tiopanme den judíos. <sup>18</sup>Huan no namechuicasque ninixpan huejueyin chihuanime, gobernadores huan in rey sayó porín namejuan nantacuautamatij ica notocay. Huan masqui nanmoquetzatihue inixpan ne tequihuani, pero namejuan nanquinnextilisque de notajtoluan. Huan ijcón nochi huelis nantajtosque de notajtoluan ninixpan in huejueyin chihuanime huan ninixpan in tagayot ten amo pohuíaj ihuan Dios. <sup>19</sup>Huan ne cuac namechtemactisque inmaco in tequihuani, ijcuación amo ximoyolcuejmolocan de quenín nantanquilisque oso toni nanquijtosque. Porín cuac ejcos ne momento, ijcuación Dios Yejuatzin namechmacas toni ica nantajtosque. <sup>20</sup>Ijcuación amo namejuan nantajtosque. Ta, tajtos Yejuatzin in Yecticatzin Espíritú namotech ten Totajtzin Dios cualtitanis.

<sup>21</sup>Huan no Jesús quinilij in majtactionmomen ijcuín:

—Huan ijcuac in icniu quitemactis icniu ma quimictican; huan in tetat quitemactis niconehuan ma quinnmictican. Huan no in teuan moajocuisque huan quitehuisque nintat; huan no ijcón quinnmictisque. <sup>22</sup>Huan ijcón nochin in talticpacuani namechtahuelitasque porín nantacuautamatij ica notocay. Huan naquen yec tacuautamati hasta cuac in miqulistempan, yejua ne maquisas. <sup>23</sup>Huan cuac namechtajyohuiltisque tech se pueblo, ijcuación xicholocan huan xiyetotij ocseco tech ocse pueblo. Yec melau ten namechilía que Nejuatzin ni Yectagatzin amo nihualas achtopa de ijcuac nantaminemisque ya huan nantamitanojnotzasque ya inpan in pueblojuani de Israel. <sup>24</sup>Huan se momachtijque amo huelis mochihuas cachi hueyi chiuque huan que nitamachtijcau. Huan no ijcón se taquehual amo huelis mochihuas cachi hueyi chiuque huan que nipatrón. <sup>25</sup>Porín monequía de que se momachtijque ma no tajyohuis queme itamachtijcau tajyohuíá. Huan no ijcón monequi de que se taquehual ma no quijyohuis ijcón queme ipatrón tajyohuíá. Huan Nejuatzin nechto-caytijque ni amocuali Beelzebú, huan Nejuatzin ya nitetat den nochi in taneltocani. Huan no ijcón namejuan no cachi oc namechtocaytisque nanamocualime porín nantahuhij nohuan huan nannechtoctilíaj para nechtoacamatisque.

**Nican tajtoa de queniu Jesús Temaquixtijque  
techmachtij de aconi monequis ticmoucatocasque**

*(Lc. 12.2-9)*

<sup>26</sup> Huan ijcón in Jesús quinnextiliaya in majtactionomen ijcuín:

—Huan cuac nanquinnojnnotzasque in tacaquini ica notajtoluan, ijcuacán xiquinyequilican huan amo xiquinpinahuilican. Porín nochi tanemililis ten motatijtoc, yejua ne quipía de que monextis. Huan nochi in tachihualis ten mopa-chojtoc, yejua ne quipía que momatis. <sup>27</sup> Huan nochi ten namechiliaya cuac tisenolochyetoyaj campá ne yecahuila, yejua ne namejuan xiyacan xictentelican senteixteno campá ne tonala ya. Huan nochi ten namechichtacailijca ya namonacastenteno, yejua ne xitanojnotzatij senteixteno desde ne mercado. <sup>28</sup> Huan amo no xiquinmohuilican ne naquen ten temictía den se inacayo, porín yejua ne amo huelis quimictisque se italnamiqulilis. Ta, cachi cuali ma xicmoucatocacan Totajtzin Dios, porín Yejuatzin melau huelis quitajtamis namonacayo huan no namotalnamiqulilis tech in mictan campá tajyohuilis den tit.

<sup>29</sup> Huan ome tototzitzin, ¿canachica huelis tiquinnamacasque? Pues sayó ica se quinto. Huan Totajtzin Dios quinyecpixtoc nijín tototzitzin huan amo quincahuas ma huetzican como amo quimonequiltía. <sup>30</sup> Porín Dios Yejuatzin cachi namechueyichihuas huan que namotzonuan, huan Totajtzin Dios quinpohua namotzonuan huan Yejuatzin cuali quimati canachi ongac. <sup>31</sup> Ica ya nojón amo ximomoutican cuac in tagayot namechchihuilíaj tensá ten amo cuali. Porín Dios cachi namechueyichihuas namejuan huan que ne tototzitzin.

**Nican tajtoa de neques tacaquini ten quiyequilitij senteixteno que  
yejuan pohuij ihuan Jesús Temaquixtijque**

*(Lc. 12.8-9)*

<sup>32</sup> Huan no Jesús quinilij ijcuín:

—Huan nochi ne naquen quiyequilíaj senteixteno que yejuan yec tacuautamatij nohuantzin porín Nejuatzin ni Cristo, Nejuatzin ya nicyequiliti Notajtzin Dios ten yetica nepa eluiyactzinco de que yejuan melau poutocque nohuan. <sup>33</sup> Huan nochi naquen teillisque senteixteno que amo nohuan tacuautamatij, Nejuatzin nicyequiliti Notajtzin Dios ten yetica nepa eluiyactzinco de que yejuan amo nohuan pohuij.

**Nican Jesús Temaquixtijque quinajsicamatiltij in majtactionomen de que  
cuac se taneltoaca de Dios, ijcuacán huelis ongas cualanyot tech se icalyetolis**

*(Lc. 12.51-53; 14.26-27)*

<sup>34</sup> Huan no Jesús quinilij in majtactionomen ijcuín:

—Huan amo xicnemilican que Nejuatzin nihuala para namechualcuilis sayó in yec yetolis nican talticpac. Porín melau amo nihuala para namechualcuilis sayó ne yec yetolis. Ta, namechualcuilis ne tehuilis huan ne xejxelolis. <sup>35</sup> Huan no nihuala para ma in teconeu de se calyetoni quixnamiqui itat, huan para ma in teichpoch moxexelos de inan, huan para ma in tesihuamon ma amo quiyequitas imonan. <sup>36</sup> Huan cuac se tagat tacuautamatis nohuan, ijcuacán yejua quitahuelitasque ichancahuan. <sup>37</sup> Huan amo quinamiquis de que ma pohuisque nohuan ne teconeuan taneltocani como cachi quintasojtaj itat huan inan huan como amo nechtasojtaj Nejuatzin. Huan

amo no quinamiquis de que ma pohuis nohuan ne tetat taneltocacque como cachi quintasojta ne itelpochuan huan como amo nechtasojta Nejuatzin.

<sup>38</sup> Huan Jesús quinnextiliaya in majtactionomen nijín nexcuitil ijcuín:

—Nicnejnehuililtía ne cruz queme se tajyohuilis. Huan como in taneltocani amo taxicojtiyasque ica nijín tajyohuilis cuac nechtoctilisque, ijcuacón yejuan amo quinamiquis pohuisque nohuan. <sup>39</sup> Huan nochi ne naquen quinejnequisque quiyecpiasque ninemilis nican talticpac, yejuan nojón quipolosque san. Pero nochi naquen quiseocahuasque huan quipolosque inemilis nican talticpac porín nohuan yec tacuautamati, yejuan nojonques quiselisque ne yec nemilis ten amo queman tamis.

**Nican Jesús Temaquixtijque quinajsicamatiltij in  
majtactionomen de ne tetayocolilisme**

(Mr. 9.41)

<sup>40</sup> Huan Jesús quinnextiliaya ijcuín:

—Nochi naquen namechselisque, no nechselisque Nejuatzin. Huan nochi ne naquen nechselisque, no quiselisque Notajtzin Dios naquen nechualtitanic. <sup>41</sup> Huan nochi taneltocani ten quiselisque se itanahuatijcau de Dios porín yejua huitza itencopa de Totajtzin Dios, yejuan nojón no quiselisque ne tetayocolil de Dios ijcón queme in tanahuatijque. Huan nochi taneltocani ten quiselisque se yolchিপaucatagat porín yejua no yolcualtagat, yejuan quiselisque ne cuali tetayocolil de Dios, ijcón queme ne tagat ne yolcualtagat. <sup>42</sup> Huan nochi taneltocani ten quimacasque tzictzin sesecat ma quiyolsehui senme de nijín nomomachtijcatzitzin sayó porín yejuan notanahuatijcatzitzin, de yec melau namechilía que yejuan nojonques quiselisque ne tetayocolil de Dios.

**Nican tajtoa de queniu imomachtijcahuan in Juan Taahuijque  
yajque quinojnotzatoj Jesús Temaquixtijque**

(Lc. 7.18-35)

**11** Huan Jesús quintamitequimactij ya ne majtactionome imomachtijcahuan. Huan de ompa Jesús quinquanteu imomachtijcahuan huan yajqui tanojnotzato huan quitenextilito in Tajtoltzin de Dios itech ne pueblojuani campa ninpueblojuan imomachtijcahuan. <sup>2</sup> Huan in Juan Taahuijque tzactoya cárcelijtic huan quimatiltijque Juan den tachihualisme de Jesus in Cristo Temaquixtijque. Ijcuacón Juan quintitanic ome imomachtijcahuan huan yejuan yajque, <sup>3</sup> huan quitajtolititoj Jesús ijcuín:

—¿Cox melau Tejuatzin ya ti Cristo tanahuatijque de Dios ten hualasquía? Oso, ¿cox ticchiasque oc ma huiqui ocsé tanahuatijque de Dios?

<sup>4</sup> Ijcuacón in Jesús tananquiliy ijcuín:

—Xiyacan huan xicmatiltitij ne Juan de nochi notachihualisuan ten nanquicacocque ya huan ten nanquitzocque ya. <sup>5</sup> Xictapohuican ne Juan de que in ixpoyome Nejuatzin niquntachialij ya. Huan in coxojme, axcan niqinnejnemiltij ya. Huan nochi cocoyani ten cocotocatoyaj ninacayo, axcan Nejuatzin niqinchipahuac ya huan niqinpajtij ya. Huan nochi naquen amo tacaquíaaj, axcan niquntacaquiltij ya. Huan in taca ten momiquilijcaj ya, yejuan nojonques niqinpanquixtij yoltocque. Huan no xictapohuican ne Juan que neques ten ixnestinemij que pobres huan amo teyi chihuanime, yejuan nojonques niqinnextilijtoc in yancuic Tajtoltzin de Dios

ten cualcui ne nemaquixtilis. <sup>6</sup> Huan tatiochihual ya nochi naquen amo quitahuel-caquij huan amo no moyolxocolíaj oc cuac quicaquij notajtoluan.

<sup>7</sup> Huan cuac imomachtijcahuan den Juan Taahuijque yajque ya, ijcuacón Jesús pehuac quinnojnztac in tacaquini de toni chiuque ne Juan Taahuijque. Huan Jesús quiniliaya ijcuín:

—¿Huan toni nanquitatoj campa ne Juan tanojnztzoya nepa campa tayiucan? ¿Xe nanquisque para nanquitatoj se tagat ten yolmoucat ten quinejnehuilía queme acaselot ten nepa huan nepa cuihuica in ejecat? <sup>8</sup> Huan como amo ijcón nancajsicque, ¿toni nanquitatoj? ¿Xe nanquisque para nanquitatoj se tagat de que taque-ntoc ica tilma ten semi cualtzin? Xiquitacan san, nanquimatij ya namejuan que ne naquen motaquentía huan mocualnextíaj ica tilma cualtzin, yejuan nojonques yetocque sayó ichanuan den huejueyinme tayecanani reyes. <sup>9</sup> Huan como amo ijcón nancajsicque, ¿toni nanquisque nanquitatoj? ¿Xe nanquisque para nanquitatoj se itanahuatijcau de Dios? Quema, ijcón melau nanquitatoj. Huan no namechilía que ne Juan Taahuijque, yejua ne in cachi hueyi chiuque huan que nochi in osequin tanahuatiani de Dios ten nemicoj ya. <sup>10</sup> Huan tajtoa de Juan tech in Tajcuilolamatzin de Dios campa quijtojca ijcuín:

Xiquitacan, Nejuatzin nictitanic se notanahuatijcau huan yejua mitzyecanas, huan mitzachtohuijtiyás para mitzyeyjectalilijtiyás moojpan.

<sup>11</sup> Huan de yec melau no namechilía ijcuín:

—Amo aquen ongac ocsé cachi hueyi chiuque de nican talticpacuani. Ta, sayó ne Juan Taahuijque. Pero axcan se tagat ten amo hueyi chiuque huan motemactis imaco Cristojesús ma Yejuatzin quiyolyecana inemilis, yejua ne cachi hueyi tatiochihualis quiselijtiyás huan que ne Juan Taahuijque quiselij. Huan axcan ne Juan Taahuijque amo hueyi chiuque oc.

<sup>12</sup> Huan ijcón Jesús quinnextiliaya imomachtijcahuan ijcuín:

—Itech ne tonalme cuac Juan Taahuijque achtopa nemico tohuan hasta axcan, Totajtzin Dios naquen tayecana ne eluiyactzinco, Yejuatzin quimonequiltij de que ma in tagat taneltocacque ma moyoyolchicahua huan ma mofuerzajuía para ma Dios quiyolyecana ica ichicahualis. Huan nochi naquen moyoyolchicahuas itech Cristo, yejua ne huelis calaquis campa Dios quinyolyecanas imomachtijcahuan ica ichicahualis. <sup>13</sup> Huan nochi nijín tanahuatiani de Dios huan tanahuatilme de Moisés, nochi yejuan tatetapohuijtihualayaj ica ne chicaucatajtolis de que Dios quimonequiltis quinyolyecanas itaneltocacahuan ica ichicahualis. Huan in Juan Taahuijque no tajtojtihuala ica nijín tajtolis.

<sup>14</sup> Ijcuacón no Jesús quinilij ijcuín:

—Como nanuelij nancajsicamatij nijín tajtol, namechyequilisque que in Juan Taahuijque, yejua ne tanahuatijque de Dios monotza Elías den achtopa quijtojcaj ya in tanahuatiani que hualasquía. <sup>15</sup> Huan ijcón nochi naquen quipías inacasuan para tacaquis, ma yec tacaqui huan cajsicamatis.

<sup>16</sup> Huan Jesús quinmachtij in tacaquini ica nijín nexcuitil:

—Huan, ¿tonica niquinnejnehuililitis in tagayot ten nijín tonalme nemij? Niquinnejnehuililitía queme coneme ten motalijtinemij tech in plaza huan tzajztinemij ihuan ocsequin coneme ten ninuan mahuiltijtinemíaj. <sup>17</sup> Huan sequin de ne coneme quilisque ocsequin ijcuín: “Tejuan ticnequíaj namohuan timahuiltisque huan tejuan tamechtatzotzoniliayaj huan tejuan no tamechtapichiliayaj, pero namejuan amo



nanquinecque nanmijtotisque. Huan no tamechcantarohuiliayaj ica ocsequin canciones ten tetayocoltíaj, pero namejuan amo no nanchocacque”.

Huan no in Jesús quinilij in tagayot ijcuín: Huan ijcón queme nijín coneme sayó teijitojtinemíaj, namejuan sayó nantatejtenehuani san. <sup>18</sup> Pero cuac huala Juan Taahuijque, ijcuacón yejua ne amo teltacuaya huan amo no tayaya ne vino queme namejuan. Huan ijcón namejuan nanquijtojqe que Juan quiapiaya iyolijtic se amocuali ejecat. <sup>19</sup> Huan cuac Nejuatzin nihuala, Nejuatzin ni Yectagatzin, ijcuacón nitacuaya huan nitayaya ne vino, huan no ijcón namejuan nannechijtohuiliayaj ijcuín: “Xiquita san nijín tagat Jesús de Nazaret, yejua ne teltacua huan tayitinemi ne vino huan no motasojtatinemi ihuan ne tatopaluiami huan no motasojtatinemi ihuan neques ten amo quitacamatque itanahuatil in Moisés”. Huan in Tajtoltzin de Dios technextiliaya ijcuín: “Huan Dios itanemililis monextijtiyás tech in chipaucanemililis den naquen melau yec tacuautamati ihuan Dios”.

**Nican Jesús Temaquixtijque quinmachtij in tacaquini de ne  
taca amo tatacamatini que yejuan melau tajyohuisque**

*(Lc. 10.13-15)*

<sup>20</sup> Huan ijcón in Jesús pehuac quinchicaucanajnahuatía ne pueblojuani campa Yejuatzin quichihuac ne cachi huejueyin mohuiscatequime. Porín ne pueblojuani melau amo moyecyolnemiliayaj den nitajtacoluan. <sup>21</sup> Huan Jesús quinilij ijcuín:

—Nantelteicneltiani namejuan, pueblojuani de nanpohuij de ne pueblo monotza Corazín. Huan no ijcón nantelteicneltiani namejuan, nanopueblojuani de Betsaida, porín amo nanmoyecyolnemiliayaj de namotajtacoluan. Huan in pueblojuani de Tiro huan Sidón cachi moyecyolnemilisqueíaj ya de nintajtacoluan como ijcón quitasquíaj queme namejuan nanquitacque ya nijín mohuiscatequime ten nicchi-huac ya. Quema, in pueblojuani de Tiro huan Sidón, yejuan cachi moyecyolnemilisqueíaj ya huan motaquentisqueíaj ya ica ne tilma den tzastic huan moixcounexusquíaj ya para ixnesisqueíaj que yejuan quiyecajscamatisquíaj ya que yejuan tajtaclejqe.

<sup>22</sup> Huan ijcón no Jesús quinilij:

—Huan ne tonal cuac namopan huetzis ne hueyi tatzacuilitis, ijcuacón yec melau cachi hueyi tatzacuilitis nanquiselisque namejuan. Huan ne tagayot campa pueblos de Tiro huan Sidón amo cachi hueyi tatzacuilitis quiselisque. <sup>23</sup> Huan namejuan, pueblojuani de Capernaum, nanmoyolcayahuaj san porín nanmoyolueyinectinemij huan nanquinequij nanajsisque hasta ne eluiyactzinco. Pero xicmatican que Dios namechtajyohuiltis huan namechtalpantalis hasta ne tani campa in ánima-jme tajyohuijtojqe. Huan in pueblojuani de Sodoma cachi moyecyolnemilisqueíaj ya den nintajtacoluan como quitasquiaj ya ijcón queme namejuan nanquitacque ya nijín mohuiscatequime ten Nejuatzin nicchihuac namohuan, huan ijcón yejuan ne pueblojuani yetosquíaj tohuan oc hasta axcan. <sup>24</sup> Ica ya nojón namechilía que ne tonal cuac namopan huetzis ne hueyi tatzacuilitis, ijcuacón melau cachi hueyi tatzacuilitis nanquiselisque namejuan huan que ne pueblojuani ten quiyehualojtoyaj Sodoma.

**Nican Jesús Temaquixtjque quinilij in tacaquini ijcuín:  
“Xihualacan nohuan huan namechyolsehuis”**

*(Lc. 10.21-22)*

<sup>25</sup> Huan tech nojón tonalme Jesús quilij Itajtzin Dios ijcuín:

—Nimitzonueyimohuistilía, Notajtzin Dios, tion Tecotzin den eluiyactzinco huan den nican talticpac. Porín Tejuatzin tiquintatilij ya nijín taixmatilis para ma amo quimatican in taixmatini huan in tamachilejque. Huan Tejuatzin tiquinnextilij ya in yec taixmatilis de nijín moyancuicataneltocacahuan ten voltanemilijtinemij queme coneme ten ayamo yec yolmajsij. <sup>26</sup> Huan ma ijcón ticonchiutica, Notajtzin Dios, porín Tejuatzin ijcón ticonmonequiltía. <sup>27</sup> Huan Tejuatzin Notajtzin tinechonmactilij ya nochi nijín chicahualisme huan tanemililisme. Huan amo aca nechixmatis nejua nimoconetzin. Ta, sayó Tejuatzin ti Notajtzin tinechonixmati. Huan amo no aquen mitzonequixmatis Tejuatzin Notajtzin. Ta, sayó Nejuatzin nimoconetzin nimitzyequixmati ya. Huan no Nejuatzin nimoconetzin niqunyecnextilis de que aconi Tejuatzin Notajtzin para nochi naquen niconmonequiltía niquinnextilis.

<sup>28</sup> Huan no Jesús quinilij in tacaquini ijcuín:

—Xihualacan nohuan, nochi namejuan naquen nanmotequiltitjocque huan nantamamatocque ica ne tajyohuilis de namotajtacoluan. Xihualacan namejuan nohuan, huan Nejuatzin namechmacas ne yolsehulis. <sup>29</sup> Huan nicnequi xicselican notamachilis itech namonemilispán, queme se yugo ten huelis namechyecantinemis tech moojpan. Huan ica cuali ximomachtican de nejua, porín Nejuatzin niyolyemancatagat; huan niyolcualtagat huan ijcón nancajsisque ne yolsehulis tech namoyoljuan. <sup>30</sup> Porín in yugo de namechtalilis, yejua ne semi amo etic. Huan in tamamal ten Nejuatzin namechmacas, yejua ne semi amo no tesiouti.

**Nican tajtoa de queniu imomachtijcahuan Jesús Temaquixtjque  
cajocuicque trigojtet tech ne tonal de nesehuilis**

*(Mr. 2.23-28; Lc. 6.1-5)*

**12** Huan tech nojón tonalme Jesús panotiaya campa tatocala ica trigo tech se tonal de nesehuilis. Ijcuacón imomachtijcahuan peuque mayanaj. Huan de ompa yejuan peuque cuijuitiyáj huan quiyolcopinayaj nijín trigo huan quicuayaj. <sup>2</sup> Huan cuac in fariseos quintacque ton quichiutiyayaj imomachtijcahuan, ijcuacón quilijque Jesús ijcuín:

—Xiquita, momomachtijcahuan quichiutocque ten amo monequía quichihuasquía tech nijín tonal de nesehuilis.

<sup>3</sup> Huan Jesús quinilij ijcuín:

—¿Xe namejuan amo queman nanquileerojque ten quichihuac in rey David huan itapalehuijcahuan cuac mayanque? <sup>4</sup> Pos in rey David calayic ichantzín Dios huan quincuaaj ne panes ten quitilijcaj ya iixpantzínco Dios para ica quimohuistilisque Dios. Huan nojón panes Dios amo quimonequiltiaya ma acsá quicuanij nión in rey David nión nitapalehuijcahuan. Ta, sayó ma quicuanij in tiopixcame judíos. <sup>5</sup> Huan, ¿xe amo no nanquileerojque tech in tanahuatil de Moisés que ne tiopixcame judíos tequitij tech in tiopan de Dios masqui tech in tonal de nesehuilis? Pero yejuan amo motajtacolmacaj cuac tequitij tech in tonal de nesehuilis. <sup>6</sup> Huan Nejuatzin namechyequilía que nican niyetoc huan cachi nihueyichiuque que ne tiopan de Dios.

<sup>7</sup> Huan, ¿xe namejuan amo nanquimatij toni quijsosnequi nijín tajtol?, ten Dios quijsotj ijcuín: “Nicnequi xicpiacan ne teyolicnelilis, huan amo nicnequi sayó xinechte-nilican tapijalme san para ica nannechmohuistilisque”. Huan tacán namejuan nanquimatisque ya toni quijsosnequi nijín tajtol, ijcuacán amo nanquintelchihuasque oc nomomachtijcahuan ten amo teyi quichiuque ten Dios amo quimonequiltía.

<sup>8</sup> Huan ijcón in Jesús quinyecajsicamatiltij ijcuín:

—Xicmatican ca cuali que Nejuatzin ni Yectagatzin huan ni Tayecancatzin de ne tonal de nesehuilis. Huan Nejuatzin nicpixtinemi tanahuatil para niteilis toni cualtías se quichihuas tech ne tonal de nesehuilis.

**Nican tajtoa de queniu Jesús Temaquixtijque  
quipajtij se cocoxque mamijmiqulotic**

(Mr. 3.1-6; Lc. 6.6-11)

<sup>9</sup> Huan ijcón in Jesús panotiaya huan yajqui calayic tech in tiopan de judíos.

<sup>10</sup> Huan ompa tocotzyetoya se cocoxque den imay mamijmiqulotic. Huan in tagayot judíos sayó quipijpixinemíaj Jesús para quenín huelis quiteluilisque. Huan ijcón yejuan quitajoltijque Jesús ijcuín:

—¿Xe Dios quimonequiltía ma onga tapajtilis de cocoyani tech nijín tonal de nesehuilis?

<sup>11</sup> Ijcuacán in Jesús tananquiliij ijcuín:

—Nican yetoc se nexcuitil: Tacán namejuan nanquipiasquíaj se ichcatzin huan huetzisquíaj tech se amel tech in tonal de nesehuilis, ¿xe amo nanyasque nanquiquixtitihue in tapialtzin? Pues quema. <sup>12</sup> Huan cuali nanquimatij que cachi valeroa se tagat huan que se ichcatzin. Ica ya nojón Dios melau quimonequiltía ma ticchihua-can ten cuali tech in tonal de nesehuilis.

<sup>13</sup> Huan ijcón in Jesús quilij in cocoxque ijcuín:

—Ximomamelahua.

Huan cuac in cocoxque momamelahuac ya, ijcuacán ne imay pajtic ya ijcón queme ne ocsé imay. <sup>14</sup> Huan de ompa quisque in fariseos den tiopan huan peuque quiyolnemiliyaj quenín huelis para quimictisque Jesús.

**Nican tajtoa de queniu Jesús Temaquixtijque quinmactis  
de ne taquehualtzin ten Totajtzin Dios quinotzac ya**

<sup>15</sup> Huan cuac in Jesús quimatic que in fariseos quinequíaj quimictisque, ijcuacán Yejuatzin yajqui huan quitociliyaj míac tagayot. Huan ijcón Jesús quinpajtiaya míac cocoyani. <sup>16</sup> Pero Jesús quinyecnajnahuatia ya ma amo teyi quijsotj aconicatca Yejuatzin. <sup>17</sup> Huan Jesús quinilij ijcón para ma mochihua ten quijsuilojca ne huejcautanahuatijque de Dios monotza Isaías cuac yejua tanojnotzaco ijcuín:

<sup>18</sup> Dios quijsotj que nican yetoc Notaquehual ten Nejuatzin nicnotzac ya.

Yejuatzin ne Notasojconetzin huan nechyolpactía.

Huan Yejuatzin ya ne nicyolpepexocaltij ya ica Noyecticatzin Espíritu.

Huan Yejuatzin quinajsicamatiltis in tagayot ten amo pohuij ihuan Dios de quenín para yec chipaucanemisque.

<sup>19</sup> Huan Notaquehual amo elihuistiquiu huan amo motehuijtinemis nión no tzajztitinemis campa ojmaxalme.

Huan amo aquen quicaquisque nitajtolis tech in hueyi ojme.

<sup>20</sup> In tajtacolejque ten yolcueptocque niquinejnehuililtía queme in acat ten quimatetziloa in ejecat.

Huan Notaquehual huala para quinyolmelahuaco huan para quinyolchipahuaco neques den tajtacolejque huan amo para quintzojcuilojtiquiu.

Huan ijcón quichihuati Notaquehual hasta ne tonal cuac nochi tamis ya in tajtacolnemilis.

Ijcuación motamichihuas in yec chipaucanemilis.

<sup>21</sup> Huan in talticpacuani ten amo pohuij ihuan Dios quichixtosque Notaquehual ma quinmaquixtiqui.

### **Nican quiteluilijque Jesús Temaquixtjique que yejua cuicatinemi in chicahualis den amocuali Satanás**

*(Mr. 3.19-30; Lc. 11.14-23; 12.10)*

<sup>22</sup> Huan cualcuilijque campa Jesús se tagat ten quiapiaya iyolijtic se amocuali ejecat, se tagat nontzin ten amo tachiaya nión tajtoaya. Pero Jesús quipajtj huan ne tagat huelic tachíac ya huan huelic tajtoj ya. <sup>23</sup> Ijcuación nochi in tagayot quimoucaitayaj huan quijtoayaj ijcuín:

—¿Xe yejua nijín ne Temaquixtjicatzin iconetzin de ne rey David?

<sup>24</sup> Huan cuac in fariseos quicacque nijín matájtanti, ijcuación quijtoayaj ijcuín:

—Nijín tagat Jesús amo quincalanquixtía in amocuali ejecame ica ichicahualistzin de Dios. Ta, yejua quincalanquixtía in amocuali ejecame ica ichicahualis den amocuali Beelzebú naquen quinyecantoc in amocuali ejecame.

<sup>25</sup> Ijcuación Jesús quintanemililixmatic huan quinilij ijcuín:

—Huan tacán in pueblojuani de se país moxexxelojtocque se huan ocsé huan motehuisque san, ijcuación ne país nochi mohuejuelosque san. Huan no ijcón como in tagayot de pueblo oso se calyetoni moxexxelojtosque se huan ocsé ica xolojpijyot, ijcuación ne calyetoni amo queman huelis sen yetosque ica paquilis. <sup>26</sup> Huan tacán in amocuali Satanás quicalanquixtis se amocualicniu ica yejua mismo ichicahualis, ijcuación yejua ne motehuía yejua mismo san. Huan ijcón amo huelis huejcahuas nichicahualis. Ta, niman huejuelihuis ichicahualis.

<sup>27</sup> Huan no Jesús quinilij in fariseos ijcuín:

—Namejuan nanquijtoaj que Nejuatzin niqincalanquixtía in amocuali ejecame ica in chicahualis de ne in amocuali tayecanque Beelzebú. Pero tacán ijcón nicchihuas, ¿ijcuación aconí oc quinmacas chicahualis ne namoconejuan de ne namopueblojcahuan para ma yejuan quincalanquixtican in amocuali ejecame? ¿Xe in Satanás quinmacas namoconejuan ne ichicahualis? Pues amo melau. Ta, Totajtzin Dios quinmaca ne ichicahualis. <sup>28</sup> Ica ya nojón namejuan namoconejuan namechtenextíaj que nanmocajcayautocque san. Porín Nejuatzin ya niqincalanquixtía in amocuali ejecame ica in chicahualis den Yecticatzin Espíritu. Huan nochi nijín ten nicchihuac quijtosnequi que ejcoc ya in tonal queman Dios momasoutoc namotzalan huan quinyolyecana itaneltocacahuan ica ichicahualis.

<sup>29</sup> Huan Jesús no quinilij in tacaquini ijcuín:

—Se tagat ten semi chicahuac monequi ma achtopa quitzijtzicocan para que ijcón huelis quihuejuelohuilisque icalten huan para huelis cuilisque ten niaxca. Porín sayó ijcón huelis quichtequilisque ten niaxca. Huan xicmatican que no ijcón Nejuatzin nicuejuelos in chicahualis den amocuali Satanás. <sup>30</sup> Huan nochi naquen amo no-

huan pohui, yejua ne nechixnamiqis. Huan nochi ne tequitini ten amo nechpale-huisque cajocuisque in taquilome, yejuan nojonques sayó taijitaocojtinemisque san. <sup>31</sup> Ica ya nojón namechilía ijcuín: Nochi tajtacolme den taca oso in ne mohuispolo-lis ten yesqui, Dios nochi huelis quintapojpoluis. Pero naquen quimohuispolos in Yecticatzin Espíritu, yejua ne amo ica quípías oc ne tapojpoluilis. <sup>32</sup> Huan nochi naquen nechmohuispoloa Nejuatzin ni Yectagatzin, yejua ne Dios huelis quitapojpoluis. Pero naquen quimohuispoloa in Yecticatzin Espíritu, yejua ne Dios amo queman quitapojpoluis, nión axcan tech nijín tonalme huan nión no huelis mopale-huis oc campa ne tatzacuilitoyan de mictan.

**Nican Jesús Temaquixtijque quinajsicamatiltij in tacaquini de ne cuohuit ten moixmati ica itaquilohuan**

*(Lc. 6.43-45)*

<sup>33</sup> Huan ijcón in Jesús quinejnehuilitij se cuohuit queme se inemilis, huan quinilij in tacaquini ijcuín:

—Huan como cuali selistoc in cuohuit, no cuali tzojtzopez yesqui itaquilohuan; huan como amo cuali selistoc in cuohuit, amo no cualtías itaquilohuan. Ta, no xojxococ yesqui. Porín in cuohuit moixmati ica itaquilohuan. <sup>34</sup> Huan namejuan nantacajcayahuani queme in cohume. ¿Quenín huelis nantanojnotzasque ica ten cuali, como namejuan amo nanyolcualime? Huan namejuan nanyolpexontoque ica mías tenesi tanemililisme de namejuan san. Huan ica nijín nantajtoaj ten amocuali. <sup>35</sup> Huan in tagat den yolchipahuac, yejua ne tajtoa ica ten cuali porín nitajtolis hualehuac tech ne iyolchipahualis. Huan in tagat den amo yolchipahuac, yejua ne tajtoa den pitzotic porín yoltzojcuiltic ica tajtacol. <sup>36</sup> Huan no namechilía que tech ne tonal cuac namotech huetzis ne hueyi tatzacuilitis, nochi namejuan nanquitactijtihue iixpantzinco Totajtzion Dios nochi ten nantajtojtinenque huan nochi ten nanquichiutinenque nican talticpac. <sup>37</sup> Porín ica namotajtoluan ten cuali, Dios namechilis que namejuan nanyolchipauque ya. Huan ica namotajtolis ten pitzotic, Dios namechtelchihuas.

**Nican Jesús Temaquixtijque quinmachtij in tacaquini den tagayot ten amo yolcualime huan tenica fuerza tajtani se nescayot de Dios**

*(Mr. 8.12; Lc. 11.29-32)*

<sup>38</sup> Huan in fariseos huan in tanextiliani de tanahuatil de Moisés quilijque Jesús ijcuín:

—Tamachtijque, ticnequij xitechonnextili se tequit tenica ticmatisque cox melau tihuala de Dios.

<sup>39</sup> Huan ijcón Jesús tananquilij ijcuín:

—Namejuan nanyolchichicque huan nanyolcucuepme de namotamachilis porín nanquinequij ma nicchihua se tequit tenica huelis nanquitasque cox melau nihuitza de Dios. Huan amo huelis oc ma namechnextili se nexcuitil porín Dios techmacac ya ne nexcuitil de huejcautanahuatijque in Jonás. <sup>40</sup> Huan in nexcuitil de Jonás yej nijín: Ijcón queme nijín Jonás yetoya ipoxijtic den ne hueyi pescado huan quichihua eyi tonal huan eyi yohual, no ijcón xicmatican que Nejuatzin no ni Yectagatzin niyetotiu ne taltampa eyi tonal huan eyi yohual satepan de ne cuac nechmictisque ya. <sup>41</sup> Huan in tagayot ten calyetoyaj tech ne pueblo Nínive moajocuisque cuac ejcos

ne tonal de hueyi tatzacuilitis huan namechtelchihuasque porín ne pueblojuani de Nínive moyolnemilijque huan moyolpatacque cuac yajqui in tanahuatijque Jonás quinnojnnotzato ica in Tajtoltzin de Dios. Huan namejuan amo nanmoyolnemilijque de namotajtacoluan huan amo no nanmoyolpatacque, huan nican niyetoc Nitaquehual de Dios huan cachi nihueyi nichiuque huan que ne Jonás. <sup>42</sup> Huan in sihuat yejua tayecanque den talme de sur ten monotza Seba, yejua ne moajocuis cuac ejcos ne tonal de hueyi tatzacuilitis huan namechtelchihuas. Porín ne sihuat tayecanque huala tech ne talme den sur semi huejca, huan caquico ne tamachilis cualtzin de rey Salomón. Huan namejuan amo nannechcaquilijque notamachtilis huan Nejuatzin nican niyetoc huan cachi hueyi notamachtilis huan que ne rey Salomón.

**Nican Jesús Temaquixtijque quinmachtij in tacaquini de ne amocuali ejecat ten yajqui ocsepa tech iyolijtic ne tagat campa yetoya**

*(Lc. 11.24-26)*

<sup>43</sup> Huan no Jesús quinilij in tacaquini ijcuín:

—Huan cuac se amocuali ejecat quisac ya tech iyolijtic de se tagat, ijcuacán ne ejecat nemi nohuiyan campa tayiucan huan quitemojtinemi can huelis mosehuis itech iyolijtic de ocsé tagat huan yejua amo cajsis. <sup>44</sup> Huan monemilía in amocuali ejecat huan quijtoa ijcuín: “Cachi cuali nimocuepas ocsepa campa nihualehuac”. Huan cuac mocuepa ya campa hualquisac, ijcuacán quinamiqui in tagat yoliuqui huan tachipahuiyan huan tachijchiutoc, pero amo yolpexontoc ica in Yecticatzin Espíritu. <sup>45</sup> Huan ijcón in amocuali ejecat yohui huan quinuica ocsé chicome amocuali ejecame ten cachi pitzoticque, huan nochi calaquitij huan mocaltalitij itech ne tagat iyolijtic. Ijcuacán ne tagat mocahuas cachi yolpitzotic huan que ne achtopa catca. Huan no ijcón quipanosque in talticpacuani ten axcan nemij, ten amo yec yolcualime.

**Nican tajtoa de queniu in nantzin huan niicnihuan de Jesús Temaquixtijque hualajque quitemocoj Yejuatzin**

*(Mr. 3.31-35; Lc. 8.19-21)*

<sup>46</sup> Huan cuac in Jesús quinnojnnotztoya oc in tagayot ne calijticpa, ijcuacán ne momento ejcocque ne calampa inantzin huan iicnihuan de Jesús huan yejuan quinequíaj quinnojnnotzasque. <sup>47</sup> Huan senme den ne calan yetoya quinejmachtij Jesús huan quilij ijcuín:

—Xicaqui Tejuatzin, nepa caltenojpa yetocque monantzin huan mocnihuan; yejuan quinequij mitznojnotzasque.

<sup>48</sup> Ijcuacán in Jesús quinanquilij ne tagat naquen cualcuilij in tajtol, huan Yejuatzin quijtoj ijcuín:

—¿Aconi nonantzin, huan aconi nocnihuan?

<sup>49</sup> Ijcuacán in Jesús quinonnextilij imomachtijcahuan huan quinilij in tacaquini ijcuín:

—Xiquinitacan nepa yetocque nomomachtijcahuan, yejuan ya ne nonantzin huan nocnihuan. <sup>50</sup> Porín namechilía que nochi naquen quitacamatiij ijcón queme quimonequiltía Notajtzin Dios ten yetica eluiyactzinco, yejuan ya ne niquinpohuas queme nocniusihuat huan no yejuan ya ne nocniutagat huan no yejuan ya nonantzin.

**Nican tajtoa de queniu Jesús Temaquixtijque quitalij se  
nexcuitil den se tagat den tatepeutinemic ica trigo**

*(Mr. 4.1-9; Lc. 8.4-8)*

**13** Huan cuac ne tonal Jesús quisac tech ne cali huan yajqui motalito tech se atenteno. <sup>2</sup>Huan ompa mosentilijque míac tagayot campa Jesús yetoya, huan Jesús calayic tech se barco de ne apanoloni huan ompa motalij tech in barco. Huan nochi in tagayot mocauque tech ne atenteno. <sup>3</sup>Huan Jesús quinnextiliaya ica míac tataman nexcuitilme huan quiniliaya ijcuín:

—Xiquitacan, se tonal quisac se tagat para quitepehuas in tatoc de trigojtet. <sup>4</sup>Huan cuac quitepehuac ya, ijcuacón mochihuac que cansaica huetzic in tatoc ojtenteno. Huan hualajque in tototztzin den patantinemij ejecaixco huan quicujcoj. <sup>5</sup>Huan ocsecan cansaica huetzic in tatoc de trigo itech tepetatal campa amo oncaya míac tal. Huan in xinach nimantzin ijsiucaxuac porín amo tilahuac in tal quiapiaya. <sup>6</sup>Huan cuac panquisac ya in tonaltzin, ijcuacón machichinahuic. Huan queme amo quipi-aya míac inaluyo, niman huayic. <sup>7</sup>Huan ocsecan cansaica huetzic in tatoc de trigo huitztalan; huan in huitzti ixuac itzalan in tatoc huan quipachoj in tatoc. <sup>8</sup>Huan ocsecan cansaica huetzic in tatoc de trigo itech cualital huan ompa quitemacac míac taquilome. Huan sequin de nijín tatoc de trigo motaquiltij ocsé macuilpoal taquilome. Huan sequin tatoc motaquiltij ocsé eyipoal taquilome; huan sequin tatoc motaquiltij sempoal huan májtacti taquilome.

<sup>9</sup>Huan de ompa Jesús quinilij ijcuín:

—Naquen quipía ninacas para tacaquis, ma yec tacaqui huan cajsicamati nijín tanextililis.

**Nican Jesús Temaquixtijque quinmejmelaquilij  
imomachtijcahuan queyé tamachtij ica nexcuitilme san**

*(Mr. 4.10-12; Lc. 8.9-10)*

<sup>10</sup>Huan ijcón imomachtijcahuan motoquijque campa Jesús yetoya huan quitaj-  
toltijque ijcuín:

—¿Queyé tiquinnojnotza in tagayot ica in nexcuitilme san?

<sup>11</sup>Ijcuacón in Jesús quinnanquilij ijcuín:

—Dios namechmatiltijtoc ya namejuan nannomomachtijcahuan de ne ichtacata-  
machilisme de queniu Dios quinyolyecana itaneltocacahuan ica ichicahualis. Pero  
in ocsequin tagayot ten amo pohuij ihuan Dios, yejuan nojonques Dios amo quina-  
ajsicamatiltis. <sup>12</sup>Huan nochi ne naquen quipíaj tamachilisme de Dios huan quite-  
quiltiltijtoc, yejua ne cachi oc Dios quinmajxtilis. Pero nochi ne naquen quipías  
tzictzin san tamachilisme de Dios, yejua ne majyá amo teyi quipiasquía porín amo  
quitequiltíaj in tepitzin san ten quipíaj, huan Dios quintamicuilis ne ten tepitzin  
san. <sup>13</sup>Ica ya nojón niquinnojnotza ica nextilme para ma in tagayot ma quitacan  
notanextililis. Pero como amo yec taneltocaj, ijcuacón yejuan mocahuasque ma-  
jyá amo queman quitacque. Huan no namechnojnotztoc ica nexcuitilme para ma  
in tagayot ma quicaquican notajtoluan. Pero como amo no yec taneltocaj, ijcuacón  
yejuan nojonques mocahuasque majyá amo queman quitacque nión cajsicamatque.  
<sup>14</sup>Huan ijcón mochihuac ten quijcuilojca ya in tanahuatijque Isaías cuac quijtojca  
ijcuín:

Huan namejuan cuali nanquicactocque ya, pero amo no nanmomacasque cuenta.

<sup>15</sup> Porín namejuan nanpueblojuani semi nanyolpicticque de namotamachilis porín nanquitahuelicaquij.

Huan nanmoixtactocque, para ma amo xiquitacan namotajtacoluan,

Huan para ma amo xiyectacaquican ica namonacasuan,

Huan para ma amo xicyeajscamatican itech namoyolojuan.

Huan amo no nanquiyolnemilisque que ximocuepacan de namotajtacoluan, para ma Dios namechyolpajti den namotajtacoluan.

<sup>16</sup> Huan Jesús no quinilij imomachtijcahuan ijcuín:

—Tatiochihualme namoixtololohuan porín nanquitzocque ya namotajtacoluan; huan tatiochihualme namonacasuan porín nanquieccaquij in Tajtoltzin de Dios.

<sup>17</sup> Huan de yec melau ten namechilía que miacque tanahuatiani de Dios huan miacque tagayot yolcualime quinequíaj quitasque ten namejuan nanquitzocque axcan, pero yejuan amo quitacque. Huan míac tanahuatiani de Dios huan tagayot ten yolcualime quinequíaj quicaquisque ten namejuan nanquicaquij axcan huan yejuan amo quicacque.

**Nican Jesús Temaquixtijque quinajscamatiltij in tacaquini in nexcuitil den tagat tatepehua ica trigo**

*(Mr. 4.13-20; Lc. 8.11-15)*

<sup>18</sup> Huan in Jesús quinajscamatiltij imomachtijcahuan ijcuín:

—Xicaquican nijín nexcuitil de se tagat tatepeuque ica trigojtet. Huan ne trigojtet quinejnehuilía in Tajtoltzin de Dios de que Yejuatzin quimonequiltía quinolyecanas itaneltocacahuan ica ihueyichicahualis. <sup>19</sup> Huan cuac se in tacaquini quicaquij ne Tajtoltzin de Dios huan amo cajsicamatij, ijcuacón huitza in amocuali Satanás huan quincuilía in Tajtoltzin de Dios ten toctoc ya tech ninyolijtic. In trigojtet tamoyautoc ya huan huetzi ojtennacastan. <sup>20</sup> Huan in trigo tatoc ten huetzi itech tejteixco, yejua ne quinejnehuilía ne tacaquini naquen quicaquij in Tajtoltzin de Dios huan quiselíaj ica míac paquilis. <sup>21</sup> Pero nijín tacaquini amo quipíaj se yec tacuautamatilis tech ninyoltijtic, queme se naluat para quichicahualtis in tatoc. Ica ya nojón amo huejcahuas nintacuautamatilis. Huan no ijcón nijín tacaquini, cuac nintech huitza in tajyohuilis huan tahuijuicaltis porín quineltocaj notajtoltzin, yejuan nojónques niman moyolxocolíaj huan moyolcuejcupaj nintaneltoocalis. <sup>22</sup> Huan in trigo tatoc ten huetzic huitztzalan, yejua ne quinejnehuilía ne tacaquini ten quicaquij in Tajtoltzin de Dios, pero moyolcuejmoloaj ica tenesi san ten nican talticpac. Huan no quinylvoltilana oc in ricojyot. Huan nochi nijín quitajtamía in Tajtoltzin de Dios. Huan ijcón in ricojyot amo quicahua ma moscalti in Tajtoltzin de Dios para ma cuica taquilot. <sup>23</sup> Huan in trigo tatoc ten huetzic tech cualital, yejua ne quinejnehuilía in tacaquini ten quicaquij in Tajtoltzin de Dios huan cajsicamatij. Huan ne tacaquini mochihuaj ijcón queme in tatoc ten quitemaca míac taquilot. Sequin tatoc motaquiltis ocsé macuilpoal taquilome; huan sequin motaquiltis ocsé eyipoal taquilome; huan sequin motaquiltis ocsé sempoal huan májtacti taquilome. Huan nochi nijín quinejnehuilía queme in taneltocani ten quitemacasque cuali taquilome.



**Nican Jesús Temaquixtijque tanextiliaya ica nexcuitil de trigo ten quinejnehuilía queme in yec taneltocani. Huan in xihuit ten tajojcocoa, yejua ne quinejnehuilía queme se tagat ten taixcajcautoc san ica ten amocuali**

<sup>24</sup> Huan ijcón Jesús quinnextilía imomachtijcahuan ica ocsé nexcuitil ijcuín:

—Nicnejnehuililtía se tagat ten quitocac in trigo xinach tech nimila queme ichichahualis de Dios cuac Yejuatzin quiyolyecana se iyolijtic ica ne chicahualis de ne eluiyactzinco. <sup>25</sup> Huan ne tagat patrón quitocato tech nimila. Huan cuac cochtocque ya in tequitini, ijcuacón huala huan calayic tech nimila se naquen quitahuelita ne patrón. Huan yejua quitocaco se xinach ten tajojcocoa campa ne trigo xinach ten no monejnehuilía queme in trigo. Huan quitocoteu huan yajqui ocseco. <sup>26</sup> Huan cuac in trigo moscaltij ya huan pehuac chicahuaya ya, ijcuacón monextij ya ne amocuali xihuit ten quinejnehuiliaya in trigo. <sup>27</sup> Ica ya nojón in tequitini yajque quilitoj in patrón ijcuín: “Xicaqui tejuatzin, ¿xe amo cualtiaya ne trigo xinach ten tejuatzin tictocac tech ne momila? ¿Huan can hualehuac ne xihuit ten quinejnehuilíaya in trigo?” <sup>28</sup> Ijcuacón in patrón tananquilij ijcuín: “Achá acsá naquen techtahuelita quichihuac ijcón”. Huan in tequitini ocsepa quitajoltijque: “¿Xe ticnequis ma tiyacan ticuijuitatij ne xihuit ten quinejnehuilía in trigo?” <sup>29</sup> Huan in patrón quinnanquilij ijcuín: “Amo xicuijuitacan ne xihuit ten tajojcocoa. Porín como nancuijuitasque ne xihuit ten amo cualtía, achá no nancuijuitasque in trigo. <sup>30</sup> Cachi cuali ma xicahuacan ma moseniscaltican se huan ocsé hasta chicahuayas in trigo. Huan tech ne tonal cuac tachicahuayas ya ica in trigo, ijcuacón nejuatzin niquintitanis notequiticahuan para ma achto quihuijuitacan in amocuali xihuit ten quinejnehuilijtoc nijín trigo huan ma quinmanojtzitzicocan huan ma quichichinocan. Huan nimampan cajocuisque in trigo huan quiyeguehuasque itech ne trigojcal”.

**Nican Jesús Temaquixtijque quitelij se nexcuitil huan quinejnehuililtij in Tajtoltzin de Dios queme in cuohuit mostazajtet**

*(Mr. 4.30-32; Lc. 13.18-19)*

<sup>31</sup> Huan ijcón in Jesús ocsepa quinmactiaya in momachtijcahuan ica ocsé nexcuitil huan pehuac quinejnehuililtía se cuouxinach ten monotza mostazajtet ihuan in chicahualis de Dios cuac Dios quiyolyecana se iyolijtic ica ne chicahualis de ne eluiyactzinco. Huan Jesús quinilij in tacaquini ijcuín:

—Huan se tagat quicuic in mostazajtet huan quitocac tech ne imila. <sup>32</sup> Huan ne cuoumostazajtet yec melau yejua in cachi tzictzin de nochí nijín xinachme. Pero cuac moscaltis, ijcuacón mochihuas cachi hueyi huan que ocsequin xochitactzonme. Huan ne mostazajtet moscaltis huan mochihuas queme se hueyi cuohuit. Huan huitze in tototzitzin ten patantinemij ejecaixco huan ompa motapajsoltisque tech imatzacaluan.

**Nican Jesús Temaquixtijque quitelij se nexcuitil huan quinejnehuilía in Tajtoltzin queme in tamajmahualis de levadura ten calaqui toyolijtic huan techtaneltoctía**

*(Lc. 13.20-21)*

<sup>33</sup> Huan ijcón in Jesús ocsepa quinnextilij in tacaquini ica ocsé nexcuitil:

—Nicnejnehuilitía in tamajmahualis ten quiposonaltía in pantixti queme cuac Dios quiyolyecana se iyolijtic ica ne chicahualis de ne eluiyactzinco. Huan se sihuat quicuic tamajmahualis huan quimaneloj ne tamajmahualis ihuan eyi tamachiu de harina. Huan ica nojón ne tamajmahualis quiposonaltía nochi in tixti de harina.

**Nican tajtoa de queniu Jesús Temaquixtijque quinmejmelaquilij in tacaquini queyé Yejuatzin tamachtij sayó ica nexcuitilme**

(Mr. 4.33-34)

<sup>34</sup> Huan ijcón in Jesús quinnextiliaya in tagayot ica nexcuitilme. Porín como amo quicuía nexcuitilme, ijcón amo quinnextiliaya in tagayot. <sup>35</sup> Huan melau ijcón mochihuac ten quijcuilojca ya in huejcautanahuatijque de Dios cuac quijtojca ijcuín: Niquinnextiliaya in tagayot ica nexcuitilme. Huan niquinajsicamatiltía tamachilisme ten ichtacapachiutoyaj desde cuac ne tzinpehuac in talticpac.

**Nican Jesús Temaquixtijque quinajsicamatiltij in tacaquini den nexcuitil den trigo huan in xihuit ten quinejnehuilij trigo**

<sup>36</sup> Huan ijcón in Jesús quinilij in tagayot ma yacan, huan Yejuatzin calayic calijtic. Ijcuacón imomachtijcahuan motoquijque campa Jesús yetoya huan quiluijque ijcuín:

—Xitechonajsicamatilti in nexcuitil de ne xihuit ten quinejnehuilía in trigo.

<sup>37</sup> Huan Jesús quinilij ijcuín:

—Nejuatzin ni Yectagatzin nitatoca ica nochi ten cuali xinach. <sup>38</sup> Huan in milajtal tamati queme in talticpac. Huan ne ten cuali xinach quinejnehuilía in taneltocani neques ten tech ninyolijtic Dios quinyolyecana ica ichicahualis. Huan ne amocuali xinach quinejnehuilía in tagayot ten tepiluan den amocuali Satanás. <sup>39</sup> Huan in amocuali Satanás, yejua ne nechtahuelita huan yejua mismo quitocac in amocuali xihuit. Huan cuac mochihuas ne tahuijuitalis de trigo, ijcuacón quinextía que ejcotoc ya in tamilis den talticpac. Huan in ángeles taquehualme de Dios quinnextiliayinisme huan quinesecotalijtinemisque in taca ten taneltocani huan in taca ten amo taneltocani, ijcón queme in trigo huan in xihuit ten amo cualtía.

<sup>40</sup> Huan ijcón in taquehualme de Dios quihuijuitasque in amocuali xihuit huan quicuisque huan quichichinosque ya, huan no ijcón quintatzacuilitisque ne naquen amo taneltocacque. Nochi nijín mochihuas cuac ejcos ya in tamilis den talticpac.

<sup>41</sup> Ijcuacón Nejuatzin ni Yectagatzin niquinualitanis notaquehualuan in ángeles para quinolosque itech notequitilspan nochi de naquen sayó quitoque nocone huan ma motajtacolmacacan huan para no quinolosque nochi neques ten sayó quichiutinemij ten amo cuali. <sup>42</sup> Ijcuacón notaquehualuan quincuisque in tagayot ten amo taneltocacque huan quintamotasque tech ne ticonijtic campa chocatosque huan tannanzocatosque huan tajyohujtosque para sen nachipa. <sup>43</sup> Huan naquen yolchipauque ten pohuij ihuan Dios, yejuan nojonques mopaquiltisque porín tech ninyolijtic Dios quinyolyecantoc ica ihueyichicahualis. Huan yejuan calaquisque campa ne cualtzin tacacahuacatoc ijcón queme in tonaltzin cuac tanextía. Huan nochi naquen quipáj inacasuan para tacaquis, ma yec tacaquij huan cajsicamatij.

**Nican Jesús Temaquixtijque quinmachtij in tacaquini den ne nexcuitil huan quinejnehuililtij in tanahuatil de Dios queme tomin den talpachiutoc**

<sup>44</sup> Huan ijcón in Jesús quinnextiliaya imomachtijcahuan ica nijín nexcuitil ijcuín:

—Nicnejnehuililtía in tomin ten talpachiutoc ne mila queme ichicahualis de Dios cuac Yejuatzin quiyolyecana se iyolijtic ica ne chicahualis de ne eluiyactzinco. Huan se tagat moajxilía ne tomin ocseco huan quiquixtía huan ocsepa seco yejua quitalpachoti. Huan ijcón yejua moyolpaquita porín cajsic ya in tomin. Ijcuacón yohui quinamacati nochi ten niaxca huan quicohuati ne tal campa in tomin talpachiutoc.

**Nican Jesús Temaquixtijque quitalij se nexcuitil huan quinejnehuililtij in tanahuatil de Dios queme se tetzin ten petani cualtzin de semi patío**

<sup>45</sup> Huan Jesús ocsepa quinilij imomachtijcahuan ijcuín:

—Nicnejnehuililtía se tagat ten taojpacanamacacque queme ichicahualis de Dios cuac Yejuatzin quiyolyecantoc se iyolijtic ica ne chicahualis de ne eluiyactzinco. Huan yejua ne quitemojtinemi in perlas, in tetzitzin ten alaxtic huan den petanij de semi patío. <sup>46</sup> Huan cuac cajsic se perla den cachi patío, yejua ne yohui huan quinamacati nochi ten niaxca. Huan de ompa quicohuati ne perla den cachi cualtzin.

**Nican tajtoa de que Jesús Temaquixtijque quitalij ocsé nexcuitil de se matat**

<sup>47</sup> Huan Jesús quinilij imomachtijcahuan ocsepa se nexcuitil ijcuín:

—Nicnejnehuililtía ocsepa se tagat queme ichicahualis de Dios cuac Yejuatzin quiyolyecantoc se iyolijtic ica ne in chicahualis de ne eluiyactzinco. Ijcón yejua ne tagat catamota para quinqitzquis de míac tataman pescados. <sup>48</sup> Huan cuac míac pescados moolochoa tech in matat, ijcuacón in tamaajsini quiquixtíaj in matat huan cuicaj ne atenteno. Huan ompa yohue motalitij huan quinpejenaj in pescados huan quinyectálaj ten cualtía tech in pescado chiquiehualoni. Huan quinatamotaj in pescados ten amo cualtíaj. <sup>49</sup> Huan no ijcón mochihuas queman tamis ya in talticpac. Huan in taquehualme de Dios in ángeles quisasque para tequitisque huan quinesecotalisque in tagayot den yolcualime huan ten amo yolcualime. <sup>50</sup> Huan no in tagayot ten amo yolcualime quinticotamotasque campa chocatosque huan campa tannanzocatosque campa ne tajyohuilis sen nachipa.

**Nican Jesús Temaquixtijque quinmachtij in tacaquini den ricojyot den Tajtoltzin de Dios, ne den yancuic huan de huejcahuac ya**

<sup>51</sup> Huan ijcón in Jesús quinnextilij huan quinmatajtoltij imomachtijcahuan ijcuín:

—¿Xe nancajsicamatij ya nochi nijín tanextililisme?

Huan yejuan tananquilijque:

—Quema, Totecotzin, ticmatij ya.

<sup>52</sup> Ijcuacón Jesús ocsepa quinyecajsicamatiltij ica nijín nexcuitil ijcuín:

—Sequin tanextiliani den tanahuatil de Moisés cajsicamatque ya nochi in tamachilisme de que Dios quimonequiltía quiyolyecana se iyolijtic ica ne chicahualis den ne eluiyactzinco. Huan Nejuatzin nicnejnehuililtía se de nojonques tanextiliani queme se tetat de se calyetoní. Huan nijín tetat quipía tech nichan se taehualoni campa quiehua niricojyo queme yesquía yejua in Tajtoltzin de Dios. Huan in tetat

yohui quinquixtiti míac tamachilisme tech ne itaehualoni ten cualtitzin yancuicque huan no den tamachilisme ten ipa achtopa ya yetoyaj.

**Nican tajtoa de que Jesús Temaquixtijque tamachtij tech ne ipueblo Nazaret**

*(Mr. 6.1-6; Lc. 4.16-30)*

<sup>53</sup> Huan mochihuac que cuac Jesús quintamiajsicamatiltij ya in tacaquini de nijín nexcuitilme, ijcuacón Yejuatzin yajqui ya para ipueblo de Nazaret. <sup>54</sup> Huan cuac ajsic ichancopa, ijcuacón pehuac quinnextiliaya in tagayot tech in tiopan de judíos in Tajtoltzin de Dios. Huan in tagayot semi quimoucaitayaj huan quijtoayaj ijcuín:

—¿Can cajsic nijín tagat nochi nijín tamachlis? Porín melau semi quipía tamachilis. ¿Huan quenén hueli quichihua nijín mohuiscatequit de Dios?

<sup>55</sup> Huan no quijtojque ijcuín:

—¿Xe amo yejua nijín Jesús iconeu den cuouxixque José? Huan in nantzin de Jesús, ¿xe amo yejua in María? Huan nicnihuan, ¿xe amo yejua in Jacobo huan José huan Simón huan in Judas? <sup>56</sup> ¿Huan cox amo niicnihuan suame ten calyetocque tohuanme? Pues quema.

Huan no quijtojque in tagayot ijcuín:

—¿Can momachtij nijín tagat nochi nijín tamachilisme ten hueli ya?

<sup>57</sup> Huan yejua quimachiliayaj que moyolxocoliayaj ica por ne itamachtis de Yejuatzin. Huan Jesús quinilij ijcuín:

—Huan nochi in tagayot quitasojtaj se tanahuatijque de Dios. Pero nipueblo-jcahuan huan nichancahuan de ne tanahuatijque de Dios, yejua nojonques amo quitasojtaj ne tanahuatijque porín ompacayot.

<sup>58</sup> Huan Jesús amo quichihuac míac ne mohuiscatequit de Dios ompa pueblo de Nazaret porín in tagayot amo quineltocacque de nichichualis de Yejuatzin.

**Nican tajtoa de que Juan Taahuique momiquilij**

*(Mr. 6.14-29; Lc. 9.7-9)*

**14** Huan tech ne tonalme Herodes in tayecanque de Galilea quimatiltijque nichichualis de Jesús. <sup>2</sup> Huan in Herodes quinilij itequiticahuan ijcuín:

—Yejua nijín Jesús yesqui Juan Taahuijque huan Dios quiajocuic yoltoc intzalan in ánimajme. Ica ya nojón ne Juan quipía nijín chicahualis ten Dios quimactij ya.

<sup>3</sup> Huan in rey Herodes quitanahuatijca ma quitzacuacan in Juan huan ma quimaicantzicocan ca cadenas huan ma quicárceltalican. Huan melau in Herodes quichihuac ijcón porín yejua in Herodes cuilijca ya icuñada ten monotza Herodías, yejua isihuau in Felipe, huan in Felipe yejua iicniu in Herodes. <sup>4</sup> Huan Juan Taahuijque quilijca ya in Herodes ijcuín:

—Dios amo quimonequiltía que xicpohua queme mosihuau den ne isihuatzin mocniu.

<sup>5</sup> Ica ya nojón in Herodes quinequía quimictis in Juan. Pero amo quichihuac, porín quinyolmohuiliaya in pueblojuani judíos. Huan yejua ihuan motasojtayaj in Juan porín yejua tajtoaya itencopa Dios. <sup>6</sup> Huan se tonal cuac xiumajsic in rey Herodes, ijcuacón ne isuatacpaconeu pehuac mijtotía ninixpan in Herodes huan in ocsequi hueyi chihuanime. Huan itacpaconeu yejua isihuapil de Herodías, huan semi quiyolpactij nijín Herodes de ne imijtotilis. <sup>7</sup> Ica ya nojón in rey Herodes moyectencahuac ihuan isuatacpaconeu huan quitenehuac ijcuín:

—Yec melau quitztoc Dios, que nimitzmacas nochi ten tinechtajtánilis.

<sup>8</sup>Huan in isuatacpaconeu ipa achtopa ya moichtacanojnotzac ya ihuan inan. Ica ya nojón isuatacpaconeu quilij in rey Herodes ijcuín:

—Nechmaca itech se plato itzontecon ne Juan Taahuijque.

<sup>9</sup>Huan quemán quicayic ya nijín, ijcuación in rey Herodes pehuac moyolcocoa porín quijtojca ya ijcuín:

—Yec melau quitztoc Dios, nochi ten ticnequis nimitzmacas.

Huan no moyolcocoj in Herodes porín yetoya ompa quicactoyaj nochi in tayecanani de Galilea den tacuajtoyaj ihuan. Ica ya nojón in Herodes tatitanic ma quitequilican itzontecon ne Juan Taahuijque huan ma quimacacan isuatacpaconeu.

<sup>10</sup>Ijcuación quinchicaucanahuatij ma quiqechtequican in Juan tech ne cárcel.

<sup>11</sup>Huan niman cualcuilijque itzontecon de Juan ipan se caxajpas huan quimactijque in isuatacpaconeu. Huan in tacpaconeu quimactilij inanajtzin Herodías. <sup>12</sup>Huan ijcón imomachtijcahuan de Juan hualajque huan cuiyacque inacayo de Juan huan quitalpachotoj. Huan cachi satepan yajque quimatilitoj in Jesús quenín in Juan quimictijque ya.

### **Nican tajtoa de queniú Jesús Temaquixtijque quintamacac macuil mil tagayot**

*(Mr. 6.30-44; Lc. 9.10-17; Jn. 6.1-14)*

<sup>13</sup>Huan cuac Jesús quimatic ya que quimictijque ya in Juan Taahuijque, ijcuación quistehuac Yejuatzin iselti huan calayic itech se barco huan yajqui ocsecan campa tayiucan. Huan cuac in tagayot quimatque ya can yetoya Jesús, ijcuación yejuan quisque de ninpueblojuan huan yajque metznejenque atenojcopaca quitoctilijque in Jesús. <sup>14</sup>Huan cuac quisac Jesús de ne barco, ijcuación Yejuatzin quinitac huel míac tagayot huan quinyolicnelij huan quinpajtij in cocoyani ten cualcuiliayaj Yejuatzin.

<sup>15</sup>Huan quemán tapoyautiaya ya, ijcuación imomachtijcahuan motoquijque campa Yejuatzin huan quilijque ijcuín:

—Amo aquen calyetoc nican huan semi tayohuati ya. Xiquinili nijín tagayot ma yacan ya ne caltempan huan ma quicohuatij ten quicuasque.

<sup>16</sup>Ijcuación Jesús quinnanquilij imomachtijcahuan ijcuín:

—Amo monequía ma xiyacan. Ta, namejuan san huelis xiquinmacacan ten quicuasque in tagayot.

<sup>17</sup>Pero imomachtijcahuan tananquilijque ijcuín:

—Amo teyi ticpíaj nican in tacualis. Ta, sayó ticpíaj macuil panes huan no ome pescadojtzitzin.

<sup>18</sup>Ijcuación in Jesús ocsepa quinilij ijcuín:

—Xinechinualcuilican ne tacualis nican.

<sup>19</sup>Huan de ompa Jesús quinnahuatij in tagayot ma motecacan ixtahuat panían. Huan niman in Jesús quicuic in macuil pantzitzin huan in ome pescadojtzitzin. Huan mochihuac que cuac Jesús maactoya ya in tacualis, ijcuación ajcotachíac huan quitatautij Dios ma quitiochihua in tacualis. Huan de ompa Jesús quixexeloy in panes huan quinmacac imomachtijcahuan huan ijcón yejuan quinmajmacatoj in panes in tagayot. <sup>20</sup>Huan tacuajque nochi in tagayot huan ixuicque. Huan imomachtijcahuan quinsentilijque nochi pan ten tatetejtec ten mocahuac huan quipexontijque maj-

tactiomome chiquihuit oc. <sup>21</sup> Huan ne naquen tacuajque catca que me macuil mil tagayot huan amo tapouca yome in sihuame nión in coneme.

**Nican tajtoa de queniu Jesús Temaquixtisque nejnemic aixco**

(Mr. 6.45-52; Jn. 6.16-21)

<sup>22</sup> Huan de ompa Jesús quinnahuatij imomachtijcahuan ma calaquican tech in barco ma yajtocan ne sentapalpa de ne ocseco atenteno, huan ma quiachtohuican Jesús mientras Yejuatzin quinnajnahuatia ya in tagayot para ma yacan ninchan. <sup>23</sup> Huan cachi satepan cuac quinnajnahuatij ya in tagayot ma yacan, ijcuacán Jesús tejcoc campa se tal lomojtzin huan ompa iselti motatatautilito ihuan Dios. Huan ne cuac tapoyahuic ya, ijcuacán Jesús ompa yetoya ya iselti oc. <sup>24</sup> Huan que man yaya ya in barco ne tatajco ya den mar den quihuicaya imomachtijcahuan, ijcuacán pehuac mocuecuenteca in mar huan quimajmagaya in barco porín ne ejecat quitzatzaculiaya. <sup>25</sup> Huan cuac tanestihualaya ya, ijcuacán motoquijitihualaya Jesús campa imomachtijcahuan huan ijcón in Jesús nejnentihualaya aixco. <sup>26</sup> Huan cuac imomachtijcahuan quitacque Jesús nejnentihualaya aixco, ijcuacán peuque moyol-moutiayaj huan moucatzajtziáj huan quijtojque ijcuín:

—¿Toni nojón? ¡Yesqui se ánima!

<sup>27</sup> Ijcuacán niman in Jesús quinnotzac huan quintzajtzilij huan quinilij ijcuín:

—Ximoyolchicahuacan porín Nejuatzin ya ni Jesús, amo ximomoutican.

<sup>28</sup> Huan ijcón in Pedro quilij ijcuín:

—Totecotzin, como melau Tejuatzin, xicchihua que ma no nihueli ninejnemi aixco para nimitzajsitiu campa tionualajtoc.

<sup>29</sup> Huan Jesús quilij:

—Xihuiqui pos.

Huan ijcón in Pedro pantemoc den barco huan pehuac nejnemi aixco para cajsitiu campa Jesús hualaya. <sup>30</sup> Huan cuac moyolnemilij in Pedro quenín chicao caejeccaya, ijcuacán pehuac momoutía huan pehuac pancalactiu ya tech in at. Huan de ompa quitzajtzilij Jesús ijcuín:

—Notecotzin, xinechpalehui huan xinechmaquixti.

<sup>31</sup> Ijcuacán nimantzin momatilanac Jesús huan quimaquitzquij in Pedro huan quilij ijcuín:

—Tejua tagatzin, semi tepitzin san ticpía motacuaumatilis. ¿Queyé amo tiyec-tacuaumatij nohuan?

<sup>32</sup> Huan queman nochi in omen tejcocque ya huan calacque ya tech in in barco, ijcuacán motatamatilij ica in ejecat. <sup>33</sup> Huan ijcón nochi ten yayaj tech in barco motancuaquetzacoj iixpan Jesús huan quimohuistilisque ijcuín:

—Yec melau Tejuatzin tion Teconetzin de Dios.

**Nican tajtoa de que Jesús Temaquixtisque quinpajtij naquen mococoayaj tech ne pueblo Genesaretcopaca**

(Mr. 6.53-56)

<sup>34</sup> Huan cuac quipanahuijque ya in mar, ijcuacán Jesús huan imomachtijcahuan ajsitoj tech in tal ten pohuía Genesaret. <sup>35</sup> Huan cuac quixmatque ya in tagayot que Jesús yetoya ompa ya, ijcuacán quitematiltijque nohuiyampa nochi in tagayot ten quiehualojtoyaj Genesaret. Huan cualcuiliayaj m'ac cocoyani campa Yejuatzin ten

mococoayaj ica m'iac tataman cocolis. <sup>36</sup> Huan quitatautiayaj Jesús ma quincahua ma quimatocacan itilmajteno san. Huan nochin naquen quimatocacque Jesús, nochi pajtijque ya.

**Nican Jesús Temaquixtijque quinmachtij in tacaquini de  
ne tamachilis ten quimajmahua ica tajtacol in tagat**

(Mr. 7.1-23)

**15** Huan hualajque de Jerusalén huan motoquijque campa yetoya Jesús sequin fariseos huan sequi tanextiliani den tanahuatil de Moisés huan quitajtoitijque Jesús ijcuín:

<sup>2</sup>—¿Queyé momomachtijcahuan amo quitacamati in tanahuatilme ten quitenextilíaj in huehuentzitzin den pueblojuani judíos? Porín momomachtijcahuan amo quitacamati in tanahuatilis de que ma achtopa momajtequican huan tacuasque.

<sup>3</sup> Huan Jesús quintajtoitij ne tayecanani ijcuín:

—¿Queyé namejuan amo no nanquitacamati in tanahuatilme de Dios? Ta, sayó nanquitacamati in tanahuatil den huehuentzitzin den pueblojuani judíos. <sup>4</sup> Huan in Tajtoitzin de Dios technahuatilia ijcuín: “Xicmohuistili motajtzin huan monantzin; porín naquen quitelchihuas itajtzin oso inantzin, yejua nojón monequi ma quimictican”. <sup>5</sup> Pero namejuan nantanahuatíaj que huelis se tagat ma quilij nitajtzin oso ninantzin ijcuín: “Amo nihuelis namechpalehuis porín nochi ten nicpía nicaxcatilij ya Dios”. <sup>6</sup> Huan nochi naquen nesi tagat ten ijcón quichihuas, yejua nojón amo monequi oc quinpalehuis nitajtzin huan ninantzin. Huan ijcón namejuan nanquisecocautocque ya in tanahuatilme de Dios huan nanquitacamatinemij sayó ten namechnextilíaj in huehuentzitzin den pueblojuani judíos. <sup>7</sup> Namejuan nanixquequeptocque san de namotamachilis, ijcón queme Isaías ne huejcautanahuatijque de Dios quijcuiloj de namejuan cuac quijtojca itencopa Totajtzin Dios ijcuín:

<sup>8</sup> Nochi nijín tagayot judíos nechmohuistilíaj sayó ica nintenixpal san; huan ninyolojuan huejca yetoc de Nejuatzin.

<sup>9</sup> Huan nenca san nechmohuistilíaj, porín yejuan tenextilíaj in tamachtilis den taca san huan quipohuaj nijín tamachtilis queme yesquía in Tajtoitzin de Dios.

<sup>10</sup> Huan ijcón in Jesús quinnotzac in tagayot huan quinilij ijcuín:

—Xicaquican huan xicajsicamatican ten namechilía: <sup>11</sup> Huan nochi ten quicuas in tagat ica iten, yejua nojón amo huelis quimajmahuas niyolo ica tajtacol. Ta, yejua itanemililis ten quisa iyolijtic in tagat, yejua ne quimajmahua ica tajtacol.

<sup>12</sup> Ijcuacán imomachtijcahuan motoquijque campa yetoya Jesús huan quilijque ijcuín:

—¿Xe amo ticmati que ne fariseos quicalancacacque ten ticonijtoj?

<sup>13</sup> Huan Jesús quinilij ijcuín:

—Nochi tatocme ten amo itatoc Notajtzin den ne eluiyactzinco, yejua ne Notajtzin cuijuitas nochi ica inaluyo.

<sup>14</sup> Huan ijcón in Jesús ocsepa quinilij ijcuín:

—Xi quincahuacan nojón fariseos, porín yejuan ixpojpopoyome. Huan no quinequij quiyecanasque in ocsequin ixpojpopoyome. Huan como se ixpojpopoyot quinequi quiyecanas ocsé ixpojpopoyot, ijcuacán in omen sen huetzitihue tech in talcomit.

<sup>15</sup> Ijcuacán in Pedro quilij Jesús ijcuín:

—Xitechyecajsicamatilti nijín nexcuitil.

<sup>16</sup> Huan Jesús tananquilij ijcuín:

—¿Xe namejuan amo no nancajsicamatij nijín nexcuitil? <sup>17</sup> ¿Xe namejuan amo no nancajsicamatique que nochi in tacualis ten se quicua, yejua ne pantemoa san tech se ipox san huan de ompa quisa de tonacayo? <sup>18</sup> Pero nochi in tajtolis ten quisa tech se iten, yejua ne hualehua tech se iyolo. Huan yejua nojón quimajmahua in tagat ica tajtacol. <sup>19</sup> Porín itech iyolo in tagat hualeutoc ne pitzotic tanemililis, ne temictilis, ne tesuacuuililis, oso ne tagacuuililis, ne tasuapapatalis oso ne tagapapatalis, ne tachtequilis, oso ne tacajcayahualis huan ne tahujuicaltilis. <sup>20</sup> Huan nochi nijín tanemililis quimajmahuaj ica tajtacol in tagat. Huan in tagat amo momajmahuas ica tajtacol cuac quicuas tensá tacualis, masqui amo momajtequía.

**Nican tajtoa de queniu Jesús Temaquixtijque quinojnotzac se sihuat analtecocayot huan yejua taneltoaca itech Jesús Temaquixtijque**

*(Mr. 7.24-30)*

<sup>21</sup> Huan de ompa quisac Jesús huan yajqui tech ne lugar campa pueblojme den monotza Tiro huan Sidón. <sup>22</sup> Huan ompa se sihuatzin calyetoaya ne Cananea sentapal cayot de Tiro huan Sidón. Huan ne sihuatzin tzajtzitihualaya campa Jesús huan quiliaya ijcuín:

—Totecotzin, Tejuatzin tion Teconetzin de ne huejcau rey David. Nimitzilía, xinechonyolicneli porín nochpoch quipía iyolijtic se amocuali ejecat huan tel senca ya tajyohuijtoc axcan.

<sup>23</sup> Pero Jesús amo teyica quinanquilij. Ijcuacón imomachtijcahuan motoquijque huan quitatautilijque Jesús ijcuín:

—Xicnahuati ma yohui ya nijín sihuat porín ijcón tzajtzitihuitz huan techualtoctilía.

<sup>24</sup> Huan Jesús quinnanquilij ijcuín:

—Notajtzin Dios nechualtitanic sayó para ma niquinpalehui huan ma niquinmaquixti in pueblojuan queme ichcame ten poliutocque, yejuan ten pohuij ihuan in pueblojuani de Israel.

<sup>25</sup> Huan motoquij in sihuat huan quilij ijcuín:

—Totecotzin, xinechonpalehui.

<sup>26</sup> Huan Jesús quinanquilij ijcuín:

—Amo cualtía ma niquincuili in tacualis den coneme judíos huan ma niquinmaca in itzcuintzitzin porín xicmati que namejuan amo nanjudíos.

<sup>27</sup> Huan tananquilij in sihuat ijcuín:

—Quema catzín, masqui tejuan queme yesquía itzcuintzitzin, pero timotaololohuilíaj mesajtampa huan ticuaj nochi den tepehui, yejua ne in Tajtoltzin de Dios den quitencajcahuaj in patrones judíos.

<sup>28</sup> Huan ijcón in Jesús tananquilij ijcuín:

—Tejua sihuat, semi hueyi motacautamatilis; huan axcan ma mochihua ijcón queme tejua ticnequi.

Huan ijcón ne isihuapil nimantzin pajtic.

**Nican tajtoa de queniu Jesús Temaquixtijque quinpajtij mías cocoyani**

<sup>29</sup> Huan ijcón in Jesús quisac de ne lugar de Tiro huan Sidón huan yajqui ateno san den hueyíat de Galilea. Huan niman tejco itech se hueyi tal lomojtzin huan



ompa motocotzoj. <sup>30</sup> Huan hualajque huel mías tagayot campa Jesús yetoya huan cualcuiliayaj mías tataman cocoayani ten amo huel moquetzaj ya, huan ten ixpojyome, huan ten amo huel tajtoayaj, huan ten macotoltijque, huan mías ocsequin ten mococoayaj. Huan quintalicoj iixpan Jesús huan Yejuatzin quinpajtij. <sup>31</sup> Ijcuacán in tagayot semi quitelmoucaitacque porín yejuan quitacque que in nontzitzin tajtoayaj ya, huan in macotoltijque motayaj que pajtijque ya, huan in coxojme huelíaj nejnemij, huan in ixpojyome huelíaj tachíaj ya. Ijcuacán nochi in tagayot peuque quimohuistilíaj Totajtzin Dios in Tayecanque de Israel.

**Nican tajtoa de que Jesús Temaquixtijque quintamacac nahui mil tagayot**

*(Mr. 8.1-10)*

<sup>32</sup> Huan Jesús quinnotzac imomachtijcahuan huan quinilij ijcuín:

—Niquinyolicnelía de nijín tagayot porín quichihuac ya eyi tonal nohuan yetocque, huan amo quipíaj toni cuasque. Huan amo nicnequi niquintitanis ninchan ma mayantiyacan. Porín como ijcón niquintitani, ijcuacán mayancacuetahuitihue tech in ojti.

<sup>33</sup> Ijcuacán imomachtijcahuan quiluijque Jesús ijcuín:

—¿Quenín huelis ticajsisque tel mías tacualis para tiquintamacasque tel mías tagayot? Porín nican semi tayiucan huan amo aca calyetoc.

<sup>34</sup> Pero Jesús quintajoltij ijcuín:

—¿Canachi panes nanquipíaj?

Huan yejuan quinnanquilijque:

—Ticpíaj chicome panes san, huan no sequin pescadojnatzitzin.

<sup>35</sup> Huan de ompa Jesús quinnajnahuatij in tagayot ma motalican talpan. <sup>36</sup> Huan ijcón in Jesús quicuic nojón panes ihuan in pescadojnatcat huan de ompa quitasojcamachilij Totajtzin Dios. Huan quincocotonac in panes huan quinmajmacac imomachtijcahuan. Huan yejuan quinxejelohuilijque in tagayot. <sup>37</sup> Huan ijcón nochi in tagayot tacuajque huan ixuicque. Huan niman imomachtijcahuan de Jesús quiololojque nochi in pan cojcotol ten mocahuac huan quinpecontijque chicome chiquihuime oc. <sup>38</sup> Huan naquen tacuajque catca queme nahui mil tagayot huan amo quinpouque in sihuame nión in coneme. <sup>39</sup> Huan de ompa Jesús quinilij in tagayot ma yacan ninchan huan no niman Yejuatzin calaquic tech in barco huan ajsito campa puebljocpaca de Magdala.

**Nican in fariseos quitajtanilíaj ya Jesús ma quinnextili se mohuisanexcuitil de Dios**

*(Mr. 8.11-13; Lc. 12.54-56)*

**16** Huan ijcón in fariseos huan in saduceos hualajque campa Jesús yetoya huan peuque ihuan motajtoltehuíaj porín yejuan quinequíaj quitepotamisque Jesús tech tajtacol. Huan quitajtaniliayaj Jesús ma quinnextiliani se mohuisanexcuitil den ne eluiyactzinco. <sup>2</sup> Huan Jesús quinnanquilij ijcuín:

—Huan cuac ne tayohuatía, ijcuacán namejuan nanquijtoaj que cualtzin tonas mosta porín nanquitaj cualtzin tachichileutoc nohuiyan desde ne ipolihuiyampa in tonal. <sup>3</sup> Huan cuac ne cualcampan, ijcuacán namejuan no nanquijtoaj que axcan amo tonas porín tamixtentoc. Huan nanixquequepme san de namotamachilis porín cuali nanquiajsicamatilíaj quenín in tonal yesqui mosta, cox tonas oso amo, pero amo

hueli nanquiajsicamatiltíaj in nexcuitilme de toni mochihuas axcan. <sup>4</sup>Nijín tagayot amo yolcualime huan nión no tacuautamatij ihuan Dios, huan tajtanij se nexcuitil de que cox melau Nejuatzin ni Teconetzin de Dios. Pero amo huelis se quinnexutilis cachi oc ocséquin mohuisanexcuitilme. Ta, sayó ne nexcuitil ten namechnexutilijca ya ne huejcautanahuatijque Jonás. In nexcuitil de Jonás yejua nijín: Ijcón queme Jonás mocahuato ipoxijtic ne hueyi pescado huan ipan eyi tonal panquisac yoltoc, no ijcón Nejuatzin nimocahuatiu ne taltampa huan ipan eyi tonal nipanquisas niyoltoc.

Huan de ompa Jesús quincauteu in fariseos huan yajqui ocseco.

**Nican Jesús Temaquixtijque quinmachtij in tacaquini de ne tamajmahualis de tajtacol ten cuica in tamachtilis den fariseos**

*(Mr. 8.14-21)*

<sup>5</sup>Huan imomachtijcahuan ajsicque sentapalpa den hueyíat mar. Pero mochihuac que yejuan quelcauque de cuicasque in tacualis de yejuan. <sup>6</sup>Ica ya nojón Jesús quinilij imomachtijcahuan ijcuín:

—Xiquitacan huan ximoyecpiacan de ne tamajmahualis de tamachilis ten quipíaj ne fariseos huan ne saduceos.

<sup>7</sup>Ijcuacón imomachtijcahuan monojnotzayaj se huan ocsé ijcuín:

—¿Queyé ijcón techilía Jesús? Achá porín amo ticualicque ten ticuasque.

<sup>8</sup>Pero Jesús niman quinyoljixmatic ne imomachtijcahuan huan quinilij ijcuín:

—¿Queyé nanquijtoaj que amo nanquipíaj ten nancuasque? Mota que namejuan amo nanyectacuautamatij nohuan. <sup>9</sup>Huan namejuan amo nancajsicamatque huan nión no nanquelnamiquij de ne macuil panes ten nicxejxeloj ihuan ne macuil mil tagayot. Huan amo no nanquelnamiquij canachi chiquihuime de pan den mocahuac de que nanquiolojojque. <sup>10</sup>Huan amo no nanquelnamiquij de ne chicome pantzitzin ten niqinxexelohuij de ne nahui mil tagayot. Huan amo no nanquelnamiquij canachi chiquihuime de pan ten mocahuac de que nanquiolojojque itech ne tonal.

<sup>11</sup> ¿Queyé amo nancajsicamatque de nijín tamachilis tenica namechnojnotztoc de ne tamajmahualis ten quipía in pan den tacualis? Ta, nicnequi que namejuan xicyecajsicatican ne tamajmahualis de tajtacol ten quipía in tanexutilis ne fariseos huan ne saduceos.

<sup>12</sup>Huan ijcón imomachtijcahuan cajsicamatque ya que Jesús amo quinilíaj ya que ma moyecpiani den ne tacualis den tamajmahualis de pan san. Ta, Jesús quinilíaj ya que ma moyecpiacan de ne nintamachtilis den fariseos huan in saduceos. Porín nintamachtilis teyolmajmahua ica tajtacol ijcón queme in tamajmahualis den quiposonaltía in pan.

**Nican tajtoa de queniu Pedro quiyequilij que Jesús yejua in Cristo Temaquixtijque**

*(Mr. 8.27-30; Lc. 9.18-21)*

<sup>13</sup>Huan ijcón in Jesús quisque ihuan imomachtijcahuan huan ajsicque tech in pueblojme ten pohuíaj Cesarea de Filipino. Huan Jesús quintajtojtij imomachtijcahuan ijcuín:

—¿Quenín quijtoaj in tagayot? ¿Aconi yesqui Nejuatzin ni Yectagatzin?

<sup>14</sup>Huan yejuan tananquilijque ijcuín:

—Sequin tagayot quiytoayaj que Tejuatzin ti Juan Taahuijque. Huan ocsequin quiytoayaj que Tejuatzin ti Elías ne huejcautanahuatijque de Dios. Pero cachi ocsequin quinemiliayaj que achá Tejuatzin ti Jeremías, oso achá Tejuatzin se den ocsequin tanahuatiani de Dios den nemicoj ya.

<sup>15</sup> Huan ijcón in Jesús ocsepa quintajtoltij ijcuín:

—Huan namejuan, ¿toni nanquijejeoaj que aconí Nejuatzin?

<sup>16</sup> Ijcuacán Simón Pedro tananquiliij ijcuín:

—Tejuatzin tion Cristo Temaquixtjicatzin, ti Yecteconetzin de Dios den yoltica.

<sup>17</sup> Huan Jesús quinanquiliij:

—Titatiochihual, tejuá Simón teconeu de Jonás. Porín amo se tagat huelic mitzajsicamatiltisquía de nijín ten melau. Ta, sayó Notajtzin ten yetica nepa eluiyactzinco, Yejuatzin mitzajsicamatiltij ya. <sup>18</sup> Huan nimitzyequilfa que tejuá ti Pedro huan motocay quiptosnequi hueyi tet, huan mohueyitacuautamatilis tamati queme in hueyi teolol. Huan ipan nijín tacuautamatilis den tamati queme se teolol, itech nijín nictzinpehualtis notequiu. Huan niquinmaquixtis huan niquinmiactiltis notaneltocacahuan. Huan ijcón amo no huelis ne chicahualis den miquilis quinxijxicos notaneltocacahuan porín quipíasque ne yec tacuautamatilis nohuantzinco. <sup>19</sup> Huan, tejuá Simón, no nimitzmacas in chicahualis queme yesquía llaves para tiquintatapohuilis in tagayot ma calaquican campa Dios momasoutoc ica ihueyichicahualis. Huan ijcón nochi ten tejuá titatacahualtis nican talticpac, no ijcón motatacahualtis ne eluiyactzinco. Huan nochi ten tejuá ticahuas ma mochihua nican talticpac, no ijcón ma mochihua ne eluiyactzinco.

<sup>20</sup> Huan ijcón in Jesús quinnajnahuatij imomachtijcahuan ma amo aquen quilican que cox yejua ya in Cristo in Temaquixtjijque.

**Nican tajtoa de que Jesús Temaquixtjijque quitetapohuij  
imomachtijcahuan que ejcotoc ya imiquilis**

*(Mr. 8.31—9.1; Lc. 9.22-27)*

<sup>21</sup> Huan desde ne tonal ya pehuac Jesús quinyectapohuía ya imomachtijcahuan ijcuín:

—Semi monequía niyás tech ne pueblo de Jerusalén. Huan ompa nechtajyohuilitisque in huehuentzitzin den pueblojuani judfos huan in tayecanani tiopixcame huan in tanextiliani den tanahuatil de Moisés.

Huan no Jesús quinilij ijcuín:

—Ompa nechmictisque, pero ipan eyi tonal nipanquisas niyoltoc itzalan in animajme.

<sup>22</sup> Ijcuacán in Pedro cuiyac Jesús seco huan ompa pehuac quixajua huan quiliaya ijcuín:

—Ma amo Dios quimonequilti ma pano mopan nijín ten tiqijtoa.

<sup>23</sup> Ijcuacán Jesús mocuepac campa yetoyaj imomachtijcahuan huan quilij in Pedro ijcuín:

—Ximijcuani de nican noixpan, Pedro, porín majyá titanemilijtoc queme Satanás in amocuali, huan tinechtzajtzacuifá san. Porín tejuá amo titanemilía queme Dios quimonequiltía. Ta, sayó titanemilía queme in tagayot.

<sup>24</sup> Huan ijcón in Jesús quinilij imomachtijcahuan ijcuín:

—Tacán acsá quinequi nechtoctilijtiyás, ijcuacón ma quicautehua ne tanejnequilis de yejua san, huan ma quixicos in cruztzin ten cualcui tajyohuilis huan ijcón ma nechtaacamatiu huan nechtoctilijtiu. <sup>25</sup> Huan nochi neques ten quinequij moyecpi-altisque huan quimaquixtisque yejuan san mismo ninnemilis, yejuan nojónques nochi quipolosque ninnemilis. Huan nochi neques ten quipolosque ninnemilis por nejua huan por in cuali Tajtoltzin de ne temaquixtilis, yejuan nojonques cajsisque ninnemilis huan no ne nemaquixtilis. <sup>26</sup> ¿Pero toni quihueyipías in tagat como moaxcatilis nochi in senmanahuac huan niman quipolos inemilis? ¿Pero canachi taxtahuil huelis quitemacas oc in tagat ica por niyolo cuac yejua cajsicamatis que quipoloj ya ninemilis? <sup>27</sup> Huan Nejuatzin ni Yectagatzin nihualas ica in huelilis de Notajtzin ihuan in ángeles ne tequitini de Notajtzin. Ijcuacón Notajtzin Dios quintaxtahuis cada se tagat ijcón queme cada se tagat motequitiltij. <sup>28</sup> Huan no de yec melau ten namechilía que senme de namejuan de nican nanyetocque, amo nanmiquisque como amo achtopa nanquitasque que Nejuatzin nihualas ya ni Yectagatzin, huan niquinyecanas notaneltocacahuan ica nochi ichichualis huan ihuelilis de Totajtzin Dios.

**Nican tajtoa de que Jesús Temaquixtijque nocta mopapatac  
quenín tamatic inixpan imomachtijcahuan**

*(Mr. 9.2-13; Lc. 9.28-36)*

**17** Huan satepan de chicuasen tonal Jesús quinuiyac Pedro huan in Jacobo huan iicniu Juan huan yajque tejcotoj ninseltij seco tech se tepet campa huejcapan. <sup>2</sup> Huan ompa ninixpan pehuac Jesús mopapataya quenín tamatic. Huan iixco nesía cualtzin petani ijcón queme in tonaltzin. Huan ne nitilmajtzin pehuac pepetacaya porín yec istac queme in tanex. <sup>3</sup> Huan monextijque Elías ihuan in Moisés, yejuan nojonques huejcautanahuatiani de Dios, huan yejuan peuque monojnotzayaj ihuan in Jesús. <sup>4</sup> Ijcuacón in Pedro quilij in Jesús ijcuín:

—Totecotzin, semi cualtzin para tejuan que nican tiyetocque. Tajcón ticonmonequiltisquía ma ticchijchihuacan eyi xajcaltzitzin, se para Tejuatzin, in ocsé para in Moisés huan in ocsé para Elías.

<sup>5</sup> Pero cuac in Pedro quinojnotztoya oc, ijcuacón quinquemiloco se mixti de semi cualtzin pepetaca. Huan mixtzalan mocaquic se tajtolis huan quijtoaya ijcuín:

—Yejuatzin nijín Notasojtzin Conetzin. Ica por Yejuatzin semi niyolpactoc; xicaquilican ca cuali Yejuatzin.

<sup>6</sup> Huan cuac quicacque ya nijín imomachtijcahuan, ijcuacón motapachojque hasta moixtalitoj tech in tal porín semi moyolmoutiyaj. <sup>7</sup> Huan ijcón in Jesús motoquij campa imomachtijcahuan huan quinolinij huan quinilij ijcuín:

—Ximoquetzacan huan amo ximoyolmoutican.

<sup>8</sup> Huan cuac yejuan moixajacque huan ixnenenque, ijcuacón yejuan amo aquen quitacque oc. Ta, sayó in Jesús. <sup>9</sup> Huan cuac temotiyayaj ya tech ne tepet, ijcuacón Jesús quinnajnahuatij ijcuín:

—Axcán amo aquen xictapohuican de nanquitacque. Ta, xicchiacan hasta ne tonal cuac Nejuatzin ni Yectagatzin nipanquisas ya niyoltoc itzalan in ánimajme.

<sup>10</sup> Huan ijcón in Jesús imomachtijcahuan quitajoltijque ijcuín:

—Nojón tanextiliani den tanahuatil de Moisés, ¿queyé yejuan quijtoaj que Elías quipía que hualas achtopa ya que hualas in Cristo Temaquixtijque?

<sup>11</sup> Pero Jesús quinnanquilij ijcuín:

—Yec melau, achtopa ya que Nejuatzin nihualasquía, hualajca ya ne Elías huan tajejyectalij ya nochi para Nejuatzin. <sup>12</sup> Huan Nejuatzin namechyequilía que hualajca ya ne Elías, huan in tanextiliani amo quixmatque. Ta, quichihuilijque queme yejuan in tayecanani tanextiliani quinecque huan cuelitacque. Huan ijcón no nicpanos Nejuatzin ni Yectagatzin; nechchihuilisque queme yejuan cuelitasque.

<sup>13</sup> Huan ijcón in imomachtijcahuan den Jesús quiyecajsicamatiltiayaj ya que Jesús quinnojnotzaya de ne nemilis de Juan Taahuijque. Huan ne Juan yejua ya in Elías ten quipía de que hualasquía.

**Nican tajtoa de queniu Jesús Temaquixtijque quipajtij  
se telpoch ten quipiaya iyolijtic se amocuali ejecat**

*(Mr. 9.14-29; Lc. 9.37-43)*

<sup>14</sup> Huan cuac Jesús huan imomachtijcahuan ajsicque campa yetoyaj míac tagayot, ijcuacón motoquij campa Jesús yetoya se tagat huan motancuaquetzac iixpan Jesús huan quilij ijcuín:

<sup>15</sup> —Totecotzin, xiconyolicneli nooquichpil porín quimaca se cocolis de nijín yolpolihuilis huan semi tel hueyi tajyohuía. Porín miacpa ya huetzi huan motico-talía huan no miacpa ya moapisahuía ya. <sup>16</sup> Huan niquinualcuilijca ya momomachtijcahuan huan amo huelic quipajtijque.

<sup>17</sup> Ijcuacón in Jesús quinnanquilij ijcuín:

—Namejuan sayó nantacaquini, semi amo nanyectaneltocaj huan amo nanyolcualime. ¿Canachi tonalme quipía de que niyetos oc namohuan? ¿Canachi tonalme oc huelis nitaxicos como amo nanyectacuautamatij nohuan? Xinechonualcuilican nican in oquichpil ten mococoa.

<sup>18</sup> Huan ijcón in Jesús quichicaucanahuatij in amocuali ejecat. Ijcuacón niman calanquisac in amocuali ejecat itech ne oquichpil den yetoya iyolijtic. Huan ijcón niman moyoltalij ne oquichpil. <sup>19</sup> Huan ijcón niman motoquijque imomachtijcahuan campa Jesús huan quinojnotzque ocsecan huan quitajoltijque ijcuín:

—¿Queyé amo tihuelque ticalanquixtilijque ne telpoch in amocuali ejecat?

<sup>20</sup> Huan Jesús quinilij ijcuín:

—Amo nanhuelque porín nanquipíaj semi tepitzin san namotacuautamatilis. Huan de yec melau ten namechilía que como nanquipiasquíaj namotacuautamatilis ma quinehuiliani tzictzin queme se mostazajtet, ijcón cuali huelis nanquilisque nijín tepelomo de que ma ximijcuani de nican huan xiyó ocsecan. Huan ijcón in tepelomo mijcuansquía. Huan para namejuan amo teyi ongac ohui como melau nanyectacuautamatij nohuan. <sup>21</sup> Huan nijín taman den amocuali ejecat ohui para se quicalanquixtis. Pero huelis se quicalanquixtis sayó ica ne tatatautilis ihuan Dios huan ica ne sahualis.

**Nican Jesús Temaquixtijque quinnejmachtij  
imomachtijcahuan ica ojpa que ejcotoc ya imiquilis**

*(Mr. 9.30-32; Lc. 9.43-45)*

<sup>22</sup> Huan cuac Jesús sen nemía ihuan imomachtijcahuan tech ne pueblojcopaca de Galilea, ijcuacón Jesús quinilij ijcuín:

—Nejuatzin ya ni Yectagatzin huan nechtemactisque imaco in tagayot, <sup>23</sup> huan nechmictisque, huan ipan eyi tonal ocsepa nipanquisas niyoltoc itzalan in ánimajme. Huan cuac imomachtijcahuan quicacque nochi nijín, ijcuacón semi motayocoltijque.

**Nican tajtoa de queniu Jesús Temaquixtijque quixtahuac in impuesto tomin nechicolis para in tiopan de judíos**

<sup>24</sup> Huan Jesús ihuan imomachtijcahuan ajsicque tech ne pueblo Capernaum, huan in tanechicoani para in tiopan de judíos motoquijque campa in Pedro huan quilijque ijcuín:

—¿Xe amo taxtahuas namotamachtijcau de ne taxtahuil para in tiopan de judíos?

<sup>25</sup> Ijcuacón in Pedro tananquilij ijcuín:

—Quema.

Huan cuac in Pedro calaquito calijtic, ijcuacón in Jesús achto quinojnotzac huan quilij ijcuín:

—¿Toni tiquixejecoa, Simón? In huejueyi chihuanime de nican talticpac, ¿cox tatopaluijtinence den nichancahuan oso den ninpueblojcahuan san?

<sup>26</sup> Ijcuacón in Pedro tananquilij ijcuín:

—Ne ten in pueblojcahuan quintopaluitinemij.

Huan Jesús quilij ijcuín:

—Inchancahuan amo monequi ma motaxtahuilican. <sup>27</sup> Pero para ma amo tiquiny-olcuejmolocan in tayecanani, xiyó tech ne hueyíat den mar huan xicatamota ne teposmaxal tenica quinqutzquáj in pescados. Huan ne ten achtopa pescado tiq-uitzquis, ompa ticaxilis iteno ne pescado se tomin ten cualtías ica titaxtahuasque in taxtahuil ten monequi para Nejuatzin huan para tejua. Huan cuac ticajsis ya, ijcuacón niman xiquinuiquili in tomin huan xiquintaxtahuiliti.

**Nican tajtoa de queniu Jesús Temaquixtijque quinmachtij in tacaquini de aconi yesqui in cachi hueyi tayecanque**

*(Mr. 9.33-37; Lc. 9.46-48)*

**18** Huan tech ne tonalme imomachtijcahuan motoquijque campa Jesús yetoya huan quitajtoltijque ijcuín:

—¿Aconi in cachi hueyi chiuque como Dios techyolyecana toyolijtic ica ihueyichicahualis?

<sup>2</sup> Ijcuacón Jesús quinotzac se conetzin huan quitelij inixpan imomachtijcahuan.

<sup>3</sup> Huan Jesús quinilij ijcuín:

—De yec melau ten namechilía de que namejuan como amo nanmocuepaj queme senme de nijín coneme, ijcuacón amo huelis nancalaquisque campa Dios quinyolyecana itaneltocacahuan ica ihueyichicahualis. Ta, monequi ximochihuacan nanyec-tacautamatcataca queme nijín conet ten tacuautamati sayó ihuan nitajtzin. <sup>4</sup> Huan nochi naquen moicnotalis huan mosejsentalis san ijcón queme nijín conet ten non-ahuactzinco tacuautamati, ijcuacón yejua ne yesqui in cachi hueyi campa Dios mo-masoutoc ica ihueyichicahualis. <sup>5</sup> Huan como namejuan nancajsicamatij huan nan-quiselisque ica in huelilis de notocaytzin se de yancuic notaneltocacau, no ijcón Nejuatzin nannechselfaj, porín nancajsicamatque ya nohuelilis.

**Nican tajtoa de queniu Jesús Temaquixtijque quinmachtij de se tagat ten quitepotamía ocsé tagat tech in tajtacol**

*(Mr. 9.42-48; Lc. 17.1-2)*

<sup>6</sup> Huan Jesús quinmachtij imomachtijcahuan ijcuín

—Huan tacán acsame quitepotamíaj tech in tajtacol se de nijín conetzin ten notech tacuautamati, ijcuación cachi cuali para yejuan ne naquen tetepotamíaj ma se quinquechpilohuili se hueyi tet huan ma se quinatamota tech in hueyíat de mar campa cachi huejcatan, de nojón tet ten in tapial quitlantinemi campa molino cuac quicuechojtoc in trigo. <sup>7</sup> Semi teicneltijque ne talticpacuani cuac yejuan quintepotamíaj notaneltocacahuan ica in tajtacol. Huan nachipa oncas tataman ohuijca yome tenica se motepotamis tech in tajtacol. Pero semi teicneltijque nijinques talticpacuani cuac yejuan quintepotamíajjinemij notaneltocacahuan tech in tajtacol nemilis. <sup>8</sup> Huan tacán momay oso mometz mitztepotamía tech in tajtacol, ijcuación xicotona huan xictamota huejca. Porín cachi cuali ticalaquís timacotoltic oso timetzcotoltic tech in yec nemilis campa Dios quinyolyecana itaneltocacahuan ica ihueyichichahualis. Porín como amo ticotonas momay oso mometz ten mitztepotamía tech in tajtacol, ijcuación mitztamotasque tech in mictan campa ne hueyi tatzacuultiloyan, campa in tit amo queman sehuis. <sup>9</sup> Huan tacán no in moixtololo mitztepotamía tech in tajtacol, ijcuación xiquixti huan xictamota huejca. Porín cachi cuali para tejua ticalaquís tech in yec nemilis ica se moixtololo san huan que ticpías omen moixtololuan huan ica por nojón mitztamotasque tech in mictan campa ne tatzacuultilis huan campa ne tit amo queman sehuis.

**Nican Jesús Temaquixtijque quitelij se nexcuitil de se ichcatzin ten ixpoliutoya, huan quinejnehuilía nitaneltocacahuan queme ne ichcatzitzin**

*(Lc. 15.3-7)*

<sup>10</sup> Huan Jesús quinmachtij imomachtijcahuan ijcuín:

—Huan amo no xiquinixtopehuacan nión senme de nijín noconetzitzin ten nohuan pohuij. Huan no namechilía que nepa eluiyactzinco in ángeles taquehualme de Totajtzin Dios yetocque nepa ixpantzinco Yejuatzin huan quinyecpixtocque nijín conetzitzin ne ten nohuan taneltocatocque. <sup>11</sup> Huan Nejuatzin ni Yectagatzin nihuala para niquinmaquixtis naquen ixpoluitocque tech in tajtacol nemilis.

<sup>12</sup> Huan no Jesús quinmachtij imomachtijcahuan ica nijín nexcuitil ijcuín:

—¿Toni nanquixejeco de nijín nexcuitil? Se tagat quiapiaya macuilpoal ichcame huan senme de ne poliu. ¿Cox amo in tapixque quincagua ne cuouta in ocsequin nahuipoal huan caxtolo nahui ichcame huan yohui quitemoti in ichcatzin ten poli-huic ya? Pues quema. <sup>13</sup> Huan tacán huéli cajsis in ichcat ten poli-huic, ijcuación de yec melau ten namechilía que ne tapixque cachi moyolpactía porín cajsic in ichcatzin ten poli-uca ya huan que ne nahuipoal huan caxtolonnahui ten amo poli-ucaj. <sup>14</sup> Huan ijcón queme ne tapixque quinequi ma ajsitinemican niichcahuan, no ijcón in Tohueyitajtzin Dios ten yetica ne eluiyactzinco amo no quimonequiltía de que ma xiixpolihuican senme de namejuan ten nanopohuij ihuantzinco.

**Nican Jesús Temaquixtijque quinmachtij in tacaquini  
den monequi se quitapojpoluis se icniu**

(Lc. 17.3)

<sup>15</sup> Huan Jesús quinilij imomachtijcahuan ijcuín:

—Huan tacán se mocniu mitzchihuilía tensá ten amo cuali, ijcuacón nimantzin xiyó xicnojnotzati huan xicajsicamatiliti moselti. Huan como mitzcaquilía ten tiquiluiti ne mocniu, ijcón yejua quiselía ne maquixtilis. <sup>16</sup> Huan como amo mitzcaquilía ten tiquiluiti, ijcuacón tejua xiquinnotza se ome eyi taca taneltocani ma yacan namohuan para que ijcón ixnesican que melau tictapojpoluij ya ne mocnitzin. <sup>17</sup> Huan tacán nión no mocniu mitzcaquilía ten tiquiluiti ihuan ne testigos, ijcuacón xiquinilui nochi ne tocnihuan den mosentilfaj tech in tiopan. Huan tacán nión no ijcón in mocniu quincaquilía in tocnihuan, ijcuacón xicpohuacan ne mocniu queme se analtecacoyot naquen amo pohui ihuan Dios. <sup>18</sup> De yec melau ten namechilía que nochi ten namejuan nantatacahualtiani de que ma amo quichihuacan in taneltocani nican talticpac, no ijcón motatacahualtis ya nepa eluiyactzinco. Huan nochi ten namejuan nanquicahuaj ma quichihuacan in taneltocani nican talticpac, no ijcón mochihuas ne eluiyactzinco. <sup>19</sup> Huan no ijcón namechilía que como omen de namejuan nanmoyecyolmaxitíaj huan nanmoyectencahuaj de que nanquitajtanielisque ica ne tatatautilis ihuan Dios, ijcuacón in Totajtzin Dios ten yetica nepa eluiyactzinco namechnanquilis huan quichihuas ne ten nancontajtanilijque. <sup>20</sup> Huan no namechilía de que campa mosentilisque se ome eyi den notaneltocacahuan ica in chicahualis de notocaytzin, ompa Nejuatzin niyetos tatajcoyan de yejuan.

<sup>21</sup> Ijcuacón in Pedro yajqui huan quitajtoztij Jesús ijcuín:

—Notecotzin, ¿canachpa huelis nictapojpoluis nocnitzin cuac tensá nechchihuilis ten amo cuali? ¿Xe monequi nictapojpoluis chicojpa?

<sup>22</sup> Ijcuacón in Jesús quinanquilij ijcuín:

—Nimitzilía amo sayó chicojpa xictapojpolui. Ta, xictapojpolui miacpa, huan amo xicpohua canachpa tictapojpoluis mocniu.

**Nican Jesús Temaquixtijque quitailij se nexcuitil den se tagat  
ten amo quinequía quitapojpoluis iicniu**

<sup>23</sup> Huan ijcón in Jesús quinnojnotzac imomachtijcahuan ica se nexcuitil ijcuín:

—Nicnejnehuililtía se hueyichiuque rey queme ichicahualis de Dios cuac Yejuatzin momasoutoc ica ihueyi chicahualis se iyolijtic. Huan ne rey quinequi quimatis canachi quitahuiquilíaj cada senme de nitaquehualuan. <sup>24</sup> Huan cuac ne hueyi chiuque pehuac quichihuac ya cuenta, ijcuacón cualcuilijque se taquehual ne ten quitahuiquiliaya mías millones de tomin. <sup>25</sup> Huan nijín taquehual amo huelía motaxahuilis. Ica ya nojón in hueyi chiuque tanahuatij ya que ma quinamacacan in taquehual ihuan nisihau huan nipiluan huan nochi ten niaxca, para ma ijcón motaxahuiliani nochi ten quitahuiquiliaya. <sup>26</sup> Pero ne taquehual motoquij huan motancuaquetzac iixpan ne hueyi chiuque huan quitatautij ijcuín: “Notecotzin xinechon-olieneli huan xinechonchía oc huan ijcón huelis nimitzontaxahuilis nochi ten nimitzontahuiquilía”. <sup>27</sup> Huan ijcón in patrón de ne taquehual quiyolicnelij huan quitapojpoluij de nitahuicallis huan de ompa quicahuac ma yohui. <sup>28</sup> Huan cuac yequin calanquistiaya ya de nichan ipatrón, ijcuacón ne taquehual moitac ihuan se itaque-



hualicniu ten no quitahuiquiliaya sequi tomin san, amó míac. Pero yejua nimantzin quiquechquitzquij ne itaquehualicniu huan pehuac quiquechpajpatzca huan quiliaya ijcuín: “Nechtaxtahuilía axcan ten tinechtahuiquilía”.<sup>29</sup> Ijcuacán ne itaquehualicniu motancuaquetzac iixpan huan quitatautiayaj ijcuín: “Xinechonchía oc se ome eyi tonal oc huan ijcón nimitzonixtahuilis nochi ten nimitzontahuiquilía”.<sup>30</sup> Huan ijcón ne taquehual amo quinequic quichías. Ta, cuiyac quitzacuato tech in cárcel para ma quitaxtahuiliani nochi ten quitahuiquiliaya.<sup>31</sup> Huan in ocsequi taquehualme cuac quicacque que ijcón mochihuac, ijcuacán yejuan semi quintelyolcocoj huan yajque quitapohuitoj in ne hueyi chiuque nochi ten mochihuac.<sup>32</sup> Ijcuacán in ne hueyi chiuque tanahuatij ma quicuitij in taquehual huan quiliij ijcuín: “Tejua taquehual, semi amo tiyolcuali. Nejua nimitztapojpoluij de motahuicallis porín tejua tinechontajtanilij de que ma nimitztapojpolui.<sup>33</sup> Huan tejua no ijcón monequía xichihuani de que xicyolicneliani ne motaquehualicniu ijcón queme nejuatzin nimitzyolicnelij”.<sup>34</sup> Huan ijcón in patrón semi yolcualanic huan tanahuatij ma quitzacuatiij tech ne cárcel huan ma amo quisasquía hasta cuac nochi quitamitaxtahuilisquía ya ten quitahuiquilía ya.

<sup>35</sup> Huan Jesús quinilij ijcuín:

—No ijcón in Tohueyitajtzin Dios ten yetica nepa eluiyactzinco namechchihuulis cada senme de namejuan, como amo nanquintapojpoluisque namocnihuan ica nochi namoyolojuan nochi ne ten namechtahuiquilíaj.

**Nican Jesús Temaquixtijque quinyecajsicamatiltij in tacaquini de ne sihuacacahualis huan de ne tagacacahualis**

*(Mr. 10.1-12; Lc. 16.18)*

**19** Huan mochihuac que cuac Jesús quintaminextilij ya nijín tajtolme, ijcuacán quisac de Galilea huan yajqui ne analcopaca de Judea huan ajsito ne iquisayampa in tonal campa in hueyíat de Jordán.<sup>2</sup> Huan míac tagayot quitoctiliayaj Jesús huan Yejuatzin quinpajtiaya míac ten cocoxcayetoyaj ica ten míac tatanman cocolis.<sup>3</sup> Huan ijcón sequin fariseos motoquijque para quiejecosque nitanemilil de Jesús huan quitajtanilijque ijcuín:

—¿Cox quitecahuilía in tanahuatil de Moisés de que se tagat ma mosihuacahua tenica tenesi ohuijcajot?

<sup>4</sup> Huan Jesús tananquilij ijcuín:

—¿Xe amo queman nanquileerojtinemij tech in Tajcuilolamatzin de Dios de que Totajtzin Dios quichihuac in ome taman cuac ne tatzinpehuac nochi? Ijcuac Yejuatzin quichihuac in tagat huan in sihuat.

<sup>5</sup> Huan Jesús no quinilij ijcuín:

—Ica ya nojón in tagat ma quincahua itatajtzin huan inananjtzin huan ma mosentali ihuan isihuau. Huan in ome mocahuas sansé san.<sup>6</sup> Huan ijcón amo omen oc yesque. Ta, sayó se. Ica ya nojón in tagat huan in sihuat ten Dios quinsentalis namicuaní ya, yejuan nojonques ma amo se tagat quinxexelos oc.

<sup>7</sup> Ijcuacán in fariseos quitajtoltijque Jesús ijcuín:

—¿Queyé in Moisés quitecahuilij ma se quimacas se isihuau se tajcuilolamat campa ixnesis de que mocacauque ya?

<sup>8</sup> Pero in Jesús quinnanquilij ijcuín:

—Moisés namechmacac ne tanahuatil de ne sihuacacahualis porín namejuan nanyolpipictique de namotamachilis huan amo quinecque quitacamatisque Dios. Pero melau cuac Yejuatzin quichijchihuac in talticpac huan in eluiyac, ijcuacán amo ijcón catca. <sup>9</sup>Ne tagat motajtacolmacas cuac yejua quinemilis de que quicahuas isihuau masqui yejua ne isihuau amo motajtacolmaca ihuan ocsé tagat. Huan ne tagat ten quicahuas nisihuau huan monamictis ihuan ocsé sihuat, yejua ne motajtacolmacas. Huan no ijcón como huitza ocsé tagat huan monamictis ihuan ne tesihuau, no ijcón yejua motajtacolmacas ya porín ne tesihuau poutoc oc ihuan ne itayecancayoquich.

<sup>10</sup> Huan Jesús imomachtijcahuan quilijque ijcuín:

—Huan tacán ijcón mochihua de que in tagat amo huelis quicahuas isihuau, ijcuacán cachi cuali ma amo monamictiani.

<sup>11</sup> Huan ijcón in Jesús ocsepa quinilij ijcuín:

—Amo nochin huelis quitacamatisque nijín tanextililis. Ta, sayó yejuan ne naquen Dios quinajsicamatiltis ya. <sup>12</sup>Ongac tataman tamachilisme para ma amo se monamictis. Sequin taca amo hueli monamictíaj porín mococoaj desde cuac yolic huan ijcón amo huelis tascaltisque. Huan ocsequin taca amo hueli monamictíaj, porín acsame quintahuelitaj ya huan quincococojque; ica ya nojón amo huelis tascaltisque. Huan ocsequi taca amo hueli monamictíaj porín quinequij motequitilisque itech in tanahuatil de que Dios momasoutoc ica ihueyichicahualis iyolijtic itaneltocacahuan. Huan nochi naquen huelis quitacamatis nijín tanextililis, ma quiseli huan ma quitacamatiyás.

### **Nican tajtoa de queniu Jesús Temaquixtijque quintiochihuac in coneme**

*(Mr. 10.13-16; Lc. 18.15-17)*

<sup>13</sup> Huan ijcón cualcuilijque sequin coneme para ma Jesús quintiochihua huan para ma quincuamajpacho huan para ma motatautili ica por yejuan. Huan imomachtijcahuan de Jesús peuque quintacahualtiyaj ne naquen quinquacuiliyaj ninconehuan.

<sup>14</sup> Huan Jesús quinilij ocsepa ijcuín:

—Xiquincahuacan in coneme ma hualacan nohuan huan amo xiquintacahualtican. Porín in coneme queme nijín, yejuan tacuautamatij notechcacopaca. Huan no namechilía que nochi naquen motemacas nohuan ma niquinyolyecana, ijcón queme ne coneme, yejuan nojonques Dios quinyolyecantiyás ica ihueyichicahualis.

<sup>15</sup> Huan cuac quincuamajpachoj ya nijín coneme, ijcuacán in Jesús yajqui huan quisac tech ne lugar.

### **Nican tajtoa de queniu Jesús Temaquixtijque quinojnotzac se telpocat rico**

*(Mr. 10.17-31; Lc. 18.18-30)*

<sup>16</sup> Huan ijcón huala se tagat campa Jesús yetoya huan quitajtoltij ijcuín:

—Tejuatzin, tioncuali tiontamachtijque, ¿toni cuali chihualis monequi nicchihuas para nicpías ne yec nemilis nachipa?

<sup>17</sup> Ijcuacán in Jesús quinancuilij ijcuín:

—¿Queyé tinechnojnotza de nicuali? Porín amo aca ocsé oc yolcuali. Ta, sayó se aquen yolcuali huan Yejuatzin ya ne in Totajtzin Dios. Huan tacán ticnequi ticalaquis tech in yec nemilis, ijcuacán monequi xictacamati in tanahuatilme de Dios.

<sup>18</sup> Ijcuacán in tagat quitajtoltij ijcuín:

—¿Catiyejua in tanahuatilme monequi ma niquintacamati?

Huan Jesús quinanquilij ijcuín:

—Amo xitemicti, amo xisihuapapatatinemi, amo xitachtequi, amo xixolopijti ihuan ocsequin. <sup>19</sup> Huan xicmohuisca pohua motajtzin huan monantzin; huan xic-tasojta mocniú ijcón queme tejua timotasojta.

<sup>20</sup> Huan in telpocat tananquilij ijcuín:

—Nochi nijín nicchiutihuitz ya desde cuac nipili oc nicatca. ¿Huan toni oc nech-poloa oc?

<sup>21</sup> Huan Jesús quilij:

—Como ticnequi tiyecchipaucanemis, ijcuacón xiyó xicnamacati nochi ten moaxca huan xiquinxexeluili in taca ten amo teyi quipáj ten cuasque. Huan ijcón ticpías in hueyi paquilis huan yec yetolis nepa eluiyactzinco. Huan xihuiqui nohuan huan xinechtoctiliqui huan xinechtacamatiyás.

<sup>22</sup> Huan cuac ijcón quicayic in telpocat de nijín tajtolme, ijcuacón mocuepteu huan yajqui moyolcocojtiyáj porín quiplaya mías ten niaxca.

<sup>23</sup> Ijcuacón Jesús quinilij imomachtijca huan ijcuín:

—De yec melau de namechilía de que semi ohui para se rico ma motemactiyás in-ahuactzinco Dios para que Yejuatzin quiyolyecantiyás ica ihueyichicahualis. <sup>24</sup> Huan ocsepa namechilía de que amo huelis nalpanos se hueyi tapial ten monotza camello campa coyotc in acoxaj. Pues amo no huelis motemactiyás in tagat rico inahuactzinco Dios para que Yejuatzin quiyolyecantiyás ica ihueyichicahualis, como yejua tacuautamatinemi itech niricoyo.

<sup>25</sup> Huan cuac imomachtijca huan quicacque ijcón, ijcuacón yejuan semi quimou-cacacque huan motajtoltiyay yejuan san se huan ocsé ijcuín:

—¿Aconi, pues, huelis maquisas de nitajtacoluan ijcón?

<sup>26</sup> Ijcuacón in Jesús quinsenitac huan quinilij ijcuín:

—In taca amo huelis momaquixtisque de nitajtacoluan, como amo yec tacuautamatij ihuan Dios; porín xicmatican de que sayó Dios huelis nochi quichihuas nijín.

<sup>27</sup> Huan ijcón in Pedro tananquilij ijcuín:

—Xiconita, tejuatzin, tejuan ticauque ya nochi ten ticpiyay huan timitztoctilfaj axcan para timitztacayasque. ¿Huan toni tejuan ticselisque?

<sup>28</sup> Huan Jesús quinnanquilij ijcuín:

—De yec melau ten namechilía que tech ne tonalme ten huitze oc Dios quichihuas nochi yancuic ya. Huan Nejuatzin ni Yectagatzin nimotalis queme se rey huan ompa nitayecanas ipan nochi ten ongac ica nohueyichicahualis. Huan namejuan ten nan-nechtoctilijtoctque huan nechtacamatinenque, namejuan no ompa nanmotalitihue nonacastan campa ne taixejecoloyan campa yetocque in majtactionome sillas. Huan ompa tiquinixejecolisque huan tiquinixcomacasque in pueblojuani de Israel ten pohuij de ne majtactionome tetatme. <sup>29</sup> Huan cuali quichihuas se tagat taneltoctque como yejua nechvoltasojtas huan quincautiyás ya ninchan, huan icnihuan taca, huan icnihuan sihuame, huan itajtzin huan inantzin, huan nisihua, huan nipiluan huan nitaluan ten niaxca. Huan in taneltocani como quicauque ya nochi nijín porín quitasojtaj notocay, yejuan nojonques quiselisque se macuilpoalpa tatiochihualisme, huan no quiselisque in yec nemilis ten amo queman tamis. <sup>30</sup> Huan miacque taneltocani ten axcan tayecanani, yejuan nojónques yesqui tacuitapanme. Huan miacque

taneltocani ten axcan tacuitapanme, yejuan nojónques tech ne tonalme yesque tayecanani.

**Jesús Temaquixtijque quinmachtij in tacaquini ica se nexcuitil huan quinejnehuililtij in taneltocani de Cristo queme ne milajtequitini**

**20** Huan in Jesús quinnextili in tacaquini nijín nexcuitil ijcuín: —Nicnejnehuililtía se tagat rico queme ichicahualis de Dios cuac Yejuatzin den ne eluiyactzinco momasoutoc ica ichicahualis se iyolijtic. Huan ne tagat rico patrón quiپیaya miác taquehualme ten quitequitilfaj ya tech ne milajuvas cuouta. Huan se tonal quaysa in patrón semi cualcan huan quintemoto sequi tequitini para ma cajocucan ne uvas taquilot ten yocsic ya. <sup>2</sup>Huan ne patrón moyectencahuac ya ihuan in tequitini de que quintaxtahuis ajsitoc se tonal tatanisque ica ne tomin denario. Huan ijcón quintitanic in tequitini tech ne italpan para ma quitequitilitij yejuan. <sup>3</sup>Huan ica ojpa quisac in patrón nepa queme chicnahui hora de tajca, huan ocsepa quintac ocsequi taca tocotzyetoyaj san tech ne plazajteno. <sup>4</sup>Huan in patrón quinilij ijcuín: “Namejuan xiyacan no xinechtequitilitij tech ne nomila huan namechtaxtahuis ijcón queme monequi”. Ijcuacán in taca yajque quitequitilitoj. <sup>5</sup>Huan ica expa huan ica naupa quisac in patrón nepa queme nepanta huan ocsepa quisac nepa queme eyi hora de tiotac, huan quichihuac ocsepa ijcón queme quichihuac ne cualcampa. <sup>6</sup>Huan ipa queme macuil hora de tiotac yajqui in patrón tech ne plaza huan ocsepa quinajsic sequin taca tocotzyetoyaj san huan yejua quinilij ijcuín: “¿Queyé namejuan nanyetocque nican san nochi in tonal huan amo nantequitij?” <sup>7</sup>Ijcuacán yejuan tananquilijque ijcuín: “Nican tiyetocque porín amo aquen techmaca tequit”. Huan ijcón in patrón quinilij: “Namejuan no xiyacan xinechtequitilitij tech ne nomila huan namechmacas in taxtahuil ajsitoc ijcón queme monequi”. <sup>8</sup>Huan ne cuac pancalayic ya in tonal, ijcuacán in patrón ten niaxca den milajuvas cuouta, ne patrón quilij ne tagat ten quinyecanaya in tequitini ijcuín: “Xiquinnotza nochi in tequitini huan xiquintaxtahui ajsitoc ijcón queme monequi. Pero achto xiquintaxtahui de ne satepan peuque tequitij, huan nimampa no xiquintaxtahui sejsé ijcón queme toni hora peutiyaque tequitij in taca”. <sup>9</sup>Huan ijcón mochihuac. Achtopa motenextilijque para quintaxtahuisque nochi ne naquen tequitijque nepa queme macuil hora de tiotac. Huan ijcón cada se quiselij nitaxtahuil ajsitoc ijcón queme se tonal tatanilis de se tomin denario, ijcón queme quinilijca ya in patrón ne achtopa. <sup>10</sup>Huan cuac motenextilijque ya ne naquen achto peuque tequitij, ijcuacán yejuan quiyolnemiliayaj de que quiselisque cachi mías taxtahuil. Pero amo ijcón mochihuac queme yejuan quinemiliayaj quiselisque. Ta, no quiselijque ijcón cada se de se tonal taxtahuil, de se tomin denario, ijcón queme ocsequin quiselijque. <sup>11</sup>Huan cuac quiselijque ya ne taxtahuil, ijcuacán yejuan peuque moyolcuejmoloaj ihuan in patrón se huan ocsé. <sup>12</sup>Huan quilijque in patrón ijcuín: “¿Queyé nijín tequitini ten tequitijque sayó se hora san huan no tiquintaxtahui ajsitoc ijcón queme tejuan titechtaxtahuij? Huan tejuan titaxicojque titequitijque nochi in tonal masqui melau ica tatotoncaoyot”. <sup>13</sup>Ijcuacán in patrón quinnanquilij senme de yejuan tequitini ijcuín: “Nocniu, amo teyi nimitzchihuilijtoc ten amo cuali. ¿Xe amo tejava no huan timoyectencahuac de que canachi tomin denario nimitzmacasquía para se tonal tequit?” <sup>14</sup>Huan no quilij in patrón: “Xicui nijín motaxtahuil huan xiyó. Porín nejua nicnequi niquintaxtahuis de ne tequitini masqui melau satepan ya peuque

tequitij ijcón queme tejua nimitztaxtahuij ya. <sup>15</sup> ¿Xe nejua amo nihuelis nicchi-huas queme nicnequis ica notomin? ¿Xe tejua tiquinyolnxicolía ocsequi in tequitini naquen nejua niqunyolicnelía?” <sup>16</sup> Huan ijcón miacque taneltocani ten axcan tayecanaj, yejuan nojonques yesque tacuitapanme. Huan miacque taneltocani ten axcan tacuitapanme, yejuan nojonques yesque tayecanani. Huan axcan miacque tantozalme ya de Dios, pero amo miacque taijitalme yesque tech ne tonal.

**Nican Jesús Temaquixtijque quintetapohuij  
imomachtijcahuan ica expa de que ejcotoc ya imiquilis**

*(Mr. 10.32-34; Lc. 18.31-34)*

<sup>17</sup> Huan cuac Jesús tejcotiaya ojtipan para Jerusaléncopaca, ijcuacón quinnotzac in majtactiomome imomachtijcahuan seco de ne ojtí huan quinilij ijcuín:

<sup>18</sup> —Xiquitacan, tejuan titejcotiyohue para Jerusaléncopaca huan ompa Nejuatzin ni Yectagatzin nechtemactisque inmaco in tayecanani tiopixcame huan inmaco in tanextiliani den tanahuatil de Moisés, huan yejuan nechtelchihuasque para ma nechmictican. <sup>19</sup> Huan nechtemactisque imaco in tagayot ten amo judíos para ma nechquejquelocan, huan ma nechuijuitequican, huan ma nechcuoupampilocan. Huan niman ipan eyi tonalica Nejuatzin nipanquisas niyoltoc intzalan in ánimajme.

**Nican in nantzin de Santiago huan in Juan quitajtaniilij  
Jesús Temaquixtijque tensá cualtagayot**

*(Mr. 10.35-45)*

<sup>20</sup> Huan ijcón motoquij campa Jesús se tenan ten isihuau den Zebedeo ihuan iconehuan Jacobo huan Juan. Huan in sihuat motancuaquetzac iixpan Jesús para quitajtaniilis tensá den cualtagayot. <sup>21</sup> Huan Jesús quitajtoitij ijcuín:

—¿Toni ticnequi?

Huan in sihuat tananquilij ijcuín:

—Xitanahuati que ompa campa Tejuatzin titayecana ica mohueyichichualis ma no nocone huan ma no quipiacan tanahuatil para ma motalican se moyecmacopaca huan in ocsé moopochcopaca.

<sup>22</sup> Huan in Jesús quinanquilij ne sihuat ijcuín:

—Namejuan amo nancajsicamatij ten nannechtajtaniilij. ¿Xe huelis nantaxicosque ten Nejuatzin nitaxicos porín nicseli sayó tajyohuilis?

Huan yejuan tanaquilijque:

—Quema catzin, tihuelisque.

<sup>23</sup> Huan Jesús quinilij ijcuín:

—De yec melau ten namechilía que namejuan nanquiselisque ne vaso den cualcui tajyohuilis ijcón queme Nejuatzin nicselis. Huan nanquiselisque de taahuilis ten cualcui tajyohuilis ijcón queme Nejuatzin nicselis. Pero Nejuatzin amo nicpía in tanahuatil para namechnahuatis que tejua Jacobo timotalis ca chichualis noyecmacopaca huan tejua Juan timotalis ca chichualis noopochcopaca. Ta, sayó Totajtzin Dios quinmactis ne tetayocolil para naquen Dios quinijtac ya.

<sup>24</sup> Huan cuac in ocsequi majtactiomomen imomachtijcahuan quicacque nijín tajtolme, ijcuacón moyolcualantijque ihuan in icnime Jacobo huan in Juan. <sup>25</sup> Huan Jesús quinnotzac nochin huan quinilij ijcuín:

—Como nanquimatij, in tayecanani de tataman puebløjme mohueyimatij huan mopohuaj hueyi chihuanime tech ne in puebløjme huan quinmachililtíaj inchicahualis den ne inpueblojcahuan. <sup>26</sup> Pero ma amo ijcón namohuan. Ta, naquen quinequis mochihuas tayecanque namohuan, yejua ne ma mochihua queme se tetaquehual san den nochin. <sup>27</sup> Huan tacán acsá de namejuan quinequis tayecanas, ijcuacán ma mochihua queme se tetequitilijque san den nochi. <sup>28</sup> Porín Nejuatzin ni Yectagatzin amo nihuala para ma acsame nechtequitilican. Ta, nihuala sayó para ma nitetequitilis, huan para ma nictemacas nonemilis para niquixtahuas in tajtacol, huan para niquinmaquixtis nijín talticpacuani.

**Nican tajtoa de queniu Jesús Temaquixtijque quintachialtij  
ome ixpojpyome campa pueblo de Jericó**

*(Mr. 10.46-52; Lc. 18.35-43)*

<sup>29</sup> Huan yaya Jesús ihuan imomachtijcahuan huan queman quistiyay ya tech ne pueblo Jericó, ijcuacán huel míac tagayot quitoctiliayaj. <sup>30</sup> Huan tocotzyetoyaj ome ixpojpyome ojtenteno. Huan cuac yejuan quicacque de que Jesús panotiaya ompaca, ijcuacán peuque quichicaucatzajtziiliayaj huan quiliayaj ijcuín:

—Totecotzin Temaquixtijque, tion Teconetzin de rey David, xitechonyolicneli.

<sup>31</sup> Huan in tagayot quintacahualtiayaj para ma amo cachi quitzajtziilianij oc, pero ne ixpojpyome cachi quitzajtziiliayaj chichahuac ijcuín:

—Totecotzin Temaquixtijcatzin, tion Teconetzin de ne huejcau rey David, xitechonyolicneli.

<sup>32</sup> Ijcuacán in Jesús moquetzac huan quinnotzac ne ixpojpyome huan quintaj-toltij ijcuín:

—¿Toni nanquinequij ma namechihuili?

<sup>33</sup> Ijcuacán yejuan quinanquilijque ijcuín:

—Totecotzin, ticnequij xitechontachialti.

<sup>34</sup> Huan ijcón in Jesús quinyolicnelij huan quinixacualoj. Huan ijcón nimantzin ya tachiacque ne ten catcaj ixpojpyome; huan de ompa quitoctilijque Yejuatzin para quitacamatiyasque.

**Nican tajtoa de queniu Jesús Temaquixtijque calayic tech pueblo  
de Jerusalén huan in tagayot quimohuistilijtiyajque**

*(Mr. 11.1-11; Lc. 19.28-40; Jn. 12.12-19)*

**21** Huan Jesús huan imomachtijcahuan ajsitiyayaj ya ne Jerusaléncopaca, huan yajque huan calacque ya tech in pueblo de Betfagé cerca ya de se tepet den monotza Olivos. Ijcuacán in Jesús quintitanic ome imomachtijcahuan, huan quinilij ijcuín:

<sup>2</sup>—Xiyacan tech ne pueblo ten ne yetoc cachi taixpampa. Huan niman cuac nancalaquitihue, ijcuacán ompa nancajsisque se tenan burrita ilpitoc ihuan se burritojtzin. Huan yej ne xictojtomacan huan xinechualcuilican. <sup>3</sup> Huan tacán acsá tensá namechilisquía, ijcuacán namejuan xitananquilican ijcuín: “In Totecotzin quimonequiltía quitatequiutis in tapialtzin”. Huan ijcón nimantzin namechcahuilisque in burrito.

<sup>4</sup> Huan nochi nijín mochihuac para ma ijcón motamijchihua ten quijcuilojteu in tanahuatijque Zacarías cuac yejua quijtojteu ijcuín:

<sup>5</sup> Xiquilican ne pueblojuani de Sión de Jerusalén ijcuín:

“Xiquitacan, namohueyitayecancatzin hualajtoc ya para namechyecanas. Yejuatzin yolyemanic huan cualtagat.

Huan tocotzyetihuitz ipan se burrita, tepili de se tapial”.

<sup>6</sup> Huan ijcón imomachtijcahuan yajque huan quichiuque ijcón queme Jesús quinnajnahuatijca ya. <sup>7</sup> Huan cualcuilijque Jesús in burrita ihuan nipili huan quipanpejpechtijque ica ninayahuan, huan ijcón in Jesús mopantalij ipan in burrita. <sup>8</sup> Huan tel mías tagayot quisohuayaj talixco inayahuan huan ocsequi quimatectiyaj cuoume nimayo huan quimoyautiyaj ne xihuit taixpampa de Jesús tech ne ojti. <sup>9</sup> Huan mías tagayot yayaj tayecanayaj huan ocsequin cualtoctiliayaj Jesús. Huan ijcón nochi yayaj yolpactiyaj huan quijtoayaj ijcuín:

—¡Hosana timitzonueyichihuaj Tejuatzin Temaquixtijcatzin, tion Teconetzin de ne huejca rey David! ¡Tiontatiochihual den tihualajtoc itencopa Totajtzin Dios! ¡Ticueyichihuaj Totajtzin Dios ten yetica nepa eluiyactzinco!

<sup>10</sup> Huan cuac calayic ya Jesús tech in pueblo de Jerusalén, ijcuacán nochi in pueblojuani moyolcuejmoloayaj huan miacque motajtoltiayaj ijcuín:

—¿Aconi yejuatzin ne?

<sup>11</sup> Huan miacque tagayot tananquilijque ijcuín:

—Yejuatzin ya in tanahuatijque ten monotza Jesús huan yejua ne cayot de Nazaret de Galilea.

### **Nican tajtoa de queniu Jesús Temaquixtijque quichijchiphahuac in cachi hueyi tiopan den judíos**

*(Mr. 11.15-19; Lc. 19.45-48; Jn. 2.13-22)*

<sup>12</sup> Huan cuac Jesús calayic tech in tiopan de judíos den cachi hueyi, ijcuacán Yejuatzin pehuac quincalanquixtía nochi ne tanamacani huan ne tacohuani ten tequitoyaj tech in tiopanijtic. Huan quicuic in mesajme den tomin papatani huan ica calan tacuamotac. Huan no ne icpalme den ne sehuilonime den ne naquen quinnamacatoyaj in totome ten monotza palomas, no ijcón ica calan tacuamotac. <sup>13</sup> Huan Jesús quinnilij in tagayot ijcuín:

—Achá amo nanquimatij de que tajcuiliutoc ya tech in Tajcuilolamatzin ijcuín: “Nijín nochan quitocaytisque se cali de ne tatatautilis ihuan Dios”. Huan namejuan nanquichiutocque nochantzin queme yesquía se tecal campa yetocque in tachtequini.

<sup>14</sup> Huan nimampa tech ne tiopanijtic motoquij campa Jesús sequin cocoyani ixpoyome, huan sequi ten amo huelfaj moquetzayaj huan Jesús quinpajtij. <sup>15</sup> Huan in tayecanani tiopixcame huan in tanextiliani den tanahuatil de Moisés quitacque ne mohuiscatequit ten Jesús quichihuac, huan no quicacque nochi in telpocame cuac quimohuistiliayaj Jesús tech ne tiopanijtic ijcuín: “Timitzonueyichihuaj Temaquixtijque, tion Teconetzin de rey David”. Huan ijcón cuac in tayecanani quicacque nijín tajtolme, ijcuacán yejuan peuque yolcualanque, <sup>16</sup> huan quilijque Jesús ijcuín:

—Xicaqui san ten mitzilijtocque nijín telpocame.

Pero Jesús quinnanquilij ijcuín:

—Quema, niquinaquilijtoc. Pero achá namejuan amo queman nanquileerojqe in Tajcuilolamatzin campa quijtoa ijcuín:

Totajtzin Dios, Tejuatzin ticonchiutzino de que in pilime huan in coneme ten chichij oc ma mitzoncantarohuilíaj huan mitzonmohuistilisque.

<sup>17</sup> Huan de ompa Jesús quinceuteu in tagayot huan yajqui campá puebljuani de Betania huan ompa mocahuac se yohual.

**Nican tajtoa de queniu Jesús Temaquixtíjque quintelchihuac in higoscuohuit ten amo quitemacac itaquilo**

*(Mr. 11.12-14, 20-26)*

<sup>18</sup> Huan imostica cualcampá Jesús mocuepac ocsepa se viaje tech ne puebljocopaca de Jerusalén. Huan mochihuac que cuac nejnentiaya ya, ijcuacán pehuac mayana. <sup>19</sup> Huan Jesús quitac se higoscuohuit ijcatoc ojteno, huan yajqui quitemolito itaquilo; pero amo teyi caxilij. Ta, se cuohuit ten sayó maxoxohuixtoc san. Ijcuacán in Jesús quilij ne higoscuohuit ijcuín:

—Amo quemán tictemacas oc motaquilohuan.

Huan niman ne higoscuohuit pehuac niman huaqui. <sup>20</sup> Huan cuac imomachtíjcahuan quitacque de que huayic ya ne higoscuohuit, ijcuacán semi quihueyimoucaitacque huan quitajtoltíjque Yejuatzin ijcuín:

—¿Quenín nijín higoscuohuit tel niman huayic?

<sup>21</sup> Ijcuacán in Jesús quinnanquilij ijcuín:

—De yec melau ten namechilía de que xicpiacan ne ajsicatacuautamatis huan xicneltocacan de que melau mochihuas ya nochi ten nanquitajtanilisque Dios. Huan ijcón amo sayó huelis nanquichihuasque nijín ten nicchihuilij nijín higoscuohuit. Ta, no huelis nanquinahuatisque se hueyi tepelomo ijcuín: “Ximijcuini de nican huan xiyó ximocalaquiti tech in hueyíat mar”, huan nochi nijín huelis mochihuas. <sup>22</sup> Huan como nanyecajscatacuaumatij de nanquitajtanilisque Dios ica ne tatatautilis, ijcuacán yec melau nanquiselisque ten nanquitajtanilisque, masqui ohuijcajot tzictzin queme in higoscuohuit oso se ohuijcajot ten semi hueyi queme se tepet.

**Nican tajtoa de queniu in tayecanani de judíos quitajtanilijque Jesús de aconí itanahuatil ten quipía**

*(Mr. 11.27-33; Lc. 20.1-8)*

<sup>23</sup> Huan niman Jesús calayic tech in tiopan de judíos. Huan cuac quinnextilijtoya ica in Tajtoltzin de Dios in tagayot, ijcuacán nimantzin motoquijque in tayecanani den tiopixcame huan in huehuentzitzin den puebljuani de judíos, huan yejuan quitajtoltíjque Jesús ijcuín:

—¿Catiyejúá tanahuatil ticalcui tejua para ticchihuas nijín tanextililisme? ¿Huan aconí mitzonmacac ne tanahuatil?

<sup>24</sup> Pero Jesús quinnanquilij ijcuín:

—Nejúá no namechtajtoltiti se matájtanti. Huan tacán nannechnanquilíaj, ijcuacán nejúa no namechilis ica aconí itanahuatil nicpía para nicchihuas nochi nijín tequit. <sup>25</sup> ¿Aconí quinahuatij Juan ma taahuijtinemi? ¿Xe Dios quinahuatij ma taahuijtinemi in Juan oso yejuan in tagayot quinahuatijque in Juan?

Huan yejuan moixejecoltiayaj se huan ocsé huan quijtoayaj ijcuín:

—Tacán tiquilíaj de que in Dios quinahuatij in Juan ma taahuijtinemi, ijcuacán yejúá technanquilis ijcuín: “Huan, ¿queyé amo nanquineltokuilijque ten namechilíaya in Juan?” <sup>26</sup> Huan tacán tiquilíaj de que in tagayot san quinahuatijque in



Juan de que ma taahuijtinemij, amo no cualtías. Porín tiquinmoucatocaj in pueblojuani de judíos que topan yasque. Porín yejuan in pueblojuani quipohuayaj ne Juan Taahuique de que se hueyi tanahuatijque de Dios.

<sup>27</sup> Huan ijcón in tayecanani quinanquilijque Jesús ijcuín:

—Amo ticmatij aconi quinahuatij in Juan ma taahuijtinemi.

Huan Jesús quinilij:

—No ijcón nejua amo no namechilis de que aconi nechmacac in tanahuatil de nicchihua nochi nijín tanextilisme.

### **Nican tajtoa de queniu Jesús Temaquixtjque quinmachtij in tacaquini se nexcuitil de ome telpocame**

<sup>28</sup> Huan ijcón in Jesús quinilij imomachtijcahuan ocsé nexcuitil ijcuín:

—¿Toni nanconixejecoaj de nijín nexcuitil? Se tagat yajqui quitato in itayecanacatelpoch huan quilito ijcuín: “Noconeu, axcan nicnequi xiyó xinechtequitiliti itech ne nomilaj uvas cuouta”. <sup>29</sup> Huan tananquilij ne iconeru ijcuín: “Amo nicnequi niyás nimitztequitilitiu”. Pero cachi satepan moyolnemilij huan yajqui quitequitilito nitat. <sup>30</sup> Huan in tetat yajqui quitato ica ome itelpoch huan quilij ijcón queme ne ocsé quilijca ya. Huan ne ica ome itelpoch tananquilij ijcuín: “Quema, notajtzin, niyás nimitztequitilitiu”. Pero satepan amo yajqui.

<sup>31</sup> Huan in Jesús quintajoltij in tayecanani ijcuín:

—¿Catiyejua de ne ome telpochme quichiuque queme quinequía in tetat?

Ijcuacán in tagayot tananquilijque ijcuín:

—Yej in tayecanque.

Huan ijcón in Jesús ocsepa quinilij ijcuín:

—De yec melau ten namechilía que in tatopaluiani huan in sihuaahuiltiani san namechyecantiyohue huan yejuan calaquisque campa Dios momasoutoc ica ihueyichicahualis ninyolijtic de nitaneltocacahuan. <sup>32</sup> Namechilía ijcón porín hualajca ya in Juan Taahuique para namechnextilis de queniu nanchipaucanemisque huan amo nanquineltoquilijque. Huan in tatopaluiani huan in sihuaahuiltiani, quema, yejuan quineltoquilijque huan moyolnemilijque de nintajtacoluan. Huan namejuan masqui nanquitacque ya nijínques ten quineltoquilijque Juan, pero namejuan amo no nanmoyolnemilijque de namotajtacoluan para nanquineltoquilisque in Juan.

### **Nican Jesús Temaquixtjque tamachtij ica nexcuitil de ne tequitini ten amo yolcalime**

*(Mr. 12.1-12; Lc. 20.9-19)*

<sup>33</sup> Huan ijcón in Jesús quinnextiliaya imomachtijcahuan ica nijín nexcuitil huan quinilij ijcuín:

—Xicaquican ocsepa ocsé nexcuitil. Se tagat patrón quiapiaya mfac ten niaxca huan quitocac sequi uvas tactzon tech ne imila, huan quichihuac se corral, huan tachcuac se tayohual campa huelis quipatzcas in uvas taquilot. Huan no quichihuac se hueyi tepamit para huelis quipanitas ne uvas cuouta para tajpías. Huan cachi satepan in patrón quitepialtijteu ica renta ihuan senme de nijín tequitini. Huan in patrón yajqui paxaloto huejca itech ocsé país. <sup>34</sup> Huan queman ajsic ya ne tonal cuac yocsic ya in uvas, ijcuacán in patrón quintitanic itaquehualuan para ma quiselitij in uvas taquilot

de ne tequitini quimactilisque den pohui ihuan in patrón. <sup>35</sup> Pero in tequitini quinqitzquijque itaquehualuan den patrón huan quinuitecque. Huan sequi quinmictijque huan ocsequi quintepoxonijque ica tet. <sup>36</sup> Ica ya nojón in patrón ocsepa quintitanic cachi míac itaquehualuan huan que ne achtopa quintitanca. Huan ne tequitini ten amo yolcualime quichiuque ocsepa ijcón queme ne achtopa quichiuque. <sup>37</sup> Huan cachi satepan in patrón quintitanilij se iyojtzin conetzin porín in patrón quiyolnemiliaya de que xa cachi quitasojtasquáfaj niconetzin nojón tequitini. <sup>38</sup> Huan quemán in tequitini quitacque ya ne iconeu in patrón, ijcuacán moyoliluijque se huan ocsé: “Yejua ya ne quiselis nochi ten pohui itatcopaca. Cachi cuali ximoyejyetalican ma ticmictican huan ijcón tejuan ica timocahuasque nijín uvascuoutacayot ten niaxca nitat”. <sup>39</sup> Huan ijcón quichiuque, huan quiqitzquijque ne iconetzin ne patrón huan quiquixtijque calampa de ne uvas cuouta huan ompa quimictijque.

<sup>40</sup> Ijcuacán in Jesús quintajtoltij in imomachtijcahuan ijcuín:

—Huan cuac hualas ne patrón den niaxca ne uvas cuouta, ijcuacán ¿toni quinchi-huilis ne tequitini ten amo yolcualime?

<sup>41</sup> Ijcuacán imomachtijcahuan quinanquilijque ijcuín:

—In patrón hualas huan yejua amo quinyolicnelis oc. Ta, quintamimictis ya ne tequitini ten amo yolcualime. Huan quincahuilis ica renta ocsequin tequitini ne uvas cuouta para ma yejuan quimactilican ne uvas taquilot cuac ne yocsis ya nochi ten pohui ihuan in patrón.

<sup>42</sup> Huan Jesús quinnojnótzac ne tacaquini huan monejnehuililtij yejua san mismo queme se tet huan quinilij ijcuín:

—Achá amo quemán nanquileerojtinemij in Tajcuilolamatzin ten quijsa ijcuín: In tet ten quimajpeuque in tepanchihuani, yejua ne mochihuaco tepanchicahualoni de tepamit.

Huan namejuan nannechixtopeuque ijcón queme in tepanchihuani quicauque ne tetzin ten mochihuacaco tepanchicahualoni.

Huan in Totajtzin Dios quichihuac nijín tequit huan para tejuan semi cualtzin queme amo quemán tiquitayaj.

<sup>43</sup> Huan no Jesús quinilij imomachtijcahuan ijcuín:

—Huan ijcón namechilía que namejuan Dios namechajchihuilij in tanahuatil para amo nantayecanasque ihuan Dios campa Yejuatzin momasoutoc ica ihueyichicahualis. Huan Dios quinmactis ocsequin tagayot ne tanahuatil porín yejuan quichihuasque ten Dios itahuelital. Huan ijcón yejuan quimactisque Dios in taquilot ten niaxca, ijcón queme amo quichihuasquáfaj in amocuali tequitini. <sup>44</sup> Huan ne tet den namechilijtoc ijcuín: “Aquen nesi tagat ipan huetzis ne tet, yejua ne tagat papayacas ninacayo. Huan tacán ne tet panuetzis itech se tagat, ijcuacán ne tagat mocahuas tacuechol”.

<sup>45</sup> Huan ijcón in tiopixcame tayecanani huan in fariseos cuac quicacque ne nexcutilme tenica quinnojnótzaya Jesús, ijcuacán yejuan cajsicamatque de que in Jesús tajtojtaya de yejuan. <sup>46</sup> Huan in tayecanani quinequáfaj quiqitzquisque Jesús queme preso. Huan amo huelía quiqitzquisque porín quimohuiliayaj in pueblojuani judíos. Huan in pueblojuani judíos quipohuayaj Jesús queme se hueyi tanahuatijque de Dios, porín sayó tajtoaya itencopaca Totajtzin Dios.

### Nican Jesús Temaquixtisque qitalij se nexcuitil de se ne namictilis

**22** Huan ijcón ocsepa in Jesús pehuac quinnextilía in tacaquini ica nexcuitilme huan quinnojnotzac ijcuín:

<sup>2</sup>—Nicnejnehuililtía se rey queme ichicahualis de Dios cuac Yejuatzin moma-soutoc ica ihueyichicahualis se iyolijtic. Huan nijín rey quichihuac se hueyi iluit de ne namictilis por nitelpoch. <sup>3</sup>Huan in rey quintitanic nitaquehualuan ma quinnotzati-j ocsequin ten ipa tanejmachtilme ya, ma tatacuaquij ya tech ne namictilis. Huan yejuan amo quinecque yasque tatacuatihue. <sup>4</sup>Huan ijcón in rey ocsepa quintitanic ocsequin nitaquehualuan para ma quinnahuatiti ijcuín: “Xiquinilican que nochi yetoc ya in tatacualis, porín nitanahuatij ya ma quinmictican nocuacuejuan huan ocsequin notapialuan ten cachi tomauque. Huan nochi yetoc ya nintacualis para titatacuasque. Xiquinilican ma hualacan ma moyolpactiquij tech nijín ne namictilis”. <sup>5</sup>Huan nijín taca ten tanejmachtilme ya catcaj, yejuan amo quinecque yasque. Ta, quixtopeuque in tacualis. Sequin taca yajque momilajtequitiltoij, huan ocsequin yajque tanamacatoj tech in plaza. <sup>6</sup>Huan ocsequin taca ten tanejmachtilme ya catcaj, yejuan quinqutzquijque nitaquehualuan de ne rey huan quinnuijtecque huan quinmictijque. <sup>7</sup>Huan cuac in rey quicayic de que toni mochihuac, ijcuación yejua semi yolcualanic huan quintitanic nitaquehualuan soldados para ma quinmictican ne temictiani, huan para ma no quintamichichinocan in pueblojuani de ne temictiani. <sup>8</sup>Huan ijcón in rey quinilij in taquehualme ijcuín: “Nochi yetoc ya para titatacuasque den ne namictilis. Huan ijcón ne tagayot ten tanejmachtilme ya catcaj, ipa amo quinnamiquía de que hualasquíaj porín ipa amo yolcualime catcaj. <sup>9</sup>Huan axcan xiyacan tech ojmaxalme de ojme den pueblo huan xiquinualcuican aquía huelic nancajsisque huan xiquintatautican ma tatacuaquij tohuan tech nijín ne namictilis”. <sup>10</sup>Huan ijcón intaquehualuan yajque tech in ojme huan quinsentilijque nochi ne ten quinajsicque den yolcualime huan masqui ten amo yolcualime, pero quintatautijque de que ma tatacuaquij de ne nenamictilis. Huan ijcón mosentilijque míac tagayot tech ne ichan in rey, huan ijcón moyolpactijque de ne nenamictilis. <sup>11</sup>Huan niman calayic in rey de naquen ichan para quinitas nochi ne tanotzalme ten hualajque. Pero no quitac se tagat ompa yetoya huan amo taquentoya ica ne tilma de ne nenamictilis. <sup>12</sup>Ijcuación in rey quilij in tagat ijcuín: “Tejua, ¿quenin huelic ticalayic nican? Ta, amo titaquentoc ica ne tilma de ne namictilis”. Ijcuación in tagat sayó momentamatilij huan amo teyi quijtoj. <sup>13</sup>Huan ijcón in rey quinnahuatij itaquehualuan naquen quixejxelojtoyaj ne tacualis tech ne mesa ijcuín: “Xicmetztijtzicocan ne tagat ten amo yec taquentoc huan xicmatzicocan huan xicalantamotacan tech in tayohuayanilot campa nachipa chocatos huan campa tannanzocatos sen nachipa tech in tajyohuilis”. <sup>14</sup>Huan ijcón in rey quinejnehuilía in Cristo cuac Yejuatzin hualas nican talticpac, cuac quinjitaquiu ne naquen tanotzalme de Totajtzin Dios huan no ne naquen amo tanotzalme. Porín miacque tanotzalme ya, pero amo miacque tajjitalme de Dios.

**Nican tajtoa de queniu quitajtanilijque  
Jesús cox monequi ma taxtahuacan impuestos oso amo**

*(Mr. 12.13-17; Lc. 20.20-26)*

<sup>15</sup>Huan ijcón in fariseos yajque moixejecoltijque huan moyectencauque para quicaquilisque Jesús xa tensá quijsosquía ten amo cuali, para ica huelis quiteluilisque de tajtacol. <sup>16</sup>Huan ijcón in fariseos quintitanque sequin tamatinime ten inuan pohuáj huan no quintitanque sequin tamatinime ten pohuáj ihuan in rey Herodes. Huan yejuan ajsicque huan motoquijque campa Jesús huan quilijque ijcuín:

—Tamachtijque, ticmatij que tejuatzin titajtoa ica nochi ten melau, huan titeyecnextilfa in ojtzin de Dios, huan amo tiquinyolmohuilfa in tagayot ten quijsos. Huan amo no tiquinchichicotasoja san taca. <sup>17</sup>Axcán xitechonilui toni tiquixejecoa, ¿xe Dios quimonequiltía ma titaxtahuacan impuestos den rey César, oso amo?

<sup>18</sup>Ijcuacán in Jesús niman quinyolojixmatic que amo yec tanemiliayaj ne tayecanani huan quinnanquilij ijcuín:

—Namejuan nantacajcayahuaj san, porín nannechichtacahuisnequij san ica nijín tanemililis. <sup>19</sup>Xinechnextilican in tomin tenica taxtahuas impuestos.

Huan ijcón in tayecanani cualcuilijque se tomin denario. <sup>20</sup>Huan cuac Jesús quitac ya in tomin, ijcuacán quintajtoltij ijcuín:

—¿Aconi nijín ixayac ten ixnesi nican? Huan, ¿aconi nijín itocay ten ijcuiliutoc nican?

<sup>21</sup>Ijcuacán in tayecanani tananquilijque ijcuín:

—Yejua ya in rey César.

Ijcuacán Jesús quinilij:

—Xicmactilican in rey César ten quinamiqui xicmactican César, huan xicmactilican Dios ten quinamiqui xicmactican Dios.

<sup>22</sup>Huan cuac quicacque ya nijín tajtolme, ijcuacán ne tayecanani semi quimoucaitacque den nitananquililis; huan de ompa quicauteuque Jesús huan yajque.

**Nican in saduceos quitajtanilijque Jesús Temaquixtijque de quenín  
panquisas yoltoc itzalan in ánimajme in talticpacuani**

*(Mr. 12.18-27; Lc. 20.27-40)*

<sup>23</sup>Huan tech ne mismo tonal in taca tamachilejque saduceos motoquijque campa Jesús. Pero yejuan quineltocacque de que amo huelis se panquisas yoltoc itzalan in ánimajme. <sup>24</sup>Huan yejuan quitajtoltijque Jesús ijcuín:

—Tamachtijque, in tanahuatijque Moisés techijcuilohuilij ijcuín: “Tacán se tagat yesqui namicque huan miquisquía huan quicahuasquía nisihuau huan amo quinpiasquíaj coneme, ijcuacán ma monamicti iicniutagat de ne miquet ihuan cahual sihuat ten icuñaada. Huan ma quiniscaltican coneme ihuan in cahual sihuat ten icuñaada. Huan ma quinpiacan coneme den iicniutagat ten miyic ya”. <sup>25</sup>Pues oncaya chicome icnime nican topueblo. Ne icnitzin ten tayecana, yejua ne monamictij ihuan se sihuat pero niman miyic in tagat, huan amo quinpiaque coneme. Huan quicauteu ne isihuau para ocsé icniu. Huan de ompa monamictij ica ome teicniu ihuan icuñaada ten miquic ya iyoquich. <sup>26</sup>Huan ijcón mochihuac queme ne achtopa, huan ne tenica ome teicniu miyic; huan satepan ica eyi teicniu monamictij ihuan in icuñaada. Huan ijcón mochihuac hasta ajsic de chicome icnime; nochi sejsé monam-

ictiyajque huan nochin mictiyajque huan amo aquen quinpiacque coneme. <sup>27</sup> Huan queme nochi tamimicque ya in chicome icnime, ijcuacón in sihuat no momiquilij ya.

<sup>28</sup> Huan in saduceos quilijque Jesús ijcuín:

—Axcan xitechonili, tech ne tonalme cuac panquisasque yoltocque ne taca den chicome icnime huan ne sihuacahual itzalan in ánimajme, ¿aconi isihuau yesqui senme de ne chicome icnime? Porín nochi in icnime quipouque queme nisihuau.

<sup>29</sup> Huan ijcón Jesús quinnanquilij ijcuín:

—Nanmocajcayautocque san ica ne nexcuitil, porín amo nanquiyequixmatij in Tajcuilolamatzin de Dios, nión no ichicahualis den Totajtzin Dios. <sup>30</sup> Porín cuac panquisasque yoltocque itzalan in ánimajme nojón chicome icnime, ijcuacón amo aquen huélis monamictis oc, huan nión no yoltanemilijtosque oc que ocsepa monamictis. Porín ompa nochi in tagayot poutosque queme in ángeles ne taquehualme de Dios, huan yejuan amo monamictíaj huan amo no quinnamictisque. <sup>31</sup> Huan cachi oc namechnextilía de ne tonal cuac panquisasque yoltocque in ánimajme: Achá namejuan amo queman nanquileerojtinemij tech in Tajcuilolamatzin de Dios ten technojnotza ijcuín: <sup>32</sup> “Nejuatzin ni Dios de Abraham huan ni Dios de Isaac huan ni Dios de Jacob”. Huan nijín quijtosnequi que Totajtzin Dios amo in Dios den ánimajme. Ta, Yejuatzin in Dios ten naconime yoltocque.

<sup>33</sup> Huan cuac in tagayot quicacque nijín nexcuitil, ijcuacón yejuan semi quimoucaitacque den itanextililis de Jesús.

### **Nican quitajtanilijque Jesús Temaquixtijque catiyejua in cachi hueyi tanahuatil de Dios**

*(Mr. 12.28-34)*

<sup>34</sup> Huan cuac in fariseos quicacque huan quimatque de que Jesús quintentamatilij in saduceos, ijcuacón mosentilijque in fariseos huan moixejecoltijque. <sup>35</sup> Huan se fariseo no catca taixejecojque ica in tanahuatil de Moisés no quinequía quichtacahuis Jesús huan quitajtolitij ijcuín:

<sup>36</sup> —Tamachtijque, ¿catiyejua in tanahuatiltzin in cachi hueyi de nochi?

<sup>37</sup> Huan in Jesús quilij ijcuín:

—“Xictasojta mohueyitecotzin Totajtzin Dios ica nochi moyolo, huan ica nochi motanejnequilis, huan ica nochi motanemililis”. <sup>38</sup> Yejua ya nijín in cachi hueyi tanahuatil huan de cachi cuica hueyi chicahualis. <sup>39</sup> Huan ica ome tanahuatil monhuilía queme ne achtopa tanahuatil huan no quijtoa ijcuín: “Xictasojta mocnitzin ijcón queme tejuatzin timotasojta”. <sup>40</sup> Ica nijín ome tanahuatilme tejuan ticajscamatij toni quijtosnequi nochi ne tanahuatil ten quijcuiloy in Moisés huan nochi ten tenextiliayaj ne tanahuatiani de Dios.

### **Nican Jesús Temaquixtijque quintajtanilij in tacaquini de ne Cristo, ¿Yejuatzin teconeu de aconi?**

*(Mr. 12.35-37; Lc. 20.41-44)*

<sup>41</sup> Huan nijín fariseos sen yetoyaj oc ihuan in Jesús huan in Jesús quintajtolitij ijcuín:

<sup>42</sup> —¿Toni nanquiynemilíaj de naquen monotza Cristo Temaquixtijque? ¿Ne Cristo aconi itatuan?

Huan yejuan tananquilijque ijcuín:

—Ne Cristo Yejuatzin ne teconeu de ne huejcau rey David.

<sup>43</sup> Huan Jesús quinilij ijcuín:

—¿Quenín huelisquía in rey David quipiasquía in Cristo Temaquixtjicatzin queme iconeu, huan ma no quinoztasquía in Cristo queme itayecancatzin? Porín in rey David quijcuiloj tech in Tajcuilolamatzin ijcuín:

<sup>44</sup> Huan in Totajtzin Dios quinojnotzaya Totayecancatzin in Totecotzin huan quiliaya ijcuín:

“Ximosehuijtzino nican noyecmacopaca huan niquintaliti mometz Tampa nochi ne naquen mitzonyoltahuelitaj”.

<sup>45</sup> Huan no Jesús quinilij ijcuín:

—Xicmatican que ne rey David quipohuac in Cristo queme iconeu den David, huan no in rey David quimohuiscaantzaya in Cristo queme itayecancateco.

<sup>46</sup> Huan ijcuac ne tonal amo aquen huelic oc quinanquilij ten Jesús quintajtoltiaya, huan nión se moixehuij oc de que ma quitajtoltij oc Jesús ocsequi matájtanti.

### Nican tajtoa de queniu Jesús Temaquixtjique quinteluiliaya in tanextiliani den tanahuatil de Dios

(Mr. 12.38-40; Lc. 11.37-54; 20.45-47)

**23** Huan ijcón in Jesús quinnojtzac in tagayot huan no ne imomachtijcahuan huan quiniliaya ijcuín:

<sup>2</sup>—In tanextiliani huan in fariseos mopohuaj ya de que yejuan san quipíaj in chicahualis huan in tamachilis para quinajsicamatiltisque in tagayot in tanahuatil de Moisés. <sup>3</sup> Huan ica nojón xiquintacamatican huan xicchihuacan nochi ten namechilíaj in tanextiliani. Pero amo xicchihuacan in tachihualisme ten ne tanextiliani quichihuaj, porín yejuan tanextilíaj ica se taman ten cuali pero amo quichihuaj ten cuali. <sup>4</sup> Huan in tanextiliani huan in fariseos quintalilíaj in tagayot in tanextililisme queme se ohuicayot ten semi etic ten amo huel quixicosque. Huan no ne quinchihualtíaj in tagayot ma no quinmamaltican nijín taman tanextililis de semi etic. Huan yejuan in tanextiliani huan in fariseos amo no quinequíaj momaolinisnequij para quinpalehuisque in tagayot den ne eticayot ten semi ohui. <sup>5</sup> Huan nochi nijín quichihuaj in tanextiliani huan in fariseos sayó para ma mohueyinctinemican inixpan in tagayot. Huan yejuan sayó cuelitaj cuicasque sequin cuetaxme patauque campa ixnesi in Tajtoltzin de Dios huan moixcuatalilíaj huan momolictalilíaj. Huan no cuelitaj motaquentisque ica nintilma sentanequistoc ten caultzin ten xojxochiyo ica icpat, huan sayó para que ma quinitacan in tagayot. <sup>6</sup> Huan yejuan no quinequij de que ma yetocan campa cachi caultzin cuac tatacuatij. Huan no semi quinequij motalisque tech in tiopan de judíos campa ne mosehuáj in hueyi chihuanime de ne taixpampa. <sup>7</sup> Huan no semi quinequij que in tagayot ma quinmohuiscaatajpalocan tech in ojme, huan ma quipohuacan de que melau tanextiliani.

<sup>8</sup> Huan cachi oc Jesús quinilij nijín tacaquini ijcuín:

—Namejuan ten nechtoctilíaj, amo no ijcón xicchihuacan nión no ximotecahuilican de que ma namechpohuacan in tagayot queme tamachtiani. Porín namejuan nochi nanicnime san, huan nanquipíaj sayó se Namotamachtijcau, huan Yejuatzin ne in Cristo Temaquixtjique. <sup>9</sup> Huan amo no xicpohuacan nican talticpac nión aquen queme se Namohueyitajtzin, porín namejuan nanquipíaj ya ne se Namohueyitajtzin

ne ten yetica nepa eluiyactzinco. <sup>10</sup>Huan amo no ximotecahuilican ma namech-pohuacan queme nantayecanani, porín sayó in Cristo Temaquixtijque Yejuatzin in Namotayecancau. <sup>11</sup>Huan naquen quinquetiltíla ocsequin tocnihuan, yejua ne cachi hueyi chiuque namohuan. <sup>12</sup>Huan naquen mohuejueyichihuas, yejua ne Dios quitz-iquitzintiltis; huan naquen motziquitzintiltis, yejua ne Dios quihueyichihuas.

<sup>13</sup>Huan Jesús ocsepa quinnejmachtij ijcuín:

—Semi nanteicneltijque, namejuan nantanextiliani huan namejuan nanfariseos, porín nannochin nanixcucueptocque san de namotamachilis. Porín namejuan nanquintzajtzacuiliáj in yec ojti para ma in tagayot ma amo calaquican campa Dios momasoutoc ica ihueyichicahualis. Huan namejuan nión no nanquinequij nancalaquisque. Ta, sayó nanquintzajtzacuiliájocque san ne naquen quinequij calaquisque. <sup>14</sup>Semi nanteicneltijque, namejuan nantanextiliani huan namejuan nanfariseos, nannochin nanixcucueptocque san de namotamachilis; porín namejuan nanquincuilíaj nican ne sihuacahualme. Huan no nanmotatautilíaj ihuan Dios ica míac tajtolme para ma amo ixnesi que namejuan nantecalculiani. Ica ya nojón ya namejuan nanquiselisque ten cachi hueyi tatzacuilitis. <sup>15</sup>Semi nanteicneltijque, namejuan nantanextiliani huan namejuan nanfariseos, nannochin nanixcucueptocque san de namotamachilis. Porín namejuan nantayohualojtinemij no-huiyampa campa hueyíat, hasta nochi campa tzintami in talticpac para nanquinchihuasque ma ocsequin in tagayot ma taneltocacan ijcón queme namejuan nanmohuicaj. Huan namejuan cuac ijcón nanquichihuaj, ijcuacón ne tagat ten yequin tanel-toca queme namejuan, yejua ne quinamiqui ma ipan huetzi se chicahuac tatelchihualis ya cachi hueyi huan que namejuan nanquiselisque.

<sup>16</sup>Huan no Jesús quinilij ne tacaquini ijcuín:

—Huan semi nanteicneltijque namejuan, porín namejuan sayó nanixpojpayome huan nanquiyecanasnequij in ocsequin. Huan namejuan nanquinilíaj ijcuín: “Tacán acsá de namejuan moyectencahua de que quichihuas tensá huan quitenehua que: Quitztica in tiopan de Dios, yejua ne amo monequi quichihuas ten moyectencahuac ya. Pero tacán se tagat quitenehua que: Quitztica in tomin de oro ten ne yec yetoc tech ne tiopan de Dios, ijcuacón yejua nojón monequi quichihuas”. <sup>17</sup>Namejuan nanmijmiquilome san huan nanixpojpayome san. ¿Catiyejua cachi monequi, yej ni-jín tomin de oro, oso yej nijín in tiopan de Dios ten quimohuisyotilíla ne tomin de oro? <sup>18</sup>Huan no nanquijtoaj ijcuín: “Tacán acsá de namejuan moyectencahua de que quichihuas tensá huan quitenehua que: Quitztica in altar de ne taixpan tech in tiopan de Dios, ijcuacón yejua ne amo monequi quichihuas. Pero tacán se tagat moyectencahuas de que quitenehuas que: Quitztica in tomin ten monechicoa ipan in altar, ijcuacón yej nojón semi monequi ma quichihuas porín moyectencahuac ya”. <sup>19</sup>Huan namejuan nanmijmiquilome huan nanixpojpayome san. ¿Catiyejua cachi monequi, cox yej in tomin ten monechicohuaj, oso yej nijín altar ten quimohuisyotilíla ne tomin? <sup>20</sup>Huan ne naquen quitenehua ma “Quitztica in altar”, no quitenehua ma quitztica nochi ten quipía in altar. <sup>21</sup>Huan naquen quitenehua ma “Quitztica ne tiopan de Dios”, amo yejua san ne tiopan de Dios. Ta, no quitenehua Totajtzin Dios ten calyetica ompa. <sup>22</sup>Huan ne naquen quitenehua ma “Quitztica ne eluiyatzinco”, yejua ne no quitenehua de que ma quitztica ne campa tanahuatijtoc in Totajtzin Dios; huan no quitenehua de que ma quitztica Totajtzin Dios ten ompa yetica.

<sup>23</sup> Huan no Jesús quinilij in tacaquini ijcuín:

—Huan semi nanteicneltijque, namejuan nantanextiliani huan namejuan nanfariseos, nannochin nanixcucueptocque san de namotamachilis. Namejuan nanquimactilíaj Dios ne namodiesmo den xiutzitzin san ten cualtíaj para tacualis huan pajti, queme menta huan anis huan cominos. Pero nanquisecocahuaj in tanextililisme ten cachi hueyi tech in tanahuatil de Moisés. Nanquisecocahuaj in chipaucanemilis, huan ne teyolicnelilis huan ne tacuautamatilis. Huan yejua nijín monequi ma xiccihuacan huan amo xicchihuacan de que amo nanquitemactisque namodiesmo. <sup>24</sup> Namejuan nanixpojpyome pero nanquinequij nantayecanasnequij. Huan namejuan nanquinnehuilíaj queme se tagat ten cuac tayi at, ijcuacán ocho quiquixtilía moyotzitzin nijín at huan amo momaca cuenta de que cox yetoc se caballo aijtic. <sup>25</sup> Huan semi nanteicneltijque, namejuan nantanextiliani huan namejuan nanfariseos, nannochin nanixcucueptocque san de namotamachilis. Namejuan nanquinehUILÍaj queme in vasos huan caxme ten quichipahuaj panían san huan tajitic temitoc míac pitzotic. Huan no ijcón namejuan nanmochijchipautocque san panían san, pero tech namoyolijtic nanpexontocque ica míac tenesi tanemililis den tachtequilis huan pitzotachihualis. <sup>26</sup> Namejuan nanfariseos nanixpojpyome, cachi cuali achtopa xicchihipahuacan tajitic in vasos huan in caxme ten quipía míac pitzotic, huan ijcón mocahua nochi chipahuac ten panían huan ijticpa no.

<sup>27</sup> Huan no Jesús quinilij in tacaquini ijcuín:

—Huan semi nanteicneltijque, namejuan nantanextiliani huan namejuan nanfariseos, nannochin nanixcucueptocque san de namotamachilis. NanquinehUILÍaj queme ne cualtzin pochiticque tepancalme ten campa ne toctocque in ánimajme. Porín yec melau ne tepancalme campa yetocque in ánimajme motaj nochi cualtzin istacque, pero tajitic pexontoc nochi omicojcotol den ne ánimajme huan temitoc míac pitzotic. <sup>28</sup> Huan no ijcón namejuan yec melau ten nanmotaj semi nanyolcualtaca ihuan in tagayot, huan namoijticpa pexontoc de tacajcayahualis huan míac tenesi pitzotic. <sup>29</sup> Huan semi nanteicneltijque, namejuan nantanextiliani huan namejuan nanfariseos, nannochin nanixcucueptocque san de namotamachilis. Huan namejuan nanquinchijchihuilíaj ne tepanme campa talpachiutocque in ánimajme ten tanahuatiani de Dios. Huan no nanquicualnextíaj nanquioxjochiyotíaj in tepanme campa talpachiutocque in ánimajme den taca ten catcaj yolcualime den taneltocani. <sup>30</sup> Huan namejuan nanquijtoaj ijcuín: “Tacán tejuan tinemisquíaj tech ne tonalme cuac nemicoj totayecancatatan, ijcuacán amo titapalehuisquíaj para ma quinmictianij ne tanahuatiani de Dios”. <sup>31</sup> Huan ica nijín tajtolme nancajsicamatque ya namejuan mismo huan nanmoyectenextíaj ica namotajtoluan de que namohuejcautatuan quinmictijque ne tanahuatiani. Huan namejuan no nanteconehuan de namohuejcautatuan huan nanquichihuasque ijcón queme quichiuque namotatan. <sup>32</sup> Ica ya nojón xictamichihuacan ya axcan ten ne achtopa quichiuque namotayecancatatan. <sup>33</sup> Namejuan nantajcayahuani san huan nannemij queme cohame huan queme tepiluan de cohame. ¿Quenín ijcón huelis nanmopalehuisque huan nanmomaquixtisque de ne hueyi tatechihualis ten namechuicas mictan?

<sup>34</sup> Huan ijcón ocsepa Jesús quinilij ijcuín:

—Ica ya nojón namechinualtitanilis sequin tanahuatiani de Dios, huan sequin tamachilejque de Dios, huan tanextiliani den yancuic tanahuatil de Dios. Pero namejuan nanquinmictisque huan nanquincouampilosque, huan ocsequin nanquinu-



itequisque tech in tiopan de judíos. Huan no nanquintahuelitasque huan nanquin-calanquixtisque cada se pueblo campa ajsisque. <sup>35</sup> Ica ya nojón namotech huetzis ne tatzacuultilis de Dios, porín nanquinmictijtinenque ya nohuiyan nijín taca naquen chipaucanemíaj. Huan nanquinmictijtinenque in yolcualime desde ne achtopa tonal cuac quimictijque ne Abel ten yolchipahuac catca, huan hasta campa nemico in Zacarías teconeu de Berequías, naquen quimictijque ne tiopanijtic campa ne altar tamohuisyojcan. <sup>36</sup> De yec melau ten namechilía que in tatzacuultilis de Dios ninpan huetzis in tagayot den axcan nemij. Huan huetzis ne hueyi tatzacuultilis de Dios porín ne tajtacol de namejuan huan porín ne tajtacol de namotayecancatantuan temictiani.

**Nican tajtoa de queniu Jesús Temaquixtijque  
quinchoquilía in pueblojuani de Jerusalén**

*(Lc. 13.34-35)*

<sup>37</sup> Huan Jesús quinilij ijcuín:

—Namejuan nanopueblojuani de Jerusalén, namejuan nanquinmictíaj in tanahu-atiani de Dios, huan nanquintepoxoníaj ne itanojnotzcahuan de Dios, naquen Dios namechualtitanilij. ¿Canachpa nicnequía namechsantil para namechycanas namejuan, nanopueblojuani de Jerusalén? Huan no nicnequía namechpalehuisquía ijcón queme in piotapachojque quinsentilía nipiluan yej tapaltampa, huan amo nanquinecque ma namechpalehuis. <sup>38</sup> Xiquitacan, namejuan, Dios namechsenc-ahuac ya axcan, namejuan namochanchahuan huan namopueblojcahuan. <sup>39</sup> Huan no namechilía que amo queman nannechitasque oc. Ta, sayó ijcuac ne tonal cuac namejuan nanmoyolnemilisque huan nannechilisque de Nejuatzin ijcuín: “Tejuatzin Tiontatiochihual de Dios, huan tihualajtoc itencopa Tohueyitayecancatajtzin Dios”.

**Nican Jesús Temaquixtijque quinnejmachtij in tacaquini de  
que cuejuelos in hueyi tiopan de judíos de Jerusalén**

*(Mr. 13.1-2; Lc. 21.5-6)*

**24** Huan ijcón cuac Jesús quisteu den tiopan de judíos huan yaya ocseco, ijcuacón motoquijque imomachtijcahuan huan quinequíaj quinextilisque in hueyi mohuistic tiopan huan ne tepan calicxime ten cualtitzin. <sup>2</sup> Huan Jesús quin-nanquilij ijcuín:

—Namejuan nanquitztocque nochi nijín, pero de yec melau ten namechilía que nican campa tiopan amo teyi mocahuas oc, nión se tet ten nanquitaj axcan sajsali-utocque huan nejnepaniutocque huan que amo huejuelihuisque oc.

**Nican Jesús Temaquixtijque quinmachtij imomachtijcahuan de ne  
nescayome cuac in talticpac tajyohuis ya huan cuac ne tacuitapan tonalme**

*(Mr. 13.3-23; Lc. 21.7-24; 17.22-24)*

<sup>3</sup> Huan ijcón in Jesús yajqui motalito tech ne tal lomojtzin ten monotza Olivos, huan imomachtijcahuan quichtacanojnotzacoj huan quilijque ijcuín:

—Xitechonili, ¿queman huejuelihuis nijín tiopan calicxime? ¿Huan toni nescay-ome oncas cuac Tejuatzin timohualuicas nican talticpac, cuac tamis ya in talticpac?

<sup>4</sup> Ijcuacón in Jesús quinnanquilij ijcuín:

—Ximoyecpiacan huan ma amo aquen namechyolcajcayahua tech namotanelto-calís. <sup>5</sup> Porín hualasque míac tacajcayahuani huan ijcón míac quincajcayahuasque,

porín yejuan quijtojtínemisque ijcuín: “Nejua ya ni Cristo Temaquixtijque”, huan ijcón miacque quincajcayahuasque. <sup>6</sup>Huan namejuan cuac nanquicaquisque den ne tehuilis huan cuac ongas míac moucayot de ne tehuilis, ijcuacón amo ximoy-olmoutican, porín ipa ijcón monequi ma mochihua; pero no xicmatican que ayamo yej ne in tamilis den talticpac. <sup>7</sup>Huan tech ne tonalme pehuas moajocuisque pueblojuani huan motehuisque se huan ocsé pueblojuani, huan in tagayot den se país moajocuisque huan motehuisque se huan ocsé tagayot. Huan oncas míac cocolis huan míac máyanti huan talolinilis; huan nochi nijín mochihuas nohuiyampa tech in senmanahuac. <sup>8</sup>Huan cuac nochi nijín mochihuas ya, yej ne quijosnequi que yequin peuti mochiuti hueyi tajyohuilis para nochi in talticpacuani. <sup>9</sup>Huan ijcuac ne tonal namechtemactisque para ma namechcojocan huan para ma namechmictican. Huan nochi in tagayot ten amo taneltocaj, yejuan ne namechtahuelitasque porín namejuan nanyectacuautamatij nohuan itech notocaytzin. <sup>10</sup>Ijcuacón ne tonalme miacque taneltocani quipolosque nintacuautamatilis de Nejuatzin nohuan. Huan se huan ocsé motahuelitztinemisque, huan se huan ocsé motemactisque ihuan in tequihuani tech ne nimpueblojuan. <sup>11</sup>Huan miacque monextisque naquen xolopijti-jtínemisque huan quijtojtínemisque que yejuan ya tanahuatiani de Dios huan ijcón quincajcayahuasque miacque taneltocani. <sup>12</sup>Huan ijcón momiactilis míac ten amo cuali tachihualisme, huan ica nojón miacque taneltocani quicahuasque ne tasojtalis se huan ocsé. <sup>13</sup>Pero naquen quisentocas yec tacuautamatis itech Cristo, hasta ne tonal cuac tamis in talticpac, yejua ne quipías ne maquixtilis. <sup>14</sup>Huan cuac motamitetapohuis ya tech nochi senmanahuac nijín yancuic Tajtoltzin de que Dios momasoutoc ica ihueyichicahualis, huan no cuac quintaminejmachtisque ya nochi in talticpacuani, ijcuacón xicmatican que ejcotihuitz ya in tamilis den talticpac. <sup>15</sup>Huan naquen quileeroa nijín Tajcuilolamatzin de Dios den tanahuatijque Daniel, monequi ma cajsicamatican. Porín in tanahuatijque Daniel, yejua ne queman ya quijtojca de que nanquitasque que mochihuas ya ne tetzaucapolihuilis campa amo monequía yetosquía, ten quitzojuilolotía ompa tech in tiopan de Dios.

<sup>16</sup>Huan no ijcón Jesús quinilij imomachtijcahuan ijcuín:

—Huan nochi ne naquen calyetosque tech ne Judeajcopaca, yejuan nojón monequi ma cholocan, huan ma yacan huan ma motatican campa ne tepepan. <sup>17</sup>Huan ijcón ne naquen yetosque calcuaco den nichan, ma amo temo oc para calaquis ichan huan quixtis tensá ten niacxa. <sup>18</sup>Huan ijcón ne naquen yetosque itequitayan, ma amo no quinemilican de que mocuepacan inchan de que ma quicuiti nintilma. <sup>19</sup>Huan cachi teicneltijque in sihuatzitzin ne ten cocoxcayetosque ica pili; huan teicneltijque sihuatzitzin ne naquen tachijchitijtosque ica coneme itech ne tonalme. <sup>20</sup>Ica ya nojón ximotatautilican ihuan Dios que ne tonal cuac monequis nancholosque, ma amo namechajsi cuac taseseyas, oso cuac ne tonal de nesehuilis cuac amo quitcahuiliaya ma nejmentosque. <sup>21</sup>Porín ne tonalme oncas cachi hueyi tajyohuilis ten amo queman nanquitasque desde cuac tzinpehuac in talticpac. Huan amo queman oncas oc satapan ocsé tajyohuilis queme nijín ten nanquipanosque. <sup>22</sup>Huan queme in Totajtzin Dios amo quitocotzos oc in tajyohuilis de ne tonalme, ijcuacón amo aquen huelis maquisas. Pero Totajtzin Dios quitocotzos in tajyohuilis de ne tonalme porín Dios quintasojta naquen Yejuatzin quinijitac ya ma pohuican ihuantzin. <sup>23</sup>Huan tacán acsame namechilisquía ijcuín: “Xiquitacan, nepa yetoc in Cristo Temaquixtijque”, oso namechilisque: “Xiquitacan, tiyohue tiquitatij campa yetoc in Cristo

Temaquixtijque”, pero amo xiquinneltoquilian ne tacajcayahuani. <sup>24</sup> Porín miacque tacajcayahuani moajocuisque huan hualasque huan quijtojinemisque que yejuan in Cristo Temaquixtijque huan yejuan tanahuatiani de Dios. Huan yejuan quichihuasque miacque mohuiscatequit huan no quichihuasque tatiochihualisme ica mohuisyot, para que ijcón cachi huelis quincajcayahuasque in taneltocani. Huan achá no quincajcayahuasque hasta itaijitaluan de Dios. <sup>25</sup> Huan nochi nijín namechilía ya achtopa que mochihuas.

<sup>26</sup> Huan no Jesús quinnexiliaya imomachtijcahuan ijcuín:

—Ica ya nojón como namechilisque in tacajcayahuani ijcuín: “Tiyohue tiquitatij in Cristo, nepa yetoc campa tayiucan”, amo xiyacan. Oso no namechilisque: “Tiyohue tiquitatij ne calijitc porín ompa yetoc in Cristo”, pero amo no xiquinneltoquilian nojón tacajcayahuani. <sup>27</sup> Huan ijcón queme nanquitaj de que tapetani ica ne ticohuat nepa iquisayampa tonal huan tamiti hasta ipolihuiyampa in tonal, no ijcón Nejuatzin nannechitasque tech ne tonal cuac Nejuatzin ni Yectagatzin nimohualuicas nican talticpac. <sup>28</sup> No ijcón campa yesqui huetztos se miquet, no ompa mosentiláj miac tzojpilome. Porín tzojpilome cuali quimatij can huetztoc in miquet huan ompa moijsiucasentiláj. Xicmatican de que no ijcón mosentilijthuetzisque notaneltocacahuan cuac Nejuatzin ni Cristo nimohualuicas nican talticpac.

**Nican Jesús Temaquixtijque quinmachtij imomachtijcahuan de ne tonal cuac mohualuicas nican talticpac Yejuatzin in Yectagatzin de Dios**

*(Mr. 13.24-37; Lc. 21.25-33; 17.26-30, 34-36)*

<sup>29</sup> Huan no Jesús quinnexiliaya imomachtijcahuan ijcuín:

—Huan ijcón tech nojón tonalme nimanpa den ne hueyi tajyohuilis, ijcuacón in tonaltzin tayohuayantis huan amo tanextis oc, huan in metzti amo no tahuis oc, huan in sitalinme tepehuisse den eluiyac. Huan in chicaucatayecanani de nemij ne ejecaixco, yejuan nojonques Dios quintzetzelos. <sup>30</sup> Huan ijcón nanquitasque ne ejecaixco se nescayot den ica monextilis de que nihualajtoc ya Nejuatzin ni Yectagatzin. Ijcuacón nochi in talticpacuani mochocistisque huan nechitasque nejua ni Yectagatzin cuac Nejuatzin nihualajtos ya mixtzalan tech ne ejecaixco, huan cualtzin nipetantihualas ica in hueyi chichualis. <sup>31</sup> Huan in Dios quinqualtitanis in ángeles taquehualme de Dios ica se hueyi tzajtzilis den tapitz, huan ijcón quinsentilisque nochi ne notaijitaluan nochi tech in se manahuac desde campa tzinehua in talticpac huan in eluiyac huan hasta ne campa tzintami. <sup>32</sup> Namechilía de que ximoyecajsicamatiltican de nijín nexcuitil den higoscuhuit. Huan cuac nanquitasque que cualtzin maxoxohuixtoc ya in higoscuhuit, ijcuacón nanquimatisque ya de que ejcotoc ya in tonalme den tatotoncayot. <sup>33</sup> Huan ijcón cuac no nanquitasque de que mochiutoc ya nochi nijín nescayome ten namechiluijca ya ne achtopa, ijcuacón xicmatican que niyetoc ya caltenteno ya para nihualas nican talticpac. <sup>34</sup> De yec melau ten namechilía de que nochi nijín nescayome mochihuas achtopa ya de que miquisque in tagayot ten axcan nemij. <sup>35</sup> Huan masqui in talticpac huan in eluiyac tajtamis, pero notajoltzitzin amo queman tamis.

<sup>36</sup> Huan no Jesús quinilij imomachtijcahuan ijcuín:

—Huan ijcuac ne tonal de nohualalis amo aquen quimatis. Hasta itaquehualuan de Dios in ángeles ten yetocque ne tech eluiyac amo no quimatij de ne tonal cuac Nejuatzin nimohualuicas. Ta, sayó quimatos Tohueyitajtzin Dios. <sup>37</sup> Huan ijcón queme

ne tonal cuac nemico in tanahuatijque Noé, no ijcón mochihuas cuac Nejuatzin nimohualuicas ni Yectagatzin. <sup>38</sup>Huan tech ne tonalme cuac nemico Noé achtopa que hualasquía ne hueyi tetzaucaquiuhuit, ijcuacán nochi in tagayot tatacuajtoyaj san, huan ocsequin motahuantijtoyaj san. Huan in ocsequin tetatme huan tenanme quinijtantoyaj san ne teichpochuan para ma monamictican. Huan ijcón mochiutihualaya hasta cuac Noé calayic tech in hueyi barco ten monotza arca. <sup>39</sup>Huan in tagayot amo quineltocacque de que hualasquía ne tetzaucaquiuhuat. Pero satepan cuac huala ya, ijcuacán nochi quinuiyac huan moalsimijque. Huan ijcón no tech ne tonalme ijcón yesqui, cuac nimohualuicas Nejuatzin ni Yectagatzin. <sup>40</sup>Huan tech ne tonalme tequititose ome taca tech in mila, huan se tequitique Dios cajocuis huan ocsé mochahuas. <sup>41</sup>Huan no ijcón ome sihuame yetosque campa molino tixcuechojtosque, huan se sihuat Dios cajocuis huan in ocsé mochahuas. <sup>42</sup>Ica ya nojón ya xiyecyectocan huan xitachixtocan, porín amo nanquimatij toni horas hualas Namotayecancateco Jesucristo. <sup>43</sup>Huan ximatican nijín: Tacán quimatisquía in tetat de que toni hora hualasquía in tachteque, ijcuacán ne tetat achá moyeyjyectalijtosquía, huan ijsatosquía, huan amo mochahuasquía ma quicaltapocan para quitachtequisque. <sup>44</sup>Ica ya nojón ya namejuan no ximoyeyjyectalijtocan, porín Nejuatzin ni Yectagatzin nimohualuicas ya cuac namejuan amo nanyoltanemilijtosque nión no nannechchixtosque.

**Nican Jesús Temaquixtijque quitelij se nexcuitil de ne taquehual ten yolcuali huan ocsequin ten amo yolcuali**

*(Lc. 12.41-48)*

<sup>45</sup> Huan ijcón in Jesús quinmacthiaya imomachtijcahuan ica nexcuitil ijcuín:

—Huan axcan namechtapohuiti de se taquehual ten yolcuali huan ten cuatamatque. Huan nipatrón de ne taquehual den tatequitiltijque den ocsequin taquehualme, huan ma yejua tanahuati ma quintamacacan cuac ne hora de tacualis. <sup>46</sup> Huan ijcón ne tayecancataquehual tatiochihual yesqui porín cuac ejcos nipatrón, ijcuacán cajsiquiu quichiutoc ten quinajnahuatijteu. <sup>47</sup> De yec melau ten namechilfa, ne patrón quicahuilis ne itayecancataquehual ma yejua quinyecana in ocsequin taquehualme huan nochi ne ten niaxca. <sup>48</sup> Pero no namechtapohuiti de se tayecancataquehual ten amo yolcuali. Huan moyolfaya yejua san ijcuín: “Nopatrón huejcahuati huan amo niman ejcos”. <sup>49</sup> Ijcuacán ne tayecancataquehual pehuac quintajyohuiltía in ocsequin taquehualme, huan no pehuac tatacuati san, huan no pehuac tahuana ihuan in tahuani. <sup>50</sup> Huan ijcón in patrón ejcoc tech ne tonal cuac ne itayecancataquehual amo quichixtoc, porín yejua amo quimatía toni hora ejcosquía nipatrón. <sup>51</sup> Huan ijcón in patrón quichicaucatzacuilitis ne taquehual ten amo yolcuali. Huan quitelchihuas, huan quititanis ma tajyohuiti ihuan ne taca ten ne yolcucuepme san. Huan ompa chocatosque huan tannanatzocatosque tech ne tajyohuilis.

**Nican tajtoa de que Jesús Temaquixtijque quitelij se nexcuitil den májtacti ichpochme**

**25** Huan ijcón in Jesús quinilij imomachtijcahuan ocsepa se nexcuitil ijcuín: —Nicnejnehuililtía májtacti ichpochme queme ichicahualis de Dios cuac Yejuatzin momasoutoc ica ihueyichicahualis se iyolijtic. Huan nijín májtacti ich-

pochme quicuicque ne nintahuiluan huan quisque para quinamiquito ne teyoquich ten monamictiti ya. <sup>2</sup>Huan macuilime ichpochme catcaj yec tanemiliayaj, huan in ocsequin macuil ichpochme amo yec tanemiliayaj. <sup>3</sup>Huan in macuilime ichpochme ten amo yec tanemiliayaj, yejuan quicuicque nintahuiluan huan yajque huan amo cuiyacque míac gas para ocsepa quinpexontisquíaj nintahuiluan cuac tamisquía in gas. <sup>4</sup>Huan in macuil ichpochme naquen yec tanemiliayaj, yejuan nojonques quicuicque nintahuiluan huan no cuiyacque míac gas para ocsepa quinpexontisquíaj nintahuiluan. <sup>5</sup>Huan in teyoquich semi huejcahuac para ejcos; huan ne ichpochme yejuan mocuahuihuicayaj ica cochilis huan niman ixcojcochíaj. <sup>6</sup>Huan ijcón ne tajcoyohuan ya cuac mocayic se tzajtzilic, ijcuacón quijtoayaj ijcuín: “Pon huitza ya in teyoquich; niman xiquisacan xiyacan huan xicnamiquitij porín Yejuatzin hualajtoc ya”. <sup>7</sup>Huan ijcón nochi ne ichpochme meuque huan moquetzque huan peuque quixotaltía nintahuiluan. <sup>8</sup>Huan in macuil ichpochme ten amo yec tanemiliayaj, yejuan quinilijque in ocsequin ichpochme ijcuín: “Xitechonmacacan sequin namogas porín tejuan totahuiluan sehuisnequij porín tamic ya in gas”. <sup>9</sup>Ijcuacón in macuil ichpochme ten yec tanemiliayaj, yejuan tananquilijque ijcuín: “Amo huelis tamechmacasque porín tacán tamechmacaj, ijcuacón amo no ajsis para tejuan. Cachi cuali xiyacan campa quinamaca huan ompa xicohuacan para namejuan”. <sup>10</sup>Pero cuac yajque ya quicohuatoj ya ne in gas ne macuil ichpochme ten amo yec tanemiliayaj, ijcuacón ejcoc ne teyoquich. Huan in macuil ichpochme ten yec tanemiliayaj huan ten moyejyectalijque ya, yejuan calacque ihuan ne teyoquich campa nenamictilis. Huan niman quitzacuacque in puerta. <sup>11</sup>Huan cachi satepan ejcocque ne ocsequin macuilime ichpochme ne ten amo moyejyectalijtoyaj huan quijtoayaj ijcuín: “Totecotzin, Totecotzin, xitechontatapohuili”. <sup>12</sup>Huan ne teyoquich quinnanquilij ijcuín: “Yec melau ten namechilía que amo namechixmati aconi namejuan”.

<sup>13</sup>Huan ijcón in Jesús quintaminotzotzac ya in tagayot huan quinilij ijcuín:

—Amo xicchihuacan queme ne ichpochme ne ten amo yec tanemiliayaj. Ta, xiijsatocan huan xitatachixtocan porín amo nanquimatisque catiyejua tonal nión catiyejua hora nimohualucas Nejuatzin ni Yectagatzin.

### **Nican Jesús Temaquixtijque quitelij se nexcuitil de ne huelilisme ten quejnehuilía queme in tomin**

<sup>14</sup>Huan Jesús quinilij imomachtijcahuan ijcuín:

—Nicnejnehuiltilía se patrón queme ichicahualis de Dios cuac Yejuatzin momasoutoc ica ihueyichicahualis se iyolijtic. Huan ne patrón quinemilijtoc de que paxolotiu tech ocsé pueblo. Huan cuac ejcoc ya in tonal de que quisas ya, ijcuacón quinnotzac itaquehualuan huan quinmajmactilijtehuac nitomin cada se taquehual. <sup>15</sup>Huan senme de ne taquehualme quimactilij macuil mil monedas de istac tomin; huan ocsé quimactilij ome mil; huan in ocsé quimactilij se mil. Huan yejua ijcón quinmactilij in tomin ijcón queme quinitac de cada se den quipíayaj huelilic para tequitisque. Huan de ompa in patrón yajqui paxaloto huejca tech ocsé país. <sup>16</sup>Huan in taquehual ten quiselij in macuil mil monedas de tomin, yejua ne quicuic in tomin huan yajqui quitequitiltito ne tomin huan quitanic ocsé macuil mil monedas de tomin. <sup>17</sup>Huan no ijcón ne taquehual ten quiselij ome mil monedas de tomin, no ijcón quichihuac huan quitequitiltito ne tomin huan quitanic ocsé ome mil monedas de tomin. <sup>18</sup>Huan ne taquehual ten quiselij se mil san, yejua nojón yajqui tachcu-

ato huan ompa quipantalito in tomin den quimactilijca ya nipatrón. <sup>19</sup> Huan panoc miac tonalme huan ijcón mocuepac ne inpatrón de ne taquehualme, huan quine-milij in patrón quitepotztocati nijín tahuicalis de ne eyi taquehualme. <sup>20</sup> Huan ijcón mochihuac que achtopa ejcoc in taquehual ne den quiselijca macuil mil monedas huan quimactij nipatrón ocsé macuil mil ten quitanic ya huan quilij ijcuín: “Notecotzin, tejuatzin tinechonmactilijca macuil mil monedas de tomin, pero nican yetoc ocsé macuil mil ten nictanic ya”. <sup>21</sup> Ijcuacón in patrón quinanquilij ijcuín: “Cuali yetoc, tejuatzin, titaquehual den semi tiyolcuali huan cuali titequitique, porín cuali tictequitiltij ya in tepitzin in tomin ten nimitzmactilijteuca ya. Ica ya nojón tejua nimitztalis tinotayecancataquehual, huan yequintzin xipano tech nochantzin huan cuali ma tisentequitican huan ma timosenpanyolpactican”. <sup>22</sup> Huan de ompa ejcoc in taquehual ten quiselijca ome mil monedas huan quilij ne ipatrón ijcuín: “Notecotzin, tejuatzin tinechonmactilijca ya ome mil monedas, pero axcan nican nimitzualcuilía ocsé ome mil ten nictanic ya”. <sup>23</sup> Ijcuacón in patrón quinanquilij ijcuín: “Cuali yetoc, tejuatzin, titaquehual ten semi tiyolcuali huan cuali titequitique porín cuali tictequitiltij ya in tomin masqui tepitzin san ten nimitzmactilijteuca. Ica ya nojón nimitztaliti tejua tinotayecancataquehual. Huan yequintzin xipano tech nijín nochantzin huan cuali ma tisentequitican huan ma timosepanyolpactican”. <sup>24</sup> Huan de ompa ejcoc ne taquehual ten quiselijca se mil san monedas de tomin huan quilij ne ipatrón ijcuín: “Notecotzin, nejua nicmatía que tejuatzin chicahuac tiquintequitiltía motaquehualuan, huan tejuatzin nicmatía de que ticajocui taquilome campa amo tictocac huan ticololoa xinach campa amo teyi tictepehuac. <sup>25</sup> Huan nicmohuilij ne chicaucatequit. Ica ya nojón nicuic in tomin huan nicuiyac nictal pachoto tech se talcomit. Huan axcan nican yetoc nijín motomin ten tinechmactilijteuca ya; xiconcui ten moaxca”. <sup>26</sup> Ijcuacón in patrón quinanquilij in taquehual ne ten amo yolcuali huan quilij ijcuín: “Tejua semi titatziu porín ticmatoya ya de que nicajocui taquilome campa amo nictocac, huan nicololoa campa amo teyi nictepehuac. <sup>27</sup> Ica ya nojón cachi cuali xictemacani oso xicalaquiani tech se banco campa notomin huelisquía quitequitiltisquíaj ne taca naquen tiquinmactilisquía. Huan ijcón cuac nimocuepasquía, ijcuacón nicselisquía notomin ihuan ten motanilij ya notomin”. <sup>28</sup> Huan ijcón in patrón quinilij in ocsequin taquehualme ijcuín: “Xicuilican de ne tatziu ne se mil monedas de tomin huan xiquinmactilican ne naquen quipía májtacti mil monedas. <sup>29</sup> Huan nochi ne naquen quipíaj in tamachilisme de Dios huan quitequitiltíaj, yejuan nojonques cachi oc Dios quinmactilis. Huan nochi ne naquen quipíaj sayó tepitzin san tamachilisme de Dios huan amo quitequitiltisque in tepitzin san ten quipíaj, yejuan nojonques Dios quitamicuilis ne den tepitzin san ten quipíaj. <sup>30</sup> Huan ne taquehual ten tatzihuic nimantzin xicuiyacan huan xicalantamotacan ne campa tayohuayanijtic huan ma ompa chocato huan ma ompa tannanzocato tech ne tajyohuilis”.

**Nican Jesús Temaquixtijque quinmachtij in tacaquini de ne tonal cuac  
Yejuatzin quinxcomacas huan quintelchihuas in talticpacuani**

<sup>31</sup> Huan no Jesús quinilij imomachtijcahuan ijcuín:

—Huan ijcón Nejuatzin ni Yectagatzin nimohualuicas ica chicahualis queme hueyi chiuque de rey, nechyehualojtihuallasque nochi niángeles itaquehualuan in Totajtzin Dios. Huan Nejuatzin nimotalis tech ne nomohuiscasehuilojcan campa ne notaixe-

jecocan huan campa ne no tacualtzincan. <sup>32</sup> Huan ijcón in ángeles quinsentilisque nochi in pueblojuani de nochi pueblojme den talticpac noixpantzinco Nejuatzin. Huan Nejuatzin ni Cristo niquinsejsecotalis se huan ocsé, ijcón queme ne tapixque quinejsecotalía in ichcame huan in chivos. <sup>33</sup> Huan Nejuatzin ni Cristo niquinyecotalis noyecmacopaca in ichcame; huan in chivos niquintalis noopochcopaca. <sup>34</sup> Huan ijcón Nejuatzin nitayecanque niquinilis naquen yetosque noyecmacopaca ijcuín: “Xihualacan nohuan namejuan, porín nantatiochihualme den Notajtzin Dios. Huan xic-selican nijín yec yetolis nepa eluiyactzinco ten Totajtzin Dios ne campa nanyetosque namejuan. Ipa namechchijchihuilij ya desde ne tonal cuac tzinpehuac in talticpac”. <sup>35</sup> Huan Nejuatzin ni Yectagatzin no niquinilis ne naquen yetosque noyecmacopaca ijcuín: “Nejuatzin cuac nimayanaya, ijcuación namejuan nannechtamacacque. Huan cuac nimocaltajtaniaya, ijcuación namejuan nannechmacacque can nimocusehuis. <sup>36</sup> Huan no cuac amo nicpiaya notilmajtzin, ijcuación namejuan nannechtaquentijque. Huan cuac nimococoaya ya, ijcuación namejuan nannechcalpanotoj. Huan cuac niyetoya cárcelijtic, ijcuación namejuan nanualajque nannechitacoj”. <sup>37</sup> Huan ne naquen yolchipauque quinanquilisque ijcuín: “Totecotzin, ¿catijejua tonal timitzitacque cuac timayancanemía huan timitztamacacque? ¿Huan catijejua tonal timitzitacque cuac tiamiquía huan timitzatiltijque? <sup>38</sup> ¿Huan catijejua tonal timitzitacque cuac timocaltajtaniaya huan tejuan timitzmacacque can timosehuis? ¿Huan catijejua tonal timitzitacque cuac amo ticpiaya motilma huan tejuan timitztaquentijque? <sup>39</sup> ¿Huan catijejua tonal timitzitacque cuac timococoaya ya oso cuac tiyetoya tech in cárcelijtic huan tejuan timitzitatoj?” <sup>40</sup> Huan in Jesús in tayecanque quinaquilis ijcuín: “De yec melau ten namechilía que nochi ten yesqui tapalehuilis ten nanquichiuque para nijinques nocnihuan masqui nocnihuan amo quiapiyaj tenica ixpanosque, pero nochi nijín nanquichiuque para Nejuatzin”.

<sup>41</sup> Huan no Jesús quinilij imomachtijcahuan ijcuín:

—Huan de ompa in tayecanque quinilis naquen yetosque iopochcopaca ijcuín: “Xicnechtapatahuilican, namejuan den nantatelchihualme ya, huan xiyacan tech ne tit ten amo queman sehuis campa Dios quichijchihuac ya para in amocuali huan para nitaquehualuan. <sup>42</sup> Huan ompa xiyacan porín cuac nimayanac, namejuan amo nannechtamacacque. Huan cuac niamiquía, namejuan amo nannechatiltijque. <sup>43</sup> Huan cuac nimocaltajtaniaya, namejuan amo nannechmacacque can nimosehuis. Huan cuac nechpoloaya notilmajtzin, namejuan amo nannechtaquentijque. Huan cuac nejua nimococoaya huan niyetoya cárcelijtic, ijcuación namejuan amo no nannechcalpanotoj”. <sup>44</sup> Ijcuación in taca den tatelchihualme quinanquilisque ijcuín: “Totecotzin, ¿quemanían timitzitacque ay timayancanemi oso tiamictinemi oso mitzpoloaya motilma, oso timococoaya, oso tiyetoya tech in cárcel huan amo timitzpalehuijque?” <sup>45</sup> Huan ijcuación Jesús in tayecanque quinnanquilis ijcuín: “De yec melau ten namechilía, nochi ten yesqui tapalehuilis ten amo nanquichiuque ihuan nijín nocnihuan ten amo quiapiyaj tenica ixpanosque, no ijcón amo para nejua nanquichiuque. <sup>46</sup> Huan nochi namejuan den tatelchihualme nantamelahuasque campa ne tatzacuiltilis ten amo queman tamis. Huan nochi namejuan den nanyolcualime nantamelahuasque campa ne nemilis nachipa”.

**Nican tajtoa de queniu moyectencauque in tayecanani judíos para quiquitzquisque Jesús Temaquixtijque**

*(Mr. 14.1-2; Lc. 22.1-2; Jn. 11.45-53)*

**26** Huan cuac Jesús quintaminextilij ya nochi nijín nexcuitil, ijcuacón quinilij imomachtijcahuan ijcuín:

<sup>2</sup>—Huan cuali nanquimatocque ya que nican ome tonalica mochihuas iluit den tajyohuilis huan Nejuatzin ni Yectagatzin nechtemactisque para ma nechcuoupampilocan.

<sup>3</sup>Huan ijcón in tayecanani tiopixcame huan in tanextiliani den tanahuatil de Moisés huan in huehuentzitzin den pueblojuani judíos, nochi nijinques mosentilijque icalteno ne tayecanque tiopixcat ten monotza Caifás. <sup>4</sup>Huan ompa moixejecoltijque se huan ocsé quenín para quiquitzquisque queme preso in Jesús ica tacajcayahualis para quimictisque. <sup>5</sup>Huan no quinemilijque ijcuín:

—Cachi cuali ma amo ticchihuacan axcan, porín mochiutoc ne hueyi iluit den tajyohuilis huan para ma amo moyolcucuejmolocan in tagayot.

**Nican tajtoa de queniu se sihuat de ne pueblo Betania quicuaojxilij Jesús Temaquixtijque ica aceite ten semi ajuiyac**

*(Mr. 14.3-9; Jn. 12.1-8)*

<sup>6</sup>Huan Jesús yetoya tech ne pueblo Betania campa calyetoya ne Simón naquen Jesús quipajtijca ya den ninacayo pajpalanía. <sup>7</sup>Huan motoquij se sihuat campa Jesús tacuajtoya huan quicuaojxilij aceite ica se istacomit ten pexontoya ica aceite ten cualtzin ajuiyac huan ten semi patío. <sup>8</sup>Huan cuac imomachtijcahuan quitacque ten quichihuac ne sihuat, ijcuacón yejuan yolcualanque huan peuque quilíayaj ijcuín:

—¿Queyé, tejua sihuat, ijcón ticchihua? Ticahuiloj nijín ajuiyacayot. <sup>9</sup>Ta, cachi cuali ma ticnamacanj ica míac tomin huan ica nijín tomin tiquinpalehuisquíaj in taca ten amo teyi quipíaj ten cuasque.

<sup>10</sup>Huan cuac ijcón quiytoayaj, ijcuacón in Jesús quicayic huan quinilij ijcuín:

—¿Queyé nanquicuejmoloaj nijín sihuatzin? Porín nochi nijín ten nechchihuilía, se cuali tequit. <sup>11</sup>Porín xicmatican de que nachipa namohuan yetosque ne naquen amo teyi quipía ten cuasque. Pero nejua amo nachipa namohuan ninemis nican.

<sup>12</sup>Huan nijín sihuat nechcuaojxilijtoc ica nijín aceite den ajuiyacat, huan nijín quichihuac para ne tonal cuac nechtalpachotihue tech ne ánimajcal. <sup>13</sup>De yec melau ten namechilía que campa yesqui motetapohuis nijín yancauc tanahuatil de Dios tech nochi se manahuac, no ijcón motetapohuis de nijín sihuatzin ten quichihuac axcan, huan ica nijín quelnamiquisque ne sihuatzin.

**Nican tajtoa de queniu in Judas moyectencahuac de quitemactis Jesús Temaquixtijque inmaco in tayecanani**

*(Mr. 14.10-11; Lc. 22.3-6)*

<sup>14</sup>Huan senme den majtactiomomen imomachtijcahuan ten monotza Judas Iscariote, yejua ne yajqui quinnojnatzato in tayecanani tiopixcame. <sup>15</sup>Huan Judas quinilij ijcuín:

—¿Canachi tomin nannechmacasque para que ma nejua namechmacti Jesús Temaquixtijque?



Huan in tayecanani quinanquilijque ijcuín:

—Timitzixtahuilisque sempool huan májtacti ica ne istac tomin denario —yesqui queme valeroa eyi ciento pesos.

<sup>16</sup> Huan cuac in Judas quiselij ya in tomin, ijcuación yejua pehuac tech ne tonal de que quitemojtinemía para quenín huelis quitemactis in Jesús inmaco in tayecanani.

**Nican tajtoa de queniu Jesús Temaquixtijque  
quinnextilij imomachtijcahuan de ne Santa Cena**

*(Mr. 14.12-25; Lc. 22.7-23; Jn. 13.21-30; 1 Co. 11.23-26)*

<sup>17</sup> Huan ijcón queman ajsic ya ne achto tonal den iluit den tajyohuilis cuac quicuayaj pan ten amo quipía tamajmahuilis de levadura, ijcuación motoquijque imomachtijcahuan huan quitajtojtijque Jesús ijcuín:

—¿Can timonequiltía ma timitzchijchihuilij in tacualis para titacuasque tech ne iluit den tajyohuilis?

<sup>18</sup> Ijcuación in Jesús quinnanquilij ijcuín:

—Xiyacan tech ne pueblo huan xiajsican ichan se tagat huan xiquilican ijcuín: “In Tamachtijque quijtoa que ejcotoc ya ne hora de notajyohuilis huan tech mochantzin nejua nicnequi ma ticchihuacan ne iluitzin den tajyohuilis ihuan nomomachtijcahuan”.

<sup>19</sup> Huan imomachtijcahuan yajque quichihuatoj ijcón queme Jesús quinnajnahuatij ya, huan ompa quichijchiuque in tacualis para se iluit den tajyohuilis.

<sup>20</sup> Huan cuac ne tapoyauteno ya, Jesús motocotzojtzino huan tacuaj ihuan ne majtactionome imomachtijcahuan. <sup>21</sup> Huan cuac ne tacuajtoyaj ya, ijcuación Jesús quinilij ijcuín:

—Yec melau ten namechilía de que senme de namejuan nechtemactis inmaco in tayecanani para nechmictisque.

<sup>22</sup> Ijcuación semi moyolcocoayaj ne imomachtijcahuan huan peuque quimatajtoltíaj se huan ocsé huan quilijque ijcuín:

—Notecotzin, ¿xon amo nejua?

<sup>23</sup> Huan Yejuatzin quinnanquilij ijcuín:

—Ne naquen pantajaquis tech noplato, yejua ne naquen nechtemactis. <sup>24</sup> Yec melau Nejuatzin ya ni Yectagatzin niyás nimomiquilitiu ijcón queme quijtoa in Tajcuilolamatzin. Pero cachi teicneltijque ne tagat naquen nechtemactis Nejuatzin ni Yectagatzin; cachi cuali nojón tagat ma amo yolini nican talticpac.

<sup>25</sup> Ijcuación tananquilij in Judas ten quitemactij Jesús huan quilij ijcuín:

—Notamachtijcau, ¿xe nejua yesqui nimitztemactis?

Huan Jesús quinanquilij:

—Quema, como tejua ijcón tiquijtoa.

<sup>26</sup> Huan cuac tacuajtoyaj ya, ijcuación Jesús quicuic in pan huan quitasojcamachilij Ihueyitajtzin, huan satepan quicojotonac in pan huan quinmajmacac imomachtijcahuan. Huan de ompa quinilij ijcuín:

—Xicuacan nijín pantzin; yejua ne nonacayo.

<sup>27</sup> Huan de ompa quicuic ocsepa se vaso de vino huan quitasojcamachilij Ihueyitajtzin. Huan quinmajmacac imomachtijcahuan huan quinilij ijcuín:

—Xitayican nijín vino nochi namejuan. <sup>28</sup> Porín nijín vino yejua ne noesyotzin. Huan ica nijín vino quitenextía que nimoyectencauca ya ihuan Notajtzin Dios de que

mimilahuis noesyotzin, para que ijcón ixnesis que Dios quintapojpoluía miacque den tajtacolejque. <sup>29</sup> Pero namechyecquilía que amo ocsepa nitayis oc nijín vino, hasta queman ne tonal cuac tisentayisque cuac Notajtzin Dios momasoutoc namoyoljtica ica ihueyichicahualis.

**Nican Jesús Temaquixtijque quitematiltij Pedro que  
yejua quilis de que amo quixmatis in Jesús**

*(Mr. 14.26-31; Lc. 22.31-34; Jn. 13.36-38)*

<sup>30</sup> Huan queman tamí cantarojque ya se himno, ijcuación nochin quisque de ne cali huan yajque campa se tepepan de monotza Olivos. <sup>31</sup> Huan ompa Jesús quinilij ijcuín:

—Nochi namejuan nanmomoutisque huan nanmoyolxocolisque porín Nejuatzin tech nijín yohual. Porín ijcón ijcuiliutoc tech in Tajcuilolamatzin de Dios ten qui-jtoj ijcuín: “Nicojocos in tapixque huan niichcahuan sejseyacan yasque”. <sup>32</sup> Huan satapan cuac nipanquisas ya niyoltoc intzalan in ánimajme, ijcuación Nejuatzin niyás namechyecantíyas hasta ne Galileajcopaca.

<sup>33</sup> Huan Pedro quinanquilij ijcuín:

—Masqui nochi in tagayot momoutisque huan yolcualanisque por tejuatzin, pero nejua amo.

<sup>34</sup> Huan ijcón in Jesús quilij ijcuín:

—Yec melau ten nimitzilía que tejua axcan tech nijín tayohuac achtopa que tza-tziz in piotzin, tejua titeilis expa que amo tinechixmati.

<sup>35</sup> Pero in Pedro quilij:

—Melau masqui mohuan ma nimiquiti, pero amo niquijtos de que amo nimitzixmati.

Huan nochi ijcón quijtojque imomachtijcahuan se huan ocsé.

**Nican tajtoa de queniu Jesús Temaquixtijque motatatautilij  
ihuan Dios tech ne xocomila campa monotza Getsemaní**

*(Mr. 14.32-42; Lc. 22.39-46)*

<sup>36</sup> Huan ijcón ajsicque Jesús ihuan imomachtijcahuan campa itech se xocomila ten monotza Getsemaní. Huan ompa Jesús quinilij ijcuín:

—Ximosehuican nican huan Nejuatzin niyó cachi taixpan nimotatatautiliti ihuan Notajtzin Dios.

<sup>37</sup> Ijcuación in Jesús quinuiyac in Pedro huan in ome iconehuan Zebedeo. Huan pehuac Jesús quimachiliaya que tajyohuiyaya tech niyolo huan motayocoltiaya ya.

<sup>38</sup> Huan ijcón in Jesús quinilij ijcuín:

—Nimachilía tech noyolo de que nitayocolmiqui. Ica ya nojón namejuan ximocahuacan nican pero xiijsatocan nohuan.

<sup>39</sup> Huan ijcón in Jesús yajqui cachi taixpan huan ompa motancauquetzato huan motentocato talixco huan ompa motatatautilito ihuan Itajtzin huan quiliaya ijcuín:

—Nohueyitajtzin, como ijcón mopaquilis, xinechonajchihuili nijín tajyohuilis. Pero ma amo mochihua queme nejua nicnequi. Ta, ma mochihua ijcón queme Tejuatzin ticonmonequiltía.

<sup>40</sup> Huan de ompa mocuepac Jesús quinitato campa yetoyaj ne imomachtijcahuan, huan quinajsito cocochtocque huan Jesús quilij in Pedro ijcuín:

—¿Queyé amo nanuelque nanixpetantosquíaj nohuan siquiera se hora?

<sup>41</sup> Huan ocsepa Jesús quinilij ijcuín:

—Nican xiyetocan xiixpetantocan huan ximotatautilijtoca ihuan Dios para que ma amo nanuetzisque tech in ohuicayot de que in Satanás mitzichtacahuis. De yec melau ten namechilía de que namoyolojuan quipíaj tanejnequilis de cuali, pero cue-tautoc namochicahualis porín amo nanquípíaj in yec tacuautamtilis. Ica ya nojón amo hueli nanquichihuaq ten cuali.

<sup>42</sup> Huan ijcón ica ojpa yajqui Jesús motatautilito ihuan Dios ocsepa ijcuín:

—Notajtzin, como semi monequis de que nejua niquijyohuis nijín ohuicayot, pues sayó xiconchihua queme Tejuatzin ticonmonequiltía.

<sup>43</sup> Huan ijcón niman ocsepa mocuepac Jesús campa yetoyaj imomachtijcahuan huan ocsepa quinajsito cocochtocque ne imomachtijcahuan porín ninixtololohuan itzatzacuíaj ica in cochilis. <sup>44</sup> Huan ocsepa ompa quincateu huan yajqui ica expa huan motatautilito ihuan Dios ica mismo tajtolme de ne achtopa quijtojca ya. <sup>45</sup> Huan ijcón ocsepa mocuepac Jesús campa yetoyaj imomachtijcahuan huan quinilij ijcuín:

—Axcan huelis para nancochisque ya, huan ximosehuican ya. Porín ejcoc ya in hora de Nejuatzin ni Yectagatzin nechtemactisque inmaco ne tagayot den tajtacolejque para nechmictisque. <sup>46</sup> Huan niman ximoquetzacan huan tiyohue; porín huitza ya ne naquen nechtemactis inmaco in tayecanani.

### **Nican tajtoa de queniu in tayecanani judíos quiquitzijque Jesús Temaquixtijque queme preso**

*(Mr. 14.43-50; Lc. 22.47-53; Jn. 18.2-11)*

<sup>47</sup> Huan queman Jesús tajtojtoya oc ihuan imomachtijcahuan, ijcuacán ejcoc in Judas senme de ne majtactiomome imomachtijcahuan. Huan ne Judas quinalcuía míac tagayot ten cualcuíaj machete huan cuoume. Hualajque intencopaca ne tayecanani tiopixcame huan in huehuentzitzin den pueblojuani judíos. <sup>48</sup> Huan in Judas ne naquen quitemactij Jesús quinilijca ya in tayecanani ijcuín:

—Cuac nanquitasque que nictennamiquis, ijcuacán xicmatican que yejua ya ne Jesús; xiquitzquican huan xictzicocan.

<sup>49</sup> Huan ijcón in Judas motoquij campa Jesús yetoya huan quilij ijcuín:

—¿Quenín tionayohuac, Notamachtijcau?

Huan niman Judas quiquechnahuaq huan quitennamic in Jesús. <sup>50</sup> Ijcuacán in Jesús quinanquilij ijcuín:

—Nocnitzin, ¿tonica teja tihuitza?

Ijcuacán nimantzin in tagayot motoquijque huan quimatziytzicojque Jesús huan cuiyacque queme preso. <sup>51</sup> Pero mochihuac de que senme den ihuan yetoya in Jesús quiquixtij nimachete, huan quinacascotonac in taquehual de ne cachi hueyi tiopixcat. <sup>52</sup> Huan ijcón in Jesús quiluij ijcuín:

—Xicyectali momachete campa tiquiehua. Porín nochi naquen motehuis ica machete, yejua ne no ica machete miquis.

<sup>53</sup> Huan Jesús quinilij in tagayot ijcuín:

—¿Xe amo ticmati de que Nejuatzin nihuelis nictajtanis Nohueyitajtzin huan Yejuatzin nechinualtitanilis majtactiomome pantime de ángeles? Huan se panti quipía majtactiomome mil ángeles. <sup>54</sup> Pero tacán ijcón nicchihuasquía, ijcuacán

amo mochihuasquía ne ten in Tajcuilolamatzin de Dios quiytoa que monequi motamichihuas.

<sup>55</sup> Huan Jesús ocsepa quinilij in tagayot ijcuín:

—Namejuan nanualajque ica machete huan ica cuohuit para nannechquitzquisque, queme yesquía nejua nitachtecque san. Mosta mosta nimotaliaya namohuan tiopanijtíc huan namechmachiaya; huan amo queman nannechquitzquijque para ma xinechtziticocan.

<sup>56</sup> Huan nochi nijín mochihuac para ma motamichihuas ijcón queme tacuilojcaj in tanahuatiani de Dios. Huan ijcón nochi ne imomachtijcahuan quichochohluilijque Jesús huan Yejuatzin mocahuac iselti.

**Nican tajtoa de queniu cuiyacque Jesús  
Temaquixtjique inixpan in tayecanani judíos**

*(Mr. 14.53-65; Lc. 22.54-55, 63-71; Jn. 18.12-14, 19-24)*

<sup>57</sup> Huan ne taca quiquitzquijque Jesús huan cuiyacque inixpan ne hueyi tayecanque tiopixcat ten monotza Caifás, huan ompa no mosentilijque ne tanextiliani den tanahuatil de Moisés huan ne huehuentzitzin den pueblojuani judíos.

<sup>58</sup> Huan in Pedro quitoctiliaya huejca san hasta ajsicque icaltenixpan nichan ne hueyi tiopixcat. Huan in Pedro calayic caltampa huan motalij campa in mayolme para quitasquía toni quichihuilisque in Jesús. <sup>59</sup> Huan in tayecanani tiopixcame huan in huehuentzitzin den judíos huan nochi ocsequi tamachilejque ten pohuáj ihuan in hueyi tequihuani, nochi nijinques mosentilijque huan quiyoltemoayaj tensá tajtacol para quipajpantisquíaj Jesús, para ijcón huelisquía quitelchihuasque huan quimictisque Yejuatzin. <sup>60</sup> Huan masqui ijcón quichiuque, pero amo teyi cajxiliayaj, masqui miacque quipajpantiayaj Jesús ten amo melau. Huan cachi satepan hualajque ome taca para quitechtisque Jesús ica tajtolme ten amo melau. <sup>61</sup> Huan yejuan quilijque ijcuín:

—Nijín tagat Jesús quiytoaya ijcuín: “Nejua nihuelis nicuejelos in tiopan de Dios huan ipan eyi tonal nicchijchihuas ocsepa”.

<sup>62</sup> Huan ijcón in tayecanque tiopixcat moquetzac huan quilij Jesús ijcuín:

—¿Queyé amo teyi ica titananquilía? ¿Toni mitzijtohuilijtocque nijín ome testigos?

<sup>63</sup> Huan in Jesús motentamatilij san. Huan cachi oc in tayecanque tiopixcat quilij ijcuín:

—Nimitzchicaucanajnahuatía ica itocaytzin den Tohueyitajtzin Dios ten yoltica que “Quitztica Dios”, xitechyequili cox tejuatzin ya in Cristo Temaquixtjique, in Teconetzin de Dios.

<sup>64</sup> Huan in Jesús tananquilij ijcuín:

—Quema, Nejuatzin ya in Cristo ijcón queme tejuatzin tiquijtoa. Huan no namechilía que nannechitasque Nejuatzin ni Yectagatzin cuac nimotalituyecmacopaca ica in chichualis den Totajtzin Dios. Huan no nannechitasque cuac nimohualuicas mixtzalan nepa ejecaixco.

<sup>65</sup> Huan ijcón ne tayecanque tiopixcat cualanic huan pehuac momojmotzoaya ica ne itilma; ijcón quichihuac porín quixejecoj que Jesús quihuajuicaltij Totajtzin Dios. Huan de ompa quinilij ijcuín:

—Nijín tagat quihuijuicaltij Dios ica itajtoluan. ¿Para toni ticnequij ocsé tagat ma quipajpantiqui oc? Porín namejuan cuali nanquicactocque ya de nijín tajtolme tenica quihuijuicaltij Dios. <sup>66</sup> Huan, ¿toni nanquixejecoaj namejuan?

Huan tananquilijque in tayecanani ijcuín:

—Tejuan timoixejecoltíaj de que cachi cuali ma miqui nijín tagat.

<sup>67</sup> Huan ijcón peuque quixchichijchaj Jesús huan quixtajtatziniayaj huan cuitequíaj. <sup>68</sup> Huan quiliayaj Jesús ijcuín:

—Como tejua in Cristo, xiquixejeco aconi mitzmagatoc.

**Nican tajtoa de queniu in Pedro quinilij in tacaquini que yejua  
amo quixmati in Jesús Temaquixtijque**

*(Mr. 14.66-72; Lc. 22.56-62; Jn. 18.15-18, 25-27)*

<sup>69</sup> Huan ijcón in Pedro tocotzyetoya nepa caltampa huan mochihuac que hualcalanquisac se sihuat den tetixilijque huan quilij Pedro ijcuín:

—Tej no tinemía ihuan ne Jesús den Galilea.

<sup>70</sup> Huan in Pedro quitatij ten melau huan senteixpan quilij ijcuín:

—Amo nicajsicamati tonica tinechnojnotztoc.

<sup>71</sup> Huan cuac in Pedro calan quistiaya ya, ijcuacón ne calampa ya ocsé tetixilijque quitac Pedro huan quinilij ne naquen tocotzyetoyaj caltampa:

—Ne tagat no ihuan nemía ne Jesús de Nazaret.

<sup>72</sup> Huan ijcón ocsepa in Pedro quitatij ten melau huan quinilij ijcuín:

—“Quitztica Dios” que amo niquixmati ne tagat.

<sup>73</sup> Huan cachi nimampa sequi taca ten ompa yetoyaj ya huan motoquijque campa in Pedro huan quilijque ijcuín:

—Tejua, yec melau ixnesi que no ticayot de ne Galilea, ompa tipohui porín mo-caqui motajtolis sansé ijcón queme Yejuatzin tajtoa.

<sup>74</sup> Ijcuacón in Pedro pehuac cachi oc tahujuicaltía huan quinilij ocsepa ijcuín:

—Melau “Quitztica Dios” que ne tagat amo niquixmati.

Huan de ompa nimantzin pehuac tzajtzi ya in piotzin. <sup>75</sup> Huan ijcón in Pedro quel-namic ten Jesús quiluijca ya ne achtopa: “Yec melau que achtopa ya que tzajtzisquía in piotzin, tejua tiquijtos expa de que amo tinexchixmati”. Huan ijcón in Pedro calan quisac huan pehuac semi mochojchoctía ilihuis.

**Nican tajtoa de queniu Jesús Temaquixtijque  
ajsic campa in hueyi chiuque Pilato**

*(Mr. 15.1; Lc. 23.1-2; Jn. 18.28-32)*

**27** Huan cuac tanesic ya, ijcuacón nochi in tayecanani tiopixcame huan in huehuentzitzin den pueblojuani judíos, yejuan nojonques mosentilijque huan moyectencauque de que quimictisque Jesús. <sup>2</sup> Huan ijcón cuiyacque Jesús tzicauti-aya huan quitemactijque imaco in hueyi chiuque ne tayecanque Poncio Pilato.

**Nican tajtoa de queniu in Judas miquic.**

<sup>3</sup> Huan ijcón in Judas cuac quitac de que quitelchiuque ya Jesús ma quimic-tican, ijcuacón yejua moyolcocoj ya huan moyolnemiliaya porín quitemactij ya Jesús. Huan yajqui nimantzin quintemactito in sempoal huan májtacti istac tomin

de ne tayecanani tiopixcame huan in huehuentzitzin den pueblojuani den judíos.

<sup>4</sup> Ijcuación in Judas quinilij ne tayecanani ijcuín:

—Nimotajtacolmacac ya porín nictemactij ne yectica tagat para ma quimictican.

Huan yejuan quinanquilijque ijcuín:

—Huan tejuan, ¿toni totequiú oc? Pues amo totequiú oc tejuan. Ta, tejava san a ver toni ticchihua ica nojón tomin.

<sup>5</sup> Ijcuación in Judas ica calijtic tacuamotac ne istac tomin den tiopixcame, huan quisteu huan yajqui huan moquechilpito ica se laso, huan ompa miyic. <sup>6</sup> Huan ne tayecanani tiopixcame quiajocuique ne tomin huan quijtoque ijcuín:

—Amo huelis ma ticsentilican nijín tomin campa monechicoa in tomin ten in tagayot quitemacaj para Dios. Porín nijín tomin yejava ne in taxtahuil para quimictisque se tagat.

<sup>7</sup> Huan ijcón niman in tayecanani moixejecoltijque huan moyectencauque que cachi cuali ica ne tomin ma quicohuasque se tal den se tagat soquiconchique para ma quiapiacan campa quintalpachosque in ánimajme den amo nican cayome. <sup>8</sup> Ica ya nojón hasta axcan ne tal monotza ijcuín: in tal quicouque ica taxtahuil tenica quimictijque se tagat. <sup>9</sup> Huan ijcón mochihuac ten quijcuilojca ya ne tanahuatijque Jeremías cuac quijtojca ijcuín: “Huan teconehuan den pueblojuani Israel quitallijque que se tagat ipatiu sempoal huan májtacti tomin, huan quicuicque ne tomin, <sup>10</sup> huan ijcón quicouque ne tal campa tequitía ne soquiconchique. Huan ijcón mochihuac porín quimonequiltij in Totecotzin”.

### **Nican tajtoa de queniu Pilato quimatajtoltij Jesús Temaquixtijque**

*(Mr. 15.2-5; Lc. 23.3-5; Jn. 18.33-38)*

<sup>11</sup> Huan ipa cuiyacque ya Jesús iixpan in hueyi tequihua Pilato huan yejava pehuac quimajtajtoltij Jesús ijcuín:

—¿Xe tejava ya in tayecanque de nochi in judíos?

Ijcuación in Jesús tananquilij ijcuín:

—Quema, ijcón queme tejuatzin tiquijtoa.

<sup>12</sup> Huan cuac in tayecanani tiopixcame huan in huehuentzitzin den judíos quicacque in tananquililis de Jesús, ijcuación yejuan cachi oc quiteteluiliiayaj huan quipajpantiayaj de mífac tataman; pero Jesús sayó motentamatilij huan amo teyi ica tananquilij. <sup>13</sup> Huan in Pilato ocsepa quilij ijcuín:

—¿Xe amo ticaqui nochi nijín ne teluililis tenica mitzpajpantíaj?

<sup>14</sup> Pero Jesús sayó motentamatilij huan níón teyi ica tananquilij. Ijcuación in tayecanque Pilato quimoucaitac huan amo quimatía oc toni quichihuas oc.

### **Nican tajtoa de queniu quitelchique Jesús Temaquixtijque de que ma quimictican**

*(Mr. 15.6-20; Lc. 23.13-25; Jn. 18.38—19.16)*

<sup>15</sup> Huan tech ne tonalme den iluit ipa mochiutihuitz que in tequihua Pilato quinc-ahuilía in pueblojuani judíos se tagat preso naquen yejuan quijitasquíaj. <sup>16</sup> Huan ne tonal tzactoya se tagat se preso monotza ya Barrabás den nochi quixmatíaj. <sup>17</sup> Huan ijcón cuac mosentilijque ya in tayecanani, ijcuación in tequihua Pilato quintajtoltij in tagayot ocsepa ijcuín:

—Namejuan tagayot, ¿catischejua preso nanquinequij ma nicajcahua? ¿Cox yejua ne preso Barrabás, oso yejua Jesús den monotza Cristo?

<sup>18</sup> Porín Pilato ipa cajsicamatic ya de que ica ne xijcolot in tayecanani quitemactijque Jesús para ma quimictican. <sup>19</sup> Huan cuac in Pilato tocotzyetoya campa ne quinixejcoa in moteteluiliani, ijcuacón isihuau in Pilato quinahuatiliqui ijcuín: “Amo teyica ximocalaqui ica ne tagat ten yolcuali, porín yalao tayohuac nejua nechmomoutiaya huan nechtajyohuiliaya porín nicojcochitztoya de ne Jesús”. <sup>20</sup> Huan in tayecanani tiopixcame huan in huehuentzintzin den judíos quintaneltoctijque nochi in tagayot de que ma quitajtanilican in Pilato de que ma quitojtomacan ne Barrabás huan ma quimictican Jesús. <sup>21</sup> Huan ijcón in Pilato ocsepa quinnojnnotzac huan quintajoltij in pueblojuani ijcuín:

—¿Catischejua de nijín omen presos nanquinequij namejuan ma nictojtoma ma yohui?

Ijcuacón in pueblojuani quijtojque ijcuín:

—Yejua ne Barrabás.

<sup>22</sup> Huan Pilato ocsepa quintajoltij in pueblojuani ijcuín:

—Huan como nictojtoma Barrabás ma yohui, ¿toni nicchihuulis Jesús den monotza Cristo?

Ijcuacón nochi in pueblojuani tananquiliijque ijcuín:

—¡Xicuoupampilocan in Jesús!

<sup>23</sup> Huan in Pilato ocsepa quinilij in pueblojuani ijcuín:

—¿Toni tajtacol quichihuac nijín Jesús?

Ijcuacón in pueblojuani cachi oc tzajtzíaj huan quijtoayaj ijcuín:

—¡Xicuoupampilocan in Jesús!

<sup>24</sup> Huan quitac in Pilato de que amo teyi cualtiaya oc nitajtol. Ta, cachi oc moyolcuemoloayaj san yejuan in pueblojuani judíos. Ijcuacón in Pilato tanahuatij ma cualcuilican at para ma momajtequi senteixpan nochi in tagayot huan quinilij ijcuín:

—Pues nejua amo xinechtectican que nejua nitanahuatij que xicmictican nijín tagat den yolcuali. Ta, namejuan namotanemililis cuica in tajtacol.

<sup>25</sup> Huan nochi in tagayot tananquiliijque ijcuín:

—Tejuan huan toconehuan titananquifaj por ne miquilis den ne yolcuali Jesús.

<sup>26</sup> Huan ijcón quitojtonque de que ma yohui in preso Barrabás. Huan niman tatitanic ma cuitequican Jesús huan quitemacti ma quicuoupampilocan Yejuatzin.

<sup>27</sup> Huan cachi satepan in taquehualme soldados den hueyi tequihua Pilato cuiyacque Jesús ichan Pilato campa hueyi caltampa. Huan de ompa quinsentilijque ocsepa in soldados huan nochin quiyehualojque in Jesús. <sup>28</sup> Huan de ompa quitaquenuixtijque Jesús huan quiquentijque se tilma chichiltic. <sup>29</sup> Huan ompa quiquejquelojque Jesús huan quicuatalilijque se taijquitil de huitzti ten yohualtic queme se corona. Huan quimaquitzquiltijque Jesús se topil iyecmacopaca huan motancuaquetzque iixpan huan quiquejqueloayaj huan quiluiayaj ijcuín:

—Ma amo queman timiquis, tejua titayecanque den judíos.

<sup>30</sup> Huan no quixchijchayaj Jesús huan no quicuijque se acat huan quicuahuijuitequíaj Yejuatzin. <sup>31</sup> Huan niman cuac quitamiquejquelojque ya, ijcuacón quiquixtilijque ne chichiltima huan quitaililijque ocsepa itilma. Huan de ompa cuiyacque huan quicuoupampilotoj.

### Nican tajtoa de queniu quicuoupampilojque Jesús Temaquixtijque

(Mr. 15.21-32; Lc. 23.26-43; Jn. 19.17-27)

<sup>32</sup> Huan cuac sen quistiayaj caltempan in soldados ihuan Jesús, ijcuacón quinamicque se tagat monotza Simón, ipueblo Cirene, huan quifuerzahuijque de que ma no quimama ne colotzin ten cuiyac ya in Jesús. <sup>33</sup> Huan ijcón ajsicque tech ne tal lomojtzin ten monotza Gólgota, den quiijosnequi miquetzontecomatan. <sup>34</sup> Huan de ompa quitayiltijque Jesús vinagre tamanelol ica cuouchoquilot. Huan Jesús cuac quitenyecoj ya, ijcuacón amo quineyic tayis.

<sup>35</sup> Huan cuac ne Jesús quisosjoque ya ica clavos tech ne colotzin, ijcuacón in soldados quichiuque ne tatanilis para quitasquía de catiyejua tasal de Jesús cuicasquía cada soldado. Huan ijcón mochihuac ten quiijuiloj ne tanahuatijque de Dios cuac quiijtoj ijcuín: “Moxejxelohuilijque se huan ocsé notilmajuan huan quichiuque ne tatanilis para quitasquía aconí cuicasquía nochi notilma”. <sup>36</sup> Huan niman motalijque ompa in soldados para quipiasque Yejuatzin campa yetoya. <sup>37</sup> Huan tech ne ixcuaco in colotzin quitalijque sequi tajtolme tenica quitelchiuque Jesús, huan ne tajtol quiijtoaya ijcuín: “Yejua nijín Jesús, Tayecanque den judíos”. <sup>38</sup> Huan no quincuoupampilojque inajnacastampa Jesús ome tachtequini, se iyecmacopaca huan in ocsé iopochcopaca. <sup>39</sup> Huan in pueblojuani ten panoayaj taixpampa Jesús mocuahuihuicatoyaj huan yejuan quiquejqueloayaj san Jesús huan quiliayaj ijcuín:

<sup>40</sup> —Tejua tiquijtoaya que ticuejuelos in tiopan de Dios huan ipa eyi tonal ocsepa ticchihuas. Pero axcan ximomaquixti tejua moselti san.

<sup>41</sup> Huan no ijcón quiquejqueloayaj Jesús nochi in tayecanani tiopixcame huan in tanextiliani den tanahuatil de Moisés, huan in fariseos huan in huehuentzitzin den pueblojuani de judíos. <sup>42</sup> Huan ijcón yejuan moyoliliayaj de Jesús ijcuín:

—Achá yejua quinmaquixtij ocsequin tagayot, pero yejua iselti amo huelis mo-maquixtis. Pero melau como yejua ne in Tayecanque de Israel, pues ma temo tech ne colotzin; huan ijcón ticneltocasque de que melau yejua in Cristo Temaquixtijque. <sup>43</sup> Yejua ne Jesús quiijtoj que tacuautamatij tech ne Ihueyitajtzin Dios, pues achá Itajtzin Dios quimaquixtis axcan mismo como melau quitasojta, porín techilía que yejua Teconetzin de Dios.

<sup>44</sup> Huan no ijcón quiquejqueloayaj Jesús ne ome tachtequini den ihuan quincuoupampilojque Yejuatzin.

### Nican tajtoa de que Jesús Temaquixtijque momiquilij

(Mr. 15.33-41; Lc. 23.44-49; Jn. 19.28-30)

<sup>45</sup> Huan mochihuac que tayohuayantijtoya nochi in talticpac desde ne cuac nepanta hasta ne eyi hora de tiotac. <sup>46</sup> Huan cuac ne eyi hora de tiotac, ijcuacón Jesús tzajtzic chichahuac huan quiijtoaya ijcuín:

—Elí, Elí, ¿lama sabactani? —quiijosnequi: No Dios no Dios, ¿queyé tinechsencahuac?

<sup>47</sup> Huan in ocsequin ten yetoyaj ompa quicacque itzajtzilis huan quiijtoaya ijcuín:

—Nijín tagat quinoztoc ne tanahuatijque de Dios ten monotza Elías.

<sup>48</sup> Huan nimantzin senme den yetoya ompa, yejua cuitihuetzito se tilma ten posoc-tic huan cajaqui tech vino den chichic huan quiyecapantalilij ica se acat; huan de



ompa quitenajxiltij Jesús para ma yejua quichichinani. <sup>49</sup> Huan in ocsequin ten ompa yetoyaj quijtojque ijcuín:

—Xicahuacan ma tiquitacan cox hualas oc ne Elías tanahuatijque para quipalehuiqui.

<sup>50</sup> Huan ocsepa in Jesús tzajtzc chicahuac huan ijcón momiquilij. <sup>51</sup> Huan ne tasal ten pilcatoya ne tiopanijtic campa in altar, yejua ne itzayanic huan ome quisac de ajco huan hasta tani. Huan talolinic huan ijcón in teme tajtapanque nochi. <sup>52</sup> Huan motapouque ne tepanme campa talpachiutoyaj in ánimajme huan sequin taneltocani panquisque yoltocque ne ten achtopa momiquilijque. Huan ijcón quisque in ánimajme itech ne tepancalme. <sup>53</sup> Huan nimampa de que cuac panquisac ya Jesús yoltoc intzalan in ánimajme, ijcuacán ne taneltocani den quisque tech ne ánimaj tepancalme, yejuan yajque tech ne mohuisca pueblo de Jerusalén campa miacque tagayot quinnextilijque. <sup>54</sup> Huan se tayecanque soldado huan ocsequin in soldados quipixtoyaj Jesús. Huan cuac quimachilijque de que talolinic ya huan quitacque nochi miac tenesi den mochihuac, ijcuacán yejuan semi moyolmoutijque huan quijtojque ijcuín:

—Yec melau nijín tagatzin Teconetzin de Dios.

<sup>55</sup> Huan ompa yetoyaj miac sihuame huejca san ontachixtoyaj. Huan yejuan ipa quitoctiliyaj Yejuatzin in Jesús porín quisenuicatinemíaj desde ne Galilea huan quitequitiliyaj Jesús. <sup>56</sup> Huan ompa yetoyaj in María Magdalena, huan in María inan den Jacobo huan de José, huan no yetoya itenan den teconehuan de Zebedeo.

### **Nican tajtoa de queniu Jesús Temaquixtijque quitalpachojque**

*(Mr. 15: 42-47; Lc. 23.50-56; Jn. 19.38-42)*

<sup>57</sup> Huan cuac tapoyahuic ya, ijcuacán huala se tagat ten quipiaya miac tenesi ten niaxca, huan yejua monotzaya José ipueblo Arimatea. <sup>58</sup> Yejua ipa quitoctiliyaj Jesús queme imomachtijcau. Huan in José yajqui quitato in hueyi chiuque Pilato huan quitajtanilito inacayo in Jesús. Huan ijcón in Pilato tanahuatij ma quimacacan. <sup>59</sup> Huan ijcón in José quicuic inacayo Jesús huan quitetziloy ica se hueyi istac tilma den chipahuac. <sup>60</sup> Huan yejua cuiyac quicalaquito inacayo in Jesús campa tecoyoc campa iaxca catca. <sup>61</sup> Porín ipa quicoyonijcaj ya in tepet. Huan quixoloncucpac se hueyi tet para ica quitzacuas ne tecoyoc huan de ompa yajqui. Huan no ompa yetoyaj María Magdalena huan in ocsé María, huan yejuan tocotzyetoyaj ixpampa ne campa tecoyoc.

### **Nican tajtoa de queniu soldados tajpixtoyaj campa Jesús Temaquixtijque campa ne tecoyoc**

<sup>62</sup> Huan imostica cuac tanesic ya, satepan cuac in judíos moyejyectaliyaj para ne iluit de nesehuilistonal, ijcuacán in tayecanani tiopixcame huan in fariseos mosentilijque huan de ompa quitatoj in tayecanque Pilato. <sup>63</sup> Huan quilijque ijcuín:

—Totecotzin, tiquelnamicque que ne tacajcayauque Jesús quijtoaya cuac nemía nican talticpac de que ipan eyi tonal panquisas yoltoc intzalan in ánimajme. <sup>64</sup> Ica ya nojón xitanahuati de que ma quiyecpiatij nepa campa toctoc Jesús hasta ma ajsi in eyi tonal, huan para ma amo hualacan imomachtijcahuan huan quichtequiquihue inacayo Jesús. Porín como quichihuasquíaj, ijcuacán yejuan quinilisque in pueblojani de que panquisac ya yoltoc in Jesús intzalan in ánimajme. <sup>65</sup> Huan como ijcón

mochihuasquía nijín xolopijyot, cachi hueyi yesqui huan que ne achtopa catca, cuac yejuan quitetapohuijtinemíaj de que yejua in Cristo Temaquixtijque.

Huan ijcón in Pilato quinilij ijcuín:

—Namechinmactilía nijín soldados para ma tajpiacan. Huan namejuan xiquinuiyacan nijín soldados huan ompa ma quiyecpiatij huan ma quiyectzacuatij in tecoyoc ijcón queme namejuan nanquinequij ma mochihua.

<sup>66</sup> Huan ijcón in soldados yajque huan quiyectentzacuatoj in tecoyoc campa toctoc ya Jesús. Huan de ompa quisellarojque in tet huan ompa quincauque in soldados de que ma tajpiacan.

### Nican tajtoa de queniu Jesús Temaquixtijque panquisac yoltoc intzalan in ánimajme

(Mr. 16.1-8; Lc. 24.1-12; Jn. 20.1-10)

**28** Huan panoc ya ne sehuilistonal den sábadu huan imostica san tanesic, yej ne tayecana tonal den semana, yej ne axcan domingo. Ijcuacán ne tonal yajque in María Magdalena huan ocsé María quitatoj ne hueyi tecoyoc campa tooc-toya Jesús. <sup>2</sup> Huan niman semi chicaucatalolinic porín temoc den ne eluiyactzinco se taquehual ángel de Dios huan ajsic campa tecoyoc huan quixoloncuepac in hueyi tet tenica tentzactoya in tecoyoc; huan de ompa motalij panían. <sup>3</sup> Huan ne ángel ixmilinía queme cuac se quita tapejpetani huan tatanextía nohuiyan. Huan ne itaquen in ángel catca cachi istac huan que secti. <sup>4</sup> Huan cuac in soldados quitacque nochi nijín ten mochihuac, ijcuacán yejuan semi motelyolmoutíaj huan hasta peuque cuecuetacayaj; huan de ompa mocauque queme yesquíaj amo talnamiquíaj oc. <sup>5</sup> Huan ijcón ne ángel quinilij ne sihuame ijcuín:

—Amo ximomoutican; porín nejua nicmati que namejuan nanquitemouaj Jesús de ne quicuoupampilojcaj. <sup>6</sup> Huan axcan amo yetoc oc nican. Ta, axcan Yejuatzin panquisac ya yoltoc intzalan in ánimajme, ijcón queme quijtojca ya ne achtopa ya. Xihualacan nican huan xiquitaquij campa quinalcalaquijcaj in Totecotzin tech in tecoyoc. <sup>7</sup> Huan axcan niman xiyacan huan xiquintapohuitij ne imomachtijcahuan de que in Jesús panquisac ya yoltoc intzalan in ánimajme. Huan yequintzin Yejuatzin namechyecanati hasta ne Galileajcopaca huan ompa nanquitasque. Huan yejua san nijín monequía namechilis.

<sup>8</sup> Huan ijcón in sihuame moucaquisteuque campa ne tecoyoc pero no moyolpactijtiayaj. Huan niman yajque motalojque huan quintapohuitoj imomachtijcahuan Jesús. <sup>9</sup> Huan cuac yayaj ya para quintapohuitij ne imomachtijcahuan, ijcuacán in Jesús quinmonextilij inixpan in sihuame huan quilij ijcuín:

—Axcan nihuala namechtajpaloco san.

Huan in sihuame motoquijque huan motancuaquetzque huan quimetzquitzi-que para quimohuistilisque. <sup>10</sup> Huan Jesús quinilij ijcuín:

—Amo ximomoutican. Ta, xiyacan xiquinnejmachtitij nocnihuan de que monequi ma xiyacan tech ne pueblo Galileajcopaca huan ompa nannechitasque.

### Nican tajtoa de queniu in soldados romanos quincajyauque in tayecanani judíos de toni mochihuac campa ánimajtecoch

<sup>11</sup> Huan cuac in sihuame yajque ya, ijcuacán ne soldados no yajque Jerusalén quintapohuitoj in tayecanani tiopixcame nochi ten mochihuac huan nochi ten quitacque

yejuan. <sup>12</sup>Huan ijcón in tayecanani yajque mosentilitoj ihuan in huehuentzitzin huan ompa moixejecoltijque toni quichihuasquíaj. Huan ijcón niman motajtolmacacque de que quintaxtahuisque ica míac tomin in soldados huan melau ijcón quichiuque huan quinnahuatijque ijcuín:

<sup>13</sup>—Namejuan sayó xiquijtoca ijcuín: “Cuac ne tayohuac ya, cuac tejuan ticochtoyaj ya, ijcuacón hualajque imomachtijcahuan in Jesús huan quichtequicoj inacayo”.

<sup>14</sup>Huan ijcón in tayecanani ocsepa quinilijque in soldados:

—Tacán in tayecanque Pilato ejcos in momento de que quimatis, ijcuacón tejuan ticmatij queniu para tictaneltoctisque den nochi den nijín mochihuac huan ijcón huelis tamechpalehuisse.

<sup>15</sup>Huan ijcón in soldados quiselijque ne tomin huan yajque quichihuatoj ijcón queme quinilijque in tayecanani. Huan nochi ijcón quintetapohuiayaj in judfos desde ne tonal huan hasta axcan que ijcón mochihuac.

**Nican tajtoa de queniu Jesús Temaquixtijque  
quintequimactij imomachtijcahuan**

*(Mr. 16.14-18; Lc. 24.36-49; Jn. 20.19-23)*

<sup>16</sup>Huan ijcón in majtactionsé imomachtijcahuan in Jesús yajque ne Galileaj-copaca tech ne tepelomo campa Jesús quinilijca ya de que ma yanij. <sup>17</sup>Huan ijcón cuac quitacque Jesús, ijcuacón peuque quimohuistiliayaj, masqui ayamo yec tacuautamatiayaj.

<sup>18</sup>Huan ijcón in Jesús motoquij campa yetoyaj imomachtijcahuan huan quinilij ijcuín:

—Notajtzin Dios nechmactilij ya nochi in tanahuatil tech in eluiyactzinco huan nican taltipac. <sup>19</sup>Huan axcan xiyacan nochi tech in senmanahuac huan xiquinnex-tilican nochi in taltipacuani ma yejuan no ma mochihuacan nomomachtijcahuan. Huan xiquinahuijtinemican ica itocaytzin de Tohueyitajtzin Dios huan de Iconetzin Dios huan de in Yecticatzin Espíritu. <sup>20</sup>Huan xiquinmactican de que ma tatacamat-ican nochi ica in tanextililisme ten namechnajnahuatíaj ma no xicchihuacan. Huan xicmatican que Nejuatzin niyetos nachipa namohuan desde axcan huan hasta cuac tamis in taltipac. Amén.

**ITATITANIL DE CRISTO, YEJUA IN SAN MARCOS,  
QUIJCUILOJ NIJÍN YANCUIC TAJTOLTZIN DE DIOS  
TEN CUALCUI NE NEMAQUIXTILIS**

**Nican tajtoa de queniu Juan in Taahuijque quipehualtij ne nitanojnotzalis**

*(Mt. 3.1-12; Lc. 3.1-9, 15-17; Jn. 1.19-28)*

**1** Nican pehua in yancuic Tajtoltzin ten temachtía de Jesucristo Teconetzin de Dios. <sup>2</sup>Ijcón queme ijcuiliutoc in Tajcuilolamatzin tech Isaías, yejua se tanahuatijque de Dios ijcuín:

Xiquitacan, Nejuatzin nictitani notanahuatijcau huan yejua mitzonachtohuitiu. Huan no mitzonochihuitiu, huan mitzonyecantiyás.

<sup>3</sup>Mocaquiti se tagat ten tanajnahuatía campa tayiucan huan quijtoj ijcuín: “Xitayeyectalijtiyacan ninemilispán den Totecotzin.

Huan xicmejmelauiyacan niojuan campa hual panotihualas”.

<sup>4</sup>Huan ijcón in Juan quinahuijtihualaya in tagayot campa ne tayiucan huan quijnajnahuatia ya ijcuín:

—Monequi ximoyolnemilican de namotajtacoluan para ijcón Totajtzin Dios namechtapojpoluis de namotajtacoluan. Huan no monequi ma namechahuijcan.

<sup>5</sup>Quisayaj nochi ne pueblojuani de Judea huan nochi den pueblojuani de Jerusalén, huan yejuan yayaj tacaquitos campa yetoya ne Juan. Huan Juan quinahuíca ica at tech in hueyíat ten monotza Jordán, como moyolnemiliayaj in tagayot de nintajtacoluan. <sup>6</sup>Huan ne Juan motaquentia ya ica camellojtojmit ten tajjquilit, huan tajcuilpitoya ica se cuetax huan quincuaya chapolinme huan cuoutajnecti.

<sup>7</sup>Huan in Juan tanajnahuatia ya huan quijtoya ijcuín:

—Huitza se naquen nechualtojtoca huan Yejuatzin cachi quipía chicahualis, huan nejua niamoteyi nichiuque. Amo nechnamiqui para nimotentocas huan nictojtomilis ne nimetzuijconca de nitegacuan. <sup>8</sup>Nejua de yec melau namechahui ica atzin san, huan Yejuatzin ne ten huitza, Yejuatzin namechquemilos huan namechylolpexocaltis ica in Yecticatzin Espiritu.

**Nican tajtoa de queniu Jesús Temaquixtijque moteahuiltij**

*(Mt. 3.13-17; Lc. 3.21-22)*

<sup>9</sup>Mochihuac tech ne tonalme que Jesús hualehuac de ne pueblo de Nazaret ten pohuíca Galilea, huan moteahuiltij inahuac in Juan tech in hueyíat de monotza Jordán.

<sup>10</sup>Huan niman cuac ajcopanquisac ya Jesús den hueyíat, ijcuacón motac que tatapohuic tech eluiyac huan Jesús quitac in Yecticatzin Espiritu hual temoaya queme se tototzin paloma huan Yejuatzin calayic itech Jesús. <sup>11</sup>Huan no mocaquic que hualaya se tajtolis de eluiyactzinco huan Yejuatzin quiliy Jesús ijcuín:

—Tejua tintasojconetzin, ica por tejuatzin semi nimoyolpaquiltía axcan.

**Nican tajtoa de queniu in amocuali Satanás quichihua ma motajtacolmacani Jesús Temaquixtijque**

*(Mt. 4.1-11; Lc. 4.1-13)*

<sup>12</sup>Huan niman in Yecticatzin Espíritu quiyoltanemililtij Jesús de que ma yohui campa ne tayiucan. <sup>13</sup>Huan yetoya Jesús campa ne tayiucan omepoal tonal, huan de ompa ne amocuali Satanás quiejecoltiaya itacuautamatilis de Jesús para ma motajtacolmacani Jesús. Huan no yetoya Jesús campa ne tecuanime, huan in ángeles taquehualme de Dios quipalehuiayaj Jesús.

**Nican tajtoa de queniu Jesús Temaquixtijque quitzinpehualtij nitequiu**

*(Mt. 4.12-17; Lc. 4.14-15)*

<sup>14</sup>Niman de quitzacuacque in Juan Taahuijque tech in cárcel, ijcuacón Jesús ya-jqui Galileajcopaca huan tanajnahuatnemic ica in yancuic Tajtoltzin huan tamachti-aya de que motoquijtoc ya Dios para momasoutos ya ica nihueyichicahualis ipan iconehuan para quinyolyecantiyás. <sup>15</sup>Huan Jesús quinnajnahuatij in tacaquini ijcuín:

—Ejcotoc ya in tonalme huan no motoquijtoc ya Dios para ma momasouto ya ica nihueyichicahualis para namechyolyecantiyás. Ica ya nojón ximoyolnemilican den namotajtacoluan huan xicneltocacan in yancuic Tajtoltzin de ne maquixtilis.

**Nican tajtoa de queniu Jesús quinnotzac nahui tamaajasini de pescados ma quitoctilican huan quitacamatiyasque Yejuatzin**

*(Mt. 4.18-22; Lc. 5.1-11)*

<sup>16</sup>Jesús nejnentinemía martenojcopaca de Galilea huan quinitac ne Simón huan icniu Andrés, naquen quitamotayaj ninmatau tech in mar porín yejuan catcaj pescadojquitzquiani. <sup>17</sup>Huan quinilij Jesús ijcuín:

—Xihuiqui nohuan, xinechtoctilican. Huan ijcón queme nantamajasini de pescados, no ijcón Nejuatzin namechchihuas de que nanquintemosque tagayot para ma nechtoctilican.

<sup>18</sup>Huan nimantzin ne Simón huan ne Andrés quicauque ninmatahuan huan quitoctilijque Jesús para quitacamatiyasque. <sup>19</sup>Huan queman panoc ya de ompa nepacatzin, ijcuacón Jesús quinitac Jacobo huan icniu Juan, teconehuan de Zebedeo. Huan yejuan yetoyaj tech se barco quitajtasalujtoyaj ninmatahuan. <sup>20</sup>Huan Jesús quinnotzac ne teconehuan ma quitoctilican. Huan yejuan quicauque nintetat huan in taquehualme tech in barco huan quitoctilijque Jesús.

**Nican tajtoa de queniu Jesús Temaquixtijque quipajtij se tagat ten quipía se amocuali ejecat**

*(Lc. 4.31-37)*

<sup>21</sup>Huan Jesús ihuan nimomachtijcahuan calacque tech pueblo Capernaum. Huan tech in tonalme de nesehuilis calayic Jesús tech in tiopan de judíos huan pehuac quinnextiliaya in tacaquini ica in Tajtoltzin de Dios. <sup>22</sup>Ijcuacón nochi in tagayot quimoucacaquíaj nitamachtilis de Jesús, porín Yejuatzin quinmachtiaya ica hueyi chicaucahuelilis huan amo quinnextiliaya queme in escribas, yejuan in tanextiliani den tanahuatil de Moisés. <sup>23</sup>Huan yetoya tech in tiopan de judíos se tagat ten quip-

iaya iyolijtic se amocuali ejecat ten tzatzajtzitoya. <sup>24</sup> Huan ne amocuali ejecat quilij Jesús ijcuín:

—Xitechtapatahuili huan amo xitechcuejmoloqui. ¿Toni ticpía tohuan, Jesús de Nazaret? ¿Cox tihuala para titechpolos? Nicmati cuali nimitzixmati aconi tejua, Tionyecticatzin de Dios.

<sup>25</sup> Huan Jesús quitacahualtij ne amocuali ejecat huan quilij ijcuín:

—Ximotentamatili huan xiquisa tech yejua.

<sup>26</sup> Huan ne amocuali ejecat quichihuac in tagat de que ma vojyolpolihui para ma tzajtzi elihuis. Huan de ompa in amocuali ejecat quisac de ne yolijtic den tagat. <sup>27</sup> Huan nochin ten yetoyaj calijtic de ne tiopan de judíos no quimoucaitaque semi huan monojnotzayaj se huan ocsé huan quijtoayaj ijcuín:

—¿Toni nijín tajtolis? ¿Xe nijín ocsepa ocsé yancuic tanextililis? Porín tiquitaj que nijín Jesús quipía huelilil para quinnahuatis in amocuali ejecame ma calanquisacan. Huan yejuan quitacamatij huan calanquisaj.

<sup>28</sup> Huan ijcón semi moijsiucetapohuijque den hueyi chichualis de Jesús tech nochi pueblojme ten quiyehualojtoyaj Galilea.

### **Nican tajtoa de queniu Jesús Temaquixtijque quipajtij imonan Pedro**

*(Mt. 8.14-15; Lc. 4.38-39)*

<sup>29</sup> Huan queman quisque tech in tiopan de judíos, ijcuacón yajqui Jesús ihuan ne Jacobo huan in Juan huan calacque tech nichan ne Simón huan in Andrés. <sup>30</sup> Huan nimonan ne Simón huetztoya ica se hueyi totonic. Huan quitapohuijque Jesús de que mococoaya nimonan Pedro. <sup>31</sup> Ijcuacón Yejuatzin motoquij campa in cocoxque huan quimaquitzquij huan quicuaehuac; huan nimantzin quisac in totonic. Huan ijcón imonan ne Pedro mehuac huan quintamacac icalpanocahuan.

### **Nican tajtoa de queniu Jesús Temaquixtijque quinpajtij miac cocoyani cuac pancalaqui in tonaltzin**

*(Mt. 8.16-17; Lc. 4.40-41)*

<sup>32</sup> Huan queman tapoyahuito ya, cuac in tonal pancalayic ya, ijcuacón cualcuilijque campa Jesús nochi in cocoyani huan neques ten quipiayaj inyolijtic amocuali ejecame. <sup>33</sup> Huan nochi in pueblojuani mosentilijque huan motilintijque icalteno de nichan Simón. <sup>34</sup> Huan Jesús quinpajtij miacque de mococoayaj ica de miac tatanman cocolisme. Huan no Jesús quincalanquixtij miac amocuali ejecame, huan amo quincahuilij ma tajtojcan, porín yejuan quixmatque Yejuatzin.

### **Nican tajtoa de queniu Jesús Temaquixtijque quinnojtztinemic in tagayot Galileajcopaca**

*(Lc. 4.42-44)*

<sup>35</sup> Huan Jesús mehuac semi cualcan, queman tayohuayan oc catca, huan quisac de pueblo huan yajqui itech campa se lugar tayiucan, huan ompa motatautaliaya ihuan Dios. <sup>36</sup> Huan Simón huan naquen ihuan yetoyaj quitemojque Jesús. <sup>37</sup> Huan queman quiajsicque Jesús, ijcuacón quilijque ijcuín:

—Nochi pueblojuani mitzontemojtocque.

<sup>38</sup> Huan Yejuatzin quinilij:

—Tiyohue tejuan nepacahuín tech ne pueblitos amo huejca para no niquinna-nahuatis ica in yancuic Tajtoltzin, porín yejua notequiu, huan yejica Nejuatzin nihuala.

<sup>39</sup> Huan nentinemía Jesús quitenextilijtinemía in Tajtoltzin de Dios tech in tiopanme de judíos tech nochi in pueblojme ten pohuía Galilea, huan no quincalan-quixtiaya amocuali ejecame.

**Nican tajtoa de queniu Jesús Temaquixtijque quipajtij  
se cocoxque den cocotocatoya ninacayo**

*(Mt. 8.1-4; Lc. 5.12-16)*

<sup>40</sup> Huan niman huala campa Jesús se tagat ten quipiaya se cocolis inacayo cocotocaya. Huan yejua motancuaquetzac huan nocta quitatautiaya Jesús huan quilij ijcuín:

—Ta como ticonequisquía, tionuelis tinechonchipahuas de nijín pitzotic cocolis.

<sup>41</sup> Huan Jesús quitelicnelij huan momatilanac huan quimatocac huan quilij ijcuín:

—Nicinequi ma tejua xichipahua de mococolis.

<sup>42</sup> Huan cuac Jesús ijcón quilij, ijcuación nimantzin quisac ne cocolis den inacayo cocotocatoya huan mocahuac chipactzin ne tagat. <sup>43</sup> Huan Jesús quilij in tagat ma yohui. Pero achto quichicaucanajnahuatij ijcuín:

<sup>44</sup> —Xiquita, amo aquen teyi xictapohui. Ta, xiyó ximotenextiliti ihuan ne tiopix-came de judíos de que tichipahuac ya. Huan no xiquinmactiti ne tetayocolil in tiopix-came de judíos, ijcón queme Moisés tanahuatiaya para ne cocoyani ten tapajtilme ya de ne cocotoca ninacayo. Huan ijcón ixnesis ninuan mopueblojchuan de que tichipahuac ya.

<sup>45</sup> Huan queman yajqui ya Yejuatzin, ijcuación ne tagat den chipahuayac ya, yejua ne pehuac tetapohuía nocta huan quiniliaya nochi tagayot toni quichihuac Jesús por yejua. Huan ica ya nojón Jesús amo huelía oc calaquis senteixteno tech ne pueblojme porín yetosquía míac tagayot. Ica ya nojón mocahuac Jesús nehuincopa campa tayiucan. Huan motoquijque campa Yejuatzin yetoya nochi in pueblojuani de nonohuiyampa.

**Nican tajtoa de queniu Jesús Temaquixtijque  
quipajtij se cocoxque de ninacayo sepoutoc**

*(Mt. 9.1-8; Lc. 5.17-26)*

**2** Satepan sequin tonalme ocsepa calayic Jesús tech ne pueblo de Capernaum; huan motetapohuij de que yetoya Jesús calijtic. <sup>2</sup> Huan nimantzin mosentilijque míac tagayot hasta amo aquíaj oc calijtic nión ne calteno. Huan ijcón in Jesús quinmachtiaya in tacaquini ica in Tajtoltzin de Dios. <sup>3</sup> Ijcuación nahuín taca hualajque campa Yejuatzin huan cualcuilijque se tagat cocoxque ten nochi ninacayo tami sensepautoc ya huan amo huelía nejnemía. <sup>4</sup> Pero queme yejuan amo huelíaj ejcosque campa Yejuatzin, porín nocta míac tagayot mosentilijque, yejuan tejcojque calcuaco quicuatapouque in cali ajco campa Yejuatzin yetoya. Huan queman quitapojque ya in cali, ijcuación quipantemoltijque in cocoxque ica nicochpet. <sup>5</sup> Cuac Jesús quitac nintacautamatilis de nojón nahuín taca, ijcuación Jesús quilij in cocoxque ijcuín:

—Noconetzin, motajtacoluan nimitzintapojpoluilía ya.

<sup>6</sup>Huan ompa tocotziutoyaj sequin tanextiliani den tanahuatil de Moisés huan yejuan voltanemilijtoyaj ijcuín: <sup>7</sup>“¿Queyé ijcón tajtoa nijín tagat? Yejua quimohuis-poloa Dios. ¿Aconi huelis tetapojpoluía tajtacol? Ta, sayó Dios hueli tetapojpoluía”.

<sup>8</sup>Huan niman Jesús quinyoloximatía de que ijcón voltanemiliayaj ne tanextiliani, huan quinilij ijcuín:

—¿Queyé ijcón nanyoltanemilíaj? <sup>9</sup>¿Catiyejua tajtolis cachi amo ohui ma niquli ne cocoxque? Ma niquli: “Motajtacoluan nimitzintapojpoluij ya”. Oso ma niquli: “Ximehua, xicui motapech huan xinejnemi”. <sup>10</sup>Huan nejua namechyecmatiltía que Nejuatzin ya ni Yectagatzin de Dios huan nicpía tanahuatil nican talticpac para niquintapojpoluis naquen motajtacolmacacque ya.

<sup>11</sup>Huan de ompa Jesús quilij in cocoxque ijcuín:

—Tejua, nimitzilía ximehua, xicui motapech huan xiyó mochan.

<sup>12</sup>Ijcuación nimantzin in cocoxque moquetzac huan quicuic nitapech huan quisac senteixteno. Huan ica ya nojón nochi in tagayot quimoucaitacque toni mochihuac huan no quihueyichiuque Dios huan quijtoayaj ijcuín:

—Amo queman ijcón tiquitztoyaj tensá chihualis queme nijín ten tiquitacque.

### **Nican tajtoa de queniu Jesús Temaquixtijque quinotzac Leví ma quitoctili Jesús**

*(Mt. 9.9-13; Lc. 5.27-32)*

<sup>13</sup>Satepan ocsepa quisac Jesús huan yajqui ne martenojcopa huan nochin tagayot mosentiliayaj campa Yejuatzin yetoya, huan Jesús quinmactiaya in Tajtoltzin de Dios. <sup>14</sup>Huan Yejuatzin ocsepa panotiaya ne martenojcopa huan ompa quitac se tagat de monotzaya Leví iconetzin de Alfeo, ten tocotziutoya calteno campa quinopaluiaya in pueblojuani. Ijcuación Jesús quilij ijcuín:

—Xinechtoctili huan ximomachtijtiyás de notnextililis.

Huan nimantzin moquetztiquisac in Leví huan yajqui quitoctilito Jesús ma momachtitíu de Yejuatzin. <sup>15</sup>Huan satepan Jesús yajqui tacuato ichan in Leví ihuan miacque tatopaluiani. Huan no in taca ten amo tatacamatini de itanahuatil Moisés, yejuan nojonques no tacuajtoyaj ihuan Jesús huan imomachtijcahuan, porín on-cayaj miacque ten quitoctiliayaj Jesús para momachtisque de Yejuatzin. <sup>16</sup>Huan in tanextiliani den tanahuatil de Moisés huan in fariseos quitacque que in Jesús sen tacuajtoya ihuan in tatopaluiani huan no ihuan in taca ten amo quitacamatinemij in tanahuatil de Moisés. Ica ya nojón yejuan quitajtoltijque imomachtijcahuan de Jesús ijcuín:

—¿Toni nijín ten quichiutoc Yejuatzin? ¿Queyé in Jesús tacuajtoc huan ati ihuan ne tatopaluiani huan in taca ten amo tatacamatinemij den tanahuatil de Moisés?

<sup>17</sup>Huan queman cayic Jesús nijín matájtanti, ijcuación Yejuatzin tananquilij ijcuín:

—Nojón tagayot ten mopohuaj yolpactocque, yejuan nojonques amo monequij tepajtijque. Ta, sayó in cocoyani monequij in tepajtijque. Nejua amo nihuala niquin-temoco naquen mopohuaj yolchিপauque. Ta, nihuala niquintemoco tajtaclejque para ma moyolnemilican de nitajtacoluan.



**Nican tajtoa de queniu quitajoltijque Jesús  
Temaquixtijque cox monequi mosahuasque**

*(Mt. 9.14-17; Lc. 5.33-39)*

<sup>18</sup> Huan imomachtijcahuan de Juan Taahuijque ihuan imomachtijcahuan de fariseos mosahuayaj. Huan in pueblojuani hualajque huan quilijque Jesús ijcuín:

—Ticmatij que imomachtijcahuan de Juan Taahuijque huan imomachtijcahuan de fariseos mosahuaj. Huan momomachtijcahuan, ¿queyé yejuan amo mosahuaj?

<sup>19</sup> Huan Jesús tananquilij ijcuín:

—¿Mangán mosahuasque nochin in taijitalme ten hualajque para moyolpactisque tech in iluit de ne namictilis, como yetoc oc in teyoquich? Pues, amo huelis mosahuasque como yetoc oc ihuan in teyoquich. <sup>20</sup> Pero queman hualas ne tonal cuac teyoquich cajchihuasque, ijcuación tech ne tonalme huelis mosahuasque nochi in taijitalme.

<sup>21</sup> Huan ijcón in Jesús quinnextilij ica nijín nexcuutil huan quinejnehuililtij in yancuic nemilis ihuan in yancuic tasal huan in yancuic vino. Huan Jesús quinilij ijcuín:

—Amo aquen quiqtzoma se yancuic tasal tech se tasalsol ten cojcotolquisac ya. Porín de amo cuac se quipacas, yejua mismo in yancuic tasal motocotzoa huan quixcocototzas in tasalsol huan ijcón cachi hueyi tzayanis. <sup>22</sup> Huan amo no aquen quipanteca yancuic vino tech in cuetaxsolme, porín de amo in yancuic vino mochicahualtía huan atzitzicasquisas. Huan ijcón quitzayanis in cuetaxsol huan mimilahuis nochi in vino huan senpolihui nochi. Pero in yancuic vino se quitequilía tech in yancuic cuetaxme.

**Nican tajtoa de queniu nimomachtijcahuan Jesús Temaquixtijque  
cajocucque trigojtet tech in tonal de nesehuilis**

*(Mt. 12.1-8; Lc. 6.1-5)*

<sup>23</sup> Huan mochihuac que Yejuatzin panotiaya campa tatocala ica trigo tech ne tonal de nesehuilis. Huan no ihuan yayaj imomachtijcahuan nejnentiayaj, pero yejuan peuque tayolcopinayaj ica trigo. <sup>24</sup> Ijcuación in fariseos quilijque Jesús ijcuín:

—Xiquita san, ¿queyé tequitinimij momomachtijcahuan tech nijín tonal de nesehuilis? Porín ne itanahuatil de Moisés tetacahualtía ya.

<sup>25</sup> Huan Yejuatzin tananquilij ijcuín:

—¿Xe amo queman nanquileerojqque ten quichihuac in rey David queman yejua mayanac huan nochin soldados ten ihuan yetoyaj no mayanque? Huan nochi yejuan amo teyi quiplayaj ten cuasquíaj. <sup>26</sup> Huan yejua in David calayic tech ichantzín Dios, cuac Abiatar catca in hueyi tiopixcat de judíos. Huan ne rey David quicuj in panes ten quitajica ya iixpantzinco Dios para ica quimohuistilisque Dios. Huan nojón panes Dios amo quimonequiltij ma acsá quicuaní. Ta, sayó in tiopixcame. Pero in rey David quicuj huan no quinmacac naquen ihuan yayaj.

<sup>27</sup> Huan no Jesús quinilij ijcuín:

—Huan Totajtzin Dios achto quinchihuac in taca, huan de ompa Yejuatzin quichihuac in tonal de nesehuilis para quinpalehuis in taca. Pero Dios amo quichihuac ne tonal de nesehuilis para ma quinyecanasquíaj in taca.

<sup>28</sup> Huan no Jesús quinyecajsicamatiltij ijcuín:

—Xicmatican que nejua ni Yectagatzin de Dios huan Nitayecancatzin de tonal de nesehuilis. Huan Nejuatzin nicpixinemi tanahuatil para niteilis toni cualtías se quichihuas tech ne tonal de nesehuilis.

**Nican tajtoa de queniu Jesús Temaquixtisque  
quipajtij se tagat cocoxque mamijmiquilotic**

*(Mt. 12.9-14; Lc. 6.6-11)*

**3** Huan ocsepa calayic Jesús tech in tiopan de judíos, huan ompa quitac se tagat ten quiplaya se imay mamijmiquilotic. <sup>2</sup>Huan in tamatinime judíos quiqipixtinemíaj Jesús cox quipajtisqueña ne cocoxque tech ne tonal de nesehuilis. Huan tacán Jesús quipajtisqueña ne cocoxque, ijcuación ne tamatinime cachi oc quipiasqueña tensá tamachilis tenica quiteluilisque Jesús de que yejua amo quitacamatiniemi in tanahuatil de Moisés. <sup>3</sup>Huan ijcón Jesús quilij in tagat ten quiplaya se imay huayic ijcuín:  
—Xihuiqui huan xiyeto senteixteno.

<sup>4</sup>Huan de ompa Jesús quintajtoltij in tamatinime judíos ijcuín:

—¿Cox Dios quimonequiltía ma se quichihua ten cuali tech in tonal de nesehuilis? ¿Oso ma se quichihua de amo cuali? ¿Oso ma se quimaquixti se inemilis? ¿Oso cachi cuali se temictis tech ne tonal de nesehuilis?

Huan yejuan sayó motentamatilijque. <sup>5</sup>Ijcuación Jesús quincualancaitac neques den quiyehualojtoyaj huan moyolcocoj Jesús porín yejuan yoltacuauque de nintamachilis. De ompa Jesús quilij in tagat cocoxque ijcuín:

—Xicmamelahua momay.

Huan yejua momamelahuac ya, ijcuación ne nimay niman pajtic. <sup>6</sup>Huan quisque den tiopan in fariseos huan motajtolcuijque ihuan in taca ten pohuáj ihuan in rey Herodes para ma quimictisqueñaj Jesús.

**Nican tajtoa de queniu míac tagayot yetoyaj  
marteno ihuan Jesús Temaquixtisque**

<sup>7</sup>Huan Jesús mosecoquixtije huan yajqui marteno ihuan imomachtijcahuan. Huan quitoclijque Jesús huel miacque tagayot de Galileajcopaca. <sup>8</sup>Huan cuac quicacque in hueyi chihualisme ten quinchihuaya Jesús, ijcuación motoquijque campa Yejuatzin huel miacque tagayot de pueblojuani de Jerusalén huan de Judea, huan no hualajque de Idumeajcopaca huan analpa den hueyíat Jordán, huan no de pueblojme de quiyehualojtoya in pueblos de Tiro huan Sidón. <sup>9</sup>Huan Jesús quinnahuatij imomachtijcahuan ijcuín:

—Xicsecotalijtocan ya se barco para ompa nicalaquis como quinequij in tagayot nechpejpechisqueñaj.

<sup>10</sup>Huan ompa Jesús quinpajtijca ya míac cocoyani, huan cachi oc huel míac cocoyani motoquiayaj para quimatocasqueñaj Jesús. <sup>11</sup>Huan in amocuali ejecame quemansá quitacque Jesús, ijcuación motentocayaj iixpantzinco, huan tzatzajtzíaj huan quiniliayaj ijcuín:

—Tejuatzin tion Teconetzin de Dios.

<sup>12</sup>Huan Jesús quinyectacahualtiaya ne amocuali ejecame para ma amo quitecaquistilianij aconi ne Jesús.

**Nican Jesús Temaquixtjque quinnotzac in májtactiomome  
imomachtijcahuan ma quitociltican Jesús**

*(Mt. 10.1-4; Lc. 6.12-16)*

<sup>13</sup> Satepan tejoc Jesús campa se tepeyo huan ompa quinnotzac in taca ten Yejuatzin quinneyic; huan yejuan motoquijque ihuantzín. <sup>14</sup> Huan Jesús quinijitac de ne majtactiomome itatitaniluan para ma yetocan ihuantzín. Huan Jesús quintatanic nijín majtactiomome ma tamachtican ica Itajtoltzin de Dios. <sup>15</sup> Huan Jesús quinxejxelo huilij cada se in chichualis para no tapajtisque ica de míac tatamanocolisme, huan no para quincalanquixtisque in amocuali ejecame. <sup>16</sup> Huan Jesús quinijitac nijín majtactiomome ma yesque itatitaniluan de Jesús: Simón ten cojpatocaytij Pedro, <sup>17</sup> huan Jacobo, iconeu de Zebedeo, huan Juan icniu de Jacobo. Nijín omen quinojpatocaytij Boanerges, quitosnejqui taca den yolchicauque queme in taticuinilot, <sup>18</sup> Huan no Jesús quinijitac Andrés, huan Felipe, huan Bartolomé, huan Mateo, huan Tomás, huan Jacobo iconeu de Alfeo, huan Tadeo, huan Simón ten pohúa ihuan in taca de yolchicauque, <sup>19</sup> Huan no Jesús quijitac in Judas Iscariote, naquen quitemactij Jesús ma quimictican.

**Nican quiteluilijque Jesús Temaquixtjque que yejua  
cuicatinemi in chichualis den amo cuali Satanás**

*(Mt. 12.22-32; Lc. 11.14-23; 12.10)*

Huan de ompa Jesús ihuan itatitaniluan yajque ninchancopaca. <sup>20</sup> Huan ocsepa mosentilijque huel miacque tagayot huan motilintijque hasta amo huelía tacuasquía Jesús ihuan imomachtijcahuan. <sup>21</sup> Huan queman quicacque nijín, ijcuacón ichanchahuan de Jesús hualajque para quimaquixtisque porín quijtoyaj que amo yec talnamiquía oc in Jesús. <sup>22</sup> Huan in tanextiliani den tanahuatil de Moisés hualajque de Jerusalén huan quijtoayaj que Jesús quiapiaya se amocuali ejecat de monotza Beelzebú. Huan no quijtoayaj que Jesús quincalanquixtij ne amocuali ejecame ica ichichualis den Beelzebú naquen quinyecantoc nochi in amocuali ejecame. <sup>23</sup> Huan Jesús quinnojnnotzac in pueblojuani huan quinnextiliaya ica nexcuitilme ijcuín:

—Amo huelis in amocuali Satanás mocalanquixtis yejua mismo in amocuali Satanás. <sup>24</sup> Huan tacán in tayecanani de se país motehuijtocque huan mosexjelojtocque se huan ocsé, ijcuacón ne país nochi mohuejuelosque san. <sup>25</sup> Huan tacán se calyetoní mocuecujmolojtocque, ijcuacón ne calyetoní amo no queman huelis sen yectosque ica paquillis. <sup>26</sup> Huan tacán in amocuali Satanás motehuía yejua mismo san, ijcuacón nichichualis momoyautoc san huan mosexjelojtocque san. Huan yejua amo huelis yec yectos huan niman ejcos nitamilis. <sup>27</sup> Se tagat ten semi chichahuac monequi ma ocho quitzijtzicocan para que ijcón huelis cuejuelohuilisque icalten huan para huelis cuillisque ten niacxa. Porín sayó ijcón huelis moaxcatilisque ten niacxa. Huan ximatican no ijcón Nejuatzin nicuejuelos in chichualis den amocuali Satanás.

<sup>28</sup> Huan no Jesús quinilij in tacaquini ijcuín:

—Huan yec melau den namechilía que nochi in tajtacolme den taca oso in ne mohuispololis ten yesqui, Dios nochi huelis quintapojpoluis. <sup>29</sup> Pero naquen quimohuispolo in Yecticatzin Espíritu, yejua ne amo ica quipías ne tapojpoluilis. Ta, cuicas ne tajtacol nachipa campa tatzacuiltiyan.

<sup>30</sup> Huan ijcón quiytoj Jesús porín in tanextiliani den tanahuatil de Moisés quiytojcaj que Yejuatzin quipiaya iyolijtic se amocuali ejecat.

**Nican tajtoa de queniu inantzin huan niicnihuan de Jesús  
Temaquixtijque hualajque quitemocoj Jesús**

*(Mt. 12.46-50; Lc. 8.19-21)*

<sup>31</sup> Huan satepan ajsicque campa yetoya Jesús niicnihuan huan ninantzin de Jesús huan mocauque calampa huan quitatitanijque. <sup>32</sup> Huan in tagayot ten tocotziutoyaj quiyehualojtoyaj Jesús, yejuan nojonques quilijque ijcuín:

—Monantzin huan mocihuan yetocque ne calampa huan mitztemoj.

<sup>33</sup> Huan Jesús quinnanquilij ijcuín:

—¿Aconi nicpohua queme nonantzin oso nocnihuan?

<sup>34</sup> Ijcuación Jesús quinsenitac naquen tocotziutoyaj quiyehualojtoyaj huan quinilij ijcuín:

—Xiquitacan, yejuan nijnques ten nican yetocque niquinpohua queme nonantzin huan nocnihuan. <sup>35</sup> Huan nochi naquen quitacamatisque ten Dios quimonequiltía, yejuan nijnques niquinpohuas queme noicniutagat huan noicniusihuat huan nonantzin.

**Nican Jesús Temaquixtijque quitilij se nexcuitil  
de se tagat ten tatepeutinemic ica trigo**

*(Mt. 13.1-9; Lc. 8.4-8)*

**4** Huan ocsepa pehuac Jesús tamachtía tech se atenteno, huan míac tagayot mosentilijque huan quiyehualojtoyaj campa Jesús yetoya hasta monequía calaquis Jesús tech se barco aixco huan itech motalij. Huan nochi in tagayot yetoyaj tech ne atenteno. <sup>2</sup> Huan Jesús quinmachtiaya míac tensá ica míac nexcuitilme huan quinmachtiaya ijcuín:

<sup>3</sup>—Xiquitacan huan xicaquican ten namechiliti: Se tonal quisac se tagat para quitepehuas in tatoc de trigojtet. <sup>4</sup> Huan cuac quitepehuac ya, ijcuación mochihuac que casaica huetzic in tatoc ojtenteno, huan hualajque in tototzitzin den patantinemij ejecaixco huan quicuajcoj. <sup>5</sup> Huan ocseco cansaica huetzic in tatoc de trigo itech tepetatal campa amo oncaya míac tal. Huan in tatoc niman ijsiucaxuac porín amo tilahuac in tal quiapiaya. <sup>6</sup> Ica ya nojón cuac panquisac ya in tonaltzin, ijcuación machichinahuic. Huan queme amo quiapiaya míac inaluyo, ica ya nojón niman huayic. <sup>7</sup> Huan ocseco cansaica huetzic in tatoc de trigojtet huitztzalan. Huan in huitzti ixuac itzalan in tatoc huan quipachoj in tatoc huan amo teyi taquic.

<sup>8</sup> Huan ocseco huetzic cansaica in tatoc de trigojtet itech cualital huan ompa motaquiltij cualtzin. Pues ixuac in tatoc huan quitemacac míac taquilome. Huan sequi in tatoc moscaltij huan momiactilij huan quitemacac ocsé sempol huan májtacti taquilome. Huan ocsequin quitemacac ocsé eyipoal taquilome. Huan ocsequin quitemacac ocsé macuilpoal taquilome.

**Nican Jesús Temaquixtijque quinmejmelaquilij  
imomachtijcahuan queyé tamachij ica nexcuitilme san**

*(Mt. 13.10-17; Lc. 8.9-10)*

<sup>9</sup> Ijcuación quinilij Jesús ijcuín:

—Naquen quipía ninacas para tacaquis, ma yectacaqui huan cajsicamatis nijín tanexutilis.

<sup>10</sup> Huan cuac yetoya iselti Jesús, ijcuacán hualajque in majtactionome imomachtijcahuan huan ocsequi ten ninuan yetoyaj, huan yejuan quitajtoltijque Jesús de toni quijtosnequi no ne nexcuitilme tenica Jesús quinmachtijtjinemic. <sup>11</sup> Huan Jesús quinilij ijcuín:

—Dios namechmatiltijtoc ya namejuan de neichtacatamachilis de queniu Dios namechyolyecantinemi itaneltocacahuan ica ihueyichicahualis. Huan in ocsequin tagayot ten amo poutinemij ihuan Dios, yejuan nojonques monequi ma tiquinmacthican ica nexcuitilme san den nochi totamachtilis. <sup>12</sup> Huan ijcón yejuan quitasque in nexcuitil. Huan masqui quitasque ya, pero amo cajsicamatisque. Huan yejuan cuac quicaquisquej in nexcuitil, masqui ipa yec tacaquij, pero amo no cajsicamatisque. Huan ijcón mochihuasque para ma amo moyolnemilican huan para ma amo Dios quintapojpolui den nintajtacoluan.

**Nican Jesús Temaquixtijque quinajscamatiltij in tacaquini in nexcuitil den tagat tatepehua ica trigo**

*(Mt. 13.18-23; Lc. 8.11-15)*

<sup>13</sup> Huan no quinilij Jesús ijcuín:

—¿Xe amo nanquiyecajscamatij nijín nexcuitil? Huan como amo nancajscamatque, ¿quenín huelis nancajscamatisque nochi in ocsequi nexcuitilme? <sup>14</sup> Ne tagat ten tatepeuque, yejua ne tamachtijtjinemi ica in Tajtoltzin de Dios, ijcón queme se tatepeuque tamoyautinemi ica trigojtet. <sup>15</sup> Huan in tacaquini ten yetocque ojtenteno, yejuan nojonques ninyolijtic quitocque in Tajoltzin de Dios. Huan cuac quicaquij, ijcuacán amo huejcahuas nintaneltochalis. Ta, huitza in amocuali Satanás huan quinajchihuilía in Tatoltzin de Dios ten tatoc itech ninyolijtic.

<sup>16</sup> Huan no ijcón ne trigo tatoc ten huetzic tejteixco, yejua ne quinejnehuilía in tacaquini ten ninyolitic quitocque in Tajtoltzin de Dios. Huan cuac yejuan quicaquij, ijcuacán nimantzin quiselíaj in Tajtoltzin ica míac paquilis. <sup>17</sup> Pero amo quipíaj se yec tacuautamatilis tech ninyolitic queme se naluat para quinchicahualtis in tatoc. Huan ica ya nojón amo huejcahuas nintacuautamatilis. Huan cuac nintech huitza in tajyohuilis oso ne tahuelitalis ica in Tajtoltzin de Dios, ijcuacán moyojvolquepaj de nintaneltochalis.

<sup>18</sup> Huan nojón tacaquini yetoyaj huitztzalan, naquen quicaquij in Tajtoltzin de Dios. Huan yejuan quinejnehuilíaj in tatoc ten huetzi huitztzalan. <sup>19</sup> Huan quicaquij in Tajtoltzin de Dios pero moyolpolojtinemij ica de míac tataman den nijín talticpac nemilis, huan mocajcayahuaj ica ne hueyi ricojyot huan quinejnequij de míac den tenesi san. Nochi nijín tanemililis calaqui tech ninyolojuan huan quitajtamía in Tajtoltzin de Dios huan amo teyi taquilot mochihuas. <sup>20</sup> Huan nojón tatoc ten huetzic itech cualital, yejua ne quinejnehuilía in tagat ten quicaquij in Tajtoltzin de Dios huan quiselía. Huan in Tajtoltzin de Dios momiaclitía tech niyolitic, ijcón queme se tatoc quitemaca ocsé sempoal huan májtacti taquilome. Huan ocsé tatoc quitemaca eyipoal taquilome. Huan ocsé tatoc quitemaca macuilpoal taquilome.

**Nican Jesús Temaquixtijque quitelij se nexcuitil de se tahuil ten quitatijque**  
(Lc. 8.16-18)

<sup>21</sup> Huan Jesús no quinilij in tacaquini ijcuín:

—¿Mangán acsá cualcuis se tanex huan quitalis tatampa de se cajón oso tatampa de cama? Pues, amo ijcón se quichihuas. ¿Cox amo cachi cuali se quitalis ne tahuil campa tasempayan para ma tahuis nohuiyampa? Pues, quema. <sup>22</sup> Porín amo ongac teyi tensá chihualis oso tanemililis ichtacayot de que ma amo quipía de que ixnesis. Huan amo no ongac tensá chihualis oso tanemililis ten motatijtihualaya de que ma amo quipía de que monextis huan quimatisque nohuiyampa. <sup>23</sup> Tacán acsá quipía inacas para tacaqui, pues ma yec tacaqui.

<sup>24</sup> Huan Jesús no quinilij in tacaquini ijcuín:

—Xicyecchihuacan cuenta namejuan ten nanquicactocque porín in tamachiu de teicnelilis tenica nanquitamachihuaj para osequin tagayot, no ijcón Dios namechta-machihuilis para namejuan. Huan cachi oc in tagayot namechtamajxilitisque ica ne teicnelilis como nanteicnelíaj, namejuan ten nannechcaquilijtocque. <sup>25</sup> Huan nochi naquen quipíaj tamachilisme de Dios huan quitequitiltíaj, yejuan nojonques cachi oc Dios quinmajxilitis. Pero nochi naquen quipíaj tzictzin san tamachilisme de Dios huan quipohuaj que amo teyi quipíaj, yejuan nojonques Dios quintamicuilis ne tepitzin ten quipíaj, porín amo quitequitiltíaj ne tepitzin ten quipíaj.

**Nican Jesús Temaquixtijque quitelij se nexcuitil de que in Tajtoltzin de Dios moscaltis queme se tatoc**

<sup>26</sup> Huan no Jesús quinmachtij in tacaquini nijín nexcuitil:

—Nicnejnehuililtía ne chicahualis de Dios cuac Yejuatzin momasoutoc ica ihueyichicahualis itech se iyolijtic queme se tagat ten quitafía se tatoc tech in tal. <sup>27</sup> Huan in tagat cochis tayohuac huan nimampa mehuas tonayan huan ijcón panao in tonalme. Huan in xinach ixua, moscaltía huan xochiohua, pero in tagat amo quemati quiniu mochiutoc. <sup>28</sup> Porín ica ichicahualis den tal mochihua ne taquilot, ocho in xihuit, niman ichicahualoni, huan satepan in xinach mochicahualtía tech ne ichicahualoni. <sup>29</sup> Huan queman in taquilot chicahuayas ya, ijcuacón nimantzin se quitequi porín ejcoc ya in tonal de tatequilis.

**Nican Jesús Temaquixtijque quitelij se nexcuitil huan quinejnehuililtij in Tajtoltzin de Dios queme in cuohuit mostazajtet**

(Mt. 13.31-32; Lc. 13.18-19)

<sup>30</sup> Huan Jesús no quinilij in tacaquini ijcuín:

—¿Tonica huelis ticnejnehuililtisque ne chicahualis de Dios cuac Yejuatzin momasoutoc itech se iyolijtic? Huan, ¿ica toni nexcuitil ticnejnehuililtisque nijín chicahualis de Dios? <sup>31</sup> In chicahualis de Dios itech se iyolijtic queme yesquía in xinach de se cuohuit de mostazajtet, ten acsá quitoca tech in tal. Yesua ne mostazajtet de cachi tziqitzin de nochi xinachme ten ongac nican talticpac. <sup>32</sup> Pero satepan de acsá quitocas, ijcuacón ne mostazajtet moscaltís huan mochihuas in cachi hueyi que nochi in cuoume ten quitemaca taquilot. Huan ne mostazajcuohuit huejueyis huan momajmaxaloas. Huan huelis ompa no in tototzitzin ten nemij ejecaixco mopajtsoltisque tech niyecahuil.

**Nican tajtoa de que Jesús Temaquixtijque quinmejmelaquilij in tacaquini queyé tamachtij sayó ica nexcuitilme**

(Mt. 13.34-35)

<sup>33</sup> Ca míac nexcuitilme queme nijinque Jesús quinnojnótzaya in tacaquini, ijcón queme huelisquáj cajsicamatisquáj in tagayot. <sup>34</sup> Huan como amo ica nexcuitilme, ijcuacán amo teyi quiniliaya Jesús. Huan cuac ninseltij yetoyaj imomachtijcahuan ihuan Jesús, ijcuacán Yejuatzin quinyequiliaya toni quijtosnequi in nexcuitilme.

**Nican tajtoa de queniu Jesús Temaquixtijque quitamatilij in tetzaucaejezat**

(Mt. 8.23-27; Lc. 8.22-25)

<sup>35</sup> Huan tech ne tonal queman tapoyahuic, Jesús quinilij imomachtijcahuan ijcuín: —Ma tipanocan ne sentapalpa de nijín hueyíat.

<sup>36</sup> Huan quincaque in tagayot huan imomachtijcahuan cuiyacque Jesús ninuan tech barco. Yejuatzin ipa yetoya ya tech in barco. Huan ocequin barcos ninuan quisehuicayaj. <sup>37</sup> Huan pehuaco se hueyi tetzaucaejezat huan quitamatotaya in at tech in barco, huan ijcón motac que pancalaquisquía in barco. <sup>38</sup> Huan Jesús yetoya ijtic den barco tacuitapampa cochtaya tech se tapech. Huan quimoucaijxitijque imomachtijcahuan huan quilijque ijcuín:

—Totamachtijcau, ¿xe amo titechonpía cuidado que tipolihuitij ya?

<sup>39</sup> Huan cuac Jesús mehuac, ijcuacán Yejuatzin quitacahualtij in tetzaucaejezat huan quilij ne hueyíat ijcuín:

—Ximotamatili huan amo ximoolini oc.

Huan ijcuacán motamatilij in ejecat huan in hueyíat mocahuac ijcón amanis.

<sup>40</sup> Huan Jesús quinilij imomachtijcahuan ijcuín:

—¿Queyé nanmoucamiquij? Huan, ¿queyé amo nanquipíaj tacuautamatilis ten yec majsitoc?

<sup>41</sup> Ijcuacán cachi motelmoutijque huan moixpantiliayaj imomachtijcahuan se huan ocsé ijcuín:

—¿Aconi nijín tagat? Hasta nochi in ejecat huan in mar quitacamati.

**Nican tajtoa de queniu Jesús Temaquixtijque quipajtij in tagat de pueblo Gadara ten quipiaya iyolojtic sequi amocuali ejecame**

(Mt. 8.28-34; Lc. 8.26-39)

**5** Ijcuacán Jesús huan imomachtijcahuan ajsicque sentapalpa den hueyíat de mar de Galilea, ompa ninchanpan den pueblojuani de Gadara. <sup>2</sup> Huan cuac Yejuatzin quisac den ne barco, ijcuacán nimantzín huala quixnamiquico den ne tech in ánimajtecochme se tagat ten quipíac iyolijtic se amocuali ejecat. <sup>3</sup> Nijín tagat quipiaya icochyan tech in ánimajtecochme, huan amo aquen hueliaya quilpis, nión ica teposmecat de cadenas. <sup>4</sup> Porín miacpa ya quijilpiayaj ca teposmecat tech imetzuan huan tech imahuan. Huan in cadenas nochi quincocototzac huan in teposmecat quicoj-cotonac, huan amo aquen se tagat huelía quitamatilis. <sup>5</sup> Huan nachipa de tonayan huan ca yohual ne tagat tahuel tzajtztinemia ne cuouta huan ne ánimajtecochpan. Huan yejua mismo ica tet mocococojtinemia. <sup>6</sup> Pero cuac ne tagat tahuel quitac Jesús de huejca, niman motaloj huan motancuaquetzato iixpantzinco Jesús. <sup>7</sup> Huan motatautij ica hueyi tzajtztilis ijcuín:

—¿Toni ticonpía nohuan, Jesús? Titeconetzin de Dios in cachi hueyi chiuque. Nimitzteltatautía yec melau que amo xinechtajyohuiliti.

<sup>8</sup> Porín Jesús achto quilijca ya ne tahuel ijcuín:

—Tejua tiamocuali ejecat, xihualquisa itech niyolijtic de nijín tagat.

<sup>9</sup> Huan Jesús quitajtoltij in amocuali ejecat ijcuín:

—¿Toni motocay?

Huan yejua tananquilij:

—Timiacque, ijcón nimonotza, porín yec melan titelmiacque.

<sup>10</sup> Huan niman nocta motatautiya ne amocuali ejecame ihuan Jesús ma amo quincalanquixitsiquía de ne pueblo. <sup>11</sup> Huan no yetoyaj amo huejca de ne cuouta míac pitzome tacuajtoyaj huan ixtahuanentoyaj. <sup>12</sup> Ica ya nojón in amocuali ejecame quitatautijque Jesús ijcuín:

—Xitehtotoca campa ne pitzome ma nintech ticalaquican tejuan.

<sup>13</sup> Huan niman Jesús quintacahuilij ma yacan. Huan quisque ne amocualime ejecame itech ne tagat, huan calacque tech in pitzome. Huan in pitzome catcaj telmiacque queme ome mil. Huan ne pitzome nochi motalojtinencue huan motaque-suijque huan huetzitoj aijtic huan moaelsimijque tech in marijtic. <sup>14</sup> Huan naconime pitzotajpiani moucacholajque huan yajque calaquitoj tech ninpuebloj huan tech in milajpa huan quitetapohuitoj de toni mochihuac. Huan niman in pueblojuani quisque huan hualajque quitacoj toni mochihuac itech ne tagat ten tahuel catca. <sup>15</sup> Huan cuac hualajque nochi in pueblojuani campa yetoya Jesús, ijcuacán quitacque in tagat ten quiplaya iyolijtic miacque amocuali ejecame. Huan cajsic ya ne tagat huan yejua tocotziutoc ya huan taquentoc ya huan yec talnamictoc ya, huan ijcón nochi in pueblojuani quimoucaitacque. <sup>16</sup> Huan ijcuacán in pitzotajpiani quintapohuijque in pueblojuani ten yejuan quitayaj huan queniu quipanoltiya ne tagat ten quinpiaya in amocuali ejecame. Huan no quintapohuijque ten mochihuac ica ne pitzome. <sup>17</sup> Huan de ompa in pueblojuani peuque quitatautiayaj Jesús ma cachi cuali ma quisa Jesús de nican ninpueblojcopaca.

<sup>18</sup> Huan cuac Yejuatzin calayic tech in barco, ijcuacán ne tagat ten quinpiaya in amocuali ejecame, yejua nojón quitatautiya Jesús ma quitacahuili oc ma ihuan Jesús nentinemi oc. <sup>19</sup> Pero Jesús amo quitacahuilij. Ta, quilij ijcuín:

—Xiyó mochan campa mochanchahuan huan xiquintapohuiti nochi ten Dios quichihuac para tejua. Huan no xiquiniliti de queniu Dios mitzpijalij míac teicnelilis.

<sup>20</sup> Huan ijcuacán in tagat yajqui huan pehuac quitetapohuíca campa ne májtacti pueblome, toni huejueyi tatiochihualisme quichihuac Jesús por yejua. Huan nochi tagayot quimoucacque ten quinilij ne tagat ten tahuel catca.

**Nican tajtoa de queniu Jesús Temaquixtijque quipajtij in suapil den tayecanque Jairo, huan no quipajtij in sihuat ten quinalmatocac Jesús itasal**

*(Mt. 9.18-26; Lc. 8.40-56)*

<sup>21</sup> Huan cuac Jesús yajqui tech in barco huan ajsic sentapalpa den hueyíat de mar de Galilea, ijcuacán mosentilijque quiyehualojque Jesús tel míac tagayot. Huan Yejuatzin yetoya marteno. <sup>22</sup> Ijcuacán huala se tayecanque tagat den tiopan de judíos, ten monetzaya Jairo. Huan niman cuac quitac Jesús, ijcuacán motancua-quetzac iicxitan. <sup>23</sup> Huan quiteltatautiya Jesús huan quiliaya ijcuín:



—Nosuapil xicautoc ya de cocolis. Xionuiqui tejuatzin, huan xicsohua momatzitzin inpan nosuapil para ma maquisa de ne cocolis huan ma nemi oc.

<sup>24</sup> Ijcuación Jesús yajqui ihuan Jairo. Huan no quitojtocayaj huel míac tagayot hasta quitojtopehuayaj. <sup>25</sup> Huan no yetoya se sihuat ten mococoaya esmeyaya, pues cuicaya ya majtactionome xihuit. <sup>26</sup> Huan semi tajyohuiaya ne sihuatzin, huan míac tepajtiani mopapatacque ya, huan nochi nitomin quitamilijcaj ya. Huan in sihuat amo teyi quimachiliaya de que cox nenquentisquía. Ta, cachi mohueyichihuaya ne cocolis. <sup>27</sup> Huan nijín sihuat cuac quicayic ten motapohuiaya de Jesús, ijcuación huala icampa de Jesús, tatzalan de ne tagayot, huan quinalmatoquiliy itilmajtzin de Jesús. <sup>28</sup> Porín sihuat quinemiliaya ijcuín: “Ta sayó nicnalmatocas ya nitilmajtzin, ijcuación nejua nipajtis”. <sup>29</sup> Huan niman cuac quimatocac ya itilmajtzin, ijcuación iesyo ten meyaya tzicahuic ya, huan quimachilij ninacayo nequentic ya de ne tajyohuilis. <sup>30</sup> Huan niman Jesús quixmatic de Yejuatzin mismo que quisac ya nichichahulis. Huan Jesús mocuepac huan quisenitacampa yetoyaj in tagayot, huan quintajoltij ijcuín:

—¿Aconi nechmatoquiliy notilma?

<sup>31</sup> Ijcuación imomachtijcahuan quilijque Jesús ijcuín:

—Xiconita, míac tagayot mitztojtopehuayaj huan tejuatzin ticonijtoj ijcuín: “¿Aconi necholinij?”

<sup>32</sup> Pero Yejuatzin ixnenemía taicampa para quitasquía aconi quimatocac itilma.

<sup>33</sup> Huan in sihuat motelajsicamoutiaya hasta huihuiyocaya porín quimatoya toni mochiuca ya itech yejua. Ijcuación huala in sihuat motancuaquetzacoo iixtenojtzinco huan quiyequijto Jesús ten yec melau toni mochiuca ya itech yejua. <sup>34</sup> Huan niman Jesús quilij in sihuat:

—Sihuat, ica por nojón motacuaautamatilis ten ticpía, tejua tipajtic ya. Huan axcan xiyó ya xiyolseutiu, huan ximocahua pajtic ya de ne tajyohuilis.

<sup>35</sup> Mientras Yejuatzin tajtojtoya oc, ijcuación hualajque ichancahuan de Jairo in tayecanque tagat de ne tiopan de judíos, huan quilijque Jairo ijcuín:

—Mosuapil miquic ya. ¿Para toni oc ticuejsojtoc in Tamachtijque?

<sup>36</sup> Pero Jesús amo quichi huac cuenta den quijtoayaj yejuan huan quilij in tayecanque tagat de ne tiopan de judíos ijcuín:

—Amo ximomouti. Ta, sayó xitacuautamati nohuan.

<sup>37</sup> Huan Yejuatzin amo quintacahuilij ma aquen quitoctilianij. Ta, sayó Pedro, Jacobo, huan in Juan iicni de Jacobo. <sup>38</sup> Huan queman Jesús ajsic ichan de ne hueyi chiuque de tiopan de judíos, ijcuación quitac hueyi ne cuejmololis huan nochi chocatojay huan motequipachoayaj huan tzajtzíaj. <sup>39</sup> Huan Jesús calayic calijtic huan quinilij ijcuín:

—¿Queyé nanmotelcuejsoaj huan nanchocatocque? In sihuapiltzin amo miyic. Ta, sayó cochtoc.

<sup>40</sup> Huan quitelquejqueloyaj Jesús. Huan Yejuatzin quincalanquixtij nochi in tagayot, huan quinuiyac sayó in tetat huan in tenan den suapil ihuan imomachtijcahuan ten yayaj ihuan. Huan nochi yejuan calacque campaa huetztoya in suapil.

<sup>41</sup> Huan ijecón Jesús quimatilanac in sihuapil huan quilij ijcuín:

—Talita, cumi—, quijtosnequi: Suapiltzin, tejua nimitzilía ximehua.

<sup>42</sup> Huan niman in suapiltzin moquetzac huan nenemic, porín yejua quiapiaya majtactionome xihuit. Huan ijecón motelajsicamoutijque ichancahuan den suapil.

<sup>43</sup> Pero Yejuatzin quintelnajnahuatij ma amo aquen quimatiltican toni mochihuac, huan no quinnahuatij ma quitamacacan in suapil.

**Nican tajtoa de que Jesús Temaquixtijque tamachtía tech ipueblo de Nazaret**

*(Mt. 13.53-58; Lc. 4.16-30)*

**6** Huan Jesús majchihuac de ne marteno huan yajqui ipueblocopaca de ne Nazaret huan ihuan yajque imomachtijcahuan. <sup>2</sup> Huan ajsic tech se tonal de nesehuilis huan calayic tech in tiopan de judíos, huan pehuac tamachtiaya ica in Tajtoltzin de Dios. Huan miacque quicaquiliayaj huan quimoucaitayaj huan quijtoayaj ijcuín:

—Pues, ¿can cajsic ne tagat nijín tamachtilis? Huan, ¿toni quijtosnequi nijín tanelililis ten yejua quipía? ¡Huan semi huejueyin chihualis ten quichihuac Yejuatzin ica nimahuan!

<sup>3</sup> Huan no quijtoayaj ijcuín:

—¿Xe amo nijín in cuouxinque, iconeu María huan iicnihuan Jacobo, José, Judas huan Simón? Pues quema. ¿Xe amo no nican yetocque tohuan iicnihuan suame? Pues quema.

Huan yejuan quimachiliayaj que quixnamiquisquía Jesús. <sup>4</sup> Huan Jesús quiniliaya ijcuín:

—Nochin tagayot quitasojtaj se itanahuatijcau de Dios. Pero campa ipueblo de ne tanahuatijque, campa niparientes huan nichancahuan yetoyaj, ompa amo quitasojtaj porín ompacayot.

<sup>5</sup> Ica nijín amo teyi hueli Jesús quichihuac den hueyi chihualisme tech ipueblo Nazaret. Ta, sayó quinpajtij Jesús se ome eyi cocoyani san ten momatalij ninnan. <sup>6</sup> Huan Jesús quinmoucaitaya in pueblojuani de Nazaret porín yejuan amo yec tacuautamatiayaj tech Yejuatzin. Huan Jesús nejnetinemía tech nochi ocsequi pueblos huan tamachtijtinemía nohuuyampa ica in Tajtoltzin de Dios.

**Nican tajtoa de queniu Jesús Temaquixtijque quinmactilij nintequiu imomachtijcahuan**

*(Mt. 10.5-15; Lc. 9.1-6)*

<sup>7</sup> Huan ijcuacón Jesús quinnotzac in majtactiomome imomachtijcahuan, huan pehuac quinnajnahuatía ma yacan ojomen san. Huan Jesús quinmactilij in tanahuatil para ijcón huelis quincalanquixtisque in amocuali ejecame. <sup>8</sup> Huan no Jesús quinnahuatij ma amo cuiyacan nión teyi para tenica mopalehuisque tech in ojti. Ta, sayó ma cuiyacan nintopil. Huan nión no ma amo cuiyacan nintominpialoni, huan nión tacualis, nión tomin tech nintajcuilpica. <sup>9</sup> Huan Jesús quinnahuatij ma motegactican, huan ma cuiyacan se camisa san huan amo ome ixnepan de tasal. <sup>10</sup> Huan no Jesús quinilij ijcuín:

—Campa yesqui nancalaquitihue tech se cali, ompa ximocahuacan hasta cuac nanquisasque tech ne pueblo. <sup>11</sup> Huan tacán cansica amo namechselíaj tech se cali, huan amo namechcaquilíaj, ijcuacón xiquisacan niman de ompa huan ximometztzejtzelocan para ma huetzi in talnex nochi ten mopiloj namometztampa para que ijcón ixnesis que Dios quintatzacuiltis ne pueblojuani porín yejuan quixtopeuque in Tajtoltzin de Dios. De yec melau den namechilía que tech ne tonal cuac huetzis in hueyi tazacuiltis de Dios, ijcuacón cachi ongas tajyohuilis tech ne pueblome campa amo

taneltocacque huan que quipiasque in ome pueblome de Sodoma huan Gomorra campa nintech huetzic in tatzacuutilis ica tit de Dios.

<sup>12</sup> Huan ijcón imomachtijcahuan quisque huan peuque quinchicaucanahuatiayaj in pueblojuani de que ma moyolnemilican de nintajtacoluan nochi in tagayot.

<sup>13</sup> Huan no ijcón imomachtijcahuan quincalanquixtiayaj in amocuali ejecame, huan no quincuaojxiliayaj aceite míc cocoyani huan no yejuan pajtique.

### Nican tajtoa de queniu Juan in Taahuijque momiquilij

(Mt. 14.1-12; Lc. 9.7-9)

<sup>14</sup> Huan in rey Herodes quicayic in hueyi chihualis de Jesús, porín nonohuiyan mopohuaya in chihualis de Jesús. Huan ijcuacán in rey Herodes quixejeco que in Juan Taahuijque panquisac ya yoltoc itzalan ne ánimajme, huan ica ya nojón mochiutoc nochi nijín huejueyin chihualisme. <sup>15</sup> Porín sequin quiytoayaj de Jesús ijcuín:

—Achá yejua in Elías ne huejcautanahuatijque de Dios ten quichiutoc nijín chihualisme.

Huan ocsequin quitoayaj ijcuín:

—Achá yesqui ocsé itanahuatijcau de Dios, oso senme den huejcautanahuatiani de Dios.

<sup>16</sup> Huan queman quicayic nijín tajtolme, ijcuacán in rey Herodes quiytoj ijcuín:

—Yejua nijín Juan ten nejuatzin nitatitanic ma quiquehcotonacan, huan yejua ne panquisac yoltoc itzalan in ánimajme.

<sup>17</sup> Porín rey Herodes quintanahuatilijca in soldados de que ma quiquitzquican preso in Juan, huan ma quitziytzicocan ca cadenas tech in cárcel. Achto ya in rey Herodes quiixuelitac icuñaada huan quinequía quipactis in suapil, monotzaya Herodías, yejua isihuau in Felipe, huan in Felipe yejua icniutagat den rey Herodes. Huan in rey Herodes ipa quicuiliy ya icuñaada para yesqui isihuau. <sup>18</sup> Pero in Juan Taahuijque ipa quilijca ya in rey Herodes ijcuín:

—Dios amo quimonequiltía ticfías queme mosihuau nijín isihuau de mocniu.

<sup>19</sup> Huan ne sihuat Herodías ipa quicualancaitaya in Juan, huan semi quinequía majcán quimicti in Juan, pero amo huelía. <sup>20</sup> Porín rey Herodes quimoucocatocaya in Juan, huan quimatoya que in Juan se tagat ten yolcuali huan yolchipahuac. Huan in rey Herodes ipa amo quitechahuiliaya de que ma quicojococan in Juan. Huan cuac in rey Herodes quicaquilij nitanojnotzalis de Juan, ijcuacán ipa mocahuac semi yoltanemilijque, pero quicaquiliaya ca míc paquilis.

<sup>21</sup> Huan in sihuat Herodías cajsic huelilis tech ne tonal cuac in rey xiumajsic. Huan in rey Herodes quintatamacac nochi in hueyi chihuanime huan no in tayecanani de soldados huan in huejueyi rcojme de Galilea. <sup>22</sup> Huan tech nojón hora calaquito isihuapil de ne sihuat Herodías huan pehuac mijtotía, huan ijcón semi quiyolpactij in rey Herodes huan no quinyolpactij naquen ihuan yetoyaj in rey Herodes tacuajtoyaj. Huan ijcuacán rey Herodes quilij in suapil ijcuín:

—Tejua tihuelis tinechtajtanilis nochi ten ticnequis, huan nejuatzin nimitzmactis.

<sup>23</sup> Huan ijcón rey Herodes moyectencahuac ihuan in suapil huan no quilij ijcuín:

—Dios quitztoc, nochi ten tinechtajtanilis, nimitzmactis, masqui yec tajco den país ten nejuatzin noaxca.

<sup>24</sup> Huan sihuapil yajqui huan quilito quiixpantilito inan Herodías ijcuín:

—¿Toni nictajtanilis?

Huan inan den suapil, yejua Herodías quinanquilij ijcuín:

—Xictajtanili nitzontecon de Juan Taahuijque.

<sup>25</sup> Huan in sihuapil ijsiucacalayic campa in rey Herodes huan quitajtanilij ijcuín:

—Niquequi xinechonmacti axcan ipan se plato nitzontecon den Juan Taahuijque.

<sup>26</sup> Huan in rey Herodes nocta voltayocoyac. Huan amo quineyic motajtolcuepas oc porín yejua moyectencauca ya ihuan in suapil ne achtopa, huan no porín nochi tayecanani den tacuajtoyaj no cactoyaj. <sup>27</sup> Huan niman in rey Herodes quititanic senme den tajpiani huan tanahuatij ma quiqechcotonacan ne Juan Taahuijque huan ma cualcuilican nitzontecon. <sup>28</sup> Huan ijcón in tajpiaque yajqui campa in cárcel huan ompa quiqechcotonque in Juan ne cárcelijtic huan cualic itzontecon tech se plato huan quimactijque in suapil. Huan in suapil quimactito inan Herodías. <sup>29</sup> Huan queman ijcón quicacque, ijcuacón imomachtijcahuan de Juan hualajque huan quicuicque inacayo in Juan huan quitalitoj tech in miquetecoch.

### **Nican tajtoa de queniu Jesús Temaquixtijque quintamacac macuil mil tagayot**

*(Mt. 14.13-21; Lc. 9.10-17; Jn. 6.1-14)*

<sup>30</sup> Ijcuacón in apóstoles in tatitanilme de Jesús Temaquixtijque mosentilijque ihuan Jesús huan quitapohuijque nochi ten quichiuque huan ten yejuan tamachtijcay ya. <sup>31</sup> Huan Yejuatzin quinilij ijcuín:

—Xihualacan nohuan namejuan namoseltij tech ne lugar campa amo aca yetoc huan ximosehuican tepitzin.

Huan Jesús quinilij ne tajtol porín nocta míac tagayot yayaj huan hualayaj, huan hasta amo quemantíaj oc para tacuasquíaj. <sup>32</sup> Huan ijcón yajque Jesús ihuan imomachtijcahuan ninseltij tech se barco hasta campa se lugar campa tayiucan. <sup>33</sup> Pero míac tagayot quinitacque cuac yajque Jesús ihuan imomachtijcahuan huan quinixmatque. Huan miacque den pueblojuani yajque no ompa metznejenque huan ajsicque achto que Yejuatzin, huan mosentilijque quichixtoyaj campa Yejuatzin yaya. <sup>34</sup> Huan cuac Jesús quisac tech ne barco, ijcuacón Yejuatzin quitac tel míac tagayot huan quimachilij se hueyi teicnelilis de yejuan porín catcaj queme ichcatzitzin ten amo quiplayaj tapixque. Huan niman Jesús pehuac quinmachtífa ica míac tataman tamachtilisme. <sup>35</sup> Huan cuac ne semi tiotactiaya ya, ijcuacón imomachtijcahuan motoquijque ihuan Jesús huan quilijque ijcuín:

—Nican semi tayiucan huan tiotac ya. <sup>36</sup> Xiquinnahuati in tagayot ma yacan huan ma tacohuatij tech in pueblos huan tech in milajpa ten amo huejca, porín in tagayot amo quipíaj toni cuasque.

<sup>37</sup> Huan Jesús quinnanquilij ijcuín:

—Xiquintamacacan namejuan san.

Huan yejuan tananquilijque ijcuín:

—¿Xe tejuan tiyasque titacohuasque májtactipoal denario de pan —yesqui ome mil pesos de pan—, huan ma tejuan tiqintamacasque?

<sup>38</sup> Huan Yejuatzin quinilij ijcuín:

—¿Canachi panes nanquinpíaj? Xiyacan xiquinitacan.

Huan cuac quimatque, ijcuacón quilijque Jesús ijcuín:

—Ticpíaj macuil panes huan ome pescadojtzitzin.

<sup>39</sup>Huan Jesús quinnahuatij in tagayot ma mojolochtalican inpan in tasetot.  
<sup>40</sup>Huan ijcón nochi mojolochtalijque, huan motecpanque, sequin majmacuilpoal, huan ocsequin ojomepoal huan májtacti. <sup>41</sup>Ijcuacán in Jesús quicuic in macuil panes huan in ome pescados, huan moixajocuic eluiyactzinco huan quitatautij Dios ma quitiochihuac in tacualis. Huan de ompa quincocotonac in panes huan quinmactilij imomachtijcahuan para ma yejuan quinxexelohuilisque in tagayot. Huan no ijcón quinxexelohuilijque in ome pescadojnacat. <sup>42</sup>Huan ijcón nochi in tagayot tacuajque huan ixuicque. <sup>43</sup>Huan niman imomachtijcahuan cololojque pan tatetejtec huan no cololojque ten mocahuac den pescadojnacat ica majtactionome chiquihuime pexontoyaj. <sup>44</sup>Huan nijñ tagayot ten tacuajque catca macuil mil taca.

### **Nican tajtoa de queniu Jesús Temaquixtijque nejnemic aixco**

*(Mt. 14.22-27; Jn. 6.16-21)*

<sup>45</sup>Huan niman Jesús quinnahuatij imomachtijcahuan ma calaquican tech in barco, huan ma yacan ma quiachtohuican Jesús ne pueblo de Betsaida tech ne ocsé ateno, mientras Yejuatzin quinilij in tagayot ma yacan ninchan. <sup>46</sup>Huan satepan de quinnajnhuatij in tagayot ma yacan, ijcuacán Jesús yajqui ne tepayo huan motatautilito ihuan Dios. <sup>47</sup>Huan queman tapoyahuic ya, ijcuacán tanejnemiltijtoyaj imomachtijcahuan ica nijñ barco hasta ne tatajco den mar, huan Jesús iselti mocahuac talixco.

<sup>48</sup>Huan Jesús quinitac imomachtijcahuan de que quinejnemiltiyaj in barco ica míac ohuijcajot porín in ejecat quintzatzaculiaya. Huan cuac ipa tanextihuitz ya, ijcuacán huala Jesús quinajsico imomachtijcahuan nejnentihuala aixco, huan quinequía quinpanahuijtiquisac. <sup>49</sup>Huan queman imomachtijcahuan quitacque Jesús nejnentihualaya aixco, ijcuacán quinemilijque que catca se ánima huan moucatzajtzicque. <sup>50</sup>Porín nochi imomachtijcahuan cuac quitacque Jesús, ijcuacán yejuan quihueyimoucaitacque. Huan nimantzin Jesús quinnotzac huan quinilij ijcuín:

—Ximoyolchicahuacan, Nejuatzin ya ni Jesús, amo ximomoutican.

<sup>51</sup>Huan cuac tejoc Jesús tech in barco campa yetoyaj imomachtijcahuan, ijcuacán motamatilij in ejecat. Huan yejuan quimoucaitacque telsenca huan quitetzaucaitacque. <sup>52</sup>Huan imomachtijcahuan ayamo cajsicamatfaj in hueyi chichualis de Jesús cuac Yejuatzin quinxexelohuilij in tagayot in panes. Huan imomachtijcahuan amo cajsicamatque porín yejuan yolpipicticque oc catcaj de nintamachilis porín ayamo yec tacuautaminemíaj ihuan Jesús.

### **Nican tajtoa de queniu Jesús Temaquixtijque quinpatij naquen mococoayaj itech ne pueblo Genesaret**

*(Mt. 14.34-36)*

<sup>53</sup>Huan cuac quinpanahuijque ya in mar, ijcuacán Jesús ihuan imomachtijcahuan ajsitoj tech tal ten pohuía Genesaret, huan quiquetzatoj huan quitzijcojque in barco martenteno. <sup>54</sup>Huan cuac quisque den barco, nimantzin in tagayot quixmatque Jesús. <sup>55</sup>Huan niman motalajtinemíaj calpan para quitetapohuisque de Jesús, huan pehuac quinalcuilíaj in cocoyani de nohuiyan tech nincochpet campa ne motapohuijque que yetosquía Jesús. <sup>56</sup>Huan campa yesqui calaquisquía Jesús tech ne pueblojtitzin, oso huejueyin pueblo, oso mijmilapa, ompa quintalijque cocoyani

ojtipan huan quitatautiayaj Jesús ma quincahua ma quimatocacan sayó itilmajteno. Huan nochi ten quimatocacque Jesús, nochi pajtijque ya.

**Nican Jesús Temaquixtijque quinmachtij in tacaquini de  
ne tamachtilis ten quimajmahua ica tajtacol in tagat**

(Mt. 15.1-20)

**7** Huan mosentilijque in fariseos campa yetoya Jesús huan no yetoyaj sequin tanextiliani den tanahuatil de Moisés; nochin hualajque de Jerusalén. <sup>2</sup> Huan nojón tanextiliani quinitacque que sequin imomachtijcahuan de Jesús quicuaajque nintacualis huan amo momachipauque, quijtosnequi amo tatacamatque ica ne tanahuatil de ne majtequilis. Huan ica ya nojón in tayecanani quinijitojque huan quintelchiquque imomachtijcahuan de Jesús. <sup>3</sup> Huan ne fariseos huan nochi in tagayot judíos quintatacamatij in tanahuatilde den huehuentzitzin, den pueblojuani judíos ten quijtoa que como amo miacpa moyecmajtequisque, pues ijcón amo hueli tacuasque. <sup>4</sup> Huan cuac hualajque in tagayot judíos den plaza, ijcuacón amo teyi tacuasque, como amo achto moyechipahuasque. Huan ongac ocsequin miacque tanahuatilde den huehuentzitzin ten quitacamatij, queme nijín, tapajpacalis den tasas tenica se tayi tensá, huan tapajpacalis de conme huan ocsequin míac tataman teposme, huan no tapajpacalis de nincochpetuan.

<sup>5</sup> Huan in fariseos huan in tanextiliani den tanahuatil de Moisés quitajoltijque Jesús ijcuín:

—¿Queyé momomachtijcahuan amo nemij queme technahuatíaj in huehuentzitzin? Yejuan quicuaaj nintacualis ica ninmahuan ten amo chipauque.

<sup>6</sup> Huan Jesús quinnanquilij:

—Namejuan nanixquequepme de namotamachilis. Isaías ne huejcautanahuatijque de Dios quiequijtoj de namejuan, huan tajcuiloj itencopa Totajtzin Dios ijcuín:

Nijín pueblojuani nechmohuistilíaj ica itenxipil san.

Huan niyolojuan huejca yetoc de Nejuatzin.

<sup>7</sup> Pues nenca san nechmohuistilíaj.

Porín yejuan tenextilíaj in tanahuatilde de taca san queme yesquía in Tajtoltzin de Dios.

<sup>8</sup> Huan namejuan nanquiseocahuaj in tanahuatil de Dios huan nanquitacamatij in tanahuatilde den taca san queme nijín: in tapajpacalis den conme huan xalojme tenica se tayi tensá. Huan nanquichihua míac ocsequin tataman nijín tanahuatilde.

<sup>9</sup> Huan no Jesús quiniliayaj ijcuín:

—Nancahuilchiquque queme amo cualtiasquía in tanahuatil de Dios para iixpatca nanquitacamatisque in tanahuatilde de huehuentzitzin den pueblojuani judíos.

<sup>10</sup> Porín in Moisés ne huejcautanahuatijque quijtoj ijcuín: “Xicmohuistilican namotajtzin huan namonanajtzin”. Huan no in Moisés quijtoj: “Naquen quitelchihuas itajtzin oso inantzín, yejua nojón ma quimictican”. <sup>11</sup> Pero namejuan nantanahuatíaj que huelis se tagat ma quilij nitajtzin oso ninantzín ijcuín: “Nochi tenica namechpalehuisquía, axcan yejua corban, ten quijtosnequi nicaxcatilij ya Dios”.

<sup>12</sup> Huan como ijcón se quinilía itatajtzin, ijcuacón namejuan nantayecanani amo nanquincahuaj in teconeu ma quichihua tensá para quinpalehuisquía nitatajtzin nióñ ninanajtzin. <sup>13</sup> Huan ijcón nanquiseochiquque in Tajtoltzin de Dios huan nanquitacatinemij in tanahuatilde ten namejuan ten nanpohuij ihuan in judíos nan-

tamachtíaj. Huan no nanquichiuque m'íac ocsequin tataman tanahuatilme queme nojonque.

<sup>14</sup> Huan ocsepa Jesús quinnotzac nochi in tagayot campa yetoya Yejuatzin huan quinilij ijcuín:

—Xinechcaquilican nannochin, huan xicajscamatican. <sup>15</sup> Amo teyi ongac tacualis ten calaquí itech iten in tagat den calampa ten hueli quimajmahuas ica tajtacol ne tagat. Ta, ne ten quiyolnemilía tech iyolijtic de se tagat, yejua nojón quimajmahua ica tajtacol in tagat. <sup>16</sup> Tacán acsá quipía inacas para tacaquis, ma yec tacaqui.

<sup>17</sup> Huan cuac Jesús quincahuac in tagayot huan yajqui calayic ichan, ijcuacón imomachtijcahuan quitajtoltijque toni quijtosnequi nijín nexcuitil. <sup>18</sup> Huan Jesús quinilij:

—¿Xe namejuan amo no nancajscamatij nijín nexcuitil? ¿Cox amo nanquimatilíaj que nochi in tacualis ten calaquí itech se iten de se tagat de calampa, yejua nojón amo hueli quimajmahuas ne tagat ca tajtacol? <sup>19</sup> Porín amo calaquí in tacualis itech se iyolo. Ta, calaquí itech se ipox huan de ompa panoa san calan.

Huan ica ya nojón Jesús quinyecquilij que nochi ten ticuasque yejua nojón chipahuac ya, porín in tacualis amo huelis techmajmahua ica tajtacol. <sup>20</sup> Huan no Jesús quinilij ijcuín:

—Pero ne tamachilis ten quisa itech iyolijtic den tagat, yejua nojón quimajmahua in tagat ica tajtacol. <sup>21</sup> Porín itech in tagat, iyolijtic den tagat, ompa quisaj pitzotic tanemililisme, ne tagacuulilis oso tesuacuulilis, ne tasuapapatalis oso tagapapatalis, in temictilis, <sup>22</sup> In tachtequilis, in xixicuinyot, in pitzotic tachihualisme, ne tacajcayahualis, ne ahuilnemilis, ne xicolot, ne tahuijuicaltilis, ne mohueyinequilis huan ne yolmijmiquiloyot. <sup>23</sup> Nochi nijín tajtacolme quisaj itech se iyolitic huan yejua nijín quimajmahua ca tajtacol in tagat.

**Nican tajtoa de queniu Jesús Temaquixtijque quinojnotzac se  
sihuat analtecocayot huan yejua taneltoca itech Jesús**

*(Mt. 15.21-28)*

<sup>24</sup> Ijcuacón moojquetzac Jesús huan yajqui ne lugar campa pueblojme de monotza Tiro huan Sidón. Huan yajqui calayic tech se cali huan amo quinequía ma acsá quimatisquía, pero amo huelic ichtacayetos. <sup>25</sup> Huan yetoya se sihuatzin ten quipiaya se isuapil ten mococoaya, porín quipiaya iyolijtic se amocuali ejecat. Huan nojón sihuat quicacca que huala Jesús. Huan in sihuatzin yajqui motancaquetzato iicxitantzincó Jesús. <sup>26</sup> Huan ne sihuat tajtoaya griego masqui yolic itech se pueblo de monotza sirofenicia. Huan in sihuatzin moteltatautiaya inahuac Jesús de que ma quicalanquixtili in amocuali ejecat de ne isuapil. <sup>27</sup> Pero Jesús quilij ijcuín:

—Xicahua achto ma ixuican in coneme judíos ica ne Tajtoltzin de Dios. Porín amo cualiquisa ma se quincuilis in tacualis den coneme huan ma se quintamaca itzcuintzitzin.

<sup>28</sup> Huan in sihuat quinanquilij ijcuín:

—Quema catzin, masqui tejuan queme yesquíaj itzcuintzitzin, pero timotaololo-huilíaj mesajtampa huan ticuaj nochi in Tajtoltzin de Dios ten panxinij den coneme judíos.

<sup>29</sup> Ijcuacón Jesús quilij in sihuat ijcuín:

—Cuali yetoc ten tejua tiqijtoa. Ica ya nojón nimitzilía que xiyó mochan huan xicmati que ne amocuali ejecat quisac ya de mosuapil.

<sup>30</sup> Huan cuac in sihuat ajsic ne ichan, ijcuacón ipa quisac ya itech isuapil in amocuali ejecat, huan ijcón in suapil tamatcahuetztoya ya.

### Nican tajtoa de queniu Jesús quipajtij se tagat ten amo tacaqui nión tajtoa

<sup>31</sup> Huan queman Jesús mocuepac ya de ne tal de monotza Tiro, ijcuacón Yejuatzin panotiquisac campa pueblo de Sidon huan yajqui marteno de Galilea, huan panotiya tech nintalteno de pohuía Decápolis, de ne májtacti pueblos. <sup>32</sup> Huan cualcuilijque campa Jesús yetoya se tagat ten amo tacaquí huan no amo yec tempanhuetzía. Huan quitatatautilijque Jesús ma momacpaltalisquí tech yejua para ijcón ma pajtisquí. <sup>33</sup> Huan Jesús cuiyac ne tagat quixexeloy iselti de tagayot. Huan Jesús momajpilcalaquic itech inacas ne cocoxque. Huan momachijchihuic huan niman quimatocac inenepil. <sup>34</sup> Huan Jesús moixajocuic, huan ajco tachíac eluiyac, huan ajco yolnejsihuic, huan quijtoj ijcuín:

—Efata —quijtosnequi: Ma tatapohuican.

<sup>35</sup> Huan nimantzin motapouque inacasuan huan tojtomic inenepil huan ijcón cuali tajahtoaya. <sup>36</sup> Huan Jesús quinnajnahuatij in tagayot ma amo aquen quitapohuican de toni mochihuac. Huan ijcón queme Yejuatzin quinnajnahuatí, pero yejuan cachi oc quitetapohuiayaj. <sup>37</sup> Huan ica nojón telsenca mohuelitayaj in tagayot huan quijtoayaj ijcuín:

—Nochi ten Jesús quichihuac semi cuali, huan naquen amo tacaqui, Jesús quintacaquilítia; huan naquen amo yectajtoa, Jesús quinchihua ma tajtocan.

### Nican tajtoa de queniu Jesús Temaquixtíjque quintamacac nahui mil tagayot

(Mt. 15.32-39)

**8** Huan tech nojón tonalme míac tagayot mosentilijque huan amo quiplayaj toni cuasque. Huan Jesús quinnotzac imomachtijcahuan huan quinilij ijcuín:

<sup>2</sup>—Niquinyolicnelía de nijín tagayot porín quipíaj eyi tonal ya nohuan yetocque, huan amo quipíaj ten cuasque. <sup>3</sup> Huan tacán ijcón niquintitanis in tagayot ninchan huan amo niquintamacas, ijcuacón mayancahuetzítihue cuac yasque tech in ojti. Porín sequin hualajque de semi huejca.

<sup>4</sup> Huan in imomachtijcahuan quinanquilijque Jesús ijcuín:

—¿Pero queniu huelis se quintamiixhuitis ica míac tacualis nochi nijín tagayot campa nijín tayiucan? Pues amo huelis.

<sup>5</sup> Huan Yejuatzin quintajtaniy ijcuín:

—¿Canachi panes nanquinpíaj?

Huan yejuan tananquilijque ijcuín:

—Chicome.

<sup>6</sup> Huan ijcón in Jesús quinnajnahuatij in tagayot ma motalican ne talixco. Huan Yejuatzin quincuic in chicome panes huan quitasojcamaquilij Dios, huan quincocotonac in pan, huan quinmactij imomachtijcahuan ma yejuan quinxejxelo huilican ne tagayot. <sup>7</sup> Huan no quiplaya sequi pescados, huan no ijcón Jesús quintiochihuac huan quinnajnahuatij imomachtijcahuan ma quinxejxelo huilican in tagayot. <sup>8</sup> Huan nochi in tagayot tacuajque huan ixuicque. Huan de ompa imomachtijcahuan quiololojque chicome chiquihuit pexonic de ne pan cojcotol ten mocahuac. <sup>9</sup> Huan



naquen tacuajque catca queme nahui mil taca. Huan de ompa Jesús quinnahuati-jtehuac in tagayot. <sup>10</sup>Nimantzin Yejuatzin calayic tech in barco ihuan nochi imomachtijcahuan huan ajsicque campa pueblojcopaca de Dalmanuta.

**Nican tajtoa de queniu in fariseos quitajtanilijque Jesús  
ma quinnextili se cuali nescayot de Dios**

*(Mt. 16.1-4; Lc. 12.54-56)*

<sup>11</sup>Ijcuacón hualajque in fariseos huan peuque motajtoltehujique ihuan Jesús porín quinequáfaj quitepotamisque Jesús tech tajtacol. Yejuan quitajtaniliayaj ma Jesús ma quinnmacasquía se nexcuitil de ne eluiyactzinco. <sup>12</sup>Huan Yejuatzin ajco yolnejsihuc huan quijtoj ijcuín:

—¿Queyé nannechtajtanilíaj tensá nexcuitil para namejuan ten axcan nanyoltocque? De yec melau ten namechilía, Dios amo namechmactilis se nexcuitil para namejuan ten nanyoltocque axcan.

<sup>13</sup>Huan de ompa Jesús quincahuac in tagayot, huan yajqui calaquito tech se barco huan quipanhuijque in mar huan ajsito ne sentapalpa den mar.

**Nican Jesús Temaquixtijque quinmachtij de ne tamajmahualis de  
tajtacol ten cuica in tamachtilis de fariseos**

*(Mt. 16.5-12)*

<sup>14</sup>Huan imomachtijcahuan de Jesús quelcauque ya de cuicasque tacualis ten monequía, huan quipiyaj sayó se pantzin tech in barco. <sup>15</sup>Huan Jesús quinnajnahuatilij ijcuín:

—Xiquitacan huan xicpiacan cuidado de ne tamachtilis ten quipíaj in fariseos huan ten quipíaj in rey Herodes, porín ne tamachtilis temajmahua ica tajtacol.

<sup>16</sup>Huan ica nijín tajtol pehuac motajtoltehuiayaj imomachtijcahuan huan quijtojqque ijcuín:

—Achá ijcón techilía porín amo ticualicque tacualis.

<sup>17</sup>Huan Jesús quinyoloximatic huan quinilij ijcuín:

—¿Queyé nanmotajtoltehujitocque que amo nanquipíaj tacualis? Mota que ayamo nanquimatilíaj nión nancajsicamatilíaj notanexutilis. ¿Xe semi namejuan semi nanyolpipicticque oc de namotamachilis de amo nanquiselisque in Tajtoltzin de Dios?

<sup>18</sup>Huan nanquipíaj namoixtololohuan, ¿xe amo nantachíaj? Huan nanquipíaj namonacasuan, ¿xe amo nantacaquij? Huan, ¿xe amo nanquelnamiquij? <sup>19</sup>Cuac Nejuatzin nicxejxeloj in macuil panes para in macuil mil tagayot, ijcuacón, ¿canachi chiquihuit pexonic de ne pan cojcotol ten namejuan nanquiolojque?

Huan yejuan tananquilijque ijcuín:

—Majtactiomomen.

<sup>20</sup>Huan no Jesús quintajoltij ijcuín:

—Cuac nicxejxeloj nahui panes para in nahui mil tagayot, ijcuacón, ¿canachi chiquihuit pexonic de pan cojcotol nanquiolojque?

Huan yejuan tananquilijque ijcuín:

—Chicome.

<sup>21</sup>Huan Jesús quinilij ijcuín:

—¿Queyé ayamo nancajsicamatij in huejueyin chihualisme ten nicchiutinemi?

**Nican tajtoa de queniu Jesús Temaquixtijque quitachialtij  
se cocoxque ijcoptoc campa ne pueblo de Betsaida**

<sup>22</sup> Huan Jesús ajsic niman tech in pueblo de Betsaida. Ijcuacón cualcuilijque se tagat ijcoptoya, huan quitatautijque Jesús ma quimatocasquía para quipajtisquía. <sup>23</sup> Huan Jesús quimaquitzquij in tagat ijcoptoya, huan cuiyac calampa den pueblo. Huan quixacualoj ica ichijchi huan quixmapachoj, huan niman quitajtani xatensá quitaya. <sup>24</sup> Huan in tagat ten ijcoptoya niman tachíac, huan quijtoj ijcuín:

—Niquinita tagayot majyá cuoume, pero no niquinita nenemij.

<sup>25</sup> Huan niman ocsepa Jesús quixmapachoj huan quichihualtij ma yec tachíac. Huan niman quiselij tachialis in cocoxque huan tachíac de huejca huan yec tachíac nochi. <sup>26</sup> Huan Jesús quititanic nichan huan quinhualtij ijcuín:

—Amo xiyó tech ne pueblito, huan nión naquen xictapohui tech ne pueblo.

**Nican tajtoa de queniu Pedro quiyequilij que  
Jesús Yejuatzin in Cristo Temaquixtijque**

*(Mt. 16.13-20; Lc. 9.18-21)*

<sup>27</sup> Ijcuacón quisque Jesús ihuan imomachtijcahuan huan yajque tech in pueblos ten pohuía Cesarea de Filipo. Huan cuac ojtocatoc ya, ijcuacón Jesús quintajtani imomachtijcahuan ijcuín:

—¿Toni quijtoaj in tagayot que niaconi Nejuatzin?

<sup>28</sup> Huan yejuan tananquilijque ijcuín:

—Sequin quijtoaj que Tejuatzin tion Juan Taahuijque. Huan ocsequin quijtoaj que Tejuatzin tion Elías. Huan ocsequin quijtoaj que Tejuatzin tionacsá den huejcautahanahuatiani de Dios.

<sup>29</sup> Ijcuacón Jesús quintajtoltij ijcuín:

—Huan namejuan, ¿toni nanquixejecoaj niaconi Nejuatzin?

Huan tananquilij Pedro ijcuín:

—Tejuatzin tion Cristo in Temaquixtijcatzin.

<sup>30</sup> Huan Jesús quinnahualtij ma amo aquen quilisquía que Yejuatzin Temaquixtijcatzin in Cristo.

**Nican Jesús Temaquixtijque quintetapohuij  
imomachtijcahuan que ejcotoc ya imiquilis**

*(Mt. 16.21-28; Lc. 9.22-27)*

<sup>31</sup> Huan Jesús pehuac quinmachiáj imomachtijcahuan ijcuín:

—Semi monequi que nejua ni Yectagatzin ma semi nitajyohuis. Huan in huehuentzitzin huan in tayecancatiopixcame huan in tanextiliani de tanahuatil de Moisés, nochi nijín tayecanani, yejuan nechixnamiquisque huan nechtelchihuasque ma nimiqui. Ta, ocsepa nipanquisas intzalan in ánimajme niyoltoc ipan eyi tonalica.

<sup>32</sup> Huan Jesús quinyequixilij nijín tanemilis. Ijcuacón Pedro quixeloj Jesús seco, huan ompa pehuac quixajua ica por nitajtolis. <sup>33</sup> Huan Yejuatzin moixcuepac campa yetoyaj imomachtijcahuan huan quixajuac Pedro huan quilij ijcuín:

—Ximijcuani noixpan Pedro, majyá titanemilijtoc queme Satanás in amocuali. Huan amo ticmatilía in tanemililis de Dios. Ta, sayó ne tamachilis den tagayot.

<sup>34</sup> Ijcuacán Jesús quinnotzac nochi in tagayot pero quinilij imomachtijcahuan ijcuín:

—Tacán acsá quinequi nechtoctilijtiyás, ijcuacán ma quicautehua ne tanejnequilis de yejua san; huan ma quixijco in cruztzin ten cualcuis in tajyohuilis huan ma nech-tacamatiu huan ma nechtoctilijtiu. <sup>35</sup> Huan nochi neques ten quinequij moyecpi-altisque huan quimaquixtisque ninnemilis, yejuan nochi quipolosque in ninnemilis. Pero nochi neques ten quipolosque ninnemilis ica por Nejuatzin huan porín in cuali Tajtoltzin den nemaquixtilis, yejuan nojonque cajsisque ninnemilis huan no ne nemaquixtilis. <sup>36</sup> Huan, ¿toni quihueyipías in tagat como moaxcatisquía nochi nijín senmanahuac huan niman quipolos nitalnamiquilis? <sup>37</sup> Oso, ¿toni taxtahuil huelis quitemacas in tagat ica por niyolo cuac yejua cajsicamatis que quipoloj ya nine-milis? <sup>38</sup> Ma tiqijtocan que acsá mopinaucamati de Nejuatzin huan de notajtoltzin cuac yejua monojnotztos ihuan in talticpacuani, neques ten tajtcolejque ten ax-can nemij huan amo quitacamati Dios. Como yejua mopinaucamati de Nejuatzin, ijcuacán no nimopinaucamatis de yejua cuac Nejuatzin in Yectagatzin nihualas ica ichicaucahuelilis de Notajtzin Dios ihuan in ángeles chipauque.

**9** Huan no Jesús quinilij in tacaquini ijcuín:

—De yec melau ten namechilía que senme de namejuan ten nican nanyetocque, amo nanmiquisque hasta queman nanquitasque que nihualas ya huan nimomasoutoc ya huan niquinyecanas notaneltocahuan ica nihueyichicahualis de Dios.

### **Nican tajtoa de que Jesús Temaquixtijque nocta mopapatac quenín tamatic inixpan imomachtijcahuan**

*(Mt. 17.1-13; Lc. 9.28-36)*

<sup>2</sup> Huan chicuasen tonal satepan Jesús quinuiyac Pedro, huan in Jacobo, huan in Juan, huan yajque tejcotoj seco itech se tepet huejcapan. Huan ompa Jesús mopapataya quen tamatic ninixpan. <sup>3</sup> Huan nitilma pehuac cualtzin pepetaca semi istac queme yesquía secti, huan amo ongac aquen tapacque nican talticpac huelisquía ijcón quichihuasquía ma tel istac queme nijín. <sup>4</sup> Huan monextijque Elías ihuan Moisés, yejuan huejcautanahuatiani de Dios, huan peuque monojnotzayaj ihuan Jesús. <sup>5</sup> Huan in Pedro quitajtolcotonac Jesús huan quilij ijcuín:

—Notamachtijcau, semi cualtzin para tejuan que tiyetocque nican. Ma ticchijchi-huacan eyi xajcaltitzin, se para tejuatzin huan se para Moisés, huan ocsé para Elías.

<sup>6</sup> Pues imomachtijcahuan semi moucacuicque ya, huan ica nojón Pedro amo quimatía oc toni quijtos. <sup>7</sup> Ijcuacán hualtemoc se mixtepet huan quinquemiloco, huan mixtzalan mocayic se tajtolis ten quijtoaya ijcuín:

—Yejuatzin ya nijín Notasoconetzin. Xicaquilican ca cuali Yejuatzin.

<sup>8</sup> Huan niman cuac huelis tatachiasque, ijcuacán amo aquen quitacque oc. Ta, sayó Jesús iselti.

<sup>9</sup> Huan cuac nochi imomachtijcahuan temocque de tepet, ijcuacán Jesús quinnaj-nahuatij ijcuín:

—Amo aquen xiquilican teyi den nanquitacque ya. Ta, ma xicchiacan hasta satepan den Nejuatzin ni Yectagatzin nipanquisas niyoltoc itzalan in animajme.

<sup>10</sup> Huan ijcón imomachtijcahuan quichtacamatojay san, pero motajtoltiayaj yejuan san, huan quijtoque ijcuín:

—¿Toni quiptosnequi nijín tajtol de que Yejuatzin panquisas yoltoc itzalan in ánimajme?

<sup>11</sup> Ijcuacón imomachtijcahuan quitajtanilijque Jesús:

—Huan ne tanextiliani den tanahuatil de Moisés, ¿queyé yejuan quiptoaj que achto monequi ma huiqui in tanojnotzque Elías achtopa que hualas in Cristo Temaquixtijque?

<sup>12</sup> Huan Jesús quinnanquilij ijcuín:

—Yec melau Elías huala achtopa que Nejuatzin nihuala huan yejua tayejepectralij nochi para Nejuatzin. Huan, ¿toni quipto in Tajcuilolamatzin de Dios de Nejuatzin ni Yectagatzin? Quipto que Nejuatzin Yectagatzin nihueyitajyohuis huan niyesqui tamohuispolol ninixpan in tagayot. <sup>13</sup> Huan Nejuatzin namechilía que Elías huala ya, huan in tayecanani quichihuilijque nochi ten quinecque, porín ijcón tajcuiliutoc ya de yejua tech in Tajcuilolamatzin.

**Nican tajtoa de queniu Jesús Temaquixtijque quipatij  
se telpoch ten quiapiaya iyolijtic se amocuali ejecat**

*(Mt. 17.14-21; Lc. 9.37-43)*

<sup>14</sup> Huan cuac ajsicque Jesús ihuan Pedro huan Jacobo huan Juan campa yetoyaj ocsequin imomachtijcahuan, ijcuacón quinitac Jesús huel mÍac tagayot huan quiyehualotoyaj. Huan no yetoyaj ne tanextiliani den tanahuatil de Moisés. Huan yejuan motajtoltehujtoyaj ihuan imomachtijcahuan de Jesús. <sup>15</sup> Huan nimantzin cuac in tagayot quitacque Jesús, ijcuacón quimoucaitacque, huan hual motalojque campa Yejuatzin huan quitajpalocoj. <sup>16</sup> Huan Jesús quintajtoltij imomachtijcahuan ijcuín:

—¿Tonica nanmotajtoltehujtocque?

<sup>17</sup> Huan tananquilij senme den ompa yetoyaj ijcuín:

—Notamachtijcau, nimitzualcuilía nooquichpil ten quipía iyolijtic se amocuali ejecat den amo quicahua ma tajto. <sup>18</sup> Huan campa yesqui cajsí nijín amocuali ejecat, ompa quiquitza in telpoch huan quitatamota talpan. Huan in telpoch tenposoni huan tennanatzoca huan melaxtía. Huan niquintajtanilijca momomachtijcahuan ma quicalanquixtican in amocuali ejecat pero yejuan amo huelque.

<sup>19</sup> Ijcuacón Jesús quinnanquilij ijcuín:

—¡Ay de namejuan ten amo nantaneltocaj! ¿Canachi tonalme quipía de que niyetos namohuan? ¿Canachi tonalme quipía de que nitaxicos como amo nanyecacuautamati nohuan? Xicualican nican in telpoch.

<sup>20</sup> Huan ijcón yejuan cualicque. Huan cuac in amocuali ejecat quitac Jesús, ijcuacón quiteltetzeloj in telpoch. Huan in telpoch huetzic talpan motetecuinojtinemía huan tenposonía. <sup>21</sup> Ijcuacón Jesús quitajtanilij in tetajtzin ijcuín:

—¿Quemanían ya ijcón pehuac mochihuac?

Huan itajtzin quinnanquilij ijcuín:

—Desde quemán yejua tzictzin catca. <sup>22</sup> Huan miacpa ya nijín amocuali ejecat quitatamotac notelpoch itech in tit huan itech in at para quimictisquía. Pero como tejuatzin tionuelis ticonchihuas tensá, xitechonicneli huan xitechonpalehui.

<sup>23</sup> Huan Jesús quinnanquilij ijcuín:

—Como tejava tihuelis titacuautamatis notech, cualtzin ya, porín nochi naquen yecacuautamati notech, yejava ne nochi hueli quichihuas.

<sup>24</sup> Huan ijcón in tetajtzin tzajtzic huan quilij ijcuín:

—Nitacuautamatic ya, huan xinechonpalehui cuac amo mohuan niyectacuautamatis.

<sup>25</sup> Huan queman Jesús quinitac in tagayot mohualtojtpehuayaj, ijcuacón Yejuatzin quichicaucanahuatij in amocuali ejecat ijcuín:

—Tejua in amocuali ejecat ten quichihua ma amo tajtoa huan ma amo tacaqui in telpoch, Nejuatzin nimitzilía, xiquisa itech nijín telpoch huan amo ocsepa xicalaquiti itech oc.

<sup>26</sup> Ijcuacón in amocuali ejecat tzajtzic huan quiteltzetzeloj in telpoch huan quisac. Huan in telpoch mocahuac queme miquet huan miacque quijtoayaj ijcuín:

—Miyic ya in telpoch.

<sup>27</sup> Pero Jesús quimaquitzquij huan quipalehuic huan moquetzac in telpoch.

<sup>28</sup> Huan de ompa Jesús calayic nichan huan imomachtijcahuan ichtaca quitajtolti-jque ijcuín:

—¿Queyé tejuan amo tihuelque ticalanquixtijque ne amocuali ejecat?

<sup>29</sup> Huan Jesús quinnanquiliij ijcuín:

—Nijín taman amocuali ejecat sayó se quicalanquixtía ica ne tatautlis ihuan Dios huan ica ne sahuialis.

**Nican Jesús Temaquixtijque quinnejmachtij  
imomachtijcahuan ica ojpa que ejcotoc imiquilis**

*(Mt. 17.22-23; Lc. 9.43-45)*

<sup>30</sup> Huan cuac quisque de ne talme, ijcuacón Jesús ihuan imomachtijcahuan yajque nejnentinemiayaj Galileajcopaca. Huan Jesús amo quinequía ma aca quimatisquía can Yejuatzin yetosquía. <sup>31</sup> Huan Jesús quinequía quinmachtis imomachtijcahuan ninseltij. Huan Jesús quinilij imomachtijcahuan ijcuín:

—Nejuatzin ni Yectagatzin huan nechtemactisque inmaco in tagayot huan nechmictisque. Huan ipan eyi tonal satepan de nimictosquía, nipanquisas niyoltoc itzalan in ánimajme.

<sup>32</sup> Huan yejuan imomachtijcahuan amo cajsicamatiayaj nijín tanojnotzalis huan quimohuiliayaj para quitajtoltsique.

**Nican tajtoa de queniu Jesús Temaquixtijque quinmachtij  
imomachtijcahuan de aconi yesqui in cachi hueyi tayecanque**

*(Mt. 18.1-5; Lc. 9.46-48)*

<sup>33</sup> Huan ejcocque itech pueblo de Capernaum huan cuac yetoyaj calijtic, ijcuacón Jesús quintajtoltij imomachtijcahuan ijcuín:

—¿Tonica nanmotajtoltehuiaj tech in ojti?

<sup>34</sup> Huan ijcón imomachtijcahuan motentamatilijque san, porín tech ojti motajtoltehuijtoyaj ica nijín tamachilis:

—¿Catiyejua den imomachtijcahuan de Jesús yesqui in cachi hueyi tayecanque?

<sup>35</sup> Ijcuacón in Jesús motalij, huan quinnotzac imomachtijcahuan huan quinilij ijcuín:

—Tacán acsá quinequi mochihuas tayecanque, ijcuacón yejua ne quipía de mochihuas tacuitapanenque de nochin, huan tetaquehual de nochin.

<sup>36</sup> Huan Jesús quimaquitzquij se oquichpilconet, huan quitelij intzalan imomachtijcahuan, huan quinapaloj in conet huan quinilij imomachtijcahuan ijcuín:

<sup>37</sup>—Huan como acsá quiselísquía se conet queme nijín, ten quipía ne yec tacuautamatis tech notocay, ijcuacón yejua ne no nechselis nejua. Huan como acsá nechselía Nejuatzin, amo nejua san quiselía. Ta, no quiselía Totajtzin Dios naquen nechualtitanic.

**Nican Jesús Temaquixtijque quinmachtij in tacaquini de naquen amo techixnamiquí, yejua ne techpalehuía**

*(Lc. 9.49-50; Mt. 10.42)*

<sup>38</sup> Huan Juan quilij Jesús ijcuín:

—Tamachtijque, tiquitacque se tagat quincalanquixtij in amocuali ejecame ica in chicahualis de motocay, pero amo pohúa tohuan. Huan tictacahualtijque ma amo ijcón quichihuas, porín amo pohúa tohuan.

<sup>39</sup> Huan Jesús quinanquilij ijcuín:

—Amo xictacahualtican, porín amo ongac acsá ten hueli quichihuas se mohuis-cachihualis ica in chicahualis de notocay, huan de ompa huelis nechtelijitos. <sup>40</sup> Porín naquen amo techtahuelita, yejua ne techpalehuía. <sup>41</sup> Huan como acsá namechmac-tisquía tzictzin at porín quitasojta notocay, oso como acsá namechpalehuisquía sayó porín namejuan nanpohuij ihuan Cristo Temaquixtijque, ijcuacón de melau ten namechilía que ne tagat quiyecselis ne tetayocolil de Dios.

**Nican Jesús Temaquixtijque quinmachtij de se tagat ten quitepotamía ocsé tagat tech in tajtacol**

*(Mt. 18.6-9; Lc. 17.1-2)*

<sup>42</sup> Huan como acsame quitepotamíaj tech in tajtacol se de nijín conetzitzin ten no-huan tacuautamatij, ijcuacón cachi cuali para yejuan ma se quinquechpilohuili se hueyi tet de ica tacuechoa, huan ma se quintamota aijtíc in taca ihuan in tet. <sup>43</sup> Huan tacán momay mitztepotamía tech in tajtacol, ijcuacón xicotona. Porín cachi cuali ticalaquís tech in yec nemilis timacotoltic, huan que ticpiasquía ome momahuan, huan tiyás mictan campa tatzacuilitis, huan campa ne tit ten amo queman hueli sehuis. <sup>44</sup> Porín ompa in miqueocuillime tacuajtocque huan amo miqij huan in tit amo queman sehuis. <sup>45</sup> Huan tacán mometz mitztepotamía tech in tajtacol, ijcuacón xicotona. Cachi cuali ticalaquís tech in yec nemilis timetzcotoltic, huan que ticpiasquía ome mometzuan, huan tiyás mictan campa tatzacuilitis, huan campa in tit amo hueli sehuis. <sup>46</sup> Porín ompa in miqueocuillime tacuajtocque huan amo miqij, huan ne tit amo queman sehuis. <sup>47</sup> Huan tacán moixtololo mitztepotamía tech in tajtacol, ijcuacón xiquixti. Porín cachi cuali ticalaquís ca se moixtololo campa Dios momasoutos ica ichicahualis huan que ticpiasquía ome moixtololohuan huan tiyás mictan campa tatzacuilitis. <sup>48</sup> Porín ompa in miqueocuillime tacuajtocque huan amo miqij, huan in tit amo queman sehuis. <sup>49</sup> Huan tinochin Dios techyolchipahuas ica tit. Huan nochi nemactil ten ticuicaj iixpantzinco Dios, yejua ne Yejuatzin quichipahuas ica istat. <sup>50</sup> Semi cuali in istat; pero tacán in istat quipoloa nipoyeca, ijcuacón, ¿quenín huelis se quitatequiutis ocsepa? Xicpiacan ne yolchipahualis itech namejuan, queme istat tachipahuac; huan xicpiacan ne yolsehuilis se huan ocsé.

**Nican tajtoa de queniu Jesús Temaquixtijque quinnextilij in tacaquini de ne sihuacacahualis huan de ne tagacacahualis**

(Mt. 19.1-12; Lc. 16.18)

**10** Moquetzteu de ompa huan yajqui Jesús Judeajcopaca huan analpa den hueyíat de monotza Jordán. Huan nochi in pueblojuani mosentilijque campa Yejuatzin, huan ocsepa pehuac Jesús quinnextilía queme ipa. <sup>2</sup> Ijcuacón motoquijque in fariseos campa Yejuatzin huan quitajtoltijque para ijcón huelis quiejecosque nitanemililis de Jesús. Huan yejuan quitajtanilijque Jesús ijcuín:

—¿Cox quitecahuilfa itanahuatil de Moisés de que se tagat ma mosihuacahua?

<sup>3</sup> Huan Jesús quinnanquilij ijcuín:

—¿Toni namechnajnahuatij ya in Moisés?

<sup>4</sup> Ijcuacón yejuan quinanquilijque ijcuín:

—Moisés quitecahuilij ma se quimacas se isihuau se tajcuilolamat de ne sihuacacahualis para ijcón mosihuacahuasque.

<sup>5</sup> Huan Jesús quinilij ijcuín:

—Moisés namechmacac ne tanahuatil porín namejuan semi nanyolpipicticque de namotamachilis huan amo nanquitacamatinemij Dios Itajtoltzin. <sup>6</sup> Pero cuac Dios quichijchihuac in talticpac huan in eluiyac, ijcuacón Yejuatzin quinchijchihuac ome taman, tagat huan in sihuat. <sup>7</sup> Ica ya nojón se tagat quincahuas nitajtzin huan inana-jtzin huan mosentilis ihuan isihuau. <sup>8</sup> Huan in ome mocahuaj sansé san; huan ijcón amo omen oc yesque. Ta, sayó se. <sup>9</sup> Ica nojón in tagat huan sihuat ten Dios quinsentilij namicuani ya, yejuan nojonques ma amo se tagat quinxelos oc.

<sup>10</sup> Huan cuac ocsepa yetoyaj calijtic, ijcuacón imomachtijcahuan quitajtoltijque Jesús de ne tanojnotzalis de namicuani. <sup>11</sup> Huan Jesús quinilij ijcuín:

—Tacán se tagat mosihuacahuas huan quimactis se amat tenica ixnesis que mosesecocauque ya, huan de ompa monamictiti ocsepa, ne tagat motajtacolmacas de suapapatalis ica ne achto sihuat. <sup>12</sup> Huan tacán se tesihuau quicahuas nyoquich huan quimactis se amat de ne cajcahualis, huan de ompa monamictiti ocsepa, ijcuacón ne tesihuat motajtacolmacas de tagapapatalis ica ne achto iyoquich porín poutoc oc ihuan ne itayecancayoquich.

**Nican tajtoa de que Jesús Temaquixtijque quintiochihuac in coneme**

(Mt. 19.13-15; Lc. 18.15-17)

<sup>13</sup> Huan cualcuiliayaj campa Jesús sequin coneme para ma Jesús quintiochihuas huan para ma quincuumapacho. Huan imomachtijcahuan peuque quintacahuaitayaj neques ten quintenextiliayaj ninconehuan iixpan in Jesús. <sup>14</sup> Huan quemán quitac Jesús que quintajtzacuiliayaj in coneme, ijcuacón cualanic Yejuatzin huan quinilij imomachtijcahuan ijcuín:

—Xiquincahuacan coneme ma hualacan nohuan huan amo xiquintacahuaitican. Huan no namechilía que nochi naquen motemacas nohuan ma niquinyolyecana, ijcón queme ne coneme, yejuan nojonques Dios quinyolyecantiyás ica ihueyichicahualis. <sup>15</sup> Huan de yec melau ten namechilía: Semi monequi ximochihuacan queme nijín coneme ten motemactijque nomaco. Huan tacán acsá amo motemactía imaco Yejuatzin queme se conetzin, ijcuacón Dios amo quiyolyecantiyás ne tagat ica ihueyichicahualis.

<sup>16</sup> Huan Jesús quinmaquitzquij in coneme huan quinnapaloj huan quincuamajpachoj huan ijcón quintiochihuac.

**Nican tajtoa de quenín Jesús Temaquixtijque quinojnotza se telpocat rico**

*(Mt. 19.16-30; Lc. 18.18-30)*

<sup>17</sup> Huan moojquetzac Jesús huan yaya tech se ojti huan niman hual motaloj se tagat huan motancuaquetzaco iixpantzinco Jesús huan quitajtoltij ijcuín:

—Tejuatzin, tioncualitamachtijque, ¿toni monequi nicchihuas para nicipías ne yec nemilis ten amo queman tamis?

<sup>18</sup> Huan Jesús quinilij ijcuín:

—¿Queyé tinechnotza que niyolcuali? Porín xicmatique amo ongac aca ocsé oc yolcuali. Ta, sayó se, huan Yejuatzin ya nijín Totajtzin Dios. <sup>19</sup> Huan tejua ticmati in tanahuatilme de Dios: “Amo xisihuapapatacan; amo xitemictican; amo xitachtequican; amo xitecajayahuacan; amo xiteili ten xolopijyot. Xiquinmohuiscapohuacan motatajtzin huan monanajtzin”.

<sup>20</sup> Huan ijcón in telpocat rico tananquilij ijcuín:

—Tamachtijque, nochi nijín nictacamatihuitz desde cuac nipili oc nicatca huan hasta axcan.

<sup>21</sup> Huan Jesús quisenitac in telpocat huan quiyolicnelij porín quitasojtac huan quilij ijcuín:

—Pero se taman mitzpoloa, huan yejua nijín monequi xicchihua: Monequi xiyó xicnamacati nochi ten ticpía huan xiquinxejxelo huili aquen amo teyi quipía. Huan ijcón ticpías se hueyi paquilis huan yec yetolis queme se tetayocolil ihuan Dios nepa eluiyactzinco. Huan de ompa xihuiqui nohuan huan xinechtoctili huan xinechtacamatinemi.

<sup>22</sup> Huan queman in telpocat rico quicayic nijín tajtolme, ijcuación niman moyolcocoj huan yajqui motequipachojti ya porín quiapiaya semi mías ricojyot nican talticpac.

<sup>23</sup> Huan Jesús tatachíac nohuiyan huan quinilij imomachtijcahuan ijcuín:

—Semi ohui para se tagat ten quipía ne hueyi ricojyot ma motemactis inahuactzinco Dios para que Yejuatzin quiyolyecantiyás ica ihueyichichualis.

<sup>24</sup> Ijcuación imomachtijcahuan quimoucacacque itajtoluan. Huan Jesús ocsepa pehuac quinilía ijcuín:

—Notelpocahuan, semi ohui para in tagayot ma motemactican inahuactzinco Dios para que Yejuatzin ma quinyolyecantiyás, cuac tacuautamatij oc itech ninricojojo.

<sup>25</sup> Amo huelis nalpanos se hueyi tapial ten monotza camello campa coyocit se acoxa. Huan amo no huelis motemactiyás se rico inahuactzinco Dios para que ma Yejuatzin quiyolyecantiyás ica ihueyichichualis, como yejua tacuautamatini om itech niricojojo.

<sup>26</sup> Huan imomachtijcahuan cachi quimoucacacque huan motajtoltiayaj yejuan se huan ocsé ijcuín:

—¿Aconi, pues, huelis maquisas de nitajtacoluan?

<sup>27</sup> Huan Jesús quisenitac huan quinilij ijcuín:

—In taca amo huelis momaquixtis de nitajtacoluan. Ta, Dios cuali hueli quinquixtis in tagayot, porín Totajtzin Dios nochi huelis quichihuas.

<sup>28</sup> Huan Pedro pehuac quinojnotzac Jesús ijcuín:



—Xiconita, Tejuatzin, tejuan ticauque ya nochi ten ticpiyaj huan timitztoctilíaj para timitztacamatinemisque.

<sup>29</sup> Huan Jesús tananquilij ijcuín:

—Yec melau ten mitzilíá, cuali nanquichiutocque de nanquicahuaj namocaluan huan namoicnihuan, huan namosuaicnihuan, huan namonanajuan, huan namotatajuan, huan namoconehuan, huan namotaluan. Pero nanquicahuaj nochi nijín porín nanquiyolnejnequi que Dios namechyolyecantiyás ica ihueyichicahualis huan porín nannechyoltasojtaj Nejuatzin. <sup>30</sup> Huan ne naquen Dios quiyolyecantiyás, yejua ne quiselis axcan nican talticpac ocsé macuilpoal de calme, huan icnime huan suaicnime, huan tetatme, huan tepiluan, huan talme, masqui ica tajyohuilis. Huan tech ne tonal ten huitza oc, no quiselis in nemilis ten amo queman tamis. <sup>31</sup> Huan miacque taneltocani ten axcan tayecanani, yejuan nojonques yesque tacuitapanme. Huan miacque taneltocani ten axcan tacuitapanme, yejuan nojonques yesque tayecanani.

**Nican tajtoa de que Jesús Temaquixtíjque  
quitetapohuíj ica expa que ejecotoc imiquilis**

*(Mt. 20.17-19; Lc. 18.31-34)*

<sup>32</sup> Huan yaya Jesús tech in ojti tejcotiaya Jerusaléncopaca. Huan Jesús tayecanaya huan imomachtijahuan quimoucaitacque de nitanextililis huan nochi in tacaquini quimoucatoctiliyaj. Pero ocsepa Jesús quinnotzac ocseco de nojón májtactionome imomachtijahuan huan pehuac quintapohuíá toni inpan ejcosquía. <sup>33</sup> Huan Jesús no quinilij ijcuín:

—Xiquitacan san, titejcotocque Jerusaléncopaca huan ompa Nejuatzin ni Yectatzin nechtemactisque inmaco in tayecanani den tiopixcame judíos huan inmaco in tanextiliani den tanahuatil de Moisés. Huan nechtelchihuasque ma nechmictican huan nechtemactisque imaco in tagayot de amo judíos. <sup>34</sup> Huan moquejquelosque de Nejuatzin huan nechcuetaxisque huan tachijchasque nopan huan nechmictisque. Huan niman itech eyi tonal nipanquisas niyoltoc itzalan in ánimajme.

**Nican tajtoa de queniu Jacobo huan Juan quitajtanielijque  
Jesús Temaquixtíjque tensá cualtagayot**

*(Mt. 20.20-28)*

<sup>35</sup> Huan ijcón Jacobo huan in Juan, yejuan teconehuan de Zebedeo, motoquijque campa Jesús huan quilijque ijcuín:

—Tamachtijque, ticnequij xitechchihuili nochi ten timitztajtaniíaj.

<sup>36</sup> Pero Jesús quintajoltij ijcuín:

—¿Toni nanquinequij ma nicchihuas para namejuan?

<sup>37</sup> Huan yejuan tananquilijque ijcuín:

—Xitechontayocoli in tanahuatil para ma timotalican ne eluiyac campa yectic tachipahuiyan, se de tejuan moyecmacopaca huan in ocsé moopochcopaca.

<sup>38</sup> Huan ijcón Jesús quinilij ocsepa ica nexcuitil ijcuín:

—Namejuan amo nancajsicamatque toni nanquitajtani. ¿Xe huelis namejuan no nanquiselisque ne vaso den cualcuis ne tajyohuilis queme Nejuatzin nicselis? Huan, ¿xe huelis no namejuan nanquiselisque in taahuilis de tajyohuilis ten Nejuatzin niquijyohuis?

<sup>39</sup> Huan yejuan tanaquilijque ijcuín:

—Quema, tihuelisque.

Huan ocsepa Jesús quinilij ijcuín:

—De yec melau ten namechilía, ijcón queme mochihuas ne tajyohuilis ten Nejuatzin nitajyohuis, namejuan no nantajyohuisque. Huan in taahuilis de tajyohuilis ten Nejuatzin nicseles, namejuan no nanquiselisque. <sup>40</sup> Pero amo nicpía in tanahuatil para namechtayocolis que tejua Jacobo timotalis noyecmacopaca huan tejua Juan timotalis noopochcopaca. Ta, sayó Notajtzin Dios quinmactis ne tanahuatil para naquen Dios quinijitac ya.

<sup>41</sup> Huan cuac quicacque in ocsequin májtacti imomachtijcahuan nijín tajtolme, ijcuación peuque mocualantijque ihuan Jacobo huan Juan. <sup>42</sup> Huan Jesús ocsepa quinnotzac huan quinilij ijcuín:

—Queme nanquimatij, que in tayecanani de tataman pueblojme mohueyimatij huan mopohuaj hueyi chihuanime tech ne pueblojme, huan quinmachililtij ninchicahualis itech ninpueblojuan. <sup>43</sup> Pero ma amo ijcón yesqui namohuan. Ta, naquen quinequis mochihuas tayecanque namohuan, yejua ne ma mochihua queme se tetaquehual de nochin. <sup>44</sup> Huan tacán acsá de namejuan quinequis tayecana, ijcuación yejua ne ma mochihua queme se tetequitilijque de nochin. <sup>45</sup> Porín Nejuatzin ni Yectagatzin amo nihuala para ma acsame nechtequitilican. Ta, nihuala sayó para ma nitetequitilis, huan para ma nictemacas nonemilis para quixtahuas in tajtacol huan para ijcón niquinmaquixtis míac tagayot.

### **Nican tajtoa de queniu Jesús Temaquixtijque quipajtij ne tagat ixpojpyot Bartimeo**

*(Mt. 20.29-34; Lc. 18.35-43)*

<sup>46</sup> Huan ajsicque tech in pueblo Jericó huan quisque de Jericó Jesús huan imomachtijcahuan huan ocsequin míac tagayot. Huan se tagat ixpojpyot monotzaya Bartimeo, iconeu Timeo, tocotziutoya ojteno motaehuiaya. <sup>47</sup> Huan cuac Bartimeo quicayic que ejcotihualaya Jesús de Nazaret, ijcuación pehuac tzajtzi huan quijtoj ijcuín:

—Jesús, tion Temaquixticatzin, tion Teconetzin de rey David, xinechonyolicneli.

<sup>48</sup> Pero míacque quitacahualtijque Bartimeo para ma tamatisquía; pero in Bartimeo cachi oc tzajtziá ijcuín:

—Tejuatzin, tion Totemaquixtijcatzin, tion Teconetzin de rey David, xinechonyolicneli.

<sup>49</sup> Huan ijcón Jesús moquetzac huan quijtoj ijquín:

—Xicnotza ne naquen nechtzajtzilía.

Huan quinotzque ne tagat ten amo tachiaya huan quilijque ijcuín:

—Ximoyolchicahua, ximoquetza porín mitznotta Jesús.

<sup>50</sup> Huan Bartimeo quitamotac nitaquen, huan mehuac, huan motaloj huan cajsito in Jesús. <sup>51</sup> Huan Jesús quitajtoltij ijcuín:

—¿Toni ticnequi ma nimitzchiuili?

Huan in Bartimeo quinanquilij ijcuín:

—Tamachtijque, nicnequi ma nitachía.

<sup>52</sup> Huan Jesús quilij ijcuín:

—Huelis tiyás ya, huan tejua tipajtis porín titacautamatic nohuan.

Huan nimantzin Bartimeo tachíac huan quitocetilij Jesús itech ne ojti para quitacamatiyás.

**Nican tajtoa de queniu Jesús Temaquixtijque calaquic  
Jerusalén huan tagayot quimohuistilijtiyajque**

*(Mt. 21.1-11; Lc. 19.28-40; Jn. 12.12-19)*

**11** Huan Jesús ihuan imomachtijcahuan ajsitiyaj Jerusaléncopaca, amo huejca den pueblojme Betfagé huan Betania, huan ixpampa in tepetzin den monotza Olivos. Huan Jesús quinnotzac ome imomachtijcahuan huan quinilij ijcuín:

<sup>2</sup>—Xiyacan tech ne pueblojme ten yetoc nepa sentapalpa huan niman cuac nancalaquitihue, ijcuacán ompa nancajsisque se burrito ilpitoc. Huan ayamo quemanaquén mopantalijtoya ipan. Huan yejua ne xicxotomacan huan xinechualcuilican. <sup>3</sup>Huan tacán acsá tensá namechilisquía, “¿Queye ijcón nanquichihuj?”, ijcuacán xicnanquilican ijcuín: “In Totecotzin quimonequiltía quitatequitis”, huan ijcón niman namechahuilisque in burrito.

<sup>4</sup>Huan ijcón in omen imomachtijcahuan yajque huan cajsicque in burrito ilpitoya caltteno campa ojti patahuac huan quitojtonque. <sup>5</sup>Huan senme den ompa yetoyaj quinilij ijcuín:

—¿Toni nanquichiutocque? ¿Queyé nanquitojtomaj ne burrito?

<sup>6</sup>Huan ijcón imomachtijcahuan quijtojque ijcón queme Jesús quinnahuatijca ya. Huan ijcón quincahuilijque ma cuiyacan in burrito. <sup>7</sup>Huan cualcuilijque Jesús in burrito huan quipanpejpechtijque ca ninayahuan huan Jesús mopantalij tech in burrito.

<sup>8</sup>Huan miacque tagayot quisohuayaj tech in ojti nintilmajuan huan ocsequin quitequiayaj cuoume nimayo huan quinsohuayaj talixco campa yaya Jesús. <sup>9</sup>Huan in tagayot yaya quiyecanayaj Jesús huan ocsequin quitojtocatiyaj Jesús huan nochin moyoluelitayaj huan tzajtziatayaj huan quijtoayaj ijcuín:

—¡Hosana, timitzonueyichihuj Tejuatzin tion Tatiochihual, huan tihualajtoc itencopa Totajtzin Dios! <sup>10</sup>Tion Tatiochihual Tejuatzin ten tionejcotihuitz ya porín ticonualcui ne chicahualis de Totajtzin rey David. Ticueyichihuj Totajtzin Dios ten yetica ne eluiyactzinco.

<sup>11</sup>Huan ijcón calayic Jesús tech ne pueblo Jerusalén huan niman calayic tech in tiopan de judíos. Huan ompa Jesús tatachíac nochi ten ongaya tiopanijtic. Huan queme niman tayohuatiaya ya, ijcuacán yajqui pueblo de Betania ihuan in majtactiomomen imomachtijcahuan.

**Nican tajtoa de queniu Jesús Temaquixtijque quitelechihuac in  
higos cuohuit ten amo quitemaca itaquilo**

*(Mt. 21.18-19)*

<sup>12</sup>Huan imostica quemanaquisque Jesús de ne Betania ihuan imomachtijcahuan, ijcuacán Jesús mayanac. <sup>13</sup>Huan quitac huejca se higoscuohuit cualtzin maxihuiyoytoya. Huan quitato quiyolnemiliaya cox quipiasquía ihigos itaquilot. Pero quemanaajsic, ijcuacán amo teyi ongaya. Ta, sayó xihuit san, porín amo catca tiempo quemana mochihua in higoscuohuit. <sup>14</sup>Huan ijcón Jesús quilij in higoscuohuit:

—Ma amo quemanaquén quicuas de motaquilo.

Huan quicacque imomachtijcahuan den nitajtolis.

**Nican tajtoa de queniu Jesús Temaquixtijque  
quichijchipahuac in cachi hueyi tiopan de judíos**

*(Mt. 21.12-17; Lc. 19.45-48; Jn. 2.13-22)*

<sup>15</sup> Ejcocque campa pueblo Jerusalén huan calayic Jesús ihuan imomachtijcahuan ne tiopanijtíc huan pehuac quincalaquixtía nochi in tanamacani huan in tacohuani ten ompa yetoyaj tiopanijtíc. Huan quinixcuepac mesajme den tominpatani huan quinixcuepac sillajme ten naquen quinnamacaj ya in totome palomas. <sup>16</sup> Huan Jesús quintacahualtiaya ma amo acsame panoanij ne tiopanijtíc como cuicayaj conme. <sup>17</sup> Huan Jesús quinmachiaya huan quiniliaya ijcuín:

—¿Xe amo nanquimatij que tajcuiliutoc ya tech in Tajcuilolamatzin de Dios: “Nochan quitocaytisque se cali de ne tatautilis ihuan Dios para nochi in talticpacuani de nochi semanahuac”? Huan namejuan nanquichiuque nochan majyá se cali campa calyetocque in tachtequini.

<sup>18</sup> Huan quicacque Jesús in tanextiliani den tanahuatil de Moisés huan no in tayecanani den tiopixcame judíos. Huan yejuan moixejecoltiayaj huan quitemo-huayaj quenín huelis para quimictisquía Jesús. Pero ne tayecanani quiyolmohuil-iayaj de ne ichicahualis de Jesús porín quimatque ya que in pueblojuani quimou-caitayaj Jesús de itanahuatil. <sup>19</sup> Huan queman tapoyahuic ya, ijcuación Jesús quisac de ne Jerusalén.

**Nican tajtoa de que ne higoscuhuit tatechihual pehuac matepehú**

*(Mt. 21.20-22)*

<sup>20</sup> Huan queman ne cualcampa, ijcuación panocque ocsepa huan imomachtijc-ahuan quitacque ne higoscuhuit de que nochi tami huayic ya hasta inaluyo.

<sup>21</sup> Huan ijcón in Pedro ocsepa quelnamic toni mochihuac huan quilij Jesús ijcuín:

—Tamachtijque, xiconita ne higoscuhuit ten yalao ticontelchihuac, huan axcan tami huayic ya.

<sup>22</sup> Huan Jesús tananquilij ijcuín:

—Xicpiacan hueyi tacuautamatilis ihuan Dios. <sup>23</sup> Porín de yec melau ten namechilía, tacán acsá quiqtosquía que ne tepet ma mijcuani huan ma motamota aijtíc, huan como amo sayó quiqejquelcaquis tech iyolijtíc, ta, quiyecneltocas que mochihuas nochi ten quiqtos, ijcuación quipía de que mochihuas nochi ten quiqtosquía. <sup>24</sup> Ica ya nojón no namechilía: Nochi ten nanquitajtanisque ica netatautil, xicyecneltocacan que melau nanquiselijque ya, huan ijcón Dios namechmactis.

<sup>25</sup> Huan queman namejuan nanmotatatautilisque ihuan Dios, ijcuación ximotapojpoluican achtopa como namejuan namechnexicolíaj ihuan acsame para ma Totajtín Dios ten yetica nepa eluiyactzinco ma namechtapojpolui namotajtacoluan.

<sup>26</sup> Porín tacán namejuan amo nanmotapojpoluisque ihuan acsame, ijcuación Namotajtín ten yetica ne eluiyactzinco amo no namechtapojpoluis namotajtacoluan.

**Nican tajtoa de queniu in tayecanani judíos quitajtanilijque  
Jesús Temaquixtijque de aconi itanahuatil den quipía**

*(Mt. 21.23-27; Lc. 20.1-8)*

<sup>27</sup> Huan ijcón Jesús ihuan imomachtijcahuan yajque ocsepa Jerusalén huan nentoya Jesús tiopan caltenojcopa. Huan motoquijque campa Jesús in tayecanani

tiopixcame judíos ihuan in tanextiliani den tanahuatil de Moisés huan in huehuentzitzin den pueblojuani. <sup>28</sup> Huan yejuan quitajtanilijque Jesús ijcuín:

—¿Toni tanahuatil ticualcui para ticchihuas nochi nijín chihualisme? Huan, ¿aconi mitzmactij ya ne tanahuatil para ticchihuas nijín ten ticchiutinemi?

<sup>29</sup> Huan Jesús quinanquilij ijcuín:

—Nejua no namechtajtoltis se matájtanti. Huan tacán nannechnanquilíaj, ijcuacón nejua no namechilis ica aconi itanahuatil nicchihua nijín ten nicchiutoc.

<sup>30</sup> Huan Jesús quinilij ijcuín:

—Ne taahuilis ten Juan quichihuaya, ¿aconi quinahuatij in Juan ma taahuijtinemi? ¿Xe Dios quinahuatij Juan? Oso ¿xe taca san quititanque Juan? Xinechnanquilican.

<sup>31</sup> Huan ijcón yejuan moixejecoltoyaj se huan ocsé huan quiytoayaj ijcuín:

—Tacán tiquilíaj que Dios quinahuatij Juan ma taahuijtinemi, ijcuacón yejuan quitos: “¿Queye amo nanquineltoquilijque?” <sup>32</sup> Huan tacán tiquijtoaj que in tagayot san quinahuatijque Juan ma taahuijtinemi, ijcuacón amo no cualtías.

Huan amo quíneque ijcón quiqtosque porín quinmohuiliayaj in pueblojuani judíos huan nochi pueblojuani quipouque Juan que se yec tanahuatijque de Dios.

<sup>33</sup> Huan ijcón quinanquilijque Jesús ijcuín:

—Yec melau amo ticmatij.

Huan Jesús no quinnanquilij ijcuín:

—Huan nejua amo no namechiliti de aconi itanahuatil tenica nicchihua nijín tanextililisme.

### **Nican Jesús Temaquixtijque quinmactij in tacaquini de ne tequitini ten amo yolcualime**

*(Mt. 21.33-46; Lc. 20.9-19)*

**12** Huan ijcón pehuac Jesús quinmactiaya in tacaquini ica nexcuitilme huan quiniliaya ijcuín:

—Se tagat quitocac sequi uvas tactzon tech ne imila huan quichihuac se colal. Huan tachcuac se tayohual campa quipatzcas in uvas taquilot. Huan no quichihuac se hueyi tepamit para huelis quiapanitas ne uvas huan tajpías. Huan cachi satepan in patrón quitepialtijteu ica renta senme de nijín tequitini. Huan yejua in patrón yajqui huejca paxaloto itech ocsé país. <sup>2</sup> Huan cuac yocsic ya in uvastaquilot, ijcuacón in patrón cualtitanic se taquehual campa tequitini yetoyaj para ma yejua quiselisquía uvastaquilot ten mochihuac ya. <sup>3</sup> Pero in tequitini quiquitizquijque in taquehual huan quimajmagacque huan quiehualtijque yojqui. <sup>4</sup> Huan ijcón in patrón ocsepa quinualtitanilij ocsé taquehual. Huan in tequitini ocsé viaje quimagacque in taquehual ica tet huan quicuajcocojque huan no quiyocolijque. <sup>5</sup> Huan in patrón ocsepa cualtitanic ocsé taquehual huan nijín hasta quimictijque. Huan cuac in patrón quinualtitanilij ocsequin taquehualme, ijcuacón nijín tequitini quintaluitecque ne taquehualme huan sequin no quinmictijque.

<sup>6</sup> Huan in patrón quiapiaya se iyojtzin iconeu tasojtzin huan satepan quihualtitanilij no. Porín in patrón quinemilij que achá nijín iconetzin, cachi quitasojtasquíaj.

<sup>7</sup> Huan ijcón ne tequitini moixejecoltijque yejuan san ijcuín: “Yejua nijín quiselis nochi in tatoc ten pohui itatcopaca. Cachi cuali ximoyejyetalican ma ticmictican para tejuan timocahuasque nijín uvascuouta ten niaxca nitat”. <sup>8</sup> Huan ijcón quiq-

uitzquijque ne iconetzin huan quimictijque huan quicalantamotque calampa de ne uvascuouta.

<sup>9</sup> Huan ijcón Jesús quintajtaniij in tacaquini ijcuín:

—¿Toni quinchihuilis ne patrón in tequitini de ne uvascuouta?

Ijcuación yejuan quinanquilijque ijcuín:

—Pues in patrón hualas huan quintamiquiu nochi in tequitini huan quincahuilis osequin tequitini ne iuvascuouta.

<sup>10</sup> Huan Jesús no quintajtoitij ijcuín:

—¿Xe amo queman nanquileerojqque ten tajcuiliutoc tech in Tajcuilolamatzin de Dios? Campa quijsa ijcuín:

In tet ten quimajpeuque in tepanchihuani, yejua nijín mochihuaco tepanchicahualoni den tepamit.

<sup>11</sup> Huan Totajtzin Dios quichihuac nijín tequit;

huan para tejuan melau se taman semi cualtzin ticmoucaitacque.

<sup>12</sup> Huan ijcón in tayecanani judíos mocualantijque huan quinecque quiquitzquisque Jesús porín cajsicamatque que Jesús quiniytohuiliaya ica ne nexcuitil, que yejuan in tequitini huan Jesús in yojtzin conetzin. Huan ijcón tayecanani quicaucque Jesús huan yajque porín quiyolmohuiliayaj in tagayot judíos, porín in tagayot judíos quipouque Jesús queme tanahuatijque de Dios.

**Nican quitajtaniijque Jesús Temaquixtijque cox monequi ma taxtahuacan impuestos, oso amo**

*(Mt. 22.15-22; Lc. 20.20-26)*

<sup>13</sup> Huan quinaltitanilijque sequin tayecanani campa yetoya Jesús huan sequin ten pohuáj ihuan rey Herodes para quicaquilisquía tensá quijsa Jesús ten amo cuali para ica quiteluilisque de tajtacol. <sup>14</sup> Huan in tayecanani motoquijque campa Jesús huan quilijque ijcuín:

—Tamachtijque, ticmatij que Tejuatzin titajtoa ica nochi ten melau huan amo tiquinyolmohuilía ten quinemilfaj in tayecanani nión ten ninchihualis. Ta, sayó titeyecnextilía ica de melau ne ojtzin de Dios. Xitechonili: ¿Xe Dios quimonequiltía ma titaxtahuacan impuestos in rey César, oso amo? ¿Xe monequi tictemacasque impuestos, oso ma amo?

<sup>15</sup> Huan ijcón in Jesús quixmatic que tacajcayahuaj san ne tayecanani huan quinilij ijcuín:

—¿Queyé nanquinequij nechichtacahuisque ica nijín tanemililis? Xinechualcuilican se tomin para ma niquita.

<sup>16</sup> Huan yejuan cualcuilijque se tomin huan Jesús quinilij ijcuín:

—¿Aconi nijín ixayac ten ixnesi nican? Huan, ¿aconi nijín tocy ten ijcuiliutoc?

Huan yejuan tananquilijque ijcuín:

—Yejua ya in rey César.

<sup>17</sup> Huan Jesús quinnanquilij ijcuín:

—Ximactilican César ten quinamiqui ximactican César, huan ximactican Dios ten quinamiqui ximactican Dios.

Huan ijcón in tayecanani quimoucacque de nitananquililis de Yejuatzin.

**Nican tajtoa de que in saduceos quitajtanielijque Jesús Temaquixtijque de quenín panquisas yoltoc itzalan in ánimajme in talticpacuani**

*(Mt. 22.23-33; Lc. 20.27-40)*

<sup>18</sup> Huan ijcón motoquijque campa Jesús in taca saduceos, yejuan tamachilejque ten quineltocaj que amo aca panquisas yoltoc itzalan in ánimajme. Huan yejuan quitajoltijque Jesús ijcuín:

<sup>19</sup> —Tamachtijque, Moisés techijcuilohuilij ijcuín: “Tacán se tagat miquisquía huan quicahuasquía nisihuau huan amo quinpiasquíaj coneme, ijcuación ma monamicti icniú tagat den miquet ihuan ne cahual sihuat. Huan ma quincalcitan coneme ihuan ne sihuacahual para quinpiasque coneme para ne icniutagat ten miquet ya”.

<sup>20</sup> Oncaya chicome icnime. In tayecanque monamictij huan niman miyic huan amo quinpialtij coneme. <sup>21</sup> Huan ica ome teicniú monamictij ihuan ne cahual sihuat. Huan ne tagat no miyic huan amo no quinpiacque coneme. Huan ica eyi teicniú no ijcón mochihuac. <sup>22</sup> Huan ica nochin chicome icnime no ijcón quichiuque. Nochin sejsé monamictijque ihuan ne sihuacahual huan nión senme den yejuan quinpiacque coneme. Huan satapan de nochin no miyic in sihuat. <sup>23</sup> Huan axcan xitechonili, cuac panquisasque yoltocque ne icnime huan ne sihuacahual intzalan in ánimajme, ijcuación, ¿aconi yesqui isihuau senme de nojón chicome? Porín nochi icnime quipouque queme ninsihuau.

<sup>24</sup> Huan ijcón Jesús tananquij ijcuín:

—Namejuan nanmocajcayautocque ica ne nexcuítel porín amo nanquiequixmatij in Tajcuilolamatzin de Dios nión in chichualis de Dios. <sup>25</sup> Cuac panquisasque in taneltocani yoltocque itzalan in ánimajme, ijcuación amo aquen monamictis oc, nión no tanemilijtosque oc de ne namictilis, porín ijcuación nochi in tagayot yesque queme in ángeles, in taquehualme de Dios. <sup>26</sup> Huan cachi oc nejua namechnextilía de que nanpanquisasque yoltocque itzalan den ánimajme. ¿Achá amo queman nanquileerojque tech in Tajcuilolamatzin de Moisés queman Totajtzin Dios quinojnotza Moisés itzalan ne morasta? Huan quij ijcuín: “Nejua ni Dios de mohuejcautetatuan, ni Dios de Abraham, ni Dios de Isaac, huan ni Dios de Jacob”. <sup>27</sup> Huan Totajtzin Dios, Yejuatzin amo in Dios den miqueme. Ta, Yejuatzin in Dios ten naconime yoltocque. Huan ijcón namejuan nanmoyoltapololtíaj porín amo nancajsicamatij nijín.

**Nican quitajtanielijque Jesús Temaquixtijque catiyejua in cachi hueyi tanahuatil de Dios**

*(Mt. 22.34-40)*

<sup>28</sup> Huan motoquij campa Jesús senme den tanextiliani den tanahuatil de Moisés; yejua quincaquilijca in tayecanani quenín motajtoltentehuiayaj ihuan Jesús. Huan nijín tanextilijque quiyecmatoya que Jesús quinnanquijijca in tayecanani semi cuali. Huan ica nojón yejua quitajtanielij Jesús ijcuín:

—Tamachtijque, ¿cатиyejua in tanahuatil cachi hueyi de nochi?

<sup>29</sup> Huan Jesús tananquij ijcuín:

—In cachi hueyi tanahuatil, yejua nijín: “Xicaquican namejuan pueblojuani de Israel, in Totecotzin Yejuatzin Totajtzin Dios, huan Totecotzin Yejuatzin setzin san. <sup>30</sup> Huan xictasojtacan in Tohueyitecotzin to Dios ica nochi namoyolo huan ica nochi namotanejnequilis, huan ica nochi namotanemililis huan ica nochi namochic-

ahualis”. Huan yejua ne in cachi hueyi tanahuatil de Dios. <sup>31</sup> Huan in ica ome tanahuatil quinehuilía ne achtópa tanahuatil huan no quijtoa ijcuín: “Xictasojta mocniu ijcón queme tejua timotasojta”. Amo ongac ocsé tanahuatil cachi hueyi queme nijinque.

<sup>32</sup> Huan ijcón in tanextilijque tananquiliij ijcuín:

—Semi cuali ten tiquijtoa Tamachtijque. Yec melau ten tiquijtoa que ongac sayó setzin san Dios, huan amo ongac ocsé queme Yejuatzin. <sup>33</sup> Huan no cuali ten tiquijtoa que ma tictasojtacan Totajtzin Dios ica nochi tochicahualis huan no ma tictasojtacan tocníu queme timotasojtaj tejuan san. Yejua nijín tanahuatil cachi hueyi huan que nochi ne nemactilme ten titetayocolíaj ma quichijchinocan para quimohuistilisque Dios.

<sup>34</sup> Huan ijcón Jesús quitac que ne tanextilijque tananquiliijca ca cuali tanemilil huan quiliij ijcuín:

—Amo huejca tiyetoc den chichahualispan de Dios de que Yejuatzin ma mitzyolyecana.

Huan ijcón amo aquen moixehuijque oc quitajtoitijque Jesús ica ocsequin matájtanti.

**Nican tajtoa de queniú Jesús Temaquixtijque quintajtanilij in tacaquini de ne Cristo Temaquixtijque, ¿Yejuatzin teconeú de aconí?**

*(Mt. 22.41-46; Lc. 20.41-44)*

<sup>35</sup> Huan Jesús tamachtiaya tech in tiopan de judíos huan quiniliaya in tacaquini ijcuín:

—¿Toni quijtosnequi ne tanextiliani den tanahuatil de Moisés cuac yejuan quijtoaj que in Cristo Temaquixtijque Yejuatzin teconeú de rey David? <sup>36</sup> Porín in mismo rey David tajtoj ica in Yecticatzin Espíritu ijcuín:

Totajtzin Dios quinojnotzaya in Totayecancatzin Totecotzin huan quiliaya ijcuín:

“Ximotali nican noyecmacopaca

huan Nejuatzin nictaliti mometzampa nochi ne naquen mitzonyoltahuelitaj”.

<sup>37</sup> Xicmatican que ne rey David quipohuac ne Cristo Temaquixtijcatzin queme iconeú de David; huan no in rey David quimohuiscañotzaya in Cristo queme itayecancatecotzin.

Huan in tagayot den pueblojuani quiyecaquíaj Jesús ica míac paquilis.

**Nican tajtoa de queniú Jesús Temaquixtijque quinteteluilij ne tayecanani judíos**

*(Mt. 23.1-36; Lc. 11.37-54; 20.45-47)*

<sup>38</sup> Huan Jesús quinnextiliaya ica itamachtilis ijcuín:

—Ximoyecpiacan cuidado den tanextiliani den tanahuatil de Moisés porín yejuan cuelitaj nemisque ica tilma ten cuilantinemij. Huan no cuelitaj cuac nochi in tagayot quintajpaloaj ica míac mohuisyot tech in plaza. <sup>39</sup> Huan no cuelitaj motalisque tech in cachi cualtzin sillias tech in tiopan de judíos. Huan cuelitaj motalisque campa in cachi hueyi chihuanime campa ne tayecanani motatamacaj. <sup>40</sup> Pero ne tanextiliani quincuilíaj inchanuan den sihuacahualme, huan sayó quixtoctíaj ay tatatautíaj sen-teixtano. Huan ica nojón yejuan quiselisque imaco Dios cachi hueyi tatzacuutilis.



**Nican tajtoa de queniu Jesús Temaquixtijque quinmachtij imomachtijcahuan de ne sihuacahual ten tetayocolij nitomin para Dios**

(Lc. 21.1-4)

<sup>41</sup> Huan Jesús tocotziutoya inacastan campa quipantaliayaj in tomin para Dios, huan quiequitztoya cuac nochi in tagayot quipantaliayaj nitomin tech in tomin-pialoni. Huan míac taca ricos quipantaliayaj míac tomin. <sup>42</sup> Pero se sihuacahual ten amo teyi quipiaya, yejua ne quipantaliy ome istac tomin ten valeroaya se centavo. <sup>43</sup> Huan Jesús quinnotzac imomachtijcahuan huan quinilij ijcuín:

—De yec melau ten namechilía, que nijín sihuacahual pobre quipantaliy cachi míac tomin huan que nochi in tagayot quipantaliyque tech in tomin ehualoni. <sup>44</sup> Porín in tagayot quipantaliyque ten quinsobraroyaj huan nijín sihuacahual masqui amo teyi quipiaya, pero yejua quipantaliy nochi nitomin ten niaxca tenica mopalehuisquía.

**Nican Jesús Temaquixtijque quinilij imomachtijcahuan que cuejelos nintiopan de judíos**

(Mt. 24.1-2; Lc. 21.5-6)

**13** Huan cuac quisac Jesús den tiopan de judíos, ijcuacán quitajtaniy Yejuatzin senme den imomachtijcahuan:

—Tamachtijque, xiquita nijín cualtzitzin tepame huan ne cualtzitzin calme ten ihuan se majsitoc.

<sup>2</sup> Huan Jesús quinanquilij ijcuín:

—Nochi ten tiquita ne huejueyin calme, nimitzyequilía que amo teyi mocahuas nión se tet ten ne quinejnepanojque den ma amo huejuelihuisque.

**Nican Jesús Temaquixtijque quinmachtij imomochtijcahuan de ne nescayome cuac in talticpac tajyohuis ya huan cuac ne tacuitapan tonalme**

(Mt. 24.3-28; Lc. 21.7-24; 17.22-24)

<sup>3</sup> Huan ijcón Jesús motalito tech ne tepetzin de ne monotza Olivos den taixpan den cachi hueyi tiopan de judíos sentapalpa. Huan Pedro huan Jacobo huan Juan huan Andrés ichtacatzin quitajtanilijque Jesús ninseltij ijcuín:

<sup>4</sup>—Xitechonili, ¿quemanían mochihuas nijín tamilis den tiopan? Huan, ¿toni nescayome oncas cuac ajsis ne tonal queman mochihuas nochi nijín chihualisme?

<sup>5</sup> Huan Jesús quinanquilij ijcuín:

—Ximoyecpiacan, ma amo aquen namechyolcajayahuas tech namotaneltolcalis.

<sup>6</sup> Porín miacque tacajcayahuani hualasque nechtenchiutinemisque ica notocay huan quijtosque ijcuín: “Najua ya, ni Cristo Temaquixtijque”, huan ijcón quincajayahuasque miacque. <sup>7</sup> Huan cuac nanquicaquisque de ne tehuilis huan míac ne moutil de ne tehuilis, ijcuacán amo ximoyoltapololtican porín ipa monequi ma ijcón mochihuas. Pero ayamo ejcos in tamilis. <sup>8</sup> Porín pehuas moajocuisque pueblojuani huan motehuisque se huan ocsé pueblojuani, huan in tagayot de se país moajocuisque huan motehuisque se huan ocsé tagayot. Huan oncas talolinilis nonohuiyan; huan oncas máyanti huan ne tehuilis. Huan ica nijín pehuati ya ne tajyohuilis.

<sup>9</sup> Huan ximoyecpiacan namejuan san, porín namechtemactisque ihuan tequihuani, huan tech in tiopan de judíos namechuijuitequisque. Huan namechuicasque iixpan

in huejueyin tanahuatiani huan in reyes porín nantacuaumatij nohuan. Huan ijcón namejuan nanmotajtohuisque de notechcacopaca. <sup>10</sup> Huan ipa monequi ma moyahua in cuali Tajtoltzin de Dios nonohuiyan nochi tech senmanahuac, huan de ompa ejcos ya in tamilis. <sup>11</sup> Huan queman namejuan namechuicasque para namechtemactisque ninixpan de ne tequihuani, ijcuacán amo ximohuilican nión xiyoltanemilican quenín nantananguilisque, porín ne nimantzin Dios namechmactis tajtolme tenica nanquijtosque. Huan amo namejuan nantajtosque. Ta, yejua in Yecticatzin Espíritu Yejuatzin tajtos. <sup>12</sup> Huan ijcón se tagat quitemactis ma miquí senme de niicniu; huan se tetat quintemactis niconehuan. Huan no moajocuisque tepiluan para quinmictisque nintatajuan. <sup>13</sup> Huan nochi in tagayot namechpetztahuelitasque porín nantacuaumatij de Nejuatzin notocay. Huan naquen sen tacuaumatis hasta in miqulistempan, yejua ne maquisas.

<sup>14</sup> Huan no Jesús quinilij imomachtijcahuan ijcuín:

—Huan xicajscamatican den tajtoj Daniel, ne huejcautanahuatijque de Dios, que tech ne tonalme nanquitasque que mochihuas ne tetzaucapolihuilis ten quitzojcuilotía itiopan in Dios, campa amo monequi yetosquía. (Huan naquen quileeroa, ma cajscamati.) Huan ijcón naquen yetosque Judeajcopaca, ma niman cholocan ma yacan tepeta. <sup>15</sup> Huan naquen yetoc calcuaco, ma amo temo calijtic nión ma calaqui para quicuis tensá ne calijtic. <sup>16</sup> Huan naquen yetos itequitiyan, ma amo mocuepa oc ma quicuii nitaquen. <sup>17</sup> Huan cachi teicneltiani in sihuame ten cocoxcayetosque ica pilime. Huan no cachi teicneltiani sihuame ten tachijchitijtosque ica coneme tech ne tonalme. <sup>18</sup> Ximotatautilican ihuan Dios para ma amo namechajsis ne tonal de tajyohuilis cuac taseseyas. <sup>19</sup> Porín tech ne tonal mochihuas hueyi tajyohuilis ten amo queman mochihuaya desde cuac tzinpehuac in talticpac ten Dios quichihuac. Huan amo queman mochihuas oc tajyohuilis quemé nijín ten nanquipanosque. <sup>20</sup> Huan como Totajtzin Dios amo quitocotzosquía nojón tonalme den tajyohuilis, ijcuacán amo aquen maquisasquía. Pero Totajtzin Dios quitocotzos in tajyohuilis de ne tonalme porín Dios quintasojta ya itaneltocacahuan naquen Yejuatzin quinijitacay ya ma pohuican ihuantzin.

<sup>21</sup> Huan tacán acsá namechilisquía ijcuín: “Xiquitacan, nican yetoc in Cristo Temaquixtjcatzin”, oso namechilisque: “Xiquitacan nepahuín yetoc in Cristo”, pero amo xicneltoquilian ne tacajcayahuani. <sup>22</sup> Porín moajocuisque miacque tacajcayahuani ten amo yec melau Cristo Temaquixtjcatzin, huan no moajocuisque tacajcayahuani ten amo melau tanahuatiani de Dios. Huan yejuan quichihuasque mías mohuisanexcuilme huan huejueyin chihualisme para que ijcón huelis tecajcayahuasque. Huan achá no quincajcayahuasque hasta in taijitalme de Dios. <sup>23</sup> Huan namejuan xiquitacan, ximoyecpiacan porín nochi nijín namechilij ya achtopa que mochihuas.

**Jesús Temaquixtjque quinmachtij imomachtijcahuan de ne tonal cuac  
Yejuatzin in Yectagatzin mohualuicas nican talticpac**

(Mt. 24.29-35, 42-44; Lc. 21.25-36)

<sup>24</sup> Huan no Jesús quinilij imomachtijcahuan ijcuín:

—Huan ijcón tech nojón tonalme, nimanpa den tajyohuilis, ijcuacán in tonaltzin tayohuayantis huan amo tanextis oc, huan in metzti amo tahuis oc. <sup>25</sup> Huan sitalinme tepehuisque den eluiyac huan in hueyi tayecanani den nemij ne ejeaixco,

yejuan nojonques Dios quintzetzelos. <sup>26</sup> Huan ijcón in tagayot quitasque que Nejuatzin ni Yectagatzin nihualajtos mixtzalan huan nicpías hueyi chichualis huan hueyi tanahuatil. <sup>27</sup> Huan ijcón Dios quinaltitanis iángeles itaquehualuan huan Yejuatzin quinsentilis nochi itajitaluan de nochi senmanahuac, desde tzinehua in talticpac huan in eluiyac hasta ne campa tzintami.

<sup>28</sup> Huan no Jesús quinilij ijcuín:

—Ximomacacan cuenta ica ne nexcuitil den higoscuhuit: Cuac nanquitasque que selic ya in cuohuit huan huelaman maxihuiyojtoc, ijcuacán xicmatican que ejcotoc ya in tonalme de tatotoncayot. <sup>29</sup> Huan ijcón no namejuan, quemán nanquitasque que mochiutoc ya nijín nexcuitilme, ijcuacán xicmatican que amo huejca oc yetoc in ni Namotecotzin. Ta, niyetoc ya caltteno ya para nihualas nican talticpac. <sup>30</sup> Huan yec melau ten namechilfa que nochi in tagayot ten axcan yoltocque ayamo miquisque como amo achto mochihuas nijín nescayome. <sup>31</sup> Huan masqui in eluiyac huan in talticpac tamisque, pero notajtoluan amo quemán tamis.

<sup>32</sup> Huan no Jesús quinilij ijcuín:

—Amo aquen quimatis in tonal de nohualalis nión in momento quemán mohualuicas in Totecotzin Jesucristo. Hasta in ángeles tech in eluiyac, huan Dios Iconetzin amo no quimati. Ta, sayó Totajtzin Dios quimatoc. <sup>33</sup> Ica ya nojón ximoyecpiacan huan xiixpetantocan. Huan ximotatautiltjtocan porín amo nanquimatij ton tonal quemán mohualuicas in Tecotzin Jesucristo.

<sup>34</sup> Huan ijcón Jesús quinilij ica nexcuitil ijcuín:

—Ne tonal cuac mohualuicas in Tecotzin Jesucristo queme yesquía se tagat yajtosquía huejca. Huan achto quitepialtijtehuac nichan, huan quintanajnuatijtehuac nitaquehualuan. Huan quitequimactijtehuac nochi sejsé. Huan quinuhatijtehuac naquen tatapoa ma tajpía tech in cali ijcuín: <sup>35</sup> “Xiixpetantocan porín amo nanquimatij quemán nejuatzin nipatrón de nijín cali niejcos, tacán tapoyauteno, oso tacán tajcoyohuan, oso quemán tzajtzis in piotzin, oso cuac ne tanestihuitz ya, <sup>36</sup> para ma amo santajma niejcos huan namechajsiquiu nancochtocque”.

<sup>37</sup> Huan ten namechilfa namejuan, no niquinilfa nochi ten nohuan yectacuautamatij: Xiixpetantocan.

### Nican tajtoa de queniu moyectencauque in tayecanani de que quiquitzquisque Jesús Temaquixtijque

(Mt. 26.1-5; Lc. 22.1-2; Jn. 11.45-53)

**14** Pero polihuía ome tonal den iluit den tajyohuilis cuac nochi in tagayot judfos quicuasque pan ten amo tamajmahual ica levadura. Huan in tayecanani tiopixcame huan in tanextiliani den tanahuatil den Moisés quitemoayaj ica taca-jcayahualis para quenín quiquitzquisque Jesús queme preso para quimictisque. <sup>2</sup> Huan yejuan quijtojque ijcuín:

—Ma amo tiquitzquican itech nijín iluit para ma amo onca ne cuejmololis itech in pueblojuani.

**Nican tajtoa de queniu se sihuat de ne pueblo de Betania  
quicuaojxilij Jesús Temaquixtijque ica aceite ten semi ajuiyac**

*(Mt. 26.6-13; Jn. 12.1-8)*

<sup>3</sup> Huan Jesús yetoya itech pueblo Betania, campa calyetoya in Simón naquen Jesús quipajtijca ya de ninacayo pajpalanía, huan Jesús tacuajtoya ihuan Simón. Huan huala se sihuat cualcuij se tecomit temitoya ica atzin ten ajuiyac monotza nardo huan semi patiyó. Huan in sihuat quitapanac in tecomit huan quicuaojxilij Jesús.  
<sup>4</sup> Huan sequin ten ompa yetoyaj yolcualanque huan quilijque ijcuín:

—¿Queyé sihuat ticahuiloj nijín atzin ten ajuiyac? <sup>5</sup> Porín cuali ticnamacasquáfaj nijín atzin ica eyi ciento denarios, yesqui queme eyi mil peso, huan tiquinxejxelo-huilisquáfaj in pobres.

Huan ijcón yejuan cajuacque in sihuat.

<sup>6</sup> Huan Jesús quinilij:

—Xicahuacan, ¿queyé nancuejmoloaj in sihuat? Nijín ten yejua nechchihuilij-toc se cuali tachihualis. <sup>7</sup> Nachipa namohuan yetosque naquen amo teyi quipía ten cuasque. Huan quémansa cuac nanquinequij, ijcuacán cuali huelis nanquipale-hisque naquen amo teyi quipía. Pero nejua amo nachipa namohuan niyetos. <sup>8</sup> Huan nijín sihuat quichihua ten hueli, achtopa que nechtalpachosque, yejua nechojxilij ica nijín atzin. <sup>9</sup> Huan de melau de namechilía que campa yesquí tech in senmanahuac momoyahuas in yancuic tanahuatil de Dios ten cualcui temaquixtilis, no motetapohuis ten nijín sihuatzin quichihuac para ma ijcón quielnamiquisque de yejua.

**Nican tajtoa de queniu Judas moyectencahuac de que  
quitemactis Jesús Temaquixtijque inmaco in tayecanani**

*(Mt. 26.14-16; Lc. 22.3-6)*

<sup>10</sup> Huan ijcón in Judas Iscariote, senme den majtactiomome imomachtijcahuan de Jesús, yejua ne yajqui quinojnotzato in tayecanani den tiopixcame para quitemactisquía Jesús inmaco in tayecanani. <sup>11</sup> Huan in tayecanani cuac quicacque, ijcuacán mohuelitacque huan quitenilijque de quimacasque Judas in tomin. Huan ijcón in Judas quitemoaya queniu huelis quitemactisquía Jesús inmaco in tayecanani.

**Nican tajtoa de que Jesús Temaquixtijque  
quinnextiliaya imomachtijcahuan de ne Santa Cena**

*(Mt. 26.17-29; Lc. 22.7-23; Jn. 13.21-30; 1 Co. 11.23-26)*

<sup>12</sup> Huan ajsic ya in achto tonal den iluit cuac quicuaj pan ten amo quipía tamajmahual de levadura, huan no quinemactiliaya huan quimictiyaj se ichcatzin tech ne iluit de tajyohuilis. Huan imomachtijcahuan quilijque Jesús:

—¿Can ticonmonequiltía ma tiyacan ma ticmitzchijchihuilij in tacualis den tajyohuilis iluit?

<sup>13</sup> Huan ijcón in Jesús quintitanic omen de imomachtijcahuan huan quinilij ijcuín:

—Xiyacan tech ne pueblo huan ompa namechnamiquis se tagat quimamajtiu se tzotzocol de at huan yejua ne xictocilican. <sup>14</sup> Huan campa yejua calaquis, ompa xiquilican in patrón den ne cali ijcuín: “In Tamachtijque quijtoj ijcuín: ¿Can yetoc in nepanacal campa nicuas in tacualis den tajyohuilis iluit ninuan nomomachtijc-

ahuan?”<sup>15</sup> Huan ne patrón namechnexilis se hueyi nepan cali ica ome cali den ipa xeliutoc ya. Huan ompa xicyectatalican ompa para tejuan.

<sup>16</sup> Huan ijcón yajque imomachtijcahuan huan calacque tech ne pueblo huan niman quiajsito in tagat queme Yejuatzin quinilijca ya. Huan ijcón quiyectatalijque in tacualis den tajyohuilis iluit.

<sup>17</sup> Huan queman tapoyahuic ya, Jesús huala inuan in majtactionome imomachtijcahuan.<sup>18</sup> Huan cuac nochi motalijque campa in mesa para tacuasque ya, ijcuacán Jesús quinilij ijcuín:

—De yec melau den namechilía que senme de namejuan ten nican nohuan nantacuajtocque, yejua ne nechtemactis inmaco in tayecanani para nechmictisque.

<sup>19</sup> Huan ijcón nochi yejuan peuque motayocoltiayaj huan moixpantiliayaj se huan ocsé:

—¿Xon amo nejua?

Huan ocsé quiytoya ijcuín:

—¿Xe nejua?

<sup>20</sup> Huan Jesús tananquilij ijcuín:

—Yesquí senme den namejuan majtactionomen, aquen pantajaquía tech noplato.

<sup>21</sup> Huan de yec melau de namechilía: Nejuatzin ni Yectagatzin huan niyó nimiquiti ijcón queme tajcuiliutoc de nejua tech in Tajtoltzin de Dios. Huan cachi teicneltijque ne tagat naquen nechtemactis Nejuatzin ni Yectagatzin. Cachi cuali nojón tagat ma amo yolini nican talticpac.

<sup>22</sup> Huan cuac tacuajtoya oc, ijcuacán in Jesús quicuic se pantzin huan quitiochi-huac huan quicojotonac huan quinmactij imomachtijcahuan huan quinilij ijcuín:

—Xicuacan nijín pantzin; yejua ya nijín nonacayo.

<sup>23</sup> Huan de ompa Jesús quicuic in vino huan quitasoicamachilij Dios huan quinmactij imomachtijcahuan. Huan ijcón nochi tayicque de ne tayil.<sup>24</sup> Huan Jesús ocsepa quinili ijcuín:

—Nijín vino, yejua ya noesyoy, huan de ne yejica quitenexilía que timoyecten-cauque ya de que noesyoy mimilahuis huan nimiquis para ijcón maquisasque miacque tagayot de nintajtacoluan.<sup>25</sup> Huan yec melau ten namechilía que amo ocsepa nitayis nijín vino hasta queman ne tonal cuac tisentayisque cuac Totajtzin Dios mosasoutoc namoyolijtic ica ihueyichicahualis para namechyolyecantiyás.

**Nican Jesús Temaquixtijque quitematiltij Pedro que yejua quilis que amo quixmatis Jesús Temaquixtijque**

*(Mt. 26.30-35; Lc. 22.31-34; Jn. 13.36-38)*

<sup>26</sup> Huan queman tamic cantarojque ya de se himno, ijcuacán nochin quisque huan yajque campa tepetzin den monotza Olivos.<sup>27</sup> Huan quinilij Jesús ijcuín:

—Nochi namejuan nanmomoutisque huan nanmoyolxocolisque de Nejuatzin tech nijín tayohuac. Porín ijcón ijcuiliutoc tech in Tajcuilolamatzin de Dios: “Nicojcocos in tapixque huan niichcahuan sejseyajcan yasque”.<sup>28</sup> Huan satepan queman nipanquisas ya niyoltoc intzalan in ánimajme, ijcuacán niyás namechyecantiyás hasta ne Galileajcopaca.

<sup>29</sup> Ijcuacán in Pedro quilij ijcuín:

—Masqui nochi in tagayot moyolxocolisquíaaj, pero nejua amo.

<sup>30</sup> Huan quinanquilij Jesús ijcuín:

—Pero de yec melau nimitzilía, que tejua axcan tech nijín tayohuac achtopa que tzajtzis in piotzin ojpa, tejua titeilis expa que amo tinechixmati.

<sup>31</sup> Ijcuacán in Pedro cachi moyolchicahuaya huan quiytoaya ijcuín:

—Ta, como ijcón monequi, masqui no nimiquisquía mohuan, pero nejua amo que-man niteilis que amo nimitzixmati.

Huan nochi imomachtijcahuan quiytoayaj ijcón.

**Nican tajtoa de queniu Jesús Temaquixtisque motatatautilij  
ihuan Dios campa xocomila de Getsemaní**

*(Mt. 26.36-46; Lc. 22.39-46)*

<sup>32</sup> Huan ejcocque tech ne xocomilajpa campa monotzaya Getsemaní, huan ompa Jesús quinilij imomachtijcahuan ijcuín:

—Ximosehuican nican huan Nejuatzin niyó nimotatautiliti ihuan Dios.

<sup>33</sup> Huan ijcón Jesús quinseuiyac in Pedro, huan Jacobo, huan Juan. Huan de ompa Jesús pehuac motayocoltía huan moyolcocoa ya. <sup>34</sup> Huan Jesús quinilij imomachtijcahuan ijcuín:

—Nimachilía tech noyolo de que nitayocolmiqui porín ejcotoc ya nomiquilis. Namejuan ximocahuacan nican huan xiixpetantocan.

<sup>35</sup> Huan ijcón in Jesús yajqui cachi nepaca huan motanciaquetzac huan motentocato talixco huan motatatautilij inahuac Itajtzin huan quiliaya ijcuín:

—Como ijcón mopaquilis ma pano ma amo nechajsiqui nijín momento de tajyohuilis.

<sup>36</sup> Huan no quiytoj Jesús ijcuín:

—Abba, Notajtzin, nochi huelis Tejuatzin ticonnchihuas. Xiconxelo de Nejuatzin nijín tajyohuilis. Pero amo xiconchihua ten Nejuatzin nicnequi. Ta, ma mochihua ijcón queme Tejuatzin ticomonequiltía.

<sup>37</sup> Huan no ijcón Jesús huala huan quinajsico imomachtijcahuan cochtocque huan Jesús quilij Pedro ijcuín:

—Simón, ¿cox ticochtoc? ¿Xe amo tihueli tiixpetantoc nión se hora? <sup>38</sup> Xiixpetantocan huan ximotatautilican ihuan Dios para ma amo nanuetzisque itech in ohuicayot de que in Satanás namechichtacahuis. De yec melau que namoyolo quinequi quichihuas ten cuali, pero namonacayo cuetautoc porín amo nanquipiáj ne yec tacuautamatilis ihuan Dios huan amo huelis nanquichihuasque ten cuali.

<sup>39</sup> Huan ocsepa Jesús yajqui motatatautilito ihuan Dios ica mismo tajtolme queme ipa quiytojca ya. <sup>40</sup> Huan cuac moquepac Jesús campa imomachtijcahuan ocsepa, ijcuacán quinajsico cojcochtocque imomachtijcahuan porín ninixtololohuan itzatzacuáj ica ne cochilis. Huan amo quimatáj oc imomachtijcahuan quenín quinanquilisque. <sup>41</sup> Huan ica expatica huala Jesús huan quinilij ijcuín:

—Xicochican ya; ximosehuican ya. Porín axcan quema, ejcoc ya in hora den notajyohuilis. Xiquitacan que Nejuatzin ni Yectagatzin nechtemactisque ya inmacopa in taca tajtacolejque para nechmictisque. <sup>42</sup> Ximoquetzacan huan tiyohue, xiquitacan ejcotoc ya, huan motoquijtoc ya naquen nechtemactis inmaco in tayecanani.

**Nican tajtoa de queniu in tayecanani judíos  
quiQuitZQUIjque Jesús TemaquiXtIjque queme preso**

*(Mt. 26.47-56; Lc. 22.47-53; Jn. 18.2-11)*

<sup>43</sup> Huan cuac Jesús tajtojtoya oc, ijcuación huala Judas, senme de ne majtactiomomen imomachtijcahuan huan yejua quinsensualcuía míac tagayot ten cualcuijque machete huan cuohuit. Nochi nijinque hualajque intencopaca in tayecanani tiopixcame huan tanextiliani den tanahuatil de Moisés huan in huehuentzitzin den pueblojuni judíos. <sup>44</sup> Huan Judas naquen quitemactij Jesús, yejua ne ipa teilijca ya quenín quitemactisquía Jesús huan quiijtojca ya ijcuín:

—Naquen nejua nictennamiquis, yejua ne yesqui in Jesús; xiquitzquican huan xicuiyacan xicyectzicocan.

<sup>45</sup> Huan ijcón quichihuac in Judas huan motoquij campa Jesús huan quilij ijcuín:  
—Tamachtijque, Tamachtijque.

Huan ijcón nimantzin Judas quitennamic in Jesús. <sup>46</sup> Huan ijcón in tagayot quimasoluijque Jesús huan quiquitZQUIjque. <sup>47</sup> Huan senme den imomachtijcahuan de Jesús ten yetoya ya ihuan, yejua ne quiquixtij imachete huan quicocoj in taquehual den hueyi tiopixcat huan quicotonac inacas. <sup>48</sup> Huan ijcón Jesús quinilij ijcuín:

—¿Queyé nanualajque para nannechquitZQUIsque queme yesquía se nitachtecque san? <sup>49</sup> Huan mosta mosta Nejuatzin niyetoya namohuan namechmachtia ya tech namotiopan huan amo nannechquitZQUIjque ompa. Huan nochi nijín ijcón mochi huac para ma motamichihuas ten tajcuiliutoc ya tech in Tajcuilolamatzin de Dios.

<sup>50</sup> Huan ijcón nochi imomachtijcahuan quicauteuque Jesús huan cholojque.

**Nican tajtoa de se telpocat ten choloj cuac quiQuitZQUIjque Jesús**

<sup>51</sup> Huan se telpoch oc quitoctiliaya Jesús huan quemiliutiaya ica se hueyi tilma; huan yejua no quiquitZQUIjque. <sup>52</sup> Pero yejua quincahuilijteu nitilma huan choloj xicaltic.

**Nican tajtoa de queniu cuiyacque Jesús  
TemaquiXtIjque taixpan de tayecanani judíos**

*(Mt. 26.57-68; Lc. 22.54-55, 63-71; Jn. 18.12-14, 19-24)*

<sup>53</sup> Huan ijcón cualicque Jesús inixpan in tayecanque den tiopixcame. Huan no mosentilijque nochi in tayecanani tiopixcame huan in huehuentzitzin huan in tanextiliani den tanahuatil de Moisés. <sup>54</sup> Huan ijcón in Pedro quihuejcatoctiliaya Jesús huan ajsic ne calijticpa den ichan in tayecanque den tiopixcame, huan ompa tocotziutoya ihuan in mayolme, huan mototonijtoya ticoteno. <sup>55</sup> Huan in tayecanani tiopixcame huan nochi in hueyi chihuanime quiyoltemoayaj ica tensá tajtol para quipajpantisquía Jesús huan para quitemactisque huan para quimictisque. Huan amo teyi cajxiliayaj. <sup>56</sup> Huan miacque quipajpantiayaj Jesús ten amo melau. Pero yejuan motajtolxixicoayaj san huan mopajpantiayaj yejuan san. <sup>57</sup> Huan ocsequin taca moquetzque huan tensá tacajcayahualis quipajpantiijque Jesús huan quiijtojque ijcuín:

<sup>58</sup> —Tejuan ticaquiliayaj que yejua quiijtoj ya ijcuín: “Nejua nicuejuelos nijín tiopan den quimachijchiquaque huan tech eyi tonalica nicyecchihuas ocsé tiopan de amo tachijchihual ica imay de se tagat”.

<sup>59</sup>Huan nión ijcón amo monehuiliaya in tapajpantilis. <sup>60</sup>Huan ijcón in hueyi tiopixcat moquetzac tatajcoyan den tayecanani huan quitajtanilij Jesús ijcuín:

—¿Queyé amo teyi titananquilía? ¿Toni nijín ten mitzpajpantijtocque?

<sup>61</sup>Huan Jesús motentamatiliaya san huan amo teyica tananquiliaya. Huan in hueyi tiopixcat ocsepa quiyancuicatajtanilij ijcuín:

—¿Xe tejua ya in Cristo Temaquixtijque, Iconetzin in Totajtzin Dios naquen itati-ochihualtzin de Dios?

<sup>62</sup>Ijcuación Jesús quinilij ijcuín:

—Quema, Nejuatzin ya. Huan no nannechitasque cuac Nejuatzin ni Yectagatzin nimotalis iyecmacopaca campa in chichualis de Dios huan nihualajtos mixtzalan.

<sup>63</sup>Ijcuación in hueyi tiopixcat pehuac momojmotzoaya ica ne itilma porín quixejecoj que Jesús quihuijuicaltij Totajtzin Dios. Huan in hueyi tiopixcat quinilij ocsepa ijcuín:

—¿Para toni oc monequi cachi tictemosque testigos para ma quipajpantiqúij oc?

<sup>64</sup>Namejuan nancacque de nijín tajtolme tenica quihuijuicaltij Dios. Huan, ¿toni nanquixejecoj namejuan ma ticchihuacan?

Huan nochin in tayecanani moixejecoltijque de que cachi cuali ma miqui in Jesús.

<sup>65</sup>Huan sequin peuque quiixchijchacque Jesús. Huan de ompa quiixtzacuacque Jesús huan quimagacque ica nimahuan huan quilijque ijcuín:

—Xiquixejeco aconi mitzmagac.

Huan ijcón in mayolme quiixhuihuitecque.

**Nican tajtoa de queniu Pedro quilij in tacaquini que  
yejua mismo amo quixmatic Jesús Temaquixtijque**

*(Mt. 26.69-75; Lc. 22.56-62; Jn. 18.15-18, 25-29)*

<sup>66</sup>Huan queman in Pedro yetoya tani tech in patío, ijcuación huala se suapil ten tetixilijque para in hueyi tiopixcat. <sup>67</sup>Huan queman in suapil quitac in Pedro ne calan mototoniaya, ijcuación yejua quixitac huan quilij Pedro ijcuín:

—Tejua no tietoya ihuan in Jesús de Nazaret.

<sup>68</sup>Huan ijcón Pedro quitatij ten melau huan quijtoj ijcuín:

—Amo niquixmati, nión nicmati ten tinechilijtoc.

Huan ijcón calanquisac Pedro huan nimatzin tzajtzic in pío.

<sup>69</sup>Huan in tetixilijque ocsepa quitac Pedro huan pehuac quinilij ne naquen ompa yetoyaj ijcuín:

—Nijín tagat no pohuía ihuan Jesús.

<sup>70</sup>Huan in Pedro ocsepa quitatij ten melau. Huan amo huejcahuac oc huan in tagayot ten ompa yetoyaj peuque quilíaj Pedro ijcuín:

—Tejua Pedro, yec melau tejua ninuan tipohuía. Porín tejua no tiixtamati queme ne taca de Galilea huan motajtolis sansé ijcón queme yejuan.

<sup>71</sup>Ijcuación in Pedro pehuac tahuijuicaltía elihuis huan quinilij ijcuín:

—Quitztica Dios, que amo niquixmatic ne tagat ten namejuan nanquijtoaj.

<sup>72</sup>Huan ijcón in piotzin ica ojpa tzajtzic. Ijcuación quelnamiyic Pedro den tajtolme ten Jesús quilijca ya achtopa: “Yec melau que achtopa ya que tzajtzisquía ojpa in piotzin, tejua tiquijtos expa de que amo tinechixmati”. Huan ijcón quelnamiyic Pedro huan pehuac mochojchoctía elihuis.



## Nican Jesús Temaquixtjque ajsic iixpan hueyichiuque Pilato

(Mt. 27.1-2, 11-14; Lc. 23.1-5; Jn. 18.28-38)

**15** Huan imostica cuac santanesic ya, ijcuacón in tayecanani tiopixcame mosen-tilijque ihuan in huehuentzitzin huan in tanextiliani den tanahuatil de Moisés; huan no yetoyaj nochi in huejueyin tamachilejque judíos. Huan cuiyacque Jesús tzicautiyáj huan quitemactijque ihuan in hueyi tequihua Pilato. <sup>2</sup> Huan Pilato quitajtanielij Jesús ijcuín:

—¿Cox tejua titayecanque de judíos?

Huan tananquilij Jesús ijcuín:

—Quema, ijcón queme tejuatzin tiquijtoa.

<sup>3</sup> Huan ijcón in tayecanani tiopixcame quiteluilayaj Jesús ica míac tataman.

<sup>4</sup> Huan ocsepa Pilato quitajtanielij Jesús ijcuín:

—¿Amo teyica titananquilía? Xiquita ica míac tataman mitzteluiláj in tagayot.

<sup>5</sup> Huan nión ica por nojón matájtanti tananquilij Jesús. Huan ica ya nojón in Pilato amo quimatía oc toni quichihuas oc.

## Nican tajtoa de queniu quitelchiuque Jesús Temaquixtjque ma quimictican

(Mt. 27.15-31; Lc. 23.13-25; Jn. 18.38—19.16)

<sup>6</sup> Huan tech ne tonalme de nijín tajyohuilis iluit, Pilato mohuicaya de que quincahuilis se naquen tzactosque preso, aquen yesqui ten quitajtanicuía in tagayot.

<sup>7</sup> Huan oncaya se preso monotzaya Barrabás tzactoya ihuan ocsequin temictiani. Yejuan motehuijcaj ihuan in soldados den tayecanani huan quinmictijcaj miacque ya. <sup>8</sup> Huan motoquijque miacque tagayot campa Pilato huan peuque quitajtanielij ma quinchihuili queme ipa huan ma quincahuilis se preso. <sup>9</sup> Huan in Pilato quin-  
nanquilij ijcuín:

—¿Cox nanquinequij ma nicajcagua in tayecanque de judíos?

<sup>10</sup> Huan ipa in Pilato quimatoyaya que in tayecanani tiopixcame quitemactijque Jesús ica ne xicolot porín quitahuelitacque. <sup>11</sup> Huan ijcón in tayecanani tiopixcame quincuejmolojque in tagayot huan quintajtolmagacque ma quitajtanielican Pilato ma cachi cuali ma quincahuili in preso Barrabás. <sup>12</sup> Huan tananquilij in Pilato ijcuín:

—¿Toni nanquinequij ma nicchihuas ihuan nijín tagat naquen nanquinotzaj tayecanque de judíos?

<sup>13</sup> Huan ijcón nochi in tagayot tzajtzcque ijcuín:

—Xicuoupampilo.

<sup>14</sup> Huan in Pilato quintajtanielij ijcuín:

—¿Toni quichihuac nijín tagat ten amo cuali?

Pero in tagayot cachi chicahuac tzajtziáj ijcuín:

—Xicuoupampilo.

<sup>15</sup> Pero queme in Pilato amo quinequía ma quicualancaitacan nijín pueblojuani, ica ya nojón quincahuilij in preso Barrabás. Huan de ompa quitemactij Jesús ma quicuetaxuican huan ma quicuoupampilocan. <sup>16</sup> Huan ijcón in soldados cuiyacque in Jesús icalteno in rey de ne cali monotza pretorio, huan quinsentilijque nochi in ocsequin soldados. <sup>17</sup> Huan quitaquentijque Jesús ica se tilma morado, huan quicualilijque se corona yohualtic den tajquitil de huitzti. <sup>18</sup> Huan peuque quiquejqueltaj-paloayaj Jesús huan quiliayaj ijcuín:

—Timitzontajpaloaj, tejuatzin titayecanque den judíos.

<sup>19</sup> Huan quicuahuijuitequíaj Jesús ica se acat huan quixchijchayaj. Huan motan-cuaquetzayaj para majyá quimohuistiliayaj Jesús. <sup>20</sup> Huan cuac quitamiquejquelo-que ya Jesús, ijcuacón quiquixtilijque nitilma morado huan quitaquentijque ica yejua itasal huan cuiyacque para quicuoupampilosque.

### **Nican tajtoa de que quicuoupampilotoj Jesús Temaquixtijque**

*(Mt. 27.32-44; Lc. 23.26-43; Jn. 19.17-27)*

<sup>21</sup> Huan yetoya ojteno se tagat monotzaya Simón de Cirene, yejua tetat den Alejandro huan Rufo, huan huala den mila. Huan in soldados quinajnahuatijque ma cuica in cruz de Jesús. <sup>22</sup> Huan cuiyacque Jesús tech se lugar monotzaya Gólgota, quij-tosnequi miquetzontecomaco. <sup>23</sup> Huan quimacacque Jesús ma tayi vino tamanelol ihuan se panti de se cuouchoquilo monotza mirra; pero Jesús amo tayic. <sup>24</sup> Huan cuac quicuoupampilojque ya, in soldados quichiuque ne tatanilis para quitasquía catín tasal de Jesús cuicasquía cada soldado. Huan ijcón quixejxelojque nochi itasal de Jesús. <sup>25</sup> Huan queman catca chicnahui hora de cualcan, ijcuacón quicuoupampilojque Jesús. <sup>26</sup> Huan quitenextilijque in tajtolme tenica quimictisque: “Yejua nijín in tayecanque de judíos”. <sup>27</sup> Huan no quincuoupampilojque ihuan nijín Jesús ome tachtequini, se iyecmacopaca huan ocsé iopochcopaca. <sup>28</sup> Huan nochi nijín motamichihuac ijcón queme quijtoa tech in Tajcuilolamatzin de Dios: “Quipouque in Taquehual de Dios ihuan in taca ten amo yolcualime”.

<sup>29</sup> Huan naquen panoayaj quiquejquelojtoyaj huan cuahuihuicayaj huan quiliayaj Jesús ijcuín:

—Semi tixoxo, tejua ten ticuejuelosquía in tiopan de Dios huan eyi tonalica ocsepa ticchijchihuasquía. <sup>30</sup> Ximomaquixti tejua moselti, huan xitemo tech ne cruz.

<sup>31</sup> Huan ijcón in tayecanani tiopixcame huan in tanextiliani de tanahuatil de Moisés no quiquejqueloayaj Jesús huan moyolnojnotzayaj se huan ocsé ijcuín:

—Jesús quinequía quinmaquixtis ocsequin taca, pero yejua san amo huelis momaquixtis.

<sup>32</sup> Huan ocsequin quilijque Jesús ijcuín:

—Como tejua ya in Cristo Temaquixtijque, titayecanque de Israel, axcan xitemo tech in cruz, para ma tiqitacan motanahuatil huan ijcón timitzneltoquilisque de que tejua in Cristo.

Huan in tachtequini ten quincuoupampilojque inajnacastan Jesús, yejuan nojonques no quitejtelchihuayaj Jesús.

### **Nican tajtoa de que Jesús Temaquixtijque momiquilij**

*(Mt. 27.45-56; Lc. 23.44-49; Jn. 19.28-30)*

<sup>33</sup> Huan cuac ajsic nepanta ya, ijcuacón pehuac tayohuayantis nochi in semanahuac, huan huejcahuac hasta eyi hora de tiotac. <sup>34</sup> Huan tech eyi hora de tiotac, Jesús tzajtzi chicahuac huan quijtoj ijcuín:

—Eloi, Eloi, ¿lama sabactani? —quijtosnequi: no Dios, no Dios, ¿queyé tinechsencahuac?

<sup>35</sup> Huan queman ijcón quicacque nijín tajtolme, ijcuacón sequin den ompa yetoyaj quijtojque ijcuín:

—Xiquitacan, majyá quinotza Elías ne tanahuatijque de Dios.

<sup>36</sup> Huan yajtihuetzic se tagat, quicuito se taman tasal ten posoni huan quiajaquij itech vinagre huan ica se acat quiyecapantalilij. Huan de ompa quintentalilij Jesús ma quichichina. Pero ocsequin tagayot quilijque ijcuín:

—Xicahua, ma tiquitacan cox hualas ne Elías huan cox quipalehuis temos.

<sup>37</sup> Huan ijcón in Jesús tzajtzc chicahuac huan momiquilij. <sup>38</sup> Huan in tasal ica tatzacuaya calteno de tiopanijtic, yejua ne tzayanic sentatajco huan ome quisac desde ajco huan hasta tani. <sup>39</sup> Huan in capitán de soldados de romanos ijcatoya iixpampa Jesús. Huan queman quitac queniu tzajtzc Jesús huan miyic, ijcuacán yejua quijtoj ijcuín:

—Yec melau nijín tagat catca Teconetzin de Dios.

<sup>40</sup> Huan no ompa yetoyaj sequin suatzitzin quitzttoyaj huejca san. Ompa ihuan yetoyaj María Magdalena huan María tenan de Jacobo in taxocoyot, huan tenan de José, huan no yetoya Salomé. <sup>41</sup> Nojonque sihuame quitoctiliyaj Jesús huan quitequitiliyaj Yejuatzin cuac yetoya tech in pueblo de Galilea. Huan no yetoyaj ocsequin miacque sihuame ten hualajque ihuan Jesús tech ne Jerusalén.

### Nican tajtoa de queniu quitalpachojque Jesús Temaquixtjique

(Mt. 27.57-61; Lc. 23.50-56; Jn. 19.38-42)

<sup>42</sup> Huan cuac tapoyahuic ya, ijcuacán pehuac in hora cuac in tagayot judíos moyeyectaliyaj para imostica queman iluitonal de nesehuilis. <sup>43</sup> Huan huala campa rey Pilato se tagat monotzaya José de Arimatea. Yejua ne se tagat yolcuali ten pohuic ihuan in tamachilejque judíos huan no quichiaya ma ejco in tiempo queman Dios momasoutoc ica ihueyichichahualis ipan itaneltocacahuan. Huan ne tagat calayic ica mías ne yolchichahualis campa yetoya rey Pilato huan quitajtanilij inacayo in Jesús. <sup>44</sup> Huan in Pilato quimoucacayic que miyic ya Jesús huan quinoztac in capitán den soldados romanos huan quitajtanilij xe melau que miyic ya in Jesús. <sup>45</sup> Huan queman in capitán romano quilij que melau, ijcuacán quimactilijque José inacayo in Jesús. <sup>46</sup> Huan in José quicohuato se tilma huan quitemohuij Jesús itech in cruztzin, huan quiquemiloy huan quitallito itech se miquetecoch, ten ipa tachijchiu ya tech se tequespan. Huan quitetecuinojque se hueyi tet para ica quitentzacuasque in miquetecoch. <sup>47</sup> Pero in María Magdalena huan María tenan de José quitzttoyaj campa quitallijque inacayo Jesús.

### Nican tajtoa de queniu Jesús Temaquixtjique panquisac yoltoc itzalan ánimajme

(Mt. 28.1-10; Lc. 24.1-12; Jn. 20.1-10)

**16** Huan queman panoc ya in tonal de nesehuilis, ijcuacán María Magdalena, huan in María tenan de Jacobo, huan ocsé sihuat Salomé, yejuan nojonques quicouque sequin xiutzitzin den ajuiyac para quiojxilisque inacayo in Jesús. <sup>2</sup> Huan tech in domingo, yejua in tayecanque tonal den semana, de ne cualcampan queman quisac ya in tonaltzin, ijcuacán in sihuame yajque campa miquecoyoc. <sup>3</sup> Huan monojnotzayaj tech in ojti ijcuín:

—¿Aconi techajchihuilisque in tet tenica tentzactoc in miquecoyoc?

<sup>4</sup> Huan cuac ajsicque ya, ijcuacán quitacque que cajchiuque ya ne tet ten semi hueyi. <sup>5</sup> Huan queman calacque tech in miquetecoch, ijcuacán quitacque se telpoch

tocotziutoya iyecmacopaca in miquetecoch huan quemiliutoc in telpoch ica se hueyi tilma ten semi istac, huan in sihuame momoutijque. <sup>6</sup> Huan in ángel quinilij ijcuín:

—Amo ximomoutican, nanquitemoaj Jesús nazareno, naquen quicuoupampilojcaj ya. Yejuatzin panquisac ya yoltoc itzalan in ánimajme huan amo nican yetoc. Xiquitaquij in lugar campa quitajijcaj ya. <sup>7</sup> Huan axcan xiyacan xiquinilitij Pedro huan in ocsequi imomachtijcahuan que Yejuatzin namechyecanati campa Galilea; huan ompa nanquitasque queme namechilijca ya.

<sup>8</sup> Huan in sihuame quisque den miquetecoch huan cholojque porín moucahuihuiyocayaj. Huan amo aquen teyi quiliayaj porín momoutiyajaj.

**Nican tajtoa de queniu quimonextilij Jesús  
Temaquixtijque campa María Magdalena**

*(Jn. 20.11-18)*

<sup>9</sup> Huan Jesús panquisac ya yoltoc intzalan in ánimajme tech ne domingo cualcan, yejua ne tayecanque tonal. Huan quimonextilijca achto in María Magdalena, naquen Jesús quinquixtilijca ya in chicome amocualime ejecame. <sup>10</sup> Huan ijcón yajqui in María Magdalena huan quinmatiltito nochi ten ihuan Jesús yetoyaj porín yejuan moyolcocoayaj huan chocatoyaj san. <sup>11</sup> Huan queman imomachtijcahuan de Jesús quicacque que panquisac ya yoltoc ya Jesús, huan quicacque que in María quitac ya in Jesús, ijcuacán yejuan amo quineltoacque.

**Nican tajtoa de queniu quinmonextilij Jesús  
Temaquixtijque ome imomachtijcahuan**

*(Lc. 24.13-35)*

<sup>12</sup> Huan satepan Jesús quinmonextilij ica ocsé taman inixpan omen imomachtijcahuan ten yayaj tequititij mila. <sup>13</sup> Huan ijcón yejuan yajque huan quinmatilijque ocsequin imomachtijcahuan de Jesús. Pero nión ica nojón tajtol amo no quineltoacque yejuan.

**Nican tajtoa de queniu Jesús Temaquixtijque  
quintequimactij imomachtijcahuan**

*(Mt. 28.16-20; Lc. 24.36-49; Jn. 20.19-23)*

<sup>14</sup> Huan satepan quinmonextilij Jesús in majtactionseme imomachtijcahuan queman sen yetoyaj tacuajtoyaj. Huan Jesús quinajuac porín amo quiplayaj in yec tacuautamatilis huan porín amo yec tacuautamatoyaj ihuan Jesús tech ninyolojuan. Porín amo quinneltoquiliayaj neques ten quiniliayaj que quitacque ya Jesús panquisac ya yoltoc in tzalan in ánimajme. <sup>15</sup> Huan Jesús quinilij imomachtijcahuan ijcuín:

—Xiyacan nochi senmanahuac huan xitanojnotzacan ica in cuali Tajtoltzin de Dios nochi ten nemij nican talticpac. <sup>16</sup> Huan naquen yec tacuautamati itech in Cristo Temaquixtijque, yejua nojón maquisas de nitajtacoluan. Pero naquen amo yec tacuautamati itech in Cristo Temaquixtijque, yejua ne yesqui tatelchihual.

<sup>17</sup> Huan ica nijín mohuistic nescayome mopalehuisque naquen yec tacuautamati itech in Cristo: Notencopaca quincalanquixtisque in amocuali ejecame. Huan tajtosque ica in yancuic tajtolme. <sup>18</sup> Huan quinquitzquisque ica inmahuan cohame.

Huan tacán tayisque tensá tepahuisquía, ijcuación amo teyi quinchihuilis. Huan ipan in cocoyani quintalilisque ninmahuan huan pajtisque.

**Nican tajtoa de que Jesús Temaquixtijque yajqui ocsepa eluiyac**

*(Lc. 24.50-53)*

<sup>19</sup>Huan in Totecotzin Jesucristo cuac quintaminotzac ya imomachtijcahuan, ijcuación yajqui ajco eluiyac huan motalito iyecmacopaca in Totajtzin Dios. <sup>20</sup>Huan ijcón yejuan imomachtijcahuan quisque huan yajque tanojnotzatoj nohuiyampa. Huan in Totecotzin quinpalehuiaya huan tenextiliaya ica mohuistic nexcuitilme que yec melau nijín yancuic Tajtoltzin tenica tanojnotzayaj. Amén.

## ITATITANIL DE CRISTO, YEJUA IN SAN LUCAS, QUIJCUILOJ NIJÍN YANCUIC TAJTOLTZIN DE DIOS TEN CUALCUI NE NEMAQUIXTILIS

### Nican tajtoa de queniu Lucas quitajcuilohuilía in tequihua Teófilo

**1** Huan yejua ya nijín hueyi melau que miacque taca tamatinime quiejecoayaj ya para quijcuilosque de catiyejua tequime mototoctilijtihualajque totehcacopaca tejuan tiitaneltocacahuan de Cristo Jesús. <sup>2</sup>Huan ne tetajtohuiltiani techmajmactijtihualajque nochi itequihuan de Cristo Jesús, ijcón queme yejuan quitilijtihualajque Cristo Jesús, porín yejuan motequitiltijtihualayaj ica in tanojnotzalis den Tajtoltzin de Dios. <sup>3</sup>Ica ya nojón niquixejcoa que semi quinamiqui nimitzonijcuilohuilis, tejuatzin de tiontequihua Teófilo, de queniu mototoctijtihualaya nochi nijín chihualis de Cristo ten mochihuaco ne achtopa. Huan yejua ya nijín nicchihuati porín nejua nicyectatemolijtihuitz ya ica nejmach nochi nijín chihualis de Cristo. <sup>4</sup>Huan ijcón, tejuatzin Teófilo, cachi oc ticyecajsicamatiquiu ya que nochi melau nochi ten mitzonnexilijtihualayaj ne ocsequin tamachtiani.

### Nican tajtoa de queniu se ángel tanejmachtía que yoliquiu se tagat ten monotza Juan Taahuijque

<sup>5</sup>Huan cuac in rey Herodes tayecantinemía campa Judeajcopaca, ijcuacán nojón tonalme nentinemía se tiopixcat judío ten monotzaya Zacarías, ten pohuía ihuan ne panti tiopantequitini de quinyecantihualaya ne huejcau tetat Abías. Huan isihuau Zacarías monotzaya Elisabet. Huan ne Elisabet no poutinemía ihuan ichancahuan de ne huejcau tiopixcat judío ten monotzac Aarón. <sup>6</sup>Huan ne Zacarías huan Elisabet yejuan yolchipaucanentinemíaj iixpantzinco Totajtzin Dios. Huan yejuan no quintacaminemíaj nochi in tanahuatilme huan in tanexlilisme de Totecotzin. Huan ijcón amo aquen huelfía quinteluilis ica tensá tajtacol. <sup>7</sup>Huan Zacarías huan Elisabet amo quinpiayaj inconehuan porín Elisabet amo huelfía tascaltis. Huan no porín yejuan catcaj semi xihuejque ya. <sup>8</sup>Huan ejcoc in tonal cuac in Zacarías huan itiopixcaicnihuan monequía tequitisque queme tiopixcame nepa tiopanijtic iixpantzinco Totajtzin Dios. <sup>9</sup>Huan quichiuque netátanti ijcón queme mohuicayaj in tiopixcame, para ijcón quitasquía aconi tayecanasquía tech nijín tequit. Ica ya nojón ejcoc in tonal que Zacarías monequía ma calaquís tiopanijtic para tapopochuis ica copal iixpantzinco Totajtzin Dios. <sup>10</sup>Huan cuac in Zacarías tapopochuijtinemía tiopanijtic, ijcuacán nochi in tagayot ne calampa motatatautilijtoyaj iixpantzinco Dios.

<sup>11</sup>Ijcuacán monextico iixpan Zacarías se ángel taquehual de Dios. Huan in ángel moquetztihuetzico iyecmacopaca den altar ne mesa campa tapopochuijtinemía in Zacarías. <sup>12</sup>Huan cuac in Zacarías conitac in ángel, ijcuacán yejua hasta amo quimatía oc toni quichihuas porín mohueyiyolmoutiaya. <sup>13</sup>Pero in ángel quilij Zacarías ijcuín:

—Tejua Zacarías, amo ximoyolmouti porín Totajtzin Dios mitzcaquilij ya mone-tatatautilis. Ica ya nojón axcan mosihuatzin Elisabet quipías se oquichpil huan nojón oquichpil monequi nanquitocaytisque Juan. <sup>14</sup>Huan tejua Zacarías tiyolpactinemis huan timohuelitztinemis. Huan miacque tagayot moyolpactisque porín yoliquiu ya ne namoconetzin. <sup>15</sup>Huan no tiyolpactinemis porín ne namoconetzin Dios quipo-

huas hueyi chiuque. Huan ne namoconetzin amo queman tayis in vino huan nión in cococat. Huan no Totajtzin Dios quiyolpexocaltijtinemis namoconetzin ica in Yecticatzin Espíritu desde achtopa que yolicquiu nican talticpac.

<sup>16</sup> Huan no in ángel quilij Zacarías ijcuín:

—Huan no namoconetzin quinchihualtis que míac pueblojuani judíos ma quicahuacan nintajtacoluan huan ma quitociltican Totecotzin Dios. <sup>17</sup> Huan ne Juan tayecanaquiu para tanojnotztinemis itencopaca den Totecotzin Cristo. Huan ne Juan quipixtinemis in chichualis den Yecticatzin Espíritu ijcón queme ne huejcautanahuatijque Elías quipixtinemico. Huan ne Juan quinyoltaliquiu neques tetatme para ma amo mocualantijtinemican ihuan inconehuan. Huan no Juan quinyolmajxitis neques ten amo tatacamatinemij para ma ijcón yejuan no ma momachtican queniu chipaucanemis que ijcón queme chipaucanemij neques ten yolchipauque ya. Huan ijcón in Juan quinyolmajxitijtinemis in tagayot para ijcón cachi huelis quiselisque itanahuatil den Totecotzin Cristo.

<sup>18</sup> Ijcuacán in Zacarías quitajoltij in ángel ijcuín:

—¿Queniu huelis nicmatis que melau nochi nijín mochihuaquiu? Porín nejuatzin nihuehuentzin ya huan no ijcón nosihuau.

<sup>19</sup> Huan ijcón in ángel quinanquilij ijcuín:

—Nejua ya ni Gabriel, ten nictequitilijtinemi sayó Dios nepa iixpantzinco Yejuatzin. Porín Totajtzin Dios nechualtitanic para ma nimitznojnotzaqui huan para ma nimitznejmachtiqui ica nijín cualtzin tanejmachtilis. <sup>20</sup> Huan axcan queme amo ticyecneltocac ten nimitzilí, ica ya nojón xicmati, tejua Zacarías, tinoncuis huan amo huelis titajtos hasta in tonal cuac yolis namoconeu. Huan nochi nijín ten nimitzilijtoc motamichihuas tech ne tonal cuac monequis.

<sup>21</sup> Huan nochi nijín ijcón mochiutoya cuac in tagayot quichixtoyaj Zacarías ne calampa. Huan quimoucamatáj que in Zacarías semi huejcahuato ya ne campa cachi tiopanijtic. <sup>22</sup> Huan cuac Zacarías hual calanquisac den tiopan, ijcuacán amo huelía quinnojnotzas. Ica ya nojón in tagayot cajsicamatque que Zacarías tajtachíac ne tiopanijtic queme cuac se tacochitzosquía. Huan ijcón in Zacarías sayó tanejnnextiaya ica imahuan cuac hual quisac ya ne tiopanijtic porín yejua nontzincui ya. <sup>23</sup> Huan cuac in Zacarías quitamichihuac nitequiu ne tiopanijtic, ijcuacán yajqui ichan. <sup>24</sup> Satepan de nochi nijín mochihuac ya, ijcuacán in Zacarías isihuau mopilcuic ya huac ijcón in Elisabet mocahuac sayó calijtic san ipan macuil metztica. Huan ipan nojón macuil metztica quinemilijtinemía in Elisabet ijcuín: <sup>25</sup> “In Totecotzin nechmactij nijín tatiochihualis tech nijín tonalme huan nechylicnelij para ma ijcón in tagayot nechmohuiscapohuacan”.

### **Nican tajtoa de queniu se ángel tanejmachtía que yoliquiu se tagat ten monotza Jesús Temaquixtijque**

<sup>26</sup> Huan ipan chicuasen metztica cuac in Elisabet mopilcuic ya, ijcuacán Totajtzin Dios cualtitanic itaquehual ángel Gabriel tech se pueblo ten monotza Nazaret ten itatitalanal de Galilea. <sup>27</sup> Huan Dios cualtitanic Gabriel ma quicalpanoqui huan ma quinojnotzaqui se suapil ten monotza María ten ayamo ihuan se tagat sen yetoya. Huan nijín María ipa yetoya tajtol ya para ihuan monamictis se tagat ten monotza José. Huan ne José pohuía ihuan ichancahuan den ne huejcaurey David. <sup>28</sup> Huan ijcón in ángel yajqui huan calaquito campa yetoya María huan quilij ijcuín:

—Nimitztajpaloqui, tejua ten Totajtzin Dios semi mitzyolicnelij ya. Huan Totecotzin mohuantzin yetica. Huan Totajtzin Dios cachi oc mitztiochiutinemis huan que in ocsequi sihuame.

<sup>29</sup> Huan cuac in María quitac in ángel, ijcuacón yejua semi moyolmoutij huan moyoltajtoltiaya de toni quijtosnequi nijín netajpalolis. <sup>30</sup> Ijcuacón in ángel quiluij ijcuín:

—Tejua María, amo ximoyolmouti porín Totajtzin Dios semi mitzyolicnelijtihuitz ya. <sup>31</sup> Axcan timopilcuis huan ticyolitis se oquichpil huan tictocaytis moconeu Jesús. <sup>32</sup> Huan moconeu yesqui hueyi chiuque huan in tagayot quipohuasque huan quitocaytis que nijín conetzin que Yejuatzin iconeu de Totajtzin Dios in cachi hueyi chiuque. Huan no Totajtzin Dios ten Totecotzin, Yejuatzin quichihualtis que in Jesús Temaquixtijque ma quipía huelilis de rey, ijcón queme in tayecancatát David tequitía cuac catca rey. <sup>33</sup> Huan ne Jesús Temaquixtijque, Yejuatzin ya ne quinyecantinemis in pueblojuani de Israel sen nachipa. Huan in chicaucahuelilis de Jesús Temaquixtijque amo queman cuetahuis.

<sup>34</sup> Ijcuacón in María quitajoltij in ángel ijcuín:

—Huan nijín, ¿queniu huelis nicpías se conetzin? Ta, nejua ayamo nicpía noyoquich.

<sup>35</sup> Ijcuacón in ángel quinanquilij ijcuín:

—Huan nijín, Yejuatzin in Yecticatzin Espíritu hualas tequitiqui moyolijtic. Huan ijcón Totajtzin Dios ten cachi hueyi chiuque, Yejuatzin hualas mitzyehualoltiqui ica nichicahualis. Ica ya nojón moconetzin ten yoliqui, yejua ne quipohuasque Yolchipactzin huan no quitocaytis que Yejuatzin Iconetzin de Dios porín ipa ya melau Yolchipahuactzin. <sup>36</sup> Huan no nimitzilía que ne moprima Elisabet no mopilcuic ya, masqui yejua semi nanajtzin ya. Huan axcan yejua quipía chिकासen metztica ya de mopilcuic, masqui quijtoayaj que amo queman huelisquía quipiasque se conetzin. <sup>37</sup> Huan nochi nijín mochiutiu porín Totajtzin Dios nochi hueli quichihua, huan amo teyi ongac ten ma amo huelis quichihuas Totajtzin Dios.

<sup>38</sup> Ijcuacón in María quilij in ángel ijcuín:

—Cuali yetoc, nejua niitequiticau de Totecotzin. Huan ma Dios quichiutica notehcacopaca nochi ten Tejuatzin tinechonilijtoc.

Huan de ompa in ángel quistehuac.

### Nican tajtoa de queniu María quicalpanoto iprima Elisabet

<sup>39</sup> Huan tech nojón tonalme in María niman yajqui tech se pueblo campa tepeyo tech se pueblo de itatilanal Judea. <sup>40</sup> Huan ijcón cuac ajsic ichan Zacarías, ijcuacón María calaquito calijtic huan quitajpaloj ne iprima Elisabet. <sup>41</sup> Huan cuac in Elisabet quicayic que in María quinaltajpaloto ya, ijcuacón in conetzin de Elisabet sepa san moolinij ne ijticpa. Huan ijcón Dios quiyolpepexocaltij Elisabet ica in chicahualis den Yecticatzin Espíritu. <sup>42</sup> Huan ijcón in Elisabet moyoluelitac huan chicaucatajtoaya ijcuín:

—Totajtzin Dios cachi oc mitztiochihuac ya huan que nochi ocsequin sihuatzitzin. Huan ne Totajtzin Dios quitiochihuac moconetzin ten ticpixtoc ya. <sup>43</sup> Huan nicmoucaita que tejuatzin tionuala tinechoncalpanoco porín nicmati que tejua tianan de Notecotzin Temaquixtijque. <sup>44</sup> Huan niman cuac nicayic tinechtajpaloco ya, ijcuacón noconetzin moolinij noijticpa porín moyoluelitac. <sup>45</sup> Huan, tejua María, tiy-



olpactoc porín ticajsicaneltocac ne tajtolis ten mitziluij ne ángel. Huan nochi nijín quipía que motamichihuas, ijcón queme quiytoj ya Totecotzin Dios.

<sup>46</sup> Ijcuacón in María tananquiliij ijcuín:

Ica nochi notalnamiqulis nicueyichihua Notecotzin Dios.

<sup>47</sup> Huan noyolo mohuelita porín Totajtzin Dios, Yejuatzin Notemaquixtjicatzin.

<sup>48</sup> Huan Totajtzin Dios nechylicnelij masqui nejua nitetequitilijque san.

Huan desde axcan para taixpan nochi in talticpacuani de nochi tonalme, nochi yejuan nechpoutinemisque que nitatiochihual de Dios.

<sup>49</sup> Huan nechilijtinemisque que nitatiochihual de Dios porín Yejuatzin ya quipixtinemi huelilis.

Ica ya nojón Yejuatzin quichiutinemi huejueyi chihualis noyolijtic.

Huan Yejuatzin in Yolchipahuactzin.

<sup>50</sup> Huan Totajtzin Dios nachipa quinyolicnelijtihuitz nochi neques ten quimohuistilijtinemij Dios huan Yejuatzin cachi oc quinyolicnelijti.

<sup>51</sup> Huan Yejuatzin quichihuaco huejueyi chihualisme ica por ihueyichichualis.

Huan no Yejuatzin quinmomoyahuac ne taixnamiquini neques ten moyolueyimatinejáj ica nintamachilis.

<sup>52</sup> Huan Totajtzin quinajchihuac in huejueyi chihuanime de ninuelilispán.

Huan no quinueyipantalij neques ten amo semi mohueyimatinemij tech nintamachilis.

<sup>53</sup> Huan Yejuatzin quintayocolij míac tenesi para ica huelis moixpanoltisque nochi neques ten mayantinemij.

Huan nochin in taca rijcome Yejuatzin quincáu ma yacan iuque.

<sup>54</sup> Huan Totajtzin Dios quinpalehuij in pueblojuani Israel, yejuan itequiticahuan de Dios.

Huan Dios amo queman quinelcahuaya de quinyolicnelis ne itequiticahuan.

<sup>55</sup> Huan Dios amo no queman quelcahuas de ne netenilil tenica moyectencahuac para sen nachipa

ihuan ne tohuejcautat in Abraham huan nichancahuan.

<sup>56</sup> Huan ijcón in María mocahuac ichan Elisabet ipan queme eyi metztica. Huan de ompa in María mocuepac huan yajqui ichan.

### Nican tajtoa de queniu yolico in Juan Taahuijque

<sup>57</sup> Huan cuac ajsic ya in tonalme cuac monequis monextis ica pili, ijcuacón Elisabet quiyolitij se oquichpilconet. <sup>58</sup> Huan ne Elisabet ichancahuan huan iparientes, cuac yejuan quitcaquilijque de queniu Dios quiyolicnelij Elisabet, ijcuacón yejuan yajque quicalpanotoj para ihuan moyolpactisque. <sup>59</sup> Huan mochihuac que ipan chicueyi tonal cuiyacque in oquichpilconet para ma quinescayotican tech ninacayo. Huan quinequíaj quitocaytisque in oquichpil ica in tocay Zacarías, ijcón queme ipapá. <sup>60</sup> Pero in Elisabet quinilij ijcuín:

—Amo ijcón ticnotzasque. Ta, ticnequij nijín tictocaytisque Juan.

<sup>61</sup> Ijcuacón ichancahuan quitajtoltijque ijcuín:

—¿Queniu ijcón ma motocayti in oquichpil? Ta, amo aquen mochancahuan ma ijcón monotza.

<sup>62</sup> Huan ijcón quitajtoltijque Zacarías ica nescayot san de ninmahuan para huelis quimatisquáj toni tocay quinequi quitailis ne ioquichpil. <sup>63</sup> Ijcuacón in Zacarías taj-

tanic ica nescayot se cuoutzin campa huelis tajcuilos huan quijcuiloj ijcuín: “Nitocay nijín nooquichpil yesqui Juan”.

Ijcuacán nochi ninchanchahuan quimoucaitacque nochi ten mochihuac. <sup>64</sup>Huan tech nojón momento Totajtzin Dios quitentapoj Zacarías huan quitojtomilij ninenepil. Huan ijcón Zacarías pehuac tajtoa huan quimohuistilía in Totajtzin Dios. <sup>65</sup>Huan cuac quitacque ya nochi nijín, ijcuacán nochi ninchanchahuan cachi oc mohueyiyolmoutiayaj. Huan nochi in pueblojuani campa tejtepeyo de itatilanalcopaca de Judea motetapohuiayaj nochi nijín ten mochihuaco inchan in Zacarías. <sup>66</sup>Huan nochi nojón calyeton ten quitecaquiliayaj de toni mochihuac, yejuan nojón peuque quiyolnemilijtinemíaj huan motajtolitjinemíaj se huan ocsé ijcuín:

—¿Toni chiuque mochihuaquiu nijín oquichpil?

Porín hueyi melau in Totecotzin Dios quihueyitiochihuac ya ica ichicahualis.

### **Nican tajtoa de queniu Zacarías moyolpactía ihuan Dios ica nijín himno**

<sup>67</sup>Huan Totajtzin Dios quiyolpepexocaltij in Zacarías ica in Yecticatzin Espíritu. Huan ijcón in Zacarías tajtoaya ica nijín tajtolme ten Totajtzin Dios quimactilij huan quijtoaya ijcuín:

<sup>68</sup>Ma ticueyichihuacan Totecotzin, Yejuatzin in Dios den pueblojuani de Israel, porín Yejuatzin huala ya techpalehuico huan techmaquixtico tejuan tiipueblojchahuan.

<sup>69</sup>Huan Totajtzin Dios quichihuac ma moscaltiqui se Temaquixtijque ten quipía nochi huelilis.

Huan nijín Temaquixtijque hualehuac intzalan de neichanchahuan de ne huejcaurey David.

<sup>70</sup>Huan ijcón Totajtzin Dios moyectencauca ya de techmaquixtis cuac technonjotzaya intencopaca de ne huejcau mohuiscatanahuatiani.

<sup>71</sup>Huan ne huejcau tanahuatiani techiliayaj que Totajtzin Dios techmaquixtis inmaco neques ten techixnamictinemij

huan Yejuatzin no techsecotalis de neques ten techtahueltztinemij.

<sup>72</sup>Huan no Totajtzin Dios techyolicnelijtiu

porín Yejuatzin quelnamiquis ne netenilil tenica moyectencauca ya ihuan tohuejcatatuan de quichihuas.

<sup>73</sup>Huan tech nojón tonalme Totajtzin Dios moyectencahuac ihuan tohuejcautat Abraham de que techualtitanilis se Totemaquixtijcatzin.

<sup>74</sup>Huan no Totajtzin Dios moyectencahuac de que techajchihuas inmaco neques ten techtahueltztinemij

para ijcón huelis tejuan tictequitilijtinemisque Dios huan amo timomoutijtinemisque.

<sup>75</sup>Huan ijcón tictequitilijtinemisque Totajtzin Dios huan tichipaucanentinemisque iixpantzinco Dios ica neyolchipahualis tech nochi tonemilispán.

<sup>76</sup>Huan tejua Juan, tinoconetzin, mitztocaytjinemisque titanahuatijque de Totajtzin Dios ten cachi hueyi chiuque.

Huan nijín ijcón mitzilisque porín tejua titanojnotztinemi ya achtopa que Cristo hualas para ijcón tiquinyolyemaniti in topueblojchahuan para huelis taneltocasque de Cristo.

<sup>77</sup> Huan tejua Juan, tiquinyecajscamatiltis mopueblojcahuan de queniu Totajtzin Dios quinmaquixtis

huan quintapojpoluis den nintajtacoluan.

<sup>78</sup> Huan Totajtzin Dios techyoltasojta huan techyolicnelía.

Ica ya nojón hualehuac desde ne eluiyactzinco se Temaquixtijque huan tahuiquiu ijcón queme tiqitaj cuac panquisa in tonaltzin ica chicahuac imeyoyo.

<sup>79</sup> Huan ne Temaquixtijque techualcuilía in tanextzin den Totajtzin Dios para quinyoltahuilis neques ten yolmictinemij tech ne tayohuayanilot ten cualcui tajtacol. Huan no quinmaquixtiqiu neques ten in miquilis quinyecahuiltijtoc ica moucayot. Huan no hualas para techmetzyecantiyás tech ne ojti campa ongac yolsehuilis.

<sup>80</sup> Huan ijcón ne oquichpilconet Juan moijsiucalcaltijtiaya huan moyolchichualtijtiaya. Huan in Juan yajqui yetoto campa taiucan san hasta in tonalme cuac ocsepa mocuepac huan yetoto intzalan in pueblojuani de Israel para pehuas nitanojnotzalis.

### Nican tajtoa de queniu yolico in pili Jesús

(Mt. 1.18-25)

**2** Huan tech nojón tonalme mochihuac que in cachi hueyi chiuque de Roma ten quilíaj emperador Augusto César, yejua quintanahuatili in ocsequin tequihuani ma quinpohuacan nochi in talticpacuani para ijcón huelis quintopaluisque. <sup>2</sup> Huan ijcón quintayecancapouque in tagayot de Siria den ititalanal den Roma, cuac ne tonal yetoya in tequihua Cirenio quinyecantinemía Siriajcopacahuani. <sup>3</sup> Huan ijcón monequía que nochi in talticpacuani mocuepasque huan yasque tech ninpueblojuan campa yolque ninuejcautatuan para ompa no yesque tapoucayome.

<sup>4</sup> Ica ya nojón in José quisac den pueblo Nazaret de ititalanal Galilea huan yajqui campa pueblo de Belén, huan de ititalanal Judeajcopaca campa yolicoj ne ihuejcautatuan de quilíaj rey David. Huan ijcón quichihuac José porín yejua pohuía ihuan ichancahuan de ne huejcau rey David. <sup>5</sup> Huan ijcón José yajqui Belén para ompa yesqui tapoucayot. Huan no quisehuicaya isihuatzin María ten ipa yetoc tajtol ya que ihuan monamictis. Huan ne María cocoxcayetoya ya ica pili. <sup>6</sup> Huan mochihuac cuac yetoyaj ya tech ne pueblo de Belén, ijcuacón ejcoc in tonal cuac in María monequía tayolitis. <sup>7</sup> Huan ijcón in María quiyolitij itayecancaoquichpil huan quitetziloz ica sequi pilcueyit huan quicuategac tech in pesebre campa ne tacuaj tapialme. Huan nijín ijcón quichiuque porín amo cana tacautoya tech mesón para ompa mosehuisque.

### Nican tajtoa de queniu in ángeles de Dios quinnojnotzacoj in tapiani

<sup>8</sup> Huan amo huejca de Belén ompa yetoyaj sequin tapiani ten tatacualtijtinemíaj ica ninichahuan huan quipanoayaj in yohual tech nojón ixtahuat. <sup>9</sup> Huan santajma monextijthuetzico se ángel taquehual de Totecotzin huan icualtziyo de Totecotzin quinmeyotico huan quinyehualoco ne tapiani. Ica ya nojón in tapiani mohueyiyolmoutijque. <sup>10</sup> Pero in ángel quinilij ijcuín:

—Amo ximoyolmoutican porín nejua namechualcuilía se cualtzin tanejmachtilis ten quinueyiyolpactis nochi in talticpacuani. <sup>11</sup> Huan in tanejmachtilis yejua nijín que axcan tech nijín yohual yolico ya se pili. Huan yejua ne mochihuas namotemaquixtijcau huan yejua itocay Totecotzin Cristo. Huan Yejuatzin yolico ya tech in pueblo de Belén campa pohuij ichancahuan de ne huejcau rey David. <sup>12</sup> Huan

nanquitasque que nochi nijín ten namechilijtoc hueyi melau porín cuac nanyasque nancalpanotihue ya, ijcuacón melau nanquitasque in conetzin tetziliutoc ica sequi pilcueyit huan huetztica tech se pesebre campa tacuaj tapialme.

<sup>13</sup> Huan santajma monextijtihuetzicoj tel miacque ne ocsequin ángeles de Dios den hualeuque ne eluiyactzinco. Huan nochi nojón ángeleme peuque quihueyimohuistilíaj Totajtzin Dios huan quiytoayaj ijcuín:

<sup>14</sup> Ticueyimohuistilíaj Totajtzin Dios ten yetica nepa eluiyactzinco.

Huan nican in talticpacuani quipixtinemisque neyolsehulis ihuan Dios huan ihuan ninchanchahuan porín yejuan quiyolpactijtinemisque Dios.

<sup>15</sup> Huan cuac in ángeles mocuepque ya huan yajque ya eluiyactzinco, ijcuacón in tapiani peuque moiliayaj se huan ocsé ijcuín:

—Tiyohue Beléncopaca huan ompa tiquitasque toni mochihuac. Porín Totecotzin Dios techualtitanilij ya nijín ángeles para yejuan techmatilticoj de toni mochiutoc.

<sup>16</sup> Huan ijcón quichiuque in tapiani ijsiucayajque tech ne pueblo de Belén huan ajsicque campa yetoya in María huan José. Huan ompa quitacque in oquichpilconet Jesús huetztoc tech in pesebre campa tacuaj in tapialme. <sup>17</sup> Huan cuac in tapiani quitacque ya in conetzin, ijcuacón yejuan quintapohuíaj María huan José den nochi tanejmachtillis ten in ángeles quiniliayaj de ne oquichpilconet Jesús. <sup>18</sup> Huan nochi in tagayot ten quitecaquilíaj nijín tanejmachtillis, yejuan quihueyimoucaitayaj den quiytoayaj in tapiani. <sup>19</sup> Huan ijcón in María quiyolelnamiquía nochi in tajtolme den tapiani huan voltanemiliaya ica nojón tajtolme. <sup>20</sup> Huan de ompa in tapiani quisteuque huan yajque campa yetoyaj. Huan yejuan quihueyimohuistilijtiyayaj huan quihueyipanchiutiyayaj Totajtzin Dios ica por nochi ne ten quicacque huan quitacque. Huan no quitasojcamachiliayaj Dios porín nochi mochihuaco ijcón queme quinuilaicaj ya.

### **Nican tajtoa de queniu quitenextilitoj in oquichpilconet Jesús tech ne hueyi tiopan de judíos**

<sup>21</sup> Huan ipan chicueyica cuiyacque in oquichpilconet Jesús para quinescayotisque tech ninacayo, huan ompa quitocaytijque in conetzin Jesús. Huan quitocaytijque ijcón queme in ángel quinahuatijca María ne achtopaca ya que mopilcuis. <sup>22</sup> Huan ajsicque ya in tonalme cuac in María mochipahuac ya den tayolitij. Huan yejua quichihuato ijcón queme tenahuatilí in tanahuatil de Moisés. Huan ijcón yejuan yajque Jerusalén cuiyacque in oquichpil Jesús campa hueyi tiopan para quitenextilisque huan quitemactisque in oquichpil inahuactzinco Totecotzin Dios. <sup>23</sup> Huan nochi nijín quichiuque porín ijcón ijcuiliutoc tech in Tajcuilolamatzin de Totecotzin Dios ijcuín: “Nochi tayecancaoquichpilme ten yolisque, yejuan nojonques ma quitemactican imaco Totecotzin”. <sup>24</sup> Huan no yajqui campa ne hueyi tiopan de judíos para ompa quimactilisque Dios sequin nematictil ijcón queme in tanahuatil den Totecotzin Dios quitenahuatilí in taca pobres ijcuín: “Ma quimactilican Dios ome tototzitzin, yesque tórtolas oso palomas”.

<sup>25</sup> Huan tech nijín tonalme nemía se tagat ten monotzaya Simeón tech in pueblo de Jerusalén. Huan nojón tagat catca semi yolchipaucatagat huan ipa quimohuistilijtinemía Dios. Huan yejua quiyecajsicachiyaj ipa ca tacuautamatilis que hualas in Cristo Temaquixtijque para quinyolsehuiquiu ica ne nemaquixtilis ipueblojchahuan de Israel. Huan in Yecticatzin Espíritu yetoya iyolijtic in Simeón. <sup>26</sup> Huan ne Yec-

ticatzin Espíritu quimatiltij ne Simeón que yejua ayamo miquis como amo achto quitas Cristo Temaquixtijque, ten Totajtzin Dios cualtitanis. <sup>27</sup> Huan in Simeón yajqui ne tiopanijtic porín in Yecticatzin Espíritu quiyecanaya. Huan in María huan José cuiyacque in oquichpil Jesús campa hueyi tiopan de Judíos para ompa quitamichihuasque nochi ten in tanahuatil de Moisés quitenahuatíla. <sup>28</sup> Huan cuac in Simeón quitac ya in oquichpil Jesús, ijcuacón yejua monapaloltij huan pehuac quimohuistíla Dios huan quiytoaya ijcuín:

<sup>29</sup> Notecotzin, axcan huelis xinechcahua ya ma nimiqui ica hueyi yolsehuilis porín axcan Tejuatzin ticontamichihuac ya nochi ne ten tionmoyectencauca ya nohuan de monequía niquitas.

<sup>30</sup> Axcan melau nicyequitac ya ica noixtolohuan in Jesús Temaquixtijque ten Tejuatzin titechonualtitanilij para titechmaquixtis.

<sup>31</sup> Huan Tejuatzin tiquijitac nijín Jesús Temaquixtijque para quinmaquixtis nochi in talticpacuani.

<sup>32</sup> Huan nijín Jesús Temaquixtijque, Yejuatzin se tanextzin para quinyoltahuilis ica in Tajtoltzin de Dios neques ten amo poutinemij queme judíos.

Huan no Jesús Temaquixtijque techueyipanchihuas tejuan den timopueblojchuan de Israel.

<sup>33</sup> Ijcuacón in José huan in María inan Jesús, yejuan nojonques quimoucacaquíaj in tajtolme ten quiytoaya Simeón cuac yejua tajtoaya de nojón conetzin Jesús.

<sup>34</sup> Huan ijcón in Simeón motatautilij que ma Dios quintiochihua. Huan de ompa Simeón quilij María yejua inan de Jesús ijcuín:

—Xiquitacan que ica por nijín oquichpil Jesús, Dios quitelij que miacque pueblojuani de Israel ixpolihuisque porín amo tacuautamatisque ihuan Yejuatzin. Huan no miacque pueblojuani de Israel maquisasque porín tacuautamatisque ihuan nijín Jesús. Huan nijín Jesús quinmactijtinemis in pueblojuani Israel pero miacque quimohuispolosque itamachtilis. <sup>35</sup> Huan nijín Jesús tamactijtinemis para ijcón ixnesiquiu itamachilisuan de cada se tacaquini. Huan tejua María, nimitzilí que nochi nijín ipan huetziquiu Jesús, huan tejua queme yesquía se machete panosquía moyolijtic para ijcón mitztajyohuiltis.

<sup>36</sup> Huan no ompa tiopanijtic yetoya se sihuatzin ten monotzaya Ana, yejua tajtoaya ica tanahuatil ten Dios quimactiliaya. Huan nojón Ana yejua catca ishupiltzin den tetat Fanuel huan pohuí ihuan ichancahuan de ne huejcautetatme ten monotzaya Aser. Huan in Ana catca semi nanajtzin ya huan monamictijca ya cuac semi sihuapil oc huan yejua ihuan yetoya iyoquich sayó chicome xiutica. <sup>37</sup> Huan axcan in Ana yejua se sihuacahual ya huan quipiaya nahuipoal huan nahui xihuit. Huan in Ana amo quemán quisaya tech ne hueyi tiopan de judíos. Ta, quitequitíla Totajtzin Dios yohual itonal ica ne nesahualis huan ica inetatautilis ihuan Dios. <sup>38</sup> Huan cuac Simeón quinnojnnotzac oc, ijcuacón in Ana motoquito inixpan. Huan yejua quitasojcamachilij ya Dios porín quinuultitanilij ya nijín oquichpil Jesús queme Temaquixtijque. Huan de ompa Ana quinnojnnotzato den oquichpil Jesús nochi in pueblojuani de Jerusalén neques ten quichixtoyaj ma mohualuicas Cristo para quinmaquixtis.

**Nican tajtoa de que mocuepque ichancahuan de  
Jesús tech ninpueblo de Nazaret**

<sup>39</sup> Huan satepan cuac quitamichiuque ya nochi ten quitenahuatilía in tanahuatil de Moisés, ijcuación José huan María mocuepque huan yajque Galileajcopaca huan ajsique tech ninpueblo de Nazaret. <sup>40</sup> Huan ompa Nazaret in oquichpil Jesús moscaltiaya huan cachi oc mochicahualtiaya huan no cachi oc cuatamatiaya. Huan ijcón Totajtzin Dios quihueyitochihuaya mosta.

**Nican tajtoa de que in oquichpil Jesús yajca  
tech hueyi tiopan de judíos de Jerusalén**

<sup>41</sup> Huan ipapajuan de Jesús ipa yayaj cada se xihuit tech ne pueblo de Jerusalén para iluititihue tech nojón tajyohuilis iluit. <sup>42</sup> Huan cuac in oquichpil Jesús quipiaya ya majtactionome xihuit, yejua ihuan nochi ichancahuan yajque campa pueblo Jerusalén. Ompa yajque iluititoj para ijcón motenextilisque inahuactzinco Totajtzin Dios, ijcón queme mohuicatinemíaj ne pueblojuani judíos. <sup>43</sup> Huan cuac taluitamic ya, ijcuación nochi ichancahuan de Jesús mocuepque huan yajque inchancopaca. Pero mochihuac que ne oquichpil Jesús mocahuato tech in pueblo Jerusalén. Huan in José huan inan Jesús amo momacacque cuenta que cox mocahuac oc in Jesús. <sup>44</sup> Huan in José huan María quinyolnemiliayaj que xa in oquichpil Jesús quinquinaltoctiliaya intzalan in tagayot ten inuan hualayaj. Huan ijcón yejuan nejnenque se tonal ya huan yejuan amo quimatía que cox amo yetoya in oquichpil Jesús. Huan de ompa peuque quitemoayaj Jesús intzalan nochi inchancahuan huan naquen inuan moixmatque. <sup>45</sup> Huan queme amo cajsique in oquichpil Jesús, ijcuación José huan María ocsepa mocuepteuque para quitemosque nepa Jerusaléncopaca.

<sup>46</sup> Huan ipan eyi tonal de quitemojtinemíaj ya in Jesús, ijcuación cajsique in oquichpil tocotzyetoc ne campa hueyi tiopanijtic intzalan ne tanextiliani den tanahuatil de Moisés. Huan in oquichpil Jesús quinquaquiliaya nintajtol de ne tanextiliani huan no quintatajtoltiaya de toni quijtosnequi nintamachtilis. <sup>47</sup> Huan nochi in tanextiliani ten quicaquiliayaj in Jesús, yejuan nojónques quimoucacaquíaj de queniu in oquichpil Jesús niman quinajsicamatiliaya ne tanextiliani. Huan no quimoucaitayaj de queniu Jesús quinnanquiliayaj cuac quitajtoltiayaj tensá matájtanti. <sup>48</sup> Huan cuac itatuan de ne oquichpil Jesús quitacque ya de toni quichiutoya, ijcuación yejuan quihueyimoucaitayaj. Ijcuación inan de Jesús quilij ijcuín:

—Noconetzin, ¿queyé ijcón titechchihuac de amo titechilij can timocahuas? Porín motat huan nejua semi timoyolcuejmolojtinemij de timitztemojtihuize.

<sup>49</sup> Ijcuación in oquichpil Jesús quinnanquilij ijcuín:

—¿Queyé ay nannechtemojtinemij? ¿Xe amo nanquelnamiquij que nejua nicpía de nimotequitis tech in tanextililis de Notajtzin Dios?

<sup>50</sup> Pero itatuan de Jesús amo cajsicamatque queyé ijcón quinnanquilij. <sup>51</sup> Huan ijcón in oquichpil Jesús mocuepac ocsepa huan yajqui Nazaret inuan itatuan. Huan ijcón in oquichpil Jesús quisentocaya quintacamatiaya itatuan. Huan ijcón inan den oquichpil quiyolelnamiquía nochi nijín tajtolme huan no yoltanemiliaya de toni quijtosnequí. <sup>52</sup> Huan in oquichpil moscaltiaya ca míac chicahualis huan no cachi oc moyolmajxitiyá. Huan Totajtzin Dios moyolpactiaya ica por Jesús huan nochi in tagayot quicualtagaitayaj.

**Nican tajtoa de queniu in Juan Taahuijque  
quiephualtij ne nitanojnotzalis ne campa taiuan**

*(Mt. 3.1-12; Mr. 1.1-8; Jn. 1.19-28)*

**3** Huan tech nojón xihuit cuac quichihuac ya caxtol xihuit de tayecantinemi in cachi hueyi chiuque de Roma den quilíaj emperador Tiberio César, ijcuacán in tequihua ten tayecantinemía campa Judeajcopaca, yejua in Poncio Pilato. Huan in Herodes tayecantinemic ne Galileajcopaca. Huan Felipe, yejua icniu de Herodes, tayecantinemía campa Iturea huan Traconite. Huan in Lisantias tayecantinemía ne Abiliniajcopaca. <sup>2</sup> Huan tech nojón xihuit in Anás huan Caifás, yejuan nojonques catcaj in cachi huejueyi tiopixcame tech in hueyi tiopan de Jerusalén. Huan Juan, yejua catca teconeu de Zacarías, huan yejua yetoya oc campa ne tayiucan. Huan tech nojón tonalme Totajtzin Dios quimactilij in Juan Taahuijque se tanahuatil tenica tanojnotztinemis. <sup>3</sup> Huan ijcón in Juan panotiaya nochi in pueblojme ten atencopaca calyetoya den hueyíat Jordán huan quinmachtiaya in pueblojuani ijcuín:

—Monequi ximoyolnemilican de namotajtacoluan para ijcón Totajtzin Dios namechtapojpoluis de namotajtacoluan. Huan no monequi ma namechahuijcan.

<sup>4</sup> Isaías yejua itanahuatijcau de Dios ten quijcuilojca de nijín Juan Taahuijque cuac quijtojca nijín tajtolme ijcuín:

Mocaquiti se tagat ten tanajnahuatía campa tayiucan huan quijtoj ijcuín:

“Xitayetalijtiyacan ninemilispán de Totecotzin huan xicmejmelauiyacan niojuan campa hualpanotihualas.

<sup>5</sup> Huan xicautiyacan namotajtacoluan para ijcón nanyesque nanyolmelauque ijcón queme yesquía se melaucaojti.

Huan campa tajtahuitomil, ma ixtemiqui.

Huan no campa nochi tepeyo huan tal lomojme, ma no tamelaucatalican.

Huan campa ojquelpachme, ma momejmelahuacan.

Huan campa ojme de talcuejcuencan, ma momejmelahuacan, para ijcón huelis hual panotihualas Totecotzin.

<sup>6</sup> Huan como ijcón nanquichihuaj, ijcuacán nochi in talticpacuani quitasque in Temaquixtiyque ten Totajtzin Dios cualtitanic”.

<sup>7</sup> Huan in Juan Taahuijque quinahuía huel mías tagayot neques ten yajque concaquiliayaj itanojnotzalis. Huan in Juan quinliaya ijcuín:

—Namejuan nantacajcayahuani san queme in cohame. ¿Aconi namejuan namechnejmachtij que huelis nanmocholotisque de ne hueyi tatzacuilitis ten mo-toquijtoc ya?

<sup>8</sup> Huan namechilía que xicyecchipaucanemican para ijcón ma mota senteixteno que melau nanmoyolnemilijque de namotajtacoluan. Huan amo xicy-olnemilijtiyacan que Dios amo namechtatzacuilitis como nanquijtoaj nijín tajtolme:

“Tejuan titeixuihuan de ne huejcau tetat Abraham”. Porín xicmatican que amo tey-ica namechpalehuis ica nojón tajtolme. Porín namechyequilía que ica nijín teme no cuali huelis in Totajtzin Dios quinchijchihuas teixuihuan de Abraham ten tacuautamatinemij ihuan Dios. <sup>9</sup> Huan como amo nanmoyolnemilíaj de namotajtacoluan,

ijcuacán namejuan nanyesque queme cuoume, ten amo teyi taquij ten quimay-ohuisque ica hacha hasta ca nochi ninnaluayohuan. Huan nochi cuoume ten amo quitemaca taquilot ten cuali, in tequitini quinnaluayojtequisque huan quitamo-

tasque tech in tit ma chichinahui.

<sup>10</sup> Ijcuacán in tacaquini quitajtoltiayaj Juan ijcuín:

—Pos, ¿toni monequi ma ticchihuacan para timomaquixtisque?

<sup>11</sup> Ijcuacán in Juan quinnanquiliij ijcuín:

—Ne ten quipía ome camisa, ma quitayocoli se camisa ne ten amo semi teyi quipía. Huan ne naquen quipía ten cuasque, yejuan ne monequi ma quitayocolican tacualis ne ten amo teyi quipía.

<sup>12</sup> Huan no mochihuac que motoquijque campa yetoya Juan sequin tatopaluiani para ma in Juan quinahui. Pero nojón tatopaluiani quitajtoltiayaj Juan ijcuín:

—Tejuatzin tamachtijque, ¿toni monequi ticchihuasque no tejuan ten titatopaluiani?

<sup>13</sup> Ijcuacán in Juan quinnanquiliij ijcuín:

—Monequi que namejuan amo semi xiquinueyitopaluican in tagayot cachi oc huan que ne ten quitenahuatílaj in tequihuani.

<sup>14</sup> Huan no motoquijque campa Juan yetoya sequin soldados huan quitajoltijque Juan ijcuín:

—Huan tejuan tisoldados, ¿toni monequi ticchiutinemisque para timomaquixtisque?

Ijcuacán in Juan quinnanquiliij ijcuín:

—Amo teyi ica xiquinxijxicocan huan xiquincuilican tensá ne acsame. Huan amo no xiquinteluilican acsame ica tacajcayahualis para ijcón quinquixtilisque tomin. Ta, namechilía ximoyolpactican ica ne taxtahuil ten namechmactilíaj.

<sup>15</sup> Huan queme in pueblojuani ipa quichixtihuitze que hualas in Cristo Temaquixtijque, ica ya nojón yejuan moyoliliayaj se huan ocsé que ne Juan Taahuijque xa yejua ya in Cristo Temaquixtijque. <sup>16</sup> Pero in Juan quinajsicamatilij nochi in tagayot ijcuín:

—Huan nejua de yec melau namechahuij ica at san. Pero hualajtoc se naquen cachi quipía huelilis huan nejua niamoteyi nichiuque. Huan amo nechnamiqui nic-tojtomilis ne imetzuijconca de nitegacuan. Huan ne Yejuatzin namechquemilos huan namechylpexocaltis ica in Yecticatzin Espíritu huan no namechylchiphuas de namotajtacoluan ijcón queme in tit quichipahua tensá. <sup>17</sup> Huan ne Temaquixtijque quichihuati ijcón queme tejuan ticchihuaj cuac ticchipahuaj in trigojtet ica ne tapipitzaloni. Huan ticololoaj in trigojtet huan tiquehuaj campa trigojcal huan in tajsol ticchichinoaj. Huan tejuan como titacuatamatij ihuan ne Temaquixtijque, ijcuacán Yejuatzin techsepantalfá ihuantzin seco san. Huan neques ten amo tacuatamatij ihuatzin, yejuan nojonques quintamotasque campa tatzacuultilis de tit de amo que-man sehuis.

<sup>18</sup> Huan ica nijín tanojnotzalis in Juan quinyolmajxitiaya in tagayot huan no quinmatiltiaya den cuali Tajtoltzin de Dios. <sup>19</sup> Huan in Juan Taahuijque quimejmelahuilijca ya de toni quichiutoya in tequihua Herodes porín yejua quipoutoya queme isihuau icuñada Herodías ne ten isihuau Felipe. Ica ya nojón Juan quimejmelahuilijca Herodes, porín Felipe huan Herodes icnime san. Huan no Juan cachi oc quimachililtij Herodes que semi hueyi tajtacol porín itajtacoluan ten quichiutihuala. <sup>20</sup> Pero ne tequihua Herodes amo quicaculiaya de toni quiliaya in Juan. Ta, ne Herodes cachi oc motajtacolmacaya huan quichihuaya que ma quicárceltalican in Juan.



**Nican tajtoa de queniu Jesús Temaquixtijque  
moteahuiltij imaco Juan Taahuijque**

*(Mt. 3.13-17; Mr. 1.9-11)*

<sup>21</sup> Huan mochihuac que cuac nochi in pueblojuani moteahuiltijtoyaj ya imaco in Juan, ijcuación no in Jesús Temaquixtijque yajqui moteahuiltito imaco Juan. Huan cuac Jesús Temaquixtijque motatatautiliaya ihuan Dios, ijcuación niman tatapohuic tech ne eluiyactzinco. <sup>22</sup> Huan ijcón in Yecticatzin Espíritu hual temoaya den eluiyactzinco ijcón queme yesquía se tototzin paloma huan calayic itech Jesús. Huan no mocaquic se tajtolis den eluiyactzinco ten Yejuatzin quiytoaya ijcuín:

—Tejua tintosajconetzin, ica por Tejuatzin semi nimoyolpaquiltía axcan.

**Nican tajtoa de queniu in Lucas techtapohuía de ne  
achtopa huejcautetatme de Jesucristo Temaquixtijque**

*(Mt. 1.1-17)*

<sup>23</sup> Huan in Jesús Temaquixtijque quipiaya queme sempoal huan májtacti xihuit cuac quitzinpehualtij nitequiu. Huan in pueblojuani de Nazaret quinyolnemiliayaj que Jesús catca iconeru in José. Huan ijcón in José catca iconeru de Elí. <sup>24</sup> Huan Elí catca iconeru de Matat. Huan in Matat catca iconeru de Leví. Huan in Leví catca iconeru de Melqui. Huan in Melqui catca iconeru de Jana. Huan in Jana catca iconeru de José. <sup>25</sup> Huan in José catca iconeru de Matatías. Huan in Matatías catca iconeru de Amós. Huan Amós catca iconeru de Nahum. Huan in Nahum catca iconeru de Esli. Huan in Esli catca iconeru de Nagai. <sup>26</sup> Huan in Nagai catca iconeru de Maat. Huan in Maat catca iconeru de Matatías. Huan in Matatías catca iconeru de Semei. Huan in Semei catca iconeru de José. Huan in José catca iconeru de Judá. <sup>27</sup> Huan in Judá catca iconeru de Joana. Huan in Joana catca iconeru de Resa. Huan in Resa catca iconeru de Zorobabel. Huan in Zorobabel catca iconeru Salatiel. Huan in Salatiel catca iconeru de Neri. Huan in Neri catca iconeru de Melqui. <sup>28</sup> Huan in Melqui catca iconeru de Adi. Huan in Adi catca ijcóneru de Cosam. Huan in Cosam catca iconeru de Elmodam. Huan in Elmodam catca iconeru de Er. <sup>29</sup> Huan in Er catca iconeru de Josué. Huan in Josué catca iconeru de Eliezar. Huan in Eliezar catca iconeru de Jorim. Huan in Jorim catca iconeru de Matat. <sup>30</sup> Huan in Matat catca iconeru de Leví. Huan in Leví catca iconeru de Simeón. Huan in Simeón catca iconeru de Judá. Huan in Judá catca iconeru José. Huan in José catca iconeru de Jonán. Huan in Jonán catca iconeru de Eliaquim. <sup>31</sup> Huan in Eliaquim catca iconeru de Melea. Huan in Melea catca iconeru de Mainán. Huan in Mainán catca iconeru de Matata. Huan in Matata catca iconeru Natán. <sup>32</sup> Huan in Natán catca iconeru de David. Huan in David catca iconeru de Isaí. Huan in Isaí catca iconeru de Obed. Huan in Obed catca iconeru de Booz. Huan in Booz catca iconeru de Salmón. Huan in Salmón catca iconeru de Naasón. <sup>33</sup> Huan in Naasón catca iconeru de Aminadab. Huan in Aminadab catca iconeru de Aram. Huan in Aram catca iconeru de Esrom. Huan in Esrom catca iconeru de Fares. Huan in Fares catca iconeru de Judá. <sup>34</sup> Huan in Judá catca iconeru de Jacob. Huan in Jacob catca iconeru de Isaac. Huan in Isaac catca iconeru de Abraham. Huan in Abraham catca iconeru in de Taré. Huan in Taré catca iconeru de Nacor. <sup>35</sup> Huan in Nacor catca iconeru de Serug. Huan in Serug catca iconeru de Ragau. Huan in Ragau catca iconeru de Peleg. Huan in Peleg catca iconeru de Heber. Huan in Heber catca iconeru de Sala.

<sup>36</sup> Huan in Sala catca iconeu de Cainán. Huan in Cainán catca iconeu de Arfaxad. Huan in Arfaxad catca iconeu de Sem. Huan in Sem catca iconeu de Noé. Huan in Noé catca iconeu de Lamec. <sup>37</sup> Huan in Lamec catca iconeu de Matusalén. Huan in Matusalén catca iconeu de Enoc. Huan in Enoc catca iconeu de Jared. Huan in Jared catca iconeu de Mahalaleel. Huan in Mahalaleel catca iconeu de Cainán. <sup>38</sup> Huan in Cainán catca iconeu de Enós. Huan in Enós catca iconeu de Set. Huan in Set catca iconeu de Adán. Huan in Adán catca iconeu de Dios.

**Nican tajtoa de queniu in amocuali Satanás quitanemililtij  
Jesús Temaquixtijque ma motajtacolmacani**

*(Mt. 4.1-11; Mr. 1.12-13)*

**4** Huan Totajtzin Dios quiyolpepexocaltijtinemic Jesús Temaquixtijque ica in Yec-ticatzin Espíritu. Huan ijcón in Jesús quisteu huan quicautehuac ne ateno den monotza Jordán huan yajqui ocsecan. Huan ijcón in Yecticatzin Espíritu quiyecanac Jesús hasta ajsic ne campa tayiucan. <sup>2</sup> Huan ompa yetoto omepoal tonal huan omepoal yohual. Huan ompa in amocuali Satanás quiejecoltij itacuautamatilis de Jesús para ma motajtacolmacani. Huan tech nojón omepoal tonal amo teyi quicuaya Jesús. Huan cuac panoc ya nojón omepoal tonal, ijcuacón mayanac Jesús. <sup>3</sup> Ijcuacón in amocuali Satanás quilij Jesús ijcuín:

—Como melau Tejuatzin tion Teconetzin de Dios, ijcuacón xicnahuati nijín tet que ma mocuepa se pantzin huan xicua.

<sup>4</sup> Ijcuacón Jesús quinanquilij ijcuín:

—Quijtoa in Tajcuilolamatzin de Dios ijcuín: “In taca ma nemican amo sayó ica in tacualis san. Ta, no ma yolpepexocaltinemican ica nochi in Tajtoltzin ten Dios techmactilijtinemi”.

<sup>5</sup> Huan de ompa in amocuali Satanás cuiyac Jesús tech se hueyi tepeyo den tepapan. Huan ompa in amocuali quinextilijtihuetzic Jesús nochi in pueblojme campa tayecanaj in hueyi chihuanime de nican talticpac. <sup>6</sup> Huan in amocuali Satanás quilij Jesús ijcuín:

—Nejua huelis nimitzmactilis nochi in chicahualisme de nojón pueblojme ihuan ninueyipanchiucayot huan ninricojyot ten yejuan quipixtinemij. Porín nochi nojón chicahualis nomaco yetoc. Huan huelis nicmacas ne chicahualis aquen yesqui nicnequis nicmactilis. <sup>7</sup> Huan tacán timotancuaquetzas huan timotentocas noixpan huan no tacán tinechmohuistilis, ijcuacón nochi nijín ten tiquitztoc nimitzmactilis Tejuatzin.

<sup>8</sup> Ijcuacón in Jesús quinanquilij ijcuín:

—Niman xiyó ya, tejua tiamocuali Satanás. Porín quijtoa tech in Tajcuilolamatzin de Dios ijcuín: “Ma xicmohuistiliti Totecotzin Dios, huan sayó Yejuatzin xicmohuiscatequiltijtinemi”.

<sup>9</sup> Ijcuacón in amocuali Satanás ocsepa cuiyac Jesús tech ne pueblo de Jerusalén. Huan ompa quitejcoltij ipan ne tepamit ten cachi huejcapan ten pohui de ne hueyi tiopan de judíos. Huan Satanás quilij Jesús ijcuín:

—Como melau Tejuatzin tion Teconetzin de Dios, ximosenahua xihuetziti de nican hasta talixco.

<sup>10</sup> Huan no Satanás quilij Jesús ijcuín:

—Ijcón nimitzilía porín quijsa in Tajcuilolamatzin de Dios ijcuín: “Dios quinu-altitanis in ángeles taquehualme de Dios ma mitzyecpalehuican. <sup>11</sup> Huan ne ángeles ma mitzmatzacuilican ica ninmahuan para ma amo ximometzcojococo ica in teme”.

<sup>12</sup> Huan Jesús quinanzquilij Satanás ocsepa ijcuín:

—Pero no quijsa in Tajcuilolamatzin de Dios ijcuín: “Amo xictelpanoltis in tapalehuilis ten Totecotzin Dios moyectencahuac de techmactilis”.

<sup>13</sup> Huan cuac in Satanás quitamitanemililtij Jesús ica míac tataman tajtacol, ijcuacón mosecocaahuac de Jesús por se rato.

### **Nican tajtoa de queniu Jesús Temaquixtisque quitzinpehualtij nitequiu**

*(Mt. 4.12-17; Mr. 1.14-15)*

<sup>14</sup> Huan ijcón in Jesús Temaquixtisque quicautehuac ne campa taiucan huan yajqui ajsito campa Galileajcopaca. Huan Totajtzin Dios quiyolpepexocaltijtiyá Jesús ica in Yecticatzin Espíritu. Huan ijcón motetapohuiayaj den chichualis de Jesús Temaquixtisque campa nochi pueblojme den itatilanahuan de Galilea. <sup>15</sup> Huan ijcón Jesús Temaquixtisque quinmachtijtjinemic ica in Tajtoltzin de Dios tech nochi nin-tiopianuan den judíos. Huan ijcón nochi in pueblojuani de nojón pueblojme quihuey-imohuiscapohuayaj Yejuatzin.

### **Nican tajtoa de queniu Jesús Temaquixtisque tamachtijtjinemic tech ipueblo de Nazaret.**

*(Mt. 13.53-58; Mr. 6.1-6)*

<sup>16</sup> Ijcuacón in Jesús Temaquixtisque yajqui ajsito campa ipueblojcopaca Nazaret itech ne pueblo campa ixpetanic. Huan mochihuac que tech ne tonal de nesehuilis in Jesús Temaquixtisque calaquic tech in tiopan de judíos, ijcón queme Jesús mohuicaya. Ica ya nojón Yejuatzin moquetzac huan pehuac quinleerohuilía in tacaquini in Tajtoltzin de Dios. <sup>17</sup> Huan quimactilijcaj ya Jesús ne Tajcuilolamatzin de ne huejcau tanahuatijque Isaías. Huan ijcón Jesús quitapoj ne libro huan ompa quixajsicampa ijcuiliutoc ijcuín:

<sup>18</sup> In Totecotzin Dios nechylolpepexocaltijtjinemi ica in Yecticatzin Espíritu.

Porín Yejuatzin nechonijitac ya para niqinnojnnotztinemic ica in yancuic Tajtoltzin de Dios para nojónques tagayot ten quiyolmachilíaj que yejua pobres huan amo teyi chihuanime.

Huan Totajtzin Dios nechualtitanic nican talticpac para niqinylolsehuis neques ten yoltaxocolilme ica tajtacol.

Huan no Totajtzin Dios nechualtitanic para niqintapohuis neques ten poutocque queme yesquía presos tech nintajtacolojpan.

Huan no Totajtzin Dios nechualtitanic para niqintachialtis neques ten ixpojpojome porín nintajtacoluan quinixpojpojocuiltitoc.

Huan no Totajtzin Dios nechualtitanic para niqintacajcahualtis neques ten tzijtzi-cautocque ica in cadenas de tajtacol.

<sup>19</sup> Huan no Totajtzin Dios nechualtitanic para niqintapohuis in talticpacuani que ej-coc ya in xihuit cuac Totajtzin Dios ipaquilis de quinmaquixtis in talticpacuani.

<sup>20</sup> Ijcuacón in Jesús Temaquixtisque quitetecuiñoj ne Tajcuilolamatzin huan quimactilij ne tiopan tapalehuijque, huan de ompa mosehuij Jesús. Huan nochi in

tiopan tacaquini quisentocayaj quisenitztoyaj Jesús. <sup>21</sup> Ica ya nojón Jesús pehuac quinnojnnotzac ijcuín:

—Huan axcan hueyi melau que nijín tanahuatil de Dios motamichihuac ya namoixpan, que nejua nican niyetoc nejuatzin ne tanahuatijque de Dios ten namejuan nanquichixtoyaj que ma hualani.

<sup>22</sup> Huan nochi nojón tacaquini quimohuiscapohuayaj Jesús huan no quimouca-caquíaj de ne itajtolan ten cualcuía neteicnelilis de Dios. Huan nojón tacaquini motatajtoltiyaj ijcuín:

—¿Xe amo vejua nijín iconeu ne José?

<sup>23</sup> Huan ijcón Jesús quilij ijcuín:

—Achá acsá yetos ten quinequis nechilis ica nijín tapohuil ten quijtoa ijcuín: “Tejua titepajtijque monequi ximopajti tejua san”. Huan no nechilisquíaj ijcuín: “Titectaquilijque que ticchihuac míac mohuiscatequime de Dios nepa campa pueblo Capernaum. Huan axcan ticnequij xicchihua nican tech mopueblojcopaca”.

<sup>24</sup> Huan no Jesús quinlij ijcuín:

—Yec melau namechilía que amo aquen quimohuiscapohuaj se tanahuatijque de Dios tech ipueblojcojpacca campa ixpetanic. <sup>25</sup> Huan namechyequilía tech nojón tonalme cuac nemico in tanahuatijque Elías, ijcuacón oncayaj miacque sihuacahualme campa pueblojuani de Israel. Huan tech nojón tonalme amo quiohuía eyi xiutica huan chicuasen metzti. Ica ya nojón oncaya hueyi máyanti tech nojón pueblojme. <sup>26</sup> Pero Totajtzin Dios amo cualtitanic Elías para quinpalehuis nión senme de nojón sihuacahualme ten calyetoyaj campa pueblojme de Israel. Pero, quema, Totajtzin Dios cualtitanic Elías para quipalehuis se sihuacahual ten calyetoya campa Sarepta ten pohuía tech in pueblo de Sidón, masqui ne sihuat amo catca pueblojcat de Israel. <sup>27</sup> Huan tech nojón tonalme cuac nemico in tanahuatijque Eliseo, ijcuacón oncayaj míac cocoyani campa pueblojme de Israel ten cocotocatoyaj innacayo. Huan ne Eliseo amo aquen quinpajtij tech nojón ipueblojcahuan den cocoyani. Ta, sayó quipajtij in cocoxque ten monotzaya Naamán. Huan vejua pohuía de Siriajcopaca huan amo catca pueblojcat de Israel.

<sup>28</sup> Huan cuac quicacque nochi nijín tanojnotzalis, ijcuacón nochi in tacaquini ten yetoya tiopanijtíc mohueyiyolcualantijque. <sup>29</sup> Huan ijcón vejua moyolchicauque huan mosenpanixejecoltijque, huan de ompa quiquixtijque Jesús tech nojón pueblo de Nazaret. Huan ijcón cuiyacque Jesús hasta ne tepeyecapan ya porín in pueblo de Nazaret quichichucaj ipan ne tepetzintan. Huan ompa quinequíaj quipantamatihue Jesús. <sup>30</sup> Pero in Jesús Temaquixtijque panotiquisac intzalan den ne tagayot huan mochololtij.

**Nican tajtoa de queniu Jesús Temaquixtijque quipajtij  
se tagat ten quipía ya se amocuali ejecat**

*(Mr. 1.21-28)*

<sup>31</sup> Huan ijcón in Jesús yajqui huan ajsito campa pueblo de Capernaum ten ititalanal Galilea. Huan ompa pehuato quinmacthiaya ica in Tajtoltzin de Dios ne pueblojuani tech in tonalme de nesehuilis. <sup>32</sup> Huan ijcón ne pueblojuani de Capernaum quihueyimoucaquíaj de Jejuatzin nitamachtilis porín Jesús quinmacthiaya ica hueyi chicaucahuelilis.

<sup>33</sup> Huan tech nojón tiopan de judíos ompa yetoya se tagat ten quiapiaya iyolijtic se amocuali ejecat ten pitzotic. Huan ne amocuali ejecat sepan san quiontzajtzilij Jesús ijcuín:

<sup>34</sup> —Xitechtapatahuili huan amo xitechcuejmoloqui. ¿Toni ticpía tohuan, Jesús de Nazaret? ¿Xe tejua tihuala para titechpolos? Nejua cuali nimitzixmati aconi tejua, tionyeticatzin de Dios.

<sup>35</sup> Ijcuacón Jesús quitacahualtij ne amocuali ejecat huan quilij ijcuín:

—Ximotentamatili huan xiquisa tech vejua.

Ijcuacón ne amocuali ejecat quitalpantamotac ne tagat inixpan ne tiopantacaquini. Huan de ompa ne amocuali ejecat quistehuac de ne tagat, pero amo teyi ica quicojcojoteu. <sup>36</sup> Ijcuacón nochi ne tiopantacaquini mohueyiyolmoutijque huan monojnotzayaj se huan ocsé ijcuín:

—¿Toni chicachualis cualcui itajtoluan de Jesús para huelis quicalanquixtilis ne amocuali ejecat? Porín tiquitaj que nijín Jesús quipía huelilis para quinnahuatis in amocuali ejecame ma calan quisacan. Huan yejuan quitacamatij huan calan quisaj.

<sup>37</sup> Huan ijcón cachi oc motejtapohuiayaj den ihuelilis de Jesús Temaquixtijque tech nochi nojón pueblojme ten quiyehualojtoya Capernaum.

### **Nican tajtoa de queniu Jesús Temaquixtijque quipajtij imonan in Simón Pedro**

*(Mt. 8.14-15; Mr. 1.29-31)*

<sup>38</sup> Ijcuacón in Jesús Temaquixtijque quisac de nojón tiopanijtic huan yajqui calaquito ichan in Simón. Huan ompa Jesús quitac que imonan Simón que huetztoya ica hueyi totonic. Ica ya nojón ichancahuan de Simón quitatautijque Jesús que ma quipajti. <sup>39</sup> Huan ijcón in Jesús motoquij campa in cocoxque huan quipanixitac. Huan de ompa Jesús quitacahualtij huan quixtopehuac nojón totonic. Ijcuacón nimantzin ne totonic quitacahuilij ne cocoxque. Huan niman cuac quitacahuilij ya in totonic, ijcuacón nimantzin meutiquisac ne imonan de Pedro huan pehuac quintamac icalpanocahuan.

### **Nican tajtoa de queniu Jesús Temaquixtijque quipajtij mías cocoyani cuac pancalaquic in tonaltzin**

*(Mt. 8.16-17; Mr. 1.32-34)*

<sup>40</sup> Huan nochi in pueblojuani de ne Capernaum quinpixtoyaj cocoyani tech ninchan de mías tatamanocolisme. Huan cuac pancalatoya ya in tonaltzin, ijcuacón quinalcuicque campa Jesús yetoya nojón cocoyani. Huan ijcón Yejuatzin momasohuaya inpan nojón cocoyani huan ijcón nochi yejuan quinpajtiaya. <sup>41</sup> Huan ijcón no quisayaj miacque amocuali ejecame tech ninyolojtic de ne cocoyani. Huan nojón amocuali ejecame chicaucatzajtzíaj huan quiliayaj Jesús ijcuín:

—Tejuatzin, tion Teconetzin de Dios ten Motajtzin.

Pero in Jesús Temaquixtijque quintacahualtij nojón amocuali ejecame ma amo tajtojcan oc porín yejuan cuali quimatque que Jesús Yejuatzin ya in Cristo Temaquixtijque.

**Nican tajtoa de queniu Jesús Temaquixtijque  
quinnojnnotztinemic in tagayot Galileajcopaca**

(Mr. 1.35-39)

<sup>42</sup>Huan imostica cuac tanesic ya, ijcuacán in Jesús Temaquixtijque quisac tech nojón pueblo huan yajqui campa se lugar tayiucan. Pero in pueblojuani quite-mojtinemíaj Jesús hasta yejuan cajsique campa Yejuatzin yetoya. Porín yejuan quinequíaj quilochtisque oc que ma mocahuani inuan oc. <sup>43</sup>Pero in Jesús quinilij ijcuín:

—Semi monequi ma niquintetapohuiti ocsequin pueblojuani huan niquinnexiliti de queniu quimonequiltía Dios ma momasouto ica ihueyichahualis tech se iyolijitc. Porín nijín tequit yejica ya Dios nechualtitanic ma nicchihua.

<sup>44</sup>Huan ijcón quichiutinemic Jesús tanojnnotztinemía ica in Tajtoltzin de Dios tech in tiopan de judíos ten poutocque Galileajcopaca.

**Nican tajtoa de queniu Jesús Temaquixtijque quichihuac  
se mohuiscatequit inixpan in tamaajsini**

(Mt. 4.18-22; Mr. 1.16-20)

**5** Huan mochihuac que se tonal in Jesús Temaquixtijque nentinemía ne atenteno-jcopaca de Genesaret. Huan huel míac tagayot cajsitoj Jesús hasta quipejpechi-ayaj porín yejuan quinequíaj quicaquisque in tanojnnotzalis den Tajtoltzin de Dios. <sup>2</sup>Huan mochihuac que Jesús quinitac ome barcos de apanolonime ne atenteno ten amo aquen yetoyaj tech nojón barcos. Porín ne tamaajsini temocaj ya de ne barcos quinixpacayaj ne ninatarrayas. <sup>3</sup>Ica ya nojón in Jesús calaquito tech senme de nojón ome barcos, ne barco pohuía ihuan in Simón. Huan ijcón Jesús quitatautij Simón ma quitzinquixti ibarco campa apanían. Huan de ompa niman Jesús motalij tech in barco huan pehuac quinmachtía in tagayot ica in Tajtoltzin de Dios desde ne apanían. <sup>4</sup>Huan cuac in Jesús quintaminonotzac ya in ica in Tajtoltzin de Dios, ijcuacán Jesús quilij Simón ijcuín:

—Xicuican nijín mobarco nepa campa cachi ahuejcatan. Huan ompa xiquintamotacan namoatarrayas para ijcón nanquinqitizquisque in pescados.

<sup>5</sup>Ijcuacán in Simón quinanquilij ijcuín:

—Pero tamachtijque, tejuan titequititocque nochi yohual ya, huan ayamo timinaxilíaj pescados. Pero tejua motanahuatil, cuali huelis tictamotasque toatarrayas.

<sup>6</sup>Huan cuac quitamotque ya niatarraya, ijcuacán quinqitizquijque tel miacque pescados hasta in atarraya pehuac ixcocotoca. <sup>7</sup>Ijcuacán in tequitini tech nojón barco de Simón, yejuan peuque quinixnotzaj nintequiticaicnihuan tech in ocsé barco para ma huiqui quinpalehuiquij. Huan ijcón ne nintequiticaicnihuan hualajque quin-palehuicoj. Huan quinololojque in pescados huan quincalaquijque tech in ome barcos hasta nesi que quinequíaj pancalaquisque in barcos. <sup>8</sup>Huan cuac in Simón quitac ya nochi nijín ten mochihua, ijcuacán motancuaquetzac iixpan Jesús huan quilij ijcuín:

—Notecotzin, ximosecakahua de nejua, porín nejua nitajtaCole.

<sup>9</sup>Huan Simón quichihuac ijcón porín mohueyiyolmoutij ca nojón ten quitac. Huan no moyolmoutijque nochi in tequitini ten ihuan Simón tequititinemíaj sayó porín quinqitizquijque huel míac pescados. <sup>10</sup>Huan no moyolmoutijque Jacobo huan

Juan, yejuan teconejuan de Zebedeo huan yejuan catcaj ipa tequiticaicnime de Simón. Pero in Jesús quinojnotzac ijcuín:

—Tejua Simón, amo ximoyolmoutij porín nican para taixpan nimitznextiliti de queniu tiquintemojtinemis tagayot para ma nechtacamatican, ijcón queme ay tiquintemojtinemi pescados.

<sup>11</sup> Huan cuac quínuiyac ya ninbarcos ne atenteno, ijcuación in Jacobo huan Juan huan Simón quicauteuque ninbarcos huan yajque quitocotilijque Jesús para mochachtisque itanextililis de Yejuatzin.

**Nican tajtoa de queniu Jesús Temaquixtijque quipajtij  
se cocoxque ten cocotocatoya ninacayo**

*(Mt. 8.1-4; Mr. 1.40-45)*

<sup>12</sup> Huan mochihuac se tonal que yetoya Jesús Temaquixtijque tech se pueblo ten itatilanal de Galilea. Huan ejcoc tech ne pueblo se cocoxque ten cocotocatoya ninacayo. Huan cuac in cocoxque quitac Jesús, ijcuación yejua motoquij huan motancaquetzac huan moixacatentocato hasta talixco huan quitatautij Jesús ijcuín:

—Totecotzin, como ticonmonequiltía, cuali tionhuelis tinechonchipahuas de nijín pitzotic nococolis.

<sup>13</sup> Ijcuación in Jesús momatilanac huan quimatocac in cocoxque huan quilij ijcuín:  
—Nicnequi ma tejua xionchipahuac ya de mococolis.

Huan cuac Jesús ijcón quilij, ijcuación nimantzin quisac ne cocolis den inacayo cocotocatoya huan mochahuac chipactzin ne tagat. <sup>14</sup> Huan ijcón Jesús quichicaucahuatij ijcuín:

—Xiquita, amo aquen teyi xictapohui. Ta, sayó xiyó ximotenextiliti ihuan ne tiopixcame judíos de que tichipahuac ya. Huan de ompa xiquinmactiliti Dios ne tetayocolil ijcón queme Moisés tanahuatiaya para ne cocoyani ten tapajtirme ya de ne cocotoca ninacayo. Huan ijcón ixnesis innahuac mopueblojchahuan de que tichipahuac ya de mococolis.

<sup>15</sup> Huan ijcón cachi oc motetapohuiayaj nohuiyampa den ichicaucahuelilis de Jesús. Huan mosentiliayaj huel míac tagayot para quicaquilisque tenica quinnojnnotzaya. Huan no motoquíaj huel míac tagayot campa Jesús yetoya para ma Yejuatzin quinpajtij de nincocolisuan. <sup>16</sup> Pero icsá in Jesús Temaquixtijque mosecocaahuac den tagayot huan yaya campa taiucan para ompa motatatautilis ihuan Dios.

**Nican tajtoa de queniu Jesús Temaquixtijque  
quipajtij se cocoxque de ninacayo sepoutoc ya**

*(Mt. 9.1-8; Mr. 2.1-12)*

<sup>17</sup> Huan mochihuac se tonal que Jesús tamachtiaya ica in Tajtoltzin de Dios. Huan campa nojón tamachtijtoya ompa tocotzyetoya sequin tamatinime fariseos huan ya sequin tanextiliani ica in tanahuatil de Moisés. Huan nojón tamatinime huan tanextiliani hualajque de míac pueblojtitzin de itatilanal de Galilea huan no de Judea huan de Jerusalén de itatilanahuan. Huan in chicaucahuelilis de Totecotzin Dios monextiaya itech Jesús Temaquixtijque cuac Yejuatzin quinpajtíaya in cocoyani. <sup>18</sup> Huan mochihuac que sequin taca cualcuiliaya Jesús se cocoxque ten nochí ninacayo tami sensepoutoc ya huan amo huelía nejnemía. Huan cualcuiayaj ne cocoxque tech se petatzin. Huan ne taca quinequíaj quicalaquitihue in cocoxque

ne calijtic para ompa quitalijtihue in cocoxque iixpan Jesús. <sup>19</sup> Pero yejuan amo huelíaj quicalaquisque in cocoxque para ejcosque campa yetoya Jesús, porín nocta míac tagayot mosentilijcaj ya. Ica ya nojón yejuan tejcocque calcuaco huan quicu-  
atapouque in cali. Huan ompa quipantemoltijque in cocoxque ihuan nipet huan  
quitalijque intzalan in tagayot ne campa iixpampa Jesús. <sup>20</sup> Huan cuac Jesús quitac  
nintacuaumatilis de nojón nahui taca, ijcuacón Yejuatzin quilij in cocoxque ijcuín:

—Tejua tagatzin, motajtacoluan nimitzintapojpoluilí ya.

<sup>21</sup> Huan ne fariseos huan in tanextiliani de tanahuatil de Moisés, cuac yejuan  
quicacquilijque Jesús nijín tajtolme, ijcuacón yejuan peuque voltanemilíaj huan mo-  
tatajtoltiayaj ijcuín: “¿Aconi nijín tagat ten quimohuiscapoloa Totajtzin Dios ica ni-  
jín tajtolme? ¿Aconi huelis tetapojpoluis tajtacol? Ta, sayó Dios hueli tetapojpoluí”.

<sup>22</sup> Huan ijcón in Jesús niman quinyolojixmatía de que ijcón voltanemiliayaj ne  
tanextiliani. Ica ya nojón Jesús quinilij ijcuín:

—¿Queyé ijcón nanyoltanemilíaj? <sup>23</sup> Huan namechilí que amo ohui ma niquilis  
nijín cocoxque ijcuín: “Motajtacoluan nimitzintapojpoluí ya”. Pero no namechilí  
que cachi ohui ma niquili nijín cocoxque ijcuín: “Ximehua de mocochope huan  
xinenemi”. Huan yejua ya nijín cachi ohui porín ixnestinemi senteixteno cox melau  
pajtic ya oso amo. <sup>24</sup> Huan como cuali hueli nicpajtis nijín cocoxque, ica ya no-  
jón Nejuatzin nicnequi namechyecmatiltía que Nejuatzin ya ni Yectagatzin de Dios.  
Huan no nicpía tanahuatil de Dios nican talticpac para niquintapojpoluis naquen  
motajtacolmagacque ya.

Huan de ompa Jesús quilij in cocoxque ten ninacayo tamisensepoutoc ijcuín:

—Tejua cocoxque, nimitzilí ximehua, xicui motapech huan xiyó mochan.

<sup>25</sup> Ijcuacón nimantzin in cocoxque moquetzac senteixteno huan quicuic nitapech  
campa huetztaya huan yajqui ichan huan ijcón quimohuistilijtiyá Totajtzin Dios.

<sup>26</sup> Huan ijcón nochi in tacaquini quihueyimoucaitacque ten mochihuac huan quimo-  
huistiliayaj Totajtzin Dios. Huan ica hueyi yolmohuisyot quijtoayaj ijcuín:

—Axcan hueyi melau tiquitacque ya se hueyi mohuiscatequit de Dios.

### **Nican Jesús Temaquixtijque quinzac Leví ma quitocili Yejuatzin**

*(Mt. 9.9-13; Mr. 2.13-17)*

<sup>27</sup> Huan satepan cuac quitamichihuac nijín mohuiscatequime, ijcuacón Jesús calan  
quisac huan ompa quitac se tatopaluijque ten monotza Leví. Huan in Leví to-  
cotzyetoya caltteno campa quintopaluiaya in pueblojuani. Huan ijcón Jesús quilij  
in Leví ijcuín:

—Xinechtoctiliti huan ximomachtiqui nohuan.

<sup>28</sup> Ijcuacón in Leví moquetztiquisac huan quicahuac nitequiu campa ne tocotzi-  
taya huan yajqui quitocilito Jesús.

<sup>29</sup> Huan cachi satepan in Leví quiluichihuilij Jesús ompa ichan. Huan ijcón ompa  
mosentilijque míac itatopaluijcaicnihuan huan ocsequin taca para ompa sepan  
tacasque. <sup>30</sup> Huan tech ne iluit in fariseos huan in tanextiliani ica in tanahuatil  
de Moisés, yejuan nojonques peuque quintejtenehuayaj ne imomachtijcahuan de  
Jesús. Huan quintajtoltijque imomachtijcahuan de Jesús ijcuín:

—¿Queyé namejuan nantacuj huan nantayij ihuan ne tatopaluiani huan ne oc-  
sequin tajtaclejque ten amo quitacamatij in tanahuatil de Moisés?

<sup>31</sup> Ijcuacón Jesús quinnanquilij ijcuín:



—In tagayot ten mopohuaj yolpactocque, yejuan nojónques amo monequi tepajtijque. Ta, namechilía que sayó in cocoyani monequi tepajtijque. Ica ya nojón axcan Nejuatzin ninuan nisentacujtoc nijín tatopaluiani, porín yejuan queme yesquía cocoyani. <sup>32</sup> Nejuatzin amo nihuala niquintemoco naquen mopohuaj yolchipauque. Ta, Nejuatzin nihuala nican talticpac para niquintemos tajtaclejque para ma yejuan ma moyolnemilican de nintajacoluan.

**Nican tajtoa de queniu quitajoltijque Jesús  
Temaquixtijque cox monequi mosahuasque**

*(Mt. 9.14-17; Mr. 2.18-22)*

<sup>33</sup> Ijcuación ne tamatinime quilijque Jesús Temaquixtijque ijcuín:

—Ne imomachtijcahuan de Juan Taahuijque, yejuan semi mosautinemij huan semi motatautilijtinemij. Huan ijcón no quichiutinemij imomachtijcahuan den fariseos. Pero tejuia momomachtijcahuan, ¿queyé yejuan quisentocaj tacuajtinemij huan tayitinemij vino ihuan nojón tajtaclejque?

<sup>34</sup> Huan ijcón in Jesús ocsepa quinanquilij ijcuín:

—Como yetoc oc in teyoquich ¿queniu huelis se quinilis ma mosahuacan neques tajjitalme ten hualajque monechicojque para se nenamictilis? Huan no ijcón amo nihuelis niquinilis in nomomachtijcahuan ma mosahuacan como Nejuatzin ihuan niyetinemi oc. <sup>35</sup> Pero queman hualas ne tonal cuac in teyoquich cajchihuasque ya, ijcuación tech nojón tonalme huelis mosahuasque. Huan no tech nojón tonalme cuac nechajchihuasque huan nechmictisque, ijcuación cuali nanmosahuasque ya.

<sup>36</sup> Huan ijcón ocsepa Jesús quinmachiya ica ocsé nexcuitil ijcuín:

—Xiquitacan que amo aquen quicotonas se cachol de se yancuic tasal para ica quitasaluis se soltic tasal. Ipa amo semi yec cualtía ihuan ne tasal den yancuic huan ne soltic tasal para quitasaluisque. Porín como ijcón quichihuasque, ijcuación ne yancuic tasal ijtaahuis ya. Huan no ne tzictzin yancuic tasal amo semi yec cualnesi ihuan ne soltic tasal. <sup>37</sup> Huan amo no aquen quipantecas in yancuic vino tech in cuetaxsolme. Porín in yancuic vino, yejua ne mochicahualtis huan atzitzicasquisas. Huan ijcón cuali huelis quitzayanas in cuetaxsol huan mimilahuís nochi in vino. Huan ijcón cachi ijtaahuis in cuetaxsol. <sup>38</sup> Pero in yancuic vino se quitequilía yejua ne den yancuic cuetaxme. Huan ijcón nión in vino huan nión in cuetaxme ijtaahuisque. <sup>39</sup> Huan nochi ten cuelitaj tayisque ne vino ten cuali mochicahualtij ya, yejuan nojónques amo cuelitaj tayisque nojón yancuic vino. Porín quijtoaj que ne vino ten mochicahualtij ya que yejua ya cachi cuali. Huan no ijcón mochihua que nochi neques ten cuelitzinemij in taneltocalis de huejcaucayome queme yesquía vino den mochicahualtij ya, yejuan nojonques amo nechcaquilisque cuac nejuia niqinmactis se yancuic taneltocalis.

**Nican tajtoa de queniu imomachtijcahuan de Jesús  
Temaquixtijque quiajocucque trigojtet tech in tonal de nesehuilis**

*(Mt. 12.1-8; Mr. 2.23-28)*

**6** Huan se tonal Jesús Temaquixtijque panotiaya campa tatocala ica trigojtet tech se tonal de nesehuilis. Huan mochihuac que imomachtijcahuan quiyolcopintiyaj nijín trigo huan icacauyo quixtiyay ica imahuan huan de ompa quicuayaj ne

niteyo. <sup>2</sup>Ijcuacón sequin tamatinime fariseos quintajoltijque imomachtijcahuan de Jesús ijcuín:

—¿Queniu namejuan nantequitinimij ica nojón tequit tech ne tonal de nesehuilis? Porín ne itanahuatil de Moisés tetacahuatlía.

<sup>3</sup>Huan in Jesús quinilij ijcuín:

—¿Xe namejuan amo queman nanquileerojque ten quichihuac in rey David huan itapalehuijcahuan cuac mayanque? <sup>4</sup>Huan in rey David calayic tech ichantzín Dios huan quincuc huan quincuj ne panes ten quitajicaj ya iixpantzinco Dios para ica quimohuistilisque Yejuatzin. Huan Dios amo quimonequiltij ma acsá quicuani nojón panes nión in rey David huan nión nitapalehuijcahuan. Ta, sayó ma quicuani ne panes in tiopixcame judíos.

<sup>5</sup>Huan no Jesús quinilij ijcuín:

—Xicmatican ca cuali que Nejuatzin ni Yectagatzin de Dios huan Nitayecancatzin de ne tonal den nesehuilis. Huan Nejuatzin nicpixinemi tanahuatil para niteilis toni cualtías se quichihuas tech ne tonal de nesehuilis.

### **Nican tajtoa de queniu Jesús Temaquixtijque quipajtij se cocoxque de mamijmiquilotic**

*(Mt. 12.9-14; Mr. 3.1-6)*

<sup>6</sup>Huan mochihuac que ocsepa se tonal de nesehuilis Jesús Temaquixtijque calayic campa se tiopan de judíos huan ompa tamachtiaya ica in Tajtoltzin de Dios. Huan ompa tiopanijtic tocotzyetoya se tagat cocoxque ten iyecmay mamijmiquilotic catca.

<sup>7</sup>Huan no ompa tiopanijtic tocotztoyaj sequin tamatinime fariseos huan tanextiliani den tanahuatil de Moisés. Huan yejuan nojonques sayó quipijpixinemíaj Jesús para quitasquáj cox melau Jesús quipajtisquía nojón cocoxque tech ne tonal de nesehuilis. Huan tacán Jesús quipajtisquía ne cocoxque, ijcuacón in tamatinime cachi oc quipiasquáj tensá tamachilis tenica quiteluilisque Jesús de amo quitacamati in tanahuatil de ne tonal de nesehuilis. <sup>8</sup>Pero Jesús quintamachilisixmatía nojón tamatinime. Ica ya nojón Yejuatzin quilij ne cocoxque ten mamelaxuaquía ijcuín:

—Ximehua huan ximoquetzaqui tatajco den tacaquini.

Huan melau ne cocoxque quichihuac ijcón; yejua mehuac huan moquetzac den tatajco den tacaquini. <sup>9</sup>Ijcuacón Jesús quinilij in tacaquini ijcuín:

—Nicnequi namechtajoltis ijcuín: ¿Cox Dios quimonequiltía ma ticchihuacan ten cuali tech in tonal de nesehuilis? oso, ¿ma ticchihuacan ten amocuali chihualis? oso, ¿ma ticmaquixtican se inemilis? oso, ¿ma tiquixpolocan se inemilis?

<sup>10</sup>Huan ijcón Jesús quinsenixitaya nochi neques ten quiyehualojtoya. De ompa Jesús quilij in tagayot cocoxque ijcuín:

—Ximomamelahua.

Huan ijcón in cocoxque momamelahuac imay huan de ompa ne imay pajtic. <sup>11</sup>Ica ya nojón ne tamatinime mohueyiyolcualantijque. Huan peuque moyoliliayaj se huan se ijcuín: “¿Toni huelis ticchihuilisque ne Jesús? para ma amo ay tamachtijtinemis oc?”

**Nican Jesús Temaquixtisque quinijitac in majtactionmome  
imomachtijcahuan ma quitociltican Yejuatzin**

*(Mt. 10.1-4; Mr. 3.13-19)*

<sup>12</sup> Huan tech nojón tonal Jesús Temaquixtisque yajqui campa se tepelomojtzin para motatautilis ihuan Dios. Huan ompa yetoya nochi se yohual motatautilitoya ihuan Itajtzin Dios. <sup>13</sup> Huan cuac tanesic ya, ijcuacón Jesús quinnotzac imomachtijcahuan ma motoquican campa Yejuatzin yetoya. Ijcuacón Jesús quinijitac majtactionmome de nimomachtijcahuan huan quinquemactij ma yesque itatitaniluan de Jesús. <sup>14</sup> Huan Jesús quinijitac yejuan nijinques: in Simón ten cojpatocaytiayaj Pedro. Huan no quijitac Andrés, yejua iicniu de Simón. Huan no Jesús quinijitac Jacobo huan Juan huan Felipe huan Bartolomé. <sup>15</sup> Huan no Jesús quinijitac Mateo huan Tomás huan Jacobo, yejua teconeu de Alfeo. Huan no Jesús quinijitac Simón ten pohúa ihuan in taca polícticos ten yolchicauque. <sup>16</sup> Huan no Jesús quijitac Judas, yejua ten iicniu Jacobo. Huan no Jesús quijitac in Judas Iscariote ne ten quitemactij Jesús ma quimictican.

**Nican tajtoa de queniu Jesús Temaquixtisque  
quinmachiya huan quinpajtiya huel míac tagayot**

*(Mt. 4.23-25)*

<sup>17</sup> Huan ijcón in Jesús temoc de ne tepelomo ihuan imomachtijcahuan huan mochihuac que Yejuatzin milochtij oc ihuan imomachtijcahuan tech se hueyi tamanis. Huan ompa yetoya huel míac tagayot ten hualayaj de míac tataman pueblojme de itatilanal Judea huan Jerusalén. Huan no hualayaj huel míac tagayot ten calyetocque campa pueblojme de Tiro huan Sidón ten atatenojcopaca. Huan ne tagayot hualayaj para quicaquilisque Jesús nitanojnotzalis. Huan no hualayaj ya para ma quinpajti Jesús de nochi nincocolisuan. <sup>18</sup> Huan nochi neques ten tajyohuijtinemíaj ica in pitzotic amocuali ejecame, yejuan nojonques Jesús quinpajti. <sup>19</sup> Huan nochi in cocoyani quinequíaj quimatocasque Jesús porín Yejuatzin quinpajtiya sayó ica ihueyichicahualis ten pepexocatinemi itech Yejuatzin.

**Nican Jesús Temaquixtisque quinmactij in tagayot de ne taca ten  
tatiochihualme de Dios huan de ne taca ten amo tatiochihualme**

*(Mt. 5.1-12)*

<sup>20</sup> Ijcuacón Jesús quinsenixitac imomachtijcahuan huan quinmachiya ijcuín:

—Nantatiochihualme de Dios namejuan ten pobres ten amo teyi nanchihuanime, porín namejuan Dios cuali namechyolyecanas ica ihueyichicahualis. <sup>21</sup> Huan no nantatiochihualme de Dios namejuan ten nanmayantinemij axcan, porín namejuan Dios cuali namechycyolpexontijtyas ica ne ten monequi. Huan no nantatiochihualme de Dios namejuan ten axcan nanmoyolcocoaj, porín Dios quichihuas que nanmoyoluelitasque ica yolpaquilis. <sup>22</sup> Huan no nantatiochihualme de Dios namejuan cuac in tagayot namechtahuelitztinemisque huan mosecocaahuasque de namejuan. Huan no nantatiochihualme de Dios cuac in tagayot namechquejueloaj huan cuac namechtejtenehuasque que amo nancualime. Huan ijcón nanquinchihuilijtocque porín nantacautamatij itech notocay Nejuatzin ni Yectagatzin de Dios. <sup>23</sup> Huan tech ne tonal cuac namechtajyohuiltisque, ijcuacón namejuan ximohueyiyolpactican huan ximo-

huelitacan porín xicmatican que nanquipiatihue se hueyi tetayocolil de Dios nepa eluiyactzinco. Huan no xicmatican que ijcón queme axcan namechmohuispoloaj in tagayot, no ijcón namohuejcautatuan quinmohuispolojtihualajque ne itanahuatijcahuan de Dios.

<sup>24</sup> Huan semi nanteicneltijque namejuan ten nanricojme porín namechnamiqui xicselican in tatzacuultilis de Dios. Huan xicmatican que axcan tamitiyás ya nochi namoricojo tenica nanmoyolpactijtihualajque. <sup>25</sup> Huan semi nanteicneltijque namejuan ten nanixuitocque huan amo nanquimachilijtinemij máyanti. Porín se tonal xicmatican que nanquimachilisque ne hueyi máyanti, huan ijcón amo huelis oc nanixuisque oc. Huan no semi nanteicneltijque namejuan ten axcan nanyoluetzcatinemij porín nanquixiptinemij nochi ten monequi. Pero se tonal nanmoyolcosque huan nanhocasque. <sup>26</sup> Huan semi nanteicneltijque namejuan cuac namechmohuiscahuasque nochi in tagayot, porín no ijcón ne namohuejcautatuan quinmohuiscahouque ne tacajcayahuan tanahuatiani.

**Nican Jesús Temaquixtijque quinajsicamatiltij imomachtijcahuan de que ma tiqintasojtacan neques ten techtahuelitztinemij**

*(Mt. 5.38-48; 7.12)*

<sup>27</sup> Huan Jesús quinilij imomachtijcahuan ijcuín:

—Huan namejuan ten nannechcaquilijtocque nijín tamachtilis, namechilía que Xiquintasojtacan neques ten namechtahuelitztinemij. Huan no xiquinpalehuican neques ten namechtajyohuiltijtinemij. <sup>28</sup> Huan xictajtaniclan Dios ma Yejuatzin quintapojpolui neques ten namechuijuicaltijtinemij. Huan no ximotatautilican ica por neques ten namechmohuispolojtinemij. <sup>29</sup> Huan tacán mitzcamatatzinis acsá, ijcuacán xicuepa moixco ma mitzcamatatzini ocseco. Huan tacán acsá no mitzcuilisnequi motaquen, ijcuacán xicahuili ma cuica motaquen hasta no mocamisa. <sup>30</sup> Huan tacán acsá quinequi mitztajtaniclis tensá, ijcuacán xicmacati. Huan tacán acsá mitzcuilis ten tejua moaxca, ijcuacán amo xiquiliti oc que ma mitzcuepili ne ten moaxca catca. <sup>31</sup> Huan xiquinchihuilican mopueblojcahuan ijcón queme no namejuan nanquinequisque que yejuan ma namechchihuilican.

<sup>32</sup> Huan como nanquitasojtatinemij sayó neques ten namechtasojtaj, ijcuacán amoteyi cualtagayot nanquichihua. Porín xicmatican hasta neques ten amo yolchipauque no ijcón quichiutinemij; yejuan quintasojtatinemij sayó neques ten quintasojtaj. <sup>33</sup> Huan como nanquinpalehuijtinemi sayó neques ten namechpalehuáj, ijcuacán amo teyi cualtagayot nanquichihua. Porín xicmatican hasta neques ten amo yolchipauque no ijcón quichiutinemij; yejuan quinpalehuijtinemij sayó neques ten achtopa quinpalehuijque. <sup>34</sup> Huan como nanquintaneutíaj tensá sayó neques ten namejuan no nanquinyolnemilíaj que ocsepa namechcuepilis, ijcuacán amo teyi cualtagayot nanquichihua. Porín no xicmatican que ne taca ten amo yolchipauque, yejuan nojonques no quintaneutíaj tensá ocsequin taca ten yolcualime para ijcón quiselisque ocsé achi oc.

<sup>35</sup> Pero namejuan monequi xiquintasojtacan neques ten namechtahuelitztinemij; huan yejuan no xiquinpalehuijtinemican. Huan no xiquintaneutican tensá, pero amo xicchihuacan que ocsepa namechcuepilisque. Huan como ijcón nanquichiutinemij, ijcuacán Dios namechmactilis se hueyi tetayocolil. Huan ijcón ixnestinemis ya que namejuan nanpoutinemij ihuan Dios in cachi hueyi chiuque. Porín nanta-

palehuijtinemij ijcón queme Yejuatzin quichiutica. Porín Totajtzin Dios Yejuatzin no semi quinyolicnelía neques ten amo yolchipauque huan ten amo motasojcamatij ihuantzin. <sup>36</sup> Ica ya nojón namejuan namechilía que xiquinyolicnelijtinemican ijcón queme Namotajtzin Dios techyolicnelijtinemij tinochin.

**Nican Jesús Temaquixtijque quinajsicamatiltij in tacaquini de que ma amo tiquinixcomacacan huan ma amo tiqintelchihuacan acsame**

(Mt. 7.1-5)

<sup>37</sup> Huan no Jesús quinilij imomachtijcahuan ijcuín:

—Huan amo xiquinixcomacatinemican acsame para ma Totajtzin Dios ma amo no ijcón namechixcomacas. Huan amo no xiqintelchiutinemican in acsame para ma Totajtzin Dios ma amo no ijcón namechtelchihuas. Ta, namechilía cachi cuali xiquintapojpoluican acsame para ma Totajtzin Dios no ma ijcón namechtapojpolui. <sup>38</sup> Xitetayocolijtinemican aquen yesqui ihuan para ma Totajtzin Dios no namechtayocolis ten namejuan nanquimonequiltisque. Huan como ijcón nanquichihuaj, ica ya nojón Totajtzin Dios namechtayocoliti huel mías ijcón queme cuac se quiyecpexonti in chiquihuit ica tensá huan se quinpanteltalía huan se quitzejtzeloa hasta pipixahuiqui. Huan no ijcón Totajtzin Dios namechtayocolis ten monequis. Ne tamachiu de teicnelilis ten namejuan nanquicuitinemij ya para nanquintayocolisque ocsequin, yejua ne Totajtzin Dios quicuis para namechtayocolijtiyás ten namejuan nanmonequij.

<sup>39</sup> Huan in Jesús quinmachiya imomachtijcahuan ica nexcuitil huan quiniliayaj ijcuín:

—¿Mangán se ixpojpooyot huelis quiyecanas se ixpojpooyocniu? Pues, amo. Porín como ijcón quichihuaj, yejuan nojonques sen huetzitihue tech ne talcoyoc. <sup>40</sup> Huan no namechilía que se momachtijque, yejua ne amo cachi hueyi chiuque huan que nitamachtijcau. Ta, nochí neques ten moajsicamachtijtiyohue, yejuan nojonques, quema, quinejnehuililtijtiyohue nintamachtilis de nintamachtijcau. <sup>41</sup> Ica ya nojón amo huelis ticyequitilis se teuti actoc iixtololoco ne mocnitzin como tejua amo timomaca cuenta de que no mitzixtzacuilijtoc se hueyi cuoutzontet. Huan no ne teuti queme se tajtacol ten amo mota huan ne cuoutzontet queme yesquía se hueyi tajtacol. <sup>42</sup> Huan no amo huelis tiquilis ne mocniu ijcuín: “Nocniu, ma nimitzquixtili nojón teuti ten ticpía moixtololoco”, como tejua amo achto ticmachilía ne hueyi cuoutzontet ten no mitzixtzajzacuilijtoc. Porín como amo ticmachilía ne ten mitzixtzajcuilijtoc, ijcuacón tejua tiixcucueptoc san ica motamachilis. Ta, cachi cuali ximoquixtili achtopa ne cuoutzontet ten mitzixtzajzacuilijtoc huan ijcón huelis tiyequitas ya ne teuti ten quipía mocniu ne ixtololoco. Huan ijcón huelis ya tiquixtilis.

**Nican tajtoa de queniu Jesús Temaquixtijque quinajsicamatiltij imomachtijcahuan de ne cuohuit ten moixmati ica itaquilohuan**

(Mt. 7.17-20; 12.34-35)

<sup>43</sup> Huan no Jesús quinmachiya imomachtijcahuan ijcuín:

—Amo teyi se cuali cuoutactzon ten quitemaca taquilot ten chichic. Huan amo no ongac se chichic cuoutactzon ten huelis quitemacacas cuali taquilot. <sup>44</sup> Porín cada se cuouhuit moixmati ica itaquilohuan. Huan no cuali nanquinyequixmatisque ya nojón tacajcayahuani ica ne tachihualis ten yejuan quichiutinemij. Huan amo huelis

cajocuisque higosxocot como quitocaj huitzme. Huan amo no huelis cajocuisque uvasxocot campa quitocaj huatzap.<sup>45</sup> Huan in tagat ten yolchipahuac, yejua ne itech iyolijtic momoyautoc yolchipahualis, huan yejua quiquixtia sayó ne tamachilisme ten cuali. Huan in tagat ten amo yolchipahuac, yejua ne itech iyolijtic momoyautoc ica tajtacol huan yejua quiquixtia sayó itamachilisuan ten motzojcuilotijtoc ica tajtacol. Huan namejuan nanyolpexontinemij ica m'iac tataman tamachilisme. Huan hualeutoc itech ne namotamachilisuan nochi tajtolme ten namejuan nanquijtoaj.

**Nican Jesús Temaquixtijque quinajscamatiltij  
imomachtijcahuan de ne omen taman tatzinehualonime**

(Mt. 7.24-27)

<sup>46</sup> Huan Jesús quinilij imomachtijcahuan ijcuín:

—Huan ¿queyé namejuan nannechnotzaj que Ninamotecotzin, como amo nanquitacamatij ten nejua namechilijtoc? Pues amo melau que Ninamotecotzin ya.

<sup>47</sup> Huan ne naquen nechtoctiliqui huan nechcaquilía huan nechtacamatis nochi ten nicanajhuatis ma xicchiutinemi, yejua ne melau tacuautamatinemi nohuan.

<sup>48</sup> Huan ne ten tacuautamatinemi nohuan, yejua ne quinejnehuilía se tagat ten quichijchihua ichan. Achto tachcua huejcatan ne tagat huan quitalij in tatzinehualonime tech se hueyi tesohuil. Huan cuac huejueyacque ya in hueyiamé, ijcuacán in at quimamagaya ne cali. Pero in at amo huelic quiolinij ne cali porín quiapiaya se itatzinehualoni tech se hueyi tesohuil.<sup>49</sup> Pero ne taca ten amo nechcaquilía oc huan amo quitacamatij ten niquinnahuatía, yejuan nojonques quinejnehuilíaj queme se tagat ten quichijchihua ichan campa yoca tal san huan amo teyi quitalía tatzinehualoni. Ica ya nojón cuac huejueyiyacque in hueyiamé, ijcuacán in at quimamagaya ne cali. Huan niman ne caltzin sen tami cacapaxhuetzic.

**Nican tajtoa de queniú Jesús Temaquixtijque  
quipajtij se taquehual den capitán romano**

(Mt. 8.5-13)

**7** Huan cuac Jesús quintamimachtij ya nijín tagayot ten quicaquiliayaj, ijcuacán Yejuatzin yajqui ajsito campa pueblo Capernaum.<sup>2</sup> Huan tech nojón pueblo Capernaum yetoya se tayecanque soldado romano. Huan ne tayecanque soldado romano quiapiaya se itaquehual ten semi quitasojtaya. Huan ne taquehual semi moco-coaya huan yetoya para miquis.<sup>3</sup> Huan ne tayecanque soldado romano quitecaquilijque de ichicahualisuan Jesús. Ica ya nojón yejua quintitanic sequin huehuentzitzin den pueblojuani de Israel para ma yejuan quitatautitij Jesús ma yohui quipajtiti ne itasotequiticau den soldado romano.<sup>4</sup> Huan ijcón in huehuentzitzin yajque huan motoquitoj campa yetoya Jesús. Huan ompa pehuatoj quitatautiayaj Jesús huan quiliayaj ijcuín:

—Semi quinamiqui que tejuatzin xicpalehuiti ne tayecanque soldado.<sup>5</sup> Porín yejua semi techyoltasojtatinemij tejuan tipueblojuani de Israel. Huan ijcón tiqijtoaj porín yejua tanahuatij ma techchijchihuilican se tiopan ica yejua itomintzin.

<sup>6</sup> Ijcuacán Jesús yajqui ihuan ne huehuentzitzin. Huan cuac ajsitiayá ya ichan ne tayecanque soldado, ijcuacán ne tayecanque soldado quintitanic sequi itasojc-nihuan ma quilican Jesús ijcuín:

—Totecotzin, amo semi ximoyolcuejmolojtihuitz oc porín amo nechnamiqui que xicalaquiti campa toyecahuiltzin porín Tejuatzin tihueyichiuque.

<sup>7</sup> Huan no ne tasojcicnime quilijque Jesús ijcuín:

—Toteco quijtoa ijcuín: “Amo nechnamiqui nimoixehuis que ma nejua niquisa huan nimitznamiquti san porín Tejuatzin cachi tihueyichiuque. Ta, Tejuatzin sayó xihualtanahuati ma pajti notaquehual campa tionyetoc, huan ijcón notaquehual nenquentis”. <sup>8</sup> Huan no quijtoa toteco ijcuín: “Nejua no nitatacamati ten nechnaj-nahuatíaj. Huan nejua no niquinnajnahuatía nosoldados ma nechtacamatican. Huan nicnahuatía se soldado que ma xiyó, huan yejua yohui. Huan nicnahuatía ocsé soldado que ma xihuiqui, huan yejua huitza. Huan no cuac nicnahuatía notaquehual que ma quichihuati tensá tequit, ijcuacón yejua quichihuas”.

<sup>9</sup> Huan cuac Jesús quicayic nijín tajtolis, ijcuacón Yejuatzin quimoucacaquic huan moicancuepac huan quiniliaya in tagayot ten cualtoctiliayaj ijcuín:

—De yec melau ten namechilía que intzalan nochi ne pueblojuani de Israel amo aquen nicajsic ten quipía in yec tacuautamatilis queme quipía nijín tayecanque soldado romano.

<sup>10</sup> Huan cuac ne tenotzani yajque mocuepque ya ninchan, ijcuacón yejuan cajsito ne taquehual pajtic ya.

### **Nican tajtoa de queniu Jesús Temaquixtijque quipanquixtij voltoc ne oquichpil de se sihuacahual ten calyotoc campa pueblo Naín**

<sup>11</sup> Huan mochihuac que satepan Jesús yajqui ajsito campa se pueblo ten monotzaya Naín. Huan quisehuicayaj huan quiyehualojtiayaj imomachtijcahuan de Jesús huan no huel míac tagayot. <sup>12</sup> Huan cuac Jesús ajsitiaya ya tech ne pueblo Naín, ijcuacón quitac que sequi tagayot cuicayaj se ánimajtzin quitalpachotij. Huan ne ánima catca iyotzin conetzin de ne sihuacahual. Huan no míac pueblojuani de Naín quisehuicayaj ne ánima. <sup>13</sup> Huan cuac Jesús quitac ne sihuacahual, ijcuacón Yejuatzin semi quiyolicnelij huan quilij ijcuín:

—Amo ximochocti oc.

<sup>14</sup> Ijcuacón Jesús motoquito campa ne ánima huan de ompa quimatocac ne ánima-jcajon. Huan ijcón moquetzque ne naquen quimamajtiayaj in ánimajcajon. Ijcuacón Jesús quilij ne ánima ijcuín:

—Tejua telpoch, nimitzilfa, ximehua.

<sup>15</sup> Ijcuacón ne telpoch ten micca ya, yejua ne mehuicatalij huan pehuac tajtoa. Huan ijcón Jesús ocsepa quimactilij ne inan. <sup>16</sup> Huan cuac in tagayot quitacque nochi nijín, ijcuacón yejuan mohueyimoucaitacque. Huan de ompa peuque quimohuistil-iyaj Totajtzin Dios huan no quijtoayaj ijcuín:

—Se hueyi tanahuatijque de Dios hual quisac ya totzalan. Huan no Totajtzin Dios hual temoc ya para techpalehuis tejuan tiipueblojcahuan.

<sup>17</sup> Huan motetapohuj de ichicaucahuelilis de Jesús tech nochi pueblojme ten ititalanal Judea huan tech nochi pueblojme ten quiyehualojtoyaj Judea.

**Nican tajtoa de queniu imomachtijcahuan de Juan  
Taahuijque yajque quinojnotzatoj Jesús Temaquixtijque**

(Mt. 11.2-19)

<sup>18</sup> Huan in imomachtijcahuan de Juan Taahuijque, yejuan nojonques quimatiltijque in Juantzin de nochi ten Jesús quichiutinemic. Ica ya nojón in Juan Taahuijque quinnotzac ome imomachtijcahuan. <sup>19</sup> Huan Juan quintitanic ne imomachtijcahuan campa yetoya Jesús. Huan yejuan quitajoltijque Jesús ijcuín:

—¿Cox melau Tejuatzin Ti Cristo tanahuatijque de Dios ten hualasquía? ¿Oso cox ticchiasque oc ma huiqui ocsé tanahuatijque oc de Dios?

<sup>20</sup> Ijcuacán imomachtijcahuan de Juan motoquijque campa yetoya Jesús huan quilijque ijcuín:

—¿In Juan Taahuijque techualtitanic para ma timitztajtoltican cox Tejuatzin ya ti Cristo Temaquixtijque ten hualasquía? ¿Oso cox monequi ticchiasque ocsé oc tanahuatijque ma huiqui?

<sup>21</sup> Huan tech nojón hora cuac ejcocque imomachtijcahuan de Juan, ijcuacán Jesús pehuac quinpajtiaya míac cocoyani de nincocolisuan huan de ninchiahuisuan. Huan no Jesús quincalanquixtiliaya in amocuali ejecame. Huan no quintachialtiaya miacque ixpojpyome. <sup>22</sup> Ica ya nojón Jesús quinanquilij neimomachtijcahuan de Juan ijcuín:

—Huan axcan xiyacan ya huan xicmatiltitij in Juan de nochi notachilisuan ten namejuan nanquitacque ya huan nochi ten nanquicacque ya. Huan no xictapohuican de queniu nanquitacque que in ixpojpyome Nejuatzin niquintachialtij ya. Huan in coxojme axcan niquinnejnemiltij ya. Huan in necocoyani ten cocotocatoya ninacayo, axcan Nejuatzin niqinchipahuac ya huan niquinpajtij ya. Huan naquen amo tacaquía, yejuan axcan niquintacaquiltij ya. Huan in taca ten momiquilijcaj ya, axcan niquinpanquixtij ya voltocque. Huan neques ten ixnestinemij que pobres huan amo teyi chihuanime, yejuan nojón niquinnextilijtoc in yancuic Tajtoltzin de Dios ten cualcui ne nemaquixtilis. <sup>23</sup> Ica ya nojón tatiochihualme de Dios nochi neques de amo quitahuelcaquij huan amo moyolxocolfaj cuac quicacquij notajnojnotzalis.

<sup>24</sup> Huan cuac yajque ya imomachtijcahuan de Juan Taahuijque, ijcuacán Jesús pehuac quinnojnotza in tagayot de toni chiuque ne Juan Taahuijque. Huan Jesús quiniliaya ijcuín:

—¿Toni nanquitatoj campa ne Juan tanojnotzayaj nepa campa tayiucan? ¿Xe nanquisque para nanquitatoj se tagat ten yolmoucat ten quinejnehuilía queme acasetot ten nepa huan nepa cuihuica in ejecat? <sup>25</sup> Huan como amo ijcón nancajsique, ¿toni nanquitatoj? ¿Xe nanquisque para nanquitatoj ne tagat ten taquentoc ica tilma ten semi cualtzin? Xiquitacan san, namejuan nanquimatij ya que neques ten motaque-ntíaj huan mocualnextíaj ica cuajcuali taquenme, yejuan nojonques yetocque sayó campa in inchanuan de huejueyime tayecanani reyes huan ompa mopaquiltijtine-  
mij ica míac tataman tanejnequilis. <sup>26</sup> Huan como amo ijcón nancajsisque, ¿cachi oc toni nanquisque para nanquitatoj? ¿Xe nanquisque para nanquitatoj se tanahu-  
atijque de Dios? Quema, ijcón melau nanquitatoj. Huan no namechilía que ne Juan  
Taahuijque, yejua ya in cachi hueyi chiuque huan que nochi in ocsequin tanahua-  
tiani de Dios ten nemicoj ya. <sup>27</sup> Porín tajtoa tech in Tajcuilolamatzin de Dios que  
Yejuatzin quinojnotztoc Cristo Temaquixtijque de ne Juan Taahuijque huan quijtoj



ijcuín: “Xiquitacan san, Nejuatzin nictitani se notanahuatijcau huan yejua mitzachtouhijtiyás para mitzyejectalilijtiyás moojpan”.

<sup>28</sup> Huan de yec melau no namechilía que amo aquen ongac ocsé cachi hueyi chiuque de nican talticpac. Ta, sayó ne Juan Taahuijque. Pero axcan se tagat ten amo hueyi chiuque ten motemactij imaco Jesús ma Yejuatzin quiyecana inemilis, yejua ne cachi hueyi tatiochihualis quiselijtiyás huan que ne Juan Taahuijque quiselij. Huan axcan ne Juan Taahuijque amo hueyi chiuque oc. <sup>29</sup> Ijcuacán nochi in tagayot tacaquini huan nochi in tatopaluiani ten quicacquilijtoyaj Jesús, nochi yejuan moteahuiltijque ihuan Juan porín cajsicamatque que yejuan tajtaclejque iixpantzinco Totajtzin Dios. Huan ijcón yejuan quichiuque porín quiyolnemilijque que Totajtzin Yolmelahuactzin huan quinamiqui ma quichihuacan nochi ten Yejuatzin tanajnahuatía. <sup>30</sup> Pero neques tamatinime fariseos huan in tanextiliani den tanahuatil de Moisés, nochi yejuan amo moteahuiltijque ihuan Juan huan no amo cajsicamatque que cox yejuan tajtaclejque. Ica ya nojón yejuan quixtopeuque nochi in tapalehuilis tenica Totajtzin Dios quinequía quinmaquixtis.

<sup>31</sup> Huan Jesús quinmachtij in tagayot ica nijín nexcuitil ijcuín:

—Huan, ¿toni niqunnejnehuilitía in tagayot ten nijín tonalme nemij? ¿Queniu tamati ninnemilipan? <sup>32</sup> In tagayot ten axcan nemij niqunnejnehuilitía queme coneme ten motalijtinemij tech in plaza huan tzajtzitinemij ihuan ocsequin coneme ten ninuan mahuiltijtinemij. Huan senme de ne coneme quilisque ocsequin ijcuín: “Tejuan ticnequíaj namohuan timahuiltisque, huan ticnequíaj tejuan tamechtatzotzoniliayaj huan no tamechtapichiliayaj, pero namejuan amo nanquinecque tohuan nanmijtotisque. Huan no tamehcantarohuiliayaj ica ocsequin canciones ten tetayocoltía. Pero namejuan amo nanchocacque”.

Huan no Jesús quinilij in tagayot ijcuín:

—Ijcón queme ne coneme sayó tejjitojtinemíaj, namejuan sayó nantatejtehuanime san. <sup>33</sup> Porín cuac huala Juan Taahuijque, ijcuacán yejua ne amo tel tacuaya nión tayaya ne vino queme namejuan. Ica ya nojón namejuan nanquijtojque que ne Juan quipíaya iyolijtic se amocuali ejecat. <sup>34</sup> Huan cuac Nejuatzin nihuala ya, Nejuatzin ni Yectagatzin de Dios, ijcuacán nitacuaya huan nitayaya vino. Huan no ijcón namejuan nannechijtohuiliayaj ijcuín: “Xiquitacan san ne tagat Jesús, yejua ne tel tacua huan tel tayitinemi vino huan no ihuan motasojtatinemi neques ten tatopaluiani huan no motasojtatinemi ihuan neques ten amo quitacamati in tanahuatilde de Moisés”. <sup>35</sup> Huan in Tajtoltzin de Dios technextiliaya ijcuín: “Dios itanemililis monextijtiyás tech in chipaucanemilis de nochi neques ten tacuautamatij ihuan Dios”.

### **Nican tajtoa de queniu Jesús Temaquixtijque quicalpanoto se fariseo ten monotza Simón**

<sup>36</sup> Huan senme den tamatinime fariseos quiyolehuac Jesús que ma tacuati ichan. Huan melau in Jesús yajqui ichan ne fariseo huan motalito campa yetoya mesa. <sup>37</sup> Huan mochihuac que se sihuat ahuilnenque calyetoya tech ne mismo pueblo campa yetoya Jesús. Huan cuac in sihuat quitecaquilij que Jesús yajqui tacuato ichan ne fariseo ten monotza Simón, ijcuacán ne sihuat yajqui huan cuiyac se conztzin ten temitoya ica sequi aceite ten cualtzin ajuiyac. <sup>38</sup> Huan ijcón in sihuat mo-toquij campa Jesús imetznacastan huan ompa pehuac choca huan hasta ica iixayo quimetzapachoaya Jesús. Huan de ompa pehuac quimetzuajuatza ica itzon.

Huan ijcón quitenamiquía imetzuan Jesús huan quimetzoxiliaya ica aceite ne ten cualtzin ajuiyac. <sup>39</sup> Huan ne fariseo ten quiyolehuac Jesús ma tacuati ihuan, cuac yejua ne quitac toni quichihuac ne sihuat, ijcuación yejua pehuac quiyolnemiliaya ijcuín: “Tacán nijín tagat Jesús yec melau yesquía se tanahuatijque de Dios, ijcuación yejua momacasquía cuenta aconi ne sihuat ten quimetzmajmatocac, huan no quimatisquía toni nemilis cuicatinemi ne sihuat, que yejua se sihuahuilnenque”.

<sup>40</sup> Ijcuación in Jesús quilij ne fariseo ijcuín:

—Tejua Simón, nicnequi nimitzilis se taman tajtol.

Huan in fariseo quinanquilij ijcuín:

—Xinechonili motamachilis.

<sup>41</sup> Huan ijcón Jesús quinextili ica nexcuitil ijcuín:

—Ome taca quitahuiquiliayaj se tataneutijque ica tomin. Huan senme de nojón taca quitahuiquiliaya macuil ciento denario de tomin, yejua in taxtahuil para macuil ciento tonal tequit quixtahuasquía. Huan in ocsé tagat quitahuiquiliaya sayó tajco ciento denario, yejua in taxtahuil para omepoal huan májtacti tonal tequit. <sup>42</sup> Huan queme nojón taca amo huelíaj quitaxtahuilisque ne tomin tataneutijque, ica ya nojón yejua in tataneutijque quintapojpoluij, huan ijcón quincahuilij nintahuicalis. Huan axcan semi nicnequi xinechili, de ne ome taca quiyoltasojtasque ne tomin tataneutijque, ¿catiyejua cachi quiyoltasojtas?

<sup>43</sup> Huan ne Simón quinanquilij Jesús ijcuín:

—Pues, nejua niquixejcoa que yejua ne tagat ten cachi quitahuiquiliaya ne iteco, yejua ne cachi quitasojtac ne tomin tataneutijque.

Ica ya nojón Jesús tananquilij ijcuín:

—Yec melau ten tiquixejcoa.

<sup>44</sup> Ijcuación in Jesús connacascaitac in sihuat huan quilij in Simón ijcuín:

—¿Xe amo tiquita nijín sihuat? Cuac nejua nicalaquico nican mochan, ijcuación tejua amo tinechmactilij at tenica nimometzpaipacasquía. Pero nijín sihuat nechmetzapachoj ica iixayo huan nechmetzuajuatzac ica nitzon. <sup>45</sup> Huan no cuac nicalayic nican mochan, ijcuación tejua amo tinechtemnamiquic para nechtajpalos. Pero nijín sihuat amo mocahua de amo quitennamiquis nometzuan. <sup>46</sup> Huan no cuac nicalayic, ijcuación tejua amo tinechcuaojxilij aceite, pero nijín sihuat, quema, nechmetzojxilijtoc aceite ten ajuiyacayot. <sup>47</sup> Ica ya nojón nimitzilí que nijín sihuat yejua tapojpoluil ya de Dios de nitajacoluan, masqui yejua quichiutinemic míac tajtacoluan. Ica ya nojón yejua cachi nechtasojta. Pero se tagat ten amo quiyolmachilía que cox tajtacole, yejua nojón tepitzin san monequi ma nictapojpoluí. Huan como tepitzin nictapojpoluis, ica ya nojón ne tagat tepitzin nechtasojta.

<sup>48</sup> Ijcuación Jesús quilij in sihuat ijcuín:

—Motajtacoluan nimitzintapojpoluilij ya.

<sup>49</sup> Huan neques ten tocotziutoyaj ihuan Jesús campa tacuajtoyaj, yejuan nojonques peuque moiliayaj se huan ocsé ijcuín:

—¿Toni chiuque nijín tagat ten quinemilía que huelis quintapojpoluis in tajtacol den tagayot?

<sup>50</sup> Pero Jesús ocsepa quilij in sihuat ijcuín:

—Huan queme titacautamatic ya nohuan, ica ya nojón Dios mitzmaquixtij ya. Huan axcan xiyó ya xinemiti ya ica ne hueyi yolsehuilis de Dios.

**Nican tajtoa de queniu nijín sihuame quitequiliayaj Jesús Temaquixtijque**

**8** Huan mochihuac que satepan cuac Jesús quisac ichan Simón, ijcuación Yejuatzin panotiaya campa miacque pueblojme huan hasta no miacque pueblojtztitzin. Huan ompa Jesús tanojnotztinemía huan quintapohuiaya in tagayot ten Tajtoltzin de Dios ten techmachtía de queniu Dios techyolyecantinemi ica ihueyichicahualis. Huan in majtactiomome imomachtijcahuan quisehuicayaj. <sup>2</sup> Huan no quisehuicayaj Jesús sequin sihuame ten Jesús quincalanquixtilij ya in amocuali ejecame huan ten Jesús quinpajtijca ya de nincocolisuan. Huan ompa tatzalan yaya in María ten monozaya Magdalena, ten Jesús quicalanquixtilijca chicome amocuali ejecame. <sup>3</sup> Huan no tatzalan yaya in Juana, yejua isihuau de Chusa ten itayecancataquehual den rey Herodes. Huan no quisenhuicayaj Jesús in Susana huan ocsequin miacque sihuame. Huan yejuan ica nintomin quinpalehuijtinemíaj Jesús huan imomachtijcahuan ica ten mopialiyaj.

**Nican tajtoa de queniu Jesús Temaquixtijque quitalij se nexcuitil de se tagat ten tateputinemic ica trigotet**

*(Mt. 13.1-9; Mr. 4.1-9)*

<sup>4</sup> Huan míac pueblojuani quisque huan quitatoj Jesús. Huan cuac mosentilijque míac tacaquini, ijcuación Jesús pehuac quinnojnotzac ica se nexcuitil huan quiniliaya ijcuín:

<sup>5</sup>—Se tonal se tagat quisac para quitepehuas in tatoc de trigojtet. Huan cuac quitepehuac ya, ijcuación mochihuac que cansaica huetzic in tatoc ojtenteno. Huan ijcón quitojtzonicsacque huan hualajque in tototzitzin ten patantinemij ejecaixco huan quicuacoj. <sup>6</sup> Huan ocsecan cansaica huetzic in tatoc de trigo campa ongac míac tet. Ica ya nojón cuac panquisac ya ne tatoc, ijcuación huayic in tatoc porín amo quipiayaj cuechahualis. <sup>7</sup> Huan ocsecan cansica huetzic in tatoc de trigojtet huitzalan. Ica ya nojón in huitzti ixuac itzalan in tatoc huan quipachoj. <sup>8</sup> Huan ocsecan cansaica huetzic in tatoc de trigojtet campa cualital. Huan ompa ixuac huan quitemacac míac taquilome hasta motaquiltij se ciento taquilome de se tatoc san.

Huan cuac Jesús quintamiilij nijín nexcuitil, ijcuación Yejuatzin ocsepa quinchicaucauilij ijcuín:

—Naquen quipía inacasuan para tacaquis, ma yec tacaqui huan ma cajsicamati nijín tanextililis.

**Nican tajtoa de queniu Jesús Temaquixtijque quinmejmelauielij imomachtijcahuan queyé Yejuatzin tamachtij ica nexcuitil**

*(Mt. 13.10-17; Mr. 4.10-12)*

<sup>9</sup> Ijcuación imomachtijcahuan de Jesús quitajtojtijque Yejuatzin ijcuín:

—¿Toni quijtosnequi nijín nexcuitil ten titechonnexutilij ya?

<sup>10</sup> Huan ijcón Jesús quinnanquilielij ijcuín:

—Dios namechmatiltijtoc ya namejuan nannomomachtijcahuan de ne tamachilisme ichtapachiutoya de queniu Dios namechyolyecantinemi ica ihueyichicahualis. Pero in ocsequin tagayot ten amo poutinemij ihuan Dios, yejuan nojonques Dios amo quinajsicamatiltis. Huan yejuan nojonques niqinmachtía ica nexcuitilme para ma yejuan ma amo quitacan huan ma amo cajsicamatican

notanexutilis. Huan como yejuan amo yec taneltocaj, ica ya nojón yejuan masqui quitasque nochicahualisuan, pero amo quimatilisque. Huan no masqui yejuan caquisque notanexutilisuan, pero amo cajsicamatisque.

**Nican Jesús Temaquixtisque quinajsicamatiltij imomachtijcahuan in nexcuitil den tagat ten tatepohua ica trigojtet**

*(Mt. 13.18-23; Mr. 4.13-20)*

<sup>11</sup> Huan nijín nexcuitil den tatepeuque quijtosnequi ijcuín:

—Ne trigojtet, yejua ne in Tajtoltzin de Dios. <sup>12</sup> Huan sequin tacaquini yetocque ojtenteno. Huan ne yejuan quicaquij in Tajtoltzin de Dios. Pero huitza in amocuali Satanás huan quinajchihuilía in Tajtoltzin de Dios tech ninyolijtic para ma amo quiyecneltocacan in Tajtoltzin de Dios, huan para ma amo maquisacan den nintajtacoluan. <sup>13</sup> Huan ocsequin trigojtet huetzic campa tejteixco trigojtet. Huan ne, yejua ne no quinejnehuilía sequin tacaquini den Tajtoltzin de Dios. Huan yejuan niman quiselíaj in Tajtoltzin de Dios ica míac paquilis. Pero queme yejuan ayamo quipíaj cuali tacuautamatilis queme yesquía se naluat ten huejcatan totoc, ica ya nojón yejuan tacuautamatinemij sequin tonalme san. Huan cuac nintech ejcoc ya in tajyohuilis, ijcuacón yejuan niman moyolxocolíaj huan quisecohauaj in Tajtoltzin de Dios. <sup>14</sup> Huan ocsequi trigojtet huetzic huitzalan. Huan ne tatoc ten huetzic huitzalan, yejua ne quinejnehuilía ocsequin tacaquini ten Tajtoltzin de Dios. Huan yejuan quisentocaj tech mismo ninnemilispán queme ipa. Huan moyolcuejmolojtinemij oc ica míac tenesi. Huan quinyoltilantoc oc in ricojyot. Huan no mopaquiltijtinemij oc tech nintanejnequilis. Ica ya nojón amo quitacahuilíaj in Tajtoltzin de Dios ma moscalti huan ma cuica taquilome. <sup>15</sup> Huan ocsequi trigojtet huetzic tech cualital. Huan ne tatoc ten huetzic campa cualital, yejua ne quinejnehuilía ocsequin tacaquini den Tajtoltzin de Dios. Huan yejuan quicaquij in Tajtoltzin de Dios porín yolyemanque huan porín quimachilíaj se yoltanejnequilis de quiselitiasque in Tajtoltzin de Dios. Ica ya nojón yejuan mopixtolijtinemij in Tajtoltzin de Dios huan quisentocaj tacuautamatiyohue. Huan ijcón yejuan quitemacatiyohue huel míac taquilome.

**Nican Jesús Temaquixtisque quitallij se nexcuitil de se tahuil ten quitatijque**

*(Mr. 4.21-25)*

<sup>16</sup> Huan no Jesús quinmachtiaya imomachtijcahuan ijcuín:

—Amo aquen quixotaltía se tahuil para niman quipantzacuas ica se contzin. Huan amo no se quitallis in tahuil tatampa in cama. Ta, se quixotaltía ne tahuil huan se quitallía campa tasempayan para ijcón naquen calaquisque calijtic, yejuan nojonques cuali tachiasque. <sup>17</sup> Porín amo ongac teysi tejsá nexcuitil de Dios ten mocahuas ichtacayot san. Ta, yejua ne quipía de que ixnesis. Huan amo no ongac teysi nexcuitil de Dios ten motatijtihualaya de que ma amo quipía de que monextis huan quimatisque nohuiyampa. <sup>18</sup> Xictalican cuidado huan ximoyecaquiltican nijín tajtol. Porín nochi neques ten quipíaj in tamachilis de Dios huan quitequitiltíaj, yejuan nojonques cachi oc Dios quinmactilis. Pero ocsequin tacaquini quipíaj tzietzin san tamachilis de Dios huan amo quitequitiltíaj in tepitzin san ten quipíaj. Ica ya nojón yejuan nojonques Dios quintamicuilis ne tepitzin ten yejuan quinemilía que quipixtinemij.

**Nican tajtoa de queniu in nantzin huan niicnihuan de  
Jesús Temaquixtíjque hualajque quitemocoj Yejuatzin**

*(Mt. 12.46-50; Mr. 3.31-35)*

<sup>19</sup> Ijcuacán inantzin de Jesús huan iicnihuan ajsicque campa yetoya Jesús. Pero yejuan amo huelíaj cajsitihue Jesús porín huel míac tagayot quintzajtzacuiliayaj Yejuatzin. <sup>20</sup> Pero se acsá quinejmachtij Jesús ijcuín:

—Monantzin huan mocnihuan yetocque ne calan huan yejuan quinequij mitzitasque.

<sup>21</sup> Ijcuacán Jesús tananquiliij ijcuín:

—Xiquitacan ca cuali huan ximatican que Nejuatzin niquinpohua queme nonantzin huan queme nocnihuan nochi neques ten quicaquij huan quitacamatine-mij in Tajtoltzin de Notajtzin Dios.

**Nican tajtoa de queniu Jesús Temaquixtíjque  
quitamatilij in hueyi tetzaucaejecat**

*(Mt. 8.23-27; Mr. 4.35-41)*

<sup>22</sup> Huan mochihuac que se tonal calayic Jesús tech se barco ihuan imomachtijcahuan huan quinilij ijcuín:

—Ma ticpanocan ne sentapalpa de nijín hueyíat.

Huan melau ijcón quichiuque huan yajque. <sup>23</sup> Huan cuac nejnentoyaj ya in barco apantoyaj ya, ijcuacán mochihuac que Jesús pehuac cochi. Huan de ompa pehuaco se tetzaucaejecat huan chichahuac taejecaya tech in hueyíat. Ica ya nojón pehuac in at calaqui tech in barco huan pexontihualaya ya. Ica ya nojón tamahuilil ya para pan-calaquis in barco. <sup>24</sup> Ica ya nojón imomachtijcahuan yajque quixxititoj Jesús huan quilijque ijcuín:

—Totamachtijcau, totamachtijcau, xiquita que tipolihuitij ya.

Ijcuacán Jesús ixpetanic huan quitacahualtij ne tetzaucaejecat huan in hueyíat ten mocuentecaya. Huan ijcón niman nochi motatamatilij huan in hueyíat mocahuac ijcón amanis. <sup>25</sup> Ijcuacán Jesús quinilij imomachtijcahuan ijcuín:

—¿Can yetinemi namotacuautamatilis?

Huan ijcón ne imomachtijcahuan mohueyiyolmoutiayaj huan quimoucaitacque ten quichihuac Jesús. Ica ya nojón yejuan motajoltiayaj se huan ocsé ijcuín:

—¿Toni chiuque nijín tagat? Porín yejua quínahuatij ne ejecat huan ne hueyíat huan yejuan quitacamataque.

**Nican tajtoa de queniu Jesús Temaquixtíjque quipajtij se tagat de  
pueblo Gadara ten quiapiaya iyolijtic se amocuali ejecat**

*(Mt. 8.28-34; Mr. 5.1-20)*

<sup>26</sup> Huan ijcón Jesús huan imomachtijcahuan ajsitot ne sentapalpa de hueyíat campa calyetoya in pueblojuani de Gadara atenteno den hueyíat Galilea. <sup>27</sup> Huan cuac Jesús temoc talixco ya den barco, ijcuacán quinamiquico Jesús se tagat den pueblojcat de Gadara. Huan yejua desde míac tonalme ya quiapiaya iyolijtic miacque amocuali ejecame. Huan ne tagat amo taquentinemía huan nión no calyetinemic cal-ijtic. Ta, yejua nentinemía campa ánimajtecochme. <sup>28</sup> Huan ne tagat ten quiapiaya in

amocuali ejecame, cuac quitac Jesús, ijcuacón chicahuac tzajtzc huan motancua-quetzac iixpan Jesús huan quichicaucailiaya ijcuín:

—Tejua Jesús, ¿toni ticpía nohuan Jesús? Porín Tejuatzin cuali nimitzixmati, Tejuatzin Titeconetzin de Dios in cachi hueyi chiuque. Nimitzteltatautía de que amo xinechtajyohuiliti.

<sup>29</sup> Huan ne amocuali ejecat quiytoayaj ijcón porín Jesús ipa quinahuatijtoya ya que ma quisani tech iyolijtic de ne tagat. Huan desde míac tonalme neamocuali ejecat quiquitziya huan quiyojyolpolihuiltij ne tagat. Ica ya nojón in pueblojuani quitzacuacaj huan quimatziiztzojcaj huan quimetztziiztzojcaj ica tepos cadena para ijcón amo huelis cholos. Pero ipa ne tagat quicojcotonaya ne tepos cadenas huan in amocuali ejecat quinejnemiltij in tagat huan quichololtij hasta campa taseltijcan. <sup>30</sup> Ijcuacón Jesús quitajtoltij ne amocuali ejecat ijcuín:

—¿Toni motocay?

Huan in amocuali ejecat quinanquilitij ijcuín:

—Notocay yej nijín, Telmiacque.

Huan ijcón tananquilitij porín míac amocuali ejecame calacaj iyolijtic ne tagat. <sup>31</sup> Huan ijcón ne amocuali ejecame nocta motatautiyaj ihuan Jesús que ma amo quintitani tech ne campa hueyi tecoch den tatzacuilitispan. <sup>32</sup> Huan queme ompa tacuajtinemíaj tech nojón ixtahuat huel míac pitzome, ica ya nojón ne amocuali ejecame quitatautilijque Jesús que ma quincahuani ma calaquican intech nojón pitzome. Huan ijcón Jesús quintacahuilitij. <sup>33</sup> Ica ya nojón ne amocuali ejecame quisque itech iyolijtic ne tagat huan calaquitoj intech ne pitzonme. Huan ijcón ne huel míac pitzonme motalojtineneque huan motaquesuijque huan huetzitoj tech in hueyíat huan ompa nochi moalsimijque.

<sup>34</sup> Huan neques ten tapiayaj ica ne pitzonme cuac quitacque toni mochihuac ya, ijcuacón yejuan moucacholojque huan yajque quintapohuitoj inpueblojcahuan tech in pueblo huan tech nintequipan de toni mochihuac. <sup>35</sup> Ijcuacón in pueblojuani quisque huan yajque quitatoj de toni mochihuac. Huan cuac yejuan ajsique campa yetoya Jesús, ijcuacón no ompa cajsitoj ne tagat ten Jesús quincalanquixtilij ya ne amocuali ejecame. Huan ne tagat cajsitoj tocotzyetoc iixpan Jesús huan taquentoc ya huan cuatamatoc ya. Ijcuacón ne pueblojuani mohueyiyolmoutijque. <sup>36</sup> Huan ijcón ne tapiani ten quitacque toni mochihuac ya, yejuan nojonques quitapohuijque in ocsequin pueblojuani de queniu Jesús quipajtij ne tagat ten quinpiaya iyolijtic ne amocuali ejecame. <sup>37</sup> Ica ya nojón nochi in pueblojuani de Gadarajcopaca peuque quitatautíaj Jesús ijcuín:

—Xiquisa ca cuali de nican topueblojcopaca.

Huan ijcón quiytocque Jesús porín yejuan mohueyiyolmoutiyaj. Ica ya nojón in Jesús calayic tech se barco huan yajqui ocsepa mocuepac campa hualehuac. <sup>38</sup> Pero achtopa que Jesús yajqui tech in barco, ne tagat ten Jesús quincalanquixtilijca ya in amocuali ejecame, yejua ne quitatautij Jesús que ma quitacahuili oc ma ihuan Jesús nentinemi oc. Pero Jesús quinahuatij que ma yohui ma mocuepati campa pohui huan no quilij ijcuín:

<sup>39</sup> —Xiyó xiyetoti ocsepa ihuan mochanchahuan huan ompa xictetapohuiti nochi ten Dios quichihuac ya para tejua.

Huan ijcón yejua yajqui ichancopaca huan ompa pehuato quintapohuíá nochi in pueblojuani de nochi in chihualisme den Jesús quichihuac ipan.

**Nican tajtoa de queniu Jesús Temaquixtijque quipajtij isihuapil den tayecanque Jairo; huan no quipajtij in sihuat ten quimatocac Jesús itasal**

(Mt. 9.18-26; Mr. 5.21-43)

<sup>40</sup> Huan cuac Jesús Temaquixtijque ejcoc ya sentapalpa den hueyíat campa quis-teuca ya, ijcuacón in tagayot quitajpalojque huan quiselijque ica mías paquilis. Huan nijín ijcón quichiuque porín ipa yejuan quichixtoyaj Jesús ma hualani. <sup>41</sup> Ijcuacón ejcotihuetzico campa Jesús yetoya se tagatzin ten monotza Jairo ten yejua catca tayecanque tech in tiopan de judíos. Huan nijín tagat Jairo motancaquetzaco iixpan Jesús. Huan quitatautij Jesús ma yohui ichan. <sup>42</sup> Huan nijín ijcón quitatautij porín quipiaya se iyojtzin sihuapil ten quipiaya majtactionome xihuit. Huan yejua imiquilistempa yetoya. Huan cuac yaya ya Jesús, ijcuacón huel mías tagayot quitoc-tiliayaj hasta quipejpechiayaj Jesús. <sup>43</sup> Huan ompa cualtoctiliaya Jesús se sihuat ten mococoaya esmeyaya, pues cuicaya majtactionome xihuit. Huan semi tajyohuiaya huan mías tepajtiani ya mopapatacque ya. Huan nochi nitomin quitamilijcaj ya. Huan amo se tepajtijque huelic quipajtij. <sup>44</sup> Ica ya nojón ne sihuat motoquito icampa Jesús huan quinalmatoquiliy itilmajtzin de Jesús. Huan huel se tepitzin tzicahuic nojón esmeyalis. <sup>45</sup> Ijcuacón Jesús matajtanic ijcuín:

—¿Aconi nechicanmatocac?

Huan queme nochi quiliayaj que amo aquen quimatocayaj Jesús, ica ya nojón Pedro huan itequiticaicnihuan quilijque Jesús ijcuín:

—Totamachtijcau, xiconita san mías tagayot mitzpejpechíaj huan mitztojtope-huaj. Huan quenín huelis Tejuatzin tiquijtoa ijcuín: “¿Aconi nechicanmatocac?”

<sup>46</sup> Huan Jesús quinnanquilij ijcuín:

—Acsá nechmatocac porín nicmachilij que quisac nochichualis huan pajtic ya acsá ica ne chicahualis cuac nechmatocac.

<sup>47</sup> Huan cuac in sihuat quimatic que amo huelis oc quitatis ten quichihuac, ijcuacón yejua moajsicamoutiaya hasta huihuiyocaya huan motoquico campa Jesús yetoya. Huan motancaquetzac iixpan Jesús huan quiyectetapohuiaya senteixteno in tagayot de queyé quimatocac Jesús huan de queniu ichichualis de Jesús ni-mantzin sepa san quipajtij. <sup>48</sup> Ijcuacón Jesús quilij in sihuat ijcuín:

—Tejua sihuatzin, ica por nojón motacuautamatis ten ticpía, tipajtíc ya. Axcan xiyó ya xiyolseutiú.

<sup>49</sup> Huan mientras Jesús quinojnotztoya oc in sihuat, ijcuacón ejcoc senme de ichancahuan de ne Jairo ten tayecanque den tiopan de judíos. Huan ne ichancahuan quilijque in Jairo ijcuín:

—Mosuapil miyic ya. Amo xicuejmolojto oc in Tamachtijque.

<sup>50</sup> Huan cuac Jesús quicaquic ne tajtolme, ijcuacón Yejuatzin quilij Jairo ijcuín:

—Amo ximoyolmouti. Ta, sayó xitacuautamati nohuan huan ijcón mosihuapiltzin pajtis.

<sup>51</sup> Huan cuac Jesús ajsic ya ichan Jairo, ijcuacón Yejuatzin amo aquen quitacahuilij ma calaquiti ihuan. Ta, sayó quintacahuilij ma calaquitij in Pedro huan in Jacobo huan in Juan huan in tetat huan inantzin den sihuapiltzin. <sup>52</sup> Pero nochi in ichancahuan chocatoyaj huan moyolcocojtoyaj ica por ne sihuapil ten miyic ya. Pero Jesús quinilij ijcuín:

—Amo semi ximochoctican. Porín nijín sihuapiltzin amo miyic. Ta, sayó cochtoc.

<sup>53</sup> Pero ne ichancahuan de Jairo quiquejueloayaj Jesús porín yejuan quimatque que ipa miyic ya in sihuapil. <sup>54</sup> Huan ijcón Jesús quimatlanac in sihuapil huan quilij ica chicaucatajtól ijcuín:

—Sihuapil, nimitzilía que ximehua.

<sup>55</sup> Ijcuacán ne sihuapil ocsepa quiselij nitalnamiquilis huan ijcón nimantzin moquetzac. Huan Jesús tanahuatij ma quitamacacan. <sup>56</sup> Huan itatuan den sihuapil quihueyimoucaitacque ten mochihuac. Pero Jesús quinnahuatij que ma amo aquen quilican de toni mochihuac.

### **Nican tajtoa de queniu Jesús Temaquitijque quintequimactij imomachtijcahuan**

*(Mt. 10.5-15; Mr. 6.7-13)*

**9** Huan Jesús Temaquixtijque quinsentilij secosan nochi in majtactionome imomachtijcahuan huan no quinmajmactilij in tanahuatil huan in chicahualis para huelis quincalanquixtijtinemisque nochi tataman den amocuali ejecame. Huan no quinmactilij tanahuatil para huelis quinpajtisque nochi tatamanocolisme. <sup>2</sup> Huan no Jesús quintitanic imomachtijcahuan ma tanojnotzatij ica in Tajtoltzin de queniu Dios quinyolyecantinemi itaneltocacahuan ica ihueyichicahualis. Huan no Jesús quintitanic ma quinpajtitij in cocoyani. <sup>3</sup> Huan no Jesús quinilij ijcuín:

—Amo teyi ximohuiquilican cuac nanyasque ya tech in ojti ica nanmopalehuisque. Amo ximohuiquilican nión namotopil, huan nión namomorral, huan nión namotaxcal huan nión namotomin. Huan amo no ximohuiquilican ojome namocamisa. Ta, sayó ximohuiquilican se san. <sup>4</sup> Huan campa yesqui nanajsisque tech se cali, ijcuacán ompa ximocahuacan hasta in tonal cuac nanquisasque de ne pueblo. <sup>5</sup> Huan campa amo namechselfaj ca paquilis, ijcuacán xiquisacan de nojón pueblo. Huan ximometztzejtelocan ma huetzi nochi ne talnex ten mopiloj namometztampa para ma ijcón ixnesis que Dios quintatzacuiltis nijín pueblojuani porín yejuan quixtopeuque in Tajtoltzin de Dios.

<sup>6</sup> Ijcuacán imomachtijcahuan de Jesús quisque huan yajque panotiyajque tech nochi in pueblojtiztin huan quintapohuiayaj in pueblojuani den Tajtoltzin de Dios ten cualcui ne nemaquixtilis. Huan no quinpajtiayaj cocoyani nohuiyampa.

### **Nican tajtoa de que Juan Taahuijque momiquilij**

*(Mt. 14.1-12; Mr. 6.14-29)*

<sup>7</sup> Huan ijcón in rey Herodes quimatiltijque de nochi ten quichiutinemia in Jesús Temaquixtijque. Huan ne Herodes hasta amo quimatía oc toni quinemilis ica por ne Jesús. Porín sequin tagayot quijtoayaj que in Juan Taahuijque panquisac yoltoc ya intzalan in ánimajme huan yejua quichiutinemia nijín mohuiscatequeme. <sup>8</sup> Huan ocsequin tagayot quijtoayaj que in Elías, ne huejcau tanahuatijque, yejua ne ocsepa monextico huan yejua axcan quichiutinemia nijín mohuiscatequime. Huan cachi ocsequin tagayot quijtoayaj que achá se huejcautanahuatijque de Dios panquisac ya yoltoc intzalan in ánimajme huan achá yejua ne quichiutinemia nijín mohuiscatequime. <sup>9</sup> Pero in rey Herodes quijtoj ijcuín:

—Amo melau nochi nojón ten quijtoaj. Ta, nicmati que nejua san nitatitanic ma quiquechcotonati ne Juan Taahuijque. Pero ne Jesús, ¿toni chiuque yejua ten nechcaquiltíaj huan nechtapohuíaj de nochi míac tataman de nitequihuan?



Ica ya nojón in rey Herodes quinequía quitas huan quinojnotzas Jesús.

**Nican tajtoa de queniu Jesús Temaquixtjque quintamacac macuil tagayot**

(Mt. 14.13-21; Mr. 6.30-44; Jn. 6.1-14)

<sup>10</sup>Huan cuac itanahuatijcahuan de Jesús mocuepque campa hualeuque, ijcuacán quitapohuijque Jesús nochi ten yejuan quichiuque. Huan cachi satepan Jesús quincuiteu imomachtijcahuan huan yajqui campa chicopayan huan nepa campa ajsique amo huejca quitztoya in pueblo Betsaida. <sup>11</sup>Pero cuac in pueblojuani quitcaquillijque que ompa yetoya Jesús, ijcuacán yejuan yajque quitocilitoj Jesús. Huan ijcón Jesús quinselij ca paquilis in tagayot huan de ompa pehuac quinnojnotzaya ica in Tajtoltzin de queniu Dios quiyolyecantinemi itaneltocacahuan ica ihueyichicahualis. Huan no Jesús quinpajtiaya in cocoyani. <sup>12</sup>Huan cuac tepeten ya in tonaltzin, ijcuacán in majtactiomome imomachtijcahuan motoquijque campa Jesús huan quilijque ijcuín:

—Xiquinnahuati ya in tagayot ma yacan ma mosehuitij ya, huan ma quitemotij nintacualis tech in pueblojtztzin huan tech in milajpa porín nican campa tiyetocque amo teyi ongac tacualis.

<sup>13</sup>Pero Jesús quinnanquilij ijcuín:

—Xiquintamacacan, namejuan san.

Pero yejuan quilijque Jesús ijcuín:

—Huan tejuan ticpíaj sayó macuil pantzitzin san huan ome pescadojncat san, como amo tiyásque titacohuatihue ica tacualis para tiquintamacacan nochi nijín tagayot.

<sup>14</sup>Huan nijín tagayot ten mosentilijca ya catca queme macuil mil. Huan ijcón Jesús quinilij imomachtijcahuan ijcuín:

—Xiquinnahuatican in tagayot ma mosentilican ojomepoal huan májtacti huan ma motalican seseco.

<sup>15</sup>Huan melau imomachtijcahuan ijcón quichiuque huan in tagayot motalijque seseco. <sup>16</sup>Ijcuacán in Jesús quicuic huan momaaquic in macuil pantzitzin huan in ome pescados. Huan de ompa Yejuatzin moixajocuic eluiyactzinco huan quitatautij Totajtzin Dios ma quitiochihua in tacualis. Huan cuac Jesús quincocotonac ya in pantzitzin, ijcuacán Yejuatzin quinmactilij imomachtijcahuan para ma yejuan quinxejxelo huilican in tagayot. <sup>17</sup>Huan ijcón nochi in tagayot tacuajque huan ixuique. Huan de ompa imomachtijcahuan quiololojque ocsepa in pantatetejtec ten mocahuac huan quitemitijque majtactiomome chiquihuime ica ne pantatajco.

**Nican tajtoa de que Pedro quiyequilij que Jesús Yejuatzin in Cristo Temaquixtjque**

(Mt. 16.13-19; Mr. 8.27-29)

<sup>18</sup>Huan se tonal Jesús motatatautilijtoya secan, huan imomachtijcahuan ihuan yetoyaj. Huan mochihuac que Jesús quintajtoltij imomachtijcahuan ijcuín:

—¿Toni quiytoaj in tagayot que niaconi Nejuatzin?

<sup>19</sup>Huan ne imomachtijcahuan quinnanquilijque ijcuín:

—Sequin quijtoa que Tejuatzin ti Juan Taahuijque. Huan ocsequin quijtoaj que Tejuatzin ti Elías. Huan cachi oc ocsequin quijtoaj que Tejuatzin tiacsá den huejcautanahuatijque ten panquisac yoltocque intzalan den ánimajme.

<sup>20</sup> Ijcuación Jesús ocsepa quintajoltij ijcuín:

—Huan namejuan, ¿toni nanquijejoaj que niaconi Nejuatzin?

Ijcuación in Pedro quinanquilij ijcuín:

—Tejuatzin ya tion Cristo Temaquixtijque de Dios.

**Nican tajtoa de queniu Jesús Temaquixtijque  
quitetapohuía que ejcotoc ya imiquilis**

(Mt. 16.20-28; Mr. 8.30—9.1)

<sup>21</sup> Pero Jesús quinchicaucanahuatij imomachtijcahuan que ma amo aquen quiluican que cox Yejuatzin ya in Cristo Temaquixtijque. <sup>22</sup> Huan no Jesús quinilij ijcuín:

—Semi monequi que nejua ni Yectagatzin de Dios ma semi nitajyohuis. Huan in huehuentzitzin huan in tayecanque tiopixcame huan in tanextiliani den tanahuatil de Moisés, nochi nijín tayecanani nechixnamiquisque huan nechtelchihuasque ma nimiqui. Pero ocsepa Nejuatzin nipanquisas niyoltoc intzalan in ánimajme ipan eyi tonalica.

<sup>23</sup> Huan cachi satepan Jesús quinilij imomachtijcahuan ijcuín:

—Tacán acsá quinequi nechtoctilijtiyás huan nechtacamatiyás, ijcuación yejua ne monequi ma quicautehua ne tanejnequilis de yejua san, huan ma quixicojtiu in cruztzin ten cualcuis tajyohuilis, huan ma nechtoctilijtiu huan nechtacamatiu. <sup>24</sup> Huan nochi neques ten quinequisque moyecpialtisque huan quimaquixtisque ninnemilis, yejuan nojonques quipolosque ninnemilis. Pero nochi neques ten quipolosque ninnemilis tech notequi, yejuan nojónques cajsisque ninnemilis huan no ne nemaquixtilis. <sup>25</sup> Huan yec melau amo teyi quihueyipías se tagat como moaxcatilis nochi ten ongac nican talticpac huan niman moijtacos huan quipolos nitalnamiquilis. <sup>26</sup> Huan tacán acsá mopinaucamati de Nejuatzin huan de Notajtoltzin, ijcuación Nejuatzin ni Yectagatzin de Dios no nimopinaucamatis de yejua. Huan ijcón mochihuas cuac nimohualuicas ihuan nochi in ángeles ten yolchipauque nican talticpac ica ne ichicaucahuelilis de Notajtzin Dios. <sup>27</sup> Huan no de yec melau ten namechilía que senme de namejuan de nican nanyetocque noixpan, amo nanmiquisque como amo achtopa nanquitaj que nihualas ya ica ne ihuelilis de Notajtzin Dios de niquinyolyecana notaneltocacahuan ica ihueyichicahualis de Totojtzin Dios.

**Nican tajtoa de queniu Jesús Temaquixtijque nocta  
mopapatac de queniu tamatic inixpan imomachtijcahuan**

(Mt. 17.1-8; Mr. 9.2-8)

<sup>28</sup> Huan ipan chicueyi tonalica de nimampa de nijín tanextililis, ijcuación Jesús quinuiyac in Pedro huan in Juan huan in Jacobo huan yajque tejcotoj tech se tal lomojtzin campa huejcapan para ompa motatatautilisque ihuan Dios. <sup>29</sup> Huan cuac Jesús motatatautiliaya, ijcuación pehuac mopapata de quenín tamati niixco. Huan itilma pepetacaya huan semi istac mochihuac. <sup>30</sup> Ijcuación monexticoj ome taca ten peuque monojnotzayaj ihuan Jesús. Huan nijín ome taca, yejuan in Moisés huan Elías, de ne huejcautanahuatiani de Dios. <sup>31</sup> Huan quinyehualojtoya in cualtziyot de Dios ijcón queme cuac in tonaltzin momeyotiqui. Huan yejuan monojnotzayaj ihuan Jesús de ne tonal cuac monequis tajyohuis Yejuatzin huan miquis tech ne pueblo de Jerusalén. <sup>32</sup> Huan masqui in Pedro huan imomachtijcaicnihuan semi cochisnequía,

pero quincan cochilis porín quitacque Jesús icualtziyo huan no quinitilijque incualtziyo de nojón omen taca ten ihuan yetoyaj Jesús. <sup>33</sup> Huan cuac ne ome taca quicauteutiayaj ya Jesús, ijcuación in Pedro quilij Jesús ijcuín:

—Totecotzin, semi cualtzin para tejuan que nican tiyetocque. Tajcón ticonmonequiltisquía ma ticchijchiuacan eyi xajcaltzitzin, se para Tejuatzin huan se para Moisés huan ocsé para Elías.

Huan Pedro ijcón quijtoa porín amo quimatía oc toni quinilis. <sup>34</sup> Huan cuac Pedro quinojnotzoc oc Jesús, ijcuación quinquemiloco se mixti nochi yejuan. Ica ya nojón in Pedro huan Jacobo moyolmoutijque porín quitayaj que yetoyaj mixtzalan. <sup>35</sup> Huan tech in mixti mocayic se tajtolis ten quijtoaya ijcuín:

—Yejuatzin ya nijín Notasoconetzin; xicaquilican ca cuali Yejuatzin.

<sup>36</sup> Huan cuac imomachtijcahuan quitamicacque ya ne tajtolis, ijcuación quitacque que Jesús iselti ya yetoc. Huan ijcón yejuan motamatcatalijque. Huan tech nojón tonalme ne imomachtijcahuan de Jesús amo aquen quintapohuijque nochi ten quitacaj ya.

### **Nican tajtoa de queni Jesús Temaquixtijque quipajtij se telpocat ten quiplaya iyolijtic se amocuali ejecat**

*(Mt. 17.14-21; Mr. 9.14-29)*

<sup>37</sup> Huan imostica cuac Jesús imomachtijcahuan temocque ya de ne tal lomotzin, ijcuación huel míac tagayot motoquicoj huan cajsitoj Jesús. <sup>38</sup> Ijcuación se tagat ten intzalan in tagayot quichicaucatzajtzilij Jesús huan quiliaya ijcuín:

—Tamachtijque, nimitzontatautía que xiyó xiquitati nooquichpil porín sayó yejua noyojtzin conetzin. <sup>39</sup> Huan se amocuali ejecat quiquitziqtoc nooquichpil huan yejua quichihualtía ma tzajtzi huan ma joyjolpolihui huan no ma tenposocquisa. Huan no ne amocuali ejecat quixojxocolía no oquichpil huan amo queman quinequi quitacahuilis. Ta, ocsepa nimampa quitzetzeloa. <sup>40</sup> Huan nejua niquinontatautijca momomachtijcahuan ma quicalanquixtiliani ne amocuali ejecat, pero yejuan amo huelque quichiuque.

<sup>41</sup> Huan ijcón Jesús quinilij in tagayot ijcuín:

—Namejuan nantacaquini, semi amo nanyectacuatamatij huan amo nanyolcualime. ¿Canachi tonalme quipía de que niyetos oc namohuan? Huan, ¿canachi tonalme oc huelis nitaxicos como amo nanyectacuatamatij nohuan?

Huan de ompa Jesús quilij ne tagat ijcuín:

—Nimitzilía, xinechonualcuili nican ne mooquichpil.

<sup>42</sup> Huan cuac in telpoch motoquijtiaya ya iixpan Jesús, ijcuación ne amocuali ejecat ocsepa quitapantamotac in telpoch huan quitzejtzeloj huan quiyojyolpolihuiltij. Ijcuación in Jesús quichiucaucatacahualtij ne amocuali ejecat huan ijcón quipajtij in telpoch. Huan de ompa Jesús quitemactij ne oquichpil imaco iteiscalticau. <sup>43</sup> Huan nochi in tagayot quimoucaitayaj de Dios ichicaucahuililis.

### **Nican Jesús Temaquixtijque quinnejmachtij imomachtijcahuan ica ojpa que ejcoctoc ya imiquilis**

*(Mt. 17.22-23; Mr. 9.30-32)*

Huan cuac in tagayot quimoucaitztoyaj oc nochi ne ten quichiutihuitz Jesús, ijcuación Yejuatzin quinilij imomachtijcahuan ijcuín:

<sup>44</sup>—Xinechcaquilican ca cuali nochi nijín ten namechiliti. Huan nicnequi amo xiquielcahuacan nijín que Nejuatzin ni Yectagatzin de Dios huan nechtemactisque imaco in tagayot ma nechmictican.

<sup>45</sup> Pero imomachtijcahuan amo cajsicamatque tenica quinnojnótzaya porín Totajtzin Dios ayamo quimonequiltiaya ma cajsicamatican. Huan imomachtijcahuan quiyolmohuiliaya de que quitajtoltsique Jesús de toni quijtosnequi nijín tajtolme.

**Nican Jesús Temaquixtijque quinmachtij imomachtijcahuan de aconi yesqui in cachi hueyi tayecanque**

*(Mt. 18.1-5; Mr. 9.33-37)*

<sup>46</sup> Huan mochihuac que se tonal imomachtijcahuan de Jesús peuque motajtoltehuiajay de aconi yesqui in cachi hueyi chiuque. <sup>47</sup> Pero Jesús quintamachilisixmatic de toni quiyolnemilijtoyaj yejuan. Ica ya nojón Jesús quicuic se pili huan qitalij inixpan. <sup>48</sup> Huan de ompa Jesús quinilij imomachtijcahuan ijcuín:

—Huan nochi naquen yesqui ten quiselisque nijín pili para quipalehuisque sayó porín nechtasojta, yejuan nojonques niquinpohua que nechselijque ya Nejuatzin. Huan nochi naquen yesque ten nechselisque Nejuatzin, yejuan nojonques niquinpohua que quiselijtiyasque Notajtzin Dios ten nechualtitanic nican talticpac. Pero namechilía que ne tagat ten amo mohueyinctinemi inixpan in tagayot, yejua ne Dios quipohuas se hueyi chiuque.

**Nican Jesús Temaquixtijque quinmachtij imomachtijcahuan de que ne naquen amo techixnamiqui, yejua ne techpalehuía**

*(Mr. 9.38-40)*

<sup>49</sup> Ijcuacón Juan quilij Jesús ijcuín:

—Tamachtijque, tejuan tiquitacque ya se tagat que yejua quincalanquixtía in amocuali ejecame ica in chichualis de motocay. Pero tejuan tictacahualtijque que ma amo ijcón quichiutinemi porín yejua amo poutinemi tohuan.

<sup>50</sup> Pero Jesús quinanquilij ijcuín:

—Amo xictacahualtiani porín ne tagat ten amo techmohuispolojtinemi, yejua nojón techpalehuijtinemij tech totequiu.

**Nican tajtoa de queniu Jesús Temaquixtijque quinyolmajxitij huan quintacahualtij in Jacobo huan Juan**

<sup>51</sup> Huan ejcotoya ya in tonalme cuac Jesús quisati ya para yas eluiyactzinco, huan Jesús moyolchicahuac de que yas ne Jerusaléncopaca. <sup>52</sup> Huan Jesús quintitanic sequin itapalehuijcahuan ma tayecanatij. Huan yejuan yajque huan calaquitoj tech se pueblojtzin campa itatilanal Samaria huan ompa yejuan quicaltajtanitoj Jesús para ompa mocahuas. <sup>53</sup> Pero ne pueblojuani de Samaria amo quintacahuilijque ma mocahuacan ompa porín yejuan cajsicamatque que Jesús ihuan imomachtijcahuan yohue ya para Jerusaléncopaca. <sup>54</sup> Huan nijín ome imomachtijcahuan de Jesús, in Jacobo huan Juan, cuac yejuan quicacque nijín tajtol ten quijtoayaj in pueblojuani de Samaría, ijcuacón yejuan quilijque Jesús ijcuín:

—Totecotzin, ¿xe amo ticomonequiltía que ma tejuan ticnahuatican Dios que ma quinalpantamotili tit de ne eluiyactzinco para ma tajtamican ne pueblojuani de Samaria, ijcón queme quichihuac ne tanahuatijque Elías?

<sup>55</sup> Ijcuacón Jesús quinsenixitac ne omen imomachtijcahuan huan quintacahualtij huan quinilij ijcuín:

—Namejuan amo nancajsicamatij de toni talnamiquilis hualeutoc nijín namotajtoluan. <sup>56</sup> Huan xicmatican Nejuatzin ni Yectagatzin de Dios huan amo nihualan nican talticpac para niquintajtamis intalnamiquilis den tagayot. Ta, Nejuatzin nihuala para niquinmaquixtis in tagayot.

Huan ijcón yajque ocsepa ocseco tech ocsé pueblojtzin.

**Nican Jesús Temaquixtijque quinnejmachtij in tagayot ten quinequíaj quitocillisque huan quitacamatiyasque Yejuatzin**

*(Mt. 8.19-22)*

<sup>57</sup> Huan cuac nejnentoya imomachtijcahuan ihuan Jesús, ijcuacón senme de yejuan quilij Jesús ijcuín:

—Totecotzin, semi nicnequi nimitztoctilis huan nimitztacamatiyás campa yesquitionyás.

<sup>58</sup> Pero Jesús quinanquilij imomachtijcahuan ijcuín:

—In cuetzitzin quipíaj nintéchanti campa cochij. Huan in tototzitzin ten patantinemij ejecaixco no quipía in tapajsoluan. Pero Nejuatzin ni Yectagatzin de Dios amo nicpía can nimocuatecas.

<sup>59</sup> Huan de ompa ocsepa Jesús quilij ocsé tagat ijcuín:

—Xinechtoctiliti huan xinechtacamatiyás.

Pero yejua quinanquilij ijcuín:

—Notecotzin, nechcahua oc ma niyó achto nitalpachoti noteiscaltijcau ten ayamo momiquilij ya.

<sup>60</sup> Pero Jesús quilij ijcuín:

—Xicahuacan ma neques ten no yolmictocque tech in tajtacol ma quitalpachocan in ánimajme. Pero tejua xiyó huan xitanojnotztinemi ica in Tajtoltzin de queniu Dios quiyolyecantoc itaneltocacahuan ica ichicahualis.

<sup>61</sup> Ijcuacón ocsepa in tagat quilij Jesús ijcuín:

—Notecotzin, nejua nimitztoctiliti huan nimitztacamatiyás. Pero nicnequi achto niquinnahuatiti nochancahuan que nejua niyó nimitztoctiliti.

<sup>62</sup> Ijcuacón Jesús quinanquilij ijcuín:

—Xicmati que se tagat ten pehua nechtoctilía huan pehua yolnemi ica ne ten quicauca ya tacuitapan, yejua ne amo teyica cualtiyás para tanojnotztinemis de queniu Dios quinyolyecantinemi itaneltocacahuan ica ichicahualis. Huan yejua ne nicnejnehuililtía queme se tayuntajuijque ten tequitit huan moican cueptiu oc.

**Nican tajtoa de queniu Jesús Temaquixtijque quintitanic ma tequititi eyipoal huan májtacti itequiticahuan**

**10** Huan satepan cuac Jesús quintaminojnotzac ya imomachtijcahuan, ijcuacón Yejuatzin no quinijitac ocsequin eyipoal huan májtacti tequitini. Huan Jesús quintitanic yejuan ma yacan ojome huan ma yajtocan achtopa huan ma quiachtohuijtiyasque Jesús huan ma calactinemican nohuiyampa tech in pueblojme campa Jesús ipa monequía panos. <sup>2</sup> Huan Jesús quinilij ne itequiticahuan ijcuín:

—Nicnejnehuililtía namotequi queme yesquía se hueyi tapixcalis ten nicnequi nicololos ya. Huan yec melau que ongac míac tequit de tapixcalis pero in tequi-

tini amo semi míac ongacque. Ica ya nojón namechilía ximotatautilican inahuac Namoteco ten niaxca nijín tapixcalis para ma Yejuatzin cachi oc ma quinqualtitani itequiticahuan. <sup>3</sup>Xiyacan xitequititij, huan Nejuatzin namechtitani xitanojnotztinemitij intzalan in tagayot ten quinejnehuilíaj ne tecuanime huan namejuan nanyesquía queme ichcame. Huan ijcón queme in tecuanime quinequij quimictisque ichcame, no ijcón ne tagayot quinequisque namechmictisque. <sup>4</sup>Huan cuac nanyasque ya, ijcuacán amo xicuiyacan namotominehualoni huan nión no namomorraal huan nión no namotegacuan. Huan amo aquen xiquinmatajpalotiyacan tech ojti, porín namejuan nanmoijsihuilijtiyohue. <sup>5</sup>Huan cuac nancalaquitihue tech ten yesqui cali, ijcuacán achtopa xiquintajpalocan ijcuín: “Ma onga sayó yolsehuilis de Dios tech nijín calijtic”. <sup>6</sup>Huan tacán nanajsij tech se calyetoní ten quinequi ma onca yolsehuilis tech ninchan, ijcuacán namoneyolsehuilis ompa no ma mocahuan. Huan tacán ne calyetoní amo quinequij ma quiapiacan ne yolsehuilis, ijcuacán namejuan xiquintzinquixtilican namoyolsehuilis. <sup>7</sup>Huan campa namechselisque, ompa ximocahuaican tech ne calijtic. Huan xicuacan huan xitayican nochi tenica yejuan namechta-macasque. Porín namechilía que quimonequiltía Totajtzin Dios que ne tanojnotzque ten tequititnemi, yejua ne monequi quiselis ajstitoc itaxtahuil. Huan no namechilía que amo xicalpapatatinemican san.

<sup>8</sup>Huan cuac nanajsisque ya tech se pueblo campa namechselíaj ica paquilis, ijcuacán ompa xicuacan nochi tacualis ten namechmacasque. <sup>9</sup>Huan tech ne pueblo xiquinpajtican nochi cocoyani ten namechinualcuilisque. Huan xiquinilican ne pueblojuani ijcuín: “Motoquijtoc ya in tonalme cuac Dios namechyolyecanas ica ihueyichicahualis”. <sup>10</sup>Pero cuac nanajsisque tech se pueblo campa amo quinequisque namechselisque ica paquilis, ijcuacán ximoquetzacan tech in ojme huan xiquinilican in pueblojuani ijcuín: <sup>11</sup>“Tejuan timometztetzeloaj para ma huetzi nochi nijín talnex de namopueblo ten mopilojca ya tech totegactampa para ijcón tamechnextilíaj que namejuan nanquixtopeuque ya in Tajtoltzin de Dios. Huan no xicmatican que motoquijtihuitz ya in tonalme cuac Dios quimonequiltis namechyolyecanas ica ihueyichicahualis”.

<sup>12</sup>Huan no Jesús quinilij imomachtijcahuan ijcuín:

—Huan queme yejuan quixtopeuque ya in Tajtoltzin de Dios, ica ya nojón namechilía que ne tonal cuac ninpan huetzis ne hueyi tatzacuilitis de Dios, ijcuacán melau cachi hueyi tatzacuilitis yejuan quiselisque huan que quiselijque ya ne pueblojuani de Sodoma.

**Nican Jesús Temaquixtijque quinmachtij neimomachtijcahuan de ne  
taca amo tatacamatini que yejuan melau tajyohuisque**

*(Mt. 11.20-24)*

<sup>13</sup>Huan no Jesús quinilij ijcuín:

—Nantelteicneltiani namejuan nanopueblojuani de Corazín, huan no nantelteicneltiani namejuan nanopueblojuani de Betsaida, porín namejuan melau namechnamiqui xicselican in tatzacuilitis de Dios. Huan ijcón namechilía porín amo nanmoyolnemilijque de namotajacoluan. Huan in pueblojuani de Tiro huan Sidón cachi moyolnemilisqueíaj ya de nintajacoluan como ijcón quitasquíaj queme namejuan nanquitacque ya nijín mohuiscatequime ten nicchiutinemi namoixpan. Huan no ne pueblojuani de Tiro huan Sidón motanquentisqueíaj ya ica ne tzastic tasal huan

mocuounexuisquía ya para ijcón ixnesisquía ya melau moyolnemilijque ya de nintajtacoluan. <sup>14</sup>Ica ya nojón ne tonal cuac namopan huetzis ne hueyi tatzacuilitis de Dios, ijcuacón yec melau cachi hueyi tatzacuilitis nanquiselisque namejuan. Huan ne pueblojuani de Tiro huan Sidón yejuan nojonques amo cachi hueyi tatzacuilitis quiselisque. <sup>15</sup>Huan namejuan nanpueblojuani de Capernaum, nanmoyolcajcayahuaj san porín nanmoyolueyinectinemij huan nanquinequij nanajsisque hasta ne eluiyactzinco. Pero xicmatican que Dios namechtajyohuiltis huan namechtaliti hasta ne tani campa in ánimajme tajyohuijtocque.

<sup>16</sup>Huan no Jesús ten quilij imomachtijcahuan ocsepa ijcuín:

—Nochi neques ten namechcaquilisque namotanojnotzalis, yejuan nojonques no nechcaquilisque Notajtoltzin. Huan nochi neques ten namechixtopehuasque, yejuan nojonques no nechixtopehuasque Nejuatzin. Huan nochi neques ten nechixtopeu-tiyasque, yejua nojnoques no quixtopehuaj Notajtzin Dios ten nechualtitanic.

### **Nican tajtoa de queniu in eyipoal huan májtacti itequiticahuan de Jesús Temaquixtijque mocuepaj ya de nintanojnotzalis**

<sup>17</sup>Huan ne eyipoal huan májtacti itequiticahuan de Jesús hual mocuepque ya de nintanojnotzalis ica hueyi paquilis. Huan quilijque Jesús ijcuín:

—Totecotzin, tejuan tiquitacque que hasta ne amocuali ejecame techtacamatíaj ica in chichualis de motocaytzin cuac tiquincalanquixtiayaj.

<sup>18</sup>Huan in Jesús quinilij ijcuín:

—Quema, hueyi melau Nejuatzin niqitac que in amocuali Satanás hualpan huetzic den eluiyac queme huetzis se ticohuat. Huan cuac huetzico ya, ijcuacón Satanás quipoloj nochi nichichualis. <sup>19</sup>Pero no namehmactilijca ya huelilis para huelis nanquintzojtzonicasque in cohuame huan in colome. Huan no namehmactilijca ya huelilis para huelis nanquinxixicojtinemisque in nochi chichualisme de amocuali Satanás huan amo teyi tajyohuilis namopan huetzisque. <sup>20</sup>Pero no namechilía que amo ximoyolpactican sayó porín in amocuali ejecame namechtacamatij san. Ta, cachi oc monequi ximoyolpactican porín Totajtzin Dios quijcuiloy ya namotocay ya tech ilista nepa eluiyactzinco.

### **Nican tajtoa de queniu Jesús Temaquixtijque moyolpactía inahuactzinco Itajtzin Dios**

*(Mt. 11.25-27; 13.16-17)*

<sup>21</sup>Huan tech ne tonal Jesús moyolpactij ica in huelilis den Yecticatzin Espíritu huan quilij ijcuín:

—Nimitzonueyimohuistilía, Notajtzin Dios, tion Tecotzin den eluiyactzinco huan nican talticpac. Porín Tejuatzin tiqintatilij ya nijín taixmatilis para ma amo quimat-ican in taixmatini huan in tamachilejque. Huan Tejuatzin tiquinnexilij ya nijín taixmatilis de nijín moyancuicataneltocacahuan ten yoltanemilijtinemij queme coneme ten ayamo yolmajisij. Huan nijín ijcón mochihuac porín Tejuatzin ijcón motanejnequilis. <sup>22</sup>Huan Tejuatzin Notajtzin, tinechonmactilij ya nochi nijín chihualisme huan tanemililisme. Huan amo aca nechajsicaixmatis Nejuatzin Nimoconetzin. Ta, sayó Tejuatzin Tinotajtzin tinechonajsicaixmati. Huan amo no aca mitzonajsicaix-mati de Tejuatzin Tinotajtzin. Ta, sayó Nejuatzin Nimoconetzin nimitzonajsicaix-

mati. Pero Nejuatzin Nimoconetzin niqunyecnextilis de aconi Tejuatzin Notajtzin para nochi neques ten niconmonequiltía niqunnnextilis.

<sup>23</sup> Ijcuación Jesús moicancuepac huan quinsenitac imomachtijcahuan huan quinilij ninseltij san ijcuín:

—Tatióchihualme de Dios yesque nochi neques ten quitaj nochi chihualisme ten namejuan axcan nanquitztocque. <sup>24</sup> Pero no namechilía que miacque ne huejcau tanahuatiani huan miacque huejueyi chihuanime de Dios quiyolnejnequíaj quitasque in chihualisme ten namejuan axcan nanquitztocque pero yejuan amo queman quitacque. Huan ne huejcau tanahuatiani huan hueyi chihuanime de Dios quiyolnejnequíaj quicaquisque in Tajtoltzin ten namejuan axcan nanquicactinemij. Pero yejuan amo queman quicacque.

### **Nican Jesús Temaquixtijque quinmachtij de se yolcuali tagat de cayot de Samariajcopaca**

<sup>25</sup> Ijcuación senme de tanextiliani den tanahuatil de Moisés moquetztiquisac huan yajquí quinojnotzato Jesús porín quinequía quitasquía de queniu itamachilusuan de Jesús huan quitajoltij Jesús ijcuín:

—Tamachtijque, ¿toni monequi nicchihuas para que Totajtzin Dios nechaxcatilis ne yec nemilis nachipa ten amo queman tamis?

<sup>26</sup> Huan Jesús quitajoltij ijcuín:

—¿Toni ompa ijcuiliutoc tech in tanahuatil de Moisés? ¿Queniu tejua ticajsicamati cuac ticleeroa ne tanahuatil?

<sup>27</sup> Huan ijcón ne tanextilijque den tanahuatil de Moisés quinanquij Jesús ijcuín:

—Xictasojta Mohueyitecotzin Dios ica nochi moyolo, huan no ica nochi motalnamiquilis, huan no ica nochi mochicahualis, huan no ica nochi motanemilil. Huan no xictasojta mochanchahuan ijcón queme tejua timotasojtatinemi.

<sup>28</sup> Ijcuación Jesús ocsepa quilij ijcuín:

—Cuali ya queme tinechnanquij ya. Como melau ticchihua nochi nijín, ijcuación ticpía ne yec nemilis ten amo queman tamis.

<sup>29</sup> Pero ne tanextilijque den tanahuatil de Moisés quinequía motequixtiltis de ne matájtanti ten quichihuiliaya Jesús. Ica ya nojón cachi oc quitajoltij Jesús ijcuín:

—¿Aconi yesqui ne nochancau ten monequi nictasojtas?

<sup>30</sup> Ijcuación Jesús pehuac quimachtía ica se nexcuitil ijcuín:

—Se tonal se tagat yaya tech in ojti de Jerusalén para ajsis campa pueblo de Jericó. Huan tech in ojti sequi tachtequini quiquitziqijque ne tagat, huan quicuiliijque ten niaxca hasta no nitilma. Huan no quitelmagacque ya. Huan yejuan yajque huan quicauteuque imiquilistempa ya. <sup>31</sup> Huan mochihuac que se tiopixcat de judíos no yaya tech nojón ojti. Pero cuac quitac ne cocoxque, ijcuación yejua huejca quitacoluij san. <sup>32</sup> Huan no mochihuac que se tagat tiopan tapalehuijque, ten quilía Levita, yejua no panotiaya tech nojón ojti. Pero cuac quitac in cocoxque campa huetztoc, ijcuación yejua no quitacoluij san. <sup>33</sup> Pero mochihuac que cachi satepan no ompa panotiaya se pueblojcat de Samariajcopaca ten namejuan nanqipohuj queme amo teyi cualtía. Huan ne pueblojcat de Samaria cuac quitac ne cocoxque huetztoc, ijcuación yejua quihueyiyolicnelij. <sup>34</sup> Ijcuación ne tagat de Samaria motoquico campa in cocoxque huetztoc, huan pehuac quipajtía ica aceite huan ca vino campa quicojcojque. Huan no quitetzilohuilij ica tilma campa ne tacojcol. Huan



de ompa quipantalij in cocoxque ipan niburro, huan cuiyac campa huelis mosehuis tech se mesón huan ompa quitasojcapialtito. <sup>35</sup> Huan imostica cuac yohui ya ne tagat de Samaria, ijcuacón yejua quiquixtij ome tomin, quijtosnequi que valeroa ome tonal de taxtahuil, huan quimactilij tomin ne teco den mesón huan quilij ne teco ijcuín: “Xictasojpía huan xicpalehui nijín cocoxque, huan como ticpojpoloa oc cachi motomin ten amo ajsi nijín ten nimitzmacautehua, cuac nimocuepas ya nicahuincopaca, ijcuacón nimitztaxtahuilijtiquisas”.

<sup>36</sup> Huan de ompa Jesús quitajoltij ne tanexutilijque den tanahuatil de Moisés ijcuín: —¿Catiyejua de nijín eyi taca tiquixejecoa mochihuac ichancau de ne cocoxque ten quicojcojque ne tachtequini?

<sup>37</sup> Huan ne tanexutilijque den tanahuatil de Moisés quinanquilij Jesús ijcuín: —Ne tagat den quiyolicnelij in cocoxque, yejua ne ten mochihuac ichancau den cocoxque.

Ijcuacón Jesús ocsepa quilij ijcuín:

—Huan axcan nimitzilía xiyó huan no ijcón xicchihuati ijcón queme ne tagat de Samariajcopaca quichihuaco.

### **Nican tajtoa de que Jesús Temaquixtijque quincalpanotiquisac Marta huan María**

<sup>38</sup> Huan mochihuac que cuac Jesús quisentocac nejnemito tech nioj, ijcuacón ajsito tech se pueblojtzin. Huan tech ne pueblo yetoya se sihuat ten monotza Marta. Huan yejua quitatautij Jesús ma calaqui huan ma mocahua ompa ichan. <sup>39</sup> Huan ne Marta qui piaya se icniu ten monetzaya María. Huan ne María motalito taixpampa de Jesús campa Yejuatzin tanojnotztoya. Huan ijcón in María quiyecaquiliaya nochi ten Jesús quiytoaya. <sup>40</sup> Pero ne Marta ilihuis yolpoliutinemía ica tequit san. Ica ya nojón Marta motoquij campa Jesús yetoya huan quilij ijcuín:

—Totecotzin, ¿xe amo ticyolmachilía que nocniu María nechcahuac noseltij ica nochi nijín tequit? Xiquili nocniu María ma nechpalehuiqui.

<sup>41</sup> Ijcuacón Jesús quinanquilij Marta ijcuín:

—Tejua Marta, semi timoyolpolojtoc huan timoyoltajyohuiltijtoc ica mías tatan tequit. <sup>42</sup> Sayó ongac se taman tequit ten monequi xicchihua. Huan mocniu nijín María yejua qui jita ya ne tequit ten cachi cuali de que ma nechcaquilijto no-tajtoluan. Huan nijín María amo aquen huelis quiquixtilis ne tamachtilis ten yejua qui jita ya de quiselis.

### **Nican Jesús Temaquixtijque quinajsicamatiltij imomachtijcahuan de queniu motatautilisque ihuan Dios**

*(Mt. 6.9-15; 7.7-11)*

**11** Huan mochihuac que se tonal Jesús motatautilijtoya tech se lugar. Pero cuac Jesús motamitatatautilij ya, ijcuacón senme den imomachtijcahuan quilij ijcuín:

—Totecotzin, ticnequi xitechonmachi de queniu timotatautilisque ihuan Dios, ijcón queme ne Juan Taahuijque quinnextiliaya imomachtijcahuan de queniu motatautilisque.

<sup>2</sup> Ijcuacón Jesús quinilij ijcuín:

—Cuac namejuan nanquinequij nanmotatatautilisque ihuan Dios, ijcuacán xiquijtojan ijcuín:

Tohueyitajtzin ten tionyetica eluiyactzinco, ma timitzonmohuistilican ica in chipaucahuelilis de motocaytzin.

Huan xionuiqui huan ma xitechyolyecanaqui ica mohueyichicahualis.

Huan ma mochihua nican talticpac queme Tejuatzin ticonmonequiltía, ijcón queme mochiutoc ya ne eluiyactzinco.

<sup>3</sup>Huan no xitechonmaca axcan totaxcaltzin ten monequis.

<sup>4</sup>Huan no xitechontapojpolui de totajtacoluan porín tejuan tiquintapojpoluijque ya nochi neques ten techmohuispoloayaj.

Huan amo xitechonua tech in ohuijcyot. Ta, xitechajchihua den chichualis den amocuali Satanás.

<sup>5</sup>Huan de ompa Jesús quinmachtij imomachtijcahuan ca se nexcuitil ijcuín:

—Ma tiquijtocan que senme de namejuan ticpía se motasojicniu. Huan ne motasojicniu yohui mochan queme tajcoyohuan huan mitziliti ijcuín: <sup>6</sup>“Notasojicniu, xinechtaneuti eyi pantzitzin. Porín yequin no ne ejcoc nochan se notasojicniu ten hualajtoc de huejca huan amo teyi nicpía para nicuantis”. <sup>7</sup>Huan no ma tiquijtocan que tejuia ten tiyetoc calijtic ticnalnanquilía ijcuín: “Amo xinechcujmolojto oc porín nicyectzacuac ya topuerta huan nopiluan cochtocque ya nohuan ya nican camajco. Ica ya nojón amo huelis nimoquetzas huan nimitzmacatilitiu tensá”. <sup>8</sup>Huan namechilía que tejuia amo timehuas huan ticpalehuis ne tagat masqui yejuia motasojicniu. Ta, tejuia melau timehuas huan ticmacas ten yejuia quipoloa para ma amo cachi oc mitzcuejmolojto oc. <sup>9</sup>Ica ya nojón namechilía ijcuín: Xictajtanilican Dios huan Yejuatzin namechmactilis. Xictemocan de Dios nochi ten nanconmonequiltisque huan ijcón nanmoajxilisque ica ichichualis de Dios. Huan no ijcón queme tinaltacacalatza hasta que mitztatapohuilican, no ijcón xicsentogacan xiquilican Dios nochi ten nanconmonequiltíaj huan ijcón Dios namechmacas. <sup>10</sup>Porín nochi tocnihuan ten tajtanisque de Dios, yejuan nojonques Dios quinseliltis den motajtanilisque. Huan nochi tocnihuan ten quitemosque tensá de Dios, yejuan nojonques Dios quinpalehuis para ma moajxilican. Huan nochi tocnihuan ten tanotzasque, yejuan nojonques Dios quintatapohuilis para ma quiselican ya.

<sup>11</sup>Huan no Jesús quinilij imomachtijcahuan ijcuín:

—Amo aquen de namejuan nantetatme huelis nanquimactilisque namoconeu se tet cuac yejuia namechtajtanilis que ximacagan taxcal. Huan amo aquen de namejuan huelis nanquimactilisque namoconeu se cohuat cuac yejuia namechtajtanilis que ximacacan tzictzin pescadojnacat. <sup>12</sup>Huan amo aquen de namejuan huelis nanquimactilisque namoconeu se colot cuac yejuia namechtajtanilis se piotetzin. <sup>13</sup>Porín masqui namejuan amo nanyolchipauque, pero no cuali nanquimatij toni nanquimactilisque namopiluan tensá ten cuali huan ten huelic. Pues cachi oc Namohueyitajtzin ten yetica eluiyactzinco, Yejuatzin namechmajmactilis huan namechyolpexocaltis ica in Yecticatzin Espiritu ten nochi namejuan ten nanquitajtanilisque.

**Nican Jesús Temaquixtijque quinmachtij de sequin calyetoni  
ten moxexelojque huan motehuijtocque se huan ocsé**

(Mt. 12.22-30; Mr. 3.19-27)

<sup>14</sup>Huan mochihuac se tonal que Jesús quicalanquixtilij se amocuali ejecat de se tagat ten nontzin. Huan mochihuac que cuac quisac ya ne amocuali ejecat, ijcuacón ne nontzin huelic ya tajtoj. Ica ya nojón in tagayot quimoucaitayaj nijín itequiu ten quichi huac Jesús. <sup>15</sup>Pero sequin tagayot quiytoayaj ijcuín:

—Nijín tagat Jesús quincalanquixtía in amocuali ejecame ica in chichualis den amocuali Beelzebú naquen quinyecantoc in amocuali ejecame.

<sup>16</sup>Huan ocsequin tagayot quinequáj quitasque in chichualis de Jesús. Ica ya nojón yejuan quitajtánijque Jesús ma quinnextili se mohuiscatequit ica in chichualis den eluiyactzinco. <sup>17</sup>Pero Jesús ipa quintanemililixmatic in tagayot huan quinilij ijcuín:

—Tacán in pueblojuani de se país moxexelojtocque se huan ocsé huan motehuisque san, ijcuacón ne país nochi mohuejuelosque san. Huan no ijcón tacán in tagayot de se calyetoni moxexelojtocque se huan ocsé huan motehuáj san, ijcuacón ne calyetoni amo queman huelis sen yetosque. Ta, sayó mohuejuelojtinemisque san.

<sup>18</sup>Huan tacán in amocuali Satanás quintehuía iamocuali icnihuan, ijcuacón yejua ne motehuáj iselti san huan mocoj cocoa san. Huan como ijcón quichiutoc in Satanás, ijcuacón amo huelis huejcahuas ne ichichualis de yejua. Huan nijín ijcón namechilía porín namejuan nanquijtoaj que Nejuatzin niquincalaquixtía in amocuali ejecame ica ne chichualis den amocuali Beelzebú. <sup>19</sup>Huan como nejua niquincalanquixtisquía in amocuali ejecame ica in chichualis de amocuali Beelzebú, ijcuacón ne namoconehuan ten quincalanquixtinemij in amocuali ejecame, ¿aconi oc quinmacas yejuan in chichualis para ma yejuan no quincalanquixtican in amocuali ejecame? Ica ya nojón namejuan namoconehuan mochiuque namotaixejecojahuan huan namechtenextíaj que nanmoyolcajcayautocque san. <sup>20</sup>Huan Nejuatzin niquincalanquixtíaj in amocuali ejecame ica in chichualis den Totajtzin Dios. Huan nochi ten nijín notequiu nicchiutinemi quijtosnequi que ejcoc ya namotzalan in tonal cuac Dios quimonequiltía namechyolyecantiyás ica ihueyichichualis.

<sup>21</sup>Huan Jesús quinmachtij in tacaquini ica nijín nexcuitil ijcuín:

—Cuac se cuali chicaucata tagat quiyecpixtoc nichan ica cuajcuali teposme de manamicme, ijcuacón nochi ten quipixtoc calijtic amo aquen huelis quichtequilisque.

<sup>22</sup>Pero cuac huitza ocsé tagat ten cachi quipía chichualis huan que ne tagat tajpixque, ijcuacón ne cachi hueyi tagat quixixicos ne tajpixque huan quicuilijtéhua nochi niteposuan tenica moyolchicautoya. Huan no ne cachi hueyi tagat quinxexxelohuilía sequin tagayot nochi ten niaxca catca in tajpixque. Huan in Beelzebú yejua in tajpixque; huan Nejuatzin cachi nicpixinemij chichualis. Huan ne Beelzebú amo teyi quipía chichualis porín Nejuatzin huelis nicuilis nochi ten mopixtolijtoc. <sup>23</sup>Huan nochi neques ten amo techpalehuijtinemij, yejuan nojonques techtahuelitztinemij. Huan nochi neques ten amo tohuan yajtocque ca nijín totequiu, yejuan nojonques quixcueptinemij san notequiu.

**Nican Jesús Temaquixtijque quinmachtij de ne amocuali ejecame ten yajqui mocuepa campa calyetoya tech iyolijtic de se tagat**

(Mt. 12.43-45)

<sup>24</sup> Huan Jesús quinmachtij in tacaquini ijcuín:

—Huan cuac se amocuali ejecat quisac ya itech se tagat, ijcuacán ne amocuali ejecat nemi nohuiyan campa taluacan huan quitemojtinemi can huelis mosehúis itech iyolijtic de ocsé tagat, huan yejua amo cajsis. Huan ijcón monemillá ne amocuali ejecat ijcuín: “Cachi cuali nimocuepas ocsepa campa nihualehuac”.

<sup>25</sup> Huan cuac mocuepac ya campa hualehuac, ijcuacán quinamiqui ne tagat yoliuqui huan tachipahuiyan huan tachijchiutoc ya, pero amo yolpexocatoc ica in Yecticatzin Espíritu. <sup>26</sup> Ijcuacán in amocuali ejecat yohui huan quinuica ocsé chicome amocuali ejecame ten cachi pitzoticque huan que yejua. Huan nochi yejuan calaquitij huan mocaltalij itech ne tagat iyolijtic. Ijcuacán ne tagat mocahuas cachi yolpitzotic huan que ne achtopa catca.

**Nican tajtoa de queniu tatiochihualme de Dios neques ten quicaquij huan quitacamati in Tajtoltzin de Dios**

<sup>27</sup> Huan mochihuac que cuac Jesús quinilijtoya in tagayot nochi nijín tamachtilis, ijcuacán se sihuatzin quichicaucaij Jesús ijcuín:

—Tatiochihual de Dios ne sihuat ten mitzyolij huan mitzchichitij.

<sup>28</sup> Pero Jesús quinanquij ijcuín:

—Amo ijcón ma se quijto. Ta, cachi cuali ma tiquijtocan que tatiochihualme de Dios nochi neques ten quiyecaquij in Tajtoltzin de Dios huan quitacamati.

**Nican Jesús Temaquixtijque quinmachtij de ne tagayot ten amo yolcualime huan tenica fuerza tajtani se nescayot de Dios**

(Mt. 12.38-42; Mr. 8.12)

<sup>29</sup> Huan in tagayot cachi oc quiyehualoayaj Jesús. Huan Yejuatzin pehuac quinnojnotta ijcuín:

—In tagayot ten axcan nentinemij, yejuan nojonques semi amo yolcualime porín sayó nechtajtanilfaj ma niquinnextili se mohuiscatequit. Pero amo niquinnextilis se mohuiscatequit porín Totajtzin Dios quinonnextilij ya ne nexcuitil de ne huejcau tanahuatijque Jonás. <sup>30</sup> Huan ne Jonás mochihuaco se nexcuitil iixpan in pueblojuani ten nentinemícoj tech in pueblo de Nínive para ma quimatican ne pueblojuani que Dios quinualtitanilij ne Jonás. Xicmatican que no ijcón Nejuatzin ni Yectagatzin de Dios huan nimochihuas se nexcuitil para in pueblojuani ten nentinemij axcan para ma yejuan quimactican que Dios nechualtitanic Nejuatzin. <sup>31</sup> Huan tech ne tonal cuac Dios namechixcomacas namejuan in tagayot ten axcan nannentinemij, ijcuacán ne sihuat tayecanque de talme ten mocahua ne sur monotza Sebá, yejua ne moquetzas huan namechteluilis porín namejuan nanquixtopeuque ya in Tajtoltzin de Dios. Porín yejua yajca quicaquito in tamachtilis de Dios ica itencopaca ne rey Salomón. Huan Nejuatzin nican niyetoc namoixpan huan cachi nihueyi nichiuque huan que ne rey Salomón. Pero namejuan amo nanquinequij nannechcaquilisque.

<sup>32</sup> Huan tech ne tonal cuac Dios namechixcomacas, ijcuacán in pueblojuani de ne Nínive moquetzasque. Huan yejuan namechteluilij iixpantzinco Dios porín name-

juan nanquixtopeuque ya in Tajtoltzin de Dios. Porín ne Jonás yajca quinnojnnotzato huan quintaneltoctij ne pueblojuani de Nínive. Huan yejuan moyolnemilijque de nintajtacoluan. Huan Nejuatzin nican niyetoc namoixpan huan cachi nihueyi nichiqué huan que ne Jonás. Pero namejuan amo nanquinequij nannechcaquilisque.

**Nican Jesús Temaquixtijque quinajsicamatiltij  
in tacaquini de queniu toixtololohuan techtahuilía**

*(Mt. 5.15; 6.22-23)*

<sup>33</sup> Huan Jesús quinilij in tagayot ijcuín:

—Amo aquen quixotaltía se tahuil huan quitatía oso quitalti tatampa de se cajón. Ta, quitatía ne tahuil campa tasempayan para ijcón naquen calaquisque huelis tachiasque. <sup>34</sup> Namoixtololohuan nicejnehuililtía queme se tanex ten namechtahuilía hasta tech namoyolijtic. Huan tacán namoixtololohuan yec tequitij queme se cuali tanex, no ijcón cuali namechtahuilijtinemi hasta tech namotalnamiquilis. Huan tacán namoixtololohuan amo yec tequitij porín tensá quitzajtzacuilía namoixcconeu, ica ya nojón amo huelis calaquis in tanex. Huan ijcón nochi namoyolijtic mocahuas tech in tayohuanilot. <sup>35</sup> Huan no namechilía ximoyecpiacan san ca ne Tajtoltzin de Dios tenica namechyoltahuilijtoc, ma amo xiquixmictican. Porín como ijcón nanquichihua, ijcuacán sehuis ne tanex huan tayohuayantis itech namoyolijtic. <sup>36</sup> Huan queme in Tajtoltzin de Dios namechyoltahuilía huan amo teyi quiyecahuiltía nepa namoyolijtic, ijcuacán nochi nanyectachiasque ca cuali, ijcón queme cuac namejuan nanquixotaltía se tahuil.

**Nican tajtoa de queniu Jesús Temaquixtijque quinteluilíaya in  
fariseos huan in tanextiliani den tanahuatil de Moisés**

*(Mt. 23.1-36; Mr. 12.38-40; Lc. 20.45-47)*

<sup>37</sup> Huan cuac Jesús quintaminojnotzac ya in tagayot, ijcuacán se tamachile fariseo quitatautij Jesús ma yohui ichan tacuati. Huan melau ijcón Jesús quichihua huan calayic ichan in fariseo huan motalito ne mesajnacastan. <sup>38</sup> Ijcuacán in fariseo quimoucaitac cuac quitac que Jesús amo momajtequi achtopa que tacuas para ica quitenextis que momachipahua de nitajtacoluan. Huan Yejuatzin amo quichihua ijcón queme mohuicatinemij in pueblojuani judíos. <sup>39</sup> Pero Totecotzin Jesús quilij ijcuín:

—Axcan namejuan nanfariseos, nanquichipahua panían san in vasos huan caxme ten tajtic pexontoc oc ica míac tenesij ten pitzotic. Huan no ijcón mochiutoc namoyolijtic, namejuan nanmochipahua panían san. Pero tech namoyolijtic nanpexontocque ica míac tataman de tachtequilis huan de amocuali chihualisme. <sup>40</sup> Namejuan semi nanyolmijmiquilome porín nanquiyolnemilíaj sayó de namonacayo. Cualí nanquimatij que Dios quichijchihua namonacayo ten mocahua panían san. Huan no xicmactican que Dios quichijchihua namotalnamiquilis ten mocahua namoijticpa. <sup>41</sup> Ica ya nojón namechilía que monequi xitetayocolican ne tacualis ten yetoc tech in platos huan vasos para neques ten amo quipía tenica moixpanoltisque. Huan como nanquitayocolíaj ne namoyolchipahualis, ica ya nojón cachi oc nanmocahuasque nanyolchipauque.

<sup>42</sup> Huan semi nanteicneltiani, namejuan nanfariseos, porín melau namejuan namechnamiqui xicselican ne tatzacuilitis de Dios. Porín namejuan nanquimactilíaj

Dios namodiesmo de xiutzitzin san, queme in menta huan in ruda huan míac tata-man quiltzitzin ten amo teyi valeroa. Pero nanquisecocahuaj in tanextililisme ten cachi hueyi tech in tanahuatil de Moisés queme nijín tanahuatilme ten namech-tapohuiti. Nanquisecocahuaj in chipaucanemilis huan in tetasojtalis de Dios. Huan yejua nijín ten semi monequi xichiutinemican huan amo no xicahuacan de amo nanquitemactisque namodiesmo.

<sup>43</sup> Huan semi nanteicneltiani, namejuan nanfariseos, porín melau namejuan namechnamiqui ne tatzacuultilis de Dios. Porín namejuan semi nanquiyolnejnequij nanmosehuisque tech in cuali sillan ten yetocque cachi taixpan tech in tiopan de judíos. Huan no semi nanquiyolnejnequij que semi ma namechmohuiscatajpalocan tech in ojme den plaza.

<sup>44</sup> Huan semi nanteicneltiani, namejuan nanfariseos, huan nantanextiliani den tanahuatil de Moisés. Porín melau namejuan namechnamiqui xicselican ne tatzacuultilis de Dios. Porín namejuan semi nanixcucuepme san de namotamachilis. Namejuan nanquinejnehuilfaj ne ánimajtecochme ten amo motaj. Huan in tagayot panotinemij panían huan amo quimatij toni quitelicsatiquisaj. Namejuan nanquima-jmahuaj ica tajtacol nochi namotaneltocacahuan ijcón queme in tanahuatil de Moisés technextilía que timotajtacolmacaj ya cuac tipanotiquisaj panían de ne animajtecoch.

<sup>45</sup> Ijcuacán se tanextilijque de tanahuatil de Moisés quinanquilij Jesús huan quilij ijcuín:

—Tamachtijque, cuac titechilía nijín tajtolme, ijcuacán semi titechmohuispoloa ya.

<sup>46</sup> Pero Jesús quilij ijcuín:

—Semi nanteicneltiani, namejuan nantanextiliani den tanahuatil de Moisés. Porín melau namejuan namechnamiqui xicselican in tatzacuultilis de Dios. Porín namejuan nanquinmiactililfaj in tanahuatilme para ma ijcón in tagayot ma quintacamatican. Huan nijín queme yesquía se hueyi tamamal ten namejuan nanquintalilfaj, huan in tagayot amo huel cuicasque. Huan namejuan hasta amo no nanquinpalehuafaj in tagayot para momamaltisque ne tamamal.

<sup>47</sup> Huan semi nanteicneltiani, namejuan ten nanquinchijchihuilfaj ninánimaj-caluan ne tanahuatiani de Dios neques ten namohuejcautatuan quinmictijque.

<sup>48</sup> Huan ixnesi que no namejuan nanquinequij nanquichihuasque ijcón queme namohuejcautatuan quichiuque. Porín hueyi melau que namohuejcautatuan quinmictijti-hualyaj ne tanahuatiani de Dios huan namejuan nanquinchijchihuilfaj ne tanahua-tiani de ninánimajcaluan.

<sup>49</sup> Huan no Jesús quinilij in tacaquini ijcuín:

—Ica ya nojón Totajtzin Dios ica ihueyitamachilis techilij ijcuín: “Niquinualti-tanilis nopueblojcahuan sequin tanahuatiani huan tatitanilme pero nopuebloj-cahuan quinmictijque sequin huan ocsequin quinicanocayaj para ijcón quintajy-ohuiltisque”. <sup>50</sup> Ica ya nojón Totajtzin Dios namechixcomacas namejuan nantagayot ten axcan nannentinemij porín nanquinmictijtihualajque ya itanahuatijcahuan de Dios ten nentinemíaj desde cuac Dios quichijchihuac in talticpac. <sup>51</sup> Huan nan-quinmictijtihualajque nojón tanahuatiani desde cuac in Abel nemico huan hasta in tonal cuac nemico Zacarías ne ten quimictijque ne tiopanijtic campa altar. Huan

namechyequilía que Totajtzin Dios namechixcomacas namejuan ten axcan nanentinemij ica por nochi nojón temictilis.

<sup>52</sup> Semi nanteicneltiani, namejuan nantanextiliani den tanahuatil de Moisés, porín melau namejuan namechnamiqui xicselican in tatzacuiltis de Dios. Porín amo nanmoaxcatilfaj namejuan de ne tamachilisme tenica huelis nancalaquisque ne eluiyactzinco. Huan ne tamachilisme queme yesquía se llave. Pero namejuan amo nanquitatequiutíaj ne llave para ica nancalaquisque ne eluiyactzinco. Huan amo no nanquitacahuilfaj ma calaquican nochi neques ten quiyolnejqeuij calaquisque.

<sup>53</sup> Huan cuac Jesús quinilijtoya ya nochi nijín tajtolme in fariseos huan in tanextiliani den tanahuatil de Moisés, ijcuacón yejuan mohueyiyolcualantijque ihuan Jesús huan peuque quicejmoloaj Jesús ica míac tataman matájtanti. <sup>54</sup> Huan ica nojón matájtanti ten quichihuiliayaj, yejuan quinequíaj que Jesús ma quiptoani tensá de elihuis tajtol tenica huelisquíaj quipajpantisque Jesús ica tajtacol.

### **Nican tajtoa de queniu Jesús Temaquixtijque quinnejmachtij de ne tanextililis de fariseos ten tecajcayahua san**

**12** Huan mochihuac que mosentiliayaj campa yetoya Jesús huel míac tagayot hasta ca miles de tagayot. Huan queme semi huel miacque ya hasta mopejpechiayaj yejuan san. Ijcuacón Jesús pehuac quinnejmachtía imomachtijcahuan ijcuín:

—Ximoyecpiacan de ne tacajcayauca tanextililis ten cuicatinemij ne fariseos ne ten temajmahua ica tajtacol ijcón queme yesquía levadura ten quimajmahua ne pan tixti. <sup>2</sup> Porín amo ongac teyi chihualis oso tanemililis ichtacayot san ten ma amo quipía de que ixnesis. Huan amo no ongac tejsá tanextililis ten motatijtoc de que ma amo quipía de que monextis huan quimatisque nohuiyampa. <sup>3</sup> Ica ya nojón nochi tajtolme ten namejuan nanquichtacajtojcaj queme yesquía tech in tayohuayanilot, nochi namotajtoluan ipa mocaquis senteixteno queme yesquía tonayan. Huan nochi namoichtacatajtoluan ten nanquijtojcaj ya nanmocalijtic, nochi nojón motajtoluan chicaucacaquisti desde ne namocalcuaco.

### **Nican Jesús Temaquixtijque techmachtij de aconi monequis ticmoucatocasque**

*(Mt. 10.28-31)*

<sup>4</sup> Huan namejuan nannotasojicnihuan, namechilía que amo xiquinyolmohuiliican neques ten huelis quinmictisque namonacayo san. Porín cuac miquis ya namonacayo, ijcuacón amo teyi huelis oc namechchihuilisque. <sup>5</sup> Pero no namechnejmachtiti de aconi monequi xicmohuilijtiyacan. Namechyequilía que xicmohuiliican Totajtzin Dios ten huelis namechquixtilis namonemilis. Porín Yejuatzin no quipixtoc huelilis para no namechtamotas campa mictan. Ica ya nojón namechyequilía xicmohuiliican sayó Totajtzin Dios. <sup>6</sup> Huan xicmatican que hasta in tototzitzin quipíaj inpatiu porín quinnamacaj macuil tototzitzin tech in plaza ica sayó ome centavos. Huan masqui tepitzin san ipatiu, pero Totajtzin Dios amo queman quinelcahuas de nojón tototzitzin. <sup>7</sup> Huan cachi oc Totajtzin Dios namechelnamiquis de namejuan. Huan Yejuatzin namechtasojtatinemis porín hasta namotzontzin de namotzon-tecon no nochi tapohual yetoc ya. Ica ya nojón amo ximoyolcuejmolocan porín Dios namechtasojta. Huan namejuan nanvaleroaj cachi oc huan que miacque tototzitzin.

**Nican Jesús Temaquixtijke quinmachtij de ne itaneltocacahuan  
ten tetapohuijtinemij de Cristo intzalan in tagayot**

(Mt. 10.32-33; 12.32; 10.19-20)

<sup>8</sup> Huan Jesús quimachtij itaneltocacahuan ijcuín:

—Huan como acsame moyectenextía senteixteno que yejuan yec tacuautamatij nohuantzin de Nejuatzin ni Yectagatzin de Dios, ica ya nojón nicyecquiliti Notajtzin Dios inixteno nochi in inángeles que melau yejuan poutocque nohuan ya. <sup>9</sup> Huan como acsame nechtatisque huan telisque que amo nohuan tacuautamatij, ijcuacán Nejuatzin ni Yectagatzin de Dios niyecquiliti Notajtzin Dios ne inixpan inángeles de que yejuan amo nohuan poutinemij. <sup>10</sup> Huan como acsame nechmohuispoloaj Nejuatzin ni Yectagatzin de Dios, ijcuacán Dios huelis quintapojpoluis. Pero nochi neques ten quimohuispoloaj in Yecticatzin Espíritu, yejuan nojonques amo huelis Dios quintapojpoluis oc.

<sup>11</sup> Huan cuac quinequisque namechuicasque tech in tiopan de judíos para ompa namechixcomacasque. Oso cuac namechuicasque inixpan tequihuani oso inixpan in taixejeoani, ijcuacán amo teyica ximonemilican de queniu nanquinnanquilisque oso toni nanquinnanquilisque nojón tequihuani. <sup>12</sup> Porín xicmatican que cuac ej-cos in tonal de namechixcomacasque, ijcuacán in Yecticatzin Espíritu, Yejuatzin ne namechnextiliti tonica monequi nantananquilisque.

**Nican tajoa de ne tagat rico ten mijmiquilot**

<sup>13</sup> Huan senme de tacaquini intzalan in tagayot quilij Jesús ijcuín:

—Tamachtijque, nicnequi xicnahuati nocniu de que ma nechxelohuili ten pohui notechcacopaca den nojón toherencia.

<sup>14</sup> Pero Jesús quinanquilij ijcuín:

—Tejua tacat, ¿aconi nechtalij nejua queme taixejecojque namohuan oso taxeje-  
eloyque ica nijín namoherencia?

<sup>15</sup> Huan no Jesús quinilij ijcuín:

—Xictalican cuidado huan ximoyecpiacan de nochi tataman yolnejxicolot. Porín Totajtzin Dios amo quipohua que quipía semi ipatiu se tagat ica por nochi iricojyo ten quipixtinemi.

<sup>16</sup> Huan ijcón Jesús quinmachtij ica nijín nexcuitil ijcuín:

—Oncaya se tagat ten semi rico huan tech nochi italuan semi motachihuaya ica cuajcuali taquilome. <sup>17</sup> Ijcuacán ne tagat rico pehuac quiyolnemilía ijcuín: “¿Toni nicchihuas axcan? Porín amo nicpía calme campa niquehuas nochi notatoc”. <sup>18</sup> Ijcuacán in rico quinemilij ijcuín: “Axcan nicnemilij ya de toni nicchihuati. Achto niquinuejeloti nijín calme campa niquehua notatoc para ijcón niquinchi-jchihuatij ocsequin calme ten cachi huejueyín. Huan ijcón ompa niquehuas nochi ten noaxca. <sup>19</sup> Huan de ompa huelis niquliti notalnamiqulilis ijcuín: Notalnamilis, nimitzilía axcan ticpía míac tataman ten tiqueutoc ten moaxca ya huan nijín hue-jcahuas míac xiume. Ica ya nojón xitacua huan ximosehui huan xitayi vino huan ximoyolpactijtiu”. <sup>20</sup> Pero Dios quiliti ne rico ijcuín: “Tejua rico timijmiquilot san. Porín nimitzilía tech nijín yohual timomiquilis. Huan nijín ten moaxcacopaca nochi ne ten tiqueutoc, ¿para aconi ica mocahuas?” <sup>21</sup> Huan no ijcón mochihuas ipan ne



tagat como moaxcatilía niricojyo para yejua san. Yejua nojón tagat amo teyi chiuque iixpantzinco Dios.

**Nican Jesús Temaquixtijque techmachtiaya de que ma amo timoyolnemilijtinemican huan ma amo tiyolcuejmolojtinemican**

(Mt. 6.25-34)

<sup>22</sup> Huan cachi satepan Jesús quinilij imomachtijcahuan ijcuín:

—Namechilía que amo ximoyolcuejmolocan de toni nancuisque tech namone-milis, huan nión no de toni nanquicuasque. Huan amo no ximoyolcuejmolocan de tonica namotanquentisque. <sup>23</sup> Huan namechilía que namonemilis cachi tayecantoc huan que namotacualis. Huan namonacayo cachi tayecantoc huan que namotaquenuan. <sup>24</sup> Cualí xiquitacan san in tototzitzin ten quinilíaj cuervos, yejuan amo motatoquíaj huan nión no cajocuij taquilot huan amo no quipíaj sincalme campa taeutinemij. Pero Namohueyitajtzin nachipa quintamacatoc ne tototzitzin. ¿Xe amo namejuan cachi nantayecantocque ihuan Dios huan que ne tototzitzin? Pues quema. <sup>25</sup> Pues amo aquen de namejuan huelis momajxitis se molic oc para cachi huejcampantiyás masqui semi moyolcuejmos para quichihuas. Pero ipa amo huelis momajxitis. <sup>26</sup> Huan como namejuan amo hueli nanmomajxitíaj ica nojón tepitzin para cachi huejcampantiyás, ijcuacán amo ximoyolcuejmolojtinemican de amo nanquichihuasque in ocsequin tequit ten cachi ohuijque. <sup>27</sup> Cualí xiquitacan queniu moscaltíaj ne milajxochime. Yejuan amo motequitiltía huan nión tajquitij. Pero namechyeccuilía que nijín xochit semi cachi cualtzin xochiyohua. Huan masqui ne hueyi rey Salomón ica nochi icualtziyo motanquentiaya, pero amo queman huelía quinejnehuilij cualtzin queme nijín xochime. <sup>28</sup> Huan Dios quicualnextijtoc nijín milajxochime ten axcan moscaltijtoc huan mosta quitalisque campa ne tachinoa. Pero namejuan cachi oc namehpalehuis huan namechtaquentis Dios huan que ne milajxochime. Huan, ¿queyé namejuan amo majsitoc namotacuautamatilis para ijcón cachi oc huelis namehpalehuijtiyás Totajtzin Dios? <sup>29</sup> Huan namejuan amo xicnemilijtinemican huan ximoyolcuejmolocan de toni nanquicuasque huan de toni nantayisque mosta mosta. <sup>30</sup> Porín in tagayot de nican talticpac, yejuan nojonques quitemoaj sayó de nijín taman. Pero namejuan nanquipíaj se Namohueyitajtzin ten cuali quimati queniu namechixpanoltis ica nochi ten namechpolaaj. <sup>31</sup> Ta, cachi cuali namejuan xictemocan achto para ma Dios namechyolyecana ica ihueyichicahualis. Huan ijcón Yejuatzin namechmajxitijtiyás huan ijcón nanquiselisque nochi ten monequi ijcón queme in tacualis huan in atilis huan namotaquen.

**Nican Jesús Temaquixtijque quinajsicamatiltij in tagayot de ne melau ricojyot ne ten yetoc nepa eluiyac**

(Mt. 6.19-21)

<sup>32</sup> Huan Jesús Temaquixtijque quinilij in tagayot ijcuín:

—Amo ximoyolmoutican namejuan nannotaneltocacahuan. Masqui namejuan amo semi nanueyichihuanime, pero Totajtzin Dios quiyolpactía de namechyolyecantinemis ica ihueyichicahualis. <sup>33</sup> Huan no namechilía xicnamacacan nochi ten nanquipíaj huan xiquintayocolican neques ten amo teyi quipía. Huan como ijcón nanquichiutinemij, ijcuacán nanquipiatihue ricojyot nepa eluiyactzinco ten amo queman tamis, queme yesquía se tomin bolsa ten amo queman tzayanis. Huan

nepa eluiyactzinco in tachtecque amo huelis calaquis para namechtachtequisque. Huan ompa amo no ocuilmimalotos namoricojyo. <sup>34</sup> Porín campa yesqui yetos nochi namoricojyo, ne eluiyactzinco oso nican talticpac, sayó ompa itech ne namoricojyo nanyoltanemilijtinemisque.

**Nican tajtoa de queniu Jesús Temaquixtijque quinmachtij  
den se taquehual ten moyectatalijtoc ya**

<sup>35</sup> Huan Jesús Temaquixtijque quinmachtij de ne tonal cuac Yejuatzin mohualuicas den eluiyac. Huan Jesús quinliaya in tacaquini ijcuín:

—Ximoyectalijtocan ya ijcón queme cuac nanquiyecxotaltisque namotahuiluan huan nanyohue campa se nenamictilis. <sup>36</sup> Porín namejuan nanquinejnehuilíaj queme ne taquehualme ten quichixtocque ninteco ma mocuepa ya de se nenamictilis. Huan yejuan quichixtocque para cuac ninteco ejcos ya huan quinnotzas, ijcuación yejuan nimantzin quitatapohuilijthuetzisque. <sup>37</sup> Huan tatiochihualme de Dios ne taquehualme ten quinajsiquiu ninteco quichixcayetocque huan ixpetantocque. Huan ne yec melau namechilía que ne ninteco cuac ejcos ya, ijcuación yejua moyecyetalis huan quintacualchihuulis huan quinilis ma motalican huan ijcón yejua quintamacas. <sup>38</sup> Huan tatiochihualme de Dios ne taquehualme ten quinajsiquiu ninteco ixpetantocque huan yec yolyetocque masqui ejcos tajcoyohuan oso masqui ejcos nepa queme eyi hora de cualcan. <sup>39</sup> Huan no xicmatican que tacán se tetat de se calyetoní quimatisquía toni hora hualasquía in tachtecque, ijcuación amo cochisquía. Ta, ixpetantosquía huan amo quicahuasquía ne tachtecque ma quicaltapo huan quichtequilis ten niaxca. <sup>40</sup> Huan namejuan no namechilía que ximoyeyectalijtocan huan xicuatamatocan porín namejuan cuac amo nanquinemilijtosque cox nimohualuicas, ijcuación Nejuatzin ni Yectagatzin de Dios nimohualuicas nican talticpac.

**Nican Jesús Temaquixtijque quitelij se nexcuitil de ne taquehual  
ten yolcuali huan de ne taquehual ten amo yolcuali**

*(Mt. 24.45-51)*

<sup>41</sup> Ijcuación in Pedro quitajtohtij Jesús ijcuín:

—Totecotzin, ¿xe nijín nexcuitil ten titechmachtijtoc para tejuan yesqui oso para nochi in tagayot?

<sup>42</sup> Ijcuación Totecotzin quinanquilij ijcuín:

—Axcán namechtapohuiti de se taquehual ten yolcuali huan ten cuatamatque. Huan in patrón quicautehuac ne yolcuali taquehual ten tayecancataquehual ma yejua quinquiltijto in ocsequin taquehualme huan para ma yejua tanahuati ma quintamaca cuac ne monequis hora de tacualis. <sup>43</sup> Huan ijcón ne tayecanque taquehual tatiochihual de Dios yesqui, porín cuac ejcos nipatron, ijcuación cajsiquiu quichiutoc ten quinajnahuatiteu. <sup>44</sup> De yec melau ten namechilía ne patrón quicahuilis ne itayecancataquehual ma yejua quinyecana nochi in ocsequin taquehualme huan nochi ten niaxca.

<sup>45</sup> Pero no namechtapohuiti de se tayecanque taquehual ten amo yolcuali. Huan yejua moyoliliaya san ijcuín: “Nopatrón huejcahuati huan amo niman ejcos”. Ijcuación ne tayecanque taquehual pehua quinuítequi in ocsequin taquehualme huan sihuatquitini. Huan ne amocuali taquehual no pehua tatacuati san huan no pehua tahuana huan mohuintía. <sup>46</sup> Huan ijcón in patrón ejcos tech ne tonal cuac ne

amocuali tayecanque taquehual amo quichixtoc nipatrón, porín yejua amo quimatía toni hora ejcos nipatrón. Ijcuacón ne patrón quichicaucatzacuiltis ne taquehual ten amo yolcuali huan quitelchihuas huan quititanis ma tajyohuiti ihuan ne taca ten amo quichiuque queme quinnajnuhuatijtehuac. <sup>47</sup> Huan ne patrón cuitequis miacpa ne taquehual ten quimatic toni quinequía nipatrón ma quichihuani pero amo moyejyetalij para quichihuas huan amo no quitacamatic. <sup>48</sup> Pero ocsé taquehual amo cajsicamatía toni quinequía nipatrón ma quichihuani. Huan ne taquehual quichihuac sequi amocuali tequit tenica quinamiqui cuitequisque. Pero in patrón amo semi quiteluitec nitaquehual. Huan nochi neques ten in patrón quintanahuatlij ma quichihuacan míac tequit, yejuan nojonques in patrón quintatajtanis cachi oc de nintequihuan. Huan nochi neques ten in patrón quincahuilijtehuac ma quitamichihuacan míac tequit, yejuan nojonques in patrón cachi oc quintatajtanis.

**Nican Jesús Temaquixtijque quimachtij de que cuac se taneltoaca de Dios, ijcuacón huelis oncas cualanyot tech se calyetoni**

*(Mt. 10.34-36)*

<sup>49</sup> Huan Jesús quinmachtij imomachtijcahuan ijcuín:

—In tagayot motajtoltehuique hasta motehuique se huan ocsé ica nijín notamachtilis ten nicualcuic ya. Porín nojón netehuilis queme yesquía tit ten nicxotaltico. Huan nicnequisquía que majcán motamichiutoya nijín notequiu, ijcón queme se tit ten cuali xotatoc ya. <sup>50</sup> Huan Nejuatzin semi monequi niquijyohuis se tajyohuilis ten nopan monequi mochihuas. Huan nejua nihueyi nitajyohuijtíyas hasta in tonal cuac nictamichihuas ya notequiu. <sup>51</sup> Huan amo xicnemilican que Nejuatzin nihuala namechualcuilij sayó yecyectolis nican talticpac. Porín melau amo nihuala para namechualcuilis sayó yecyectolis. Ta, namechualcuilij ne tehuilis huan ne xexelolis. <sup>52</sup> Huan axcan para taixpan macuil calyetoni moxexelosque ica por notamachtilis. Huan eyi de ne calyetoni quintahuelitasque in ocsé ome. Oso ome de calyetoni quintahuelitasque in ocsé eyi. <sup>53</sup> Huan tech se calyetoni in tetat quicualancaitztinemis niconeu; huan ne iconeu quicualancahuis nitat. Huan no ijcón mochihuas in tenan quicualancahuis nisihuapil; huan ne isihuapil no quicualancaitztinemis inan. Huan no ijcón mochihuas in temonan quitahuelitztinemis nisihuamon; huan ne tesihuamon no quitahuelitztinemis ne imonan. Huan nochi nijín mochihuas ijcón porín quinselisque nijín notamachtilis.

**Nican tajtoa de queniu Jesús Temaquixtijque quintajtoltij in tagayot de queyé yejuan amo cajsicamatij nitamachtilis**

*(Mt. 16.1-4; Mr. 8.11-13)*

<sup>54</sup> Huan Jesús no quinilij in tagayot ijcuín:

—Huan namejuan nantagayot, cuac namejuan nanquitaj que in mixti motetepequetza nepa ipoliuyampa in tonal, ijcuacón nanquijtoaj que niman quiuhuis ya. Huan melau ijcón mochihuas. <sup>55</sup> Huan cuac nanquitaj que hualtaejeca de ne ajcopa, ijcuacón nanquijtoaj que tacahuanis. Huan melau ijcón mochihuas. <sup>56</sup> Namejuan nantacajcayahuani san. Cualí nancajsicamatij toni mochihuas cuac motetepequetza in mixti nepa ejeaixco oso cuac taejeca nican talticpac. Huan queme taejeca, cualí nancajsicamatij nochi nojón. Pero namejuan amo nancajsicamatij notamachtilis ten niquinnextilijtoc in tagayot ten axcan nentinemij.

### Nican tajtoa de ma timoyecahuacan ihuan neques ten namechteluilíaj

(Mt. 5.25-26)

<sup>57</sup> Huan namechilía que monequi namejuan san ximoixcomacacan se huan ocsé ica tamelautoc. <sup>58</sup> Huan tacán acsá mitzteluilía huan quinequi mitzuicas iixpan in juez, ijcuacón nimantzin tejua xiyó ximofuerzajui huan xictajtaneliti tech ne ojti ma mitztapojpolui para ijcón nanmoyecahuasque ya. Huan ijcón amo mitzuicas oc iixpan in juez. Porín tacán mitzuicas iixpan in juez, ijcuacón ne juez mitztemactis inmaco in policía huan yejuan mitzcalaquitihue nepa cárcelijtic. <sup>59</sup> Huan yec melau ten namechilía que como mitztzacuasque, ijcuacón amo huelis tiquisas oc de ne cárcel, como amo achto ticemaca nochi ten mitztajtanisque.

### Nican tajtoa de ma timoylnemilican de namotajtacoluan oso, ¿xe cachi cuali nanixpolihuisque?

**13** Huan tech nojón tonalme sequin taca yajque quitapohuitoj Jesús de quenú in tayecanque Poncio Pilato quinmictij sequin taca de pueblo Galilea. Huan ne Pilato quimaneloj inesti de ne taca ihuan sequin esti den tapialme ten ne taca quinmictijcaj ya para ijcón quimohuistilijque Totajtzin Dios. <sup>2</sup> Huan Jesús quinilij ijcuín:

—Namejuan amo xinemilican que ijcón inpan mochihuac porín yejuan cachi tajtaclejque huan que ocsequin ninpueblojcahuan de Galilea. <sup>3</sup> Pero namechilía que amo melau yejuan cachi tajtaclejque. Ta, namechilía que como amo nanmoyolnemilíaj de namotajtacoluan, ijcuacón nochi namejuan nanixpolihuisque ijcón queme yejuan ixpoliuque ya.

<sup>4</sup> Huan no xiquelnamiqican de ne caxtolomeyi taca ten momiquilijque cuac inpan huetzic ne tepan queme campanario ten monotza Siloé. Huan amo xicnemilican que ne taca ten momiquilijque cachi tajtaclejque catca huan que in ocsequin tagayot ten calyetocque tech in Jerusalén. <sup>5</sup> Pero namejuan namechilía que yejuan amo cachi tajtaclejque. Ta, namechilía como namejuan amo nanmoyolnemilíaj de namotajtacoluan, ijcuacón nanixpolihuisque ijcón queme yejuan ixpoliuque ya.

### Nican Jesús Temaquixtijque qitalij se nexcuitil den se higos cuohuit ten amo quitemacac taquilot

<sup>6</sup> Huan no Jesús quinmachtij in tagayot ica se nexcuitil ijcuín:

—Se patrón quiapiaya se higos cuohuit ten ijcatoya italpan. Huan ne patrón yajqui quitamolito cox quiapiaya higos cuouxocot. Pero amo teyi xocot cajxilij. <sup>7</sup> Ijcuacón ne patrón quilij in taquehual ten tajpixinemía nepa italpan ijcuín: “Xiquita, que nihualajca expa ya de nijín eyi xihuit, huan amo teyi higos xocot nicajxilía nijín cuohuit. Nimitzilía yequintzin xicmayohui nijín cuohuit para ma amo nencajtito san nijín tal”. <sup>8</sup> Pero ne tajpixque de ne tal quinancuilij ipatrón ijcuín: “Notecotzin, ma ticahuacan oc in cuohuit nijín xihuit. Huan nejua nitalyemaniti itzintan in cuohuit huan nictalilis tapalan. <sup>9</sup> Huan ca nijín notequiu ten nichihuas, a ver xa quitemecas taquilot ten ocsé xihuit. Pero tacán amo quitemacas xocot, ijcuacón ocsepa xinechnahuati huan nejua nicmayohuis”.

**Nican tajtoa de queniu Jesús Temaquixtisque  
quipajtij se sihuat tech in tonal de nesehuilis**

<sup>10</sup> Huan se tonal de ne sehuilis Jesús quinmactiaya in tagayot tech in tiopan de judíos. <sup>11</sup> Huan mochihuac que no ompa yetoya se sihuat ten mococoaya caxtolomeyi xiutica ya. Huan se amocuali ejecat quichihualtij in sihuat ma tomozquisa. Huan ijón in sihuat amo queman huelía momelaxquetzas. <sup>12</sup> Huan cuac Jesús quitac ne sihuat, ijcuacón Yejuatzin quinotzac huan quilij ijcuín:

—Tejua sihuatzin, axcan nimitztacajchualtij ya de neocolis ten ticpíaya.

<sup>13</sup> Huan ijón Jesús momasohuac ipan ne sihuat cocoxque huan de ompa tech ne momento momelaxquetzac ne sihuat. Huan yejua pehuac quimohuistilía Totajtzin Dios. <sup>14</sup> Pero in tayecanque de ne tiopan de judíos mohueyiolcualantij porín quitac que Jesús quipajtij se cocoxque tech in tonal de ne sehuilis. Ica ya nojón ne tayecanque quinilij in tagayot ijcuín:

—Ongac chicuasen tonal para se tequitis. Huan como nanquinequij nanmopajtisque, ijcuacón xihualacan senmanajpan huan amo xihualacan tech in tonal de ne sehuilis para nanmopajtisque.

<sup>15</sup> Ijcuacón Totecotzin quinanquilij ijcuín:

—Namejuan semi hueyi nantacajcayahuani. Nicmati que senme de namejuan nanquitomaj namocuacuohue oso namoburro para nancuicasque huan nantamacatihue tech in tonal de ne sehuilis. Huan nojón ximatican que no tequit cuac ijón nanquichihuaj. <sup>16</sup> Pero nijín sihuatzin cocoxque, yejua teconeu de ne tohuejcaut de Abraham. Huan in Satanás quitajyohuiltijtihuitz ya ica nijínocolis para nijín caxtolomeyi xiutica ya. ¿Xe amo Dios quimonequiltía ma nictacajchualtis nicocolis de nijín sihuat, masqui tech nijín tonal de ne sehuilis? Pues quema.

<sup>17</sup> Huan cuac Jesús quitamijtoy ya nijín tajtolme, ijcuacón nochi neques ten quixnamicque nitajtolis de Jesús, yejuan nojonques mopinautisque. Pero nochi in pueblojuani moyolpactiyaj cuac quitacque nochi in mohuiscatequime ten quichiutinemía Jesús.

**Nican Jesús Temaquixtisque quinejnehuililtij in Tajtoltzin de Dios  
queme se cuohuit ten quilíaj mostazjtet**

*(Mt. 13.31-32; Mr. 4.30-32)*

<sup>18</sup> Huan in Jesús quinmactiaya in tagayot ica se nexcuitil huan quiniliaya ijcuín:

—Nicui nijín nexcuitil para nicnejnehuililtía se cuouxinach ten monotza mostazjtet ihuan nijín ihueyichicahualis de Dios tenica Yejuatzin techyolyecantinemi.

<sup>19</sup> Nicnejnehuililtía ne ichicahualis de Dios queme se cuouxinach ten quilía mostazjtet. Huan mochihuac que se tagat quicuic in mostazjtet huan quitocac tech ne imila. Huan ne mostazjtet ten quitocac ixuac huan moscaltij huan mochihuaco se hueyi cuohuit. Huan hualaya in tototzitzin ten pantantinemij ejecaixco huan ompa motapajsolitíaj tech imatzacaluan.

**Nican tajtoa de queniu Jesús Temaquixtisque qitalij  
se nexcuitil den tamajmahualis ten quilíaj levadura**

*(Mt. 13.33)*

<sup>20</sup> Huan ijón Jesús ocsepa quinmactiaya in tagayot ca se nexcuitil ijcuín:

—Nicui nijín nexcuitil para nicnejnehuilittía in levadura ihuan nijín ichicahualis de Dios tenica Yejuatzin techyolyecantinemi. <sup>21</sup> Huan ne levadura yejua ne ten tamajmahualis ten quiposonaltía in pantixti. Huan se sihuat quicuic tamajmahualis huan quimaneloa ihuan eyi tamachiu de harina. Ica ya nojón ne tamajmahualis quiposonaltía nochi in tixti de harina.

**Nican tajtoa de queniu Jesús Temaquixtijque quinajsicamatiltij in tacaquini de ne calten ten amo patahuac**

*(Mt. 7.13-14, 21-23)*

<sup>22</sup> Huan ijcón cuac in Jesús yaya para ajsis Jerusaléncopaca, ijcuacán panotiaya tech in huejueyi pueblojme huan tech in pueblojtzitzin huan ompa quinmachtij-tiquisac in tagayot ica in Tajtoltzin de Dios. <sup>23</sup> Huan senme den taca quitajoltij Jesús ijcuín:

—Totecotzin, ¿xe amo semi miacque maquisasque de nintajtacoluan?

<sup>24</sup> Pero Jesús quinilij ijcuín:

—Namechilia monequi ximofuerzajuican de xicalaquican tech ne calten ten amo patahuac ne ten namechajxitis ne eluiyactzinco. Porín melau namechilía que miacque quiyolnejqequisque calaquisque tech ne calten ten amo patahuac pero amo huelisque. <sup>25</sup> Ma tiqijtocan que se tagat de se calyeton mehuac ya huan quiyectzacuac ne calten. Pero namejuan nanyetinemisque ne calampa, huan nanquinalcalatzasque in calten huan nanquilisque ijcuín: “Totecotzin, techontatapohuili ma ticalaquican”. Pero ne tetat namechinnanquilis ijcuín: “Amo namechtatapohuilis porín amo namechixmati de can nanhuitze”. <sup>26</sup> Ijcuacán namejuan nanpehuasque nanquilisque ne tetat ijcuín: “Tejuan titacuayaj huan titayayaj vino mohuan. Huan tejua titechmactiaya tech in plazajteno”. <sup>27</sup> Pero ne tetat namechnanquilis ijcuín: “Namechilij ya que amo namechixmati de can nanhuitze. Xinechtapatahuilican nochi namejuan ten nanquichiutinemíaj tajtacol san”. <sup>28</sup> Huan cuac mochihuas ne tatzacuultilis de Dios, ijcuacán namejuan nanchocasque huan nantananzocatosque ica tajyohuilis. Porín nanquitasque ne huejcautetame Abraham huan Isaac huan Jacob. Huan no nanquitasque nochi in tanahuatiani de Dios que nochi yejuan yetine-misque imaco Dios campa Yejuatzin quinyolyecantinemi ica ihueyichicahualis. Pero namejuan namechcalantamotasque de ne ihuelilispán de Dios. <sup>29</sup> Porín nanquitasque que hualasque in taca taneltocani desde ne iquisayampa tonaltzin huan no hualasque desde ne ipoliuyampa tonaltzin huan no hualasque desde ne ajcopa huan hualasque desde ne tanipa. Huan nochi yejuan nojón taneltocani hualasque huan calaquisque huan motalitihue para sentacuasque ne campa ihuelilispán de Dios campa Yejuatzin quinyolyecantinemi itaneltocahuan. <sup>30</sup> Ijcuacán sequin de namejuan ten axcan namechpohuaj que nantacuitapanme ya, namejuan nanmochihuatihue tayecanani iixpantzinco Dios porín nanquiselijque ca cuali in Tajtoltzin de Dios. Huan no sequin de namejuan ten axcan nanmopohuaj nantayecanani, namejuan namochihuatihue nantacuitapanme iixpantzinco Dios porín amo nanquiselijque in Tajtoltzin de Dios.

**Nican tajtoa de queniu Jesús Temaquixtijque  
quinchoquilij in pueblojuani de Jerusalén**

(Mt. 23.37-39)

<sup>31</sup> Huan tech ne tonal motoquijque campa Jesús yetoyaj sequin tamatinime fariseos huan quilijque Jesús ijcuín:

—Xiquisa de nican porín in rey Herodes quinequi mitzmictis.

<sup>32</sup> Huan Jesús quinnanquilij ijcuín:

—Ta, xiyacan xiquilican ne tacajcayauque rey Herodes ijcuín: “Xiquita, tech nínjín tonalme mosta huan huipta niquincalanquixtiti oc in amocuali ejecame. Huan no niquinpajtiti oc in cocoyani. Huan de ompa niman motamichihuas notequiu”.

<sup>33</sup> Porín semi monequi nicsentocas nitequitiyás tech noojpan axcan huan mosta huan huipta huan tech in tonalme ten niman hualajtoc. Pero semi monequi ma niajsiti Jerusaléncopaca porín amo nechnamiqui que Nejuatzin nitanahuatijcau de Dios ma nimomiquili calampa den pueblo Jerusalén. Ica ya nojón ne rey Herodes amo huelis nechmictiquiu nican.

<sup>34</sup> Huan no Jesús quinilij ijcuín:

—Namejuan nanpueblojuani de Jerusalén, namejuan nanquinmictijtहितze tanahuatiani de Dios. Huan namejuan nanquintepoxonijthuitze itanojnotzcahuan de Dios ten Yejuatzin namechinualtitanilij. Namechilía que miacpa nicnequía namechsantililij para namechtampahuis ica nochicahualis huan namechyecanas nochi namejuan nanpueblojuani de Jerusalén. Huan nicnequía namechpalehuis ijcón queme in piotapachojque quinsentilía nipiluan iejtapaltampa. Pero namejuan amo nanmotecahuilijque ma namechpalehuis. <sup>35</sup> Xiquitacan namejuan, axcan Dios namechsencahuac ya, namejuan namochancahuan huan namopueblojcahuan. Huan no namechilía que amo queman nannechitasque oc. Ta, sayó ijcuac ne tonal cuac namejuan nanmoyolnemilisque de namotajtacoluan. Huan no nannechilisque de Nejuatzin ijcuín: “Tejuatzin tiontatiochihual de Dios, huan tionualajtoc itencopaca tohueyi Totayecancajtzin Dios”.

**Nican tajtoa de queniu Jesús Temaquixtijque quipajtij se tagat  
cocoxque ten pojposahuaya ya ninacayo**

**14** Huan mochihuac tech se tonal de nesehuilis que Jesús yajqui tacuato ichan se tayecanque fariseo. Huan ompa ocsequin tamatinime fariseos quipijpixonoyaj Jesús para huelis quipajpantisquía ica tensá tajtacol. <sup>2</sup> Huan ompa iixpan Jesús yetoya se tagat cocoxque ten pojposahuaya ya ninacayo. <sup>3</sup> Ijcuacán Jesús quintajtotlij neques fariseos huan tanextiliani den tanahuatil de Moisés ijcuín:

—¿Cox Dios quimonequiltía ma se quipajti se cocoxque tech in tonal de nesehuilis? Oso, ¿cox Dios amo quimonequiltía?

<sup>4</sup> Huan ne fariseos huan tanextiliani sayó motentamatilijque san. Ica ya nojón ne Jesús quicuic in cocoxque huan quipajtij huan de ompa quilij ma yohui. <sup>5</sup> Huan ijcón Jesús pehuac quinilía ne fariseos ijcuín:

—Huan como namoburro oso namocuacuohue huetztosquía huan mopantamotasquía tech se talcomit, ¿xe namejuan amo nanquiquixtithue nimantzin masqui tech in tonal de nesehuilis? Pues quema.

<sup>6</sup> Ica ya nojón ne fariseos amo teyi huelic ica quinanquilijque Jesús.

**Nican Jesús Temaquixtijque quitelij se nexcuitil de sequi  
techanchahuan ten yohue iluititij tech se nenamictilis**

<sup>7</sup>Huan Jesús quitac de queniu ne tanotzalme quijitacque can motalisque campa cachi mohuistic in sillas tech se iluit. Ica ya nojón Jesús quinmachtij ica se nexcuitil ijcuín:

<sup>8</sup>—Cuac acsá mitznotza huan mitzuicas tech se iluit de nenamictilis, ijcuación cuac tiajsis amo ximotaliti tech in silla den cachi mohuistic. Pues como ijcón tic-chihuas, ijcuación huelis ejcotihuetzis ocsé tagat tanotzal ten cachi hueyi chiuque huan que tejua. <sup>9</sup>Huan como ejcos ne cachi hueyi chiuque, ijcuación huelis hualas in patrón ten namechnotzac xiiluitiqui huan huelis mitzilis ijcuín: “Tejua ximajchihua huan xicahuili ne mohuistic silla para nijñ tanotzal ten cachi hueyi chiuque”. Ijcuación tejua ipa quipía de timajchihuas huan ijcón timopinaucatalijtiyás huan timotaliti ne campa ne silla ten cachi tacuitapampa. <sup>10</sup>Ta, namechilía cachi cuali cuac acsame mitznotzasque xiiluititi, ijcuación ximotaliti tech ne silla ten cachi tacuitapampa. Huan cuac hualas ne patrón ten mitznotzac xiiluititi, ijcuación yejua mitzilis ijcuín: “Notasojicniu, ximopanolti cachi taixpan campa cachi tamohuisyojcan”. Huan ijcón cachi oc mitzueyichihuasque nochi neques ten ompa tocotzyetocque. <sup>11</sup>Huan namechyequilía que nochi neques ten mohuejueyichihuasque, yejuan nojonques Dios quintalpantalis. Huan nochi neques ten mopohuaj que amo hueyi chihuanime, yejuan nojonques Dios quinueyitalis.

<sup>12</sup>Huan no Jesús quilij in tayecanque fariseo ten quinotzac Jesús ma iluititi ijcuín: —Huan cuac tejua ticnequi tiquintamacas acsame, ijcuación amo xiquinnotza motasojicnihuan huan nión no mocnihuan. Huan amo no xiquinnotza moparientes huan nión movecinos ten ricojme. Huan amo xiquinnotza nochi yejuan ma mohuan tatacuaquij porñ yejuan cuali huelis momacuepasque huan mitznotzasque xitacuatiniñ. <sup>13</sup>Ta, namechilía que cachi cuali cuac ticnequis tiquintamacas acsame, ijcuación xiquinnotza neques ten amo teyi quipíaj huan neques ten macotoltijque. Huan no xiquinnotza neques ten coxojme huan ixpojpyome. <sup>14</sup>Huan como tiqinnotza ma iluitiquij nojonques, ijcuación Dios mitzmactilis yolpaquilis porñ yejuan amo huelisque mitznotzasque no xitacuaquij tech ninchan. Huan ijcón tejua ticpías se hueyi tetayocolil imaco Dios tech ne tonal cuac Yejuatzin quinpanquixtis yoltocque nochi in taneltocani ten yolchipauque.

**Nican tajtoa de queniu Jesús Temaquixtijque  
quitelij se nexcuitil de se hueyi tatacualis**

<sup>15</sup>Huan cuac quicayic senme de neques ten tatacuatoya ihuan Jesús, ijcuación yejua quilij Jesús ijcuín:

—Tatiocihual de Dios huan semi yolpaqui ne tagat ten tatacuaqui ihuan neques ten Dios quinyecantinemi ica ne ichuahualis.

<sup>16</sup>Ijcuación Jesús quinmachtij in tagayot ica se nexcuitil ijcuín:

—Se tonal mochihuac que se patrón quinecquic quintamacas miacque huan taticnic ma quinnotzacan miac tagayot. <sup>17</sup>Huan cuac ejcoc ya in hora para tatacuasque, ijcuación ne patrón quintitanic itaquehual que ma yejua quinnejmachtiti ya neques ten ninpatrón ipa quinnotzaca ya huan ma quinili ijcuín: “Niman xihualacan ya, xitacuaquij ya porñ nochi yetoc ya”. <sup>18</sup>Ijcuación nochi neques tanotzalme peuque



moyayajcanecquij seco. Huan se tanotzal quilij in taquehual ijcuín: “Yequirpan nicohuac se tal huan quipía de niyás niqunitatiu. Ica ya nojón xiquilij mopatrón ma nechontapojpolui que amo huelis niyás nitatacuatiu”.<sup>19</sup> Huan ocsé tanotzal no quilij in taquehual ijcuín: “Yequintzin niquincohuac macuil yuntas de cuacuejme huan nicnequi niquinejecotiu cox huelis tequitisque. Ica ya nojón nimitzontatautía que xiquili mopatrón ma nechontapojpolui que amo huelis niyás nitatacuatiu”.<sup>20</sup> Huan ocsé tanotzal no quijtoj ijcuín: “Yequirpan nimonamictij. Ica ya nojón amo huelis niyás nitatacuatiu”.<sup>21</sup> Huan cuac in taquehual mocuepa ichan ipatrón, ijcuacán yejua nochi quitapohuij ipatrón ten quiluijque ne ten tanotzalme. Ica ya nojón ne patrón mocualantij huan quilij itaquehual ijcuín: “Nimantzin xiyati xihualnemiti tech huejueyi ojme huan tech ojtztzin den pueblo huan xiquinualcui nican para tatacuasque neques ten amo teyi quipíaj. Huan no xiquinualcui ne cocoltijque huan ne coxome huan ne ixpojyome”.<sup>22</sup> Huan satapan cuac in taquehual tami nemico ya, ijcuacán yejua quilij ipatrón ijcuín: “Notecotzin, axcan nictamichihuac ya ijcón queme tinechnahuatlij ya. Huan tacautoc oc ne calijtic para ocsequin tatacuasque”.<sup>23</sup> Ijcuacán in patrón quilij itaquehual ocsepa ijcuín: “Xiyó xihualnemiti tech in huejueyi ojme huan tech in ojtztzin de pueblo huan xiquinfuerzajui ocsequin taca ma hualacan huan ma calaquican tech nochan ma pexoni nochan de tatacuani.<sup>24</sup> Porín namechyequílía que neques ten achtopa niqinotzac ya ma tatacuacui ten amo quinequij hualasque, yejuan nojónques amo queman tatacuasque nohuan”.

### **Nican tajtoa de ma ticchixtiyacan ne tajyohuilis como tejuan ticnequij tictacacmatinemisque Cristo**

<sup>25</sup> Huan se tonal huel míac tagayot quitoctiliyaj Jesús huan Yejuatzin moican-cuepac huan quinilij ijcuín:

<sup>26</sup>—Huan namejuan nanquintasojtaj namotatuan huan namonanuan huan namosihuahuan huan namoconehuan huan namoicnihuan taca huan namoicnihuan sihuame. Huan no nanquintasojta hasta namotalnamiquilisuan. Pero monequi cachi xinechtasojtacan Nejuatzin huan que nochi nijinques. Huan como amo nannechyechtasojtaj, ijcuacán amo huelis nannechtoctilisque huan nión no huelis nanmochihuasque nannomomachtijcahuan.

<sup>27</sup> Huan Jesús quinnextiliaya in tacaquini ica nijín nexcuitil ijcuín:

—Nicnejnehuililtía in cruz queme se tajyohuilis. Huan como notaneltocacahuan amo taxicojtiasque ica nijín tajyohuilis cuac nechtoctilisque, ijcuacán yejuan amo huelis mochihuaquihue nomomachtijcahuan.

<sup>28</sup> Huan Jesús quinnextiliaya in tacaquini ica se nexcuitil ijcuín:

—Huan namejuan cuac nanquinequij nanquichihuasque se huejcapan tepan, ijcuacán achto nanmosentilaj para nanquixejecoaj de canachi tomin monequis para nanquitamichihuasque ne tepan. Huan cuac nochi nanquixejecoajque ya que ajsis ya in tomin, ijcuacán nanquimatij ya que melau nanquitamichihuasque ya ne tequit.<sup>29</sup> Huan tacán amo achto cuali nanquixejecoaj, ijcuacán amo huelis nanquitamichihuasque in tequit. Porín como nanquintalisque ya in tatzinehualoni huan tamis namotomin, ijcuacán amo huelis nanquitamichihuasque in tequit. Huan ijcón in tagayot pehuaj namoca paquij san.<sup>30</sup> Huan quijtosque sequi ijcuín: “Ne taca peuque quijchihuaj se tepan, pero amo huelic quitamichiuque”.

<sup>31</sup> Huan ocsepa Jesús quinmachiya in tacaquini ica se nexcuitil ijcuín:

—Huan ma tiquijtocan que se rey quinequi motehuis ihuan ocsé rey. Ica ya nojón ne achto rey ten quiyolnemilía motehuis, yejua ne mosentilía ihuan iteyolmajxitic-ahuan. Huan ijcón mosenixejecoltíaj cox huelis motehuitihue ica májtacti mil soldados para quintanilisque ne ocsé rey ten cualcui sempoal mil soldados. <sup>32</sup> Huan tacán ne achto rey quixejecoa que amo huelis quitanilis ne ocsé rey ten cachi míac soldados quincualcui, ijcuacón yejua quititani se itetajtohuijcau para yejua quinojnotzati ne ocsé rey cuac huejca oc motztocque. Huan ijcón ne itetajtohuijcau quitajtaniliti ne ocsé rey que ma amo onca oc ne netehuilis.

<sup>33</sup> Huan no Jesús quilij in tagayot ijcuín:

—Como namejuan nanquinequij nanmochihuasque nannomomachtijcahuan, ijcuacón monequi xiquixejecohtiyacan queniu nannechtacamatiyasque huan ijcón xicsecocautiyacan nochi ten namoaxca.

**Nican Jesús Temaquixtijque quinmachtij in tacaquini de se nexcuitil den istat ten quipoloj ya ipoyecca**

*(Mt. 5.13; Mr. 9.50)*

<sup>34</sup> Huan no Jesús quinilij in tacaquini ijcuín:

—Semi huelic in istat. Pero tacán in istat quipoloa ne ichicahualis, ijcuacón ¿que-niu huelis ocsepa poyeyas, como amo quipía oc nipoyecayo? Pues amo huelis. <sup>35</sup> Ica ya nojón ne istat amo teyi cualtía huan amo no quipalehuis in tal huan amo no cualtía queme tapalan. Ta, sayó se quitamotas. Huan no ijcón mochiutos inpan neques ten quinequi nechtacamatisque. Monequi ma mofuerzajuican ica nochi nintalnamiquilis de nechtoctilisque huan nechtacamatisque. Huan nochi neques ten quipíaj ninnacasuan para tacaquisque, ma yec tacaquican.

**Nican tajtoa de queniu Jesús Temaquixtijque quitilij se nexcuitil de se ichcatzin ten ixpoliutoya**

*(Mt. 18.10-14)*

**15** Huan motoquijque campa Jesús yetoya míac tatopaluiani huan neques ten amo tatacamatinemij ica in tanahuatil de Moisés. Huan yejuan motoquicoj para quicaquilisque Jesús itanojnotzalis. <sup>2</sup> Ica ya nojón in tamatinime fariseos huan in tanextilianí den tanahuatil de Moisés, yejuan nojonques quitejtenehuayaj Jesús huan quijtoayaj ijcuín:

—Nijín tagat Jesús quinselía huan ninuan tacuaquij nochi neques ten amo quitacamatinemij in tanahuatilme de Dios.

<sup>3</sup> Ijcuacón Jesús quinmachtij in tacaquini ica nijín nexcuitil ijcuín:

<sup>4</sup>—Ma tiquijtocan que senme de namejuan quipiaya macuilpoal ichcame huan senme de ne ichcame polihuc. ¿Cox amo in tapixque quincahuac ne cuouta in ocsequin nahuipoal huan caxtolonahuin ichcame huan yohui quitemoa hasta cajsis ne ichcatzin ten polihuc? Pues quema. <sup>5</sup> Huan ne tapixque cuac cajsis ya ne ichcatzin ten poliUCA ya, ijcuacón yejua quicuis huan moquechcochtalilis huan yohui moyolpactijti. <sup>6</sup> Huan cuac ne tapixque ajsis ya ichan, ijcuacón yejua quinsentilis ne itasojcnihuan huan ichancahuan huan quinilis ijcuín: “Ximoyolpactican ijcón queme nejua. Porín nicajsic ya ne ichcatzin ten ixpoliutoya ya”. <sup>7</sup> Huan Totajztin Dios quitztinemi ne nahuipoal huan caxtolonahuin taca ten mopohuaj yolchipauque ya, ten quinemilíaj que amo monequi moyolnemilisque oc que de nintajtacoluan.

Pero no namechilía que Dios ihuan in ángeles nepa eluiyactzinco no cachi oc moyolpactíaj ica por se tagat tajtacole ten yequin moyolnemilij ya huan quicahuac ya nitajtacoluan.

**Nican Jesús Temaquixtijque quitelij se  
nexcuitil de se sihuat ten quipoloj se tomin**

<sup>8</sup> Huan Jesús quinmactij in tagayot ica nijín nexcuitil huan quiniliaya ijcuín:

—Huan se sihuat quipiaya májtacti tomin de plata, quiptosnequi májtacti tonal taxtahuil. Huan yejua quipoloj se tomin. Huan ne sihuat quixotaltía se tanex huan de ompa pehua tachpana ica nejmach ne icalijtic huan quitemoa ne tomin hasta queman cajsi. <sup>9</sup> Huan cuac ne sihuat cajsi ya itomin, ijcuacán yejua quinsentilía itaso-jcaicnihuan huan ichancahuan huan quinilía ijcuín: “Ximoyolpactican ijcón queme nejua, porín nicajsic ya notomin ten nicpulojca ya”. <sup>10</sup> Huan Nejuatzin namechilía que Dios ihuan in ángeles nepa eluiyactzinco melau no cachi oc moyolpactía cuac se tagat tajtacole moyolnemilía huan quicahua nitajtacoluan.

**Nican Jesús Temaquixtijque quitelij se nexcuitil de se tamajcahual tellocat**

<sup>11</sup> Huan ocsepa Jesús quinmactij in tagayot ica se nexcuitil ijcuín:

—Se tagat quipiaya ome iconehuan. <sup>12</sup> Huan iconeu taxocoyot quilij itat ijcuín: “Notajtzin, xinechonxelo huili de nejua nechnamiqui nicselis de moricoyo”. Ijcuacán in tetat quinxejxelo huilij de ninricojo ne ome iconehuan. <sup>13</sup> Huan nimampa de sequin tonalme ne teconeu taxocoyot quisentilij nochi ten niaxca. Huan de ompa quis-tehuac huan yajqui huejca tech ocsé país. Huan ompa quitamipojpoloto nochi nitomin tech in ahuilnemilis. <sup>14</sup> Huan cuac quitamipojpoloj ya nochi nitomin, ijcuacán amo huejcahuac huan huala se hueyi máyanti tech ne país. Huan ne teconeu taxocoyot pehuac mayancanentinemi ya. <sup>15</sup> Ijcuacán yejua yajqui quitemoto tequit ihuan se patrón tech ne país. Huan ne patrón yejua quititanic ma quinpiati sequin pitzome campa italpan ne patrón. <sup>16</sup> Huan ne tapixque quinequía quicuas huan ixhuís ica in cuoutaquilot ten tamati queme in huaxin tenica quintamacayaj in pitzome. Huan ijcón quinequía quichihuas ne tellocat porín amo aquen quitamacaya yejua.

<sup>17</sup> De ompa ne tellocat tapixque ocsepa quiyolelnamic huan quinemiliaya ijcuín: “Miacque tequitini quinpiá notajtzin ompa ichan huan nochi yejuan cuali ixpan-otocque hasta mocautiu oc tacualis oc. Huan nejua nimayanmictinemi nican. <sup>18</sup> Ica ya nojón nejua nimoquetztehuas huan niyás nicajsitiu notajtzin huan niquilis ijcuín: Notajtzin, nimohueyitajtacolmacac iixpantzinco Totajtzin Dios ten ne eluiyactzinco huan no nimotajtacolmacac moixpantzinco. <sup>19</sup> Huan axcan nimitzilis notajtzin que amo nechnamiqui oc ma xinechpohua queme nimoconeu. Ta, xinechpohua queme sayó se motaquehual”.

<sup>20</sup> Ijcuacán ne tellocat moquetztehuac huan yajqui huan ajsito campa yetoya ichan itajtzin. Huan cuac ne tellocat ajsitiaya ichan itajtzin, ijcuacán itajtzin conitac huan quihueyiyolicnelij. Huan ne tetat motaloj quinamiquito iconeu huan quique-quechnahuato huan quitennamic. <sup>21</sup> Ijcuacán in tellocat quilij itajtzin ijcuín: “Notajtzin, nimohueyitajtacolmacac iixpantzinco Dios huan no nimotajtacolmacac moixpantzinco. Ica ya nojón axcan amo nechnamiqui xinechpohua queme nimoconeu”.

<sup>22</sup> Pero in tetat quinnahuati sequin itaquehualuan ijcuín: “Xiquixtij nimantzin ten cachi cuali taquemit huan xictaquehualuan nijín noconetzin huan xicmajpiltalil-

ican se anillo huan no xictegactican”.<sup>23</sup> Huan de ompa ocsepa quinilij itaquehualuan ijcuín: “Xicualcuican se cuacuejtzin ten tictomauque ya huan xicmictican huan ma titatacuacan huan ma tiiluichihuaca.”<sup>24</sup> Huan ma tiiluichihuacan porín nijín noconetzin nicpolojca ya queme yesquía momiquilisquía. Pero axcan ocsepa yoltinemi. Huan nijín noconetzin ixpoliua ya, pero axcan ocsepa ixnesico”. Ijcuacán nochi ichancahuan peuque moyolpactíaj tech ne iluit.<sup>25</sup> Huan cuac iluichiutoque ya, ijcuacán in itayecancaconeu yetoya itequipan. Huan cuac hual mocuepac ya de nitequipan huan motoquijtihualaya ya campa ichan, ijcuacán yejua quicayic sequin tat-zotzonani huan no quicayic que migtotijtoyaj.<sup>26</sup> Huan ne tayecancaconet quinotzac se taquehual huan quitajtoltij de toni mochiutoc.<sup>27</sup> Ijcuacán ne taquehual quinankuilij in tayecancateconeu ijcuín: “Huan nochi nijín iluit mochiutoc porín ejcoc ya mocniu. Huan motat tatitanic ma ticmictican in cuacuejtzin ten tictomauque ya. Huan motat quichihuac nochi nijín, porín mocniu ocsepa ixnesico huan cuali ejcoc huan amo mococoa”.

<sup>28</sup> Pero ne tayecancateconeu yolcualanic huan amo quinequía calaquiti tech ne iluit. Ica ya nojón ne itat calanquisac huan quitatautito itayecancaconeu ma calaquito.<sup>29</sup> Pero itayecancaconeu quinankuilij itat ijcuín: “Xiquita, cuali ticmati canachi xiutica ya nimitztequitilijtoc huan nachipa nimitztacamatihuitz. Huan amo queman tinechmacac nión se chivito para ma niiluichihua ihuan notasojicnihuan.<sup>30</sup> Pero axcan ejcoc ya ne moconeu que nochi quiahuiloto ya motomin ihuan sihuame ahuilnemini. Huan tejua ticmictilij in cuacuejtzin ten tictomaucaayaj ya para tiquiluichihuilis”.

<sup>31</sup> Ijcuacán itat quinankuilij iconeu ijcuín: “Noconetzin, tejua melau nachipa nohuan titequititoc huan axcan nochi noaxca yetoc momaco.”<sup>32</sup> Pero axcan semi quinamiqui ma tiiluichihuacan huan ma timopactican. Porín mocnitzin poliua ya queme yesquía momiquilisquía pero axcan ocsepa yoltinemi. Huan nijín noconeu ixpoliua ya, pero axcan ocsepa ixnesico tohuan”.

### **Nican tajtoa de queniu Jesús Temaquixtijque quitalij se nexcuitil de se tayecancataquehual den amo yolcuali**

**16** Huan Jesús quinmachiaya imomachtijcahuan ica nijín nexcuitil:  
 —Se tonal oncaya se patrón ten semi rico ten quiapiaya se itayecancataquehual. Huan mochihuac que acsame quiteluililto ne itayecancataquehual inahuac in patrón de que yejua quiahuiltojtoc ten iixca in patrón.<sup>2</sup> Ijcuacán in patrón quinotzac ne itayecancataquehual huan quilij ijcuín: “¿Toni quijtosnequi nijín tajtolme ten nejua nictecaquilij de tejua? Axcan nicnequi ma tictepotztocacan tocuenta de motequiu porín axcan amo ticsentocas titequitis queme tinotayecancataquehual”.<sup>3</sup> Ijcuacán ne tayecanque taquehual pehuac moyolnemiliaya ijcuín: “Axcan, ¿toni nicchihuas porín nopatrón amo nechmacas oc tequit? Huan nejua amo semi nichichahuac para nisalontequitis. Huan no nipinahua para nimotaehuijtinemis.”<sup>4</sup> Pero axcan nicmati de toni nicchihuas para cuac amo nicpiás oc tequit, ijcuacán sequin notasojicnihuan nechselisque huan nechixpanoltisque campa ninchan”.<sup>5</sup> Ijcuacán ne tayecanque taquehual pehuac quinnotzac sejsé nochi neques ten quitahuiquil-iayaj ipatrón. Huan in tayecanque taquehual quitajtoltij ne ten motoquico achto ijcuín: “¿Canachi tictahuiquilía nopatrón?”<sup>6</sup> Huan ne tagat quinankuilij ijcuín: “Nictahuiquilía mopatrón se ciento barriles de aceite”. Ijcuacán in tayecanque taquehual

ocsepa quilij ijcuín: “Nican yetoc mocuenta; ximotalijtihuetzi huan xicchihua ocsé cuenta para ma ixnesi que tictahuiquilía sayó omepoal huan májtacti barriles. Huan de ompa xicfirmaro”.

<sup>7</sup> Huan satepan in tayecanque taquehual quinotza ica ome tagat ten quitahuiquilíaya ipatrón huan quitajtoltij ijcuín: “Huan tejua, ¿canachi titahuica?” Huan yejua quilij ijcuín: “Nejua nictahuiquilía mopatrón cien medida de trigo, quijsosnequi macuil ciento almon de trigo”. Ijcuacán in tayecanque taquehual quilij ijcuín: “Nican yetoc mocuenta. Ximotalijtihuetzi huan xicchihua ocsé cuenta para ma ixnesi que tictahuiquilía sayó nahuipoal medidas de trigo, quijsosnequi queme nahui ciento almon de trigo”. <sup>8</sup> Huan de ompa Jesús quinilij in tacaquini que in patrón cuac quimatic toni quichihuac itayecancataquehual ten amo yolcuali, ijcuacán in patrón quicuatamatcaítac itayecancataquehual porín cuali yolmajsitoc ya tech nitequiu. Huan no ijcón mochiutoc axcan porín in talticpacuani ten axcan nentinemi, yejuan nojonques cachi cuatamatocque tech nintequiu huan quiyolicnelíaj in tagayot. Huan in taneltocani ten tacuautamatinemij ica tanextzin de Dios, yejuan nojonques monequi ma mofuerzajuican de mochihuasque míac amigos ijcón queme quichiutocque in talticpacuani ten amo taneltocani.

<sup>9</sup> Huan Jesús ocsepa quinilij imomachtijcahuan ijcuín:

—Huan namechilía que xicyectequitiltican ica cuali namoricojyo ten poutoc nican talticpac para ijcón nanquipliasque míac namotasojicnihuan ten tacuautamatisque ihuan Dios. Huan cuac namoricojyo tajtamis ya, ijcuacán Totajtzin Dios ihuan itaneltocacahuan namechselisque nepa eluiyactzinco campa nansenyetosque sen nachipa.

<sup>10</sup> Huan Jesús ocsepa quilij ijcuín:

—Huan ne tagat ten tequititinemi ica nejmach masqui tepitzin san nitequiu, yejua ne no tequititinemis ica nejmach masqui míac tequit quichiutinemis. Huan ne tagat ten tequititinemi ica tatzihuilis masqui tepitzin san, yejua ne no tequititinemis ica tatzihuilis masqui míac tequit quipías. <sup>11</sup> Huan tacán namejuan nanquitequitiltíaj ica tatzihuilis namoricojyo ten poutoc nican talticpac san, ijcuacán Dios amo no namechmactilis xictequitiltican ne yec ricojyot de hualeutoc ne eluiyactzinco ten amo quemam tamis. <sup>12</sup> Huan tacán namejuan nanquitatequiutíaj ica tatzihuilis ne ricojyot ten poutinemi ihuan in talticpacuani ten Dios namechtaneutij san, ijcuacán Dios amo no namechaxcatilis se ricojyot de eluiyactzinco ten amo quemam tamis para xictatequiutijtinemi tejua san.

<sup>13</sup> Huan Jesús ocsepa quinilij imomachtijcahuan ijcuín:

—Amo aquen se taquehual huelis quinquitilis ome patrónes sepan san. Porín como ijcón quichihuas ne taquehual, ijcuacán pehuas quitahuelitas se patrón huan quitasojtas in ocsé. Oso no pehuas quitacamatis se patrón huan quimohuispolos in ocsé. Ica ya nojón namechilía que namejuan amo huelis nanquitequitiltijtinemisque Totajtzin Dios huan in ricojyot sepan san.

<sup>14</sup> Huan ompa yetoyaj sequi tamatinime fariseos ten quicactoyaj nochi tajtolme de Jesús huan nochi yejuan sayó quitasojtayaj tomin. Ica ya nojón yejuan quiquejqueloayaj Jesús ica ne por itajtolis. <sup>15</sup> Ijcuacán Jesús quinilij ne fariseos ijcuín:

—Namejuan nanfariseos nanmopohuaj que nanyolchipauque ya ninixpan in tagayot, pero in Totajtzin Dios cuali namechyolojixmati. Huan Totajtzin Dios quitahuelitztinemi ne nohueyinequilis de ne taca ten mohuejueyinectinemij huan mopohuaj hueyi chihuanime.

### Nican tajtoa de ne tanahuatil de Moisés huan ne ihueyi chichualis de Dios

<sup>16</sup> Huan ocsepa Jesús quinmactiaya in tagayot ijcuín:

—In tanahuatil de Moisés huan ne tanextililisme den tanahuatiani, nochi yejuan namechualyecantihualayaj hasta in tonal cuac nemico in Juan Taahuijque. Pero cuac ixnesico Juan, ijcuacón yejua pehuac namechnextilía in cuali Tajtoltzin de que Dios namechyolyecantiu ica ichichualis. Ica ya nojón nochi namejuan monequi ximofuerzahuijtiyacan para ma Dios ma namechyolyecantiyás ica ichichualis. <sup>17</sup> Huan no namechilía que huelis tajtamis nochi ten tiquitaj ne ejeaixco huan nican talticpac. Pero namechyequilía que nochi in itanahuatiltzitzin de Dios, yejuan nojonques amo tajtamitihue san. Ta, yec motamichihuahitij.

### Nican tajtoa de queniu Jesús Temaquixtijque quinmactij de ne sihuacacahualis huan de ne tagacacahualis

(Mt. 19.1-12; Mr. 10.1-12)

<sup>18</sup> Huan Jesús ocsepa quinilij in tagayot ijcuín:

—Tacán se tagat quicahua isihuau huan monamictis ihuan ocsé sihuat, ijcuacón ne tagat motajtacolmacas ya queme se ahuilnenque. Huan no tacán ocsé tagat monamictis ihuan ne tesihuau quicautocque, ijcuacón ne tagat motajtacolmacas ya queme se ahuilnenque.

### Nican Jesús Temaquixtijque quitilij se nexcuitil de se tagat rico huan se motaehuijque monotza Lázaro

<sup>19</sup> Huan Jesús ocsepa quinilij in tagayot ijcuín:

—Se tonal oncaya se tagat rico ten motaquentiaya ica cuajcuali tilma ten semi cualtzitzin alaxtic. Huan in rico mosta mosta taluichihuaya huan tatacuaya ca míc cualnescayot. <sup>20</sup> Pero nojón tonalme no nemía se pobre ten monotzaya Lázaro huan yejua nochi ninacayo sahuayojtoya huan motaliaya icaltenteno de ne rico. <sup>21</sup> Huan no ne Lázaro quinequía ixhuis ica ne tacualis ten quitencajcahuaya in rico ne ten huetzía mesajtampa. Huan ompa campa motaliaya in Lázaro hualayaj in itzcuinme huan quipajpalohuiliayaj nicocohuan. <sup>22</sup> Huan mochihuac que se tonal momiquilij ne motaehuijque Lázaro huan yejua cuiyacque in ángeles de Dios nepa iixpan Abraham campa quilíaj paraíso. Huan amo huejcahuac huan no momiquilij in rico huan yejua quitalpachojque. <sup>23</sup> Huan ne rico tajyohuijtoya ya ne mictan campa tajyohuíaj nochi neques ten amo tacuautamatij ihuan Dios. Huan ne rico moixajocuic huan conita in Abraham huan no conita ne motaehuijque Lázaro iixpan in Abraham. <sup>24</sup> Ijcuacón ne rico contzajtzilij ijcuín: “Notajtzin Abraham, nechonyolicneli. Huan xicnahuati ne Lázaro ma huiqui huan ma nechnejnepitaliliqui tzictzin atzin masqui ica imajpil san para ma niyolsehui porín nican semi nitajyohuijtoc tech in tit”.

<sup>25</sup> Pero in Abraham quinanquilij ijcuín: “Noconeu, xiquelnamiqúi san que tejua nochi ticpixtinemía ten ticnequía tech monemilis. Huan no xiquelnamiqúi que nijín Lázaro sayó tajyohuiya tech inemilis. Ica ya nojón axcan in Lázaro cualtzin yolseucayetoc nican; huan tejua titajyohuijtoc. <sup>26</sup> Huan no xicmati que techxelojtoc se hueyi tecoch. Ica ya nojón tejuan amo huelis tipanosque para tamechajsihuhue huan nión no namejuan amo huelis nanualpanosque para nantechajsiquihue”. <sup>27</sup> Ijcuacón ne rico quilij Abraham ijcuín: “Nimitzontatautía, tejuatzin Notajtzin Abraham, xi-

contitani Lázaro ma yohui ichan notajtzin. <sup>28</sup> Porín ompa yetocque macuil nocni-huan oc. Huan nicnequi que ma Lázaro ma yohui ma quinnojnatzati, para que yejuan ma amo no hualacan nican campa nejua nitajyohuijtoc”. <sup>29</sup> Pero Abraham ocsepa quilij in rico ijcuín: “Amo nicchihuas porín yejuan quipixtocque inmaco in tanahu-atil de Moisés huan in tanexutililisme den tanahuatiani de Dios. Monequi que mocni-huan ma yejuan ma quicaquican huan ma quitacamatiyacan nochi nojón tanex-utililisme de Dios”. <sup>30</sup> Huan de ompa in rico tananquilij ijcuín: “Notajtzin Abraham, quema, mocni-huan quipixtocque in Tajtoltzin de Dios, pero achá cachi quineltocasque como yohui se ánima quinnojnatzati para que ma yejuan ma moyolnemilic-an de nintajtacoluan”. <sup>31</sup> Pero in Abraham quilij in rico ijcuín: “Tacán mocni-huan amo quinequij quitacamatisque in Moisés huan nión no quinequi quincaquilisque ne tanahuatiani, ijcuacán yejuan amo no quineltocasque nijín Tajtoltzin de Dios, masqui se tagat panquisas yoltoc intzalan in ánimajme huan quinnojnatzati”.

**Nican Jesús Temaquixtijque quinmachtij de cuac se tagat  
quitepotamía ocsé tagat tech in tajtacol**

*(Mt. 18.6-7, 21-22; Mr. 9.42)*

**17** Huan Jesús quinilij imomachtijcahuan ijcuín:  
—Nachipa oncatiyás in ohuijca yot ten quintajyohuiltía huan quin-tepotamíaj notaneltocacahuan ma huetzican tech in tajtacol. Pero semi teicneltiani ne talticpacuani ten quintepotamíaj notaneltocacahuan tech in tajtacol. <sup>2</sup> Porín cachi cuali para yejuan ma se quincechpilohuili se hueyi tet queme se metat huan ma se quinatamota tech in hueyíat den mar. Cachi cuali para yejuan que ma momiquiliani huan ma amo quintepotamican nijín notaneltocacahuan tech in tajtacolnemililic. <sup>3</sup> Huan namechilía que cuali ximoyecpixtiyacan tech namejuan namonemililic san. Tacán se mocni motajtacolmaca mopampa, ijcuacán tejua xictacahualti ma amo ijcón quichihua oc. Huan tacán ne mocni moyolnemilía de nitajtacoluan, ijcuacán tejua xictapojpolui ya. <sup>4</sup> Huan ma tiquijtocan que ne moicni motajtacolmaca mopampa chicojpa tech se tonal huan yejua hualas chicojpa tech se tonal huan mitziliqui ijcuín: “Axcan nimoyolnemilij ya de notajtacoluan”. Ica ya nojón Nejuatzin nimitzilia tejua, xictapojpolui.

**Nican tajtoa de queniu imomachtijcahuan de Jesús Temaquixtijque  
quitatautijque que quinmáxitili nintacuautamatilis de Dios**

<sup>5</sup> Huan itanojnatzahuan de Jesús quitatautijque ijcuín:

—Totecotzin, xitechonmáxitili totacuautamatilis cachi oc.

<sup>6</sup> Ijcuacán in Totecotzin quinanquilij ijcuín:

—Tacán namejuan nanquiasquíaj tzictzin san tacuautamatilis de Dios queme ne mostazajtet, ijcuacán nanuelisquíaj nanquinojnatzasquíaj ne hueyi cuohuit ten quilía sicómoro porín ne cuohuit queme yesquía se ohuijca yot ten namechtatzacu-tilisquía. Huan tiquilis ijcuín: “Tejua, ximohuijuita de nican huan xihuetziti ne tatajco den mar”. Huan como ijcón nanquilisquíaj, ijcuacán ne cuohuit namechtacamatisquía.

**Nican Jesús Temaquixtijque quitelij se  
nexcutil de se taquehual huan de nitequi**

<sup>7</sup> Huan Jesús ocsepa quinilij in tagayot ijcuín:

—Achá senme de namejuan nanquipíaj se namotaquehual ten tayuntajuijtinemi oso tatacuajtijnemi ica in tapijalme. Huan cuac yejua mohualcuepa ya de nitequi, ijcuación namejuan amo nanquifaj ijcuín: “Tejua totaquehual, ximosehuiqui huan xitacuaqui nican campa tomesa”. <sup>8</sup> Ta, namejuan nanquifá ijcuín: “Tejua, totaquehual, xinechtacualchihuili huan ximoyectataliti para tinechtamacas ica tacualis huan ica vino. Huan cuac nejua nitamitacuas ya, ijcuación tejua no huelis titacuas ya huan titayis movino”. <sup>9</sup> Huan namejuan amo nanquitasojcamachilfaj ne taquehual cuac quitamichihuac ya ne tequit ten namejuan nanquinahuatijque; melau amo ijcón nanquichihuaj. <sup>10</sup> Huan no namejuan nantaneltocani, cuac nanquitamichihuasque ya namotequi, ijcuación monequi nanquijtosque ijcuín: “Tejuan titaquehualme ten amo teyica ticualtíaj, porín ticchiuque sayó ten ticnemiliayaj que monequí ticchihuasque. Cachi cuali ma ticnemilijtiyacan que nachipa ma timotequitilijtiyacan Yejuatzin cachi oc huan que Yejuatzin technajhuatía”.

**Nican Jesús Temaquixtijque quipajtij májtacti  
cocoyani ten ninnacayo cocotocatiyaj**

<sup>11</sup> Huan Jesús quisentocaya niojpan para ajsis Jerusalén. Huan panotiaya campa talnamic de Galilea huan de Samaria. <sup>12</sup> Huan cuac Yejuatzin ajsic se pueblojtzin, ijcuación quinamiquicoj Jesús májtacti cocoyani ten ninnacayo cocotocatoc. Pero yejuan sayó mohualquetzque ne huejca san de Jesús, porín nincocolis huelis quimamahuas ocsequin tagayot. <sup>13</sup> Huan yejuan contzajtiziliyaj Jesús huan quili-  
jque ijcuín:

—Tejuatzin Jesús, tiontamachtijque, xitechonyolicneli huan xitechonpajti.

<sup>14</sup> Pero cuac Jesús quinítac ya, ijcuación Yejuatzin quinilij ijcuín:

—Xiyacan ximotenextilitij inixpan in tiopixcame judíos que namejuan nanchipauque ya.

Huan mochihuac que cuac yayaj ya ne cocoyani, ijcuación yejuan pajtijque huan mocauque chipauque. <sup>15</sup> Huan senme de yejuan cuac moitac que pajtic ya, ijcuación mohualcuepato huan quimohuistilijtihualaya Totajtzin Dios ica hueyi itzajtzilis. <sup>16</sup> Huan yejua motancuaquetzac iixpan Jesús huan motentocac huan moixacaquetzac talpan. Huan de ompa quitasojcamachilij Jesús. Huan nijín tagat ten pajtic ya yejua cayot de Samariajcopaca. <sup>17</sup> Ijcuación Jesús quitajtolitij ijcuín:

—Huan Nejuatzin namechpajtij nanmajtacme. Huan in ocsequin chicnahuin, ¿can yetoc ne taca judíos ten nopueblojcahuan? ¿Can yetocque? <sup>18</sup> Huan tejua tianaltecocayot huan sayó tejua tihualmocuepato para ticmohuistilis Totajtzin Dios.

<sup>19</sup> Ica ya nojón nimitzilí ijcuín:

—Ximoquetza huan xiyó ya, nimitzpajtij ya porín tejua titacautamactic ya nohuan.



**Nican Jesús Temaquixtijque quinmachtij in tacaquini de queniu monextiquiu ichicaucahuelilis huan nihueyicualtziyo nican talticpac**

(Mt. 24.23-28, 36-41)

<sup>20</sup> Huan in tamatinime fariseos quitajtoltijque Jesús ijcuín:

—¿Quemanían monextiquiu ne ichicaucacualtziyo de Dios de que Yejuatzin techy-olyecantiyás nican talticpac?

Huan Jesús quinnanquiliij ijcuín:

—Amo aquen huelis quitasque cuac monextiquiu ne ichicaucacualtziyo de Dios nican talticpac. <sup>21</sup> Ica ya nojón amo huelis se quínilis ijcuín: “Nican yetoc ne ichicaucahuelis de Dios”, oso “Ne yetoc ya”. Huan amo huelis ijcón se quilis porín ne ichicaucacualtziyo de Dios ipa ejcoc ya huan mochiutoc ya toztalan.

<sup>22</sup> Huan Jesús ocsepa quinilij imomachtijcahuan ijcuín:

—Ejcosque in tonalme cuac namejuan nanquiyolnejnequij nanquitasque oc ne tonal cuac Nejuatzin ni Yectagatzin de Dios nitayecanaquiu nican talticpac pero namejuan amo nanquitasque. <sup>23</sup> Huan ijcón in talticpacuani namechilisque ijcuín: “Cristo nican tayecantoc”. Oso namechilisque ijcuín: “Cristo nepa tayecantoc”. Ijcuación amo xiyacan huan amo xiquinnetoquilican. <sup>24</sup> Huan ijcón queme nanquij cuac tapetani sepa san ejecaixco, no ijcón yesqui tech ne tonal cuac Nejuatzin ni Yectagatzin de Dios nimohualucas nican talticpac. Porín ijcuac nannechitasque nihualajtos ica nochi nochicaucacualtziyo. <sup>25</sup> Pero achtopa que ocsepa nimohualucas nican talticpac monequi que achto nitajyohuis. Huan ne talticpacuani ten axcan nentinemij, yejuan nojonques monequi que nechmajpehuasque huan nechtajyohuiltisque.

<sup>26</sup> Huan ijcón queme mochihuac se ixpolihuilis ne tonalme cuac Noé nemico, no ijcón mochihuas ne ixpolihuilis tech in tonal cuac Nejuatzin ni Yectagatzin de Dios nimohualucas nican talticpac. <sup>27</sup> Huan tech ne tonalme cuac nemico Noé, ijcuación in talticpacuani sayó tatacuayaj huan mohuintiayaj huan monamictiayaj huan mosihuamonijtantinemíaj. Huan nijín ijcón quichiutoyaj hasta ne tonal cuac in Noé calayic tech ne hueyi barco ten quilía arca. Huan ijcón Dios quinaltitanilij ne hueyi tetzaucaquiohuit huan nochi in tagayot momiquilijque.

<sup>28</sup> Huan no mochihuac in ixpolihuilis tech ne tonalme cuac Lot nemico. Porín in talticpacuani sayó tatacuayaj huan tahuanayaj huan tacohuayaj huan tanamacayaj huan tatocayaj huan calchihuayaj. <sup>29</sup> Pero tech ne tonal cuac in Lot quisac de ne pueblo de Sodoma, ijcuación Dios quinalpixohuilij tit huan azufre impan in talticpacuani huan ijcón quintamimictij nochi. <sup>30</sup> Huan no ijcón mochihuas se ixpolihuilis tech in tonal cuac nimonextiquiu Nejuatzin ni Yectagatzin de Dios.

<sup>31</sup> Huan tech ne tonal cuac nimonextiquiu ya, tacán acsá moajsi necalcuaco, ijcuación yejua ma amo temo para quiquixtitiu ten niaxca nepa calijtic. Huan no ijcón tacán acsame moajsi ne itequipan, ijcuación ma amo mohualcucapan nichan para quiquixtiquiu ten niaxca. <sup>32</sup> Ica ya nojón namechilía cuali xiquelnamictiyacan de queniu momiquilij ne isihuau de Lot. <sup>33</sup> Huan neques ten quiyolnejnequij quimaquixtisque ninnemilis, yejuan nojonques quixpolosque ninnemilis. Huan nochi neques ten quipía tanejnequilis de motemactisque nohuan hasta tajyohuisque huan quipolosque ninnemilis, yejuan nojónques nentinemisque sen nachipa. <sup>34</sup> Huan no namechilía que cuac Nejuatzin nimohualucas, ijcuación tech

ne tayohuac yetosque ome tech se cochpetat san. Huan Dios quiajocuis se huan quicahuas in ocsé. <sup>35</sup> Huan no tech ne tonal cuac nimohualuicas, ijcuacán ome sihuame sen tixcuehojtosque. Huan Dios cajocuis se huan quicahuas in ocsé. <sup>36</sup> Huan no tech ne tonal cuac Nejuatzin nimohualuicas, ijcuacán ome taca tequititosque milajpa. Huan Dios cajocuis se huan ocsé quicahuas.

<sup>37</sup> Ijcuacán imomachtijcahuan quitajtoltijque Jesús ijcuín:

—Totecotzin, ¿can mochihuaqui nochi nijín?

Huan Jesús quinanquilij ijcuín:

—Campa yesqui huetzoc se miquet, no ompa mosentiláj míac tzopilome. Porín cuali quimatij ne tzopilome can huetzoc se miquet huan ompa mosentilijihuetzij. Huan no ijcón mosentilijihuetzisque notaneltocacahuan cuac Nejuatzin nimohualuicas nican talticpac.

### **Nican tajtoa de que Jesús Temaquixtijque quinmachtij in tacaquini ica se nexcuitil de se sihuacahual huan se taixejejojque ten amo yolcuali**

**18** Huan ijcón Jesús quinmachtij in tagayot ica se nexcuitil de monequi ma motatautilisque ihuan Dios huan ma amo yolcuetahuican de motatautilisque. <sup>2</sup> Huan Jesús quinilij ijcuín:

—Huan oncaya tech se pueblo se tequihua juez ten amo quimohuistilíaya Dios huan nión no quitacachihuaya in tagayot. <sup>3</sup> Huan tech nojón mismo pueblo no oncaya se sihuacahual. Huan nojón sihuacahual mosta mosta conitaya juez huan quitatautiliaya in juez ijcuín: “Xinechonmaquixtis imaco ne ten nechchihuilij ten amocuali”. <sup>4</sup> Huan míac tonalme panocque ya huan ne juez amo quinequía quipalehúis ne sihuacahual. Pero satepan ne juez pehuac moyolnemiliaya ijcuín: “Nejua amo nicmohuistilía Dios huan nión no niquintacachihua in tagayot. <sup>5</sup> Pero queme nijín sihuacahual quisentoca nechcuejmoloqui, ica ya nojón nicpalehúis ne sihuacahual para ma amo quisentoca oc huiqui. Porín amo cachi nitaxicos oc de que ma quisentoca nechcuejsoqui”.

<sup>6</sup> Ijcuacán Jesús quinilij in tagayot ijcuín:

—Cuali xicaquican ten quijtojca ne juez ten amo yolcuali. <sup>7</sup> Porín Totajtzin Dios no ijcón quichihuas huan Yejuatzin techpalehúis huan techmaquixtis porín tejuan tiitajitaluan huan tejuan timotatautilíaj yohual itonal que Yejuatzin ma techpalehú. Huan no namechilía que Totajtzin Dios amo huejcahuas de techpalehúis. <sup>8</sup> Huan no namechilía que Totajtzin Dios niman namechpalehuijtiyás. Pero cuac Nejuatzin ni Yectagatzin de Dios nimohualuicas ya nican talticpac, ijcuacán tech nojón tonal, ¿xe niquinajsis oc neques ten melau nohuan tacuautamatinemij nican talticpac?

### **Nican Jesús Temaquixtijque quitelij se nexcuitil de se fariseo huan de se tatopaluijque**

<sup>9</sup> Huan Jesús ocsepa quinmachtía in tagayot ica se nexcuitil de ne taca ten mopohua yolchpauque huan de ne taca ten quinmohuispoloaj ocsequin tagayot. Huan Jesús quiniliayaj ijcuín:

<sup>10</sup> —Se tonal mochihuac que ome taca yajque campa tiopan de judíos para ompa motatautilisque ihuan Dios. Se tagat catca tamatque fariseo huan in ocsé tagat catca tatopaluijque ica tomin. <sup>11</sup> Huan mochihuac que ne fariseo moquetzac huan majyá monojnotzaya iselti san pero quijtoj ijcuín: “Notajtzin Dios, nimitztasojca-

machilía porín nejua amo niquinnejnehuilía queme ne ocsequin taca ten tachtequini huan queme neques ten semi amo yolchipauque huan queme neques ten ahuilnentinemij. Huan nión no amo nicnejnehuilía queme ne tatopaluijque. <sup>12</sup>Nejuatzin cachi oc nicchiutinemi cuali chihualisme huan que ocsequin taca. Porín nejua nimosahua ojpa se semana huan no nictemactía nodiezmo de nochi ten nimotatanilía”.

<sup>13</sup> Pero ne tatopaluijque moquetzac ne huejca san huan yejua hasta amo quinequía ajcotachías ne eluiyactzinco. Ta, yejua cachi oc moelmajmagaya porín yejua cajsicatic que hueyi tajtaclejque iixpantzinco Dios. Ica ya nojón yejua motatautiliaya ihuan Dios huan quiliaya ijcuín: “Notajtzin Dios, nechonyolicneli porín nejua semi nitajtacle”.

<sup>14</sup> Huan de ompa Jesús quilij ijcuín:

—Namechonyequilía que ne tatopaluijque Dios quipohuac yolchipahuac. Huan de ompa yajqui ichan yolpactiya. Pero ne tagat fariseo Dios amo quipohuac yolchipahuac. Ica ya nojón nochi neques ten mohueyimatisque, yejuan nojonques Dios quinpohuati que amo teyi chihuanime. Pero nochi neques ten mopohuasque amo teyi chihuanime, yejuan nojonques Dios quinueyicualnextijtiyás.

### **Nican tajtoa de queniu Jesús Temaquixtijque quintiochihuac coneme**

*(Mt. 19.13-15; Mr. 10.13-16)*

<sup>15</sup> Huan sequin tetatme quinalcuij coneme campa yetoya Jesús para ma Yejuatzin quincumapacho huan quintiochihuas. Pero cuac imomachtijcahuan quitacque ya nochi ten mochiutoc, ijcuacón yejuan peuque quintacahualtiyaj ne tetatme ten quinalcuíaj ninconehuan. <sup>16</sup> Pero Jesús quinnotzac imomachtijcahuan huan quinilij ijcuín:

—Xiquincahuacan ne coneme ma hualacan nohuan huan amo xiquintacahualtican. Porín ne coneme tacuautamatinemij notechcacopaca. Huan no namechilía nochi naquen motemacas nohuan ma niquinyolyecana ijcón queme ne coneme, yejuan nojonques Dios quinyolyecantiyás ica ihueyichicahualis.

<sup>17</sup> Huan Jesús ocsepa quinilij ijcuín:

—De yec melau ten namechilía que semi monequi ximochihuacan queme ni-jín coneme ten motemactijque nomaco. Huan tacán acsá amo motemactía imaco Yejuatzin queme se conetzin, ijcuacón Dios amo quiyolyecantiyás ne tagat ica ihueyichicahualis.

### **Nican tajtoa de queniu Jesús Temaquixtijque quinojnotzac se telpocat rico**

*(Mt. 19.16-30; Mr. 10.17-31)*

<sup>18</sup> Huan se tonal se tiopan tayecanque quitajtolitij Jesús ijcuín:

—Tamachtijque Tejuatzin, tionyolcuali. ¿Toni monequi nicchihuas para nicpías ne yecnemilis sen nachipa?

<sup>19</sup> Huan Jesús quinancuilij ijcuín:

—¿Queyé tinechnotza que niyolcuali? Porín xicmati que amo aca ocsé oc yolcuali. Ta, sayó se aquen yolcuali huan Yejuatzin ya in Totajtzin Dios. <sup>20</sup> Tejua cuali ticmati in tanahuatil de Dios ten quijtoa ijcuín: “amo xisihuapapatatinemi; amo no xictemicti; amo no xitachtequi; amo no xitajtolerojtijnemi; xicmohuistiliti motajtzin huan monantzín”.

<sup>21</sup> Ijcuacón ne tiopan tayecanque quilij Jesús ijcuín:

—Nochi nijín nictacamatihuitz ya desde cuac nipili oc nicatca.

<sup>22</sup> Huan cuac Jesús quicayic nijín nitananquililis de netequihua tiopan tayecanque, ijcuación Yejuatzin quilij ijcuín:

—Xicaqui tejava, mitzpoloa se taman oc. Monequi xiyó xicnamacati nochi ten moaxca huan xiquinxexelohuiliti in taca ten amo teyi quipáj. Huan como ijcón ticchihuas, ijcuación ticpías in hueyi paquilis huan yec yectolis queme se tetayocolil de ne eluiyactzinco.

Huan no nimitzilía tejuatzin ijcuín:

—Xihuiqui nohuan huan xinechtoctiliqui huan xinechtacamatinemi.

<sup>23</sup> Pero cuac in tiopan tayecanque ten rico quicayic ya nochi nijín tajtolme de Jesús, ijcuación yejava semi moyolcocojtíyá porín quiplaya míc ricojyot. <sup>24</sup> Huan Jesús quitac ne tiopan tayecanque ten tequihua que semi quiyolcocoj ica por ne tajtolme ten Yejuatzin quilij. Ica ya nojón Jesús quinilij imomachtijcahuan ijcuín:

—Semi ohui para in ricojme que motemactisque inahuactzinco Dios para que Yejuatzin quinyolyecanas ica ihueyichicahualis. <sup>25</sup> Huan ocsepa namechilía que amo huelis nalpanos se hueyi tapial ten monotza camello campa coyotict in acoxa. Huan amo no huelis motemactijtyás se rico inahuactzinco Dios para que Yejuatzin quiyolyecantiyás ica ihueyichicahualis, como yejava tacuautamatinemi itech niricojyo.

<sup>26</sup> Huan cuac in tacaquini quicacque ya nochi nijín, ijcuación yejuan quimoucacque huan quitajtolijque Jesús ijcuín:

—Como ijcón mochihuas, amo aquen huelis maquisas de nitajtacoluan.

<sup>27</sup> Huan Jesús quinnanquilij ijcuín:

—In taca amo huelisque momaquixtisque yejuan san, como amo yec tacuautamatij inahuatzinco Dios. Pero Totajtzin Dios, quema, Yejuatzin cuali huelis quinmaquixtis in tagayot.

<sup>28</sup> Ijcuación in Pedro quilij Jesús ijcuín:

—Xiconita tejuatzin, tejuan ticauque ya nochi ten ticpíayaj huan nochi tejuan timitztoctilijtinemij para timitztacamatisque.

<sup>29</sup> Ijcuación Jesús quinnanquilij nochi imomachtijcahuan ijcuín:

—De yec melau ten namechilía, cuali nanquichiutocque de nanquicahuaj namocaluan huan namoicnihuan huan namosihuahuan huan namoteiscaltijcahuan huan namoconehuan. Huan nochi nijín nanquincahuaj porín namejuan nanquiyolne-nequij que Dios namechyolyecantiyás ica ihueyichicahualis. <sup>30</sup> Huan como namejuan nanquicauque ya nochi nijín taman, ijcuación Dios namechmactilijtyás tech nijín tonalme cachi míc oc huan que ne ten nanquicauque ya. Huan no Dios namech-seliltis ne nemilis nachipa ne eluiyactzinco tech in tonalme ten huitze oc.

**Nican Jesús Temaquixtijque quitetapohuij  
imomachtijcahuan ica expa de que ejcotoc ya imiquilis**

*(Mt. 20.17-19; Mr. 10.32-34)*

<sup>31</sup> Huan Jesús quinnotzac in majtactiomome imomachtijcahuan seco de se ojti huan quinilij ijcuín:

—Xiquitacan tejuan, titejcotiyohue para Jerusaléncopaca huan ompa motamichihuas nochi tajtolme ten quijcuilojca ne huejcau tanahuatiani de Dios cuac yejuan tajtoayaj de Nejuatzin ni Yectagatzin de Dios. <sup>32</sup> Huan ompa Jerusaléncopaca nechtemactisque inmaco in tagayot ten amo judíos huan nechquejquelosque huan

nechuijuicaltisque huan nechchichijchasque. <sup>33</sup>Huan de ompa nechuitequisque huan nechmictisque. Pero ipan eyi tonalica nipanquisas niyoltoc intzalan in ánimajme.

<sup>34</sup>Pero ne imomachtijcahuan amo cajsicamatque toni quiniliaya. Huan Dios quintatiliy oc nijín tamachilis; ica ya nojón yejuan amo cajsicamatque.

**Nican tajtoa de queniu Jesús Temaquixtijque  
quitachialtij se ixpojpyot campa pueblo de Jericó**

*(Mt. 20.29-34; Mr. 10.46-52)*

<sup>35</sup>Huan cuac Jesús ajsitiaya ya campa pueblo Jericó, ijcuacán Yejuatzin quitac se ixpojpyot tocotzyetoya ojten nacastan huan yejua ompa motaehuiaya. <sup>36</sup>Huan cuac ne ixpojpyot quicayic que panotocque huel míac tagayot, ijcuacán yejua matajtanic de toni mochiutoc. <sup>37</sup>Huan mochihuac que quiluijque que Yejuatzin in Jesús de Nazaret ten panotoc ompa. <sup>38</sup>Huan ijcón ne ixpojpyot pehuac quichicaucatza-jtzilía Jesús ijcuín:

—Tejuatzin Jesús ten tion Teconetzin de rey David ten quipía de tihualas, xinechonyolicneli.

<sup>39</sup>Huan in taca ten quiyecanayaj Jesús, yejuan nojonques peuque quitacahualtiayaj ne ixpojpyot que ma amo cachi oc quitzajtziliani. Pero ne ixpopoyot cachi oc quichicaucatza-jtzilía ijcuín:

—Tejuatzin tion Teconetzin de ne rey David, ten quipía de tihualas, xinechonyolicneli.

<sup>40</sup>Ijcuacán Jesús moilochtij oc huan de ompa tatitanic que ma cualcuilican ne ixpojpyot ompa iixpampa. Huan cuac cualicque ya, ijcuacán Jesús quitajoltij ne ixpojpyot ijcuín:

<sup>41</sup>—¿Toni ticnequi ma Nejuatzin nimitzchihuili?

Huan ne ixpojpyot quinanquilij Jesús ijcuín:

—Notecotzin, nicnequi xinechontachialti.

<sup>42</sup>Huan de ompa Jesús quilij ijcuín:

—Axcan ya nimitztachialtiti huan tejua tipajtis porín titacuaautomatic ya nohuan.

<sup>43</sup>Huan tech ne momento ne ixpojpyot huelic ya tachíac. Huan de ompa yejua quitoclijteu Jesús huan quimohuistilijtiyá Totajtzin Dios. Ica ya nojón cuac in pueblojuani quitacque toni quichihuac Jesús, ijcuacán yejuan no peuque quimohuistiliayaj Totajtzin Dios.

**Nican tajtoa de queniu Jesús temaquixtijque monojnotzac ihuan Zaqueo**

**19** Huan cuac Jesús quitamijpajtij ne ixpojpyot, ijcuacán Yejuatzin calayic tech in pueblo Jerico huan panotiyá tatajco den pueblo. <sup>2</sup>Huan mochihuac que ompa yetoya se tagat ten monotzaya Zaqueo huan yejua catca tayecanque den tatopaluiani. Huan Zaqueo catca hueyi rico. <sup>3</sup>Huan ne Zaqueo semi quinejnequía quitas toni chiuque ne Jesús. Pero amo huelía quitas porín míac tagayot quiyehualojtiayaj Jesús huan in Zaqueo amo semi huejcapantic tagat. <sup>4</sup>Ica ya nojón cuac Zaqueo quimatic que nimampa hualajtoc Jesús, ijcuacán yejua niman quiachtohuij Jesús huan tejcotihuetzito tech se cuohuit ten quilía sicómoro para huelis quipanitas Jesús, porín ipa Jesús panosquía ompaca. <sup>5</sup>Huan cuac Jesús ajsito ya ne cuoutampa, ijcuacán Yejuatzin cajcoitac Zaqueo huan quilij ijcuín:

—Tejua Zaqueo, niman xijsiucatemo porín axcan semi monequi ma nimocau-tiquisa mochan.

<sup>6</sup> Ijcuacán in Zaqueo temotihuetzic huan ijcón ica míac paquilis quisehuiyac Jesús ichan. <sup>7</sup> Huan cuac in tagayot quitacque toni quichihuac Jesús, ijcuacán yejuan peuque quitejtenehuaj Jesús huan quijtoayaj que Jesús yajqui mocahuato ichan se tagat ten amo quitacamatini in tanahuatl de Moisés. <sup>8</sup> Huan cuac ajsique ya ichan, ijcuacán Zaqueo moquetzac huan quilij Totecotzin ijcuín:

—Xiconita Notecotzin, axcan para taixpan tajco de noricojyo niquinmacajtiyás naquen amo teyi quipía. Huan tacán acsá niquichtequilis, ijcuacán nicuepilis nahui achichi oc ten nicuilij.

<sup>9</sup> Huan ijcón Jesús quilij Zaqueo ijcuín:

—Axcan tech nijín tonal Dios mitzmaquixtij ya ihuan mochanchahuan. Huan axcan tejua timochihuaco ya tiiconetzin de Abraham porín titacuaautomatic ihuan Dios ijcón queme Abraham tacuaautomatic ihuan Dios. <sup>10</sup> Huan nijín ijcón mochihuac porín Nejuatzin ni Yectagatzin de Dios huan nihuala nican talticpac para niquin-temoco huan niquinmaquixtis neques ten ixpoliutocque tech in tajtacol.

### **Nican Jesús Temaquixtijque quitelij se nexcuitil den májtacti monedas**

<sup>11</sup> Huan cuac in tagayot quicactoyaj nijín tajtolme de Jesús, ijcuacán Yejuatzin pehuac quinmachtía ica se nexcuitil. Huan Jesús ihuan in tagayot ajsitiyay Jerusalén. Huan in Jesús pehuac quinmachtía ica nexcuitil porín in tagayot quiyolnemiliyay que xa niman ejcotihuitziquiu in tonal cuac Dios quinyolyecanas ipueblojcahuan ica ihueyichicahualis tech ne país de Judea. <sup>12</sup> Huan Jesús quinmachtía ijcuín:

—Se tonal yetoya se tagat ten hueyi tequihua. Huan ne hueyi tequihua tagat yajqui huejca tech ocsé país para ompa quiselitu in chicahualis huan tanahuatl para mocahuas rey. Huan de ompa mohualcuepac campa quistehuac para tayecanaquiu. <sup>13</sup> Pero achtopa que yas tech ocsé país, ijcuacán ne hueyi tequihua quinnotzac májtacti itaquehualuan. Huan yejua quinmajmactilij sejsé moneda ten quijtosnequi se ciento tonal taxtahuil. Huan quinilijtehuac ijcuín: “Xictequitiltican nijín tomin cada senme de namejuan hasta in tonal cuac nimohualcuepas”. <sup>14</sup> Pero in pueblojuani de ne país quihueyiyoltahuelitacque ne hueyi tequihua. Ica ya nojón yejuan quititanque sequin tanojnotzani para ma yejuan quilican ne tayecanani den ocsé país ijcuín: “Tejuan amo ticnequij que nijín tagat ma mochihuati totayecancau rey”. <sup>15</sup> Pero mochihuac que ne hueyi tequihua tagat quiselij ne chicahualis huan tanahuatl para tayecantinemis queme rey. Huan de ompa mohualcuepa tech ipaís. Huan cuac ejcoc ya in hueyi tequihua ten mochihuac ya rey, ijcuacán yejua quintatitanic ma hualacan ne itaquehualuan ten quinmactilijteuca ya in tomin de sejsé tonal taxtahuil. Huan in rey ijcón quineyic quichihuac porín quinequía quimatis canachi tomin motanilijque ya cada se taquehual.

<sup>16</sup> Huan ne taquehual ten achto ejcoc, yejua ne quilij in rey ijcuín: “Notecotzin, ica nijín motomin nimotatanilij ocsé májtacti tomin”. <sup>17</sup> Ijcuacán in rey quilij ijcuín: “Cuali yetoc, tejua ticalitequitijque. Huan queme titacuaautomaticatequitique ica sayó tepitzin tequit san, ica ya nojón axcan nimitztalis xiquinyecantinemi májtacti pueblojme”. <sup>18</sup> Huan ica ome taquehual ejcoc huan quilij in rey ijcuín: “Totecotzin, ica nijín motomin nimotatanilij ocsé macuil tomin”. <sup>19</sup> Ijcuacán in rey quilij ijcuín: “Huan ica nijín mocualitequiu no nimitztaliti xiquinyecantinemi macuil pueblojme”.

<sup>20</sup> Huan ica eyi taquehual ejcoc huan quilij in rey ijcuín: “Notecotzin, nican yetoc motomin ten niqieutoya ya tech nomapayo. <sup>21</sup> Pues nejua amo nictequiltij motomin porín nimitzyolmohuiliaya porín tejua se titeco ten semi ticnequi ma se quiyecajsicacihuas. Huan no nicmatic que tejua ticololoa taquilot campa amo tic-talpachoj motatoc; huan no ticajocui taquilot campa amo tictocac”. <sup>22</sup> Ijcuacán in rey quilij: “Tejua, semi amo cuali titaquehual. Nimitzixcomacati ica tejua motaj-toluan ten tinechiluijtoc. Huan tejua ticmatoya ya que nejua niteco que semi nicnequi que ma se quiyecajsicacihuas. Huan no ticmatoya ya que nejua nicololoa taquilot campa amo nictalpachoj notatoc, huan no nicajocui tatoc campa amo nictocac. <sup>23</sup> Huan como nochi nijín ticmatoya ya, ¿queyé nijín notomin amo ticalaquic tech se banco campa huelsisquía quitequiltisquía notomin ne taca ten tiquinmactilisquía? Huan ijcón cuac nimocuepasquía, ijcuacán nicselisquía notomin ihuan ten timotanilij ya”. <sup>24</sup> Ijcuacán in rey quinilij itaquehualuan ten ompa yetoyaj ijcuín: “Xicuilian notomin de nijín tatzu huan xicmactilican ne ten quipixtoc májtacti tomin”. <sup>25</sup> Ijcuacán ne ocsequin taquehualme quinanquilijque ijcuín: “Totecotzin, ¿queyé ticmacasque? Ta, yejua quipixtoc ya májtacti tomin”. <sup>26</sup> Huan in rey quinanquilij ijcuín: “Huan nochi neques ten quipía tanahuatil de Dios huan quitequiltitáj, yejuan nojonques cachi oc Dios quinmactilis. Pero in ocsequin taca ten quipía sayó tepitzin san tanahuatil de Dios huan amo quitequiltisquic in tepitzin san ten quipíaj, yejuan nojonques Dios quintamicuilis ne tepitzin san ten quipíaj”. <sup>27</sup> Huan no in rey quinilij ijcuín: “Huan nochi neques ten nechtahuelitayaj huan amo quinequíaj que ma nimocahuani ninrey, yejuan nojonques xiquinualcuican nican huan xiquinmictican nican noixpan”.

**Nican tajtoa de queniu Jesús Temaquixtijque calayic tech in pueblo de Jerusalén huan in tagayot quimohuistiliyajque**

*(Mt. 21.1-11; Mr. 11.1-11; Jn. 12.12-19)*

<sup>28</sup> Huan de ompa cuac Jesús quintamiilij ya nijín nexcuitil, ijcuacán Yejuatzin quisentocac yajqui para Jerusalén. <sup>29</sup> Huan ajsitiaya ya Jesús campa pueblójme de Betfagé huan Betania campa amo huejca quitztoya se tal lomotzin ten monotzaya Olivos. Huan ijcón Yejuatzin quintitanic ome imomachtijcahuan. <sup>30</sup> Huan Jesús quinilij neimomachtijcahuan ijcuín:

—Xiyacan tech ne pueblo ten yetoc cachi taixpampa. Huan niman cuac nancalaquitihue ya, ijcuacán ompa nancajsitihue se burritojtzin ten ilpitoc ten ayamo aquen ipan motalía. Huan nojón burritojtzin xictojtomacan huan xinehualcuilican. <sup>31</sup> Huan tacán acsá namechtajtoltis de queyé nanquitojtomaj ne burritojtzin, ijcuacán namejuan xicnanquilican ijcuín: “In Totecotzin quimonequiltía quitatequiutis nijín tapialtzin”.

<sup>32</sup> Ijcuacán ne ome imomachtijcahuan yajque huan cajsitoy in burritojtzin ijcón queme Jesús quilijca ya. <sup>33</sup> Huan cuac yejuan quitojtontoyaj ya in burritojtzin, ijcuacán itecohuan quintajtoltijque ijcuín:

—¿Queyé nanquitojtontocque in toburritotzin?

<sup>34</sup> Huan imomachtijcahuan de Jesús quinnanquilijque ijcuín:

—Tictojtontocque porín Totecotzin quinequi quitatequiutis.

<sup>35</sup> Huan ijcón cualcuilijque Jesús ne burritojtzin huan quipanpejpechtijque ica nintaquehuan ne burritojtzin huan ijcón quipantalijque Jesús ipan ne burritojtzin.

<sup>36</sup> Huan ijcón queme nejnentiaya Jesús, no ijcón in tagayot quisoutiyaj nintaquen talixco tech in ojti. <sup>37</sup> Huan cuac ajstitiyaj ya campa ne temolis den ne tal lomotzin de Olivos, ijcuacón nochi imomachtijcahuan ten quitoctiliyaj, yejuan nojonques peuque yolpaccatzajtzíaj huan quimohuistiliyaj Jesús ica por ne mohuiscatequime ten quitacque. <sup>38</sup> Huan no quitzajtzilíayaj ijcuín:

—Tiontatiochihual de Dios ten Tejuatzin tiontayecanque ten tionualajtoc itencopaca Totajtzin Dios para techyolyecanas. Porín Yejuatzin den eluiyactzinco techmactilij ya ne yolsehuillis. Huan ticueyichihuaq Totajtzin Dios ten yetica ne eluiyactzinco.

<sup>39</sup> Ijcuacón senme de ne tamatinime fariseos ten yayaj intzalan in tagayot, yejuan nojonques quiliyaj Jesús ijcuín:

—Tamachtijque, xiquintacahualtij momomachtijcahuan ma amo ijcón quiytojcan.

<sup>40</sup> Pero Jesús quinnanquilij ijcuín:

—Namechyequilía que tacán nijín nomomachtijcahuan motentamatilisque, ijcuacón nochi nijín teme tzajtzisque para nechmohuistilisque.

<sup>41</sup> Huan Jesús amo huejca yetoya oc de ne pueblo Jerusalén. Huan cuac quitac Jerusalén, ijcuacón Yejuatzin mochojchoctij ica por nojón pueblojuani ten yetoyaj Jerusalén. <sup>42</sup> Huan Jesús quiytoaya ijcuín:

—Huan Nejuatzin nicnequisquía que namejuan xicajsicamatican nochi in tatiochihualis ten Totajtzin Dios quinequi namechmactilis para ica xiyolseucanentinemican. Pero nijín amo nancajsicamatisque porín Totajtzin Dios namechtatilij ya. <sup>43</sup> Pero ejcos in tonalme ten cualcuis ne moutil. Huan neques ten namechtahuelitztinemij, yejuan nojonques namechyequaloquihue ica se hueyi tepan yehualol huan yejuan namechtatzacuiltisque nohuiyampa de namopueblo. <sup>44</sup> Huan ijcón namechtaluitequisque huan namechmictisque nochi namejuan nanpueblojuani de Jerusalén. Huan tech nijín pueblo Jerusalén amo mocahuas ma nejnepaniuto oc se tet ipan ocsé tet. Huan nochi nijín mochihuas ijcón porín amo nanquiyecneltocasque que Totajtzin Dios nechualtitanic para namechmaquixtis.

### **Nican tajtoa de queniu Jesús Temaquixtijque quichijchipahuac in cachi hueyi tiopan de judíos**

*(Mt. 21.12-17; Mr. 11.15-19; Jn. 2.13-22)*

<sup>45</sup> Huan de ompa Jesús calayic tech in calten den hueyi tiopan de judíos huan pehuac quincalanquixtía nochi ne tanamacani huan ne tacohuani ten tequititoyaj ne calten den tiopan. <sup>46</sup> Huan Jesús quinilij in tagayot ijcuín:

—Tajcuiliutoc ya tech in Tajcuilolamatzin de Dios ijcuín: “Nochan quitocaytisque se cali de ne tatatautilis ihuan Dios”. Pero namejuan nanquichiutocque queme yesquía se tecal campa yetocque in tachtequini.

<sup>47</sup> Huan mosta mosta Jesús tamachtia ya ica in Tajtoltzin de Dios tech ne hueyi tiopan de judíos. Pero ne tayecanani tiopixcame huan ne tanextiliani ten tanahuatil de Moisés huan ne huehuentzitzin den pueblojuani, nochi nojón tayecanani mosenixejecoltiayaj de queniu huelis quimictisque Jesús. <sup>48</sup> Pero nojón tayecanani amo cajsique de queniu quimictisque Jesús porín nochi in tagayot tamatcayetoyaj para quicaquilisque itanojnotzalis de Jesús ica paquilis.



**Nican tajtoa de queniu in tayecanani judíos quitajtanilijque  
Jesús Temaquixtijque de aconi itanahuatil ten quipía**

*(Mt. 21.23-27; Mr. 11.27-33)*

**20** Huan se tonal Jesús yetoya tech ne hueyi tiopanjitc de judíos huan ompa quinmachiaya in tagayot. Huan Jesús quinnojnnotzaya ica ne yancuic Tajtoltzin de Dios ten cualcui ne nemaquixtilis. Huan mochihuac tech nijín momento que ejcotihuetzque in tayecanani tiopixcame huan ne tanextiliani den tanahuatil de Moisés huan no ne huehuetzitzin den pueblojuani judíos. <sup>2</sup> Huan nochi tayecanani ejcotihuetzque huan quitajtoltijque Jesús ijcuín:

—Xitechonili toni tanahuatil ticalcui teja para ticchihuas nochi nijín tanextililisme huan para tiquinquixtij ne tanamacani. Huan no xitechonili aconi mitzonnahuatijtoc xitamachtijtinemi.

<sup>3</sup> Ijcuacán Jesús quinanquiliij ijcuín:

—Nejuatzin no namechtajtoltiti se matájtanti huan nicnequi no xinechilican.

<sup>4</sup> ¿Aconi quinahuatij Juan ma taahuijtinemi? ¿Xe Dios quinanhuatij ma taahuijtinemi in Juan? Oso, ¿yejuan in tagayot quinahuatijque in Juan?

<sup>5</sup> Ijcuacán yejuan moixejecoltiayaj se huan ocsé huan quijtoayaj ijcuín:

—Tacán tiquilíaj de que Dios quinahuatij Juan ma taahuijtinemi, ijcuacán yejua technanquilis ijcuín: “¿Queyé namejuan amo nanquineltoquilijque ten namechiliana in Juan?” <sup>6</sup> Huan tacán tiquilíaj de que tagayot san quinahuatijque in Juan de que ma taahuijtinemi, ijcuacán yejuan techtepoxonisque. Porín nochi in tagayot quiyecneltoaj que in Juan Taahuijque yejua se hueyi tanahuatijque de Dios.

<sup>7</sup> Ica ya nojón ne tayecanani quinanquiliijque Jesús que yejuan amo quimatíaj aconi quinahuatij Juan ma taahuijtinemi. <sup>8</sup> Ijcuacán Jesús no quinilij ijcuín:

—No ijcón nejua amo no namechilis aconi nechmacac tanahuatil para nicchiutinemi nochi nijín tanextililisme.

**Nican Jesús Temaquixtijque quitalij se nexcuitil  
de sequin tequitini ten amo yolcualime**

*(Mt. 21.33-44; Mr. 12.1-11)*

<sup>9</sup> Huan cachi satepan Jesús pehuac quinnojnnotzac in tagayot huan quinmachtij ica nijín nexcuitil ijcuín:

—Oncaya se tagat patrón ten quitocac sequi uvas tactzon tech ne imila. Huan cachi satepan in patrón quitetaneutijteu ca renta ne imila ihuan senme de nijín tequitini. Huan satepan ne patrón quistehuac huan yajqui ocseco hasta ocsé país huan ompa yetoya míac tonalme campa ipueblo. <sup>10</sup> Huan ajsic ya in tonal cuac yocsic ya in uvas taquilot, ijcuacán in patrón quititanic se itaquehual para ma yejua quintajtaniti ne tequitini que yejuan ma quimactilican ne taquilot ten pohui ihuan in patrón. Pero ne tequitini quiquitizquijque ne taquehual huan cuitecque. Huan de ompa ijcón yojqui quitogacque. <sup>11</sup> Ijcuacán ne patrón ocsepa quititanic ocsé itaquehual. Pero ne tequitini ocsepa quihuijuicaltijque huan cuitecque. Huan de ompa no ijcón yojqui quitogacque ne ica ome taquehual. <sup>12</sup> Huan in patrón quititanic ocsepa ica eyi itaquehual. Pero ne tequitini quicojcocojque huan quicalantamotque de ne uvastal ne ica eyi itaquehual.

<sup>13</sup> Ijcuacón in patrón de ne uvasta, yejua ne moyolij ijcuín: “¿Axcan toni oc nicchihuas? Pero axcan nicmactic ya toni monequi nicchihuas. Cachi cuali nictitaniti notasoconetzin campa ne tequitini. Xa santajma cuac yejuan quitasque notasoconetzin, ijcuacón quimohuiscaselisque”. <sup>14</sup> Pero cuac ne tequitini quitacque ya que ejcotihuitz ne itasoconetzin de patrón, ijcuacón yejuan moliliayaj se huan ocsé huan motajtolmacayaj ijcuín: “Yejua ya ne quiselis nochi ten pohui itatcopaca ya. Cachi cuali ma timoyeyectalican para ticmictisque para ijcón toaxcatis nijín uvastal ten quiselisquía queme herencia ne teconeu”. <sup>15</sup> Huan de ompa ne tequitini quicalantatmotque ne tasoconetzin de ne uvastal huan quimictijque. Ijcuacón in Jesús quintajtoltij in tagayot ijcuín:

—Huan cuac hualas ne patrón ten niaxca ne uvastal, ijcuacón ¿toni quinchihuilis ne tequitini ten amo yolcualime? <sup>16</sup> Nejua namechyequilía que ne patrón cuac hualas ya, ijcuacón yejua quintamimictis ne tequitini ten amo yolcualime huan quincahuilis ne uvastal ica renta ocsequin tequitini.

Huan in tagayot cuac quicacque nochi nijín tajtolme, ijcuacón yejuan quilijque Jesús ijcuín:

—Ma amo ijcón quimonequiltij Dios ma mochihua.

<sup>17</sup> Pero Jesús sayó quinsenixitac huan pehuac quinmachtía ica se nexcuitil huan Yejuatzin monejnehuililtij queme se tet, huan quinilij in tagayot ijcuín:

—¿Toni quiptosnequi nijín ten ijcuiliutoc tech in Tajtoltzin de Dios? ten quiytoa ijcuín: “In tet ten quimajpeuque in tepanchihuani, yejua ne mochihuaco tepanchicahualoni de tepamit”. <sup>18</sup> Huan nochi neques ten amo nohuan tacuautamatij, yejuan nojónques queme yesquía se tagat ten motepotamía huan huetzi ipan se tet huan ne tagat quipojpostequi ninacayo. Huan nochi neques ten amo taneltocani de Nejuatzin, yejuan nojonques mocahuasque tacuecholme ijcón queme se tet huetziqui ipan se tagat.

### **Nican tajtoa de queniu quitajtanilijque Jesús Temaquixtijque que cox monequi ma taxtahuacan impuestos oso ma amo**

*(Mt. 21.45-46; 22.15-22; Mr. 12.12-17)*

<sup>19</sup> Ijcuacón in tayecanani tiopixcame huan in tanextiliani den tanahuatil de Moisés, nochi nijín tayecanani quinequíaj quiquitzquisque Jesús tech nojón momento. Huan ijcón quinequíaj quichihuasque porín yejuan cajsicamatque ya que Jesús tajtoaya de yejuan nintechcacopaca ica ne nexcuitil den amo yolcualime tequitini. Pero amo quiquitzquijque Jesús porín yejuan quinyolmohuiliayaj in pueblojuani que ninpan yasque. <sup>20</sup> Huan ijcón yejuan quipijpixinemíaj Jesús que tensá tajtacol quiptosquía para ica huelis quiteluilisque huan quitemactisque imaco in hueyi tequihua. Ica ya nojón ne tayecanani quintitanque sequin intequiticaicnihuan huan yejuan mochiutinemij que yejuan yolcuali taca. <sup>21</sup> Ica ya nojón ne taixcayahuani quitajtoltijque Jesús ijcuín:

—Ticmatíaj ya que Tejuatzin titajtoa huan titamachtía sayó ica ten melau. Huan no ticmatij que tejua amo tiquinyolmohuiliá in tagayot ten yejuan quiytoaj. Huan amo no tiquinchichicotasojta in tagayot. Ta, Tejuatzin yec melau titeyecnextilía in ojtzin de Dios. <sup>22</sup> Huan axcan xitechonilij toni tiquixejecoa. ¿Xe Dios quimonequiltía ma taxtahuacan impuestos den ne rey César oso amo?

<sup>23</sup> Ijcuacán in Jesús quinyolojixmatic que ica tacajcayahualis quitajtoltiayaj. Ica ya nojón Jesús quinilij ijcuín:

—¿Queyé namejuan nanquinequij nannechichtacahuisque san ica nijín tacajcayahualis? <sup>24</sup> Xinechnextilican in tomin tenica nantaxtahuj impuestos. ¿Aconi nijín ixayac ten ixnesi nican? Huan, ¿aconi nijín itocay ten ijcuiliutoc nican?

Huan yejuan quinanquilijque ijcuín:

—Yeja nijín in rey César.

<sup>25</sup> Ijcuacán Jesús quinilij ijcuín:

—Xicmactilican in rey César ten quinamiqui xictemactican César. Huan cachi oc xicmactilican Dios nochi ten Yejuatzin quimonequiltía xictemactican huan xicycajsicamactican.

<sup>26</sup> Huan ica nochi in tajtolme tenica Jesús quinojnotztoya in tagayot, ne taixcaycayahuani amo huelque quichtacahuisque Jesús ica nintacajcayahualis. Ta, yejuan cachi oc quimoucacacque de queniu Jesús tananquilij. Ica ya nojón yejuan sayó motentamatilijque san.

**Nican tajtoa de que ne saduceos quitajtanilijque Jesús Temaquixtijque de queniu panquisasque yoltocque in talticpacuani intzalan in ánimajme**

*(Mt. 22.23-33; Mr. 12.18-27)*

<sup>27</sup> Huan cachi satepan sequin taca tamachilejque saduceos motoquijque campa Jesús yetoya. Huan yejuan amo quineltocayaj de que huelis se panquisas yoltoc intzalan in ánimajme. Ica ya nojón yejuan quitajtoltijque Jesús ijcuín:

<sup>28</sup> —Tamachtijque, in tanahuatijque Moisés techijcuilohuilijtehuac ijcuín: “Tacán se tagat yesqui namique huan miquisquía huan quicahuasquía nisihuau huan amo quinpiasquía coneme, ijcuacán ma monamicti icniutagat de ne miquet ihuan ne cahual sihuat ten icuñaada catca. Huan ma quiniscaltican coneme ihuan in cahual sihuat ten icuñaada catca. Huan ijcón ma quinpiacan coneme ten icniutagat ten miyic ya para ma ne teconejuan ma quiselican itocay huan iherencia de nintat ten ipa miyic ya”. <sup>29</sup> Pues ma tiquijtocan que oncaya chicome icnime. Huan ne ten tayecana, yeja ne monamictij ihuan se sihuat. Pero niman miyic in tagat huan amo quinpiacque coneme. <sup>30</sup> Huan de ompa ne ica ome teicniu monamictij ihuan icuñaada ten miyic iyoquich. Huan ijcón mochihuac queme ne achto. Huan ne tenica ome teicniu miyic huan amo quinpiacque coneme. <sup>31</sup> Huan satepan ne ica eyi teicniu monamictij ihuan icuñaada. Huan ijcón mochiutiyá hasta ajsic de chicome icnime. Nochi sejsé monamictiyajque ihuan incuñaada huan nochi yejuan sejsé mictiyajque. Huan nochi yejuan amo senme quinpiacque inpiluan. <sup>32</sup> Huan queme nochi tami micque ya in chicome icnime, ijcuacán in sihuat no momiquilij ya.

<sup>33</sup> Huan de ompa in saduceos quitajtoltijque Jesús ijcuín:

—Axcan xitechonili que tech ne tonalme cuac panquisasque yoltocque intzalan in ánimajme ne taca ten chicome icnime huan in sihuacahual, ijcuacán, ¿aconi isihuau yesqui senme de ne chicome icnime? Porín nochi in icnime quipouque queme nisihuau.

<sup>34</sup> Ijcuacán Jesús quinnanquilij ijcuín:

—In tagayot ten axcan nentinemij, yejuan nojonques monamictíaj huan mosihua-monijtantinemij. <sup>35</sup> Pero Totajtzin Dios quinpohua yolcualime sayó sequin tagayot. Huan sayó yejuan quinamiqui ajsisque ne eluiyactzinco. Huan sayó yejuan Dios

quinpanquixtis yoltocque intzalan in ánimajme. Huan nepa eluiyactzinco neques ten yolcualime amo monamictijtinemisque huan amo no mosihuamonijtantinemisque oc.<sup>36</sup> Huan ijcón mochihuas porín yejuan amo huelis momiquilisque oc. Ta, yejuan no nentinemisque ya queme in ángeles. Huan yejuan nojón Dios quinpoutos que niconehuan porín Yejuatzin quinpanquixtis ya yoltocque intzalan in ánimajme.<sup>37</sup> Huan ne Moisés ipa namechmachtijca ya de que Dios quinpanquixtis yoltocque itaneltocacahuan intzalan in ánimajme. Huan nochi nijín tamachilis Moisés ipa namechnextilijca ya tech in Tajtoltzin de Dios campa tajtoa de ne huitzcuoutactzon ten momejmelahuaya ica tit. Huan ompa quijtoa que Totecotzin Yejuatzin in Dios de Abraham huan Yejuatzin in Dios de Isaac huan Yejuatzin in Dios de Jacob. Porín Yejuatzin quinnojnottoc de neques ten yoltinemisque sen nachipa.<sup>38</sup> Ica ya nojón xicmatican que Totajtzin Dios Yejuatzin amo in Dios de neques ten yetoc tech in ixpolihuilis. Ta, Yejuatzin in Dios ten neques ten yoltinemij sen nachipa. Porín nochi neques ten tacuautamatinemij ihuan Dios, yejuan nojonques yoltinemij sayó para quimohuistilijtinemisque Totajtzin Dios.

<sup>39</sup> Ijcuación sequin tanextiliani de tanahuatil de Moisés quinanquilijque Jesús ijcuín:

—Tamachtijque, cuali queme tiquijtoa.

<sup>40</sup> Huan ijcón amo aquen moixehuijque oc ma quitajtoltican oc Jesús tensá matájtanti.

**Nican Jesús Temaquixtijque quintajtoltij in tacaquini ijcuín: “Ne Cristo, ¿aconi itetat?”**

*(Mt. 22.41-46; Mr. 12.35-37)*

<sup>41</sup> Ijcuación Jesús quintajtoltij in tagayot ijcuín:

—¿Toni nanquiyolnemilfaj de ne ten monotza Cristo Temaquixtijque? ¿Queyé quijtoa que ne Cristo, Yejuatzin iconu de ne huejcau rey David? <sup>42</sup> Porín tech in Tajcuilolamatzin de Dios ten quilfaj Salmos, ne rey David quijtoa ijcuín:

Huan in Totajtzin Dios quinojnottzoya Notayecancatzin in Notecotzin huan quiliayaj ijcuín: “Ximosehuitzino nican noyecmacopaca.

<sup>43</sup> Huan xitayecantinemi hasta ne tonal cuac niquintanilis nochi neques ten mitzixnamictinemi”.

<sup>44</sup> Huan como David quitenehuac Cristo queme i Tecotzin, ¿queniu huelis que Cristo no mochihuac tecone de David? Ica ya nojón David quipohuac Cristo Temaquixtijque, que Yejuatzin i Tecotzin de David huan no itecone de David.

**Nican tajtoa de queniu Jesús Temaquixtijque quinteluilij in tanextiliani den tanahuatil de Moisés**

*(Mt. 23.1-36; Mr. 12.38-40; Lc. 11.37-54)*

<sup>45</sup> Huan nochi in pueblojuani judíos quicaquiliayaj itanojnottzalis de Jesús cuac Yejuatzin quinnojnottzaya imomachtijcahuan ijcuín:

<sup>46</sup> —Ximotachialican ca cuali de ne tanextiliani den tanahuatil de Moisés porín yejuan semi cuelitaj nentinemisque huan mocualnextijtinemij ica ne itilma ten sen taniquistoc. Huan yejuan no cuelitaj que ma quinmohuiscatajpalocan tech in plazajteno. Huan yejuan no cuelitaj motalitihue ne taixpampa den tiopan de judíos campa yetocque ne mohuiscasillajme. Huan no semi quinequij motalitihue tech ne sillajme

campa cachi cuali tatacuasque. <sup>47</sup> Pero hasta yejuan no quincalcuiliáj ne sihuacahualme. Huan para amo monextis ten quichihuaj, yejuan semi huejcahuaj cuac motatatautilíaj ihuan Dios. Huan nochi nijinques quiselisque imaco Dios cachi hueyi tatzacuilitis.

**Nican Jesús Temaquixtijque quinmachtij in tacaquini de ne sihuacahual ten quitetayocolij nitomin iixpantzinco Dios**

(Mr. 12.41-44)

**21** Huan tech ne hueyi tiopan de judíos Jesús quinsenitztoya ne ricojme cuac quipantalijtoyaj ne nintomin campa quinechicoa ninofrenda. <sup>2</sup> Huan no Jesús quitac se sihuacahual ten semi pobre. Huan yejua quipantalij sayó ome tomintzin queme yesquía ome centavos. <sup>3</sup> Huan Jesús quijtoaj ijcuín:

—Yec melau ten namechilía que ne sihuacahual, yejua ne quipantalij cachi míac tomin huan que neques ricojme. <sup>4</sup> Porín nochi ne tagayot quipantalijque nintomin ten quinsobraroyaj para ninofrenda. Pero ne sihuacahual yejua semi pobre. Huan yejua quipantalij nochi nitomin tenica monequía moixpanoltisquía.

**Nican Jesús Temaquixtijque quinnejmachtij in tacaquini de que quihuejuelos in hueyi tiopan de judíos de Jerusalén**

(Mt. 24.1-2; Mr. 13.1-2)

<sup>5</sup> Huan sequin imomachtijcahuan de Jesús monojnotzayaj de ne hueyi tiopan de judíos. Huan yejuan quinextiliayaj Jesús de queniu cualtzin tachijchiutoc ica ne cualtzitzin teme. Huan no quinextiliayaj nochi ne tetayocolilme tenica quicualnexitayaj in tiopan. Huan no Jesús quinilij ijcuín:

<sup>6</sup>—Huan hualajtoc in tonal cuac nochi nijín ten nanquitztocque, nochi yejua quihuejuelosque hasta amo teyi mocahuas se tet ten nejnepaniutos.

**Nican Jesús Temaquixtijque quinmachtij in tacaquini de ne tacuitapan tonalme cuac in talticpacuani tajyohuisque**

(Mt. 24.3-28; Mr. 13.3-23)

<sup>7</sup> Ijcuacón imomachtijcahuan quitajtoitijque Jesús ijcuín:

—Tamachtijque, xitechonili queman huejuelihuis nijín tiopan calixime. Huan, ¿toni nescayome tiqitasque cuac motamichihuaqui ya nochi nijín ten titechonilijtoc?

<sup>8</sup> Ijcuacón Jesús quinnanquiliij ijcuín:

—Ximoyecpiacan ma amo aquen namechyolcajayahua tech namotaneltolcalis. Porín hualasque miacque tacajcayahuani ten no nechtenchiutinemisque ica notocay huan quijtojinemisque ijcuín: “Nejua ya ni Cristo Temaquixtijque”. Huan no yejuan quijtosque ijcuín: “Axcan ejcoc ya in tonal cuac mohualuicas Cristo”. Masqui ijcón namechilisque in tacajcayahuani pero amo xiyacan xiquintoctilican. <sup>9</sup> Huan cuac nanquicaquisque que mochiutoc ne hueyi netehuilis, ijcuacón amo ximoyolcujmolocan. Huan cuac motetapohuis ya que mocualancatehuisse in tagayot, ijcuacón amo ximoyolmoutican. Porín ipa ijcón monequi mochihuas achtopa que nimohualuicas Nejuatzin. Pero ximatican que amo yejua in tamilis den talticpac cuac nochi nijín mochiutos.

<sup>10</sup> Ijcuacón Jesús quisentocac quinnojnnotzaya imomachtijcahuan ijcuín:

—Huan tech nojón tonalme de tajyohuilis pehuas moajocuisque pueblojuani huan motehuisque se huan ocsé pueblojuani. Huan in tagayot de se país moajocuisque huan motehuisque se huan ocsé tagayot. <sup>11</sup> Huan mochihuas que miaccan talolinis. Huan tech miaccan pueblojme mochihuati máyanti huan tetzaucacocolisti. Huan no ejecaixco nanquitasque tetzaucanescayome huan no huejueyi nemoutil mochi-huaquiu. <sup>12</sup> Pero achtopa que nanquitasque nochi nijín nescayot, ijcuación namej-uan namechquitzquisque huan namechtajyohuiltisque. Huan namechtemactisque inmaco in tiopan tayecanani huan ompa namechixcomacasque. Huan namech-calauitihue cárcelijtic. Huan de ompa namechuicasque inixpan in tequihuaní que me reyes huan ocsequin tayecanani. Huan nochi nijín namopan mochihuas porín namej-uan nantacautamatij tech in chichualis de notocaytzin. <sup>13</sup> Huan cuac namechuicasque ya inixpan in tayecanani, ijcuación namej-uan huelis nanmotajto-huisque notechcacopaca. <sup>14</sup> Huan no namechilía que amo semi monequi xiyoltane-milijtinemican de queni nantanquilisque cuac nanmotajtohuisque notechcacopaca. <sup>15</sup> Porín tech ne tonal namechinmactiliti tajtolme huan tamachilis. Huan ijcón neques ten namechtahuelitztinemij, yejuan nojonques amo huelis namechtajtolxij-xicosque huan amo nohuelis namechtajtolixnamiquisque.

<sup>16</sup> Huan mochihuas que namechtemactisque inmaco in tayecanani hasta namoteis-caltijcahuan huan namocnihuan huan namoparientes huan namotasojicnihuan. Huan ijcón yejuan namechmictisque senme de namej-uan. <sup>17</sup> Huan nochi in taltic-pacuani namechsenpetztahuelitztinemisque porín namej-uan nantacautamatinemij nohuan. <sup>18</sup> Pero no xicmatican que Dios namechyecpixinemis huan Yejuatzin amo quicahuas nión se namotzontzin ma polihui. <sup>19</sup> Huan como namej-uan nanquixico-jtiyohue nochi nijín tajyohuilis, ijcuación Dios namechmactilis ne tamajscayot de ne nemilis nachipa.

<sup>20</sup> Huan cuac nanquitasque que in pueblo Jerusalén quiyehualojtocque ya míac soldados, ijcuación cuali xicmatican ya que quitamihuejuelotij ya in pueblo de Jerusalén. <sup>21</sup> Ijcuación namechilía que neques ten calyetocque Judeajcopaca, ma niman cholocan huan ma yacan ne tepepan. Huan neques ten calyetocque Jerusalén-copaca, yejuan nojonques monequi ma quisacan de ompa. Huan neques ten tequititocque milajpa, ma amo mohualcuepacan oc tech in pueblo de Jerusalén. <sup>22</sup> Porín tech nojón tonalme huetziqiu ya in hueyi tatzacuilitis de Dios huan motamichihuaquiu ya nochi ten ijcuiliutoc tech in Tajcuilolamatzin de Dios. <sup>23</sup> Huan tech nojón tonalme semi teicneltiani neques sihuame ten cocoxcayetocque ica pili. Huan no semi teicneltiani neques sihuame ten tachichitijtinemisque ica coneme. Porín tech nojón tonalme mochihuaquiu se tetzaucatajyohuilis nican talticpac. Huan Totajtzin Dios quinueyitatzacuilitis in pueblojuani de Jerusalén. <sup>24</sup> Huan sequin pueblojuani miquisque tech in netehuilis den soldados huan ocsequin pueblojuani quinuicasque queme presos huan quinajxitisque tech ocsequin país. Huan ijcón in analtecocayome quitamipopolosque in pueblo de Jerusalén huan no quintajyohuiltijtihue in pueblojuani de Jerusalén. Huan ijcón mochiutiyás hasta cuac tamis in tonalme que Dios quintecahuilij ne analtecocayome ma nentinemican ne Jerusalén.

**Nican tajtoa de queniú Jesús Temaquixtíjque quinmachtij de ne tonal cuac  
Yejuatzin in Yectagatzin de Dios mohualuicas nican talticpac**

(Mt. 24.29-35, 42-44; Mr. 13.24-37)

<sup>25</sup> Huan no Jesús quinnextiliaya imomachtijcahuan ijcuín:

—Huan tech nojón tonalme nimampa den hueyi tajyohuilis, ijcuación namejuan nanquimoucaitasque ne huejueyi tetzaucatequime ten mochihuaquiu ipan in tonalzín huan ipan in metzi huan inpan in sitalime. Huan nanquitasque que in talticpacuani moyolpolojtinemisque ya huan mohueyiyolmoutisque. Porín in hueyíat den mar tetzaucaijcoyocas cuac mocueuentecas. <sup>26</sup> Ijcuación in talticpacuani talcautiyasque ya ica ne moutil cuac quinemilijtosque de toni tatzacuutilis ninpan ejcotoc nican talticpac. Huan hasta Dios no quintzetzelos ne tayecanani ten nentinemij ejecaixco. <sup>27</sup> Huan cuac motamichihuas nijín, ijcuación namejuan nannechitasque Nejuatzin ni Yectagatzin de Dios nihualajtos ya ne mixtzalan ejecaixco huan ica hueyi chicaucacualtziyo no nimohualuicas. <sup>28</sup> Huan cuac nanquitasque mochiutoc ya nochi nijín, ijcuación namejuan cachi oc ximoyolchicahuacan huan xiajcotachiacan porín ejcotos ya ne tonal cuac Dios namechtamajxtilis den namonemaquixtilis.

<sup>29</sup> Huan Jesús quinmachtij imomachtijcahuan ocsepa ica se nexcuutil ten higoscuo-huit ijcuín:

—Xiquitacan ne higoscuo-huit oso ten yesqui cuoume. <sup>30</sup> Huan cuac nanquitasque que cualtzin maxoxohuixtoc ya in cuoume, ijcuación nanquimatij ya que ejcotoc ya in tonalme de tatotoncayot. <sup>31</sup> Huan no ijcón cuac nanquitasque que mochiutoc nochi nijín tajyohuilis ten namechiluijca ya, ijcuación xicmatican ya que ejcotoc ya in tonal cuac Dios namechyolyecanaquiu ica ichicahualis nican talticpac. <sup>32</sup> De yec melau ten namechilía que nochi nijín ten namechilijtoc, nochi nijín motamichihuaquiu achtopa que momiquilisque in tagayot ten axcan nentinemij. <sup>33</sup> Huan ejcos in tonal cuac in ejecaixco huan in talticpac tatajtamis ya. Pero xicmatican que notajtoltzitzin amo queman polihuis.

<sup>34</sup> Huan no namechilía que ximoyecpiacan namejuan san para ma amo quejquepto namotacuautamatilis. Huan amo xicneltatacuajtinemican huan amo xitahuantinemican. Huan amo xiyoltanemilijtinemican den namonemilis de nican talticpac. Porín como ijcón nanquichiutocque, ijcuación namechmoucaichtacahuiquiu ne tonal cuac Nejuatzin nimohualuicas. <sup>35</sup> Porín ne tonal cuac nimohualuicas, ijcuación Nejuatzin niqinmoucaichtacahuiquiu in talticpacuani de nochi senmanahuac, ijcón queme se trampa quimoucaichtacahuía se oculin cuac huetziti tech in trampa. <sup>36</sup> Ica ya nojón namechyequilía xiyecuatamatinemican tech namotacuautamatilis. Huan nachipa ximotatautilican ihuan Dios para que Dios namechpalehuis xicholohuilican nochi nijín tajyohuilis ten mochihuaquiu. Huan no ximotatautilican ihuan Dios para que Yejuatzin ma namechpalehuis nanmotenextilisque noixpan de Nejuatzin ni Yectagatzin de Dios.

<sup>37</sup> Huan Jesús tamachtiaya tonayan tech in hueyi tiopan de judíos, huan tech yohual mooncahuaya campa ne tal lomotzin ten monotza Olivos. <sup>38</sup> Huan nochi in pueblojuani de Jerusalén yayaj cada cualcan huan calaquiyaj tech in hueyi tiopan para quicaquilisque itanojnotzalis de Jesús.

**Nican tajtoa de queniu moyectencauque in tayecanani  
judíos de queniu quiquitzquisque Jesús Temaquixtijque**

*(Mt. 26.1-5, 14-16; Mr. 14.1-2, 10-11; Jn. 11.45-53)*

**22** Huan amo huejcahuaya oc para mochihuas ne tajyohuilis iluit ten quilía pascua cuac in pueblojuani quicuaj pan ten amo tamanelol ica levadura. <sup>2</sup> Huan in tayecanani tiopixcame huan in tanextiliani den tanahuatil de Moisés, nochi yejuan nijín tayecanani quitemoliayaj de queniu quimictisque Jesús. Pero quichiutoya nijín ica ichtacayot porín quinyolmohuiliayaj in pueblojuani que ninpan yasque.

<sup>3</sup> Huan ijcón in amocuali Satanás calayic iyolijtic in Judas ten cojpatocaytía Iscariote ten yejua no poutinemía ihuan ne majtactiomomen imomachtijcahuan de Jesús. <sup>4</sup> Huan ne Judas yajqui quinitato ne tayecanani tiopixcame huan ne tiopan tayecanque den policia. Huan ompa Judas quinixpantilito de queniu yejua huelis quitemactis Jesús inmaco ne tayecanani. <sup>5</sup> Ijcuacón ne tayecanani mohueyiyolpactijque huan yejuan moyectencauque ihuan Judas de quitaxtahuisque ca tomin. <sup>6</sup> Ijcón in Judas motemactij ihuan in tayecanani. Huan de ompa yejua pehuac quitemoa de queniu quitemactisquía Jesús inmaco in tayecanani, pero ichtaca para ma amo quimatican in pueblojuani de Jerusalén.

**Nican Jesús Temaquixtijque quinmachtij imomachtijcahuan de ne Santa Cena**

*(Mt. 26.17-29; Mr. 14.12-25; Jn. 13.21-30; 1 Co. 11.23-26)*

<sup>7</sup> Huan cuac ajsic in iluitonal cuac in pueblojuani quicuaj pan ten amo tamenelol ica levadura, ijcuacón monequía quimictisque se ichcatzin para ijcón quielnamiquisque de ne tonal cuac Dios quinalquixtij ipueblojcahuan ne Egipto. <sup>8</sup> Ijcuacón Jesús quintitanic Pedro huan Juan huan quinilij ijcuín:

—Xiyacan xichijchihuati in ichcatzin para ticsenpancuasque ne mohuiscatacualis ten monotza pascua.

<sup>9</sup> Huan quitajoltijque Jesús ne ome imomachtijcahuan ijcuín:

—¿Can ticnequi ma ticchihuati ne mohuiscatacualis?

<sup>10</sup> Ijcuacón Jesús ocsepa quinanquilij ne ome imomachtijcahuan ijcuín:

—Cuac nancalaquitihue ya tech ne pueblo de Jerusalén, ijcuacón hual quisas ne tagat ten cuica se atzotzocol. Namejuan xictoctilican ne tagat hasta campa ne cali campa yejua calaquitiu. <sup>11</sup> Huan namejuan xiquilican in teco de ne cali ijcuín: “In tamachtijque mitzilía ijcuín: Xiquinnextili ne nomomachtijcahuan can yetoc ne nepancal campa huelis tisentacuasque ica ne mohuiscatacualis Nejuatzin ihuan nomomachtijcahuan”. <sup>12</sup> Ijcuacón in teco de ne cali namechnextilitiu ya se hueyi cuarto tech ne nepancal campa tachpanala ya huan ijcatoc ya mesa. Huan ompa namejuan xicchijchihuacan in mohuiscatacualis.

<sup>13</sup> Huan ijcón ne ome imomachtijcahuan yajque huan ajsito campa ne nepancal tayejeetalij ya, ijcón queme Jesús quinilijca ya. Huan ijcón ne imomachtijcahuan peuque quichijchihuaj in mohuiscatacualis ten quilíaj pascua. <sup>14</sup> Huan cuac ejcoc ya in hora cuac monequi quicuasque ne mohuiscatacualis, ijcuacón Jesús ihuan itanojnotzcahuan motalitoj para tacuasque. <sup>15</sup> Ijcuacón Jesús quinilij ijcuín:

—Desde ne tonal ya semi nicyolnejnectihuitz niiluchihuas namohuan ica nijín mohuiscatacualis de pascua achtopa que nechmictisque. <sup>16</sup> Porín namechilía que



amo nicchihuas oc namohuan nijín mohuiscatacualis den tajyohuilisiluit como amo achtopa Dios quitamichihuas que ma namechyolyecanas ica ichicaucahuelilis.

<sup>17</sup> Huan de ompa Jesús momaaquí se vaso de vino huan quitasojcamachilij Dios. Huan de ompa quinilij imomachtijcahuan ijcuín:

—Xitayican nijín vino huan ximopanoltijtiyacan huan ximotayiltican cada senme de namejuan. <sup>18</sup> Porín namechilía que amo ocsepa nitayis nijín uvasat como amo ocho Dios quitamichihuas de namechyolyecanas ica ihueyichicahualis huan tisenyetinemesque sen nachipa nepa eluiyactzinco.

<sup>19</sup> Huan cuac tami tayicque ya, ijcuación Jesús momaaquí se pantzín. Huan de ompa quitasojcamachilij Dios huan quicojcotonac in pan huan quinxejxelo huilij imomachtijcahuan. Huan Jesús quiniliayaj ijcuín:

—Nijín pan yejua ne nonacayo tenica ixnesis que nictemactiti nonacayo inmaco in tayecanani para nechmictisque huan ijcón niqixtahuati namotajtacoluan. Huan namejuan cuac nijín pan nanquicuasque, ijcuación namejuan nannechelnamictiyasque de nejua nomi quilis.

<sup>20</sup> Huan no ijcón quichihuac Jesús ica in vino. Huan cuac quitamicuajque ya ne mohuiscatacualis, ijcuación Jesús momaaquí ne vaso de vino huan quinilij imomachtijcahuan ijcuín:

—Ica nijín vaso de vino quitenextijtoc ya que nimoyectencauca ya ihuan Notajtzin Dios de que mimilahuis no esyotzin huan nimiquis para ijcón Dios namechtapojpoluis de namotajtacoluan. <sup>21</sup> Huan yetoc nican noixpan se tagat naquen nechtemactis inmaco in tayecanani para nechmictisque. Huan ne tagat tohuan tacuajtoc huan tayitoc campa nijín mesa. <sup>22</sup> Huan namechyequilía que Nejuatzin ni Yectagatzin de Dios huan niyajtoc tech ne ojtzin ten Notajtzin Dios nechnahuatilij ya. Huan no namechilía que semi teicnelti ne tagat naquen nechtemactis inmaco in tayecanani para nechmictisque.

<sup>23</sup> Ijcuación ne imomachtijcahuan peuque motajtajtoltiayaj se huan ocsé ijcuín:

—¿Aconi senme ne tiimomachtijcahuan tictemactisque Jesús Temaquixtijque inmaco in tayecanani?

### **Nican tajtoa de queni imomachtijcahuan de Jesús motajtoltehuiayaj de aconi yesqui in cachi hueyi chiuque inpan yejuan**

<sup>24</sup> Huan imomachtijcahuan de Jesús peuque motajtoltehuiayaj de aconi de yejuan mochihuaquiu cachi hueyi chiuque inpan yejuan. <sup>25</sup> Pero Jesús quinilij ijcuín:

—In chihuanime reyes den tataman paísme, yejuan nojonques quinyecantine-mij ninpueblojcahuan, porín yetocque queme tayecanani. Huan ne tayecanani quinequij quinmachililtijnemisque ninpueblojcahuan den ninchicahualis. Huan no netayecanani quinequij que ninpueblojcahuan ma quijtocan ne nintayecancahuan que yejuan cuali tequihuani. <sup>26</sup> Pero namejuan amo ijcón xicchihuacan. Ta, ne tagat ten cachi hueyi chiuque namotzalan, yejua nojón ma mopohua huan ma motequitilti queme se telpocat san. Huan ne tagat ten tayecantinemi namohuan, yejua nojón ma mochihuaqui que se tetequitilijque. <sup>27</sup> Huan namechtajtoltlía ijcuín: ¿Aconi in cachi hueyi chiuque ne ten motaliti tacuati campa mesa? ¿Xe cachi hueyi chiuque ne ten motalía para tacuati? ¿Oso cachi hueyi chiuque neques de tetamaca? Namechilía que ne ten motaliti tacuati campa mesa, yejua ne in cachi hueyi chiuque. Pero xiquitacan que Nejuatzin nimochihuaco ya se tetequitilijque san namotzalan.

<sup>28</sup> Huan namejuan nanquisentocatihualayaj nannechtoctilitihualajque Nejuatzin tech nochi notajyohuilsuan. <sup>29</sup> Huan ijcón queme Notajtzin Dios nechtennahuatilij ya ma nitayecantinemi, no ijcón Nejuatzin namechnahuatílía que xitayecantinemican namejuan. <sup>30</sup> Huan ijcón huelis namejuan nantacuasque huan nantayisque huan nohuan nantequitisque cuac Nejuatzin nitayecantinemi quiiu ica nochicaucahuelilis. Huan no namejuan nantocotzyetocque campa nochicaucahuelilispan huan nohuan nantayecantinemis que para ijcón nanquinixcomacasque ne majtactiomome tetatme de Israel ihuan nochi in pueblojuani de Israel.

**Nican tajtoa de queniu Jesús Temaquixtijque quitematiltij  
Pedro que yejua quilis amo quixmatis Jesús**

*(Mt. 26.31-35; Mr. 14.27-31; Jn. 13.36-38)*

<sup>31</sup> Huan ijcón Totecotzin quilij Simón ijcuín:

—Tejua Simón, xicaqui que in amocuali Satanás tajtantoc permiso imaco Dios para huelis quiejecos motacuautamatis para ixnesis cox melau titacuautamati nohuan. <sup>32</sup> Pero xicmatican que nimotatautilij ya ihuan Dios de que ma amo xicpoloti motacuautamatis. Huan tejua, cuac timoyolnemilij ya de motajtacoluan, ijcuacán xiquinyolmajxiti motequiticaicnihuan.

<sup>33</sup> Huan Simón quilij Jesús ijcuín:

—Notecotzin, niyecyetoc ya para niyás mohuan, masqui techzacuasque tech in cárcelijtic oso masqui techmictisque.

<sup>34</sup> Ijcuacán Jesús quinanquilij Simón ijcuín:

—Tejua Pedro, nimitzilía que axcan tayohuac achtopa que tzajtzis in piotzin, tejua titeilis expa que amo tinechixmatis.

**Nican tajtoa de que Jesús Temaquixtijque monojnotza ihuan  
imomachtijcahuan de ne morral tominehualoni, huan de machetes**

<sup>35</sup> Ijcuacán Jesús quinilij imomachtijcahuan ijcuín:

—Xiquelnamiquican ne tonal cuac namechtitanic xitequitican. Huan amo nanuiyacque morral nión tominehualoni huan nión no namotegac. ¿Xe namechpoloto tensá?

Huan yejuan quinanquilijque ijcuín:

—Amo teyi techpoloj.

<sup>36</sup> Ijcuacán Jesús ocsepa quinilij ijcuín:

—Pero axcan namechilía que ne naquen quipía imorral, huelis ma cuica, huan no ma cuica itominehualoni. Huan ne naquen amo quipía imachete, ijcuacán yejua ma quínamaca se itaquen huan ma quicohua imachete. <sup>37</sup> Huan nochi ijcón namechilía porín motamichiutiyás nochi ten ijcuiliutoc de Nejuatzin tech in Tajtoltzin de Dios campa Isaías quijtoco ijcuín: “Quipohuasque que Yejuatzin se amocuali tagat”. Ica ya nojón nechtajyohuilitisque. Pues nochi ten ijcuiliutoc de Nejuatzin tech in Tajtoltzin de Dios, nochi quipía que motamichihuas.

<sup>38</sup> Ijcuacán imomachtijcahuan quilijque Jesús ijcuín:

—Totecotzin, nican yetoc ome machetejme.

Huan Yejuatzin quinanquilij ijcuín:

—Ajsij ya nojón ome machetes.

**Nican tajtoa de queniu Jesús Temaquixtisque motatatautilij  
ihuan Dios tech ne xocomila campa monotza Getsemaní**

*(Mt. 26.36-46; Mr. 14.32-42)*

<sup>39</sup> Ijcuacán Jesús quisac de ne nepanacal huan yajqui ajsito campa ne tal lomotzin ten monotza de ne Olivos campa ipa motatatautiliaya. Huan ne imomachtijcahuan quitotilijque Yejuatzin. <sup>40</sup> Huan cuac ajsique ya tech ne xocomila, ijcuacán Jesús quinilij imomachtijcahuan ijcuín:

—Ximotatautilican ihuan Dios para ma in amocuali Satanás ma amo namechyoltanemililti ica tajtacol.

<sup>41</sup> Huan Yejuatzin amo huejca mosecocaahuac de yejuan nican huejcatzin ijción queme cuac se tacuamota ica se tet. Huan ompa Jesús motancuaquetzato huan pehuato motatatautilía inahuactzinco Itajtzin Dios. <sup>42</sup> Huan Jesús quilij ijcuín:

—Notajtzin, tacán ticonmonequiltía, xinechajchihuulis nijín tajyohuilis ten niquiyohuiti ya. Pero ma amo mochihua queme nejua nicnequi. Ta, ma mochihua queme Tejuatzin ticonmonequiltía.

<sup>43</sup> Huan tech nojón momento monextico se ángel den eluiyactzinco para ijción yejua quichicahualismacaya Jesús. <sup>44</sup> Huan Yejuatzin semi tajyohuijtoya. Huan cachi oc motatatautiliaya ihuan Dios huan hasta mijtoniaya. Huan ica por neitajyohuilis ne ineton queme yesquí huejueyi esolol ten huetzía talixco. <sup>45</sup> Huan cuac Jesús motamitatatautilij ya, ijcuacán moquetzac huan yajqui quinitato imomachtijcahuan. Huan mochihuac que quinajsito nochi cojcoctocque porín semi motayocoltiyaj. <sup>46</sup> Huan Jesús quinilij imomachtijcahuan ijcuín:

—¿Queyé namejuan nancojcoctocque? Xiixpetantocan huan ximoquetzacan. Huan ximotatautilican ihuan Dios para ma amo in amocuali Satanás namechyoltanemililtis ica tajtacol.

**Nican tajtoa de queniu in tayecanani judíos  
quitziqtizcoque Jesús Temaquixtisque queme preso**

*(Mt. 26.47-56; Mr. 14.43-50; Jn. 18.2-11)*

<sup>47</sup> Huan queman Jesús tajtojtoya oc ihuan imomachtijcahuan, ijcuacán ejcotihuetzque huel mfac tagayot. Huan ne ten monotza ya Judas, yejua ne quinalyecantihualaya ne tagayot. Ne Judas yejua senme den majtactionome imomachtijcahuan de Jesús. Huan yejua motoquijtiquisac huan de ompa quitennamic Jesús. <sup>48</sup> Ijcuacán Jesús quilij Judas ijcuín:

—Tejua Judas, tinechtemamic ya para ijción tinechtemactiaya inmaco in tayecanani de Nejuatzin ni Yectagatzin de Dios.

<sup>49</sup> Huan neques ten ihuan Jesús quiyehualojtoyaj, cuac yejuan quitacque de toni mochihuati ya, ijcuacán yejuan quitajoltijque Jesús ijcuín:

—Totecotzin, ¿xe ticonnequi ma tiquinmagacan ica tomachetejuan?

<sup>50</sup> Huan ijción senme den imomachtijcahuan de Jesús, yejua ne quinacascocoj itaquehual de ne tayecancatiopixcat huan quicotonilij inacas ten yecmacopaca.

<sup>51</sup> Pero Jesús quinilij imomachtijcahuan ijcuín:

—Xicahuacan ne netehuulis huan amo teyi xicchihuacan.

Huan de ompa Jesús quimatoquili inacas de ne taquehual huan quipajtij. <sup>52</sup> Huan ompa oloch yetoyaj in tayecanani tiopixcame huan in tiopan tayecanani den policía

huan in huehuentzitzin den pueblojuani de Israel. Nochi yejuan hualajque para cuicasque Jesús queme preso. Huan Jesús quintajtolitij ijcuín:

—¿Queyé namejuan nanualajque ica machete huan ica cuohuit para nannechquitzquisque, queme yesquí nejua se nitachtecque san? <sup>53</sup> Huan cuac nejua mosta mosta niyetinemía namotzalan nepa tiopanijtíc, ijcuacón namejuan amo queman nannechquitzquijque. Pero axcan ejcoc in hora de nanquichihuah de ne amocuali chihualis. Huan yequintzin namotech quemiliutoc ya ne chicahualis den amocuali Satanás queme yesquía se tilahuac tayohuayanilot.

### **Nican tajtoa de queniu Pedro quiytoj que amo quixmati Jesús Temaquixtijque**

*(Mt. 26.57-58, 69-75; Mr. 14.53-54, 66-72; Jn. 18.12-18, 25-27)*

<sup>54</sup> Ijcuacón ne tayecanani quiquitzquijque Jesús queme preso huan cuiyacque ichan in hueyi tiopixcat. Huan ne Pedro quihuejcatocotiliaya san ne Jesús. <sup>55</sup> Huan icalteno de ne hueyi tiopixcat quihueyitalijque tit, huan ompa quiyehualojque huan motalitoj. Huan ne Pedro no motalij intzalan de ne mayolme. <sup>56</sup> Huan mochihuac que se tacualchiuque quitac que no ompa tocotzyetoc Pedro mototonijtoc ticonteno. Huan ne sihuat quisenitac in Pedro huan quiytoj ijcuín:

—Nijín tagat Pedro ihuan nentinemía Jesús.

<sup>57</sup> Ijcuacón in Pedro quitatij ten melau huan quinanquilij ijcuín:

—Tejua sihuat, amo melau ten tinechilijtoc. Nejua amo niquixmati aconi nojón Jesús.

<sup>58</sup> Huan cachi satepan ocsé tagat quitac in Pedro huan no quilij ijcuín:

—Tejua no tipoutinemi ihuan ne imomachtijcahuan de Jesús.

Pero in Pedro quinanquilij ijcuín:

—Tejua tagat, amo melau ten tinechilijtoc. Nejua amo nipoutinemi ninuan neimomachtijcahuan de Jesús.

<sup>59</sup> Huan cuac panoc se hora, ijcuacón ocsepa se tagat quiyecmatiltij itequiticaic-nihuan ijcuín:

—Yec melau nijín tagat Pedro ihuan Jesús nentinemía porín yejua no se pueblojcat de Galilea.

<sup>60</sup> Ijcuacón in Pedro ocsepa quinanquilij ijcuín:

—Tejua tagat, amo melau ten tinechilijtoc, hasta amo nicajscamati de toni tinechilijtoc.

Huan tech ne hora cuac tajtojtoya oc Pedro, ijcuacón tzajtzic in piotzin. <sup>61</sup> Ijcuacón in Totecotzin moicancuepac huan quisenixitac Pedro. Ijcuacón in Pedro quelnamic que quiluijca ya Jesús ijcuín: “Axcan achtopa que tzajtzis in piotzin, tejua Pedro, titelis ica expa que amo tinechixmati”. <sup>62</sup> Ijcuacón in Pedro ne calan quistehuac huan mocualancachojchoctito.

### **Nican tajtoa de queniu Jesús Temaquixtijque quiquejquelojque huan quihuitechque in tagayot**

*(Mt. 26.67-68; Mr. 14.65)*

<sup>63</sup> Huan ne taca ten quipixtoyaj Jesús, yejuan nojonques quiquejqueloayaj huan cuitequíaj Jesús. <sup>64</sup> Huan ne taca quixtzajtzacque Jesús ica tilma, huan quitajtolitayaj ijcuín:

—¿Xiquixejeco aconi mitzixtajtatzinitoc?

<sup>65</sup> Huan ne taca cachi oc quihuijuicaltiyaj Jesús ica míac tataman tajtolme.

**Nican tajtoa de queniu cuiyacque Jesús  
Temaquixtijque inixpan in tayecanani judíos**

(Mt. 26.59-66; Mr. 14.55-64; Jn. 18.19-24)

<sup>66</sup> Huan cuac tanesic ya, ijcuación mosentilijque huan mosenixejecoltijque in huehuentzitzin den pueblojuani judíos ihuan in tayecanani tiopixcame huan in tanextiliani den tanahuatil de Moisés. Huan de ompa cuiyacque Jesús inixpan nochi nijín tayecanani. <sup>67</sup> Huan yejuan quitajtoltiayaj Jesús ijcuín:

—Xitechili, ¿que cox melau tejua ya ti Cristo Temaquixtijque?

Huan Jesús quinanquiliij ijcuín:

—Tacán namechilía que ni Cristo Nitemaquixtijque, ijcuación namejuan amo nannechneltoquilisque. <sup>68</sup> Huan no como nejua namechtajtoltsiquía tensá, ijcuación ipa amo nannechnanquilisqueáj huan nión no nannechcajcahuasquía. <sup>69</sup> Pero xicmatican que desde axcan para taixpan Nejuatzin ni Yectagatzin de Dios huan nimotalitui ne iyecmacopaca Totajtzin Dios campa no mochiutoc ichicaucahuelilis.

<sup>70</sup> Ijcuación nochi in tayecanani quisentajtoltijque Jesús ijcuín:

—Ica nijín motajtoluan, quiqtosnequi que tejua tiiconetzin de Totajtzin Dios.

Huan Jesús ocsepa quinanquiliij ijcuín:

—Quema, Niiconetzin de Dios, ijcón queme namejuan nanquijtoaj.

<sup>71</sup> Ijcuación nochi yejuan quijtoayaj ijcuín:

—¿Toni oc monequi ma timatajtanicán? Ta, tejuan ya ticactocque que quijtoa que Yejuatzin iconetzin de Totajtzin Dios.

**Nican tajtoa de queniu Jesús Temaquixtijque  
ajsic iixpan in hueyichiuque Pilato**

(Mt. 27.1-2, 11-14; Mr. 15.1-5; Jn. 18.28-38)

**23** Ijcuación nochi ne tayecanani moquetzque huan cuiyacque Jesús iixpan in hueyi tayecanque romano Poncio Pilato. <sup>2</sup> Huan ompa iixpan Pilato in tayecanani peuque quitejteluillíaj Jesús ica míac tataman huan quiliayaj Pilato ijcuín:

—Tejuan ticajsicque nijín tagat Jesús cuac yejua quincuejmoloaya in topueblojcahuan. Huan nijín tagat no tetacahualtía que ma amo monequi tiquixtahuasque impuestos imaco in hueyi emperador romano. Huan no yejua quijtoa que yejua Cristo Temaquixtijque huan no yejua mopoutinemi queme rey.

<sup>3</sup> Ijcuación in Pilato quitajtoltij Jesús ijcuín:

—¿Xe melau tejua ya tirey den pueblojuani judíos?

Pero Jesús quinanquiliij ijcuín:

—Melau nirey, ijcón queme tiquijtoa.

<sup>4</sup> Ijcuación in Pilato quinilij in tayecanani tiopixcame huan in tagayot ijcuín:

—Nejuatzin ayamo teyi nicajxilía tajtacol ipan nijín tagat.

<sup>5</sup> Pero ne tayecanani cachi oc quiyequiliayaj Pilato ijcuín:

—Nijín tagat quincuejmolojtinemi ica nitamachtilis topueblojcahuan nican Judeacopaca. Huan itequiu hualehuac ne Galileacojpaca huan hasta ejcoco nicahuín Jerusalén.

**Nican tajtoa de queniu Jesús Temaquixtijque  
cuiyacque iixpan in tequihua Herodes**

<sup>6</sup> Cuac Pilato quicayic que Jesús pehuac itequiti campa Galileajcopaca, ijcuacón matajtanic cox Jesús yejua catca pueblojcat de Galilea. <sup>7</sup> Huan cuac Pilato cajsicatic que Jesús catca pueblojcat de Galilea campa Herodes taquitzquijtoc queme tayecanque, ica ya nojón Pilato quititanic Jesús imaco Herodes ten no moajsía ompa Jerusalén tech nojón tonalme. <sup>8</sup> Huan cuac in Herodes quitac ya in Jesús, ijcuacón yejua moyolpactij porín ipan m'ac tonalme semi quinequía quitas Jesús. Huan Herodes ipa quinequía quinojnotzas Jesús porín Herodes quitecaquiliayaj den itequiu Jesús. Huan no Herodes quinequía quitas que Jesús ma quichihua se mohuiscatequit iixpan. <sup>9</sup> Huan in Herodes quitatajtoltiaya Jesús ica m'ac matájtanti. Pero Jesús amo teyi ica quinanquiliaya.

<sup>10</sup> Huan ompa iixpan in Herodes yetoyaj ne tayecanani tiopixcame huan ne tanextiliani den tanahuatil de Moisés. Huan nochi yejuan quiteteluiliayaj Jesús ica m'ac yolchicahualis. <sup>11</sup> Ijcuacón in Herodes ihuan isoldados, yejuan peuque quimohuispoloayaj Jesús huan quiquejqueloayaj. Huan no quitaquentijque Jesús ica se cuajcualtzin tilma den rey. Huan de ompa in Herodes ocsepa quititanic Jesús imaco in Pilato. <sup>12</sup> Huan nojón tonal in Pilato huan Herodes moyoltalijque se huan ocsé, porín achtopa mocualantijtinemíaj se huan ocsé.

**Nican tajtoa de queniu Jesús Temaquixtijque quitelchiuque ma quimictican**

*(Mt. 27.15-26; Mr. 15.6-15; Jn. 18.39—19.16)*

<sup>13</sup> Ijcuacón in Pilato ocsepa quinsentilij in tayecanani tiopixcame huan in tiopan tequihuani huan in pueblojuani de Jerusalén. <sup>14</sup> Huan in Pilato quinilij ijcuín:

—Huan namejuan nannechualcuilijque nijín tagat Jesús. Huan no nannechilicoj que yejua ay quincuejmolojtinemi topueblojcahuan. Pero Nejuatzin nictatajtoltij ya nijín Jesús namoixpan ica m'ac matájtanti, huan ayamo teyi nicajxilij tajtacol nijín tagat tenica namejuan nanquitejteluilfaj. <sup>15</sup> Huan xicmatican que in Herodes amo no teyi cajxilij tajtacol nijín tagat. Ica ya nojón ocsepa techualtitanilij. Huan axcan xicmatican que nijín Jesús amo quichihuac tajtacol ten cuica miquilis. <sup>16</sup> Ica ya nojón nejua sayó nicuitequis huan de ompa nicajcahuas ma yohui.

<sup>17</sup> Porín tech nojón iluitonal ipa ijcón mohuica in Pilato de que quicajcahuas se tagat preso ijcón queme in pueblojuani quinequíaj. <sup>18</sup> Huan tech nojón momento nochin pueblojuani chicauca tzajtzíaj huan quijtoayaj ijcuín:

—Xicalanquixtican nijín tagat ma quimictiti. Huan ticnequij xicajcahua yejua in Barrabás ma yohui.

<sup>19</sup> Huan ne Barrabás quitzacuacque cárcelijtic porín yejua temictijque huan porín yejua no ay moixnamictinemía ihuan nisoldados in tayecanani de Jerusalén. <sup>20</sup> Pero in Pilato quinequía quicajcahuas Jesús ma yohui huan ijcón quinnojnotzac tagayot ocsepa. <sup>21</sup> Pero in pueblojuani cachi oc quichicaucijtoayaj ijcuín:

—Xicuoupampilocan, xicuoupampilocan nojón Jesús.

<sup>22</sup> Huan de ompa ica expa in Pilato quinilij in pueblojuani ijcuín:

—¿Toni tajtacol quichihuac nijín Jesús? Porín nejuatzin ayamo teyi nicajxilía tajtacol ten cuica miquilis. Ica ya nojón nejua sayó nicuitequis huan de ompa nicajcahuas, ma yohui.

<sup>23</sup> Pero ne pueblojuani cachi oc quiyequiliayaj huan quitzajtziiliayaj que ma quicuoupampilocan ne Jesús. Huan ne pueblojuani huan tayecanani tiopixcame, yejuan nojonques cachi oc quitzajtziiliayaj Pilato hasta que quitaneltoctijque que ma quimictilican Jesús. <sup>24</sup> Ijcuacón in Pilato quitelchihuac Jesús ma quimictican ijcón queme quinectoyaj in pueblojuani huan in tayecanani judíos. <sup>25</sup> Ica ya nojón Pilato quicajc-ahuac ne Barrabás ne ten temectijque huan ten ay moixnamictinemía ihuan isoldados in tayecanani de Jerusalén. Huan ijcón quichihuac Pilato porín ijcón in pueblojuani intanejnequillis ma mochihua. Huan no Pilato quitemactij Jesús inmaco in pueblojuani para ma yejuan quichihuilican Jesús ijcón queme yejuan quinequíaaj.

### **Nican tajtoa de queniu quicuoupampilojque Jesús Temaquixtijque**

*(Mt. 27.32-44; Mr. 15.21-32; Jn. 19.17-27)*

<sup>26</sup> Huan cuac Jesús cuicatoyaj ya para quicuoupampilotij, ijcuacón quinamicque se tagat ten monotza Simón ten pohúa campa pueblo Cirene. Huan ne Simón hualaya motoquijtihuaya para ajsis Jerusaléncopaca. Huan in soldados quimamaltijque Simón ma cuica ne colotzin. Huan ijcón yejua quimamaltiyá ne colotzin huan quitoctiliaya Jesús.

<sup>27</sup> Huan no huel míc pueblojuani quitoctiliayaj Jesús. Huan no míc sihuame yayaj huan chocatiayaj ica por ne Jesús huan tzajtziitiayaj ica hueyi yolcocolis ica por ne Jesús. <sup>28</sup> Ijcuacón Jesús moicancuepac campa hualayaj ne sihuame huan quin- senixitac huan quinilij ijcuín:

—Namejuan nansihuame de pueblojuani Jerusalén. Amo xinechchoquilian. Ta, ximochoctican por namejuan san huan no ximochoctican por ica ne namoconehuan. <sup>29</sup> Huan ijcón namechilía porín namopan ejcos ne tonalme ten cualcui tajyohuilis. Ijcuacón sequin quijtosque ijcuín: “Yolpactocque sihuame ten amo quinpíaj coneme huan yolpactocque neques ten amo queman mopilcuicque. Huan no yolpactocque neques ten amo queman tachichitijtinemij”. <sup>30</sup> Tech nojón tonalme in pueblojuani quinilisque in tepeme ijcuín: “Namejuan nantepeme xihuetziquij topan. Huan no namejuan nantallomotzitzin, xitechpechiquij”.

<sup>31</sup> Huan Jesús quiniliaj ica se nexcuitil ijcuín:

—Nejuatzin amo teyi nicpía tajtacol. Huan nicnequi nimonejnehuililtis queme se cuohuit ten cualtzin motaquiltía ica itaquilot ten quinequi quimayohuisque. Huan como Nejuatzin nechmictisque huan amo nitajtacole, ijcuacón ¿toni mochihuas namopan namejuan ten semi nantajtaolejque?

<sup>32</sup> Huan no quinuiyacque ome tachtequini ten ipa quintelchiuque ya para ma no quinmictican ihuan Jesús. <sup>33</sup> Huan cuac ajsitoj ya ne campa motanotza miqetzontecomatan, ijcuacón quicuoupampilojque Jesús ihuan ome taca ten no quintelchiuque. Huan se tachtecque quicuoupampilojque iyecmacopaca huan in ocsé iopochcopaca de Jesús. <sup>34</sup> Huan cuac quicuoupampilojtoyaj Jesús, ijcuacón quijtoj Yejuatzin ijcuín:

—Notajtzin Dios, xiquintapopolui nijín taca porín amo cajsicamatij toni quichiutocque.

Huan ne itilma Jesús quicuicque ne soldados huan quichiuque ne tatanilis para quitasquía de catiyejua tasal de Jesús cuicasquía cada soldado. <sup>35</sup> Huan ompa nochi quitztoyaj in pueblojuani. Huan nochi yejuan den tayecanani judíos quique- queloayaj Jesús huan quijtoayaj ijcuín:

—Ne Jesús quinmaquixtij ocsequin tagayot. Huan como melau yejua in Cristo Temaquixtijque in tajjitaltzin de Dios, ijcuacón ma momaquixti yejua san.

<sup>36</sup> Huan no ijcón quichiuque in soldados de quihuijuicaltiayaj Jesús. Huan ne soldados motoquijque para quitayiltisque Jesús in vinagre. <sup>37</sup> Huan ne soldados quiliayaj Jesús ijcuín:

—Tejua ya, como melau ti rey den pueblojuani judíos, ijcuacón ximomaquixti tejua san.

<sup>38</sup> Huan quitailijque colotzin icuaco se cuohuit campa ijcuiliutoc ica tajtolme de griego huan de latin huan de hebreo. Huan nojón tajcuilol quijtoaya ijcuín: “Nijín tagat, yejua tayecanque den judíos”. <sup>39</sup> Huan senme den tachtequini ten quitelchiuque ma quicuoupampilojca inacastan de Jesús, yejua cachi oc ne quimohuipoloaya Jesús huan quiliaya ijcuín:

—Como melau tejua ya ti Cristo Temaquixtijque, ximomaquixti tejua san moselti. Huan tejuan no xitechmaquixti.

<sup>40</sup> Pero in ocsé tagat ten no quicuoupampilcatoc ya, yejua ne quitacahualtij in ocsé huan quiliij ijcuín:

—¿Queyé tejua amo ticyolmohuilía Totajtzin Dios? ¿Huan amo no timoyolnemilía de motajtacoluan? Porín tejua no titatelchihual ya huan mitzmictisque porín mitznamiqui. <sup>41</sup> Huan tejuan hueyi melau quinamiqui ma tiquijyohuican nijín tajyohuilis ten topan yetoc ya porín ticchiuque ten amo cualtía. Ica ya nojón monequi timiquisque. Pero nijín tagat Jesús amo teyi tajtacol quichihuac.

<sup>42</sup> Ijcuacón yejua quiliij Jesús ijcuín:

—Tejua Jesús, xinechonelnamiqui ne tonal cuac tejua ticonselitu ya in tanahuatli de mohueyichicahualis imaco Totajtzin Dios.

<sup>43</sup> Ijcuacón Jesús quinanquiliij ijcuín:

—Yec melau ten nimitzilía que axcan nohuan tiyetotiu ne eluiyactzinco campa Dios tayecantica.

### **Nican tajtoa de que Jesús Temaquixtijque momiquilij**

*(Mt. 27.45-56; Mr. 15.33-41; Jn. 19.28-30)*

<sup>44</sup> Huan nepa queme nepanta ya, ijcuacón sepan san tayohuayantic tech nochi in semanahuac huan tayohuayantitoya hasta eyi hora de tiotac. <sup>45</sup> Huan in tonaltzin nochi pojpolihuic imeyoyo huan mocahuac tayohuayanijtic. Huan ne tasal ten pilcatoya ne hueyi tiopanijtic campa in altar, yejua ne itzayanic sen tatajco. <sup>46</sup> Ijcuacón Jesús chiscaucatzaizic huan quijtoj ijcuín:

—Notajtzin Dios, nimotemactía momacotzinco, xiconseli notalnamiquilis.

Huan cuac quitamiijtoj ya nijín tajtol, ijcuacón Yejuatzin momiquilij. <sup>47</sup> Huan cuac ne tayecanque soldado quitac ya toni mochihuac, ijcuacón yejua quimohuistilij Totajtzin Dios huan quijtoj ijcuín:

—Yec melau nijín tagat Jesús yejua yolchipaucatagat catca.

<sup>48</sup> Huan míac pueblojuani ompa taixpan yetoyaj huan quitztoyaj ya de que toni mochiutoc. Huan cuac yejuan mocuepteuque huan yayaj para Jerusalén, ijcuacón moelmajmagayaj porín quiyolmachiliayaj de toni mochihuac. <sup>49</sup> Pero ompa yetoya míac tagayot ten Jesús ihuan moixmatíaj huan no miacque sihuame ten quipalehuijtinemíaj Jesús desde cuac hualehuac Jesús campa Galileajcopaca. Huan nochi nojonques mocauque campa Jesús huan tachixtoyaj de huejca san.



### Nican tajtoa de queniu Jesús Temaquixtijque quitalpachojque

(Mt. 27.57-61; Mr. 15.42-47; Jn. 19.38-42)

<sup>50</sup> Huan tech ne tonal yetoya se tagat ten monotzaya José; yejua se pueblojcat de Arimatea de itatilanal Judea. Huan yejua se yelmelaucatagat huan se yolcuali tagat. Yejua no catca se tayecanque den pueblojuani de Israel. <sup>51</sup> Huan nijín José ipa quichixtoya ne tonal cuac Dios momasoutos ica ihueyichicahualis para quinyolyecanas in pueblojuani de Israel. Huan ne José amo semi tehuan moyectencahuac ihuan ne tayecancaicnihuan ten yejuan quichiutoyaj. <sup>52</sup> Ica ya nojón ne José quitato in tayecanque Pilato huan quitajtanilito ma quimactili inacayo Jesús. <sup>53</sup> Huan de ompa José quitemohuito inacayo Jesús itech in cruz, huan quitetziloy ica se hueyi tilma. Huan ne José cuiyac inacayo Jesús huan quicalaquito campá se hueyi tecoyoc ten tamachijchiu campá ayamo aquen quinalcalaquiayaj. <sup>54</sup> Huan ne tonal tiotac ya nochi in pueblojuani monequía moyectatalisque para imostica ne tonal de nesehuilis cuac quichihuj ne tajyohuilis iluit. Huan ne iluitonal ejcotoya ya in momento de pehuas.

<sup>55</sup> Huan ne sihuame ten quipalehuijtinemíaj Jesús desde ne cuac hualeuque Galileajcopaca, yejuan nojonques yajque quihuejcatocotilijque in José para quitasque can yetoc in tecoyoc huan para quitasque queniu quinalcalaquijque in inacayo Jesús. <sup>56</sup> Huan cuac ne sihuame hual mocuepatoj ya huan calaquicoj ninchan, ijcuacán yejuan quinsentilijque sequi polmada para quiojxilisque in inacayo Jesús para ma amo semi tzojya inacayo de Jesús. Huan de ompa yejuan mosehuijque tech nojón tonal de nesehuilis, ijcón queme tenahuatía in tanahuatil de Moisés.

### Nican tajtoa de queniu Jesús Temaquixtijque panquisac voltoc intzalan in ánimajme

(Mt. 28.1-10; Mr. 16.1-8; Jn. 20.1-10)

**24** Huan tech ne tayecanque tonal de semana, yejua ne ten axcan domingo, cuac semi cualcan oc, ijcuacán ne sihuame yajque campá netecoyoc cuicayaj ne ajuiyacayot ten quichijchiuque ya. Huan no ocsequin sihuame quinehuicayaj. <sup>2</sup> Huan cuac ajsicque ya, ijcuacán quitacque ne tet tenica quitentzacuacque in tecoyoc ipa quinacastanolauque ya. <sup>3</sup> Ica ya nojón yejuan calacque tech in teyococ, pero amo cajsique inacayo de Totecotzin Jesús.

<sup>4</sup> Huan ne sihuame quimoucaitayaj ten mochihuac huan amo quimatíaj toni quichihuasque oc. Ijcuacán moquetztihuetzicoj ome taca inixpan de ne sihuame ten nintilma semi istac huan pepetacaya. <sup>5</sup> Huan ne sihuame semi moyolmoutijtoyaj huan moixacatentocaya talixco. Ijcuacán ne ángeles quinilijque in sihuame ijcuín:

—¿Queyé namejuan ay nanquitemojtinemij intzalan in ánimajme in Jesús? Ta, Yejuatzin yoltinemi axcan. <sup>6</sup> Xicmatican que axcan Jesús amo nican yetoc oc. Ta, Dios quipanquixtij ya yoltoc intzalan in ánimajme. Huan xiquelnamiquican san ten namechilijca ya Jesús ne achtopa cuac namohuan yetinemía oc ne Galileajcopaca. <sup>7</sup> Huan ne Jesús namechilijca ijcuín: “Semi monequi que Nejuatzin ni Yectagatzin de Dios ma nechtemactican inmaco ne taca ten amo yolcualime. Huan ma nechcuoupampilocan huan ipan eyi tonalica nipanquisas niyoltoc intzalan in ánimajme”.

<sup>8</sup> Ijcuacán ne sihuame quielnamicque ya de ne nitajtoluan ten quinilijca ya Jesús. <sup>9</sup> Huan cuac quisteuque den ne tecoyoc huan yajque Jerusaléncopaca ya, ijcuacán

ne sihuame nochi quintapohuitoj ne majtactionse imomachtijcahuan de Jesús. Huan no cachi oc quintapohuitoj in ocsequin taneltocani. <sup>10</sup> Huan nijín sihuame ten quintapohuitoj itanojnotzcahuan de Jesús, yejuan nojónques in María Magdalena, huan in Juana huan in María ten inan Jacobo, huan ocsequin sihuame. <sup>11</sup> Huan imomachtijcahuan de Jesús quixejecoayaj que mijmiquiloyot san ne ten quitapohuiayaj in sihuame. Huan ijcón yejuan amo ipa quineltoaque. <sup>12</sup> Pero in Pedro calan quiste-huac huan motalojteu hasta ajsito campa ne tecoyoc. Huan cuac yejuan naltachíac, ijcuacón quitac ne tilma seseco huetztoc ya. Huan de ompa nimampa yajque ichan huan quimoucanemilijtiaya de toni mochihuac.

**Nican tajtoa de queniu Jesús Temaquixtijque monextij inixpan ome imomachtijcahuan tech in ojti ten yajtoc campa pueblo Emaús**

*(Mr. 16.12-13)*

<sup>13</sup> Huan tech ne tayecana tonal, ne ten axcan domingo, ome imomachtijcahuan de Jesús yayaj campa ojti ten yajtoc para Emaús. Nican huejca quipiaya majtactionsé kilómetro de Jerusalén hasta Emaús. <sup>14</sup> Huan nojón omen monojnotztiayaj ica nochi ne ten mochihuac. <sup>15</sup> Huan mochihuac que cuac yejuan san monojnotztiayaj huan motajtoltentehuijtiyáj yejuan san, ijcuacón motoquico huan quinajsico Jesús huan ijcón Yejuatzin ihuan nejnentiaya. <sup>16</sup> Huan ne ome masqui quitayaj Jesús, pero amo quimatíaj aconi yejua. Porín Totajtzin Dios ayamo quinajsicamatiltij que nijín in Jesús Temaquixtijque. <sup>17</sup> Ijcuacón Jesús quintajoltij ne omen ijcuín:

—¿Toni nojón tenica nanmotajoltenuijtiyohue tech nijín ojti? ¿Huan queyé namejuan nanyoltayocoyaj?

<sup>18</sup> Huan ijcuacón senme de yejuan ten monotza Cleofas, yejua ne quinanquilij ijcuín:

—Huan nochi in pueblojuani cuali quimatque ya toni mochihuac ne Jerusalén tech nijín tonalme. Huan tejua que tipueblojnemito ya ne Jerusalén, ¿huan amo ticmati nijín ten mochihuac?

<sup>19</sup> Ijcuacón Jesús quintajoltij ocsepa ijcuín:

—¿Toni mochihuac de ne Jerusalén?

Huan ne taca quinanquilijque ijcuín:

—Xicmati de toni ipan mochihuac ne Jesús de Nazaret. Yejuatzin catca se tanahu-atijque de Dios huan yejua quinextijtinemía hueyi chicahualis tech nochi nichihualisuan huan tech nochi nitajtoluan ijcón queme iixpantzinco Dios huan inixpan pueblojuani. <sup>20</sup> Pero ne tayecanani tiopixcame huan totequihuajcahuan, yejuan nojonques quitemactijque Jesús ma quitelchihuacan huan ma quicuoupampilocan. <sup>21</sup> Huan tejuan ticchiayaj que ne Jesús, Yejuatzin yesquía in Temaquixtijque ten hualasquía para techajchihuasquía inmaco in tayecanani romanos nochi tejuan tipueblojuani de Israel. Huan amo yequin mochihuac de que momiquilij ya. Ta, quípía eyi tonal ya ten quimictijque Jesús. <sup>22</sup> Huan sequin sihuame ten taneltocaj queme tejuan, yejuan nojonques techmoucacalaquijque porín yejuan yajcay campa ne tecoyoc achtopa que tanesic. <sup>23</sup> Huan ompa yejuan amo cajsicque inacayo Jesús. Ica ya nojón yejuan techilicoj de toni mochihuac huan no techilicoj que yejuan quinitacque sequin ángeles. Huan ne ángeles quinilijque in sihuame que Jesús ocsepa yoltinemi. <sup>24</sup> Huan cachi satepan sequin totequíticaicnihuan no yajque campa

ne tecoyoc huan melau amo teyi cajsicque. Huan no quitacque ijcón queme in sihuame techilijcaj ya.

<sup>25</sup> Ijcuación Jesús quinilij ne omen ijcuín:

—Semi nanyolpícticque huan semi nantanejnematini san para nanquineltocasque nochi ten in tanahuatiani de Dios namechiluijque ya. <sup>26</sup> ¿Xe amo melau que in Cristo Temaquixtíjque semi monequi ma tajyohui nochi tajyohuilis ten namechiluijque in tanahuatiani de Dios? Huan satepan cuac Cristo quitamijyohuis ya, ijcuación quipías de calaquitiu nepa tacualtzincan para tayecantinemis ne eluiyactzinco.

<sup>27</sup> Ijcuación Jesús pehuac quinajsicamatiltij ne imomachtijcahuan nochi in Tajtoltzin de Dios campa tajtoa de Cristo Temaquixtíjque. Huan pehuac quinnextilíca in Tajcuilolamatzin ten quichi huac Moisés hasta ne tajcuilolamame ten quijcuilojque ne ocequin tanahuatiani de Dios. <sup>28</sup> Huan cuac ajsicque ya tech in pueblo Emaús campa ipa monequía ajsisque, ijcuación Jesús quinilij que yejua quisentocati oc tech in ojti. <sup>29</sup> Pero ne ome quitatautijque que ma mocahua oc ninuan, huan quiniliayaj Jesús ijcuín:

—Ximocahua nican tohuan porín semi tiotac ya huan niman tayohuayantiti.

Ijcuación Jesús calaquic tech in pueblo de Emaús para inuan mocahuas ne omen imomachtijcahuan. <sup>30</sup> Huan mochihuac que cuac sentacujtocque oc, ijcuación Jesús momaaquij se pantzin. Huan de ompa quitiuchi huac huan quicojcotonac in pan huan quinmajmactij ne imomachtijcahuan. <sup>31</sup> Huan tech nojón momento Dios quinajsicamatiltij ne ome de toni mochiutoc huan ijcón yejuan quixmatque ya que Yejuatzin in Jesús Temaquixtíjque. Pero Jesús nimantzin majchihuac huan amo quitacque oc ninixpan. <sup>32</sup> Ijcuación yejuan moliayaj se huan ocsé ijcuín:

—Huan melau que semi tiyolpactihualayaj tech in ojti huan ticyolmachiliayaj que Dios techyolnojnotztoyaj cuac in Jesús technojnotztihualaya huan techajsicamatiltijhualaya den Tajtoltzin Dios.

<sup>33</sup> Huan tech nojón hora ne ome moijsiucquetzteuque huan yajque ocsepa Jerusalénjcopaca. Huan ompa quinajsito senyetocque ne majtactionsé itanojnotzcahuan ihuan nochi nitaneltoaicnihan. <sup>34</sup> Huan ijcón miacque quinilijque ne ome ijcuín:

—Yec melau que Totecotzin panquisac ya voltoc intzalan in ánimajme. Porín Yejuatzin monextij iixpan in Simón.

<sup>35</sup> Ijcuación ne ome peuque quintapohuiyayaj nochi ten mochihuac tech ne ninopan huan no quintapohuijque de queniu quixmatque Jesús cuac Yejuatzin quincocotonilij in pantzin.

### **Nican tajtoa de queniu Jesús Temaquixtíjque monextico inixpan imomachtijcahuan**

*(Mt. 28.16-20; Mr. 16.14-18; Jn. 20.19-23)*

<sup>36</sup> Huan cuac monojnotzayaj oc ne miacque imomachtijcahuan, ijcuación in Jesús monextijthuetzico inixpan huan quilij ijcuín:

—Xicpiacan yolsehuilis.

<sup>37</sup> Pero yejuan mohueyiyolmoutijque huan quitetzaucaitayaj porín yejuan quiyolnemiliayaj que xa quitztoyaj se ánima. <sup>38</sup> Ijcuación Jesús quinilij ijcuín:

—¿Queyé namejuan nanmomoucacuatapololtijque? Huan, ¿queyé no semi nantanemilíaj elihuis? <sup>39</sup> Xiquitacan nomahuan huan nometzuan. Nejuatzin ya ni

Jesús. Xinechmajmachilican huan xinechitacan. Porín xicmatican se ánima amo quipía nacat nión iomiyohuan. Pero Nejuatzin nannechitilijtocque nonacayo huan noomiyohuan.

<sup>40</sup> Huan cuac Jesús quintamiilij nijín tajtol, ijcuacán Yejuatzin quinextilij ya imomachtijcahuan nimahuan huan nimetzuan. <sup>41</sup> Huan masqui moyolpactiayaj huan quitetzaucaitayaj ten mochihuac pero ayamo quiyecneltocayaj que cox yejuatzin ya in Jesús. Ica ya nojón Jesús quinilij ijcuín:

—¿Xe nancompíaj tensá para ticuasque?

<sup>42</sup> Ijcuacán yejuan quimactilijque Jesús tzictzin pescado nacat ten tatehuatz huan no quimactilijque tzictzin necti. <sup>43</sup> Huan ijcón Jesús quicuic huan quitamicuaj inixpan. <sup>44</sup> Huan de ompa Jesús quinilij ocsepa ijcuín:

—Huan cuac namohuan niyetinemía oc, ijcuacán namechnojnotztoya ica nijín tajtolme que semi monequi ma motamichihua nochi in tajtolme ten Nejuatzin notechcacopaca ijcuiliutoc tech in Tajtoltzin de Moisés. Huan no monequi ma motamichihua ten quijcuilojque in huejcautanahuatiani de Dios huan no ten ijcuiliutoc tech in Salmos.

<sup>45</sup> Ijcuacán Jesús quintamachilistapoj imomachtijcahuan. Huan de ompa yejuan cajsicamatque ya nochi ne nintajcuiloluan den ne tanahuatiani. <sup>46</sup> Huan no Jesús quinilij ijcuín:

—Nocnihuan, ijcón queme ijcuiliutoc tech in Tajtoltzin de Dios que Nejuatzin ni Cristo Temaquixtijque, semi monequi nitajyohuis huan nimiquis. Huan no monequi que nipanquisas niyoltoc intzalan in animajme ipan eyi tonalica. <sup>47</sup> Huan no monequi que namejuan xitanojnotztinemican ica in chicahualis de notocaytzin ipan nochi semanahuac. Huan xicpehualtican namotequiu desde nican Jerusalén. Huan xiquilican nochi in talticpacuani que monequi moyolnemilisque de nintajtacoluan para ijcón Dios quintapojpoluis. <sup>48</sup> Porín namejuan nochi nanquitacque ya nijín ten nopan mochihuac. <sup>49</sup> Huan xicmatican que namechualtitanilis ne Yecticatzin Espíritu ten Notajtzin Dios namechtenilijca que namechualtitanilis. Pero namechilía que ximocahuacan nican pueblo de Jerusalén huan xicchiati hasta ne tonal cuac mohualucas in Yecticatzin Espíritu den eluiyactzinco huan ijcón namechquemilos ica yolchicahualis de Yejuatzin.

### **Nican tajtoa de queniu Jesús Temaquixtijque moajocuic huan yajqui eluiyactzinco**

*(Mr. 16.19-20)*

<sup>50</sup> Ijcuacán Jesús quinuiyac imomachtijcahuan huan yejuan quisque huan yajque hasta caltempan den pueblo Betania. <sup>51</sup> Huan ijcón Yejuatzin momaajocuic huan quitatautij Dios ma quintiochihua imomachtijcahuan. <sup>52</sup> Huan mochihuac que cuac quintiochihua ya, ijcuacán Jesús pehuac moajocuic de yejuan. Huan Totajtzin Dios quiajocuic huan cuiyac eluiyactzinco. <sup>53</sup> Huan cuac imomachtijcahuan quitamimohuistilijque ya Dios, ijcuacán yejuan mocuepque huan yajque ica mías yolpaquilis huan ajsitoj tech pueblo Jerusalén. Huan ompa quisentocayaj yayaj tech ne hueyi tiopan de judíos campa quimohuistiliayaj huan quihueyichihuayaj Totajtzin Dios. Ma ijcón mochiuti. Amén.

## ITATITANIL DE CRISTO, YEJUA IN SAN JUAN TEN QUIJCUILOJ NIJÍN YANCUIC TAJTOLTZIN DE DIOS TEN CUALCUI NE NEMAQUIXTILIS

### Nican tajtoa de ne Tajtoltzin de Dios ten mochihuaco tagat

**1** Huan cuac ayamo tzinpehuaya in talticpac, ijcuacón ipa voltinemi in Tajtoltzin de Dios. Huan ne Tajtoltzin ipa yetinemi iixpantzinco Totajtzin Dios. Huan ne Tajtoltzin Yejuatzin ne no catca Dios. <sup>2</sup>Huan ne Tajtoltzin nentinemi iixpantzinco in Totajtzin Dios achtopa que tzinehuasquía nijín talticpac. <sup>3</sup>Huan in Totajtzin Dios nochi quichijchihuac nican talticpac ica ne ichicahualis den Cristo Itajtoltzin de Dios. Huan amo teyi ongac nican talticpac como amo Yejuatzin in Tajtoltzin quichijchihuac. <sup>4</sup>In Tajtoltzin Yejuatzin ne quipixtoc imaco nochi chicahualis para quitemacas nemilis. Huan Yejuatzin quitemaca nemilis huan ne nemilis yejua ne se tanex ten quinyoltahuilía in talticpacuani. <sup>5</sup>Huan ne tanextzin teyoltahuilía campa ne tayohuayanilot den tajtacol, huan ne tayohuayanilot amo huelis quisejsehuis ne tanextzin.

<sup>6</sup>Huan se tonal Totajtzin Dios quijitac se tagat monotza Juan huan tatitanic ma yolico nican talticpac, huan Dios quihualtitanilij ma quichiutinemi nitequiu. <sup>7</sup>Huan in Totajtzin Dios quinahuatilij que Juan ma tetapohuijtinemi huan ma tanojnotztinemi ica por ne tanextzin para ma xiyecajsicaneltocacan in talticpacyetoni de ne tanextzin ten teyoltahuilía. <sup>8</sup>Huan in Juan amo catca ne tanextzin. Ta, Juan sayó queme se tanojnotzque quinnextilijtinemía in talticpacuani de aconi ne tanextzin.

<sup>9</sup>Huan ne yec melau tanextzin, yejua ne ica quinyoltahuilijtihualaya nochi in talticpacuani ten ejcotihualayaj nican talticpac. <sup>10</sup>Huan ne tanextzin Yejuatzin in Jesús Temaquixtijque ten huala nemico nican talticpac. Pero miacque in talticpacuani amo quixmatque, masqui Totajtzin Dios quichijchihuac nijín talticpac ica por yejua ichicahualis ne Yejuatzin in Tajtoltzin. <sup>11</sup>Huan masqui huala Jesús Temaquixtijque nican talticpac campa itaaxcayan huan campa ipueblojchahuan, pero in talticpacuani amo quiselijque nitanojnotzalis ten quinalcuilij Jesús. <sup>12</sup>Pero ocsequin, quema, quiselijque nitajtoltzin de Jesús huan no ihuantzin tacuautamatque tech in chicahualis den nitocaytzin. Huan nochi neques ten ihuantzin tacuautamati-que, yejuan nojonques in Jesús Temaquixtijque quinmactilij tanahuatil para ma yejuan pohuican ihuan Totajtzin Dios queme teconejuan. <sup>13</sup>Huan nojonques ten ihuantzin Jesús tacuautamatque, yejuan nojonques yec melau mochihuacoj teconejuan den Totajtzin Dios, pero amo porín ijcón yolicoj nican talticpac. Huan amo no mochihuacoj iconejuan Totajtzin Dios ijcón queme cuac se tetat quiniscaletía iconejuan. Huan amo no mochihuacoj iconejuan Totajtzin Dios porín se tagat huan se sihuat de nitanejnequilis san. Ta, yejuan mochihuacoj teconejuan de Dios sayó porín Yejuatzin quimonequiltij quinyancuicayolitía.

<sup>14</sup>Huan ne Jesús Temaquixtijque ten quitocaytíaj Tajtoltzin, Yejuatzin mochihuaco tagat nican talticpac; huan ne Tajtoltzin nentinemía tohuan sequi tonalme. Huan itech Jesús yejua ne Tajtoltzin tiqutilijque que Yejuatzin tanextilijtinemía ica ne teicnelilis, huan itech Yejuatzin no ticajxilijque tajtolme den yec melau. Huan cuac Yejuatzin nemic tohuan, ijcuacón tiqutilijque ne ichicahualilis; huan ne chi-

caucahuelilis Totajtzin Dios quimautilij iyojtzin Conetzin. <sup>15</sup> Huan ijcón ne Juan Taahuijque quitetatohuiltiaya Jesús huan quiniliaya in tagayot ijcuín:

—Nijín Jesús Yejuatzin achtopa ya namechtapohuiaya cuac nejua namechiliaya ijcuín: Ne ten hualajtoc nimampa de nejua, Yejuatzin ya ne cachi hueyi chiuque huan que nejua, porín Yejuatzin ipa yoltinemi ne achtopa ya que nejua niyolisquía.

<sup>16</sup> Huan tinochi ticselijtinenque ya nochi tataman tapalehuilis ten hualehua itech italaniquilis de Cristo. Huan Totajtzin Dios technenepantalilía ojcahi oc iteicnelilis ica por ne Jesús Temaquixtijque. <sup>17</sup> Huan ica por ne huejcautanahuatijque Moisés, ticmaticoj in tanahuatil de Dios. Huan no ticmatij que techajsico ya ne teicnelilis de Dios huan ne yec melau Tajtoltzin de Dios sayó ica por ne Jesucristo.

<sup>18</sup> Huan amo aquen queman acsá quitac Totajtzin Dios. Ta, sayó ne Iyojtzin Iconetzin ten semi moyoltasojtaj ihuan Itajtzin Dios. Huan yejua ne iyojtzin Conetzin hualehuac iixpantzinco Totajtzin Dios huan huala nican talticpac para technextilico quenín tamati Totajtzin Dios.

### **Nican tajtoa de que Juan Taahuijque quitetapohuía de Jesucristo Temaquixtijque**

*(Mt. 3.11-12; Mr. 1.7-8; Lc. 3.15-17)*

<sup>19</sup> Huan in Juan Taahuijque techtapohuía de que in tayecanani judíos de pueblo Jerusalén quinaltitanque sequi tiopixcame huan sequin tapalehuiani den tiopixcame, yejuan ten monozaj Levitas. Huan ijcón yejuan quitajtojtijque in Juan ijcuín:

—¿Aconi tejua? Huan, ¿toni tanahuatil ticualcuitihuitz tejua, Juan?

<sup>20</sup> Huan ijcón in Juan quinyequiliaya, huan amo teyi quintaatiliaya. Ta, quinyecajsicamatiltij ijcuín:

—Pues, nejua amo ni Cristo Temaquixtijque.

<sup>21</sup> Ijcuación ocsepa ne tiopixcame quitajtojtijque in Juan ijcuín:

—Pues, ¿aconi tejua? ¿Xe tejua ya ti Elías, ne tanahuatijque de Dios?

Ijcuación in Juan quinnanquiliij ijcuín:

—Nión no nejua ni Elías.

Huan de ompa ocsepa yejuan quiyectajtojtijque in Juan ijcuín:

—¿Xe tejua ya tihueyitanahuatijque de Dios ten quipía que hualas, Yejuatzin ne Cristo Temaquixtijque?

Huan in Juan ocsepa quinnanquiliij ijcuín:

—Amo no nejua ninetanahuatijque ten quipías que hualas.

<sup>22</sup> Ijcuación in tiopixcame quilijque Juan ijcuín:

—Pues, ¿aconi tejua ya pos? Xitechili porín tejua monequi ticuicasque tensá tajtol para tiquinmaquilisque huan tiquinmatiltisque ne naquen techualtitanque. Pues, ¿xe semi amo tihuelis xitechili aconi tejuatzin?

<sup>23</sup> Ijcuación in Juan quinnanquiliij ocsepa in tiopixcame ijcuín:

—Nejuatzin ya den namejuan nannechactocque ya ica nijín notajtolis huan nitanajnahuatía campa ne taiucan. Huan niquinilijtoc in tagayot ijcuín: “Xicmejmelahuacan se ojtzin campa huelis panos in Totecotzin”. Huan ijcón namechilía porín ipa ijcón quijtojteu ne huejcautanahuatijque Isaías.

<sup>24</sup> Huan no in tamachilejque fariseos yejuan nojonques ipa quinaltitancaj ya nijín tiopixcame para ma quiyectajtojtican in Juan Taahuijque. <sup>25</sup> Ica ya nojón yejuan ocsepa quitajtojtijque in Juan huan quilijque ijcuín:

—Pues, ¿queyé tejua titaahuijtinemi? Como tejua amo tion Cristo, huan como nión ti Elías huan como nión no titanahuatijque de Dios ten quipías de hualas.

<sup>26</sup> Ijcuacón in Juan quinnanquiliij ijcuín:

—Pues melau nejua nitaahuijtinemi ica at san, pero nican yetoc se tamachtijque namotzalan ten amo nanquitaj huan nión no nanquixmatij. <sup>27</sup> Yejua ya ne tamachtijque hualajtoc de nechualtoctilijtoc nimampa de nejua, huan Yejuatzin ipa nentihuitz ya achtopa que nejua niyolis. Huan nejua amo nechnamiqui que ma nictojtomilis ne nimetzuijconca de nitegac, ne naquen nechualtojtocatoc.

<sup>28</sup> Huan nochi nijín mochihuac tech ne lugar campá monotza Betábara ten yetoya ne iquisayampa in tonal den sentapalpa de hueyiat den monotza Jordán, nepa campá Juan taahuijtuya.

### **Nican tajtoa de que Jesucristo Temaquixtijque Yejuatzin ne ichcatzin de Dios**

<sup>29</sup> Huan imostica in Juan Taahuijque quitac Jesús que motoquijtihuala ya campá yejua. Ijcuacón in Juan quinilij in tagayot ijcuín:

—Xiquitacan san, ne huitza ya in tagatzin ten Dios cualtitanic ten tamati queme ichcatzin. Huan ne ichcatzin yejua ya ne quinajchihuilis nintajtacoluan de nochi talticpacuani. <sup>30</sup> Huan namechtopohui ya de ne tagatzin ijcuín: “Nimampa de nejua hualajtoc se tagat huan Yejuatzin ne den semi cachi hueyi chiuque huan nejua amo teyi nichiuque, porín Yejuatzin ipa nentihuitz ya achtopa que nejuatzin nine-misquía”. <sup>31</sup> Huan melau nejua amo no niquixmatía de aconi Yejuatzin; pero axcan niquixmati ya. Ica ya nojón nejua nihuala niquinahuijtihuala ica at para ma ijcón niquinajsicamatilti in pueblojuani de Israel de aconi Yejuatzin.

<sup>32</sup> Huan ijcón in Juan ocsepa quintapohuij in tagayot ten yejua quitac huan quinilij ijcuín:

—Huan nejuatzin niquitac in Yecticatzin Espíritu cuac Yejuatzin hual pantemoaya de ne eluiyactzinco ijcón queme hual temoa se tototzin paloma. Huan no niquitac que calaquito itech ne Jesús. <sup>33</sup> Huan masqui nejua amo niquixmatic aconi ne Jesús, pero ipa Totajtzin Dios nechualtitanic ma nitaahuijtinemi ica at. Huan Totajtzin Dios ipa nechilijca ya ijcuín: “Cuac tiqitas ne Yecticatzin Espíritu que hual temos huan calaquitiu itech se tagat, xicmati que yejua ya ne teojxilijtiyás huan teyolpexontijtiyás ica in chichualis den Yecticatzin Espíritu”. <sup>34</sup> Huan nejua niquitac ya que ijcón mochihuac ipan ne Jesús. Ica ya nojón namechtopohuij de que Jesús yejua ya nijín Teconetzin de Dios.

### **Nican tajtoa den imomachtijcahuan de Jesús ten Yejuatzin achtopa quinijitac**

<sup>35</sup> Huan ijcón ocsepa imostica in Juan Taahuijque ijcatoya monojnotztoya ihuan omen imomachtijcahuan. <sup>36</sup> Huan cuac in Juan quitac que ompa panoaya Jesús Temaquixtijque, ijcuacón Juan quinilij ne imomachtijcahuan ijcuín:

—Xiquitacan san, ne huitza ya in tagatzin ten Dios cualtitanic ten tamati queme ichcatzin.

<sup>37</sup> Huan ijcón cuac in omen imomachtijcahuan de Juan caquilijque ya de nitajtolis de Juan, ijcuacón nojón omen yajque huan quitoctilijque in Jesús para ijcón ma momachtijtiyasque de Yejuatzin. <sup>38</sup> Ijcuacón in Jesús niman mocueptiquisac para tacuitapampa huan quinítac que quitoctiliayaj ne omen imomachtijcahuan de Juan huan Jesús quinilij ijcuín:

—¿Aconi nanquitemojtiyohue?

Huan yejuan quinanquilijque ijcuín:

—Totamachtijcau, ticnequij ticmatisque, ¿can tioncalyetica?

<sup>39</sup> Ijcuación in Jesús quinnanquilij ne omen ijcuín:

—Xihualacan huan xiquitaquij.

Huan ijcón ne omen imomachtijcahuan de Juan melau yajque huan quitacque can calyetoaya in Jesús. Huan ijcón ihuan tiotacque Yejuatzin porín catca ipa queme nahui hora de tiotac ya. <sup>40</sup> Huan in Andrés ihuan ocsé tagaicniu, yejuan nojonques catcaj imomachtijcahuan de Juan huan yejuan quicaquilijque ne itajtolis de Juan. Ica ya nojón yejuan quitoclijque in Jesús Temaquixtijque para ijcón momachtisque de Yejuatzin. Huan ne Andrés, yejua ne catca iicniu de Simón Pedro. <sup>41</sup> Ijcuación in Andrés amo teyi ica quinejematic. Ta, yejua niman yajqui quitemoto ne iicniu Simón Pedro huan quilito ijcuín:

—Tejuan ticajsicque ya ne Mesías —ten quijtosnequi Cristo ne Temaquixtijque.

<sup>42</sup> Huan ijcón in Andrés niman cuiyac iicniu Simón Pedro campa yetoya Jesús. Huan cuac Jesús quitac ya Pedro, ijcuación Jesús quilij ijcuín:

—Tejua ya ti Simón, de titeconeu de Jonás, pero nejua nimitztocaytía Cefas —ten quijtosnequi Pedro (huan no quijtosnequi tet).

### **Nican Jesús Temaquixtijque quinnotzac in Felipe huan in Natanael ma yejuan quitoclican huan ma momachtijtiyacan Yejuatzin**

<sup>43</sup> Huan ijcón ocsepa imostica Jesús quinequic yas nepa Galileajcopaca. Huan cuac yaya ya Galileajcopaca, ijcuación cajsito in Felipe huan in Jesús quilij ijcuín:

—Tiyohue xinechtoctilijti huan ximomachtijti de Nejuatzin.

<sup>44</sup> Huan nijín Felipe pohuía campa ne pueblo de Betsaida campa no calyetoaj in Andrés huan in Pedro. <sup>45</sup> Huan ijcón in Felipe yajqui quitemoto ne Natanael. Huan cuac cajsic ya, ijcuación quilij ijcuín:

—Tejuan ticajsicque ya ne tagat ten monotza Jesús. Huan nijín yejua ya in Jesús den teconeu de José den ipueblo Nazaret. Huan yejua ya nijín Jesús ten ipa Moisés techijcuilohuilijca ya tech nitajcuilolamatzin. Huan no ijcón ne huejcautanahuatiani de Dios, yejuan nojonques techijcuilohuilijteucaj ya de nijín Jesús.

<sup>46</sup> Huan ijcón in Natanael quilij Felipe ijcuín:

—¿Xe timoyolilía que huelis ma acsá quisa yolcuali tech ne pueblo de Nazaret?

Ijcuación in Felipe quinanquilij ijcuín:

—Xihuiqui san huan xiquitaqui.

<sup>47</sup> Huan cuac in Jesús quitac ya que motoquijtihuitz ya in Natanael, ijcuación Jesús quilij ijcuín:

—Nican hualajtoc se tagat ten yec melau yolcuali den pohui ihuan israelitas ne ten melau tacuautamatinemij ihuan Dios. Huan yejua ne amo cuicatinemi tech niyolo nión teyi ne tacajcayahualis.

<sup>48</sup> Ijcuación in Natanael quitajtolitj Jesús ijcuín:

—¿De can tinechonixmatic?

Ijcuación Jesús quinanquilij ijcuín:

—Nejua nimitzitac achtopa que in Felipe mitzonnotzasquía, cuac tejua tiyetoya oc tatampa de se higoscuhuit.

<sup>49</sup> Ijcuación in Natanael quilij Jesús ijcuín:



—Tamachtijque, melau tejuatzin ya ti Teconetzin de Dios, huan tejuatzin titayecanque rey den quinyolyecantinemis in pueblojuani de Israel.

<sup>50</sup> Huan Jesús quilij Natanael ijcuín:

—¿Xe tinechneltoca sayó porín nimitzilij que nimitzitat ne higoscuousampa? Como ijcón ticneltocac de nijín ticaquico, ica ya nojón xicmati que cachi huejueyi oc mohuiscatequit de mías tataman tiquitatu huan que nijín de ticayic ya.

<sup>51</sup> Huan no ijcón in Jesús ocsepa quilij ne Natanael ijcuín:

—Yec melau ten nimitzilífa que tejua tiquitas tapoutoc in eluiyac huan tiquitas ne ángeles taquehualme de Dios tejcotosque huan hual temotosque de ne eluiyactzinco para ma nechpalehuiquihue porín Nejuatzin ni Yectagatzin.

### **Nican tajtoa de se nenamictilis mochihuac campa pueblo Caná de itatilanal ne Galileajcopaca**

**2** Huan cuac panoc ya de eyi tonal, ijcuación mochihuac se iluitonal de ne nenamictilis campu pueblo de Caná de itatilanal ne Galileajcopaca. Huan ne inantzin Jesús no ompa yetoya. <sup>2</sup> Huan no quinejmachtijcaj Jesús ihuan imomachtijcahuan de que ma yacan ne campu nenamictilis. <sup>3</sup> Huan mochihuac que cuac tacuajtoyaj ya, ijcuación tamic ne vino. Huan inantzin Jesús quilij Jesús ijcuín:

—Amo quipíaj oc ne vino.

<sup>4</sup> Ijcuación Jesús quinanquilij inantzin ijcuín:

—Tejua nonantzín, ¿queyé ijcón tinechilía? Porín cuali ticmati que ayamo ejcoc in tonal de notequiu.

<sup>5</sup> Ijcuación inantzín quinilij in tequitini ne naquen quinxejxelojtoyaj ne vino ijcuín:

—Xicchihuacan ijcón queme Yejuatzin namechnajnahuatís.

<sup>6</sup> Huan no mochihuac que ompa yetoyaj chucuasen huejueyi soquiconme, ijcón queme ne pueblojuani judíos quicuíaaj cuac quitacamatíaj ne tanahuatil de ne matequilis. Huan cada se de ne soquiconme aquía queme nahuipoal oso macuilpoal litros de at. <sup>7</sup> Ijcuación in Jesús quinilij ne tequitini ijcuín:

—Xiquinpexontican ica at nijín soquiconme.

Huan yejuan melau ijcón quichiuque quinyepexontijque. <sup>8</sup> Huan de ompa Jesús ocsepa quinilij ne tequitini ijcuín:

—Axcán xiquixtican tzictzin huan xicuiquilican ne naquen tayecancataxelojque de nijín iluit.

Huan in tequitini ijcón quichiuque. <sup>9</sup> Huan ijcón ne tayecancataxelojque de nenamictilis, yejua ne quitenyecoj ne at ten mocuepac ya vino, pero melau yejua amo quimatía de can hualehuac ne vino. Ta, sayó in tequitini quimatque de can cualcuicque ne vino. Huan yejuan quitacque san de can quiquixtijque ne at. Huan ijcón ne tayecancataxelojque de nenamictilis quinzac ne teyoquich ten monamictía ya huan quilij ijcuín:

<sup>10</sup> —Axcán nochí in tagayot achto ma motequili ya ne vino de cachi cuali. Huan de ompa cuac nochí ne naquen tanotzalme ixuitiyasque ya ica ne vino ten cuali, ijcuación ocsepa pehuasque motequilisque ne vino ten de amo semi yec cuali. Pero tejua, titeyoquich, tiqueutoya ya den cachi cuali vino huan hasta axcán titechxelohuilijtoc.

<sup>11</sup> Huan Jesús quichihuac nijín mohuiscatequit tech ne pueblo de Caná campu itatilanal Galileajcopaca. Huan yejua ya nijín ne achtopa mohuiscatequit ten quichi-

huac Jesús. Huan ica nijín mohuiscatequit Jesús quinonnextilij in pueblojuani den hueyi chichahualis de nicualtziyo. Huan ijcón imomachtijcahuan taneltocacque ihuan Yejuatzin. <sup>12</sup> Huan niman cuac motamichihuac ya ne iluit de nenamictilis, ijcuacán yajqui Jesús campa pueblo Capernaum huan no quisehuiyac inantzin huan iicni-huan huan ocsequin imomachtijcahuan. Huan ijcón ompa nochi senyetoyaj se ome eyi tonalme.

**Nican tajtoa de que Jesús Temaquixtisque  
quichijchihuac in cachi hueyi tiopan de judíos**

*(Mt. 21.12-13; Mr. 11.15-18; Lc. 19.45-46)*

<sup>13</sup> Huan ijcón in Jesús yajqui tejcoto huan ajsito tech ne pueblo ne Jerusalén, porín ipa ejcotoya ya ne tonal de tajyohuilis iluit den pueblojuani judíos quichihuayaj. <sup>14</sup> Huan ompa Jesús quinajsito calijitc de ne hueyi tiopan den judíos miacque naquen tanamacatoyaj ica cuacuejme huan ica ichcame huan ica palomas. Huan no quinajsito ocsequin taca tocotzyetocque, huan yejuan quinpatiliayaj in tomin den tagayot. <sup>15</sup> Huan cuac Jesús quitac que ijcón mochiutoc, ijcuacán Yejuatzin quichijchihuac se cuetaxtamalin. Ijcuacán Jesús ica quincalanquixtij de ne hueyi tiopan nochi ne tanamacani huan no ihuan nincuaquejuan huan inichcahuan. Huan nochi ica ne taca ten tominpapatani no ica calancuatamotac; huan nochi nintomin quinmoyahuilij huan quinixcuepiliij ninmesajuan de nojón tanamacani. <sup>16</sup> Huan nochi ne tanamacani de palomas Jesús quinilij ijcuín:

—Niman xiquinajchihuacan nijinques palomas tech nijín tiopan huan amo xicchiutocan ichantzin de Notajtzin Dios queme yesquía se cali campa sayó tanamacaj huan tacohuaj.

<sup>17</sup> Huan ijcón imomachtijcahuan cuac quitacque ya nochi nijín ten quichihuac Jesús, ijcuacán yejuan quelnamicque de ne Tajcuilolamatzin de Dios campa tajtoa de Jesús ijcuín: “Semi nicyolmachilía se chicaucatanenequilis para quenín nicpalehuis niyectatalis ichantzin de Notajtzin Dios”. <sup>18</sup> Ijcuacán in tayecanani judíos quitajoltijque Jesús ijcuín:

—¿Toni mohuiscatequit huelis titechnextilis? Porín tejuan ticnequij que xicchiuati se mohuiscatequit para ijcón ticmatisque cox melau ticpía tanahuatil de Dios.

<sup>19</sup> Ijcuacán in Jesús quinnanquiliij ijcuín:

—Xicuejuelocan nijín tiopan huan ipan eyi tonal nejuatzin nicchijchihuati ocsepa se tiopan yancuic.

<sup>20</sup> Ijcuacán in tayecanani judíos quilijque Jesús ijcuín:

—¿Queyé ijcón tiquijtoa? Ta, nijín hueyi tiopan semi huejcahuac para quitamichijchique nijín tepamit, achá queme omepoal huan chicuasen xihuit. Huan, ¿xe tejuatzin timoyolilía que tejua tihuelis ticchijchihuas ipan eyi tonal?

<sup>21</sup> Pero in Jesús Temaquixtisque tajtoaya de nitacayopan huan monejnehuililtij queme se tiopan. <sup>22</sup> Ica ya nojón cuac Jesús quitapachojcaj ya huan ipan eyi tonal ocsepa panquisac yoltoc intzalan in ánimajme, ijcuacán imomachtijcahuan ocsepa quelnamicque nojón tajtolme ten quinilijca ya Jesús. Ijcuacán yejuan imomachtijcahuan cachi oc quineltocacque in Tajcuilolamatzin huan no quineltocacque in tajtolme ten Jesús quinilijca ya ne achtopa.

### Nican tajtoa de que Jesús Temaquixtijque quinyolojixmatic nochi in tagayot

<sup>23</sup> Huan cuac in Jesús yetoya ne campa pueblo de Jerusalén huan mochiutoya ne tajyohuilis iluit, ijcuacón miacque pueblojuani quineltoquilijque in chicahualis den nitocaytzin de Jesús, porín yejuan quitacque miac tataman mohuiscatequit ten quichihuac in Yejuatzin. <sup>24</sup> Pero Jesús amo yec tacuautamatic ninuan in pueblojuani. <sup>25</sup> Porín Yejuatzin cuali quinyolojixmatic ya in tagayot huan melau Yejuatzin amo monequía oc ma acsá quiliani oc de quenin mohuicajay in pueblojuani. Porín Yejuatzin ipa cuali quinyolojixmatía ya nochi in tagayot.

### Nican Jesús Temaquixtijque monojnotza ihuan Nicodemo, yejua se tamachtijque de judíos

**3** Huan yetoya se tagat tamachile ten no catca fariseo ten monotza Nicodemo, yejua ne no catca se tayecanque den pueblojuani judíos. <sup>2</sup> Huan Nicodemo yajqui quinojnotzato Jesús cuac ne tapoyahuic ya, huan quilito ijcuín:

—Tamachtijque, cuali ticmatij que Dios mitzualtitanic para titechonmachtis. Huan no cuali ticmatij que amo aquen se tagat huelis quitenextis ichicahualis para quichihuas se mohuiscatequit queme tejuatzin ticchihua, tajcón amo ihuan yetica in Totajtzin Dios.

<sup>3</sup> Ijcuacón in Jesús quilij in Nicodemo ijcuín:

—Yec melau ten nimitzilía que monequi ma se yancuicayolis para ijcón huelis se cajsicamatis que Dios quimonequiltis momasoutos ica ne ihueyichicahualis tech se iyolijtic.

<sup>4</sup> Ijcuacón in Nicodemo quitajtoltij Jesús ijcuín:

—Pero, ¿quenín huelis se hueyi tagat ma ocsepa yoli? ¿Xe huelis oc acsá ocsepa calaquis ijcticpac den inantzin para ocsepa ijcón yolis?

<sup>5</sup> Pero in Jesús quinanquilij ijcuín:

—Yec melau ten nimitzilía ocsepa que nochi ne naquen amo yancuicayolis de italnamiqulís ica at huan ica in chicahualis den Yecticatzin Espíritu, yejua ne ijcón amo huelis calaquitiu campa Dios quinyolyecanas itaneltocacahuan ica ihueyichicahualis. <sup>6</sup> Huan ijcón queme in talticpactetatme quiniscaltíaj ninconehuan sayó de nacat san, ma tamatican queme yejuan tamatij, no ijcón in Yecticatzin Espíritu quiniscaltía niconehuan ma tamatican queme Yejuatzin tamati, huan ma cuicacan tech niyolojuan in Yecticatzin Espíritu. <sup>7</sup> Pero amo semi xictetzaucacaqui nijín ten nimitzilía que tejua semi monequi xiyancuicayoli. <sup>8</sup> Porín in ejecat mopipitztinemi nican huan nepa campa yejua quinequi. Huan tejua ticaqui ijcoyocatinemi nican huan nepa, pero tejua amo ticmati can hualehuac in ejecat huan nión no ticmati can yohui. Huan no ijcón mochihua ica nojonques ten yancuicayolque ya ica in Yecticatzin Espíritu.

<sup>9</sup> Ijcuacón in Nicodemo ocsepa quitajtoltij Jesús ijcuín:

—¿Quenín huelis mochihuas nochi nijín ten ticonijtoa?

<sup>10</sup> Pero Jesús ocsepa quinanquilij ijcuín:

—¿Xe tejua amo ticajsicamati nijín ten nimitzilijtoc, porín tejua no titamachtijque ihuan in pueblojuani de Israel? <sup>11</sup> Huan yec melau ten nimitzilía que tejuan tictenex-tilíaj ne ten ticyecajsicamatij. Huan tejuan no tictetapohuíaj nochi ten melau tiquitacque ya. Pero namejuan amo nanquiyecneltoaj ten tamechilíaj. <sup>12</sup> Huan name-

juan, como amo nannechneltoquilíaj in tamachtilis de nican talticpac san tenica namechnojnotztoc, ¿quenín huelis nanquineltocasque como Nejuatzin namechnojnotzasquía ica ne tanextililisme den ne eluiyactzinco? <sup>13</sup> Huan amo aquen tejcoc nepa eluiyactzinco. Ta, sayó Nejuatzin ni Yectagatzin. Huan nejua no nihualpantemoc desde ne eluiyactzinco porín ompa Nejuatzin nipoutoc. <sup>14</sup> Huan Moisés ne huejcautanahuatijque cajocuic ne teposcohuat tech se cuohuit campá ne taiucan. Huan ijcón queme Moisés cajocuic ne teposcohuat campá ne taseltijcan, no ijcón Nejuatzin ni Yectagatzin nechajocuisque huan nechsojsosque campá in colotzin. <sup>15</sup> Ica ya nojón nochi naquen tacuautamatisque nohuan, yejuan nojonques amo queman xpolihuisque oc. Ta, quipiasque ne yec nemilis sen nachipa.

### **Nican tajtoa de ne hueyi tetasojtalis ten Totajtzin Dios quipía para in talticpacuani**

<sup>16</sup> Huan in Totajtzin Dios semi quintasojtac in talticpacuani. Ica ya nojón Yejuatzin cualtitanic Iyojtzin Iconetzin de Dios para ma nochi ne ten ihuantzin tacuautamatisque, yejuan nojonques ma amo xpolihuican. Ta, ma quipiacan ne yec nemilis nachipa. <sup>17</sup> Porín Totajtzin Dios cualtitanic Yejuatzin Iconetzin de Dios nican talticpac amo para quintelchihuas in talticpacuani. Ta, para quinmaquixtis in tagayot. <sup>18</sup> Huan Totajtzin Dios amo quintelchihuas nochi neques ten yec tacuautamatisque tech Yejuatzin de Iteconetzin den Totajtzin Dios. Pero nochi neques ten amo yec tacuautamatisque ihuantzin Yejuatzin, yejuan nojonques yesque tatelchihualme ya porín amo yec tacuautamatque ya tech in chicahualis de toca de Yejuatzin Iyojtzin Iconetzin de Dios. <sup>19</sup> Ica ya nojón inpan in tagayot huetziquiu hueyi tatza-cuilitis de Dios. Porín cuac Yejuatzin huala nican talticpac queme se tanextzin, ijcuacón yejuan in tagayot sayó cuelitacque in tayohuayanilot den tajtacol. Huan in tagayot quiseocauque Yejuatzin in yec tanextzin porín yejuan sayó cuelitayaj quichihuasque tachihualisme ten amo cualtía. <sup>20</sup> Porín nochi neques ten quichiutinemij ten amo cuali, yejuan nojonques quitahuelitaj in yec tanextzin, huan amo motoquijque campá ne yec tanextzin para ma amo monextiquij in amocuali tachihualisme ten yejuan quichiutinemij. <sup>21</sup> Pero nochi neques ten yec tachiutinemij ica ten yec melau, yejuan nojonques motoquiquij campá ne yec tanextzin para ma monextiqui senteixteno que Totajtzin Dios melau quinmacatinemij imohuiscachichualis para ijcón quichiutinemisque ne ten cuali.

### **Nican Juan Taahuijque ocsepa quitetapohuía de Cristo Temaquixtijque**

<sup>22</sup> Huan satepan in Jesús huan imomachtijcahuan yajque ne Judeajcopaca huan ompa yetotoj ihuan ne calyetoní de Judeajcopaca se ome eyi tonal. Huan ijcón ne imomachtijcahuan de Jesús quinahuijtinemíaj in tagayot. <sup>23</sup> Huan no ijcón in Juan Taahuijque, yejua ne taahuijtinemía campá pueblo Enon campá amo huejca quitztoya ne pueblo Salim, porín campá ne pueblójcopaca ongaya míac ame. Ica ya nojón míac pueblojuani hualayaj campá in Juan huan yejua quinahuía. <sup>24</sup> Huan nochi nijín quichihuac Juan achtopa ya que quitzacuasquíaj tech in cárcel.

<sup>25</sup> Ijcuacón sequin imomachtijcahuan de Juan Taahuijque peuque motajtoltehuíaj ihuan sequin taca judíos ica por ne tanahuatil den huehuentzitzin de judíos de que monequi ma se momatequi achtopa que se tacuas. <sup>26</sup> Huan ijcón imomachtijcahuan de Juan Taahuijque yajque nochi quitapohuitoj in Juan Taahuijque ijcuín:

—Tamachtijque, xiquita san ne Jesús ten mohuan yetoya ne campa sentapalpa den hueyiat de Jordán campa iquisayampa tonal. Tejuatzin, titechtapohuiaya de Yejuatzin huan axcan Yejuatzin ya taahuijtinemi nican huan míac tagayot quitoc-tilijtoque para ijcón momachtijyohue de Yejuatzin.

<sup>27</sup> Ijcuacón in Juan Taahuijque quinnanquilij imomachtijcahuan ijcuín:

—Amo aquen huelis quipías nión teyi tanahuatil como amo achto Dios quitayocolía ihuelilis. <sup>28</sup> Namejuan ipa cuali nannechcaquilijque ya que nejua amo ni Cristo Temaquixtijque. Ta, sayó namechyequilij que nejua Dios nechualtitanic para ma nitayejectaliqui achtopa que hualas Yejuatzin.

<sup>29</sup> Huan ijcón in Juan quinnextiliaya in tagayot ica nijín nexcuitil de se nenamictilis:

—Cuac ongac nenamictilis ne naquen cuica in sihuapil, yejua ne iyoquich de ne sihuapil. Huan yetoc se no tasojicniu den teyoquich ten ihuan moixmati huan yetoc inacastan huan quicactoc nochi tenica tajtojtoc ne teyoquich. Ica ya nojón ne itasojicniu semi moyolpactía cuac quicaqui que ne teyoquich tanojnotza. Huan no ijcón nejua queme yesquía ne nitetasojicniu, huan Jesús Yejuatzin ne in teyoquich ten tanojnotza. Huan nejua semi nimohueyiyolpactía porín nicaqui que ne Jesús tanojnotza. <sup>30</sup> Porín ne Jesús Temaquixtijque semi monequi ma cachi oc mohueyichiu-tiu ica imohuiscatequi. Huan nejua no semi monequi ma nimotziquitzintiltijtiu ica notequi.

### **Nican tajtoa de Jesús Temaquixtijque de que Yejuatzin hualpantemoc de ne eluiyactzinco**

<sup>31</sup> Huan in Juan Taahuijque quintapohuía in tagayot ijcuín:

—Huan ne Jesús hual pantemoc de ne eluiyactzinco, huan Yejuatzin quinyecantinemi nochi talticpacuani. Huan nochi neques ten yolque tech nijín talticpac san, yejuan nojonques poutocque nican talticpac huan sayó tajtoaj ica tamachilisme de nican talticpac san. Pero ne Jesús hualpantemoc de ne eluiyactzinco, huan Yejuatzin ya melau quipixtinemi chichahualis inpan nochi in talticpacuani. <sup>32</sup> Huan Yejuatzin techtapohuía nochi ten Yejuatzin quitac ya huan ten quicayic ya nepa eluiyactzinco. Pero amo aquen quineltoacatoc ten Yejuatzin quitenextilía. <sup>33</sup> Huan como acsame quineltoquilisque ten Jesús quinenextilía, yejuan nojonques ijcón motenextíaj senteixteno que Totajtzin Dios quinyequilía ten yec melau. <sup>34</sup> Huan Totajtzin Dios cualtitanic ne Jesús huan Yejuatzin ne tajtoa sayó ica in tajtoltitzin ten Dios quimactilij. Porín mismo Totajtzin Dios quimactilij ya Jesús nochi in chichahualis den Yecticatzin Espíritu. <sup>35</sup> Huan Totajtzin Dios semi quiyoltasojta Iyotzin Conetzin. Ica ya nojón Totajtzin Dios quimactilij ya Jesús nochi ichichahualis huan nochi tanahuatil. <sup>36</sup> Huan nochi neques ten tacuautamatisque ihuan ne Iconetzin Dios, yejuan nojonques quipiasque ne yec nemilis nachipa. Pero nochi ne naquen amo quinequisque yec tatacamatisque ihuan Iconetzin Dios, yejuan nojonques amo quipiasque ne yec nemilis. Ta, yejuan sayó quiselisque ne hueyi tatzacuiltis ten Totajtzin Dios quinqualtitanilis.

**Nican Jesús Temaquixtijque monojnotza ihuan se sihuat den Samariajcopaca**

**4** Huan Jesús ipa quinyoloximatic ne fariseos. Huan in taca tamachilejque fariseos quimatilijque que in Jesús quinpía cachi itaneltocacahuan huan que in Juan

Taahuijque. Huan no quimatilijque que in Jesús quinahuía cachi míac in tagayot huan que ne Juan, <sup>2</sup>Pero amo yec melau que in Jesús quinahuía in tagayot. Ta, taahuijtinemíaj yejuan ne imomachtijcahuan de Jesús. Huan in fariseos cajsicamatque ya que Jesús catca cachi hueyi chiuque huan que ne Juan Taahuijque. <sup>3</sup>Huan cuac Jesús quimatic nijín, ijcuacán quistehuac de ne Judeajcopaca huan ocsepa ya-jqui tequitito ompa Galileajcopaca.

<sup>4</sup>Huan cuac Jesús pehuac nejnemi para Galileajcopaca, ijcuacán ipa monequía panos ne campa talme ten pohuía ne Samaria. <sup>5</sup>Huan ijcón mochihuac que Jesús ajsic ne Samariajcopaca campa se pueblo monotza Sicar, amo huejca quitztoya ne tal ten pohuía ihuan Jacob, yejua ne se huejcautat den judíos. Huan ne Jacob quimac-tilijca niconeu José nochi ne tal. <sup>6</sup>Huan amo no huejca quitztoya ne amel ten pohuía ihuan in Jacob. Huan queme Jesús hualaya semi siutihualaya tech ne ojti, ica ya nojón Yejuatzin mosehuito ne campa amelnacastan. Huan catca ipa queme nepanta ya. <sup>7</sup>Ijcuacán niman huala se sihuat ten pohuía Samariajcopaca, huan ijcón ejcoc amelteno para quiquixtis in at. Huan Jesús quilij ijcuín:

—Xinechuanti tzictzin atzin ma nitayi.

<sup>8</sup>Huan Jesús ijcón quilij porín ne imomachtijcahuan nochi yajcaj ya campa ne pueblo Samaria quicohuatoj ten quicuasque. <sup>9</sup>Ijcuacán ne sihuat ten pohuía Samariajcopaca quilij Jesús ijcuín:

—¿Queyé tejua tinechtajtanía at? Ta, tejua tipohui ihuan judíos huan nejua nipo-hui nican Samariajcopaca.

Ijcón quijtoj in sihuat porín in judíos amo moyequitayaj ihuan pueblojuani de Samaria. <sup>10</sup>Ijcuacán Jesús quinanquilij ne sihuat ijcuín:

—Tajcón ticajsicamatisquía ne tetayocolil ten Dios mitztayocolía, huan tajcón no ticajsicamatisquía aconi Nejuatzin ten nimitztajtanilía tzictzin atzin, ijcuacán tejua yec melau tinechtajtanilisquía huan nimitztayocolisquía ne atzin ten yoltica.

<sup>11</sup>Ijcuacán in sihuat quilij Jesús ijcuín:

—Notecotzin, ¿quenín ticchihuas para tiquixtis in atzin? Ta, amo ticpía tonica tiquixtis. Porín nijín amel semi huejcatan. Huan, ¿can ticuis ne atzin ten yoltica para tinechmacas? <sup>12</sup>Porín tohuejcautat Jacob techcahuilijteu nijín amel campa yejua no tayaya in at huan campa ne atiyayaj niconahuan, huan no nitapialuan quínatiltiyayaj nican. ¿Xe cachi tejua ya tihueyichiuque huan que ne Jacob?

<sup>13</sup>Huan ijcón in Jesús ocsepa quinanquilij in sihuat ijcuín:

—Nochi neques ten tayisque nijín at, yejuan nojonques ocsepa amiquisque. <sup>14</sup>Pero nochi neques ten tayisque ne atzin ten nejua niquinmacas, yejuan nojonques amo queman quipiasque amiquilis oc. Huan ne atzin ten nejua niquinmacas, yejua ne cocoxocatos queme yesquía se amel itech ninyolijtic. Huan ne atzin quichihualtijtos ninyolijtic in yec nemilis ten amo queman tamis.

<sup>15</sup>Ijcuacán in sihuat quilij Jesús ijcuín:

—Notecotzin, nechonmaca, pues, nojón atzin para ma amo ocsepa niamiquis, huan para ma amo ocsepa nihualas oc nican niquixtiquiu in at campa nijín amel.

<sup>16</sup>Huan Jesús quilij in sihuat ijcuín:

—Xiyó xicotzati moyoquich, huan de ompa xihualacan nican.

<sup>17</sup>Ijcuacán in sihuat tananquilij ijcuín:

—Amo nicpía noyoquich.

Pero ocsepa Jesús quilij ijcuín:

—Cuali queme tiqijtoa que amo ticpía moyoquich. <sup>18</sup> Porín hasta axcan inuan tiyetoya macuil taca ten tiquinpapatac ya queme moyoquichuan. Huan yec melau ne tagat ten axcan tiyetoc ihuan, yejua ne amo moyoquich. Huan nochi nijín ten tinechiluijtoc, nochi yec melau huan amo xolopijyot san.

<sup>19</sup> Huan cuac in sihuat quicayic ya nijín tajtolme, ijcuacán yejua quilij ijcuín:

—Notecotzin, nejua nimitzita que tejua ya tipohui ihuan ne tanahuatiani de Dios. <sup>20</sup> Huan ne nohujcautatuan de Samariajcopaca, yejuan nojonques quimohuistilijque Totajtzin Dios nican tech nijín tepet. Pero namejuan nanjudíos nanquijtoaj que sayó ompa Jerusalén campa monequi se quimohuistilis Totajtzin Dios.

<sup>21</sup> Ijcuacán in Jesús quinanquilij ijcuín:

—Tejua, sihuat, xinechneltoquili ten nimitzilijtoc que ejcotoc ya in tonal quemanejuan nanquimohuistilisque Totajtzin Dios campa yesqui. Huan ijcón amo monequi oc nanualasque campa nijín tepet, huan amo no monequi nanyasque oc Jerusaléncopaca para nanquimohuistilisque Totajtzin Dios. <sup>22</sup> Namejuan nanpueblojuani de Samaria amo nanquimatij aconí nanquimohuistilíaj. Pero tejuan tijudíos, quema, ticajscamatij aconí ticmohuistilíaj porín ne temaquixtilis de Dios hualehuac den pueblojuani judíos. <sup>23</sup> Huan melau ejcotoc ya in tonal huan melau axcan ya mochiutoc ya nijín ten nimitzilijtoc. Nochi neques ten quinequij quiyolmohuistilisque Totajtzin Dios, yejuan nojonques quimohuistilisque ica por nintalnamiquilis huan ica nochi in tamachilis ten melau. Porín Totajtzin Dios quimonequiltía ma ijcón quimohuistilican nochi in tamohuistiliani. <sup>24</sup> Porín Totajtzin Dios Yejuatzin queme yesquía ejecat san. Huan nochi neques ten quinequisque quimohuistilisque Dios, yejuan nojonques ma quimohuistilijtiyacan Dios ica nochi ninyolojuan huan ica nintamachilis ten yec melau.

<sup>25</sup> Huan in sihuat quilij Jesús ijcuín:

—Nejua ipa nicvolmatoc que hualas ne ten monotza Mesías —ten quijsosnequi Cristo Temaquixtijque—. Huan nicaquía que cuac Yejuatzin hualas, ijcuacán Yejuatzin ne techyecajscamatiltis nochi tamachilisme ten techpoloa oc.

<sup>26</sup> Huan Jesús quilij ijcuín:

—Nejua ya ni Cristo Temaquixtijque ten nimitznojnotztoc axcan.

<sup>27</sup> Huan de ompa nimampa ejcocque imomachtijcahuan de Jesús, huan yejuan semi quimoucaitacque porín quitacque que Jesús monojnotztoya ihuan se sihuat de Samaria. Pero amo aquen moixehuij para quitajtoltsique Jesús ijcuín:

—¿Toni tictemohua, tejuatzin? oso, ¿queyé timonojnotztoc ihuan ne sihuat?

<sup>28</sup> Ijcuacán in sihuat nimantzin quicautehuac nitzotzocol huan yajqui calaquito campa nipueblojcopaca. Huan ompa in sihuat quintapohuij in taca den tajtoanime ijcuín:

<sup>29</sup> —Xihualacan xiquitaquij se tagat ten nejua nechnojnotza ya huan nechilij ya nochi ten nejua nicchiutinemic ya. ¿Xon amo Yejuatzin ya yesqui in Cristo Temaquixtijque?

<sup>30</sup> Ijcuacán miacque pueblojuani quisque de ninpueblo huan yajque campa yetoya Jesús. <sup>31</sup> Huan cuac yajqui ya in sihuat, ijcuacán imomachtijcahuan quitatautiyaj Jesús ijcuín:

—Tamachtijque, xicmasehua tepitzin nijín tacualis.

<sup>32</sup> Pero Jesús quinnanquilij ijcuín:

—Nejua nicpía tensá ten nicmasehuas ten namejuan amo nancajscamatij.

<sup>33</sup> Ijcuacán imomachtijcahuan peuque motatajtoaltíaj se huan ocsé ijcuín:

—¿Queyé ijcón quijtoa? ¿Xe acsá cualcuilisquía tensá tacualis?

<sup>34</sup> Pero in Jesús quinilij ijcuín:

—Notacualis yejua nijín, ma nicchihua in tequit ijcón queme quimonequiltía No-tajtzin Dios ten nechualtitanic. Huan ma nictamichihua in tequit ten Yejuatzin nechmactilij ya. <sup>35</sup> Huan namejuan nanquijtoa ijcuín: “Techpoloaj oc nahui metztica oc para ticajocuisque in tatocme”. Pero nejua namechilía que xiquitacan san, namejuan, xiyecquitacan nojón pueblojuani ten hualajtocque, yejuan nojonques niqinnejnehuililtía queme yesquía taquilome ten pehuac ya cosahui ya. Huan nojón quijtosnequi que ma amo huejcahuas oc para cajocuisque in tatocme. <sup>36</sup> Huan nochi neques ten tequitij ca in tatocme, yejuan nojonques quiselisque taxtahuil. Huan nochi neques ten taajocuij, yejuan nojonques no quiololoaj taquilome. Huan ne taqilolot quijtosnequi taca ten quipíaj ne yec nemilis ten amo queman tamis. Ica ya nojón nochi neques ten tatasque huan nochi neques ten taajocuisque ica in tatocme, yejuan nojonques quiselithue tataman taxtahuil huan mosepanyolpactisque. <sup>37</sup> Porín yec melau nijín tajtol ten moijtoa ijcuín: “Naquen tatoca se taman taquehual, huan naquen taajocui ocsé taman tequitique”. <sup>38</sup> Nejuatzin namechualtitanic xictaajocucan campa namejuan amo nantatocque. Porín melau ocsequin tequitini motequitiltijque ica ne tatocalis huan axcan namejuan ya nantaajocuisque de yejuan nintequiu.

<sup>39</sup> Huan miacque pueblojyetoní de ne Samariajcopaca tacuautamatque ihuan Jesús porín ica ne tajtolme ten quinilijca ne sihuat cuac yejua quinilijca ijcuín: “Yejuatzin Jesús, yejua ne nechilij ya nochi ten nicchiutinemic ya”. <sup>40</sup> Huan ijcón mochihuac que cuac motoquijque ne pueblojuani de Samaria campa Jesús, ijcuacán yejuan quitatautijque Jesús que ma mocahuani oc inuan. Ica ya nojón Jesús mocahuac ompa ome tonal. <sup>41</sup> Huan ijcón cachi oc in tagayot yec tacuautamatque itech Jesús porín quicaquilijque nochi ten Yejuatzin quinmachiya. <sup>42</sup> Ijcuacán in pueblojuani quilijque ne sihuat ijcuín:

—Huan axcan ya tejuan ticyecneltocaj ya in tamachtilis de Jesús huan amo sayó porín tejava titechiluijca ya. Ta, no tejuan ticyecneltocaj porín ticaquilijque ya itanojnotzalis de Yejuatzin. Ica ya nojón ticyecmatij que yec melau Yejuatzin in Cristo Temaquixtijque huan Yejuatzin huala para quinmaquixtis in talticpacuani den nintajtacoluan.

### **Nican tajtoa de queniu Jesús Temaquixtijque quipajtij se tayecanque iconeu**

<sup>43</sup> Huan queman panoc ya ome tonal ya, ijcuacán Jesús quisac de ne Samariajcopaca huan yajqui ajsito campa Galileajcopaca. <sup>44</sup> Huan Jesús amo tequitito nepa Judeajcopaca porín ne tonal ten ne achtopa moijtoaya ijcuín: “Amo quitasojtasque se tanahuatijque de Dios tech mismo ipueblojcopaca”. <sup>45</sup> Huan ijcón in Jesús cuac ejcoc ya campa pueblo Galilea, ijcuacán nochi in pueblojuani quiselijque Yejuatzin ica míac paquilis. Porín nochi in pueblojuani quitacque ya nochi ten quichiuca Jesús tech ne iluit de tajyohuilis, cuac yejuan yajcaj iluititoj tech ne pueblo Jerusalén.

<sup>46</sup> Huan de ompa Jesús yajqui campa pueblo Caná den itatilanal de Galilea, campa ipa ne achtopa yetoya ya, campa Jesús quichihuac ma in at ma mocuepa vino. Huan mochihuac que ompa Caná yetoya se hueyi tayecanque den rey. Huan yejava quipíaya ya se ioquichpil semi mococoaya tech in pueblo de Capernaum. <sup>47</sup> Huan



in tayecanque quimatic ya que Jesús quisac ya de Judeajcopaca huan ajsito tech in Galileajcopaca. Ijcuacán in tayecanque yajqui quitato Jesús, huan ompa quitatautito Jesús para ma yani ompa ichan itech ne pueblo den Capernaum ma quipajtiti nioquichpil ten semi tanautoya ya. <sup>48</sup> Huan ijcón Jesús quilij in tayecanque ijcuín:

—Como amo nanquitasque tensá nescayome de Dios huan mohuiscatequit de Dios, ica ya nojón namejuan amo nantacautamatisque de Nejuatzin.

<sup>49</sup> Pero in tayecanque quilij Jesús ijcuín:

—Notecotzin, niman xionyohui nochan achtopa que noconeu momiquilis.

<sup>50</sup> Ijcuacán Jesús quilij ijcuín:

—Niman xiyó ximocuepa mochan porín moconetzin nenquentis huan amo miquis.

Huan melau ijcón in tayecanque quiyecneltoquilij ten quilij Jesús. Huan ijcón nimantzin yajqui ichan. <sup>51</sup> Huan cuac ne tayecanque ajsitoyaya ya ichan, ijcuacán hual quisque sequin itaquehualuan huan quinamiquicoj huan quilijque ijcuín:

—Mooquichpil nenquentic ya.

<sup>52</sup> Ijcuacán in tayecanque quintajtoltij itaquehualuan ijcuín:

—¿Toni hora pehuac nenquenti noconeu?

Huan yejuan quilijque ijcuín:

—Yaloa queme se hora de tiotac quicahuac in totonic.

<sup>53</sup> Ijcuacán in tetat tayecanque cajsicamatic que tech ne hora de yaloatica que Jesús quilijca ya ijcuín: “Moconeu nenquentiti ya”. Huan ijcón yejua tacuautamatic itech Jesús ihuan nochi ichancahuan. <sup>54</sup> Yejua ya nijín ica ome mohuiscatequit ten quichihuac Jesús campa Galileajcopaca satapan cuac quisac ya de ne Judeajcopaca.

### **Nican Jesús Temaquixtisque quipajtij tech ne pueblo Betesda se cocoxque ten niomiyohuan melaxtic**

**5** Satapan de nochi nijín ten quichihuac Jesús, mochihuac que in pueblojuani judíos iluichiuque. Ica ya nojón in Jesús ocsepa yajqui tejcoto huan ajsic campa Jerusaléncopaca. <sup>2</sup> Huan tech ne pueblo de Jerusalén, ompa oncaya hueyi calten ten monotzaya Ichcaltén. Huan ompa no yetoya se hueyi tepan aichcual ten monotza Betesda, ten quipiaya macuilcan campa mosehuiayaj in tagayot. <sup>3</sup> Huan ompa moajsiáj miacque cocoyani ompa najnacascahuetztoyaj anacastan. Huan sequin cocoyani amo huel tachiayaj, huan ocsequin coxoyme, huan ocsequin ten niomiyohuan melaxtic. Huan yejuan quichixtoyaj que ma se ángel de Dios ma quioliniani in at. <sup>4</sup> Porín quemán san hualtemoaya se ángel taquehual de Dios huan yejua quijticmaneloaya in at. Huan ijcón ne naquen achtopa mopancalaquiaya tech ne at, yejua ne mocahuaya tapajtíl ya, masqui catiyejua yesqui cocolis quipiasquía ne cocoxque.

<sup>5</sup> Huan ompa yetoya se tagat cuicaya sempoal huan caxtolomeyi xihuit ya de mococoaya. <sup>6</sup> Huan cuac Jesús conitac ne cocoxque que ompa nacascahuetzotc, ijcuacán Yejuatzin niman cajsicamatic que cuicaya ya míac xihuit ya de mococoaya ne cocoxque. Huan Yejuatzin quilij ijcuín:

—¿Xe tejua ticnequi tipajtis?

<sup>7</sup> Huan in cocoxque quinankuilij ijcuín:

—Amo nicpía aquen ihuan nimotasohta para yejua huelis nechpancalaquis tech nijín hueyi tepan aichcual cuac moolinía in at. Porín nachipa cuac nejua nicnequi nimopanalaquis, ijcuacán huitze ocsequin cocoyani huan niman yejuan mopancalaquíaj achtopa que nejua.

<sup>8</sup> Huan ijcón in Jesús quilij ne cocoxque ijcuín:

—Ximoquetza, huan xicuiqui mocochochet huan xinenemi.

<sup>9</sup> Ijcuacán nimantzin ne tagatzin mocahuac tapajtil ya. Ica ya nojón quicuic ne icochpet huan pehuac nejnemi. Huan catca ne tonal de nesehuilis cuac pajtic ne cocoxque. <sup>10</sup> Huan ijcón in tayecanani judíos quilijque ne tagat ten tapajtil ya ijcuín:

—Axcan tech nijín tonal de nesehuilis, ne tanahuatil de Moisés amo techcahuilía ma xicmama mocochochet.

<sup>11</sup> Huan in tagat quinnanquilij ijcuín:

—Pero yejua nechilij Yejuatzin ne naquen nechpajtij ijcuín: “Xicajocui mocochochet huan xinejnemi”.

<sup>12</sup> Ijcuacán in tayecanani quitajtohtijque ijcuín:

—¿Aconi nojón mitzilij ya ijcón que xicui mocochochet huan xinejnemi?

<sup>13</sup> Pero ne cocoxque ten tapajtil ya amo quimatía aconi quipajtij, porín Jesús ipa motzinquixtij ya huan amo no quimatic porín yetoyaj mías tagayot. <sup>14</sup> Pero mochi-huac que satepan Jesús ocsepa moajsic ihuan ne tagat ten mococoaya catca tech ne hueyi tiopan de judíos, huan Jesús ocsepa quilij ijcuín:

—Xiquita san, axcan cuali tipajtic ya. Pero axcan para taixpan amo ximotajtacol-maca oc, para ijcón ma amo motechuiqui oc se cocolis den cachi chicahuac.

<sup>15</sup> Huan ijcón in tagat ten tapajtil ya yajqui huan quinyequilijteu ne tayecanani judíos que yejua in Jesús ten quipajti. <sup>16</sup> Ica ya nojón ne tayecanani judíos quitepostocayaj Yejuatzin para quimictisque porín Yejuatzin quichihuaya mohuiscatequit tech in tonal de nesehuilis. <sup>17</sup> Ijcuacán in Jesús quinilij in tayecanani judíos ijcuín:

—Notajtzin tequititihuitz hasta axcan huan Nejuatzin nitequititoc axcan masqui tonal de nesehuilis.

<sup>18</sup> Ica ya nojón in tayecanani judíos cachi oc quinequíaj quimictisque Jesús, porín Yejuatzin quichihuaya mohuiscatequit tech in tonal de nesehuilis. Huan no porín Yejuatzin monejnehuiltiaya sansé queme Totajtzin Dios, cuac quijtoaya que melau Totajtzin Dios yejua ne Itajtzin de Jesús.

### **Nican Jesús Temaquixtijque quinajsicamatiltij in tacaquini den tanahuatil ten Yejuatzin cuica**

<sup>19</sup> Ijcuacán in Jesús quinilij in tayecanani ijcuín:

—Yec melau ten namechilía que Nejuatzin ni Teconetzin de Dios, huan amo huelis tensá nicchihuas de nejua notanejnequilis san. Ta, sayó nicchiutinemis ten niquitilía Notajtzin Dios quichiutinemi. Porín nochi ten quichiutinemi Notajtzin Dios, no Nejuatzin ni Iconetzin no ijcón nicchiutinemi. <sup>20</sup> Notajtzin Dios nechtasojta Nejuatzin ni Iconetzin. Huan Notajtzin Dios nechnextilijtiu nochi in tequit ten Yejuatzin quichitoc. Huan no nechnextilijtiyás oc ocsequin tequit den cachi huejueyi para ma ijcón namejuan cachi oc nanquimoucaitasque de notequihuan.

<sup>21</sup> Huan ijcón queme Notajtzin Dios quinpanquixtis yoltocque in ánimajme huan ocsepa quinmacas nemilis, no ijcón Nejuatzin ni Iconetzin de Dios nictemaca ne nemilis nachipa nochi neques ten Nejuatzin nicnequi niquinpalehuis. <sup>22</sup> Huan Notajtzin Dios amo aquen quinixcomacas huan quintelchihuas den talticpacuani. Ta, sayó Nejuatzin ni Iconetzin de Dios nechmactilij ya nochi in chicahualis para ma nejua niquinixcomacas huan niqintelchihuas in talticpacuani. <sup>23</sup> Huan ijcón quichihuac Notajtzin Dios para ma nochi in talticpacuani ma nechmohuistilican Nejuatzin

ni Iconetzin de Dios, ijcón queme yejuan quimohuistilijthualayaj Notajtzin Dios. Huan nochi neques ten amo quinequi nechyecmohuistilisque Nejuatzin ni Iconetzin de Dios, yejuan nojónques amo no quimohuistilijtocque Notajtzin Dios naquen nechualtitanic.

<sup>24</sup> Huan yec melau ten namechilía nochi neques ten nechyecaquilisque de notaj-toltzitzin, huan no quiyecneltoacasque Notajtzin Dios naquen nechualtitanic, yejuan nojonques quipiasque ne nemilis nachipa. Huan yejuan amo yesque oc tatelchihualme oc porín mopanoluilijque ya den miquilis huan ejcocque ya itech in yec nemilis. <sup>25</sup> Huan yec melau ten namechilía que ejcotoc ya in hora de notequiu, huan melau axcan mochiutoc ya nican. Huan nochi naquen yolmictocque ya porín nintajtacoluan, yejuan nojonques nechcaquilisque notajtolzinzin de Nejuatzin ni Iconetzin de Dios. Huan nochi neques ten nechtacamatisque, yejuan nojonques nachipa yoltinemesque. <sup>26</sup> Huan ijcón queme Notajtzin Dios quipía imaco nochi in chichualis para quitemacas nemilis, no ijcón Notajtzin Dios nechmactilij Nejuatzin ni Iconetzin de Dios nochi in chichualis para que Nejuatzin no nictemacas nemilis. <sup>27</sup> Huan no Notajtzin Dios nechmactilij ya in tanahuatil para ma Nejuatzin niquinixcomacas huan niqintelchihuas in talticpacuani. Huan nijín ijcón quichihuac Notajtzin Dios porín sayó Nejuatzin ni Yectagatzin. <sup>28</sup> Huan amo xicmoucaitan de nijín notajtolis, porín ejcos oc in tonal queman nochi in ánimajme nechcaquilisque notajtolis. <sup>29</sup> Ica ya nojón cuac Nejuatzin niquinnotzas, ijcuacón noch in ánimajme hual quisasque campa ne ánimajtecochme. Huan nochi ne neques ten quichiutinenque ten cuali, yejuan nojonques hual quisasque huan quiselisque ne yec nemilis nachipa. Pero nochi ne naquen tachiutinenque ica ten amo cuali, yejuan nojonques hual quisasque huan quiselisque ne hueyi tatelchihualis.

### **Nican tajtoa de queniu Jesús Temaquixtijque quiyectenextilía de nitanahuatil**

<sup>30</sup> Huan ijcón in Jesús quinilij in tagayot ijcuín:

—Nejuatzin amo huelis tensá nicchihuas ica nejua notanahuatil san. Ta, ijcón queme nicaquilía que nechilijtoc Notajtzin Dios, no ijcón niquinixcomacas huan niqintelchihuas in talticpacuani. Huan notaixcomacalis sayó cuica tamachilis ten melau, porín Nejuatzin amo nictemoa que nicchiutinemi de nejua nicnectinemi san. Ta, nictemoa nicchiutinemis sayó ten quimonequiltía Notajtzin Dios naquen nechualtitanic ya. <sup>31</sup> Huan tacán nejua san nimotajtohuisquía, ijcuacón amo teyica cualtiasquía nonetajtohuilis de nejua san. <sup>32</sup> Pero nohuan yetica Notajtzin Dios huan Yejuatzin nechtajtohuiltía ica por nejua namoixpan. Ica ya nojón Nejuatzin nicyecmati que ne tetajtohuilis de Yejuatzin melau cualtía. <sup>33</sup> Huan namejuan nanquintitanque sequin taca ma quitajtolitij in Juan Taahuijque de Nejuatzin. Huan ne Juan notetajtohuijcau, yejua quinnanquilij sayó ica ten melau. <sup>34</sup> Pero Nejuatzin amo monequi nicselis ne tetajtohuilis den tagat san. Ta, sayó namechnojnotza de ne tetajtohuique de Juan para ma huelis namejuan nanquiselisque in nemaquixtilis ica por ne Juan itajtolis. <sup>35</sup> Huan ne Juan Taahuijque catca queme yesquía se hueyi tanex ten xotaya huan tahuiaya huan namechyoltahuiliaya ica ten melau, pero namejuan sayó nanquinecque nanmoyolpactisque tech ne tanex ipan se ome eyi tonal san.

<sup>36</sup> Pero Nejuatzin nicpixtoc ocsé tetajtohuilis tenica nechtajtohuía, yejua nijín in tachihualisme ten nicchiutinemi. Huan notachihualisuan, yejuan nojonques semi

cachi huejueyi tetajtohuilis huan que ne tetajtohuilis de ne Juan Taahuijque quichiutinemía por nejua. Huan in tachihualisme ten nicchiutinemi, yejuan nijinques in tachihualisme ten Notajtzin Dios nechnahuatiliy ya ma nicchihua. Huan nochi nijín tachihualisme quitenextijtoc que melau Notajtzin Dios nechualtitanic. <sup>37</sup> Huan Notajtzin Dios nechualtitanic nican talticpac huan Yejuatzin no nechtetajtohuiltía por nejua, masqui namejuan amo nanquicacque nitajtolis de Notajtzin Dios, huan nión no nanquitacque de quenín tamati Notajtzin Dios. <sup>38</sup> Pero itanahuatiluan de Notajtzin Dios hasta yequintzin amo huel calaquij tech namoyolojuan. Yejica amo nannechyeclneltocaj de Nejuatzin huan amo no nanquineltocaj que Notajtzin Dios nechualtitanic nican talticpac. <sup>39</sup> Huan namejuan nanquiyectemolaj tech in Tajcuilolamatzin de Dios ica nejmach. Huan ijcón nanquichiutinemij porín namejuan nanquichíaj que nanquiaisisque itech ne in Tajcuilolamatzin de Dios ne yec nemilis nachipa. Huan namechyequilía que ne Tajcuilolamatzin de Dios, yejua ne nechtetajtohuiltía de Nejuatzin. <sup>40</sup> Huan namejuan amo no nanquinequij nanmotoquisque huan nanmotemactisque nohuan para huelis nanquipiasque ne yec nemilis nachipa.

<sup>41</sup> Huan Nejuatzin amo nicselía ne xochitajtolis san ten tagayot quinequij nechmacasque. <sup>42</sup> Pero Nejuatzin cuali namechyolojixmati huan Nejuatzin cuali nicyecmatoc que namejuan amo melau nanquiyoltasojtaj Notajtzin Dios. <sup>43</sup> Huan Nejuatzin nihuala nican talticpac itencopaca Notajtzin Dios huan namejuan amo nannechneltoquilía que melau notajtolis. Pero tacán acsá hualasquía ten tajtojtinemi itencopaca san de yejua san, ijcuacón yejua ne namejuan nanquineltocasquíaj. <sup>44</sup> Huan namejuan nanquitemoj san huan nanquiselíaj san de ne sayó xochitajtolis san de se huan ocsé namejuan san. Pero amo nanquitemoj huan nión no nanquiselíaj ne hueyi panchihualis ten sayó Dios huelis quitemacas. Huan queme ijcón nanquichiutinemij, pues amo huelis nanquineltocaj ne tetajtoluilis ten Yejuatzin quitemaca. <sup>45</sup> ¡Amo xicnemilican que se tonal Nejuatzin namechteluliti nepa iixpantzin de Notajtzin Dios! Ta, yetoc ya ne naquen namechteluliti, huan nijín yejua in tanahuatijque Moisés, masqui namejuan nanquichíaj que nanquipiasque ne nemaquixtilis ica por ne Moisés.

<sup>46</sup> Huan tacán namejuan nanquiyecneltoocasquía ne tanahuatil ten namechmactilij ne tanahuatijque Moisés, ijcuacón namejuan no nannechneltoquilisquíaj de Nejuatzin, porín ne tanahuatijque Moisés tajcuiloco de Nejuatzin nonemilipan. <sup>47</sup> Pero como namejuan amo nanquiyecneltoocaj ten Moisés quiijuiloco, ¿quenín huelis nanquineltocasque de notajtoluan ten axcan namechilijtoc? Pues, amo huelis.

### Nican Jesús Temaquixtijque quintacamacac macuil mil tagayot

(Mt. 14.13-21; Mr. 6.30-44; Lc. 9.10-17)

**6** Huan satepan de nochi nijín ten quichihuac Jesús, ijcuacón Yejuatzin yajqui sentapalpa den hueyíat ten monotza Galilea, ten no quitocaytiayaj Tiberias. <sup>2</sup> Huan mochihuac que míac tagayot quitoctiliayaj Jesús, porín nochi yejuan quitiliayaj ne mohuiscatequime ten Jesús quichiutinemía cuac quinpajtiaya in cocoyani. <sup>3</sup> Huan de ompa Jesús tejcoto campa ne tepoyo huan ompa mosehuito ihuan imomachtijcahuan. <sup>4</sup> Huan ne tonal motoquijtoya ya cuac ne judíos iluichihuayaj ten monotza tajyohuilis iluit. <sup>5</sup> Huan Jesús pehuac ixnemía huan qunitac tel míac tagayot ten cualtoctiliayaj Yejuatzin. Huan in Jesús quitajtoltij Felipe ijcuín:

—¿Can huelis ticohuasque tel míac tacualis para huelis tacuasque nochi nijín tagayot?

<sup>6</sup>Huan in Jesús quiytoj ijcón para quiejecoltis in tamachilis de Felipe huan para quitas toni quijosquía yejua. Pero Jesús ipa cuali quimatoya ya toni quichihuati nojón momento. <sup>7</sup>Ijcuacón in Felipe quinanquilij ijcúin:

—Para nochi nijín tagayot huelis quicuasque pan, amo ajsis nión ome mil pesos. Huan hasta amo quinajsisquía nión tejtepititzin san.

<sup>8</sup>Huan ompa yetoya Andrés, senme den imomachtijcahuan Jesús, yejua iicniu den Simón Pedro. Huan in Andrés quilij Jesús ijcúin:

<sup>9</sup>—Nican yetoc se oquichpilconet ten quipía macuil pantzitzin de cebada huan ome pescadojnat. Pero, ¿quenín ajsis nijín tacualis para nochi in tagayot? Ta, tel míacque.

<sup>10</sup>Ijcuacón in Jesús quinilij imomachtijcahuan ijcúin:

—Namejuan xiquiniluican nochi in tagayot ma motalican.

Huan oncaya míac talixco sacat campa ne yetoyaj. Huan ompa motalijque nochi in tagayot queme macuil mil taca. <sup>11</sup>Huan ijcón in Jesús momaaquij ne pantzitzin. Huan cuac Jesús quitasojcamachilij ya Totajtzin Dios, ijcuacón quinmajmactilij ne imomachtijcahuan ne pantzitzin. Huan de ompa yejuan quinxejxelo huilijque in pantzitzin in tagayot nochi ne naquen tocotzyetoyaj ixtahua panían. Huan de ompa no ijcón quichihuac Jesús ica ne pescadojnat. Huan ijcón quinmactilijque in tagayot nochi ten yejuan quinequíaj ica ixisque. <sup>12</sup>Huan cuac nochi in tagayot cuali ixuicque ya, ijcuacón Jesús quinilij imomachtijcahuan ijcúin:

—Xicajocuican ten mocahuac ya, para ma amo teyi ahuilihui.

<sup>13</sup>Huan ijcón imomachtijcahuan cajocuicque huan quinpejontijque ne majtatiomome chiquihuime de pancocotol ne ten mocahuac ya den ne macuil pantzitzin den cebada, ne ten mocahuac cuac ixuicque ne tagayot ten tacuajque. <sup>14</sup>Huan cuac nochi in tagayot quitacque ya nijín mohiscatequit ten quichihuac Jesús, ijcuacón yejuan quiytojque ijcúin:

—Melau Yejuatzin ya ne Jesús in Tanahuatijque de Dios ten ipa monequía hualas nican talticpac.

<sup>15</sup>Huan Jesús cajsicamatic que in tagayot semi moijsiu huilijtoyaj ya para quiq-uitzquisque Jesús huan quitayecancaquetzasque queme ninrey, masqui Yejuatzin amo quinequía. Ica ya nojón ya Jesús majchihuac de nintzalan huan yajqui campa ne tepeyo.

### **Nican tajtoa de queniu Jesús Temaquixtijque nejnemic aixco**

*(Mt. 14.22-27; Mr. 6.45-52)*

<sup>16</sup>Huan nepa cuac tapoyahuic ya, ijcuacón imomachtijcahuan de Jesús temocque de ne tepeyo huan ajsicque atenteno. <sup>17</sup>Huan de ompa yejuan calacque tech ninbarco huan peuque quinejnemiltíaj ya in barco para quiapanahisque in hueyíat huan para ajsisque campa pueblo Capernaum. Huan tapoyahuic ya huan ne Jesús ayamo quinalajsía. <sup>18</sup>Ijcuacón pehuac chicaucataejecaya, huan nochi in at pehuac mocuecuentecaya huejcapan. <sup>19</sup>Huan cuac imomachtijcahuan quinejnemiltijtoyaj ya ninbarco queme macuil oso chicuasen kilómetro aixco ya, ijcuacón yejuan quitacque Jesús que nejnentihualaya aixco huan motoquitihualaya campa ninbarco. Huan

ijcón ne imomachtijcahuan de Jesús mohueyiyolmoutiayaj. <sup>20</sup> Pero in Jesús quinilij ijcuín:

—Nejua ya ni Jesús, amo ximomoutican.

<sup>21</sup> Ijcuacán ne imomachtijcahuan quihueyiyolmachilijque paquilis para quiselisque Jesús, huan quicalaquijque Yejuatzin tech in barco. Huan ijcón niman ijsiucaajsitihuetzque ica ninbarco ne atenteno campa ipa quiyolnemilijtoyaj ya ajsisque.

### **Nican in tagayot quitemoayaj Jesús Temaquixtjique**

<sup>22</sup> Huan mochihuac que imostica in tagayot mocaucaj oc ne sentapalpa den hueyíat campa mochihuac ne hueyi tacualis. Huan yejuan cajsicamatque que imomachtijcahuan de Jesús ipa quisque ya ica ne barco, ne ten mocahuaya ya, porín ipa sayó yetoya ya se barco. Huan yejuan no cajsicamatque que Jesús amo inuan yajqui imomachtijcahuan. Ta, imomachtijcahuan ninselti yajque. <sup>23</sup> Pero mochihuac que ejcocque ocsequin barcos ten hualayaj campa ne pueblo de Tiberias. Huan in barcos ejcocque ne atenteno amo huejca campa in tagayot quicuaque ne hueyi tacualis, cuac in Totecotzin Jesús quitasojcamachilijca in Totajtzin Dios. <sup>24</sup> Huan queme in tagayot quitacque ya que amo yetoya oc Jesús ompa, nión no yetoyaj oc imomachtijcahuan, ijcuacán nochi in tagayot calacque tech nojón barcos huan quisque huan yajque quipanahuijque in hueyíat huan ajsicque campa pueblo Capernaum, huan ompa quitemotoj Jesús.

### **Nican Jesús Temaquixtjique Yejuatzin monejnehuililtía queme se tacualis ten quitemaca nemilis nachipa**

<sup>25</sup> Huan ijcón cuac in tagayot ajsicque ya ne sentapalpa den atenteno, ijcuacán ompa cajsicque ya in Jesús huan quitajoltijque ijcuín:

—Tamachtijque, ¿quemanían tihuala nicahuín?

<sup>26</sup> Ijcuacán in Jesús quinanquilij ijcuín:

—Yecmelau ten namechilía, que namejuan nannechtemoaj porín nantacuajque huan porín cuali nanixuicque. Huan namejuan amo nannechtemoaj porín nancajsicamatij nijín mohuiscatequit ten nicchihuac. <sup>27</sup> Huan namechyequilía que amo ximotequitiltican san sayó ica in tacualis ten panoa san. Ta, ximotequitiltican de ica ne tacualis ten namechuejcahuas, ne tacualis ten namechmacas ne yec nemilis nachipa. Yejua nijín tacualis namechmacas Nejuatzin ni Yectagatzin, porín Notajtzin Dios tacuautamatic nohuan huan nechmacac ya nitanahuatiltzin para ica ma namechtaoyocoli ne nemilis nachipa.

<sup>28</sup> Ijcuacán in tagayot ocsepa quitajoltijque Jesús ijcuín:

—¿Toni monequi ma ticchiutiyacan para tictacamatiyasque nochi tensá ten Totajtzin Dios quimonequiltía ma ticchihuacan?

<sup>29</sup> Ijcuacán in Jesús quinnanquilij in tagayot ijcuín:

—Totajtzin Dios quimonequiltía xicchiutiyacan yejua nijín: Xitacuautamatiyacan nohuan porín sayó Totajtzin Dios Yejuatzin nechualtitanic.

<sup>30</sup> Ijcuacán yejuan ocsepa quitajoltijque Jesús ijcuín:

—¿Huan toni mohuiscatequit huelis ticchihuas tejua para titechnextilis huan para ijcón tiqitasque huan timitzneltoquilisque? ¿Toni mohuiscatequit ticchihuati?

<sup>31</sup> Huan ne tohuejcautatuan yejuan quicuaque ne tacualis ten monotza maná cuac

nejnentoyaj campa ne tayiucan, ijcón queme quijtoa in Tajcuilolamatzin ijcuín: “Yejuatzin quintamacac ica tacualis ten huala de ne eluiyactzinco”.

<sup>32</sup> Huan ijcón ocsepa Jesús quinnanquilij ijcuín:

—Yec melau ten namechilía axcan que amo yejua in Moisés ne tanahuatijque ten namechtamacac ica ne tacualis ten huala de ne eluiyactzinco. Ta, Totajtzin Dios, Yejuatzin namechinmacatoc axcan ne yec melau tacualis ten hualpantemoc de ne eluiyactzinco. <sup>33</sup> Porín Nejuatzin ya ninetacualis ten Totajtzin Dios namechmacatoc, huan Nejuatzin ya nihualtemoc de ne eluiyactzinco. Huan nimonejnehuililtía queme ne tacualis ten Dios namechmacatoc huan ne tacualis, yejua ne quitemaca yec nemilis nochi in talticpacuani.

<sup>34</sup> Ijcuacón in tagayot quilijque Jesús ijcuín:

—Totecotzin, nachipa xitechonmaca pos nojón tacualis.

<sup>35</sup> Huan ijcón in Jesús quinnextilij ica se nexcuitil ijcuín:

—Nejuatzin ya nimonejnehuililtía queme ne tacualis ya ten quitemaca nemilis. Huan nochi naquen hualasque huan motemactisque nohuan, yejuan nojonques amo queman quimachilisque oc máyanti tech ninyolojuan. Huan no nochi naquen tacuautamatisque nohuantzinco, yejuan nojonques amo queman oc quiplasque amiquilis den nintalnamiqulils. <sup>36</sup> Pero yec melau queme namechilijtinemía que namejuan amo nohuan nantacuautamatij, masqui namejuan nannechitztocque ya. <sup>37</sup> Huan nochi notaneltocacahuan ten Totajtzin Dios nechinmactilía, yejuan nojonques hualasque huan motemactisque nohuantzin. Huan nochi naquen hualasque huan motemactisque nohuantzin, yejuan nojonques amo queman niquinmajpehuas. <sup>38</sup> Porín Nejuatzin nihualpantemoc de ne eluiyactzinco amo para nicchihuaquiu tensá de nejua notanejnequils san. Ta, nihuala para nicchiutinemis ten Notajtzin Dios quimonequiltía, porín Yejuatzin nechualtitanic nican talticpac. <sup>39</sup> Huan Notajtzin Dios nechualtitanic nican talticpac, huan Notajtzin Dios quimonequiltía ma amo senme de nijín notaneltocacahuan ma ixpolihuican, nijinques ten Yejuatzin nechinmactilij ya. Ta, Yejuatzin quimonequiltía que ma Nejuatzin niquinyolitis nochi notaneltocacahuan ma yoltinemican tech ne tacuitapan tonalme ya cuac mochihuas ya ne hueyi taixcomacalis. <sup>40</sup> Huan Notajtzin Dios nechualtitanic nican talticpac huan Yejuatzin itanejnequils que nochi naquen nechitasque Nejuatzin huan tacuautamatisque nohuantzin que ni Teconetzin de Totajtzin Dios, yejuan nojonques quiselisque ne nemilis nachipa. Huan ijcón Nejuatzin niquinpanquixtis yoltocque huan niquinmacas nemilis ne tech tacuitapan tonalme.

<sup>41</sup> Ica ya nojón in tagayot judíos peuque quitejtenehuaj Jesús porín Yejuatzin quijtoaya ijcuín: “Nejuatzin ya nimonejnehuililtía queme ne tacualis ten hualtemoc de ne eluiyactzinco”. <sup>42</sup> Huan ijcón in tagayot quijtoayaj ijcuín:

—¿Xe amo yejua nijín Jesús de niconeu José? Pues, tejuan cuali tiquinixmatij nitat huan ninantzin. ¿Quenín huelisquía techilijtoc que yejua mismo hual pantemoc ne eluiyactzinco?

<sup>43</sup> Pero in Jesús quinilij oc ocsepa ijcuín:

—Ximotacahaltican ya huan amo ximotajtoltehujtocan oc. <sup>44</sup> Porín amo aquen huelis ejcos huan motemactis nohuantzin como amo achto Notajtzin Dios quinquialcuis, porín Yejuatzin nechualtitanic nican talticpac. Huan Nejuatzin niquinyolitis ne notaneltocacahuan huan niquinmacas ne nachipa nemilis tech ne tacuitapan tonalme cuac mochihuas ya ne hueyi taixcomacalis. <sup>45</sup> Huan tech in Tajcuilola-

matzin den ne huejcautanahuatijque ten quijtoco ijcuín: “Notajtzin Dios, Yejuatzin ya quinmachtijtinemis nochi in talticpacuani ica Itajtoltzin”. Ica ya nojón nochi neques ten quicaquilijque ya Notajtzin Dios huan momachtijtiyajque ya itamachilisuan, yejuan nojonques axcan hualajtocque huan motemactijtocque nohuantzin.

<sup>46</sup> Huan no namechilía que amo yec melau que acsame quitacque ya Notajtzin Dios. Ta, sayó Nejuatzin ten nihuala de Notajtzin Dios, yec melau Nejuatzin ya niquitac ya Notajtzin Dios. <sup>47</sup> Yec melau ten namechilía que nochi neques ten tacuautamatiyasque nohuantzin, yejuan nojonques quipixtiyasque ne yec nemilis nachipa. <sup>48</sup> Nejuatzin ya nimonejnehuililtía queme tacualis huan nictemaca nemilis nachipa. <sup>49</sup> Huan namohuejcautatan quicuaque ne tacualis ten monotza maná cuac nejnentoyaj campa ne taiucan. Huan masqui ijcón tacuajtinenque, pero yejuan nochi momiquilijque. <sup>50</sup> Pero axcan namechilijtoc que Nejuatzin nimonejnehuililtía queme ne tacualis huan nihualpantemoc de ne eluiyactzinco. Huan nochi naquen quicuasque de nijín tacualis, yejuan nojonques amo quemamiquisque oc. <sup>51</sup> Huan Nejuatzin nimonejnehuililtía queme tacualis ten yoltoc huan nihualpantemoc de ne eluiyactzinco. Huan nochi naquen quicuasque nijín tacualis, yejuan nojonques yoltinemis que sen nachipa. Huan Nejuatzin niquinmactilis in tagayot nonacayo queme yesquía tacualis. Huan ica nejua nonacayo ten nictemacas, yejica niquinmaquixtilis nintalnamiquilisuan den talticpacuani.

<sup>52</sup> Ijcuación yejuan in tagayot judíos peuque cualanij huan motajtoltehuiayaj se huan ocsé huan quiytoayaj ijcuín:

—¿Quenín huelis nijín tagat ma techmaca ninacayo de yejua san para maticuasque?

<sup>53</sup> Pero Jesús quinnextilij ica nexcuitil ijcuín:

—Yec melau ten namechilía que Notajtolztzin queme yesquía nonacayo huan noesyotzin. Huan amo huelis nanquíasque ne nemilis nachipa como amo namejuan nanquicuasque de nijín nonacayo de Nejuatzin ni Yectagatzin, huan como amo no nantayisque de nijín noesyotzin. <sup>54</sup> Huan nochi neques ten momachtisque de Nejuatzin Notajtolztzin queme yesquía quicuasque nonacayotzin huan tayisque noesyotzin, yejuan nojonques quipiasque nemilis nachipa. Huan ijcón Nejuatzin niquinyolitis huan niquinmacas nemilis ocsepa tech ne tacuitapan tonalme cuac mochi-huas ya ne hueyi taixcomacalis. <sup>55</sup> Huan Notajtolztzin queme yesquía nonacayotzin huan yejua ne melau yec tacualis. Huan Notajtolztzin queme yesquía noesyotzin huan yejua ne melau yec tayilis. <sup>56</sup> Huan Notajtolztzin queme yesquía nonacayo huan noesyotzin. Ica ya nojón nochi naquen quicuasque nonacayotzin huan nochi naquen tayisque noesyotzin, yejuan nojonques nohuantzin poutinemis que huan majsitinemis que, huan Nejuatzin inuan nimajsitinemis. <sup>57</sup> Huan Notajtzin Dios, Yejuatzin nechualtitanic nican talticpac huan Yejuatzin nachipa yoltinemi huan quipixtoc imacotzinco nochi in nemilis. Huan Nejuatzin niyoltinemi porín Notajtzin Dios nechmacac nemilis. Huan no ijcón nochi neques ten motemacas ica Nejuatzin Notajtolztzin queme yesquía tacualis, yejuan nojonques no yoltinemis que ica por Nejuatzin. <sup>58</sup> Huan namechilijtoc que Nejuatzin queme yesquía nitacualis huan nihualpantemoc de ne eluiyactzinco. Huan nijín tacualis de namechnojnotza, yejua ne amo quinehuilía ne tacualis ten monotza maná ten quicuaajtinenque ne namohuejcautatan. Porín nochi yejuan masqui quicuaque ne maná, pero momiquilijque.



Pero nochi naquen quicuasque ne pantzin ten Nejuatzin nictemaca, yejuan nojonques nachipa yoltinemisque.

<sup>59</sup> Huan in Jesús quinmachtia ya nochi nijín tamachilisme ompa Capernaum cuac mosentiliayaj in tagayot judíos tech nintiopan.

**Nican Jesús Temaquixtijque quinmachtij in tagayot ica  
tajtolme ten quitemaca ne nemilis nachipa**

<sup>60</sup> Huan cuac nochi quicacque ya nijín tanexutilisme de Jesús, ijcuación miacque in tagayot naquen quitociliayaj Jesús quiytojque ijcuín:

—Nochi nijín ten quijsa Jesús techyolcujmololtía. ¿Aconi huelis Yejuatzin ijcón quitacamatisque?

<sup>61</sup> Huan ijcón in Jesús niman quimatic de que yejuan imomachtijcahuan motajtoltehujtoyaj se huan ocsé ica por Yejuatzin itajtolis. Ica ya nojón Jesús quintajoltij ijcuín:

—¿Xe namechylcujmoloa nijín tanexutilisme? <sup>62</sup> Como namechylcujmoloa nijín notanexutilis, ijcuación, ¿toni nanquichihuasque cuac nannechitasque Nejuatzin ni Yectagatzin cuac nitejcotiyás campa ne achtopa niyetoya? <sup>63</sup> In Yecticatzin Espíritu, Yejuatzin no quitemaca nemilis. Pero itacayo de tagat, yejua ne amo teyi hueli quichihualtía ten cuali. Huan nochi in tajtolme tenica Nejuatzin namechnojnotzotc, yejua ne hualehuac imaco den Yecticatzin Espíritu. Huan nijín notanexutilisuan, yejua ne quichihualtía ma onca ne nemilis nachipa. <sup>64</sup> Pero yetocque senme oc de namejuan de amo nanquiyecneltoaj nijín notanexutilisuan.

Huan ijcón quijsa Jesús porín ipa quimatiya desde ne achtopa ya de aconime amo quiyecneltoacasquíaj. Huan no Jesús quimatoya ya de aconi tagat quitemactis inmaco in tayecanani para ma quimictisque. <sup>65</sup> Ica ya nojón in Jesús quijsa ya ijcuín:

—Amo aquen huelis ejcos nohuantzin para motemactis nohuan como amo achtopa Notajtzin Dios quimonequiltía quinalcuís.

<sup>66</sup> Desde ijcuac miacque imomachtijcahuan de Jesús quicauque ya itamachtilis de Jesús huan amo ihuantzin nemíaj oc. <sup>67</sup> Ijcuación in Jesús quintajoltij de ne majtactionomen imomachtijcahuan ijcuín:

—¿Xe namejuan no nanquinequij nannechahuasque de notanexutilisuan?

<sup>68</sup> Pero in Pedro Simón quinanquiliij ijcuín:

—Notecotzin, ¿aconi oc huelis ihuan timotoquisque para huelis techpalehuijtiyás? Ta, sayó Tejuatzin ticonpía ne tanexutilisme ten cualcui ne nemilis nachipa. <sup>69</sup> Porín tejuan timitzneltoacque ya huan ticajscimatque ya que Tejuatzin tion Cristo Temaquixtijque, huan Tejuatzin tion Yolchipactzin, huan tion Teconetzin de Totajtzin Dios ten yoltica.

<sup>70</sup> Ijcuación in Jesús quinanquiliij ijcuín:

—Cuali nanquimatij namejuan in majtactionomen que Nejuatzin namechijitac ya para ximomachtijtiyacan de Nejuatzin, masqui senme de namejuan quisaquiu queme se amocuali tagat.

<sup>71</sup> Huan ijcón Jesús tajtoya de ne Judas den teconeu de Simón Iscariote. Porín Judas yejua ne quitemactis Jesús inmaco in tayecanani para quimictisque, masqui in Judas ipa poutinemía ihuan ne majtactionomen imomachtijcahuan de Jesús.

### Nican iicnihuan de Jesús Temaquixtisque amo quineltoquilisque de Yejuatzin

**7** Huan satepan de nochi nijín ten quichihuac ya Jesús, Yejuatzin nentinemía ne Galileajcopaca. Pero Yejuatzin amo quinequía nentinemis Judeajcopaca porín ompa in tayecanani judíos quinequía quimictisque. <sup>2</sup> Huan ejcotihualaya ya ne iluit den tagayot judíos queman quichijchihuayaj ne xajcaltzitzin. <sup>3</sup> Ica ya nojón ne iicnihuan de Jesús quilisque ijcuín:

—Xiquisa de nican Galileajcopaca huan xiyó ne Judeajcopaca para ma ompa no ma quitacan momomachtijcahuan nochi in mohuiscatequime ten ticchuitinemi. <sup>4</sup> Porín como se quinequi ma teixmatican ica ne ten se quichiutinemi, ijcuacán ma amo se quichtacachiutinemi san, ya que melau ticchiutinemi nijín mohuiscatequit. Pos monequis ximotenextiliti senteixteno ihuan in talticpacuani.

<sup>5</sup> Huan nión no senme de niicnihuan quineltoquilisque de Yejuatzin. <sup>6</sup> Ijcuacán in Jesús quinilij iicnihuan ijcuín:

—Ayamo ejcoc ne hora cuac monequis nimotenextilis ica notequihuan. Pero namejuan cuali nanuelisque nanmotenextilisque de namotamachilis ten yesqui hora. <sup>7</sup> Huan namejuan in talticpacuani amo huelis namechtahuelitasque. Pero Nejuatzin melau nechtahuelitaj porín niquinteluilía in talticpacuani de que amo cuali nintachihualisuan ten quichiutinemij. <sup>8</sup> Xiyacan namejuan, nocnihuan, xiiluititij. Nejua amo niyás niiluititiu porín ayamo ejcoc ne hora cuac monequi nimotenextilis senteixteno ihuan in pueblojuani.

<sup>9</sup> Huan ijcón mochihuac que cuac Jesús nochi quintamiilij ya, ijcuacán Yejuatzin mocahuac oc ompa ne Galileajcopaca.

### Nican Jesús Temaquixtisque yajqui iluitito queman ne tagayot judíos quinchijchihuayaj ne xajcaltzitzin

<sup>10</sup> Huan satepan mochihuac que cuac niicnihuan de Jesús yajque ya iluititoj ne Jerusaléncopaca, ijcuacán Jesús no yajqui iluitito, masqui Yejuatzin moichtacahuiyac huan amo yajqui senteixteno. <sup>11</sup> Huan tech ne iluit in tayecanani judíos quitemoayaj Jesús huan motajtoltiayaj ijcuín:

—¿Can nentinemi nojón tagat ten monotza Jesús?

<sup>12</sup> Huan ijcón in tagayot judíos motajtoltehuiayaj se huan ocsé ipampa de Jesús. Huan sequin quijtoayaj ijcuín: “Yejua ne se cuali tagat”. Huan osequin quijtoayaj ijcuín: “Yejua ne se tagat ten amo yolcuali porín sayó quincaycayautinemi in tagayot”. <sup>13</sup> Pero nochi ne ten quijtoayaj in tagayot judíos, amo quichicaucaijtoayaj porín nochi yejuan quinyolmohuiliayaj ne tayecanani judíos. <sup>14</sup> Huan ipa tajcotitiaya ya ne iluit cuac Jesús calayic tech ne tiopan den judíos huan pehuac quínmachtiaya in tagayot. <sup>15</sup> Huan in tagayot judíos semi quihueyimoucaitayaj itamachtilis de Jesús huan quijtoayaj ijcuín:

—¿Quenín huelis quimatis nijín tagat de míac tataman tanextilisme? Ta, como amo cana momachtito.

<sup>16</sup> Ijcuacán Yejuatzin quinnanquilij ijcuín:

—Nochi nijín notanextililisuan amo hualehuac de nejua notanemililis san. Ta, hualeutoc de Notajtzin Dios ten nechualtitanic. <sup>17</sup> Huan nochi neques ten quinequisque quichihuasque ten Notajtzin Dios quimonequiltía, yejuan nojonques melau Dios quinajsicamatiltis de notanextililisuan. Huan ijcón yejuan quieyequitasque de

que cox hualeutoc de Totajtzin Dios nijín notanexutilisuan oso cox eutoc de ne-  
jua san notanemililis san. <sup>18</sup> Porín nochi ne naquen tajtoa ica yejua itanemililis san,  
yejua ne ijcón quichiutinemi sayó para ma quihueyichihuacan in tagayot. Pero Neju-  
atzin nicchiutinemi notequiu para ma in tagayot ma quicualnextican Notajtzin Dios  
ten nechualtitanic. Ica ya nojón namechilía ten yec melau. Huan tech noyolo amo  
teyi ne tacajcayahualis. <sup>19</sup> ¿Xe amo melau que ne tanahuatijque Moisés namech-  
mactilij ya ne tanahuatilme de Dios? Pues quema, Moisés namechmactilij ya; pero  
namejuan amo nanquintacamatiij nijín tanahuatilme. Huan, ¿queyé namejuan nan-  
quinequij nannechmictisque?

<sup>20</sup> Ijcuacán in tagayot quinanquilijque Jesús ijcuín:

—Tejua ticpía moyolitic se amocuali ejecat. ¿Aconi quinequi mitzmictis?

<sup>21</sup> Huan in Jesús ocsepa quinnanquilij in tagayot ijcuín:

—Huan nochi namejuan nannechueyimoucaitaque porín nicchihuac sesan mo-  
huiscatequit tech ne tonal de nesehuilis. <sup>22</sup> Pero Moisés namechmactilij ya ne  
tanahuatil de que xiquinnesscayotican tech ninacayo den oquichpilme ten quipíaj  
chicueyi tonal para ijcón moixnextis que yejuan pohuij ihuan Dios. Pero Moisés  
yejua amo quipehualtij nijín tanahuatil. Ta, yejuan nojonques nanmohuejcautatuan  
ijcón quichiutihuitze. Ica ya nojón namejuan nanquinnesscayotijtinemij in oquich-  
pilme masqui tech in tonal de nesehuilis. <sup>23</sup> Huan namejuan nanquinnesscayotij  
in oquichpilme, masqui tech in tonal de ne nesehuilis, para ijcón nanquitacama-  
tis que ne tanahuatilme de Moisés. Huan como ijcón no namejuan nanquichiutine-  
mij, ¿queyé namejuan nanyolcualanij nohuan porín Nejuatzin nicyecajscapajtij ne  
tagat tech ne tonal de nesehuilis? <sup>24</sup> Amo xiquinixcomacacan acsame que yejuan  
tajtacolejque sayó tenica nanquinitilijtinemij que yejuan quichihuaj. Ta, monequi  
achto namejuan xicyecajscamatican cox cuali oso amo cuali nintachihualisuan, para  
ijcón huelis nanquinxcomacasque ica ten melau.

### **Nican in tagayot motajtoltiayaj que xa yejua ya nijín Jesús yesqui in Cristo Temaquixtijque**

<sup>25</sup> Ijcuacán ocsequin pueblojuani ten calyetoyaj Jerusaléncopaca peuque motaj-  
toltiayaj ijcuín:

—¿Xe amo yejua ne Jesús in tagat ten quitemojtinemij in tayecanani judíos para  
quimictisque? <sup>26</sup> Xiquitacan san nepa tajtojtoc senteixteno huan amo aca teyi quilía.  
¿Xe melau que in tayecanani no cajscamatque ya que nijín tagat Jesús que yejua  
ya ne in Cristo Temaquixtijque? <sup>27</sup> Pero tejuan cuali ticmatocque de can huitza nijín  
tagat Jesús. Ta, cuac hualas in Cristo Temaquixtijque, ijcuacán amo aquen quimatis  
de can hualehuas.

<sup>28</sup> Huan queman Jesús tamachtijtoya tech in tiopan de judíos, ijcuacán Yejuatzin  
quincaquilij ne matájtanti den calyetoni de Jerusaléncopaca. Ica ya nojón Yejuatzin  
quinnanquilij ijcuín:

—¿Cox melau que namejuan cuali nannechixmatij? Huan, ¿xe cuali nanquimatij  
de can nihuitza? Pero Nejuatzin amo nihuala nican talticpac porín Nejuatzin no-  
tanejnequilis san. Ta, nihuala porín nechualtitanic Notajtzin Dios, huan Yejuatzin  
Yolmelahuactzin, huan ne Notajtzin Dios namejuan amo nanquixmatij. <sup>29</sup> Huan Ne-  
juatzin yec melau niqixmati Notajtzin Dios porín nihuitza imaco Yejuatzin, huan  
Yejuatzin nechualtitanic.

<sup>30</sup> Huan ica por nijín tajtolme de Jesús ne tayecanani judíos quinequíaj quiq-uitzquisque Jesús queme se preso. Pero amo aquen quiajcolquitzquijtoj porín tech ne tonal ayamo ejcoc in hora cuac monequis quiqiztquisque Jesús queme preso. <sup>31</sup> Huan cuac mochiutoc nochi nijín, ijcuacón miacque tagayot taneltocacque de Jesús huan quijtoayaj ijcuín:

—Axcan ticneltocacque ya que nijín Jesús yejua in Cristo Temaquixtijque ten hualasquía. Porín amo aquen huelis oc quichihuas cachi hueyi mohuiscatequime huan que ne chihualisme ten quichiutinemi nijín Jesús, como amo yejua in Cristo Temaquixtijque.

### **Nican in tayecanani fariseos quinaltitanque sequin mayolme para ijcón quiqiztquisque Jesús queme preso**

<sup>32</sup> Huan in tayecanani fariseos quincaquilijque in tagayot que motajtoltehuiayaj se huan ocsé ica por itajtolis de Jesús. Ica ya nojón in fariseos huan in tayecanani tiopix-came quinaltitanque sequin tiopan mayolme para ijcón quiqiztquisque Jesús queme preso. <sup>33</sup> Ijcuacón in Jesús quinilij in tagayot ijcuín:

—Amo huejcahuas oc namohuan niyetoti. Huan axcan ocsepa nicajsiti Notajtzin Dios ten nechualtitanic nican talticpac. <sup>34</sup> Ijcuacón namejuan nannechtemosque huan amo nannechajsisque oc, porín namejuan amo huelis nanyasque ne campa Nejuatzin niyajtoc.

<sup>35</sup> Ijcuacón in tagayot judíos peuque motatajtoltlíaj se huan ocsé yejuan san ijcuín: —¿Can quinemilía yati nijín Jesús porín quijtoa que amo huelis tiajsisque oc tejuan? ¿Xe quinemilía yati yetoti ompa intzalan in tagayot judíos ten no callyetocque ihuan in pueblojuani griegos para ompa quinmactis ne griegos in tanahuatil de Moisés?

<sup>36</sup> Huan no motatajtoltiayaj in judíos ijcuín: —¿Toni quijtosnequi nijín den Jesús techilij ya que nannechtemosque pero amo nannechajsisque oc, porín namejuan amo huelis nanyasque ne campa Nejuatzin niyetos?

### **Nican tajtoa de que pepexocatos se iyolijtic ne atzin ten yoltica**

<sup>37</sup> Huan tech ne tonal tantoya ya in iluit, yejua ne in cachi hueyi iluitonal. Huan tech ne tonal moquetzac Jesús intzalan in tagayot huan quinchicaucailij ijcuín:

—Como acsame de namejuan nanyolamiqij, ijcuacón ma xihualacan nohuan huan ma xitayican nijín atzin ten Nejuatzin namechtayocolis. <sup>38</sup> Huan in Tajcuilolamatzin de Dios quijtoa ijcuín: “Nochi naquen yec tacuautamatisque nohuan, yejuan nojonques ninyolijtic pepexocatos huan toyautos atzin ten yoltica”.

<sup>39</sup> Yejica nijín tajtolme Jesús quinequía quinajsicamatiltis que nochi neques ten quineltoacasque Jesús, yejuan nojonques quiselisque tech ninyolitic in Yecticatzin Espíritu. Pero ayamo ejcoc ya in Yecticatzin Espíritu ma yetinemi intzalan in talticpacuani porín Totajtzin Dios ayamo quihueyipanchihuaya Jesús.

### **Nican tajtoa de queniu mocualancaxejxelojque in tagayot ica por in tajtolztzin de Jesús Temaquixtijque**

<sup>40</sup> Huan sequin den tagayot cuac quicaquilijque ne tajtolis de Jesús, ijcuacón yejuan quijtojqe ijcuín:

—Yec melau ya nijín tagat Jesús yejua ne in hueyi tanahuatijque de Dios ten no monequía hualas.

<sup>41</sup> Huan ocsequin quiytoayaj ijcuín:

—Ne Jesús melau yejua Cristo Temaquixtijque.

Pero cachi oc ocsequin quiytoayaj ijcuín:

—¿Quenín huelisquía ehuasquía Cristo Temaquixtijque campa ne pueblo Galileajcopaca? <sup>42</sup> Porín quiyto in Tajcuilolamatzin de Dios que in Cristo Temaquixtijque monequi de que Yejuatzin yesqui teconeu den ne huejcautayecanque in rey David. Huan no monequi yolis campa ne pueblo de Belén porín ompa no yolico in rey David.

<sup>43</sup> Ica ya nojón in tagayot mocualancaxejxelojque ica por nijín tajtolme de Jesús.

<sup>44</sup> Huan sequin mayolme quinequíaq quiquitizquisque Jesús queme preso, pero amo aquen huelic quiajcolquitquis.

### Nican in tayecanani judíos amo quineltoquilijque Jesús Temaquixtijque

<sup>45</sup> Huan ijcón nochi in tiopan mayolme mocuepque campa ne sen oloch yetoyaj in fariseos huan in tayecanani den tiopixcame. Huan de ompa ne tayecanani quintajoltijque in mayolme ijcuín:

—¿Queyé amo nancualicque ne Jesús?

<sup>46</sup> Ijcuación in tiopan mayolme tananquilijque ijcuín:

—Amo ticualicque porín amo queman aca ijcón ticaquilíaj se tagat queme yejua technoynotzaya.

<sup>47</sup> Ijcuación in fariseos ocsepa quintajoltijque ijcuín:

—¿Xe namejuan no nanmoyolcayahuaj ica ne Jesús? <sup>48</sup> Cualí nanquimatij que amo senme den totayecancahuan quineltoquilijque Jesús. Huan amo no senme de tejuan tifariseos no ticneltocaj ne Jesús. <sup>49</sup> Pero nochi nijín tagayot quinelto caj de Jesús porín amo quiyecajsicamatij in tanahuatil de Moisés. Ica ya nojón ne tagayot tatelchihualme san.

<sup>50</sup> Huan se tagat monotza Nicodemo no catca senme den fariseos. Yejua ne yajca quinoynotzato Jesús tech se tayohuac. Huan axcan yejua quiniluij in ocsequin fariseos huan quinilij ijcuín:

<sup>51</sup> —Tejuan cualí ticmatij que in tanahuatil de Moisés amo techcauilía que ma tejuan ma tichelchihuacan acsá como amo achtopa tiyasque huan tictajoltentacausque de toni quichihua ne tagat. Huan ijcón ticyecmatisque toni quichiutinemic.

<sup>52</sup> Ijcuación yejuan in tayecanani fariseos quinanquilijque ne Nicodemo ijcuín:

—¿Xe yejua no tipohui ne Galileajcopaca? Huan axcan para ticyecmatisque, cachi cualí xictemoliti tech in Tajcuilolamatzin de Dios huan ompa tiqitas que nión se tanahuatijque de Dios hualehuas ya de ne Galileajcopaca.

### Nican tajtoa de ne situat ahuilnenque

<sup>53</sup> Huan de ompa yajqui sejsé de nichan.

**8** Pero in Jesús yajqui tejcoto tech ne tepet ten monotza Olivos. <sup>2</sup> Huan imostica cuac san tanesic ya, ijcuación in Jesús ocsepa mocuepac huan yajqui calaquito campa ne hueyi tiopan den judíos. Huan de ompa nochi in tagayot motoquicoj campa Jesús. Huan Yejuatzin ompa tiopanijtic motalito huan pehuac quinmachti-

aya in tagayot ica in Tajtoltzin de Dios. <sup>3</sup> Huan de ompa ne tanextiliani den tanahuatil de Moisés huan in fariseos, yejuan cualcuicque se sihuat campa Jesús, porín ne tayecanani cajsicaj ya ne sihuat cuac motajtacolmacatoya tech in ahuilnemilis. Huan de ompa ne tayecanani quitalitoj ne sihuat tatajcoyan de nochi ne tagayot den tiopanijtic yetoyaj. <sup>4</sup> Ijcuacón in tayecanani quilijque Jesús ijcuín:

—Tamachtijque, nijín sihuat tejuan ticajsicque ne cuac motajtacolmacatoya tech in ahuilnemilis. <sup>5</sup> Huan in tanahuatil de Moisés technahuatílfa ma tictepoxonican de nojón taman de sihuat. Pero tejava, ¿toni tiquixejecoa?

<sup>6</sup> Huan yejuan in tayecanani ijcón quijtojqe porín quinequíaj quixejecoltisque itamachilisuan de Jesús, para ijcón huelisquía ica quiteluilisquía in Jesús ica tensá tajtacol. Ijcuacón in Jesús motomotzoj, huan pehuac tajcuíloa ica imajpil talixco. <sup>7</sup> Pero queme in tayecanani quisentocayaj quitajtoltiayaj Jesús, ica ya nojón Jesús momelaxquetzac huan quinilij in tayecanani ijcuín:

—Aquen yesqui de namejuan ten amo quipía tajtacol, yejava ne ma achtopa ma quitepoxoni ne sihuat.

<sup>8</sup> Huan ijcón in Jesús ocsepa motomotzoj huan pehuac ocsepa tajcuíloa talixco. <sup>9</sup> Huan in tayecanani cuac quicaquilijque nijín tajtolme de Jesús, ijcuacón yejuan no quiyolnemilijque que yejuan no tajtcolejqe. Huan de ompa peuque cacalanquisaj sejsé. Achto peuque quiquisaj de ne cachi huehuentzitzin. Huan cuac nochi in tagayot tamic quisque ya, ijcuacón mocahuac sayó in Jesús iselti ihuan ne sihuat ten yetoya tatajco de yejuan. <sup>10</sup> Huan in Jesús ocsepa momelaxquetzac. Pero amo aquen oc quinitac. Ta, sayó ne sihuat ten ompa yetoya. Ica ya nojón Yejuatzin quilij ijcuín:

—Tejava sihuat, ¿can yetocque ne naquen mitzteluilayaj ya? ¿Xe amo senme de yejuan mitztelchihuac?

<sup>11</sup> Ijcuacón in sihuat quilij Jesús ijcuín:

—Amo, Notecotzin, amo aquen nechtelchihuac.

Ijcuacón in Jesús quilij ijcuín:

—Pues nión no nejua nimitztelchihuas. Ta, axcan xiyó mochan huan amo ocsepa ximotajtacolmacati.

### **Nican tajtoa de que Jesús Temaquixtijque Yejuatzin ya in tanextzin ten quinyoltahuíla in talticpacuani**

<sup>12</sup> Huan cachi satepan Jesús ocsepa quinnojnnotzac in tagayot huan quinmachtiaya ica nexcuítal ijcuín:

—Nejuatzin ya queme yesquía nitanextzin huan niqinyoltahuíla in talticpacuani. Huan nochi neques ten nechtoctilisque huan momachtisque de notanahuatíluan, yejuan nojonques quipiasque ne neyoltahuíllis ten cualcui ne nemilis nachipa. Huan ijcón amo queman nemisque tayohuayanijtic.

<sup>13</sup> Ijcuacón in tayecanani fariseos quilijque Jesús ijcuín:

—Tejava timotetajtohuíltía de tejava san. Ica ya nojón motajtoluan amo cualtías.

<sup>14</sup> Pero ocsepa Jesús quinnanquilij ijcuín:

—Nochi niqijtoa nochi cualtía, masqui nejua nimotetajtohuíltía de nejua san. Porín nejua cuali nicmati de can nihualehuac huan de can niyajtoc. Pero namejuan amo nancajsicamatij den can nihualehuac huan nión no nanquimatij can niyajtoc. <sup>15</sup> Huan namejuan nanteixcomacatinemij sayó ica in tanemililis den tagayot

san. Pero Nejuatzin amo aquen niquinixcomacas ica in tanemililis den tagayot san. <sup>16</sup> Pero como Nejuatzin niquinixcomasquía in tagayot ica tensá, ijcuación notaixejecolis yesqui cuali. Porín Nejuatzin amo niteixcomaca noselti san. Ta, Yejuatzin Notajtzin Dios ten nechualtitanic nican talticpac, Yejuatzin huan Nejuatzin tiquinsepanixcomacaj in tagayot. <sup>17</sup> Huan tech ne tanahuatil de Moisés ten namejuan nanquipíaj, ompa ijcuiliutoc que cuac ome taca tetajtohuíaj sansé san, ijcuación monequivis xiquinyecneltoquilican ten quisenijtoaj. <sup>18</sup> Huan axcan ijcón mochiutoc nican, porín Nejuatzin nimotetajtohuiltía de Nejuatzin san, huan no Notajtzin Dios nechte-tajtohuiltía de Nejuatzin. Huan Notajtzin Dios nechualtitanic nican talticpac.

<sup>19</sup> Ijcuación in fariseos ocsepa quitajtoitijque Jesús ijcuín:

—¿Can yetoc, pos, motajtzin?

Ijcuación in Jesús quinnanquiliij ocsepa ijcuín:

—Namejuan amo nannechixmatij huan amo no nanquixmatij Notajtzin Dios. Porín tajcón nannechixmatisquíaj Nejuatzin, no ijcón cuali huelisquía nanquixmatisquíaj Notajtzin Dios.

<sup>20</sup> Huan nochi nijín tajtolme Jesús quiijtoaya cuac tamachtijtoya ne tiopanijtic campa ne yetoyaj ne tomin ehualonime campa in tagayot quitemacayaj para Dios de nintetayocolil. Pero amo aquen quiquitizquijque Jesús queme preso porín ayamo ejcic in tonal cuac monequía quiquitizquisque.

### **Nican Jesús quinmachtía nimomachtijcahuan que campa Yejuatzin yajtoc, yejuan amo huelis ejcosque**

<sup>21</sup> Huan ijcón Jesús ocsepa quinilij in tagayot ijcuín:

—Nejua niyó ya huan namejuan nannechtemosque, pero amo nannechajsisque. Huan ijcón namejuan nanmiquisque huan nancuicasque oc namotajtacoluan, huan amo huelis nanajsisque campa Nejuatzin niyajtoc.

<sup>22</sup> Ijcuación in tagayot judíos motajtoltiayaj se huan ocsé ijcuín:

—¿Xe ne Jesús momictiti yejua san? Porín quiijtoa ijcuín: “Que campa nejua niyás, namejuan amo huelis nanajsisque”.

<sup>23</sup> Ijcuación in Jesús quinajscamatiltij ijcuín:

—Nochi namejuan nanpohuij nican talticpac, pero Nejuatzin nipoutoc nepa eluiyactzinco. Huan namejuan melau nantalticpacuani san, pero Nejuatzin amo nipoutoc de nican talticpac. <sup>24</sup> Ica ya nojón namechilía que namejuan nanmiquisque huan nancuicasque oc namotajtacoluan, como amo nannechyecneltoacaj que Nejuatzin ni Cristo Temaquixtijque.

<sup>25</sup> Ijcuación ocsepa in tagayot judíos quitajtoitijque Jesús ijcuín:

—¿Huan tejua toni tichiuque?

Pero Jesús quinnanquiliij ijcuín:

—Nejua ipa namechtapohuijtihuitz ya desde ne tonal cuac nictzinpehualtij notequiu. <sup>26</sup> Nejuatzin nicpía mías taman tamachilis para ica namechilis, huan no mías taman tanahuatil nicpixtoc para ica namechixcomacas. Pero amo nicchihuati de nejua notanejnequilis san. Ta, namejuan de nantalticpacuani namechmachtijtoc de ne tamachtilis ten nicaquiliij de Notajtzin Dios ten nechualtitanic nican talticpac. Huan nochi ten Yejuatzin quiijtoa, nochi melau.

<sup>27</sup> Pero in tagayot judíos amo cajsicamatque que Jesús quinnojnötzaya den Itajtzin Dios. <sup>28</sup> Ica ya nojón Jesús ocsepa quinilij ijcuín:

—Cuac namejuan nannechajcocusque huan nannechcuoupampilosque Nejuatzin ni Yectagatzin, ijcuacón nancajsicamatisque que Nejuatzin ni Cristo Temaquixtíjque. Huan no nancajsicamatisque que nochi ten Nejuatzin nicchiutinemi amo de nejua no tanejnequilis san. Ta, sayó niqúijtojtinemi ten Notajtzin Dios nechnextilij ya.<sup>29</sup> Huan Notajtzin Dios Yejuatzin ne nechualtitanic nican talticpac, huan Yejuatzin yetinemi nohuan. Huan Notajtzin Dios amo queman nechsencahuas noselti porín Nejuatzin nachipa nicchiutinemi sayó ne ten Yejuatzin quipactía.

<sup>30</sup> Huan cuac Jesús quitamiijtoj ya nochi nijín tajtolis, ijcuacón huel miacque tagayot quineltoquilijque de Yejuatzin.

### **Nican Jesús quinmachtía in tagayot de quenín in yec melau Tajtolztzin de Dios namechtojtomas de namotajtacoluan**

<sup>31</sup> Huan ijcón Jesús ocsepa quinnojtzaya in tagayot judíos ten quineltoquilijque Yejuatzin, huan Jesús quinilij ijcuín:

—Como namejuan nanquisentocaj nanquiyectacamatiyohue nochi ten namechilijtoc, ijcuacón melau nanmochihuasque nannomomachtijcahuan.<sup>32</sup> Huan ijcón nancajsicamatiasque de ne Tajtolztzin ten yec melau. Huan ne yec melau Tajtolztzin, yejua ne namechtojtomatiu de namotajtacoluan.

<sup>33</sup> Ijcuacón yejuan quinanquilijque Jesús ijcuín:

—Tejuan titeconejuan de ne huejcautanahuatijque Abraham huan amo queman aca techzajtzacuiliayaj queme ne taquehualme ten tacohualme. ¿Quenín huelis tiquijtoa que tejuan techtojtontiyás de totajtacoluan ica por ne Tajtolztzin de Dios?

<sup>34</sup> Huan ijcón in Jesús quinilij ijcuín:

—Yec melau ten namechilía que nochi neques ten motajtacolmacatinemij, yejuan nojonques in tajtacol quinmajpachojtoc tech ninyolojuan huan yejuan mocahuaj queme taquehualme de ne tajtacol.<sup>35</sup> Huan no cuali nanquimatij que se taquehual amo nachipa poutinemis ihuan ichancahuan den teco. Ta, yejua ne in teconeju den patrón, yejua ya ne melau nachipa poutos tech ne ichan huan se tonal quinyecanas ichancahuan.<sup>36</sup> Huan queme Nejuatzin ni Conetzin de Dios namechtojtontiyás de namotajtacoluan, ijcuacón melau ixnestiu que Nejuatzin namechajchiuilitiu de ne tajtacol ten namechmajpachojtoc ya.

<sup>37</sup> Huan Jesús ocsepa quinilij ijcuín:

—Quema, cuali nicmati que namejuan nanteconejuan de ne huejcautanahuatijque Abraham, pero namejuan nanquinequij nannechmictisque, porín namejuan amo nanquinequij nanquiselisque in tajtolme ten namechilijtoc ya.<sup>38</sup> Nochi ten niqúitac ya huan nochi ten nicaquic ya nepa iixpantzinco Notajtzin Dios, yejua ne ica namechnojnotztoc. Pero namejuan sayó nanquichiutinemij ten nanquicaquilijque de namotatuan.

### **Jesús quinilij in tacaquini que nintat yejua in amocuali Satanás**

<sup>39</sup> Huan in tagayot quinanquilijque Jesús ijcuín:

—Tejuan totat yejua in Abraham.

Pero no Jesús quinilij ijcuín:

—Ta ijcón melau yesquía que nanteconejuan den ne Abraham, no ijcón nanquichihuasquáj ijcón queme yejua quichihuaco.<sup>40</sup> Huan masqui Nejuatzin namechyecnojtztoc ya ica ten melau Tajtolztzin ten Notajtzin Dios nechnextilij ya,



pero namejuan ipa nanquinequij nannechmictisque. Pero ne Abraham amo queman ijcón quichihuani. <sup>41</sup> Ta, namejuan axcan nanquichiutinemij ijcón queme namotat quichiutinemic.

Ijcuacón in tagayot quilijque Jesús ijcuín:

—Tac tejuan amo sayó titeahuilcateconejuan. Ta, ticpíaj sayó se totat huan Yejuatzin ne in Totajtzin Dios.

<sup>42</sup> Pero in Jesús ocsepa quinilij ijcuín:

—Como melau yesquía namejuan namotat yejua ne Totajtzin Dios, ijcón namejuan nannechtasojtasquíaj, porín Nejuatzin nihualehuac iixpantzinco Totajtzin Dios. Huan axcan nihuala nican niyetoc namohuan, huan Nejuatzin nihuala amo sayó de notanejnequilis de nejua san. Ta, Totajtzin Dios nechualtitanic nican talticpac. <sup>43</sup> ¿Queyé namejuan amo hueli nancajsicamatij ten namechilijtoc yequintzin? Pues namechilía que amo nancajsicamatij porín amo nantaxicoaj de nanquicactiyasque notajtoltzin. <sup>44</sup> Huan namejuan namotat yejua ne in amocuali Satanás. Huan nochi namejuan nanpoutocque de yejua. Huan namejuan sayó nanquinequij nanquichiutinemisique ijcón queme yejua quinequi. Huan ne amocuali Satanás ipa temictijque desde ne tonal cuac tatzinpehuac nochi. Huan yejua amo queman quitequiltíia ten melau, huan amo queman tajtoa ica ten melau. Huan cuac yejua ne Satanás quijtoa tensá xolopijyot, ne itajtol melau hualeutoc iyolijtic ne Satanás, porín yejua sayó xolopijtijtinemi san, huan yejua ya in tetat den nochi neques ten xolopijtijtinemij. <sup>45</sup> Ica ya nojón namejuan amo nannechneltocaj huan Nejuatzin namechilijtoc ten melau. <sup>46</sup> Huan, ¿catischejua de namejuan huelis nannechnextilisique que nejua nimotajtacolmacac? Huan como Nejuatzin namechilijtoc ten melau, ijcuacón, ¿queyé amo nannechneltoquilíaj? <sup>47</sup> Huan nochi neques ten yec melau poutocque ihuan Notajtzin Dios, yejuan nojonques quicaquilisque in Tajtoltzin de Notajtzin Dios. Pero queme namejuan amo nanpohuij de Dios, ica ya nojón amo nanquinequij nannechcaquilisque de Notajtoltzin.

**Nican Jesús quinmachtía in tacaquini que yejua mismo in Cristo  
Temaquixtijque ten yoltinemiaya achtopa que yolisquía Abraham**

<sup>48</sup> Ijcuacón in tagayot judíos ocsepa quilijque Jesús ijcuín:

—Yec melau queme tiquijtoaj que tejua tipohui ihuan ne pueblojuani den calyetocque ne Samariajcopaca. Huan tejua no ticpía moyolijtic se amocuali ejecat.

<sup>49</sup> Ijcuacón in Jesús quinnanquilij ijcuín:

—Amo nicpía noyolijtic nión se amocuali ejecat. Ta, nejua nicchiutinemi ne ten sayó para nicueyipanchihuas Notajtzin Dios. Pero namejuan sayó nannechmohuispolojtinemij. <sup>50</sup> Huan Nejuatzin amo sayó nictemojtinemi tagayot para nechueyipanchihuasque. Ta, Notajtzin Dios Yejuatzin ne quitemojtinemi tagayot para nechueyipanchihuasque. Huan Yejuatzin ipa cuali quinixcomacas ne tagayot de amo nechueyipanchihuj axcan. <sup>51</sup> Huan yec melau ten namechilía Nejuatzin que nochi neques ten quiyecacisque ten niquinilía huan quitacamatinemisque no Tajtoltzin, yejuan nojonques quipiasque ne nachipa nemilis huan amo queman miquisque.

<sup>52</sup> Ijcuacón ocsepa in tagayot judíos quinnanquilijque Jesús ijcuín:

—Axcan melau ticyecajsicamatij que tejua ticpía moyolijtic se amocuali ejecat. Porín ne Abrahám huan nochi ocsequin tanahuatiani de Dios momiquilijque

ya. Pero tejua tiquijtoa ijcuín: “Nochi naquen quiyecaquisque huan quitacamatisque ten niquinilía, yejuan nojonques quipiasque nemilis nachipa huan amo que-man miquisque oc”.<sup>53</sup> ¿Xe tejua cachi tihueyichiuque huan que ne tohuejcautat Abrahám? Ta, yejua no momiquilij huan nochi in ocsequin tanahuatiani de Dios momiquilijque. ¿Huan toni ticnemilía que tiaconi tejua?

<sup>54</sup> Huan de ompa ocsepa in Jesús quinnanquilij ijcuín:

—Tacán nejua san nimohueyipanchihuasquía san, ijcuacán nohueyipanchihualis amo teyi cualtiasquía. Pero Notajtzin Dios Yejuatzin ne nechueyipanchiutoc axcan. Huan namejuan no nanquijtoaj que ne Notajtzin Dios que Yejuatzin no namotat.<sup>55</sup> Huan melau que namejuan amo nanquixmatij Notajtzin Dios, pero Nejuatzin melau niquixmati Notajtzin Dios. Huan tacán nejua niquijtosquía que amo niquixmatisquía Notajtzin Dios, ijcuacán no niyesquía nixolopi san queme namejuan nanxolopijme san. Huan Nejuatzin melau nicyecajsicaixmati Notajtzin Dios huan nictacamatinemi ten Yejuatzin nechilúia ma nicchihua.

<sup>56</sup> Huan no Jesús quinilij ijcuín:

—Huan namohuejcautat Abraham, yejua ne moyolpactiaya porín quimatiaya que quitas ne tonal cuac Nejuatzin nihualas nican talticpac. Huan melau in Abrahám quitac in tonal cuac nihuala; ica ya nojón yejua semi mohueyiyolpactij.

<sup>57</sup> Ijcuacán in tagayot judíos ocsepa quiluijque Jesús ijcuín:

—Tejua ayamo ticajxitía nión ya tajco ciento xihuit. ¿Quenín huelis tejua tiquijtoa que tiquitac ya ne Abraham?

<sup>58</sup> Huan in Jesús quinnanquilij ijcuín:

—Yec melau ten namechilía que achtopa que yolisquía ne Abraham, Nejuatzin ipa niyoltinemi. Porín ni Dios ten nachipa niyoltinemi.

<sup>59</sup> Huan ica por nojón tajtolme ten quiytoj Yejuatzin, ijcuacán in tagayot judíos cajocque sequi tet para quitepoxonisque Jesús. Pero Yejuatzin motaatito de yejuan huan niman quisac de ne tiopanijtic, huan de ompa panoc tatajco de nochi in tagayot huan yajqui ocseco.

### Nican Jesús Temaquixtijque quitachialtij se tagat den ipa yolic ixpojpyot

**9** Huan se tonal cuac Jesús yajtoya ya tech se ojti, ijcuacán Yejuatzin quitac se tagat ten ipa yolic ixpojpyot.<sup>2</sup> Huan imomachtijcahuan de Jesús quitajtoltijque Yejuatzin ijcuín:

—Totamachtijcau, ¿queyé yolic ixpojpyot ne tagat? ¿Xe yolic ixpojpyot porín de nintajtacol den nitatuan oso de yejua itajtacol san?

<sup>3</sup> Huan ijcón in Jesús quinilij ijcuín:

—Ne tagat amo yolic ixpojpyot porín den itajtacol, huan nión no porín nintajtacoluan den nitatuan. Ta, cachi cuali ma tiquijtocan que ne tagat yolic ixpojpyot para ma ijcón monexti tech ninacayo in chicaucahuelilis ten Dios huelis quichihuas.<sup>4</sup> Porín mientras cuali tanestoc monequi ticchiutinemisque nijín tequit ten technahuatilij ya Notajtzin Dios ne naquen nechualtitanic. Pero axcan tapoyautihuitz ya huan ijcón satepan amo aquen huelis tequitis oc.<sup>5</sup> Mientras Nejuatzin niyoltinemi nican talticpac, nejua ya queme niyesquía se tanextzin ten niquinyoltahuilía in taltipacuani.

<sup>6</sup> Huan cuac nochi nijín quintamiilij ya in tagayot, ijcuacán in Jesús talpan tachi-jchac, huan quichijchihuac tzictzin soquit ica ne ichijchi. Huan de ompa quiioxjilij

niixtololohuan ica ne soquit ne tagat ten ixpojpayot. <sup>7</sup> Ijcuacón in Jesús quilij ne tagat ixpojpayot ijcuín:

—Axcan nimantzin xiyó ximixamiti ne campa ne amel ten monotza Siloé. Nijín tocayit quijtosnequi Tahualtitanil.

Huan ijcón ne tagat ixpojpayot yajqui moixamito. Huan satepan cuac mocuepac ya, ijcuacón hueliaya tachíac. <sup>8</sup> Ijcuacón ne ichancahuan huan ne ten ipa neachtopa quitztinemíaj que ixpojpayot, yejuan nojonques quijtoayaj ijcuín:

—¿Xe amo yejua nijín tagat ten motalijtinemía ojteno huan motaehuijtinemía?

<sup>9</sup> Huan sequín in tagayot quijtoayaj ijcuín:

—Quema, yejua nijín tagat ten catca ixpojpayot.

Huan cachi ocsequín quijtoayaj ijcuín:

—Amo yejua ne ten ixpojpayot catca, pero nesi tamatisnequi que melau yejua.

Huan ne tagat ten catca ixpojpayot, yejua ne quijtoaya ijcuín:

—Quema, nejua ya niixpojpayot nicatca.

<sup>10</sup> Ijcuacón ocsepa quitajtoltijque ijcuín:

—Huan, ¿quenín mochihuac para huelic titachía?

<sup>11</sup> Huan yejua quinnanquilij ijcuín:

—Ne tagat ten monotza Jesús, yejua ne quichijchihuac tzictzin soquit huan nechixojxilij. Huan de ompa nechilij ijcuín: “Xiyó ne campa amel ten monotza Siloé huan ximixamiti”. Huan melau nejua niyajqui nimixamito huan ijcón huelic nitachíac ya.

<sup>12</sup> Huan de ompa in tagayot ocsepa quitajtoltijque in tagat ten catca ixpojpayot ijcuín:

—¿Can yetoc nojón tagat ten mitzpjajtij?

Huan yejua quinnanquilij ijcuín:

—Amo nicmati.

### **In tayecanani fariseos quitajtoltiayaj ne tagat ten catca ixpojpayot de aconi quipajtij**

<sup>13</sup> Huan ijcón mochihuac que quihuiquilijque inixpan in tayecanani fariseos ne tagat ten catca ixpojpayot. <sup>14</sup> Porín catca ne tonal de ne nesehuilis queman Jesús quichijchihuac in soquit huan quitachialtij ne tagat ten catca ixpojpayot. <sup>15</sup> Ica ya nojón in fariseos ocsepa quitajtoltijque in tagat den quenín huelic tachíac axcan. Huan yejua quinnanquilij ijcuín:

—Yejuatzin nechixtalilij tzictzin soquit huan nejua nimixamito huan axcan huella nitachía ya.

<sup>16</sup> Ica ya nojón senme de nojón tayecanani fariseos quijtoayaj ijcuín:

—In tagat ten quichihuac nijín tequit, yejua ne amo melau pohui ihuan Dios, porín yejua amo quitacamati in tanahuatil de ne tonal de nesehuilis.

Huan ocsequín tayecanani no quijtoayaj ijcuín:

—¿Quenín huelis quichihuas se hueyi mohuiscatequit, como yejua se tajtacle huan amo quitacamatic in tanahuatil de Moisés?

Huan ica por nijín tajtolme in fariseos mocualancaxejxelojque se huan ocsé. <sup>17</sup> Huan ijcón in fariseos ocsepa quitajtoltijque ne tagat ten catca ixpojpayot huan quilijque ijcuín:

—Huan tejua, ¿toni tiquixejecoa? ¿Aconi yesqui ne tagat ten mitztachialtij?

Huan yejua quinnanquilij ijcuín:

—Nejua niquixejecoa que yejua yesqui se tanahuatijque de Dios.

<sup>18</sup> Pero ne tayecanani judíos amo quinequáfaj quineltocasque que cox melau yejua ya ne catca ixpojpyot ten axcan huelía tachía. Ica ya nojón hasta no quinnotzque nitatuan de ne tagat ten catca ixpojpyot. <sup>19</sup> Huan in tayecanani quintajoltijque itatuan ijcuín:

—¿Xe nijín tagat yejua yesqui namoconeu, nijín ten namejuan nanquijtoaj que yolic ixpojpyot? ¿Quenín axcan huelía tachía?

<sup>20</sup> Ijcuacán nitatuan tananquilijque ijcuín:

—Quema, ticyematij que yejua nijín toconeu huan melau yolic ixpojpyot.

<sup>21</sup> Pero melau axcan amo ticmatij de quenín mochihuac de melau axcan tachía ya. Huan hasta amo no ticmatij aconí quitachialtij nijín toconeu. Pero para cachi nanquiyecmatisque, namejuan xictajoltican yejua toconeu, porín hueyi ya huan xihue ya. Huan ijcón yejua huelis cachi namechyequilis ya ten namejuan nanquitemoaj.

<sup>22</sup> Huan ijcón ne itatuan quijtoque porín quinyolmohuiliayaj ne tayecanani judíos. Porín ipa yejuan in tayecanani motencauque ya de que quicalanquixtisque tech ne hueyi tiopan de judíos ma amo queman ocsepa calaquican nochi neques ten quineltocayaj que Jesús yejua in Cristo Temaquixtijque. <sup>23</sup> Ica ya nojón itatuan ocsepa quijtoque ijcuín:

—Xicontajoltican yejua toconeu, porín melau xihue ya.

<sup>24</sup> Ijcuacán in tayecanani judíos ocsepa quinotzque ne tagat ten ne achtopa ixpojpyot catca huan quilijque ijcuín:

—Xitechonili sayó ten melau iixpantzinco Totajtzin Dios. Porín tejuan ticmatij que ne tagat Jesús yejua ne tajtacole san.

<sup>25</sup> Ijcuacán yejua ocsepa quinnanquilij ijcuín:

—Pero nejua amo nicmati cox ne Jesús tajtacole oso amo. Ta, sayó nicmati que nejua niixpojpyot nihatca huan axcan nihueli ya nitachía.

<sup>26</sup> Huan ijcón ocsepa quiyectajoltijque ijcuín:

—¿Quenín mitzchihuac cuac mitzpaajtij? Huan, ¿quenín quichihuac yejua para mitztachialtij?

<sup>27</sup> Huan yejua quinnanquilij ijcuín:

—¿Xe amo nanquicacque ya ten namechilij ya? Namejuan amo nanquinequij nannechcaquilisque. ¿Quenín namejuan nanquinequij ocsepa ma namechilij? ¿Xe namejuan no nanquinequij nanmochihuasque nanimomachtijcahuan de Jesús?

<sup>28</sup> Ijcuacán in tayecanani peuque quihuijuicaltiyaj in tagat huan quilijque ijcuín:

—Tejua no tiimomachtijcau de ne tagat Jesús. Pero tejuan tiimomachtijcahuan de ne cachi hueyi tanahuatijque Moisés. <sup>29</sup> Huan tejuan ticyematij que Totajtzin Dios technoynotzac ya ica por itencopa ne Moisés. Pero ne tagat Jesús nión no ticmatij de can cayot.

<sup>30</sup> Ijcuacán in tagat ten catca ixpojpyot ocsepa quinnanquilij ijcuín:

—Semi nicmoucaita namotajtoluan porín namejuan amo nanquimatij de can cayot nijín tagat, pero yejua ne nechtachialtij. <sup>31</sup> Tejuan cuali ticmatij que in tajtacolejque in Totajtzin Dios amo quincaquilía. Ta, in Totajtzin Dios sayó quincaquilía ne naquen quimohuistilijtinemij huan quichiutinemij ten Dios itanejnequilis. <sup>32</sup> Desde ne cuac hualtzinpehuac nochi, amo queman ticaquiliayaj que ma quijto acsá que quitachialtijque se tagat ten yolic ipa ixpojpyot. <sup>33</sup> Huan tajcón nijín tagat Jesús

amo hualehuasquía imaco den Totajtzin Dios, ijcuacón yejua ne amo huelisquía teyi quichihuasquía ten cuali.

<sup>34</sup> Ijcuacón in tayecanani quiluijque ijcuín:

—Tejua ya timotajtacolmacatihuitz ya desde ne tonal cuac tiyolico. ¿Cox huelis tejua titechmachtis in tanahuatil de Moisés?

Huan de ompa in tayecanani quicalanquixtijque ne tagat ten catca ixpojpyot tech ne tiopan de judíos ma amo queman calaquican ocsepa.

### **Nican Jesús quinmachtía in tacaquini de neques talticpacuani ten ixpojpyome den nintalnamiquilisuan**

<sup>35</sup> Huan ijcón in Jesús quimatiltijque que quicalanquixtijque ya den tiopan den judíos ne tagat ten ixpojpyot catca. Pero cuac Jesús ocsepa ihuan moajsic ne tagat, ijcuacón in Jesús quilij in tagat ijcuín:

—¿Xe melau tiyectacautamatic ihuan in Yectagatzin de Dios?

<sup>36</sup> Ijcuacón ne tagat quilij Jesús ijcuín:

—Notecotzin, xinechonyequilij aconi ne Yectagatzin de Dios para ma ijcón nejua ya ma niyectacautamati ihuantzin.

<sup>37</sup> Huan ijcón in Jesús quinancuilij in tagat ijcuín:

—Tejua ipa tiqiztinemi ne Yectagatzin de Dios porín Nejuatzin ya ni Yectagatzin de Dios naquen ihuan tejua axcan timonojnotztoc ya.

<sup>38</sup> Ijcuacón in tagatzin nimantzin motancuaquetzac iixpantzinco Jesús huan quimohuistilij huan quilij ijcuín:

—Quema, Notecotzin, nitacautamati mohuantzin.

<sup>39</sup> Huan cachi satepan Jesús quinilij in tagayot ijcuín:

—Nejuatzin nihuala nican talticpac para niquinixcomacas in talticpacuani, para ijcón niquintachialtis ne naquen ixpojpyome, huan no para ijcón ma ixpojpyojcuican ne naquen mopohuaj que melau yejuan ya tachixtinemij.

<sup>40</sup> Pero sequin tayecanani fariseos yetoyaj ihuan Jesús. Huan cuac quicacque ya nijín tajtolme, ijcuacón yejuan quitajoltijque Jesús ijcuín:

—¿Xe tiqijtosnequi que tejuan no tiixpojpyome?

<sup>41</sup> Huan ijcón in Jesús quinancuilij ijcuín:

—Tajcón namejuan melau nanixpojpyome yesquía, ijcuacón nejua amo huelis namechtechtisquía ne namotajtacoluan. Pero queme nanquijtoaj namejuan que nantachixtinemij, ica ya nojón melau namotajtacoluan yetinemi oc namohuan.

### **Nican Jesús Temaquixtijque quinmachtiaa in tagayot ica se nexcuitil de se ichcat colal**

**10** Huan ijcón in Jesús quinilij in tagayot ijcuín:

—Yec melau ten namechilía que sequin amo calaquij campa ne calten de ichcat colal. Ta, tejcoj colalquetzpan san huan calaquij ocsecan. Huan yejuan nojonques tachtequini san huan tecuilfaj san ten teaxca san. <sup>2</sup> Pero ne tagat ten calaquis campa ne calteno den ichcat colal, yejua ne in tapixque ne ten tapixtinemi ica in iichcahuan. <sup>3</sup> Huan in calten tapiaque, yejua ne quitapohua in calten para ma calaqui ne tapixque. Huan in ichcame cuali quitenixmatij itajtolis de intapixcau. Huan no in tapixque quinnotta iichcahuan sejsé ijcón queme nintocay de cada se ichcat. Huan ijcón in tapixque quinalquixtía nochi in iichcahuan. <sup>4</sup> Huan cuac ne tapixque nochi

quintamihualquixtij ya nochi niichcahuan, ijcuacán yejua yohui quinyecantiu. Huan ijcón in ichcame quitociltijtiyohue in tapixque porín cuali quitenixmatocque ya de nitajtolis. <sup>5</sup> Huan ne ichcame amo quitociltijtiyohue ne ocsé tagat ten amo quixmatij. Ta, yejuan quichochohuhiláj ne ten amo quixmatij porín amo quitenixmatij ne ten amo yec melau cuali tapixque.

<sup>6</sup> Huan ijcón in Jesús quinmachtij in tagayot ica nijín nexcuitil pero yejuan amo cajsicamatque in tamachilisme tenica in Jesús quinequía quinajsicamatiltis.

### **Nican tajtoa de que Jesús Temaquixtijque Yejuatzin in cuali tapixque**

<sup>7</sup> Ijcuacán in Jesús ocsepa quineyic quinajsicamatiltis in tagayot huan quinilij ijcuín:

—Yec melau ten namechilía, Nejuatzin ya queme niyesquía se calten campa calaquij in ichcame tech nincolal. <sup>8</sup> Huan nochi ne tamachtiani ten hualajcaj tamachtijtinemicoj achtopa que nejua nihualasquía, nochi nojonques tachtequini san. Huan yejuan sayó quinequiayaj quintecuilisque ocsequin san. Pero in ichcame amo quintacamatque. <sup>9</sup> Huan Nejuatzin queme niyesquía nicalten para in ichcat colal. Huan nochi ne taneltocani ten calaquisque campa nejua nipoutoc, yejuan nojonques quipiasque temaquixtilis. Ica ya nojón ne notaneltocacahuan nentinemisque moyecyolpactijnemisque ijcón queme se ichcat ten calaqui huan quisa de nicolal huan ijcón nachipa cajsitinemi toni quicuas.

<sup>10</sup> Pero ne tachtecque sayó huitza para tachtequis huan para temictis huan no sayó para tahuejuelos san. Pero Nejuatzin nihuala nican talticpac para ma in talticpacuani ma quipiacan ne yec nemilis sen nachipa huan para ijcón ma quihueyipiacan ne yec nemilis ica yec yolpaquilis. <sup>11</sup> Nejuatzin nicualitapixque. Huan ne cuali tapixque yejua quitemacas ninemilis huan miquis para ijcón quinmaquixtis iichcahuan. <sup>12</sup> Pero ne taquehual tapixque sayó tequiti para motatanilis san, huan amo melau cuali tapixque. Porín cuac yejua quita que huitza ya in tecuani, ijcuacán ne amocuali tapixque quincehual ne ichcame huan choloa, porín yejua amocuali tapixque. Huan no choloa porín ne ichcame amo inaxca. Ica ya nojón in tecuani quinquitzaquía sequin ichcame huan in ocsequin moixcuacuamoyahua sejsecan. <sup>13</sup> Huan ne amocuali tapixque choloa porín sayó tequititinemi para motatanilis san, huan porín yejua amo itequiu de quinyecpías ne ichcame.

<sup>14</sup> Nejuatzin nicualitapixque. Huan ijcón queme nejua niquinyequixmati noichcahuan, no ijcón noichcahuan nechixmatij Nejuatzin. <sup>15</sup> Huan ijcón queme Nejuatzin niquixmati Notajtzin Dios, no ijcón Notajtzin Dios nechixmati. Huan nitemacas nonemilis huan nimiquis para niquinmaquixtis noichcahuan. <sup>16</sup> Huan no niquinpía ocsequin noichcahuan ten ayamo poutocque tech nijín ichcat colal. Yejuan nojonques no monequi niquinualcuis huan yejuan no quitacamatisque notajtoluan. Huan ijcón oncas sayó se sen oloch yetolis de noichcahuan huan no oncas sayó se tapixque san.

<sup>17</sup> Huan Notajtzin Dios nechtasojta porín nitemacas nonemilis huan nimiquiti para niquinmaquixtis noichcahuan. Huan satapan niyoltinemis ocsepa. <sup>18</sup> Huan melau amo aquen huelis nechmictis como amo achtopa nictemaca nonemilis para ijcón niquinmaquixtis noichcahuan. Huan nictemaca nonemilis porín ijcón notanejnequilis de nejua san. Huan sayó Nejuatzin nicpía huelilis para nictemacas nonemilis;

huan sayó Nejuatzin nicpía huelilis para ocsepa niyoltinemis. Yejua ya nijín tanahuatil nechmactilij Notajtzin Dios.

<sup>19</sup> Huan cuac in tagayot judíos quicacque nochi nijín tajtolme ten quiytoaya Jesús, ijcuacón ocsepa niman yejuan mocualanaxejxelojque. <sup>20</sup> Huan miacque de yejuan quiytoayaj ijcuín:

—¿Queyé namejuan nanquicaquilijtoque itajtoluan de nijín Jesús? Ta, yejua nijín quiipía se amocuali ejecat huan amo yec talnamiqui.

<sup>21</sup> Huan ocsequin in tagayot quiytoayaj ijcuín:

—Amo aquen se tagat ma quiipía se amocuali ejecat huan ma tajto ijcón. ¿Xe no huelisquía se amocuali ejecat quitachialtisquía se tagat ten ixpojpyoyot? Pues, amo huelis.

### **Nican tajtoa de quenín in tayecanani judíos quixtopeuque Jesús Temaquixtijque**

<sup>22</sup> Huan tech ne pueblo de Jerusalén in tagayot taluichiutoyay porín quelnamiquía ne tonal cuac quitamichijchiuque in hueyi tiopan de judíos. <sup>23</sup> Huan tech ne tonalme quiohuía huan taseseyaya. Huan ijcón in Jesús nejntentinemic ne tiopan caltampa, campa quitocaytíaj in caltampa de rey Salomón. <sup>24</sup> Ijcuacón in tayecanani judíos quiyehualojque Jesús huan quitajtoltijque ijcuín:

—¿Quenín ticyolnemilía de titechajsicailis ten melau? Ta, como melau tejua ya ti Cristo Temaquixtijque, semi xitechyequili ya axcan.

<sup>25</sup> Huan ijcón in Jesús quinnanquilij ijcuín:

—Ipa namechyequilijtihuitz ya, pero namejuan amo nanquiyecneltoaj. Nochi nomohuiscatequihuan yejuan nojonques nicchiutinemi ica in chicahualis den Notajtzin Dios. Huan ica por ne mohuiscatequime, yejuan nojonques nechtenextía que Nejuatzin ni Cristo. <sup>26</sup> Huan namejuan melau amo nanquiyecneltoaj porín amo nanpohuij nohuan queme nannoichcahuan, ijcón queme ipa namechilijtihuitz ya.

<sup>27</sup> Huan notaneltocacahuan queme yesquía noichcahuan huan yejuan cuali nechtenixmatij ya; huan nejua no niquinixmati. Ica ya nojón yejuan nechtoctilíaj. <sup>28</sup> Huan ijcón nejua niquinmacatinemi notaneltocacahuan ne nemilis nachipa, huan yejuan amo queman xpolihuisque huan nión no aca huelis nechinmacuilis. <sup>29</sup> Huan nochi notaneltocacahuan ten Notajtzin Dios nechinmactilij ya, yejuan nojonques amo aca huelis quinmacuilis Notajtzin Dios porín amo ongac ocsé cachi hueyi chiuque huan que Yejuatzin. <sup>30</sup> Huan Nejuatzin huan Notajtzin Dios tipohuij san sesan.

<sup>31</sup> Ijcuacón in tayecanani judíos ocsepa peuque cajocuique tet para quitepoxonisque Jesús. <sup>32</sup> Huan ijcón in Jesús quinlij ijcuín:

—Nejuatzin nicchiutihuala huan namechnextilijtihuala ya míac tataman mohuiscatequime de nanquitacque ya. Huan nochi nijín nicchiutihuala ica ichicahualis de Notajtzin Dios. Huan, ¿catischejua senme de nijín mohuiscatequime tenica nanquinequij nannechtepoxonisque?

<sup>33</sup> Ijcuacón in tayecanani judíos quinnanquilijque ijcuín:

—Amo timitztepoxonisque ica por mocualitachihualisuan den ticchihuac ya. Ta, timitztepoxonisnequij porín ticuijuicaltía Totajtzin Dios ica por motajtoluan. Huan tejua no titagat san, pero no timopoutinemi tejua que no ti Dios.

<sup>34</sup> Huan ijcón in Jesús quinnanquilij ocsepa ijcuín:

—Huan tech namotanahuatil ijcuiliutoc que Totajtzin Dios quijtoaj ijcuín: “Namejuan san queme nanyesquíaj nandiosme”.<sup>35</sup> Huan cuali nanquimatij que amo hueli se quinecajtalís in Tajtoltzin de Dios. Huan no cuali nanquimatij que in Totajtzin Dios quintocaytía queme diosme nochi neques ten quiselisque huan quitacamatisque notajtoltzin.<sup>36</sup> Huan in Totajtzin Dios nechijitac huan nechualtitanic nican talticpac. Huan, ¿queyé namejuan nanquijtoaj que nejua nicuijuicaltía Totajtzin Dios cuac nejua niqijtoa que Nejuatzin Niteconetzin de Dios?<sup>37</sup> Huan como amo nicchiutinemi nijín mohuiscatequime ijcón queme Notajtzin Dios quimonequiltía, ijcuacán namejuan amo xinechneltoquilican de notajtoluan.<sup>38</sup> Pero como nicchiutinemi ten quimonequiltía Notajtzin Dios, ijcuacán namejuan cachi cuali xicneltocacan de nijín mohuiscatequit ten nanquitztoque ya, masqui namejuan amo nannechneltoaj. Pero xicneltocacan de nochi nijín ten nicchihuac para ijcón xicajsicaixmatican huan no xicyecneltocacan que Notajtzin Dios poutinemi nohuanztzin huan no Nejuatzin nipoutinemi ihuanztzin.

<sup>39</sup>Huan ijcón in tayecanani ocsepa quinequíaj quiquitizquisque in Jesús queme preso, pero Yejuatzin mochololtij ocsepa ninmaco.<sup>40</sup> Huan ijcón ocsepa yajqui in Jesús ne iquisayampa in tonal den sentapalpa den hueyíat Jordán, Huan ompa ajsito campa ne Juan Taahuijque achtopa taahuijtinemía. Huan ijcón ompa Jesús mochihuac.<sup>41</sup> Huan huel míac tagayot yayaj conitaya Jesús huan quijtoayaj ijcuín:

—Yec melau ne Juan Taahuijque amo teyi quinextico de que ma quichihua mohuiscatequime. Pero nochi ne ten Juan techiluijca de nijín tagat Jesús, nochi catca ten melau.

<sup>42</sup>Huan ijcón mochihuac que míac tagayot tacuautamatque ihuan Jesús ompa campa ne conajsjaj.

### Nican tajtoa den miqulís den ne tagat Lázaro

**11** Huan ne tonalme oncaya se tagat ten mococoaya, huan ne tagat cocoxque monotzaya Lázaro. Huan yejua pohúa tech ne pueblo de Betania campa no ipuebloj in María ten no iicniu Marta.<sup>2</sup> Huan ne María no catca iicniu in Lázaro in cocoxque. Yejua ya ne María ten quimetzoxxilij ica aceite den ne ajuiyacayot in Totecotzin Jesucristo huan quimetzuajuatzac ica itzon.<sup>3</sup> Huan nijín ome sihuame icnime, yejuan quitanahuatilizque in Jesús ijcuín:

—Totecotzin, motasojicniu Lázaro yejua semi mohueyicocoa axcan. Huan Tejuatzin semi ticyoltasojta ne Lázaro.

<sup>4</sup>Pero queman in Totecotzin Jesús quicayic ya nijín tajtolme, ijcuacán Yejuatzin quijtoj ijcuín:

—Xicmatican que nijín cocolis amo para miqulís. Ta, sayó para ma moyectenexti in hueyi chichualís den Totajtzin Dios. Huan no ica por nijín cocolis, ma moyectenexti de Nejuatzin nohuelilís huan ijcón ma nochi tagayot ma quitacan que melau Niteconetzin de Dios.

<sup>5</sup>Huan melau in Jesús semi ihuan motasojtaya in Marta huan iicniu María huan iicniu Lázaro.<sup>6</sup> Huan cuac in Jesús ijcón quilijque ya de que ne itasojicniu Lázaro semi mohueyicocoa, ijcuacán Yejuatzin mochihuac oc ocsé ome tonalme oc para ne tamachtijtoya campa yetoya.<sup>7</sup> Huan mochihuac que cachi satepan in Jesús quinilij ne imomachtijcahuan ijcuín:

—Tiyohue ocsepa tech ne Judeajcopaca.



<sup>8</sup> Pero imomachtijcahuan quiluijque ijcuín:

—Xicaqui, Tejuatzin Totecotzin, ¿queyé ocsepa ticnequi tiyás ompa? Porín yec melau ayamo huejcahuac in tayecanani judíos ompa quinequáj mitzmictisque ica tet.

<sup>9</sup> Ijcuacón in Jesús quinnanquiliy imomachtijcahuan ijcuín:

—¿Xe melau que in tonal quipía majtactiomome hora san? Namechilía ijcón para xicmatican que cuac se nemi tonayan, ijcuacón amo huelis se motepotamis porín ne nentinemi tonayan nican talticpac. <sup>10</sup> Pero como se nemi tech in tayohuayanilot, ijcuacón huelis se motepotamis porín amo ongac tenica se moyecantinemis.

<sup>11</sup> Pero mochihuac que cachi satepan Jesús quinilij imomachtijcahuan ijcuín:

—Huan axcan ne totasojicniu Lázaro, yejua axcan cochtoc san. Pero axcan Nejuatzin niyó niquijxititi ma ixpetani ocsepa.

<sup>12</sup> Pero queman ijcón quicacque ya nijín imomachtijcahuan, ijcuacón quilijque ijcuín:

—Totecotzin, tacán melau cochtoc san motasojicniu Lázaro, ijcuacón ocsepa ixpetanis.

<sup>13</sup> Huan in Jesús quinequía quinyecajsicamatiltis que ne Lázaro miquic ya. Pero imomachtijcahuan yejuan quinemiliayaj que in Jesús tajtojtoc de que Lázaro mosehujtoc san tech in cochilis. <sup>14</sup> Ijcuacón in Jesús ocsepa quinyecajsicamatiltij imomachtijcahuan ijcuín:

—Yec melau, Lázaro miyic ya. <sup>15</sup> Huan no xicmatican que semi niyolpaqui ica por namejuan porín amo niyetoya ompa ichan Lázaro cuac yejua momiquilij. Huan axcan nicchihuati tensá tenica namechtaneltoctis. Ica ya nojón yequintzin tiyohue tiquitatij ne Lázaro campa yetoc.

<sup>16</sup> Huan no yetoya ompa in Tomás den senme den imomachtijcahuan ten no monotza Dídimo, ten quijtosnequi nenetz. Huan ijcón in Tomás quinilij in ocsequin imomachtijcaicnihuan ijcuín:

—Tiyohue tejuan no para ma no timiquican no ihuan Yejuatzin.

### **Jesús Temaquixtijque Yejuatzin ya quinpanquixtis yoltocque in ánimajme huan no quinmacas nemilis**

<sup>17</sup> Huan melau ijcón ne imomachtijcahuan yajque ihuan Jesús. Huan cuac ajscique ya tech ne pueblo de Betania, ijcuacón cajsicamatque ya que ipa quichihuac ya nahui tonal de quicalaquijque Lázaro ne campa animajtecal. <sup>18</sup> Huan in Betania semi amo huejca motztoya ihuan ne pueblo Jerusalén, sayó queme eyi kilómetros san. <sup>19</sup> Ica ya nojón no yajque miacque tagayot judíos quicalpanotoj Marta huan ya in María para quinyojoyoltalisque yejuan para ma amo cachi moyolcocojtocan ica por inicniu ten momiquilij ya. <sup>20</sup> Huan mochihuac que cuac ne Marta quicayic ya que in Jesús ompa ejcotihuitz ya tech nimpueblo de yejuan, ijcuacón in Marta nimantzin quisac huan yajqui quinamiquito campa hualaya Yejuatzin. Pero ne iicniu María mocahuac calijtic. <sup>21</sup> Huan cuac in Marta quinamic ya Jesús, ijcuacón yejua quilij ijcuín:

—Notecotzin, tajcón Tejuatzin tiyetosquía nican tochan, ijcuacón ne nocnitzin Lázaro amo momiquilisquía. <sup>22</sup> Pero nejua cuali nicmati que Totajtzin Dios nochi mitzmacas ten tictajtjanilis.

<sup>23</sup> Ijcuacón in Jesús quilij in Marta ijcuín:

—Xicmati que mocnitzin ocsepa panquisas yoltoc intzalan in ánimajme.

<sup>24</sup> Ijcuación in Marta quinanquili ijcuín:

—Quema, nejua nicmati que nocnitzin ocsepa yoltinemis tech ne tacuitapan tonalme cuac panquisasque yoltocque nochi in ánimajme.

<sup>25</sup> Pero in Jesús ocsepa cajsicamatiltij Marta ijcuín:

—Xicmatican ya que Nejuatzin niqinyolitía in ánimajme huan niquinmaca nemilis ocsepa. Huan nochi ten nohuan yec tacuautamati, yejua ne masqui momiquilis ya, pero ocsepa yoltinemis. <sup>26</sup> Huan nochi neques ten yoltinemij oc axcan, huan nohuan yec tacuautamatij, yejuan nojonques amo queman momiquilisque oc. Huan, ¿xe ticyecneltoca nochi nijín ten nimitziluitoc?

<sup>27</sup> Ijcuación in Marta quinanquili ijcuín:

—Quema, Totecotzin, nejua niyctacuautamati que Tejuatzin ya ti Cristo Temaquixtijque den Titeconetzin den Totajtzin Dios. Huan Tejuatzin ya ne titanahuatijque ten ipa monequía hualasquía nican talticpac.

### **Nican Jesús Temaquixtijque mochojchoctij iixpan ne animajtecal campa quinalcalaquijque in Lázaro**

<sup>28</sup> Huan mochihuac que cachi satepan cuac quitamiilij ya ijcón, ijcuación in Marta nimantzin yajqui quinotzato ne iicniu María. Huan yejua quichtacanotzato ijcuín:

—Tejua María, in Tamachtijque nampón yetoc ya, huan Yejuatzin mitzualtanahuatílía que xiyó.

<sup>29</sup> Huan ijcón cuac in María quicayic ya nijín tajtol, ijcuación nimantzin moquetztiquisac huan yajqui quitato Jesús. <sup>30</sup> Huan in Jesús ayamo yec ajsía tech ne pueblo Betania. Ta, Yejuatzin yetoya oc hasta ne campa monamiquito ihuan ne Marta.

<sup>31</sup> Huan míac tagayot judíos yetoyaj ne calijtic ichan María ten ipa hualajcaj para quiyoyoltalisque in María. Pero cuac in tagayot quitacque que in María nimantzin moquetztiquisac huan calan quistiquisac ica ne ijsiucayot, ijcuación yejuan no nimantzin calanquisque huan yajqui quitociltijque María. Porín yejuan quiyolnemiliayaj que xa yohui ya María nepa campa animajtecal para ompa mochoctis.

<sup>32</sup> Huan ijcón mochihuac queman in María ajsito ya campa ne Jesús yetoya, ijcuación yejua nimantzin motancuaquetzac iixpantzinco Yejuatzin huan quiliaya ijcuín:

—Notecotzin, tajcón Tejuatzin tionyetosquía nican tochanpa, ijcuación ne nocnitzin Lázaro amo momiquilisque.

<sup>33</sup> Huan cuac in Jesús quitac que in María semi mochoctía huan no quitac que in tagayot ten cualtoctiliayaj que no yejuan mochojchoctijtihuitze, ijcuación Yejuatzin no yoltajyohuiaya huan moyoltayocoltiaya. <sup>34</sup> Huan in Jesús quintajoltij in tagayot ijcuín:

—¿Can nanquinalcalaquitoj in Lázaro?

Huan yejuan quinanquiliijque ijcuín:

—Totecotzin, xionuiqui huan xiquitaqui campa yetoc.

<sup>35</sup> Huan ijcón in Jesús no ompa pehuac mochojchoctía. <sup>36</sup> Ica ya nojón in tagayot judíos quiytoayaj ijcuín:

—Xiquitacan san, que melau Jesús semi quitasojtaya me Lázaro.

<sup>37</sup> Huan ocsequin tagayot no quiytoayaj ijcuín:

—Yejua ya ne Jesús quitachialtij ne ixpojpayot. Huan, ¿queyé amo no huelic quichihuac que ma amo momiquiliani ne Lázaro?

### **Nican Jesús Temaquixtijque quinpanquixtij yoltoc in Lázaro**

<sup>38</sup> Huan ijcón in Jesús cachi oc moyoltayocoltiaya cuac motoquij ne campa quinalcalaquijque in Lázaro. Pero ne campa quinalcalaquijcaj in Lázaro catca tech se hueyi tecal ten quitentzacque ica se hueyi patahuactet. <sup>39</sup> Huan in Jesús quinilij ijcuín:

—Xicajchiuacan ne tet, in hueyi patahuactet.

Ijcuacán in Marta yejua iicniu ten difuntito quilij ijcuín:

—Xiquita, Notecotzin, achá semi tzojyac ya porín quiapiaya nahui tonal ya de momiquilij.

<sup>40</sup> Pero ocsepa in Jesús quilij in Marta ijcuín:

—¿Xe amo nimitzilij ya que como tiyectacautamati nohuan, ijcón tiquitas imohuiscahuelilis den Notajtzin Dios?

<sup>41</sup> Ijcuacán quiajchique ne hueyi patahuactet huan de ompa Jesús nimantzin ajcotachía ne eluiyac huan quijtoj ijcuín:

—Nohueyijtatzin Dios, nimitzontasojcamachilía porín Tejuatzin nachipa tinechoncaquilía nonetatautilis. <sup>42</sup> Nejuatzin cuali nicmatic que Tejuatzin ipa cuali tinechoncaquic, pero nimotatautía sayó para ma quicaquican nijín tagayot ten nican yetocque. Huan ijcón huelis quineltocasque que Tejuatzin tinechualtitanic nican talticpac.

<sup>43</sup> Huan ijcón mochihuac que cuac quitamijtoj ya nijín tajtolme, ijcuacán Jesús quichicaucatzaiztilij in Lázaro ijcuín:

—Tejua Lázaro, xihualcalanquisa de nampón.

<sup>44</sup> Ijcuacán nimantzin in Lázaro ten micca ya hual calanquisac, nochi matziztzi-cautoc huan metztziztzi-cautoc ica tilma, huan no ixtactoya ya ica se tilma. Huan de ompa Jesús quinilij in tagayot ijcuín:

—Axcan xictojtomilican nochi ne tilma huan xicahuacan ma nenemi.

### **Nican in tayecanani judíos moyectencauque para quiquitzquisque in Jesús Temaquixtijque**

*(Mt. 26.1-5; Mr. 14.1-2; Lc. 22.1-2)*

<sup>45</sup> Huan ijcón mochihuac que míac tagayot judíos neques ten quisehualcuiyaj in María, yejuan nojonques no yec tacuautamatque ihuan in Jesús, porín quitacque nochi ne mohuiscatequime ten quichihuac Yejuatzin. <sup>46</sup> Pero cachi ocsequin tagayot judíos yajque quintatoj in tayecanani fariseos huan yejuan nochi quintapohuijque nochi ne ten Jesús quichihuac ya. <sup>47</sup> Ijcuacán in tayecanani fariseos huan ne tayecanani tiopixcame, nochi yejuan mosentilijque ihuan ne tayecanani huehuentzitzin den pueblojuani judíos. Huan yejuan moyoliliayaj ijcuín:

—Huan axcan, ¿toni ticchihuasque? Porín nijín tagat Jesús quichiutinemi míac mohuiscatequime. <sup>48</sup> Porín tajcón ticahuaj nijín tagat Jesús ma tachiutinemi ica míac taman, ijcuacán nochi in tagayot tacuautamatisque ihuan. Ica ya nojón ne tequihuani romanos yejuan hualasque huan quixixitinisque nijín tomohuiscatiopan huan ijcón techcuilisque totanahuatil huan no techcuilisque nochi totaluan ten pohui ihuan in pueblojuani judíos.

<sup>49</sup> Pero senme de yejuan no ompa yetoya ten monotzaya Caifás, yejua ne catca tayecanque de tiopixcame tech ne xihuit. Huan Caifás quinilij in ocsequin tayecanani ijcuín:

—Xicmatican que namejuan amo teyi nanquimatij. <sup>50</sup> Huan namejuan amo no nancajsicamatij que semi monequi para tejuan ma miqui se tagat para ijcón tech-palehuis tejuan tipueblojuani de Israel. Porín como amo ijcón mochihuas, ijcuacán hualasque ne tequihuani romanos huan techtamijtacohuilisque nijín topueblo.

<sup>51</sup> Huan ne tayecanque Caifás ten tajtoj, amo yejua itanemililis san ten quijtoj. Ta, yejua ijcón quijtoj porín catca tayecanque tiopixcat tech ne xihuit, huan porín Dios quitanemililtij ijcón. Ica ya nojón in Caifás quijtoj que Jesús yejua miquis para quinmaquixtis in pueblojuani judíos. <sup>52</sup> Huan Jesús quinmaquixtis amo sayó nijín pueblojuani judíos. Ta, no miquis Jesús para quinsentilis nochi iconehuan den Totajtzin Dios ten icuamoyautocque nican talticpac. <sup>53</sup> Huan ijcón mochihuac que desde ne tonal in tequitini judíos peuque moixejecoltiayaj para quenín quimictisque in Jesús. <sup>54</sup> Ica ya nojón in Jesús amo nentinemía senteixteno intzalan in tayecanani judíos. Ta, quisac tech ne pueblojcopaca de Judea huan yajqui ajsito campa taiucan, amo huejca quitztoya se pueblo ten monotzaya Efraín. Huan ijcón Yejuatzin ompa mocautinemía inuan imomachtijcahuan.

<sup>55</sup> Huan amo huejcahuaya oc para pehuasquía ne tajyohuilis iluit ten quichihuayaj in tagayot judíos. Ijcuacán míac tagayot tejcotiyajque tech ne pueblo Jerusalén nochi in puebloyetoni ten quiyehualojtoyaj ne Jerusaléncopaca. Huan ijcón nochi ne taca ten hualajque, yejuan nojonques mochipahuacoj den nintajtacoluan achtopa que pehuas ne tajyohuilis iluit. <sup>56</sup> Huan no miacque tagayot quitemojtinemíaj Jesús. Huan cuac yejuan yetoyaj ya ne tiopanijtic, ijcuacán motajtoltiayaj se huan ocsé ijcuín:

—¿Toni nanquinemilíaj? ¿Xe nanquinemilíaj que hualas ne Jesús tech nijín toilitonal oso amo hualas?

<sup>57</sup> Huan ne tayecanani fariseos huan in tayecanani tiopixcame, yejuan ipa tanahuatijcaj ya ijcuín: “Como acsá quimatisquía can yetoc Jesús, que ma quiniliani in tayecanani para yejuan huelis quiquitzquisque Jesús queme preso”.

### **Nican se sihuatzin tech pueblo Betania quiojxilij sequi aceite in Jesús Temaquixtijque**

*(Mt. 26.6-13; Mr. 14.3-9)*

**12** Huan chicuasen tonal achtopa que taluipehuas ica ne tajyohuilis iluit, Jesús yaqui campa ne pueblo de Betania, campa calyetoya in Lázaro de ne achtopa momiquilijca ya, ne ten Jesús quipanquixtij yoltoc intzalan in ánimajme. <sup>2</sup> Huan ijcón cuac ajsic in Jesús campa ne Betania, ijcuacán ompa quiluichihuilijque Jesús. Huan in Marta yejua tacualtectoya huan in Lázaro yejua senme den tacuajtoyaj ihuan in Jesús. <sup>3</sup> Ijcuacán in María cualcuito tajco litro de aceite yoca ten semi ajuiyac ten monotza nardo huan no ten semi patío. Huan ijcón ne María quimetzojxilij Jesús ne ajuiyacayot, huan de ompa quimetzuajuatzac ica itzon. Huan ijcón nochi sentaajuiyaya ne calijtic. <sup>4</sup> Huan no yetoya Judas Iscariote, yejua ne senme den imomachtijcahuan de Jesús. Huan Judas, yejua teconeu de Simón. Huan ne Judas yejua ne ten quitemactis Jesús Temaquixtijque para ma quimictisque. <sup>5</sup> Huan ijcón in Judas quijtoj senteixteno ijcuín:

—¿Queyé nijín ajuiyacayot amo nanquinamacacque para ica eyi mil pesos? Huan ica nijín tomin huelisquía tiquinpalehuisquíaj in taca ten amo quipíaj tenica moixpanoltisque.

<sup>6</sup>Huan ne Judas amo ijcón quijtoj porín melau quinequía quinpalehuis in taca ten amo teyi quipíaj tenica motequipanosque. Ta, yejua ijcón quijtoj porín yejua ipa tachtecque san. Huan queme yejua catca tomineuque, yejua ipa ijcón mohuicaya de que quichtequía ne tomin ten imomachtijcahuan de Jesús quipantaliayaj tech in tomin bolsa. <sup>7</sup>Ijcuacón in Jesús quinilij imomachtijcahuan ijcúin:

—Xicahuacan, huan amo xicuemolocan ne sihuat porín yejua ipa quieutoc ya nijín ajuiyacayot para nechojxilis tech ne tonal cuac nechtocasque. <sup>8</sup>Porín in taca ten amo quipíaj tenica ixpanosque, yejuan nojonques nachipa namohuan yetosque. Pero Nejuatzin amo nachipa namohuan niyetos.

### **Nican tajtoa de que in tayecanani judíos moixejecoltiayaj para quimictisquíaj in Lázaro**

<sup>9</sup>Ijcón tech ne iluitonalme míac tagayot judíos quimatque que Jesús yetoya tech ne pueblo de Betania. Ica ya nojón míac tagayot yajque quitatoj Jesús. Huan amo sayó quitatoj in Jesús. Ta, no yajque para quitasque in Lázaro, ne ten Jesús quipanquixtijca ya yoltoc intzalan in ánimajme. <sup>10</sup>Ica ya nojón in tayecanani tiopixcame moyecsentencauque para quimictisquíaj no in Lázaro. Huan ne tayecanani quinequíaj quimictisque Lázaro, porín miacque tagayot tacuautamatque ihuan in Jesús cuac quitacque que ocsepa yoltinemi in Lázaro. <sup>11</sup>Huan ica por ne ten quitacque, miacque tagayot mosecocaque den taneltocalis den ne tayecanani tiopixcame.

### **Nican tajtoa de que Jesús Temaquixtijque calayic tech pueblo de Jerusalén huan in tagayot quimohuistilijque**

*(Mt. 21.1-11; Mr. 11.1-11; Lc. 19.28-40)*

<sup>12</sup>Huan ijcón miacque tagayot mosentilijque ya ne Jerusalén para quichihuasque ne tajyohuilis iluit. Huan imostica cuac senyetoyaj ya in tagayot ompa, ijcuacón quimatque que in Jesús ejcotihuitz ya huan hualajtoc ya tech ne hueyi pueblo Jerusalén. <sup>13</sup>Ica ya nojón nochi in tagayot quimatequíaj sequi palma cuouxiumayit. Huan de ompa quisque tech in pueblo Jerusalén huan yajque quinamiquitoj Yejuatzin huan tzajtzitiayaj ijcúin:

—¡Hosanna! —ten quijtosnequi, timitzonhueyipanchihuaj Tejuatzin Temaquixtijque. ¡Tiontatiochihual ten tihualajtoc ica itencopaca in Totajtzin Dios! ¡Huan no Tiontatiochihual porín Tejuatzin tion Hueyitayecanque ihuan ne pueblojuani de Israel!

<sup>14</sup>Huan in Jesús quicuicca se burritojtzin huan ipan motalij. Nochi nijín mochi-huac ijcón queme quijtoj in Tajcuilolamatzin de Dios ijcúin:

<sup>15</sup>Amo ximoyolmoutican namejuan nanpueblojuani de Sión —ten quijtosnequi Jerusalén.

Xiquitacan hualajtoc ya ne namohueyitayecanau panyetihuitz ipan se burritojtzin.

<sup>16</sup>Huan tech nojón iluit imomachtijcahuan de Jesús amo cajsicamatque toni mochiutihuitz. Pero cuac Jesús quitamichihuac ya nochi nitequiu, ijcuacón Itajtzin Dios quihueyitayecanatalij Jesús ne eluiyactzinco. Ica ya nojón imomachtijc-

ahuan quielnamecque que nochi nijín ten mochihuac ipa ijcón ijcuiliutoc ya tech in Tajcuilolamatzin de Dios. Huan no quielnamecque que melau ijcón quipanoj Jesús. <sup>17</sup> Huan in tagayot ten ihuantzin Jesús yetoyaj, yejuan nojonques quitacque ten Jesús quichihuac huan yejuan quitetapohuiayaj nochi ten quitacque. Porín yejuan yetoyaj ne tonal cuac Jesús quinzotzca ya in Lázaro huan quipanquixtijca ya yoltoc intzalan in ánimajme. <sup>18</sup> Ica ya nojón huel míac tagayot quisque de ne Jerusalén huan yajque quinamiquitoj in Jesús, porín ipa cuali quimatque que Yejuatzin quichihuac se mohuiscatequit. <sup>19</sup> Ijcuacón in tayecanani fariseos moyoliliayaj se huan ocsé ijcuín:

—Xiquitacan san namejuan, axcan amo huelis teyi ticchihuasque oc tejuan, porín xiquitacan nochi in talticpacuani yajtocque ihuantzin Jesús huan quitoctilijtocque Yejuatzin.

**Nican tajtoa de que sequin pueblojuani ten monotzayaj griegos,  
yejuan nojonques quitemojtinemíaj Jesús**

<sup>20</sup> Huan yetoyaj sequi taca ten monotzayaj griegos intzalan de ne tagayot ten yajque quimohuistilitoj Dios tech ne tajyohuilis iluit. <sup>21</sup> Ijcuacón ne taca griegos motoquijque campa Felipe ne ten pahuía tech in pueblo de Betsaida de itatilanal de Galileajcopaca. Huan ne griegos quihueyitatautijque Felipe huan quilijque ijcuín:

—Tejuatzin Felipe, ticnequij tiqutasque ne Jesús.

<sup>22</sup> Ica ya nojón in Felipe yajqui quiluito in Andrés. Huan ijcón ne ome yajque quitapohuitoj Jesús de ne netatautil de ne griegos. <sup>23</sup> Ijcuacón in Jesús quinnanquilij ijcuín:

—Yec melau ejcoc ya in tonal cuac Nejuatzin ni Yectagatzin nechueyipantayecancaquetzas Notajtzin Dios. <sup>24</sup> Yec melau ten namechilía, como amo se quitocas se trigojxinach ne tech nimilajpa, yejua ne quisentocas queme ipa xinach san huan amo palanis huan amo no motaquiltis. Pero tajcón se quitocas, masqui mota majyá que tamic ya ne xinach, ijcuacón yejua ne niman palanis huan ixuas huan cuali motaquiltis. <sup>25</sup> Huan ijcón queme mochihuac ne trigojxinach, no ijcón nopan monequi ma mochihua. Huan naquen yesqui quiyecpixinemis ninemilis nican talticpac, yejuan nojonques quipolosque ne nemilis nachipa. Huan naquen yesqui amo quiyec-tasojtatinemis que ninnemilis nican talticpac, yejuan nojonques quiselisque ne yec nemilis sen nachipa. <sup>26</sup> Huan nochi neques ten quinequis nechtequitilisque, yejuan nojonques monequi ma nechtoctilijti huan ma nechacamatiu. Huan neques ten nechtequitilijtinemij, yejuan nojonques no yetosque ompa campa Nejuatzin niyetos. Huan no nochi neques ten nechtequitilijtinemis que, yejuan nojonques Notajtzin Dios quineyichiutiayás.

**Nican Jesús Temaquixtijque quinmatiltij in tagayot que ejcoctoc imiquilis**

<sup>27</sup> Huan ijcón in Jesús quinnejmachiya in tagayot ijcuín:

—Axcán semi niyoltajyohuía. Huan axcán, ¿toni niqulilís Notajtzin Dios? ¿Xe niqulilís ijcuín: “Notajtzin, xinechmaquixti de nijín tajyohuilis ten ejcotoc ya nopan”? Pero amo ijcón nicnequi niqulilís. Ta, yejica ya Nejuatzin nihuala para nitajyohuis. <sup>28</sup> Ta, cachi cuali niqulilís ijcuín: “Notajtzin Dios, xicueyipanchihua motocaytzin ica mohueyihuelilís”.

Huan cuac Jesús tami tajtoj ya, ijcuacán sepa san mocayic se tajtolis de ne eluiy-actzinco ten quijtoayaj ijcuín:

—Pero nimohueyipanchihuac ya ica ne huelilis de notocay huan axcan ocsepa nicchihuati ijcón.

<sup>29</sup> Huan nochi in tagayot ten quicactoyaj, yejuan quijtoayaj que ne achá taticuinilot. Huan cachi ocsequin quijtoayaj ijcuín:

—Achá se ángel quinojnotzaco Jesús.

<sup>30</sup> Ijcuacán in Jesús ocsepa quinilij ijcuín:

—Nochi nijín tajtolme ten mocayic ya, amo mocayic para ma nejua nicaqui san. Ta, no para namejuan xicaquican. <sup>31</sup> Huan axcan ejcotoc ya in tonalme cuac Notajtzin Dios quinixcomacas huan quintelchihuas nochi in talticpacuani. Huan Yejuatzin quicalantamotas in Satanás naquen taquitzquijtoc axcan talticpac. <sup>32</sup> Huan cuac nechajocuisque para nechcuoupampilosque tech in ne colotzin, ijcuacán Nejuatzin niqunyoltlanas in talticpacuani para ma tacuautamatican nohuan.

<sup>33</sup> Huan ica nijín tajtolme ten quijtoaya Jesús, yejica quinajsicamatiltij in tagayot de quenín momiquilis. <sup>34</sup> Huan ijcón in tagayot quinanquilijque Jesús ijcuín:

—Huan tejuan ticactinemij huan ticleerojtinemij den tanahuatilme de Moisés. Huan yejua techilía que Cristo Temaquixtijque, yejua ne sen nachipa yoltinemis. ¿Quenín tejua tiquijtoa que ne Yectagatzin monequi quiajocuisque huan quicuoupampilosque? ¿Huan aconi nojón ten tejua tictocaytía in Yectagatzin?

<sup>35</sup> Ijcuacán in Jesús quinilij ijcuín:

—Huan Nejuatzin ya queme niyesquía nitanextzin. Huan Nejuatzin niyetoc namohuan queme se tanextzin pero amo semi nihuejcahuas oc. Huan xinechtacamatiyacan axcan porín Nejuatzin queme se nitanextzin niyetoc namohuan para ma amo namechichtacahuiquiu in tayohuayanilot den tajtacol. Porín naquen nentinemi tech tayohuayanilot, yejua ne amo quimati can yajtoc. <sup>36</sup> Huan Nejuatzin queme niyesquía nitanextzin huan mientras namohuan niyetinemi oc, huan mientras nanquitztocque nijín tanextzin, namejuan monequi xitacuautamatican nohuan para ijcón ximochihuacan no nannoconejuan queme nanyesquía j nantanextzitzin ijcón queme Nejuatzin.

Huan ijcón in Jesús cuac quintamiilij ya nochi nijín tajtolme, ijcuacán Yejuatzin yajqui motaatito den tagayot judíos.

### **Nican tajtoa de que in tagayot judíos amo quiyecneltocacque de ne Jesús Temaquixtijque**

<sup>37</sup> Huan masqui in Jesús quichihuac míac tataman mohuiscatequime ninixpan in tagayot pero nión no ica por nojón yejuan tacuautamatque ihuantzin. <sup>38</sup> Huan ijcón nochi nijín mochihuaco ijcón queme ne huejcautanahuatijque Isaías quijcuiloco ijcuín:

Totecotzin, ¿aconi quineltocaj totanejmachtillis?

Huan masqui quionmonextilij ya in Totecotzin nichichualis, ¿aconi quineltoca?

Pues amo aquen.

<sup>39</sup> Huan ne huejcautanahuatijque Isaías no quijcuiloj que in tagayot amo hueli yec tacuautamatisque. Ica ya nojón ne Isaías ocsepa quijtoaya ijcuín:

<sup>40</sup> Huan Totajtzin Dios quichihuac ma ixpojocuican in tagayot huan no quichihuac ma yejuan yolchichicque yesque.

Huan ijcón in tagayot amo huel tachiasque ica ne ninixtololohuan huan nión no huel quiyecajsicamatisque tech ninyolojuan.

Huan nión no huelis moyecyolnemilisque huan nechajsiquiu para niquinpajtis.

<sup>41</sup> Huan ijcón ne huejcautanahuatijque Isaías quijtoco porín yejua quitac ne huelilis-cachicahualis de Jesús Temaquixtijque huan yejua ne Isaías technojsotzoc de Jesús.

<sup>42</sup> Huan masqui sequin amo quineltocacque, pero mías ocsequin tagayot judíos, quema, tacuautamatque ihuan Jesús. Huan amo yejuan san ne tagayot taneltocacque. Ta, hasta no sequin tayecanani judíos quineltocacque. Pero nijín taneltocani judíos amo teyi quiytoayaj senteixteno cox tacuautamatque ihuan Jesús porín yejuan quinyolmohuilíaj ne ocsequin tayecanani fariseos. Huan in taneltocani judíos quichiuque ijcón para ma yejuan in tayecanani judíos ma amo quincalanquixtican in taneltocani tech ne tiopan de judíos. <sup>43</sup> Huan nijín taneltocani judíos cachi oc cuelitayaj ne hueyi tetasojtalis den tagat san. Pero ne tetasojtalis den Totajtzin Dios amo quitemoayaj.

### **Ica nijín itajtoluan Jesús Temaquixtijque quinixcomacas huan quintelchihuas in tagayot**

<sup>44</sup> Huan ijcón Jesús quinchicaucajtoj ijcuín:

—Nochi naquen tacuautamatisque nohuan, yejuan nojonques amo sayó nohuan tacuautamatisque. Ta, no yejuan ihuantzin Notajtzin Dios tacuautamatisque ne ten nechualtitanic nican talticpac. <sup>45</sup> Huan nochi naquen nechitztiyasque Nejuatzin, yejuan nojonques no quitztiyohue Notajtzin Dios ne naquen nechualtitanic nican talticpac. <sup>46</sup> Huan Nejuatzin queme niyesquía se nitanextzin ten niquintahuilía in talticpacuani. Huan nihuala nican talticpac para ma nochi neques ten yec tacuautamatisque nohuantzin, yejuan nojonques ma amo nentinemican oc tech ne tayohuayanilot den tajtacol. <sup>47</sup> Huan tacán acsame nechyecaquilíaj, pero amo quiyectacamati notajtoluan, yejuan nojonques ma amo quinemilican que niquinixcomacas huan niqintelchihuas. Ta, yejua notajtoluan quintelchihuas. Porín Nejuatzin nihuala nican talticpac amo para niqintelchihuas in talticpacuani. Ta, nihuala para niquinmaquixtis. <sup>48</sup> Huan nochi naquen nechixtopehuasque huan amo quiselisque notajtoluan, yejuan nojonques motelchihuasque yejuan san. Porín Nejuatzin nitamachtijtinemi ica notajtoluan, huan satepan Notajtzin Dios quicuis nijín notajtoluan huan yejica quinixcomacas huan quintelchihuas neques ten amo taneltocani tech ne tacuitapan tonalme yesqui.

<sup>49</sup> Huan Nejuatzin amo nitamachtijtinemi ica por nejua notanahuatil san. Ta, Yejuatzin ne Notajtzin Dios nechualtitanic Nejuatzin ya huan nechnahuatij ya de tonica monequis nitajtojtinemis huan tonica nitamachtijtinemis. <sup>50</sup> Huan Nejuatzin cuali nicmati que ne ichicaucatanahuatil de Notajtzin Dios, yejua ne cualcui se nachipanemilis. Ica ya nojón namechmachtijtinemi ijcón queme Notajtzin Dios nechchicanahuatijca ya ma nicchihua.

### **Nican tajtoa de que Jesús Temaquixtijque quinmetzajpacac ne imomachtijcahuan**

**13** Huan ne tonal achtopa que pehuas ne tajyohuilis iluit mochihuac nijín: Jesús ipa quimatoya ya que ejcotoc ya in tonal cuac Yejuatzin quicahuas nijín talticpac huan yas quiajsitiu ocsepa Nitajtzin Dios. Huan ijcón Yejuatzin nachipa



quinyoltasojtatihualaya nimomachtijcahuan ten yetoyaj ihuan nican talticpac. Huan cachi oc Jesús quinyoltasojtac nimomachtijcahuan hasta tech nojón tonal de nimiquilis. <sup>2</sup>Huan cuac Jesús sen tacuajtoyaj ihuan imomachtijcahuan, ijcuacón in amocuali Satanás ipa calaquic iyolijtic huan quiyoltanemililtij ya ne Judas Iscariote, ne ten teconeu de Simón, de queniu quitemactis Jesús para ma quimictican. <sup>3</sup>Huan Jesús cuali quimatic ya que Itajtzin Dios quimactilijca ya nochi huelilisme. Huan no cuali quimatic ya que yejua hualehuac imacotzinco Totajtzin Dios. Huan Jesús no ipa quimatic ya que ocsepa mocuepas huan ajsis imacotzinco Itajtzin Dios. <sup>4</sup>Huan ijcón quemam tamitacuajtoyaj ya, ijcuacón in Jesús moquetzac huan moquixtilij ne tilma ten panían quiquentoya. Huan de ompa quicuic ocsé tilma tenica se momahuajuatza huan quipiloj iixpampa. <sup>5</sup>Huan de ompa Jesús quitecac sequi at tech se caxapas huan pehuac quinmetzpajpaca imomachtijcahuan. Huan no quinmetzuajuatzac ica ne tilma ten quipilojca iixpampa. <sup>6</sup>Huan cuac in Jesús pehuatía ya quinmetzpajpacati in Simón Pedro, ijcuacón Simón Pedro quilij ijcuín:

—Notecotzin, ¿xe Tejuatzin ticnemilía tinechmetzpajpacas?

<sup>7</sup>Ijcuacón in Jesús quinankuilij ijcuín:

—Axcán de nicchiutoc ayamo ticyecajsicamati. Pero cachi satepan ticajsicamati-jtíu toni yequintzin nicchiutoc.

<sup>8</sup>Huan ijcón ocsepa in Pedro quilij Jesús ijcuín:

—Para nejua amo quemam huelis tinechmetzpajpacas.

Huan in Jesús quinankuilij ocsepa ijcuín:

—Huan como amo ticnequi ma nimitzmetzpajpacas, ijcuacón nimitzyequilía que amo huelis tipoutinemis nohuan.

<sup>9</sup>Ica ya nojón in Pedro ocsepa quilij ijcuín:

—Notecotzin, ta como ijcón yesqui, amo sayó xinechmetzpajpaca. Ta, no xinechpajpaca nomahuan huan hasta no xinehcuaajmohuij.

<sup>10</sup>Pero Jesús ocsepa quilij ijcuín:

—Huan naquen yesqui ten yequin motamialtij ya ica nochicahualis, yejua ne amo monequis ocsepa moaltis. Ta, sayó monequi mometzpajpacas porín nochi ninacayo chipahuac oc. Huan no namechyequilía que namejuan melau nanyolchipauque ya, masqui amo nochi de namejuan.

<sup>11</sup>Huan Jesús quinilij ijcuín: “Masqui amo nochi nanyolchipauque namejuan”. Huan ijcón quiqtoj porín Yejuatzin cuali quimatiaya de aconí quitemactis inmaco in tayecanani para quimictisque. <sup>12</sup>Huan ijcón cachi satepan cuac quitamimetzpajpacac ya, ijcuacón in Jesús quicuic ne itilma ten panían quiquentoya huan ocsepa motaquentij. Huan de ompa ocsepa motalito campa ne tacuajtoyaj huan quinilij imomachtijcahuan ijcuín:

—Nochi namejuan, ¿xe nancajsicamatij ten axcán nicchihuac? Achá amo. <sup>13</sup>Huan namejuan nannechnotzaj ica ne tocayit den Tamachtijque huan no nannechilíaj Totecotzin. Huan melau cuali yetoc queme nanquijtoaj porín melau Nitamachtijque huan Ninamotecotzin. <sup>14</sup>Huan Nejuatzin Ninamotecotzin huan Ninamotamachtijcau. Ica ya nojón ijcón queme namechmetzpajpacac, no ijcón namejuan monequi nanquinmetzpajpacasque se huan ocsé. <sup>15</sup>Huan Nejuatzin axcán namechnextilij ya para quenín nanquichihuasque namejuan. Huan ijcón xicchihuacan namejuan se huan ocsé ijcón queme Nejuatzin namechnextilij ya. <sup>16</sup>Huan yec melau ten namechilía que in tetaquehual amo cachi hueyi chiuque huan que ne iteco. Huan no

namechilía que ne naquen tanahuatijtinemi, yejua ne amo cachi hueyi chiuque huan que ne naquen cualtitanic. <sup>17</sup> Huan como melau nanquiajsicamatij ya nochi nijín tajtolme, ijcuacón monequi xitatacamatiyacan para ijcón Dios namechyolpactijtiyás.

<sup>18</sup> Pero nochi nijín tajtolme tenica namechnojnotza, amo nannochin namopan mochihuas. Porín nejua ipa cuali nicmati ya aconi niquinijitac ma nohuan poutine-mican para ma ximochihuacan nannomomachtijcahuan. Huan nochi nijín quipía de motamichihuas ijcón queme tajcuiliutoc tech in Tajcuilolamatzin de Dios ijcuín: “Yec melau ne naquen nohuan tacuajtoc, yejua ne quitemolía queniu para nechtemactis huan nechmictisque”. <sup>19</sup> Huan ijcón namechilía nochi nijín achtopa ya que mochihuas, para que cuac mochihuas ya, ijcuacón namejuan nancajsicamatisque que Nejuatzin ni Cristo Temaquixtijque. <sup>20</sup> Yec melau ten namechilía que neques ten quiselisque ica paquilis notanojnotzcaw ten Nejuatzin nicualtitanis, yejuan nojonques no nechselisque Nejuatzin ica ne paquilis. Huan no ijcón naquen nechselisque Nejuatzin, yejuan nojonques no quiselisque Notajtzin Dios ten nechualtitanic nican talticpac.

**Nican Jesús Temaquixtijque quitetapohuía de  
que Judas quitemactis ma quimictican,**

*(Mt. 26.20-25; Mr. 14.17-21; Lc. 22.21-23)*

<sup>21</sup> Huan ijcón in Jesús cuac quintamiilij ya nijín tajtolme, ijcuacón moyolmachilíaya que yoltajyohuiaya. Ica ya nojón Jesús quinyequilij imomachtijcahuan ijcuín:

—Yec melau ten namechilía que senme de namejuan ten nican nanyetocque, yejua ne nechtemactis para ma nechmictican.

<sup>22</sup> Ijcuacón imomachtijcahuan peuque mosejsenixitayaj san se huan ocsé porín amo quimatíaj aconi ica tajtoayaj Jesús. <sup>23</sup> Huan senme den imomachtijcahuan tacuajtoyaj inacastan in Jesús huan Yejuatzin semi quiyoltasojtaya nijín imomachtijcau ten tacuajtoya inacastan. <sup>24</sup> Huan ijcón in Simón Pedro quimaixnotzac ne imomachtijcaicniu ten Yejuatzin quiyoltasojtac porín quinequía quimatajtoltis aconi ica Jesús tajtoaya. <sup>25</sup> Ijcuacón ne imomachtijcaicniu motoquijtiquisac campa Jesús huan quitajtoltiayaj ijcuín:

—Notecotzin, ¿aconi Tejuatzin mitzontemactis para ma mitzmicmictican?

<sup>26</sup> Ijcuacón Jesús nimantzin quinanquilij imomachtijcaicniu ijcuín:

—Cuac nicpanajaquis nijín pan tatejtec, ijcuacón tiquitas ne naquen nicmactilis, yejua in tagat ten nechtemactis para ma nechmictican.

Huan melau ijcón quichihuac. In Jesús quipanajaqui se pan tatejtec huan quimactilij ne Judas, teconeu de Simón Iscariote. <sup>27</sup> Huan ijcón cuac Judas quiselij ya ne pan taajaquil, ijcuacón nimantzin ipan calaquic in amocuali Satanás tech niyolijtic in Judas. Huan de ompa Jesús quilij Judas ijcuín:

—Nochi ten ticyolnemilijtoc ticchihuas, yejua ne niman xiyó xicchihuati ya.

<sup>28</sup> Pero nión senme ten tacuajtoyaj ihuan Jesús huelic ma cajsicamican de queyé quijtoaya ijcón in Jesús. <sup>29</sup> Huan Judas ipa quipixtoya in tominehualoni. Ica ya nojón in ocsequin imomachtijcahuan quiyolnemiliayaj que Jesús quilijtoya in Judas ijcuín: “Ma xiyó xitacohuati nochi ten monequis para tiiluichihuasque”. Huan yejuan no quiyolnemiliayaj que xa Jesús quilijtoya in Judas ma quintayocolisquía in tomin neques ten amo teyi quipíaj tenica ixpanosque. <sup>30</sup> Huan cuac in Judas quitamicuaj

ya ne pantaajaquil, ijcuacón nimantzin quisac huan yajqui. Huan tech ne momento ipa cuali tapoyahuic ya.

### **Nican Jesús Temaquixtijque tajtoa de ne yancuic tanahuatil**

<sup>31</sup> Huan ijcón cachi satepan cuac Judas quisac ya, ijcuacón in Jesús quinilij imomachtijcahuan ijcuín:

—Huan axcan ya Notajtzin Dios namechonmonextilis nohueyichicaucahuelilis de Nejuatzin ni Yectagatzin. Huan Notajtzin Dios no namechonnextilis ihueyichicaucahuelilis de Yejuatzin ica por Nejuatzin Niiconetzin. <sup>32</sup> Huan como Nejuatzin ni Yectagatzin namechonnextilis ne ihueyichicaucahuelilis de Notajtzin Dios, ijcuacón Notajtzin Dios no namechycnextiliti nohueyichicaucahuelilis de Nejuatzin Niiconetzin. Huan no Notajtzin niman namechnextilitiu nohueyichicaucahuelilis de Nejuatzin. <sup>33</sup> Notasojconetzitzin, xicmatican que amo cachi nihuejcahuas oc namohuantzin niyetos. Huan namejuan nannechtemosque. Huan ijcón queme niquinilijca ya in tagayot judíos, no ijcón namejuan namechilía axcan ijcuín: “Campa Nejuatzin niyajtoc, namejuan amo huelis nannechtoctilisque”.

<sup>34</sup> Huan no in Jesús quinilij ijcuín:

—Axcan namechmaca se yancuic tanahuatil ma xictacamatiyacan ijcuín, que monequi ximoyolsepantasojtacan se huan ocsé. Huan no namechilía que ijcón queme Nejuatzin namechyoltasojtatiuhuitz ya, no ijcón namejuan ximoyoltasojtatiyacan se huan ocsé. <sup>35</sup> Huan como namejuan nanmoyoltasojtatinemij, ijcuacón nochi in talticpacuani cajsicamatisque que melau nannomomachtijcahuan.

### **Nican Jesús Temaquixtijque quitenejmachtía que Pedro quijtoa que amo quixmatis Yejuatzin**

*(Mt. 26.31-35; Mr. 14.27-31; Lc. 22.31-34)*

<sup>36</sup> Huan in Simón Pedro quitajtolitij Jesús ijcuín:

—Notecotzin, ¿can tiyati?

Huan Yejuatzin quinanquiliij ijcuín:

—Xicmati que campa Nejuatzin niyás, tejua amo huelis tinechtoctilis. Pero cachi satepan melau tinechtoctilitiu.

<sup>37</sup> Ijcuacón in Pedro quilij in Jesús ijcuín:

—Notecotzin, ¿queyé tiquijtoa que axcan amo huelis nimitztoctilis? Nejua no cuali huelis nictemacas nonemilis huan nimiquis para nimitztacamatis.

<sup>38</sup> Huan ijcón in Jesús ocsepa quinanquiliij ijcuín:

—¿Xe yec melau, tejua Pedro, ticnequi tictemacas monemilis para tinechpalehuis? Yec melau ten nimitzilía que axcan ahtopa que tzajtzis in piotzin, ijcuacón tejua expa tiquijtos que amo tinechixmati.

### **Nican tajtoa de de Jesús Temaquixtijque Yejuatzin ya in ojti tenica se cajsitiu Totajtzin Dios**

**14** Huan ijcón in Jesús quiniliaya imomachtijcahuan ijcuín:

—Amo ximoyolcuejmolocan. Ta, como melau nantacuaumatatij ihuan Totajtzin Dios, no ijcón monequi xicyectacuaumatatican nohuantzin. <sup>2</sup> Porín nepa campa ichantzin de Totajtzin Dios ongac míac caltzitzin campa namejuan no cuali nancalyetotihue. Porín tajcón amo oncasquía míac caltzitzin queme namechilijtoc

ya, ijcuacón namechyequilisquía ya que amo teyi. Pero quema, namechilijtoc ya ten melau. Ica ya nojón Nejuatzin niyó huan namechsesecotaliliti ya ne caltzitzin para namejuan. <sup>3</sup>Huan como Nejuatzin niyó namechsesecotaliliti ya ne caltzitzin, ijcuacón Nejuatzin ocsepa nimohualuicas nican talticpac para namechajocuiquiu huan namechuicatiu nepa campa eluiyactzinco campa noixpantzinco. Huan ijcón campa Nejuatzin niyetos, namejuan no ompa nanyetosque sen nachipa. <sup>4</sup>Huan namejuan cuali nanquimatij ya can niyó huan no nanquixmatij ya in ojtzin.

<sup>5</sup>Ijcuacón in Tomás quilij Jesús ijcuín:

—Notecotzin, amo ticmatij can tiyajtoc. Huan tejuan, ¿quenín huelis tiquixmatisque in ojtzin campa tiyajtoc?

<sup>6</sup>Ijcuacón in Jesús quinnanquilij ica se nexcuitil ijcuín:

—Nejuatzin ya queme niyesquía niojtzin para ica nanajisque ne campa Notajtzin Dios. Huan Nejuatzin ni Yolmelahuactzin huan namechnojnotzas sayó ica ten melau. Huan sayó Nejuatzin nitemacas nemilis. Ica ya nojón amo aquen huelis cajsis Notajtzin Dios como amo Nejuatzin nicyecantiyás. <sup>7</sup>Porín tajcón namejuan nanechyecajsicaixmatisquíaj, no ijcón Nohueyitajtzin nanquiyequixmatisquíaj. Huan axcan para taixpan nanquixmatosque ya Notajtzin Dios porín nanquitztihualayaj ya.

<sup>8</sup>Ijcuacón in Felipe quilij Jesús ijcuín:

—Notecotzin, tejuan ticnequij que xitechnextili Motajtzin Dios para ijcón tiyolpaquisque.

<sup>9</sup>Ijcuacón in Jesús quinanquilij ijcuín:

—Tejua Felipe, melau huejcahuac ya mohuan niyetinemic. Huan, ¿queyé hasta axcan ayamo tinechyequixmati? Ta, ipa tinechitzinemi ya. Xicmati que ijcón queme Nejuatzin tinechitzinemi, no ijcón Totajtzin Dios tiquitzinemi. Ica ya nojón, ¿queyé tejua tinechilía ijcuín que ma nejua ma namechonnnextili Notajtzin Dios? <sup>10</sup>¿Xe tejua amo tiyectacautamati que Nejuatzin ya niyetinemi ihuan Notajtzin huan no Notajtzin Dios yetinemi nohuan? Xicmatican que nochi nijín tajtolme tenica namechnojnotztoc, yejuan nojonques amo namechmachtijtoc ica por nejua notanahuatil san. Ta, Notajtzin Dios ten yetinemi nohuan, Yejuatzin ne quichiutinemi imohuiscatequihuan ten Yejuatzin quimonequiltía. <sup>11</sup>Nicnequi xicyecneltocacan cuac namechilía que Nejuatzin niyetinemi ihuan Notajtzin Dios huan no Notajtzin Dios yetinemi nohuan. Pero amo sayó xinechyeecneltocacan porín namechilijtoc. Ta, cachi oc nicnequi que xicyectacautamatican nohuan porín nanquitzinemi ya in mohuiscatequime ten nicchiutinemi. <sup>12</sup>Yec melau ten namechilía que nochi naquen yec tacuautamatisque nohuan, yejuan nojonques no quichiutinemisque in tachihualisme ijcón queme Nejuatzin nicchiutinemi. Huan no namechilía que notaneltocacahuan quichihuasque cachi huejueyi oc tachihualisme porín Nejuatzin niyó niyetotiu ihuan Notajtzin Dios. <sup>13</sup>Ica ya nojón nochi ten namejuan nanquitajtanilisque Notajtzin Dios ica in chicahualis de notocaytzin, ijcuacón Nejuatzin nicchihuas para ijcón Nejuatzin ni Teconetzin de Dios namechnextilis ne hueyi chicahuelilis de Notajtzin Dios. <sup>14</sup>Huan Nejuatzin nicchihuas nochi ten namejuan nanquitajtanilisque Notajtzin Dios ica in chicahualis de notocaytzin.

**Nican Jesús Temaquixtijque quintenilij imomachtijcahuan  
que quinaltitanilis in Yecticatzin Espíritu**

<sup>15</sup>Huan no Jesús quinilij imomachtijcahuan ijcuín:

—Huan como namejuan nannehyectasojtatinemij, no ijcón nicnequi xicyectacamatiyacan notanahuatiluan. <sup>16</sup> Huan ijcón Nejuatzin nictatautiti Notajtzin Dios para ma Yejuatzin namechualtitanili ocsé namo Teyolojpachojcau para ma ijcón Yejuatzin yetoquiu namohuan sen nachipa. <sup>17</sup> Yejuatzin in Yecticatzin Espíritu namechnojnotzas ica ten melau. Huan in talticpacuani amo huelis quiselisque in Yecticatzin Espíritu tech ninyolijtic porín yejuan amo queman quitztinemij huan amo queman quixmatij Yejuatzin. Pero melau namejuan cuali nanquixmatisque in Yecticatzin Espíritu porín Yejuatzin yetoquiu namohuan tech namoyolijtic huan ijcón Yejuatzin nachipa yetotinemis namohuan. <sup>18</sup> Huan Nejuatzin amo namechcautehuas queme nanmicacahualme. Ta, Nejuatzin ocsepa nihualas niyetoquiu namohuan. <sup>19</sup> Huan in talticpacuani amo huejcahuasque oc nechitztinemisque. Pero namejuan nantaneltocani, quema, nannechitztinemisque. Huan namejuan nanyoltinemisque sen nachipa, porín sayó Nejuatzin niyoltinemi sen nachipa huan no sayó Nejuatzin niteyayocolfa nemilis. <sup>20</sup> Huan tech ne tonal cuac hualas ya ne namo Teyolojpachojcau, ijcuación nanquiyecajscamatisque que Nejuatzin ya melau niyetinemi ihuan Notajtzin Dios. Huan no nancajscamatisque que namejuan no nanyetinemis que nohuan huan Nejuatzin no niyetinemis namohuan. <sup>21</sup> Huan nochi neques ten quixmatosque huan quitacamatiytinemij notanahuatiluan, yejuan nojonques melau nechyectasojtaj. Huan ijcón Notajtzin Dios no quintasojta nochi neques ten nechtasojtaj. Huan niqintasojtatiyás neques ten nechtasojtasque huan nimoajscatenextilijtiyás que Nejuatzin ni Cristo ihuan nochi neques ten nechtasojtaj.

<sup>22</sup> Huan senme den imomachtijcahuan ten monotzaya Judas, yejua ne amo in Judas Iscariote, yejua ne quitajtoitij Jesús ijcuín:

—Notecotzin, ¿queyé Tejuatzin tiquijtoa que titechonmonextilis que Tejuatzin ti Cristo? ¿Huan queyé amo tiquinmonextilis que ti Cristo nochi in talticpacuani?

<sup>23</sup> Ijcuación in Jesús quinanquilij ijcuín:

—Nochi neques ten nechyoltasojtaj, yejuan nojonques quitacamatinemij nochi notanahuatiluan. Huan ijcón Notajtzin Dios no quintasojtas ne naquen nechyoltasojtaj. Huan ijcón Notajtzin Dios huan Nejuatzin no tihualasque huan tiyetoquihue tech ninyolijtic de ne naquen nechyoltasojtaj. <sup>24</sup> Pero neques ten amo nechyoltasojtaj, yejuan nojonques amo quitacamatinemij notanahuatiluan. Huan nochi ne tanahuatilme ten nanquicactinemij, yejuan nojonques amo hualeutoc de nejua notanahuatil. Ta, nojón tanahuatilme nechmactilij ya Notajtzin Dios ten nechonualtitanic nican talticpac. <sup>25</sup> Huan nochi nijín tanahuatilme namechilijtoc porín niyetoc namohuan oc. <sup>26</sup> Pero Notajtzin Dios namechualtitanilis in Yecticatzin Espíritu ica in chichualis de notocaytzin. Huan ne Yecticatzin Espíritu Yejuatzin ne Teyolojpachojque. Huan Yejuatzin namechyecnextilijtiyás de notanahuatiluan. Huan Yejuatzin namechelnamictijtiyás nochi nijín ten axcan namechiluijtoc.

<sup>27</sup> Huan Nejuatzin namechcahuilijtehuas se ne hueyi yolsehulils. Huan ne neyolsehulils de Nejuatzin namechtayocolijtehuas, yejua ne amo monehuilía queme ne yolsehulils ten in talticpacuani quitemacaj. Ica ya nojón namechilía que amo ximoyolcuelmolocan nión no ximoyolmoutican. <sup>28</sup> Huan namejuan ipa cuali nanquicactinenque ya que Nejuatzin niyás campa yetica Notajtzin Dios. Huan de ompa ocsepa nihualas niyetoquiu namohuan. Porín tajcón yec melau nannechyoltasojtasquíaj, ijcuación nanmoyolpactisquíaj cuac nancajscamatij que Nejuatzin niyó inahuactzinco Notajtzin Dios. Porín Notajtzin Dios Yejuatzin ya ne cachi hueyi chiuque huan

que Nejuatzin. <sup>29</sup> Huan nochi nijín namechilía achtopa ya que mochihuas para cuac mochihuas ya, ijcuación namejuan nanquiyecneltoque que Nejuatzin ni Cristo Temaquixtijque. <sup>30</sup> Huan axcan amo cachi oc namechnojnotzas oc, porín hualajtoc ya ne amocuali tayecanque Satanás ten nican talticpac taquitzquijtoc ica ne ichicahualis. Huan ne Satanás amo teyi quipía chicahualis para ma yejua nechtanajnahuatiqui. <sup>31</sup> Pero ijcón queme Notajtzin Dios nechnahuatiliy ya ma nicchihua, no ijcón nicchiutinemis para ma ijcón ma quimatican in talticpacuani que Nejuatzin nictasojta Notajtzin Dios.

Huan de ompa Jesús quinilij imomachtijcahuan ijcuín:

—Axcan nimantzin ximoquetzacan huan tiyohue.

### **Nican Jesús Temaquixtijque quinmachtijtoc imomachtijcahuan ica se nexcuitil de se uvastemecat**

**15** Huan ijcón in Jesús quinmachtij imomachtijcahuan ica se nexcuitil ijcuín: —Nejuatzin queme niyesquía niuvastemecatatzon. Huan Notajtzin Dios quinejnehuilía queme ne tequitique ten quichijchipautinemi ne uvastemecatatzon. <sup>2</sup> Huan ne tequitique quimaxintinemi ne nomayohuan ten motatzmolía ne ten amo quitemaca taquilot. Huan ne tequitique no quichijchipautinemi ne nomayohuan nochi ten melau quitemaca taquilot, para ijcón cachi quitemaca taquilome. <sup>3</sup> Huan namejuan melau namechylchijchipahuac ya ica ne tanextililis ten namechmacatinemic ya. <sup>4</sup> Huan namejuan monequi ximajsitocan nohuantzin ijcón queme Nejuatzin nimajsitinemis namohuan. Porín ximatican que se uvasmayit amo huelis quitemacas taquilot iselti san, como amo pilcatoc ihuan ne uvastemecat. Huan no ijcón namejuan amo no huelis nanquitemacasque taquilome como amo nachipa nanmajsitinemisque nohuan.

<sup>5</sup> Porín Nejuatzin nimonejnehuililía queme se uvastemecatatzon huan namejuan nanquinejnehuilíaj queme uvastatzmolme. Huan nochi naquen majsitinemisque nohuantzin, huan Nejuatzin no nimoajsitinemis ihuan, yejuan nojonques quitemacatiasque míac taquilome ten quipactía Totajtzin Dios. Huan namejuan amo huelis teyi nanquichihuasque como amo nanmajsitinemisque nohuantzin.

<sup>6</sup> Porín naquen amo majsitinemisque nohuan, yejuan nojonques quinejnehuilíaj ne uvastatzmol ten amo taqui. Huan in tequitini quimaximasque huan quitamotasque talpan. Huan de ompa huaquis huan quiololosque huan quichichinosque campa motzonmelautoc nochi tit. <sup>7</sup> Huan como namejuan nachipa nanmajsitinemij nohuantzin, huan no como nanquitacamatiyohue notanahuatilan, ijcuación namechilía xitajtanilican Notajtzin Dios nochi ten namejuan nanquinequisque, huan Yejuatzin namechmactilis.

<sup>8</sup> Huan ijcón namejuan nanquihueyimohuiscachiutinemij Notajtzin Dios cuac nanquitemacaj míac taquilome ica namochipaucanemilis, huan ijcón nanquiyolpactíaj Notajtzin Dios. Huan ica nijín namotaquilohuan ixnesitiu que melau nannomomachtijcahuan. <sup>9</sup> Huan Nejuatzin namechtasojtatiu namejuan ijcón queme Notajtzin Dios nechtasojta Nejuatzin. Ica ya nojón namechilía xicsentocacan xicselijtiyacan ne tetasojtalis tenica Nejuatzin namechtasojta. <sup>10</sup> Huan como namejuan nanquitacamatiyohue nijín notanahuatilan, ijcuación namejuan nanquisentocasque nanquiselisque notetasojtalis. Huan no ijcón mochihuas, cuac Nejuatzin nictacamatiu itanahuatilan de Notajtzin Dios, ijcuación Nejuatzin nicsentoca nicselijtiyás

itetasojtalis de Notajtzin Dios. <sup>11</sup> Huan ijcón Nejuatzin namechnojnotza para ximoy-olpactican ica ne paquilis ten namechmaca huan ijcón ma yec majsitiu noyolpaquilis tech namoyolojuan. <sup>12</sup> Huan notanahuatil ten namechmaca yejua nijín, ma ximosep-antasojtacan se huan ocsé ijcón queme Nejuatzin namechtasojta namejuan. <sup>13</sup> Huan ne tetasojtalis ten cachi hueyi yejua nijín: Monequi ma se quitemaca inemilis para ijcón quinpalehuis ocsequin itasojcnihuan.

<sup>14</sup> Huan namejuan nanmochiutinemij nannotasojcnihuan, como namejuan nanquitacamatijtinemij nochi ten namechnahuatiliy ya. <sup>15</sup> Huan axcan Nejuatzin amo namechnotza oc queme yesquáj nantaquehualme san, porín in taquehual amo quimati toni quichihuas nipatrón. Ta, axcan nejua namechilfa que namejuan nannotasojcnihuan porín namechajsicamatiltij ya nochi ne tanahuatilme ijcón queme nicaquilij cuac Notajtzin Dios nechnahuatiliy ma nicchihua. <sup>16</sup> Huan namejuan amo nannechijitacque que ma nejua ninamoteco. Ta, Nejuatzin namechijitac que ma namejuan nannomomachtijcahuan. Huan Nejuatzin namechnahuatij ya que xichipaucanemican huan xictacamatinemican ijcón queme Notajtzin Dios quimonequiltía. Huan ijcón xicpixtiyacan míac taquilome de namochipaucanemilis para ma ne taquilome amo nenca san. Ta, ma huejcahuasque. Ica ya nojón nochi ten yesqui nanquitajtanilisque Notajtzin Dios ica ne chicahualis de Nejuatzin notocaytzin, nochi Yejuatzin namechmactilis. <sup>17</sup> Huan yejua nijín namechnahuatilfa axcan, que ximosepantasojtacan se huan ocsé.

### **Nican tajtoa de ne talticpacuani ten quitahuelitaj Jesús huan itaneltocacahuan**

<sup>18</sup> Huan no Jesús quinilij imomachtijcahuan ijcuín:

—Huan cuac in talticpacuani namechyoltahuelitasque, ijcuacón xicmatican que yejuan achtopa nechyoltahuelitaj Nejuatzin. <sup>19</sup> Porín tajcón namejuan nanopoutosquáj ihuan in talticpacuani, ijcuacón xicmatican que ne talticpacuani cachi namechtasojtasquáj, ijcón queme yejuan quintasojtaj nochi ne ten ihuan poutocque. Pero namejuan amo nanopoutinemisque oc ihuan in talticpacuani. Porín Nejuatzin namechijitac ya namejuan para ma amo xipoutocan ihuan in talticpacuani. Ica ya nojón in talticpacuani namechyoltahuelitztinemij porín namejuan amo nanopoutinemij oc inuan yejuan. <sup>20</sup> Cualí xiquelnamiquican nijín tajtolme ten namechilijitihuitz ya ijcuín: “In taquehual amo cachi hueyi chiuque huan que ne ipatrón”. Huan ijcón queme Nejuatzin nechtahuelitztinenque in talticpacuani, no ijcón namejuan namechtahuelitztinemisque. Huan queme namejuan nanquitacamatque ya notanahuatilian, no ijcón in tagayot ten taneltocatiyasque, yejuan nojonques no quintacamatiyasque namotanahuatilian. <sup>21</sup> Huan ijcón nochi in talticpacuani namechta-  
jyohuiltijtinemisque porín Nejuatzin nechtahuelitaj. Huan yejuan nechtahuelitztine-  
mij porín yejuan amo quixmatij Notajtzin Dios ten nechualtitanic nican talticpac.

<sup>22</sup> Huan tajcón Nejuatzin amo nihualasquía para niquinnojtzasquía in talticpacuani ica in Tajtoltzin de Dios, ijcuacón yejuan amo cajsicamatisquáj cox tajtaclejque. Pero queme niquinnojtzaco ya, ica ya nojón axcan in talticpacuani amo huelis quijtosque oc que amo tajtaclejque. <sup>23</sup> Huan nochi naquen nechtahuelitaj, yejuan nojonques no quitahuelitztinemij Notajtzin Dios. <sup>24</sup> Amo huelis se tagat san quichihuasquía nijín mohuiscatequime ijcón queme Nejuatzin nicchihuaco. Pero queme Nejuatzin nictamichihuac ya senteixteno nijín mohuiscatequime, ica ya no-

jón in talticpacuani cajsicamatque ya que yejuan tajtaclejque. Huan melau nijín tagayot quitztinenque ya in mohuiscatequime ten Nejuatzin nicchiutinemic ya. Ica ya nojón yejuan axcan nechtahuelitaj Nejuatzin, huan no quitahuelitztinemij in Notajtzin Dios. <sup>25</sup> Huan nechtahuelitztinemij in talticpacuani porín ijcón quipía que motamichihuas nijín tajtolme ten ijcuiliutoc tech in Tajcuilolamatzin de Dios ijcuín: “Nenca san nechtahuelitacque”. <sup>26</sup> Huan cuac namechualtitanilis ya ne namo Teyolojpachojcau, ijcuación Yejuatzin ne yec Yolmelahuactzin hualas tequitiquiu itencopaca Notajtzin Dios. Huan ne Yolmelahuactzin, Yejuatzin ne hualehuac imaco de Totajtzin Dios. Huan cuac in Yolmelahuactzin hualas ya, ijcuación Yejuatzin namechajscamatiltiyás de aconi Nejuatzin. <sup>27</sup> Huan no ijcón namejuan nantanojnotztinemicque ica notajoltzin huan nanquinajscamatiltisque in tagayot de aconi Nejuatzin. Huan ijcón xicchiutinemican porín namejuan nanyetinenque nohuan desde ne tonal cuac nictzinpehualtij notequiu.

**16** Huan no Jesús quinilij imomachtijcahuan ijcuín: —Huan namechilía nochi nijín tajtolme para cuac namechtahuelitztinemicque in talticpacuani, ijcuación amo ximoyolxocolican para xicsecocahuacan namotacuautamatilis. <sup>2</sup> Porín in tayecanani judíos namechcalantamotasque para ma amo ximosentilijtinemican oc tech in tiopan de judíos. Huan amo sayó namechtacahualtisque. Ta, no ijcón ejcos in tonal cuac acsá de yejuan namechmictis. Huan neques ten namechmictisque, yejuan nojonques quiyolnemilisque que xa cachi quiyolpactíaj in Totajtzin Dios ica ne ten yejuan quichiutocque. <sup>3</sup> Huan ijcón namechtahuelitztinemicque porín amo queman quixmatque in Notajtzin Dios, huan amo no Nejuatzin amo queman nechixmatque. <sup>4</sup> Huan ijcón nochi nijín ten mochihuas namechnejmachtijtoc axcan para que cuac ejcos ya ne tonal ten tajyohuilis, ijcuación xiquelnamiquican que Nejuatzin ipa namechilijca ya.

### Nican tajtoa den itequiu den Yecticatzin Espíritu

Huan no Jesús quinilij imomachtijcahuan ijcuín:

—Huan amo teyi namechilijca den itequiu in Yecticatzin Espíritu porín axcan Nejuatzin ninentinentoc oc namohuan. <sup>5</sup> Pero axcan Nejuatzin niyó ya niyetoti imacotzincó Notajtzin Dios ten nechualtitanic nican talticpac. Huan amo senme de namejuan ma xinechtajoltican ijcuín: “¿Can tiyajtoc?” <sup>6</sup> Huan amo nannechtajoltíaj teyi porín nochi nanmoyoltayocoltíaj ica por nochi nijín tajtolme ten namechilijtoc ya. <sup>7</sup> Pero nochi yec melau nijín tajtol ten namechilijtoc que cachi cuali para namejuan ma Nejuatzin niyó ya campa nihualehuac. Porín tajcón amo niyó campa Notajtzin Dios, ijcuación amo huelis hualas ne namo Teyolojpachojcau para yetoquiu namoyolijtic. Pero como niyó ya campa ne nihualehuac, ijcuación namechualtitanilis ne namo Teyolojpachojcau para ma namechpalehuiqui. <sup>8</sup> Huan cuac hualas ya ne namo Teyolojpachojcau nican talticpac, ijcuación Yejuatzin nochi quintaneltoctis in talticpacuani que yejuan tajtaclejque. Huan no quintaneltoctiquiu que sayó Nejuatzin ni Yolchipahuactzin. Huan no quintaneltoctiquiu de que Totajtzin Dios se tonal quinixcomacas huan quintelchihuas nochi ten amo taneltocani. <sup>9</sup> Huan ne Teyolojpachojque quintaneltoctis in talticpacuani que yejuan tajtaclejque porín yejuan axcan amo tacuautamatij nohuanzin. <sup>10</sup> Huan no Yejuatzin quintaneltoctis ne talticpacuani que sayó Nejuatzin ni Yolchipahuactzin, porín sayó Nejuatzin niyó niyetoti imacotzincó Dios. Ica ya nojón namejuan amo nannechitztinemicque oc cachi oc.



<sup>11</sup> Huan ne Teyolojpachojque quinajsicamatiltis in talticpacuani de ne hueyi tatzacuilitis ten Dios quinaltitanilis. Huan ijcón mochihuas porín Totajtzin Dios quinx-comacac ya huan quintelchihuac ya in amocuali Satanás ne ten axcan taquitzquijtoc nican talticpac.

<sup>12</sup> Huan no Jesús quinilij imomachtijcahuan ijcuín:

—Huan ijcón nicpía míac taman tanextilisme para namechilisquía oc, pero axcan amo huelis oc nancajsicamatisque. <sup>13</sup> Pero cuac hualas ne Yecticatzin Espíritu ten Yolmelahuactzin, ijcuación Yejuatzin ne namechyecantiyás para ximomachtican ica nochi tanextilisme ten melau. Huan ne Yecticatzin Espíritu amo tanojnotztine-mis ica Yejuatzin itanahuatil san. Ta, Yejuatzin melau namechmachtijiyás ica ne tanahuatil tenica Notajtzin Dios quinajnahuatiliz ya. Huan no in Yecticatzin Espíritu namechnextiltijiyás nochi míac tataman ten mochihuaquíu satepan oc. <sup>14</sup> Huan in Yecticatzin Espíritu, Yejuatzin ne quichihuas que in tagayot ma nechmohuistilijtinemican. Huan Yejuatzin ijcón quichihuas porín quicuis noaxca notajtoluan huan namechajsicamatiltijiyás de toni quijtosnequi nochi nijín notajtoluan. <sup>15</sup> Huan nochi ne tanextilisme ne ten Notajtzin Dios iaxcacopaca, Yejuatzin ne no noaxcacopaca. Ica ya nojón namechilij que in Yecticatzin Espíritu quiselis de noaxcacopaca huan Yejuatzin ne quicuis para namechajsicamatiltis namejuan.

### **Nican Jesús Temaquixtijque quinilij imomachtijcahuan que: ninyoltayocolisuan mochihuaquíu yolpaquilisme**

<sup>16</sup> Huan Jesús ocsepa quinilij imomachtijcahuan ijcuín:

—Huan axcan amo cachi huejcahuas oc nannechitztinemisque. Pero cachi satepan ocsepa nannechitasque. Huan ijcón mochihuas porín Nejuatzin niyati nepa campa yetica Notajtzin Dios.

<sup>17</sup> Huan ijcón sequin de imomachtijcahuan motatajtoltiayaj se huan ocsé ijcuín:

—Huan, ¿toni quijtosnequi nijín tajtolme? Porín Yejuatzin techilía que amo huejcahuas oc tiquitztosque. Huan no quijtoa que cachi satepan ocsepa tiquitasque. Huan no quijtoa que nochi nijín mochihuas porín Yejuatzin yohui yetoti imacotz-inco Totajtzin Dios. <sup>18</sup> Huan, ¿toni quijtosnequi nijín tajtol: “Amo huejcahuas oc nannechitztosque”? Huan tejuan nijín tajtolme amo ticajsicamatij de tonica yejua tajtojtoc.

<sup>19</sup> Huan ijcón in Jesús niman quinyolojixmatic que yejuan quinequíaj quichihuilis que matájtanti. Ica ya nojón in Jesús quinilij ijcuín:

—Melau Nejuatzin namechilij que amo huejcahuas nannechitztosque oc. Huan no namechilij que cachi satepan nannechitasque. ¿Xe yejica ya nijín tenica namejuan nanmotatajtoltijtocque de toni quijtosnequi nijín notajtoluan? <sup>20</sup> Yec melau ten namechilía que namejuan nanchocasque huan nanmoyolcocojtosque cuac namechcautehuas ya. Pero in talticpacuani moyolpactijtosque. Huan masqui namejuan nanyetosque tech ne hueyi neyolcocolis, pero xicmatican que namoneyolcocolis mochihuaquíu paquilisme. <sup>21</sup> Huan namechnextilía ica se nexcuitil ijcuín: Melau cuac se sihuat tayolititi ya, ijcuación yejua ne tajyohuíá ica ne hueyi toneucayot, porín ejcoc ya in tonal de ne tajyohuilis. Pero satepan cuac yolic ya in conetzin, ijcuación ne sihuat hasta amo no quelnamiquis oc ne tajyohuilis cox ipan panoc, porín yejua semi moyolpactijtoc ica ne conetzin ten yolic nican talticpac. <sup>22</sup> Huan ijcón queme ne sihuat tajyohuíá, no ijcón namejuan axcan nantajyohuisque. Pero

xicmatican que Nejuatzin satepan ocsepa namechitaqui. Huan cuac Nejuatzin nihualas ya, ijcuacón namejuan nanmohueyiyolpactisque. Huan ne namoyolpaquilisuan amo aquen huelis namechajchihuilis oc. <sup>23</sup> Huan tech ne tonal cuac nanyolpactinemisque ya, ijcuacón amo monequi oc nannechtajtoltisque tensá oc. Porín yec melau ten namechilía que tech ne tonal Notajtzin Dios namechmactilis nochi ten nanquitajtanilisque ica in chicahualis de notocaytzin. <sup>24</sup> Huan melau tech nijín tonalme hasta yequintzin amo teyi nanquitajtanilijtocque Notajtzin Dios ica in chicahualis de notocaytzin. Pero axcan xictajtanican huan ijcón nanquiselisque ten Notajtzin Dios namechmacas. Ijcuacón namejuan nanquipiasque tech namoyolijtic se hueyi ajscapaquilis.

**Nican Jesús Temaquixtisque quinilij imomachtijcahuan que Yejuatzin nochi quitamixijxicoj ya in chicahualisme den amocuali Satanás**

<sup>25</sup> Huan Nejuatzin namechmachtijtihuala ya ica sequi nexcuitilme. Pero hualas ya in tonal cuac Nejuatzin amo namechnextilis oc ica ne nexcuitilme. Ijcuacón Nejuatzin namechmachtis de chicahualisme de Notajtzin Dios ica sequi tajtolme ten cachi amo ohui para ijcón namejuan nancajsicamatisque. <sup>26</sup> Huan tech ne tonal namejuan nanmotatautilisque ihuan Notajtzin Dios sayó ica ichicahualis de notocaytzin. Ijcuacón amo monequis oc ma nimotatautilis ihuan Notajtzin Dios ica por namejuan. Ta, sayó namejuan xicchihuacan. <sup>27</sup> Huan ijcón xicchihuacan namejuan porín Notajtzin Dios namechyoltasojta. Huan Yejuatzin namechyoltasojta porín namejuan no nannechyoltasojtaj Nejuatzin. Huan no Yejuatzin namechyoltasojta porín namejuan nanquiyecneltocacque que Nejuatzin nihualehuac imacotzinco Notajtzin Dios. <sup>28</sup> Huan melau Nejuatzin nihualehuac imacotzinco Notajtzin Dios huan nihuala nican talticpac. Ica ya nojón axcan ocsepa nicahuas nijín talticpac. Huan niyás ocsepa nicajsitiu Notajtzin Dios.

<sup>29</sup> Ijcuacón ne imomachtijcahuan quiluijque Jesús ijcuín:

—Axcan melau titechnojnotzoc ya huan no timitzonyecajsicamatilíaj ya, masqui amo ticuic oc nexcuitilme para titechnojnotzas. <sup>30</sup> Huan axcan melau ticyecajsicamatij ya que tejuatzin nochi in tamachilisme de Dios ticmatoc ya. Huan axcan amo monequis oc que ma acsá mitztatajtoltis oc de toni quijtosnequi motamachilisan. Ica ya nojón tejuan tiyecajsicaneltoaj ya que tejuatzin tionualehuac imacotzinco Totajtzin Dios.

<sup>31</sup> Ijcuacón in Jesús quintajtoltij imomachtijcahuan ijcuín:

—¿Xe melau nanquiyecneltocaj ya nijín que Nejuatzin nihualehuac imacotzinco Dios? <sup>32</sup> Huan Nejuatzin namechilía que hualajtoc ya in tonal, huan axcan melau namopan ejcoc ya in tonal cuac mochihuas que namejuan nanchocholosque huan nanmoixcuamoyahuasque se huan ocsé sejsecan huan nannechcahuasque noselti. Pero xicmatican que amo niyetos noselti. Ta, yetos nohuan Notajtzin Dios. <sup>33</sup> Huan nochi nijín tajtolme namechilijtoc para que namejuan xicpiacan ne neyolsehuilis. Huan tech nijín talticpac namejuan nanquipiasque míac tajyohuilisme. Pero amo ximoyolmoutican. Ta, ximoyolchicahuacan porín Nejuatzin nochi nictamixijxicoj ya in chicahualis den amocuali Satanás ten taquitzquijtinemi nican talticpac.

**Nican Jesús Temaquixtijque motatatautilij inahuactzinco  
Itajtzin Dios ica por imomachtijcahuan**

**17** Huan in Jesús cuac quintamiilij ya imomachtijcahuan nochi nijín tajtolme, ijcuacán Yejuatzin ajcotachíac ne eluiyactzinco huan quilij Itajtzin Dios ijcuín:

—Notajtzin Dios, ejcoc ya in tonal cuac nictamichihuas notequiu. Huan axcan xinechonueyipanchihua senteixteno para que Nejuatzin nimoconetzin ma nicpía chichahualis ma no nimitzonueyipanchihuas Tejuatzin senteixteno. <sup>2</sup> Porín Nejuatzin nimoconetzin huan Tejuatzin tinechonmactilij ya tanahuatil para ma Nejuatzin nimomasouto ica mochichahualis inpan nochi in talticpacnemini. Huan amo sayó nojón. Ta, no Tejuatzin tinechonmacac ya tanahuatil para ma Nejuatzin niquinmaca ne nemilis nachipa nochi naquen Tejuatzin tinechinmactilij ya ma pohuican nohuantzín. <sup>3</sup> Huan ne nachipa nemilis quijosnequi yejua nijín: Que in talticpacuani ma mitzonixmatican Tejuatzin que tion Dios tion Yolmelahuactzin, huan sayó Tejuatzin tion Dios. Huan in talticpacuani ma nechixmatican Nejuatzin que ni Jesucristo ten Tejuatzin tinechonualtitanic ya nican talticpac.

<sup>4</sup> Huan Nejuatzin nimitzonhueyipanchiutinemic ya nican talticpac. Huan axcan Nejuatzin nochi nictamichihuac ya in tequit ten Tejuatzin tinechonmactilij ya ma nicchihuani. <sup>5</sup> Huan axcan Notajtzin Dios xinechonhueyipanchihua moixpantzinco Tejuatzin ica ne mochicaucahuellilis ten ipa nicpiaya ya ne moixpantzinco ne achtopa ya que tzinehuasquía in talticpac. <sup>6</sup> Huan Nejuatzin niquinyecajsicamatililtij ya de aconí Tejuatzin nochi ne taneltocani ten tiquinonijitac ya intzalan in talticpacnemini, huan neques Tejuatzin tinechonmactilij ya. Huan nojón taneltocani catcaj moaxcahuan, pero Tejuatzin tinechoninmactilij ya nojón taneltocani. Ica ya nojón yejuan quitacamatiyajque motajtolztitzin. <sup>7</sup> Huan axcan nijín motaneltocacahuan cuali quimatij ya que nochi in tamachilisme ten tinechonmactilij ya, nochi nojón hualeutoc de Tejuatzin. <sup>8</sup> Huan Nejuatzin niquinnextilij ya motaneltocacahuan de nochi motajtolztitzin ten tinechonmactilij ya, huan yejuan melau quinselijque huan quintacamatiyohue. Huan axcan nomomachtijcahuan quiyecajsicamatij ya que Nejuatzin nihualehuac momacotzinco Tejuatzin. Huan yejuan no quineltoacque ya que Tejuatzin tinechonualtitanic nican talticpac.

<sup>9</sup> Huan axcan nimohueyitatatautilía moixpan, Tejuatzin, ica por yejuan nomomachtijcahuan ten Tejuatzin tinechoninmactilij ya. Huan amo nimotatautilía ica por ne talticpacnemini san. Ta, nimotatautilía ica por nomomachtijcahuan ten tinechoninmactilij ya porín yejuan moaxcahuan. <sup>10</sup> Huan nochi nomomachtijcahuan, yejuan nojonques no moaxcahuan. Huan no ijcón nochi momomachtijcahuan yejuan nojonques no pohuij nohuan. Huan yejuan yec tacuautamatij nohuan; ica ya nojón yejuan nechueyipanchiutihualayaj. <sup>11</sup> Huan axcan amo nimocahuas oc nican talticpac, pero nomomachtijcahuan yejuan melau mocahuasque oc nican talticpac. Huan Nejuatzin niyó nimitzajsiti para niyetos mohuan. Huan Tejuatzin tion Nohueyimohuiscatajtzin, nicnequi que Tejuatzin nachipa xiquinyecpixinemi nomomachtijcahuan ica mochichahualis de motocaytzin nijinques momomachtijcahuan ten Tejuatzin tinechonmactilijca ya. Huan ijcón yejuan ne momomachtijcahuan ma poutinemican sansé ijcón queme Tejuatzin huan Nejuatzin tisenpoutinemij sansé san. <sup>12</sup> Porín cuac Nejuatzin ninentinemic ihuan momomachtijcahuan

nican talticpac, ijcuación Nejuatzin niqunyepixtinemic ica mochicahualis de motocaytzin. Huan nochi ne momomachtijcahuan ten tinechoninmactilijca ya, yejuan nojonques nachipa niqunyepixtinemic. Ica ya nojón nión senme de yejuan ixpoli-  
 uque. Ta, sayó ixpolihuic ne Judas Iscariote, ne ten ipa Dios quitalij ya ma ixpolihui. Huan ijcón mochihuac ipan ne Judas para que in Tajcuilolamatzin de Dios ma motamichihuati ijcón queme ijcuiliutoc.

<sup>13</sup> Huan axcan niyó ya ne eluiyactzinco campa Tejuatzin tionyetoc. Pero Nejuatzin niqunnextilijtoc oc nomomachtijcahuan ica nijín tajtolme, para ma yejuan moyecajscayolpactijtiyacan ica noyolpaquilis de Nejuatzin nicpía. <sup>14</sup> Huan no ijcón Nejuatzin niqunnextilijtinemic niqunnextilijtinemic nomomachtijcahuan de motajtoltzin de Tejuatzin. Pero in talticpacnemini quintahuelitacque nomomachtijcahuan, porín nomomachtijcahuan amo poutinemij oc ihuan in talticpacnemini, ijcón queme Nejuatzin amo no nipoutinemi oc nican talticpac. <sup>15</sup> Huan Nohueytajtzin Dios, nimitzontajtanilía que amo xiquinajchihua nomomachtijcahuan de nican talticpac. Ta, nimitzontatautilía de que xiquinyepixtinemi nomomachtijcahuan para que in amocuali Satanás ma amo quincajcayahua. <sup>16</sup> Huan ijcón queme Nejuatzin amo nipoutinemi nican talticpac, no ijcón nomomachtijcahuan yejuan amo no poutinemij nican talticpac.

<sup>17</sup> Notajtzin Dios, motajtolis yejua ne yec melau tajtolis. Huan ica motajtolis ten yec melau xiquinyolchijchiphahua huan ximoinaxcatili nijín nomomachtijcahuan para ma yec melau yejuan yec ajscapoutinemican mohuantzin. <sup>18</sup> Huan ijcón queme Tejuatzin tinechonualtitanic para niqunnextilijtinemic in talticpacnemini, no ijcón Nejuatzin niquntitanis nomomachtijcahuan para ma no yejuan ma tamachtijtinemican intzalan in talticpacnemini. <sup>19</sup> Huan mohuantzin nimotemactía momacotzinco Tejuatzin para niqunpalehuijtiyás nomomachtijcahuan. Huan no nimotemactía momacotzin para ma yejuan no mohuantzin ma moteaxcatilijtinemican ica yolmelau-cayot ica por motajtoltzin. <sup>20</sup> Huan ijcón amo nimitzontatautilía sayó ica por nijín nomomachtijcahuan. Ta, no nimitzontatautilijtoc ica por neques ten tacuautamatisque oc satepan nohuantzin, cuac nomomachtijcahuan quinnojnotztinemicque ica notajtoltzin. <sup>21</sup> Huan ijcón nimitzontajtanilía que nochi yejuan notaneltocacahuan, ma yejuan ma yec ajscamajsitinemican se huan ocsé. Huan no nimitzontatautía Notajtzin ma sen poutinemican tohuan nochi nomomachtijcahuan, ijcón queme Tejuatzin timoajsitinemi nohuan, huan ijcón queme Nejuatzin no nimoajsitinemi mohuantzin. Huan no nimitzontatautía que notaneltocacahuan ma yec ajscamajsitinemican se huan ocsé para ma ijcón in talticpacnemini ma quineltocacan que melau Tejuatzin ya tinechonualtitanic nican talticpac.

<sup>22</sup> Huan Notajtzin, niqunaxcatilij ya nomomachtijcahuan ne mohuiscahuelilis ten Tejuatzin tinechonmactilij ya. Huan ijcón yejuan ma sepan poutinemican ijcón queme Tejuatzin huan Nejuatzin tisepanpoutinemij. <sup>23</sup> Huan Nejuatzin ni-majsitinemi ihuan notaneltocacahuan huan Tejuatzin tionmajsitinemi nohuantzin. Huan nochi nijín mochihuac ijcón para que ma yejuan no nomomachtijcahuan ma yec ajscapoutinemican sansé san. Huan ica por nijín sen yetolis in talticpacuani cajsicamatisque de que Tejuatzin tinechonualtitanic nican talticpac. Huan no cajsicamatisque que Tejuatzin tiqunyoltasoja in talticpacuani ijcón queme Nejuatzin tinechonyoltasoja. <sup>24</sup> Notajtzin Dios, nimitzontatautía ica por nijín nomomachtijcahuan ten tinechonmactilij ya. Huan Nejuatzin nicnequi ma yejuan yetotihue no-

huantzin nepa eluiyactzinco campa Nejuatzin niyetos. Huan ompa eluiyactzinco yejuan quixmatitihue ne mohuiscahuelilis ten Tejuatzin tinechonmactilij ya. Huan Tejuatzin tinechonmactilij ya ne mohuiscahuelilis porín Tejuatzin tinechonyoltasojtac ya achtopa ya que tzinpehuasquía in talticpac.

<sup>25</sup>Notajtzin Dios, tion Yolmelahuactzin huan in talticpacnemini amo mitzonixmatij. Pero Nejuatzin, quema, nimitzonixmati. Huan nijín nomomachtijcahuan cuali quimatocque ya que Tejuatzin tinechonualtitanic nican talticpac. <sup>26</sup>Huan Nejuatzin niqinnextilijtinemic nomomachtijcahuan ica in chicahualis de motocaytzin de aconi Tejuatzin. Huan niqinmachtijtinemis oc de aconi Tejuatzin, para ma ne tetasojtalis tenica tinechonyoltasojta, ma no ninyolijtic yejuan ma mochihua. Huan ijcón melau Nejuatzin nimoajsitinemis ninuan nomomachtijcahuan.

### Nican in tayecanani judíos quitzijtzicojque Jesús Temaquixtijque queme preso

(Mt. 26.47-56; Mr. 14.43-50; Lc. 22.47-53)

**18** Huan cuac in Jesús quintaminojnotzac ya imomachtijcahuan ica nochi nijín tanexutililisme, ijcuacón Yejuatzin quistehuac, huan yajqui ihuan imomachtijcahuan, huan ajstitoj sentapalpa de ne hueyi atahuat de monotza Cedrón. Huan ompa yetoya se xocomila, huan Jesús calayic ompa ihuan imomachtijcahuan tech ne xocomila. <sup>2</sup>Huan ne Judas ten ipa quitemactis Jesús ma quimictican, yejua ipa cuali quixmatoya ya ne xocomila campa mosentiliayaj, porín miacpa in Jesús quinuicaya imomachtijcahuan ompa. <sup>3</sup>Ica ya nojón ne Judas quinquialcuito huan quinejcoltij mías tagayot soldados campa ne xocomila. Huan no hualayaj ne tiopan mayolme ten quinquialtitanque in fariseos huan tayecanani tiopixcame. Huan ne tagayot nochi cualcuíaj teposme queme machete, huan sequin cualcuíaj lampara de aceite, huan sequi cualcuíaj ocopil tenica motahuilijtihualayaj. <sup>4</sup>Huan queme in Jesús ipa cuali quimatoya ya toni ipan mochihuasquía, ica ya nojón cuac ejcocque ya ne tagayot, nimantzin Jesús motayecancaquetzac huan quintajoltij in tagayot ijcuín:

—¿Aconi nanquitemoaj?

<sup>5</sup>Huan yejuan tananquilijque ijcuín:

—Tictemoaj yejua ne ten monotza Jesús de Nazaret.

Huan in Jesús quinnanquilij ijcuín:

—Nejuatzin ya ni Jesús de Nazaret.

Huan no ompa ijcatoya in Judas Iscariote ten hualaya para ijcón quitemactis Jesús.

<sup>6</sup>Huan cuac in Jesús quinili ijcuín: “Nejuatzin ya ni Jesús”, ijcuacón in tagayot nochi motzinquixtijtihuetzque huan ajquetztihuetzitoy talpan. <sup>7</sup>Pero in Jesús ocsepa quinyectajoltij in tagayot ijcuín:

—¿Aconi nanquitemoaj?

Huan yejuan quijtoayaj ijcuín:

—Tictemoaj yejua ne ten monotza Jesús de Nazaret.

<sup>8</sup>Ijcuacón in Jesús quinilij ocsepa ijcuín:

—¿Xe amo nanquicacque ya ten namechilij que Nejuatzin ya ni Jesús de Nazaret?

Huan como nannechtemoaj Nejuatzin, pero namechilía que amo xiquinquitziqican nomomachtijcahuan. Ta, nicnequi que xiquincahuacan ma yacan.

<sup>9</sup>Huan nochi nijín mochihuac para ma ijcón motamichihua ya ne ten Jesús quinilijca ya imomachtijcahuan ne achtopa: “Notajtzin Dios, amo nicpoloj nión senme den notaneltocacahuan ten tinechonmactilijca ya”. <sup>10</sup>Huan in Simón Pedro quiapiaya se

machete. Ica ya nojón yejua nimantzin quipanquixtij imachete huan quinacasxi-mac iyecmacopaca ne tagatzin ten monotza Malco, ne ten catca itaquehual den ne tayecanque tiopixcat. <sup>11</sup> Ijcuacón in Jesús quilij Pedro ijcuín:

—Nimitznahuatía que nimantzin xicpancalaqui momachete tech in cuetax. ¿Xe tejua ticyolnemilía que Nejuatzin amo monequis nicxicos in tajyohuilis ten Notajtzin Dios quimonequiltía ma niquijyohuis? Pues, monequi ma nicchihua.

**Nican cuiyacque Jesús Temaquixtijque inixpan den cachi hueyi tiopixcat**

*(Mt. 26.57-58; Mr. 14.53-54; Lc. 22.54)*

<sup>12</sup> Ijcuacón in tagayot soldados ihuan in tayecanque soldado huan ne tiopanmayolme den tayecanani judíos, nochi yejuan quiquitziqijque Jesús queme preso huan quitzijtzicojque. <sup>13</sup> Huan de ompa niman cuiyacque Jesús ichan Anás, huan ne Anás catca imontat de Caifás, huan ne Caifás yejua ne catca tayecanque tiopixcat tech ne xihuit. <sup>14</sup> Huan ne Caifás yejua ne ten ipa quinilijca ya in tayecanani judíos que monequía momiquilis se tagatzin para quinmaquixtis in pueblojuani judíos.

**Nican tajtoa de que Simón Pedro yetoya icaltampa de ne tayecanque Anás**

*(Mt. 26.69-70; Mr. 14.66-68; Lc. 22.55-57)*

<sup>15</sup> Huan in Simón Pedro huan ocsé imomachtijcaicniu quitoctiliyaj Jesús. Huan ne imomachtijcaicniu den Pedro, yejua ne ipa cuali quixmatía ne tayecanque tiopixcat. Ica ya nojón ne imomachtijcaicniu no calaquito ihuan Jesús ne icaltampa den hueyi tiopixcat. <sup>16</sup> Pero in Simón Pedro mocahuac ne calampa den calteno. Ica ya nojón ne imomachtijcaicniu ne ten ihuan moixmati ne tayecanque tiopixcat, yejua hual calanquisac para quinojnotzaco ne sihuat ten calten tapixque para ma quicahua in Pedro ma no calaquiti. <sup>17</sup> Ica ya nojón ne sihuacaltentajpiaque quilij in Pedro ijcuín:

—¿Xe amo no tejua tiimomachtijcau de ne tagat Jesús?

Huan Pedro quinanquilij ijcuín:

—Niejua amo niimomachtijcau.

<sup>18</sup> Huan queme ompa sen tocotzyetoyaj sequi taquehualme huan sequin mayolme, yejuan nojonques quixotaltijcaj in tit huan moijcatoyaj mototoniayaj porín semi taseseyaya. Huan no ompa inuan ijcatoya in Pedro mototoniyoaya campa in tit.

**Nican in tayecanque tiopixcat quitatajtoltiaya Jesús Temaquixtijque**

*(Mt. 26.59-66; Mr. 14.55-64; Lc. 22.66-71)*

<sup>19</sup> Huan in tayecanque tiopixcat pehuac quitatajtoltiaya Jesús de aconime imomachtijcahuan, huan no quitatajtoltiaya Jesús de toni quinnextiliaya in pueblojuani.

<sup>20</sup> Pero in Jesús quinanquilij ijcuín:

—Nejuatzin nochi nitanojnotztinemic senteixteno inixpan nochi in pueblojuani judíos. Huan nachipa nitamachtiaya tech in tiopanme de judíos huan tech ne cachi hueyi tiopan campa ne mosentiliayaj nochi in tagayot judíos. Ica ya nojón nejua niquijtoa que amo teyica nitanojnotztinemic ichtaca san. <sup>21</sup> Huan, ¿queyé nejua san tinechtajtoltijtoc? Ta, cachi cuali xiquintajtolti ne naquen nechcactinenque para ma yejuan mitzyequilican tonica niquinnojnotztinemic. Porín melau yejuan cuali quimatocque tenica niquinmachtijtinemía.

<sup>22</sup> Huan ijcón cuac in Jesús quitamijtoj nochi nijín, ijcuacón senme den tiopanmayolme ten ompa yetoya, yejua ne quixtatzinij Jesús huan quilij ijcuín:

—¿Xe ijcón monequi ticnanquilis in tayecanque tiopixcat?

<sup>23</sup> Huan Jesús quinanquilij in mayol ijcuín:

—Como tensá niquijtoa ten amo cuali, xinechyequili catiyejua in tajtol ten amocuali. Huan como niquijtoa ten melau, ¿queyé tejua tinechixtatzinía?

<sup>24</sup> Ijcuacón in tayecanque Anás quitanahuatij ma quitzijtzicocan Jesús, huan de ompa ma cuiquilican ne ocsé tayecanque ten monotza Caifás.

### **Nican Simón Pedro quijtoaya ocsepa que amo quixmati Jesús Temaquixtijque**

*(Mt. 26.71-75; Mr. 14.69-72; Lc. 22.58-62)*

<sup>25</sup> Huan queme in Simón Pedro no moijcatoya mototonijtoya ne campa tatatijtoya, ijcuacón in Pedro quitajoltijque ijcuín:

—¿Xe tejua amo senme den imomachtijcahuan de ne tagat Jesús?

Ijcuacón in Pedro quitaatij ten melau huan quinilij ijcuín:

—Njua amo niimomachtijcau.

<sup>26</sup> Pero yetoya se taquehual den tayecanque tiopixcat. Yejua ne catca ichancau ne Malco ne ten Pedro quicotonilijca inacas. Huan ne taquehual quilij Pedro ijcuín:

—¿Xe timolía que amo nimitzitac ne campa xocomila ihuan ne Jesús?

<sup>27</sup> Ijcuacón in Pedro ocsepa quitaatij ten melau. Huan de ompa pehuac tzajtzi ya in piotzin.

### **Nican tajtoa de que Jesús Temaquixtijque ajsic campa in hueyi chiuque Pilato**

*(Mt. 27.1-2, 11-14; Mr. 15.1-5; Lc. 23.1-5)*

<sup>28</sup> Huan ijcón in Jesús quiquixtijque ichan ne Caifás huan cuiyacque campa ne hueyi cali den hueyi tajtoani Pilato. Huan tech ne horas pehuac tanesi ya. Ica ya nojón in tayecanani judíos amo quinecque calaquisque tech ne hueyi cali. Porín tacán calaquisquía campa amo taneltocani judíos, ijcón motajtacolmacasquíaj huan ijcón amo huelisquíaj oc quicuasque ne mohuiscatacualis tech in tajyohuilis iluit.

<sup>29</sup> Ica ya nojón ne hueyi tajtoani Pilato hual calanquisac huan quinilij in tayecanani judíos ijcuín:

—¿Tonica nanquiteluilijtihuitze nijín tagat Jesús?

<sup>30</sup> Huan yejuan tananquilijque ijcuín:

—Xicmati que tajcón nijín tagat Jesús amo quichihuasquía tensá tajtacol, ijcuacón tejuan amo huelisquía timitzualcuilisquíaj nican para timitzmactilisque.

<sup>31</sup> Ijcuacón in tajtoani in Pilato quinilij ijcuín:

—Xicuiyacan namejuan nijín tagat Jesús huan xiquixcomacacan namejuan san, ijcón queme namotanahuatilan namechnajnahuatía namejuan.

Huan ijcón in tayecanani judíos quinanquilijque Pilato ijcuín:

—Pero tejuan queme titayecanani judíos amo huelis aquen ma ticmictican. Ta, sayó tejuatzin ticpía ne tanahuatil.

<sup>32</sup> Huan melau ne tonalme motamichihuac ya nochi in tajtolme ten quijtojca Jesús cuac Yejuatzin quinnejmachtijca ya ne imomachtijcahuan de quenín momiquilisquía. <sup>33</sup> Ijcuacón in Pilato ocsepa calaquito campa ne hueyi calijtic campa Pilato ichicahualispan. Huan de ompa in Pilato quinoztac Jesús huan quitajoltij ijcuín:

—¿Xe tejua ya no tihueyichiuque rey den pueblojuani judíos?

<sup>34</sup> Huan Jesús quinanquilij ijcuín:

—Huan nochi nijín ten tinechtajtoltijtoc, ¿cox hualeutoc de tejua? oso, ¿xa porín mitztapohuijtinemij ne tayecanani que nejua no nirey?

<sup>35</sup> Huan ijcón ocsepa in Pilato quitajtoltij Jesús ijcuín:

—¿Xe timolía que nejua no nipoutoc ihuan ne pueblojuani judíos? Huan ne tayecanani den pueblojuani huan ne tayecanani tiopixcame, yejuan nojonques motayecancahuan, yejuan mitztemacticoj nomaco. ¿Xe tejua tensá ticchihuac den amo cuali?

<sup>36</sup> Ica ya nojón in Jesús ocsepa quinanquilij ijcuín:

—Quema, ni rey, pero Nejuatzin amo niquinyolyecantoc ica nochichualis neques ten pohuij nican talticpac san. Porín tacán Nejuatzin ni rey de nican talticpac san, ijcuacán nomomachtijcahuan motehuisqufaj ihuan ne tecuini soldados para ma ijcón Nejuatzin amo nechtemactisqufaj inmaco in tayecanani judíos. Pero xicmatican que Nejuatzin ni rey pero amo niquinyolyecantoc ica nochichualis neques ten pohuij nican talticpac san.

<sup>37</sup> Ijcuacán in Pilato ocsepa quitajtoltij Jesús ijcuín:

—¿Tajcón de melau ya que tejua ya ti rey?

Huan Jesús quinanquilij ijcuín:

—Quema, ni rey, ijcón queme tejua tiquijtoa. Nejuatzin nihuala nican talticpac niyolico para sayó niquijtos ten melau ten Notajtzin Dios nechnahuatiliz san. Huan nochi naquen quitacamatinemisque den melau Tajtoltzin de Dios, yejuan nojonques quiyecaquilis ten nejua niquinilía.

<sup>38</sup> Huan ijcón in Pilato ocsepa quitajtoltij Jesús ijcuín:

—Huan, ¿toni quijtosnequi ten tinechilijtoc ne den tajtol melau?

### Nican quitelchique Jesús Temaquixtijque de que ma quimictican

(Mt. 27.15-31; Mr. 15.6-20; Lc. 23.13-25)

Huan cuac Pilato quitamitajtoltij ya Jesús, ijcuacán ne hueyi tajtoani quisac huan yajqui quinnojnatzato ne tayecanani judíos huan quiniliaya ijcuín:

—Nejua amo nicajxilía teyi tajtacol nijín tagat Jesús. <sup>39</sup> Pero nicmatoc que namejuan ipa ijcón nanmohuicaj que cada xihuit ma nannechiliquij ma nicajcahua se preso cuac namejuan nantaluichihuaaj ica ne iluit den tajyohuilis. ¿Toni nanquixejecoaj namejuan? ¿Xe nanquinequij ma nicajcahua nijín in preso ten quilía tayecanque de ne judíos, oso amo?

<sup>40</sup> Cuac quicacque ya nijín tajtolme, ijcuacán nochi in tagayot tzajtzcique huan quijtoayaj ijcuín:

—Amo yejua nojón Jesús ticnequij que xicajcahua. Ta, ticnequij xicajcahua yejua ne tagat Barrabás, ne ten catca se tachtecque.

**19** Ijcuacán ne hueyi tajtoani Pilato cualcuito Jesús huan quitatanilij ne soldados ma cuitequican. <sup>2</sup> Huan ijcón ne soldados quimajquitque sequi huitzti yohualtic queme se corona, huan de ompa quicuatalilijque Jesús. Huan no quitaquentijque Jesús ica se tilma xocopaltic. <sup>3</sup> Huan de ompa nochi in soldados motoquijque campa Yejuatzin huan quiquejqueltajpaloayaj ijcuín:

—Timitzonueyichihuaaj, tejuatzin den titayecanque de pueblojuani de judíos.

Huan amo sayó quiliayaj ijcón. Ta, no quixtajtatziniayaj Jesús. <sup>4</sup> Ijcuacán in hueyi tajtoani Pilato ocsepa quisac huan quinilito ne tayecanani judíos ijcuín:



—Xiquitacan san, nejua nicualquixtiti nijín tagat Jesús para xicmatican namejuan que nejua amo teyi nicajxilía tensá tajtacol.

<sup>5</sup>Huan ijcón in Jesús hual calanquisac cuaactihuitz ne corona den huitzti huan no taquentihuitz ica ne tilma den xocopaltic. Ica ya nojón in Pilato quinilij tagayot ijcuín:

—Nican yetoc ya nijín tagat Jesús.

<sup>6</sup>Huan cuac in tayecanani tiopixcame huan in tiopanmayolme quitacque ya in Jesús, ijcuacán yejuan peuque quitzajtziayaj ijcuín:

—Xicuoupampilocan, xicuoupampilocan.

Huan ocsepa in Pilato quinilij in tagayot ijcuín:

—Xicuiyacan namejuan huan xicuoupampilocan porín nejua amo teyi nicajxilía tajtacol nijín tagat Jesús.

<sup>7</sup>Huan ijcón in tayecanani judíos quinanquilijque Pilato ijcuín:

—Xiconmati que tejuan ticpíaj se tanahuatil ten technahuatía que monequi miquis ne Jesús porín yejua no mopohuac queme Teconetzin de Dios.

<sup>8</sup>Huan ijcón cuac quicayic in Pilato nijín tajtolme, ijcuacán yejua cachi oc moy-olmoutiaya. <sup>9</sup>Huan ijcón in Pilato ocsepa calaquito campa ne hueyi calijtic huan ompa ocsepa quitajtohtij Jesús ijcuín:

—Huan tejua, ¿de can ticayot?

Huan in Jesús sayó motentamatiliaya san huan amo teyica quinanquilij Pilato.

<sup>10</sup>Ijcuacán in Pilato ocsepa quitajtohtij Jesús ijcuín:

—¿Queyé tejua amo teyica tinechnanquilía? ¿Xe amo ticmati que nejua nicpía ne chicaucatanahuatil para niteilis ma mitzcuoupampilocan? Huan no nicpía tanahuatil para ma nimitztajtohuis ma mitzcajcahuacan.

<sup>11</sup>Ijcuacán in Jesús quinanquilij ocsepa ijcuín:

—Para tejua san amo huelisquía ticpiasquía tanahuatil para tinechtelchihuas, como amo achtopa Totajtzin Dios mitzmactilisquía ne tanahuatil. Ica ya nojón ne naquen nechtemactij momaco, yejua ya ne cuica ya cachi hueyi tajtacol huan que tejua.

<sup>12</sup>Huan cuac quicaquic nijín tajtol de Jesús, ijcuacán Pilato pehuac quitemoaya para queniu huelisquía quitajtohuis ma quicajcahuacan in Jesús. Huan cuac in tayecanani judíos quimatque que in Pilato quinequía quicajcahuas Jesús, ijcuacán yejuan quitzajtziayaj Pilato huan quiliayaj ijcuín:

—Como tejua tictajtohuis nijín tagat para ma ticajcahuacan, ijcuacán tejua amo tictacamati ne hueyi rey emperador César. Porín nochí naquen yesqui quinequij mochihuas reyes, yejuan nojonques quixnamiquij ne hueyi rey César.

<sup>13</sup>Huan ijcón queman in Pilato quicayic nijín tajtolme, ijcuacán yejua tatitanic ma cualquixtican in Jesús. Huan ijcón in Pilato yajqui motalito campa itaxejecocan ten quijtoaya ica ne hebreo tajtol Gábata (ten quijtosnequi ne campa patahuac tet ten alaxtic). <sup>14</sup>Huan tech ne tonal catca nepanta, in tonal achtopa que pehuasquía in tajyohuilisiluit ne tonal cuac in pueblojuani moyolchiphahuasque de tajtacol.

Ijcuacán in Pilato quinilij in tayecanani judíos ijcuín:

—Nican namechcahuiliqui namotayecancaurey.

<sup>15</sup>Ijcuacán yejuan cachi oc tzajtziayaj ijcuín:

—Xicalanquixtican huan xicuiyacan calan huan xicuoupampilotij.

Huan in Pilato ocsepa quinilij ijcuín:

—¿Xe namejuan nanquiyolnemilíaj que nejua nicuoupampilos ne namorey?

Pero ne tayecanani tiopixcame quinanquilijque ijcuín:

—Yec melau tejuan amo ticpíaj ocsé rey. Ta, sayó ne hueyi rey romano den monotza César.

<sup>16</sup> Huan nimampa cuac quicayic nijín tajtolme, ijcuación in Pilato quinmactij ne tayecanani judíos in Jesús. Huan ijcón yejuan cuiyacque para quicuoupampilosque.

**Nican quicuoupampilojque in Jesús  
Temaquixtijque huan Yejuatzin momiquilij**

(Mt. 27.32-44; Mr. 15.21-32; Lc. 23.26-43)

<sup>17</sup> Huan ijcón mochihuac que in Jesús yajqui quisac campa ne hueyi cali ten monotza pretorio. Huan de ompa yajqui quimamajtiyá ne icolotzin huan ajsito campa ne motanotza miqetizontecomatan, ten quilíaj ica in hebreo tajtol Gólgota.

<sup>18</sup> Huan ijcón ompa Jesús quicuoupampilojque ihuan ome tachtequini, cada se tagat soutoya tech se colotzin se yecmacopaca huan in ocsé iopochcopaca quicuoupampilojque, huan Jesús Yejuatzin yetoya tatajcoyan. <sup>19</sup> Huan cuac quicuoupampilojque ya Jesús, ijcuación ne hueyi tajtoani Pilato tanahuati que ma quichijchihuacan se cutoutzin ica tajcuilol tajtolzin huan ma quicuatalilican ne colotzin de Jesús ten quijtoa ijcuín: “Jesús de Nazaret, yejua rey den pueblojuani judíos”. <sup>20</sup> Huan ijcón miacque tagayot judíos quileerojtiquisayaj ne tajcuilol tajtolme. Huan ijcón quichiuque porín campa ne quicuoupampilojque Jesús amo huejca de ne pueblo de Jerusalén. Huan ne tajcuilol tajtolme cuicayaj eyi taman tajtolme, ne tajtol hebreo, huan in tajtol griego, huan in tajtol latin. <sup>21</sup> Ica ya nojón in tayecanani tiopixcame judíos quilijque ne Pilato ijcuín:

—Amo xiquijcuilohuani ijcón, Rey den pueblojuani judíos. Ta, cachi cuali xiquijcuilohuani ijcuín: “Yejua quijtoaya que yejua in Rey den pueblojuani judíos”.

<sup>22</sup> Ijcuación in Pilato quinchicaucailij ijcuín:

—Xicmatican que ne ten niquijcuiloy ya, niquijcuiloy ya huan ijcón mocahuas.

<sup>23</sup> Huan ijcón cachi satepan cuac in soldados quitamicuoupampilojque ya Jesús, ijcuación yejuan quiajocuijque itilma huan quinahuiixtzayanque huan ijcón moxejxelohuilijque cada se soldado. Huan de ompa no quicuicque ne ocsé itilma ten quiquentinemía sen tanequistoc. Huan ne taquemit amo tajtzonmal. Ta, senquis taijquitil. <sup>24</sup> Huan ijcón in soldados moliayaj se huan ocsé ijcuín:

—Cachi cuali ma amo tictzajtzyanacan nijín taquemit. Ta, cachi cuali ma ticchihuacan ne tatanilis para ijcón tiqitasque aconi imaco mocahuas ne taquemit tajquitil.

Huan ijcón motamichihuac ijcón queme quijtoa in Tajcuilolamatzin de Dios ijcuín: “Moxejxelohuilijque notilmajtzin yejuan san, huan quichiuque ne tatanilis para quitasque aconi imaco mocahuas”. Huan nochi nijín ijcón quichiuque ne soldados.

<sup>25</sup> Huan ompa itzintan ne colotzin campa pilcatoya Jesús, ompa yetoyaj nahui sihuame ten nijinques: Jesús inantzin, huan iicniu de inantzin, huan María isihuau de Cleofas, huan ya in María den pohuía ne pueblo Magdalena. <sup>26</sup> Huan cuac Jesús quitac inantzin que ompa ijcatoc ihuan ne imomachtijcau ten ne cachi quitasojtaya, ijcuación in Jesús quilij inantzin ijcuín:

—Nonantzin, nijín nomomachtijcau, yejua xicpohua queme moconeu.

<sup>27</sup> Huan de ompa in Jesús quilij ne imomachtijcau ijcuín:

—Ne nonantzin, axcan tejua xicpohua queme monantzin.

Huan ijcón ne imomachtijcau quipohuac inantzin Jesús queme inan, huan cuiyac yejua ichan.

### **Nican Jesús Temaquixtijque momiquilij**

(Mt. 27.45-56; Mr. 15.33-41; Lc. 23.44-49)

<sup>28</sup> Huan satepan cuac quimatic ya Jesús que quitamichihuac ya nitequiu, ijcuacán Yejuatzin quijtoj ijcuín:

—Niyolamiqui.

Huan nochi nijín quijtoj Jesús ijcón para ma motamichihua ya ijcón queme ijcuilutoc tech in Tajcuilolamatzin de Dios. <sup>29</sup> Huan como amo huejca yetoya se xalo temitoya ica ne xococ vino, ijcuacán motalojtihuetic se tagatzin huan quiajaquic se tilma ten posoctic tech ne xococ vino. Huan quicuic se cuohuit huan se tilma ten posoctic huan quipilohuilij ne cuohuit huan ijcón quiajocuic huan quitenajxiltij Jesús. <sup>30</sup> Huan ijcón cuac in Jesús quichichinac ya ne xococ vino, ijcuacán Yejuatzin quijtoj ijcuín:

—Nochi notequihuan nictamichihuac ya axcan.

Huan de ompa mocuaixpiloj huan ijcón momiquilij Yejuatzin.

### **Nican tajtoa de ne soldado ten quinalcalaquic nimachete ielchiquiupan in Jesús**

<sup>31</sup> Huan nochi nijín mochihuac se tonal san achtopa ya que taluipehuasquía ca ne tajyohuilisiluit. Huan ijcón in tayecanani judíos amo quinequáj ma mocahuani ninacayo in Jesús huan ne ome tachtequini campa ne colotzin tech ne tonal de nesehuilis, porín ne sehuilistonal catca semi mohuistic. Ica ya nojón yejuan quitajtanilijque in Pilato que ma yejua tatitani ma quimetzpojposteyican nochi neques ten cuoupampilatocque, huan no ma quintemohuican tech ne colotzin. <sup>32</sup> Ijcuacán ne solados yajque quitacamataque in tanahuatil ne Pilato. Huan quimetzpojpostecque ne achto tachtecque. Huan de ompa no ijcón quichiuque ne ocsé tachtecque ten ihuan Jesús cuoupampilatoya. <sup>33</sup> Huan ijcón in soldados cuac motoquijque campa Jesús pilcatoya, ijcuacán yejuan quitacque que ipa miyic ya. Ica ya nojón yejuan amo quimetzpojpostecque oc Jesús.

<sup>34</sup> Huan masqui ipa momiquilij ya in Jesús, pero senme de ne soldados quielchiquiutoquilij imachete. Huan cuac quielchiunaltzoponij ya, ijcuacán pehuac esquisa huan no quisaya sequi queme at san. <sup>35</sup> Huan nejua nimomachtijcau ompa niquitztoya, huan nochi ten namechilía niquitac ya ica noixtololohuan. Ica ya nojón namechilía sayó ten melau. Huan nejua cuali nicmati que ne ten namechilijtoc, yejua ne nochi melau. Huan no namechilía nijín para que namejuan xicyecajsi-caneltocacan ten mochihuac ya ipan Jesús. <sup>36</sup> Huan nochi nijín mochihuaco para ma motamichihua ya ijcón queme quijtoa in Tajcuilolamatzin de Dios ijcuín: “Nión se niomiyotzin quipostequilisque”. <sup>37</sup> Huan no quijtoa ocseco tech in Tajcuilolamatzin de Dios ijcuín: “In tagayot quitasque ne naquen quielchiquiutzoponijcaj ya”.

### Nican tajtoa de que Jesús Temaquixtijque quitalpachojque

(Mt. 27.57-61; Mr. 15.42-47; Lc. 23.50-56)

<sup>38</sup> Huan in José pahuía tech se pueblo Arimatea huan yejua no catca imomachtijcau in Jesús masqui melau ichtacataneltocaya, porín quinmohuilíaya ne tayecanani judíos. Huan ijcón satepan cuac momiquilij ya Jesús, ijcuacón in José yajqui quitajtanilito ne hueyi tajtoani Pilato ma quicahuiliani de ne inacayo Jesús. Huan ijcón in Pilato quicahuilij. Ica ya nojón in José yajqui quitemohuito tech in colotzin inacayo Jesús huan cuiyac. <sup>39</sup> Huan queme Nicodemo no ompa ajsicca ya campa ne colotzin, yejua ne Nicodemo ten concalpanojca Jesús tech se tayohuac. Yejua ne huala cualcuic queme sempoal huan májtacti kilos de xiutzitzin ten cualtzin ajuiyac, ne xiutamanelol de ome taman, se xihuit monotzaya mirra, huan in ocsé áloes. <sup>40</sup> Huan ijcón in José huan Nicodemo quitemohuijque inacayo in Jesús. Huan de ompa quitetzilozque ica sequi tilma ten cuica ajuiyacayot de ne xiutamanelol. Huan ijcón quichiuque porín ijcón mohuicayaj ne pueblojuani judíos cuac quintalpachoyaj ninpueblojcahuan. <sup>41</sup> Huan ne campa quicuoupampilojcaj Jesús, amo huejca yetoya de se xochimila. Huan tech ne xochimila yetoya se yancuic animajtecal campa ne ayamo aca quinaltaliyaj. <sup>42</sup> Huan ompa ne quinalcalaquitoj inacayo Jesús. Huan ijcón quichiuque porín ne xochimila amo huejca quitztoya campa quicuoupampilojcaj Jesús. Huan no ijcón quichiuque porín semi tiotac ya, huan ne pueblojuani judíos ipa pehuatij ya in iluit de nesehuilistonal.

### Nican tajtoa de que Jesús Temaquixtijque panquisac voltoc intzalan in ánimajme

(Mt. 28.1-10; Mr. 16.1-8; Lc. 24.1-12)

**20** Huan cuac ne tayecanatonal den se semana, yejua in domingo, ijcuacón in María Magdalena yajqui quitato ne tecoyoc campa toctoya Jesús. Pero cuac yejua yajqui, catca tayohuayan oc. Huan yejua quitac que cajchiuque ne hueyi tet tenica tentzactoya ne tecoyoc. <sup>2</sup> Ijcuacón in María nimantzin motalojtechuac huan yajqui campa yetoya Simón Pedro huan ne ocsé imomachtijcaicniu, ne ten Jesús semi quiyoltasojtaya. Huan María quinilij ijcuín:

—Namechilico que ne inacayo de Totecotzin quiquixtijque ya campa ne tecoyoc, huan axcan amo ticmatij oc can quitalijtoj.

<sup>3</sup> Ijcuacón no nimantzin in Pedro huan ocsé imomachtijcaicniu quisque huan yajque ne campa tecoyoc. <sup>4</sup> Huan ijcón in omen mosentaloayaj, pero ne imomachtijcaicniu cachi moijsiucataloj huan que ne Pedro. Ica ya nojón yejua ajsic achtopa ne campa tecoyoc. <sup>5</sup> Huan de ompa motentocac huan cuac quinalitac, ijcuacón sayó quitac ne hueyi tilma huetztaya san tenica quitetzilozca Jesús. Huan masqui quinalitac, pero amo calayic. <sup>6</sup> Huan in Simón Pedro ejcoc nimampa de ne imomachtijcaicniu. Huan de ompa in Pedro nimantzin calayic campa ne tecoyoc. Huan yejua no sayó quitac ne hueyi tilma sayó huetztaya tenica quitetzilozca in Jesús. <sup>7</sup> Huan amo sayó ne hueyi tilma quitac. Ta, no quitac ne tzictzin tilma tenica quicuapicaj Jesús. Huan nijín tilmajtzin amo sen yetoya ihuan ne hueyi tilma. Ta, semi seco yetoya tetecuiniutoya. <sup>8</sup> Ijcuacón no calayic ne imomachtijcaicniu, yejua ne ten achtopa ejcoco campa ne tecoyoc. Huan cuac quitac ya nochi nijín ten mochihuac, ijcuacón yejua quiyecajsicaneltocac ya que Jesús melau panquisac ya voltoc intzalan in án-

imajme. <sup>9</sup> Porín ne imomachtijcahuan de Jesús ayamo quiyecajsicamatíaj que cox ijcuiliutoc ya tech in Tajcuilolamatzin que in Jesús quipía de panquisas yoltoc intzalan in ánimajme. <sup>10</sup> Ijcuación ne ome imomachtijcahuan de Jesús mocuepque huan yajque ichancopaca.

### **Nican Jesús Temaquixtijque quimonextilij ne María Magdalena**

*(Mr. 16.9-11)*

<sup>11</sup> Huan satepan cuac yajque ya ne omen imomachtijcahuan, ijcuación in María Magdalena ipa yetoya calampa de ne tecoyoc chocatoya. Huan cuac chocatoya, ijcuación motentocac huan quinalitac ne tecoyoc campa yetoya Jesús. <sup>12</sup> Huan mochihuac que sayó quitac ome ángeles taquentoyaj ica sequi istac tilma ten pepetaca cualtzin. Huan in omen tocotzyetoyaj ne campa yetoya inacayo in Jesús; se yetoya itzontan, huan se icxitan. <sup>13</sup> Ijcuación in ángeles quitajtoltijque María ijcuín:

—Tejua sihuat, ¿queyé tichocotoc?

Huan yejua quínnanquiliij ijcuín:

—Nichocotoc porín cuiyacque ya Notecotzin Jesús, huan axcan amo nicmati can quitalitoj.

<sup>14</sup> Huan ijcón cuac quintamiilij ya in ángeles, ijcuación María mocueptiquisac huan quitac Jesús que ijcatoya ompa. Pero in María amo quimatic cox yejua ya Jesús.

<sup>15</sup> Ijcuación in Jesús quitajtoltij María ijcuín:

—Tejua sihuat, ¿queyé tichocotoc? ¿Aconi tictemoa?

Huan ijcón in María quiyolnemiliaya que xa yejua ne xochimilajpiaque. Ica ya nojón María quilij ijcuín:

—Tejua tagatzin, como tejua ticuiyac inacayo in Jesús, nimitzontatautía que xinechonili can ticahuato para ma nejua nicuitiu.

<sup>16</sup> Huan in Jesús quinoztac María ijcuín:

—María.

Huan ijcón in María mocueptiquisac huan quilij ica ne hebreojtajtol ijcuín:

—Raboni —ten quiijosnequi Tamachtijque.

<sup>17</sup> Huan ijcón in Jesús quilij María ijcuín:

—Amo nicnequi xinechtzajtzacuili, porín ayamo nitejcoc ne campa yetica Notajtzin Dios. Ta, nicnequi xiyó xiquiniliti nocnihuan ijcuín: “Niman nitejcoti ya campa ne yetica Notajtzin”. Huan no xiquinyequili que nitejcoti ya ne campa yetica no Dios huan campa yetica namo Dios.

<sup>18</sup> Ica ya nojón in María Magdalena nimantzin yajqui quintapohuito ne imomachtijcahuan de Jesús que yejua melau quitac ya Totecotzin Jesús. Huan no quinilito nochí in tajtolme tenica Jesús quinojnotzac.

### **Nican Jesús Temaquixtijque quinonmonextilij imomachtijcahuan**

*(Mt. 28.16-20; Mr. 16.14-18; Lc. 24.36-49)*

<sup>19</sup> Huan ijcuac ne tayecanatonal, yejua ya ne ten axcan domingo. Huan tech ne tiotac imomachtijcahuan in Jesús sen yetoyaj tech se cali san campa nochí cuali tajtatzactoya, porín yejuan quinyolmohuiliayaj ne tayecanani judíos. Huan cuac yetoyaj ya calijtic, ijcuación in Jesús calactihuetzico huan monextijtihuetzico intzalan imomachtijcahuan. Huan Yejuatzin quintajpaloco huan quinilij ijcuín:

—Xicpiacan namejuan axcan ne cuali neyolsehuilis.

<sup>20</sup> Huan satepan cuac quintamitajpaloj ya imomachtijcahuan, ijcuacón in Jesús quinmonextilij imahuan campa tajojcol. Huan no quinnextilij ielchiquiuu campa no quicojcojque. Ica ya nojón imomachtijcahuan, cuac quitacque ya Nintecotzin, ijcuacón nochi yejuan moyolhueyipactijque. <sup>21</sup> Huan ijcón in Jesús quinilij ocsepa ijcuín:

—Xicpiacan namejuan axcan se cuali neyolsehullis. Ijcón queme Notajtzin Dios nechualtitanic nican talticpac, no ijcón Nejuatzin namechtitaniti xicchihuatij de notequi.

<sup>22</sup> Ijcuacón in Jesús quinixpitzac imomachtijcahuan huan quinilij ijcuín:

—Xicselican in Yecticatzin Espiritu ten namechtayocolía. <sup>23</sup> Huan como namejuan nanquintapojpoluúfaj acsame nintajtacoluan, no ijcón Notajtzin Dios quintapojpoluis yejuan. Huan como namejuan amo nanquintapojpoluúfaj acsame nintajtacoluan, no ijcón Notajtzin Dios amo no quintapojpoluis yejuan.

### **Nican tajtoa de que in Tomás amo quiyecneltocaya cox melau panquisac ya voltoc Jesús Temaquixtijque**

<sup>24</sup> Huan ne Tomás senme den majtactionomen imomachtijcahuan, ten quitocay-tiayaj nenetz, yejua ne amo yetoya ihuan ne ocsequin imomachtijcaicnihuan cuac monextico Jesús inixpan. <sup>25</sup> Huan ijcón cachi satepan ne ocsequin imomachtijcaicnihuan quiluijque Tomás ijcuín:

—Tejuan tiquitacque ya Totecotzin.

Pero in Tomás tananquilij ijcuín:

—Amo huelis nicneltocas como amo achtopa niquitas campa ne tajojcol ica teposme tech nimahuan Jesús. Huan como amo nimomajpilcalaquis campa ne quimasojsojcaj Jesús, ijcuacón amo nicneltocas. Huan como amo no nimomajpilcalaquis ielchiquitampa, ijcuacón amo nicneltocas que Jesús panquisac ya voltoc.

<sup>26</sup> Huan ijcón chicueyica ocsepa mosentilijque tech se cali ne imomachtijcahuan in Jesús. Huan tech nesenyetolis yetoya ya ne Tomás ihuan ne imomachtijcaicnihuan. Huan ijcón mochihuac masqui cuali yec tatzactoya tech in calteno, pero in Jesús calayic huan quinonmonextilij intzalan. Huan Yejuatzin pehuac quintajpaloa huan quiniliaya ijcuín:

—Axcan xicpiacan se cuali neyolsehullis.

<sup>27</sup> Huan niman in Jesús quilij in Tomás ijcuín:

—Tejua Tomás, xiquinita nomahuan huan xicalaqui momajpil tech nomacpal. Huan no ximomatilana huan xicalaqui nican noelchiquiupan, para ma amo xicnemilijtinemi queme ne ten amo taneltocaj. Ta, xicyecajsicaneltocha que Nejuatzin nipanquisac ya niyoltoc intzalan in ánimajme.

<sup>28</sup> Ijcuacón in Tomás tananquilij ijcuín:

—Tac melau, tejuatzin Titotecotzin huan tion Dios.

<sup>29</sup> Huan ijcón in Jesús quilij ocsepa ijcuín:

—Tejua Tomás, axcan tinechitac ya; ica ya nojón titacuautamatic ya nohuan ya. Pero cachi quipíaj ne yolpaquilis neques ten yec tacuautamatij nohuan masqui amo nechitacque.

### Nican technextilía de queyé techijcuilohuilij nijín tajcuilolamatzin

<sup>30</sup> Huan in Jesús quichihuac ocsepa míac taman chihualisme de ne mohuiscatequime. Huan nochi nijín quichihuac inixpan imomachtijcahuan, masqui tech nijín tajcuilolamat amo nochi nican ixnesij. <sup>31</sup> Pero nochi nijín ten ixnesi nican, nejua namechijcuilohuilía para ma xicyecneltoacacan que ne Jesús Yejuatzin ya in Cristo, Iconetzin Totajtzin Dios. Huan cuac nanquiyecneltoacasque ya, ijcuacón nanquipi- asque ne yec melau nachipa nemilis ica ne chicahualis de nitocaytzin de Cristo.

### Nican Jesús Temaquixtijque monextij inixpan ne chicome imomachtijcahuan

**21** Huan ijcón cachi satepan in Jesús ocsepa monextij inixpan imomachtijcahuan, cuac yejuan yetoyaj ne atenteno campa hueyíat de monotza Tiberias. Huan Yejuatzin monextico ijcuín. <sup>2</sup> Huan ompa sen yetoyaj ne chicome imomachtijcahuan, ne Simón Pedro, huan ne Tomás ten quitocaytiayaj nenetz, huan ne Natanael ten pohuía Caná de Galileajcopaca, huan ne omen iconehuan de Zebedeo, huan ne ocsequin omen nimomachtijcahuan in Jesús. <sup>3</sup> Ijcuacón in Pedro quinilij ne imomachtijcahuan ijcuín:

—Nejua niyó nitamaasiti ica pescados.

Ijcuacón yejuan no quilijque ijcuín:

—Como tiyó, tejuan no tiyasque mohuan. Huan ijcón yejuan quichiuque huan yajque huan tejcotoj tech ninbarco. Huan yajque quinejnemiltijque, pero tech ne tayohuac amo teyi moajxilijque pescados. <sup>4</sup> Huan cuac tanestihualaya ya, ijcuacón in Jesús monextico atenteno, huan masqui ne imomachtijcahuan amo quimatíaj aconi ne.

<sup>5</sup> Ijcuacón Yejuatzin quinilij ijcuín:

—Namejuan telpocame, ¿xe ayamo teyi nanmoajxilíaj in pescados?

Ijcuacón yejuan quinanquilijque ijcuín:

—Ayamo teyi timoajxilíaj.

<sup>6</sup> Huan ocsepa in Jesús quinilij ijcuín:

—Xictamotacan namomatau namoyecmacopaca den namobarco, huan ompa nanquitasque que nanmoajxilisque pescados.

Huan melau ijcón quichiuque ne imomachtijcahuan, huan satepan amo huelíaj oc quiquixtijque ne ninmatau tech in at porín mocuicque huel míac pescados.

<sup>7</sup> Ijcuacón ne imomachtijcau ten Jesús cachi quiyoltasojtaya quilij Pedro ijcuín:

—Yejua in Totecotzin.

Huan cuac in Simón Pedro quicayic que yejua ya Nintecotzin, ijcuacón nimantzin motalilij nitilma ten panían quiquentinemía. Huan ijcón quichihuac Pedro porín moquixtilijca ne nitilma. Huan cuac motalilij ya nitilma, ijcuacón nimantzin moatamotac Pedro. <sup>8</sup> Ijcuacón cachi satepan in ne ocsequin imomachtijcahuan cajxitijque ne ninbarco ne campa atenteno ya. Huan ijcón ejcocque quintilatztihualajque ne pescados, porín amo semi huejca quitztoya ne atenteno, achá queme se ciento metro.

<sup>9</sup> Huan ijcón cuac temocque ya ne imomachtijcahuan de ninbarco campa ne taluacpan, ijcuacón quitacque sequi tecol mimilicatoc. Huan tech ne tecol panían yetoya se pescado huan sequi pan. <sup>10</sup> Huan ijcón in Jesús quiniliaya ijcuín:

—Xicualcuican sequi namopescados ten yequin nanquinalcuicque.

<sup>11</sup> Ijcuación nimantzin in Simón Pedro tejcoto tech ninbarco huan yejua cachi cualtilatlazato in matat hasta campa ne taluacpan. Huan ne matat pexontihualaya de ne huejueyi pescados. Huan oncaya se ciento huan ome poal huan majtactioneyi pescados. Huan masqui tel senca ya pexontihualaya ne matat, pero amo tzayanic. <sup>12</sup> Ijcuación in Jesús ocsepa quinilij imomachtijcahuan ijcuín:

—Xihualacan xialmasalokuqij.

Huan nión senme de imomachtijcahuan ma moixehui ma quitajtolti aconi yejua. Porín ipa cuali quixmatíaj que Yejuatzin ya Nintecotzin. <sup>13</sup> Huan ijcón cuac mosentilijque ya imomachtijcahuan, ijcuación Yejuatzin motoquij campa quitehuatztoya ne pescados. Huan de ompa quitilanac ca imay sequin pan, huan quinmajmactij ne imomachtijcahuan. Huan no ijcón quichihuac ica ne pescadojnacat quinmajmactij sejsé. <sup>14</sup> Huan nijín mochihuac ca expa ya que quinmonextilij in Jesús ninixpan imomachtijcahuan satepan cuac panquisac ya voltoc intzalan in ánimajme.

**Nican Jesús Temaquixtijque quilij Pedro ma xiquintamaca itaneltocacahuan ica itajtoltzin, ijcón queme in tapixque quintamacatinemi niichcahuan**

<sup>15</sup> Huan mochihuac que cachi satepan cuac tamialmasalokuqij ya, ijcuación in Jesús quitajtoltij Simón Pedro ijcuín:

—Tejua Simón, de titeconeu de Jonás, ¿xe cachi tinechyoltasojta huan que nijinques ten nechyoltasojtaj?

Huan ijcón in Pedro quinanquilij ijcuín:

—Quema, Notecotzin, cuali ticmatoc que nimitzyoltasojta.

Ica ya nojón ocsepa quilij Jesús ijcuín:

—Huan como melau tinechtasojta, tejua xiquinnextilijtinemi notaneltocacahuan ica Notajtoltzin, ijcón queme in tapixque quichiutinemi cuac quintamacatinemi iichcahuan.

<sup>16</sup> Huan ijcón in Jesús ocsepa cojpacatajtoltij ijcuín:

—Tejua Simón, de titeconeu de Jonás, ¿xe tinechyoltasojta?

Huan in Pedro quinanquilij ijcuín:

—Quema, Notecotzin, tejuatzin cuali ticmatoc ya que nimitzyoltasojta.

Huan ijcón in Jesús ocsepa quilij ijcuín:

—Como melau tinechyoltasojta, nicnequi que xiquinyecpixinemi nijín notaneltocacahuan ijcón queme in tapixque quinyecpixinemi niichcahuan.

<sup>17</sup> Huan ijcón in Jesús ocsepa quexpacatajtoltij ijcuín:

—Tejua Simón, de titeconeu de Jonás, ¿xe melau tinechyoltasojta?

Ijcuación in Pedro pehuac moyoltayocoltía, porín Jesús quitajtoltij ica expatica ya que cox yejua melau quitasojta in Yejuatzin. Ica ya nojón in Pedro quinanquilij ijcuín:

—Notecotzin, ticmatoc ya nochi notamachilis. Cuali ticmatoc ya que nimitzyoltasojta.

Huan ijcón in Jesús quilij ocsepa ijcuín:

—Huan como melau tinechyoltasojta, tejua xiquinnextilijtinemi notaneltocacahuan ica Notajtoltzin, ijcón queme in tapixque quichiutinemi cuac quintamacatinemi niichcahuan.

<sup>18</sup> Huan Jesús quilij ocsepa Pedro ijcuín:



—Yec melau ten nimitzilía que cuac catca titelpoch oc, ijcuación timotaquentiaya queme ticnequía, huan tiyaya campa tejua ticnequía. Pero cuac yesqui tihuehuentzin ya, ijcuación sayó timomamejmelahuas para ma mitztaquentican, huan ma mitztzi-jtzicocan queme preso. Huan ijcón yejuan mitzuicasque campa tejua amo ticnequía tiyás.

<sup>19</sup> Huan in Jesús quinilijtoya imomachtijcahuan ijcón porín Yejuatzin quinequía quinajsicamatiltis de quenín momiquilis in Pedro huan quenín in Pedro quinueyi-panchihuas Totajtzin Dios. Huan de ompa in Jesús quilij ijcuín:

—Xicnechtoctilij, tejua Pedro, xinechtacamatiu.

### **Nican tajtoa de se imomachtijcau de Jesús ten semi quiyoltasojta huan nijín yejua in Juan**

<sup>20</sup> Huan ijcón cuac Pedro mocueptiquisac ya, ijcuación quitac ne imomachtijcaic-niu ten monotza ya Juan, ne ten cachi quiyoltasojtaya Jesús. Huan ijcón ne Juan quinaltoctiliaya. Yejua ne Juan ipa yetoya inacastan Jesús cuac sepan tacuajtoyaj, huan Juan quitajtoctijca Jesús ijcuín: “Notecotzin, ¿aconi mitztemactis inmaco in tayercanani para ma mitzmiectican?” <sup>21</sup> Huan ijcón cuac in Pedro quitac in Juan, ijcuación in Pedro quitajtoctij Jesús ijcuín:

—Notecotzin, huan nijín momomachtijcau in Juan, ¿toni ipan mochihuas?

<sup>22</sup> Huan ijcón Jesús quinankuilij ijcuín:

—Tajcón Nejuatzin nicnequisquía que Juan ma quisentoca yoltinemis hasta cuac ocsepa nimohualuicas nican talticpac, ¿toni motequiu, tejua Pedro? Ta, tejua sayó xinechtoctili huan xinechtacamatiu.

<sup>23</sup> Huan ica nojón tajtolme de Jesús, nimantzin moijsiucamoyahuac intzalan in tocnihuan taneltocani que nijín momachtijque Juan amo miquisquía oc. Pero in Jesús amo quilij que amo miquisquía in Juan. Ta, Yejuatzin quijtoj ijcuín: “Tajcón Nejuatzin nicnequisquía que in Juan ma quisentoca yoltinemis hasta cuac ocsepa nimohualuicas nican talticpac, ¿toni motequiu, tejua Pedro?”

<sup>24</sup> Huan nejua ya ni Juan, niimomachtijcau de Jesús, huan axcan nimoyectenex-tía que nejua namechijcuilohuilía nochí nijín tajtolme. Huan namejuan cuali nan-quimatij ya que nejua namechilía sayó ten melau. <sup>25</sup> Pero ongacque oc mías tata-man chihualisme ten quichi huaco Jesús, ten nican amo aquis para niquijcuilos. Huan tajcón ma niquinijcuilohuani sejsé nochí nimohuiscatequihuan de Jesús, ijcuación niquixejecoa que amo aquisquía masqui tech nochí tajcuilolamatzin den senmanahuac.

## IN CHIHUALISME TEN QUICHIUTINENQUE ITATITANILUAN DE CRISTO

### Cristo moyectencahuac ihuan itatitaniluan cuac yajqui ne eluiyactzinco que quinaltitanilis in Yecticatzin Espíritu

**1** Cuac yequinica nimitztajcuilohuilij ica ne achtopa tajcuilolamat, ijcuacán, tejua Teófilo, nochi nimitztapohuiaya den tequit ten Jesús quichiutinemic huan de nochi ten Jesús quitenextilijtinemic, desde ne tonal cuac quipehualtico nitequiu hasta in tonal cuac tejcoc huan ajsito ne eluiyactzinco. <sup>2</sup> Huan achtopa que yasquía ne eluiyac, Jesús quinijitac sequin itatitaniluan huan quinquimajmactij ica ichicahualis den Yecticatzin Espíritu de queniu monequi quichiutinemisque ne itatitaniluan. <sup>3</sup> Huan satepan cuac Jesús tajyohuico ya huan momiquilico ya, ijcuacán Yejuatzin monextico inixpan ne itatitaniluan. Huan mochiutinemic míac chihualisme tenica ixnesic que Jesús melau yec yoltinemi ya. Huan monextijtinemic Jesús miacpa inixpan itatitaniluan hasta ejcoc omepoal tonal. Huan cuac monextico, ijcuacán Jesús quinnextilijtinemic itatitaniluan huan quinnonotztinemic de queniu Dios mohueyimasoutoc ica ichicahualis ipan itaneltocacahuan.

<sup>4</sup> Huan cuac Jesús sen yetoya oc ihuan itatitaniluan, ijcuacán Yejuatzin quinnejmactijtehuac huan quinilij que ma amo xiquisacan tech nojón pueblo de Jerusalén. Huan no Jesús quinilijtehuac ijcuán:

—Ta, xicchian ma mochihua oc ne tenilil tenica Notajtzin Dios moyectencahuac ya namohuan, ijcón queme namechilijca, <sup>5</sup> Que in Juan Taahuijque, yejua ne taahuijtinemic ica atzin san. Pero nican ome eyi tonalica Totajtzin Dios namechahuis huan namechylpexocaltis ica in Yecticatzin Espíritu.

### Jesús tejcoc ne eluiyactzinco

<sup>6</sup> Huan cuac itatitaniluan ihuan sen yetoyaj oc Jesús, ijcuacán yejuan quitajtolijque Yejuatzin ijcuán:

—Totecotzin, ¿xe axcan ya tiquintecahuilía que ocsepa in pueblojuani de Israel ma yejuan moyecantiyacan san?

<sup>7</sup> Pero in Jesús quinnanquilij ijcuán:

—¿Queyé ijcón nannechilíaj? Porín namejuan amo namechnamiqui xicmatican in tonal nión in metzti cuac Totajtzin Dios quichihuas nijín nitequiu de quinpalehuis ocsepa ipueblojcahuan judíos. Porín Yejuatzin quitajlij ya in tonal ica por ihueyi tanahuatil cuac quichihuas nijín tequit cuac Yejuatzin connonequiltía. <sup>8</sup> Pero cuac hualas ya namoyolijtic in Yecticatzin Espíritu, ijcuacán namejuan nanquiselisque ichicahualis de Yejuatzin. Ica ya nojón namejuan nannechtetajtohuiltijtinemisque nican tech in pueblo de Jerusalén huan campa in itatitaniluan de Judeajcopaca huan de Samaria. Huan no nantetapohuijtinemisque de Nejuatzin nonohuiyampa de nochi senmanahuac.

<sup>9</sup> Huan satepan cuac in Jesús nochi quintaminonotzac ya itatitaniluan, ijcuacán moajocuic ica por ichicahualis de Itajtzin Dios. Pero itatitaniluan quisenitztoyaj Jesús cuac tejcotoya ya ne eluiyactzinco. Pero cuac yajtoya ya Jesús, ijcuacán sepa san quiquemiloco Jesús se mixti huan amo huelic quitacque oc ne itatitaniluan.

<sup>10</sup> Huan itatitaniluan ijcón cajcoitztoyaj oc cuac Jesús tejcotoya ne eluiyactzinco. Ijcuacón nimantzin monexticoj ome taca de taquentoyaj ica cualtzin istac tilma. Huan yejuan motoquijque campa itatitaniluan de Jesús huan quinilijque ijcuín:

<sup>11</sup> —Namejuan nantaca ten nanpohuij Galileajcopaca, ¿queyé namejuan nansenquetzque nansenajcotachiyacque san ne eluiyactzinco? Porín Yejuatzin ne Jesús de nanquitacque ya quistehuac namotzalan huan tejcoc ne eluiyactzinco, yejua ne Jesús ocsepa mohualuicas nican talticpac ijcón queme nanquitacque que yajqui eluiyactzinco.

### **Nican quijitacque in Matías para tequitis queme itatitanil de Jesús iixpatca ne Judas ten momictij**

<sup>12</sup> Ijcuacón hualeuque itatitaniluan de Jesús campa ne tal lomo ten monotza xocotal de Olivos, huan ajsito Jerusalén. Huan ne xocotal amo huejca de Jerusalén. Ta, sayó ijcón queme quitecahuilía in tanahuatil de Moisés ma se nejnemi tech in tonal de nesehuilis. <sup>13</sup> Huan cuac itatitaniluan ajsicque ya tech in pueblo de Jerusalén, ijcuacón yejuan calacque tech ne cali campa ipa mocautinemíaj. De ompa tejcocque cachi ajco ica ome nepancal. Huan ijcón quichiuque que mosepansentilijque in Pedro, huan Jacobo, huan Juan, huan in Andrés, huan in Felipe, huan Tomás, huan in Bartolomé, huan Mateo, huan in Jacobo teconeu de Alfeo, huan Simón ten pohúa ihuan in taca políticos ten quinilíaj in cananistas. Huan no ompa yetoya Judas ten iicni Jacobo. <sup>14</sup> Huan nochi nijinques mosentiliayaj mosta mosta ihuan iicnihuan de Jesús para mosentatautilisque ihuan Dios. Huan no yetoyaj María ten inan Jesús, huan ocsequin sihuatzitzin taneltocani.

<sup>15</sup> Huan senme de nojón tonalme cuac in tocnihuan taneltocani motatautiliayaj ihuan Dios, ijcuacón in Pedro moquetzac tatajco den tocnihuan huan pehuac quinnojnnotza. Huan tech ne tonal mosentilijcay se ciento huan sempoal tocnihuan. <sup>16</sup> Huan in Pedro quiniliaya ijcuín:

—Namejuan nannocnihuan, namechilía que quipía de mochihuas nochi in tajtolme ten techiluijtoc in Tajcuilolamatzin de Dios cuac in Yecticatzin Espíritu tajtoj ica itencopa ne huejcaurey David, cuac yejua technojnnotzaya de ne Judas ten quinyecanac in tagayot para quiqitzquijque Jesús queme preso. <sup>17</sup> Porín ne Judas no catca tapoucayot tohuan huan no quiplaya tequit queme tejuan. <sup>18</sup> Pero ne Judas quitaxtahuijque ica por niamocuali itequiu de quitemactis Jesús ma quimictican. Huan de ompa ocsequin taca quicuicque ne tomin huan quicohuatoj se tal. Huan satepan ne Judas yajqui moquechilpito huan motzonicaquetzato huan miquic. Huan ijcón pitzinic ipox huan momoyahuac ijticyo. <sup>19</sup> Huan cuac nochi in calyetonni de Jerusalén quinmatiltijque ya toni mochihuac ya, ijcuacón nojón tal quitocaytijque ica nintajtol Acéldama, ten quijtosnequi, se tal ten tacohual ica esti de se tagat. <sup>20</sup> Porín ijcón ijcuiliutoc tech in Tajcuilolamatzin de Dios ten monotza Salmos ten quijtoa ijcuín:

Nichan ma yesqui tayiucan huan ma amo acsá calyeto ompa.

Huan no quijtoa ijcuín:

Ma ocsé tagat quixpatcayoti tech nitequiu.

<sup>21</sup> Huan no in Pedro quinilij ijcuín:

—Axcan nican sen yetocque tohuanme sequin taca ten tohuan nemíaj nochi in tonalme cuac in Totecotzin Jesús yetinemic tohuan nican talticpac. <sup>22</sup> Huan nijín

taca tohuan nentinenque desde ne tonal cuac in Juan quiahuij Jesús huan hasta in tonal cuac Jesús yajqui ne eluiyactzinco. Huan semi monequi que senme de nijín taca ma ticpoutinemican queme se itatitanil de Jesús porín yejuan quitztinenque que Jesús panquisac voltoc intzalan in ánimajme.

<sup>23</sup> Ijcuacón in tocnihuan quiyolnemilijque huan quintalijque nijín ome taca ma senme de yejuan ma yesqui itatitanil de Jesús Temaquixtijque. Huan quitalijque in José ten quitocaytiayaj Barsabás, no ten quitocaytijque Justo. Huan no quitalijque in Matías. <sup>24</sup> Huan ijcón in tocnihuan motatautilijque ihuan Dios ijcuín:

—Totecotzin, Tejuatzin cuali tiquinonyolojixmati nochi in taca. Ticnequij xitechonnextili catiyejua de nijín omen taca Tejuatzin tiquijitas ya ma yesqui itatitanil de Jesús. <sup>25</sup> Huan xitechonnextili catiyejua tagat ticonmonequiltía ma quichihua nijín tequit queme titatanil de Jesús porín Judas quipoloy ya nitequiu cuac motajta-colmacac huan yajqui campa ipa pouthualaya.

<sup>26</sup> Ijcuacón in tocnihuan quichihueque netatanilis se huan ocsé para quitasquíaj aconí yesqui itatitanil de Jesús. Huan mochihuac que ipan huetzic in tatanilis yejua nijín Matías. Ica ya nojón nochi in tocnihuan quipouque in Matías queme se tatitanil de Jesús, ihuan in ocsequin majtactionsenme tatitanilme.

### Nican tajtoa de ne tonal cuac huala in Yecticatzin Espíritu

**2** Huan ejcoc ne iluitonal de judíos ten quilíaj Pentecostés, yejua quijtosnequi ome-poal huan májtacti tonalica den tajyohuilisiluit. Huan nochi in taneltocani de Jesús mosentilijque seco san. <sup>2</sup> Huan santajma mocayic que chichahuac tajcoyocaya tech ne cali. Huan hual taejecaya de ne eluiyactzinco huan tachicaucacomonic ne calijtic campa ne seco san tocotzyetoyaj nochi in tocnihuan. <sup>3</sup> Ijcuacón nimantzin monextico sequin tiztitzin ten moxexeloy huan mocahuac ipan cada se tocníu. Huan nijín ten monextij queme yesquía imejmelaucayo de in tit. <sup>4</sup> Ijcuacón in Yecticatzin Espíritu quinyolpexontij huan quinyolpepexocaltij cada senme den ne tocnihuan. De ompa yejuan peuque tajtoayaj ica míac tataman tajtolis den Dios quinmajmactilij. Huan nochi nijín mochihuac ijcón queme in Yecticatzin Espíritu quinchichahualismacaya ma tajtocan in taneltocani.

<sup>5</sup> Huan tech nojón tonalme calyetoyaj para sequi tonalme tech in pueblo Jerusalén huel miacque judíos ten hualajque nohuiyampa de nochi senmanahuac para quimohuistilisque Totajtzin Dios tech nojón iluitonal. <sup>6</sup> Huan cuac mocayic chichahuac taijcoyocaya ya, ijcuacón nochi in tagayot mosentilijque campa ne itatitaniluan de Jesús yetoyaj. Ijcuacón in tagayot yolpoliunque huan amo quimatíaj oc toni quichihuasque porín cada se tagat quincaquilijque que tajtoayaj ne itatitaniluan de Cristo ijcón queme se tagat tajtoa tech nipaís. <sup>7</sup> Huan nochi in tagayot quitetzaucacaquíaj huan quihueyimoucaitayaj porín motatajtolpatacque ne itatitaniluan de Cristo. Ica ya nojón in tagayot motajtoltiayaj se huan ocsé ijcuín:

—Xiquitacan san, ¿xe amo yejuan ne ten poutocque ne Galileajcopaca nijín taca ten tiquincaquilíaj tataman nintajtol? <sup>8</sup> ¿Queyé ijcón tiquincaquilíaj que yejuan no tajtoaj cada se ica ne tajtol queme tejuan tiixpetanque ten tejuan techmactiayaj topapajuan? <sup>9</sup> Porín xiquitacan san, nican yetocque sequin taca de poutocque tech in países de Partia, huan de Media, huan de Elam, huan de Mesopotamia, huan de Judea, huan de Capadocia, huan de Ponto, huan den talme ten itatitanil de Asia. <sup>10</sup> Huan no nican yetocque sequin taca ten pouthuitze tech in ocsequin países de

griegos huan de Panfilia, huan de Egipto, huan no hualajque de sequin pueblojme cachi huejca huan que in pueblo Cirene den itatilanal Africa. Huan no yetocque sequin taca de Roma ten calyetocque nican Jerusalén. Sequin de yejuan ipa judíos porín ijcón yolque; huan ocsequin de yejuan mochihuacoj judíos porín no quinel-tocaj nintanahuatiluan de judíos. <sup>11</sup> Huan no ongacque sequin taca den paísme de Creta huan Arabia.

Huan ijcón in tagayot moluiayaj ijcuín:

—Huan nochi tejuan tiquincaquilfaj que ne itatitaniluan de Jesús tajtojtocque ica ne hueyi itatiochihualisuan de Dios. Huan yejuan tajtojtocque cada senme ica ne tajtol ijcón queme cada senme de tejuan tiixpetanque huan techmachtijque topapajuan.

<sup>12</sup> Huan nochin in tagayot quitetzaucitayaj huan hasta amo quimatfaj oc toni quinemilisque. Ica ya nojón yejuan motatajtoltiayaj se huan ocsé ijcuín:

—¿Toni quijtosnequi nochi nijín ten quichiutocque nijinques itatitaniluan de Cristo?

<sup>13</sup> Pero ocsequin tagayot sayó quinmohuispoloayaj neitatitaniluan de Cristo huan quijtoayaj ijcuín:

—Ne achá huintitocque ica ne yancuic vino.

### Nican tajtoa de queniu Pedro quinnojnnotzac in tagayot

<sup>14</sup> Ijcuación in Pedro moquetzac intzalan in ocsé majtactionsenme itatitaniluan de Cristo huan pehuac quinchicaucanojnnotzaya in tagayot huan quiniliaya ijcuín:

—Namejuan nantaca de nanpohuij ne Judeajcopaca, huan no nochi namejuan ten nancalyetocque nican Jerusalén. Xicmatican nijín huan no xiyecaquican ten namechiluiti. <sup>15</sup> Xicmatican que nijín itatitaniluan de Cristo, yejuan amo melau huintitocque, amo ijcón queme namejuan nanquixejecoayaj, porín yequin tiyetocque chicnahui hora de cualcan. <sup>16</sup> Ta, nochi nijín motamichiutoc ya ijcón queme quijtoco ne huejcautanahuatijque Joel cuac quijcuiloco ijcuín:

<sup>17</sup> Porín Dios quijtoj que cuac ne tacuitapan tonalme ya, ijcuación niquinualtitanilis no Yecticatztin Espíritu huan ijcón niquinyolpexontis nochi tagayot.

Huan namotelpocahuan huan namoichpocahuan, yejuan tajtotinemisque ica tanahuatilme ten quiselisque ica Nejuatzin notencopaca.

Huan in telpocame quitasque huan cajsicamatisque nochi ten niquinnextilis ijcón queme cuac se tacochitas.

Huan in huehuentzitzin tacochitasque tech nincochilis.

<sup>18</sup> Huan cachi oc tech nojón tonalme niquinualtitanilis no Yecticatztin Espíritu huan niquinyolpexontis notequiticahuan taca huan sihuame.

Huan ijcón yejuan tanojnnotztinemisque ica tanahuatilme ten quiselisque ica Nejuatzin notencopaca.

<sup>19</sup> Huan nicsentenextis huejueyi tetzaucachihualisme ne ejecaixco.

Huan no ijcón nican talticpac nicsentenextis huejueyi nescayome queme nijinques ten cualcui in esti huan tit huan mixpociti.

<sup>20</sup> Huan in tonaltzin amo tanextis oc. Ta, tayohuayantis.

Huan in metzti chichilehuis queme esti.

Huan nochi nijín mochihuas achtopa que mohualuicas in Totecotztin.

Huan tech ne tonal cuac Totecotzin hualas ica ne hueyi ichicaucacualtziyo, ijcuacón quinextijtihualas ichicaucahuelilis de Dios.

<sup>21</sup> Huan nochi naquen motatatautilíaj ihuan Dios ica ichicahualis den itocaytzin den Totecotzin, yejuan nojonques Dios quinmaquixtis.

<sup>22</sup> Huan in Pedro no quiniliayaj in tagayot ijcuín:

—Xinechcaquilican notajtoluan, namejuan nanopueblojuani de Israel. Namechnonotzati de ne tagat Jesús ten pohúa tech pueblo Nazaret. Totajtzin Dios namechnextilij ya que ne Jesús Yejuatzin ya in taijital de Dios. Huan Totajtzin Dios quimactilij ya Jesús in chichahualis para quichiutinemis namotzalan nochi nijín mohuiscatequime huan nijín tetzaucanescayome ijcón queme nanquimatocque ya. <sup>23</sup> Huan masqui Jesús quichiutinemía sayó ten cuali, pero namejuan nanquitemactijque inmaco in tayecanani. Huan yejuan quiquitziqijque Jesús queme preso, huan quimictijque huan quicoupanpilojque. Ijcón quichiuque ne taca ten tamajchualme. Pero nochi nijín mochihuac porín Totajtzin Dios ijcón quimonequiltij huan no Yejuatzin ipa quimatoyaj ya que mochihuas ijcón. <sup>24</sup> Pero Totajtzin Dios quipanquixtij yoltoc in Jesús intzalan in ánimajme, huan ijcón Yejuatzin quiquixtij Jesús campa in chichahualis de miquilis, porín ne chichahualis den miquilis amo huelic oc quitzacuilij ya in Jesús. <sup>25</sup> Huan ne huejcaurey David tajtoaya de Jesús tech in Tajcuilolamatzin de Dios huan quijtoa que Jesús monojnotztoc ihuan Itajtzin Dios ijcuín:

Niquitaya Notajtzin que nachipa noixpantzinco yetica.

Huan Notajtzin nachipa yetica noyecmacopaca para ma amo aquen nechyolmoutis.

<sup>26</sup> Ica ya nojón nejua nimoyolpactijtinemía huan noten nipaquilistajtoaya.

Huan masqui nonacayo huetztoc tech in taltecocti, pero nejua nitacuaumatami mohuantzin.

<sup>27</sup> Porín nicmati que Tejuatzin amo tinechoncahuas campa toctocque in ánimajme.

Huan no nicmati que Tejuatzin amo ticcahuas que nonacayo ma palani porín nicmati que Nejuatzin nimotasojtzin.

<sup>28</sup> Huan Tejuatzin tinechonnextilij ya motanextilisuan queme yesquía ojtzin ten nechuicas tech ne nemilis nachipa.

Huan no Tejuatzin tinechylpexontijtiyás ica paquilis porín Tejuatzin tiyetinemis sen nachipa nohuantzin.

<sup>29</sup> Huan in Pedro no quiniliaya in tagayot ijcuín:

—Namejuan nantocnihuan, namechilfa ica ne yolchicahualis que ne tohuejcautat rey David no momiquilij huan quitalpachojque. Huan nitalcon de ne rey David campa toctoc ipa tiqiztocque hasta axcan. <sup>30</sup> Pero ne rey David catca se tanahuatijque de Dios. Huan ne rey David quimatic que Totajtzin Dios ica nochi ihuelilistzin moyectencahuac ihuan David de que se tonal se iixuiu de David yesqui in Cristo Temaquixtijque. Huan no Totajtzin Dios moyectencahuac de que Yejuatzin ne Cristo tayecanas queme rey iixpatca David. <sup>31</sup> Huan in rey David quitac nochi nijín desde ne achtopa ya huan technojnotzac de ne tonal cuac Cristo panquisas yoltoc intzalan in ánimajme. Huan David quijtoj que nitalnamiquilis de Jesús amo mocahuasquía campa yetocque in ánimajme, huan amo no ninacayo palanisquía. <sup>32</sup> Huan ijcón Totajtzin Dios quipanquixtij yoltoc in Jesús intzalan in ánimajme. Huan ijcón tamechiluáj porín tejuan nochi tiquitacque ya ten mochihuac. <sup>33</sup> Huan ijcón Totajtzin Dios quiajocuic Jesús huan quitallij iyecmacopaca campa ihuelilispán de Dios. Huan de ompa Jesús quiselij in Yecticatzin Espíritu ten Itajtzin Dios quimactilij, ijcón

queme Itajtzin Dios ipa moyectencahuac que quichihuas. Huan ijcón Jesús cualpan-toyahuac huan techyolpexontij axcan ica in Yecticatzin Espíritu, ijcón queme namejuan nanquitacque huan nanquicacque. <sup>34</sup> Porín melau in rey David amo tejcoc ne eluiyac, masqui in rey David yejua quiytoj tech in Tajcuilolamatzin de Dios ijcuín: In Totajtzin Dios quilij Notecotzin ijcuín:

“Ximosehuijtzino noyecmacopaca,

<sup>35</sup> hasta ne tonal cuac nejua nimitztayecancaquetzas ipan nochi neques ten mitztahuelitaj”.

<sup>36</sup> Huan nochi namejuan nancalyetoni de Israel, ximatican ica hueyi yolchicahualis que nijín Jesús namejuan nanquicuoupampilojque. Pero Yejuatzin ne Totajtzin Dios quihueyipanchihuac huan axcan ne Jesús Yejuatzin den Totecotzin huan no Yejuatzin in Cristo Temaquixtijque.

<sup>37</sup> Huan cuac in tagayot quitamicacque ya nijín tajtolme, ijcuacón yejuan semi quiyolmachiliayaj que quinyolxocoliayaj. Ica ya nojón quitajoltijque in Pedro huan ocsequin itatitaniluan de Jesús ijcuín:

—Tocnihuan, ¿toni monequi ticchihuasque axcan?

<sup>38</sup> Ijcuacón cachi oc in Pero quiniliaya in tagayot ijcuín:

—Ximoyolnemilican de namotajtacoluan huan ma namechahuijcan ica in chichahualis den itocaytzin de Jesucristo. Huan ijcón Dios namechtapojpoluilis de namotajtacoluan. Huan no Totajtzin Dios namechtayocolis in Yecticatzin Espíritu. <sup>39</sup> Huan ijcón in Totajtzin Dios no moyectencahuac que namechtayocolis in Yecticatzin Espíritu para namejuan huan no para namoconejuan huan no para ocsequin tagayot ten mocuatapololtijtinemij oc tech in tajtacol. Huan ijcón Totajtzin Dios quintayocolis in Yecticatzin Espíritu para nochi ne ten Yejuatzin quinijitac ya ma poutinemican ihuan Yejuatzin.

<sup>40</sup> Huan in Pedro quinnoijnatzaya in tagayot ica nijín tajtolme. Huan ica míac ocsequi tataman tajtolme Pedro quinyolmajxitiaya in tacaquini cachi oc ijcuín:

—Ximoyolnemilican de namotajtacoluan huan ximomaquixtican para ma amo xipolihuican inuan nijín tagayot ten xpoliutinemij.

<sup>41</sup> Huan ijcón nochi naquen quicaquilijque huan quitacamatque nintanojnotzalis de Pedro, yejuan nojonques motemactijque ma quinahuijcan. Huan ijcón tech nojón tonal Totajtzin Dios cachi oc quinmiactiltij in taneltocani queme eyi mil. <sup>42</sup> Huan ne taneltocani momachtijtiayaj huan quitacamatiaayaj nochi in tajtolme ten in tatanilme de Jesús quinnextiliayaj. Huan nochi ne tocnihuan sen yolseucanenque se huan ocsé huan no mosentatautiliayaj ihuan Dios. Huan no nochi in tocnihuan mosentiliayaj para quisepancuasque in pantzin para ijcón quielnamiquisque in miqulils de Cristo.

### **Nican tajtoa den chipaucanemilis de ne achtopa taneltocani**

<sup>43</sup> Huan nochi in tagayot quinmoucaitayaj in taneltocani porín yejuan quitayaj in huejueyi nescayome huan mohuiscatequime ten quichiutinemíaj ne tatitanilme de Cristo. <sup>44</sup> Huan nochi naquen taneltocasque, yejuan nojonques sen yolseucayetoyaj seco san. Huan nochi in tocnihuan quinxejxelo huiliayaj se huan ocsé ten ninaxcaca-pa. <sup>45</sup> Huan in tocnihuan no quinamacayaj nochi ten yejuan quiapiayaj, huan nojón tomin quinxejxelo huiliayaj nochi naquen tensá quinpolaoyaj para ica ixpanosque. <sup>46</sup> Mosta huan mosta in tocnihuan mosentilijque tech in hueyi tiopan de judíos para

quimohuistilisque Totajtzin Dios. Huan no yayaj tech cada se cali para quisepan-cuasque in pan para ijcón quielnamiquisque in miquilis de Cristo. Huan no sepan tamasehuayaj ica míac yolpaquilis huan ica ne yolyemanilis. <sup>47</sup> Huan ijcón in tocnihuan quimohuistiliayaj Totajtzin Dios, huan ijcón in tagayot quincualtagaitayaj in tocnihuan. Huan hasta Totajtzin Dios cachi oc quinmiactilitiaya taneltocani ihuan ocsequin tocnihuan ten ipa taneltocatihuitze ya tech in ne nemaquixtilis.

### Nican tajtoa de queniu in Pedro quipajtj se tagat coxo

**3** Huan se tonal queme eyi hora de tiotac cuac mosentiliayaj in pueblojuani taneltocani para motatatautilisque ihuan Dios, ijcuacán in Pedro huan Juan no yajque campa ne hueyi tiopan de judíos. <sup>2</sup> Huan mosta mosta yetoya tiopan calteno se tagat metzcoxo desde ne cuac yolic. Huan nojón coxo no cuicayaj para quitalisque campa ne tiopan calteno ten monotza Cualtzin. Huan ijcón in cocoxque ompa motaehuiaya ca tomin naquen ompa calaquíaj tiopanijtic. <sup>3</sup> Huan cuac in Pedro huan Juan yayaj calactiayaj ya campa ne tiopan, ijcuacán ne metzcoxo quinitac huan quintajtani ma quimacacan ne taehuil. <sup>4</sup> Pero in Pedro huan Juan sayó quisenitacque. Huan in Pedro quilij ijcuín:

—Xitechualita.

<sup>5</sup> Huan ijcón ne cocoxque quinsencayic san porín yejua quiyolnemiliaya que xa quimactilitij tensá de tomin. <sup>6</sup> Pero in Pedro quilij in cocoxque ijcuín:

—Amo teyi nicpía nión plata huan nión oro. Pero ne ten nicpixtoc, yejua ne nimitzmacas. Huan nimitzilía ca ichicahualis de tocaytzin de Jesús de Nazaret, ximoquetza huan xinejnemi.

<sup>7</sup> Huan ijcón in Pedro quimaquitziqij in coxo iyecmacopaca huan quiquetzac. Huan cuac moquetztía ya, ijcuacán mochicahualtijque nimetzuan huan nitaluayohuan. <sup>8</sup> Ijcuacán ne tagat sepa san ajcotzicuinic huan moquetztiquisac; huan de ompa pehuac nenemi. Huan ijcón no inuan in Pedro huan Juan in tagat ten catca coxo calaquito tiopanijtic huan nejnemía hasta ajcotzijtzicuintiaya huan quihueyimo-huistiliaya Totajtzin Dios. <sup>9</sup> Huan ijcón nochi in pueblojuani quitacque in tagat ten catca coxo que yejua nenentinemis ya huan quimohuistilijtinemic Totajtzin Dios. <sup>10</sup> Huan in tagayot ipa cajsicamatque que yejua ne in tagat den motaliaya huan motaehuiaya campa tiopan calteno ten monotza Cualtzin. Huan ijcón in tagayot quihueyimoucaitacque huan moyolpoloque ica ne ten mochihuac ipa ne coxo.

### Nican Pedro quinnojnnotzac in tagayot campa in tiopan calteno ten monotza Salomón

<sup>11</sup> Huan yetoya se calten ten monotza Salomón campa tiopan calteno. Huan tech nojón calten yetoyaj Pedro huan Juan quinquitziqijtoya ne tagat coxo de yejuan quipajtijcaj. Ijcuacán nochi in tagayot quihueyimoucaitacque huan hual motalojque quitacoj ten mochihuac. <sup>12</sup> Huan cuac Pedro quitac ya que mosentilicoj ya in tagayot, ijcuacán yejua quinilij ijcuín:

—Namejuan nanpueblojuani de Israel, ¿queyé namejuan nanquimoucaitaj nijín ten mochihuac? Huan, ¿queyé namejuan nantechsenitaj san? Majyá nanmoyolilíaj que xa tejuan san ica tochicahualis oso xa ica por tochipaucanemilis ticnejnemiltijque nijín tagat. <sup>13</sup> Pero namechilía ten melau que Totajtzin Dios ten Yejuatzin nin Tajtzin Dios de ne tohuejcautatuan Abraham huan Isaac huan Jacob. Huan Tota-



jtzin Dios quihueyipantayecancaquetzac ya Iconetzin Jesús iyecmacopaca ne eluiyactzinco campa ichicaucahuelilispán. Pero ne Jesús namejuan nanquitemactijque inmaco in tayecanani ma quimictican. Huan ne Jesús namejuan nanquimajpeuque iixpan in Pilato. Huan cuac ne tayecanque Pilato quinequía ma quicajcahuas Jesús, ijcuacán namejuan amo nanquinecque. <sup>14</sup> Huan ne Jesús yolchihpahuactzin huan yolmelahuactzin. Pero namejuan nanquimajpeuque ne Jesús. Huan namejuan amo nanquitajtanilijque Pilato ma quicajcahua in Jesús. Ta, namejuan cachi oc nantajtanque ma quicajcahuacan se tagat temictijque. <sup>15</sup> Huan ijcón namejuan nanquimictijque ne Jesús Iconetzin Dios ten quitemaca nemilís. Pero masqui ijcón nanquichiqué, Totajtzin Dios quipanquixtij Jesús yoltoc intzalan in ánimajme. Huan tejuan nochi nijín tamechilíaj porín tejuan tquitacque nochi nijín ten mochihuac. <sup>16</sup> Huan nijín tagat coxo ten nochi namejuan ipa nanquitzinenque huan nanquixmatij, yejua ne Totajtzin Dios quipajtij ica in chicahualis den tocaytzin de Jesús, porín nijín tagat coxo tacuautamatic ica ne tocaytzin de Jesús. Huan Totajtzin Dios quiyecajscapajtij ya nijín tagat coxo porín yejua tacuautamatic ica in chicahualis den tocaytzin de Jesús, huan namejuan cuali nanquitztocque que pajtij ya.

<sup>17</sup> Huan no Pedro quinilij in tacaquini ijcuín: Huan axcan tocnihuan, ipa nicmatoc ya que cuac namejuan huan namotayecancahuan nanquimictijque Jesús, ijcuacán namejuan amo nancajscamatque toni nanquichiyotaj. <sup>18</sup> Pero Totajtzin Dios cajscachihuaco ne itenilil ijcón queme ne achtopa tanahuatiani quijtojcaj que in Cristo monequía quijyohuis huan miquis. Huan melau ijcón mochihuaco. <sup>19</sup> Ica ya nojón monequi ximoyolnemilican de namotajtacoluan huan ximocuepacan de namotajtacoljpan huan xictocilican Totajtzin Dios, huan ijcón Totajtzin Dios namechtapojpoluilis de namotajtacoluan. Huan no Totecotzin Dios namechtitanilijiyás ne yolchicahualis para namechyolsehuijtiyás. <sup>20</sup> Huan no Totajtzin Dios ocsepa namechualtitanilis Jesús, Yejuatzin nijín in Cristo Temaquixtijque, ne ten ipa Totajtzin Dios quijitac ya para namechmaquixtis de namotajtacoluan. <sup>21</sup> Huan hasta axcan monequi ma yeto Jesucristo ne eluiyactzinco hasta cuac in tonal queman Totajtzin Dios quiyectataliti huan quiyancuicatalis nochi in eluiyac huan nican talticpac. Huan nochi nijín quijtoj Dios ma mochihua ica itencopaca ne yolchihpauque tanahuatiani ne ten achtopa nemicoj ya. <sup>22</sup> Huan no Moisés quinilij tohuejcautatuan ijcuín: “Totajtzin Dios Totecotzin, Yejuatzin namechualtitanilis se tanahuatijque ten Yejuatzin quijitas namotzalan, ijcón queme Totajtzin Dios nechijitac nejua ni Moisés. Huan namechilíja que xicyecaquilican ne tanahuatijque ica nochi de míac tataman namechnojnotzas. <sup>23</sup> Huan mochihuas que nochi neques ten amo quiyecaquilisque itanojnotzalis de ne tanahuatijque, yejuan nojonques Totajtzin Dios quinsecotalis den ocsequin pueblojuani de Israel huan ompa quintamis”.

<sup>24</sup> Huan nijín nochi in tanahuatiani de Dios desde ne huejcautanahuatijque Samuel para taixpan, nochi ocsequin tanahuatiani hasta axcan, nochi yejuan tajtojtihuaque de toni mochihuaquiu tech nijín tonalme. <sup>25</sup> Huan nochi ten Totajtzin Dios quintenilij in tanahuatiani, nochi nijín tajtolme cualtías para namejuan. Porín namejuan nanteixuihuan huan naninchancahuan de ne tanahuatiani. Huan Totajtzin Dios moyectencahuac ihuan tohuejcautatuan para namechtiocihuas cuac Yejuatzin quilij ne huejcatanahuatijque Abraham ijcuín: “Totajtzin Dios quintiocihuaac nochi in taneltocani nican talticpacuani huan nochi ninconeahuan ica por ne ixuiu de Abraham”. <sup>26</sup> Huan cuac Totajtzin Dios quijitac huan quinoztac Jesús Iconetzin Dios ma

tequitiqui namotzalan nican talticpac, ijcuacón Totajtzin Dios namechualtitanilij ya nijín Jesús para namechtiochihuas de namejuan in judíos, huan no para namecht-  
esecocahualtis de namotajtacolojpan.

### Nican quinuiyacque Pedro huan Juan inixpan in tequihuani

**4** Huan in Pedro huan Juan quinnojnnotzayaj oc in tagayot cuac ejcoctihuetzque in tayecanani tiopixcame ihuan ne tiopan tayecancamayol, huan no quisenu-  
alciuayaj sequin taca saduceos. <sup>2</sup>Huan nochi nojonques semi yolcualantihualayaj porín Pedro huan Juan quinmachiayaj in tagayot que ijcón queme Jesús panquisac ya yoltoc intzalan in ánimajme no ijcón panquisasque yoltocque intzalan in ánimajme nochi itaneltocacahuan de Jesús. <sup>3</sup>Ica ya nojón ne tayecanani quin-  
jquitzque Pedro huan Juan queme presos, huan quinuiyacque quintzacuatoj tech in cárcel. Huan queme ipa tiotac ya huan amo huelic oc quinixcomacasque oc, ica ya nojón quincauque cárcelijtic hasta imostica. <sup>4</sup>Huan masqui ijcón mochihuac, pero miacque tagayot ten quícaquilijque in tanojnnotzalis de Pedro, yejuan nojon-  
ques quineltoquilijque de Jesús. Huan ne tagayot ten quineltoquilijque catca queme macuil mil taca huan amo quipouque in sihuame. <sup>5</sup>Huan mochihuac que imostica mosentilijque tech nojón pueblo Jerusalén in tayecanani judíos ihuan in huehuentz-  
itzin den pueblojuani huan in tanextilianí ten tanahuatil de Moisés. <sup>6</sup>Huan yetoya ompa ne tayecanque tiopixcat ten monotzaya Anás. Huan ihuan yetoya Caifás huan in Juan huan in Alejandro huan nochi inchancahuan den tayecanani tiopixcame. <sup>7</sup>Ijcuacón tatitanque ma quinalcuilican ne Pedro huan Juan. Huan de ompa quin-  
quetzque tatajco de ne tayecanani. Huan in tayecanani quintajtojtijque Pedro huan Juan ijcuín:

—¿Tonica tanahuatil oso aconi itencopaca nanquichiutinemij nochi nijín chihualisme?

<sup>8</sup>Huan queme in Pedro yolpepexocatoc ica in Yecticatzin Espíritu, ijcuacón yejua quinnanquilij ijcuín:

—Namejuan nantayecanani huan nanhuehuentzitzin den pueblojuani de Israel. <sup>9</sup>Namejuan axcan nantechtajtojtíaj huan nantechtoquilíaj ma tiquijtocan toni tati-  
ochihualis mochihuac ipan nijín coxo, para ijcón namejuan nanquimatisque de queniu pajtic nijín tagat. <sup>10</sup>Huan tejuan tamechmatiltíaj nochi namejuan para ma ijcón xicmatican nochi namejuan in pueblojuani de Israel que nijín tagat ten yetoc namoixpan nochi namejuan, yejua ne pajtic ya sayó ica in chichualis den tocaytzin de Jesucristo ten pohúa de Nazaret. Huan yejua nijín Jesús namejuan nanquicu-  
oupampilojque, pero Totajtzin Dios quipanquixtij Jesús yoltoc intzalan in ánima-  
jme. <sup>11</sup>Huan nijín Jesús Yejuatzin ya queme yesquía se cuali tet ten namejuan in tepan-  
chihuanime nanquimajpeuque. Pero ne tet, yejua ne mochihuaco in tepan chich-  
ahualoni den tepanmit. <sup>12</sup>Pero xicmatican amo aquen oc huelis temaquixtis. Ta, sayó Jesús Temaquixtijque porín Totajtzin Dios amo techmaca oc ocsé tocaytzin tenica se tagat nican talticpac huelis momaquixtis.

<sup>13</sup>Huan cuac in tayecanani quitacque in yolchichualis tenica tajtoayaj Pedro huan Juan, ijcuacón yejuan quinmoucaitacque nitajtolis porín cajsicamatque que yejuan amo queman momachtijque para ma taixmatican. Huan no quinmoucaitayaj porín yejuan no catcaj sayó milaj tequitini san. Ijcuacón in tayecanani cajsicaix-  
matque que yejuan yetinemíaj huan momachtijtinemíaj ihuan Jesús. <sup>14</sup>Huan in

tagat ne ten pajtic ya no ihuan ijcatoc ya Pedro huan Juan. Ica ya nojón in tayecanani amo huelláj quinpajpantisque ica tensá tajtacol.

<sup>15</sup> Ica ya nojón in tayecanani tanahuatijque que ma quincalanquixtijcan ne taneltocani de ne campa sen oloch yetoya in tayecanani para ijcón huellis mosepanixejecoltisque yejuan san ten mochihuac. <sup>16</sup> Huan ijcón in tayecanani quijtoayaj ijcuín:

—¿Toni tiquinchihuilisque nijín taca? Porín nochi pueblojuani de nican Jerusalén quimatocque ya que ne Pedro huan Juan quichiuque ya se mohuiscatequit de Dios. Ica ya nojón tejuan amo huellis oc tiquitaatilisque den tagayot nijín mohuiscatequit ten mochihuac ya. <sup>17</sup> Huan amo no ticnequij que ma cachi motetapohuijtine-misque ipan in pueblojuani nijín mohuiscatequit ten mochihuac ya. Ta, cachi cuali ma tiquintacahualtican ne taneltocani de Jesús para que nican para taixpan ma amo cachi oc quinnojnnotztinemican nión naquen oc ica ne tocaytzin de Jesús. Huan como amo techtacamatisque, ijcuación tejuan tiquintatzacuultisque.

<sup>18</sup> Ijcuación quinnotzque Pedro huan Juan huan quintacahualtijque que ma amo cachi oc quinnojnnotztinemican oc nión ma ay quinmachtijtjinemican oc in tagayot ica ne tocaytzin de Jesús. <sup>19</sup> Pero mochihuac que cachi oc Pedro huan Juan quin-nanquilijque ijcuín:

—Namejuan cuali xiquixejecocan cox ijcón Dios quimonequiltía que tejuan ma tamehtacamatican namejuan oso ma tictacamatican Totajtzin Dios. <sup>20</sup> Porín tejuan amo huellis ticahuasque de amo titetapohuisque nochi nijín ten tiquitacque huan ten ticacque.

<sup>21</sup> Ijcuación in tayecanani sayó quintacahualtijque que ma amo cachi oc tanojnnotztinemican. Huan ijcón ne tayecanani quincajcauque ma yajcan porín amo teyi quinaxxilijque tensá ten amo cuali para ica quintatzacuultisquáj. Huan ijcón quichiuque in tayecanani porín quinyolmohuiliayaj in pueblojuani. Huan in pueblojuani quinueyimohuistiliayaj Totajtzin Dios ica por ne tagat ten pajtic ya. <sup>22</sup> Huan nijín tagat ten quipajtijque ya ica ne ichicaucahuelilis de Dios, yejua ne ipa panoaya de omeopal xihuit.

### **Nican in taneltocani quitajtanilijque Dios ma cachi oc quinmaca tacuautamatis huan yolchicahualis**

<sup>23</sup> Huan in Pedro huan Juan, cuac quincajcauque ya, ijcuación yejuan yajque campa yetoyaj ocsequin nintequiticaicnihuan huan ijcón quintapohuitoj nochi ten quinilijque in tayecanani tiopixcame huan in huehuentzitzin de pueblojuani Israel. <sup>24</sup> Huan cuac quicacque ya nochi nijín tajtolme, ijcuación nochi in taneltocani mosepantatautilijque ihuan Dios huan quiliayaj ijcuín:

—Tejuatzin, tion Hueyichiuque huan tion Totecotzin. Huan Tejuatzin tion Dios ten ticonchijchihuac in eluiyac huan talticpac huan nochi in huejueyi ame, huan no ticonchijchihuac nochi ten nemij nican talticpac huan aijtic. <sup>25</sup> Huan Tejuatzin ticonijtojca ica ichicahualistzin den Yecticatzin Espíritu huan ica itencopaca tohuejcautat rey David de motequiticau huan yejua techiliaya ijcuín:

¿Queyé in talticpacuani ay mocualantijtjinemij?

Huan, ¿queyé in talticpanemini quinemilijtjinemij míac tataman ten sayó nencajtic san?

<sup>26</sup> In hueyi chihuanime den talticpac mosentilijque.

Huan in huejueyi tayecanani den paísme monechicojque para quixnamiquisque Totajtzin Dios huan Cristo Temaquixtijque.

<sup>27</sup> Huan no in taneltocani motatatautilijque ijcuín:

—Huan hueyi melau que ne rey Herodes huan in tayecanque Poncio Pilato, yejuan nojonques mosentilijque ihuan in analtecocayome huan ihuan in pueblojuani de Israel. Huan nochi nijinques mosentilij monechicojque tech nijín pueblo Jerusalén para quixnamiquisque Moconetzin Jesús ten Yolchipahuactzin ten Tejuatzin ticonijitac ya huan ticontequimactij ya ma techmaquixtiquiu. <sup>28</sup> Huan ne tayecanani quichique ijcón queme Tejuatzin ticonnemilijca ya huan queme Tejuatzin tiontanahuaticja ya que ijcón mochihuas. <sup>29</sup> Huan axcan, Totecotzin, xiconita san queme yejuan quinequij techtajyohuiltisque. Huan tejuan timotequiticahuan, huan timitzonueyitatautilij xitechonmaca ne yolchicahualis para ma tejuan amo tiyolmoahuican de tictetapohuisque motajoltzin. <sup>30</sup> Huan no xionmomasohua ica mochicaucahuelilis inpan in cocoyani para ma pajtican. Huan xiconchiutica cachi oc mohuiscatequime huan huejueyi nescayome ica ichicahualis den tocaytzin ten Moconetzin Jesús ten Yolchipahuactzin.

<sup>31</sup> Huan cuac motamitatatautilijque ya ne itaneltocacahuan de Jesús, ijcuacón huihuiyocaya ne cali campa sen oloch yetoyaj. Huan de ompa Dios quinyolpepexocaltij ica in Yecticatzin Espíritu. Ica ya nojón nochi in tocnihuan ay tanojnotztinenque ica in Tajtoltzin de Dios ica hueyi yolchicahualis ten quinmactilij in Yecticatzin Espíritu.

### **Nican in tocnihuan mosepanxejelohuilíaj nochi ten inaxcacopaca**

<sup>32</sup> Huan ijcón nochi taneltocani ten tacuautamatque ihuan Dios, yejuan sen voltanemiliayaj huan sansé san mohuicayaj. Huan amo senme den tocnihuan quiyolnemiliayaj que sayó pohuía de yejua den iaxcacopaca. Ta, nochi in tocnihuan quiyolnemiliayaj que quisepanpíaj ya nochi de inaxcacopaca. <sup>33</sup> Huan ijcón itatitaniluan de Cristo ica hueyi yolchicahualis quisentocayaj quinnojnnotztinemíaj in tagayot que yejuan quitacque ya cuac Totecotzin Jesús panquisac yoltoc itzalan in ánimajme. Huan Totajtzin Dios cachi oc quintatiochihuiliaya nochi in itaneltocacahuan de Jesús. <sup>34</sup> Huan ijcón amo aquen yetoya se tocnui que ma amo quipía ten monequía para moixpanoltis. Porín nochi in tocnihuan quinnamacayaj nintaluan oso ninchanuan ten quinpiayaj. Huan no ne tomin quinalcuiliayaj ninmaco de ne itatitaniluan de Cristo. <sup>35</sup> Huan cuac quinmactiliayaj ya nijín tomin itatitaniluan de Cristo, ijcuacón yejuan quinxejelohuiliayaj in tomin ne tocnihuan, ijcón queme monequía cada senme den tocnihuan para moixpanoltisque. <sup>36</sup> Huan oncaya se tagat ten monetzaya José. Huan ne José yejua ten yolic campa itatilanal de Chipre. Huan ne José catca se levita, ten quijtosnequi itapalehuijcau den tiopixcame judíos. Huan itatitaniluan de Cristo quiojpacatocaytiayaj José queme Bernabé, ten quijtosnequi in tagat ten teyoltalía. <sup>37</sup> Huan ijcón ne José quinamacac nital ten quipiaya huan in tomin cualic huan quitalico ninmaco itatitaniluan de Cristo.

### **Nican tajtoa de queniu in Ananías huan Safira motajtacolmacacque**

**5** Pero yetoya sé tagat ten monetzaya Ananías ihuan isihua ten monetzaya Safira, yejuan nojonques no quinamacacque nital. <sup>2</sup> Huan ijcón ne tagat mocahuilij sequi tomin huan ocsequi quinmactilito ne itatitaniluan de Cristo ijcón queme yesquía

ajsitosquía den tal patiyot. Huan ne isihuau ipa cuali quimatoya ya ten quichiutoya iyoquich Ananías. <sup>3</sup> Ica ya nojón in Pedro quilij Ananías ijcuín:

—¿Queyé ticahuac que in amocuali Satanás ma tequiti moyolijtic para mitzyolmajitis de queniu ticajcayahuas in Yecticatzin Espíritu huan para ijcón timocahuilis sequi tomin ne tenica quixtauque motal? <sup>4</sup> Huan cuac ayamo ticnamacaya, ¿xe amo moaxca oc catca ne tomin? Pues, quema. Huan cuac ticnamacac ya, ¿xe amo catca moaxca ne tal? Pues quema. ¿Queyé ijcón ticyolnemilij que ticchihuas nijín xolopijyot? Porín amo titechajcayahuac tejuan san. Ta, Yejuatzin in Totajtzin Dios ticnequic ticajcayahuas.

<sup>5</sup> Huan cuac ijcón in Ananías quicayic ya nijín tajtolme, ijcuación nimantzin huetzic huan miyic. Huan nochi naquen quimatque ya toni mochihuac, nochi yejuan moyolmoutiyaj. <sup>6</sup> Huan de ompa hualajque sequin telcame tocnihuan huan quipicque ninacayo de Ananías, huan de ompa cuiyacque huan quitalpachojque. <sup>7</sup> Huan panoc ya queme eyi hora, ijcuación ejcoc nisihuau de Ananías, pero yejua amo quimatía toni mochihuac. <sup>8</sup> Ijcuación in Pedro quitajtolitj in Safira ijcuín:

—Xitechili, tejua Safira. ¿Xe melau ijcón ipatiu namotal ten nanquinamacacque, ijcón queme nanquijtojque ya?

Ijcuación in Safira no quinanquilij ijcuín:

—Quema, ijcón ipatiu queme tamechilijque ya.

<sup>9</sup> Ijcuación in Pedro quilij ocsepa ijcuín:

—¿Queyé nanquisepannemilijque ijcón para nanquicajcayahuasque in Yecticatzin Espíritu, para ijcón nanquitasque cox melau quitztica Dios? Xiquita nepa calan huitze ya ne telcame ten cuiyacque quitalpachojque ne moyoquich. Huan axcan tejua no mitzuicasque para mitztalpachotihue.

<sup>10</sup> Ijcuación tech nojón momento nimantzin huetzito in Safira iicxitan in Pedro huan miyic. Huan cuac in telcame calaquitoj ya, ijcuación cajsitoj in sihuat ipa miquic ya. Ica ya nojón calanquixtijque huan cuiyacque quitalpachotoj tanacastan campa quitocque iyoquich. <sup>11</sup> Huan ijcón nochi in tocnihuan huan nochi in ocsequin tagayot, cuac quimatque ya toni mochihuac, ijcuación yejuan nochi moyolmoutijque.

### **Nican tajtoa de ne míac huejueyi nescayome huan mohuiscatequime ten Dios quichiutoc**

<sup>12</sup> Huan Dios quichihuac ya míac huejueyi nescayome huan ya mohuiscatequime ica por itatitaniluan de Cristo inpan nochi in tagayot. Huan nochi in tocnihuan taneltocani mosentiliayaj campa ne tiopan calteno ten monotza Salomón. <sup>13</sup> Pero amo senme tagayot den amo taneltocaj que ma moixehui ma mosentiliani ihuan in tocnihuan taneltocani. Pero nochi in tagayot quincualtagaitayaj in tocnihuan taneltocani. <sup>14</sup> Huan ijcón mohueyimiactilijque in tocnihuan ten tacuautamatáj ihuan Totecotzin. Huan tel míac tacuautamatque ihuan Cristo, amo sayó in taca. Ta, no in sihuame. <sup>15</sup> Huan queme yec tacuautamatque in tocnihuan hasta quinquixtiayaj calampa nincocoxahuan tech ojme huan quincuatecayaj tech nintapechuan huan tech ninpetau den cocoyani. Huan ijcón cuac panosquía in Pedro, ijcuación siquiera ne iyecahuil in Pedro ma panoani inpan in cocoyani para quinpajtis. <sup>16</sup> Huan no ijcón quichihuaya ocsequin pueblojme ten quiyehualojtoyaj Jerusaléncopaca. Nochi nojón pueblojuani quinalcuiayaj nochi nincocoxahuan campa in tatitaniluan de

Cristo. Huan no quinalcuilijque nochi naquen yoltajyohuiayaj ica in amocuali ejecame. Huan nochi yejuan quinpajtijque.

### Nican in tayecanani judíos quitajyohuiltijque Pedro huan Juan

<sup>17</sup> Huan in tayecanque tiopixcat huan in tayecanani saduceos sen yetoyaj. Huan cuac quitacque ya toni quichiuque Pedro huan Juan, ijcuacón yejuan semi quiny-olnexciliayaj ne itatitaniluan de Jesús. <sup>18</sup> Huan niman tatitanque ne tayecanani de ma quincuitij ne tatitanilme de Jesús huan ma quinquitizquican queme presos huan ma quincalaquican campa ne cárcelijtic. <sup>19</sup> Pero mochihuac que huala cayohual se taquehual ángel de Dios huan quintapoj nochi caltenme den cárcel huan quinuiyac in tatitanilme de Jesús calan. Huan de ompa in ángel quinilij ijcuín:

<sup>20</sup> —Axcan xiyacan tiopanijtic huan ompa ximoquetzacan inixteno nochi in tagayot huan xiquintapohuican nochi nijín tajtolme ten cuica ne yancuic nemilis.

<sup>21</sup> Huan in tatitaniluan de Jesús cuac quicacque ya nochi nijín, ijcuacón imostica santanesic calacque tech ne hueyi tiopan de judíos. Huan de ompa peuque quinmactiyaj in tagayot ica in Tajtoltzin de Dios.

Huan cuac tanojnotztoyaj ya Pedro huan Juan ne tiopanijtic, ijcuacón in tayecanque tiopixcat huan nochi tayecanani ten inuan yetoyaj, yejuan nojonques mosentilijque inuan nochi in huehuentzitzin den pueblojuani Israel. Huan yejuan tatitanque ma quincuitij in tatitanilme de Jesús de ne cárcelijtic. <sup>22</sup> Huan cuac in tiopan mayolme ajsicque ya ne cárcelteno, ijcuacón quinnalixtemoayaj ne tatitanilme de Jesús pero amo aca quitacque oc ne cárcelijtic. De ompa nimantzin mocuepque campa in tiopan huan quinmatiltijque in tayecanani de toni mochihuac. <sup>23</sup> Huan quinilijque ijcuín:

—Cuac tejuan tiajsicque, ijcuacón ticajsitoy in cárcel yec tatzactoc. Huan in soldados yejuan tiquinajsitoy calteno tajpixtocque. Pero cuac tejuan tictapouque ya in puertas, ijcuacón amo aquen ticajsicque.

<sup>24</sup> Huan in tayecanque tiopixcat huan tayecanque mayol den tiopan huan in ocsequin tayecanani tiopixcame, yejuan nojonques cuac quicacque nijín tanojnotzalis, ijcuacón motatajoltiyaj toni mochihuac ya huan toni mochihuati oc porín amo yetoyaj ne tatitanilme de Jesús. <sup>25</sup> Huan nimampa huala se mayol huan quinilico ijcuín:

—Ne taca ten namejuan nanquintzacuacque yalao queme presos tech in cárcel, yejuan nojonques axcan yetocque ne tiopanijtic huan quinmactijtocque in tagayot.

<sup>26</sup> Ijcuacón in tayecanque soladado quinuiyac in tiopan mayolme huan yajque tiopanijtic huan quincuitoy in tatitanilme de Jesús. Huan cuac quinquitizquijque ya, ijcuacón amo quinojcojque porín in mayolme quinyolmohuiliaya que in tagayot quintepoxonisquíaj yejuan in mayolme. <sup>27</sup> Huan cuac quinalicque ya, ijcuacón quinquetzque in tatitanilme de Jesús ne ninixpan nochi in tayecanani de pueblojuani Israel. Huan de ompa in tayecanque tiopixcat quinilij in tatitanilme de Jesús ijcuín:

<sup>28</sup> —Tejuan ipa tamechtacahualtijcaj ya que ma amo ay xitamachtijtinemican oc itencopaca itocaytzin de ne Jesús. Huan xiquitacan ten nanquichiuque ya, namejuan nanquinmatiltijque ya nochi in pueblojuani de nican Jerusalén den namotanextililis. Huan namejuan nanquinequij nantechtajtacoltisque den miqulilis de ne tagat Jesús.

<sup>29</sup> Ijcuacán in Pedro huan in tatitanilme de Cristo quinnanquilijque in tayecanani ijcuín:

—Pero tejuan semi monequi que ma tictacamatican Totajtzin Dios huan ma amo ocho tiquintacamatican in tagayot. <sup>30</sup> Totajtzin Dios, Yejuatzin quinpanquixtij Jesús yoltoc intzalan in ánimajme. Pero Yejuatzin ne namejuan nanquimictijque cuac nanquicuoupampilojque. <sup>31</sup> Pero Totajtzin Dios quipanquixtij ya Jesús yoltoc huan quitayecancaquetzac ya ne iyecmacopaca campa ihuelilispan. Huan Totajtzin Dios quitalij ya Jesús queme hueyi tayecanque huan no quitalij Jesús queme Temaquixtijque. Huan ijcón Dios quichihuac para huelis in pueblojuani de Israel moyolnemilisque de nintajtacoluan para ijcón Dios quintapojpoluilis de nintajtacoluan. <sup>32</sup> Huan tejuan tiquitacque ya nochi nijín ten tictetajtohuiltfaj que melau ijcón mochihuac. Huan ijcón in Yecticatzin Espiritu no quintetajtohuiltfaj in tacaquini que ijcón mochihuac. Huan Totajtzin Dios quinmactilijtiyás ica in Yecticatzin Espiritu neques ten quitacamatinemisque Yejuatzin.

<sup>33</sup> Huan cuac in tayecanani judfós quinququilijque ya in tajtolme den tatitanilme de Jesús, ijcuacán cachi oc moyolcualantijque huan hasta quinequíaj quinmictisque. <sup>34</sup> Huan ompa inuan in tayecanani yetoya se tagat fariseo ten monotzaya Gamaliel, yejua catca se tanextilijque den tanahuatil de Moisés. Huan yejua ne in tagayot semi quicualtagaitayaj. Ijcuacán ne Gamaliel moquetzac intzalan ocsequin tayecanani huan tanahuatij ma quinquixtican in tatitanilme de Jesús se tepitzin san. <sup>35</sup> Huan de ompa in Gamaliel quinilij in ocsequin tayecanani ijcuín:

—Namejuan nantayecanani den pueblojuani de Israel. Xiquitacan huan xictalican cuidado ten nanquinchihuilitij nijín taca. <sup>36</sup> Porín xiquelnamiquican san que ne quemanían ya nemico se tagat ten mochihuac tayecanque, yejua ne ten monotzaya Teudas. Huan yejua mopohuac huan quijtojinemía que semi hueyi chiuque. Huan yejua quinuicatinemía nahui ciento isoldados. Pero yejua amo huejcahuac. Ta, niman quimictijque huan quinixcomoyauque nochi isoldados ten quitacamatinemíaj. Huan ijcón nochi quintamijque. <sup>37</sup> Huan nimampa nemico ocsé tagat tech ne tonalme cuac quinpoutoya nochi in pueblojuani de Israel. Huan ne Judas mochihuaco tayecanque ten hualehuac Galileajcopaca. Huan no quinuicatinemía míac tagayot. Pero yejua no quimictijque huan ijcón nochi in tagayot ten quitoclijtinemíaj, yejuan nojonques mosesecocauque. <sup>38</sup> Ica ya nojón namejuan namechilía que xiquincahuacan nijín taca presos huan amo ximocalaquican de nintaneltoocalis. Porín tacán nijín taneltoocalis hualeutoc de taca san, ijcuacán nochi nijín sayó tajtamis san. <sup>39</sup> Pero tacán nijín taneltoocalis hualeutoc de Dios, ijcón namechilía que namejuan amo huelis nanquitamisque. Xictalican cuidado porín achá nanmoajsitinemij que nanquixnamictinemij Totajtzin Dios.

<sup>40</sup> Huan ijcón nochi in tayecanani mocauque huan moyolpoxauque. Huan de ompa ocsepa quinnotzque in tatitanilme de Cristo huan tatitanque ma quinitequican san. Huan no quintacahualtijque que ma amo ay cachi oc tanojnotztinemican oc ica in tocaytzin de Jesús. Huan ijcón quincajcauque ma yajcan. <sup>41</sup> Huan ijcón in tatitanilme de Jesús quisteuque inixpan ne tayecanani. Huan yajque moyolpactijtiyajque, porín Totajtzin quincahuac que ma ijcón quijyohuican huan ma quinpinautican porín yejuan ay tanojnotztinemij ica ne tocaytzin de Jesús. <sup>42</sup> Huan nijín tatitanilme de Jesús amo quemán mocauque que ma amo tamachtican huan tano-

jnotzacan de que Jesús Yejuatzin Cristo Temaquixtijque. Ta, yejuan mosta mosta ijcón quichiutinemíaj nepa tiopanijtic huan itech calpan.

**Nican in taneltocani quijitacque chicome taca  
ma quichihuacan in tequit de tiopan huehuentzitzin**

**6** Huan tech nojón tonalme cachi oc imomachtijcahuan calactiyayaj tech in taneltocalis de Jesús. Huan ne tocnihuan ten tajtoayaj griegos, yejuan peuque quini-jitoaj in tocnihuan ten tajtoayaj hebreo, huan quiniliayaj ijcuín:

—Ne tocnihuan sihuacahualme den tajtoaj hebreo, yejuan nojonques cachi oc mosta quinyectamacaj. Huan amo quinyectamacaj ne tocnihuan sihuacahualme de tajtoaj griegos. Quijtosnequi que ne sihuacahualme hebreos, yejuan cachi quiselij-tocque tacualis mosta mosta cuac quinxexelohuilfaj in tacualis.

<sup>2</sup>Huan ijcón ne majtactionome tatitanilme de Jesús, yejuan quinsentilijque nochi in momachtiani de Jesús huan quinilijque ijcuín:

—Tamechilíaj que amo cualtía que ma tejuan ticahuacan de titetapohuitzine-misque den Tajtoltzin de Dios que ma tejuan tiquinxexelohuilican in sihuacahualme ica tacualis. <sup>3</sup>Ica ya nojón tamechilíaj, tocnihuan, que xiquinijitacan chicome taca den namejuan nantaneltocani namotzalan. Huan monequi que nochi in tocnihuan ma tacuatamatican ihuan nojón chicome taca. Huan no monequi que nojón chicome que ma cuali cuautamatcanemican. Huan no monequi ma yec yolpepexocatinemican ica in Yecticatzin Espíritu. Huan cuac namejuan nanquinijitasque ya ne chicome, ijcuación tiquintequimactisque ma quixexelocan ne tacualis. <sup>4</sup>Huan tejuan ticsentocati timotatautilitij ihuan Dios, huan titamachtijtinemisque ica in Tajtoltzin de Dios.

<sup>5</sup>Huan nochi in tocnihuan cuelitacque queme quicacque. Huan ijcón quijitacque Esteban, se tagat ten yec ajsica tacuautamatía ihuan Jesús huan no yec yolpepexocatoya ica in Yecticatzin Espíritu. Huan no quinijitacque nijín ocsequin tiopan tapalehuiani queme Felipe, huan in Prócoro, huan no Nicanor, huan Timón, huan Parmenas. Huan no quijitacque Nicolás, se tagat ten pohuíaj campa pueblo Antioquía. Yejua ne achtopa ya taneltocaya queme judíos huan de ompa tacuautamatic ihuan Cristo. <sup>6</sup>Huan ijcón niman quinuiyacque nijín chicome taca campa yetoya in tatitanilme de Jesús. Huan de ompa motatatautilijque ica por yejuan huan ijcón quinquimactijque cuac quincumapachojque. <sup>7</sup>Huan ijcón in Tajtoltzin de Dios quitetapohuijtijayque huan quimoyautiyayaj nohuuyampa. Huan cachi oc in taneltocani de Jerusalén momiactiltijtiayaj. Huan hasta no míac tiopixcame den judíos motemactijque tech ne tacuautamatilis den ocsequin taneltocani de Jesús.

**Nican tajtoa de queniu quiquitzquijque queme preso in Esteban**

<sup>8</sup>Huan Totajtzin Dios quihueyiyolpepexocaltij ne Esteban ica in neteicnelilis. Huan no Dios quimacatoya huelilil para ijcón quichiutinemi míac nescayome huan míac mohuiscatequime intzalan in pueblojuani. <sup>9</sup>Ijcuación sequin judíos mosentilijque, yejuan de pueblojme de Cirene, huan de Alejandría, huan de Cilicia, huan de país de Asia. Huan no inuan yetoyaj ocsequin judíos ten pohuíaj tech in tiopan ten monotza “Tequitini ten amo tanamacme oc”. Huan yejuan nojonques moquetzque huan motajtoltehuíaj ihuan ne Esteban. <sup>10</sup>Pero amo huelíaj quitanilisque ne Esteban porín yejua tajtoaya ica in tamachilisme den Yecticatzin Espíritu ten quimactilijtoya.



<sup>11</sup> Ijcuacán ne judíos quinichtacataxtahuijque ocsequin taca para ma yejuan qui-  
jtojan que melau tensá quicaquilijque que in Esteban ica itajtoluan quimohuis-  
polaoya in Moisés huan Totajtzin Dios. <sup>12</sup> Huan ijcón nojón judíos quinyolcuejmolo-  
jque nochi in pueblojuani judíos huan no in huehuentzitzin den pueblojuani huan  
in tanextiliani den tanahuatil de Moisés. Ijcuacán nojón judíos santajma quichtac-  
ahuitoj in Esteban huan quiquitzquijque huan cuiyacque. Huan de ompa yajqui  
quitenextilitoj inixpan in cachi hueyi tayecanani den pueblojuani judíos. <sup>13</sup> Huan no-  
jón judíos no quintemojque sequin taca para ma quipajpantican ica ten amo melau  
in Esteban. Huan ijcón ne tateluiliani quiytoayaj ijcuín:

—Nijín tagat Esteban quisentoca quimohuispoloa nijín tochipaucatiopan huan no  
quiquejquelo a in tanahuatil de Moisés.

<sup>14</sup> Pero ne tateluiliani quiytoayaj ica xolopijyot ijcuín:

—Tejuan ticaquiliayaj ne Esteban cuac quiytoaya que ne Jesús de Nazaret hualas  
nican para cuejueloqui ni jín totiopan. Huan no quiytoaya que hualas ne Jesús para  
techpatiliqui in tanahuatilme ten Moisés techcahuilijtehuac ya.

<sup>15</sup> Ijcuacán nochi in tayecanani huan nochi ten inuan tocotzyetoyaj, cuac nochi  
yejuan quitacque in Esteban, ijcuacán quitayaj iixco Esteban queme se ángel taque-  
hual de Dios.

### Nican in Esteban motajtoltenpalehuía inixpan in tayecanani

**7** Huan ijcón in tayecanque tiopixcat quitajoltij Esteban ijcuín:

—¿Xe melau nochi nijín ten mitzpajpantíaj?

<sup>2</sup> Ijcuacán in Esteban quinanquilij ijcuín:

—Namejuan nantaca de Israel, nantocnihuan huan nantetatme, xinechoncaquili-  
can. Totajtzin Dios monextij ica ichicaucahuelilis iixpan tohuejcautat Abraham cuac  
yejua calyetoya oc campa país de Mesopotamia, achtopa que Abraham yas calyetotiu  
tech in pueblo Harán. <sup>3</sup> Huan Yejuatzin quilij Abraham ijcuín: “Xicautehua ya mop-  
ueblo huan nochi mochanchahuan huan xiyó xicalyetoti campa ne pueblo ten Neju-  
atzin nimitznexiliti”. <sup>4</sup> Ijcuacán in Abraham quicautehuac ne Mesopotamia campa  
calyetoya intzalan in pueblojuani de Caldeos, huan yajqui calyetoto campa pueblo  
Harán. Huan cachi satepan miyic itat de Abraham. Huan de ompa Totajtzin Dios  
cualcuic Abraham nican tech nijín país de Israel campa nancalyetocque axcan.

<sup>5</sup> Pero Totajtzin Dios amo quicahuilij Abraham ma nican quipía talme, huan amo  
no ma quipiani can mometztalis. Pero Totajtzin Dios, quema, moyectencahuac ihuan  
in Abraham que se tonal quimactilis nijín tal. Huan no Totajtzin Dios moyectenc-  
ahuac que quinmactilis nijín tal iconahuan de Abraham satepan cuac miquis ya  
yejua, masqui tech nojón tonalme Abraham ayamo quipiaya coneme. <sup>6</sup> Huan no  
Dios quilij Abraham ijcuín: “Mopiluan huan nochi moixuihuan, yejuan nojonques  
calyetotihue tech ocsé país campa ipa amo poutinemij. Huan tech nojón pueblo quin-  
piasque queme tequitini ten tanamacme. Huan ompa quintajyohuiltisque ca tequit  
para nahui ciento xihuit”. <sup>7</sup> Huan in Totajtzin Dios no quilij Abraham ijcuín: “Pero  
Nejuatzin niqinixcomacas huan niqintatzacuiltis ne pueblojuani de Egipto, ne  
naquen namechtajyohuiltisque queme tequitini ten tanamacme namejuan nannop-  
ueblojcahuan. Huan satepan nopueblojcahuan de Israel quicautehuasque ne país de  
Egipto huan nechmohuistiliquihue nican tech nijín tepet”.

<sup>8</sup>Huan ijción Totajtzin Dios moyectencahuac ihuan Abraham huan no quimac-tilij se nescayot tenica ixnesis que melau Yejuatzin moyectencahuac ya. Huan in nescayot yejua nijín: Ma tiquinnescayotican tech ninnacayo in oquichpilconeme den pueblojuani Israel para ixnesis ya que melau yejuan poutinemisque ihuan Dios. Ica ya nojón in Abraham cuac quipíac niconeu Isaac ipan chicueyica de yolic, ijcuación quinescayotijque. Huan in Isaac cuac no quipíac niconeu Jacob, no ijción quichihuac de quinescayotijque tech ninacayo. Huan in Jacob no ijción quichihuac cuac no quinpíac nojón majtactionmomen iconehuan ten mochihuacoj in tetatme de ne majtactionmomen calyetoní de Israel.

<sup>9</sup>Huan no in Esteban quinilij in tacaquini ijcuín:

—Huan ijción nojón majtactionmome teconejuan de Jacob, yejuan mochihuacoj ten axcan tohuejcautatuan. Huan yejuan nojonques quinyolnejxicolijque ninicniu José. Ica ya nojón quinamacaque José para ma cuiyacan campa país de ne Egipto. Pero Totajtzin Dios ipa ihuan yetinemía in José. <sup>10</sup>Huan ompa Egipto Dios quimaquixtij José tech nochi itajyohuilisuan huan quiyolpexontij ica tamachilisme ten melau. Huan Dios quichihuac que in Faraón, yejua in rey de Egipto, ma tacuautamati ihuan José. Huan ompa Faraón quijitac José huan quipohuac ma tequiti queme tayecanque den pueblojuani egipcios huan no queme tayecanque tech ichancahuan den rey Faraón. <sup>11</sup>Huan mochihuac hueyi máyanti huan huel míac tajyohuilis tech in pueblojme de Egipto huan de Canaán. Huan ijción tohuejcautatuan amo cajsíaj oc toni cuasque. <sup>12</sup>Pero cuac in Jacob quimatic ya que ongaya toni cuasque tech ne país de Egipto, ijcuación yejua quintitanic itelpocahuan ica se viaje ma yacan ompa. Huan ne itelpocahuan de Jacob, yejuan nojonques mochihuacoj tohuejcautatuan. <sup>13</sup>Huan cuac ica ojpa yajque ne itelpocahuan de Jacob, ijcuación in José moteixmatiltij ihuan iicnihuan. Huan ijción in rey Faraón quimatico de can pohuij in José huan ne iicnihuan. <sup>14</sup>Ijcuación in José tatitanic ma quincuitij itat Jacob ihuan nochi ichancahuan. Huan ne ichancahuan de Jacob ten yajque Egipto catcaj queme eyipoal huan caxtol tagayot. <sup>15</sup>Huan ijción mochihuac que yajque in Jacob calyetoto campa pueblo Egipto. Huan satepan ompa momiquilij. Huan no campa ne pueblo de Egipto no ijción momiquilijque nochi tohuejcautatuan. <sup>16</sup>Huan ijción satepan quihuiquillijque inacayo de Jacob campa ipa italpan catca in Jacob ten monotza Siquem. Huan ijción ompa campa Siquem quitalpachojque Jacob tech ne talcomit, ne ten Abraham quicohuilijca ya ne achtopa ya de niconeuan de Hemor ica platajtomín.

<sup>17</sup>Huan motamichihuaco ya ne tenilil tenica Dios moyectencahuac ya ihuan Abraham de quinpalehuis ipueblojcahuan tech ne país de Egipto. Yejuan momiac-tilijque huan mochiuque huel míac tagayot. <sup>18</sup>Pero mochihuac tech ne país de Egipto que pehuac tayecana ocsé tayecanque rey ten amo quixmatía José de toni quichihuac. <sup>19</sup>Huan ne yancuic tayecanque rey nochi quincajcayahuac topueblojcahuan israelitas. Huan de ompa pehuac quintajyohuiltij ne tohuejcautatuan. Huan no quintanahuatilij tohuejcautatuan que ma yejuan quincalantamotacan huejca ninoquichpilconeuan ten yequin yolij para ma ijción miquican. <sup>20</sup>Huan tech nojón tonalme cuac ijción quichiutoya, ijcuación yolico Moisés. Huan Dios quipohuac ne conetzin que semi cualtzin. Huan in tetatuan quiscaltijtoyaj eyi metztica tech ninchan. <sup>21</sup>Huan cuac ejcoc in tonal que nijín tetatme monequía quiseccocahuasque niconeu para ma miqui, ijcuación yejua in sihuapil den rey de Egipto quiajocuic Moisés huan cuiyac ichan. Huan ompa quiscaltito queme yesquía iconeu. <sup>22</sup>Ica ya nojón in Moisés

quimachtijiyajque míac tataman tamachilis ten huelíaj in egipcios. Ica ya nojón Moisés quipíac míac ne yolchicahualis tech nochi ten quichihua huan de nitajtol.

<sup>23</sup> Huan ijcón cuac Moisés quimajxitij ya omepoal xihuit, ijcuacón quiyolnemilij quincalpanotiu ichancahuan ne pueblojuani de Israel. <sup>24</sup> Huan ompa quitac Moisés que se tagat egipcio quitajyohuiltiaya se tagat de pohuij Israel. Huan melau ijcón Moisés quinequía quipalehuis iicniu israelita. Huan quinequía quixtahualtis ne egipcio ijcón queme yejua temagac ya. Huan ijcón in Moisés quixtahualtij hasta quimictij ne tagat egipcio. <sup>25</sup> Huan ijcón quichihuac in Moisés porín yejua ipa quiyolnemiliaya que iicnihuan ne pueblojuani de Israel ijcón cajsicamatisque que Totajtzin Dios quinmaquixtisquía tech ne nintajyohuilis ica por ne Moisés. Pero in pueblojuani Israel amo ijcón cajsicamatque. <sup>26</sup> Huan imostica in Moisés quinajsito ome iicnihuan de israelitas ten yejuan no motehuijtoyaj. Huan Moisés quinequía quinxejuelos huan quinoyoltalis. Ica ya nojón Moisés quinilij ijcuín: “¿Xe namejuan amo nanicnime? ¿Queyé namejuan san nanmocojcojtocque se huan ocse?”

<sup>27</sup> Ijcuacón ne tagat ten quitehuijtoya ne icniu quixacatopehuac Moisés huan quilij ijcuín: “Huan tejua, ¿toni motequiu? ¿Aconi mitzualtitanic tejua queme tayecanque huan queme taixejecojque para titechtaqhualtis tejua?” <sup>28</sup> ¿Xe tejua no ticnequi tinehmictis nejua, ijcón queme ticmictij yaloa ne tagat egipcio?”

<sup>29</sup> Huan cuac Moisés quicaquic nijín tajtolme, ijcuacón choloj huan yajqui cayetoto tech in pueblo de Madían. Huan ijcón ompa tepalyetoya sequi xiume huan ompa quiniscaltij ome iconehuan. <sup>30</sup> Huan cuac panocque ya ome poal xihuit, ijcuacón Moisés moajsic campa taiucan amo huejca de ne tepet ten monotza Sinaí. Huan ompa monextijtzinoco iixpan Moisés se ángel taquehual de Dios. Huan in ángel monextij itzalan in tit campa nesic que tatatoya se huitzcuoutactzon. <sup>31</sup> Ijcuacón in Moisés quitetzaucatac. Huan cuac motoquito para quieyequitas, ijcuacón quicayic se tajtolis den Totecotzin Dios ten quiytoaya ijcuín: <sup>32</sup> “Nejuatzin ya niin Dios de mohuejcautuan. Huan nii Dios de Abraham, huan nii Dios de Isaac, huan nii Dios de Jacob”.

Ijcuacón in Moisés semi moyolmoutiaya huan amo moixehuía oc de quitas. <sup>33</sup> Huan in Totecotzin Dios ocsepa quilij ijcuín: “Ximometzquixtili motegacuan, porín campa timetzijcatoc, yejua tamohuisyojcan. <sup>34</sup> Porín yec melau Nejuatzin niquinyequitilijtoc ya nintajyohuilis de nopueblojcahuan Israel ten yetocque Egipto. Huan no niquincaquilijtoc ninyolnejsihuilis. Ica ya nojón nitemoc de eluiyac para niquinmaquixtis. Xiquita san, que axcan Nejuatzin nimitztitaniti que xiyó ocsepa ne campa país Egipto”.

<sup>35</sup> Huan no Esteban quinilijtoya in tayecanani ijcuín:

—Pero in pueblojuani Israel quixtopeuque Moisés huan quilijque ijcuín: “¿Aconi mitztalij tejua queme titotayecancau huan queme titotaixejecojcay?” Pero Totajtzin Dios quititanic Moisés queme tayecancaque para quinmaquixtis ipueblojcahuan Israel. Huan nochi nijín Dios quichihuac ica itencopaca ne ángel taquehual de Dios ten monextico ica tit campa ne huitzcuoutactzon. <sup>36</sup> Huan yejua ya ne Moisés quincuito tech in Egipto nochi ne tohuejcautuan. Huan ijcón in Moisés quichiutinemía mohuiscatequime huan huejueyi nescayome tech ne país Egipto. Huan no quichihuac mohuiscatequime campa ne hueyíat ten quilíaj chichilat. Huan no quichiutinemía mohuiscatequime tech nojón omepoal xihuit cuac nejnentoya in pueblojuani de Israel ne campa tayiucan. <sup>37</sup> Huan yejua ne Moisés quinilij in pueblojuani

de Israel ijcuín: “Totajtzin Dios namechualtitanilis se tanahuatijque ten Yejuatzin quijitas namotzalan, ijcón queme Totajtzin Dios nechijitac nejua ni Moisés. Huan namechilía que xicyecaquilican ne tanahuatijque ica nochi míac tataman namechnojnotzas”.<sup>38</sup> Yejua ya nijín Moisés inuan nentinemía in pueblojuani de Israel campa ne taiucan. Huan ne ángel taquehual de Dios, yejua ne quinojnotzac Moisés huan no quinojnotzac tohuejcautatuan campa ne tepet Sinaí. Huan no ompa Moisés quiselij ne tajtolme ten cualcui nemilis para techmacas tejuan no.

<sup>39</sup> Pero tohuejcautatuan amo quinecque quitacamatisque Moisés. Ta, yejuan sayó quixtopeuque seco in Moisés huan ocsepa voltanemiliayaj que mocuepasque Egiptojcopaca.<sup>40</sup> Huan cuac Moisés yetoya tepecuaco quinojnotzoya Dios, ijcuacán in pueblojuani de Israel quilijque in Aarón ijcuín: “Tejuan ticnequij que xitechchijchihuili sequi tatadiosme para ma yejuan techyecantiyasque. Porín ne Moisés ten techualquixtito de Egiptojcopaca, amo ticmatij toni ipan mochihuac”.<sup>41</sup> Ijcuacán quichijchiuque se tatadios queme se cuacuouconet. Huan de ompa quinmictijque sequín tapialme para ica quimohuistilisque ne cuacuoutatadios. Huan ijcón ne pueblojuani Israel moyolpactijtiyayaj ica ne nintamachijchiu.<sup>42</sup> Ijcuacán Totajtzin Dios quinsecocahuac nipueblojcahuan Israel huan quincahuilij ma quimohuistilican nochi in sitalinme de ne ejecaixco yetocque. Huan quijcuiloj de yejuan in tanahuatijque de Dios tech in Tajcuilolamatzin ijcuín:

Namejuan nanopueblojuani de Israel, amo melau nanquinmictijque tapialme para nannechmohuistilijque Nejuatzin,  
cuac nannejnentoyaj omepoal xihuit ne campa taiucan

<sup>43</sup> Pues amo melau que nannechmohuistilijque Nejuatzin. Ta, namejuan nancuicayaj ne tapialme para nanquimohuistilisque namotatadios ten monotza Moloc campa itiopan.

Huan no nanquimohuistilijtiyaya ne tatadios de sitalin ten monotza Renfán.

Huan namejuan nanquinchijchiuque míac tataman tatadiosme para nanquimohuistilijtinenque.

Ica ya nojón Nejuatzin namechquixtiti de namopueblojcopaca para ijcón namechuicas queme presos cachi huejca de ne país de Babilonia.

<sup>44</sup> Huan Esteban no quinilij in tacaquini ijcuín:

—Cuac nejnentoyaj ne tohuejcautatuan de campa taiucan, ijcuacán yejuan quipixtinenque ne tiopan mantiadajcal campa quiehuayaj ne májtacti teme campa ijcuilicutoc in tanahuatil de Dios. Huan quichijchiuque ne tiopan mantiadajcal ijcón queme Dios quinajnahuatilij Moisés. Huan Moisés quichijchihuac ne tiopan mantiadajcal ijcón queme Dios quinextilij cuac quinojnotztoya ne tepepan de Sinaí.<sup>45</sup> Huan tohuejcautatuan quiselijque de Moisés nijín tiopan mantiadajcal huan cuicatinenque hasta cuac calacque tech nintal ten mochihuaco axcan país de Israel. Huan in tayecanque Josué ihuan nipueblojcahuan de Israel quitecuilijque ne tal ten poutoyaj ihuan ocsequin pueblojuani. Huan Totajtzin Dios quinquixtij ne ocsequin ne pueblojuani para ijcón huelis calacque tohuejcautatuan. Huan ijcón Dios quinmactilij nojón tal ipueblojcahuan. Huan ijcón yejuan quipixtinenque ne tiopan mantiadajcal hasta in tonalme cuac nemico in rey David.<sup>46</sup> Huan Dios quicualtagaitac in rey David huan quihueyipanchihuac porín ne David quinequía quichijchihuas se hueyi tiopan campa huelis yetinemis Totajtzin ne ten i Dios de Jacob.<sup>47</sup> Pero in rey David amo quichijchihuac. Ta, Salomón quichijchihuac ne hueyi tiopan de Dios.<sup>48</sup> Pero To-

tajtzin Dios Yejuatzin in cachi hueyi chiuque. Huan Yejuatzin amo calyetotinemi tech tiopan tamachijchiume. Ica ya nojón quijtoj ne tanahuatijque tech in Tajcuilolamatzin ijcuín:

<sup>49</sup> Huan quijtoa Totecotzin que ne eluiyactzinco yejua ne campa nohuelilispán.

Huan nijín talticpac sayó campa nimometzquejquetzoc san.

¿Toni taman cali nannechchijchihuilij? quijtoa Totecotzin. Huan, ¿canica huelis nimosehuis?

<sup>50</sup> ¿Xe amo Nejuatzin nicchijchihuac nochi míac tataman ten tamachijchiu ya de nican talticpac? Pues quema.

<sup>51</sup> Huan no Esteban quinilijtoc in tayecanani oc ijcuín:

—Pero namejuan ipa semi nanyolpipictique. Huan in Tajtoltzin de Dios amo calaquí tech namonacasuan nión no tech namoyolijtic. Huan namejuan nachipa nanquixtopeutinemij in Yecticatzin Espíritu. Huan ijcón queme quichiutinenque ne namohuejcautatuan, no ijcón namejuan nanquichiutinemij axcan. <sup>52</sup> Huan namohuejcautatuan yejuan nojonques quintajyohuiltijque ne huejcautanahuatiani de Dios, catiyejua ten yesqui. Huan no namohuejcautatuan quinmictijtihualajque in tanahuatiani de Dios, neques ten tanejmachtiajay desde ne achtopa ya que hualasquía ne Cristo in Yolmelahuactzin. Huan axcan hualajca ya ne Cristo. Pero namejuan nanquitamactijque inmaco in tayecanani huan quimictijque. <sup>53</sup> Huan namejuan nantayecanani de pueblojuani de Israel, nanquiselijque in tanahuatil de Dios ica intencopaca in ángeles taquehualme de Dios pero namejuan amo nanquitacamati.

### Nican tajtoa de queniu quimictijque in Esteban

<sup>54</sup> Huan cuac in tayecanani quicacque nochi nijín tajtolme, ijcuacán mohueyiyolcualantiyajque hasta tananatzocayaj porín semi quihueyitahuelitayaj ne Esteban.

<sup>55</sup> Pero in Esteban yec yolpexocatoya ica in Yecticatzin Espíritu huan ajco tachíac ne eluiyactzinco. Huan ompa conitac de nicualtziyo de Totajtzin Dios. Huan no conitac Jesús ijcatoca campa ne ihuelilispán de iyecmacopaca Totajtzin Dios. <sup>56</sup> Ijcuacán Esteban quinilij in tayecanani ijcuín:

—Xiquitacan san, nejua niqiztoc ne eluiyactzinco que tatapotoc ya. Huan niconitzoc in Jesús in Yectagatzin ten ijcatoc campa ne huelilispán de iyecmacopaca Itajtzin Dios.

<sup>57</sup> Huan cuac in tayecanani quicacque nochi nijín tajtolme, ijcuacán monacastzajtzacuacque huan tzajtzíaj chicahuac. Huan sepan san motalojteuque huan quiquitzquijque Esteban. <sup>58</sup> Huan ijcón cuiyacque calampa ten tepancolal de Jerusalén huan ompa quitepoxonijque Esteban. Huan cuac quitepoxonijque ya Esteban, ijcuacán yejuan moquixtilijque intilmajuan huan quicahuilijteuque imaco se tagat ten monotza Saulo. <sup>59</sup> Huan cuac ne Esteban quitepoxonijtoyaj ya, ijcuacán yejua motatatautiliaya ihuan Dios ijcuín:

—Totecotzin Jesús, nimitzontatatautilía que xiconseli noanimajtzin.

<sup>60</sup> Huan de ompa in Esteban motancuaquetzac huan tzajtzic chicahuac huan quilij ijcuín:

—Totecotzin, amo xiquintechti que yejuan tajtacolejque nijín taca.

Huan cuac Esteban quitamijtoj ya nijín tajtolme, ijcuacán momiquilij.

### Nican Saulo quintajyohuiltij in tocnihuan taneltocani

**8** Huan nijín Saulo no ijcón itanejnequilis catca de ma quimictican in Esteban. Ica ya nojón Saulo tech ne tonal peuque quintajyohuiltía nochi in taneltocani ten calyetoyaj Jerusaléncopaca. Huan nochi in tocnihuan taneltocani mochololtijque huan momoyauque campa Judeajcopaca huan Samariajcopaca. Pero ne tatitanilme de Cristo mocauque Jerusaléncopaca. <sup>2</sup> Huan sequin taca judíos ten yec yolchipauque, yejuan nojónques quitalpachotoj inacayo in Esteban huan miacque tagayot mochoc-tiyaj ica por Esteban. <sup>3</sup> Huan cuac quitalpachotoj ya Esteban, ijcuacón in Saulo pehuac tel senca quintajyohuiltiaya in taneltocani. Huan ne Saulo quintitanic in mayolme ma calactinemican cali por cali campa yetoyaj in taneltocani taca huan si-huame. Huan ompa quincalanquixtiayaj huan quintitlatzayaj huan quintemactiyaj inmaco in tayecanani para ma quincalaquican tech in cárcel.

### Nican tanojnotztinémaj in taneltocani campa ne Samariajcopaca ica in Tajtoltzin de Dios ten cualcui ne nemaquixtilis

<sup>4</sup> Huan nochi ne taneltocani mochololtijque den calyetoyaj ne Jerusalén, yejuan nojonques peuque tanojnotztinencue ica in Tajtoltzin de Dios nohuyampa campa moajsáj. <sup>5</sup> Ijcuacón in Felipe, yejua catca senme de tiopan tapalehuiani, yejua ya-jqui tech se pueblo campa Samariajcopaca huan ompa pehuato tanojnotztinemi que Cristo Jesús Yejuatzin in Temaquixtijque. <sup>6</sup> Huan ijcón in pueblojuani de Samariajcopaca mosentilijque huan quiyecaquiliayaj ica yolpaquilis tenica quinnojnotzaya in Felipe. Huan ijcón in tagayot nochi quitecaquiliayaj huan quitztoyaj nochi ten Felipe quichiutoyaj cuac yejua quinnextilijtoya huejueyi mohuiscatequime de Dios. <sup>7</sup> Huan in Felipe quinpahtiaya miac tagayot ten quiplayaj ninyolijtic amocuali ejecame. Huan ne amocuali ejecame cuac quisayaj intech nojón cocoyani, ijcuacón chicahuac tzajtziáj. Huan in Felipe no quinpahtiaya miac tagayot cocoyani ten nitacayo melaxtiayaj huan no quinpahtiaya sequin cocoyani de coxoyme. <sup>8</sup> Huan queme ijcón quichiutinemía Felipe, ica ya nojón nochi in pueblojuani de Samariajcopaca mohueyiyolpactiyaj.

<sup>9</sup> Huan tech ne tonalme nemía se tagat ten monotzaya Simón. Yejua tenahualuiaya tech ne pueblo huan quinmomoutiaya huan quincajcayautinemía ne pueblojuani de Samaria. Huan yejua ay quitetapohuiaya que yejua cachi hueyi chiuque. <sup>10</sup> Huan nochi in tagayot quiyecaquiliayaj ne Simón masqui coneme huan huejueyi taca, huan yejuan quiytoaya ijcuín:

—Nijín tagat Simón, yejua quipía hueyi chicahualis de Dios.

<sup>11</sup> Huan in tagayot de Samaria quineltocquiliayaj ne Simón, porín ica inahualo yejua quinmomoutiaya huan quincajcayautinemic in tagayot ipan miac tonalme. <sup>12</sup> Pero in Felipe quinnojnotzaya in pueblojuani de Samaria ica in chicahualis den tocaytzin de Jesucristo. Huan no quinmachtijtinemía de que Dios quimonequiltij-toc momasoutos ninyolijtic itaneltocacahuan ica ihueyichicahualis. Huan cuac in pueblojuani quicaquilijque in tanojnotzalis de Felipe, ijcuacón miac taca huan si-huame taneltocacque huan moteahuiltijque. <sup>13</sup> Huan ijcón ne nahual Simón no tanel-tocac huan pehuac quisehuicatinemi in Felipe porín yejua quitiliaya nochi in huejueyi nescayome huan mohuiscatequime ten quichiutinemía Felipe. Ica ya nojón in Simón quitetzaucaitaya nitequi de Felipe.

<sup>14</sup> Huan cuac in tatitanilme de Cristo ten yetoyaj Jerusaléncopaca quitecaquilijque que ne pueblojuani de Samariajcopaca que no quiselijque ya in Tajtoltzin de Dios, ijcuación yejuan quintitanque in Pedro huan Juan ma yacan ne Samariajcopaca. <sup>15</sup> Huan ijcón cuac ajsicque ya in Pedro huan Juan, ijcuación yejuan tatatautijque ica por ne taneltocani de Samariajcopaca para ma yejuan no ma quiselican in Yecticatzin Espíritu. <sup>16</sup> Huan ijcón quichiuque porín ayamo hualaya in Yecticatzin Espíritu mosehuiqui tech ninyolijtic neques taneltocani de Samaria. Ta, yejuan yequin moteahuiltijque ica in chicahualis den tocaytzin de Totecotzin Jesús. <sup>17</sup> Ica ya nojón in Pedro huan Juan quincumapachoayaj nijín taneltocani huan ijcón Totajtzin Dios quinyolpepexocaltij ica in Yecticatzin Espíritu.

<sup>18</sup> Huan ne nahual Simón quitaya que in Yecticatzin Espíritu hualaya cuac in tatanilme de Cristo quincumapachoayaj in taneltocani. Ica ya nojón yejua quindenilij tomin in Pedro huan Juan. <sup>19</sup> Huan quiniliayaj ijcuín:

—Nejua no xinechonnaquiltican de nojón chicahualis de nanquipíaj para no ijcón mochihuas cuac nejua ni quincumapachos aquen yesqui, ijcuación ma no quiselican in Yecticatzin Espíritu.

<sup>20</sup> Ica ya nojón Pedro quilij Simón ijcuín:

—Nojón motomin ma ixpolihui huan tejua no xiixpolihui ihuan motomin. Porín tejua ticyolnemilía que huelis ticohuas ca tomin nijín chicaucahuelilis ten Dios quitemaca. <sup>21</sup> Tejua amo tipoutinemi tohuan nión no mitznamiqixiyetinemi tohuan porín tejua amo tiyecyoltanemilijtinemi queme Dios quimonequiltía. <sup>22</sup> Tejua Simón, ximoyolnemili de nijín motajtacol tenica tiyoltanemilijtoc. Huan xictatauti Totajtzin Dios para tiqitas cox Yejuatzin mitztapojpoluilis oso amo de nijín moyoltanemililis ten ticpixinemi. <sup>23</sup> Huan nimitzilía ijcón porín nimitzilitijtoc que pepexocatoc moyolijtic in tajtacol queme yesquía in chichicayot, huan ica por nojón pitzotic tamachilis in tajtacol mitzyoltzizicajtoc.

<sup>24</sup> Ijcuación in Simón tananquilij ijcuín:

—Ximotatautilican ihuan Totecotzin ica por nejua para ma amo teyi nopan mochihuas nochi nijín ten nannechilijque ya.

<sup>25</sup> Huan ijcón in tatitanilime de Jesús quitetapohuijtinemíaj nochi ten quitilijque in Totecotzin ten quichihuaco. Huan no tanojnotztinenque nohuiyampa de itatilanal de Samariajcopaca ica in Tajtoltzin de Dios ten cualcui ne nemaquixtilis. Huan de ompa yejuan mocuepque huan yajque Jerusalén.

### **Nican Felipe quinojnotzac se hueyi chiuque ten pohui campa país de Etiopía**

<sup>26</sup> Huan satepan cuac motamichihuac ya nochi nijín tequit tech in Samariajcopaca, ijcuación huala se ángel taquehual de Dios huan quilij in Felipe ijcuín:

—Nimantzin ximoquetztehua huan xiyó campa ne ojti ten hualeutoc campa Jerusalén ten hual temotoc campa in pueblo Gaza.

Huan nijín ojti panotoc campa tayiucan. <sup>27</sup> Ijcuación in Felipe moquetztiquisac huan yajqui ijcón queme quilij in ángel. Huan cuac in Felipe yaya tech in ojti, ijcuación cajsito se tagat tayecanque ten pohui den país de Etiopía. Yejua ne tagat catca se hueyi chiuque campa tayecanaya in sihuat tayecanque in reina ten monotza Candace. Huan ne tagat quinyecanaya nochi tomin nechicohuani den reina Candace. Huan yejua ne ten yajca ya Jerusalén para quimohuistilito Totajtzin Dios. <sup>28</sup> Huan nijín tayecanque yohui mocuepa ya ipueblojcopaca. Huan moquetzac nitapialuan ten

quititilatzayaj ne cuoucarro. Huan yejua motalij huan pehuac quileeroa in Tajcuilolamatzin den quijuiloj in tanahuatijque Isaías. <sup>29</sup> Ijcuacón in Yecticatzin Espíritu quiyolnojnnotzac Felipe ijcuín:

—Ximotoquiti campa ne cuoucarro huan xicpalehui ne tagat ten taleerojtoc.

<sup>30</sup> Huan cuac motalo huan motoquito in Felipe, ijcuacón quicayic que ne tayecanque quileerojtoya in Tajcuilolamatzin ten quijuiloco ne tanahuatijque Isaías. Ijcuacón in Felipe quitajtoltij ne tagat ijcuín:

—¿Xe ticonajsicamatilía de nojón tiquinleerojtoc?

<sup>31</sup> Huan in tayecanque quinanquilij ijcuín:

—¿Quenín huelis nicajsicamatis? Ta, amo aquen nechyecmejmela huilía.

Ijcuacón ne tagat quitatautij Felipe ma tejco tech in cuoucarro huan ma motaliti inacastan. <sup>32</sup> Huan in tayecanque quileerojtoya in Tajcuilolamatzin campa quijsa ijcuín:

Cuiyacque Yejuatzin para quimictisque queme yesquía se ichcatzin.

Huan ijcón queme in ichcatzin amo tzajtzi cuac quitequilíaj itojmiyo,

No ijcón Yejuatzin amo teyi quijsa cuac quimictijque.

<sup>33</sup> Huan in tagayot quimohuispolojque Yejuatzin.

Huan cuac quixcomagacque Yejuatzin, ijcuacón quitelchique nenca san.

Huan amo aquen huelis quinpohuasque canachinme nochi neques ten tacuautamatisque ihuantzin.

Huan ijcón mochihuas porín quicouppampilojque Yejuatzin,

Huan de ompa yajqui eluiyactzinco.

<sup>34</sup> Ijcuacón ne hueyi chiuque quitajtoltij Felipe ijcuín:

—Nimitztajtaniilía que xinechonili, ¿cox nijín tanahuatijque tajtoa de yejua san, oso tajtojtoc de ocsé tagat?

<sup>35</sup> Ijcuacón in Felipe quinojnnotzac ica nijín Tajcuilolamatzin de Isaías huan cajsi-camatiltij den yancuic Tajtoltzin de Jesús. <sup>36</sup> Huan cuac panotoya ya campa oncaya at, ijcuacón in tayecanque de Etiopía quilij Felipe ijcuín:

—Nican ongac at. ¿Xe amo huelis ma xinechahui tech nijín at?

<sup>37</sup> Huan ijcón in Felipe quilij ijcuín:

—Como titacuautamati ihuan Jesús ica nochi moyolo, nochi cuali huelis mochihuas.

Ijcuacón in tayecanque quinanquilij ijcuín:

—Quema, nicneltoque que Jesucristo Yejuatzin Teconetzin de Dios.

<sup>38</sup> Ica ya nojón in tayecanque de Etiopía tanahuatij ma moquetza in cuoucarro. Huan ijcón cuac moquetzac ya, ijcuacón temotiyajque hasta atenteno in omen, in Felipe ihuan in tayecanque. Huan de ompa in Felipe quiahuij ne tayecanque de Etiopía.

<sup>39</sup> Huan cuac panquisque ya den at, ijcuacón in Yecticatzin Espíritu de Totecotzin cuiyac Felipe. Huan ijcón in tayecanque amo quitac oc Felipe, pero yejua quisentocac nejnemic tech nicuoucarro huan yajqui yolpactiyá. <sup>40</sup> Huan in Felipe moajsito campa in pueblo ten monotza Azoto. Huan ijcón quichiutiyá Felipe panotiaya tech in pueblome huan ompa quitetapohuiaya in yancuic Tajtoltzin ten cualcui ne nemaquixtilis. Huan ijcón quichiutiyá hasta ajsito campa pueblo Cesarea.



## Nican Saulo moyolnemilij huan tacuautamatic ihuan Cristo

(Hch. 22.6-16; 26.12-18)

**9** Huan ijcón ne tayecanque judío Saulo amo quincahuaya in taneltocani de amo quintajyohuiltis. Ta, yejua quinequía quinmictis nochi neques ten tamachtijtin-enque ihuan Totecotzin. Ica ya nojón in Saulo yajqui quitato in tayecanque tiopixcat ten judíos. <sup>2</sup> Huan ompa in Saulo quitajtanilito tanahuatil para huelis ajsis campa pueblo Damasco huan tech in tiopanme de judíos ma quintemo nochi taca huan sihuame den taneltocatinenque tech in ojtzin de Dios. Huan de ompa ma quinquitzquican queme presos huan ma quiniuyacan Jerusalén. <sup>3</sup> Huan cuac yajtoya ya in Saulo tech ne ojti huan cuac ajsitiya tech ne pueblo de Damasco, ijcuación sepa san monextico huan quiyehualoco Saulo se cualtzin tanex de eluiyac ten semi mil-ínia. <sup>4</sup> Ijcuación in Saulo huetzito talpan huan quicayic se tanotzalis ten quilfaj ijcuín:

—Tejua Saulo, ¿queyé tejua ay tinechtahuelitztinemi?

<sup>5</sup> Ijcuación in Saulo quitajtolitij ijcuín:

—¿Aconi tejuatzin, Notecotzin?

Huan in Yejuatzin quinanquilij ijcuín:

—Nejuatzin ya ni Jesús ten tinechtahuelitztinemi. Huan masqui tinechtahuelitztinemi, pero tejua san timocojcocoa san, ijcón queme in cuacuohue mo-jojcocojtinemi cuac amo quitacamati in tapeuque icuapitzac.

<sup>6</sup> Huan ijcón in Saulo moucahuihuiyocaya huan quilij ijcuín:

—Notecotzin, ¿toni ticonmonequiltía ma nejua nicchihua?

Huan Totecotzin quinanquilij ijcuín:

—Ximoquetza huan xiyó xicalaquiti tech ne pueblo Damasco huan ompa mitzilisque toni monequi ticchihuas.

<sup>7</sup> Huan in taca ten quisehuicayaj Saulo, yejuan elihuis momoutiyaj huan amo huelfaj tajtosque. Porín quicaqufaj ne tajtolis pero amo aquen quitacque. <sup>8</sup> Huan ijcón in Saulo moquetzac de campa huetztoya. Huan cuac yejua quinequía tachías, ijcuación amo huelic oc. Ta, quimajchanque ya huan cuiyacque tech in pueblo de Damasco. <sup>9</sup> Huan tech ne Damasco yetoya Saulo eyi tonal ixpojyocuitoyaya huan amo tacuaya huan nión atiaya. <sup>10</sup> Huan tech ne Damasco calyetoya se imomachtijcau de Jesús ten monotzaya Ananías. Huan in Totecotzin monextico iixpan. Huan in Ananías quitac Totecotzin majyá cuac tacochitztosquía. Huan in Totecotzin quilij ijcuín:

—¡Tejua, Ananías!

Ijcuación in Ananías quinanquilij ijcuín:

—Nican niyetoc, Notecotzin, xinechonili toni ticonmonequiltía ma nicchihua.

<sup>11</sup> Huan in Totecotzin quilij ijcuín:

—Ximoquetza huan xiyó campa ne ojti ten monotza melahuac. Huan ompa xitemo campa ichan ne Judas se tagat ten monotza Saulo ten pohui de pueblo Tarso porín yejua motatautilijtoc nohuan. <sup>12</sup> Huan ne Saulo majyá cuac tacochitztosquía quitac ya que huala se tagat monotza Ananías. Huan no Saulo quitac que Ananías calaquic huan quicuamapachoco para ijcón huelic tachías.

<sup>13</sup> Huan cuac Ananías quicaquic nijín, ijcuación quilij ijcuín:

—Notecotzin, nejua miacpa nicactinemi de nojón tagat Saulo. Huan no nechtapohuiayaj que yejua quinchihuilijtinemic in taneltocani de Jerusalén ica mías ten

amocuali. <sup>14</sup> Huan ne Saulo huala nican huan cualcui tanahuatil den tayecanani tiopixcame para huelis quinqitzquis queme presos nochi in taneltocani ten mo-huantzin motatatautilijtnemij para quinuicas Jerusalén queme presos.

<sup>15</sup> Pero in Totecotzin quilij Ananías ijcuín:

—Xiyó ya, xicchihuati ten nimitzilijtoc porín ne tagat Saulo niqijitac ya para yas quinojnotztinemitu de nejua notocaytzin ne ocsequin pueblojme ten amo pohuij judíos. Huan ne Saulo tanojnotztinemitu inixpan huejueyi chihuanime huan no inixpan in pueblojuani de Israel. <sup>16</sup> Huan Nejuatzin nicnextiliti ne Saulo de míac tataman ohuijcyot ten monequi quijyohuis porín yejua tacuautamatinemis ica in chicahualis de notocaytzin.

<sup>17</sup> Huan ijcón in Ananías quistehuac huan yajqui calaquito campa calyetoya in Saulo. Huan cuac yejua ajsic ya, ijcuacón quicuamapachoj in Saulo huan quilij ijcuín:

—Nocnitzin Saulo, Totecotzin Jesús monextij tech ne moojpan campa tihualaya. Huan Yejuatzin nechualtitanic que ma nihuiqui ma nimitzitaqui para ijcón ocsepa huelis titachías huan no para ma xiyolpepexocato ica in Yecticatzin Espíritu.

<sup>18</sup> Huan nimantzin majchihuac nojón mixti de quixtzacuiliytoya Saulo huan ijcón nimantzin huelic tachíac. Ijcuacón in Saulo mehuac huan quiahuijque. <sup>19</sup> Huan cuac tamasehuac ya, ijcuacón moyolcuic. Huan ijcón in Saulo yetoya inuan imomachtijcahuan de Jesús se ome eyi tonal tech nojón pueblo de Damasco.

### **Nican in Saulo tanojnotztinemic ica in Tajtoltzin de Dios campa pueblo de Damasco**

<sup>20</sup> Huan ijcón nimampan pehuac Saulo tanojnotztinemi ica in Tajtoltzin de Dios tech in tiopan de judíos huan nochi quinyecajsicailiaya que Jesús Yejuatzin ya Teconetzin de Totajtzin Dios. <sup>21</sup> Huan nochi tacaquini ten quicaquiliayaj itanojnotzalis de Saulo, yejua nojónques quitetzaucacaquíaj huan moyoliliayaj se huan ocsé ijcuín:

—Nijín tagat, yejua ten quintajyohuiliaya campa Jerusalén nochi neques ten motatatautiliayaj ica in chicahualis de itocaytzin de Jesús. Huan nijín tagat, yejua ne ten axcan hualajca nican para quinqitzquico nojón taneltocani huan quinuicas queme presos para quintemactis inmaco in tayecanani tiopixcame.

<sup>22</sup> Pero in Saulo cachi oc moyolmajxitijtiaya huan moyolchicautiaya ica por nitanojnotzalis huan quinyecajsicailiaya que in Jesús Yejuatzin in Cristo Temaquixtijque. Huan in Saulo hasta quinyolpoloj in judíos. Huan yejuan ten calyetoyaj tech pueblo Damasco amo quimatíaj oc toni quijtosque.

### **Nican in Saulo mochololtij intzalan in judíos**

<sup>23</sup> Huan cuac panocque ya míac tonalme, ijcuacón in tayecanani judíos moyectencauque que se tonal quimictisque Saulo. <sup>24</sup> Pero in Saulo niman quimatiltijque que quinequíaj quimictisque. Huan ijcón yohualitonal ne tayecanani judíos quipijpixtoyaj campa ne hueyi calten den pueblo para ijcón huelis quimictisque Saulo. <sup>25</sup> Pero imomachtijcahuan de Jesús quicalaquijque Saulo tech se hueyi chiquihuit. Huan tech se yohual quitemoltijque Saulo tepanquespan campa ne hueyi tepan ten quiyehualojtoya ne pueblo Damasco. Huan ijcón mochololtij in Saulo.

### Nican Saulo quinitato in taneltocani campa pueblo Jerusalén

<sup>26</sup> Huan cuac in Saulo ajsic ya tech in pueblo Jerusalén, ijcuación yejua quinequía mosentilis inuan itaneltocacahuan de Jesús. Pero yejuan quiyolmohuiliayaj Saulo huan amo no quineltoquilijque que yejua no se itaneltocacau de Jesús. <sup>27</sup> Pero in Bernabé quicuiteu Saulo huan quiniuilij inixpan in tatitanilme de Jesús. Huan ijcón in Saulo quintapohuij de queniu yejua quitac Totecotzin tech in ojtí, huan de queniu Totecotzin quinojnotzac Saulo. Huan no Saulo quintapohuij de queniu yejua tanojnotztinemic ica in chichualis den tocaytzin de Jesús ne Damasco ica míac yolchichualis. <sup>28</sup> Huan ijcón in Saulo mocahuac tech in pueblo Jerusalén huan ijcón inuan nentinemía in tatitanilme de Jesús. <sup>29</sup> Huan in Saulo tanojnotztinemia ica hueyi yolchichualis den tocaytzin de Jesús ne Jerusaléncopaca. Huan no Saulo motatajtoltehuyia inuan ne judíos ten tajtoayaj griego. Pero yejuan quiyolnemilijque que quimictisque Saulo. <sup>30</sup> Huan cuac in taneltocani quimatque que quinequíaj quimictisque Saulo, ijcuación yejuan cuiyacque Saulo pueblojcopaca de Cesarea. Huan de ompa quititanque Saulo ma yohui Tarso. <sup>31</sup> Huan ijcón nochi in taneltocani ten calyetoyaj campa Judeajcopaca huan campa Galileajcopaca huan campa Samari-ajcopaca, nochi nojonques yolseucanemíaj huan yolmajsitiayaj ica in Tajtoltzin de Dios. Huan yejuan quimohuistilijtinemíaj Totajtzin Dios porín in Yecticatzin Espiritu quinyolojmajxitijtinemía. Huan ijcón in taneltocani cachi oc momiactiliayaj.

### Nican tajtoa de queniu Pedro quipajtij in Eneas

<sup>32</sup> Huan mochihuac que cuac in Pedro quincalpanojtinemía nochi in taneltocani, ijcuación no yajqui quinitato in tocnihuan taneltocani ten calyetoyaj campa pueblo Lida. <sup>33</sup> Huan ompa in Pedro cajsito se tagat ten monotzaya Eneas. Huan yejua in Eneas huetztaya tech cama chicueyi xiutica ya porín yejua sen melaxtic ya nitacayo catca. <sup>34</sup> Ijcuación in Pedro quilij ijcuín:

—Tejua Eneas, in Jesucristo Yejuatzin mitzpajtis ya. Ica ya nojón niman ximoquetza huan xictetecuino motapech.

Huan ijcón in Eneas nimantzin moquetztiquisac. <sup>35</sup> Huan nochi in pueblojuani de Lida huan de Sarón quitacque que pajtic ya ne Eneas. Ica ya nojón ne pueblojuani quinsecocauque nintatadiosuan huan tacuautamatque ihuan Totecotzin Jesucristo.

### Nican in Dorcas miyic huan in Pedro quiseliltij Dorcas in nemilis ocsepa

<sup>36</sup> Huan tech nojón tonalme calyetoya campa pueblo Jope se sihuat itaneltocacau de Jesús ten monotzaya Tabita, tech in tajtol griegos quijtosnequi Dorcas. Huan nijín sihuatzin Dorcas quichiutinemía ten cualtagayot huan quinpalehuijtinemía nochi tagayot ten quinpolaoyaj tensá tenica ixpanosque. <sup>37</sup> Pero tech nojón tonalme mochihuac que cocolispehuac in Dorcas huan momiquilij. Huan satepan cuac quitamipacque ya inacayo, ijcuación cuiyacque huan quicalaquitoj campa ne nepancal para ompa quixtonilisque. <sup>38</sup> Huan ne pueblo Jope amo huejca quitztaya de ne pueblo Lida, de ne campa moajsitinemía in Pedro. Huan ijcón cuac sequin itaneltocacahuan de Jesús de ompa Jope quitecaquilijque que ompa nentinemía Pedro, ijcuación yejuan quintitanque ome taca para ma quiliti Pedro ijcuín:

—Nimantzin xihuiqui nican Jope campa tejuan tiyetocque, huan amo xihuejuec-ahua oc.

<sup>39</sup> Ijcuacón in Pedro yajqui ihuan ne tanahuatiani. Huan cuac ajsic ya in Pedro, ijcuacón cuiyacque campa ne nepancal campa quiyehualojtoyaj inacayo in Dorcas huel míac sihuacahualme. Huan yejuan quichoquiliayaj Dorcas huan quinejnextiliayaj Pedro nincamisajuan huan nintaquenuan ten in Dorcas quinchijchihuiliya ya cuac ihuan nentinemía oc. <sup>40</sup> Ijcuacón in Pedro quinilij in tagayot que ma nochi calanquisacan. Huan de ompa in Pedro motancuaquetzac huan motatautilij ihuan Dios. Huan de ompa moicancuepac huan quisenitac campa huetztoya in ánima huan quilij ijcuín:

—Tejua Tabita, ximoquetza.

Ijcuacón nimantzin in Dorcas moixtapoj huan cuac quitac in Pedro, ijcuacón mehuiticaehuac. <sup>41</sup> Huan ijcón in Pedro quimaquitziqij Dorcas huan quiquetzac. Huan de ompa Pedro quinnotzac nochi in tocnihuan yolchipauque huan ne sihuacahualme huan quinnextilij que ocsepa yoltoc in Dorcas. <sup>42</sup> Huan nijín ten mochihuac motetapohuijtinemic nochi tech pueblojme ten itilanal de Jope. Ica ya nojón huel míac tagayot tacuautamatque ihuan Totecotzin Jesús. <sup>43</sup> Huan mochihuac que in Pedro mocahuac oc sequi tonalme tech ne pueblo de Jope campa ichan se tagat ten monotza Simón, ten taxocoltijque de cuetaxme.

### Nican Pedro monojnotzac ihuan Cornelio

**10** Huan oncaya tech ne pueblo de Cesarea se tagat ten monotza Cornelio, yejua catca tayecanque de se ciento soldados, huan ne hueyi panti de soldados monotza Italiano. <sup>2</sup> Huan ne Cornelio quitacamatinemía huan quimohuistilijtinemía Totajtzin Dios ihuan nochi nichancahuan. Huan no quintayocoliaya míac tomin ipueblojcahuan huan no nachipa motatautiliaya iixpantzinco Dios. <sup>3</sup> Huan se tonal queme eyi hora de tiotac Cornelio tajtachíac queme yesquía cuac tacochitzosquía. Huan yejua quitac se ángel taquehual de Dios calaquic campa yejua yetoya, huan in ángel quiliaya ijcuín:

—Tejua Cornelio, xicaqui.

<sup>4</sup> Huan ijcón in Cornelio sayó quisenitac in ángel huan quihueyiyolmohuiliaya huan quitajoltij ijcuín:

—Notecotzin, ¿toni ticonmonequiltía?

Ijcuacón in ángel quinanquilij ijcuín:

—Totajtzin Dios mitzcaquilijtoc motatautilisuan. Huan Yejuatzin nachipa quielnamictihuitz que tejua tiquinpalehuijtinemi naquen amo teyi quipía. <sup>5</sup> Huan axcan xiquintitani taca ma yacan tech ne pueblo Jope ma quinotzatij ma huiqui se tagat ten monotza Simón ten cojpacatocaytíaj Pedro. <sup>6</sup> Yejua calyetoc ichan ne ocsé Simón, ne tagat ten taxocoltijque de cuetaxme huan nichan atennacastan de mar. Huan yejua ne mitzilis ten monequi xicchiuati.

<sup>7</sup> Huan cuac ne ángel quitaminojnotzac ya in Cornelio, ijcuacón yejuatzin yajqui. Huan de ompa Cornelio quinnotzac ome itequiticahuan. Huan no quinotzac ocsé soldado ten no quimohuistilijtinemic Dios. Huan nijín eyin tapalehuijtinemique ne ichan Cornelio. <sup>8</sup> Huan ijcón Cornelio quintapohuij ne eyin tapalehuiani nochi ten quitac. Huan de ompa quintitanic tech ne pueblo Jope. <sup>9</sup> Huan imostica cuac yejuan yayaj tech in ojti huan ajsitiyayaj ya campa pueblo Jope, ijcuacón Pedro tejcoto ne calcuaco queme nepanta para ompa motatautilis ihuan Dios. <sup>10</sup> Huan Pedro semi hueyi mayanaya huan quinequía quimasehuas tensá. Huan cuac tacualchijchiutoya

oc, ijcuación Pedro tajtachíac ijcón queme yesquía cuac tacochitztosquía. <sup>11</sup> Huan yejua quitaya que tatapotoc ne eluiyactzinco huan hualtemoaya se patahuac tilma ten tzicautihualaya naucampa. <sup>12</sup> Huan itech ne patahuac tilma yetoyaj nochi tata-man ocuiltzitzin ten quipíaj nahui imetzuan. Huan no yetoya míac tataman cohame huan sequi cuouta tototzitzin de patantinemij ne ejecaixco. <sup>13</sup> Ijcuación in Pedro quicaquic se tajtolis ten quilij ijcuín:

—Ximoquetza, Pedro, huan xiquinmicti neques oculinme, huan xiquincua.

<sup>14</sup> Pero in Pedro quinanquilij ijcuín:

—Notecotzin, amo niquincuas ne oculinme porín nejua amo queman nicuaj tensá pitzotic ne ten in tanahuatil de Moisés techtacahualtía.

<sup>15</sup> Ijcuación mocaquic ica oja ne tajtolis ten quilij ijcuín:

—Tejua amo xicpohua que pitzotic in oculinme ten Dios quichipahuac ya.

<sup>16</sup> Huan nijín mochihuac expa. Huan de ompa ne patahuac tilma ocsepa quia-jocucique ne eluiyactzinco. <sup>17</sup> Huan cuac in Pedro quiyolnemilijtoc oc de toni quijtosnequi nijín ten yejua quitac ya, ijcuación ejcocque huan mocaltenquetzacoj ne taca ten quinaltitanic Cornelio. Yejuan motajtantihualayaj can calyetoc ne tagat Simón. <sup>18</sup> Huan yejuan cuac ajsicque ya, ijcuación matajtanque que cox ompa calyetoc tech nojón cali se tagat ten quilíaj Simón ten cojpacatocaytíaj Pedro. <sup>19</sup> Huan cuac in Pedro yoltanemilijtoya oc de toni quitosnequi nojón ten quitac, ijcuación in Yecticatzin Espíritu quiyolnojnotzac Pedro ijcuín:

—Xicaqui, mitztemoj eyi taca. <sup>20</sup> Ximoquetztihuetzi huan xitemo huan xiyó ninuan huan amo teyica ximomouti, porín nijín taca nejua niquinaltitanic ya ma mitzcuiquij.

<sup>21</sup> Ijcuación in Pedro temotihuetzic ne campa yetoyaj ne eyi taca ten quinaltitanic Cornelio huan yejua quinilij ijcuín:

—Xiquitacan, nejua ya ni Pedro ten namejuan nannechtemoj. ¿Ica toni tanemilil namejuan nanualajtihualajque?

<sup>22</sup> Huan yejuan quinanquilijque ijcuín:

—Tejuan tihuitze ica itencopaca ne tayecanque Cornelio ne ten quinyecana se ciento soldados, se tagat ten yolmelahuac huan quimohuistilía Dios. Huan nochi in pueblojani judfos quicualtagaitaj ne Cornelio. Huan se chipactzin ángel de Dios quilij Cornelio ma tatitani ma timitzonnotzaquij huan ma timitzonsehuiyacan campa ichan Cornelio para ompa mitzoncaquilisque nochi ten tiquiniluiti.

<sup>23</sup> Ijcuación in Pedro quincalaquij ne eyi taca campa ne motepalcautoyaj huan ijcón ompa mocaque tech nojón yohual. Huan ijcón imostica quisehuiyacque Pedro huan no quinsehuiyacque ocsequi tocnihuan taneltocani de calyetoyaj ompa Jope.

<sup>24</sup> Huan imostica calaquitoj ya tech ne pueblo de Cesarea, campa ipa quinchixtoyaj Cornelio ihuan ichancahuan huan sequin itasojcnihuan ten ipa quinyoleucaj ma ihuan yetotij. <sup>25</sup> Huan cuac in Pedro mocaltenquetzato ya, ijcuación nimantzin Cornelio hual quisac para quintajpalos huan quinselis. Huan niman Cornelio motancua-quetzac iicxitan Pedro huan quinequía quimohuistilis. <sup>26</sup> Pero in Pedro quiquetzac ne Cornelio huan quilij ijcuín:

—Ximoquetza porín nejua no nitagat san ijcón queme tejua.

<sup>27</sup> Huan cuac monojnotztoyaj ya, ijcuación yajque sen calaquitoj calijtic. Huan Pedro ompa quinajsito míac tagayot ten ipa mosentilijaj ya. <sup>28</sup> Huan in Pedro quinilij ijcuín:

—Namejuan cuali nancajsicamatij que tejuan titaca judíos. Huan techtacahualtía in tanahuatil de Moisés de timosentilisque ihuan tagayot ten amo judíos. Huan no techtacahualtía de que ma amo ticalactinemican ninuan tech ninchan. Pero Totajtzin Dios nechonmonextilij ya que ma amo niquinpohua acsame queme yolpitzoticque como amo quitacamati in tanahuatil de Moisés. <sup>29</sup> Ica ya nojón, cuac nechnotzque ya ma nihuiqui, ijcuación nimantzin nihuala huan amo teyi niqijtoj.

Huan ijcón Pedro quintajtoltij ichancahuan de Cornelio ijcuín:

—¿Queyé namejuan nannechtatitanijque ma nihuiqui?

<sup>30</sup> Ijcuación in Cornelio quinanquiliij ijcuín:

—Quichihuac nahui tonal ya, ijcón queme axcan tech nijín hora niyetoya nican nochan nimosautoya. Huan cuac nimotatautiliaya nepa queme eyi hora de tiotac, ijcuación sepa san monextico noixpan se tagat de Dios ten cualtzin pepetacatihualaya nitilma. <sup>31</sup> Huan Yejuatzin nechilij ijcuín: “Tejua Cornelio, Totajtzin Dios mitzcaquilijtihuitz ne motatatautilis. Huan no Dios quielnamictihuitz nochi ten ticchiutihuitz de tiquinpalehuía neques ten amo teyi quipáj”. <sup>32</sup> Huan no yejua nechilij ijcuín: “Xitatitani campa ne pueblo Jope ma quinzotzati ma huiqui se tagat Simón ten cojpacatocaytíaj Pedro, ne ten motepalcautoc ichan ne ocsé Simón, se tagat ten taxocoltíaj ica cuetaxme huan yejua calyetoc inacastan in mar. Huan cuac in Pedro ejcos ya, ijcuación yejua mitznójnotzas”. <sup>33</sup> Huan ijcón nicchihuac. Nitatitanic ma mitzontemotij huan melau tejuatzin ticonchihuac se hueyi cualtagayot de niman tionhuala. Huan axcan nican nochi tiyetocque iixpantzinco Totajtzin Dios. Huan ticnequij ticaquisque nochi tajtolme ten Totecotzin mitzonnahuatiliij ya que xitechtopohuiqui.

### Nican Pedro quinojnotzac Cornelio ihuan ichancahuan

<sup>34</sup> Ijcuación in Pedro pehuac quinojnotzac in tacaquini huan quiniliaya ijcuín:

—Axcan melau nicajscamati que Totajtzin Dios amo quinchichicojtasojta in tagayot. <sup>35</sup> Ta, Yejuatzin quinicnelía tagayot tech nochi in senmanahuac como yejuan quimohuistilíaj Yejuatzin huan chipaucanentinemij. <sup>36</sup> Huan Totajtzin Dios quinontitanilij Nitajtolztin in pueblojuani Israel huan quinnextiliaya in yancuic Tajtolztin ten cualcui yolsehuilis ica itencopaca Jesucristo. Porín ne Cristo Yejuatzin ya in Totecotzin para tinochin den titalticpacuani. <sup>37</sup> Huan namejuan cuali nanquimatij que ne Tajtolztin de Dios motetapohuijtihiuitz tech nochi in talme ten itatilanal de Judea. Huan pehuac motetapohuía nijín Tajtolztin campa Galileajcopaca, nimampa que in Juan Taahuijque quitamichihuac nitequiu de nitanojnotzalis huan den nitahuilis. <sup>38</sup> Huan nanquimatij que Dios quiyolpepexocaltij ne Jesús de Nazaret ica in ichicahualis den Yecticatzin Espíritu. Huan no nanquimatij que Jesús quichiu-tinemic sayó ten cuali. Huan Yejuatzin quinpajtijtinemic nochi ne cocoyani ten tajyohuiayaj ica ichicahualis den amocuali Satanás, porín Totajtzin Dios yetinemía ihuan Jesús. <sup>39</sup> Huan nochi nijín ten Jesús quichihuac tejuan tiquitacque tech in talme de pohui Judeajcopaca huan tech in Jerusalén. Huan no tiquitacque que quimictijque Jesús cuac quicuoupampilojque. <sup>40</sup> Pero Totajtzin Dios quipanquixtij yoltoc ne Jesús intzalan in ánimajme ipan eyi tonalica. Huan ijcón Dios quichihuac que ma monextijtinemi in Jesús toixpan. <sup>41</sup> Huan nijín Jesús amo nochi quitacque in pueblojuani. Ta, techonmonextilij tejuan san. Porín Totajtzin Dios ne achtopa techijitac para ma tejuan tiqiztinemican nochi ten quichihuac Jesús. Huan melau tejuan

titacuayaj huan titamasehuayaj ihuan Jesús nimampa que Dios quipanquixtij yolto intzalan in ánimajme. <sup>42</sup> Huan ne Jesús Temaquixtijque Yejuatzin techtitanic ma tanojnotztinemican ica in Tajtoltzin de Dios tech nochi in pueblojuani. Huan no techtitanic ma titanejmachtijtjinemican que Dios quimonequiltij huan quijitac Jesús ma yesqui in Juez. Huan se tonal Yejuatzin techixcomacas nochi tejuan ten tiyoltinemic huan nochi ten ipa micque ya. <sup>43</sup> Huan no nochi in tanahuatiani de Dios tajtojtihualajque de Totecotzin Jesús. Huan yejuan no quitetapohuijtihualajque que nochi naquen tacuautamatisque ihuantzin Jesús, yejuan nojonques quiselisque ne-tapojpoluilis de de nintajtacoluan ica por in chichualis de nitocaytzin de Yejuatzin.

### **Nican Dios quinyolpepexocaltij ica in Yecticatzin Espiritu neques taneltocani den amo pohuij ihuan pueblojuani Israel**

<sup>44</sup> Huan cuac Pedro quinnojnotztoya oc, ijcuacón hualpantemoc in Yecticatzin Espiritu huan Dios quinyolpepexocaltij ica in Yecticatzin Espiritu nochi neques ten quicactoyaj itanojnotzalis de Pedro. <sup>45</sup> Huan quinsehucaya Pedro sequin taneltocani judíos ne ten quitacamatinemic oc in tanahuatil de Moisés. Huan nojón taneltocani quitetzaucaitaque cuac quitacque que Dios quinyolpepexocaltij ica in Yecticatzin Espiritu nochi nijín taca ten amo poutinemic queme judíos. <sup>46</sup> Huan nojón taneltocani judíos quitetzaucacacque porín quinquaquiliayaj nijín ten amo judíos cuac yejuan tajtoayaj ica míac tataman tajtolis ne ten quinmactilij in Yecticatzin Espiritu. Huan no quinquaquiliáj que ijcón quimohuistiliayaj Totajtzin Dios. <sup>47</sup> Ijcuacón in Pedro quijtoj ijcuín:

—Tiquitacque ya que Dios quinyolpepexocaltij ica in Yecticatzin Espiritu nijín taneltocani ten amo judíos, ijcón queme Dios techyolpepexocaltij tejuan. Ica ya nojón tejuan amo huelis ma tiquintacahualtican. Ta, ma tiquinahuican ica at.

<sup>48</sup> Huan ijcón in Pedro tanahuatij ma quinahuican ica in chichualis den tocaytzin de Jesucristo. Huan cuac quintamiahuijque ya ne taneltocani, ijcuacón quitatautijque in Pedro que ma mocahuani oc ninuan se ome eyi tonalme oc.

### **Nican Pedro quintapohuij in taneltocani de Jerusalén de toni mochihuac nepa Cesareajcopaca**

**11** Huan in tatitanilme de Cristo huan in tocnihuan taneltocani ten calyetoyaj Judeajcopaca, yejuan nojonques quicacque que sequin tagayot ten amo judíos no quiselijque ya huan quineltoacque ya in Tajtoltzin de Dios. <sup>2</sup> Huan cuac in Pedro ocsepa ajsito tech in pueblo Jerusalén, ijcuacón in taneltocani judíos peuque quitejtenehuayaj in Pedro. <sup>3</sup> Huan yejuan quilijque Pedro ijcuín:

—¿Queyé tejua tiyajca tiquincalpanoto neques ten amo poutinemic queme judíos? ¿Huan queyé tejua no ihuan titacuato?

<sup>4</sup> Ijcuacón in Pedro pehuac quintapohuía sejsé tamachilis nochi ten mochihuac huan quinilij ijcuín:

<sup>5</sup>—Huan nejua niyetoya tech in pueblo Jope. Huan cuac nejua nimotatautilijtoya, ijcuacón nitajtachíac queme yesquía cuac nitacochitztosquía. Huan niquitac tensá ten quinehuiliaya se patahuac tilma ten tzicautihualaya naucampa den ne eluiyactzinco huan hual temoaya campa nejua niyetoya. <sup>6</sup> Huan cuac nicyequitac ya, ijcuacón nicajsicamatic que niquinitztoya nochi tataman ocuilinme ten quipíaj nahui imetzuan. Huan no niquitac tecuanime huan cohuaime huan sequi cuoutajto-

tome ten patantinemij ejecaixco. <sup>7</sup>Huan no nicayic se tajtolis ten nechiliaya ijcuín: “Ximoquetza, Pedro, xiquinmicti neques ocuulinme huan xiquincua”. <sup>8</sup>Huan nejua niquilij ijcuín: “Notecotzin, amo niquincuas nojonques ocuulinme porín nejua amo queman nicuaj tensá pitzotic ten in tanahuatil de Moisés techtachualtía”. <sup>9</sup>Ijcuacán ne tajtolis den eluiyactzinco ica ojpa nechnanquiliij ijcuín: “Tejua, amo xicpohua queme pitzoticque nijínques ocuulinme ten Dios quinchipahuac ya”. <sup>10</sup>Huan nijín mochihuac expatica. Huan de ompa ne tilma quiajocucique ocsepa ne eluiyactzinco.

<sup>11</sup>Huan no Pedro quinilij itaneltoaicnihuan ijcuín:

—Huan tech ne momento ejcocque eyi taca tech ne cali campa nimotepalcautoya. Huan ne eyi taca quinuaitanque desde ne pueblo Cesarea para ma nechtemoquij. <sup>12</sup>Huan in Yecticatzin Espíritu nechyojnojnotzac huan nechnahuaati ma inuan niyó, huan ma amo teyica nimonemili. Huan no nohuan yajque nojón chicuasen tocnihuan taneltocani. Huan ijcón tejuan nochi ticalaquitoj inuan se tagat ten monotzaya Cornelio. <sup>13</sup>Huan ne tagat Cornelio nochi techtapohuij de queniú quitac tech ichan se ángel taquehual de Dios ten moquetzaco iixpan huan quiliaya ijcuín: “Xiquintitani sequin taca tech ne pueblo Jope para ma quinoztatij ma huiquí in Simón ten cojpacatocatíaj Pedro. <sup>14</sup>Huan ijcón yejua mitznojnotzaquiú de queniú huelis ticpías ne nemaquixtilis, ijcón queme tejua ihuan mochanchahuan”. <sup>15</sup>Huan cuac nejua nipehuac niquinnojnotzaya, ijcuacán hual pantemoc in Yecticatzin Espíritu. Huan Dios quinyolpepexocaltico ica in Yecticatzin Espíritu ijcón queme tejuan techyolpexontij ne achtopa ya cuac yequinica huala in Yecticatzin Espíritu. <sup>16</sup>Huan ijcón nicyolel-namiquic ne tajtolme ten quijtojca in Totecotzin cuac techilij ijcuín: “Huan yec melau que in Juan Taahuijque, yejua ne quinahuijtinemía ica at san. Pero namejuan Dios namechyoepexocaltis ica in Yecticatzin Espíritu”. <sup>17</sup>Huan cuac yejuan tacuautamatque ihuan Totecotzin Jesucristo, ijcuacán Dios quinmactilij in Yecticatzin Espíritu, ijcón queme tejuan Dios techtayocolij in Yecticatzin Espíritu. Huan cuac niquitac nijín, ijcuacán nimoyolilij ijcuín: “¿Toni nichiuque nejua para niquixtopehuas Dios itequí?”

<sup>18</sup>Ica ya nojón cuac in tocnihuan taneltocani judíos ten calyetoya Jerusalén quitamicauilijque nochi nijín tajtolme de Pedro, ijcuacán yejuan sayó motentamatilijque. Huan de ompa peuque quihueyimohuistiliyaj Totajtzin Dios huan quiliayaj ijcuín:

—Axcan ticajsicamatij que Totajtzin Dios quinchahuilij que in taca ten amo judíos ma no ma moyolnemilican de nintajtacoluan para ijcón ma quipiacan ne yec nemilis nachipa.

### **Nican tajtoa de ne tocnihuan taneltocani ten calyetocque campa pueblo Antioquía**

<sup>19</sup>Huan cuac quimictijque ya in Esteban, ijcuacán pehuac in tagayot de quintajyohuilitíaj in ocsequin taneltocani. Huan nojón taneltocani cholojque huan moyauque tech in pueblojme de Fenicia huan Chipre huan Antioquía. Huan ompa quinojnotztinenque ica in Tajtoltzin de Dios sayó neques judíos pero amo teyi quintapohuijque in ocsequin taca. <sup>20</sup>Huan sequin taneltocani ten pohuíaj tech in pueblo Chipre huan Cirene, yejuan nojonques cuac ejcocque tech in pueblo de Antioquía, ijcuacán yejuan peuque quinojnotztinemij in taca griegos huan quintapohuíaj den yancuic Tajtoltzin de Totecotzin Jesucristo. <sup>21</sup>Huan ijcón Totajtzin Dios quinmactilij



huelilis nijín tanojnotzani huan ijcón míac tagayot quinsecocauque nintatadiosuan huan tacuautamatque ihuan Totecotzin Jesús.

<sup>22</sup> Huan cuac in tocnihuan taneltocani ten calyetoyaj ne Jerusalén quitecaquili-que de toni mochiutoc ne campa pueblo Antioquía, ijcuacán yejuan quititanque in Bernabé ma yohui quinitati in tocnihuan de Antioquía. <sup>23</sup> Huan cuac in Bernabé ajsic ya ne campa Antioquía, ijcuacán yejua quitac ya que in teicnelilis de Dios inpan mochiutoc ya ne taneltocani. Ica ya nojón Bernabé mohueyiyolpactij. Huan cachi oc quinyolmajxitiaya in taneltocani que ma quisentocacan tacuautamatiyacan ihuan Totecotzin ica nochi nintanejnequilis. <sup>24</sup> Huan ne Bernabé catca se yolcuali tagat. Huan Dios quiyolpepexocaltij Bernabé ica in Yecticatzin Espíritu huan quimactilij míac tacuautamatilis. Ica ya nojón míac tagayot tacuautamatque ihuan Totecotzin.

<sup>25</sup> Huan satepan cuac nijín mochihuac ya, ijcuacán in Bernabé yajqui campa pueblo Tarso huan ompa quitemoto in Saulo. <sup>26</sup> Huan ijcón cuac cajsic ya in Saulo, ijcuacán quisehuiyac ne campa pueblo Antioquía. Huan mochihuac que Bernabé huan Saulo mosentilijtineneque se xiutica ihuan in tocnihuan taneltocani huan no quinmachtijtiyajque míac tagayot. Huan ompa tech nojón pueblo Antioquía campa in pueblojuani peuque quintocaytíaj in taneltocani queme cristianos.

<sup>27</sup> Huan tech nojón tonalme sequi tequitini taneltocani de Jerusalén peuque no quiselijque tanahuatilme ten Totajtzin Dios quinmactilij. Huan yejuan yajque campa pueblo de Antioquía. <sup>28</sup> Huan senme de yejuan monotzaya Agabo. Huan yejua mo-quetzac intzalan in tocnihuan taneltocani. Huan ica in chicahualis den Yecticatzin Espíritu in Agabo quinajsicamatiltij huan quiniliaya que hualas se hueyi máyanti tech nochi in senmanahuac. Huan melau ijcón mochihuac cuac Claudio catca hueyi tayecanque emperador de nochi in talticpacuani ten pohúaj romanos. <sup>29</sup> Ijcuacán in tocnihuan taneltocani de Antioquía moyectencauque de quintitanilisque se tapalehuilis de nojón tocnihuan de calyetoyaj Judeajcopaca. Huan cada taneltocacque tapalehuij ijcón queme yejua quixejecoaya que huelisquía quitemacas. <sup>30</sup> Huan ijcón quichiuque yejuan, de ompa quititanque ne nintapalehuilis para ne tiopanhuehuentzitzin den Judeajcopaca yetocque. Huan in tapalehuilis cuiyacque ne tocnihuan Bernabé huan in Saulo.

### Nican quimictijque in Jacobo huan quitzacuacque Pedro tech in cárcel

**12** Huan tech nojón tonalme in tayecanque rey Herodes pehuac elihuis quin-tajyohuiltic sequi taneltocani. <sup>2</sup> Huan in Herodes tanahuatij ma quimictican ica machete in Jacobo, ne ten iicniu Juan. <sup>3</sup> Huan ijcón cuac in Herodes quitac ya que moyolpactijque ya in tayecanani judíos ica por nitequiu, ijcuacán in Herodes no tanahuatij que ma quiqitzquican Pedro queme preso. Huan nijín mochihuac tech ne iluitonalme cuac nochi in pueblojuani judíos quicuaj in pan ten amo tamanelol ica levadura. <sup>4</sup> Huan cuac quiqitzquijque ya Pedro queme preso, ijcuacán Herodes tanahuatij ma quitzacuatij tech in cárcel. Huan no tanahuatij ma quipiatij nahui pantime de soldados, huan nojón panti de soldados cuicaj najnahuin. Huan ijcón quichiuque quiyecpixtoyaj Pedro porín quinemiliayaj que cuac tamis ya in tajy-ohuilis iluit, ijcuacán cuicasque Pedro inixpan in pueblojuani para quixcomacasque huan quimictisque. <sup>5</sup> Huan ijcón melau in Pedro mocahuac tech in cárcel huan ne soldados quiyecpixtoyaj. Pero in tocnihuan taneltocani amo queman mocahuaya de amo motatatautilisque iixpan Dios ica por ne Pedro.

### Nican tajtoa de queniu Dios quitapoj in cárcel para ma quisa Pedro

<sup>6</sup>Huan in rey Herodes quitalijsa ya in tonal queman cuicasque Pedro inixpan in pueblojuani para ma ompa quixcomacacan huan ma quimictican. Huan se tayohuac achtopa que quichihuas Herodes, ijcuacán Pedro cochtoya tajtacoyan de omen soldados. Huan matzicautoya ica ome cadenas cada se imay ihuan se soldado. Huan no ne caltento yetoya ocsequin soldados ten caltentapiani. <sup>7</sup>Huan nimantzin monextij se ángel taquehual de Totecotzin. Huan no ijcón tech ne carcelijtic monextij se hueyi tanex de mimilíná. Huan ijcón in ángel quiolinij in Pedro ielchiquiu nacastan huan quijxitij huan quilij ijcuín:

—Tejua Pedro, niman ximoquetza.

Ijcuacán ne tepos cadenas sepa san motapouque huan huetzic tenica matzicautoya Pedro. <sup>8</sup>Huan in ángel ocsepa quilij ijcuín:

—Ximotaquenti huan ximotegacti.

Huan cuac in Pedro quichihuac ya nijín, ijcuacán in ángel quilij ijcuín:

—Ximotalili motilma huan tiyohue xinechtoctilijtiu.

<sup>9</sup>Huan ijcón in Pedro quitoctilijtiyá in ángel huan hasta amo quimatía cox hueyi melau ten quichiutoc in ángel. Ta, in Pedro quiyolnemiliaya que xa tajtachixtoc queme yesquía cuac tacochitztoc. <sup>10</sup>Huan quipanahuijque ica se calten campa tajpixtoyaj in soldados. Huan de ompa quipanahuijque ocsé calten campa no tajpixtoyaj soldados. Huan cuac ajsicque ya campa ne hueyi tepos puerta ne ten mocahuaya ojtípampa, ijcuacán ne tepos puerta iselti motapoj. Huan ijcón quisque huan yajque huan quipanahuijque ocsé ojti. Huan de ompa in ángel de Dios quisecocahuac Pedro. <sup>11</sup>Ijcuacán in Pedro yec talnamic ya huan quijtoj ijcuín:

—Melau axcan niyecajsicamic ya que in Totectotzin nechualtitanilij se ángel para nechmaquixtis imaco ne rey Herodes ihuan nochi ne pueblojuani judíos ten yejuan quinequíaj nechmictisque.

<sup>12</sup>Huan cuac in Pedro quitamiyolnemilij ya nijín tanemilil, ijcuacán yajqui ichan María, ne ten inan in Juan, ne ten cojpacatocaytíaj Marcos. Huan tech ne cali huel míac taneltocani mosentilijcay ya ompa para motatatautilisque ihuan Dios ica por ne Pedro. <sup>13</sup>Huan cuac in Pedro naltacacalatzac ya campa in calten huan quinnalnotzac ya, ijcuacán quistiquisac se sihuapil tequitique ten monotza Rode para yejua quitato aconi huala. <sup>14</sup>Pero cuac in Rode quitajtolixmatic ya ne Pedro, ijcuacán amo quitatapohuilij porín hasta moyolpoloj de tanto paquilis. Huan de ompa nimantzin motalojteu calijtic huan quinnejmachtito in taneltocani que in Pedro yetoc ya ne caltento. <sup>15</sup>Ijcuacán in tocnihuan quilijque in Rode ijcuín:

—Tejua sayó timocuatapololtijtoc san.

Pero in Rode cachi oc quinyecquiliaya ijcuín:

—Amo, ta melau ten namechilía.

Pero in tocnihuan quijtoayaj ijcuín:

—Amo yejua in Pedro. Ta, yejua in ángel ten quipixtinemi in Pedro.

<sup>16</sup>Huan cuac yejuan monojnotzayaj oc, ijcuacán in Pedro quisentocaya naltacacalatzaya tech in calten huan quinnotzaya. Huan cuac quitatapohuilijque ya huan quitacque ya in Pedro, ijcuacán nochi in taneltocani quihueyitetzaucaitacque.

<sup>17</sup>Pero in Pedro quintanextilij ica nimahuan que ma tamatiyacan. Huan de ompa

Pedro nochi quintapohuij de queniu in Totecotzin quiajchihuac yejua ne cárcelijtic, huan quinilij ijcuín:

—Nochi nijín xictapohuican Jacobo huan nochi in tocnihuan taneltocani.

Huan de ompa in Pedro quistehuac huan yajqui ocsecan. <sup>18</sup> Huan imostica cuac tanesic ya, ijcuacán in soldados semi moyolpolojque porín amo quimatíaj toni mochihuac huan amo quimatíaj can calaquito Pedro. <sup>19</sup> Ijcuacán in Herodes tanahuatij ma quitemocan Pedro, pero amo huelia cajsisque. Huan cuac quintamiyolcuiltijque ya ne soldados tajpiani, ijcuacán in Herodes tanahuatij ma quinmictican in soldados tajpiani. Huan niman in Herodes quicauteu nichan ten quiipiaya ne Judea-jcopaca huan yajqui calyetoto campa pueblo Cesarea.

<sup>20</sup> Huan in rey Herodes mocualantijtinemic ihuan in pueblojuani de Tiro huan Sidón huan amo quinmactiliaya oc in tacualis ten monequía. Ica ya nojón yejuan mosepanyoltalijque ihuan Herodes porín quitaxtahuijque in Blasto ma quinpalehui, ne ten se tayecanque taquehual de Herodes. Huan ica in tapalehuilis de Blasto, in pueblojuani de Tiro huan Sidón quitajtanilijque Herodes que ma amo mocualantijtinemican oc. Huan ijcón yejuan quichiuque porín amo teyi tacualis quipiasque como amo hualajtos imaco in rey Herodes. <sup>21</sup> Huan in rey Herodes quitelij in tonal quemanían ma mosentilican inixpan in pueblojuani de Tiro huan Sidón. Huan tech nojón tonal in rey Herodes motaquentij ica cualtzin tilma de quitavía in tayecanani reyes. De ompa yejua motalito campa ihuelilispan de itaixejecolispan huan ompa pehuato quinnojtza in tagayot. <sup>22</sup> Huan in tagayot peuque quitzajtzilíaj huan quihueyichihuayaj Herodes ijcuín:

—Nijín tagat ten tajtojtoc amo tagat san. Ta, yejua se dios.

<sup>23</sup> Huan tech ne momento se ángel taquehual de Dios quicocoliscuiltico ne Herodes. Porín nojón Herodes amo quihueyipanchiutoya Totajtzin Dios. Ta, yejua san mohueyipanchiutoyaj. Ica ya nojón Herodes momiquilij huan inacayo quitamijque in talocuilinme. <sup>24</sup> Huan in Tajtoltzin de Dios motetapohuiaya huan momoyautiaya nohuiyampa. Huan miacque den pueblojuani quineltoaya. <sup>25</sup> Huan cuac in Bernabé huan Saulo quitamichiuque ya nintequiu tech in pueblo Jerusalén, ijcuacán yejuan quisehuiyacque Juan ne ten cojpacatocaytíaj Marcos. Huan de ompa quisque de Jerusalén huan yajque campa pueblo Antioquía.

### **Nican Bernabé huan Saulo quipehualtijque nintequiu queme tatitanilme de Dios campa analtecocayome**

**13** Huan nojón taneltocani ten calyetoyaj Antioquía ompa yetoyaj ihuan tamachtiani den Tajtoltzin de Dios. Huan no yetoyaj sequin tanahuatiani ten quiselijque tanahuatilme ten Dios quinmactiliaya. Huan ompa yetoyaj Bernabé, huan in Simón ten cojpacatocaytía Niger, huan Lucio de pohui Cirene, huan Saulo. Huan no inuan yetoya in Manaén ten moseniscaltía ihuan Herodes. Huan ne Herodes mochihuaco tayecanque tech in talme de Galilea. <sup>2</sup> Huan se tonal in tocnihuan taneltocani mosentilijque para quimohuistilisque Totajtzin Dios huan para mosahuasque. Huan cuac ijcón quichiutoyaj ya, ijcuacán in Yecticatzin Espíritu quinyolnojtzac ijcuín:

—Xiquinijitacan in Bernabé huan Saulo para ma yejuan nechtequitilijtinemican ijcón queme Nejuatzin niconmonequiltía ma xicchiutinemican.

<sup>3</sup> Huan ijcón cuac motamitatataulijque ya huan cuac motamisauque ya, ijcuacán in tocnihuan taneltocani quincumapachojque in Bernabé huan Saulo para quinte-quimactisque. Huan de ompa in tocnihuan quinsehuiyacque in Bernabé huan Saulo huan quincahuatoj tech in ojti.

### **Nican in tatitanilme de Cristo tanojnotztinenque tech in pueblo Chipre**

<sup>4</sup> Huan queme in Yecticatzin Espiritu quintitanic in Bernabé huan Saulo, ijcuacán yejuan yajque campa pueblo Seleucia huan ompa calacque tech se barco para ajsitihue campa taltzin de Chiprejcopaca. <sup>5</sup> Huan cuac ajsicque ya campa ne Chipre, ijcuacán calaquitoj tech ne pueblo de Salamina, huan ompa peuque tanojnotztinemicque ica in Tajtoltzin de Dios tech in tiopanme de judíos. Huan no inuan yaya in Juan Marcos queme tapalehuijque. <sup>6</sup> Huan ijcón in tatitanilme de Cristo nentiyajque tech nochi in talme ten pohuía Chipre, huan ajsicque tech se pueblo ten monotza Pafos. Huan ompa cajsicque se tagat judío ten monotza Barjesús, yejua catca se tagat nahual. Huan yejua tacajcayautinemic san porín quiytoaya que yejua tajtojtinemi ica itencopaca Totajtzin Dios. <sup>7</sup> Huan ne nahual Barjesús, yejua yetinemic ihuan in hueyi chiuque de Chipre ten monotza Sergio Paulo, se tagat ten yec cutamatque. Huan in Sergio Paulo quintatitancanotzac in Bernabé huan Saulo porín yejua quinequía quincaquilis in Tajtoltzin de Dios. <sup>8</sup> Pero ne nahual Barjesús, ten no quitocaytíaj Elimas, yejua quinixnamic in tatitanilme de Cristo porín yejua amo quinequía que nijín tatitanilme ma quitaneltoctican in hueyi chiuque Sergio Paulo.

<sup>9</sup> Pero in Saulo, ten no quitocaytíaj Pablo, yejua ipa Dios quiyolpepexocaltijca ya ica in Yecticatzin Espiritu. Ica ya nojón in Pablo sayó quisenixitac ne nahual huan quilij ijcuín:

<sup>10</sup> —Tejua se titacajcayauque san, huan tejua tixolopij san. Tejua tiitequiticau den amocuali Satanás porín tejua tictahuelitztinemij nochi ten cuali. Tejua sayó ticuelita tiquinchijchicocalaquijtinemis in tagayot para ma amo cajsican in melahuac ojti den Totecotzin. <sup>11</sup> Huan axcan in Totecotzin mitztatzacuiliti ica ichicahualis huan Yejuatzin mitzixpojpopocuiltis. Huan amo huelis tiquitztinemis in tanex den tonaltzin.

Ijcuacán nimantzin huetzic ipan niixtololohuan queme mixhuac huan mocahuac ixpojpopoyot ne Barjesús huan mocahuac tayohuayanijtic. Huan ijcón quitemotjinemía acsame ma quimajchanacan. <sup>12</sup> Huan cuac in hueyi chiuque Sergio Paulo quitac ya toni mochihuac, ijcuacán yejua tacuautamatic ihuan Cristo porín quimoucaquic in tanexlilis de Totecotzin.

### **Pablo huan Bernabé ajsicque campa pueblo Antioquía ten itilanal de Pisidia**

<sup>13</sup> Huan ijcón in Pablo ihuan in itequiticaicnihuan calacque tech ne barco campa Pafos huan yajque ajsito campa pueblo Perge ten itilanal Panfilia. Pero in Juan Marcos quincateu in ocsequin itequiticaicnihuan huan yajqui mocuepac ocsepa Jerusalén. <sup>14</sup> Huan in Pablo huan Bernabé quisteuque den pueblo Perge huan yajque ajsito campa pueblo Antioquía ten itilanal Pisidia. Huan ompa tech in tonal de nesehuilis in Pablo huan Bernabé calacque tech in tiopan de judíos huan motalitoj ompa. <sup>15</sup> Ijcuacán in tiopan tayecanani quinleerohuiliayaj in tacaquini in tanahuatil de Moisés huan no quinleerohuiliayaj in Tajcuilolamatzin den tanahuatiani de Dios. Huan cuac quintamileerohuilijque ya, ijcuacán in tiopan tayecanani tatitanque que ma quinilican in Pablo huan Bernabé ijcuín:

—Namejuan nantocnihuan, como nancompíaj tensá tajtolme tenica nantechylomajxitisque, pues yequintzin tamechcahuilíaj ya de xictechnojnotzacan namejuan.

<sup>16</sup> Ijcuacón in Pablo moquetzac huan quintanextilij ica nimahuan que ma tamatiyacan in tacaquini huan quinilij ijcuín:

—Xicaquican namejuan nanpueblojuani de Israel, huan no xicaquican nochi namejuan ten nanquimohuistilijtinemij Totajtzin Dios. <sup>17</sup> Nin Dios den pueblojuani de Israel, Yejuatzin quinijitac tohuejcautatuan huan quinmiactilij in pueblojuani de Israel, masqui yejuan calyetoyaj campa amo ninpueblo tech ne talme ten pohuía Egipto. Huan nimampa Totajtzin Dios quinalcuito tech ne Egipto ne nipueblojcahuan ica hueyi ichicahualis. <sup>18</sup> Huan Totajtzin Dios quinicnelij huan quinxicohuilij nipueblojcahuan nochi ten quichiutinemíaj nojón ome poal xihuit cuac nejnentoyaj campa ne taiucan. <sup>19</sup> Huan Totajtzin Dios quintajtamij nojón chicome taman pueblojme ten calyetoya campa talme de Canaán. Huan de ompa Dios quintalmactilij tohuejcautatuan queme ninherencia. Huan ompa calyetoyaj tohuejcautatuan ipan nahui ciento huan tajco xiutica. <sup>20</sup> Huan no Totajtzin Dios quinyecantiyá ica itecopaca den itaixejecojcahuan. Ijcón quichiutiyá hasta in tonal cuac nemico ne tanahuatijque Samuel.

<sup>21</sup> Huan satepan ne tohuejcautatuan quitajtanilijque Dios ma quitayecancaquetzati ninpan se rey queme tayecanque. Huan ijcón Dios quitalij ninpan se tagat ten monotza Saúl, teconeu de Cis, nojón tagat pohuía ihuan ichancahuan de Benjamín. Huan ne Saúl tayecantinemic omepoal xihuit. <sup>22</sup> Huan satepan Dios cajchi-huac in Saúl queme rey huan quixpatcayotij ocsé tagat ten monotza David. Huan Dios quicualtagaitaya David huan quijtoaya ijcuín: “Xiquitan, nijín tagat David, yejua teconeu de Isaf, niqutilia que yolcualtagat huan ne David nechylpactía. Huan nicmati que yejua quichihuati nochi ten niconmonequiltía”.

<sup>23</sup> Huan senme den iixuihuan de David quisaco yejua in Jesús. Huan nijín Jesús yejua ne Totajtzin Dios quitalij para quinmaquixtis ipueblojcahuan de Israel, porín Yejuatzin ijcón moyectencauca ya de quichihuasquía. <sup>24</sup> Huan achtopa que hualasquía ne Jesús, ijcuacón Juan Taahuijque yejua quinnojnnotztinemic in pueblojuani de Israel que ma moyolnemilican de nintajtacoluan huan ma moteahuiltican. <sup>25</sup> Pero cuac Juan Taahuijque quitamichiutoya ya nitequi, ijcuacón yejua quijtoj ijcuín: “Xicmatican que nejua amo ninetanahuatijque Cristo, ijcón queme namejuan nanquiyolnemilíaj. Ta, hualajtoc nimampa de nejua ne tanahuatijque Cristo. Huan amo nechnamiquis que ma nejua nicmetztegacixti”.

<sup>26</sup> Huan no in Pablo quinilij ijcuín:

—Tocnihuan, namejuan de nantepiluan de Abrahám, xicaquican nochi namejuan ten nanquimohuistilijtinemij Totajtzin Dios. Porín Dios techualtitanilij ya ne in Tajtoltzin de Dios ten cualcui nemaquixtilis. <sup>27</sup> Huan nochi inpueblojyeton de Jerusalén huan in tayecanani, yejuan nijínques amo quixmatque de aconi nojón Jesús. Huan hasta amo no cajsicamatíaj in tajtolme ten den huejcautanahuatiani de Dios ten quileerohuilijayaj tech in tonal de nesehuilis campa ne nintiopanuan. Huan cuac in tayecanani quimictijque Jesús, ijcuacón quitamichiuque ya nochi ten ne achtopa ya in tanahuatiani quijcuilocoj que monequi mochihuaqui. <sup>28</sup> Huan masqui amo teyi quiajxilijque de nitajtacol Jesús tenica monequi quimictisque, pero ne tayecanani ipa quitajtanilijque Pilato que ma tanahuati ma quimictican Jesús. <sup>29</sup> Huan quimictijque ya Jesús huan quitamichiuque ya nochi ten moijcuilocoj ya tech in Tajcuilola-

matzin ne achtopa ya que ijcón quipanos Jesús. Ijcuacán quitemohuijque ninacayo campa in colotzin huan cuiyacque quitalpachotoj. <sup>30</sup> Pero in Totajtzin Dios quipanquixtij yoltoc ne Jesús intzalan in ánimajme. <sup>31</sup> Huan in Jesús míac tonalme monex-tijtinemic inixpan imomachtijcahuan. Porín yejuan quisehuicatinemíaj Jesús desde cuac Yejuatzin quipehualtij nitequiu campa Galilea hasta ajsic Jerusaléncopaca. Ica ya nojón axcan ne imomachtijcahuan yejuan quitetapohuijtinemij intzalan in pueblojuani de aconi Jesús.

<sup>32</sup> Huan no Pablo quinilij ijcuín:

—Ica ya nojón tejuan tamechtapohuíaj de nijín yancuic Tajtoltzin ten Totajtzin Dios quinteniluijca ya tohuejcautauan. <sup>33</sup> Huan yejuan tohuejcautatuan Dios quinteniluijca ya de que hualas Jesús Temaquixtijque huan tejuan tiiconehuan de yejuan tohuejcautatuan. Ica ya nojón cuac Dios quitamichihuaco ya ne ten quiniluijca ya, ijcuacán Yejuatzin quipanquixtij Jesús yoltoc intzalan in ánimajme. Huan mochi-huac ijcón queme ijcuiliutoc tech ica ome Salmos ijcuín: “Tejuatzin Tinoconetzin. Huan Nejuatzin nimitzenextiti axcan inixpan in pueblojuani para ma ijcón quimat-ican que Tejuatzin Tinoconetzin”. <sup>34</sup> Huan Totajtzin Dios technextilijtoc ya tech Itajcuilolamatzin que Yejuatzin ipa quipanquixtis Niconetzin Jesús yoltoc intzalan in ánimajme. Huan no technextilijtoc que itacayo de Jesús amo palanis. Huan ijcón ticmatij porín in Isaías quijcuiloco ijcuín: “Namechtayocolis nochi tatiochihualis huan teicnelilis ten nicteniluijca ya in rey David”. <sup>35</sup> Ica ya nojón no ijcuiliutoc ya tech ocsé Salmos ten quijtoa ijcuín: “Tejuatzin amo ticahuas ma palani inacayo de motasojtequiticau tech in ánimajtecoch”.

<sup>36</sup> Huan hueyi melau que in rey David tequitinemic intzalan in pueblojuani judíos ijcón queme Dios quimonequiltiaya. Huan ijcón yejua momiquilij huan ya-jqui sen yetoto ihuan ne ihuejcautatuan. Huan de ompa inacayo de David palanito. <sup>37</sup> Pero itacayo de Jesús amo palanito porín Totajtzin Dios quipanquixtij yoltoc intzalan in ánimajme. <sup>38</sup> Huan xicmatican, namejuan nantocnihuan, que Totajtzin Dios namechyequilijtinemi que Yejuatzin namechtapojpoluis namotajtacoluan ica itechcacopaca Jesús porín Jesús quixtahuac ya in tajtacol. <sup>39</sup> Huan nochi neques ten tacuautamatque ihuan Jesús Cristo Temaquixtijque, yejuan nojonques amo mon-equi quitacamatisque oc ne tanahuatilme de Moisés. Pero xicmatican que ica itech-cacopaca Jesús, Dios cuali namechtojtomilis den tanahuatil de Moisés, huan cuali namechtapojpoluis de namotajtacoluan. <sup>40</sup> Ica ya nojón namechilía ximoyecpiacan para ma amo namopan huetzi nijín tatzacuultilis de Dios ten quijtoaj in huejcau-tanahuatiani cuac quijcuilojque ijcuín:

<sup>41</sup> Xiquitacan, namejuan nantacajcayahuani, xictetzaucaitacan de ne ten mochihuati oc.

Huan ijcón xiixpolihuican, porín Nejuatzin Nión Dios, huan nicchihuati se mohuis-catequit tech namonemilispán.

Huan ijcón masqui acsame namechtapohuisque ten nicchihuati, pero namejuan amo nanquineltocasque.

<sup>42</sup> Huan cuac in Pablo huan ocsequin itequiticaicnihuan quisque ya tech in tiopan de judíos, ijcuacán in taca ten amo pohuij judíos, yejuan nojonques quitatautijque Pablo que ipan chicueyi tonal que ma ocsepa yejua quinnojnotzani ica nojón taj-tolme den quinnojnotzac ya. <sup>43</sup> Huan cuac motamixexeloyque ya de mosentilijca tech in tiopan de judíos, ijcuacán míac judíos quitacamamatque in tanojnotzalis ten

quicaquilijque huan quitoclijque Pablo huan Bernabé. Huan no ijcón quichiuque míac taca ten ne achtopa ya amo catcaj judíos, pero yejuan axcan quitacaminemij in taneltochalis huan tanahuatilme den judíos. Huan in Pablo quinyolmajxitiaya que nachipa ma yec tacuautamatican tech in teicnelilis de Totajtzin Dios.

<sup>44</sup> Huan ipan chicueyi tonal tech ne ocsé tonal de nesehuilis, ijcuacán nochi in pueblojuani de Antioquía mosentilijque para yejuan quicaquitihue in Tajtoltzin de Dios. <sup>45</sup> Huan cuac in tayecanani judíos quitacque ya que huel míac tagayot mosentilijque, ijcuacán yejuan quinueyinejxicoliayaj huan peuque quitajtolixnamiquíaj in Pablo huan no cuijuicaltiayaj. <sup>46</sup> Huan ijcón in Pablo huan Bernabé peuque moyolchicahuaj huan quinnanquilijque ijcuín:

—Huan melau semi monequi ma se namechnojnotzaqui ica in Tajtoltzin de Dios porín namejuan nanpoutinemij ihuan in pueblojuani judíos. Pero queme niqiztoc que amo nanquinequij nanquiselisque nijín Tajtoltzin de Dios, no ijcón niqiztoc que namejuan nanmopohuaj que amo quinamiqui nanquiselisque in yec nemilis nachipa. Ica ya nojón axcan tejuan tiyohue tiquinnojnotzatij in tagayot ten amo judíos. <sup>47</sup> Huan ijcón ticchihuatiy porín Totecotzin technahuatiy ya cuac techilij ijcuín:

Namechijitac huan namechtalij ya queme yesquía tanexme para nanquinyoltahuilisque nochi in tagayot ten amo poutinemij queme judíos.

Huan ijcón nanquintapohuijtinemisque in tagayot de nochi senmanahuac de queniu yejuan huelis quiajsisque ne nemaquixtilis.

<sup>48</sup> Huan ijcón in tagayot ten amo poutinemij queme judíos, cuac yejuan quicacque nijín tanojnotzalis de Pablo, ijcuacán yejuan mohueyiyolpactijque. Huan ijcón cachi oc quijtoayaj que in Tajtoltzin de Dios yejua ya cachi cualtzin. Huan ijcón no tacuautamatque ihuan Cristo nochi neques ten Dios quinijitac ya para ma quipiacan ne yec nemilis nachipa.

<sup>49</sup> Huan melau ijcón quitetapohuijtinenque in Tajtoltzin de Dios nochi campa ititalanal de Antioquía de Pisidia. <sup>50</sup> Pero in tayecanani judíos quinnojnotzque sequin sihuame ten taneltocani den tanahuatilme de Moisés huan ten yolcualime. Huan no ne judíos quinyolmajxitiayaj ne sihuame que ma no pehuacan quintajyohuilitcan in Pablo huan Bernabé. Huan no ijcón ne judíos quinyolmajxitiayaj in tequihuani que ma quincocococan in Pablo huan Bernabé. Huan ijcón quichiuque hasta quincalanquixtijque tech ne pueblo Antioquía. <sup>51</sup> Ijcuacán in Pablo huan in Bernabé mometzteztelozque para ma huetzi in talnex nintegactampa, para ijcón quinextijque que ne tagayot quimajpeuque ya in Tajtoltzin de Dios. Huan de ompa Pablo huan Bernabé mohuiyacque hasta campa pueblo de Iconio. <sup>52</sup> Pero imomachtijcahuan de Jesús ten calyetoyaj tech in pueblo Antioquía, yejuan nojonques mohueyiyolpactiayaj huan Dios quinyolpepexocaltijtiaya ica in Yecticatzin Espíritu.

### Pablo huan Bernabé ajsitoj tech pueblo Iconio

**14** Huan mochihuac ompa tech in pueblo de Iconio que in Pablo huan Bernabé calacque tech in tiopan den judíos huan peuque quinnojnotzayaj in tiopan tacaquini ica in Tajtoltzin de Dios. Huan ijcón míac tagayot tacuautamatque ihuan Cristo. Huan amo sayó judíos tacuautamatque. Ta, no tacuautamatque in tagayot ten amo poutinemij queme judíos. <sup>2</sup> Pero sequin taca judíos amo tacuautamatque ihuan Cristo. Huan yejuan nojonques quinnojnotzque huan quintajtolmacayaj in tagayot

ten amo judíos que ma yejuan ma quincualancaitacan in tocnihuan taneltocani. <sup>3</sup>Huan masqui quincualancaitayaj, pero Pablo huan Bernabé ompa quipanocque míac tonalme. Huan yejuan tanojnotztinenque ica in Tajtoltzin de Dios ica míac yolchichualis porín yejuan tacuautamatinenque ihuan Totecotzin. Huan Totajtzin Dios quinajsicamatiltij in tagayot que hueyi melau cualcui teicnelilis nintanojnotzalis de Pablo huan Bernabé. Huan no Totajtzin Dios quinmactilij Pablo huan Bernabé in huelilis para ma quichiutinemican in nescayome huan mohuiscatequime.

<sup>4</sup>Pero in pueblojuani de Iconio mocualancajexelojque ica itanojnotzalis de Pablo. Ica ya nojón sequin pueblojuani mohuicatinenque ihuan in tatitanilme de Cristo. Huan ocsequin taca mohuicatinenque ihuan in tayecanani judíos. <sup>5</sup>Huan ijcón mochihuac que in tayecanani judíos mosenyectencauque ihuan in tequihuani griegos para quinuijuicaltisque huan para quintepoxonisque in tatitanilme de Cristo. <sup>6</sup>Huan cuac ejcosquía in tonal para quintepoxonisque, ijcuación Pablo huan Bernabé quinmatiltijque de toni inpan mochihuasquía. Ica ya nojón yejuan cholojque tech nojón pueblo Antioquía huan yajque ajsitoj campa pueblojme Listra huan Derbe ten itatilanahuan Licaonia. <sup>7</sup>Huan de ompa tech nochi in pueblojme ten quiyehualojtoyaj in Listra huan Derbe Pablo huan Bernabé ompa no peuque tanojnotztinemij ica in Tajtoltzin de Dios den cualcui ne nemaquixtilis.

### Nican Pablo quitepoxonijque campa pueblo Listra

<sup>8</sup>Huan tech nojón pueblo ten monotza Listra calyetoja se tagat ten amo huel nejnemic. Huan yejua tocotzyetoja san porín ipa ijcón yolic metzcoxo. Ica ya nojón amo queman huel nejnemic. <sup>9</sup>Huan ne tagat coxo nochi quicactoya tenica tanojnotzaya Pablo. Huan ijcón in Pablo quisenixitac in cocoxque. Huan Pablo cajsicatic que ne tagat quiapiaya ne tacuautamatilis para huelisquía pajtis. <sup>10</sup>Ijcuación in Pablo quichicaucauilij in cocoxque ijcuín:

—Ximomelaxquetza.

Huan ijcón in tagatzin ajcotzicuinic huan pehuac nenemi. <sup>11</sup>Huan cuac in tagayot quitacque ya que Pablo quipajtij ne cocoxque, ijcuación yejuan peuque tzajtziáj ica ne tajtolme ten tajtoaj in pueblojuani de Licaonia huan quijtoayaj ijcuín:

—Xiquitacan san, in tatadiosme mochihuacaj taca huan hualtemocque para nentinemisque tohuan.

<sup>12</sup>Ica ya nojón yejuan quitocaytijque in Bernabé se tatadios ten monotza Júpiter. Huan in Pablo no quitocaytijque que yejua no se tatadios ten monotza Mercurio. Huan ijcón quitocaytijque Pablo porín yejua tayecantinemic tech in tanojnotzalis.

<sup>13</sup>Huan ne tiopixcat de ne tatadios Júpiter quiapiaya nitiopan ne campa pueblojten. Huan yejua quinalcuic sequi toros huan sequi xochitachijchiume. Huan ne tiopixcat ihuan sequin tagayot quinequíaj quinmohuistilisque Pablo huan Bernabé queme yesquía yejuan tatadiosme. Huan no quinequíaj quintemilisque ne xochitachijchiume. Huan no quinequíaj quinmictilisque ne toros para ijcón quinmohuistilisque.

<sup>14</sup>Pero Bernabé huan Saulo yejuan in tatitanilme de Cristo. Huan cuac cajsicatic que ya que in tagayot quinequíaj quinmohuistilisque, ijcuación yejuan peuque quitzajtzyayanaj nintilma porín in tagayot quimohuistilisque Dios. Huan ijcón Bernabé huan Pablo motoquijtiquisque intzalan in tagayot huan quintzajtziayaj ijcuín:

<sup>15</sup>—Namejuan tagayot, ¿queyé ijcón nanquichihuasnequij? Amo xitechmohuistilican porín tejuan no titaca san queme namejuan. Huan ticpiáj totalnamiquilis ijcón



queme namejuan. Ica ya nojón tejuan tihualajque para tamechnejmachtisque ica in Tajtoltzin de Dios de que monequi xicahuacan nijín tatadiosme ten amo cualtíaj. Huan no tamechilíaj que monequi xicmohuistilican in Totajtzin Dios ten nachipa yoltica. Porín Yejuatzin quichijchihuac in eluiyac huan in talticpac huan in hueyi ame. Huan no Yejuatzin quichijchihuac nochi ten nentinemij campá eluiyac huan nican talticpac huan campá huejueyi ame. <sup>16</sup> Huan tech in tonalme ten panocque ya, Totajtzin Dios quintecahuilij in talticpacuani que ma yejuan quitemotij queniú para nentinemisque tech ninójpán de yejuan nintanejnequilis. <sup>17</sup> Pero Totajtzin Dios ipa quinnestilijtihualaya in talticpacuani aconí Yejuatzin cuac Yejuatzin quinpalehuijtiaya. Huan no Yejuatzin quinqualtitaniliaya in quioutzin huan quinnestilijtiaya cuajcuali taquilome. Huan no Yejuatzin namechmactiliaya huel míac in tacualis para nanixuitosque huan para nanmoyolpactijtosque.

<sup>18</sup> Huan ijcón in Pablo cuac quintamiilij ya nochi nijín tajtolme, ijcuacón semi ohui para quintaneltoctij in tagayot que ma amo quinnestilican in toros huan ma amo quinnestilican yejuan queme tatadiosme. <sup>19</sup> Ijcuacón nojón momento ejcotihuetzque sequi tayecanani judíos ten hualayaj de Antioquía huan de Iconio. Huan yejuan nojonques cachi oc quincualancacalaquijque in tagayot de ne Listra para ijcón ma quitepoxonican in Pablo. Huan cuac quitamitepoxonijque ya Pablo, ijcuacón yejuan quiyolnemiliayaj que xa quinnestilijque ya Pablo. Ica ya nojón quinnestilijque in Pablo huan quicahuatoj hasta ne caltenpan den pueblo. <sup>20</sup> Pero cuac in taneltocani nochi quiyehualojtoj in Pablo, ijcuacón yejua meutiquisac huan ocsepa calaquito tech nojón pueblo. Huan ijcón imostica in Pablo huan Bernabé quisque huan yajque campá pueblo Derbe. <sup>21</sup> Huan ompa quitepohuiayaj in Tajtoltzin de Dios ten cualcui ne nemaquixtilis. Huan quinnestilijaj míac tagayot ma tacaamatican ihuan Dios. Huan ijcón cachi satepan ocsepa yajque tacaipanotoj campá pueblojme de Listra huan Iconio huan Antioquía de Pisidia. <sup>22</sup> Huan tech nojón pueblojme in Pablo quinyolchicahuaya in taneltocani huan quinyolmajxitiaya que ma yejuan quinnestilijcan ya ma tacaumatamiatcan ihuan Dios. Huan Pablo no quinnestilij in taneltocani ijcuín:

—Huan como namejuan nanquiyolnejnequij de que Dios ma momasouto namopan ica ichicahualis, ijcuacón monequis xitaxicojtiyacan ica míac tataman tajyohuilis ten hualas namopan.

<sup>23</sup> Huan tech cada pueblo campá mosentiliayaj in taneltocani, ompa quinnestilijacque sequin tiopan tayecanani queme tiopan huehuentzitzin para quiyecantinemisque in tocnihuan. Huan ijcón cuac tamitatatautijque ya huan motamisauque ya, ijcuacón quinnestilijque imaco Totecotzin ne tiopan tayecanani para que Dios ma quinnestilijcantiu porín yejuan tacaumatamatque ya ihuan Dios.

### **Pablo huan Bernabé ocsepa mocuepaj campá hualeuque tech pueblo Antioquía de Siria**

<sup>24</sup> Huan cuac Pablo huan Bernabé quisque ya de Antioquía de Pisidia, ijcuacón panotiyajque campá nochi itatilanal de Pisidia huan ijcón hasta ajsicque campá Panfiliajcopaca. <sup>25</sup> Huan de ompa tanojnotztinenque ica in Tajtoltzin de Dios campá pueblo de Perge. Huan de ompa ocsepa yajque ajsito campá pueblo Atalia. <sup>26</sup> Huan ompa calacque tech in barco huan yajque ajsitoj campá pueblo Antioquía de Siria. Porín tech ne pueblo Antioquía in taneltocani quinquemactijcay ya in Pablo huan

Bernabé. Huan no ompa motatautilijcaj ica por yejuan que ma Dios quinyolicnelijtinemi tech nintequiu. Huan axcan in Pablo huan Bernabé mocuepque ocsepa campa quisteucaj porín quitamichihuatoj ya nintequiu. <sup>27</sup> Huan cuac ejojque ya in Pablo huan Bernabé tech ne pueblo de Antioquía, ijcuación mosentilijque nochi in tocnihuan taneltocani. Huan ijcón in Pablo huan Bernabé nochi quintapohuijque ten Dios quichiutinemic ica por yejuan. Huan no quintapohuijque de queniu Dios quinyolyemanij huan quinyoltapohuaya in taca ten amo judíos para ma yejuan ma tacuautamatiyacan ihuan Cristo. <sup>28</sup> Huan ijcón ompa tech in pueblo Antioquía de Siria, Pablo huan Bernabé calyetoyaj mías tonalme ihuan in tocnihuan taneltocani.

### Nican mosentilijque in tatitanilme de Cristo ihuan in taneltocani campa pueblo Jerusalén

**15** Huan tech nojón tonalme sequi taca hualeuque campa Judeajcopaca huan asitoj tech pueblo Antioquía de Siria. Huan yejuan nojonques peuque quimachtijtinenque in tocnihuan ijcuín:

—Como amo nanquitacamati in tanahuatil de Moisés huan amo nanmotecahuilíaj que ma namechnescayotican tech namonacayo, ijcuación amo huelis nanquiplasque ne nemaquixtilis de Dios.

<sup>2</sup> Huan ijcón in Pablo huan Bernabé mocualancatajtoltiayaj ihuan ne ocsequi huan quintajtoltehuijque ne taca de Judeajcopaca. Huan queme amo huelic moyecauque, ica ya nojón in taneltocani de Antioquía quinijitacque Pablo huan Bernabé huan ocsequin taneltocani para ma yacan campa ne pueblo Jerusalén. Huan cuac ajsicque ompa, ijcuación ompa quisepanixejecojque ihuan in tatitanilme de Cristo huan inuan in tiopan huehuentzitzin nijín tamachilis ten quitenextilijtinemij ne tamachtiani ten pohuij Judeajcopaca. <sup>3</sup> Ica ya nojón in taneltocani de Antioquía quintitanque in Pablo huan in Bernabé huan ocsequin tasoicnihuan ma yacan Jerusaléncopaca. Huan tech nojón ninyalis, yejuan panotihuetzque campa pueblojme de ititalanaluan Fenicia huan Samaria. Huan ompa yejuan quintapohuiyayaj in taneltocani de queniu in taca ten amo judíos quincauque nintatadiosuan huan tacuautamatque ihuan Totajtzin Dios. Ica ya nojón nochi in tocnihuan mohueyiyolpactiyaj cuac quicaquíaj que ijcón mochiutoya.

<sup>4</sup> Huan cuac in Pablo huan Bernabé ajsicque ya campa pueblo de Jerusalén, ijcuación nochi in tatitanilme de Cristo huan in tiopan huehuentzitzin quintajpalojque ica paquilis. Huan ijcón Pablo huan Bernabé quintapohuijque nochi ten Dios quichiutinemic ya ica por yejuan. <sup>5</sup> Ijcuación sequin taneltocani ten taneltocatinemíaj oc queme fariseos, yejuan nojonques moquetzque inixpan nochi in tocnihuan huan quinilijque ijcuín:

—Semi monequi ma xiquinnescayotican tech ninnacayo in taneltocani ten amo judíos. Huan no semi monequi que xiquinnahuatlican que ma quitacamatinecan nochi in tanahuatilme de Moisés.

<sup>6</sup> Ijcuación in tatitanilme de Cristo huan in tiopan huehuentzitzin mosentilijque para quisepanixejecosque nijín tamachtilis. <sup>7</sup> Huan cuac motamitajtoltehuijque ya, ijcuación in Pedro moquetzac huan quinilij ijcuín:

—Tocnihuan, namejuan cuali nanquimatij ya que ne tonal ya Dios nechijitac huan nechtalij para ma niquinnojnnotztinemi in taca ten amo poutinemij queme judíos ica in Tajtoltzin de Dios ten cualcui ne nemaquixtilis. Huan ijcón yejuan ma quinel-

tocacan in Tajtoltzin de Dios. <sup>8</sup>Huan Totajtzin Dios cuali techyolojixmatic. Huan no Yejuatzin techmatiltij que Yejuatzin quincualtagaitac ne taca ten amo judíos como yejuan yec tacuautamatij ihuan Cristo. Huan ijcón Yejuatzin quinmactilij ya in Yecticatzin Espíritu ijcón queme tejuan techmactilij ya. <sup>9</sup>Porín Totajtzin Dios amo techchichicotasoja tejuan ihuan yejuan ten amo poutinemij queme judíos. Ta, yejuan Dios quinyolchipahuac ya ica por ne tacuautamatilis ten quiapiacque yejuan. <sup>10</sup>Huan axcan, namejuan, ¿queyé nanquixnamiqij Dios itequiu? Huan, ¿queyé nanquineqij nanquinchihualtisque nijín taneltocani que ma quitacamatican in tanahuatil de Moisés? Huan ica nijín tanahuatil nanquichihuaj queme yesquía nanquintamamaltíaj in taneltocani ica ne hueyi eticayot, queme yesquía se yugo nanquintamamaltíaj in taneltocani. Huan nojón eticayot den tanahuatil de Moisés hasta nión no in tohuejcautatuan huan nión tejuan huelij ticajsicacamatiyohue. <sup>11</sup>Huan amo ijcón monequi. Ta, ticajsicamatij que Totecotzin Jesucristo techmaquixtis ica ne iteicnelilis. Huan Yejuatzin quinicnelij yejuan ijcón queme tejuan no techyolicnelij.

<sup>12</sup>Ijcuacán nochi in tagayot motentamatilijque san. Huan quinquaculiyay in Bernabé huan Pablo ten yejuan quintapohuiayaj de queniu Dios quichiutinemic huejueyi nescayome huan mohuiscatequime ica por yejuan cuac yejuan quinnojnnotztinque in taca ten amo pohuij queme judíos. <sup>13</sup>Huan cuac in Pablo huan Bernabé quintamiluijque ya in tagayot, ijcuacán se tatitanil de Jesucristo ten monotza ya Jacobo, yejua moquetzac huan quinilij in tagayot ijcuín:

—Nocnihan, xinechyeaquilican ten namechiliti. <sup>14</sup>In Simón Pedro techtapohuij ya de queniu Dios yequinica quinyolicnelij in taca ten amo poutinemij queme judíos. Huan Dios quinijitac sequin san ma mochihuacan ipueblojcahuan para quitasojtasque itocaytzin de Yejuatzin. <sup>15</sup>Huan nijín ten Dios quichihuac sansé san yohui ihuan ne tajtolme ten quijtocoj ne huejcautanahuatiani cuac yejuan quiqcuilocoj tech in Tajcuilolamatzin ijcuín:

<sup>16</sup>Huan satepan nimohualcuepas.

Huan ocsepa nicajocuis huan nicyancuicatalis ichan den rey David den huejuelihuic ya.

Huan nicyancuicaiscaltis ne ichan de David ica ten mocahuac huan ijcón ocsepa niquetzas.

<sup>17</sup>Huan ijcón nicchihuas para ma nochi in talticpacuani ma nechylotemocan de Nejuatzin niin Tecotzin.

Huan ijcón nicchihuas para ma nochi pueblojuani ten amo poutinemij queme judíos ma no ijcón nohuan ma motatautilican ica por notocaytzin.

<sup>18</sup>Huan ijcón mochihuas queme tanahuatij Totecotzin, porín Yejuatzin techmatiltij ya nochi nijín tamachilisme desde ne huejcau ya.

<sup>19</sup>Huan no in Jacobo quinilijtoc ijcuín:

—Ica ya nojón namechilía que niquixejeco que ma amo xiquincuejmolojtinemican in taneltocani ten amo poutinemij queme judíos, porín yejuan quincaque ya nintatadiosuan huan tacuautamatque ya ihuan Cristo. <sup>20</sup>Ta, namechilía que xiquinijcuilohuilican ica se amatzin campa ixnesis nijín tanahuatilme que ma amo quicucan nacat tenica quinmohuistilijque ya tatadiosme; huan ma amo aquen tagayot oso sihuat ma sencohtinemican como amo ihuan namicque; huan ma amo quicucan nacat de ne tapial ten amo quiquixtilíaj nintzontecon cuac quinmictíaj; huan ma amo no quicucan esti. <sup>21</sup>Huan ijcón namechilijtoc xicchihuacan porín amo tic-

nequij tiquinyolxocolisque ne taca judíos ten desde ne huejcau ya tanextilijtihuitze ica in tanahuatil de Moisés tech nochi pueblojme. Huan yejuan quinleerohuilijtime-  
mij in tanahuatil de Moisés tech nintiopanuan tech cada tonal de nesehuilis.

<sup>22</sup> Ijcuación nijín tamachtilis quinyolpactij in tatitanilme de Cristo huan in tiopan huehuentzitzin huan nochi in taneltocani. Ica ya nojón yejuan moyectencauque de quiniñitasque sequin taneltocani para quintitanisque campa pueblo de Antioquía de Siria, ma quinsehuyacan in Pablo huan Bernabé. Huan ijcón quichiuque quiniñitacque in Judas ten cojpacatocaytíaj Barsabás huan no quijitacque in Silas. Yejuan nojonques ipa tayecantinemfaj ihuan in tocnihuan taneltocani. <sup>23</sup> Huan ijcón in tiopan tayecanani quintoctijque se amat inmaco in Pablo huan ocsequin itequit-icaicnihuan. Huan ne amat quijtoaya ijcuín:

“Tejuan titatitanilme de Cristo huan titiopianhuehuentzitzin huan tinamoicnihuan. Nochi tejuan tamechtajpaloaj namejuan nantaneltocani nantocnihuan ten amo nantoputinemij queme judíos ten ompa nancalyetocque campa pueblo Antioquía de Siria. Huan no tiquintajpaloaj neques ten calyetocque campa pueblojme ten nititalanal in Siria huan de Cilicia. <sup>24</sup> Tejuan titecaquilijtinemij que sequin tamachtiani quisque nican Jerusalén para yajque namechcujmolojtihue ica nintanextililisan. Huan masqui yejuan quisteuque pero amo tejuan totencopaca tanextilijtinemij. Huan yejuan namechcuatapololtíaj san ica nintajtoluan cuac namechilía que monequi ma ximotecahuilican ma namechnescayotican tech namonacayo huan monequi xictacamatican in tanahuatil de Moisés. <sup>25</sup> Ica ya nojón ticyoluelitacque queme ticsepanixejecoque huan timoyectencauque de que ma tiquiniñitacan ya sequin tocnihuan huan tiquintitanque para ma yejuan namechnojnotzatij. Huan nijín tocnihuan quinsehuicaj totasojtequiticahuan Bernabé huan Pablo. <sup>26</sup> Porín nijín totasojtequiticahuan Bernabé huan Pablo yejuan motequicuicque huan motencauque que masqui ma quipanocan míac tataman tajyohuilis para tanojnotztinemisique ica in chichahualis den tocaytzin de Totecotzin Jesucristo. <sup>27</sup> Ica ya nojón no tamechontitanilíaj in Judas huan Silas no ten yejuan namechnojnotzasque namoixpan para namechyecmejmela huilisque nochi totanahuatiluan. <sup>28</sup> Huan ijcón queme quimonequiltía in Yecticatzin Espíritu, huan tejuan no ijcón totanejnequilis, que amo ticnequij tamechtalilisque ica tensá tanahuatil queme yesquía se hueyi eticayot. Ica ya nojón tamechilía que amo monequi xictacamatinemican in tanahuatil de Moisés. Ta, sayó monequi que xictacamatiyacan nijín tanahuatilme tech nijín toamatajcuilol ixnesi: <sup>29</sup> Amo xicuacan ne tacualis tenica quinmohuistilijque ya in tatadiosme; huan amo xicuacan esti; huan amo no xicuacan nacet de ne tapialme ten cuaestemitocque ten amo quinquixtilíaj nintzontecon cuac quinmictíaj; huan amo no aquen tagayot oso sihuat ma sen cochtinemican como amo ihuan namicque. Huan como nanquintacamatiyohue nijín tanahuatilme ten ixnesi tech toamatajcuilol, no ijcón se hueyi cuali como ijcón nanquichiutiyohue. Huan ma Dios namechontiochiutiu”.

<sup>30</sup> Huan ijcón in tocnihuan de Jerusalén cuac quititanque ya Judas huan Silas, ijcuación yejuan quinsehuyiacque Pablo huan Bernabé. Huan ijcón sen ajsitoy campa pueblo Antioquía de Siria. Huan ompa tech in pueblo de Antioquía mosentilijque nochi in tocnihuan. Huan de ompa in tatitanilme quinmactilijque ne amat tajcuilol ten quinqualmactilijque ne campa pueblo Jerusalén. <sup>31</sup> Huan cuac in tocnihuan quileerojque ya in amat, ijcuación yejuan moyolpactijque porín nojón amat quinqualcuilíaj se yolsehuilis huan se yolmajxitilis. <sup>32</sup> Huan in Judas huan Silas quiselijti-

nenque tanahuatilme ten Totajtzin Dios quinmactiliayaj. Ica ya nojón yejuan cachi oc quinyoltalijque huan quinyolchicauque in tocnihuan de Antioquía ica míac tata-man ne yolmajxtilisme ten Dios quinmactiliaya. <sup>33</sup>Huan ijcón in tatitanilme de Cristo ompa quipanocque míac tonalme. Huan cuac quitamichiuque ya nintequiu, ijcuacón quinequáj quisasque para Jerusalén. Ica ya nojón in tocnihuan de Antioquía quinnanahuatijteuque huan quinilijque ijcuín:

—Ma Dios namechyecantiu huan ma namechyolsehuitiu.

<sup>34</sup>Huan masqui ijcón quinilijque, pero in Silas quinequía mocahuas oc campa Antioquía de Siria. <sup>35</sup>Huan no ijcón Pablo huan Bernabé mocauque campa Antioquía huan quinmactijtenque huan quinnojnnotztinenque ocsequin tagayot ica in Tajtoltzin de Dios ten cualcui ne nemaquixtilis.

### **Pablo quipehualtij itequiu ica ojpa queme tatitanil de Dios campa analtecocayome**

<sup>36</sup>Huan cuac panocque ya míac tonalme, ijcuacón Pablo quilij in Bernabé ijcuín: —Axcan ocsepa tiyohue tiquincalpanotij ne tocnihuan tech nochi ne pueblojme campa tiquinnojnnotzque ya ica in Tajtoltzin de Totecotzin, ma tiyacan ma tiquinitatij queniu yetocque.

<sup>37</sup>Huan in Bernabé yejua quinequía ma quisehuiyacan oc in Juan, ten cojpacatocaytíaj Marcos. <sup>38</sup>Pero in Pablo amo cuelcayic que ma ocsepa quinsehuican in Marcos, porín yejua ya ne Marcos ten quinalcauteuca campa pueblo Panfilia. Porín ne Juan Marcos amo quinequic ihuan tequitinemis oc. <sup>39</sup>Ica ya nojón Bernabé huan Pablo mocualantijque huan motajtoltehujque huan mosesecocauque se huan ocsé. Huan ijcón in Bernabé quisehuiyac ne Juan Marcos huan yejuan calacque tech se barco huan yajque ajsitoj campa tal ten monotza ya Chipre. <sup>40</sup>Pero in Pablo quijitac Silas que ma ihuan tequititi. Huan ijcón in tocnihuan de Antioquía motatautalijque ihuan Dios que ma Dios quinyecantiu huan ma quinyolicnelijtiu nojón omen. <sup>41</sup>Huan yejuan panoque tech nochi in pueblojme ten itatilanahuan de Siria huan Cilicia huan quinyolmajxitijtenque nochi in taneltocani de nehuincopaca.

### **Nican Pablo moajsic ihuan Timoteo huan Silas**

**16** Huan ijcón in Pablo huan Silas ejcocque campa pueblojme Derbe huan Lистра. Huan ompa cajsitoj se taneltocacque de Jesucristo ten monotza Timoteo. Huan yejua catca teconeu de se sihuat judía ten no taneltocacque de Jesucristo. Huan itat de Silas, yejua se griego. <sup>2</sup>Huan in taneltocani tocnihuan ten calyetoyaj campa pueblojme Lистра huan Iconio, yejuan nojonques quicualtagaitayaj in Timoteo que yejua yec taneltocacque de Jesucristo. <sup>3</sup>Huan ijcón in Pablo quineyic que in Timoteo ma quinsehuica. Ica ya nojón Pablo quinahuatij in Timoteo que ma motecahuili que ma quinescayotican tech ninacayo. Huan melau ijcón quichihuac para amo quinyolxocolisque in judíos ten ompacahuín calyetoyaj. Porín nochi in pueblojuani quimatinemíaj que in Timoteo itat yejua se griego. <sup>4</sup>Huan tech nochin pueblojme campa panoayaj Pablo huan Silas huan Timoteo, yejuan quinmactiyaj huan quinnextiliayaj in taneltocani ma quintacamatinemij nochi in tanahuatilme ten quinalmactilijque in tatitanilme de Cristo huan in tiopan huehuentzitzin de Jerusalén. <sup>5</sup>Huan ica nijín ne yolmajxtilis ten quinaltitanilijque, ijcuacón nochi in

tocnihuan cachi oc yec tacuautamatque de Cristo. Ica ya nojón cachi oc momiactil-ijtiyaj in taneltocani.

**Pablo tajtachíac queme yesquía cuac tacochitztoc huan  
quitac se tagat den pohui campa pueblo Macedonia**

<sup>6</sup> Huan in Yecticatzin Espíritu amo quincahuac in tatitanilme de Cristo ma tanojnotztinemican ica in Tajtoltzin de Dios campa itatilanalan de Asiajcopaca. Ica ya nojón in tatitanilme de Cristo yejuan panocque tech in talme ten pohuíaj Frigia huan Galacia. <sup>7</sup> Huan ajsitiyaj ya campa talme ten pohuíaj Misia. Huan ompa no quinequíaj calaquitihue campa talme ten pohuíaj Bitinia, pero in Yecticatzin Espíritu amo quincahuac ma yacan. <sup>8</sup> Ica ya nojón yejuan sayó quipanahuijque in talme de Misia huan ajsitoj campa pueblo Troas. <sup>9</sup> Huan ompa in Pablo tajtachíac queme yesquía cuac tacochitztosquía. Huan yejua quitac que se tagat ijcatoc iixpan ten poutoc campa talme de Macedonia huan yejua quitatautiayaj Pablo ijcuín: “Tejua, xionanalpano huan xihuiqui nican hasta Macedoniajcopaca huan xitechpalehuiqui”. <sup>10</sup> Huan cuac in Pablo quitamiitac ya ne tajtachialis, ijcuacón tejuan timoyectatalijque para tiyasque ne Macedoniajcopaca. Porín cuali ticajscamatque que Totajtzin Dios techyolnojnotzac ya que ma tiyacan ma tiquinnojnotzati ne pueblojuani de Macedoniajcopaca ica in yancuic Tajtoltzin ten cualcui ne nemaquixtilis.

**Quintzacuacque queme preso Pablo huan Silas campa pueblo Filipos**

<sup>11</sup> Ijcuacón ticalacque tech in barco campa pueblo Troas, huan tiyajque titame-lauque campa pueblo Samotracia. Huan ocsepa imostica tiajsicque campa pueblo de Neápolis. <sup>12</sup> Huan de ompa tiquisque de Neápolis huan tiajsitoj campa pueblo Filipos. Huan in Filipos yejua in pueblo cachi tayecanque de ne Macedonia. Huan ne pueblojuani de Filipos ipa poutinemíaj queme ipa ipueblojcahuan de Roma. Huan ompa tipanotoj sequi tonalme. <sup>13</sup> Huan tech se tonal de nesehuilis tiquisque den pueblo campa se atenteno campa tejuan tiquixejejoayaj que acsame ompa motatautilijtoque ihuan Dios. Huan ijcón ompa timotalitoj huan tipeuque tiquinnojnotzaj ica in Tajtoltzin de Dios sequin sihuame ten ompa mosentilijcaj ya. <sup>14</sup> Huan se sihuat ten monotza Lidia, yejua ten ipuebloj Tiatira huan yejua itequiu quiplaya de quina-macatinemis sequi tilma den semi cualtzitzin ten moradojtic. Huan yejua ipa quiy-olmohuistiliaya Totajtzin Dios. Huan in Lidia cuac quicactoya in Tajtoltzin de Dios, ijcuacón Yejuatzin quiyolyemanij huan quiyoltapoj para huelis cajscamatis huan quitacamatis tenica in Pablo quinojnotzaya. <sup>15</sup> Huan ijcón cuac quinahuijque ya in Lidia ihuan ichancahuan, ijcuacón in Lidia techtatautiaya huan techiliaya ijcuín:

—Como namejuan nanquiyequixejecoaj ya que nejua melau se nitaneltocacque ya de Totecotzin, ijcuacón xihualacan campa nochan huan ompa ximocahuacan.

Huan mochihuac que melau santajma techtaneltoctij ma timocahuacan ompa ichan. <sup>16</sup> Huan mochihuac que se tonal cuac tiyayaj ya timotatautilitij, ijcuacón hual quisac den pueblo technamiquito se sihuapil ten quiplaya iyolijtic se amocuali ejecat ten nitequi quichiutinemi adivinos. Huan ne sihuapil catca se tequiticque ten tanamac, huan quitanía huel míac tomin para nipatrones ica ne adivinos. <sup>17</sup> Huan ijcón ne sihuapil pehuac quitoctilía in Pablo huan tejuan no techtoctiliaya. Huan yejua chiscaucatzajtzía huan quijtoaya ijcuín:

—Nijín taca yejuan quitacamatinemij in Totajtzin Dios ten cachi hueyi chiuque, huan nijín yejuan namechtapohuijtinemij in ojtzin ten cualcui ne nemaquixtilis.

<sup>18</sup> Huan ijcón in sihuapil quichiutinemía míac tonalme hasta semi quicuejsoaya ya in Pablo. Ica ya nojón in Pablo moicancuepac huan quilij ne amocuali ejecat ijcuín:

—Ica in chicahualis den tocaytzin de Jesucristo, nimitznahuatía que xihualcalan-  
quisa de niyolijtic nojón sihuapil.

Huan ijcón nojón amocuali ejecat nimantzin hual calanquisac. <sup>19</sup> Pero cuac ipatrones den sihuapil quimatque ya que quisac ya in amocuali ejecat, ijcuación yejuan cajsicamatine que ne sihuapil amo huelis oc quintatanilijtinemis oc ca tomin. Ica ya nojón ne patrones quinquitzijque in Pablo huan Silas huan quinuiyacque inixpan in tequihuani campa hueyi plaza. <sup>20</sup> Huan ompa quinentextilijque Pablo huan Silas inixpan in tequihuani huan quinilijque ijcuín:

—Nijín taca yejuan poutinemij ihuan judíos. Huan yejuan quincuejmolojtinemij topueblojcahuan. <sup>21</sup> Huan yejuan quinnextilijtinemij topueblojcahuan ma quintacamatinemican sequin tanahuatilme que tejuan amo technamiqui ma ticchiutinemican huan nión no technamiqui ma tiquintacamatinemican porín tejuan tipoutinemij desde ne Roma.

<sup>22</sup> Ijcuación in pueblojuani de Filipos inpan yajque Pablo huan Silas. Huan ijcón ne tequihuani tatitanque ma quintaquenquixtican huan ma quincuapitzacuican.

<sup>23</sup> Satepan cuac quintamicuapitzacuijque ya, ijcuación quincárcelalitoj huan quititanque se cárcel tajpiaque para ma yejuan quinyecpía. <sup>24</sup> Huan cuac in cárcel tajpiaque quimactijque ya ne tanahuatil, ijcuación yejua quincalaquito in Pablo huan Silas hasta tacaltech huan quinmetzcuoutzalancalaquito ompa.

<sup>25</sup> Huan nepa cuac tajcoyohual ya, ijcuación Pablo huan Silas motatatautilijtoyaj huan quicantarohuiliayaj Dios ica himnos. Huan in ocsequin presos quinsencaquiliayaj san. <sup>26</sup> Huan cuac motatatautilijtoyaj ya, ijcuación sepa san tachicaucatalolinic hasta nochi quihuijuixoj in tepan tatzinehualonime den cárcel. Huan tech nojón momento motapouque nochi in puertas tech cárcel. Huan no ijcón tojtomic nochi tepos cadenas ica metztzizicautoyaj nochi in presos. <sup>27</sup> Ijcuación in cárcel tajpiaque ijsac. Huan cuac quitac que nochi in puertas tapotoc ya, ijcuación yejua quipanquixtij imachete huan quinequía momictis. Huan ijcón quichihuac porín quiyolnemiliaya que xa nochi in presos chocholojque ya. <sup>28</sup> Pero in Pablo quichicaucatzajtzilij ne tajpiaque huan quilij ijcuín:

—Amo ximocojcoco tejava san, porín nochi tiyetocque nican.

<sup>29</sup> Ijcuación in tajpiaque nimantzin quintajtaniy ma quimacacan se tanex. Huan ijcón calactihuetzito cárcelijtic huan moucahuihuiyocatiu huan motancuaquetzac inixpan Pablo huan Silas. <sup>30</sup> Huan satepan quinuiyac nepa calan Pablo huan Silas huan ompa quinilij ijcuín:

—Namejuantzitzin, xinechilican toni monequi ma nicchihuas para ijcón nicpías ne nemaquixtilis.

<sup>31</sup> Huan yejuan quinanquilijque ijcuín:

—Xitacuautamati sayó ihuan Totecotzin Jesucristo huan ijcón Totecotzin mitzmaquixtis tejava huan mochanchahuan.

<sup>32</sup> Huan ijcón cachi oc quinojnotzque ne tajpiaque ica in Tajtoltzin de Totecotzin ijcón queme yejua huan ichanchahuan. <sup>33</sup> Huan tech ne mismo tayohuac oc, in cárcel tajpiaque quinixpaquilij in Pablo huan Silas campa ne tacojcolme. Ijcuación quiahui-

jqe in cárcel tajpiaque huan no ijcón quinahuijqe nochi ichancahuan. <sup>34</sup>Huan satepan in cárcel tajpiaque quinuiyac Pablo huan Silas campa ichan huan ompa quintamacacque. Huan ijcón nojón calyeton mohueyiyolpactijque porín quineltocacque ya de Dios. <sup>35</sup>Huan imostica in tequihuani quintitanque in mayolme ma quilítij in cárcel tajpiaque ijcuín:

—Xiquincajcahua ya ma yacan nojón taca judíos.

<sup>36</sup>Ijcuacán in cárcel tajpiaque quilij Pablo ijcuín:

—In tequihuani nechualnahuatijque ya que ma namechcajcahua ya. Ica ya nojón axcan xiquisacan huan cuali xiyacan ya.

<sup>37</sup>Pero Pablo quinilij in mayolme ijcuín:

—Huan tejuan tipueblojuani de Roma. Huan namejuan nantechuitecque senteixteno masqui amo nantechixcomacacque achtopa, ijcón queme tanahuatía in tanahuatil de Roma. Huan no nantechcalaquijque cárcelijtic. Huan axcan nanquinequij nantechcajcahuasque ichtaca. Ta, ma amo ijcón quichihuacan nojón tequihuani. Ta, ma yejuan hualacan ma techquixtiqij den cárcel.

<sup>38</sup>Ijcuacán in mayolme yajque quinmatiltitoj in tequihuani nochi ten quicacque. Huan in tequihuani mohueyiyolmoutiayaj cuac quicacque que Pablo huan Silas catca pueblojuani de Roma. <sup>39</sup>Huan ijcón in tequihuani yajque cárcelteno huan quinilijque Pablo huan Silas ijcuín:

—Xitechontapojpoluican nochi nijín ten tamechchihuilijque.

Huan ijcón quinalquixtijque den cárcel; huan de ompa quintatautijque ca mohuisyot ijcuín:

—Xitechonyecaquilican que xiquisacan ya tech nijín pueblo de Filipos.

<sup>40</sup>Huan cuac quisque ya den cárcel, ijcuacán Pablo huan Silas yajque quicalpanotoj in taneltocacque Lidia. Huan cuac motaminojnotzque ya in tocnihuan huan quinyolmajxitijque ya, ijcuacán Pablo huan Silas quisque tech nojón pueblo de Filipos huan yajque ocsecan.

### Mochihuac ne cuejmololis campa pueblo Tesalónica

**17** Huan cuac yajtoyaj ya in Pablo huan Silas, ijcuacán yejuan panocque campa pueblojme de Anfípolis huan Apolonia. Huan de ompa ejcocque tech in pueblo Tesalónica campa yetoya se tiopan de judíos. <sup>2</sup>Huan Pablo quichihuac ijcón queme ipa quichiutinemic. Yejua yajqui calaquito tech in tiopan de judíos huan quinmachtia ya den Tajtoltzin de Dios. Huan ijcón quichihuac cada se tonal de nesehuilis para eyi semana. <sup>3</sup>Huan in Pablo quinmejmelahuilij huan quintaneltoctij in tacaquini ica ne Tajtoltzin de Dios que monequía ma tajyohuis huan miquis Cristo Temaquixtijque. Huan no monequía ma panquisas Cristo yoltoc intzalan in ánimajme. Huan no in Pablo quinilij ijcuín:

—Huan nijín Jesús tenica namechnojnotza, Yejuatzin ya in Cristo Temaquixtijque.

<sup>4</sup>Huan melau sequin judíos tacuautamatque ihuan Cristo huan moyecuiyacque ihuan Pablo huan Silas. Huan no tacuautamatque ihuan Cristo huel míac pueblojuani griegos ten ipa no taneltocatinemíaj ihuan Totajtzin Dios. Huan no míac sihuame tayecanani no tacuautamatque ihuan Cristo. <sup>5</sup>Huan cuac mochiutoya nochi nijín, ijcuacán sequin judíos ten amo taneltocani de Cristo, yejuan cualunque huan yolnexcoltíaj. Ica ya nojón yejuan quinsentilijque sequin taca ten sayó eluistijtine-mij huan ten sayó motatziucaquetztinemij san tech ojmaxalme. Huan ijcón in judíos



quincuejmoloayaj hasta quinueycuejmoloayaj nochi in pueblojuani de Tesalónica. Huan ijcón quitzintzacualuejelojque in Jasón huan calaquitoj huan quintemotoj Pablo huan Silas porín quinequáj quincalanquixtisque para quintemactisque inmaco in tagayot. <sup>6</sup>Huan queme amo quinajsicque Pablo huan Silas ompa ichan Jasón, ica ya nojón quititilatztuque in Jasón huan no quintitilatztuque sequin taneltocani huan quinajxititoj inixpan tequihuani de pueblo de Tesalónica. Huan ompa tzajtzíaj huan quijtoayaj ijcuín:

—Nijín taca ay quincuatapololtijtinemij nochi in tagayot den senmanahuac huan hasta axcan no hualajque nicahuín. <sup>7</sup>Huan Jasón quinpixtoya nijín ome ompa ichan. Huan nochi nijín Pablo huan Silas yejuan ay tanextilijtinemij que ma amo se quitacamatiniemi in tanahuatilme den hueyi tayecanque rey de Roma. Huan no ay quitetapohuijtinemij que ongac ocsé cachi hueyi tayecanque, yejua ten monotza Jesús.

<sup>8</sup>Huan cuac in tequihuani huan in tagayot quicacque nochi nijín tajtolme, ijcuación yejuan cachi oc mohueycuejmolojque. <sup>9</sup>Huan cuac in Jasón huan ocsequin taneltocani motaxtahuilijque ya ica ninmulta, ijcuación in tequihuani quincajcauque ma yacan.

### **Pablo huan Silas yetoyaj campa pueblo Berea**

<sup>10</sup>Huan ijcón nimantzin in tocnihuan taneltocani de Tesalónica quintitanque ca yohual in Pablo huan Silas ma yacan hasta campa pueblo Berea. Huan cuac ompa ajsicque ya, ijcuación yejuan ocsepa yajque calaquitoj tech in tiopan de judíos.

<sup>11</sup>Huan in judíos de ne pueblojuani de Berea cachi yolcualtaca catcaj huan que ne judíos de Tesalónica. Ica ya nojón yejuan quiyecneltoacque ica nochi nintanejnequilis den Tajtoltzin de Dios. Huan ijcón mosta mosta yejuan quinyecleeroaya huan quiyectemoliayaj in Tajtoltzin de Dios ten yejuan quiapiayaj inmaco. Huan quixejecolitiayaj cox in tanojnotzalis de Pablo sen yohui ya ihuan in Tajtoltzin de Dios. <sup>12</sup>Ica ya nojón miacque tacuautamatque ihuan Cristo. Huan miacque sihuame griegos ten tayecanani no taneltoacque huan no miac taca tacuautamatque ihuan Cristo. <sup>13</sup>Pero in judíos ten calyetoyaj pueblo Tesalónica quitecaquilijque que ne campa pueblo Berea no in Pablo huan Silas tanojnotztinemij ica in Tajtoltzin de Dios. Ica ya nojón ne judíos yajque ajsitoj campa pueblo Berea huan ompa no quinueycuejmolojque huan quintacualancatalilijque in Pablo huan Silas. <sup>14</sup>Pero in taneltocani tocnihuan de Berea nimantzin quititanque Pablo ma yohui ne atencopaca campa hueyi mar. Huan in Silas huan Timoteo mocauque ompa pueblo Berea oc. <sup>15</sup>Huan sequin tocnihuan quisehuiaque Pablo huan cajxitijque campa pueblo Atenas. De ompa yejuan ocsepa mocuepque campa ninpueblojcopaca de Berea. Huan cuac mocuepque ya, ijcuación cuiyacque tanahuatil de Pablo que ma in Silas huan in Timoteo nimantzin ma yacan campa pueblo Atenas ma ihuan yetotij Pablo.

### **Pablo yetoya campa Atenas**

<sup>16</sup>Huan cuac Pablo quinchixtoya campa pueblo Atenas ma ejcogan Silas huan Timoteo, ijcuación Pablo semi quiyolmachiliaya que yejua yolxocoltic ya porín quinitaya que nochi in pueblojuani de Atenas quinpixtoyaj huel miac tataman tatiadosme. <sup>17</sup>Ica ya nojón in Pablo motajtoltehuiaya ihuan ocsequin judíos tech nin-tiopan, huan no monojnotzayaj ninuan ocsequin ten quimohuistilijtinemíaj Totajtzin Dios. Huan mosta mosta in Pablo monojnotzaya ica in Tajtoltzin de Dios inuan

in pueblojuani den moajsíaj campa plaza. <sup>18</sup> Huan sequin taca griegos momachtiayaj in tamachilisme de sequin tamatinime ten monotza epicúreos. Huan ocsequin momachtiayaj in tanextililisme de in tamatinime ten no monotza estoicos. Huan yejuan peuque monojnotzayaj ihuan Pablo. Huan sequin taca griegos quiquejqueloayaj Pablo huan quijtohuiliayaj ijcuín:

—¿Toni techiluis nijín tagat ten semi tajtole?

Huan ocsequin quijtoayaj ijcuín:

—Nesi que yejua tanojnotztinemi ica sequin yancuic tatadiosme den ocseco cayome.

Huan ijcón quijtoayaj porín Pablo quinnojnotztinemia de Jesús Itajtoltzin ten cualcui ne nemaquixtilis. Huan no in Pablo quinmachiya de queniu Jesús panquisac yoltoc intzalan in ánimajme. <sup>19</sup> Ijcuación in tamatinime cuiyacque Pablo campa se plaza ten monotza Areópago campa yejuan nachipa mosentiliayaj para mosenmachtiayaj. Huan ijcón ompa quitajtoltijque Pablo ijcuín:

—Timitzontatautíaj que xitechonnextili nijín yancuic tanextililis tenica tejua tita-tjotjihuitz. <sup>20</sup> Huan porín tejua titechiluitoc sequi yancuic tamachilis. Huan tejuan ticinequij xitechmejmela huili nochi nijín de toni quijtosnequi.

<sup>21</sup> Huan ijcón yejuan quichiuque porín in pueblojuani de Atenas huan no sequin analtecocayome ten calyetoyaj Atenas, yejuan nojonques sayó monojnotztinemia se huan ocsé para motajtolcaquisque oso para monextilisque tensá tamachilis ten yancuic. <sup>22</sup> Ijcuación in Pablo mohualquetzato intzalan in tagayot campa in plaza Areópago huan quinilij ijcuín:

—Namejuan nanpueblojuani de Atenas, niquita que namejuan nanquipíaj míac tatadiosme ten nanquinmohuistilijtinemij. <sup>23</sup> Huan ijcón namechilía porín cuac nejua ninemia campa namoplaza, ijcuación niquinitztinemi miacque namotatadiosuan campa namejuan nantamohuistilíaj. Huan no niquitac se capilla campa yetoc se namotatadios. Huan ompa niquitac in tajtolme ijcuiliutoc ijcuín: “In tatadios ten amo se quixmati”. Huan nijín tatadios ten namejuan nanquimohuistilíaj masqui amo nanquixmatij, yejua ne in Totajtzin Dios ten ipa nejua namechnojnotztoc. <sup>24</sup> Huan nijín Totajtzin Dios tenica namechnojnotztoc, Yejuatzin quichijchihuac in talticpac huan nochi míac taman ten ongac nican talticpac. Ica ya nojón Yejuatzin itaaxcayan ne eluiyac huan nican talticpac. Huan Yejuatzin amo calyetinemi tech in tiopan ten tamachijchiu de se tagat san. <sup>25</sup> Huan ne Totajtzin Dios amo monequi que in talticpacuani ma quimacacan teyi porín Yejuatzin nochi quipixtoc. Porín ximatican que Yejuatzin techmacatoc tonemilis nican talticpac, huan no Yejuatzin techmaca toijiyó. Huan nochi ten ticpíaj tomaco ya, Yejuatzin techmacatoc.

<sup>26</sup> Huan Yejuatzin quichijchihuac sansé tagat san huan nojón tagat nochi tejuan timochihuacoj tiixuihuan. Huan Yejuatzin quitalij que ma ticalyetocan nochi tejuan tiixuihuan tech nochi senmanahuac. Huan no Yejuatzin tanahuatij de can yoltosque huan can moscaltisque huan can calyetosque cada taman pueblojuani nican talticpac. <sup>27</sup> Huan in Totajtzin Dios techtalij nican talticpac para que ma se tonal ma tictemocan huan ma timotoquitij iixpan Yejuatzin huan ma ticajscan. Porín hueyi melau que Yejuatzin amo huejca yetica de cada senme de tejuan titalticpacuani. <sup>28</sup> Huan se huejcautamatque quijtoco ijcuín: “Ica ihuelilis de Totajtzin Dios nochi tejuan tinentinemij huan tinejntinemij huan tiyoltinemij”. Huan no sequin namotanahuatij cahuan ten quinilíaj poetas, yejuan nojonques quijcuiloayaj ijcuín: “Nochi tejuan

titalticpacuani tihualeuque sayó de Dios". <sup>29</sup> Huan queme nochi tihualeuque imacotzinco Totajtzin Dios, ijcuación ma amo ticnemilican que Totajtzin Dios monejnehuilía queme se tatadios ten tamachijchiu de oro oso de plata oso de tet. Porín Totajtzin Dios amo teyi quinejnehuilía queme in taca quixnemilíaj masqui ica nintajtoluan oso nintamachijchiuhuan. <sup>30</sup> Ne achtopa ya in Totajtzin Dios amo semi quichihuac cuenta ten nintajtacoluan den talticpacuani porín yejuan amo cajsicamatíaj toni quichiutinemíaj. Pero axcan Totajtzin Dios quinnahuatía nochi in talticpacuani den senmanahuac que monequi ma moyolnemilican den nintajtacoluan. <sup>31</sup> Huan ijcón quichihuac Totajtzin Dios porín Yejuatzin quitalij ya se tonal cuac Yejuatzin quinxcomacas in talticpacuani ica ne ajsicataixejecolis. Huan Totajtzin Dios quichihuati ne ixcomacalis ica itencopaca ne tagat Jesús ten Yejuatzin quijitac ya ma quichihuas. Huan Totajtzin Dios quinyecnextilij nochi in talticpacuani que hualas ne ixcomacalis porín Yejuatzin quipanquixtij ya yoltoc in Jesús intzalan in ánimajme.

<sup>32</sup> Huan cuac in tamatinime quicacque ya que Pablo tajtoayaj de que Jesús panquisac yoltoc intzalan in ánimajme, ijcuación senme de yejuan quiquejquelcaquíaj san. Pero ocsequin quijtoayaj ijcuín:

—Cachi cuali se tonal oc timitzcaquilisque motanojnotzalis.

<sup>33</sup> Ijcuación in Pablo quisac intzalan de ne tacaquini huan yajqui ocseco. <sup>34</sup> Huan sequin ne tacaquini tacuautamatque ihuan Cristo huan cuali mohuicatinenque ihuan Pablo. Huan senme de taneltocani, yejua in Dionisio ten no pohuía ihuan in tamatinime den Areópago. Huan ocsé taneltocacque, yejua se sihuat ten monotza Dámaris. Huan ocsequin oc cachi oc no taneltocayaj de Cristo.

### Pablo yetoya tech pueblo de Corinto

**18** Huan ijcón cachi satepan Pablo quisac campa pueblo de Atenas huan yajqui ajsito campa pueblo Corinto. <sup>2</sup> Huan ompa cajsito se tagat judío ten monotza Aquila ten pohuía campa talme de Ponto. Huan ne Aquila isihuau monotzaya Priscila. Yejuan yequimpan ejcocque ompa Corinto ten hualeuque ya campa talme de Italia. Huan yejuan quisque de ne Italiajcopaca porín ne hueyi tayecanque Claudio tanahuatij que ma quisacan nochi judíos ten calyetocque Roma. Huan ijcón in Pablo yajqui quincalpanoto in Aquila huan Priscila. <sup>3</sup> Huan ne Aquila huan Priscila yejuan nintequiu de tajquti huan quisajsaloayaj ne tilahuac lona tenica quichijchi-huaj calme. Huan queme Pablo no yejua itequiu catca, ica ya nojón moca huato inuan tequitito. <sup>4</sup> Huan Pablo ten quichihuaya, yejua yaya ne campa tiopan de judíos tech cada tonal de nesehuilis. Huan ompa yejua quintajtoltehuia huan quintaneltocti-aya míac judíos huan míac taca ten amo judíos ica in Tajtoltzin de Dios.

<sup>5</sup> Huan cuac ejcocque ya ne Silas huan Timoteo ten hualajque de Macedoniajcopaca, ijcuación in Pablo ipa quicauca nitequiu huan cachi oc pehuac tanojnotztine-mic ica in Tajtoltzin de Dios. Huan cachi oc quinyecnextiliaya in taca judíos que ne Jesús Yejuatzin ya Cristo Temaquixtijque ten yejuan ipa quichixtoyaj ma hualani. <sup>6</sup> Pero ne judíos peuque quixnamiquij Pablo huan quihuijuicaltiyaj. Ica ya nojón Pablo quitzetzeloj nitaquen para ijcón quinnextili que yejuan quixtopeuque ya in Tajtoltzin de Dios. Huan ijcón in Pablo quinilij ijcuín:

—Xicmatican que amo nejua notajtacol oc como namejuan nanixpolihuisque. Huan amo no huelis nannechtectiquihue ca tajtacol como namejuan nan-

quipolosque ne nemilis sen nachipa. Huan nican para taixpan nejua niyó niquin-nojnotzati in tagayot ten amo pohuij queme judíos.

<sup>7</sup> Huan ijcón in Pablo quistehuac campa ne tiopan de judíos huan yajqui ichan se tagat ten monotza Justo. Yejua ten no quimohuistiliaya Dios huan calyetoya inacastan tiopan de judíos. <sup>8</sup> Huan se tagat judío ten monotzaya Crispo, yejua tayecanque den tiopan de judíos huan yejua ihuan nochi ichancahuan tacuautamatque ihuan Totecotzin. Huan ijcón no miacque pueblojuani de Corinto tacuautamatque ihuan Cristo ica nochi ten quicaquáfaj tenica quinnojnotzaya Pablo. Huan ijcón quinahúfaj ne taneltocani de Cristo. <sup>9</sup> Ijcuacón in Totecotzin quiyolnojnotzac Pablo tech se tayohuac huan yejua tajtachíac ijcón queme yesquía tacochitztosquía huan Yejuatzin quilij ijcuín:

—Tejua Pablo, amo ximoyolmouti. Ta, xicsencui xitanojnotztinemi huan amo ximotentamatili de amo titanojnotzas. <sup>10</sup> Porín Nejuatzin niyetinemi mohuan huan ijcón amo aquen huelis mitzmasoluis para mitzcojcosos. Porín tech nijín pueblo Corinto nicmati que nicpía míac taca ten necheltocasque.

<sup>11</sup> Huan ijcón in Pablo mocahuac ompa Corinto se xihuit huan tajco huan tech nojón tonalme tanextilijtinemic ica in Tajtoltzin de Dios. <sup>12</sup> Huan tech in tonalme cuac Galión catca hueyi tayecanque de ne talme de Acaya, ijcuacón sequin taca judíos mosentencauque de quixnamiquisque Pablo. Ica ya nojón yejuan ipan Pablo yajque huan cuiyacque campa itaixejecocan de Galión. <sup>13</sup> Huan ompa yejuan quilijque Galión ijcuín:

—Nijín tagat Pablo ay quintaneltoctijtinemi in tagayot que ma quimohuistilican se Dios ten amo techcahuilía ma ticchihuacan in tanahuatil de Roma.

<sup>14</sup> Huan cuac Pablo quinequía tajtos para ijcón mopalehuis, ijcuacón nimantzin in Galión quitajtolcotonac Pablo huan quinilij in judíos ijcuín:

—Xiquitacan, namejuan nanjudíos, amo xinechcuejmolocan. Porín tajcón nijín Pablo quichihuasquía tensá tachtequilis oso temictilis, ijcuacón nejua namechye-caquilisquía. <sup>15</sup> Pero amo ijcón quichiutinemi nijín Pablo. Ta, namejuan nanyolcualanij porín tajtolme tenica yejua tamachtijtinemi. Huan porín yejua amo quintacamatinemi namotayecancahuan. Huan queme nochi nijín tamachtilis moajsi tech namejuan namotanahuatilan, ica ya nojón namejuan san ximoixejecoltican porín nejua amo nicnequi nimochihuas queme ninamotequihua de nochi nijín.

<sup>16</sup> Huan ijcón in Galión tatitanic ma quincalanquixtican ne judíos campa nitaixejecocan. <sup>17</sup> Ica ya nojón in tagayot griegos quiqijquitziqijque ne tiopantayecanque de judíos ten monotza Sóstenes. Huan de ompa in griegos cuitecque Sóstenes campa ne itaixejecocan de tayecanque Galión. Pero in Galión amo teyica mocalaqui de yejua.

### **Pablo yajqui ocsepa Antioquía de Siria huan quipehualtij ica expa itequiu queme tatitanil de Dios campa analtecocayome**

<sup>18</sup> Huan ompa tech ne pueblo mocahuac in Pablo míac tonalme. Huan ijcón cachi satepan quinnahuatijteu in tocnihuan de Corinto que yohui ya. Huan calaquito tech se barco huan yajqui ajsito campa Siria huan quisehuyiacque Priscila huan Aquila. Huan ijcón cuac ajsicque ya campa pueblo Cencrea, ijcuacón in Pablo mocuatequic alaxtzin porín yejua quitamichihuati ya ne tenilil tenica motajtolentalijca ya ihuan Dios. <sup>19</sup> Huan ijcón cuac Pablo huan Aquila huan Priscila ajsicque campa pueblo Efeso, ijcuacón Pablo quincahuac seco Aquila huan Priscila tech ne pueblo huan

yejua yajqui calaquito tech in tiopan de judíos. Huan ompa pehuac ihuan motajtoltehuía in tagayot judíos ten mosentiliayaj ompa. <sup>20</sup> Ijcuación in judíos quitatautijque Pablo ma cachi huejcahua oc ihuan yetoni oc, pero yejua amo huelic oc cachi mocahuas ompa. <sup>21</sup> Ica ya nojón in Pablo quinnahuatijteu que yohui ya huan no quiniijteu ijcuín:

—Niyó ya porín monequi niyetos campa pueblo Jerusalén porín ompa monequi nicpanos in iluit ten mochihuati. Pero amo por nojón. Ta, ocsepa nihualas namechitaquiu, como Dios quimonequiltía.

De ompa in Pablo calaquito tech se barco huan quicahuac nojón pueblo de Efeso. <sup>22</sup> Huan cuac in Pablo ajsito ya campa pueblo Cesarea, ijcuación niman yajqui tej-coto campa pueblo Jerusalén para quintajpalos in tocnihuan taneltocani. Huan de ompa Pablo mocuepac huan yajqui ajsito campa pueblo Antioquía de Siria. <sup>23</sup> Huan cuac in Pablo panoc ya sequi tonalme tech ne pueblo de Antioquía, ijcuación yejua quisac huan yajqui ocsepa quincalpanotinemito in tocnihuan taneltocani campa talme de Galacia huan Frigia. Huan cuac ajsito ya, ijcuación quinyolmajxitiaya nochi in taneltocani.

### In Apolos tanojnotztinemi campa pueblo Efeso

<sup>24</sup> Huan mochihuac que ejcoc campa pueblo Efeso se tagat judío ten monotza Apolos ten yejua yolic tech in pueblo de Alejandría. In Apolos yejua se cuali tanojnotzque huan cuali quinyecajscamatiliaya in tacaquini ica in Tajcuilolamatzin de Dios. <sup>25</sup> Porín yejua ipa cuali quinmachtij ya ica in Tajtoltzin de Dios queme se ojtzin den Totecotzin. Huan yejua tanojnotztinemía ica nochi niyoltanejnequilis huan quinajscamachtiaya de aconi Jesús, masqui in Apolos cajscamatic sayó in tanojnotzalis de Juan cuac yejua taahuijtinemía. <sup>26</sup> Ijcuación in Apolos pehuac tanojnotza ica míac yolchicahualis campa tiopan de judíos. Pero cuac in Priscila huan Aquila quicaquilijque nochi nitanojnotzalis, ijcuación yejuan cuiyacque Apolos seco huan ompa quiyecmejmela huilitoj huan cachi oc quiyecajscamatiltijque den ojtzin de Dios. <sup>27</sup> Huan mochihuac que in Apolos quinequic panos campa talme de Acaya para ompa tanojnotzas ica in Tajtoltzin de Dios. Ica ya nojón in tocnihuan taneltocani de Efeso quilijque in Apolos ijcuín:

—Cuali queme ticnemilía, huan tejuan timitzijuilohuilitij se amat para in tocnihuan ma ijcón yejuan mitzselican ca paquilis.

Huan ijcón cuac ajsic ya in Apolos campa talme de Acaya, ijcuación yejua semi quinpalehuijtinemic neques ten Dios quintaneltoctij ya ica iteicnelilis. <sup>28</sup> Huan cuac in Apolos quinnojnotzaya in judíos, ijcuación yejua senteixteno quintajtolcuepiliaya ica hueyi chichahualis in judíos. Huan ijcón in Apolos cachi oc quinajscamatiltij que in Tajcuilolamatzin de Dios techyecnextilía que in Jesús Yejuatzin ya in Cristo Temaquixtijque ten yejuan quichixtoyaj que hualasquía.

### Pablo yetoya campa pueblo Efeso

**19** Huan mochihuac que in Apolos yetoya oc ne Corintojcopaca. Ijcuación Pablo nentihuala tech in puebløjme campa tepeyo, huan ijcón hasta ejcoc campa pueblo Efeso, huan ompa quinajsito sequin imomachtijcahuan de Cristo. <sup>2</sup> Huan in Pablo quintajtoltij ijcuín:

—¿Cox xe nanquiselijque ya in Yecticatzin Espíritu cuac namejuan nantacuautamatque ihuan Cristo?

Huan yejuan quinanquilijque ijcuín:

—¿Quenín huelis ticselisque in Yecticatzin Espíritu? Ta, hasta amo aquen ticaquilíaj cox ongac.

<sup>3</sup> Ica ya nojón in Pablo quintajtoltij ocsepa ijcuín:

—¿Toni ica chicahualis namechahuijque ya?

Ijcuacán yejuan ocsepa tananquilijque ijcuín:

—Tejuan techahuijque ica in chicahualis den tocaytzin de Juan Taahuijque.

<sup>4</sup> Huan ijcón in Pablo ocsepa quinilij in tocnihuan ijcuín:

—Pero ne Juan quinnahuijtinemía in tagayot, huan ne taahuilis yejua se nescayot san campa ixnesis que monequi ma moyolnemilican in tagayot den nintajtocoluan. Huan no ne Juan quinnextiliayaj que monequi ma tacuautamatican ihuan ne Jesús. Porín ne Jesús hualajtoc nimampa de Juan, huan ne Jesús Yejuatzin ya Cristo Temaquixtijque.

<sup>5</sup> Huan cuac in taneltocani quicacque nochi nijín tajtolme de Pablo, ijcuacán nochi motemactijque ma quinahuijcan ica in chicahualis den tocaytzin de Totecotzin Jesús. <sup>6</sup> Huan cuac in Pablo quincuamapachoaya in taneltocani, ijcuacán in Yecticatzin Espíritu calaquito tech ninyolijtic ne taneltocani. Huan ijcón yejuan peuque tajtoayaj ica tataman tajtolme ten quinmactilij ya in Yecticatzin Espíritu. Huan ijcón yejuan no quitetapohuitinemíaj in Tajtoltzin de Dios ica tanahuatilme ten Totajtzin Dios quinmactilijtinemic ya. <sup>7</sup> Huan neques ten tacuautamatque ihuan Cristo, yejuan nojonques catca majtactionomen taca.

<sup>8</sup> Huan ijcón in Pablo ipan eyi metztica calactinemía tech in tiopan de judíos. Huan ompa tanojnotzaya ica míac yolchicahualis, huan inuan ne judíos Pablo quintajtoltehuía huan quintaneltoctiaya in tagayot que Dios quimonequiltía quinyolyecanas itaneltocacahuan ica ihueyichicahualis. <sup>9</sup> Huan sequin judíos ten ompa yetoyaj, yejuan quixtopeuque in tanojnotzalis de Pablo huan amo quinecque tacuautamatisque ihuan Cristo. Ta, cachi oc quitejtenehuayaj san in ojtzin de Jesús inixpan nochi in tacaquini. Ica ya nojón in Pablo mosecocaahuac de yejuan huan quinuiyac imomachtijcahuan de Jesús ocseco campa escuela de se tamachtijque yetoya ten monotza Tiranno. Huan ijcón ompa Pablo quinmactiaya in taneltocani mosta mosta. <sup>10</sup> Huan ijcón in Pablo quinnextilijtinemic in taneltocani ipan ome xiutica. Huan ijcón in Pablo quintapohuiaya in Tajtoltzin de Totecotzin Jesús nochi in pueblojyeton ten calyetoyaj campa talme de Asia. Huan amo sayó quinmactijtinemic in judíos. Ta, no quinmactijtinemic nochi ne pueblojyeton griegos ten amo poutinemíaj queme judíos. <sup>11</sup> Huan ijcón Totajtzin Dios quichiutinemic míac huejueyi mohuiscatequime ica por imahuan de Pablo. <sup>12</sup> Huan semi hueyi ihuelilis de Dios mochiutoya porín hasta intilmajuan de cocoyani cuicayaj huan cajxiltiayaj Pablo. Huan ijcón ocsepa quiniquiliayaj huan no quinajxiltiayaj in cocoyani. Huan ijcón nenquentijtiyajque nochi in cocoyani hasta no hualcalanquisayaj in amocuali ejecame intech nojón cocoyani.

<sup>13</sup> Pero oncaya sequin judíos que no nentinemíaj huan no ay quincalanquixtinemíaj in amocuali ejecame den tagayot. Huan yejuan quinequíaj quicuisque in huelilis den tocaytzin de Totecotzin Jesús para ijcón quinquixtisquíaj ne amocuali ejecame den cocoyani. Huan ne judíos quiniliayaj in amocuali ejecame ijcuín:

—Tamechnajnahuatíaj que xihualcalanquisacan ica in huelilis den tocaytzin de Jesús, ne tocaytzin ten Pablo quicui cuac tanojnotztinemi ica ne huelilis de Jesús.

<sup>14</sup> Huan tech ne tonal ijcón quichiutinemíaj yejuan ne chicome teconehuan de se tagat judío ten monotza Esceva ne ten catca tayecanque tiopixcat. <sup>15</sup> Huan ijcón cuac yejuan quinequíaj quicalanquixtisque in amocuali ejecat, ijcuacón ne amocuali ejecat quinnanquilij ijcuín:

—Nejua cuali niquixmati de aconi Jesús. Huan no nicmati aconi Pablo. Pero namejuan, ¿toni nanchihuanime?

<sup>16</sup> Ijcuacón in tagat ten quipíaya amocuali ejecat, yejua inpan yajqui nojón chicome tepiluan ca míac chicahualis huan quintamixijxicoj huan quintamitanilij hasta ijcón yejuan quicholohuilijque masqui ijcón xitatztijque huan tajojcolme ya. <sup>17</sup> Huan ijcón nochi in pueblojyetoní de Efeso ten catca judíos huan ten amo catca judíos, nochi yejuan quimatque nijín ten mochihuac. Ica ya nojón yejuan semi moyolmoutiayaj pero no quihueyipanchiuque in huelilis den tocaytzin de Totecotzin Jesús.

<sup>18</sup> Huan no ijcón miacque tagayot ten tacuautamatque ihuan Cristo, yejuan nojonques hualayaj moteluilij de nintajtacoluan ihuan Dios senteixteno, ne nintajtacoluan ten quichiutinenque ya ne achtopa. <sup>19</sup> Huan no miacque hualayaj ten tequititinemíaj ica nahualot. Huan yejuan cualcuicque ninlibros tenica momachtia-yaj huan ompa quitatijque senteixteno. Huan ne libros ten quitatijque se quixeje-coaya nipatiu yesquía queme omepoal huan májtacti mil den platajtomín. <sup>20</sup> Ica ya nojón in Tajtoltzin de Dios momoyautiaya nohuiyampa. Huan ica por in Tajtoltzin de Dios cachi oc monextijtiaya ihuelilis den Totajtzin Dios.

<sup>21</sup> Huan satepan de nochi nijín mochihuac ya, in Yecticatzin Espíritu quiyoltanemililtij Pablo que ocsepa quincalpanotiu in taneltocani ten calyetoyaj campa talme de Macedonia huan Acaya. Huan satepan Pablo quinequíya yas para Jerusalénjcopaca. Huan no Pablo quiytoaya que satepan cuac yas ya Jerusaléncopaca, ijcuacón monequíya yas campa pueblo Roma. <sup>22</sup> Ica ya nojón in Pablo quintitanic Timoteo huan Erasto ome itapalehuijcahuan ma yajtocan ne Macedoniajcopaca. Pero Pablo mochihuac oc sequi tonalme campa talme de Asiajcopaca.

### **Mochihuac necuejmololis campa pueblo Efeso**

<sup>23</sup> Huan satepan nojón tonalme mochihuac se hueyi necuejmololis porín sequin tagayot quixtopeuque in ojtzin de Dios. <sup>24</sup> Huan nijín necuejmololis quipehualtij se tagat ten monotzaya Demetrio, ten tequitía ica plata. Huan yejua quinchijchihuaya sequi tiopan tatadiosme ten monotzaya Diana. Huan ne Demetrio ihuan ocsequin tapalehuiani cuali ica motataniliayaj. <sup>25</sup> Huan ijcón ne Demetrio quinsentilij ne itequiticaicnihuan ten tequitij ica plata huan yejua quinilij ijcuín:

—Namejuantzitzin nantequitini, cuali nanquimatij que ica nijín tequit cuali ica timotequipanojtocque. <sup>26</sup> Huan namejuan cuali nanquitztocque ya huan nanquicac-tocque ya que nijín tagat Pablo tamachtijtinemi de que nijín tatadiosme ten tejuan ticchihuaj ica tomahuan, yejuan nojonques amo melau diosme. Huan ijcón no in Pablo quintaneltoctijtinemi ya míac tagayot amo sayó nican topueblo Efeso. Ta, hasta nochi ne campa talme de Asia, que ma quinsecocahuacan nijín tatadiosme ten tamachijchiume. <sup>27</sup> Huan nijín tanojnotzalis de Pablo semi amo cualtía para tejuan, porín nijín totequiuhuelis tajtamis san. Huan amo sayó tejuan san. Ta, hasta

no huelis tajtamis in chicahualis den tohueyitiopan. Huan no huelis quimohuis-polosque in chicaucahuelilis de totatadosa Diana, ten axcan quihueyimohuistilíaj campa nochi in talme de Asiajcopaca huan tech nochi in senmanahuac.

<sup>28</sup> Huan cuac in tequitini quicaquilijque ya nochi nijín tajtolme, ijcuacón yejuan mohueyiyolcualantijque huan tzajtzíaj huan quijtoayaj ijcuín:

—Ticueyichihuaaj sayó Diana in tatadosa den pueblojuani de Efeso.

<sup>29</sup> Ijcuacón mochihuac se hueyi necuejmololis tech in pueblo Efeso. Huan no ompa yetoya ome taca taneltocani ten quisehuicatinemíaj Pablo, yejuan in Gayo huan Aristarco ten pohuáj campa Macedoniajcopaca. Yejuan nojonques in tagayot quin-quitziqijque huan quintitilatziyajque hasta tech in cancha campa ipa mosentiliyaj in tagayot. <sup>30</sup> Huan in Pablo no quinequía calaquitiu campa mosentilijque in tagayot para quinnojnnotzas, pero in imomachtijcahuan de Jesús amo quicaucque ma yohui calaquiti tech in cancha. <sup>31</sup> Huan no yetoyaj sequi tequihuani ten tequitinemij ne Asiajcopaca, yejuan nojonques ipa ihuan Pablo motasojtayaj. Ica ya nojón yejuan connahuatijque Pablo que ma amo yohui calaquiti campa mochiutoc ne hueyi ne sentililis den tagayot. <sup>32</sup> Huan ompa campa mosentilijque, sequin tagayot elihuistzajtíaj ica se taman tajtolis. Huan ocsequin tagayot no tzajtzíaj elihuis ica ocsequin tajtolme. Porín nojón tagayot mocuatapololtiyay san hasta amo quimatíaj queyé mosentilijque seco san. <sup>33</sup> Huan ijcón sequin tagayot judíos quimejmelahuilijque in Alejandro de queniu pehuac ne hueyi necuejmololis. Ica ya nojón in judíos quitalitoj Alejandro ne taixpan nochi in tagayot. Huan yejua quintanextilij ica imay que ma motamatilican in tagayot porín yejua quinequía quintajtohuis in judíos inixpan in pueblojuani ten amo judíos. <sup>34</sup> Pero cuac in tagayot quimatque que in Alejandro yejua no catca se judío, ijcuacón nochi peuque tzajtzíaj huan ipan ome horajpan sen oloch tzajtzíaj huan quijtoayaj ijcuín:

—¡Ticueyichihuaaj sayó Diana in tatadosa den pueblojuani de Efeso!

<sup>35</sup> Huan ijcón cuac in tequihua secretario den pueblojuani Efeso quintamatilij ya in tagayot, ijcuacón yejua quinilij ijcuín:

—Namejuan nanpueblojuani de Efeso, nochi in talticpacuani cuali quimatij que tejuan tipueblojuani de Efeso, huan tejuan totequiu ma ticyecpixinemican ne hueyi tiopan campa yetoc ne hueyi tatadosa Diana. Huan no ticyecpixinemij ne tatadios Diana itaixcopin ten hualuetzic imaco in tatadios Júpiter den eluiyac. <sup>36</sup> Huan ximatican que amo aquen huelis techtajtolcuepas que in Diana yejua amo in cachi hueyi tatadosa. Ica ya nojón namechilía ximotentamatilican san, huan amo teyi xiquelihuischihuacan. <sup>37</sup> Huan nijín ome taca ten namejuan nanquinualijque nican, yejuan nojonques amo teyi ica quiquejqueloayaj in tatadosa Diana huan nión no cuijuicaltíaj namodiosa. <sup>38</sup> Pero tacán in Demetrio huan itequiticaicnihuan quinequij quinteluilisque nijín Gayo huan Aristarco, ijcuacón cuali huelis xiquinteluilican. Porín tapotoc ne cali campa taixcomaca huan nachipa yetocque in tequihuani para quinixcomacasque. <sup>39</sup> Huan tacán namejuan nanquipíaj ocsé taman ne teluililis, ijcuacón monequi se cualcuis nican, pero monequis ica in tanahuatil den tequihuani. <sup>40</sup> Porín ijcón queme yequintzin nanquichiutocque, huelis acsame techteluilisque imaco in cachi hueyi tequihuani, que ticsecocautocque in tanahuatil den tequihuani. Ijcón namechilía porín como techtatajoltisquáj de queyé timocuejmolojtocque axcan, ijcuacón ne inixpan amo teyi huelis ica titananquilisque huan timopalehuisque.



<sup>41</sup> Huan cuac in secretario quintamiilij ya, ijcuacón yejua quinnajnahuatij in tagayot que ma yacan ya.

### **Pablo monemiltij campa talme de Macedonia huan de Grecia**

**20** Huan satepan cuac tamic ya ne hueyi necuejmololis tech in pueblo de Efeso, ijcuacón in Pablo tanahuatij ma mosentilican imomachtijcahuan de Jesús para cachi oc quinyolmajxitis ica in Tajtoltzin de Dios. Huan de ompa Pablo monajnahuateyic ihuan in taneltocani huan yajqui ajsito campa talme de Macedonia. <sup>2</sup> Huan in Pablo nochi quincalpanoto ya in tocnihuan campa talme de Macedonia, huan no quinyolmajxitiaya ica míac tataman tanextililisme. Huan de ompa yajqui ajsito campa talme de Grecia. <sup>3</sup> Huan ijcón ompa Grecia mocahuato Pablo ipan eyi metztica. Huan mochihuac que in Pablo quinemilijtoya calaquís tech se barco para yas ajsitiu campa ne talme de Siriajcopaca. Pero in Pablo quitecaquilijcaj que in tayecanani judíos no quinemilijtoyaj que quimictisque Pablo tech in barco como yejua yasquía tech in barco. Ica ya nojón in Pablo quiyolnemilij que cachi cuali tacolotiu campa amo ongac at huan panotiu campa talme de Macedoniajcopaca. <sup>4</sup> Huan quisehuiyacque Pablo nijín ocsequin tocnihuan, Sópater den pohuía pueblo Berea, huan Aristarco, huan Segundo ten pohuía campa pueblo Tesalónica, huan Gayo ten pohuía tech in pueblo Derbe, huan Timoteo huan Tíquico huan Trófimo, yejuan pohuíaaj campa talme de Asiajcopaca. Nochi nijín taneltocani quisehuiyacque Pablo. <sup>5</sup> Huan ijcón nijín tocnihuan yajque techyecanque ya huan techchiatoyaj campa pueblo Troas. <sup>6</sup> Pero tejuan timocauque oc sequi tonalme campa pueblo Filipos para huelis ompa ticpanosque ne iluitalme cuac se quicua pan ten amo maneliutoc ihuan levadura. Huan de ompa tejuan ticalacque tech se barco campa pueblo Filipos huan ipan macuil tonal tiquinajsitoyaj nojón tocnihuan campa in pueblo Troas. Huan ijcón ompa timocauque oc ocsé chicome tonal oc.

### **Pablo quincalpanoa in tocnihuan campa pueblo Troas**

<sup>7</sup> Huan tech in tayecana tonal de semana, yejua ten axcan domingo, ijcuacón mosentilijque in taneltocani tocnihuan para momajmacasque ne pan tatetejtec tenica se quelnamiqui in miqulís de Cristo. Huan ijcón Pablo quinnextiliaya in taneltocani ica in Tajtoltzin de Dios. Huan queme in Pablo quisasquía ya niman imostica, ica ya nojón semi huejcahuac quinnojnotztoya in tocnihuan hasta nepa tajcayohuan. <sup>8</sup> Huan sen yetoyaj míac taneltocani tech se cuarto campa se cuali cali ica eyi nepancal huan ompa xotatoyaj míac tahuilme. <sup>9</sup> Huan ompa yetoya se telpocat ten monotzaya Eutico. Huan yejua tocotzyetoya ne ventanajteno. Huan queme Pablo huejcahuac ya itanojnotzalis, ica ya nojón in telpocat semi cochisnequía ya. Huan cuac quixixicoj ya in cochilis, ijcuacón in telpocat huetzito tani ica eyi nepancal. Huan cuac quiajocucicque ya, ipa momiquilij ya. <sup>10</sup> Ijcuacón in Pablo temoc huan mopanaxacatecac campa in telpocat huetztoya. Huan de ompa Pablo monapaloltij in telpocat huan quinilij in tocnihuan ijcuín:

—Amo ximoyolmoutican. Ta, voltoc oc nijín telpocat.

<sup>11</sup> Huan ijcón ocsepa in Pablo tejcoto. Huan cuac quintamimajmacac ya in pan tenica quelnamiqui in miqulís de Cristo, ijcuacón nochi quicujque. Huan ijcón in Pablo ocsepa huejcahuac quinnojnotzac in tocnihuan taneltocani hasta tanesic.

Huan de ompa quistehuac in Pablo. <sup>12</sup>Huan cuac cuiyacque ya ichan in tellocat ten Dios quimactilij nemilis ocsepa, ijcuacón nochi in tocnihuan yolseuque.

### **Pablo quisac Troas huan ajsito campa pueblo Mileto**

<sup>13</sup>Huan tejuan ticyecanque ya Pablo huan ticalacque tech se barco huan tiajsitoj campa pueblo de Asón, para ompa techcuitiquisa in Pablo porín yejua amo quinequía yas tech in barco. Ta, quineyic nejnemis. <sup>14</sup>Huan cuac timoajsicque ya ihuan Pablo campa pueblo Asón, ijcuacón Pablo calaquic tech in barco campa tejuan tiyayaj. Huan ijcón tiyajque tiajsitoj campa pueblo Mitilene. <sup>15</sup>Huan ijcón tiquisque campa pueblo Mitilene tech in barco huan imostica ticpanahuijque in pueblo de Quó. Huan ocsepa imostica tiajsicque campa pueblo Samos. Huan ompa campa tal ten monotza Trogilio timosehuijque. Huan ocsepa imostica tiajsicque campa pueblo Mileto. <sup>16</sup>Huan ijcón quichihuac Pablo porín yejua amo quinequía huejcahuas campa talme de Asiajcopaca huan amo no quinequía panos campa pueblo Efeso. Ta, como huelis, Pablo quinequía ajsis niman campa pueblo Jerusalén para ompa quipanos ne iluitonal de judíos ten quilíaj Pentecostés.

### **Nican Pablo quinnojnatzac in tiopan huehuentzitzin de Efeso**

<sup>17</sup>Huan cuac in Pablo yetoya oc campa pueblo Mileto, ijcuacón yejua tatitanic ma quinnotzati in tiopan huehuentzitzin de Efeso. <sup>18</sup>Huan cuac in tiopan huehuentzitzin ejojqque ya, ijcuacón in Pablo pehuac quinnojnatzac huan quinilij ijcuín:

—Namejuan cuali nanquimatij ya de queniu nichipaucanemía namotzalan desde ne tayecanatonal cuac niajsic campa talme de Asiajcopaca. <sup>19</sup>Huan nochi nojón tonalme nimotequitiltiaya sayó ica in Totecotzin huan nitequitía ica ne yolyem-analis huan hasta niquinchoquiliaya neques ten quixtopehuayaj Cristo. Huan no nanquimatij ya de queniu nicpanotoya tajyohuilis cuac in judíos quinequía nechmictisque. <sup>20</sup>Huan no nanquimatocque ya que nejua amo quemán nicahuac notequiu. Ta, nachipa namechnojnotzaya ica in ne yolmajxtilis ten namejuan namech-poloaya. Huan no nanquimatocque que nejua namechmachtia ica in Tajtoltzin de Dios senteixteno huan hasta tech namochanuan. <sup>21</sup>Huan ijcón niquinnojnatzac in taca judíos huan in tagayot ten amo judíos. Huan niquinnejmachtia nochi yejuan que monequi ma moyolnemilican de nintajtacoluan iixpantzinco Totajtzin Dios. Huan no niquinyequiliaya nochi yejuan que monequía ma tacuautamatiyacan ihuan Totecotzin Jesucristo. <sup>22</sup>Huan axcan nipanos nicahuín huan niyajtoc nicmelahua ya para pueblo Jerusalén porín in Yecticatzin Espíritu nechyolnahuatijtoc que mon-equi niyás, masqui nejua amo nicmati toni nopan mochihuas ompa. <sup>23</sup>Pero tepitzin nicmati de toni nopan mochihuas porín in Yecticatzin Espíritu nechilijtinemic que nechtzacuasque tech in cárcel huan nechtajyohuiltisque tech nochi in pueblojme campa niajsis. <sup>24</sup>Pero nochi nijín tajyohuilis ten nopan hualas amo teyi nicueyipohua huan nión no nictasojta nonemilis de nejua san. Ta, para nejua cachi cuali ma nictacamatinemi ca paquilis in tanahuatil de Cristo, huan ma nictamichihuas in tequit ten nechahuatiliz ya Totecotzin Jesús. Porín Yejuatzin nechahuatiliz que ma nejua nitanojnotztinemi ica in yancuic Tajtoltzin ten cualcui ne teicnelilis de Dios.

<sup>25</sup>Huan axcan nicyecajsicamati que nión senme de namejuan nannechitasque oc, namejuan ten namechnojnotztinemic que Dios quimonequiltia namechyolye-

canas ica ihueyichicahualis tech namoyolijtic. <sup>26</sup> Ica ya nojón axcan namechyequí-lía que amo nejua notajtacol oc como senme de namejuan nanixpolihuij. <sup>27</sup> Porín nejua namechyecajsicamatiltij ya xicseliani nochi ne tamachtilis ten Dios qui-monequiltis xicpixtiyacan. <sup>28</sup> Huan nejua namechilía que axcan ximoyecpixtine-mican namejuan. Huan no namechilía que xiquinyecpixtiyacan huan xiquinye-cyecantiyacan nochi in taneltocani tocnihuan. Huan ijcón xicchihuacan porín in Yecticatzin Espíritu namechtequimactij ya namejuan queme tiopan huehuentz-itzin para xiquinyolmajxitijtiyacan in tocnihuan, neques ten Totecotzin moinxat-tilij cuac Yejuatzin quixtahuac ya ica iesyotzin de nintajtocoluan. <sup>29</sup> Pero ne-juua cuali nicmatoc ya que cuac níquisas ya de nican, ijcuacán hualasque sequi taman tamachtiani ten yejuan quinequisque namechxejxelosque den Tajtoltzin de Dios, ijcón queme tecuanime quichihuaaj cuac ejcotihuetzij huan quinixcuamoy-ahuaaj in ichcame. <sup>30</sup> Huan no senme de namejuan mochihuasque tamachtiani ica xolopijyot san, sayó para ma nochi in taneltocani ma namechtoctilijtiyacan. <sup>31</sup> Ica ya nojón namechilía ximoyecpixtiyacan para ma amo aquen namechcaycayahua. Huan ijcón xiquelnamiquican san que nejua niyetinemía namohuan ipan eyi xiutica. Huan nachipa namechyolmajxitijhualaj yohual itonal hasta namechchojchoquili-aya namejuan.

<sup>32</sup> Huan axcan nocnihuan, namechcahua sayó imacotzinco Totajtzin Dios. Huan no namechilía que xictacamatiyacan in Tajtoltzin ten cualcui teicnelilis de Dios. Porín sayó nijín Tajtoltzin quipía huelilis para namechyolmajxitis. Huan no sayó nijín Taj-toltzin quipía huelilis para namechmaquixtis huan namechyecantiyás para ne eluiy-actzinco campa mosentilisque nochi ne taneltocani ten Dios quinyolchipahuac ya. <sup>33</sup> Huan tech nochi nijín eyi xiutica amo teyi nicyolnejneyic que ma nicseli namooro nión in namoplata nión namotilma. <sup>34</sup> Porín namejuan cuali nanquimatij que nejua nimotequitiltij ica nomahuan hasta campa nihuelic para ijcón nimotequipanos huan niquintequipanos nochi naquen nohuan yetinemíaj. <sup>35</sup> Huan nejua nachipa namech-nextilijtinemic que monequi xitequitican para ijcón huelis nanquinpalehuisque ne neques ten amo teyi quipíaj. Huan no namechilía que xiquelnamiquican ne tajtol ten quijtoj Totecotzin Jesús ijcuún: “Cachi yolpactoc in tagat ten tapalehuijtinemi ica ten niaxca huan que ne tagat ten sayó quiselía tapalehuilis”.

<sup>36</sup> Huan cuac in Pablo quitamijtoj ya nijín tajtolme, ijcuacán yejuua motancau-quetzac huan motatatautilij iixpantzinco Totajtzin Dios ihuan nochi in tiopan hue-huentzitzin. <sup>37</sup> Ijcuacán in tiopan huehuentzitzin nochi mochojchoctijque huan sejsé quinanhuaajtecque Pablo huan quitennamicque. <sup>38</sup> Huan ijcón nochi mohueyiyolco-coayaj oc ica ne tajtol ten quinilij Pablo que amo queman ocsepa quixixtasque oc. Huan ijcón yajqui Pablo huan quisehuiyacque hasta atenteno campa yetoya in barco.

### Nican Pablo yajqui Jerusaléncopaca

**21** Huan cuac tiquincauteuque ya in tiopan huehuentzitzin den pueblo de Efeso, ijcuacán ticalacque tech in barco huan tiyajque ticmelauque hasta campa talme de Cos. Huan imostica tiajsicque campa talme de Rodas. Huan de ompa tia-jsicque campa pueblo Pátara. <sup>2</sup> Huan ijcón tech ne pueblo de Pátara, ompa tica-jsicque se barco ten yohui ya campa talme de Feniciajcopaca. Ica ya nojón ticalacque tech ne barco huan tiyajque. <sup>3</sup> Huan cuac tiyajtoyaj ya tech in barco, ijcuacán tiq-uitacque in talme de Chipre nepa lado de toopochcopaca. Pero tejuan ticmelauque

hasta campa in talme de Siria. Huan queme in barco ten itech tiyayaj monequía moquetzas campa pueblo Tiro para ompa quitamamalquixtisque, ica ya nojón ompa tejuan tiquisque den barco huan ticalacque tech ne pueblo Tiro. <sup>4</sup>Huan campa ne pueblo Tiro tiqintemojque huan tiquinajsicque sequin imomachtijcahuan de Jesús huan ompa ihuan timocauque chicome tonal. Huan Dios quinyolnojnotzac ya ica in Yecticatzin Espiritu nijín taneltocani. Ica ya nojón yejuan quilijque Pablo ijcuín:

—Amo xiyó ne Jerusaléncopaca.

<sup>5</sup>Huan cuac panocque ya nojón chicome tonal, ijcuación tejuan tiquisque. Huan ijcón nochi in taca taneltocani ihuan nisihuahuan huan ninconeahuan, nochi yejuan techsehuyiacque hasta ne pueblojtenti. Huan ompa ne campa atenteno timosen-tancuaquetzque tinochin huan timosentatatautilijque iixpantzin Totajtzin Dios. <sup>6</sup>Ijcuación nochi timonanahuatécque. Huan de ompa tejuan titejcotoj tech in barco huan yejuan yajque mocuepque ichan ya.

<sup>7</sup>Huan cuac tiquisque de pueblo Tiro huan tiajsicque campa pueblo Tolemaida, ijcuación ticauque ya in barco den toaixconemilis. Huan ticalaquitoj tech nojón pueblo Tolemaida huan tiqintajpalotoj in tocnihuan taneltocani huan ompa ihuan timocauque se tonal. <sup>8</sup>Huan ijcón imostica in Pablo huan tejuan ten ihuan tinemíaj Pablo, nochi tejuan tiquisque huan tiajsicque campa pueblo de Cesarea. Huan ompa ticalaquitoj ichan se tagat monotza Felipe, yejua ten catca no tanojnotzque ica in Tajtoltzin de Dios. Huan yejua no ten catca senme de nojón chicome tiopan tapalehuani ne ten quinilíaj diáconos. Huan ijcón ompa timocauque ichan Felipe. <sup>9</sup>Huan ne Felipe quinpiaya nahui iichpochuan ten amo monamictiyaj. Huan yejuan tanojnotztinemíaj ica in tanahuatilme ten Dios quinmactiliaya. <sup>10</sup>Huan ompa tech ne pueblo Cesarea tiyetoyaj sequi tonalme. Huan mochihuac que hualtemoc de ne Jerusaléncopaca se tagat monotza Agabo, yejua quiselijca ya tanahuatilme ten Dios quimactilijca ya. <sup>11</sup>Huan ne Agabo itequipan huala techcalpanoco. Huan in Agabo cuac ejcoc ya campa tiyetoyaj, ijcuación yejua quicuic ne cuetax tajcoilpiloni de Pablo. Huan yejua mometziztjzicoj huan no momatziztjzicoj. Huan de ompa Agabo quilij Pablo ijcuín:

—In Yecticatzin Espiritu mitznójnotza tejava ten moaxca nijín cuetax tajcoilpiloni. Huan yejua in Yecticatzin Espiritu mitzajsicamatiltis que ijcón queme tiqiztzcoc nimometztiztjzicojtoc, no ijcón ne tayecanani judíos tech Jerusaléncopaca mitztiztjzicosque huan mitztemactisque inmaco in analtecocayome.

<sup>12</sup>Huan cuac ticacque ya nijín tajtolme ten techiliaya Agabo, ijcuación tejuan huan in tocnihuan de Cesarea ticueytatautijque Pablo que ma amo yohui Jerusaléncopaca. <sup>13</sup>Pero in Pablo technanquilij nochi ijcuín:

—¿Queyé namejuan nanhocaj? Huan, ¿queyé no nannehyoltayocoltíaj? Porín nejua notanejnequilis nicnequi nictacamatis Notecotzin Jesús, masqui ma nechtziztjzicocan ne Jerusaléncopaca oso masqui ma nechmictican.

<sup>14</sup>Huan queme amo tihuelque oc tictaneltoctisque Pablo de ma amo yohui Jerusalén, ijcuación tejuan amo teyi tiquilijque oc. Ta, sayó ticauque ma mochihua ijcón queme Totecotzin quimonequiltía. <sup>15</sup>Huan satepan de nojón tonalme tech in Cesarea cuac tejuan timoyectatalijque ya, ijcuación tiyajque para Jerusaléncopaca. <sup>16</sup>Huan no techsehuyiacque sequin imomachtijcahuan de Jesús den pueblo Cesarea. Huan ompa Jerusalén calyetoya se tocníu ten monotza Mnasón, yejua ten pohuía campa talme de Chipre. Huan yejua ipa momachtijtoya de Jesús desde ne huejcau

ya. Ica ya nojón in tocnihuan de Cesarea techtamelahualtijque campa ichan Mnasón para ma ompa timocahuatij.

### Nican tajtoa de queniu Pablo quicalpanoto Jacobo

<sup>17</sup> Huan ijcón cuac tiajsitoj ya ne pueblo Jerusalén, ijcuación in tocnihuan techtajpalojque huan techselijque ica míac paquilis. <sup>18</sup> Huan imostica tiquitajto in Jacobo huan no tiquinajsitoj sen yetocque nochi in tiopan huehuentzitzin. <sup>19</sup> Huan ijcón cuac ticalaquitoj ya, ijcuación Pablo quintajpaloto in tiopan huehuentzitzin. Huan de ompa pehuac quintapohuía sejsé tequit ten Totajtzin Dios quichihuac ipan in Pablo campa in taca ten amo poutinemij queme judíos. <sup>20</sup> Huan cuac in tiopan huehuentzitzin quicacque ya nochi nijín tajtolme, ijcuación yejuan quihueyimohuistilijque Totajtzin Dios. Huan de ompa quilijque Pablo ijcuín:

—Xiquita san, tocníu, ongac míac miles de tagayot judíos ten tacuautamatque ya ihuan Cristo. Huan nochi yejuan quijtoaj que monequi ma se quitacamatinemi in tanahuatil de Moisés <sup>21</sup> Huan nochi nojón taneltocani judíos quitecaquiliayaj que tejua Pablo tiqinnextilijtinemi in tagayot judíos ten calyetocque intzalan in analtecocayome, que ma amo monequi ma quitacamatinemican oc in tanahuatil de Moisés. Huan no quijtoaj que tejua tiqinilijtinemi que amo monequi ma quinnescayotican ninoquichpíluan tech ninnacayo huan nión no monequi ma quintacamatican in tanextililisme ijcón queme cualcuitihuitze ne tohuejcautatuan. <sup>22</sup> ¿Huan toni ticchihuasque? Porín in taneltocani judíos cuac mosentilisque, ijcuación quimatisque ya que tejua, Pablo, tihuala ya nicahuín. <sup>23</sup> Huan axcan xicchihuati ijcón queme timitzilíaj. Nican yetocque tohuanme nahui taca ten yejuan monequi quitamichihuasque ne tenilil tenica moyectencauque ya ihuan Dios. <sup>24</sup> Huan tejuan ticnequij xiquinsehuicati nijín nahui taca. Huan xicchihuati ijcón queme yejuan quichihuatij cuac quitacamati in tanahuatil de Moisés para ijcón mocahuasque yolchipauque iixpantzinco Dios. Huan tejua xiquintaxtahuili nijín taca para ma yejuan quincuatanzocan. Huan tejua no ma mitzcuatananzocan. Huan ijcón nochi in taneltocani judíos cajsicamatisque que amo teyi melau tenica ay mitzteluillíaj. Ta, ixnesis que tejua no tictacamatinemi in tanahuatil de Moisés ijcón queme monequi. <sup>25</sup> Pero tejuan tiqintajcuilohuilijque ya in taneltocani ten amo judíos, huan tiqinilijque que amo monequi ma quitacamatican nijín taman tanahuatilme de Moisés. Ta, sayó ma amo quicuacan nacam ne tenica quimohuistilijque tatadíosme. Huan nión no ma quicuacan esti. Huan amo no xicuacan nacam de ne ocuulinme ten cuaestemotocque cuac quimictíaj. Huan amo no aquen ma se tagat oso sihuat ma sen cochtinemican como amo namicuani.

### Nican in Pablo quiquitzi que me preso tech in hueyi tiopan Jerusalén

<sup>26</sup> Ijcuación in Pablo quincuic ne nahui taca huan quinquisehuayac. Huan imostica yejuan quitacamati in tanahuatil de Moisés para ijcón moyolchipahuasque. Huan ijcón in Pablo calaquito tech hueyi tiopan para ijcón quitenejmachtis quemanián motamichipahuatij ya. Huan cuac motamichipahuasque ya, ijcuación cada senme de yejuan monequi quimictisque sequi tapialme para ica quinmohuistilisque Dios. <sup>27</sup> Huan cuac ejcotoya ya chicome tonal motamichipahuasque ya, ijcuación sequin tayeacanani judíos ejcocque ten hualeuque campa talme Asiajcopaca. Huan cuac

yejuan quitacque Pablo ne tiopanijtic, ijcuación quinueycuejmolojque nochi in tagayot. <sup>28</sup> Huan quiquitziqijque Pablo huan quitzajtziayaj in tagayot ijcuín:

—¡Namejuan nantagayot de Israel, xitechpalehuican! Porín yejua ya nijín tagat ten nohuiyan quinxtopeutinemi topueblojcahuan de Israel. Huan no tanextilitinemi que ma amo xictacamatican in tanahuatil de Moisés. Huan nijín tagat no tamachtía que ma amo se quitztani oc nijín tomahuiscatiopan. Huan nijín tagat Pablo ay quincalaquijtinemi sequin griegos tech nijín tomohuiscatiopan, huan ijcón quipitzochiutinemi de nijín tomohuiscatiopan.

<sup>29</sup> Huan ijcón ne tayecanani judíos quijtoayaj porín yejuan quinitacque Pablo huan Trófimo tech in pueblo de Jerusalén. Huan queme yejuan quimatque que Trófimo hualehuac de Efeso, huan no quimatque que Trófimo sen nemía ihuan Pablo, ica ya nojón yejuan quiyolnemilijque que Pablo no quisehuicaya ya ne tiopanijtic ne Trófimo ten amo pohui queme in judíos. <sup>30</sup> Ijcuación nimantzin mohueycuejmolojque nochi in pueblojuani de Jerusalén huan mohualtaløjteuque campa Pablo. Huan quiquitziqijque Pablo huan quititiltzteuque calampa den hueyi tiopan. Huan de ompa nimantzin quitzacuacque in puertas den hueyi tiopan. <sup>31</sup> Huan mas ya yejuan quinequáfaj quimictisque ya Pablo. Pero mochihuac que quimatiltijque in hueyichique den soldados romanos que nochi in pueblojuani den Jerusalén mohueycuejmolojtocque. <sup>32</sup> Ijcuación in tayecanque soldado quincueteu sequin tayecanani nin-soldados, huan de ompa motalojque huan quintalochtij hasta campa in tagayot motehuijtoyaj. Huan cuac in tagayot quitacque que ejcotihuitze ya in tayecanque soldado ihuan ocsequin miacque soldados, ijcuación quicauque Pablo huan amo cachi quimajmagacque oc. <sup>33</sup> Huan cuac ejcoc ya in tayecanque soldado, ijcuación quitanahuatilij ma quiquitziquican Pablo queme preso huan ma quitziytzicocan ica ome tepos cadena. Huan de ompa in tayecanque soldado tajtanic de can cayot ne Pablo huan de toni tajtacol quichihuac. <sup>34</sup> Pero sequi pueblojuani tzajtziayaj ica se taman tajtol, huan ocsequin pueblojuani tzajtziayaj ica ocsé taman tajtolis. Huan queme in tayecanque soldado amo huelfa cajsicamatis nochi nijín ne teluililis porín ongaya hueyi cuejmololis, ica ya nojón yejua tatitanic ma cuiyacan Pablo hasta campa calyetocque in soldados. <sup>35</sup> Huan cuac in soldados ajsicque campa in escalones de ninchan in soldados, ijcuación quipíac que quimanhalojque Pablo porín tagayot tel mocuejmolojtayaj. <sup>36</sup> Huan ijcón in pueblojuani quintociltijtiayaj in soldados huan tzajtziayaj huan quijtoayaj ijcuín:

—¡Xicmictican san ne tagat Pablo!

### **Nican Pablo motajtoltenpalehuij inixpan nochi in pueblojuani judíos**

<sup>37</sup> Huan cuac in Pablo quicalaquijtiayaj ya campa calyetoyaj soldados, ijcuación yejua quitajtoltij in tayecanque soldado ijcuín:

—¿Cox tinechontacahuilis ma nimitzonnojtzas tepitzin?

Huan ijcón in tayecanque soldado quinanquilij ijcuín:

—¿Xe melau tejua tihueli titajtoa ica in griego tajtol? <sup>38</sup> Achá tejua ya tiyesqui ne den tipueblojcat de Egipto ten quichihuac ne hueyi ne tehuilis ihuan in soldados romanos, porín yejua quinuiyac nahui mil temictiani ne campa taiucan.

<sup>39</sup> Ijcuación in Pablo quilij ijcuín:

—Nejua melau nijudío porín niyolic campa ne tayecanque pueblo de Tarso ten itatilanal de Cilicia. Pero nimitzontatautía xinechontacahuili ma niquinnojtza oc nijín pueblojuani.

<sup>40</sup> Huan in tayecanque soldado quitacahuilij ya. Ica ya nojón in Pablo moquetzac campa escalones huan quintanextilij ica imay que ma tamatiyacan in tagayot. Huan cuac in pueblojuani motentamatilijque ya, ijcuacán in Pablo pehuac quinnojtza ica tajtolme de hebreo huan quinilij ijcuín:

**22** —Namejuan nannocnihuan huan nantetatuan, xinechcaquilican tenica nimo-tajtoltenpalehuía namoixpan.

<sup>2</sup> Huan cuac in tagayot quicacque ya que Pablo pehuac quinnojtza ica tajtolme hebreo, ijcuacán yejuan cachi oc motentamatilijque. Huan ijcón in Pablo quinilij ijcuín:

<sup>3</sup> —Nejua ya melau nijudío huan niyolic campa pueblo Tarso ten itatilanal in Cilicia. Pero nimoscaltij nican Jerusalén. Huan nejua nechmachtij ne Gamaliel. Ica ya nojón yejua cuali nechyecajsicamachtij nochi in tanahuatilme de ne tohuej-cautatuan. Huan nejua nachipa nicyolnejnequic nictacamatis Notajtzin Dios, ijcón queme axcan namejuan nanquiyolnejnequij nanquichihuasque tech nijín tonalme.

<sup>4</sup> Huan nejua ne achtopa ya niquintajyohuilitiaya neques ten quineltoayaj in ojtzin de Jesús hasta niquinmictiaya. Huan niquinquitziya taca huan sihuame para niquintemactis inmaco in tayecanani ma quincalaquican ne cárcelijtic. <sup>5</sup> Huan hasta in tayecanque tiopixcat huan in huehuentzitzin den pueblojuani de judíos, yejuan nojonques quimatocque nochi nijín ten nicchihuac. Porín yejuan nechmactiliayaj se amat campa ixnesi que nicpiaya tanahuatil. Huan nojón amat ten cuica tanahuatil nicuicaya para niquinmactilisquía in tocnihuan judíos campa pueblo Damasco. Huan ijcón nejua niyaya Damascojcopaca para niquincuiti presos ten itaneltoacahuan Jesús. Huan de ompa niquinualcuía hasta nican Jerusalén para ma nican quintatzacuilitican.

### **Nican Pablo quintapohuij in tagayot de queniu yejua pehuac tacuautamati ihuan Cristo**

*(Hch. 9.1-19; 26.12-18)*

<sup>6</sup> Pero mochihuac que cuac nejua ninejnentoya huan niajsitiaya ya campa amo huejca de ne pueblo Damasco, ijcuacán catca queme nepanta cuac sepan san monex-tico huan nechyehualoco se chicahuac tanex den eluiyac ten cualtzin milictic. <sup>7</sup> Huan de ompa nihuetzito talpan huan nicayic se tajtolis ten quiytoayaj ijcuín: “Tejua Saulo, ¿queyé tinechtahuelitztinemi?” <sup>8</sup> Ijcuacán nejua nicnanquilij ijcuín: “¿Aconi teju-atzin Notecotzin?” Huan Yejuatzin nechnanquilij ocsepa ijcuín: “Nejua ya ni Jesús de Nazaret ten tejua tinechtahuelitztinemi”. <sup>9</sup> Huan ne taca ten nechsehuicayaj, yejuan nojonques no melau quiyequitacque ne tanex huan mohueyiyolmoutijque. Pero yejuan amo cajsicamatque nojón tajtolis ten nechnojtzaya. <sup>10</sup> Pero nejua nicnanquilij ne tajtolis ocsepa ijcuín: “Notecotzin, ¿toni monequi nicchihuas?” Huan Notecotzin nechilij ijcuín: “Ximoquetza huan xiyó ne campa pueblo Damasco, huan ompa mitzilisque nochi ten Dios quimonequiltía ticchihuas”. <sup>11</sup> Huan queme nejua niixpojyocuique ica ne tanex, ica ya nojón nechmajchanque ne naquen nechsehuicayaj huan ijcón nechajxitijque ne campa pueblo Damasco.

<sup>12</sup>Huan tech nojón pueblo de Damasco yetoya se tagat ten monetzaya Ananías, huan yejua semi taticamatque ica in tanahuatil de Moisés. Huan nochi in judíos ten calyetocque Damasco, yejuan semi quicualtagaitayaj ne Ananías. <sup>13</sup>Huan ijcón ne Ananías huala nechitaco. Huan cuac ejcóc ya campa niyetoya, ijcuacón nechilij ijcuín: “Tejuatzin, nocniu Saulo, ma Dios mitztachialti”. Huan tech nojón momento nimantzin Dios nechtachialtij, huan ijcón huelic ya niquitac ya in Ananías. <sup>14</sup>Huan ijcón no nechilij Ananías ijcuín: “Nin Dios de tohuejcautatuan, Yejuatzin mitzijitac ya desde ne achtopa ya para que tejua xiquixmati ten Totajtzin Dios quimonequiltía xicchihua. Huan Dios no mitzijitac ya para tiquitas Jesús que Yejuatzin in Yolmelahuactzin. Huan no mitzijitac para ticaquilis que Jesús mitznojnotzoc. <sup>15</sup>Huan ijcón tejua tiquinnojnotztinemis de Jesús nochi in talticpacuani, huan tiquintaphuijtíyás nochi ten tiquitac ya huan nochi ten ticayic ya. <sup>16</sup>Ica ya nojón ma amo ticchá oc. Ta, ximoquetza huan ma mitzahuican. Huan ximotatautilij ica in chicahualis den Tocaytzin den Totecotzin para ma ijcón Totajtzin Dios mitzchijchipahuilis de motajtacoluan”.

### **Nican Pablo quintapohuj in tagayot de queniu Dios quititanic ma quinnojnotzati ne taca ten amo judíos**

<sup>17</sup>Huan Pablo no quinliaya in tagayot ijcuín:

—Huan mochihuac que cuac nimocuepac ya campa pueblo Jerusalén, ijcuacón niyajca campa ne hueyi tiopan para nimotatautilis ihuan Dios. Huan cuac nimotatautilijtoya ya ihuan Dios, ijcuacón nitajtachíac ijcón queme cuac se tacochitzoc. <sup>18</sup>Huan niquitac Notecotzin, huan Yejuatzin nechiliaya ijcuín: “Ximoijsihuili xiquisa nican Jerusaléncopaca porín in pueblojuani amo mitzneltoquilisque tenica tejua tiquinnojnotzoc de Nejuatzin”. <sup>19</sup>Ica ya nojón ocsepa niquilij Yejuatzin ijcuín: “Notecotzin, ¿pero quenin nihuelis niquisas? Porín nochi in pueblojuani quimatoque ya que nejua ninentinemía nohuiyan campa yetocque in tiopanme de judíos. Huan niquinquitziqij neques ten tacuautamatque mohuantzin huan niquinuicaya ma quintzacuacan tech in cárcel huan ma quinuitequican. <sup>20</sup>Huan cuac quimictijque ya motequiticau Esteban ten tajtojtinemía ica in motencopaca, ijcuacón nejua no ompa niyetoya. Huan no nicuelitaya que yejuan ma quimictican in Esteban huan no niqinpixtolijtoya nintilma neques ten quimictijque Esteban”. <sup>21</sup>Pero Notecotzin nechilij ijcuín: “Xiyó queme nimitzilij, porín Nejuatzin nimitztitaniti huejca campa calyetocque in tagayot ten amo poutinemij queme judíos”.

### **Nican Pablo mocahuac imaco ne tayecanque soldado**

<sup>22</sup>Huan ijcón Pablo quicaquilijque nochi nijín tajtolme ya. Huan de ompa peuque tzajtzíaj in tagayot ijcuín:

—¡Ximictican nijín tagat! ¡Cachi cuali ma amo nemi oc nican talticpac!

<sup>23</sup>Pero in tagayot ojcachi oc tzajtzíaj huan motatzajtzayaniayaj yejuan ica nintilmajuan huan cajcopixohuayaj míac talnex ejecaixco. <sup>24</sup>Huan queme cachi oc quichihuaya necuejmololis in tagayot, ica ya nojón in hueyi chiuque soldado tanahuatij ma quicalaquican Pablo ne calijtic in soldados. Huan no tanahuatij que ma cuitequican, huan ma quitajtolitican in Pablo de toni nitajtacol, para ijcón quimatisquía de queyé in tagayot tzajtzíaj ma quimictican. <sup>25</sup>Huan cuac in Pablo cuali quitzijtz-



icojca ya para cuitequisque, ijcuación yejua quilij in tayecanque soldado ten ompa yetoya ijcuín:

—¿Xe tejua mitztacahuilisque ya nintanahuatilme de Roma que tejua xinechuitequis? Porín nejua nipueblojcat de Roma huan ayamo aca se tequihua romano ma nechixcomaca de notajtacoluan.

<sup>26</sup> Huan cuac ne tayecanque soldado quicayic ya nijín tajtol de Pablo, ijcuación yejua yajqui quimatiltito in hueyi chiuque soldado huan quiliaya ijcuín:

—Cuali xiquita toni ticchihuilis nijín tagat Pablo, porín yejua no pueblojcat de Roma.

<sup>27</sup> Ijcuación in hueyi chiuque soldado quitato Pablo huan quitajtoltij ijcuín:

—¿Xe yec melau que tejua no tipueblojcat de Roma?

Huan in Pablo quinanquilij ijcuín:

—Quema, nejua nipueblojcat de Roma.

<sup>28</sup> Ijcuación in hueyi chiuque soldado quilij ijcuín:

—Nejua niquixtahuac ica míac tomin para nimochihuaco nipueblojcat de Roma.

Huan Pablo quilij ocsepa ijcuín:

—Nejua no nipueblojcat de Roma porín ipa ijcón niyolic.

<sup>29</sup> Huan ica nijín tajtolme ten quicacque, ijcuación nochi in soldados ten quitzi-jtzicojcaj ya para cuitequisque, yejuan nojonques quicajcauteuque in Pablo. Huan hasta no in hueyi chiuque soldado quicauteu Pablo cuac yejua cajsicamatic ya que in Pablo catca pueblojcat de Roma. Huan nochi moyolmoutiayaj porín quitzi-jtzicojcaj ya Pablo.

### Nican Pablo moajsi senteixteno nochi in tayecanani judíos

<sup>30</sup> Huan imostica in hueyi chiuque soldado quinequía quiyecmatis de tonica in tayecanani judíos quiteluiliiyay Pablo. Ica ya nojón quimaquixtilijque Pablo ne teposcadena. Huan in hueyi chiuque soldado tatitanic ma quinsentilican in tayecanani tiopixcame ihuan nochi in tayecanani den pueblojuani judíos. Huan cuac mosentilijque ya, ijcuación cualcuicque Pablo inixpan nochi in tayecanani judíos.

**23** Huan ijcón in Pablo quinsenixitac in tayecanani judíos huan quinilij ijcuín: —Nocnihan judíos, huan nejua hasta axcan nichipaucanemi huan amo teyi ica tajtacol nimoyolcujmolojtinemi iixpantzinco Totajtzin Dios.

<sup>2</sup> Ijcuación ne Ananías ten tayecanque tiopixcat, yejua ne quinnahuatij neques ten yetocque cachi inacastan Pablo ma quitentatzinican. <sup>3</sup> Ijcuación in Pablo quilij in tayecanque tiopixcat ijcuín:

—Tejua se titagat titacajcayauque, huan Totajtzin Dios no mitzmagas. Yec melau que tejua nampón campa tihualtocotzyetoc para tinechixcomacas ijcón queme in tanahuatil de Moisés mitznahuatijtoc. Huan como tictacamati in tanahuatil de Moisés, ¿queyé titatitanic ma nechtentatzinican ijcón queme in tanahuatil de Moisés mitztacahuatijtoc que amo xicchihua?

<sup>4</sup> Huan sequi tayecanani ten ompa yetoyaj quilijque Pablo ijcuín:

—¿Queyé ijcón ticmohuispoloa nijín tayecanque ten hueyi tiopixcat de Dios?

<sup>5</sup> Ijcuación in Pablo quinanquilij ijcuín:

—Nocnihan, xinechontapojpoluican, porín nejua amo nicmatía cox yejua ya in hueyi tiopixcat. Ma amo ijcón nicchihuani porín in Tajcuilolamatzin de Dios quijtoa ijcuín: “Amo xicmohuispolo ne motayecancau den mopueblojcahuan”.

<sup>6</sup> Ijcuación in Pablo cajsicamatic que sequi tayecanani ten ompa yetoya, yejuan pohuíaj ihuan in saduceos. Huan no Pablo cajsicamatic que ocsequin pohuíaj ihuan in fariseos. Ica ya nojón in Pablo quinchicaucailij ijcuín:

—Nocnihuan judíos, nejua no nifariseo huan notatuan no fariseos catca. Huan nican sequin quinequij nechixcomacasque porín nejua niceltoca que se tonal panquisasque yoltocque in ánimajme.

<sup>7</sup> Huan cuac ijcón quinilij ya, ijcuación ne tayecanani fariseos huan ne tayecanani saduceos peuque motajtoltehuíaj yejuan san. Ica ya nojón nochi mocualancaxejx-elojque campa yejuan mosentilijcaj. <sup>8</sup> Huan in Pablo ijcón quinilij porín quimatic que ne saduceos amo quineltocaj que se tonal Dios quinpanquixtis yoltocque in ánimajme. Huan ne saduceos amo no quineltocaj cox ongay ángeles. Huan amo no quineltocaj cox in tagat quipía nitalnamiquilis. Pero in tayecanani fariseos, quema, quineltocaj nochi nijín. <sup>9</sup> Huan mochihuac que sejsé tayecanque pehuac motajtolix-namiquij hasta nochi tzajtzáj san. Huan no yetoyaj sequi tanextiliani den tanahuatil de Moisés ten taneltocayaj queme ne fariseos. Ica ya nojón ne tanextiliani moquetzque huan quinilij in ocsequin tayecanani ijcuín:

—Nijín tagat Pablo amo teyi ticajxilíaj tensá tajtacol. Huan tacán quémansa se ángel oso se chipahuac ejecat de Dios quinojnotzac Pablo, cachi cuali ma amo tiquixnamiquican Totajtzin Dios.

<sup>10</sup> Huan semi hueyi mocualantijque huan motajtoltehujque ne tayecanani, hasta in hueyi chiuque soldado quinyolmohuiliaya ne tayecanani que tajcón yejuan quipajpayastzasque Pablo. Ica ya nojón tatitanic ma quincuitij sequin soldados para ma quiquixtican ne Pablo intzalan in tayecanani huan para ma cuiyacan Pablo ocsepa campa inchan in soldados.

<sup>11</sup> Huan cuac imostica tayohuac ya, ijcuación in Totecotzin monextico iixpan Pablo huan quilij ijcuín:

—Ximoyolchicahua, Pablo, porín ijcón queme titanojnotzac ya ica notencopaca nican Jerusalén, no ijcón nicnequi titanojnotzatiu ica notencopaca campa pueblo Roma.

### **Nican tajtoa de queniu sequin judíos moyectencauque de quimictisque Pablo**

<sup>12</sup> Huan ijcón imostica sequin taca judíos moyectencauque de quimictisque Pablo. Huan ijcón cada se telijque ijcuín:

—Ma nopan huetzis in tatechihualis de Dios como nitacuas oso niatis achtopa que nimictis in Pablo.

<sup>13</sup> Huan nijín taca judíos ten ijcón moyectajtoltencauque ya catca queme ome-poalme taca. <sup>14</sup> Huan ijcón nijín judíos yajque quinitatoj in tayecanani tiopixcame huan in huehuentzitzin den pueblojuani de Israel huan quinilij ijcuín:

—Tejuan timoyectajtoltencauque ya que ticchihuasque ijcuín: “Ma topan huetzis ne tatechihualis de Dios como titacuj oso tiatij huan como ayamo ticmictíaj ne Pablo”. <sup>15</sup> Ica ya nojón tamechontatautíaj que namejuan huan nochi in tayecanani judíos ma xiquilican in hueyi chiuque soldado que mosta ma cualcui in Pablo nican namoixpan. Huan xiquilican in hueyi chiuque soldado que ma quichihua ijcón porín namejuan nanquinequij ojchachi oc nanquixcomacasque Pablo ica nejmach. Huan ijcón achtopa que ejcos in Pablo namoixpan, ijcuación tejuan tiyecyetosque ya para ticmictisque.

<sup>16</sup> Huan ne isobrino in Pablo quitecaquilij que ijcón quinequij quimictisque Pablo. Ica ya nojón ne isobrino yajqui campa inchan in soldados para quinejmachtito Pablo. <sup>17</sup> Huan in Pablo cuac quicaquic ya nijín tajtolme, ijcuacón yejua quinoztac ne tayecanque soldado huan quilij ijcuín:

—Nimitzilía que xicuica nijín telpocat campa yetoc in hueyi chiuque soldado porín yejua cualcui sequi tajtolme para quilis.

<sup>18</sup> Huan ijcón in tayecanque soldado quicuiteu ne telpocat huan cuiyac campa yetoya in hueyi chiuque soldado huan quilij ijcuín:

—Ne preso Pablo nechnotzac huan nechtautij que ma nimitzualcuili nijín telpocat porín yejua cualcui sequi tajtolme ten quinequi mitzilis.

<sup>19</sup> Ijcuacón in hueyi chiuque soldado quimaquitzquij in telpocat huan cuiyac seco, huan ompa quitajoltito ijcuín:

—¿Toni tajtolme ticualcui ten tejua ticnequi tinechilis?

<sup>20</sup> Ijcuacón in telpocat quilij ijcuín:

—In tayecanani judíos moyectencauque ya que mitztatautiquihue que mosta xicuica in Pablo ninixpan nochi in tayecanani judíos para ocsepa quiyancuicaix-comacasque ica nejmach. <sup>21</sup> Pero como huitze, ijcuacón amo xiquinnetoquili ten mitziliquihue. Porín ongacque queme omepoal taca ten quichtacapijpixtocque Pablo para quimictisque. Huan yejuan moyectencauque ya ijcuín: “Ma topan huetzi in tatelchihualis de Dios como titacuaj oso tiatij huan como ayamo ticmictáj ne Pablo”. Huan axcan yejuan sayó quichixtocque tonica tiquinanquilis, que cox ticuicas Pablo oso amo.

<sup>22</sup> Ijcuacón in hueyi chiuque soldado quinhuatij in telpocat que ma amo aquen quitapohui nijín ten quilij ya. Huan de ompa quititanic ma yohui.

### **Nican cuiyacque Pablo campa pueblo de Cesarea imaco Félix in hueyi tequihua**

<sup>23</sup> Huan de ompa in hueyi chiuque soldado quinnojnnotzac ome de nitayecanc-ahuan soldados huan quinnahuatij ijcuín:

—Ximoyejyctatalican namejuan huan namosoldados para axcan tayohuac queme chicnahui hora de yohuac ma xiquisacan para nanyasque ne campa pueblo Cesarea. Huan monequis ma yacan ome ciento soldados ten metznejnentinemij. Huan no ma yacan eyipoal huan májtacti soldados ten ipan mopantaliytinemij tech nincaballo. Huan no ma yacan ome ciento soldados ten cuicatinemi cuoume ten quilíaj lanza.

<sup>24</sup> Huan no in hueyi chiuque soldado tanahuatij ma cualcuilican se caballo para ma in Pablo mopantalis cuac yas Cesarea. Huan no tanahuatij ma cuiyacan Pablo pero ma amo quicojcocojtiyacan huan ma amo teyi ipan mochihua para ijcón quimactilisque in hueyi chiuque tequihua Félix. <sup>25</sup> Huan in hueyi chiuque soldado no quijcuiloj se carta ten quijtoj ijcuín: <sup>26</sup> “Nesua ni Claudio Lisias; huan nimitzontajpaloa ica míac mohuisyot, tejuatzin Félix in hueyi tequihua, huan nimitzonilía ijcuín: <sup>27</sup> In tayecanani judíos quiquitzquijque queme preso nijín tagat Pablo para quimictisque. Pero cuac nesua nicmatic que yejua puebljcat de Roma, ijcuacón niquinuiyac nosoldados huan niquixtito inmaco in tayecanani judíos. <sup>28</sup> Huan queme nicnequía nicmatis de tonica quiteluliayaj Pablo, ica ya nojón nicuiyac Pablo inixpan nochi in tayecanani judíos. <sup>29</sup> Pero mochihuaco que nicajsicamatic que yejuan quiteluliayaj porín amo quitacamatic nintanahuatiluan de yejuan san. Ica ya nojón amo teyi tajtacol quiapiya in Pablo para ma quimictianij, huan nión no para ma quiza-

cuasquáj queme preso. <sup>30</sup> Huan queme nictecaquilijca ya que sequi taca judíos motajtoltencauque de quimictisque Pablo, ica ya nojón axcan nimitzontitanilía tejuatzin momaco. Huan no niquintanahuatiliz ya in judíos ten quinequij quiteluilisque Pablo, ma quichihuatij moixpantzinco nochi ten yejuan ica quiteluilíaj. Hasta nican san timonahuatía”.

<sup>31</sup> Ijcuación in soldados quichiuque ijcón queme quinnajnahuatijca in hueyi chiuque soldado. Huan quicuiteuque Pablo huan cuiyacque ca yohual hasta ajsicque campa pueblo Antípatris. <sup>32</sup> Huan ijcón imostica in soldados ten yayaj metznejnemíaj, yejuan mocuepque huan yajque ocsepa Jerusalén campa ninchan. Huan in soldados ten yayaj ica caballos, yejuan ijcón quisehuiyacque Pablo. <sup>33</sup> Huan cuac in soldados ajsicque ya campa pueblo Cesarea, ijcuación yejuan quitemactijque ne amat tajcuilol imaco in hueyi tequihua Félix huan no quitenextilijque Pablo iixpan. <sup>34</sup> Huan cuac in hueyi tequihua Félix quitamileeroj ya in amat tajcuilol ten cuiquilijque ya, ijcuación yejua matajtanic de can cayot in Pablo. Huan quinanquilijque que Pablo pohuía ne Ciliciajcopaca. <sup>35</sup> Ica ya nojón in Félix quilij Pablo ijcuín:

—Xicmati que cuac hualasque ne naquen mitzteluilisque, ijcuación nimitzcaquilis motajtoluan.

Huan de ompa Félix tanahuatij ma quiyecpíxtocan Pablo campa ne hueyi cali campa calyotoc in rey Herodes.

### Nican Pablo motajtoltenspalehuj iixpan in hueyi tequihua Félix

**24** Huan satepan cuac ajsic ya macuil tonalica, ijcuación in hueyi tiopixcat Ananías ajsito campa pueblo Cesarea ihuan sequin huehuentzitzin den pueblojuani judíos. Huan no quisehuicayaj se tetajtohujique ten monotzaya Tértulo. Huan nochi yejuan nojonques yajque iixpan in hueyi tequihua Félix para ompa quiteluilisque Pablo. <sup>2</sup> Huan cuac in Pablo cualicque ya iixpan in Félix, ijcuación ne tetajtohujique pehuac quiteluilía Pablo. Huan ne Tértulo quilij Félix ijcuín:

—Timitzonhueyitasojcamachilíaj tejuatzin, tionueyi tequihua, porín ica por tejuatzin ticpíaj paquilis huan yolsehuilis. Huan ticmatij que tejuatzin ticchiutoc míac cuajcuali chihualisme ica mocualitamachilisuan tenica tejuatzin tiquinpalehuijtoc topueblojcahuan. <sup>3</sup> Huan nochi nijín ten tejuatzin tionueyi tequihua ticonchiutoc, tejuan nochi tiyolpaquij huan timitzontasojcamachilíaj por motachihualisuan de mochiutoc nohuiyanpan. <sup>4</sup> Huan queme amo ticnequij cachi oc timitzilochtijtosque oc, ica ya nojón nimitztatautía ica míac mohuisyot que xitechonyolicneli huan xitechcaquili sequin tajtolme. <sup>5</sup> Huan no nimitzonilía que nijín tagat Pablo ticajxilijque que yejua se tagat ten techcuesojtinemi. Huan no nijín tagat nohuiyanpan den senmanahuac quinxejlojtinemi in taca judíos. Huan nijín Pablo yejua in tayecanque de neques ten taneltocatinemij de ne Jesús de Nazaret. <sup>6</sup> Huan nijín Pablo hasta no quinequía quipitzotilis tomohuiscatiopan. Ica ya nojón tejuan tiquiquitzquijque huan ticnequíaj tiquixcomacasque ijcón queme technahuatía totanahuatiluan. <sup>7</sup> Pero in hueyi chiuque soldado Lisias, yejua mocalaquij ica por ne Pablo, huan quitemacuilij ica hueyi cuejmololis. <sup>8</sup> Huan no Lisias techilij que como ticnequij ticteluilisque Pablo, monequis ma timitzonitaquij tejuatzin. Huan axcan ticnequi tejuatzin xiyectajtolti Pablo para ijcón ticmatis de tonica ticteluilicoj tejuan.

<sup>9</sup> Huan ijcón in tayecanani judíos ten ompa yetoyaj yejuan quisenijtoaya ijcuín:

—Hueyi melau ten mitzonilujtoc ne Tértulo.

<sup>10</sup> Ijcuación in hueyi tequihua Félix quixtanextilij Pablo que ma yejua tajto ya. Ica ya nojón Pablo pehuac quinilía ijcuín:

—Ca míac paquilis nimotajtoltenpalehuía moixpantzinco, tejuatzin Félix, porín nicmati que melau, tejuatzin ya, tionueyi tequihua de míac xiume ya inpan nochi nijín judíos. <sup>11</sup> Huan tejuatzin cuali tihueliti ticajsicamatiti de que nejua niajsic ya nepa Jerusalén quipía majtactiomome tonal san para ompa nicmohuistiliti Totajtzin Dios. <sup>12</sup> Huan nijín taca ten nechteluilíaj amo cana nechajsicque nimotajtoltehujitoyá ihuan acsame. Huan nión no nechajsicque niquincuejmolojttoyá in pueblojuani judíos. Huan amo cana niquincuejmolojtinemía in tagayot nión tech ne hueyi tiopan huan nión no tech ocsequin tiopanme huan nión no tech pueblo Jerusalén. <sup>13</sup> Huan nijín tayecanani amo huelis teyi mitzonyecnextilisque tenica nechteluilíaj. <sup>14</sup> Pero axcan mitzonyecajsicailía que nejua nictacamati huan nicmohuistilía Totajtzin Dios ten nohuejcautatuan no quimohuistiliayaj. Pero nejua nicmohuistilijtinemi Totajtzin Dios ijcón queme nechnextilía in yancuic ojtzin de Cristo, ne ten tayecanani quipohuaj queme se amocuali taneltocalis ten nijín nicuicatoc. Pero nejua nicajsi-caneltocatoc ijcón queme ijcuiliutoc tech in tanahuatilme de Moisés. Huan no nicneltocatoc nochi ten quijcuilojcoj tohuejcautanahuatijcahuan. <sup>15</sup> Huan nitacacuautamati ihuan Dios de que se tonal Totajtzin Dios quinpanquixtis yoltocque nochi in ánimajme, amo sayó in yolcualime. Ta, no neques ten amo yolcualime. <sup>16</sup> Huan ica nijín tacuautamatilis nimoyojoyolchicahua huan ica ne yolchiphualis nichipaucanemi huan ijcón amo teyi nechteluilía noyolo iixpantzinco Dios huan nión no inixpan nijín taca.

<sup>17</sup> Huan míac xiume panocque ya huan amo ninentinemía campa nopueblo. Ta, ninentinemía campa ocsequin pueblojuani. Pero axcan ocsepa yequin nimoejcoltij campa nopueblo de Jerusalén para ompa niquintayocolis neques ten amo teyi quipíaj tenica ixpanosque. Huan no nihuala para nicmactilis Totajtzin Dios sequi nemactil ten quinamiqui quiselis. <sup>18</sup> Huan nejua nicchiutoya nochi nijín tatacamatis cuac sequin tayecanani judíos ten pohuíaj ne Asiajcopaca, yejuan nojonques nechajsicque ne tiopanijtic. Huan ompa nimochipautoya ya ijcón queme technahuatílía in tanahuatil de Moisés. Huan nejua nicchiutoya amo iixpan míac tagayot. Huan amo no niquincuejsojttoyá ne tiopancalaquini. <sup>19</sup> Huan monequía ma hualani moixpantzinco neques in tiopan calaquini para yejuan nechteluilisque, como melau yejuan tensá quimatij de notajtacoluan. <sup>20</sup> Huan como amo hualasque neques tiopan calaquini para nechteluilisque, axcan monequis yejuan neques ten nican yetocque moixpantzinco, ma mitzilican toni tajtacol nechajxilijque campa mosentilijque nochi in tayecanani den pueblojuani judíos. <sup>21</sup> Huan achá nechteluilíaj nijín tayecanani porín nejua cuac niyetoya ninixpan nochi ne tayecanani den pueblojuani judíos, ijcuación niquinchicaucailij ijcuín: “Axcan nanquinequij nanechixcomacasque porín nicneltoca que se tonal panquisasque yoltocque nochi in ánimajme”.

<sup>22</sup> Huan Félix quicaquic ya nochi nijín tajtolme ten quijtoaya Pablo. Pero yejua ipa quiyecajsicamatic ya de toni quijtosnequi ne ojtzin de Cristo. Huan in Félix nochi nijín quicahuac para ocsé tonal quincequilis. Ica ya nojón in Félix quinilij in tayecanani judíos ijcuín:

—Pero cuac hualas ne hueyi chiuque soldado Lisias, ijcuación yejua nochi nechtapohuis de nochi nijín ne teluililis. Huan ijcón nictamiixcomacas ya in Pablo.

<sup>23</sup> Ijcuacán in Félix quinahuatij ne tayecanque soldado ma quiyecpixinemican in Pablo queme preso. Pero no tanahuatij que ma quicahuacan Pablo ma quichiutinemi queme yejua quimonequiltía ne calijtipa. Huan no tanahuatij ma amo quinxtopehuacan ne icalpanocahuan cuac huitze quicalpanoquihue Pablo. Ta, ma quinseli.

<sup>24</sup> Huan cuac panocque ya sequi tonalme, ijcuacán in Félix huala ocsepa ihuan isihuau ten monotza Drusila, ne ten pohuía ihuan in judíos. Huan cuac ejcocque ya, ijcuacán in Félix quitanahuatij Pablo ma huiqui ma quinnojnnotzaqui ica ne tacuautamatilis de Jesucristo. <sup>25</sup> Huan Pablo quinnojnnotzaco ica ne chipaucanemilis de Cristo huan no quinnojnnotzac de queniu se moyecantinemis ica ichichualis de Cristo. Huan no Pablo quinnojnnotzac ica ne tatzacuultilis de Dios ten mochihuaquiu. Huan cuac in Félix quicaquic nochí nijín tajtolme de Pablo, ijcuacán yejua mohueiyolmoutij huan quilij Pablo ijcuín:

—Huan tejuatzin Pablo, cachi cuali xiyó ya. Huan cuac nejua niquemantitos, ijcuacán ocsepa nimitznotzas.

<sup>26</sup> Huan nijín Félix ijcón quichihuac porín quiyolnemiliaya que xa in Pablo quimactilisquía tomin para que ma yejua quicajcahua ma yohui. Ica ya nojón in Félix miacpa quinoztaya Pablo huan monojnotzaya ihuan. <sup>27</sup> Huan cuac panoc ya ome xiutica, ijcuacán ne Félix quicahuac nitequiu queme hueyi chiuque, huan motequicuic in Festo iixpatca Félix. Huan queme in Félix quinequía moyecahuas ihuan in tayecanani judíos, ica ya nojón quicahuac oc majcón yeto oc in Pablo queme preso.

### **Nican Pablo quitatautía in cachi hueyi chiuque César que ma yejua quipalehui ica ne neteluililis**

**25** Huan ijcón ejcoc in tonal cuac in Festo motequicuic huan mochihuaco hueyi chiuque de Cesarea. Huan satepan eyi tonalica in Festo quistehuac de pueblo Cesarea huan ajsito campa pueblo Jerusalén. <sup>2</sup> Huan ijcón ompa cuac ajsic ya in Festo campa Jerusalén, ijcuacán in tayecanani tiopixcame huan in ocsequin judíos den cachi tamatinime, yejuan nojonques yajque iixpan in Festo huan quimactiltoij se neteluililis de Pablo. <sup>3</sup> Huan nojón tayecanani quitatautijque Festo que ma quinchihuilis se hueyi tapalehuilis, que in Festo ma yejua tanahuati ma cualcuican Pablo desde Cesarea hasta nepa puebljcopaca de Jerusalén. Huan nijín tayecanani ijcón quitatautijque Festo porín yejuan quiyolnemilijtoyaj que quimictisque Pablo tech in ojti. <sup>4</sup> Huan in Festo quinnanquilij in tayecanani que amo ijcón quichihuas porín Pablo yejua tzactoc ya queme preso ompa Cesarea. Huan in Festo quiyolnemilijtoya amo huejcahuas no yas Cesareaicopaca. <sup>5</sup> Huan ijcón Festo quinili in tayecanani ijcuín:

—Nochi namejuan ten nantayecanani, monequi nanyasque nohuan campa pueblo Cesarea. Huan ompa nancaquilisque de toni tajtacol ica nanquiteluilíaj in Pablo.

<sup>6</sup> Huan in Festo yetoya ne campa pueblo Jerusalén achá queme chicueyi tonal oso májtacti tonal. Huan de ompa mocuepac ocsepa campa pueblo Cesarea. Huan ijcón imostica in Festo motequicuic campa ne taixcomacalispán huan ijcón yejua tanahuatij ya que ma cualcuilian Pablo. <sup>7</sup> Huan cuac in Pablo calaquico ya campa in Festo, ijcuacán nochí nijinques tayecanani judíos ten hualajque de Jerusalén, yejuan motoquijque huan peuque quipajpantíaj Pablo ica míac tataman tajtacol. Pero yejuan amo teyi huelque quitenextilisque ten melau tenica quiteluilíayaj. <sup>8</sup> Ijcuacán in Pablo cachi oc motajtoltenpalehuiaya ijcuín:

—¿Queyé namejuan nannechteluilíaj? Ta, nejuatzin amo teyi nicchiutoc de tajtacol namohuan. Huan nión no nicmohuispolojtoc in tanahuatilme den pueblojuani judíos. Huan nión no nicmohuispolojtoc ne hueyi tiopan. Huan nión no nicmohuispolojtoc ne hueyi chiuque de Roma ten monotza César.

<sup>9</sup> Pero queme in Festo quinequí moyecahuac ihuan in tayecanani judíos, ica ya nojón yejua quitajtolitj Pablo ijcuín:

—¿Xe tejua Pablo ticnequi tiyás ne Jerusalén para ompa mitzixcomacasque de nijín neteluililis?

<sup>10</sup> Ijcuacán Pablo quinanquilij Festo ijcuín:

—Nican niyetoc campa in taixcomacalipan den hueyi chiuque de Roma ten monotza César. Huan nican ya campa melau monequi ma nechixcomacacan. Huan tejuatzin cuali ticonajsicamatoc ya que amo teyi tajtacol nicchihuac inixpan nijín tayecanani judíos. <sup>11</sup> Huan tacán nejua nicchihuac tensá tajtacol ninixpan in tayecanani judíos ten cualcui tatzacuilitis de miqulilis, ijcuacán nejua nimoyectemactisquía ma nechmictican. Pero como amo teyi ongac tajtacol ten nicchihuac ninixpan ne tayecanani judíos, ica ya nojón amo teyi melau tenica nechteluilíaj. Huan ijcón amo aquen huelis nechtemactis inmaco nijín tayecanani. Huan axcan nimitzontatautía que cachi cuali ma nechixcomaca ne hueyi chiuque de Roma, ten monotza César.

<sup>12</sup> Huan satepan cuac in Festo quintamiixejecoltj ya ne itayolmajxitijcahuan, ijcuacán yejua quilij Pablo ijcuín:

—Huan queme titechilía que ticnequi ma mitzixcomaca in hueyi chiuque César, ica ya nojón tiyás axcan iixpan ne hueyi chiuque César.

### **Cuiyacque Pablo iixpan in rey Agripa huan isihauu Berenice**

<sup>13</sup> Huan ijcón panocque sequi tonalme huan in rey Agripa huan isihauu Berenice yajque campa pueblo Cesarea ompa quitajpalotoj in chiuque Festo. <sup>14</sup> Huan queme ompa yetoyaj sequi tonalme, ica ya nojón in Festo quitapohuuj in rey Agripa de ne teluililis de Pablo. Huan Festo quilij Agripa ijcuín:

—Nican yetoc se tagat ten ne achtopa tayecanque Félix quicauteu preso. <sup>15</sup> Huan nimitzontapohuía que cuac niyetoya ompa Jerusalén, ijcuacán ne tayecanani tiopixcame huan in huehuentzitzin de pueblojuani judíos, yejuan nojonques nechmactilijque se neteluililis ica por ne Pablo. Huan nochi yejuan nechtajtaniayaj se tanahuatil para ma nejua nictelchihua Pablo ma quimictican. <sup>16</sup> Huan nejua niquinnanquilij que in tanahuatil de Roma amo quitechahuilía que ma nejua nictelchihua se preso que ma quimictican, como amo achtopa mosenixcomacaj ihuan ne naquen quiteluilía para ijcón huelis motajtoltenpalehuis ica ne neteluililis. <sup>17</sup> Ica ya nojón cuac ne tayecanani judíos hualajque nican, ijcuacán nejua amo nihuejcahuac oc. Ta, niman imostica nimotequicuic tech nijín taixcomacalipan; huan de ompa nictatitanic ma cualcuican ne tagat Pablo. <sup>18</sup> Pero mochihuac que cuac ne tayecanani judíos peuque quiteluiliiayaj ya ne Pablo, ijcuacán amo teyi ica quipajpantijque de nejua niquixnemiliaya que quixilisque. <sup>19</sup> Ta, sayó quipajpantiayaj Pablo que amo melau quitacamatine mic nojón tanahuatilme de nintaneltoocalis. Huan no quixiliayaj de que Pablo quijtojtinemía que se tagat ten monotza Jesús momiquilijca ya, huan yejua ocsepa yoltinemi. <sup>20</sup> Huan queme nejua amo nicmatía queniu nictajtolcaquis de nijín taman de neteluililis, ica ya nojón nictajtolitj Pablo ijcuín: “¿Cox ticnequi

tiyás ne campa pueblo Jerusalén para ma ompa mitzixcomacacan ica nochi nijín neteluililis?”<sup>21</sup> Pero in Pablo nechtajtaniij que ma nejua ticitani campa pueblo Roma para ma ompa quixcomacacan iixpan in hueyi chiuque de Roma ten monotza César Augusto. Ica ya nojón nejua axcan nitanahuatij que ma ijcón yeto preso in Pablo hasta in tonal cuac nejua nicontitanilis Pablo ma yati iixpan ne hueyi chiuque de Roma ten monotza César Augusto.

<sup>22</sup> Ijcuacón in rey Agripa quilij Festo ijcuín:

—Pos nejua no nicnequi nictajtolcaquis nojón tagat.

Ijcuacón in Festo quinanquilij ijcuín:

—Cuali yetoc mosta ticontajtolcaquis de queniu yejua tajtoa.

<sup>23</sup> Huan melau ijcón imostica, cuac in rey Agripa huan isihuau Berenice ajsitoj ya ica hueyi cualtziyo campa ne taixcomacalispan de Festo, ijcuacón calaquitoj ne tayecanani soldados huan ne tayecanani taca den pueblojuani de Cesarea. Huan de ompa in Festo tanahuatij ma cualcuilican Pablo iixpan in tayecanani.<sup>24</sup> Ijcuacón in Festo quinilij nochi ten yetoyaj ijcuín:

—Tejuatzin tionchiuque tion rey Agripa. Huan nochi namejuan nantaca ten nican no nanmosentilijque tohuanme. Axcan nican yetoc nijín tagat Pablo. Ijcuacón miacque tayecanani judíos quipajpantiayaj Pablo tensá tajtacol noixpan. Huan amo sayó campa pueblo Jerusalén. Ta, no nican Cesareajcopaca quipajpantiayaj Pablo. Huan nochi nijinques amo queman mocahuayaj de nechtajtziliayaj que monequis miquis nijín tagat.<sup>25</sup> Huan nejua niquixejecoa que in Pablo amo teyi tajtacol quichihuac ten cualcui miquilis. Huan queme yejua nechtautía que ma nictitani campa in hueyi chiuque César Augusto, ica ya nojón nejua nimoyectencahuac ya de nictitanis nijín Pablo campa in hueyi chiuque de Roma, in César Augusto.<sup>26</sup> Huan amo teyi nicpía ten yec melau teluililis tenica nicontajcuilohuilis nohueyitayecancau César Augusto ne ten yetoc Roma. Ica ya nojón axcan namechualcuilij Pablo namoixpan. Huan cachi oc nicnequi ma yeto Pablo porín tejuatzin nican tionyetoc, tejuatzin tion rey Agripa, para que tejuatzin xicontatajtoltij nijín Pablo ica mías tataman matájtanti, para ma onca tonica nicontajcuilohuilis nohueyitayecancau ten yetoc Roma.<sup>27</sup> Porín nejua niquixejecoa que amo cuali tamachilis como nejua nictitanis se preso campa pueblo Roma huan como amo achtopa niqinnejmachtía de que tonica quiteluilijque.

### Nican Pablo motajtoltenpalehui iixpan in rey Agripa

**26** Ijcuacón in rey Agripa quilij Pablo ijcuín:

—Huan yequintzin timitzcahuilíaj que ximotajtoltenpalehui.

Ijcuacón in Pablo momatilanac para quitajpalos in rey Agripa. Huan de ompa pehuac motajtoltenpalehuía ya ijcuín:

<sup>2</sup>—Axcan nejua niyolpaqui porín tejuatzin tinechontacahuilía ma nimotajtoltenpalehui moixpan, tejuatzin ten tionrey Agripa, ica nijín neteluililis ten nechpajpantijtinemij ne tayecanani judíos.<sup>3</sup> Huan cachi oc nimoyolpactía de nimotajtoltenpalehuis moixpan porín nicmati que tejuatzin cuali ticonajscamati nochi in tanahuatilme den pueblojuani judíos. Huan tejuatzin no cuali tiquixmati nochi nijín tamachilisme tenica timotajtoltehuíaj tejuan tijudíos. Ica ya nojón nimitzontatautía que xinechonyecaquili ica nejmach de nijín notetajtohuilis.



### **Nican tajtoa de ne nemilis de Pablo achtopa que tacuautamatic ihuan Cristo**

<sup>4</sup> Huan nochi nijín tayecanani judíos cuali quimatij que nichipaucanentinemic inuan nopueblojcahuan huan inuan ne pueblojuani de Jerusaléncopaca desde cuac ne tonal cuac nipili oc nicatca. <sup>5</sup> Huan yejuan no cuali quimatij, queme yejuan quinequij mitzonilisque, que nejua no nicatca nifariseo desde cuac nitelpoch oc nicatca. Huan ne tocay fariseo yejua quijtosnequi que cachi oc nimoyoyolchicahuac para nicyectacamatinemis nochi in tanahuatilme de Moisés. <sup>6</sup> Huan axcan yejuan nechualcuicque nican moixpantzinco para nechixcomacasque porín nejua nitacuautamatinemi ica netenilil ten quijtoj Totajtzin Dios, de que Yejuatzin se tonal quinpanquixtis yoltocque in ánimajme, ijcón queme Totajtzin Dios quinyequilijca ya ne tohuejcautatuan. <sup>7</sup> Huan ica por ne netenilil de Dios, nochi ne majtactionome pan-time de tetatme de Israel, nochi yejuan quichixtihuayaj que se tonal mochihuaquiu ijcón queme Totajtzin Dios moyectencahuac inuan. Ica ya nojón nochi in judíos quimohuistilijtinemij huan quitacamatinemij in Totajtzin Dios yohual itonal. Huan nimitzonilía, tejuatzin ten tionrey Agripa, que ica nijín notacuautamatis de nejua nicpixtoc, yejica ya nijín tayecanani judíos nechteluilijtinemij. <sup>8</sup> ¿Queyé namejuan nanquixejcoaj que amo huelis mochihuaquiu que Totajtzin Dios se tonal quinpanquixtis yoltocque nochi ánimajme?

### **Nican tajtoa de queniu Pablo quintajyohuiltjinemía in tocnihuan taneltocani de Jesús**

<sup>9</sup> Porín nejua no niqixnemiliaya que semi monequic ma niquintajyohuiltis ica miac tataman neques ten tacuautamatinemij ica in chichualis den tocaytzin de Jesús de Nazaret. <sup>10</sup> Huan melau nejua ijcón nicchihuac tech in pueblo Jerusalén. Huan ica nintencopaca ne tayecanani tiopixcame nejua niquincárceltalij miacque ne yolchipauque taneltocani de Jesús. Huan no cuac ne tayecanani judíos quinmic-tiayaj in taneltocani, ijcuacón nejua no nicuelitaya ya. <sup>11</sup> Huan nejua miacpa niquintatzacuiltij ne taneltocani de Jesús campa in tiopanme de judíos huan no niqinchi-hualtiaya ne taneltocani de Jesús ma quimajpehuacan de nintacuautamatis ihuan Jesús. Huan nochi nijín nicchiutinemía tech nochi tiopanme den judíos. Huan nejua semi nitelueyiyolcualantinemía ica ne taneltocani de Jesús. Huan ijcón nejua niquintahuelitaya huan niqinquantocaya masquí campa pueblojme de analtecocayome.

### **In Pablo ocsepa quietapohuía queniu pehuac tacuautamatic ihuan Cristo**

*(Hch. 9.1-19; 22.6-16)*

<sup>12</sup> Huan ijcón niyaya Damascojcopaca para niquintajyohuiltisquía ne taneltocani de Jesús, porín ne tayecanani tiopixcame nechnajnahuatiayaj huan nechtequimacayaj que ma ijcón nicchihua. <sup>13</sup> Huan nimitzonilía, tejuatzin tion rey Agripa, que cuac ninejmentoya tech ojti para Damasco, ijcuacón queme nepanta niquitac se hueyi tanex ten hualehuac ne eluiyactzinco ten cachi chichahuac tahuía huan que in tonaltzin. Huan ne tanextzin huala nechyehualoco huan telsenca momoyotico nopan ijcón queme nejua huan neques ten nechsehucayaj. <sup>14</sup> Ijcuacón nochi tejuan tihuejuetzitaj talixco. Huan nejua nicaquic sequi tajtolis ten nechnojnatzaya ica in tajtol hebreo ijcuín: “Tejua Saulo, ¿queyé tinechtahuelitzinemi? Porín sayó timococojtinemi tejua san ijcón queme in cuacuejme mococojtinemij cuac in tapeuque

quinguestzoponijtiu".<sup>15</sup> Ijcuacán nejua nicnanquilij ijcuín: "¿Aconi Tejuatzin, Notecotzin?" Huan Notecotzin nechilij ijcuín: "Nejuatzin ya ni Jesús ten tejua tinech-tahuelitztinemi huan tinechicantocatinemi."<sup>16</sup> Nimitzilía que ximehua huan ximo-quetza porín Nejuatzin nimonextico moixpan para nimitztequimactis de que ma tejua xinechtequitiliti, huan no para xictetajtohuiltijtinemi nochi ten axcan tiquitac ya. Huan no xictetajtohuiltijtinemi de nochi ten tinechitilis oc satapan.<sup>17</sup> Huan Nejuatzin nimitzpalehuijtinemis cuac quinequisque mitzmictisque mopueblojcahuan judíos huan neques pueblojuani ten amo judíos. Huan axcan nimitznahuatía que xiyó xitanojnotztinemi ica Notajtoltzin campa pueblojuani ten amo poutinemij queme judíos.<sup>18</sup> Huan no nimitztitani campa ne pueblojuani ten amo judíos para que tejua xiquinnojnotzati. Huan xiquinyolmajxititi ica Notajtoltzin para que yejuan ma quicahuacan ne tajtacolyalis ten cualcuí tayohuayanilot, huan ma nentinemican ica por ne tanextzin de Dios. Huan ijcón in amocuali Satanás ma amo quinmapachojto oc ica nichicahualis. Ta, yejuan ma nentinemican ica por ne chicauhuelilistzin de Totajtzin Dios. Huan no nimitzilía que xiquinnojnotzati ne analtecocayome para ma yejuan tacuautamatican nohuantzin huan ijcón Notajtzin Dios quintajpojpoluis de nintajtacoluan. Huan ijcón no Dios quintayocolis ne analtecocayome se tanahuatil para ma yejuan poutinemican ihuan nochi in tocnihuan taneltocani ten Totajtzin Dios quinyolchipahuac ya".

#### **Nican tajtoa de queniu in Pablo quitacamatic ne ten Dios quinextilij**

<sup>19</sup> Ica ya nojón, tejuatzin tion rey Agripa, nicyectacamatic ijcón queme nechnextilij Notajtzin Dios den eluiyactzinco ijcón queme nechtajtachialtij majyá ne cuac nitacochitztosquía.<sup>20</sup> Huan nejua achto niquinmachtito ica in Tajtoltzin de Dios ne pueblojuani de Damasco. Huan nimampa niquinmachtito neques ten calyetocque Jerusaléncopaca. Huan de ompa niquinmachtia ya nochi in pueblojuani ten pohuíaj campa talme de Judeajcopaca. Huan cachi satapan niquinnojnotzato ne pueblojuani ten amo poutinemíaj queme judíos. Huan nejua niquinmachtia ya ijcuín: Ma moy-olnemilican de nintajtacoluan, huan ma mocuepacan den nintajtacolopan huan ma quitoctilican Totajtzin Dios. Huan no niquinilij ma quichiutinemican chihualisme ten cuali, para que ijcón ixnestinemis que yejuan melau moyolnemilijque den nintajtacoluan huan quitoctilijtoque Dios.<sup>21</sup> Huan nijín chihualisme nicchiutinemic nejua nohuiyan, ica ya nojón ne tayecanani judíos nechquitziqijque campa ne hueyi tiopan de judíos huan yejuan quinequíaj nechmictisque.<sup>22</sup> Pero ica ne tapalehuilis de Dios niquijyohuijtinemi nijín tajyohuilis hasta axcan. Huan niquinnojnotztinemic ica in Tajtoltzin de Dios neques ten hueyi chihuanime huan ya neques ten cachi majsehualme. Huan nejua amo queman nicsecocahuac de amo nitamachtijtinemía ica ne tanahuatilme ten ne huejcautanahuatiani huan ne Moisés ten quitetapohuicoj que se tonal monequi mochihuaquiu.<sup>23</sup> Huan nejua niquiniliaya ijcuín: Que in Cristo Temaquixtijque monequi ma quitajyohuiltisque huan ma quimictisque. Huan Cristo yejua nojón yesqui in achto tagat ten Dios quipanquixtij yoltoc intzalan in ánimajme. Huan in Cristo Yejuatzin quinyoltahuilis ica Nitajtoltzin ne ipueblojcahuan judíos huan no quinyoltahuilis ica Itajtoltzin de nochi in talticpacuani ten amo judíos.

### Nican Pablo quinequi quitaneltoctis in rey Agripa que ma tacuautamati ihuan Cristo

<sup>24</sup> Huan cuac Pablo motajtoltenpalehuijtoya ya ica nochi nijín tajtolme, ijcuacán in hueyi tayecanque Festo conchicaucailij Pablo ijcuín:

—¡Mitzcuatapololtiaya motaixmatilis!

<sup>25</sup> Pero in Pablo quinanquiliij ijcuín:

—Nimitzonilífa, tejuatzin tionueyichiuque Festo, amo nechcuatapololtijtoc notaixmatilis. Ta, nimitzonnojnottzoc ica tajtolme ten melau huan ten cualcui hueyi ne yolmajxtilis. <sup>26</sup> Huan nican niyetoc inixpan in rey Agripa ten yejuatzin no cuali quixmatoc nijín tanahuatilme. Ica ya nojón iixpantzínco in rey Agripa, nejua nimitznojnottzoc ica nochi ne yolchicahualis. Porín nejua cuali nicmati que in rey Agripa no cuali cajsicamatoc nijín tanahuatilme. Huan ijcón nimitzonilífa porín ne tequit de Jesucristo mochihuaco senteixteno huan amo teyi quitatij. <sup>27</sup> Huan tejuatzin tion rey Agripa, ¿xe tejuatzin ticonyecneltocha nochi ten quijtocoj ne huejcautanahuatiani de Dios? Pues nejua cuali nicmatoc que no ijcón ticneltochatoc queme nejua.

<sup>28</sup> Huan ijcón in rey Agripa quiliij Pablo ijcuín:

—¿Xe timoyolilífa que ca nijín ome eyi tajtolme tinechtaneltoctis que ma nejua nitacuautamati ihuan Cristo?

<sup>29</sup> Ijcuacán in Pablo quinanquiliij ijcuín:

—Nicchá que Dios ma quimonequilti que masqui ica nijín ome eyi tajtolme oso ica míac tajtolme que xiontacuautamati ihuan Cristo. Huan amo sayó tejuatzin. Ta, ma tacuautamatican nochi ninjiques ten quicactocque notanojnottzalis, para que yejuan ma mochihuaquij taneltocani de Jesús queme nejua. Pero ma amo mochihuaquij queme nejua nitzijtzicautoch ica tepos cadena.

<sup>30</sup> Huan satepan cuac in Pablo quintaminojnottzac ya ica nijín tajtolme, ijcuacán moquetztiquisac in rey Agripa ihuan isihuaui ten monotza ya Berenice, huan in hueyi tequihua Festo. Huan no ijcón moquetztiquisque ne ocsequin tayecanani ten ompa tocotzyetoyaj. <sup>31</sup> Huan in rey Agripa huan in Festo quicauteuque ocsequin tayecanani huan yajque ocsecan para ma ompa moixejecoltitoy ten quicaquilijque Pablo. Huan yejuan moliaiyaj ijcuín:

—Nijín tagat Pablo amo teyi tajtacol quichiutoc ten cualcui in miqulilis, huan hasta amo monequis ma yeto cárcelijtic.

<sup>32</sup> Huan in Agripa quiliij Festo ijcuín:

—Nijín tagatzin cuali huelis se quicajcahuas como yejua amo techtatautisquía que ma tictitanican imaco in hueyi chiuque ten monotza César para ma yejuatzin quixcomaca ompa.

### Nican quititanque Pablo campa pueblo Roma

**27** Huan moyectencauque ya de techtitanisque tech se barco para tiajsisque campa ne país ten monotza Italia. Ica ya nojón quitemactijque Pablo huan ocsequin presos imaco se tayecanque soldado ten monotza Julio, ten poutinemía ihuan ne panti soldados ten quitocaytiayaj Augusta. <sup>2</sup> Huan ijcón ticalacque tech se barco campa ne marteno den pueblo ten monotza Adramitio huan tobarco ipa panosquía nepa martenojcopaca de pueblojme ten yetoyaj campa talme de Asiajcopaca. Huan techsehuicaya se taneltocacque de Jesús ten monotzaya Aristarco ten pohuía campa

pueblo Tesalónica, den itatilanal de Macedonia. <sup>3</sup>Huan ijcón imostica tiajsicque tech ocsé marteno campa in pueblo Sidón. Huan ne tayecanque soldado Julio quimo-huiscahuicaya Pablo. Huan quintacahuilij itasojcinihuan de Pablo que ma quicalpanocan huan ma quipalehuican Pablo ica míac tataman tapalehuilis. <sup>4</sup>Huan de ompa tiquisteuque campa pueblo de Sidón huan tiyajque tech tobarco huan tipanotoj campa amo huejca quitztoya ne talme ten monotza Chipre ne toopochcopaca. Huan ijcón ticchiuque porín in ejecat techzajtzacuiliaya para tipanosquafaj tech ocsé ojti. <sup>5</sup>Huan cuac ticpanahuijque ya ne mar, ijcuacón tipanotoj ya campa nojón talme ten monotza Cilicia huan Panfilia. Huan ijcón hasta tiajsicque campa marteno se pueblo ten monotza Mira, ten itatilanal de Licia.

<sup>6</sup>Huan tech ne pueblo de Mira in tayecanque soldado Julio ompa cajsic se barco ten hualehuac campa Alejandríajcopaca huan yaya campa talme de Italia. Ica ya nojón in tayecanque soldado techcalaquij tech ne barco para ijcón ticsentocasque toojpan. <sup>7</sup>Huan ijcón mochihuac que ipan sequi tonalme titanejnemiltiyaj semi yolic. Huan ica hueyi ohuijgayot tiajsitoj campa pueblo Gnido. Huan queme in ejecat techzajtzacuiliaya oc, ica ya nojón tictacoluijque ne tal ten monotza Creta huan tipanotoj taixpan ne pueblo de Salmón, campa amo semi techzajtzacuiliaya in ejecat. <sup>8</sup>Huan ijcón tiyayaj ica hueyi ohuijgayot ne martenojcopaca san nochi campa talme de Creta. Huan ijcón tiajsicque campa se pueblojtzin ten monotza Buenos Puertos, ten amo huejca quitztoya ne pueblo de Lasea.

<sup>9</sup>Huan queme tihuejcauque tech toojpan, ica ya nojón ejcocque in tonalme cuac temomoutía in tetzaucaejecat. Huan ma amo yani in barco porín pehuas ya tasesecaecajecas. Ica ya nojón in Pablo quinequía quinyolmajxitis nochi tagayot ten tohuan yayaj, huan Pablo quinilij ijcuín:

<sup>10</sup>—Namejuan nantagatzitzin, axcan nicajsicamati que oncas ohuicayot tech toojpan para ticsentocasque aixco. Huan no nicajsicamati que huelis pancalaquis tech in mar tobarco huan ijcón polihuis nochi totamamal, huan hasta no tejuan tiixpolihuisque.

<sup>11</sup>Huan in tayecanque soldado Julio cachi amo quitacamati ten Pablo quiniliayaj. Ta, yejua cachi quicuelcaquilij ne patrón ten niaxca in barco. Huan no cachi quicaquilij ne tagat ten quiyecantinemij in barco. <sup>12</sup>Huan queme ne martenojcopaca ten monotza Buenos Puertos amo cualtía para ompa ticpanosque ne tapoalme cuac tasesecaecajecaya, ica ya nojón nochi ticyolnemilijque ijcuín:

—Cachi cuali ma tiquisacan de nican huan ma tiyacan campa ne martenojcopaca den pueblo ten monotza Fenice ten itatilanal Creta, que xa ompa huelis tiajsisque para ijcón ompa ticpanotihue ne tapoalme cuac tasesecaecajecas. Porín tech ne pueblo de Fenice ompa cuali mocahuati se barco porín amo cachi quimamagasya ne ajcopaejecat huan ne tanipaejecat.

### Nican tajtoa de que tatetzaucaecajecaya marixco

<sup>13</sup>Huan queme pehuac yemancataejecaya de ne ajcopaca, ijcuacón in tayecanani den barco quiyolnemiliayaj que cuali huelis tanejnemiltisque tech ninopan. Ica ya nojón quisque huan yajque quinejnemiltiyaj in barco martenojcopaca san nochi campa amo huejca quitztoc ne talme de Creta. <sup>14</sup>Pero nimampa pehuac tatetzaucaecajeca queme yesquía in tonal ejecat, huan quimamagasya in barco huan ne chiscaecajecat ten hualaya tanipaca quiliayaj Noreste. <sup>15</sup>Huan ne chiscaecajecat pe-

huac quiquequepa in barco. Huan queme amo huelía oc quinejnemiltisque oc in barco porín chicaucataejecaya, ica ya nojón tejuan timosencauque ya para ma sayó techuica ya in ejecat campa mopitztoc.<sup>16</sup> Huan ijcón tipanocque icampa se tzictzin taltzin ten monotza Clauda, campa amo semi taejecaya. Pero ica míac ohuijcaoyot huelic ticpanquixtijiayque ne tzictzin barco ten ticualtilatzaya desde ne Fenicejcopaca.<sup>17</sup> Huan satepan cuac ticteljcoltisque ya ne tzictzin barco, ijcuación cuali tictz-ijtzicojque ne tzictzin barco. Huan de ompa in tequitini peuque quitzijtzicoaj huan quitajcoyantzijtzicoaj in hueyi barco para ma amo majmacahui ica ne chicaucatejecat. Huan ne tequitini quiyolmohuiliayaj que tajcón in barco mocalaquiti campa ne yoca atexal ten monotza Sirte, ijcuación majmacahuisquía. Ica ya nojón in tequitini quitemohuijque ne mantajtilma tenica in ejecat quinejnemiltía in barco. Huan ijcón mosencauque in tequitini ma techuica ya in ejecat campa mopitza.<sup>18</sup> Huan ijcón imostica quisentocaya tatetzaucaejecaya, huan ilihuis techmajmagaya ne ejecat. Ica ya nojón imostica in tequitini peuque quiatatamotaj nochi in tamamal ten cuicaya in barco.<sup>19</sup> Huan ijcón ipan eyi tonalica tejuan ica tomahuan tiquinquixtilijque huan tiquinatamatotque nochi ten tictatequiutiayaj tech in barco calijtic.<sup>20</sup> Huan ijcón míac tonalme panocque huan amo monextij in tonal huan in sitalinme. Huan ica nijín hueyi tetzaucaejecat ten techmamagaya, ijcuación ticyolnemiliayaj ya que amo huelis oc timaquisasque oc tech nijín tetzaucaejecat.

<sup>21</sup> Huan cuac panocque ya míac tonalme que amo titacuayaj, ijcuación in Pablo moquetzac intzalan nochi ten yayaj tech in barco huan quinilij ijcuín:

—Namejuan nantagatzitzin, cachi cuali que xinechyeaquilianij queme nejua namechiliaya de que ma amo tiquisanij campa ne tal de Creta, para ijcón amo tiquijyohuisquíaaj huan amo ticpolosquíaaj nochi in tamamal ten cuicaya in barco.

<sup>22</sup> Pero axcan namechilía que amo ximoyolmoutican porín masqui in barco polihuis pero tejuan amo senme timiquisque.<sup>23</sup> Porín yalao tayohuac Dios nechonmonextilij se ángel de Yejuatzin ten ihuantzin nipoutinemi huan sayó Yejuatzin nictequitilijtinemi.<sup>24</sup> Huan ne ángel nechilij ijcuín: “Huan no nimitzilía, tejuja Pablo, amo ximoyolmouti, porín semi monequi mitztemactisque iixpan ne hueyi chiuque César, tayecanque de Roma. Huan ica tejuja motechcacopaca Totajtzin Dios quinmaquixtis nochi neques ten mohuan yetocque tech in barco huan amo momiquilisque”.<sup>25</sup> Huan namejuan nantagatzitzin, ica nijín tajtoltzitzin de ángel ximoyolchicahuacan porín nejua nitacuautamati ihuan Dios. Huan nicmatoc que Yejuatzin quichihuati ijcón queme nechiluij ya ne ángel.<sup>26</sup> Huan xicmatican que pancalauquis in barco pero tejuan aixco tiajcuitiyasque huan tiajsitihue tech se tzictzin tal ten quiyehualoa in mar.

<sup>27</sup> Huan se tayohuac cuac panoc ya caxtol tonal, ijcuación nojón momento timoajsitinemíaj campa in mar ten monotza Adria porín in ejecat techuicaya sayó seco huan seco. Huan nepa queme tajcoyohuan in tequitini ten quinejnemiltiayaj in barco, yejuan nojonques cajsicamatque que ajsitiyayaj ya ne taluacpan.<sup>28</sup> Huan in tequitini quitamachiutiayaj de queniu ica huejcatan oc in at. Huan tech nojón momento catca sempoal huan caxtolonsé metro de huejcatan. Huan ijcón cachi taixpampa ocsepa quitamachiuque de queniu huejcatan in at. Huan ijcón sayó quipiaya sempoal huan chicuasen metro de huejcatan.<sup>29</sup> Huan in tequitini quiyolmohuiliayaj que tajcón in barco moteloto ihuan ne hueyi teme, huan ijcón nochi majmacahuisquía. Ica ya nojón yejuja quipancalauquijque tech in at nahui huejueyi teposme

ilpitocque tech in barco para ma quitzacuiltoj in barco. Huan no quipancalaquique ne teposme icuitapampa in barco para ma amo quicahua ma nejnemi taixpan. Huan ijcón ticchixtoyaj tejuan ica tajyohuilis. Huan semi ticnequáj majcán tanesi ya tech nojón momento.<sup>30</sup> Huan cuac ticchixtoyaj que ma tanesi ya, ijcuacán in tequitini ten quinejnemiltiyaj in barco, yejuan nojonques quiyolnemilijque que cachi cuali quicholohuilij in barco. Ica ya nojón yejuan peuque quitemohuáj ne tzictzin barco ten panian tajco tzicautiaya ihuan in hueyi barco. Huan nijín tanejnemiltiani quinequáj quincajcayahuasque in ocsequin paxaloani. Huan quinequáj techtaneltoctisque de que yejuan quiatamotasque sequi teposme para ijcón huelis quixpantzacuilisque in hueyi barco, mientras yejuan quitemohuáj ne tzictzin barco para ica mochololtisque.<sup>31</sup> Ijcuacán in Pablo niman quinejmachtij in tayecanque soldado Julio ihuan nochi nisoldados huan quinlij ijcuín:

—Tacán nijín tequitini amo mocahuaj nican barcoijtic, ijcuacán namejuan amo huelis nanmaquisasque.

<sup>32</sup>Ica ya nojón in soldados quitecque in mecat tenica ilpitiaya ne tzictzin barco. Huan ijcón yejuan quicauque ma huetziti aixco para ma amo ica mochololtican ne tanejnemiltiani den barco.<sup>33</sup> Huan cuac tanestihualaya ya, ijcuacán in Pablo quintatautij nochi ma quicuacan tensá huan quilij ijcuín:

—Xitacuacan nochi namejuan porín quiapiaya caxtol tonal ya que namejuan amo nancohtocque nión nantacuajtocque.<sup>34</sup> Ica ya nojón namechtatautía yequintzin que xicuacan tensá para ma namechchicahua. Huan ijcón semi monequi xicchihua-can para ijcón huelis nanmaquisasque. Porín xicmatican que amo aquen se ixpolihuis, huan nión se itzontzin quipolos.

<sup>35</sup>Huan cuac Pablo quintaminejmachtij ya nochi nijín taca, ijcuacán momaaquij se pantzin. Huan de ompa quitasoicamachilij Dios inixpan nochin. Huan ijcón in Pablo mocotonilij in pan huan quicuaj.<sup>36</sup> Ijcuacán nochi yejuan moyolchicauque huan no quicuajque.<sup>37</sup> Huan tinochin ticatcaj queme ome ciento huan eyipoal huan caxtolensé paxaloani ten tiyayaj tech in barco.<sup>38</sup> Huan satapan cuac ticuajque ya ten ticneque, ijcuacán tiatamotque nochi trigo ten mocahuaya oc barcoijtic para ijcón cachi ejcauquisac in barco.

### **Nican tajtoa de queniu in barco pancalayic tech in at**

<sup>39</sup>Huan cuac yec tanesic ya, ijcuacán nijín tanejnemiltiani den barco amo taixnehuilijque oc campa ne taluacpan. Pero conitacque se atenteno campa sayó moman-isoutoya in at huan amo mocuentecaya oc. Ijcuacán yejuan quinequáj quitasque cox huelis ompa cuicasque in barco.<sup>40</sup> Huan ijcón quichiuque huan quitequilijque in mecat tenica ilpitoyaj ne teposme ten quitzacuilijtoyaj in barco. Huan ijcón quincajcauque ma huetzican aijitic. Huan ijcón quitacajcahualtijque ne cuohuit tenica quiyecantinemia in barco ten quilía timón. Ijcuacán quiajocque ne mantajtilma ne den taixpampa tenica in ejecat quinejnemiltía in barco. Huan ijcón in ejecat cuicaya in barco campa atenteno.<sup>41</sup> Huan ijcón in barco moteloto campa amaxal campa chichahuac mocajcautoc in at. Huan ompa in barco motocato campa atexal. Huan ijcón in barco de iixpampa moatexalpachoto huan ijcón amo huelito oc molonij. Pero in barco ne tacuitapampa pehuac cojcotoni porín in at quichicaucamajmagaya cuac mocuentecaya.<sup>42</sup> Ica ya nojón in soldados quinequáj quintamimictisque nochi in presos para ma amo quincahuacan ma cholocan huan ma majcuiiyacan aixco.

<sup>43</sup> Pero mochihuac que in tayecanque soldado Julio, yejua quinequía quimaquixtis in Pablo. Ica ya nojón yejua amo quincahuac in soldados ma quinmictican in presos. Ta, yejua tanahuatij que ma achtopa moatamotacan neques ten huelis ajcuij para yejuan achtopa ajsitihue ne taluacpan. <sup>44</sup> Huan no tanahuatij que ma ocsequin ten amo huelía ajcuíaj, ma quicuican cuome ne ten xojxolcopinic ya den barco, huan ma panían motalican, huan ma quintocilican in ocsequin. Huan ijcón ticchiuque, huan nochi timaquisque porín tiajsicque ne taluacpan.

### Pablo yetoya campa talme de Malta

**28** Huan cuac nochi timaquisque ya, ijcuación ticajscamatque ya que tiyetoyaj campa talme de Malta, se taltzin ten quiyehualotoc in mar. <sup>2</sup> Huan ompa in majsehualme techselijque ica paquilis huan techyolicnelilijque. Huan de ompa quihueyitalijque sequi tit porín semi taseseyaya para ma timototonican. <sup>3</sup> Huan mochihuac que cuac in Pablo quiajocuic sequin tatascuohuit ten huayic huan quinticotemaya, ijcuación hualquisac se cohuat ten pepechiutoya tech in cuohuit porín quinequía mochololtis den tit. Huan ijcón in cohuat mopiloto imaco in Pablo. <sup>4</sup> Huan cuac quitacque ne majsehualme que in cohuat pilcatoc imaco in Pablo, ijcuación yejuan moliayaj se huan ocsé ijcuín:

—Nijín tagat yesqui temictijque porín quitepinij ya in cohuat. Huan masqui maquisac ya tech in mar, pero tejuan tiquixnemilíaj que in tatadíosme amo quicahuaj ma nentinemi oc.

<sup>5</sup> Pero in Pablo momatzejtzeloj huan huetzito ne cohuat ticoijtic. Huan ijcón yejua amo teyi quichihuilij. Huan nochi in majsehualme quichixtoyaj que xa maposahuayasquía in Pablo oso ca nenquen huetzitiu huan miquis. <sup>6</sup> Huan cachi satepan ixuejcauque ya quichixtocque que cox huetzisquía Pablo. pero queme quitacque que amo teyi ipan mochihuac, ijcuación yejuan niman motanemililpatacque huan peuque quijtoa ocsepa ijcuín:

—Nijín Pablo yejua achá se tatadíos.

<sup>7</sup> Huan ompa campa tiyetoyaj amo huejca quitztoya ne italuán ne tagat in hueyi chiuque ten monotza Publio. Huan yejua techselij ca míac paquilis huan techtamacatoya ca cuali ipan eyi tonal. <sup>8</sup> Huan mochihuac que in Publio ipapá huetztoya tech in icochpet porín mococoaya ca totonic huan calannemilis. Huan ijcón in Pablo yajqui quicalpanoto. Huan satepan cuac motatatautilij ya ica por yejua, ijcuación in Pablo quicuamapachoj ica imacpal huan ijcón quipajtij. <sup>9</sup> Huan ica nijín ten nochi quitacque, no hualajque ocsequin cocoyani ten calyetoyaj campa italuán de Publio. Huan ijcón nochi pajtijque. <sup>10</sup> Ica ya nojón techueycualtagaitacque huan techtayocoliyaj ica míac tataman tetayocolil. Huan cuac ocsepa ticalacque tech se barco, ijcuación techmactilijque míac tensá ten techpoloaya para ica tiixpanosque tech toojpan.

### Nican tajtoa de queniu Pablo ajsito campa pueblo Roma

<sup>11</sup> Satepan cuac panoque ya eyi tapoalme tech ne talme, ijcuación ticalacque tech ocsé barco ten ompa quipanoc ya in tapoalme den taseseyalista. Huan ne barco hualeuca ya campa pueblojcopaca de Alejandría. Huan ne barco cuicaya taixpampa ne taixcopinme ten ome tatadíosme, ten monotza in Cástor huan Pólux. <sup>12</sup> Huan tiquisque huan tiajsitoj campa marteno den pueblo Siracusa huan ompa timocauque

eyi tonal. <sup>13</sup> Huan ijcón tiyayaj amo huejca tiquitztiayaj ne atenteno. Huan ijcón tiajsicque hasta se pueblo monotza Regio. Huan imostica pehuac taejecaya ca cuali huan ijcón quinejnemiltiaya tobarco. Ica ya nojón ipan ome tonal tiajsicque campa pueblo Puteoli. <sup>14</sup> Huan tech ne pueblo de Puteoli timoajsicque ihuan ocsequin tocnihuan taneltocani. Huan ijcón yejuan techyoleuque que ma timocahuacan inuan chicome tonal. Huan de ompa tiquisque huan tiyajque tiajsitoj campa pueblo Roma. <sup>15</sup> Pero mochihuac que in tocnihuan taneltocani de Roma ipa quimatque ya que ompa tiyajtocque. Ica ya nojón yejuan quisque huan technamiquitoj tech in ojti hasta campa pueblo ten monotza Foro de Apio, amo huejca quitztoya ne ocsé pueblo ten monotza Tres Tabernas. Huan cuac in Pablo quinitac in tocnihuan, ijcuación yejua quihueyitasojcamachilij Dios huan ijcón cachi moyojvolchicahuac ya. <sup>16</sup> Huan cuac tiajsitoj ya ne campa pueblo Roma, ijcuación in tayecanque soldado Julio quin-temactij in presos imaco ocsé tayecanque soldado ten quinpixtinemi in presos. Pero in Pablo quicauque ma seco calyeto, sayó ica se soldado para ma yejua quipixtinemi in Pablo.

### **Pablo tanojnotza ica in Tajtoltzin de Dios campa pueblo Roma**

<sup>17</sup> Satepan cuac tiajsicque ya huan ipan eyi tonal, ijcuación in Pablo tatitanic ma quinnotzacan nochi in tayecanani judíos de ne pueblo Roma. Huan mochihuac que cuac ne tayecanani judíos mosentilijque ya, ijcuación in Pablo pehuac quinnojnotza ijcuín:

—Namejuan nantaca ten nannocnihuan judíos. Huan nejua amo teyi nicchi-huac de niquinmohuispoloj in pueblojuani judíos. Huan amo no niquixnamiquic ne tanahuatilme de ne tohuejcautatuan ten yejuan quineltoctihuitze. Pero ne Jerusaléncopaca in tayecanani judíos nechtemactijque queme nipreso inmaco in soldados romanos. <sup>18</sup> Huan cuac ne tequihuani romanos nechtemoliayaj tensá tajtacol, ijcuación amo teyi nechajxilijque tajtacol ten cuica miqulils para ica nechtelchihuasquáfaj. Ica ya nojón yejuan quinequáfaj nechcajcahuasque. <sup>19</sup> Pero ne tayecanani judíos quixnamicque nijín tamachilis huan cualanque porín romanos quinequáfaj nechcajcahuasque. Ica ya nojón monequía nictatautis in tayecanque romano ma nechualtitanican nican Roma para ma in hueyi chiuque César ma nechixcomaca, masqui nejua amo nihuala para niqinteluilico nojudíosicnihuan. <sup>20</sup> Ica ya nojón nejua namechnotzac xihuiquij nican noixpan para namechnotzas. Huan nejua nechtziztcojque ca nijín tepos cadena porín nejua nitacuautamati ihuan Cristo, ne ten quilfaj Mesías Temaquixtijque, ten nochi tejuan tipueblojuani de Israel ticchixtoyaj que hualas.

<sup>21</sup> Ijcuación in tayecanani judíos quiluijque Pablo ijcuín:

—Pero tejuan amo teyi ticselijtocque tajcuilolamatzin de ne Judeajcopaca campa ixnesisquía de tejua. Huan nión senme mojudíosicnihuan ma ejconij nican para ma techilianij tensá de motajtacol. <sup>22</sup> Huan queme amo teyi ticmatij tejuan, ica ya nojón axcan xitechcaquilti de toni tejua ticyolnemilijtihuitz. Sayó titecaquilfaj que nohuiyampa quiquejquematij san de nijín yancuic taneltoctalis.

<sup>23</sup> Huan ijcón in tayecanani judíos quitelijque se tonal para ma hualani oc ocsequin pueblojuani judíos para ma quicaquilican in tanojnotzalis de Pablo. Huan ijcón mochihuac que hualajque huel míac tagayot campa yetoya motepalcautoya Pablo. Huan in Pablo pehuac quinnojnotzac desde cuantzinpa hasta tiotacpa ica ne huelil-



isme de queniu Dios quimonequiltía quinyolyecanas ica ichicaucahuelis itaneltocacahuan. Huan Pablo quinequía quintaneltoctis de aconi ne Jesús huan de toni tanahuatil cualcui. Huan nijín Pablo quinnextiliyaj de aconi Jesús ica in tajcuilolamat de Moisés huan ica itencopaca ne huejcautanahuatiani de Dios. <sup>24</sup> Huan ijcón sequi tacaquini tacautamatque ihuan Dios ica ne ten quinnojnotzaya Pablo. Pero ocsequin amo quineltocayaj. <sup>25</sup> Huan queme in tacaquini amo nochi quiyecuelcaquíaj in tanojnotzalis de Pablo, ica ya nojón yejuan peuque cualancaquiquisaj. Ica ya nojón Pablo quinilijca ijcuín:

—In Yecticatzin Espíritu quiyectamelaucauilij ya de ne tohuejcautatuan ica itencopaca ne tanahuatijque Isaías cuac yejua quiniliaya ijcuín:

<sup>26</sup> Nimitzilía tejua Isaías, que xiyó xiquiniliti nojón pueblojuani de Israel ijcuín:

Namejuan nanpueblojuani de Israel, nanquiyecaquisque nijín Tajtoltzin de Dios pero amo nancajsicamatisque.

Huan no nicmati que nanquiyequitasque ihuelilis de Dios, pero amo no nanmomasque cuenta de toni mochihuati.

<sup>27</sup> Huan ijcón mochihuas porín in pueblojuani de Israel semi moyoltacuahualtijque ya.

Huan yejuan quiquejquelcaquij san in Tajtoltzin de Dios.

Huan nojón pueblojuani Israel majyá itzajtactocque

para ma amo quitacan in huelilis de Dios ica ninixtololohuan.

Huan no nacas tzajtactocque para ma amo quicaquican in Tajtoltzin de Dios.

Huan nión no ma cajsicamatican tech nintalnamiqulilis.

Huan ijcón amo huelisque mocuepasque notechcacopaca ma quicahuacan nintajtocoloipan para ijcón niquinpajtis den nintajtacol.

<sup>28</sup> Huan xicmatican namejuan nanpueblojuani judíos que nican para taixpan Dios quinteniluiti ne maquixtilis para nochi neques tagayot ten amo poutinemij queme judíos. Porín yejuan melau quinequij quiyecaquisque in Tajtoltzin de Dios.

<sup>29</sup> Huan cuac in Pablo quintaminojnotzac ya ica nijín tanojnotzalis, ijcuación in tacaquini judíos mocualantijtiyajque huan motajtoltehujtiyajque se huan ocsé.

<sup>30</sup> Huan ijcón in Pablo mocahuac ome xiutica oc tech ne cali campa tepal yetoya, campa yejua quinseliaya nochi ne naquen yesquij hualayaj quicalapanoquij. <sup>31</sup> Huan in Pablo quitetapohuiaya ica mfac yolchicahualis de ne huelilis ten mochiutoc cuac Dios quinyolyecanas itaneltocacahuan ica ihueyichicahualis. Huan cachi oc quimachtiaya den ichipaucanemilis de Totecotzin Jesucristo. Huan amo aquen huelfa quitacuahualtis Pablo que ma amo tanojnotztinemi.

## IN TATITANIL SAN PABLO QUINTAJCUILOHUILIA IN TANELTOCANI CAMPA PUEBLO DE ROMA

### Pablo quintajpaloa in taneltocani ten calyetocque Romajcopaca

**1** Nejuatzin ni Pablo huan niitequiticau de Jesucristo. Huan Totajtzin Dios nechijitac ya para ma nejua nitequititinemí queme se niitatitanil de Jesucristo. Huan no Totajtzin Dios nechijitac huan nechualnotzac para ma nejua nictetapohuijtinemi den yancuic Tajtoltzin de Dios ten cualcui ne nemaquixtilis.

<sup>2</sup> Huan in Totajtzin Dios ipa moyectencauca ya ne achtopa ya de techtayocolis nijín yancuic Tajtoltzin de Dios ten cualcui ne nemaquixtilis. Huan Yejuatzin technojnotztihuala de ne itetayocolil intencopaca ne huejcautanahuatiani ten quiqcuiolocj tech in mohuiscatajtoltzin de Dios. <sup>3</sup> Huan nijín yancuic Tajtoltzin de Dios technojnotza den Totecotzin Jesucristo, Yejuatzin ne Teconetzin de Dios. Huan Jesucristo yolico nican talticpac queme se teconeu de rey David. <sup>4</sup> Huan Totajtzin Dios ica hueyi chichualis quihueyitenextij que Cristo Jesús Yejuatzin Iconetzin de Dios cuac Yejuatzin quipanquixtij Cristo yoltoc intzalan in ánimajme. Huan nochi nijín mochihuaco ica por ne chipaucahuellil den Yecticatzin Espíritu de Dios. Huan nijín Jesucristo Yejuatzin Totecotzin. <sup>5</sup> Huan ica ihuelilil de Jesucristo, ticselijque ya de Dios ne teicnelilil. Huan Yejuatzin nechtequimactij de que ma nitequititinemí queme niitatitanil de Jesucristo. Huan ma niquinmachtijtiu in tagayot ten amo judíos de queniu quitacamatisque huan de queniu tacuautamatisque de Cristo, para ma in tacaquini ma quimohuiscapohuacan in chichualis den tocaytzin de Jesucristo. <sup>6</sup> Huan namejuan ten nancalyetocque campa pueblo de Roma, nantacuautamatque ya ihuan Cristo ijcón queme ne ocsequin tagayot ten nentinemij tech nochi senmanahuac. Huan nochi namejuan Totajtzin Dios namechijitac ya que xipoutine-mican ihuan Jesucristo.

<sup>7</sup> Huan nejuatzin namechtajcuilohuilía nochi namejuantzitzin ten nancalyetocque Romajcopaca. Huan Totajtzin Dios namechyoltasojtatinemi huan no namechijitac que namejuan xichipaucanentinemican iixpantzinco Yejuatzin. Huan xicpixinemican in teicnelilil huan yolsehuilil ten hualehua imaco Totajtzin Dios huan imaco de niconetzin Yejuatzin Totecotzin Jesucristo.

### Pablo quiyolnejnequi quincalpanotiu in taneltocani den Romajcopaca

<sup>8</sup> Huan axcan ica itocaytzin de Jesucristo nicueyitasojcamachilía Notajtzin Dios ica por nochi namejuan, porín nohuiyampa de senmanahuac motetapohuijtinemi de queniu nantacuautamatinemij ihuan Cristo. <sup>9</sup> Huan nejuatzin nitequitilijtinemi Totajtzin Dios ica nochi notalnamiqulil huan nictetapohuijtinemi den yancuic Tajtoltzin de Dios ten cualcui ne nemaquixtilis. Huan ne Tajtoltzin technojnotza de aconi de Iconetzin Totajtzin Dios. Huan Yejuatzin cuali quimati que nejua nachipa namechelnamiqui iixpantzinco Yejuatzin cuac nimotataatauilía ihuantzin. <sup>10</sup> Huan nejua nictatautía Dios que ma Yejuatzin quimonequilti que ma se tonal nihuelil niyás namechcalpanotiu porín desde ne quemanía ya nicnectoya ya namechitatu. <sup>11</sup> Porín nejua semi nicyolnejnequi namechitas para ijcón huelilil cachi oc namechyolmajxitis ica ocsé huelililil de Dios huan para ijcón nanyesque cachi oc nanyecyoltam-

atosque ica namotacuautamatis. <sup>12</sup> Huan como huelis niyás namechitatu, ijcuacán cachi oc timoyolmajxitisque ica ne totacuautamatis. Namejuan nanmoyolmajxitisque huan nejua no nimoyolmajxititi ica notacuautamatis.

<sup>13</sup> Huan, notasojcnihuan, nicnequi xicmatican que miacpa nicyolnejnequía niyás namechcalpanotiu. Pero amo nihuelic porín ongaya tensá ten nechtzajzacuilijtoya. Huan nejua ipa nicyolnejnecoc niyás namechcalpanotiu para ijcón cachi oc namechyolmajxitis huan no ma onca miác taneltocani yancuicque queme yesquía huel miác taquilot. Porín xicmatican que ijcón mochiutoc que huel miác taneltocani ongacque intzalan in tagayot ten amo judíos campá yesqui ninentihuitz nochi senmanahuac. <sup>14</sup> Huan nejua semi nicyolmachilía que monequi nitanojnotztinemis ica in Tajtoltzin de Dios para ijcón niquinnejmacthis in taca ten calyetotinemij tech huejueyi pueblos huan no para niquinnejmacthitjinemis neques taca ten milajuani. Huan no ma niquinnejmacthis neques ten taixmatinemij huan no neques ten amo taixmatinemij. <sup>15</sup> Ica ya nojón xicmatican que nejua nimoyejyetalijtoc ya para niyás namechtapohuitiu in Tajtoltzin de Dios ten cualcui ne nemaquixtilis nochi namejuan ten nancalyetocque nepa Romajcopaca.

### **Nican tajtoa de que ne Tajtoltzin de Dios cualcui chicahualis para temaquixtía**

<sup>16</sup> Huan nejua amo queman nipinahuas de nitajtos ica in yancuic Tajtoltzin de Dios ten cualcui ne nemaquixtilis. Porín nicmati que in Tajtoltzin de Dios cualcui chicahualis de Dios para quinmaquixtis nochi neques ten tacuautamatisque ihuantzin Cristo, quijtosnequi para quinmaquixtis achtopa in taca ten judíos, ijcón queme quinmaquixtis neques taca ten amo judíos. <sup>17</sup> Huan nijín Tajtoltzin de Dios techmejmelaquilía de queniu Totajtzin Dios techyolchipahua huan amo techtajtacolcuiltis oc de totajtacoluan. Huan nochi nijín mochihuas porín titacuautamatinemij ihuan Cristo Jesús, huan sayó ihuan Cristo Jesús de techmaquixtis. Huan tajtoa de nochi nijín tamachilis tech in Tajtoltzin de Dios ijcuín: “Nochi aquen yesqui tagat ten tacuautamati ihuan Cristo Jesús, yejua ne Dios quípohuas que yolchipahuac ya para ijcón nentinemis sen nachipa”.

### **Nican tajtoa de queniu nochi in talticpacuani motajtacolmacactocque ya**

<sup>18</sup> Huan Totajtzin Dios techmatiltijtoc que hualtemotoc de ne eluiyactzinco in chicaucatzacuilitis de Dios huan huetztoc inpan nochi in talticpacuani ten quixnamiquij Dios huan ten quichiutinemij ten amocuali chihualisme. Huan ijcón mochiutoc porín ne taca taixnamiquini de Dios quitzajzacuilíaj in melahuac Tajtoltzin de Dios huan amo motecahuilíaj ma quixmatican Dios ica por ne ninamocualitachihualisuan. <sup>19</sup> Huan Yejuatzin quintatzacuilitía ne taca taixnamiquini porín yejuan nojonques cuali huelij quimatisque queniu tamati Dios porín Dios ipa motenextilijtinemi inixpan. <sup>20</sup> Huan masqui Yejuatzin amo mota, pero cuali huelis tiquixmatisque Dios huan no cuali huelis tiquixmatisque ihuelilis de Yejuatzin ica por ne itachijchihualuan ten Yejuatzin quichijchihuac. Porín cuali tiquixtinemij itachijchiu de Dios desde cuac Yejuatzin quitzinehualtij in talticpac. Huan ijcón ticajsi-camatij que Yejuatzin se Dios huan que ne Dios quipixtinemi nochi huelilis para sen nachipa. Ica ya nojón neques ten quixnamiquij Dios, yejuan nojonques amo teyica huelis motajtoltenpalehuisque iixpantzinco Dios cuac yejuan quijtoaj que amo quixmatij Dios. <sup>21</sup> Huan ne taca ten taixnamiquini, masqui yejuan quixmatij que

yetica se Dios pero yejuan amo quihueyipanchiuque Yejuatzin. Huan nión no motasojcamatij ihuantzin. Huan ne taca taixnamiquini como amo motecahuilfaj ma quixmatican Dios, ica ya nojón nintamachilis mochihuaco nencajtíc san. Huan ijcón nintalnamiquilis mosentamimijmiquilotalij ya huan mocahuac tayohuayanijtic san ten cualcui tajtacol. <sup>22</sup> Huan masqui yejuan quiyolnemiliyaj que yejuan semi taixmatinime, pero mochihuaco ya cachi yolmijmiquilome de nintalnamiquilis.

<sup>23</sup> Huan in Totajtzin Dios amo queman quipía tamilis. Huan ne taca taixnamiquini, yejuan nojonques quixpatilijque icualnescayo de Dios ten amo quipía tamilis ica tatadiosme ten ixtamatij queme taca ten ipa quipíaj tamilis. Huan no yejuan quixpatilijque icualtziyo de Dios ica ne tatadiosme queme nochi tototzitzin ten patantinemi huan tatadiosme den cohuame huan de oculinme. <sup>24</sup> Ica ya nojón Totajtzin Dios mosecocahuac de yejuan huan quintecahuilij ne taca taixnamiquini ma quichiutinemican in pitzotic tanejnequilis ten yejuan san cuelitztinemij. Huan ijcón yejuan mopitzotilijtinemij huan mopinaucatalijtinemij se huan ocsé tech ninnacayo ica por ninamocualichihualisuan. <sup>25</sup> Huan Totajtzin Dios mosecocahuac de yejuan huan quincahuilij ma yetinemican tech ne pitzotic nemilis porín yejuan amo quineltoacque in melahuac Tajtoltzin de Dios. Ta, yejuan cachi quixpatilijque in melahuac Tajtoltzin de Dios ica por ne tamachilisme ten sayó xolopijyot san. Huan yejuan amo quimohuistilijque Totajtzin Dios. Ta, cachi oc quihueyipanchiuque huan quimohuistilijque nochi ne tamachijchíu ten Yejuatzin quichijchihuac. Pero yejuan amo quimohuistilijque Totajtzin Dios ten quichijchihuac nochi ten ongac. Ta, quimohuistilijque sayó ne ten itachijchíu de Dios.

<sup>26</sup> Ica ya nojón Totajtzin Dios mosecocahuac de yejuan huan quincahuilij in tagayot taixnamiquini ma ahuilnentinemican tech in ahuilnemilis tenica mopinaucatalijque. Huan ijcón in sihuame amo quinequíaj oc cochisque ihuan taca queme ninyoquichuan ijcón queme Dios quinsentalijca ya. Ta, yejuan quinequíaj sencohtinemisique ihuan sihuame, ijcón queme Dios amo quimonequiltía ma quichiutinemican. <sup>27</sup> Huan no ijcón quichiuque in taca taixnamiquini. Yejuan amo quinecque sencoquisque ihuan sihuame queme ninsihuahuan. Ta, yejuan semi quiyolnejnequij sencoquisque ihuan taca san. Huan ijcón in tagayot tachiutinenque ca míc pitzotic chihualisme tenica mopinaucatalijque. Ica ya nojón ne tagayot taixnamiquini yejuan nojonques quiselityohue tech ninnacayo se tatzacuiltlis de Dios ten quichicotilijtoc tech nintalnamiquilis.

<sup>28</sup> Huan queme in taca taixnamiquini amo quinequij quiyecajsicaixmatisque Dios, ica ya nojón Dios mosecocahuac de yejuan huan quincahuilij que ma quichiutinemican ten amo monequía quichihuasque ijcón queme nintamachilisuan pitzoticque quinyecanayaj. <sup>29</sup> Huan nijín taca taixnamiquini, yejuan nojonques yolpexontinemij ica nochi tataman de amocuali tachihualisme. Huan yejuan ahuilnentinemij ica taca huan sihuame. Huan quichiutinemij sayó ten amocuali chihualisme. Huan ica ne nejxicolot quinectinemij moaxcatilijtinemisique ten amo inaxca huan motajtacolmacatinemij san ica tahuelitalis. Huan nojón taca semi quiyolnejnequij teyolnejxicolisque huan no temictisque huan no cuelitztinemij de motajtoltehujtinemisique ihuan ocsequin. Huan cuelitaj tecajcayautinemij huan tecualancahujtinemij huan no semi xolopijitinemij. <sup>30</sup> Huan nojón taca no cuelitaj sayó tatejtenehuasque huan no quitahuelitztinemij Dios. Huan tehuijuicaltijtinemij huan mohuejeyimatinemij huan motajtolueyimatinemij. Huan no ne taca cachi cuelitaj quite-

mojtinemij tamachilisme ten yancuicque para queniu cachi oc motajtacolmacasque. Huan no yejuan taixnamiquini de ninteiscaltijcahuan. <sup>31</sup> Huan nojón taca taixnamiquini, yejuan nojonques amo cajsicamatij in Tajtoltzin de Dios huan amo queman quichihuaq ten moyectencaucaj que quichihuasque. Huan amo no hueli teyoltasojtatinemij huan amo no hueli teyolicnelijtinemij. <sup>32</sup> Huan nojón taca cuali quimatij in tanahuatilme ten Dios quitatico. Huan yejuan no cuali quimatij que naquen quichiutinemisque nochi nijín tataman de amocuali tachihualisme, yejuan nojonques quinnamiqui ma miquican sen nachipa tech in mictan. Huan masqui ijcón inpan mochihuas, pero yejuan quisentocaj quichiutinemij nochi nijín tataman tajtacolme. Huan yejuan no cachi oc moyoluelitaj cuac quitaj que ocsequin no ijcón quichiutinemij.

### **Nican tajtoa de queniu Dios quinixcomcas in talticpacuani ica melahuac taixejecolis**

**2** Huan tejua, ten yesqui tagat, nimitznojnotza queme tiyetosquía noixpan. Como tejua tiquinixcomacatinemi ocsequin tagayot de nintajtacoluan, nimitzilía que amo tihuelis timotajtoltenpalehuis iixpantzinco Dios. Porín cuac ticchihua ne taixcomacalis, ijcuación timotelchihua tejua san. Huan timotelchihua porín tejua no titachiutinemi ica ne tajtacolme tenica tiquinixcomacac ya ne ocsequin taca. <sup>2</sup> Huan tejuan cuali ticmatij que Totajtzin Dios quinixcomacas ica ten melahuac cuac Yejutatzin quintelchihuas ya ne taca ten quichiutinemij ne míac tataman pitzotic tachihualisme. <sup>3</sup> Huan tejua tagat, ten tiquinixcomaca ocsequin taca que yejuan tajta-colejque, ¿cox amo ticajsicamati que tejua no ticchiutinemi ijcón queme yejuan tachiuutinemij? Pues cuali ticmati. ¿Xe tejua ticyolnemilía que timopalehuis de timomaquixtis de nojón hueyi tatelchihulis de Dios mitztaliliti? Pues amo huelis timopalehuis. <sup>4</sup> ¿Huan queyé tejua ticmajpehua in teicnelilis de Dios ten amo queman tamis? Huan Totajtzin Dios mitzxicohuilijtinemi huan mitzpixtolijtinemi huel míac yolyemanalis. Huan, tejua tagat, amo ticajsicamati que Dios mitzxicohuilijtinemi motajtacoluan, porín Dios ica iteicnelilis quimonequiltía mitzyecanas para tejua ximoyolnemilis de motajtacoluan. <sup>5</sup> Pero tejua tagat, amo ticpía ne yolyemanalis, amo no ticnequi timoyolnemilis de motajtacoluan. Ica ya nojón tejua timonechico-huilijtoc in chicaucatazacuiltis para ma huetzi mopan tech ne tonal cuac Dios cualtitanis nojón tamelahuac tatzacuiltis ten mitznamiqui. <sup>6</sup> Huan tech ne tonal de tatzacuiltis, ijcuación Dios quinixtahualtis cada se tagat ijcón queme cada se tagat tachiuutinemic tech ninemilipan nican talticpac. <sup>7</sup> Pero Totajtzin Dios quintaxtahuis ica ne nemilis sen nachipa nochi neques ten quiyolnejnequij ma quipiacan ne cualtziyo iixpantzinco Dios huan no quiyolnejnequij ma Dios quincualtagaita huan no quiyolnejnequi ne nemilis ten amo xpolihuís. Huan ijcón Dios quichihuas porín yejuan quinsentocacque quichiutinenque sayó ten cuali chihualisme. <sup>8</sup> Pero Totajtzin Dios quinixtahualtis huan quintatzacuiltis ica hueyi cualanyot neques ten quiyoltemojtinemij sayó tensá para yejuan san. Huan ijcón Dios quinixtahualtis porín yejuan amo quinequij tatabacatinemisque ica in melahuac Tajtoltzin de Dios. Ta, yejuan cachi quitacatinemij in amocuali tamachilisme. <sup>9</sup> Huan ijcón no Totajtzin Dios quinixtahualtis ica tajyohuilis huan ica hueyi toneucayot porín yejuan tachiuutinemij ica ten amocuali chihualis. Huan Dios ijcón quinixtahualtis ocho in taca judíos huan no Dios quinixtahualtis taca ten amo poutinemij queme judíos. <sup>10</sup> Pero

Totajtzin Dios quinueyipanchihuas huan quinueyimatis huan quinyolpoxahuis nochi neques ten quichiutinemij sayó ica ten cuali chihualis san. Huan Dios ijcón quintaxtahuis in taca judíos ten taneltocani de Cristo huan no ijcón Dios quintaxtahuis in taca taneltocani ten amo poutinemij queme judíos. <sup>11</sup> Huan Totajtzin Dios ijcón quichihuas porín Yejuatzin amo quinchichicotasojta in talticpacuani cuac Yejuatzin quinixcomacas de nintajtacoluan.

<sup>12</sup> Huan nochi neques ten amo quixmatij in tanahuatil de Moisés huan motajtacolmacatinemij, yejuan nojonques ipa ixpolihuisque masqui amo quipíaj ne tanahuatil de Moisés. Huan nochi neques ten quixmatij in tanahuatil de Moisés huan motajtacolmacatinemij, para yejuan nojonques Dios quicuis nojón tanahuatil de Moisés para ica quinixcomacas huan quintelchihuas. <sup>13</sup> Porín Totajtzin Dios quintajtacolcuiltis oc huan amo quinpohuas que yolchipauque neques ten sayó tacactinemij ica in tanahuatil de Moisés. Ta, Dios quinpohuas yolchipauque huan amo quintajtacolcuiltis oc neques ten quiyectacatinemij ne tanahuatil de Moisés. <sup>14</sup> Huan namechnojnotza de nochi in taca ten amo judíos huan ten amo quipíaj in tanahuatil de Moisés. Cuac yejuan nojonques quichiutinemij tensá tanahuatilme ten tanahuatilia in tanahuatil de Moisés, ijcuación yejuan quitenextilijtinemij que yejuan quipixtinemij tech nintalnamiqulis se tanahuatil ten yejuan quinyecantoc, masqui yejuan amo quixmatij in tanahuatil de Moisés. <sup>15</sup> Huan ijcón yejuan quitenextilijtinemij que yejuan quipixtinemij tech nintalnamiqulis se tanahuatil ten yejuan quinyecantoc. Huan ninyolojuan quinmachililtía que cox yejuan tajtacolejque oso amo. Huan ijcón axcan in talticpacuani ten amo quimatij in tanahuatil de Moisés, yejuan motajtoltenpalehuisse ica por ne tanahuatil ten hualehua tech nintalnamiqulis. Huan no yejuan motajtacolcuiltíaj ya ica ne tanahuatil den yec yetoc tech nintalnamiqulis. <sup>16</sup> Huan no ijcón mochihuas tech ne tonalme de tatzacuilitis, porín Dios quinixcomacas in talticpacuani itencopaca Cristo Jesús. Ijcuación Yejuatzin quinixcomacas in talticpacuani de nochi ten yejuan quichtacachiutinenque. Huan nochi nijín mochihuas ijcón queme nanquicacque ya cuac namechtopohuijque ica nijín Tajtoltzin de Dios ten cualqui ne nemaquixtilis.

### **Pablo tajtoa den taca judíos huan den tanahuatil de Moisés**

<sup>17</sup> Huan tejua, ten yesqui tagat, ten tiquijtojtinemi que timopoutinemi queme judío, tejua timoyolchicahuas ica in tanahuatil de Moisés. Huan tejua timohueyimatis porín tiquijtoa que tiquixmati Totajtzin Dios. <sup>18</sup> Tejua tagat ten tijudío, cuali tiquixmati ne tanahuatil ten Totajtzin Dios quimonequiltía ma xicchihua. Porín in tanahuatil de Moisés mitznextilijtinemi queniu tiquijitas huan ticchiutinemis sayó ten cuali. <sup>19</sup> Huan tejua tagat tijudío, timomachilía que tihuelis tiquinyecantinemis neques ten ixpojpyocuiltijtocque ica por nintajtacoluan. Huan no timomachilía que tihuelis tiquinyoltahuilijtinemis ica in tanahuatil de Dios nochi neques ten nentinemij tech in tajtacol ten cualcui tayohuayanilot. <sup>20</sup> Tejua tagat ten tijudío, ticyolnemilía que no tihuelis tiquinmejmelaहुलिस neques ten sayó yolmijmiquilome de nintamachilis. Huan no timopohua que tihuelis tiquinyolmajxitijtinemis neques ten amo yec yolmajsitinemij de nintacuaautamatilis. Huan tejua ticchihua nochi nijín porín ticajxilijtinemi tech in tanahuatil de Dios nochi in tamachilis ten yec melahuac. <sup>21</sup> Huan tejua ten titagatjudío, tiquinmachtijtinemi ocsequin taca ica in Tajtoltzin de Dios. Nochi nijín cuali yetoc. Pero tejua no monequi ximomachtijtinemi

ten mitzpoloa oc den Tajtoltzin de Dios. Huan tejua tiquinnojnotztinemi ocsequin taca que ma amo tachtectinemican. Cualí yetoc nochí nijín. Pero tejua amo no xitachtectinemi oc. <sup>22</sup> Huan tejua titagatjudío, tiquinnejmachtijtinemi ocsequin que ma amo ay ahuilnentinemican. Cualí yetoc nochí nijín. Pero tejua no monequi amo xiahuilnentinemi. Huan tejua tiquintahuelitztinemi in tatadiosme ten tamachijchiume san. Nochi nijín cualí yetoc. Pero tejua amo no xiquichtequilijtinemi in tomin ten nintetayocolil ne tatadiosme. <sup>23</sup> Huan tejua ten titagatjudío, timohueyimatinemi ica in tanahuatil de Moisés. Pero tejua ticchihua que ocsequin tagayot ma quimohuispolojtinemican Dios porín tejua amo tictacamatinemi ne ten mitznahuatíla ne tanahuatíl de Moisés. <sup>24</sup> Ica ya nojón in Tajtoltzin de Dios techilía ijcuín: “In taca ten amo mopoutinemij queme judíos, yejuan nojonques quijijtojinemi Totajtzin Dios ica porín in amocualí tachihualis de namejuan nanjudíos”.

<sup>25</sup> Huan tejua ten titagatjudío, como ticyeajscacacamatiniemi in tanahuatil de Moisés, ijcuación yec melau mitzpalehuis nojón nescayotzin de mitznescayotijque tech monacayo para ixnestinemi que tipoutoc ihuan Dios. Pero tacán amo ticyeajscacacacamatiniemi in tanahuatil de Moisés, ijcuación masqui mitznescayotijque ya tech monacayo, pero mochihuas que ipa amo teyica mitzpalehuis. <sup>26</sup> Huan tacán acsá amo quinescayotijque tech ninacayo, pero yejua quitacamatinemi in tanahuatil de Moisés tanahuatía, ijcuación yejua ne Dios quipohua que tanescayotil ya masqui amo ijcón mochihua itech inacayo. <sup>27</sup> Huan se tagat ten amo tanescayotil, pero quitacamatinemi in tanahuatil de Moisés, yejua ne queme yesquía mitzixcomacatoc tejua, titagatjudío. Huan ijcón mochihuas, porín tejua titagatjudío, amo tictacamatinemi in tanahuatil de Moisés, masqui momaco yetoc ya in amat tajcuilol den tanahuatil de Moisés, huan masqui titanescayotil de Dios ya. <sup>28</sup> Huan se tagat ten ticpoutinemij queme judío, yejua ne amo melau poutinemi ihuan judíos sayó porín ijcón monejnehuililtía ninemilis. Huan amo no yec melau que yejua no tanescayotil de Dios porín quinescayotijque tech ninacayo. <sup>29</sup> Ta, nimitzilía que aquen yec melau judío, yejua ne tagat ten quitacamati Dios desde iyolijtic huan amo ica itenxipal san. Huan no nimitzilía que in tamelahuac tanescayotilis de Dios, yejua ne Dios quichihua tech se iyolijtic huan tech se italnamiqulis. Huan ijcón Dios quipohua que yolcuali se tagat masqui ocsequin taca amo quipohuaj que yejua yolcuali.

**3** Huan, ¿toni quihueyipía se tagat de judío? Pues hueyi tatanilis quipixtinemi. ¿Huan toni ipatiu quipía se tagat cuac quinescayotijque ya tech ninacayo? Pues hueyi patiu. <sup>2</sup> Porín nimitzilía que Totajtzin Dios quintequimactilij ipueblojcahuan judíos de que ma quiyecpixtinemican iamatajcuilol den ojtzin de Totajtzin Dios. Ica ya nojón se pueblojcat judío cualcui míac tataman tensá tatanilis. <sup>3</sup> Huan tejuan cualí ticmatij que sequin pueblojuani judíos amo quineltoacacque in Tajtoltzin de Dios. Pero nimitzilía que Dios ipa quichihuas ijcón queme moyectencauca de quintochihuas oso de quintelchihuas masqui sequi ipueblojcahuan judíos amo tacuautamatque que Dios ijcón quichihuas. <sup>4</sup> Huan cachi oc nimitzyeajscacailía que Dios quichihuati ijcón queme moyectencahuac. Huan Yejuatzin amo xolopijti masqui nochí taca ixnestinemij que yejuan tajtoaj de xolopijyot san. Huan ijcuiliutoc tech in Tajtoltzin de Dios ijcuín:

Huan tacán in tagayot huelisquía mitzonixcomacasquía Tejuatzin Dios, ijcuación yejuan amo huelis mitzontajtacolcultisque oc.

Ta, mitzonpohuasque que tionyolcuali porín ticonchiutinemi ijcón queme motajtolis.

Huan tacán in taca cachi oc huelisquáj mitzonixcomacasquáj Tejuatzin Dios, ijcuación timochihuaqui que tiquintajtoltanis ya neques ten quinequi mitzontechtisque.

<sup>5</sup>Huan nican namechnojnotza ica tamachtilisme huan nexcuitilme de talticpactaca san. Huan amo teyi huelis tiquijtosque tejuan como tictenextijtjinemij que Dios cachi oc quipía yolchipahualis ica por tochihualisuan ten amo cuali ten ticchiutinemij. ¿Xe tejuan tiquijtosque que Totajtzin Dios amo yolcuali cuac Yejuatzin techatzacuiltis ica por toamoacualitachihualisuan? <sup>6</sup>Huan amo quemán ijcón xicnemilijtjinemican. Huan tacán amo yolcuali yesquía Totajtzin Dios, ijcuación Yejuatzin amo huelisquá quinixcomacas in talticpacuani ica tamelahuac taixejecolis. <sup>7</sup>Huan achá se tagat quijtosquía ijcuín:

—Tejuan ticueyipannextíaj icualtziyo de Dios que nochi melau Itajtolzin cuac tejuan ticchiutinemij sayó xolopijyot. Ica ya nojón Totajtzin Dios amo huelisquá techixcomacasquía huan techtenextis que tejuan titajtaColejque.

<sup>8</sup>Huan ocsequin talticpactaca quinemilíaj ijcuín:

—Ma ticchiutiyacan ten amo cuali chihualisme para ma cachi monextijtju que semi cachi hueyi icualtziyo de Dios ica por toamocualichihualisuan. Huan ne talticpactaca techijitojtjinemij ica tacajcayahualis que tejuan ijcón titamachtijtjinemij, pero amo melau ijcón titamachtijtjinemij. Huan quinnanmiqui in tatelchihualis ma inpan huetziqui ne talticpactaca.

### Nican tajtoa de que amo aquen se yolchipahuac

<sup>9</sup>Ica ya nojón, ¿toni ticchihuasque tejuan tijudíos? ¿Xe tejuan tijudíos cachi tiyolcualime huan que ne taca ten amo mopoutinemij queme judíos? Pues amo melau. Porín tejuan tiquintajtacoltíaj in taca judíos huan no tiquintajtacoltíaj in taca ten amo judíos. Huan ijcón timocahuaj ya que nochi tejuan titalticpacuani techquitziqijtjinemi in chichualis den tajtaCol. <sup>10</sup>Nochi nijín melahuac porín ijcuiliutoc tech in Tajtolzin de Dios ijcuín:

Dios quijtoa que amo aquen se yolchipahuac, pero nión se talticpactagat ten yolchipahuac.

<sup>11</sup>Huan no Dios quijtoa que amo no ongac se tagat ten cachi cajsicamati ten Dios quimonequiltía ma xicchihua.

Huan amo no ongac se tagat ten voltanemilijtjinemi sayó de Dios.

<sup>12</sup>Porín nochi talticpacuani mosecocautinenque ya de cuali chihualisme huan ixpoliutinemij tech in tajtaColnemilis.

Huan amo ongac se tagat ten quichihua sayó ten chipahuac. Huan amo no ongac se talticpactagat ma quichiutinemi ten cuali.

<sup>13</sup>Huan ninten den talticpactaca queme yesquía se ánimajtecoch ten tapotoc campa hualquistoc míac tensá pitzotic.

Huan ica ninnenepiluan yejuan sayó tacajcayautinemij.

Huan ne tacajcayahuani cuicatinemij tech ninten sayó tacajcayahualis tenica tepajuía ijcón queme in cohua tepajuía.

<sup>14</sup>Huan ne talticpacuani sayó tehuijuicaltíaj ica míac tataman tajtolme ten teyolxocolía ijcón queme yesquía teyolchichilía.



<sup>15</sup> Huan ne talticpactaca moijsihuilijtinemij para queniu temictijtinemisque.

<sup>16</sup> Huan yejuan quincacahuilijtiyohue tech ninnemilispán sequin taca ma quiapiacan tequipacholisme huan no ma taxojxocolilme ya tech ninyolojuan.

<sup>17</sup> Huan nojón talticpactaca amo cajsicamatij nojón ojyalis ten cualcui yolsehuilis.

<sup>18</sup> Huan yejuan amo no quiyolnemilíaj de quiyolmohuilisque Totajtzin Dios.

<sup>19</sup> Huan ticmatij que in tanahuatil de Moisés quinnojnnotzoc ica míc tataman nochi tacaquini ten moyecantinemij ica ne tanahuatil de Moisés. Huan ijcón in tanahuatil de Moisés quintajtacolcuiltía nochi talticpacuani para ma aquen huelis motajtoltenpalehuis iixpantzinco Dios. Huan ijcón ica ne tanahuatil, Dios huelis quinxcomacas in talticpacuani. <sup>20</sup> Huan no ticmatij que Dios amo aquen quipohuas que yolchiphuac sayó porín quinequi quitacamatis in tanahuatil de Moisés. Ta, Dios quintajtacolcuiltis oc. Porín ne tanahuatil de Moisés cualtías sayó para techtajtacolnextis huan techtajtacolcuiltis.

### **Nican tajtoa de queniu Dios techpohua tiyolchipauque sayó ica totacuatamatis**

<sup>21</sup> Huan axcan cuali Dios techmatiltij de queniu Yejuatzin techpohuas que tiyolchipauque iixpantzinco Yejuatzin huan amo techtajtacolcuiltis oc. Pero nochi nijín mochihuas amo porín tictacamatinemij in tanahuatil de Moisés. Pues ne tanahuatil de Moisés huan ne huejcautanahuatiani no ijcón techtapoutihualajque de que se tonal Dios techpohuas que tiyolchipauque ya iixpantzinco Yejuatzin ica por totacuatamatis huan ijcón amo techtajtacolcuiltis oc. <sup>22</sup> Huan Totajtzin Dios amo techtajtacolcuiltis oc. Ta, Dios techpohuas que tiyolchipauque iixpantzinco Yejuatzin cuac titacuatamatij ihuan Jesucristo. Huan cachi oc Totajtzin Dios quinpohuas que yolchiphauque nochi neques ten tacuatamatinemij ihuan Jesucristo huan Dios amo quintajtacolcuiltis oc. Porín ticmatij que amo ongac ome taman de taca iixpantzinco Yejuatzin, neques ten yolchiphauque huan ne taca tajtacojque. <sup>23</sup> Porín tinochin timotajtacolmacacque iixpantzinco Yejuatzin huan huejca tinentinemíaj de ne chipaucanemilis ten Dios quimonequiltía ma ticpiacan. <sup>24</sup> Pero Totajtzin Dios quicahuac ya de techtajtacolcuiltis huan techpohuac que tiyolchipauque sayó porín techueyiyolicnelij. Huan ijcón Dios quichihuac porín Totecotzin Cristo Jesús quixtahuac ya nochi totajtacoluan huan techmaquixtij ya.

<sup>25</sup> Huan Totajtzin Dios quitecahuilij Cristo ma quimictican queme se nemactil para ijcón ica por niesyotzin de Cristo ma quixtahuac totajtacoluan. Huan tejuan Dios amo techtajtacolcuiltis oc. Ta, techpohua que tiyolchipauque cuac tejuan ticneltocaj que Cristo ijcón momiquilij toixpatca. Huan ijcón Dios quichihuac ma momiquili Cristo toixpatca para ijcón quitenextis que yec chipactzin nochi ten Yejuatzin quichiutinemico. Porín ne achtopa ya Yejuatzin amo quinchihuiliaya cuenta in tajtacol den talticpacuani. Ta, Dios quinxcohuilijtihuala intzalan nintajtacoluan de ne huejcautaca ten ocho nemicoj huan Yejuatzin amo quemán quinxtahualtico. <sup>26</sup> Huan no Dios quichiutinemi hasta axcan para ijcón quitenextilijtinemis que melau Yejuatzin yec Yolchiphuactzin. Pero ma titacuatamatinemican que Cristo momiquilij toixpatca para quixtahuas totajtacoluan. Huan ijcón Yejuatzin amo techtajtacolcuiltis oc. Ta, Dios techpohuas tiyolchipauque iixpantzinco Yejuatzin cuac titacuatamatij ihuan Cristo Jesús.

<sup>27</sup> Huan axcan amo aquen se tagat huelis mohueyimatine mis oc. Porín Totajtzin Dios techpohua que tiyolchipauque huan amo techtajtacolcuiltis oc cuac titacuautamatij que Cristo momiquilij toixpatca para quixtahuac totajtacoluan. Huan Yejuatzin amo techpohua que tiyolchipauque sayó porín tejuan ticnequij tictacamatine mij in tanahuatil de Moisés. Porín amo aquen huelis quiyecajsicatacamatis in tanahuatil de Moisés. <sup>28</sup> Ica ya nojón ticajsicamatij que Dios quipohuas se tagat yolchipahuac huan amo quitajtacolcuiltis oc, como yejua tacuautamati ihuantzin. Huan Dios amo quitilía que cox yejua quinequi quitacamatine mis in tanahuatil de Moisés. <sup>29</sup> ¿Cox melau que Totajtzin sayó Yejuatzin in Dios den pueblojani judíos? Pues amo melau. Ta, Totajtzin Dios Yejuatzin in Dios de nochi in judíos huan no in Dios de nochi in talticpacuani ten amo mopohuaj queme judíos. <sup>30</sup> Porín ticajsicamatij que yetica sayó se Dios. Huan no ticajsicamatij que Dios no quinpohuas yolchipauque neques ten tanescayotilme ya de Dios tech ninnacayo como yejuan tacuautamatij ihuan Cristo. Huan no Yejuatzin quinpohuas yolchipauque neques ten amo tanescayotilme ya de Dios, como yejuan tacuautamatij ihuan Cristo. <sup>31</sup> Huan amo xicyoltanemilijtinemican que ticnencajtilíaj san in tanahuatil de Moisés porín titacuautamatij ihuan Cristo huan amo tictacamatine mis ne tanahuatil de Moisés. Ta, tejuan cachi oc tiyecajsicamatacamatinemij ne tanahuatil de Moisés cuac titacuautamatij ihuan Cristo.

#### **Nican tajtoa ten de queniu Pablo quitalía se nexcuitil den nemilis de Abraham**

**4** Huan axcan ma timonojnotzacan de tohuejcautat Abraham. ¿Xe melau que Abraham cajsic ne yec melau yolchipahualis ica porín quinescayotijque tech ne inacayo? Pues amo melau. <sup>2</sup> Porín tacán Dios quipohuasquía Abraham yolchipahuac huan amo quitajtacolcuiltisquía sayó ica por nicualichihualisuan ten quichihua, ijcuacán in Abraham cuali huelis mohueyimatisquía iixpantzinco Dios ica por nitachihualisuan. Pero amo aquen huelis mohueyimatis iixpantzinco Dios. <sup>3</sup> Porín in Tajtoltzin de Dios techilía ijcuín: “Abraham tacuautamatic ihuan Dios, ica ya nojón Totajtzin Dios quipohuac Abraham que yolchipahuac huan amo quitajtacolcuiltij oc”. <sup>4</sup> Huan cuac se tagat quichihua se tequit, ijcuacán ne ipatrón quitaxtahuía amo porín quiyolicnelía. Ta, ne patrón quitaxtahuís ne itaquehual porín quitahuiquilía. <sup>5</sup> Pero cuac se tagat tacuautamati ihuan Dios huan amo quichihua tensá tachihualis tenica mopohuasquía yolchipahuac, ijcuacán Totajtzin Dios quipohuas ne tagat yolchipahuac huan amo quitajtacolcuiltis oc sayó porín itacuautamatis ihuan Dios. Huan ijcón Yejuatzin quichiutinemi porín quimonequiltijtinemís de quinselis taca tajtaclejque ten tacuautamatij ihuantzin. <sup>6</sup> Huan ne huejcaurey David techtapohuía de queniu moyolpactijtinemi se tagat naquen Dios quiyolicnelía huan amo quitajtacolcuiltis oc. Porín Yejuatzin quipohuas ne tagat yolchipahuac ica por itacuautamatilis ihuan Dios. Huan ne David tajtoa de ne tagat ten amo motequitilijtinemi para ica mochihuas ma yolchipahuac. <sup>7</sup> Huan ne huejcau rey David quijtoco ijcuín: Semi tatiocihualme neques talticpacuani ten Dios quinyoltapojpoluía nintajtacoluan

porín Dios quintajtamiltij huan quinpohuilij ya nintajtacoluan.

<sup>8</sup> Huan no tatiocihualme ne taca naquen Totajtzin amo quintajtacolcuiltis para quinxcomacas de nintajtacoluan.

<sup>9</sup> ¿Xe melau nijín tatiochihualis yesqui sayó para neques ten tanescayotilme ya tech ninacayo? Pues amo melau. Ta, ne tatiochihualis no huetziquiu ipan nochi taca ten amo tanescayotilme tech ninacayo. Huan tejuan ipa tamechilijcaj ya que Dios quipohuac Abraham yolchipahuac huan amo quitajtacolcuiltij oc sayó porín yejua tacuautamatic ihuantzin Dios. <sup>10</sup> Ma namechtajtaniliti, ¿quemanían mochihuac que Dios quipohuac Abraham que yolchipahuac huan amo quitajtacolcuiltij oc? ¿Cox Dios quipohuac Abraham yolchipahuac cuac yejua ipa tanescayotil ya tech ninacayo? Pues amo melau. Ta, achtopa que quinescayotijque Abraham, ijcuacán Dios ipa quipoutihualaya que yejua yolchipahuac huan amo quitajtacolcuiltij oc sayó porín yejua tacuautamatic ihuan Dios. <sup>11</sup> Huan de ompa quinescayotijque Abraham para ijcón tanextil ya tech ninacayo que Totajtzin Dios quipohuac ya yolchipahuac porín Abraham tacuautamatic ihuan Dios, masqui ayamo quinescayotijque ya. Huan ijcón Abraham mochihuaco queme yesquía in huejcautat de nochi neques ten tacuautamatisque ihuan Dios que ma Yejuatzin quinpoahuas yolchipauque huan ma amo quintajtacolcuiltis oc, masqui yejuan amo queman quinescayotisque tech ninacayo. <sup>12</sup> Huan no ijcón ne huejcautat Abraham, yejua ne no mochihuaco queme yesquía in tetat de nochi neques ten tanescayotilme ya de Dios, pero amo sayó porín yejuan tanescayotilme san. Porín Abraham ipa tacuautamatihuala ihuan Dios achtopa que quinescayotijque ya. Huan se tagat ten tanescayotijque ya, tacán yejua tacuautamatinemi ihuan Dios ijcón queme quichihuac Abraham ten ayamo tanescayotil ya, ijcuacán ne Abraham mochihuati queme yesquía in tetat de ne taneltoaque ten tacuautamatinemi ihuan Dios masqui tanescayotil ya.

**Dios quitamichihuac ne tenilil tenica moyectencauca ya  
ihuan Abraham porín Abraham tacuautamatic ihuantzin**

<sup>13</sup> Huan Dios moyectencahuac ihuan Abraham huan no ihuan iconehuan de que yejuan se tonal quiselisque tanahuatil para tayecantinemisque tech nijín talticpac. Huan in Abraham quiselij nijín tenilil de Dios. Pero amo porín yejua quitacamatinem mic ne tanahuatil de Moisés. Ta, in Abraham quiselij ne tenilil sayó porín yejua tacuautamatic ihuan Dios huan ijcón Dios quipohuac Abraham que yolchipahuac, huan amo quitajtacolcuiltij oc. <sup>14</sup> Huan namejuan nanjudíos, nanquinemilíaj que sayó namejuan nanquiselisque ne hueyi nemactil de Dios porín sayó namejuan nanquinequij nanquitacamatinemisque ne tanahuatil de Moisés. Pero amo melau. Porín como ijcón mochihuas, ijcuacán ne tacuautamatilis ihuan Dios amo teyi ica cuáltias oc. Como namejuan nanquinemilíaj que nanquiselisque ne nemactil de Dios sayó porín nanquitacamatinemij in tanahuatil de Moisés, ijcuacán ne tenilil de Dios nanquihuejueloaj ya huan nanquichihuaj que amo teyi ipatiu oc. <sup>15</sup> Huan ticmatij que nochi tataman tanahuatil cualcui tatzacuiltis de Dios como amo se quiyecajsicacatamatis. Huan como oncasquía se lugar campa amo teyi oncasquía tataman tanahuatilme, sayó ompa amo oncasquía tajtaclejque.

<sup>16</sup> Ica ya nojón Totajtzin Dios moyectencahuac ihuan Abraham de que quitiochihuas como Abraham tacuautamatis ihuantzin. Huan tejuan no, Dios techtayocolij ya ne tenilil de tatiochihualis sayó porín Yejuatzin techyolicnelía. Huan no nochi neques ten tacuautamatinemij queme Abraham, yejuan nojonques yec melau quiajsicaselisque ne tenilil de tatiochihualis de Dios sayó porín Yejuatzin quinyolicnelía. Huan ma namechajsicamejmelahuili cachi oc que nochi neques

ten quinequij quitacamatinemisque in tanahuatil de Moisés, yejuan nojonques quiselisque ne tenilil de tatiochihualis de Dios como yejuan tacuautamatij ihuantzin. Quijtosnequi que quiselisque nojón tenilil de Dios nochi nojonques ten tacuautamatinemij ihuan Dios, ijcón queme Abraham tacuautamatic ihuan Dios. Huan nochi tejuan ya titacuautamatinemij ihuan Totajtzin Dios ijcón queme Abraham tacuautamatic ihuan Dios. Ica ya nojón cuali ticpohuaj Abraham queme totat. <sup>17</sup> Huan quijtoa tech in Tajtoltzin de Dios ijcuín: “Nejuatzin ya nictamichihuac ya de que tejua ti Abraham, tiyesqui titeiscaltijcau de tel míac páisme huan tagayot”. Huan nijín tenilil de Dios ipa quipixtihuitz chicahualis porín Yejuatzin moyectencahuac de quichihuas. Huan ijcón Abraham quineltoac ne tenilil de Dios. Huan sayó Totajtzin Dios, Yejuatzin quipixtinemi chicahualis para quinmaca se yancuic nemilis neques ten momiquilijque. Huan no sayó Yejuatzin quichiutica que ma mochiutinemi míac tataman chihualisme ten axcan ayamo ixnesi.

<sup>18</sup> Huan masqui Abraham amo quichiaya que quinpías coneme, pero yejua tacuautamatic ihuan Dios huan quineltoquilij itenilil de Dios que se tonal mochihuaquiu. Huan ijcón Abraham mochihuaco hueyi teiscaltijcau intzalan huel míac páisme huan tagayot ijcón queme Totajtzin Dios quilijca ya ijcuín: “Ijcón mochihuaquiu que tejua tiquinpías huel míac moconehuan ijcón queme huel míac sitalinme tiquintztinemi”.

<sup>19</sup> Ijcuac in Abraham quiapiaya queme se ciento xihuit ya. Pero yejua amo quipoloz itacuautamatilis ihuan Dios que se tonal quiapiati míac teconehuan, masqui in Abraham quelnamic que yejua huan isihuau Sara, in omen semi huehuentzitzin ya huan cuetautoc ya ninnacayo. Ica ya nojón amo huelisquíaj oc quiniscais que oc ninconehuan. <sup>20</sup> Pero Abraham quisentocaya quineltoquilijtihualaya amo ica tacajcayahualis ne tenilil de Dios. Huan amo no quiyolnemilij oc que cox amo melau ne tenilil de Dios. Ta, yejua cachi oc quihueyiltij itacuautamatilis ihuan Dios huan quiajsicaneltoquilij Dios nochi ten quilij. Huan no Abraham quihueyimohuistijtihuala Dios. <sup>21</sup> Porín in Abraham quiyecajsicaneltoac que Dios quipía huelilis para quichihuas nochi tenica moyectencahuac. <sup>22</sup> Ica ya nojón Dios quipohuac Abraham que yolchipahuac huan amo quitajtacolcuiltij oc porín yejua tacuautamatij ihuantzin.

<sup>23</sup> Huan amo sayó para quihueyipohuas Abraham nijín tanextililis ten ijcuiliutoc tech in Tajtoltzin de Dios de que Dios quipohuac Abraham yolchipahuac porín tacuautamatic ihuantzin. <sup>24</sup> Ta, no nijín ne tenilil ijcuiliutoc tech in Tajtoltzin de Dios ica por tejuan ten Dios techpohuas que tiyolchipauque huan amo techtajtacolcuiltis oc sayó porín titacuautamatij ihuantzin. Huan no porín titacuautamatij ihuan Dios que Yejuatzin quipanquixtij yoltoc intzalan in ánimajme in Cristo Jesús Totecotzin. <sup>25</sup> Huan Totajtzin Dios quitemactij Jesús inmaco in tayecanani ma quimictican para ijcón quixtahuas totajtacoluan. Huan de ompa Dios quipanquixtij yoltoc in Totecotzin para ijcón Yejuatzin huelis techpohuas tiyolchipauque. Huan Yejuatzin amo techtajtacolcuiltis oc cuac titacuautamatic ihuantzin.

### **Dios techpohua que tiyolchipauque huan ixnestiu que techtayocolitiu míac tataman tatiochihualis**

**5** Huan Totajtzin Dios techpohuas que tiyolchipauque huan amo techtajtacolcuiltis oc, cuac titacuautamatij ihuan Cristo Jesús. Huan ijcón ticpixinemij ne yolsehuilis ihuan Dios porín Totecotzin Jesucristo momiquilij toixpatca huan quixtahuac totajtacoluan. <sup>2</sup> Huan ica por Cristo, Yejuatzin Dios techseliltij ya ite-

icnelilistzin ten axcan ticpixinemij, porín tejuan titacautamatque ihuan Cristo Jesús. Huan semi timoyoluelitztinemij huan ticyolicachixtiyohue de que se tonal tipohuitihue ne campa ichicaucahuelilispan de Dios campa ticsepanpixinemis que icualtziyo. <sup>3</sup> Huan amo sayó timoyoluelitztinemij ne cualtziyot de Dios. Ta, no timoyoluelitztinemij cuac ticseljaj tajyohuilis. Huan ijcón timoyoluelitztinemij porín ica ne tajyohuilisme ticmatij que timomachtijtiyohue de queni tejuan cachi oc ticxijxicojtiyasque ne tajyohuilis. <sup>4</sup> Huan cuac tiquijyohuitiyohue ne tajyohuilis, ijcuacán Dios techpohua que cuali titachihuanime. Huan cuac ticajscamatij ya que cuali titachihuanime, ijcuacán ticpíaj itechcacopaca Yejuatzin se tacuautamatilis cuali majsitoc ya que se tonal ticselitihue ne chicaucacualtziyo de Dios. <sup>5</sup> Huan ne tacuautamatilis ten majsitoc amo tepinautía ya, huan yejua ne amo no tecajcayahua san ya. Porín Totajtzin Dios techyolpexontij ya ica ihueyitetasojtalis cuac ejcoc tech toyolojuan in Yecicatzin Espíritu ten Dios techtayocolij.

<sup>6</sup> Huan tejuan amo ticpiacque tenica huelisquía timomaquixtisquíaj. Pero cuac Totajtzin Dios quimonequiltij, ijcuacán Cristo huala huan momiquilij toixpatca huan quixtahuac nochi totajtacoluan de nochi tejuan de amo tiyolcualime. <sup>7</sup> Huan semi ohui de ticneltocaj que acsá talticpactagat momiquilis para quipalehuis de ocsé tagat ten yolchipahuac. Pero achá huelisquía oncasquía se acsá ten moixehuis de ijcón quichihuas, de momiquilisquía para quipalehuisquía se tagat ten melau yolcuali. <sup>8</sup> Pero Totajtzin Dios techueyinentilía ihueyitetasojtalistzin masqui tejuan tech ne tonal ticatcaj semi titajtaolejque. Huan amo ticatcaj tiyolcualime tech ne tonal cuac Cristo momiquilij toixpatca para quixtahuas totajtacoluan. <sup>9</sup> Huan Totajtzin Dios techpohuas tiyolchipauque huan amo techtajtacolcuiltis oc porín Cristo quimijmiloj iesyotzin huan momiquilij toixpatca huan quixtahuac totajtacoluan. Huan cachi oc Yejuatzin ica ne chicahualis de Cristo techquixtis de ne cualancatatzacuiltis ten Dios cualtitanis oc. <sup>10</sup> Huan tech ne tonalme cuac tictahuelitztinemíaj oc Dios, ijcuacán Totajtzin Dios quichihuac que ma moyoltali tohuan huan que tejuan ma tiyolseutinemican ihuantzin. Huan nijín yolsehuilis Dios quichihuac sayó cuac momiquilij Iconetzin por toixpatca huan quixtahuac totajtacoluan. Huan queme axcan tiyolseutinemij ihuan Dios, ica ya nojón cachi oc Yejuatzin techmaquixtijtoc ica in chicahualis ten Cristo quipixtinemij de ne cualancatatzacuiltis de Dios cualtitanis. <sup>11</sup> Huan amo sayó tiyolseutinemij ihuan Dios. Ta, no cachi oc tiyolpactinemij ihuan Dios porín Cristo Totecotzin techmaquixtijtoc. Huan axcan cuali ticmatij que tiyolseutinemij ihuan Dios porín ica ne huelilis de Cristo.

### **Nican Pablo tajtoa den ome tayecanani, in Adán huan in Cristo**

<sup>12</sup> Huan no cuali ticmatij que itechcacopaca ne achtopa tagat Adán ten motajtacolmacac in tajtacol momahuac ya tech nochi senmanahuac. Huan no ticmatij que ongac miqulilis nochi senmanahuac ica por ne tajtacol de Adán. Huan no ne miqulilis mosohuaco huan taquitzquijtinemico inpan nochi in talticpacuani porín nochi in talticpacuani motajtacolmacacque ijcón queme ne achtopa tagat in Adán. <sup>13</sup> Achtopa que tayecantinemis in tanahuatil de Moisés, ijcuacán ipa momahuaco ya in tajtacol inpan in talticpacuani. Pero Totajtzin Dios amo quintajtacolcuiltij in talticpacuani masqui yejuan amo quitacamatinenque ne tanahuatil de Moisés. <sup>14</sup> Pero ipa mochihuaco que oncaya miqulilis desde in tonalme cuac nemico Adán huan hasta in tonalme cuac nemico Moisés. Ica ya nojón in miqulilis quinmapach-

jihuala inpan neques ten motajtacolmacatihualayaj, masqui yejuan amo motajtacolmacaque queme ne Adán. Huan xicmatican que ne achtopa tagat Adán, yejua ne se nexcuitil de Cristo ten ipa monequía hualas.

<sup>15</sup> Huan semi tatamantic ne tajtacol de Adán ihuan ne iteicnelilis ten Totajtzin Dios techtayocolía. Porín ica ne tajtacol de Adán, miacque momiquilijque. Pero Totajtzin Dios ica ihueyiteicnelilis techtayocolía ne nemaquixtilis sayó itechcacopaca de ne tagat Jesucristo. Huan semi hueyi ne itequiu de Jesucristo ten cuatlías para quinmaquixtilis miacque talticpacuani. <sup>16</sup> Huan semi tatamantic ne tajtacol de ne tagat Adán ihuan ne nemaquixtilis ten Dios techtayocolía. Porín ica setzin ne tajtacol tenica Adán motajtacolmacac, ijcuacón mosensohuaco inpan nochi in talticpacuani ne tatlchihualis. Pero Totajtzin Dios ica iteicnelilis techmaquixtilis huan amo techtajtacolcuiltis oc. Ta, Yejuatzin techpohua que tiyolchipauque, masqui tejuan timotajtacolmacaque ya ica míac tataman tajtacolme. <sup>17</sup> Huan ticmatij que quinmapachojtihualaya in miqulilis inpan in talticpacuani ica por in tajtacol de se tagat san huan nijín yejua in Adán. Pero ica por itequiu de se tagat san ten monotza Jesucristo, ica ya nojón huel míac tagayot quihueyiselisque ne teicnelilis ten Dios quintayocolis. Huan yejuan no quiselisque ne yolchipahualis ten Dios quintayocolía. Huan no yejuan tayecantinemij tech ninnemilispán ica por ne ichicauhuelilis de Cristo Jesús.

<sup>18</sup> Xiquitacan que itechcacopaca ne tagat Adán huetzico ne tatlchihualis inpan nochi in talticpacuani porín ne tagat Adán motajtacolmacac ya. Huan no ijcón xiquitacan que itechcacopaca ne tagat Jesucristo, nochi tejuan Dios amo techtajtacolcuiltis oc. Ta, Yejuatzin techpohuac que tiyolchipauque porín ne Jesucristo quitacomatic Itajtolzin cuac momiquilij para quixtahuas totajtacoluan. Huan ijcón Totajtzin Dios quinmacatiyás nochi itaneltocacahuan se cualtzin yec nemilis ten amo cualcui tatzacuiltis. <sup>19</sup> Huan Totajtzin Dios quintajtacolcuiltij ya nochi in talticpacuani itechcacopaca de ne tagat Adán ten amo taticamatic. Pero no ijcón mochi huas que Totajtzin Dios techpohuas que tiyolchipauque timiacque titalticpacuani huan amo no techtajtacolcuiltis oc. Huan nochi nijín mochiutoc itechcacopaca se tagat ten monotza Jesucristo porín Yejuatzin quitacomatic Itajtzin Dios.

<sup>20</sup> Huan ne tanahuatil de Moisés, Dios cualtitanic para techajscamatiltis que tejuan ticuicatinemij míac tajtacolme. Pero xicmatican que cuac cachi mohueyinxico ya in tajtacol, ijcuacón no cachi oc ticyecajscamatilticoj que mohueyisohuaco in hueyi teicnelilis de Dios. <sup>21</sup> Huan ijcón in tajtacol techmapachojtihualaya topan para techuicas tech in miqulilis. Pero Dios ica ihueyiteicnelilis techyecantinemis, huan amo techtajtacolcuiltis oc. Ta, Yejuatzin techpohua que tiyolchipauque porín titacautamatinemij ihuan Cristo Iconetzin de Dios, huan no techtayocolijtiyás ne yec nemilis ten amo queman tamis. Huan nochi nijín quichihuac porín Totecotzin Jesucristo momiquilij toixpatca huan quixtahuac totajtacoluan.

**Nican tajtoa de que ne talnamiquililis de tajtacol ma  
amo techyolmapachojtinemi oc ica ichicahualis porín  
tiyoltinemij ica in chichahualis de Cristo**

**6** Huan namechilía amo xicneltocacán nijín tajtolme den tecajcayahualis ten quijtoaj sequin tajtoani. Porín yejuan quijtoaj que ma ticsentocacán ma timotajtacolmactiyacán para que ma Dios cachi oc technextilijtiuhueyiteicnelilis. <sup>2</sup> Namechilía

que amo ijcón xicnemilican nión xicneltocacan. Porín xicmatican que iixpantzincó Yejuatzin nochi in chicahualis de totalnamiquilis de tajtacol cuetautoc ya hasta tamis. Huan como tamic ya ne chicahualis den soltic totalnamiquilis, ijcuacón amo huelis tinentinemisque oc ica in chicahualis de ne soltic totalnamiquilis. <sup>3</sup> Huan cuali nanquimatij que nochi tejuan cuac techahuijque ya, ijcuacón ixnesic ya que timajsitinemij ya ihuan Cristo Jesús. Huan no cuac techahuijque ya, ijcuacón Yejuatzin techpohuac ya que timomiquilijque ijcón queme Cristo Jesús momiquilij, quijsosnequi que in chicahualis de ne soltic totalnamiquilis, nochi cuetahuic ya hasta tamis. <sup>4</sup> Huan no xicmatican que cuac techahuijque, ijcuacón Yejuatzin no techpohuac que tejuan timomiquilijque huan no techpohuac que techalpacohojque ihuan Cristo, quijsosnequi ne soltic totalnamiquilis de tajtacol cuetahuic ya hasta tamic ya. Huan ijcón queme Totajtzin Dios quipanguixtij Cristo yoltoc intzalan in ánimajme ica ichicahuelilis, no ijcón tejuan Dios techpohuac ya que tipanquisque ya tiyoltocque ihuan Cristo, para ijcón axcan ma tiyoltinemican ica se yancuic nemilis.

<sup>5</sup> Huan xicmatican que tejuan timajsitinemij ihuan Cristo porín Dios techpohuac que tejuan timomiquilijque ijcón queme Cristo Jesús momiquilij, quijsosnequi ne soltic talnamiquilis de tajtacol sen tami cuetahuic ya hasta miyic ya. Huan no xicmatican que tejuan timajsitinemij ihuan Cristo porín Dios techpohuac que tejuan tipanquisque ya tiyoltocque intzalan in ánimajme, ijcón queme Cristo Jesús panquisac yoltoc. <sup>6</sup> Huan no xicmatican que in soltic totalnamiquilis de tajtacol, yejua ne Dios quipohuac que quicuoupampilojque huan quimictijque cuac quimictijque Cristo, para ijcón quihuejelos in chicahualis den soltic totalnamiquilis. Ica ya nojón in tajtacol amo huelis techmapachojtiyás oc ica ichicahualis.

<sup>7</sup> Huan no xicmatican que aquen yesqui tagat ten momiquilij ya, yejua ne in tajtacol amo huelis quiyoltitanas oc nión quimapachojtiyás oc ica ichicahualis. <sup>8</sup> Huan como Dios techpoutinemi que timomiquilijque ya ihuan Cristo, no ijcón tiyectacuautamatinemij que tinentinemisque ihuan Cristo Jesús sen nachipa. <sup>9</sup> Huan no ticmatij que ijcón queme Cristo Jesús panquisac ya yoltoc intzalan in ánimajme, ijcuacón ma ticmatican que Yejuatzin amo queman quipías tamilis, porín ne miqulilis amo huelis oc tamapachojtos oc ipan Cristo ica ichicahualis. <sup>10</sup> Huan no ticmatij que cuac Cristo momiquilij ya, ijcuacón sepan san quixtahuac de nintajtacoluan den talticpacuani. Huan no ticmatij que Cristo ocsepa yoltinemi huan axcan nentinemis para ijcón quitequitilijtiyás Itajtzin Dios. <sup>11</sup> Huan axcan namejuan monequi ximopohuacan que nanmomiquilijque ya, quijsosnequi in soltic namotalnamiquilis de tajtacol, yejua ne tami cuetahuic ya para ma amo in tajtacol huelis namechmapachojtiyás oc. Huan namejuan no cachi oc ximopohuacan que nanyoltinemican axcan para nanquihueyipanchihuasque Totajtzin Dios porín nanpoutinemij ihuan Totecotzin Cristo Jesús.

<sup>12</sup> Ica ya nojón namechilía amo xictacahuilican oc ne tajtacol que ma namechmapachojtiu tech namotacayo. Huan amo no xictacahuilican oc ne tajtacol que ma namechvoltanejnequiltij tech namotacayo. <sup>13</sup> Huan ximotemactijtiyacan ihuan Dios huan amo xicmactijtiyacan oc namotacayo tech in tajtacol para que ma in tajtacol namechtequitiltijtiu tech in amocuali tachihualisme. Ta, namechilía cachi oc ximotemactijtiyacan imaco Totajtzin Dios para que ijcón Dios namechtequitiltijtiyás ica ten cuali. Huan ijcón xicchihuacan namejuan ten nanyoltinemican ihuan Cristo porín Dios namechpohuac que namechpanquixtij ya nanyoltocque ya para xinentinemican tech ne yec nemilis. <sup>14</sup> Huan axcan xicmatican que namejuan amo

namechyecantiyás oc ne tanahuatil de Moisés. Ta, namechyecantiyás ne ihueyiteicnelilis de Dios. Ica ya nojón in tajtacol amo huelis oc namechmapachojtiyás oc.

### **Pablo quitalía se nexcuitil de tequitini tacohualme**

<sup>15</sup> ¿Toni nanquixejecoaj namejuan de nijín nexcuitil den namechtaliliti? ¿Xe tejuan cachi oc ma timotajtacolmacacan porín ticmatij que amo techyecantinemi oc in tanahuatil de Moisés? Pues amo ijcón ma ticnemilican. Huan, ¿xe no tejuan cachi oc ma timotajtacolmacacan porín ticmatij que techyecana axcan ne ihueyiteicnelilis de Dios? Pues, amo no ijcón ma ticnemilican. <sup>16</sup> Huan no namejuan cuali nanquimatocque ya que tacán nanmotemactij ya queme nantaquehualme de nantacohualme imaco de se patrón para nanquitacamatinemisque, ijcuación namejuan nanmochihuaj ya nanitequiticahuan nantacohualme de ne patrón huan ijcón monquis nanquitacamatisque. Huan no ijcón mochihuas que cuac nanquitacamati in tajtacol queme yesquía se patrón, ijcuación nojón tajtacol namechualcuilía tamilis san. Pero cuac namejuan nanquitacamati Totajtzin Dios, ijcuación ne taticamatilis de Dios namechualcuilis se yolchiphualis huan se chipaucanemilis. <sup>17</sup> Huan namejuan ne achtopa ya nancatcaj nanitequiticahuan den tajtacol huan namechyecanaya queme yesquía namopatrón. Pero tictasojcamachilíaj Totajtzin Dios que axcan namejuan ica nochi namotalnamiquilis nanquitacamatinemij ya nojón chipahuac tanextililis tenica nanmoyectencauque de que nanquitacamatisque. <sup>18</sup> Huan axcan namejuan nanquisecocauque ya de ne tajtacol de que ma amo namechyecantiu oc. Huan nanmochihuacoj de que namejuan nantequitini de ne chipaucanemilis huan ne yolchiphualis. <sup>19</sup> Huan namejuan namechnojnotztoc ijcón queme talticpactaca tajtoaj. Ne achtopa ya namejuan nanmotemactijtihualayaj tech in tajtacol para ma ne tajtacol ma namechmapachojtihualani para ijcón quichiutihualajque tachihualisme ten pitzotic huan ten amocuali. Ica ya nojón sayó nanquichiutinenque ten amocuali tajtacol. Pero axcan namejuan ma ximotemactijtiyacan imaco Dios para nanquichiutinemisque huan nanmotequitiltijtinemisque tech in chipaucanemilis. Huan ijcón queme nanchipaucanentiyasque, ijcuación Totajtzin Dios cachi oc namechyolchipautiyás.

<sup>20</sup> Huan cuac namejuan namechmapachojtinemic oc in tajtacol, ijcuación namechyecanaya in tajtacol queme yesquía se patrón, huan amo nanmotequitiltijtinemíaj tech in chipaucanemilis. <sup>21</sup> Huan, ¿toni nanquiquixtilijque de ne amocuali tajtacolnemilis para ica namechpalehuis? Pues amo teyi. Porín axcan cuac nanquelnamiquij de ne namotajtacolnemilis ten nanquicauteuque ya, ijcuación sayó nanmopinaucatalíaj ya. Porín ne tajtacolnemilis tenica namechpinaucatalíaj ya, yejua ne namechualcuilía ne ixpololis tech in miqulilis. <sup>22</sup> Huan axcan Dios namechtesecocahualtij ya de tajtacol para ma amo namechyecantinemi oc in tajtacol queme yesquía se patrón. Huan axcan nanpeuque namotequitiltijtinemij sayó para Dios. Huan nijín chipaucanemilis namechualcuilía sayó tatiochihualis de Dios. Huan ijcón mosta mosta Totajtzin Dios cachi oc namechyolchipautiu. Huan ne chipaucanemilis quimajxitijtiu namopan ne yec nemilis ten amo quemam tamis. <sup>23</sup> Huan in tajtacol queme yesquía se patrón ten tetaxtahuía sayó ica miqulilis. Pero Totajtzin Dios techtayocolía yejua ne yec nemilis nachipa porín tipoutinemij ihuan Totecotzin Cristo Jesús.



### Nican Pablo quitalía se nexcuitil de se namicuani

**7** Huan notasojicnihuan, namechnojnotza ica se nexcuitil, namejuan ten cuali nanquixmatinemij in tanahuatil de Moisés. Porín cuali nanquimatij que in tanahuatil de Moisés quinyecantinemi in tagayot sayó cuac yejuan yoltinemij oc. <sup>2</sup> Huan ma tiqijtojcan ijcuín: In tanahuatil de Moisés tenahuatía que se sihuat namicque ma poutinemi ihuan iyoquich cuac yoltinemi oc iyoquich. Pero tacán iyoquich momiquilis ya, ijcuacán ne sihuat amo poutinemi oc ihuan ne iyoquich. Huan ijcón in tanahuatil de Moisés amo quiyecantinemi oc ne sihuatzin queme namicque. <sup>3</sup> Huan no tenahuatía ne tanahuatil de Moisés que tacán se sihuat namicque mosen-tilía ihuan ocsé tagat, ijcuacán ne sihuat motajtacolmaca tech in ahuilnemilis porín yoltinemi oc iyoquich. Pero tacán iyoquich momiquilij ya, ijcuacán ne tanahuatil de Moisés amo quiyecantinemi oc ne sihuat queme ipa yesquía namicque. Ta, ne sihuat ten iyoquich momiquilij ya, yejua ne huelis monamictis ocsepa ihuan ocsé tagat huan ijcón amo motajtacolmacatiyás oc tech in ahuilnemilis.

<sup>4</sup> Ica ya nojón, notasojicnihuan, in tanahuatil de Moisés amo techmapachojtinemi oc porín Totajtzin Dios techpohua que timomiquilijque ya de tosoltictalnamiqulilis cuac Yejuatzin techtepohualtij ihuan Cristo. Ica ya nojón tejuan ocseco titeaxchahuan ya de ocsé patrón, quijtosnequi que axcan tipoutinemij ihuan Cristo ten panquisac yoltoc intzalan in ánimajme. Huan ijcón tejuan timotequitiltijtinemisque ihuan Dios para ma onca cuali tachihualisme queme yesquía taquilot. <sup>5</sup> Huan ne achtopa ya techyecantinemía oc ne tosoltictalnamiqulilis ten cuica tajtacol. Huan cuac ticajsicamaticoj in tanahuatil de Moisés, ijcuacán cachi oc timonejnequiliayaj ijcón queme tosoltictalnamiqulilis techyecanaya. Huan nojón no mochiutihualaya sayó ma onca míac tataman amocuali tachihualisme ten cuica miquilis. <sup>6</sup> Huan axcan xicmatican que ne tanahuatil de Moisés amo techmapachojtinemi oc porín Dios techpohua que timomiquilijque huan ne tosoltictalnamiqulilis tami cuetahuic ya. Ica ya nojón tejuan amo teyi techtazjzacuiliá oc para timotequitiltijtinemisque para Dios. Huan ijcón tichipaucanemij tech ne yancuic nemilis ica in chichualis de Yecticatzin Espíritu. Huan amo techmapachojtinemis oc ne huejcautajcuilolamatzin de tanahuatil de Moisés.

### Nican tajtoa de queniu in tajtacol momautoc tech totalnamiqulilis

<sup>7</sup> Huan namechilía amo xicneltocacan que nicnequi namechilis que in tanahuatil de Moisés yejua ne techmajmahua ica tajtacol. Huan namechilía que amo ijcón xicnemilican. Porín nejua amo nicmatisquía toni quijtosnequi tajtacol como amo nechajsicamatiltisquía ne tanahuatil de Moisés. Ma tiqijtojcan que amo nicyolmachiliaya toni quijtosnequi ne tajtacol de ne yolnejxicolilis, como amo nechahuatilisquía in tanahuatil de Moisés ijcuín: “Amo xicyolnejnequi de ximoaxcatili ten teaxca”.

<sup>8</sup> Huan cuac in tanahuatil de Moisés nechnahuatiliij que ma amo nicyolnejnequi ma tensá nimoaxcatili ten teaxca, ijcuacán nejua notalnamiqulilis de tajtacol cachi oc nechyoltanejnequiltij ya que ma nicyolnejnequi ten teaxca. Pero cuac ne tanahuatil de Moisés amo teyi techtacahualtía, ijcuacán totalnamiqulilis de tajtacol amo mo-fuerzajuía de techyoltilanas. Ta, mocahuas majyá miquet ya. <sup>9</sup> Huan sequi tonalme nejua ninentinemía queme yesquía amo oncaya tanahuatil de Moisés. Pero tech

ne tonal cuac in tanahuatil de Moisés pehuac nechyecana ya, ijcuacón ne notalnamiqulilis de tajtacol majyá cachi quicuic chicahualis huan moyolcuic. Huan ijcón nejua nicajscamatico que in tanahuatil de Moisés nechpohuac nimiquet ya porín nopan huetziquiu ya in ixpolihuilis.<sup>10</sup> Huan ne tanahuatil de Moisés yejua ne monequía nechejcoltis campa in yec nemilis ihuan Dios como nihuelisquía nicyecajscatacamatisquía. Pero mochihuac que ne tanahuatil de Moisés nechajxitij ya campa ongac tamilis porín amo nihuelic niyecajscatacamatic.<sup>11</sup> Huan nosoltictalnamiqulilis nechcajcaياهوac tech notamachilis porín nicchiaya nicyecajscatacamatis in tanahuatil de Moisés. Pero cuac nicajscamatic que amo queman huelis nicyecajscatacamatis in tanahuatil de Moisés, ica ya nojón in tanahuatil de Moisés nech-tatzacuiltij huan nechpohuac nimiquet ya porín nopan huetziquiu ya ne ixpolihuilis.

<sup>12</sup> Huan ocsepa cachi oc namechyequilía que nijín tanahuatil de Moisés, yejua ne yec chipahuactzin. Huan cada se tanahuatiltzin, yejua ne chipahuactzin huan tame-lahuac huan semi cualtía.<sup>13</sup> Huan, ¿xe melau que ne tanahuatil de Moisés ten melau yec chipahuactzin, yejua ne nechixnextico ma nimiqui tech in ixpolihuilis? Pero amo ijcón ma tiqulican. Porín in tajtacol yejua ne nechteaxcatij ihuan in miqulilis porín nitajtacle. Huan ijcón in tajtacol cachi oc monextico que semi cuica ixpolihuilis san. Huan nijín mochihuac ica ipampa ne tanahuatil de Moisés ten melau yec chipahuactzin. Ica ya nojón ne tanahuatil de Moisés quitenextijtjnemi que in tajtacol yejua semi cuica chicahualis de techtajtamiltis tech in ixpolihuilis.

<sup>14</sup> Huan cuali ticmatij que ne tanahuatil de Moisés, yejua ne cuicatinemi in chicahualis de Yecticatzin Espíritu. Huan no nicmati que nejua notalnamiqulilis momautoc ica tajtacol huan nejua majyá niteaxcatitoc tech in tajtacol ten nechyecana queme yesquía nopatrón.<sup>15</sup> Huan nejua amo nicajscamati ne ten nicchiutinemi. Porín amo nicchiutinemi ne ten nicnequi nicchihuas. Ta, nejua nicchiuati ne ten nictahuelitztjnemi; yejua ne cachi nicchihua.<sup>16</sup> Pero tacán nicchiutinemi ne ten amo nicnequi nicchihuas, ijcuacón nejua no niquijtoa ijcón queme Totajtzin Dios quijtoa que ne tanahuatil de Moisés yejua ne chipahuactzin.<sup>17</sup> Huan no niquijtoa ijcón queme Dios quijtoa que amo nejua oc nicchiutinemi ne amocuali tachihualisme. Ta, quichiutinemi ne amocuali chihualisme in tajtacol ten momautoc ya tech notalnamiqulilis. Yejua ne nechchihualtía ma ninentinemi tech ne amocuali chihualisme.

<sup>18</sup> Huan cuali nicmati que itech noyolijtic, quijtosnequi tech notalnamiqulilis, amo teyi ongac ten Dios quipohua que chipahuac. Porín nimoyolajxitía que nicnequi nicchihuas ten cuali, pero amo nimoyolajxilía in chicahualis de queniu nicchihuas ten cuali.<sup>19</sup> Porín amo nicchiutinemi ne cuali tachihualis ten nicnequi nicchihuas. Ta, nicchiutinemi yejua ne amocuali tachihualisme ten amo nicnequi nicchihuas.<sup>20</sup> Huan tacán nicchiutinemi ne amocuali tachihualisme ten amo nicnequi nicchihuas, ijcuacón amo nejua oc nicchiutinemi ne amocuali tachihualisme. Ta, ne tajtacol ten momautoc tech notalnamiqulilis, yejua ne nechchihualtjtoc ma nicchiutinemi ne amocuali tachihualis.

<sup>21</sup> Ica ya nojón cuac nicnequi nicchihuas ne tachihualis ten cuali, ijcuacón nimoyolajxilía que in tajtacol momautoc ya tech notalnamiqulilis. Huan ne tajtacol queme yesquía se tanahuatil ten nechmapachojtinemi.<sup>22</sup> Huan no nimoyolajxilía que nejua semi nechyolpactía ne tanahuatil de Dios ten yetoc tech notalnamiqulilis.<sup>23</sup> Pero no nicyoliztoc que yetoc ocsé huelilil ten nechmapachojtinemi tech notalnamiqulilis. Huan ne ocsé huelilil quixnamictinemi nejua notalnamiqulilis ten quinequi quichi-

huas ten cuali. Huan ne ocsé huelilis tictocaytíaj netalnamiqulis de tajtacol. Huan yejua ne nechmautoc ica tajtacol huan no nechylolquitzquijtinemi huan nechtzijtzicojtinemi queme yesquía nejua nipreso ihuan. <sup>24</sup> Ica ya nojón nejua semi nionteicnelti, porín amo aquen huelilis nechmaquixtis den chicahualis de notalnamiqulis de tajtacol ten nechucas campa ixpolihuilis sen nachipa. <sup>25</sup> Ica ya nojón ica notamachilis nimotequiltitjinemi para nictacamatis in tanahuatil de Dios. Pero niman no nicmati que nejua ica notalnamiqulis de tajtacol nictacamatinemi ne tajtacol ten nechyecantinemi queme yesquía se patrón. Pero nictasojcamachilía que Totajtzin Dios nechmaquixtis ica por ichicahualis de Totecotzin Jesucristo.

### **Nican tajtoa de ne chipaucanemilis ten cualcui in Yecticatzin Espíritu de Dios**

**8** Huan axcan xicmatican que Totajtzin Dios amo quintelchihuas neques ten poustinemij ihuan Cristo Jesús, como yejuan amo nentinemij ica ichicahualis den nintalnamiqulis de tajtacol. Ta, yejuan ma chipaucanemican ica in chicahualis den Yecticatzin Espíritu. <sup>2</sup> Porín ne Yecticatzin Espíritu cualcui huelilis tenica Yejuatzin techmaca yancuic nemilis nochi tejuan ten tipoutinemij ihuan Cristo Jesús. Huan no ne huelilis ten cualcui in Yecticatzin Espíritu, yejua ne no techualquixtij ya imaco de ne tajtacol huan no techualquixtij imaco de ne miqulis ten techyecanaya queme yesquía se patrón. <sup>3</sup> Huan axcan Totajtzin Dios quitamichihuac ya ne tatacamatis ten in tanahuatil de Moisés amo queman huelic quichihuaco. Porín ne tanahuatil de Moisés amo cualcuía huelilis para ica ticchihuasque ten cuali, porín ne soltic totalnamiqulis momautoya ica tajtacol. Pero Totajtzin cualtitanic ne Iy-ojtzin Conetzin ma yoliquiu huan ma monacayoti queme tejuan titaca titajtaColejque. Huan no Totajtzin Dios cualtitanic ne Iconetzin para ma momiquili toixpatca huan para techsentamitaxtahuilis de totajtacoluan. Ica ya nojón Totajtzin Dios quitamipoloy ya in chicahualis in tajtacol den nochi talticpacuani cuac momiquilij Cristo queme se tagat tatelchihual. <sup>4</sup> Huan ijcón Dios quichihuac para que tejuan huelis ma tichipaucanemican ijcón queme Dios itanahuatil techtanahuatilía. Ica ya nojón axcan tejuan ma amo tinentinemican ica in chicahualis de tejuan totalnamiqulis ten momautoc ica tajtacol. Ta, ma tichipaucanemican ica in chicahualis den Yecticatzin Espíritu. <sup>5</sup> Huan no namechilía que nochi neques ten moyecantinemij ica ne chicahualis de nintalnamiqulis de tajtacol, yejuan nojonques sayó yoltanemilijtinemij itech nintamachilis ten hualehua tech nintalnamiqulis de tajtacol. Pero no namechilía que nochi neques ten moyecantinemij ica ne chicahualis den Yecticatzin Espíritu, yejuan nojonques sayó yoltanemilijtinemij itech nintamachilis ten cualcui in Yecticatzin Espíritu. <sup>6</sup> Xicmatican que cuac ticyoltanemilijtinemij sayó itech totalnamiqulis ten cualcui tajtacol, ijcuacón yejua ne techuica ya tech in ixpolihuilis. Pero cuac tiyoltanemilijtinemij sayó itech in tamachilis ten cualcui in Yecticatzin Espíritu, ijcuacón yejua nojón techualcuilía se yancuic nemilis huan se cualtzin yolseucanemilis. <sup>7</sup> Huan no xicmatican que nochi neques ten yoltanemilijtinemisque itech ne talnamiqulis ten cualcui tajtacol, yejuan nojónques sayó quixnamictinemij Totajtzin Dios. Huan yejuan quichiutinemij ten amocuali chihualisme, porín amo motecahuilíaj ma quinyecana in tanahuatil de Dios. Huan no cachi oc amo huelij quitacamatinemisque in tanahuatil de Dios. <sup>8</sup> Ica ya nojón namechilía que nochi neques ten sayó moyolpactinemij ijcón queme nintalnamiqulis de tajta-

col quinyecantinemi, yejuan nojonques amo queman huelis quiyolpactijtinemisque Dios.

<sup>9</sup> Pero axcan namejuan amo nanmoyolpactijtinemisque oc ijcón queme namotalnamiquilis de tajtacol namechyecantinemi. Ta, namejuan nanyoltinemi sayó para nanquiyolpactijtiyasque in Yecticatzin Espíritu porín Yejuatzin yetinemi namoyolijtic. Huan tacán acsá amo quipía iyolijtic in Yecticatzin Espíritu ten Cristo quitemaca, ijcuación yejuan nojonques amo poutinemij ihuan Cristo Jesús. <sup>10</sup> Pero quema, Cristo yetinemi namoyolijtic. Huan masqui namonacayo se tonal ixpolihuis porín momautoc ica tajtacol, pero in Yecticatzin Espíritu namechmacatiu yec nemilis tech namotalnamiquilis porín Totajtzin Dios namechtajtamiltij ya nochi namotajtacoluan. <sup>11</sup> Huan in Yecticatzin Espíritu de Totajtzin Dios yetinemi namoyolijtic huan Yejuatzin ne quipanquixtij ya yoltoc Cristo intzalan in ánimajme. Huan ica in chichualis de Yecticatzin Espíritu ten yetinemi namoyolijtic, Yejuatzin no quinyolitijtoc namonacayohuan ten quipia de ixpolis se tonal.

<sup>12</sup> Ica ya nojón, notasojcnihuan, amo aquen oc huelis technajnahuatijtinemis de que monequi ma xictacamatinemican ne soltic totalnamiquilis ten cualcui tajtacol. Ta, monequi ma tichipaucanentinemican. <sup>13</sup> Pero tacán namejuan nanquitacamatinemij ijcón queme namotalnamiquilis de tajtacol namechnextilijtoc, ijcuación namejuan nanixpolihuisque ya. Pero como namejuan ica in chichualis de Yecticatzin Espíritu nanquicuetahuiltijtiyohue ne namotalnamiquilis ten cualcui tajtacol, ijcuación namejuan nanyoltinemisque sen nachipa. <sup>14</sup> Huan xicmatican, nocnihuan, nochi neques ten motecahuilíaj que ma quinyecana in Yecticatzin Espíritu, yejuan nojonques melau iconehuan de Totajtzin Dios. <sup>15</sup> Huan namejuan nanquiselijque ya namoyolijtic in Yecticatzin Espíritu. Pero ne Yecticatzin Espíritu amo namechilpitjinemi huan amo no namechmacatinemi ten namoyolijtic se ejecat tenica nanyolmohuilisque Totajtzin Dios. Ta, ne Yecticatzin Espíritu namechmachililtijtinemi que nochi namejuan Dios namechchihuac que nanitacpaconehuan. Ica ya nojón ica in chichualis de Yecticatzin Espíritu ticnotztinemij Totajtzin Dios ijcuín: “Abba” —ten quijtosnequi Notasojtajtzin.

<sup>16</sup> Huan nijín Yecticatzin Espíritu techyolnojnnotztinemi tech totalnamiquilis huan techmachililtijtinemi que tejuan tiiconehuan de Dios. <sup>17</sup> Huan queme tejuan tiiconehuan de Dios, ijcuación tejuan no se tonal ticselisque se tetayocolil, ne ten Totajtzin Dios techteniluijca ya que ticselisque imaco Yejuatzin. Huan tejuan ihuan Cristo ticsenselitihue ne tetayocolil, como tejuan titaxicojtiyasque ica ne tajyohuilis ijcón queme Cristo quipanoco. Huan ijcón Dios techueyipanchihuas ijcón queme Yejuatzin quihueyipanchihuac ya Cristo.

<sup>18</sup> Huan nejua nicpoutinemi que amo teyi ohui nochi notajyohuilisuan de axcan niquiniyohuijtinemi. Huan ijcón nicchiutinemi porín nicueyipohua ne chicaucacualtziyo ten Totajtzin Dios techaxcatiliti se tonal. <sup>19</sup> Huan Dios quichijchihuac nochi in talticpac huan eluiyac, nochi ten mota huan ten yoltinemi. Huan yejuan nojonques nochi queme yesquía quichixcayetocque ica hueyi yoltanejnequilis de ne tonal cuac tejuan tiiconehuan de Dios ticselisque ya ne ichicaucacualtziyo de Dios. <sup>20</sup> Huan nochi ten mota huan ten yoltinemi ten Dios quichijchihuac, yejua nojón nencajtlic ya huan ijtaacahuic ya ica por ne tatelechihualis ten Dios quitalij. Huan nochi itachijchihuan amo monejnequilijque que ma oncato tatelechihualis. Ta, Dios quitalij ya ne tatelechihualis cuac motajtacolmacac in Adán iixpantzinco Yejuatzin.

Huan axcan ticyolicachixtocque que Dios quiyancuicachihuati nochi ten ongac. <sup>21</sup> Huan nochi ten Dios quichijchihuac, nochi yejua nencajtico san porín yetinemi tech in ijtaahuilis huan amo hueli mopalehuis. Pero se tonal Totajtzin Dios techyancuicataliqui nochi tejuan tiiconehuan, huan ijcón ticselisque ne ihueycualtziyo de Cristo. Ijcuacán nochi ten Dios quichijchihuac, nochi yejua Dios quiajchihuaqui de ne ijtaahuilis para ocsepa quipixtinemis ne iyancuicacualtziyo de Cristo. <sup>22</sup> Huan ticmatij que axcan nochi ten Dios itachijchiu, nochi yejuan tajyohuijtihiuitze ica hueyi toneucayot huan hasta toneucatzajtzí queme yesquía se sihuat cuac tayolititi. <sup>23</sup> Huan amo sayó tajyohuijtihiuitz ne ten Dios itachijchiu. Ta, no tejuan ticmachilijtihiuitze tajyohuilis masqui ipa ticpixinemij toyolijtic in Yecticatzin Espíritu queme yesquía se tayecancanemactil ten Dios techtayocolis. Huan melau ticyolmachilíaj ne yoltajyohuilis porín ticyolicachixtocque ne tonal cuac mohualuicas Cristo huan cuac Yejuatzin techtamiteaxcatilis inahuactzinco Totajtzin Dios que tiiconehuan. Huan no tech ne tonal Cristo techpatilis huan techyancuicatalis totacayo. <sup>24</sup> Huan cuac Dios techmaquixtij, ijcuacán Yejuatzin techilij que se tonal ticselisque yancuic tonacayo. Ica ya nojón tejuan ticyolicachixtiyohue ne ihualalis de Yejuatzin. Pero tacán tiqiztztocque ya ne tenica ticyolicachixtocque, ijcuacán amo teyi ticyolicachixtosquíaaj oc. Porín como tiqiztziyohue tensá, ijcuacán amo monequi oc ma ticchixtiyacan oc ma motamichihuaqui. <sup>25</sup> Pero tacán ticchixtocque tensá ten ayamo tiqiztztocque, ijcuacán monequi ma ticyolicachixtocan que ijcón se tonal tiqiztasque.

<sup>26</sup> Huan no in Yecticatzin Espíritu techpalehuijtinemi cuac amo ticpíaj yolchichahualis. Porín tejuan san amo ticmatij toni monequi tictajtanilisque Dios ijcón queme quinamiqui. Pero in Yecticatzin Espíritu, Yejuatzin tatatautijtoc iixpantzinco Dios ica por tejuan. Huan in Yecticatzin Espíritu motatatautijtoc toyolijtic huan monojnotza ihuan Dios ica ne neyolnejsihuilis ten tejuan amo ticajscamatij. <sup>27</sup> Huan Totajtzin Dios techyoltatemolía tejuan ten tiitaneltocacahuan huan no Dios cajsicamati neyolnejsihuilis tenica in Yecticatzin Espíritu monojnotztoc. Ica ya nojón in Yecticatzin Espíritu tatatautijtoc iixpantzinco Yejuatzin, ijcón queme qui-monequiltía Totajtzin Dios, ica por tejuan ten tipoutinemij ihuantzin.

**Nican tajtoa de que ica in chichahualis de  
Cristo tictamitanilijtiyohue nochi ten techtzajtzacuilía**

<sup>28</sup> Huan cuali ticmatij que Totajtzin Dios quichihualtijtoc que nochi ten topan huetzi tech tonemilipan ma mochiutinemi ica ten cuali para tejuan ten tictasojtatinemij Dios. Huan Dios ipa technotzac ya tejuan ma tipoutinemican ihuantzin, ijcón queme Yejuatzin quimonequiltij. <sup>29</sup> Huan Dios ipa techixmatic ya desde ne achtopa ya. Huan cuac ayamo tzinpehuac ya in talticpac, ijcuacán Dios ipa techijitac ya ma tipohuiquij ihuantzin huan no ma tiyolchipahuaqui huan ma titamatican ijcón queme Cristo quipixtinemij yolchiphahualis huan tamati. Huan ijcón ixnesic ya que Cristo Yejuatzin itayecancateconeu de Dios intzalan nochi itaneltoaicnihuan. <sup>30</sup> Huan nochi neques ten Dios quinijitac ya cuac ayamo tzinpehuac ya in talticpac, yejuan nojonques no Dios quinnotzac ma ihuan pohuitij. Huan nochi neques ten Dios quinnotzac ya ma ihuantzin pohuitij, yejuan nojonques Dios quinpohuac ya que yolchipauque huan amo quintajtacolcuiltis oc. Huan nochi neques ten Dios

quipohuac que yolchipauque ya, yejuan nojonques Dios no quinhueyipanchihuac ya para ma no quipixtinemican ichicaucacualtziyo de Dios.

<sup>31</sup> Huan como ticneltocaj nochi nijín tenica namechnojnotzac ya, ijcuación cuali ticmatij que Totajtzin Dios techyecpixinemi. Ica ya nojón amo aquen ongac ten huelis techixnamictinemis. <sup>32</sup> Huan Totajtzin Dios, Yejuatzin amo yoltzotzocat catca. Ta, Yejuatzin cualtitanic Niyojtzin Conetzin nican talticpac. Huan de ompa quitemactij ma momiquili por toixpatca para quixtahuas totajtacoluan. Huan queme Dios techtayocolij ya Iconetzin, ica ya nojón cachi oc Yejuatzin techtayocolijtiyás nochi ten techpolojtiyás. <sup>33</sup> Huan amo aquen huelis techpajpantis ica tensá tajtacol tejuan ten Totajtzin Dios techijitac ya ma tipoutinemican ihuantzín. Porín Totajtzin techpohuac ya que tiyolchipauque ya huan amo techajtacolcuiltis oc. <sup>34</sup> Huan amo no aquen huelis ica por totajtacoluan techtelchihuas. Porín sayó Yejuatzin in Cristo momiquilij por toixpatca para ijón quitamiixtahuac ya totajtacoluan. Huan no cachi oc amo huelis aquen techtelchihuas porín sayó ne Cristo panquisac ya yoltoc ya intzalan in ánimajme. Huan axcan ne Cristo yetica iyecmacopaca Itajtzin Dios campa ichicaucahuelilispán. Huan ompa Cristo quisentocac tatatautijtoc ica por tejuan. <sup>35</sup> ¿Aconi huelis techtzinquixtis itech ne itetasojtalistzin de Cristo? Pues, amo aquen. Huan amo huelis techtzinquixtis de Cristo in tajyohuilis nión no in ohuij-cayot. Huan cuac techtajyohuiltisque, ijcuación amo no huelis techtzinquixtisque itech ne itetasojtalistzin de Cristo. Huan nión no huelis techtzinquixtis de Cristo como techchihualtijtinemi que ma timayantinemican oso ma amo ticpiacan totilma ten monequi. Huan amo no huelis techtzinquixtisque itech ne itetasojtalistzin de Cristo cuac techmojmoutisque oso cuac quinequisque techmictisque ica machete. <sup>36</sup> Huan tech in Tajtoltzin de Dios acsá monojnotzoc ihuan Dios ijcuín: Tejuan titacuautamatij mohuantzinco. Ica ya nojón in tagayot quinequij techmictisque mosta mosta.

Huan no ne temictiani techpohuaj queme yesquía tiichcatzitzin ten ticaltíaj sayó para techmictisque.

<sup>37</sup> Huan masqui techtahuelitzinemisque huan quinequisque techmictisque, pero tejuan cachi oc tiqintanilijtiyohue neques ten techixnamictinemij ica ne chichualis de Cristo ten techtasojtatinemi. <sup>38-39</sup> Ica ya nojón nicyecajsicaneltoaca que itech nijín itetasojtalistzin de Dios amo aquen huelis techtzinquixtis, masqui timiquisque huan masqui tiyoltinemisque. Huan amo no in ángeles, nión in amocuali ejecame, nión in huejueyi tamatinime huelis techtecuilisque tech ne itetasojtalistzin de Dios. Huan amo no huelis techtzinquixtis de Dios ne tajyohuilis ten axcan ticpanotocque. Huan amo no huelis techtzinquixtis de Dios ne tajyohuilis ten topan huetziquiu mosta oso huipta. Huan amo no huelis techtzinquixtis tech in itetasojtalistzin de Dios ne tataman amocuali ejecame. Huan ne tayecanani ten hualpan-temosque den ajco, yejuan nojonques amo huelis techtzinquixtis de Dios huan nión no neques ten hualpanquisasque den tani. Huan amo ongac ocsé taman ten Dios itachijchiu ten huelis techtzinquixtis itech in tetasojtalistzin de Totajtzin Dios, porín tipoutinemij ihuan Totecotzin Cristo Jesús.

**Totajtzin Dios quinijitac ma ihuantzín poutinemican in pueblojuani de Israel**

**9**<sup>1-2</sup> Huan notasojcnihuan, namechyequilía ten melau porín nipoutinemi ihuan Cristo huan amo namehcajcayahua. Porín in Yecticatzin Espiritu quiyecan-

tinemi notamachtilis. Huan Yejuatzin no nechyecajsicamatiltía que hueyi melau tenica namechnojnotzati. Ica ya nojón axcan semi niqinyolcocolijtinemi huan ni-moyoltequipachojtinemi ica por nojudíosicnihuan ten amo taneltocani de Cristo. <sup>3</sup>Huan nejua hasta nicnequisquía ma Dios nechtelchihuasquía. Huan no para huelis niqinmaquixtis nojudíosicnihuan nicnequisquía que ma Cristo ma nechsecotalisquía de Yejuatzin. Huan nicnequisquía ma ijcón mochihuani como ijcón huelis niqinpalehuis notasojicnihuan, yejuan ne nojudíosicnihuan, porín nochi tejuan ipa ijcón tiyolicoj tijudíos ya. <sup>4</sup>Porín nochi tejuan tiiconehuan de ne huejcautat Jacob. Huan tohuejcautatuan Totajtzin Dios Yejuatzin quinselij nochi yejuan queme iconehuan. Huan Dios yetinemía nintzalan huan quinnextilijthualaya ihueycualtziyo. Huan Totajtzin Dios moyectencahuac ninuan para quinpalehuijtiyás. Huan Totajtzin Dios no quinmachtij ne tanahuatil de Moisés, huan no quinnextilij queniu yejuan monequi quimohuistilisque Yejuatzin tech nintiopan. Huan no Totajtzin Dios quintenilijca que quintiochiutiyás ica itatiochihualis de Abraham. <sup>5</sup>Huan nijín nojudíosicnihuan ten axcan nentinemij, yejuan nojonques teconeahuan de toachtopatatuan ten nemicoj ne queman ya. Huan Cristo yolico huan monacayotico intzalan nojudíosicnihuan. Huan Cristo, Yejuatzin Dios. Huan Yejuatzin quinyecantinemi nochi ten on-gac. Huan sayó Yejuatzin ma ticmohuistilijtiyacan sen nachipa huan sen nachipa. Amén.

<sup>6</sup>Huan masqui sequin pueblojyetoní de Israel amo yec tacuautamatque, pero ipa Dios quiyecajsicacahuac ya ne tenilil tenica moyectencauca ya de quinpalehuis ipueblojcahuan de Israel. Huan cachi oc nicnequi namechilis que nochin judíos ten yolicoj intzalan in pueblojuani Israel, amo yec melau que nochi yejuan poutinemij ihuan in pueblojuani ten Dios quintocaytía Israel. <sup>7</sup>Huan no namechilía que nojón judíos ten mopohuaj teconeahuan de tohuejcautat Abraham, amo yec melau que nochi yejuan Dios quinpoutinemi tepiluan de Abraham. Huan Totajtzin Dios monojnotzac ihuan Abraham huan quijtoca ijcuín: “Tejua Abraham, sayó iconehuan de moconeu Isaac, sayó yejuan niqinpoutinemis queme melau moconeahuan”.

<sup>8</sup>Huan nijín Tajtoltzin de Dios technextilía que amo aquen huelis mopohuas teconeu de Dios como sayó yolico queme judío oso queme teconeu de Abraham. Ta, Totajtzin Dios quinpohuas iajsicaconehuan sayó neques ten yolicoj ijcón queme Dios moyectencauca ya ihuan Abraham de quichihuas. <sup>9</sup>Huan nijín ijcón namechilijtoc porín Totajtzin Dios ijcón moyectencahuac ya ihuan Abraham de quichihuas ijcuín: “Tejua Abraham, nimitzilía que nican se xihuit nihualas huan ijcuacón mosihuau Sara quipías iconetzin”. <sup>10</sup>Huan amo sayó nijín ne tenilil ten Dios quichihuac. Ta, xiquelnamiquican que tohuejcautat Isaac, yejua quipíac se isihuau ten monotza Rebeca. Huan ne Rebeca quinpía ome iconehuan, yejuan nenetzme de sayó se tetat, huan nijín tetat yejua in Isaac. <sup>11-12</sup>Huan ne coneme nenetzme de Rebeca cuac ayamo yolicoj huan nión no quichihuayaj ten cuali oso ten amocuali chihualisme, ijcuacón Totajtzin Dios quinojnotzac Rebeca de ninconeahuan nenetzme ten yoliquihue ijcuín: “Motayecancaconeu, yejua ne quitequitilijtinemis ne ica ome moconeu de quitojtoca”. Huan ijcón mochihuac porín Totajtzin Dios ipa ijcón quinemilijca ya huan quimonequiltij que ijcón ma mochihuas. Ica ya nojón Dios quijitac ya ne ica ome conet de nenetzme. Huan Totajtzin Dios ayamo quinitilij de ne tachihualisuan de ne ome coneme, yejuan in Esaú huan Jacob. Ta, Dios sayó quinijitac ne ome coneme ijcón queme Yejuatzin quimonequiltij.

<sup>13</sup> Huan nochi nijín ten Dios quichihuac senyohui ihuan Itajcuilolamatzin campa Dios tajtoa de ne ome iconehuan de Rebeca ijcuín: “Nejuatzin cachi nictasojta in Jacob, huan ne Esaú amo nictasojta”. <sup>14</sup> Huan namechilía amo xicneltocacan ne tacajcayahuani ten quijtoaj ijcuín: “Totajtzin Dios amo yolcuali porín Yejuatzin quijitac se tagat huan amo quijitac ocsé”. Pero amo ijcón xicnemilican. <sup>15</sup> Porín Totajtzin Dios no quiluij Moisés ijcuín: “Nejuatzin nicyolicnelis ne tagat ten nejua nicnequis nicyolicnelis. Huan no nictasojtas ne tagat ten nejua nicnequis nictasojtas”.

<sup>16</sup> Nijín tajtol technextilía ijcuín: Amo huelis se tagat motechtis in teicnelilis de Dios sayó porín ne tagat quinequi quiselis oso porín quinequis moferezajuis de quiselis. Ta, nijín teicnelilis de Dios tejuan ticselisque sayó porín Totajtzin Dios quimonequiltía techyolicnelis. <sup>17</sup> Huan cuali xiquinelnamiquican que Totajtzin Dios quinojnotzac in rey Faraón de pueblojuani Egipto tech Itajcuilolamatzin ijcuín: “Tejua Faraón, nimitzhueyipanchihuac queme rey, para ijcón niquinnextilis in talticpacuani de Nejuatzin nohueyicualtziyo. Ica ya nojón tejua nimitztequitilij para ijcón ma nochi talticpacuani ma quitacan de Nejuatzin nochicaucahuelilis. Huan no nimitztequitilij queme rey para ijcón motetapohuis nochi senmanahuac den chicahualis de Notocaytzin”. <sup>18</sup> Huan nijín tajtol technextilía que Totajtzin Dios quiyolicnelía ne tagat ten Yejuatzin quimonequiltía quiyolicnelis. Huan no Totajtzin Dios quiyoltacuahualtía ne tagat ten Yejuatzin quinequi quiyoltacuahualtis, para ma amo quitacamatinemi Yejuatzin.

<sup>19</sup> Ijcuación ne tacajcayahuani nechtajtoltisque ijcuín: “Tacán Dios ijcón quichiu-tinemi, ijcuación ¿queyé Dios quitajtacolcuiltía ne tagat ten amo quitacamatinemi Yejuatzin? Porín amo aquen huelis quisecotalis ne ten Dios quimonequiltis quichihuas”. <sup>20</sup> Pero nejua niquinanquilía ne taca tacajcayahuani ijcuín: “¿Toni tichique, tejua, de que timotajtoltehuis ihuan Dios?” Namechnojnotzatij ica nexcuil ijcuín: ¿Xe in soquicomit huelis motajtoltehuis ihuan ne soquiconchique? Pues amo huelis. Huan amo no in soquicomit huelis quitajtolts ne soquiconchique ijcuín: “¿Queyé ijcón tinechchijchihuac?” <sup>21</sup> Pues namechilía que ne soquiconchique cuali huelis quichihuas tataman soquiconme ijcón queme yejua quinequis. Quema, hueyi melau que ne soquiconchique cuali huelis quinchijchihuas tataman soquiconme, se taman ten semí cualtzin tachijchiu huan tacualnextil huan ocsé taman ten amo semi cualtzin tachijchiu. Huan nochi nijín tataman soquicomit quichijchihuaj ica mismo soquit san. <sup>22</sup> Huan namechilía que no ijcón tequititinemi Yejuatzin intzalan in talticpacuani. Yejuatzin quinequía quitatzacuiltis in talticpacuani ten quicualantijca ya porín Yejuatzin quinequía quinnnextilis nichicaucahuelilis. Ica ya nojón Dios quinxicohuilijtiaya ca hueyi nejmach ne taca ten quinnamiquía quiselisque tatza-cuultis, neques ten Dios ipa quintalijca ya de que ixpolihuisque. <sup>23</sup> Huan no ijcón Totajtzin Dios quinequía quinnnextilijtinemis in talticpacuani de queniu hueyixtoc ichicaucacualtziyo. Ica ya nojón tejuan tiitaneltocacahuan de Dios techueyiyolicnelijtiyás nochi tejuan ten Yejuatzin ipa techijitac ya ne queman ya de que se tonal techaxcatilijtiu ihueyicualtziyo. <sup>24</sup> Porín tisenme de judíos techijitac Dios, huan no tisenme ten amo tijudíos techijitac Dios. Nochi tejuan Dios techijitac ma tipoutine-mican ihuantzin. <sup>25</sup> Huan nijín ijcón Dios techilij itencopaca ten ne huejcautanahu-atijque Oseas cuac yejua quijtoco ijcuín: Niquinnotzas huan niquinpohuas que nopueblojcahuan neques ten achtopa amo poutinemíaj nohuan queme nopueblojcahuan.



Huan niquintasojtas neques ten achtopa amo niquintasojtac ya.

<sup>26</sup> Namejuan de nochi senmanahuac amo namechpohuaya que nancatcaj nannopueblojcahuan.

Pero axcan namejuan de nochi senmanahuac namechtocaytía huan namechpohua que nanyesque nannoconeahuan de Nejuatzin, ni Dios ten niyoltica sen nachipa.

<sup>27</sup> Huan no ne huejcautanahuatijque Isaías chicaucatajtoaya itechcacopaca in pueblojuani de Israel huan quijtoaya ijcuín: “Ijcón queme ongac tel míac temomox ne atenteno de hueyíat, no ijcón oncasque huel míac tepiluan de tohuejcautat Israel. Pero no namechilía que sayó sequin de yejuan Dios quinmaquixtiti”. <sup>28</sup> Huan sayó sequin maquisasque porín Totecotzin quintamitatzacuiltis inpan in talticpacuani. Huan Yejuatzin quijsiucacihuati ne itatzacuilitis sayó ica yolchipahualis. <sup>29</sup> Huan ne huejcautanahuatijque Isaías no quijtoco ijcuín:

Totecotzin quinyecantinemí niángelme de ne eluiyactzinco, pero Yejuatzin techy-olicnelij huan amo quintamisenixpoloj nochi ipueblojcahuan de Israel.

Ica ya nojón amo timochiuque queme mochihuac cuac Dios quintamisenixpoloj ne pueblojuani de Sodoma huan cuac quintamichichinoj in pueblojuani de Gomorra.

### **Nican tajtoa de queniu Dios techpohua que tiyolchipauque cuac titacautamatij ihuan Dios**

<sup>30</sup> Ica ya nojón tamechilíaj ijcuín que ne taca ten amo judíos, yejuan nojonques amo moyoltatemoliayaj de queniu huelis Dios quinpohuas que yolchipauque. Pero ipa ijcón mochihuaco ya que Dios quinpohuac que yolchipauque porín yejuan tacuautamatque ihuan Cristo huan ijcón Dios quinpohuaco ya que yolchipauque huan amo quintajtacolcuiltis oc. <sup>31</sup> Pero hueyi melau que in pueblojuani de Israel moyoltatemoliayaj de queniu Dios amo quintajtacolcuiltis oc. Porín quinecque ma Yejuatzin ma quinpohua yolchipauque cuac yejuan quitacamatinenque in tanahuatil de Moisés. Pero Dios ipa amo quinpohuac yolchipauque ica por ne tanahuatil de Moisés ten yejuan quitacamatinemíaj. <sup>32</sup> Huan Dios quintajtacolcuiltij oc huan amo quinpohuac ipueblojcahuan de Israel yolchipauque porín yejuan amo moyoltatemoliayaj de queniu tacuautamatisque ihuan Cristo para ijcón Dios huelisquía quinpohuasquía yolchipauque. Ta, yejuan cachi oc moyoltatemoliayaj de queniu quitacamatisque in tanahuatil de Moisés para ijcón Dios quinpohuas yolchipauque para ma amo quintajtacolcuilti oc. Ica ya nojón in Cristo itanexutilis quinyolxocolij in pueblojuani de Israel queme se tet ten tetepotami san. Huan ijcón mochihuaco porín yejuan amo tacuautamatque ihuantzin Cristo. <sup>33</sup> Huan quijtoa tech in Tajcuilomatzin ijcuín:

Campa in pueblo de Sión, ompa nictalij ya Cristo. Huan Yejuatzin queme yesquía se tet tenica motepotamisque huan huetzisque nochi neques ten amo tacuautamatinemij ihuantzin.

Huan cuac se motepotamis itechcacopaca Cristo huan amo se tacuautamatis ihuantzin, ijcuacán yejua huetzti tech in ixpolihuilis.

Pero nochi neques ten tacuautamatisque ihuan Cristo, yejuan nojonques Dios amo queman quinpinaucataliquiui. Ta, Yejuatzin quincualnextiquiui ica icualtziyo.

**10** Notasojcnihuan, semi nic yolneje nequi que ma Dios quinmaquixtiti no-judíosicnihuan. Huan nimotatautilijtoc nachipa ica por nopueblojcahuan

de Israel. <sup>2</sup>Huan nejua cuali niqunitilijthuitz nopueblojcaicnihuan huan niquintejajtohuiltía nopueblojcaicnihuan de Israel que yejuan semi quinequij quitacamatinemisque san in tanahuatil de Dios para ijcón quiyolpactijtinemisque Totajtzin Dios. Pero yejuan amo cajsicamatque de queniu quiyolpactijtinemisque Dios. <sup>3</sup>Porín nopueblojcaicnihuan de Israel amo cajsicamatij queniu Dios quichihuas para quipohuas se tagat ma yolchipahua, huan tapojpohuil ya de itajtacoluan. Ta, yejuan melau mofuerzajuijtinemíaj san yejuan san para ijcón Dios quinpohuasquía que yejuan yolchipauque ya huan tapojpohuilde ya de nintajtacoluan. Huan yejuan amo motecahuilijque de que ma Dios quinpohua yolchipauque ijcón queme Yejuatzin quixejcoa que quinnamiqui. <sup>4</sup>Porín Totajtzin Dios quinmactilij ipueblojcahuan de Israel in tanahuatil de Moisés para que ijcón nochi yejuan ma tacuautamatini ihuan Cristo huan para ijcón Dios huelis quinpohuas que yejuan yolchipauque huan amo quintajtacolcuiltis oc. <sup>5</sup>Huan Moisés quijsuilojca tech itanahuatil de nochi neques ten Dios quinpohuas que yolchipauque huan tapojpohuilde ya de nintajtacoluan como yejuan cajsicatacamatisquía in tanahuatil de Moisés. Huan ne Moisés quijtojca ijcuín: “Nochi neques ten cajsicatacamatiasque nijín tanahuatil, yejuan nojonques no yoltinemi, porín yejuan cajsicatacamatinenque nijín tanahuatil”. <sup>6</sup>Pero in Tajtoltzin de Dios technojnotza de nochi neques ten tapojpoluilde ya de nintajtacoluan, neques ten Dios quinpohuas que yolchipauque sayó porín yejuan tacuautamatisque ihuan Cristo. Huan ne Tajtoltzin no quijtoa ijcuín: “Huan amo xicyolnemilijtinemican ijcuín: Monequi que acsá ma tejcotiu ne eluiyactzinco para cualpantemohuitiu in Cristo para ijcón titacuautamatisque ihuantzin. <sup>7</sup>Huan amo no xicyolnemilijtinemican ijcuín: Monequi acsá ma temotiu campa yetocque in ánimajme para cualpanquixtitiu Cristo intzalan in ánimajme”. <sup>8</sup>Huan amo no monequi ijcón xicyolnemilijtinemican. Porín namechyequilía que axcan yetoc in Tajtoltzin de Dios namotennacastampa huan no yetoc tech namoyolijtic. Huan nijín Tajtoltzin de Dios tenica tamechnojnotztocque, yejua nojón techmachtía de queniu se tacuautamatis ihuan Cristo. <sup>9</sup>Huan como namejuan nanquieyquijtoaj senteixteno que Jesucristo Yejuatzin namotecotzin, huan no como nantacuautamatij ica nochi namoyolojuan que Dios quipanquixtij voltoc Cristo Jesús intzalan in ánimajme, ijcuación Dios namechmaquixtis de namotajtacoluan. <sup>10</sup>Huan como nantacuautamatij ihuan Cristo ica nochi namoyolojuan, ijcuación Dios namechpohuas que nanyolchipauque huan amo namechtajtacolcuiltis oc. Huan no como nanquieyquijtoaj que Jesucristo Yejuatzin namotecotzin, ijcuación Dios namechmaquixtía ya de namotajtacoluan. <sup>11</sup>Huan in Tajcuilolamatzin de Dios technojnotza ijcuín: “Nochi neques ten tacuautamatisque ihuan Cristo, yejuan nojonques Dios amo queman quipinaucataliquiui”. <sup>12</sup>Huan Totajtzin Dios amo quinchichicotasoja in talticpacuani, masqui taca judíos oso masqui taca ten amo judíos. Porín Dios Yejuatzin in Totecotzin ten techyecantinemi nochi tejuan ten titaca judíos oso titaca ten amo tijudíos. Huan no Totajtzin Dios quinueyipixtolijtinemi teicnelilis inpan nochi neques ten motatatautilíaj ihuan Dios para ma quinpalehui. <sup>13</sup>Porín in Tajtoltzin de Dios techilía ijcuín: “Nochi neques ten tajtanisque tapalehuilis de Dios ica in chicahualis den tocaytzin de Cristo, yejuan nojonques Dios quinmaquixtis de nintajtacoluan”. <sup>14</sup>Pero no namechilía ijcuín: Amo aquen huelis quitajtanilisque Cristo ma quinpalehui como yejuan ayamo tacuautamatij ihuantzin. Huan amo aquen huelis tacuautamatisque ihuan Cristo, como yejuan ayamo queman quicactocque cox on-

gac Cristo Temaquixtijque. Huan no namechilía que amo aquen huelis caquisque de Cristo como amo aquen quinmatiltía de que cox ongac se Cristo Yejuatzin Temaquixtijcatzin. <sup>15</sup> Huan no namechilía que amo aquen huelis quinmatiltis in tagayot de Cristo como amo ocho Dios quitojtoca ne itanojnotzahuan. Porín in Tajtoltzin de Dios technojtoca ijuín: “Semi cualtzin cuac ejcotihuitz ya ne tanojnotzani ten quitetapohuijthuitz in Tajtoltzin de Dios ten cualcui ne yolsehuilis. Huan no semi cuali cuac ne tanojnotzani quitematiltijtinemij in cuali Tajtoltzin de Dios ten cualcui ne nemaquixtilis”.

<sup>16</sup> Pero amo nochi in talticpacuani quinequij quitacamatisque in Tajtoltzin de Dios ten cualcui ne nemaquixtilis. Porín ne huejcautanahuatijque Isafas quijtoco ijuín: “Notecotzin, amo aquen quineyic quineltocas totanojnotzalis”. <sup>17</sup> Ica ya nojón namechilía que monequi ma se quiyecaquili in tanojnotzalis de Cristo para ijcón huelis ya se tacuautamatis ihuan Yejuatzin. Huan tejuan tamechnextilijthuitze ya ica nijín tanojnotzalis de Cristo para ijcón huelis nantacuautamatisque ihuan Cristo Jesús. <sup>18</sup> Pero namechtajtoltía ijuín: ¿Xe melau que in pueblojuani de Israel amo quicacque ya nijín tanojnotzalis de Cristo? Pues amo melau. Porín yejuan cuali quicacque ya, ijcón queme in Tajcuilolamatzin de Dios quijtoco ijuín: Porín nochi senmanahuac in tanojnotzani quitetapohuijque ya de Cristo. Huan cachi oc tech nochi in talticpac in tequitini quinmatiltijque ya in tacaquini de Cristo.

<sup>19</sup> Pero ocsepa namechtajtoltía ijuín: ¿Xe melau que ne pueblojuani de Israel amo quiyecajsicamatque nijín tanojnotzalis de Cristo? Pues amo melau. Porín yejuan momatiltijque ijcón queme cajsicamatinemij ne ocsequin tagayot ten amo judíos. Huan ne achtopa ya in Moisés quijtojca ya ijuín:

Namejuan nanopueblojuani de Israel, Nejuatzin namechchihualtis que namejuan ximoyolnejxicoltalican porín nimoinaxcatiliti ocsé taman pueblojuani ten ne achtopa ya amo poutinemíaj nohuan.

Huan no Nejuatzin namechchihualtis que namejuan xicalancacalaquican porín nimoinaxcatiliti ocsequin pueblojuani ten namejuan nanquinpouthuitz que amo teyi inpatiu.

<sup>20</sup> Huan ne huejcautanahuatijque Isafas moixehui de quinilis ipueblojcahuan de Israel ijcón queme Yejuatzin quijtoca ijuín:

Neques ten amo nechtemoayaj para nechixmatisque, yejuan nojonques, quema, nechajsicaixmatque ya.

Huan no nimotenextij ihuan neques ten amo matajtantinemíaj de can niyetica.

<sup>21</sup> Huan no in Isafas moixehui de quinnojtocas in ipueblojcahuan de Israel ica itajtoltuan de Dios ijuín: “Nejuatzin mosta mosta niquinnojtocatinenque nijín nopueblojcahuan de Israel ma nechtacamatinemican, pero yejuan amo nechtacamatque. Ta, yejuan sayó nechixnamicque san”.

### Nican tajtoa de queniu Dios quinmaquixtis se pantime de nochi ipueblojcahuan de Israel

**11** Ocsepa namechtajtoltía ijuín: ¿Xe melau que Totajtzin Dios quinsecocahuac ya ipueblojcahuan de Israel? Pues, amo ijcón xicnemilican. Porín xicmat-ican que nejua ni Pablo no nipueblojcat de Israel. Huan nejua niteconeu de ne tohuejcautat Abraham. Huan no nipoutinemi ihuan ne ichancahuan de tohuejcau-

tat Benjamín. <sup>2</sup>Huan xicmatican que Totajtzin Dios desde ne queman ya quinpohuac in ipueblojuani de Israel queme ipueblojcahuan. Huan axcan Yejuatzin amo quinsecocahua ya. Huan namejuan cuali nanquimatij in Tajcuilolamatzin de Dios campa tajtoa de ne huejcautanahuatijque Elías. Huan ne Elías cuac motatautili-aya ihuan Dios, ijcuacán yejua quinteluliaya in ipueblojcaicnihuan de Israel huan quijtoj ijcuín: <sup>3</sup>“Notecotzin, ne pueblojuani de Israel quintamimictijque ya nochi motanahuatijcahuan huan no quintamihuejueloque ya ne altarme campa mitzonmohuistiliayaj. Huan sayó nejuatzin nimocahua niyoltinemi oc de nochi motanahuatijcahuan, pero yejuan no quinequij nechmictisque”. <sup>4</sup>Pero Totajtzin Dios quinancuiliq in Elías ijcuín: “Nejuatzin nimoinpixtolijtinemi oc chicome mil tagat taneltocani ten ayamo quinmictijque. Huan nojón chicome mil tagayot amo motancaqueztatoj para quimohuistilisque ne tatadios ten quitocaytíaj Baal. Ta, yejuan nechmohuistilijtinemij oc”. <sup>5</sup>Huan no ijcón tech nijín tonalme Totajtzin Dios moinpixtolijtinemi oc se pantime den ipueblojcahuan de Israel ten melau quimohuistilijtinemij Yejuatzin, ijcón queme Yejuatzin quinyolicnelij huan quinijitac ma poutinemican ihuantzin. <sup>6</sup>Huan ne itaneltocacahuan Dios quinijitac sayó porín Yejuatzin quinyolicnelij. Huan Yejuatzin amo quinijitac porín yejuan quichiuque tensá chihualis ten cuali. Porín tajcón Dios quinijitasquía ne itaneltocacahuan porín yejuan quichiuque tensá chihualis ten cuali, ijcuacán quijtosnequi que Dios quinpalehuis ne taneltocani pero amo porín quinyolicnelía. Ta, Dios quinpalehuis porín yejuan quichiuque tensá cuali tequit tenica quinnamiqui ma quiselican iteicnelilis de Dios.

<sup>7</sup>Huan, ¿toni mochihuac? Pues mochihuac que sequin pueblojuani de Israel amo cajsicque queniu yesque yolchipauque, ijcón queme yejuan quitemojtinemíaj. Huan in ocsequin ipueblojcaicnihuan ten Dios quinijitac ya ma poutinemican ihuantzin, yejuan nojonques melau cajsicque ya de queniu Dios quinpohuas yolchipauque para amo quintajtacolcuiltis oc. Huan ne ocsequin ten amo yolchipauque, yejuan nojonques Dios cachi oc quinyoltacuahuatij ya que ma amo huelis cajsicatican ne teicnelilis de Dios. <sup>8</sup>Ica ya nojón in Tajcuilolamatzin de Dios quijtoa ijcuín: Dios quintapololtilij ya nintamachilis de ne taca amo yolcualime.

Huan no Dios quinixpojyocuiltij ya para ma amo tachixtinemican. Huan no Dios quinchihuac que ma amo tacaquican, para ijcón amo huelis moajsicamatiltisque ne iteicnelilis de Dios.

Huan hasta axcan ne pueblojuani de Israel amo huelis cajsicamatisque in Tajtoltzin de Dios.

<sup>9</sup>Huan no ne huejcau rey David quijtoa tech in Tajtoltzin de Dios ijcuín: Huan ne pueblojuani de Israel nochi niniluihuan tenica moyolpactijtinemij, nochi yejuan nencajtij san, porín Dios quinixmatilía que yejuan taluichiutinemij ica tacajcayahualis san.

Ica ya nojón Dios quinetziltía ya ne tacajcayahuan huan quinqitzqui huan quintatzacuiltijtoc ica por ninamocualitachihualisuan.

<sup>10</sup>Huan no David quijtoa ijcuín:

No ma Dios quinixpojyocuilti ne ipueblojcahuan de Israel para amo huelis cajsicamatisque in teicnelilis de Dios.

Huan no ma yejuan tajyohuijtinemican sen nachipa, ijcón queme yesquía se acsá tomotzquisa cuac tamamajtiu.

**Nican tajtoa de queniu Dios quinmaquixtis in  
taca ten amo poutinemij queme judíos**

<sup>11</sup> Huan namechilía que amo xicnemilijtinemican oc que Totajtzin Dios quin-tapololtilij ya nintamachilis de ipueblojcahuan de Israel para ma yejuan huet-zinij sepa san tech ne hueyi ixpolihuilis. Pero namechilía que amo ijcón xicne-milican. Porín cuac in pueblojuani Israel motajtacolmacacque huan quimajpeuque ya Cristo Temaquixtijque, ijcuacón in tagayot ten amo judíos yejuan nojonques quiselijque ne nemaquixtilis de Cristo. Huan ijcón Totajtzin Dios quichiutica para ma ipueblojcahuan Israel ma quiyolnejnequican tacuautamatisque de Cristo cuac yejuan quitasque de iteicnelilis de Dios ipan neques ten amo judíos. <sup>12</sup> Huan queme in tagayot judíos quixnamicque ya Cristo Temaquixtijque, ica ya nojón nochi in talticpacuani quiselijque ya ne hueyi tatiochihualis de Dios. Huan no queme in tagayot judíos quipololjque in tacuautamatilis ihuan Cristo, ica ya nojón nochi in taca ten amo poutinemij queme judíos, yejuan nojonques no Dios quinaxcatilij ya nojón iteicnelilis. Tiquitztocque que Dios quinueyitiochihuac in talticpacuani porín in judíos quixnamicque ya Cristo. Huan cachi oc Dios quinueyitiochihuas in taltic-pacyetoni tech ne tonal cuac in judíos ocsepa tacuautamatisque ihuan Cristo.

<sup>13</sup> Huan yequintzin namechnojnotztoc namejuan ten amo nanmopohuaj queme judíos. Porín Totajtzin Dios nechualtitanic ma nitanojnotztinemi namotzalan name-juan ten amo nanjudíos. Huan cuali nanquimatij que nejuatzin nicueyipohua nijín notequiu ten Yejuatzin nechmactilij. <sup>14</sup> Huan nejua queme nicueyipohua namotza-lan notequiu ica in Tajtoltzin de Dios, ica ya nojón niquinchihualtis nopueblojcaic-nihuan ma yejuan ma semi quiyolnejnectinemican de moyolnemilisque de ninta-jtacoluan. Huan ijcón Dios huelis quinmaquixtis sequin de nopueblojcaicnihuan. <sup>15</sup> Huan queme nopueblojcahuan judíos quimajpeuque ya ne tacuautamatilis ihuan Cristo, ica ya nojón axcan Dios quinueyiyolicnelijtinemi nochi in talticpacuani huan quinmacatinemi yolsehuilis huan amo cualantinemi oc ninuan. Huan tech ne tonal cuac Dios quinselis ya nopueblojcahuan judíos, ijcuacón, ¿toni oc mochihuas? Pues, namechilía que mochihuati que Dios quinmactiliti ne nemilis nachipa neques judíos ten yolmictinemij axcan tech in tajtacol. <sup>16</sup> Huan axcan namechnojnotza ica sequin nexcuitil: Tacán se quitemaca huan quimohuistilía Dios ica ne tixti tenica quichijchi-huaj in achtopaca pan, ijcuacón quijtosnequi que nochi ne pantixti chipahuac ya. Huan no tacán in naluayot de se cuohuit Dios quipohuac chipahuactzin ya iixpantz-inco Dios, ijcuacón nochi ne imatzacaluan nochi chipahuac ya iixpantzinco Dios. Huan ne tohuejcautat Abraham yejua queme yesquía ne achtopaca pan huan nochi iconehuan queme yesquía nochi in pantixti. Huan ijcón queme Abraham pohuic ihuan Dios, no ijcón nochi iconehuan poutinemisque ihuan Dios. Huan tohuejcau-tat Abraham queme yesquía se hueyi naluayot. Huan iconehuan queme yesquía j ne matzacalme. Huan ijcón queme Abraham pohuic ihuan Dios, no ijcón iconehuan majsitinemij ihuan Dios.

<sup>17</sup> Huan ne pueblojuani judíos queme yesquía imatzacaluan de se olivos cuohuit. Huan Dios quinsecocahuac sequin de ne judíos porín yejuan amo tacuautamatque ihuan Cristo ijcón queme se quicotona se matzagal. Huan namejuan que amo nan-judíos Dios namechixpatcayotij ihuan nojón judíos ijcón queme se quinjertaroa se yancuic matzagal. Ica ya nojón namejuan nanmochihuacoj queme se tatzmol de ne

naluat. Huan ijcón nanquiselijtiyasque in chichualis de ne naluat ten nanquinixpatcayotijque ya ne judíos. <sup>18</sup> Ica ya nojón namejuan ten amo nanjudíos, amo xicyolnemilijtinemican que namejuan cachi hueyi nanchihuanime huan que ne judíos. Porín xiquelnamican que namejuan queme yesquía se matzactal. Huan namejuan amo nanquichichualismacaj in naluat. Ta, yejua in naluat namechchichualismacatinemi. <sup>19</sup> Huan achá nanquijtoaj que nochi ne judíos Dios quincocotonac queme yesquía matzactalme ten amo teyi cualtía, para ma ijcón Dios namechmajxitij tech ne cuouten inixpatca ne ocsequin. Huan ijcón namejuan nanquiselijtiyasque ne chichualis ten hualeutoc tech in naluat. <sup>20</sup> Pero cuali xiquelnamiquican que Dios quincocotonac ya huan quinsecotalij ne judíos ten amo taneltocani, queme yesquía matzactalme ten amo teyi cualtía, porín yejuan amo tacuautamatque ihuan Dios. Huan no xiquelnamiquican axcan namejuan que Dios namechmajxitij ya queme yesquía se matzactal ten cualtías, sayó porín nantacuautamatij ihuan Cristo. Ica ya nojón amo ximohueyimatinecan. Ta, sayó xicmohuistilijtinemican Totajtzin ica yolyemanalis. <sup>21</sup> Huan xiquelnamiquican que Dios amo quintapojpoluij ne judíos ten quixnamicque Cristo, masqui yejuan queme yesquía matzactalme ten mohualiscaltijque tech ne cuali naluat. Huan no ijcón Dios amo namechtapojpoluis como namejuan no nanquixnamiquisque Cristo. <sup>22</sup> Xiquitacan queniu Totajtzin Dios teyolicnelía huan no queniu Yejuatzin tetatzacuiltía. Hueyi melau que Dios quintatzacuiltij ya neques ten huetzque tech in tajtacol. Huan no hueyi melau que Dios namechueyiyolicnelij ya. Pero namejuan no monequi xicsentocacan xitacuautamatiyacan ihuan Cristo. Porín tacán amo nantacuautamatiyasque, ijcuacón Dios namechsecotalis huan namechmaximas queme se cuoumatzactal ten amo teyi cualtía. <sup>23</sup> Huan no queme in pueblojuani judíos ocsepa tacuautamatisque ihuan Cristo, ijcuacón Dios quinpohuas iaxcahuan huan quinmajxitis tech ne hueyi cuoutactzon naluat queme matzactalme ten cualtiasque oc. Porín Totajtzin Dios cachi hueyi chichualis quipixtinemi para quinmajxitis ocsepa tech ne cuoutactzon naluat campa ipa tatzmolojtoyaj. <sup>24</sup> Huan axcan, tejua tagat, ten amo tijudío, amo tipoutihuitz ihuan ipueblojcahuan de Dios. Pero axcan Yejuatzin mitztepohualtij ya inuan ipueblojcahuan porín titacuautamati ihuantzin. Huan ne ipueblojcahuan de Dios ten taixnamiquini de Dios, yejuan nojonques cachi oc Dios quinpohuas ocsepa ipueblojcahuan como ocsepa yejuan pehuaj tacuautamatisque ihuantzin.

**Nican tajtoa de ne tonal cuac Dios  
quintamimaquixtiquiu in pueblojuani de Israel**

<sup>25</sup> Huan namejuan, nannotasojicnihuan, nicnequi amo ximohueyimatinecan ica por namotamachilis san. Porín monequi namechajsicamatiltis de ne ichtacata-machilis ten motaatijtihualaya ten namejuan amo queman nanquimatihualayaj. Huan ne ichtacatamachilis yejua nijín: Sequin de ne pueblojuani de Israel, yejuan nojonques amo quisentocaj moyoltacuahualtijtosque sen nachipa. Ta, hualas se tonal cuac yejuan tacuautamatisque de Cristo. Huan nochi nijín mochihuas cuac tacuautamatisque ya nochi ne taca ten amo judíos, nochi neques ten Dios quinequi quinmaquixtis. <sup>26</sup> Ijcuacón Dios quintamimaquixtis itaneltocacahuan, ne de yec melau ipueblojcahuan de Israel ijcón queme in Tajcuilolamatzin quijtoa ijcuín: Tech ne pueblo de Sión hualehuas se Temaquixtijque

ten quinajchihuiliqui nintajtacoluan de nochi in pueblojcahuan judíos ten iconahuan de Jacob.

<sup>27</sup> Huan no Dios quijtoa ijcuín:

Cuac niquintamitapojpoluilis ya nochi nintajtacoluan, ijcuación motamichihuas notenilil tenica nimoyectencauca que nicchihuas.

<sup>28</sup> Huan axcan Dios quinpoutinemi ne pueblojuani judíos queme itahuelitzcahuan de Dios, porín yejuan quimajpeuque ne tamachtilis de Cristo ten cualcui ne namaquixtilis. Huan ijcón Totajtzin Dios quichiutica para que namejuan ten amo nanjudíos axcan cuali huelis nantacautamatisque ihuan Cristo. Pero ne pueblojuani judíos, yejuan nojonques Dios quiniitacca ya ne queman ya. Huan Yejuatzin quintasojtatinemi. Huan axcan ninuejcautatuan yejuan quiselijque iteicnelilis de Dios. <sup>29</sup> Huan Totajtzin Dios amo tamachilis quequeptoc san. Porín ne tatiochihualis ten Yejuatzin quimactilijca ya in Abraham, yejua ne Yejuatzin amo queman quiajchihuilis oc. Huan no nochi neques ten Dios quiniitac ya que ma poutinemican ihuantzin, yejuan nojonques Dios amo no quiseccotalis oc.

<sup>30</sup> Huan namejuan ten amo nanjudíos, ne achtopa ya amo nanquitacamatinemíaj Totajtzin Dios. Pero axcan Yejuatzin namechyolicnelijtinemij para xitacuautamatinemican ihuantzin. Huan nochi nijín mochihuac porín in pueblojcahuan judíos amo quitacamatinemij Dios. <sup>31</sup> Huan axcan ne pueblojuani judíos, yejuan nojonques Dios quinpoutinemij que yejuan amo taticamatini de Yejuatzin, para ma ijcón Dios namechtayocolijtiyás ihueyiteicnelilis namejuan de amo nanjudíos. Huan no ijcón mochihuaquiu intzalan in judíos que se tonal Dios quintayocolis se hueyi teyolicnelilis ijcón queme quichiutinemi namopan axcan. <sup>32</sup> Porín Totajtzin Dios quinsencahuac nochi in talticpacuani que ma amo quitacamatinemican Yejuatzin para que ocsepa satepan huelis quinyolicnelijtiyás huan quinmaquixtis de nintajtacoluan.

<sup>33</sup> Semi hueyi iteicnelilis de Dios, huan Yejuatzin nochi cajsicamati huan nochi momatiltijtinemi. Huan hueyi melau que amo queman huelis ticajsicamatilijtihue itamachilis de Dios. Huan nión no queman huelis tiquinmejmelaहुलisque ocsequin de queni Dios quichiutinemis tech niojuan. <sup>34</sup> Huan in Tajtoltzin de Dios quijtoa ijcuín:

Huan amo aquen huelis cajsicamatilijtihue in tamachilis de Totecotzin.

Huan amo aquen se tagat huelis quimachtiti Totajtzin Dios.

<sup>35</sup> Huan amo aquen se tagat huelis quitayocolis Dios tensá nemactil para ijcón Dios monequi cachi oc quixtahuilis ne tagat ica mías tensá.

<sup>36</sup> Totajtzin Dios Yejuatzin techtayocolijtiu nochi ten ongac. Huan nochi ten ongac Dios itachijchiu. Huan Dios quichijchihuac nochi para ica ticueyipanchiutiyasque Dios. Ica ya nojón ma ticmohuistilijtiyacan Totajtzin Dios sen nachipa huan sen nachipa. Ma ijcón mochiutiu. Amén.

### Nican tajtoa de ne chipaucanemilis iixpantzinco Dios den itaneltocacahuan

**12** Huan axcan namejuan, notasojcnihuan, nanquiselijque ya ne hueyi teyolicnelilis de Dios. Ica ya nojón namechontatautía ximotemactilijtiyacan ihuan Dios huan ximoteaxcatilijtiyacan ihuan Dios ijcón queme nanitetayocoliluan de Dios para ijcón xicmohuistilijtiyacan Dios. Huan no xichipaucanemican huan xicyolpactijtinemican Dios. Huan nochi nijín taman chipaucanemilis, yejua nojón monequis xicchiutiyacan para ijcón nanquimoahuistilijtiyohue Dios. <sup>2</sup> Huan amo xinentinemican

ijcón queme in talticpacuani namechnajnahuatía. Ta, ximotecahuilican ihuan Dios para ma Yejuatzin namechtamachilispatatiu para ijcón namechyancuicatilijtiyás ica yancuic tamachilis. Ijcuacón namejuan nanquiyecajsicamatitihue ya ne tequit ten Dios quimonequiltía xicchiutiyacan. Huan nancajsicamatisque ten cuali; huan no nancajsicamatisque de queniu nanquiyolpactijtiyasque Dios; huan no nancajsicamatisque de queniu nanquiyecajsicachihuasque ne tequit ten Dios quimonequiltía xicchiuacan.

<sup>3</sup> Huan queme Notajtzin Dios nechyolicnelij para ma namechnajnahuatí de queniu nannemisque, ica ya nojón namechilía que ma amo aquen quinemili que yejua cachi huelilis quipixtinemi huan que ne huelilis ten Dios quimactilij ya. Ta, namechilía que cada tocníu taneltocque ma cajsicamati toni huelilis Dios quitayocolij ya. Huan ijcón cada tocníu cuali huelilis moixmatilijtiyás, huan ijcón cuali cuatamatcanemis. Porín Totajtzin quinxejxelo huilij ya sejsé itaneltocacau itacautamatilis ijcón queme Yejuatzin quimonequiltij para ijcón cada se tocníu quitatequiutijti ihuelilis ten Yejuatzin quinmactilij. <sup>4</sup> Huan cuali nanquimatij que se inacayo quipía míac tataman omime huan nochi nojón omitzitzin amo tequititinemij sansé san. <sup>5</sup> Huan no ijcón mochiutoc topan tejuan titaneltocani de Cristo. Masqui tejuan semi timiacque, pero timochihuacoj sansé porín nochi tejuan tisenpoutinemij ihuan Cristo huan no tisenpoutinemij se huan ocsé.

<sup>6</sup> Huan Totajtzin Dios techyolicnelijtinemi huan techmajmactilijtinemi tataman ihuelilisuan, ijcón queme Yejuatzin quimonequiltía techxejxelo huilijtiyás cada senme de tejuan. Ica ya nojón monequi ticyectatequiutijtinemican nijín huelilisme. Huan queme Dios techmactilij ya ne huelilis de ticselisque tanahuatil imaco Yejuatzin, ijcuacón ma tictatequiutijtiyacan ne huelilis ijcón queme ajsitiyás toacuautamatilis. <sup>7</sup> Huan queme Dios techmactilij ya ne huelilis para titapalehuijtinemisque, ijcuacón ma tiquinpalehuijtiyacan in tagayot ica míac tataman tapalehuilis. Huan queme Dios techmactilij ya ne huelilis de titamachtijtinemisque ica in Tajtoltzin de Dios, ijcuacón ma titamachtijtinemican ica nochi tochichualis. <sup>8</sup> Huan queme Dios techmactilij ya ne huelilis de titeyolmajxitijtiyasque, ijcuacón ma tiquinyolmajxitijtinemican in tocnihuan taneltocani ca nejmach. Huan queme Dios techmactilij ya ne huelilis de tiquntayocolijtinemisque acsame ten amo teyi quipáj, ijcuacón ma tiquntayocolijtinemican ica míac tataman de tetayocolilme huan ma amo ticchiuacan ica ne tzotzocayot. Huan queme Dios techtayocolij ya ne huelilis de titayecantinemisque, ijcuacón ma tiquinyecantinemican in tocnihuan taneltocani ica ne yolchichualis. Huan queme Dios techtayocolij ya ne huelilis de titeyolicnelisque, ijcuacón ma tiquinyolicnelijtinemican in pueblojuani ica hueyi yolpaquilis.

### **Nican Pablo technextilía de queniu monequi tichipaucanentinemisque**

<sup>9</sup> Huan ma timosenpantasojtatinemican se huan ocsé, pero ma amo ica ne taixcajyahualis. Huan xictahuelitztiyacan nochi tataman chihualisme den amocuali. Huan xicsentocacan xicchiutinemican ne chihualisme ten cuali. <sup>10</sup> Huan monequi ma ximotasojtatiyacan se huan ocsé ica hueyi yoltetasojtalis de totasojcnihuan. Huan no ximofuerzajuican de ximomohuiscapoutinemican se huan ocsé ica hueyi chipaucamohuisyot. <sup>11</sup> Huan ma ximofuerzajuican de nantequitisque ijcón queme Dios namehmactilij namotequiu cada senme de namejuan. Huan ma amo nantatz-



ihuini san. Huan ica hueyi yoltanejnequilis ma ximotatequiutijtiyacan para Totecotzin ica ichichualis den Yecticatzin Espíritu.<sup>12</sup> Huan ma ximoyolpactijtiyacan porín nanquiyolicachixtiyohue de ne nemaquixtilis ten yec majsitoc imaco Cristo. Huan ma xicyolicaxicojtiyacan nochi tataman tajyohuilis. Huan nochi namejuan ma xicsentocacan de nanmotatatautilisque ihuan Dios.<sup>13</sup> Huan ma xiquinpalehuijtiyacan in tocnihuan taneltocani ijcón queme monectiu tech ninnemilis. Huan no ma xiquinseljtiyacan ica teyolicnelilis nochi neques ten namechcalpanoquihue.<sup>14</sup> Huan ma xictajtanilican Dios ma Yejuatzin quintiochihua neques ten techtahuelitztinemij. Huan ma ximotatautilican ihuan Dios que ma Yejuatzin quintapojpolui neques ten namechtajyohuiltijtinemij. Huan ma amo no xiquinuijuicaltican.<sup>15</sup> Huan ma ximopactijtiyacan ihuan neques ten moyolpactijtinemij. Huan ma ximochoctijtiyacan ihuan neques ten moyolcocoaj huan chocaj porín quimachiláj ohuijcyot.<sup>16</sup> Huan no ma xisepanyoltanemilijtiyacan se huan ocsé ica yolyemanalis. Huan ma amo aquen nansenme ma ximohueyimatinemican. Huan ma amo ximosecchahuacan de neques ten amo teyi chihuanime. Ta, ma xisepannentinemican ihuan ne pobres. Huan ma amo ximopohuacan que semi nanquihueyimatij ya.<sup>17</sup> Huan queme acsame namechchihuiláj tensá ten amo cuali, ijcuacón namejuan amo no ijcón xiquinixnamiquican. Huan no sayó xicchiutinemican sayó ne ten in talticpacuani quipohuaj ten cuali chihualis.<sup>18</sup> Ximofuerzajuijtiyacan se huan ocsé hasta campa nanuelisque de nannentinemisque ica yolsehuilis huan ica yolyemanalis ihuan nochi talticpacuani.<sup>19</sup> Notasojcnihuan, namejuan ma amo ximomacuepacan ica in amocuali chihualis de neques ten namechtajyohuiltíaj. Ta, sayó xicahuilican Totajtzin Dios que ma Yejuatzin quintatzacuiltis. Porín in Tajtoltzin de Dios ixnesi ijcuín: “Huan Totecotzin quijtoa ijcuín: Nejuatzin nechnamiqui niquintatzacuiltis in talticpacuani huan niquinixtahualtis de nintajtacoluan”.<sup>20</sup> Ica ya nojón namechilá ijcuín: “Tacán mayana ne naquen mitztahuelitztinemi, ijcuacón tejua xictamaca. Huan no tacán amiqui ne naquen mitztahuelitztinemi, ijcuacón tejua xicatilti. Huan cuac ijcón ticchihuas ya nochi nijín, ijcuacón ne tagat mohueyipinaucamati ten mitztahuelitztinemi”.<sup>21</sup> Huan ma amo ximotecahuili ma mitzxijxico in amocuali Satanás. Ta, neques ten mitztahuelitztinemij, yejuan nojónques xiquinpalehui. Huan ijcón cuali huelis ticxijxicojtiyás ne amocuali Satanás.

**13** Huan nochi namejuan monequi xiquintacamatiyacan nochi nojón tequihuani ten quintalá in gobierno. Porín ma ticmatican que amo se tequihua ongac que ma amo Dios itencopaca tequititoc. Huan nochi tataman tequihuani Dios ijcón quintalij ya.<sup>2</sup> Ica ya nojón namechilá que naquen quinixnamiquis nojonques tequihuani, yejua ne no quixnamictinemi in tanahuatil ten Dios quitallij. Huan nochi neques ten quinixnamictinemij in tequihuani, yejuan nojónques motajtacolmacaj iixpantzinco Yejuatzin huan ijcón Dios quintatzacuiltis.<sup>3</sup> Porín ne tequihuani amo tequititinemij para quinmoucacuiltisque neques ten quichiutinemij ten cuali. Ta, ne tequihuani quinmoucacuiltisque neques ten quichiutinemij ten amocuali tachihualisme. Huan como ticnequi que in tequihuani ma amo mitzmoucacuiltican, ijcuacón tejua monequi xicchiutinemi sayó ten cuali huan ijcón mitzmohuiscapohuasque ne tequihuani.<sup>4</sup> Porín xicmatican que ne tequihuani, yejuan nojonques tequititinemij itencopaca Dios. Huan como tejua ticchiutinemi ten amo cuali tachihualisme, ijcuacón tiquinmohuilis ne tequihuani. Porín amo nencajti san ne tequihuani de nintequi. Ta, yejuan quipíaj tanahuatil de mitztatzacuiltisque. Huan

ne tequihuani tequititinemij sayó itencopaca Dios para ijcón quintatzacuiltisque neques ten quinnamiqui ma quiselican tatzacuiltis porín yejuan quichiutinemij ten amocuali. <sup>5</sup>Ica ya nojón namechilfa semi monequis xiquintacamatican ne tequihuani. Huan ijcón xiquintacamatinemican ne tequihuani porín totalnamiquilis technoynotza que cuali ma ijcón ticchiutinemican. Huan como nanquintacamatinemi ne tequihuani ica nochi namoyolo, pero amo ica tacajcayahualis, ijcuacón amo nanquimohuilfaj que ne tequihuani namechtatzacuiltisque itechcacopaca Dios. <sup>6</sup>Huan no monequis xitaxtauiyacan nochi tataman rentas porín ne tequihuani tequititinemij ica itencopaca Dios huan motequitiltitinemij sayó ica nojón tequitit ten Yejuatzin quinmactilij. <sup>7</sup>Ica ya nojón ximoxtahuacan nochi namejuan ten nantahuicatinemij ica yesqui tahuicalis. Huan no ximoxtauiyacan nochi tataman rentas huan nochi tataman puestos ten in tequihuani namechtopaluíaj. Huan no xicmohuiscapohuacan neques ten quinnamiqui ma se quinmohuiscah. Huan no xicmohuiscaitacan nochi neques ten quinnamiqui ma se quinmohuiscaita. <sup>8</sup>Huan amo xitahuicatinemican ihuan acsame. Ta, sayó monequi ximosepantasojtatiyacan se huan ocsé. Porín ne ten quinyoltasojtatinemi iicnihuan, yejua nojón cajsicacamatiau nochi in tanahuatil de Dios. <sup>9</sup>Porín cuali nanquimatij namejuan nijín tanahuatilme de Dios ten quijtoa ijcuín: “Amo xiahuilnentinemican”, huan “amo xitemictican”, huan “amo xitachtequican”, huan “amo xixolopijtijtinemican”, huan “amo xicyolnejnequican ten teaxca”. Huan nochi nijín tanahuatilme huan in ocsequin tanahuatilme de Dios cuali se quisepanijtoa ya queme quijtoa in Tajcuilolamatzin de Dios ijcuín: “Xictasojtatinemi moicniu ijcón queme tejua timoyoltasojtatinemi”. <sup>10</sup>Huan neques ten tetasojtatinemij, yejuan nojonques amo quitajyohuilitijtinemij inicniu. Porín cuac titetasojtatinemij, ijcuacón tejuan ticajsicacamatatinemisque ya nochi in tanahuatil de Dios.

<sup>11</sup>Huan cuali xictacamatinemi nochi nijín tanahuatil, porín no cuali ticajsicacamatinemij de toni niman mochihuati tech nijín tonal campa axcan tinentinemij. Porín ejcoc ya in tonal cuac monequi xiixpetanto para ma cachi oc xictacamatiu Dios. Porín ne tonal cuac Cristo techtamimaquixtis ya, yejua ne cachi motoquico ya huan que ne tonal cuac yequinica titacuautamatque ya ihuan Cristo. <sup>12</sup>Huan nijín talticpac campa tinentinemij queme yesquía tayohuayanijtic porín tajtacol momautoc. Pero ne tayohuayanilot poliutiu ya, porín axcan tanestihuitz ya, huan hualas Cristo para ijcón quitamiajchihuas in tajtacol. Ica ya nojón monequi ma ticautiyacan nochi tataman pitzotic chihualisme ten cualcui tayohuayanilot. Huan no monequi ma timoquemiloltican ica ne chichualis den cualcui in tanextzin de Dios. Huan ijcón ma timoyecpixinemican mosta mosta huan in amocuali Satanás amo huelis techxijxicos. <sup>13</sup>Huan ma tichipaucanemican ijcón queme in tanextzin de Dios techyoltahuilitjinemi. Huan no sayó ma ticchiutinemican ten tamelahuac. Ma amo elihuis titatacuajtinemican campa sayó mijmiquiloyot san. Huan nión no ma titahuantinemican. Huan nión no ma tiahuilnentinemican. Huan nión no ma ticchiutinemican máfac tataman vicios. Huan nión no ma timotajtoltehuilitjinemican. Huan nión no ma ticyolnejnequican de timoaxcatilisque ten teaxca. <sup>14</sup>Ta, cachi oc monequi ma timoquemiloltican ica in huelilis den Totecotzin Jesucristo para ijcón huelis tichipaucanemisque. Huan ma amo timotecahuilican que ma techyecana ne tosolictalnamiquilis ten momautoc ica tajtacol.

**Nican tajtoa de ne tocnihuan taneltocani ten ayamo yec  
yolmajsitinemij tech nintacuautamatis**

**14** Xiquinselican ica hueyi yoltetasojtalis ne tocnihuan taneltocani ten ayamo yec yolmajsitinemij tech nintacuautamatis. Huan amo xiquintajtoltehuican inuan neques ten ayamo yolmajsitinemij, de queniu yejuan cajsicamatij in Tajtoltzin de Dios. <sup>2</sup>Ma tiquijtocan que sequin taneltocani cuali quixejecohtiyohue que cuali huelis quipalosome nochi ten oncac. Pero ocsequin taneltocani ten ayamo quiyecasicamatij ne tamachilis de Dios, yejuan nojonques quixejecohtinemij que monequi quicuasque sayó tataman tacualis de quilil san. <sup>3</sup>Huan neques taneltocani ten quicuajtinemij de nochi tataman tacualis, yejuan nojonques ma amo quinijitocan in ocsequin taneltocani ten quinequij quicuasque sayó sequin tacualis san. Huan ne taneltocani ten quicuajtinemij sequin san tacualisme, yejuan nojonques ma amo quintejtenehuacan in ocsequin taneltocani ten quicuajtinemij de nochi tataman tacualisme. Huan amo xiquintejteneutinemican in taneltocani, porín Dios quinpoutinemi iconehuan ya. <sup>4</sup>Huan tejua tagat ten titaneltoaca de Cristo, amo teyi motequiu de tictetejteneutinemis ne itaquehual de Dios. Porín tacán cuali tequititinemi ne taquehual de Dios oso amo yec tequititinemi, ijcuacán amo teyi motequiu oc tejua. Ta, itequiu yejua ne de nipatrón. Huan ne tetaquehual, yejua ne motequitiltijtinemi para Dios. Ica ya nojón ne taneltocque yejua ne mochihuati cuali tequitique porín Totecotzin nochi quipía chicahualis para quipalehuijtinemis ne itequitica para ma cuali tequititinemi.

<sup>5</sup>Huan no ma tiquijtocan ijcuín: Sequi taneltocani cachi quinpohuaj sequin tonalme huan quinemilíaj que semi mohuistic. Huan ocsequin taneltocani quiyolnemilijtinemij que amo teyi se tonal den cachi mohuistic. Ta, nochi tonal mosenehuilíaj. Ica ya nojón cada se taneltocque monequi ma cuali quimati tech nitalnamiquilis que cox nochi quiyolpactía Dios ten yejua quichiutinemi. <sup>6</sup>Huan como se taneltocque quipohua que se tonal cualcui mohuisyot, ijcuacán yejua ne ma ijcón quinemilijtinemi para quihueyipanchihuas Dios. Huan como ocsequin taneltocani quinemilíaj que se tonal amo cualcui mohuisyot, ijcuacán yejuan ma ijcón quixejecohtinemican para quihueyipanchiutiyohue ya Dios. Huan como se taneltocacque quicuajtinemi nochi tataman tacualisme, ijcuacán yejua ma ijcón quicuajtinemi para quimohuistilis Totecotzin, porín ipa quitasojcamachilij ya Dios ica por ne tacualis. Huan como ocsequin taneltocani quinemilíaj que amo quicuajtinemisque sequin tacualis, ijcuacán yejuan ijcón quichiutinemij para quimohuistilisque Dios. Huan yejuan no quitasojcamachilíaj Dios ica por ne tacualis.

<sup>7</sup>Porín tejuan amo hueli tiyoltinemisque sayó para timopalehuisque ijcón queme tejuan ticnequisque. Huan amo no huelis timomiquilisque tech ne tonal cuac tejuan ticnequisque. <sup>8</sup>Huan como tiyoltinemisque oc, ijcuacán tiyoltinemisque sayó para tictequitiltijtinemisque Totecotzin. Huan como timomiquilisque ya, ijcuacán timomiquilisque cuac quimonequiltía Totecotzin. Huan como tiyoltinemisque oc oso como timomiquilisque, ijcuacán ipa tipoutinemisque ihuantzin Totecotzin. <sup>9</sup>Huan nochi nijín hueyi melau porín Cristo momiquilij huan panquisac yoltoc intzalan in ánimajme. Huan axcan Yejuatzin yoltinemi huan mochihuaco Totecotzin ya de tejuan tiitaneltocacahuan, masqui timomiquilisque oso masqui tiyoltinemisque oc.

<sup>10</sup> Huan tejua, nimitzilía amo mitznamiqúi xiquixcomaca mocniú taneltocque. Huan tejua no amo mitznamiqúi xictejtenehua mocniú taneltocacque. Porín ma ticmatican que nochi tejuan tiitaneltocacahuan de Cristo, monequis timotenexilitihue iixpantzinco Totajtzin Dios para ma Yejuatzin techixcomacas. <sup>11</sup> Huan ijcuilitoc tech in Tajtoltzin de Dios ijcuín:

Quijtoa Totecotzin ijcuín: Nejuatzin niyoltinemi sen nachipa. Ica ya nojón nochi talticpacuani monequis motancuaquetzasque noixpantzinco para nechmohuistilisque.

Huan nochi talticpacuani quiyequijtosque senteixteno que Nejuatzin ya nión hueyi Dios.

<sup>12</sup> Ica ya nojón cada tisenme de tejuan ya monequis ma ticmactilisque Dios tocuentas nochi ten ticchiutinenque nican talticpac.

### **Nican tajtoa de ma amo xictepotami mocniú tech in tajtacol**

<sup>13</sup> Huan queme tejuan ticmactiyohue Dios nochi tochi hualisuan, ica ya nojón monequi ma ticautiyacan de timotejteneutinemis que se huan ocsé. Ta, cachi cuali ximofuerzajuijtiyacan de amo xiquintepotamican oc namocnihuan taneltocani tech in tajtacol. Huan amo no xiquintepahuacan ma huetzitij tech in tajtacol. <sup>14</sup> Huan nejua cuali nicyecmati porín Notecotzin Jesús nechtaneltoctij ya que nochi ten ongac tacualis nican talticpac, nochi chipahuac. Porín ijcón Dios quitajij ya. Pero naquen quiyolnemilía que ongac tensá tacualis tenica se motajtacolmacas, ijcuacón ne tagat quipohuas ya que amo chipahuac ne tacualis. <sup>15</sup> Huan tacán tejua ticuajtinemi tensá tacualis tenica ticyxocolijtinemi mocniú taneltocque, ijcuacón tejua amo tictasojtatinemi ne mocniú. Huan amo no xicchihua que tiquixpolos tech in tajtacol ne mocniú taneltocque ne ten Cristo quixtahuilij ya nitajtacoluan, sayó porín tejua ticnectinemi ticuajtinemis tensá taman tacualis. <sup>16</sup> Huan tacán tejua ticmatinemi que cuali chihualis ten ticchiutinemi, ijcuacón xichipaucanemi ica por ne cuali chihualis para ma amo acsame ica mitztejtenehua san. <sup>17</sup> Huan cuac Dios techyecantinemi ica ihueyichicahualis, ijcuacón amo ticueyipohuaq tensá tacualis oso tensá tayillis. Ta, cuac Yejuatzin techyolecana ica ihueyichicahualis, ijcuacón ticvolnejnectinemij de queniú tichipaucanemis que huan de queniú tiyolseucanemis que huan de queniú tiyolpactinemis que ica ne chichahualis den Yecticatzin Espíritu. <sup>18</sup> Huan ne taneltocani ten ijcón quitequitilijtinemis que Cristo ica ne ichipaucanemilis, yejuan nojonques quiyolpactijtinemis que Totajtzin Dios huan no in tagayot quinpohuaq que yolcuali taca.

<sup>19</sup> Ica ya nojón ma ticsentocacan ne ojtzin de Cristo ten cualcui yolsehuilis. Huan como ijcón ticchiutiyohue, ijcuacón timosepanpalehuijtiyohue se huan ocsé para ijcón timoyecyolmajxitijtiyohue tech totacuaumatilis. <sup>20</sup> Huan tejua ten cachi tiajsicataneltocque, amo xicuetahuiltili nitacuaumatilis de mocniú ten yequin taneltocatoc. Porín cuac tejua ticuajtinemi tensá tacualis tenica ne mocniú moyolxocolía, ijcuacón tictajtamilía ya nitacuaumatilis de ne mocniú ten iyancuicataneltocau de Dios. Huan ticmatij que nochi tataman tacualis chipahuac. Pero tacán ticuajtinemij tensá tacualis tenica tejuan tictepotamíaj tocnihuan tech in tajtacol, ijcuacón melau amocuali ten ticchiutocque. <sup>21</sup> Cachi cuali para tejuan, tiajsicataneltocani, monequi ma amo ticuajtinemijcan nacaat huan nión no ma titayitinemican vino. Huan nión no ma ticchiutinemican ocsequin taman oc chihualis tenica huelis tiquinuetziltíaj

tech in tajtacol in tocnihuan taneltocani. <sup>22</sup> Huan tejua, como titacuaautamatinemi ihuan Cristo huan tiquixejecoa que huelis nochi ticuajtinemis ten yesqui tacualis, ijcuación sayó xicchiutinemi iixpantzinco Dios. Porín se taneltocacque quipías cachi yolpaquilis como yejua amo motajtacolcuiltis yejua san mismo ica ne ten yejua quixejecoa que cuali quichiutinemis. <sup>23</sup> Huan ne taneltocacque ten quipohua que amo cuali tacualis ne ten cuajtinemij, yejua nojón motajtacolcuiltía ya, porín yejua amo quicua ne tacualis ica tacuaautamatis. Tejuan san timotajtacolcuiltíaj san cuac ticchiutinemij tensá tequit oso chihualis huan cuali ticmatinemij ya que yejua ne se amo cuali chihualis.

**Nican tajtoa de queniu ma xicyolpactijtinemi mocniu taneltocacque ijcón queme tejuan timoyolpactijtinemij**

**15** Ica ya nojón tejuan ten tiyecmajsitocque tech totacuaautamatis, monequi ma tiquinpalehuijtiyacan huan no ma tiquinxichohuilijtiyacan nochi ninyolcuetahuilis de ocsequi tocnihuan ten amo yec yolmajsitinemij tech nintacuaautamatis. Huan ma amo tejuan san timoyolpactijtinemican san ica ne ten ticchiutinemij. <sup>2</sup> Ica ya nojón monequis cada senme de tejuan ma tiquinpalehuijtiyacan ne tocnihuan taneltocani ica nijín cuali tanextililis ten yequin namechilij para ijcón cachi oc yejuan huelis momajxitijtiyasque de nintacuaautamatis. <sup>3</sup> Porín cuali ticmatij que in Cristo amo moyolpactijtinemic de yejua san. Ica ya nojón ijcuiliutoc tech in Tajtoltzin de Dios campa Cristo quinojnotztoc Itajtzin Dios ijcuín: “Nochi ne huijuicaltis tenica mitzonuijuicaltiaya, nochi yejua huetzico nopan huan ica nech-tajyohuiltij”. <sup>4</sup> Huan nochi tanextililis ten ticajsij tech in Tajcuilolamatzin de Dios, nochi nojón techijcuilohuilijque para tejuan ica timomachtisque cachi oc. Ica ya nojón ticpiasque cachi oc tacuaautamatis ihuan Dios porín ompa ticajsij de queniu titaxicojtiyasque ica ne tajyohuilis huan no ticajsij de queniu timoyoltalijtiyasque. <sup>5</sup> Huan sayó Totajtzin techchihualtis ma titaxicojtiyacan ica tajyohuilis huan ma timoyoltalijtinemican. Huan ijcón ma Totajtzin Dios namechpalehuijtiu que xiyolseucanemican se huan ocsé ijcón queme Cristo Jesús yolseucanentinemi. <sup>6</sup> Huan queme namejuan nanyolseucanentinemis que se huan ocsé, ijcuación huelis nanquimohuistilijtiyasque ica sansé san tamachilis Totajtzin Dios, Yejuatzin Itajtzin de Totecotzin Jesucristo.

**Nican Pablo tanojnotztinemic ica in Tajtoltzin de Dios intzalan neques ten amo mopoutinemij queme judíos**

<sup>7</sup> Ximoselijtiyacan ica hueyi paquilis se huan ocsé, ijcón queme Cristo techselij ya ica iteicnelilis, para ijcón in ocsequin tagayot ma quimohuiscapohuacan Totajtzin Dios. <sup>8</sup> Cuali xiquelnamiquican ten namechilía que hualajca Cristo para quintequitilis in pueblojuani judíos. Huan ijcón Yejuatzin quitamichihuaco nochi ten Dios quintenilijca ya de quichihuas. Huan ijcón ixnesitinemi que Totajtzin Dios Yolmelahuactzin huan melau quitamichihuaco ya nochi tenica Yejuatzin moyectencauca ya ihuan ne tohujcautatuan. <sup>9</sup> Huan no Cristo huala para quinmaquixtis in taca ten amo judíos para ijcón yejuan no ma quimohuistilijtiyacan Dios ica ne iteicnelilis ten Yejuatzin quichihuac ninpan. Porín tech in Tajcuilolamatzin de Dios, Cristo Jesús monojnotztoc ihuan Itajtzin Dios ijcuín: Ica por moteicnelilis, nimitzueyipanchihua intzalan neques ten amo judíos.

Huan ompa no nimitzcantarohuilijtiyás himnos para nimitzueyichihuas ica motocaytzin.

<sup>10</sup> Huan ocseco in Tajtoltzin de Dios quijtoa ijcuín:

Namejuan nantaneltocani ten amo nanjudíos, ximosepanyolpactijtiyacan ihuan ne itaneltocacahuan de Dios ten poutinemij ihuan in judíos.

<sup>11</sup> Huan ocsecan quijtoa in Tajtoltzin de Dios ijcuín:

Xicmohuistilijtiyacan Totecotzin, nochi namejuan nantalticpacuani ten amo nanjudíos.

Huan no xicueyimatiyacan Totajtzin Dios, nochi namejuan nantalticpacyetoni.

<sup>12</sup> Huan ocsepa ne huejcautanahuatijque Isaías quijtoa ijcuín:

Huan ne tohuejcautat Isaí ten itat den rey David, yejua nojón quiscaltis se ixuii.

Huan ne ixuii de Isaí, yejua nojón moscaltis huan quiyecantinemis nochi in talticpacuani ten amo judíos.

Ica ya nojón nochi in talticpacyetoni ten amo judíos, yejua nojonques tacuautamatosque ihuan Yejuatzin ten quinmaquixtiquiu.

<sup>13</sup> Huan sayó Totajtzin Dios techmacatinemi ne hueyi tacuautamatilis. Huan ma Yejuatzin namehyolpexontijtiyás ica hueyi yolpaquilis huan ica hueyi yolsehuilis, ijcón queme namejuan nantacuautamatinemij ihuan Cristo. Huan ijcón namejuan cachi oc nanmoajscapixtolijtiyasque ne hueyi tacuautamatilis ica ichicahualis den Yecticatzin Espíritu.

<sup>14</sup> Notasojicnihuan, cuali nicyecmati que namejuan nanyolpexontijtiyohue ica hueyi tetasojtalis huan no cuali nanquimatilijtiyohue in Tajtoltzin de Dios. Ica ya nojón cuali nanuelisque nanquinyolmajxitisque de se huan ocsé namotaneltoaicnihuan. <sup>15</sup> Huan masqui namejuan nochi nijín nanquimatij ya pero nimoixehuj de ocsepa namehijcuilohuilis ica hueyi yolchicahualis de nijín notamachtilis para ijcón cachi oc namechtalnamictis de nijín notanextililisuan. Huan ijcón nicchiutinemi porín Totajtzin Dios nechyolicnelij huan nechtequimactij ma ijcón nicchiutinemi.

<sup>16</sup> Huan Totajtzin Dios nechtequimactij ya de que ma nitequitilijtinemi Cristo para niqinnojnnotztinemic ne taca ten amo judíos. Huan nitequitilijtinemi Cristo Jesús queme se tiopixcat huan ijcón nictetapohujtinemi in Tajtoltzin de Dios ten cualcui ne nemaquixtilis. Huan nijín taneltocani ten amo judíos, yejua nojonques niqintemactis iixpantzinco Dios queme se cualtzin nemactil de cuica ajuiyacacayot ten quiyolpactía Dios. Huan nochi nijinques in Yecticatzin Espíritu quinyolchipahuac ya ica ihueyi chicahualis.

<sup>17</sup> Huan nejua nipoutinemi ihuan Cristo Jesús. Ica ya nojón nicueyipoutinemi notequiu tenica nitequitilijtinemi Totajtzin Dios. <sup>18</sup> Huan amo huelis namechnojnotzas ica ne tequit ten amo nicchihuac. Ta, nimoixehuj de namechnojnotzas ica ne tequit ten Cristo Jesús quichiutinemi notechcacopaca. Huan no tequiu yejua nijín de que ne taca ten amo judíos ma niqintaneltocti de Cristo para ma yejua ma quitacamatiyacan Dios. Huan yejua nojonques niquinnextilijtinemi ica notajtoluan huan ica notachihualisuan. <sup>19</sup> Huan niquinnextilijtinemi in tagayot ica nescayome de Dios huan no ica huejueyi mohuiscatequime ten Dios quichiutinemi notechcacopaca ica ichicahualis den Yecticatzin Espíritu. Huan ica nijín chicahualis de Yecticatzin Espíritu niqintaminojnotztinemic ya ica ne Tajtoltzin de Cristo ten cualcui ne nemaquixtilis desde ne pueblójcopaca de Jerusalén hasta nochi ne talmejcopaca ten quilíaj Ilírico. <sup>20</sup> Huan tech notequiu nimofuerzajujtinemi de nitanojnnotztinemi

ica in Tajtoltzin de Dios ten cualcui ne nemaquixtilis ne campa ayamo aquen quincaquiltij in chicahualis den tocaytzin de Cristo. Huan nejua amo nitequitinemi ica in Tajtoltzin de Dios campa ipa tanojnotztocque ya de Cristo Jesús. <sup>21</sup> Huan nejua cachi cuali nimotequitiltijtinemi ijcón queme quijtoa in Tajcuilolamatzin de Dios ijcuín:

Neques ten amo queman quincaquiltijque de Cristo, yejuan nojonques moaxcatilisque ne tanojnotzalis de Cristo.

Huan neques ten amo queman quinmatiltijque de Cristo, yejuan nojonques axcan cajsicamatisque.

### **Nican tajtoa de que in Pablo quiyolnemilía yas campa ne Romajcopaca**

<sup>22</sup> Huan amo niquemanti niyás namechitatu porín semi nitanojnotztinentoya nicahuín, masqui semi nicyolnejnequía namechcalpanotiu. <sup>23</sup> Pero axcan nitamichiutiu ya notequiu de tanojnotzalis tech nijín tonalme desde Jerusalén hasta Ilíricojcopaca. Huan quipiaya míac xiume ya de nicyolnejnecoc niyás namechcalpanotiu.

<sup>24</sup> Huan cuac niyás nitequititiu nepa Españajcopaca, ijcuacón nicnequi namechcalpanotiquisas. Huan cuac namechtamicalpanotiquisas ya, ijcuacón nicnequi xinehpalehuican ica tensá tapalehuilis para niajsis ca cuali campa ne país España. <sup>25</sup> Pero axcan niyati ya Jerusaléncopaca huan niquinuquiliti ne taneltocani se tapalehuilis.

<sup>26</sup> Huan niyati ya Jerusalén porín in tocnihuan taneltocani de Macedonijcopaca huan de Acayajcopaca, yejuan nojonques quinmilijque cajocuisque sequin tomin queme se nemactil para quinpalehuisque in taneltocani ten calyetocque Jerusaléncopaca, neques ten amo teyi quipíaj tenica ixpanosque. <sup>27</sup> Huan in taneltocani nicahuín quixejecojque que monequi quititanisque se tapalehuilis porín yejuan nicahuín quiyolmachilíaj majyá quintahuiquilíaj ne taneltocani de Jerusalén. Porín in taneltocani judíos quinqualtitanilijque ne taneltocani ten amo judíos in Tajtoltzin de Dios. Ica ya nojón neques ten axcan taneltocani ten amo judíos, yejuan nojonques monequi tapalehuisque campa ne taneltocani judíos ica nintapalehuilis de ninricojyo. <sup>28</sup> Ica ya nojón cuac nictamichihuas ya notequiu de niquinmactilis in taneltocani de Jerusalén nijín nemactil, ijcuacón niquisas ya para Españajcopaca. Huan ijcón namechcalpanotiquisas ompa Romajcopaca. <sup>29</sup> Huan nitacuautamati que cuac namechcalpanotiquisas ya, ijcuacón nejua niajsis huan namechcahuilitiu míac tati-chihualis ten cualcui ne nemaquixtilis de Cristo. <sup>30</sup> Huan, notasojicnihuan, namejuan nanoputinemij ya ihuan Totecotzin Jesucristo huan nanmosepantasojtatinemij ica in chicahualis den Yecticatzin Espíritu. Ica ya nojón namechontatautía que xinehpalehuican huan ximatatautilitocan ihuan Dios ica por nejua. <sup>31</sup> Xictatautican Dios para que ma Yejuatzin nechmaquixtis inmaco neques taca ten semi taixnamiquini de Cristo, neques ten calyetocque Jerusaléncopaca. Huan no xictatautican Dios que nijín tapalehuilis ten niquinuquiliti ne tocnihuan taneltocani de Jerusalén, que ma cuali quiselican ca paquilis. <sup>32</sup> Huan ica por namotatautilis ma Dios quimonequilti ma niajsi ica hueyi yolpaquilis campa namejuan nanyetocque. Huan no ma Dios nechyolseucatali tech nojón tonalme cuac namohuan niyetinemis. <sup>33</sup> Huan sayó Totajtzin Dios teyolsehuía, ma Yejuatzin namohuan yetinemi sen nachipa huan sen nachipa. Ma ijcón mochiutiu. Amén.

### Nican in Pablo quintajpaloa m'ac itasojicnihuan

**16** Huan namechnahuatílía que xiquixmatican de totasojicniú taneltocque sihuat ten monotza Febe. Porín yejua tequititinemi queme tiopantapalehuijque campa in pueblo Cencrea, campa mosentílíaj in tocnihuan para quimohuistilisque Dios. <sup>2</sup>Huan nicnequi que xicselican ne Febe ica teicnelilis den tocaytzin de Totecotzin, ijcón queme quinnamiqui quiselisque in taneltocani. Huan no nicnequi xicpalehuican ne Febe ica nochi ten quipolojtiyás tech iixpanolis. Porín nijín taneltocasihuat, yejua semi quinpalehuijtinemi ya ocsequin taneltocani huan hasta nejua no semi nechpalehuij ya.

<sup>3</sup>Huan xiquintajpalocan in tocnihuan Priscila huan iyoquich Aquila, yejuan no notequiticaicnihuan tech nijín tequit ten titanojnotztinemi de Cristo Jesús. <sup>4</sup>Huan ne Priscila huan Aquila hasta in tagayot quinequíaj quinmictisque porín yejuan nechpalehuijque. Huan semi nicueyitasojcamachilía Dios ica por yejuan. Huan amo sayó nejua. Ta, no nochi in taneltocani ten amo pohuij queme judíos, yejuan no jonques no quihueyitasojcamachilíaj Dios ica por ne Priscila huan Aquila. <sup>5</sup>Huan no xiquintajpalocan nochi in tocnihuan taneltocani ten mosentilía inchan Priscila huan Aquila para quimohuistilisque Dios. Huan no xictajpalocan in Epeneto, notasojicniztin, yejua notayecancataneltocau de Cristo campa in talme de Acaya. <sup>6</sup>Huan no xictajpalocan in María ten semi tequititinemi namohuan. <sup>7</sup>Huan no xiquintajpalocan nopueblojcahuan in Andrónico huan in Junias, ne ten no nohuan tzactoyaj nepa cárcelijtic. Porín nochi in taneltocani quintasojtaj ne omen porín yejuan tanojnotzani de Cristo. Porín yejuan tacuautamatque ihuan Cristo achtopa que nejua.

<sup>8</sup>Huan no xictajpalocan in Amplias, notasojicniztin ten no poutinemi ihuan Totecotzin. <sup>9</sup>Huan no xictajpalocan in Urbano notequiticaicniú ten no quitequitilijtinemi Cristo Jesús. Huan no xictajpalocan ne notasojicniú Estaquis. <sup>10</sup>Huan no xictajpalocan in Apeles ten miacpa quitenextij que yejua quipixtinemi se tacuautamatilis de Cristo ten yec majsitoc. Huan no xiquintajpalocan nochi inchancahuan de Aristóbulo. <sup>11</sup>Huan no xictajpalocan nopueblojcau in Herodión. Huan no xiquintajpalocan ten inchancahuan de Narciso ten tacuautamatinemij ihuan Totecotzin. <sup>12</sup>Huan no xiquintajpalocan in Trifena huan in Trifosa ten no quitequitilijtinemij Totecotzin. Huan no xictajpalocan notasojicniztin in sihuat taneltocque ten monotza Pérsida ne ten no semi motequitilijtihuitz para Totecotzin. <sup>13</sup>Huan no xictajpalocan in Rufo ten nochi in tocnihuan quicualtagaitaj porín yejua yec tatacamatque de Cristo. Huan no xictajpalocan Rufo inantzin ten nejua no nicpohua queme yesquía no nonantzin. <sup>14</sup>Huan no xiquintajpalocan nijinques tocnihuan, in Asíncrito, huan ne Flegonte, huan ne Hermas, huan ne Patrobas, huan ne Hermes. Huan no xiquintajpalocan nochi in tocnihuan taneltocani ten ompa inuan yetocque. <sup>15</sup>Huan no xiquintajpalocan nijinques tocnihuan in Filólogo, huan in Julia, huan ne Nereo. Huan no xiquintajpalocan ne iicnihuan de Nereo huan ne Olimpás huan nochi in tocnihuan taneltocani ten inuan yetocque. <sup>16</sup>Huan no ximonanahuatéquican se huan ocsé ica hueyi tetasojtalis. Huan nochi in tocnihuan ten nican tacuautamatinemij ihuan Cristo, nochi yejuan namechontajpaloa.

<sup>17</sup>Huan, notasojicnihuan, namechontatautíaj que xiquinixmatilican neques ten sayó quincualancaxejxelojtinemij in taneltocani huan ten sayó quintepotamijtinemij in taneltocani tech in tajtacol. Huan nochi nijín ximosecocautiyacan porín yejuan



quixnamictinemij in tamachtilis ten namechmachtijque ya ne achtopa. <sup>18</sup> Porín namechilía que ne tacajcayahuani taixnamiquini, yejuan nojonques amo quitequitilijtinemij Totecotzin Jesucristo. Ta, yejuan motequitiltijtinemij sayó para yejuan san mohueyichihuasque. Huan nojón taixnamiquini quinoxchinojnotzaj in taneltocani ica tajtolme ten sayó teyolpactía. Huan ijcón yejuan quinxcajyahuahaj ne taneltocani ten ayamo yec yolmajsitocque tech nintacuaautomatica. <sup>19</sup> Huan nochi in taneltocani nican cuali quimatque de queniu namejuan nantatacamatinemij. Ica ya nojón nimoyolpactijtinemij ica por namejuan. Pero cachi oc nicnequi que namejuan xicuataminemican ica cuali tamachilis ten cuica chipahualis. Huan no nicnequi que amo ximotecahuilican que acsame namechcajyahuaacan para que namejuan nanquichihuasque tensá amocuali chihualis. <sup>20</sup> Huan sayó Totajtzin Dios quimacatinemi yolsehulilis. Huan Yejuatzin amo huejcahuas oc para quitamitanilis in amocuali Satanás para que namejuan xictajtamiltican ichichualis de Satanás. Huan xicselijtiyacan in teicnililis de Totecotzin Jesucristo.

<sup>21</sup> Huan namechontajpaloa in Timoteo, nijín notequiticaicniu. Huan namechontajpaloaj in Lucio, huan in Jasón, huan in Sosípater, yejuan nojonques no nopueblojcahuan. <sup>22</sup> Huan nejua ni Tercio, huan niqijcuilojtoc nijín amatzin ijcón queme Pablo nechilijtoc huan nejua no namechtajpaloa ica in teicnelilis de Totecotzin. <sup>23</sup> Huan no namechtajpaloa in tocníu Gayo, ten ompa ichan nimocautinemi, huan no ompa ichan Gayo nochi in taneltocani mosentilíaj para quimohuistilisque Dios. Huan no namechontajpaloa in tocníu Erasto ten yejua in tomin nechicojque nican campa pueblo Corinto. Huan no namechontajpaloa in tocníu Cuarto. <sup>24</sup> Huan nochi namejuan xicselijtiyacan in teicnelilis de Totecotzin Jesucristo. Ma ijcón mochiutiu. Amén.

### **Nican Pablo quihueyipanchihua Totajtzin Dios**

<sup>25</sup> Huan axcan ma ticmohuistilican Totajtzin Dios porín Yejuatzin cuali hueli namechyecyolmajxitis de namotacuaautomatica. Huan ijcón Jesucristo tamachtijtinemi huan nejua no namechmachtijtinemi. Huan nijín tanextililis ten cualcui ne nemaquixtilis, yejua ne in ichtacatamachilis ten Dios quichtacapixtihuala ya desde ne achtopa ya, cuac ayamo tzinpehuac in talticpac. <sup>26</sup> Pero axcan Dios quitenextilijtinemi ya nijín tanextililis ten ne huejcautanahuatiani quimachtijtihualayaj tech nintajcuilolamatiztin. Huan ijcón yejuan quichiutihualayaj porín ijcón quimonequiltía Totajtzin Dios ten amo queman xpolihuis. Huan nijín tanextililis ten cualcui ne nemaquixtilis, yejua nojón motetapohuij ya tech nochi in senmanahuac para ijcón nochi in tagayot ma tacuaautomatica ihuan Cristo huan ma quitacamatican. <sup>27</sup> Huan sayó ongac se Dios huan sayó Yejuatzin quipixtinemi hueyi tamachilis. Huan ma ticmohuistilijtiyacan Dios sen nachipa itechcacopaca Jesucristo. Ma ijcón mochiutiu. Amén.

## IN ACHTO TAJCUILOLAMATZIN TEN QUIJCUILOJ IN TATITANIL SAN PABLO PARA IN TANELTOCANI TEN CALYETOCQUE CAMPA PUEBLO CORINTO

### Nican tajtoa de queniu in tatitanil Pablo quintajpaloa in taneltocani campa pueblo de Corinto

**1** Nejuatzin ni Pablo, huan Totajtzin Dios ijcón quimonequiltij ma mochihua huan nechnotzac huan nechjitat para ma niitatitanil itencopaca itocaytzin Jesucristo ten nechualtotocac ma nitanojnotztinemi ica Yejuatzin itencopaca. <sup>2</sup>Nejuatzin ihuan in tocnihuan Sóstenes tamechontajpaloaj ica nijín Tajcuilolamatzin de Dios, namejuan nantaneltocani de Dios ten nanpoutocque inahuactzinco Dios huan nancalyetocque tech pueblo Corinto. Huan namejuan Dios namechylchihuac ya para nanpohuij ihuan Cristo Jesús Temaquixtijque. Huan Dios namechnotzac namejuan para cachi oc xichipaucanentinemican. Ica ya nojón tamechonijcuilohuilíaj nijín tajtolme namejuan ihuan nochi tocnihuan den nohuiyampa calyetocque ten quimohuistilíaj Dios ica itocaytzin de Totecotzin Jesucristo. Huan Jesucristo in Tecotzin de yejuan huan no Totecotzin de tejuan. <sup>3</sup>Huan ma xicpiacan ne teicnelilis huan ne yolsehulilis ten hualehua imaco Totajtzin Dios huan no hualehua imaco Totecotzin Jesucristo.

### Nican Pablo quitasojcamachilía Dios porín Yejuatzin techmacatinemi huelilisme tech toyoljuan

<sup>4</sup>Huan ijcón nachipa nictasojcamachilía Dios ica por namejuan de que Yejuatzin namechmactilij ya neteicnililis porín namejuan nanpoutinemij ihuan Totecotzin Cristo Jesús. <sup>5</sup>Huan no nictasojcamachilía Dios porín Yejuatzin namechtayocolij ya tech namoyoljuan míac tataman huelilis de tatiochihualisme tenica namejuan hueli nantanojnotztinemij ica in Tajtoltzin de Dios huan hueli nanquiyecajsicacatinemij in Tajtoltzin de Dios. Huan nochi nijín mochiutoc porín nanmajsitinemij ihuan Cristo Jesús. <sup>6</sup>Huan ne achtopa ya namechnextilijca ya nochi ten Cristo quipía de quichihuas namopan. Huan axcan namechilía que motamichihuaco ya tech namonemilipan nochi ne itequiu de Cristo Jesús. <sup>7</sup>Huan amo teyi namechpoloa de nochi nijín tamachilisme huan huelilisme ten Dios quitemaca. Ica ya nojón nanquiyolicachixtocque Cristo Jesús hasta cuac ejcos in tonal queman monextijtzi-nojqui. <sup>8</sup>Huan Cristo Jesús namechyecpixtiyás huan namechylchicautiyás para xiyetacautamatiyacan itech Yejuatzin. Huan ijcón amo aquen huelis namechtejtechtis tensá tajtacol tech ne tonal cuac mohualuicas in Totecotzin Jesucristo para quintelchihuaquiu in talticpacuani ten amo taneltocani. <sup>9</sup>Huan Dios quiyecajsicacihuas nochi ten techtenilijca ya. Huan Totajtzin Dios techjitat huan technotzac para ma tisenpohuican ihuan in Teconetzin de Dios, Yejuatzin ne Totecotzin Cristo Jesús.

**Nican tajtoa de queniu mochihuac ne xexelolis huan ne  
cuejmololis campa in taneltocani de Corinto**

<sup>10</sup> Nocnihuan, namechtatautía ica itencopaca in itocaytzin de Totecotzin Jesu-cristo, huan namechilía que ximoyectajtoluiyacan sansé huan ma amo ximocualan-caxexelocan campa namejuan nanmosepansentilíaj. Ta, namechilía xisenyecyetocan se huan oscé huan xiyecsentanemilitocan sansé huan no xisentaixejecojtiyacan tech namoyolojuan. <sup>11</sup> Huan nochi nijín namechilía notasojcnihuan, porín Cloé ichanchahuan nechajscamatiltijque que namejuan nanmotajtoltehujtocque. <sup>12</sup> Huan nic-nequi namechilis que sejsé de namejuan nanquijtoaj ijcuín: “Nejua nipohui ihuan ne itanextililis de Pablo”. Huan oscé quijtoa ijcuín: “Nejua nipohui ihuan neitanextililis de Apolos”. Huan oscé quijtoa ijcuín: “Nejua nipohui ihuan ne itanextililis de Cefas”. Huan oscé no quijtoa ijcuín: “Nejua nipohui ihuan ne itanextililis de Cristo”. <sup>13</sup> ¿Xe no acsá quixejxeloj in Temaquixtijque Cristo Jesús ma oncani miacque Temaquix-tiani? Pues amo melau. ¿Xe nijín Pablo quicuoupampilojque por namejuan para quixtahuas namotajtacoluan? Pues amo. ¿Xe nijín Pablo namechahuijque ica yejua itocaytzin para nanquitacamatinemisque ne Pablo? Pues amo. <sup>14</sup> Nictasojcamachilía Dios de que nejuatzin amo miacque den namejuan namechahuij. Ta, de nochi name-juan melau sayó nichahuij yejuan in tocnihuan in Crispo huan in Gayo. <sup>15</sup> Como amo aquen oc nichahuij, ica ya nojón amo aquen huelis quijtos que yejua tahuil ya ica nejua notocay para nechtacamatisque nejua. <sup>16</sup> Huan axcan niquelnamiqui no niquinahuij inchanchahuan in Estéfanas. Huan amo niquelnamiqui cox niquinahui-jo ocsequin tocnihuan. <sup>17</sup> Porín Cristo Temaquixtijque amo nechualtitanic para ma nitaahuijtinemi san. Ta, Cristo nechualtitanic ma nitetapohuijtinemij ica in Taj-toltzin de Dios ten cualcui ne nemaquixtilis. Huan nejuatzin amo namechonxochino-notzaco ica huejueyi tamachilisme ten hualeu nican itech talticpacuani. Huan tacán ijcón namechonnotzascuía, ijcuacán nicueyiahuiltisquía hasta nencajtíc san in tanextililis de Cristo ten Yejuatzin momiquilij tech in colotzin ica por tejuan.

**Nican tajtoa de Cristo Temaquixtijque, Yejuatzin quipía in  
chicahualis huan in tamachilis de Dios**

<sup>18</sup> Huan cuac titanojnotztinemij de que Cristo momiquilij tech in cruztzin, ijcuacán in talticpacuani ten yajtocque tech ixpolihuilis, yejuan nojonques quimatij queme yesquía mijmiquiloyot san nijín totanojnotzalis. Pero para tejuan ten ticyecnelto-catocque tech nijín nemaquixtilis, tejuan cuali ticmatij que ne tanojnotzalis de Cristo, yejua ne techualcuilía ne ichicahualis de Dios. <sup>19</sup> Huan Dios quijtoa itech Itajcuilol-matzin ijcuín:

Niquinpojpolohuilis nintamachilis ten taca tamatinime huan no nicsecotalis nin-tanemililis de neques ten mopohuaj hueyi chihuanime.

<sup>20</sup> ¿Pues para toni cualtías in tanemililisme den ne tamatinime? Pues amo teyi. ¿Huan para toni cualtías in tamachilisme de naquen tanextilía den tanahuatil de Moisés? Pues amo teyi. ¿Huan para toni cualtías ne tajtolme ne aquen sayó xochitajtoa de míac tataman de nican talticpac san? Pues in tamachilisme de taca de nican talticpac, yejua nojón Dios quichihualtij que nochi nojón mijmiquiloyot san iixpantzinco Yejuatzin. <sup>21</sup> Huan Tohueyitajtzin ica Yejuatzin mismo itamachilis cuali moyecantinemi. Huan Yejuatzin quitelij que in talticpacuani amo huelis quix-

matisque Dios ica por yejuan intamachilis san. Ica ya nojón Dios quimonequiltij de que quinmaquixtis nochi neques ten tacuautamatij tech nijín tanojnotzalis de que Cristo momiquilij tech in cruz para quixtahuas nochi nintajtacoluan. Huan nochi nijín ijcón mochiutoc masqui ocsequin talticpacuani quipohua nijín miquilis de Cristo mijmiquiloyot tanojnotzalis san. <sup>22</sup> Huan in taca judíos tajtanij para ma quitacan se mohuiscatequit para huelis yec tacuautamatisque ihuan Cristo Jesús. Huan no in taca griegos quitemojtinemij tamachilisme san de nican talticpacuani san para ica momaquiixtisque. <sup>23</sup> Pero tejuan tanojnotztinemij ica in Tajtoltzin de que ne Cristo momiquilico toixpatca huan quixtahuac totajtacoluan. Huan in tagayot judíos quipinaucamatij nijín tanojnotzalis de Cristo. Huan in taca ten amo judíos, yejuan nojonques quipohuaj nijín tanojnotzalis de Cristo queme yesquía se mijmiquiloyot san. <sup>24</sup> Pero para tejuan ten Dios technotzac huan techijitac ya ma tipohuican ihuantzin, masqui titaca tijudíos oso titaca amo tijudíos, nochi tejuan ticpohuaj que ne tanojnotzalis de que Cristo yejua ne cualcui in chicahualis huan in tamachilis de Dios. <sup>25</sup> Huan masqui in talticpacuani quipohuaj queme se mijmiquiloyotanojnotzalis de Dios, pero ne tanojnotzalis yejua ne cualcui cachi oc tamachilis de Dios. Huan masqui in tagayot quimatij queme se tanojnotzalis ten amo cualcui chicahualis, pero yejua ya nijín quipía cachi oc chicahualis huan que nochi in chicahualis den ongac nican talticpac.

<sup>26</sup> Huan tocnihuan, xiquelnamictican de queniu nannentinemíaj cuac ne achtopa ya Dios namechijitac ya para xipoutinemican ihuantzin. Pero Dios amo quinijitac miacque tamatinime tamachilejque ma poutinemican ihuantzin naquen quiyolnemilijtinemij de que semi tamachilijque nican talticpac san. Huan amo no Dios quini-jitac miacque tayecanani ma poutinemican ihuantzin. Huan Dios amo no quini-jitac ma poutinemican ihuantzin miacque inchancahuan den huejueyi tayecanani de semi mopoutinemij que yejuan tepiluan den tayecanani. <sup>27</sup> Pero Dios quinijitac ya ma yesqui ipueblojcahuan naquen in talticpacuani quinpohuaj que semi yolmijmiquilome. Huan ica por nijín taca ten quinpohuaj mijmiquilome, Dios ica quinpinautía naquen semi momachilíaj tamatinime. Huan Dios no quinijitac ya ma yesqui ipueblojcahuan naquen in talticpacuani quinpohuaj que semi amo teyi cualtíaj. Huan ica por nijín taca ten quinpohuaj queme amo teyi cualtíaj, Dios ica quinpinautij nochi neques ten mochicaucanectocque. <sup>28</sup> Huan Dios no quinijitac ya ma yesqui ipueblojcahuan naquen in talticpacuani quinpohuaj que amo hueyi chihuanime, ten in talticpacuani amo quinmohuiscanojnotzaj. Huan Dios no quinijitac ya ma yesqui ipueblojcahuan naquen in talticpacuani quinpohuaj queme amo teyi ipatiu. Huan ica por nojón taca ten amo teyi ipatiu, Dios ica quinpinautía in talticpacuani naquen sayó mocuajcualnextijtocque. <sup>29</sup> Huan nochi nijín mochiutoc para ma amo aquen huelis mohuejueyichihuas inahuactzin Dios.

<sup>30</sup> Huan Totajtzin Dios techsenolochoj ya ma tisenyolmajsitocan inuan Cristo Jesús. Huan Dios cualtitanic iconetzin Cristo Jesús ma Yejuatzin techyecana ica itamachilis. Huan no Cristo Jesús quixtahuac totajtacoluan huan ijcón huelis Dios techselij ya que amo titajtaque. Huan Cristo Jesús techonyolchিপautinemij huan no techonmaquixtijtinemi. <sup>31</sup> Pues ijcuiliutoc tech in tajcuilolamatzin de Dios ijcuín: “Tacán acsá quinequis mohuejichihuas, ma amo mohueyueyichihua yejua iseltij san. Ta, sayó ma mohuelita tenica Totecotzin Jesucristo quichihuac por yejua”.

**Nican tajtoa de quenín Pablo tanojnotztinemi  
Cristo de que Yejuatzin quicuoupampilojque**

**2** Notasojicnihuan, cuac niyajca para namechnojnotzato, ijcuación namechtapohuij de toni quichihuaco in Iconetzin Dios. Huan amo niyajca para namechxochinojnotzas san ica huejueyi tamachilisme. Huan amo no nicuic in tamachilis de taca san para namechtaneltoctis de Cristo. <sup>2</sup>Huan cuac namohuan niyetoya, ijcuación amo nicnequic nicmatis ocsé taman tamachilis. Ta, sayó namechtapohuij de Cristo Jesús huan de queniu quicuoupampilojque Yejuatzin. <sup>3</sup>Huan nejuatzin cuac namechcalpanoco, ijcuación amo nimochihuac nihueyichiuque. Ta, nimonex-tico namoixpan ca se cuetahuilis huan no nimoucahuihuiyocaya, porín nicmohuili-aya xa amo cualquisas no tequiu namotzalan. <sup>4</sup>Huan cuac namechnojnotzato huan cuac namechtapohuij in tanojnotzalis de Cristo, ijcuación amo nicnequic namech-taneltoctis ica tajtolme san de tagayot tamachilejque. Ta, nicnequic namechtanel-toctis ica in tamachilis den Yecticatzin Espíritu huan ica ichicahualis de Dios. <sup>5</sup>Huan ijción namotacuautamatilis ihuan Cristo ma amo euto tech in tamachilis de tagat. Ta, namotacuautamatilis ma euto tech in chicahualis de Dios.

**Nican tajtoa de queniu Totajtzin Dios motenextijtjnemi  
ica ichicahualis den Yecticatzin Espíritu**

<sup>6</sup>Huan namejuan ten nanyecyolmajsitocque ya tech namotacuautamatilis, tamechnojnotzaj ica tajtolme den cuica tamachilisme de Dios. Pero nijín tamachilis amo pohuij de taca de nican talticpac. Huan nijín tamachilis de Dios amo pohuij ihuan in tayecanani de nican talticpacuani naquen sayó tajtamisque san. <sup>7</sup>Ta, tejuan tamechnojnotztinemi ica nijín ichtacatamachilisme de Dios. Huan nijín tamachilisme, Dios quintaatiliy ya den talticpacuani. Huan Dios ipa ijción tanahuatij ya de que ma quintaatilian nijín tamachilisme desde que achtopa ya que tzinpehuac in talticpac. Huan ijción Dios quichihuac para ma tejuan ma ticpiacan ne nemaquixtilis sen nachipa. <sup>8</sup>Huan nión senme den talticpac tayecanani cajsicamatque nijín ichtacatamachilisme de Dios. Porín tacán yejuan cajsicamatisquáj in tamachilisme de Dios, ijcuación amo quicuoupampilosquáj in Totecotzin Jesucristo in mohuistic Tayecancatzin. <sup>9</sup>Huan ijción mochihuac queme ijcuiliutoc tech in Tajcuilolamatzin de Dios ijcuín:

Totajtzin Dios quiyeyjectalij ya se tetayocolil para nochi neques ten quitasojtaj Dios. Huan nijín tetayocolil de mífac tataman de ayamo aquen quitaj, huan nión queman ya quitecaquilij,

huan nión ya queman ocsé quiyolnemiliayaj de quiseliti.

<sup>10</sup>Huan yejua nijín tetayocolilisme, Totajtzin Dios techajscamatiltía ica in chicahualis den Yecticatzin Espíritu. Huan ijción in Yecticatzin Espíritu quiyectatemolía huan cuali quiyecmati nochi in tamachilisme de Totajtzin Dios huan cajsicamati in tamachilisme den cachi ohuijque.

<sup>11</sup>Huan intzalan in talticpacuani, ¿aconi huelis quimatis in tamachilisme ten quipía se tagat tech niyolo? Amo aquen hueli. Ta, sayó hueli yejua san in tagat motal-namiquilisixmati. Huan no ijción amo aquen huelis quimatis in tamachilisme de Dios. Ta, sayó in Yecticatzin Espíritu, Yejuatzin cuali quiyecmati toni yetoc Dios iyolijtic.

<sup>12</sup>Huan Dios amo techtayocolía ne talnamiquilis ten pohui nican talticpac san. Ta,

Yejuatzin techtayocolij in Yecticatzin Espíritu ten cualcui talnamiquilis de Dios, para ma tejuan ijcón ticajsicamatican nochi in huelilisme ten Dios techtayocolijtinemi. <sup>13</sup>Huan tejuan amo tamechnojnotzaj ica in tamachilisme de tacá san. Ta, tamechmachtijtinemij ica in tajtolme ten Dios technextilij ya ica in Yecticatzin Espíritu. Huan amo no ticuij in tajtolme ten techmachtijque ya in talticpacuani ica yejuan intamachilisuan. Huan namejuan nanquipíaj namoyoljtic in Yecticatzin Espíritu. Huan tejuan tamechyecmejmela huilíaj in tamachilis de Dios ica neichicahualis den Yecticatzin Espíritu.

<sup>14</sup>Huan in tagat ten amo quipía iyolijtic in Yecticatzin Espíritu, yejua ne amo huelis cajsicamatis in tamachilisme ten Dios quitemaca ica in Yecticatzin Espíritu. Huan yejua ne tagat quipohua nijín tamachilis queme mijmiquiloyot san; huan amo hueli cajsicamatis. Porín sayó aquen quipía iyolijtic in Yecticatzin Espíritu, yejua nojón huelis quitatemolis huan cuali huelis quimatis nijín tamachilisme de Dios. <sup>15</sup>Pero nochi aquen quipía iyolijtic in Yecticatzin Espíritu, yejua nojón, quema, yejua cuali huelis quitatemolis huan cuali quimatis nochi in tamachilisme de Dios. Huan amo aquen huelis oc quixcomacas oc ne tagat de itamachilisuan ten quipía iyolijtic. <sup>16</sup>Huan ijcuiliutoc tech in tajcuilolamatzin de Dios ijcuín: “¿Aconi huelis quitamachilisixmatis Totecotzin Cristo?” Pues amo aquen. Huan, “¿aconi huelis quimachtis Dios?” Pues amo aquen. Pero tejuan ticpixtinemij in tamachilis ten Cristo techmacac.

### Nican Pablo tajtoa de queniu yejuan sentequitini de Dios

**3** Notasojcnihuan, amo huelic namechnojnotzac namejuan queme taneltocani ten namechyolyecantinemi in Yecticatzin Espíritu. Ta, namechnojnotzac namejuan queme taneltocani ten amo nanmotecahuilíaj que ma namechyolyecantiu in Yecticatzin Espíritu. Huan ijcón niquijtoa porín namejuan nanmotecahuilijtinemij oc ma namechyecana ne namotalnamiquilis ten cuica tajtacol. Ica ya nojón namejuan nannentinemij oc queme yesquía nanconetzitzin ten amo quiyecajsicamatij in tamachilis de Cristo. <sup>2</sup>Namechmachtia ya ica tanojnotzalis ten amo ohuijque, ijcón queme se tenan quipía se iconetzin huan quimaca sayó leche, huan amo quimaca iconetzin in tacualis de huejueyin. Huan amo nihuelía namechmachtis in tamachilisme ten ohui. Huan axcan ayamo no nihueli namechyecajsicamatiltis porín namejuan ayamo nanyecyecotocque de namotacuatamatilis para nanquiselisque nijín tamachilisme ten cachi ohui. <sup>3</sup>Porín namejuan nanmotecahuilijtinemij oc que ma namechyolyecana ne namotalnamiquilis ten cuica tajtacol. Huan ijcón niquijtoa porín namejuan nanmoyolnexcilijtinemij oc huan no nanmotajtoltehuilijtinemij oc huan no nanmocualancaxejxelolijtinemij se huan ocsé. Huan nanquichiutinemij nochi nijín porín nanmoyecantocque ica ne namotalnamiquilis ten cuica tajtacol. Ica ya nojón namejuan nannentinemij oc queme ne taca ten amo taneltocani. <sup>4</sup>Huan senme de namejuan nanquijtoaj ijcuín: “Njua nipohui ihuan ne itanextililis de Pablo”. Huan ocsé quijtoa no ijcuín: “Njua nipohui ihuan ne itanextililis de Apolos”. Huan como ijcón nanquichiutinemij, ica ya nojón nanmotenextijtinemij que nanmoyecantinemij ica nenamotalnamiquilis ten cualcui tajtacol. <sup>5</sup>Huan, ¿toni chiuque ni Pablo? Pues amo teyi. Huan, ¿toni chiuque ne Apolos? Pues amo teyi. Porín tejuan amo teyi tichihuanime. Ta, sayó tiitequiticahuan de Dios. Huan ica por tejuan namejuan nantaneltocacque tech Totecotzin Cristo. Huan cada senme de tejuan ticchi-

unque totequiu ijcón queme Totecotzin technextilij ma ticchihuacan por namejuan. <sup>6</sup>Nejuatzin nitamachtijtinemic ica in Tajtoltzin de Dios ijcón queme cuac se tatoca ca tagol. Huan in tocníu Apolos cachi oc quiajsicamajxitiytiaya notamachtilis ijcón queme cuac se quiajtzelui in tatoc. Pero Totajtzin Dios quintaneltoctij in tacaquini ijcón queme Yejuatzin quiscaltía in tatoc. <sup>7</sup>Huan naquen tanojnotza ica in Tajtoltzin de Dios huan naquen cachi oc quiajsicamajxitiytiaya in tacaquini, yejuan nojonques majyá amo hueyi tequit quichiutinenque. Ta, sayó Totajtzin Dios in hueyi chiuque. Yejuatzin quipía huelilis para quinajsicamatiltis ica nintacuaumatilis in taneltocani. <sup>8</sup>Huan naquen tanojnotza ica in Tajtoltzin de Dios huan naquen cachi oc quinajsicamajxitiytiaya in tacaquini, yejuan nojonques san se tequitini san. Pero Totajtzin Dios quintaxtahuis sejsé ijcón queme yejuan motequitiltijque. <sup>9</sup>Huan tejuan ticsentequitilijtocque Dios. Huan namejuan nanquinejnehuilíaj queme se milajtal campa Dios motequitilía. Huan namejuan no nanquinejnehuilíaj queme se nepancal ten Dios mochijchihuilijtoc.

<sup>10</sup>Huan nejuatzin nitequitijtinemi ica in huelilisme ten Dios nechtayocolij. Huan nejua nimonejnehuililtía queme se tepantequitique huan nicchijchiutoc tatzinehualonime. Huan ocsequin tequitini de Dios quimajxitiyohue panían de ne tatzinehualonime. Pero cada se tequitique de Dios, ma quiequitztíu cox tamelahua quimajxitiytoc. <sup>11</sup>Porín amo aquen huelis quichijchihuas ocsé tatzinehualoni. Porín yetoc ya tachijchiu ya; huan nijín Yejuatzin Cristo Temaquixtijque den quinejnehuilía queme nijín tatzinehualoni. <sup>12</sup>Huan acsá tequitique de Dios hueli quimajxitía ipan ne tatzinehualoni ica ichihualisuan ten huejcahuati, queme in oro oso in plata oso in tetztzin den cajcahuani cualtzin. Huan ocsé tequitique de Dios hueli quimajxitía ica ichihualisuan ten amo huejcahuas, queme in cuohuit, in cuopach oso in milsat. <sup>13</sup>Huan ijcón cada se tagat ichihualisuan tenica motequitiltía, yejua ne monextis catiyejua huejcahuas. Porín se tonal Totajtzin Dios quiequejecos huan quitas cox catiyejua nojón chihualisme cualtías huan huejcahuas. Huan ne tonal Dios quiequejecos ca tit ne chihualis. Ijcuacón monextiquiu ne cox cuali tachihualisme oso amo. Huan in tit quiequejecos in tachihualis de cada se tequitique ten quichihuac. Huan ne tachihualis ten huejcahuas, yejua ne quinejnehuilía queme in tet ten amo tatamis. Huan in chihualis ten tamis san, yejua ne quinejnehuilía queme in sacat. <sup>14</sup>Huan como acsá cuali motequitilía huan cuica cuali tachihualisme, ica ya nojón yejua ne quinejnehuilía queme se hueyi nepancal ten cuali chijchiutoc. Huan ijcón ne tequitique quiselis se cualtzin taxtahuil ten Dios quimactilis. <sup>15</sup>Huan como acsá motequitilía huan cuica tachihualisme ten amo cualtía, ica ya nojón yejua ne quinejnehuilía queme se tepan ten amo quiechijchiuque. Quijtosnequi que itachihualisuan amo quixicos in tit. Ta, chichinahuis huan nochi tajtamis, masqui yejua mismo in tequitique de Dios momaquixtis queme cuac se tagat quicholohuilía in tit.

<sup>16</sup>Huan cuali xicmatican que namejuan nanmochihuaco ya nancalme de Dios campa mosehuitzinojtica in Yecticatzin Espíritu tech namotalnamiquilis. <sup>17</sup>Huan tacán acsá quichihualtía de que ma motajtacolmaca se tocníu para ijcón cuejuelohuilis ne ichantzín Dios, ijcuacón Dios no cuejuelos ne tagat naquen quichihualtij ma motajtacolmaca in tocníu. Porín ne ichantzín de Tohueyitajtzin Dios, yejua ne tamohuisyojcan. Huan nijín amo ocsé taman cali oc. Ta, namejuan ya nanmochihuaco ya nancalme de Dios. <sup>18</sup>Huan nochi namejuan, ma amo aquen moyolcajayahuaj. Tacán acsá de namejuan nanmohueyimatinemij ica ne tamachilisme de nijín taltic-

pac san, yejua nojón monequi ma mocuepa queme se tagat de amo teyi quimati. Huan sayó ijcón huelis cajsis in yectic tamachilis de Dios. <sup>19</sup> Huan in tamachilis de nican talticpac, Dios quipohua queme se mijmiquiloyot san. Huan ijcuiliutoc tech in Tajcuilolamatzin de Dios ijcuín: “Totajtzin Dios quihuetziltía in tagat tamachilejque ica itamachilisuan ten yejua cuicatinemi para ica tacajcayahuas”. <sup>20</sup> Huan no quijtoa in Tajcuilolamatzin de Dios ijcuín: “Totecotzin cuali quimati que nenca san nintamachilisuan den nochi taca tamatinime”. <sup>21</sup> Ica ya nojón ma amo aquen de namejuan ma mohueyichiucanequi ica in tamachilisme de ne tataman taca ten quinequisquáfaj namechtoctilisquáfaj de nintanextililis. Porín nicnequi xicmatican que nochi tataman ten ongac, nochi nojón Dios quichijchihuac para namechpalehuas namejuan. <sup>22</sup> Huan in Pablo huan in Apolos huan in Cefas, Dios quitechpohualtij namohuan ma namechpalehuican. Huan in talticpac huan in yecnemilis huan in miqulilis no poutocque namohuan san, nochi yejua Dios quintalij ma namechpalehui. Huan nochi ten mochiutoc axcan huan nochi ten mochiutihuitz huan nochi ten ongac poutoc namohuan, nochi yejuan Dios quitallij ma namechpalehuican. <sup>23</sup> Huan namejuan nansenpohuij ihuan Cristo; huan Cristo no senpoutoc ihuan Totajtzin Dios.

#### Nican Pablo tajtoa de itatitaniluan de Cristo huan niitequiui ten cuicaya

**4** Huan ijcón namejuan xitechpohuacan tejuan queme tiitapalehuijcahuan de Cristo ica por namejuan. Huan no tejuan tiquinmachtijtinemij in tacaquini ica in ichtacatamachilisme de Dios, queme se cuali tayecancatequitique. <sup>2</sup> Huan ijcón in tayecancatequitique monequi ma nipatrón quipohua queme se tagat ten quiyecchihuas nochi ten motentelijca ya que quiyecchihuas. <sup>3</sup> Huan ijcón nejuatzin amo nimocuejmoloa de que namejuan xinechixcomacacan de notequiui. Huan amo no nimocuejmoloa de que acsá taca san ma nechixcomacas. Huan amo no nimocuejmoloa de que nejuatzin nimoixcomacas de notequiui. <sup>4</sup> Huan notalnamiqulilis amo teyi ica nechtenextía que nitajtacole. Pero amo por nojón Dios nechpohuas de que nejua cuali nitayecancatequitique. Porín nejua noselti amo nihueli nimoixcomacas san. Ta, sayó Totecotzin san Yejuatzin nechixcomacas que cox melau cuali nitayecancatequitique. <sup>5</sup> Ica ya nojón axcan namejuan amo aquen xiquinixcomacan. Ta, xicchixtocan hasta ne tonal cuac mohualuicas Totecotzin Cristo. Porín tech ne tonal sayó Totecotzin quintenextis senteixteno nochi ten motaatijtoya tech in tayohuayanilot de tajtacol. Huan no Totecotzin quinajsicamatiltis senteixpan nochi tamachilis ten in taca quiichtacayolnemiliayaj quichihuasquáfaj yejuan. Huan ijcón tech ne tonal Dios quinmajmactilis sejsé itaneltocacahuan in tasoicamachilis tenica quinueyipohua, ijcón queme cada se monequi quiselis.

<sup>6</sup> Ica ya nojón notasojicnihuan, nochi nijín nexcuitilme namechtopohuía se cuali para namejuan. Huan nejua ihuan in tocnui Apolos, tejuan timochihuacoj queme tinexcuitilme para cachi oc tamechyecajsicamatiltisque. Huan namechyequilía nochi nijín para ma ximomachtijtiyacan de queniu xichipaucanemican. Huan ma amo xicpanahuican san in tanahuatilme de Dios ten namechijcuilohuilij ya. Huan amo no ma xicueyipohuacan se tequitique san para ica nanquimajpehuasque ya ne ocsé tagat. <sup>7</sup> Huan ¿aconi namechtalij de que namejuan cachi nanuejueyinme huan que ocsequin tocnihuan? Pues amo aquen. Huan tejava, ¿toni ticpixtoc ten Dios amo mitztayocolij? Pues amo teyi. Huan como Dios mitztayocolij ya nochi nijín, ¿queyé timochihua semi tihueyichiuque? ¿Queyé titanemilijtinemi que nochi ten ticpía,



tejua san timoaxcatilía san? Huan, ¿queyé ticpohua nochi ten ticpixinemi que amo huitza de Dios? Pues ma amo xicchihuacan.

<sup>8</sup> Huan axcan nesi nanmomachilislíaj que nochi ten ongac, nochi nanquimatij huan amo monequi ocsé tanextililis de Dios. Huan nesi nanmopohuaj queme rícos huan amo monequi ocsé huelililis de Dios. Huan nesi nanmopohuaj que nantayecanani huan tejuan nantechsecocauque ya. Huan se cuali yesqui como melau nantayecanani ica de melau para ma tejuan no ma tionsepantayecantocan namo-huan. <sup>9</sup> Huan niquixejecoa que tejuan tiitatitaniluan de Totajtzin Dios, huan Yeju-atzin techtenextía senteixteno que tejuan amo teyi tichihuanime. Tejuan timo-chihuacoj queme taca ten tatechihualme ya para ma techmictican. Huan Dios techtenextilijtoc inahuac in ángeles huan no inahuac in talticpacuani para ma toca huetzcacan. <sup>10</sup> Huan in tagayot techpohuaj queme taca mijmiquilome porín titacautamatij ihuan Cristo. Pero namejuan nanquinemilíaj que cachi nantamachilejque ya ica in tamachtilis de Cristo. Pero tejuan in tagayot techpohuaj que amo tihueyichihuanime. Huan namejuan nanquinequilíaj que cachi nanchicau-catayecanani. Huan tejuan in tagayot techquejqueloaj pero namejuan namechmo-huiscañojnotzaj. <sup>11</sup> Huan hasta axcan tejuan tiquijyohuíá máyanti huan tiamictine-mij, huan techpoloa totilmajtzin. Huan in tagayot techcojcocojtinemij huan amo no ticpíaj can ticalyetosque. <sup>12</sup> Huan tejuan semi timosioucatequitijtihualayaj ica tomahuan. Huan cuac in tagayot techtejtelhichuayaj, ijcuacán tejuan tiquinmo-huiscañanquiliayaj. Huan cuac in tagayot techtocatinemíaj para techmictisquíaj, ijcuacán tejuan nochi titaxicoayaj. <sup>13</sup> Huan cuac in tagayot techtejtenehuayaj, ijcuacán tejuan tiquinnejmachnojnotzayaj para ma amo oncani netahuelitalis. Huan hasta axcan in tagayot techpohuaj queme se tajsolpalac san. Huan no techpohuaj queme taca ten yoltzojcuiltique.

<sup>14</sup> Pues nijín namechijcuilohuilía amo para namechpinautis. Ta, namechijcuilo-huilía para ica namechyecnejmachtía porín namejuan nannotasojconehuan. <sup>15</sup> Huan como nanquipiasquíaj májtacti mil tanextiliani ten namechmachtisquía ica in tamachtilis de Cristo, pero amo nanquipíaj miacque namotatuan. Pero nejua namechilía que amo nanquipíaj miacque namotatuan. Ta, sayó nanquipía se namo-tat, naquen namechtaneltoctij ica tacuautamatilis de Cristo. Ta, nejua ya ninamotat de namechiscaltij ya ica in yancuic Tajtoltzin ten cualcui ne nemaquixtilis. <sup>16</sup> Ica ya nojón namechonmohuiscañatatautía xicuiyacan in chipaucanemilis ijcón queme nejua namechnextilij de queniu xichipaucanemican. <sup>17</sup> Huan namechtitanilía in toc-niu Timoteo. Yejua notasoconetzin huan notatacamatcaconetzin ica in tamachtilis de Totecotzin. Huan yejua Timoteo namechelnamictijtiu de queniu nejua nicuica nechipaucanemilis de Cristo, ijcón queme nictenextilijtinemi nohuyampa campa mosentilijtinemij in taneltocani. <sup>18</sup> Huan sequin de namotamachtijcahuan, yejuan nojonques mohueyimatinemij queme tayecanani. Huan yejuan no quinemilijtocque que nejuatzin amo queman niquincalpanotiu oc. <sup>19</sup> Pero como Dios quimonequiltía, ijcuacán niman nicnequi niyás namechcalpanotiu. Huan ijcuac niquixmatis amo sayó nitajtolis san de ne mohueyimatinime. Ta, cachi oc niquixmatis cox melau in chichualis de neques ten mohueyimatinemij ica yejuan in tajtoluan san. <sup>20</sup> Huan Totajtzin Dios techyolyecana amo ica tenesi tajtolme san. Ta, Yejuatzin techy-olyecantinemij ica ichichualis. <sup>21</sup> Huan, ¿toni nanquinequij namejuan? ¿Xe nan-quinequij nanquisentocaj tech namoamocualinemilis? Porín como ijcón nanquichi-

huaj, ijcuación namechcalpanotiu ica se tacot para namechtacaquiltis. Pero como nanchipaucanemij ica ne yolyemanalis, ijcuación namechcalpanotiu ica ne tetasojtalis huan ica ne ten yolicnelilis. Axcán, ¿catijejua nanquichihuatij?

**Nican Pablo quinilij in taneltocan ma  
xiquixcomacan ne naquen ahuilnentinemi**

**5** Pues nican campa tinentinemij motetapohuía que senme de namejuan quipoutoc queme isihuau ne itacpanan. Huan nijín ahuilnemilis semi hueyi tajtacol porín hasta amo quichihuj nijín taman ahuilnemilis in taca ten amo tacuautamatij ihuan Dios. <sup>2</sup>Huan como ijcón mochiutoc, ¿queyé namejuan nanmohueyimatoque? Ta, cachi cuali monequi que ximoyolcocojtinemican ica por ne tajtacol ten mochiutoc namotzalan. Huan in tagat ten tachiutoc ica nijín ahuilnemilis, yejua ne xiquixtica de namohuan huan ma amo mosentilijtinemi namohuan oc.

<sup>3</sup>Pues masqui nejua amo namohuan niyetoc de notacayo pero melau namohuan niyetoc de notalnamiqulis, huan nicnemilijtinemi de namejuan. Huan ica in chicahualis den tocaytzin de Totecotzin Jesús, nejua niqixcomacac ya ne tagat den tachiutoc ica nijín pitzotic nemilis, ijcón queme yesquía niyetosquía namohuan.

<sup>4</sup>Huan monequi ximosepansentilican namejuan ica in chicahualis de itocaytzin den Totecotzin Jesucristo. Huan nejuatzin no niyetos namohuan de notalnamiqulis. Huan no ma yetica in chicahualis den Totecotzin Jesucristo. <sup>5</sup>Huan ne tagat den tachiutoc ica ne pitzotic nemilis, yejua ne monequi xictemactican imaco in amocuali Satanás para ma quitajyohuiltis in Satanás. Huan ijcón quitajtamilis in chicahualis de italnamiqulis den cualcu tajtacol. Huan ijcón ne iyancuic talnamiqulis maquisas tech ne tonal cuac Cristo mohualucas.

<sup>6</sup>Ica ya nojón namejuan amo ximohueyimatinemican. Cualí nanquimatij nijín nexcuitil. “Ijcón queme ne tzictzin tamajmahualis de levadura den cuali quiposonaltía in tix harina, no ijcón se tajtacol queme ne ahuilnemilis, yejua ne quinmajmahua nochi in taneltocani ma motajtacolmacacan”. <sup>7</sup>Xicalantamotacan de namonemilis nochi ne ten amocuali tachihualisme den nanquixitihuitze desde ne achtopa cuac ayamo nantacuautamatíaj ihuan Cristo. Nochi ne amocuali tachihualisme, yejua ne quinehuilía ne soltic levadura ten namechmajmahua ica tajtacol. Huan namejuan xichipaucanemican ica ne yancuic chipaucanemilis ten amo tamanelol ica ne tajtacol, ijcón queme ne yancuic pan ten amo tamanelol ica levadura. Huan ijcón xicchipautiyacan namonemilis porín Totecotzin Cristo momiquilij toixpatca para quixtahuac totajtacoluan. Huan Cristo Yejuatzin quinehuilía queme ne ichcatzin den quimictijthualayaj cada xihuit tech in iluit den tajyohuilis. <sup>8</sup>Huan ma titailuichihuacan ica ne pan ten amo tamanelol ica levadura, quijtosnequi ma tichipaucanemican. Huan ma amo tamanelol ica tajtacol tonemilispán. Ta, ma tinentinemican ica ne chipaucanemilis ten quinejnehuilía in pantixti ten amo tamanelol ica ne levadura. Huan no monequi ma amo tinemican ica ne tacajcayahualis huan ica ne amocuali tachihualis. Porín nijín pitzotic nemilis tamanelol ica tajtacol huan quinejnehuilía in pan ten tamanelol ica ne levadura.

<sup>9</sup>Ica ne achto amatzin ten namechijcuilohuilijca, ipa namechnajnahuatijca que ma amo ihuan ximohuicatinemican in tagayot naquen ahuilcanemi ica sihuame.

<sup>10</sup>Huan nicneyic namechyequilis que semi ximoyecsecocahuacan den nochi in taneltocani naquen ahuilcanemij ica sihuame. Huan no ximosecocahuacan den tanel-

tocani ten xijxicuintanemilijtinemij oso naquen tachtectinemij oso naquen quinmohuistilijtinemij tatadosme. Pero tacán nanquinequisque nanmosecocaahasque de nochi tataman tajtacolejque, ijcuación monequi nanquisasque de nijín talticpac huan nanyasque tech ocsé talticpac. <sup>11</sup> Huan nejua nicneyic namechilis que ma amo ihuan ximohuicatinemican se taneltocque como yejua ahuilcanemi ica sihuame oso xijxicuintanemilijtinemi; oso yejua quinmohuistilía tatadosme; oso yejua taijitojtinemi; oso yejua tajtoleerojtinemi; oso yejua tahuantijtinemi; oso yejua tachtectinemij. Huan como se acsá mopohua queme taneltocque huan no quichiutinemi nijín tataman pitzotic nemilis, pues amo no ihuan xitacuacan. <sup>12</sup> Huan nejua amo nechnamiqui ma niqunixcomacas ne taca ten amo tohuan poutinemij queme taneltocani. Pero namejuantzitzin monequi xiquinixcomacan naquen tohuan poutinemij queme taneltocani. Huan Totajtzin Dios Yejuatzin quinixcomacas neques ten amo tohuan poutinemij. <sup>13</sup> Ica ya nojón namechilía xicalanquixtican ma amo yetoc namohuan ne tagat tajtacole de quipouque que isihuau ne itacpanan.

### Nican Pablo tajtoa de ne tateluililis ihuan neques ten taneltocani

**6** Nictecaquilijtoc que cuac senme de namejuan mocualantía ihuan ocsé tocníu, ijcuación yejua quinequi quiteluliti iixpan juez. Huan namechmoucaita que namejuan nanmoixehuijque ya de nanmoteluilijque ya iixpan jueces huan yejuan amo pohuij tech in tacuautamatilis de Cristo. Namechilía que cachi cuali ximoteluiliiani inahuac in yolchipauque taneltocani ten poutinemij queme ipueblojcahuan de Dios. <sup>2</sup> Huan namejuan nantaneltocani ten nanpoutocque ihuan Cristo. Achá namejuan amo nanquimatij que monequi nanquinixcomacasque in talticpacuani ten amo poutocque ihuan Dios. Huan como nanquinixcomacasque in talticpacuani, ica ya nojón namejuan cuali huelis nanquinixcomacasque acsame taneltocani inixpan in ocsequin tocníhuan taneltocani ica namoneteluililis ten amo semi hueyi ipatiu. <sup>3</sup> Huan xicmatican que tejuan tiqunixcomacasque amo sayó taca. Ta, no tiqunixcomacasque ángeles taquehualme de Dios. Huan como tiqunixcomacasque in ángeles taquehualme de Dios, ica ya nojón cuali huelis tiqunixcomacasque acsame taneltocani de míac tataman neteluililisme de nican talticpac. <sup>4</sup> Huan como namejuan nanmohuicatinemij de nanmoteluilíaj se huan ocsé tocníhuan taneltocani, ica ya nojón amo xicuica xicnextitij namoteluililis hasta campa ne teluillilipan, porín ne juez amo quinamiqui ma no ma mocalaqui campa intequi den taneltocani. <sup>5</sup> Huan nochi nijín namechilía para ma namechpinaucatali namejuan. ¿Xe amo yetoc setzin tocníu de namejuan ten huelis taixejejojque, ten huelis quinixcomacas in tocníhuan ten mocualantijtinemij huan mototeluiliijtinemij inixpan ne jueces ten amo taneltocani? <sup>6</sup> Huan nictecaquilía que se tocníu quitelulía ocsé itaneltoaicniú huan nijín neteluililis mochihuac inixpan in jueces ten amo taneltocani de Cristo. <sup>7</sup> Huan yec melau namechueyipinautía huan cuejueloa namotacuautamatilis como oncatoc ne teluillilis namotechcacopaca. Huan nejua namechilía que cachi cuali ximotecahuilican que ma namechchihuilican tensá chihualis ten amocuali. Huan no namechilía que cachi cuali ximotecahuilican ma namechichtequilican de namoaxca. Huan xicchihuacan ijeón queme namechilía para amo xiyacan inixpan in jueces ten amo taneltocatocque. <sup>8</sup> Huan no nictecaquilía que namejuan nanmomamacuepaj ica míac tataman ten amo cuali chihualis hasta no nanmotatachtequíaj namejuan san de nantaneltocani.

<sup>9</sup>Huan xicmatican namejuan que ne taca den amo yolchipauque, yejuan nojonques quitenextijtinemij que Dios amo quinyolyecantinemij ica ichichualis. Amo ximoyolcajcahuacan namejuan san. Porín xicmatican que Dios amo no quinyolyecantinemi in tagayot como yejuan quichiutinemij nijín taman tajtacol ten yequintzin namechtapohuiti ya: Cuac namicuani ahuilcanentinemij tech in ahuinemilis; cuac se quinmohuistilijtinemi in tatadiosme; cuac ne namicuani ahuilcanentinemij ihuan ocsé taca oso ihuan ocsequin síhuame; cuac ne taca ahuilcanentinemij huan senyetinemij ihuan ocsequin itaicnihuan. <sup>10</sup>Huan Dios amo no quinyolyecantinemi in tagayot ten quichiutinemij nijín taman tajtacol queme ninjinque: Cuac se acsá tachtectinemij; cuac se acsá xixicuintanemilijtinemi san; cuac se acsá tahuan tinemij; cuac se acsá tajtolerojtijtinemij; cuac se acsá moaxcatilía ten teaxca. <sup>11</sup>Huan ijcón nantachiutinemiayaj sequin de namejuan. Pero axcan Dios namechyolajchi huilij ya de namotajtacoluan. Huan Dios namechyolchipahuac ya para ijcón huelis ya nanquitequitilijtinemisque Yejuatzin. Huan no Dios namechpohuac ya que nanyolchipauque ya ica itocaytzin de Totecotzin Jesucristo huan ica in chichualis den Yecticatzin Espíritu den huitza de Totajtzin Dios.

**Nican Pablo quijtoa que monequi xicpohuacan  
namonacayohuan que chipauque ya**

<sup>12</sup>Yec melau ten namejuan nanmotetapohuíaj, que in tocníu taneltocacque amo monequi ma quitacamati oc in tanahuatil de Moisés. Ica ya nojón yejua quijtos que cuali huelis ma quichiutinemi ijcón queme yejua quinequis. Pero namechilía que ne tamachilis amo tenamiqui. Huan amo no tepalehuía ma se quichiutinemi sayó ne ten yejua quinequis. Huan hueyi melau que cuali nicchiutinemi ijcón queme nejua nicnequi. Pero ma amo nimotecahuili que tensá tamachilis de taca san ma yejua nechyecana ica ichichualis. <sup>13</sup>Yec melau ten namejuan nanquilíaj que Dios quichijchi huac in tacualis sayó para topox. Huan Dios no quichijchi huac topox sayó para quiselis tacualis. Pero nochi nijín ome taman se tonal Dios quintajtamis. Huan amo melau que Dios quichijchi huac tonacayo para ma tiahuilnentinemican. Ta, Totajtzin Dios quichijchi huac tonacayo para se quitequitilijtinemis sayó Dios. Huan no Totecotzin Dios quichijchi huac tonacayohuan sayó para ma Yejuatzin quinyecanas. <sup>14</sup>Huan ijcón queme Totajtzin Dios quipanquixtij Totecotzin Jesucristo yoltoc intzlan in ánimajme, no ijcón se tonal Yejuatzin techpanquixtis tiyoltocque intzalan in ánimajme ica ichicauchuelilis. <sup>15</sup>Huan cuali xicmatican sejsé de namejuan que totacayo poutihuitz ihuan Cristo. Ica ya nojón amo quemán nicuis notacayo ten poutoc ihuan Cristo huan nicchihuas ma poutinemij ihuan se síhuaahuilnenque. <sup>16</sup>Huan cuali xicmatican que cuac se tagat cochis ihuan se síhuaahuilnenque, ijcuacón ne ome mochihuauquij sansé san iixpantzinco Yejuatzin. Porín in Tajcuilolamatzin de Dios quijtohua ijcuín: “Ne omen mochihuauquihue sansé san iixpantzinco Yejuatzin”. <sup>17</sup>Pero naquen poutoc ya ihuan Totecotzin, yejua ne mochihuaco ya sansé san italnamiqulilis ihuan Yejuatzin. <sup>18</sup>Ica ya nojón xiccholohuilican de ne ahuilnemilis. Nochi ocsé tataman tajtacol de quichiutinemi se tagat, yejua ne amo moijtaco huilía ninacayo. Pero cuac se tagat motajtacolmaca ihuan se síhuaahuilnenque, ijcuacón in tagat moijtaco huilía ya amo sayó itacayo. Ta, no moijtaco huilía hasta italnamiqulilis. <sup>19</sup>Huan cuali xicmatican namejuan que namotacayo Dios quipohua queme se cali campá tequititinemij in Yecticatzin Espíritu naquen Totajtzin Dios

techmactilij ya. Huan in Yecticatzin Espíritu calyetica tech totalnamiquilis. Huan amo xicnemilican que namejuan san namechnamiqui ya ma ximoyecantinemican tech namonemilis. Ta, ximotecahuilican que ma namechyecana in Yecticatzin Espíritu tech namonemilis. <sup>20</sup> Porín Dios namechcohuaco ya ica hueyi patiyot. Ica ya nojón namechyequilía: Xicmohuiscatacamatinemican Totajtzin Dios amo sayó ica namoyoltanamiqulilis. Ta, no xicmohuiscatacamatican Dios ica namonacayo porín namotalnamiquilis huan namonacayo hualeutoc de Dios.

### Nican Pablo tajtoa de ne ohuijyayome para de namicuani

**7** Huan axcan namechnanquilía de ne matájtanti ten namejuan nannechijcuilo-huilijque: Namechilía que yec melau cuali yesqui que se tagat mocahua iselti huan amo monamictis ihuan se sihuat. Quijtosnequi amo queman quipixtinemi se sihuat queme isihuau. <sup>2</sup> Pero queme nohuiyan ongac ne ahuilnemilis ihuan sihuame, ica ya nojón cada se tagat monequi ma quipía se isihuatzin ten sayó poutinemis ihuan. Huan no ijón cada se sihuat, monequi ma quipía se iyoquich ten sayó poutinemi ihuan. <sup>3</sup> Huan in teyoquich monequi ma quimohuiscapohua isihuau huan ma ihuan cochi ijón queme Dios quimonequiltía. Huan no in tesihuatzin monequi ma quimohuiscapohua iyoquich huan ma ihuan cochi. Huan ijón ma motasojtatiyacan ijón queme Dios quimonequiltía. <sup>4</sup> Huan no namechilía que in tesihuatzin amo quinamiqui moyecanas yejua iselti, porín itacayo nijín sihuat pohui ihuan niyoquich. Huan no ijón ne teyoquich amo quinamiqui ma moyecanas yejua iselti san, porín no nitacayo poutoc ihuan ne isihuatzin. <sup>5</sup> Huan amo ximotatacahualtican de que amo nansencochisque se huan ocsé como amo achto nanmonojnotzque huan nanmoyectencauque de que ijón nanquichihuasque sequin tonalme san, para ijón huelis namotequitiltisque ica in netatatautilis ihuan Dios. Huan ijón satepan ocsepa monequi nansencochisque. Huan como nanmotacahualtíaj ica míac tonalme, achá amo huelis nantaxicotihue de que amo nansencochisque. Huan ijón in amocuali Satanás huelis namechyoltanemililtis de que ximotajtacolmacacan ihuan ocsequin.

<sup>6</sup> Nochi nijín ten namechilijtihuitz xicchihuacan, yejua ne amo namechnajnahuatía xicchihuacan ica hueyi tanahuatil. Ta, nijín ten namechilía, yejua ne cuali taixejecolis de xicchihuacan como nanquimachilíaj tech namotalnamiquilis que quinamiqui. <sup>7</sup> Huan nejua namechyequilía que nicnequisquía que nochi namejuan ximochihuani queme nejua. Pero Totajtzin Dios namechmactilij ya cada senme de namejuan tataman huelilisme. Huan Yejuatzin quimactilij se tocníu se taman huelilis, huan no Yejuatzin quimactilij ocsé tocníu ocsé taman huelilis. <sup>8</sup> Huan axcan namechnojnotztoc namejuan den amo nannamicuani, huan no namechnojnotztoc de namejuan nansihuacahualme. Huan namechyequilía namejuan ten amo nannamicuani que cuali yesqui ximocahuacan queme nanyetinemij huan amo ximonamictican ijón queme nejuztin ni Pablo. Huan ijón para ne sihuacahualme, cuali yesque ximocahuacan queme nejua ni Pablo huan amo ximonamictican. <sup>9</sup> Huan namejuan nantaca, como amo huelis ijón nanmocahuasque de amo nanmonamictisque, ijcuacón cachi cuali ximonamictican. Porín cachi cuali ximonamictican para ma amo xisihuatatanemilijtinemican huan amo no xisihuahuelitztinemican san. Huan in sihuame ma amo xitacatanemilijtinemican huan amo no xitacatahuelitztinemican.

<sup>10</sup> Huan axcan namechnojnotztoc namejuan de nannamicuani ya. Huan namechyecnajnahuatía ijcuín: Se tesihuau ma amo mosecocahua de iyoquich. Huan

amo xicyolnemilican que nijín tanajnahuatilis eutoc de nejua san notanamachilis. Ta, nijín tanajnahuatilis hualeutoc de Totecotzin Dios. <sup>11</sup> Huan tacán in sihuat moyoquichcahuas huan amo quinequis mosentilis oc ihuan iyoquich, ijcuacón ne sihuat ma quijita den nijín ome tamachilis: Ma amo monamicti ihuan ocsé tagat, oso ma ocsepa moyoltalij huan ma sen yetinemiti ihuan ne achto iyoquich. Huan no ijcón namechycnajnahuatía ijcuín que in teyoquich ma amo quiseccocahua ne isihuau.

<sup>12</sup> Huan in ocsequín namicuani niquinnojnotta ica ne notamachilisuan san. Huan amo niquinnojnotta ne namicuani ica tanahuatil de Totecotzin Dios. Huan como se tocnitzin taneltocacque quipía se sihuat den amo taneltocacque huan ne sihuat quinequi nachipa ihuan yetos, pues ijcón in tocnitzin taneltocacque ma quitasoja huan ma amo quiseccocahua ne isihuatzin. <sup>13</sup> Huan como se sihuat taneltocacque no quipía se tagat den amo taneltocacque, huan in tagat quinequi nachipa ihuan yetos, pues no ijcón in sihuat ma quitasoja iyoquich huan ma amo quiseccocahua. <sup>14</sup> Pues ijcón ne teyoquich ten amo taneltocacque, yejua ne mocautoc queme yesquía se tagat ten quiyolpactijtinemi huan quitequitilijtoc Dios, porín nachipa poutoc ihuan isihuau ten quipía tacuautamatilis ihuan Dios. Huan no ijcón in tesihuau ten amo taneltocacque, yejua ne mocautoc queme se sihuat ten quitequitilijtoc Dios, porín nachipa poutoc ihuan iyoquich ten quipía tacuautamatilis ihuan Dios. Huan tacán Dios quipohuas ne teyoquich como amo quitequitilijtoc Yejuatzin, ijcuacón ne ninconehuan Dios quinpoahuasquía queme teconehuan de amo taneltocani. Huan como melau Dios quipohuas ne teyoquich que quitequitilijtoc Yejuatzin, ijcuacón ne niconehuan mopohuaquihue de que yolchipauque iixpantzin Dios. <sup>15</sup> Huan in teyoquich oso in tesihuau ten amo taneltocani, tacán yejuan quinequi mosesecocahuasque, ijcuacón ma mocacahuacan ijcón queme yejuan itanejnequilis. Huan como ijcón quichihuj neques ten amo taneltocani, ijcuacón in tagat oso sihuat taneltocani ten mocacauque ya, yejuan nojonques Dios quinpoahuas tasesecocahualme ya. Porín Totajtzin Dios technotzac de que ma tinentinemican ica se yolsecaucanemilis huan ma amo timotehujtinemican. <sup>16</sup> Huan tejua sihuat taneltocacque, ¿queni huélis ticmaquixtis moyoquich ten amo taneltocacque, como amo nachipa nansenyetosque? Huan tejua tagat taneltocacque, ¿queni no huélis ticmaquixtis mosihuau ten amo taneltocacque como amo nachipa nansenyetosque? Ica ya nojón cachi cuali ma amo ximoseccocahuacan.

<sup>17</sup> Huan namechilía cada senme de taneltocani monequi ma nentinemican queme namicuani oso amo namicuani ijcón queme Dios quimonequiltij ma xinentihuitz ya. Huan ijcón queme nannemíaj ne achtopa ya cuac yequinica Dios namechijitac ma xipoutinemican ihuantzin, ijcuacón xicsentocacan ica ne taman nemilis den nancualcuitihuitze ya ne achtopa ya. Nochi ica nijín notanextililis nitanajnahuatía nohuiyampa campa in tocnihuan mosepansentilijtinemij para quimohuistilisque Dios. <sup>18</sup> Huan namechilía senme de namejuan, cuac Dios namechijitac que xipoutinemican iixpantzinco, ijcuacón ¿xe namejuan ipa namechnescayotijque tech namonacayo para ixnestinemi que nanpoutinemij ihuan Dios? Como namechnescayotijque tech namonacayo, ijcuacón amo ximofuerzahuijcan de queni namechajchihuilisque ne nescayot. Huan como ocsequin de namejuan amo namechnescayotijque tech namonacayo cuac Dios namechnotzac ya que xipoutinemican ihuantzin, ijcuacón amo no ximoyolcuejmolocan que monequi ma axcan ma namechnescayotisque tech namocayo para ixnestinemis que nanpoutocque ya ihuan Dios. <sup>19</sup> Ne-

jua niquixejcoa que amo semi monequi que ma se tanescayotil oso ma amo. Ta, semi cachi monequi ma se quitacamatinemi in tanahuatil ijcón queme Yejuatzin qui-monequiltía ma xicchihuac. <sup>20</sup> Ica ya nojón cada taneltocani monequi ma quisentoca ica ne nemilis ten yejuan quipiayaj ya ne achtopa que Dios quinijitac ma poutine-mican ihuantzin. <sup>21</sup> Huan cuac Dios namechijitac que ximochihuacan taneltocani, masqui ipa nantetequitiliani ten nantacohualme de se patrón, pero ica nijín amo ximoyolcuejmolocan. Huan como huelis nanmochihuasque que amo nantanamacate-quitini oc, ijcuacán xicchihuati que ma amo xitanamacme. <sup>22</sup> Huan cada se tocnü taneltocacque ten tanamacatequitique cuac Dios quijitac que ma yejua tacuautamati ihuan Totecotzin, yejua ne Dios quipohua que axcan amo tanamac ihuan se patrón de nican talticpac. Ta, yejua quitequitilijtinemi ya Totecotzin Jesús. Huan cada se tocnü taneltocacque de ne achtopa amo catca tanamac ihuan se teco, yejua ne axcan no motequitilijtinemi ya huan moteaxcatilij ya queme yesquía tanamac de Cristo. <sup>23</sup> Huan Totajtzin Dios namechcohuac ya ica hueyi patiyó. Ica ya nojón amo ximotec-ahuilican que in tagayot ma namechycantinemican oc tech in amocuali chihualis queme yesquía nanyesque nantequitini nantanamacme. <sup>24</sup> Ica ya nojón nocnihuan namechilía ijcuín: Cada senme de namejuan xicsentocacan ya xinentinemican ijcón queme nanualajtoyaj ya ne achtopa cuac Dios namechijitac queme nantaneltocani.

<sup>25</sup> Huan axcan nocnihuan no namechajsicamatiltía den sihuame taneltocani ten amo namicuani. Masqui nejua amo nicpía se tanahuatil den Totecotzin mismo nech-mactilij para sihuame taneltocani ten amo namicuani, pero nejua namechiliti ijcón queme nejua niquixejcoa. Porín Totecotzin nechyolicnelij ica ne iteicnililis. Ica ya nojón namejuan cuali huelis nantacuautamatisque ica nijín notaxejecolis. <sup>26</sup> Ica ya nojón nejua namechilía ijcuín: Nejua niquixejcoa que in tagat ma mocahua ijcón queme moajsitinemía ta amo namicque oso ta namicque ya. Huan nochi nijín monequi ma xicchiutiyacan porín nijín tonal campa tinentinemij mochiutoc míac cuejmololis. <sup>27</sup> Pero tacán tejua, tocnü, tinamicque ya ihuan mosihuau, ijcuacán amo xicnemili que ma ximosecocahua de yejua. Huan no como ayamo tinamicque ihuan se sihuat, ijcuacán amo xicnemiliti que xictemos sihuat. <sup>28</sup> Pero como ejcos in tonal de timonamictis, ijcuacán amo timotajtacolmacas. Huan no ijcón como se ich-poch monamictía ya, ijcuacán no ijcón yejua amo motajtacolmacas. Pero xicmatican que naquen monamictisque, yejuan nojonques quipiasque ohuijcaoyot tech ninnemil-ispán. Huan namechilía nochi nijín tanextililis ijcón porín nicnequi namechmaquix-tis de míac tataman ohuijcaoyome ten mochiutihuitz.

<sup>29</sup> Nocnihuan nicnequi namechilis que axcan amo huejcahuas oc huan mohualucas Cristo. Huan nican para taixpán nochi neques taneltocani ten namicuani ya, yejuan nojonques monequi ma nentinemican queme amo namicuani para cachi oc ma motequitilijtiyacan para ijcón quiyolpactisque Totecotzin. <sup>30</sup> Huan no ijcón namechilía que nochi in taneltocani ten moyoltequipachojtinemij, yejuan nojonques monequi ijcón queme majyá amo quipiasquáj choquilis. Huan no ijcón neques tanel-tocani ten iluititocque, yejuan nojonques monequi ma yetinemican ijcón queme majyá amo iluititosquáj. Huan no ijcón neques taneltocani ten tacoutiyohue, yejuan nojonques monequi ma yetinemican majyá amo inaxca ya yesqui ten quicouque. Huan nijín como ijcón quichihuaj in taneltocani, ijcuacán yejuan cachi huelis mote-quitilijtinemisque ihuan Totecotzin. <sup>31</sup> Huan ijcón nochin taneltocani ten moix-panoltijtocque ica ten ongac nican talticpac, yejuan nojonques ma yetinemican

queme yesquía amo teyi quitztinemij de ongac nican talticpac. Huan nijín tamachilis ten namechilía, monequi ma ijcón ticchiutiyacan porín nochi ten tiquitztinemij axcan nochi tajtamis san.

<sup>32</sup> Huan nijín namechilía ijcón porín nicnequi amo xicpixinemican ne yolcujmololis tech namonemilipan. Huan cuac in tagat taneltocacque ayamo namicque, ijcuación yejua tanemilitinemi sayó tech itequiu den Totecotzin, huan yejua no oj-cachi oc quitemoa queniu quipactijtiyás in Totecotzin. <sup>33</sup> Pero cuac se tagat taneltocacque namicque ya, ijcuación yejua cachi quiyolnemilijtinemi sayó ten ongac nican talticpac. Huan yejua no oj-cachi oc quitemoa de queniu quipaquilismacatiyás nisi-huau. <sup>34</sup> Huan namechilía que siempre oncati tatamantic tanemililis tech se sihuat ten namicque ya, huan tech se sihuat ten ayamo quipía iyoquichu. Huan ne taneltocacque sihuat ten ayamo namicque, yejua nojón tanemilijtinemi sayó tech itequiu den Totecotzin. Huan yejua quiyoltemoa de queniu cachi oc motemactijtiyás in-ahuactzinco Dios. Huan no quiyoltemoa de queniu quitequitilijtinemis Totecotzin amo sayó ica itacayo. Ta, ica cachi oc ica italnamiqulis. Pero ne taneltocasihuat ten namicque ya, yejua nojón tanemilijtinemi tenica ongac nican talticpac. Huan no oj-cachi oc quitemoa queniu de quipaquilismacatiyás niyoquich.

<sup>35</sup> Huan nochi nijín ten namechilía se hueyi cuali para namejuan. Huan nijín amo namechilía para ica namechtzajtzacuilía tech namotamachilis. Ta, nijín namechilía para que namejuan xiyecchipaucanemican, huan ijcón cachi oc xictequitilijtiyacan Totecotzin huan ma amo teyi tensá namechtacahualtitiu.

<sup>36</sup> Huan tacán se tetat taneltocacque quipía se isihuapil huan quiyolnemilía que yejua ma monamicti, ijcuación yejua nojón cuali yetoc ma quichihuati. Huan tacán quinemilijtihuitz ya ne tetat que quinamiqui ma monamicti ya nisihuapil porín yejua cuali mosihuamajxitij ya, ijcuación monequi ma monamicti. Porín como ijcón quichihuac, amo teyi tajtacol ongas. <sup>37</sup> Huan como se tetat taneltocacque no quiyolnemilía que nisihuapil ma amo monamicti, yejua nojón cuali quichihua. Sayó monequi que in tetat ma quiyecmatinemi que nisihuapil melau amo quinamiqui ma monamicti. Pero no monequi in sihuapil ma quipía paquilis de amo namicque yesqui. Huan como ijcón quichihuaj, ijcuación amo teyi ongac tajtacol cuac in tetat quitemaca nisi-huapil ma monamictiti. Huan nochi nijín ijcón mochihuas porín in tetat quipoutoc nisihuapil nachipa queme iichpoch. <sup>38</sup> Huan ijcón in tetat taneltocacque ten quinamictía nisihuapil, yejua nojón cuali quichihuas. Huan no ne tetat ten amo quitemaca nisihuapil ma monamictiti, yejua nojón no cuali quichihuas. <sup>39</sup> Huan in sihuat taneltocacque ten namicque ya, yejua nojón poutoc ihuan iyoquich ica itanahuatil de Dios mientras niyoquich yoltinemis oc. Huan tacán ne sihuat taneltocacque niyoquich momiquilía, ijcuación yejua nojón amo aquen quitzacuilía oc. Ta, yejua huelis monamictis ihuan aquen yesqui ten yejua cuelitas. Pero sayó monequi que ne naquen ihuan monamictis, ma no taneltocacque de Cristo. <sup>40</sup> Pero ne sihuacahual cachi yol-pactinemis como amo ocsepa monamictía. Yejua nijín nochi notaixejecolis. Pero nicmati que in Yecticatzin Espíritu Yejuatzin nechtenyecantoc.

### Nican Pablo tajtoa de ne tacualis ten quitemactíaj ninixpan in tatadiosme

**8** Huan axcan nocnihan nicnequi namechnojnotzati de ne tacualis ten quinmac-tilíaj in tatadiosme para ica quinmohuistilisque. Huan yec melau que nochi tejuan ticmachilíaj que tictelmatij ya de nochi nijín. Pero xicmatican que míac tata-



man tamachilis sayó techuejueyichihua. Pero ne tetasojtalis de Dios, yejua ne techyolmajxitijtiu para ojcachi oc titacuaumatij ihuan Yejuatzin. <sup>2</sup>Huan tacán se tocniú taneltocacque quiyolmachilía que quihueyimati, ijcuacán yejua nojón ayamo teyi quimati ten melau monequi quimatisquía. <sup>3</sup>Pero como acsá tocniú quitasojta Totajtzin Dios, ijcuacán yejua nojón cachi cuali quichihuas porín Yejuatzin quiyoloximati de itetasojtalis.

<sup>4</sup>Huan axcan nocnihuan namechnojnotzoc de namejuan nantaneltocani ten nancuajtinemij ne tacualis ten quinmactilijcaj ya tatadiosme. Huan yec melau ten namechilía que in tatadiosme de nican talticpac amo teyi quipía nemilis. Huan cachi oc tejuan ticmatocque que ongac sayó setzin ten yec melau Dios. <sup>5</sup>Huan ongac tatadiosme ne ejecaixco huan nican talticpac huan nojonques yejuan in amocuali ejecame ten mopoutinemij tatadiosme. Huan ica nijín amocuali ejecame, melau ongac miacque tatadiosme huan tayecanani de tatadiosme. <sup>6</sup>Pero tejuan cuali ticmatij que ongac sayó setzin ten yec melau Dios, huan Yejuatzin Totajtzin Dios. Porín Totajtzin quichijchihuac nochi ten ongac. Huan Dios no techchijchihuac para ma tictequitilijtinemican Yejuatzin. Huan no ticmatij que ongac sayó setzin san ten melau Totecotzin, huan nijín Yejuatzin ya Jesucristo. Huan nochi ten ongac nican talticpac, nochi mochihuac ica ne ichicahualis de Jesucristo. Huan hasta tejuan no Dios techchijchihuac ica ichicahualis de Jesucristo.

<sup>7</sup>Pero amo nochi nanquimatij nijín ten namechiliti: Sequin de namejuan cuac ayamo nantaneltocayaj de Cristo, ijcuacán nanquimohuistiliayaj tatadiosme ica miac tataman tacualis. Huan axcan cuac ocsequin namechuantí xicuacan nojón tacualis tenica nanquinmohuistilijtinemíaj tatadiosme, ijcuacán namejuan nanquicuaj. Pero satepan nanmoyolcuejmoloaj que xa nanmotajtacolmagacque ya porín nancuajque ne tacualis tenica quimohuistilijque in tatadiosme. <sup>8</sup>Huan yec melau que cuali ticmatij que cuac tensá ticuaj, ijcuacán nojón tacualis amo techchihua que cachi tiyolchipauque iixpantzinco Dios. Huan masqui ticuasque nijín tacualis, pero ipa tyesque tiyolchipauque. Huan masqui amo ticuasque ne tacualis, pero ipa amo timotajtacolcuilíaj ya. <sup>9</sup>Huan namechilía que cuali xicuacan nojón tacualis. Pero namechilía ximoyectachilican achtopa cuac nancuasque nojón tacualis para ma amo xiquinyolxocolican huan xiquinuetziltican tech in tajtacol ocsequin taneltocani ten amo yec yolmajsitocque tech nintacuautamatilis.

<sup>10</sup>Xiquinitacan ten namechilía, tejava ten cuali tiyolmajsitinemi tech motacuautamatilis. Tacán se tocniú taneltocacque ten ayamo yecyolmajsitoc tech itacuautamatilis, tacán yejua no mitzita que tejava timotaliti para titacuas ne campa quinmohuistilía in tatadiosme, ijcuacán ticvoltilana ne tocniú ma no motaliti para quicuas ne tacualis tenica quinmohuistilijque in tatadiosme. <sup>11</sup>Huan ica nemoyolmajxitilis de motacuautamatilis, tejava ticchihualtía que ne tocniú ten ayamo yolmajsitoc tech nitacuautamatilis, que ma ixpolihui ya. Huan ijcón ne tocniú ticpolosnequi ne tenica Cristo momiquilij para quimaquixtis de nitajtacoluan. <sup>12</sup>Huan como tiquinyolxocolía huan tiquinetziltía tech in tajtacol ne tocniuhuan ten ayamo yec yolmajsitocque tech nitacuautamatilis, no ijcón tejava timotajtacolmaca iixpantzinco Cristo huan no ticonyolxocolía Cristo Temaquixtijque. <sup>13</sup>Huan melau niquinyolxocolisquía huan niquinetziltisquía tech in tajtacolnemilis nocnihuan taneltocani como nejava nechitasque que nicuajtoc nojón nacat tenica quimohuistilijque ya in tatadiosme.

Ica ya nojón nejua monequi que ma amo queman nicua oc nojón nacat para amo cachi oc niquintepotamijtiyás tech in tajtacol in nenotaneltoaicnihuan.

**Nican tajtoa de itanahuatil ten cuicatinemi  
Pablo porín yejua se tatitanil de Cristo**

**9** Huan nejuatzin nicpixinemi in tanahuatil de Dios huan amo necholyecantinemi in tanahuatil de Moisés porín nejua nitaneltocacque ten yec yolmajsitinemi tech notacuautamatilis. Huan no ojcachi oc nicpixinemi in tanahuatil queme se itatitanil de Cristo, porín niquitac ya Jesús Totecotzin. Huan namejuantzitzin namechtaneltoctij de Cristo huan nanmochihuacoj ya nannotaquilohuan de notequiu ica in chicahualis den Totecotzin Cristo. <sup>2</sup>Huan masqui ocsequin taneltocani amo nechpohuaj queme niitatitanil de Cristo, pero namejuantzitzin, quema, nannechpoutinemij queme niitatitanil de Cristo porín namejuan namechtaneltoctij ihuan Totecotzin Cristo. Huan nijín namotacuautamatilis quitenextilijtinemi que nejua niitatitanil de Cristo.

<sup>3</sup>Huan sequin taneltocani nechtejteneutinemiáj que nejua amo melau niitatitanil de Cristo. Pero cuac ne tatejtenehuani nechijitoaj, ijcuacón nejua timotajtolpalehuá ijcuín: <sup>4</sup>Nejua melau niitatitanil de Cristo porín nicpixinemi tanahuatil para nicuas huan nitayis nochi ten nechmacasque. <sup>5</sup>Huan nejua no nicpixinemi tanahuatil para nimonamictisquía huan para nicuicatinemis nosihuau taneltocacque, ijcón queme quichiutinemij in ocsequin itatitaniluan de Cristo queme quichiutinemij iicnihuan de Jesús Totecotzin, huan no queme in Pedro quichiutinemi. <sup>6</sup>Xicmatican que nejua huan Bernabé tejuan no ticpixinemij in tanahuatil ijcón queme in ocsequin itatitaniluan de Cristo de que amo monequi ma timoixpanoltijtiyacan ca totequiu san. Ta, xicmatican que tejuan tipixtinemij tanahuatil que in taneltocani ma techixpanoltijtiyacan tech totequiu de titanojnotztinemij de Cristo. <sup>7</sup>Huan no xicmatican que cuac se soldado yohui tech ne tehuilis de guerra, ijcuacón yejua amo motequipanojtiu yejua san. Huan no xicmatican que in tequitique quitoca in uvas. Huan de ompa cuac mochihuac ya, ijcuacón yejua quicua den itaquilohuan. Huan no xicmatican que in tajpiani quinpixtinemij nicuacuejuan huan quitayilijtiyohue in ne leche ten quinpatzquilíaj. <sup>8</sup>Huan nochi nijín ten namechilijtoc amo xicyolnemilican que sayó hualajtoc itech itanemililis se tagat san. Ta, nijín tajtolme ten namechilijtoc no ijcón ijcuiliuto tech in tanahuatil de Moisés. <sup>9</sup>Porín ijcuiliuto ya tech in Tajcuilolamatzin den tanahuatil de Moisés ten quijtoaya ijcuín: “In cuacuohue ten quitejtelticztatinemi trigo ma cacahuiyojquisa, yejua ne amo xictepiquican. Ta, como mayana, huelis ma quicuas ne trigo”. Huan nijín quijtoa Totajtzin Dios amo sayó para quintajtohuis ma tacuacan in cuacuejme. <sup>10</sup>Ta, Totajtzin Dios quijtoa nijín para techajscamatiltis tejuan. Huan nijín nexcuil den cuacuejme technextilía para se cuali tapalehuilis para tejuan. Porín ne naquen tayuntahuijtinemij huan naquen quitejtelticztajtinemij trigo ma cacahuiyojquisa, nochi nojón ome taman ma tequititinemican ica ne tacuautamatilis que se tonal quiselisque taquilot ten tejuan monequi quiselisque. <sup>11</sup>Huan queme tejuan tamechnojnotztinencue ya huan tictoctinencue ya namoyolijtic in Tajtoltzin de Dios, amo semi xicmoucaitan tajcón tejuan tamechilisque que xitechtequipanocan ica ten namejuan nanquipíaj. <sup>12</sup>Huan como ocsequin tamachtiani quipixtinemij nijín tanahuatil para quiselijtinemisque namotapalehuilis, ijcuacón cachi oc tejuan technamiqui ma no ticselican

namotapalehuilis. Pero tejuan amo tictequitiltijtinenque nijín taman tanahuatil de que xinechtequipanojtiyacan. Ta, tejuan cachi oc timotajyohuiltijtihuitze ca nijín totequi para ma amo ica tictzajtzacuilican in Tajtoltzin de Cristo ten cualcui nemaquixtilis. <sup>13</sup> Porín namejuan cuali nanquimatocque ya que ne tiopan tayecanani judíos ten motequitiltijtinemij tiopanijtic, yejuan nojonques moixpanoltíaj ica ne tetayocolil ten quitemacaj ne tiopanijtic. Huan no ijcón sequin tiopixcame judíos motequitiltijtinemij ne tiopanijtic campa quinmictíaj tapialme tenica quimohuistilíaj Totajtzin Dios. Huan yejuan no moixpanoltíaj ica ne nacat ten tatemactilme ya campa ne altar. <sup>14</sup> Huan no ijcón Totecotzin Cristo tanahuatía que neques ten tanojnotztinemij ica in Tajtoltzin ten cualcui nemaquixtilis, yejuan nojonques monequi ma quinixpanoltijtiyacan in taneltocani campa tanojnotzasque. <sup>15</sup> Pero nejua amo queman nictequitiltijtinemía nijín tanahuatil de que xinechtequipanojtinemican. Huan nión no namechjcuilohuilía nijín amat para que namejuan xinechmacacan tensá tapalehuilis. Porín nejua nicnequisquía ma nimomiquili achtopa que namejuan nannechtequipanosque. Porín queme nannechtequipanosque, ijcón nannechajchihuilisquíaj nijín noyolpaquilis de que namejuan amo nannechtequipanotocque.

<sup>16</sup> Huan para nejua cuac nitanojnotztinemi ica in Tajtoltzin ten cualcui ne nemaquixtilis, ijcuacón amo nicchiutinemi para ica nimohueyinequis. Ta, nijín nicchiutinemi porín Totajtzin Dios nechnahuatij ma niquinnojnotztinemi in talticpacuani. Huan nejua semi niteicneltij porín cuali huelis nicselis ne tatzacuilitis de Dios como amo nictetapohuía in yancuic Tajtoltzin de Dios ten cualcui ne nemaquixtilis. <sup>17</sup> Porín como nejua nicchiutinemi nijín tequit ica se cuali tayolnejnequilis de nejua, ijcuacón nejua nicseliti se cuali taxtahuil ten nechmactilis Notajtzin Dios. Pero como amo nicchiutinemi ca se cuali tayolnejnequilis, ijcuacón amo nicseliti ne taxtahuil. Pero nijín tequit ipa ijcón monequi nicchihuati porín Notajtzin Dios ijcón nechtequimactij ya. <sup>18</sup> Huan in taxtahuil de notequiu yejua nijín de nicpixtinemis yolpaquilis porín nejua nitajnojnotztinemi ica in Tajtoltzin de Dios ten cualcui nemaquixtilis. Huan amo teyica namechtopaluiti que ma xinechixtahuilican de notequiu. Huan masqui nicpixtinemi huelilis de namechtopaluis, pero ijcón notanejnequilis de amo namechtopaluis para ijcón nannechixpanoltisque cuac nejua nitanojnotztinemis ica in Tajtoltzin de Dios.

<sup>19</sup> Huan masqui nejua amo nitacohualtequitique de acsá imaco, pero nimochiutinemi queme niyesquía nitacohualtequitique para ijcón cachi oc nihuelis niquintaneltoctis de Cristo ocsequin taca ten tacohualtequitini. <sup>20</sup> Huan no cuac niyetinemi ihuan tagayot ten poutinemij queme judíos, ijcuacón nejua no nimochiutinemi queme niyesquía nijudío. Huan nicchihua nijín taman para ijcón huelis niquintaneltoctis de Cristo ne taca judíos. Huan no nejua nictacamatinemi in tanahuatil de Moisés ijcón queme ne judíos quitacamatinemij. Huan nicchihua nijín taman para que ijcón huelis cachi oc niquintaneltoctis ne judíos de Cristo, masqui nejua amo melau monequi nictacamatinemis nojón tanahuatil de Moisés. <sup>21</sup> Huan no nimochihuati queme niyesquía nitagat ten amo quixmatij in tanahuatil de Moisés. Huan nicchihua nijín taman para que ijcón cachi oc huelis niquintaneltoctis de Cristo neques ten amo quixmatij in tanahuatil de Moisés. Pero xicmatican que ipa nictacamatinemi in tanahuatilme de Dios porín necholyecana in tanahuatil de Cristo. <sup>22</sup> Huan no ijcón cuac no ninentinemi ihuan in taneltocani ten amo yecyolmajsitinemij de nintacuautamatilis, ijcuacón nejua no nimochihua queme niyesquía amo no

niyecolmajsitinemi de notacautamatilis. Huan nicchihua nijín taman sayó para ijcón ojcahi oc niqinyectaneltoctis neques ten amo yecolmajsitinemij de nintacautamatilis. Huan nimochiutinemi ijcón queme itaneltoctis de cada taman se tagat, para ijcón huelis niqintaneltoctijtiyás huan niquinmaquixtis de nintajtacol de cada taman se tagat. <sup>23</sup> Huan nochi nijín nicchiutinemi sayó ica porín Tajtoltzin de Dios ten cualcui ne nemaquixtilis. Huan para no ijcón nicselijtiyás míac tataman tatiocihualis ten hualeutoc tech ne Tajtoltzin de Dios.

<sup>24</sup> Porín namejuan cuali nanquimatocque ya que cuac ongac se motalolis de ne tatanilis, ijcuación motas que nochi motalojtocque pero sayó sesan tatanis, huan yejua ne quiselis ne tetayocolil. Huan namejuan monequi ximotequitiltijtiyacan masqui ca tajyohuilis para ijcón nanquiselisque netetayocolil de Dios, ijcón queme neques ten motaloj huan mosioutijtiyohue para huelis quiselisque ne nemactil de talticpacuani san. <sup>25</sup> Huan neques ten mahuiltiani de tataman ne ahuiltis, yejuan nojonques motacahualtíaj nochi tataman tanejnequilis de sayó ica quijtacohua itacayo. Huan nojón mahuiltiani ijcón mosioutijtiyohue sayó para quitanisque se nemactil de se corona ten tachijchiu de xihuit san ten amo huejcahuas. Ta, ne xihuit niman huaquis. Pero tejuan titaneltocani timotajyohuiltijtiyohue huan timosioutijtiyohue para ijcón ticselisque ne tetayocolil de Dios ten amo queman ixmiquis. <sup>26</sup> Huan nejua cuac nimotajyohuiltijti huan nimosioutijti para Dios, ijcuación amo nicchiutinemi de nencajtíc san. Huan amo sayó nenca san nimotajyohuiltijti queme se tagat cuac quinequi tatehuis huan sayó ejecaixco san panoa nimahuan. <sup>27</sup> Ta, nejua nictajyohuiltía notacayo huan nicchihualtía notacayo ma nechtacamatiu. Porín como amo nimotajyohuiltisquía para ma nechtacamati notacayo, ijcuación huelis que Yejuatzin amo nechpohuas que nechnamiqui nicselis neitetayocolil, masqui nejua miacque niqintaneltoctijtihualaya ica in tanojnotzalis de Cristo.

### **Nican Pablo quinnejmachtij in taneltocani ma amo quinmohuistilican ne tatadiosme**

**10** Huan axcan nocnihuantzitzin, nicnequi xicmatican que Totajtzin Dios quin-palehuiaya nochi de ne tohuejcautatuan huan quinyecanaya ica ne mohuistic mixti ten Dios quintaliliaya. Huan ica ne mixti Dios quinpanoltij tohuejcautauan tech ne hueyíat ten monotza chichilat. <sup>2</sup> Huan ne mixti quinyecanaya ne tohuejcautatuan. Huan cuac yejuan panocque itech ne chichilat hueyíat, ijcuación nochi yejuan mochiuque taahuilme de Dios huan ijcón yejuan moyectencauque de que quitacamatinesisque ne tanahuatijque Moisés. <sup>3</sup> Huan no ijcón ne tohuejcautatuan quicuajtiyajque ne tacualis cuac Totajtzin Dios quinalpampixohuiliaya desde ne eluiyactzinco. <sup>4</sup> Huan no ijcón ne tohuejcautatuan tayitiyaj ne atzin ten Dios quintayocoliaya. Ica ya nojón yejuan tayayaj nojón atzin ten pepexocaya tech ne hueyi tet. Huan ne hueyi tet, Yejuatzin ne in Cristo Temaquixtijque ten quinsehuicatiaya huan quinyolsehuijtiaya tech ninopan ne tohuejcautatuan. <sup>5</sup> Huan masqui ne tohuejcautatuan tacuayaj huan atiyaj ica ihuelilis de Dios, pero amo cachi miacque quitacamatinesíaj Dios huan amo no quipactiyaj Totajtzin Dios. Ica ya nojón yejuan momiquilijtiyajque tech ne ninopan campa tayiucan.

<sup>6</sup> Huan nochi nijín ten namechilijtoc axcan, melau ijcón mochihuac para ijcón techyecajsicanextilía que tejuan ma amo ticvolnejnequican ticchihuasque tensá ten amo cuali chihualis ijcón queme quichiutinenque ne tohuejcautatuan. <sup>7</sup> Ica ya nojón

namechilía que amo xiquinmohuistilijtinemican oc nojón tatadiosme ijcón queme quichiutinenque sequin de ne tohuejcautatuan. Huan ijcón namechnejmachtía porín ijcuiliutoc tech in Tajtoltzin de Dios ijcuín: “Huan in pueblojuani judíos peuque mosesecosentiliayaj para tatacuasque huan tahuanasque. Huan de ompa pehuayaj ahuilnemiáj ihuan ocsequin taca huan sihuame”.<sup>8</sup> Huan no namechnejmachtía nocnihuan que ma amo se ahuilnentinemi ihuan ocsequin namicuaní queme quichiutinenque ne tohuejcautatuan. Huan ica porín ninahuilnemilis Dios quintatzacuilitij. Huan yejuan momiquilijque sempoal huan eyi mil tagayot tech se tonal san.<sup>9</sup> Huan amo xicchiutinemican ten amocuali chihualisme sayó para nanquitasque cox melau Dios namechtatzacuilitis. Porín ne tohuejcautatuan ijcón quiyolnemilíayaj. Ica ya nojón Totajtzin Dios quintatzacuilitij ca nijín taman tatzacuilitis cuac quintepiniayaj cohuame.<sup>10</sup> Huan no namechilía ijcuín que amo xiquijitocan Totajtzin Dios de queniu techpalehuijtiu. Porín sequin de ne tohuejcautatuan ijcón quichiuque. Ica ya nojón in ángel de Dios quinmijmictico ica ichicahualis.

<sup>11</sup> Huan nochi nijín impan mochihuac ne tohuejcautatuan huan ijcuiliutoc nochi tech in Tajtoltzin de Dios para technejmachtis de nochi tejuan ten axcan tinentinemij tech nijín tonalme ten tacuitapan tonalme.<sup>12</sup> Huan no namechilía nocnihuan, que naquen moyolmachilía que yejua semi se yec tacuautamatcatagat ya, yejua nojón monequi ma quieyquita niyalis para ma amo huetziti tech in tajtocol.<sup>13</sup> Huan in tajyohuilis ten namejuan nanquijyohuijtiyohue, yejua nojón in mismo tajyohuilis ten no cuicatinemij in ocsequin taneltocani. Pero xitacuautamatiyacan namejuan que Totajtzin Dios ipa quitamichihuati ten ne achtopa ica moyectencahuac ya. Huan cuac Yejuatzin namechtalilijtiyás tajyohuilisme de namotacuautamatilis, ijcuacón cuali huelis nanquixicojtiyasque. Huan cachi oc namechilía que cuac Dios namechtalilijtiyás nojón tajyohuilisme, ijcuacón Yejuatzin no namechmacas huelilis para ma amo ximotajtacolmacatiyacan. Ta, cuali huelis nanquisasque de ne tajyohuilis. Huan ijcón huelis nanquixicojtiyasque de nochi nijín tajyohuilis.

<sup>14</sup> Ica ya nojón namechilía notasojicnihuan, que ximosecocaahuacan huan ximochololtican de ne tatadiosme huan amo xiquinmohuistilijtiyacan oc nojón tatadiosme.<sup>15</sup> Huan namechnojnotza ijcuín porín namejuan nanyolmajsitocque ya tech namotacuautamatilis. Ica ya nojón namejuan cuali huelis nanquixejecosque cox cualtía nochi nijín ten namechilijtoc.<sup>16</sup> Huan ijcón cuac tejuan titayij nijín mohuiscatayil den vino tech in santa cena, ijcuacón ticmohuiscachihuj. Huan nijín quijtosnequi que cuac titayij nijín vino, ijcuacón ixnestinemi que tejuan tisepanmajsitinemij se huan ocsé ica por ne iesyotzin de Cristo ten quimimiloco cuac Yejuatzin quicuoupampilojque. Huan no ijcón cuac tejuan ticuaj ne mohuiscapantzin tech in santa cena, ijcuacón no ticmohuiscachihuj. Huan nijín quijtosnequi que cuac ticuaj nijín pantzin, ijcuacón ixnestinemi que melau tejuan tisepanpoutinemij se huan ocsé ica ne inacayo de Cristo Yejuatzin cuac quimictijque huan quicuoupampilojque tech in cruztzin.<sup>17</sup> Huan masqui tejuan timiacque titaneltocani pero ticsepanmasehuaj nijín mohuiscapantzin ten quitenextijtoc que ongac sayó se temaquixitijque ten monotza Cristo. Huan queme ticsepanmasehuaj nijín mohuiscapantzin, yejua nijín quijtosnequi que tisepanpoutinemij se huan ocsé ihuan Cristo.

<sup>18</sup> Huan namejuan nannocnihuan nantaneltocani xicajsicamatican ne chihualis ten quichiuque in pueblojuani de Israel. Porín pueblojuani de Israel, yejuan nojonques quinmictiayaj tapialme para ica quimohuistiliayaj Totajtzin Dios. Huan nochi

neques ten quimasehuayaj ne nacat, yejuan nojonques ixnestinemíaj que sepanpoutinemíaj se huan ocsé ihuan Totajtzin Dios. <sup>19</sup> Huan ica nijín nexcuitil ten namechtalilij ya, amo porín nicnequi niquijtos que nijín tatadiosme quipíaj huelilis. Huan ne nacat tenica quimohuistilijque tatadiosme, amo no nicnequi namechilis que ne nacat cachi chipahuac huan que ocsequin nacat. <sup>20</sup> Nicnequi namechnojnotzas de nochi neques ten amo taneltocani de Dios. Huan cuac yejuan quimohuistilíaj ne tatadiosme ica tacualis, ijcuacón yejuan quinmohuistilíaj ne amocuali ejecame huan amo quimohuistilía Totajtzin Dios. Huan nejua namechilía ijcón porín amo nicnequi que namejuan no xipoutinemican ihuan ne amocuali ejecame. <sup>21</sup> Porín xicmatican amo huelis nantayisque ne mohuiscatayilis ten techmaca Totecotzin Cristo huan nimampa no ma xitayican nijín tayil ica quinmohuistilíaj ne amocuali ejecame. Huan amo no huelis nanmotalitihue campa ne mesa de Totecotzin Cristo para nanquimasehuasque ne mohuiscapantzin, huan nimampam ma xicmasehuacan ne tacualis tenica quinmohuistilíaj ne amocuali ejecame. Huan amo huelis nanquichihuasque nijín ome taman como melau nanyectacuataminemij de Cristo. <sup>22</sup> Huan nicnequi xicmatican que cuac namejuan nanquimohuistilíaj ne tatadiosme, ijcuacón nanquiyolcualantíaj in Totecotzin Jesucristo. Huan, ¿xe tejuan cachi ticpíaj huelilis huan que Yejuatzin? Pues amo melau.

### **Nican tajtoa Pablo de queniu ma tiquinpalehuican huan tiquintasojtacan taneltocani**

<sup>23</sup> Huan hueyi melau cuac in taneltocani quijtoaj ijcuín: “Nochi huelis ticchihuaj ten ticnequisque huan amo aquen huelis techtachualtis”. Pero nejua namechilía que amo nochi technamiqui ma ticchihuacan. Huan sequin no quijtoaj ijcuín: “Nochi huelis ticchihuasque ten ticnequisque”. Pero nejua namechilía que amo nochi tatanman chihualis techyolmajxitis tech totacuatamatis. <sup>24</sup> Ica ya nojón namechilía que monequi ma tictemocan de queniu huelis tiquinyolmajxititiasque in ocsequin taneltocani huan ma amo tictemocan sayó tapalehuilis para tejuan san.

<sup>25</sup> Huan no namechilía nocnihuan, que xicuacan nochi nacat ten nancajsij campa quinamacaj. Huan amo monequi ximatajtinemican oc de can cualcuique ne nacat. Huan ijcón amo ximoyoltehuijtinemican de que achá nanmotajtacolmagacque ya como nanquicujque ne nacat tenica quimohuistilijque in tatadiosme. <sup>26</sup> Huan amo no monequi ximatajtanican de can huala ne nacat porín nochi in talticpac huan nochi ten ongac nican talticpac, yejua ne nochi ne iaxca Totecotzin Cristo.

<sup>27</sup> Huan ma tiquijtocan que acsá ten amo taneltoaca ihuan Dios huan yejua namechyolehuas xitamajsehuati ichan. Huan como namejuan nanquinequij nanyasque nantamajsehuatihue, ijcuacón xiyacan. Pero xicuacan nochi ten namechuantisque. Huan amo monequi ximatajtantocan oc de can quicouque in nacat. Huan amo ximoyolmoutican que xa nanmotajtacolmagacque ya ica ne tacualis ten nanquicujque ya. <sup>28</sup> Huan tacán acsá namechilía que nojón nacat ten nanquicujque, yejua nojón ica quinmohuistilijque in tatadiosme, ijcuacón amo xicuacan para ma amo xicyolxocolican ne naquen ijcón namechilij ya. Huan amo no xicuacan ne nacat para ma amo xicyoltanemilijtinemican que xa nanmotajtacolmagacque ya. Porín xicmatican que in talticpac huan nochi ten ongac talticpac, yejua ne nochi iaxca Totecotzin Jesucristo. <sup>29</sup> Porín nejua namechnojnotztoc de se iyoltanemililis de ne ocsé tagat ten amo quicuas ne tacualis tenica quimohuistili-

jqe in tatadiosme. Huan amo namechnojnotztoc de namoyoltanemililis de namejuan porín namejuan cuali nanuelisque nancuasque ne nacat. Porín cuali nicmati que senme de namejuan nanuelisquíaj nannechilisque nijín: “Nejua amo nimotacahualtis de que amo nicuas ne nacat sayó porín se tagat san teilijtinemi que ne nacat yejica quimohuistilijque tatadiosme”.<sup>30</sup> Huan no huelis senme de namejuan nanquijtosque nijín: “Amo cualtía que namejuan nannechijitosque cuac nejua nicuas ne nacat tenica quimohuistilijque tatadiosme. Porín nejua ipa nictasojcamachilía ya Notajtzin Dios de nochi ten nicuaj ya”.

<sup>31</sup> Pero nejua ni Pablo namechilía nocnihan, que cuac nanquimasehuasque tensá huan cuac nantayisque tensá huan no cuac nanquinequisque nanquichihuasque tenesi namotequiu, ijcuación xicchiutiayacan sayó para ma xicueyicualnextican Totajtzin Dios. <sup>32</sup> Huan nicnequi amo aquen xiquinyolxocolican ne pueblojuani judíos huan amo no xiquinyolxocolican neques ten amo poutinemij judíos. Huan nión no xiquinyolxocolican ne itaneltocacahuan de Totajtzin Dios. <sup>33</sup> Xicchiutinemican namejuan ijcón queme nejua nimofuerzajuitihuitz de niquinpalehuis neques ten nechcaquilíaj. Huan ijcón huelis quipiasque yolsehuilis nochi naquen nechtilíaj nonemilis. Porín nejua amo nictemojtinemi sayó para nejua nimopalehuis san. Ta, nejua nictemojtinemi de queniu niquinpalehuijtinemis ocsequin para ma yejuan no ma quiapiacan ne nemaquixtilis de Cristo.

**11** Huan nicnequi que namejuan no xichipaucanentinemican ijcón queme nejua nichipaucanentinemi. Porín nejua nichipaucanemi ijcón queme Totecotzin Cristo chipaucanemico.

### **Nican Pablo tajtoa de queniu ma moyecuiyacan in sihuame taneltocani cuac yejuan mosentilíaj para quimohuistilisque Totajtzin Dios**

<sup>2</sup> Nocnihuantzitzin, nannechueyiyolpaquilismacaj porín namejuan nachipa nannechelnamictinemij huan no porín nanquitacamatinemij nochi nijín neyolmajxtilisme ten namechmactilijca ya. <sup>3</sup> Pero nejua nicnequi xicajscamatican nijín tanojnotzalis que in Totajtzin Dios, Yejuatzin quiyecantinemi Cristo. Huan in Cristo Yejuatzin quinyecantinemi itaneltocacahuan. Huan no ijcón mochihuas que in taneltocacque teyoquich, yejua ne quiyecantinemi isihuau. <sup>4</sup> Huan no namechilía que tacán se tocníu mocuapiqui cuac motatatautilía ihuan Cristo, ijcuación yejua mopinaucatalía. Huan no ijcón tacán se tocníu mocuapiqui cuac pehua quinnojnotta ica ne tanahuatil ten quimactilij ya Dios, ijcuación yejua mopinaucatalía. <sup>5</sup> Huan no namechilía que tacán se sihuat taneltocacque amo mocuapiqui cuac motatatautilis ihuan Dios, ijcuación yejua mopinaucatalía. Huan no tacán se sihuat taneltocacque amo mocuapiqui cuac pehua quinnojnotta in taneltocani ica ne tanahuatilme ten quimactilij ya Dios, ijcuación no yejua mopinaucatalía. Huan ijcón queme mopinautía se sihuat taneltocacque cuac amo mocuapiqui, no ijcón mopinautía cuac moalaxcuatequis in sihuat. <sup>6</sup> Huan tacán se sihuat taneltocacque amo mocuapiqui, ijcuación cachi cuali ma moalaxcuatequis sepa san. Porín tejuan tiquixejecoaj que mohueyipinautía se sihuat taneltocacque cuac moalaxcuatequis oso cuac mocuatequis huan quicahuas sayó tzietzin itzon. Ica ya nojón monequi ma mocuapiqui in sihuat. <sup>7</sup> Huan in tagat taneltocacque monequi ma amo mocuapiqui porín yejua tamatinemi ijcón queme Totajtzin Dios tamatinemi. Huan no ma amo mocuapiqui in tagat porín yejua cuicatinemi huan quitenextijtinemi icualtziyo de Dios. Pero

in sihuat monequi ma mocuapiqui porín yejua quipixtinemi huan quitenextijtine-  
mij ihuelilis den tagat. <sup>8</sup> Porín xicmatican que cuac Totajtzin Dios quichijchihuac in  
tagat, ijcuacán amo quicuic imajsica in sihuat para quichijchihuas in tagat. Ta, To-  
tajtzin Dios quicuic imajsica in tagat para ijcón quichijchihuas in sihuat. <sup>9</sup> Huan no  
xicmatican, nocnihan, que Totajtzin Dios quichijchihuac in sihuat para quipale-  
huis in tagat. Huan Totajtzin Dios amo quichijchihuac in tagat para quipalehuis  
in sihuat. <sup>10</sup> Ica ya nojón in sihuat monequi ma mocuapictinemi ica ihuelilis de  
iyoquich para ijcón ixnestinemis que yejua quitacamatinemi iyoquich. Huan ijcón  
monequi quichiutinemis in sihuatzin para ma amo quinyolxocolis in ángeles itequit-  
icahuan Dios. <sup>11</sup> Nocnihan, cuac tejuan tipoutinemij ihuan Totecotzin, ijcuacán  
in tagat mosenpalehuá ihuan in sihuat. Huan no ijcón in sihuat mosenpalehuá  
ihuan in tagat, huan amo xeluitinemij. <sup>12</sup> Huan nochi nijín ten namechilijtoc se  
hueyi melau. Porín in sihuat Dios quichijchihuac ica por in tagat. Huan no hueyi  
melau que in tagat yoliqui de se sihuat. Pero nochi nijín ome taman mochiutoc  
porín Totajtzin Dios ijcón quimonequiltía. <sup>13</sup> Nocnihan, nicnequi que namejuan  
cuali xicsenixejecocan nijín tamachilis. ¿Xe cualtías que in sihuat cuac motatautilis  
ihuan Dios ma amo mocuapiqui? Pues, niquixejecoa de que amo cualtías. <sup>14</sup> Huan  
nochi in talticpacuani cuali quimatinemij que in tagat mopinaucamati cuac yejua  
tzonueyac yesqui. <sup>15</sup> Huan nochi in talticpacuani no cuali quimatinemij que cuac  
se sihuat tzonueyac, ijcuacán itzon quicualnextijtine- nesihuat. Huan nijín itzon  
ica cuapictinemi ma ijcón cuicatinemi porín Dios quitiochihuac in sihuat que yejua  
tzonueyac yesqui. <sup>16</sup> Pero tacán acsá tocníu taneltocacque quinequi quixnamiquis  
nijín notanojnotzalis, ijcuacán yejua ne monequi ma quimati que amo teyi ongac  
ocsé tanahuatil totehcacopaca. Huan amo no ongac ocsé taman tanahuatil campa  
mosentiláj in ocsequin taneltocani para quimohuistilisque Dios.

**Nican Pablo quijtoa que in taneltocani de Corinto amo  
quiyecchihuayaj in mohuiscatacualis de Totecotzin**

<sup>17</sup> Pero amo huelis namechpaquilismacas ica nijín noamatajcuilol de notanex-  
tililis. Porín nesi nicmati que cuac namejuan nanmosepansentiláj para nanquimo-  
huistilisque Dios, ijcuacán amo nanmosepanpalehuáj. Ta, sayó nanmocualancaxe-  
jxeloaj. <sup>18</sup> Huan ijcón namechilía porín nechmatiltijque ya que namejuan cuac nan-  
mosentiláj para nanquisepancuasque ne mohuiscatacualis den Totecotzin Cristo,  
ijcuacán namejuan nanpehuaj nanmocualancaxeloaj. Huan nijín tepitzin san nic-  
neltoca que melau ijcón mochiutoc que me nechiluijque. <sup>19</sup> Huan niquixejecoa que  
ipa ijcón mochihuas que nanmocualancaxejxelosque seseco para ijcón ixnesis acon-  
ime cachi in yec yolmajsitocque tech nintacuaautamatilis ihuan Cristo. <sup>20</sup> Huan cuac  
ijcón namejuan nanpehuaj nanmocualancaxejxeloaj, ijcuacán amo melau nanquise-  
pancuatij ne mohuiscatacualis den Totecotzin Cristo. <sup>21</sup> Huan ijcón namechilía porín  
nechtapohuijque ya que cuac nanmosentiláj para nantamasehuasque, ijcuacán cada  
senme de namejuan nanmoachtohuilíaj huan nanpehuaj nanmotamacaj namejuan  
san. Huan ocsequin mocahuaj mayantocque huan ocsequin hasta mohueyihuín-  
tíaj. <sup>22</sup> Huan, ¿queyé ijcón nanquichihuaj? Porín nicmati que namejuan nanquipíaj  
namochanuan campa huelis nantacuasque huan nantayisque. Pues ompa namochan-  
uan xitacuacan huan xitayican. Porín cuac nanmosentiláj huan elihuis nantamase-  
huaj, ijcuacán nanquinmohuispoloaj in ocsequin taneltocani. Huan no nanquinpin-



autíaj ne naquen amo teyi quipíaj toni quimasehuasque. Huan axcan, ¿toni nanmoyolilíaj que namachilis? ¿Xe nanmolíaj que namechpaquilismacati como ijcón nanquichiutinemij? Pero xicmatican que amo huelis namechpaquilismacati.

### **Nican Pablo tajtoa de in mohuiscatacualis den Totecotzin Jesucristo**

(Mt. 26.26-29; Mr. 14.22-25; Lc. 22.14-20)

<sup>23</sup> Porín nochi nijín tamachtilis ten nejua namechnextilí, nochi nijín nicselij ya itencopaca de Totecotzin Jesucristo. Huan nijín nochi mochihuac tech ne yohual cuac quitemactijque Jesús inmaco in tayecanani judíos para quimictijque. Huan tech ne tajyohuac Totecotzin Jesucristo momaaquij pantzin. <sup>24</sup> Huan cuac quitasojcamachilij ya Totajtzin Dios, ijcuacán Cristo quinxejxelo huilij in pan imomachtijcahuan huan quiniliaya ijcuín: “Xicuacan nijín pantzin porín yejua nonacayo ten quinextía que nimomiquiliti ya por namoixpatca. Huan nochi nijín xicchihuacan sayó para ica nannechelnamictisque Nejuatzin”. <sup>25</sup> Huan no ijcón quichihuac Jesús que cuac quitamicuajque ya ne pantzin, ijcuacán Yejuatzin momaaquij ne tayil huan quiniliaya imomachtijcahuan ijcuín: “Huan nijín tayil yejica ixnesi que nimoyectencahuac ya que nimomiquiliti huan nicmimilos noesyotzin para huelis Dios namechtapojpoluis de namotajtacoluan. Huan nijín tayil cada vez cuac nantayisque, ijcuacán sayó ica xinechelnamictinemican”. <sup>26</sup> Huan ijcón cada tonal cuac nanquicuasque nijín pantzin huan nantayisque nijín tayil, ijcuacán cachi oc namejuan nanquitenextilijtinemisque que Yejuatzin momiquilico nican talticpac. Huan ijcón nanquichiutiyasque hasta in tonal cuac mohualuicas Cristo.

### **Nican Pablo quinyecnextilij queniu monequi se quimasehuas ne mohuiscatacualis den Totecotzin**

<sup>27</sup> Huan ijcón nejua namechilí que aquen yesqui quimajsehuas nojón pantzin huan tayis nojón tayil de Totecotzin huan como amo quichihua ica ne yolchipahualis, ijcuacán yejua ne motajtacolmaca. Huan ijcón quimohuispoloo ya ne inacayo in Cristo huan no quimohuispoloo ne ieszotzin de Cristo. <sup>28</sup> Ica nojón namechnejmachtía que cada taneltocacque monequi ma moyoltatemoli xa ongac tajtacol oc iyolijtic. Huan como amo cajsí tajtacol oc, ijcuacán cuali ma quicuati ne pantzin huan ya ne tayil. <sup>29</sup> Huan como se tocníu taneltocacque quicua huan tayi huan amo moyoltatemolía, yejua ne quimohuispoloo Cristo inacayo ten Yejuatzin quitemactij tech in cruz. Huan ijcón ne tocníu cachi oc mocuilía se hueyi tatzacuilitis porín quicuj huan tayic se mohuiscatacualis huan amo yolchipahuac. <sup>30</sup> Huan como nanquicuj nijín pantzin huan nantayij nojón tayil huan amo nanyolchipaucanemij, ica ya nojón miacque de namejuan nancocolispeutiohue huan miacque namejuan nancocoliscacuetahuij huan sequin de namejuan momiquilijque ya. <sup>31</sup> Pero como tejuan timoyecyoltatemolíaj huan amo ticatáíaj totajtacol, ijcuacán Totecotzin amo monequi techixcomacas oc. <sup>32</sup> Pero Totecotzin Cristo techixcomacas cuac quitas que tejuan amo tichipaucanentinemij. Huan Yejuatzin ijcón techtatzacuilitis para ma amo topan ejcos ne hueyi tatzacuilitis de Dios ten huetziqiu inpan in talticpacuani ten amo taneltocani.

<sup>33</sup> Huan ijcón nocnihuan, cuac nanmosentilisque para nanquisepancuasque in mohuiscatacualis de Totecotzin, ijcuacán ximochiacan se huan ocsé para ijcón huelis nanquisepancuasque ne mohuiscatacualis de Totecotzin. <sup>34</sup> Huan como acsá se toc-

niu mayanatiu, yejua ne ma achto tacua ichan. Huan como namejua nanquisepan-masehuasque ne mohuiscatacualis ica yolchipahualis, ijcuacón Yejuatzin amo mon-equi namechtatzacuiltis. Huan yejua san nijín ten namechilía. Pero ocsequin ohuij-cayot nicyectalitiu oc hasta in tonal cuac niyás namechitatu.

**Nican Pablo tajtoa de in huelilisme ten in  
Yecticatzin Espíritu techmajmactilijtoc**

**12** Nocnihuan, ongac ocsequin tamachtilis huan nijín nicnequi xismatican de queniu in Yecticatzin Espíritu techmajmactilía in huelilisme. <sup>2</sup>Namejua cuali nanquimatij que cuac ayamo nantaneltocayaj de Cristo, ijcuacón nanmotec-ahuilliyaj ma namechyecanacan ne tatadiosme ten sayó ijticacauticque. <sup>3</sup>Ica ya nojón nicnequi que axcan xismatican que como acsá tajtojtinemis ica ihuelilis den Yecticatzin Espíritu, yejua ne amo huelis quiijos ijcuín: “Ma tatelechihual in Jesús”. Huan no xismatican que amo aquen huelis quiijos nijín tajtol: “Jesús Yejuatzin Totecotzin”, como yejua amo tajtojtinemi ica ihuelilis den Yecticatzin Espíritu.

<sup>4</sup>Pero nocnihuan no ongacque míac tataman huelilisme ten huelis quiselisque in taneltocani, pero nijín huelilis sayó in Yecticatzin Espíritu techmajmactilía. <sup>5</sup>Huan ongacque míac tataman de queniu timotequitilitisque. Pero sayó Totecotzin Cristo techtequimajmactía. <sup>6</sup>Huan no ongacque míac tataman de queniu tequititinemis in Yecticatzin Espíritu; pero sayó Totajtzin Dios quitemaca in chicahualis para cada se itaneltocacahuan. <sup>7</sup>Huan Totajtzin Dios quinmaca cada se itaneltocacau se huelilis tenica Dios quinmachililtía que in Yecticatzin Espíritu yetica ninyolijtic ya. Huan nijín huelilis ten ticselfaj, yejua ne tictequitiltijtinemij intzalan in taneltocani para ica timosepanpalehuijtinemij. <sup>8</sup>Huan ica chicahualis den Yecticatzin Espíritu, Totajtzin Dios quinmaca sequin taneltocani in huelilis para tanojnotztinemi huan quinajsi-camatiltía in tocnihuan den Tamachtilis ten quinpola. Huan no ica in chicahualis de Yecticatzin Espíritu, Totajtzin Dios quinmaca ocsequin taneltocani in huelilis para tanojnotztinemi ica hueyi cuatamatilis. <sup>9</sup>Huan sequin taneltocani quiselfaj in huelilis de hueyi tacuautamatilis ica in chicahualis den Yecticatzin Espíritu. Huan ocsequin taneltocani quiselfaj tataman huelilisme para quinpajtisque in cocoyani ica in chicahualis de Yecticatzin Espíritu. <sup>10</sup>Huan sequin taneltocani quiselfaj de Dios in huelilis para quichiutinemis que mohuiscatequime. Huan sequin taneltocani quiselfaj de Dios in huelilis para tanojnotztinemi ica ne tanahuatil ten quinmac-tilij ya Dios. Huan Totajtzin Dios quintayocolía sequin taneltocani in huelilis para cajsicamatiquihue catiyejua in eجات ten Yecticatzin huan catiyejua in amocuali eje-came. Huan no Totajtzin Dios quintayocolía sequin taneltocani ne huelilis para taj-tos ica ocsé tataman tajtolis. Huan ocsequin taneltocani quiselfaj de Dios in huelilis para quinmejmelaहुलisque toni quiijosnequi neques ten tajtoaj ica ocsé taman taj-tolis. <sup>11</sup>Huan sayó Yejuatzin Espíritu quichiutinemij nochi nijín tequime. Huan sayó Yejuatzin quinmajmactijtinemi in huelilisme cada se tocnihuan taneltocani ijcuón queme Yejuatzin quimonequiltía.

**Nican Pablo tajtoa de queniu nochi tejuan tipoutinemij sayó ihuan Cristo**

<sup>12</sup>Huan Totecotzin Cristo Yejuatzin queme yesquía se tacayot ten quipía míac omitzitzin. Huan masqui ongac míac tataman omitzitzin, pero nochi nijín senpoutoc huan momajxitía sayó se tacayot. <sup>13</sup>Huan tejuan masqui tijudíos oso tigriegos,

huan masqui titacohualtequitini oso amo titacohualtequitini, pero nochi tejuan cuac techahuijque, ijcuacán in Yecticatzin Espíritu techsenolochoj ma tisenpanpohuican ihuan Cristo. Huan tejuan masqui timiacque tisenpohuij ihuan Cristo ijcón queme ne omitzitzin senpohuij itech se tacayot san. Huan sayó in Yecticatzin Espíritu techyolpexontij tinochi huan techyolsehuáj ica ichicahualis.

<sup>14</sup> Huan cuali xismatican que se tacayot quipía míac omitzitzin, huan amo sayó se taman san. <sup>15</sup> Huan amo huelis tometz mosecocahuas den totacayo como yejuan quijtosquía ijcuín: “Como nejua amo nimayit, ica ya nojón amo nipohui ihuan nijín tacayot”. <sup>16</sup> Huan amo no hueli tonacayo quijtosquía ijcuín: “Como nejua amo niixtololo, ica ya nojón amo nipohui ihuan nijín tacayot”. <sup>17</sup> Huan tacán nochi toomiyohuan tequitisquía queme tequitij toixtololohuan, pues amo huelis titacaquisquía. Huan no tajcón nochi toomiyohuan tequitisquía queme tequitij tonacasuan, pues amo no huelis titajnequisquía. <sup>18</sup> Pero Totajtzin Dios quisasaloj cada omitzin tech totacayo ijcón queme Yejuatzin quimonequiltij. <sup>19</sup> Huan tajcón nochi toomiyohuan tequitisquía ica se tequit san, ijcuacán amo huelisquía majsitos totacayo. <sup>20</sup> Huan masqui tejuan ticpáj míac taman omitzitzin pero nochi nijín momajmaxitía para mochihuas sayó se totacayo.

<sup>21</sup> Huan toixtololo amo huelis quilis tomay ijcuín: “Tejua mayit, amo semi timitznequij xiyeto tohuan”. Huan notzontecon amo no huelis quilis tometzuan ijcuín: “Tejua metzti, amo semi timitznequij xiyeto tohuan”. <sup>22</sup> Huan no xismatican que tech totacayo yetocque sequin toomiyohuan ten ixnesij que cachi amo quipáj chicahualis. Pero yejuan nojonques cachi oc monequi ma majsitinemican para ijcón quichicahualtía totacayo. <sup>23</sup> Huan no tech totacayo yetocque ocsequin omitzitzin ten amo semi ticmohuiscajá. Pero yejuan nojón cachi oc tictaquentfaj ca cuali. Huan no tech totacayo yetocque ocsequin omitzitzin ten ticpohuaj que ma amo monextijtinecan. Huan yejuan nojonques tiquintaatijtine. <sup>24</sup> Pero tech totacayo amo tiquintaatijtine nojón toomiyohuan ten cachi cualtzin monextijtine. Huan Totajtzin Dios ijcón quisasaloa in omitzitzin de totacayo. Huan nojón omitzitzin ten mota amo semi hueyi nitequiu, yejuan nojonques ojcachi oc ticmohuiscapixtine. <sup>25</sup> Huan Totajtzin Dios quisasaloa totacayo para ma amo se toomiyo mohueyinequi huan quisencahua in ocsequin iomiicnihuan. Ta, Totajtzin Dios quichihuac que cada se toomiyohuan ma mosenquitzquijtocan huan ma mosepanpalehuican. <sup>26</sup> Huan Totajtzin Dios quisasaloa totacayo que cuac se toomiyotzin moxocolis, ijcuacán nochi in ocsequin toomiyohuan toneucayetosque. Huan no Totajtzin Dios quichihuac que cuac se toomiyotzin ticmohuiscapixtine porín cuali tequititine, ijcuacán nochi in ocsequin toomiyotzitzin ihuan mopactfaj. Huan no ijcón tejuan tiitaneltocacahuan de Cristo, tisenpanpoutine. Huan no timosenquitzquijtocque tisepanpoutine ihuan Cristo huan timosenquitzquijtocque para timosepanpalehuijtiyasque.

<sup>27</sup> Huan nochi namejuan nocnihuan, nansenpoutine ihuan Cristo huan no cada senme de namejuan namochihuacoj queme yesquía nanitacayohuan de Cristo. <sup>28</sup> Ica ya nojón Totajtzin Dios quinquemajmactij ya in tocnihuan taneltocani ica huejueyi tequit. In Totajtzin Dios achto quinquemajmactij sequin taneltocani ma yejuan yesque itatitaniluan de Cristo. Huan nimampa Totajtzin Dios quinquemajmactij sequin taneltocani para ma tanojnotztinecan ica tanahuatilme ten Dios quinmacilijti ya. Huan ica eyi taman Dios quinquemajmactij sequin taneltocani para ma

tamachtijtinemican ica in Tajtoltzin de Dios. Huan no ocsequin taneltocani Dios quinquimajmactij para ijcón huelis quichiutinemisque mohuiscatequime. Huan no ocsequin taneltocani Totajtzin Dios quinquimajmactij para tapajtijtinemisque. Huan no Dios quinquimajmactij sequin tocnihuan para tapalehuijtinemisque. Huan no Totajtzin Dios quinquimajmactij sequin taneltocani ma tayecantinemican intzalan in taneltocani. Huan ocsequin Dios quinquimajmactij ma quipiacan ne huelilis para tajtos ica ocsé tataman tajtolis. <sup>29</sup> Huan amo nochi in taneltocani tocnihuan yesque itatitaniluan de Cristo. Huan amo nochi tanojnotzaj ica tanahuatilme ten Dios quinquimactilía. Huan amo no nochi yesque tamachtiani. Huan amo no nochi huelis quichiutinemij mohuiscatequime. <sup>30</sup> Huan amo no nochi in taneltocani quipiasque tataman huelilisme para tapajtisque. Huan amo no nochi quipiasque huelilis para tajtosque ica ocsé tataman tajtolis. Huan amo no nochi tocnihuan quipixtinemij huelilis de quinmejmelaquilisque in tocnihuan de toni quijosnequi ne ocsé tataman tajtolis. <sup>31</sup> Huan semi monequi ximofuerzajuican de xictajtanilican Totajtzin Dios ma namechmacti ne huelilisme ten cachi tepalehuía. Pero nejua axcan namechnextiliti se taman tamachilis ten cachi cualtzin.

### Nican Pablo tajtoa de ne tetasojtalis de Dios

**13** Huan tacán nejua nitajtoa ica tajtolme den taca san, oso no nitajtosquía queme in ángeles tajtoaj huan como amo nicpixtinemi tetasojtalis, ijcuacán notajtolis mocaquis que se cuetax tambor ten sayó cocomoca oso mocaquis queme se tepos tzitzilica ten amo teyi cualtía. <sup>2</sup> Huan tacán nejua niquinnojnotztinemi in taneltocani ica ne tanahuatiltzitzin ten Dios nechmactilía; huan no tacán cuali nicmatinemi nochi in ichtacatamachilisme de Dios, huan como amo nicpixtinemi tetasojtalis, ijcuacán nejua amo teyica nicuáltía. Huan tacán no nicmati nochi tamachilis ten ongac huan como amo nicpía tetasojtalis, ijcuacán nejua amo no teyica nicuáltía. Huan tacán nicpixtinemi ne hueyi ajsica tacuautamatilis tenica huelis quinajchihuaj tepeme huan como amo nicpía tetasojtalis, ijcuacán nejua amo teyi nicuáltía. <sup>3</sup> Huan tacán nejua niquinxexelohuilía in pobres nochi noricojyo huan como amo nicpía tetasojtalis, ijcuacán nochi nencajti san ten nicchiutinemis. Huan tacán no nejua nimotemactía ma nechmictican huan ma quichijchinocan notacayo porín notacuautamatilis huan como amo nicpía tetasotalis, ijcón nochi nenca san ten nicchihua.

<sup>4</sup> Ne naquen quipixtinemi tetasojtalis de Dios, yejua ne yolyemanic huan quixicoa tajyohuilis. Porín ne naquen tetasojtatinemi, yejua ne quipía teicnelilis huan amo no quiyolmachilía nexijcolot. Huan ne naquen tetasojtatinemi, yejua ne amo mohueyinctinemi huan amo no mohueyimatini. <sup>5</sup> Huan ne naquen tetasojtatinemi, yejua ne amo quinpinautía ica nitajtoluan huan amo no quinemilijtinemi sayó ten niaxca. Huan ne naquen tetasojtatinemi, yejua ne amo moyolcualantijtinemi huan amo no quielnamictinemi tetajtoluan. <sup>6</sup> Huan ne naquen tetasojtatinemi, yejua ne amo ica paqui ne naquen motajtolmaca. Huan ne naquen tetasojtatinemi, yejua ne sayó moyolpactijtinemi ica in yec melahuac Tajtoltzin de Dios. <sup>7</sup> Huan ne naquen tetasojtatinemi, yejua ne quixicojtiu nochi míac tataman tajyohuilisme. Huan ne naquen tetasojtatinemi, yejua ne amo quicactinemi xolopijyot san. Ta, quineltoctatinemi sayó ten cuali. Huan ne naquen tetasojtatinemi, yejua ne nachipa quiyolicachixtinemi Dios itanejnequilis, huan nachipa quiyohuijtinemi tataman ohuijgayome.

<sup>8</sup> Huan in tetasojtalis, yejua ne amo queman tamis. Pero ejcos in tonal cuac amo monequis oc ne tanahuatilme ten ticseláj de Dios. Huan no hualas in tonal cuac amo se tajtoltinemis oc ica ocsé tataman tajtolis. Huan no motalis in tonal cuac nochi tataman tamachilisme tajtamis ya. Pero in tetasojtalis, yejua ne amo queman tamis. <sup>9</sup> Huan tejuan ticajsicamatij sequi san tamachilis de Dios huan no sayó ica tepitzin san ticselijtinemij tanahuatil ten Dios techmactilía para tiquinnojtztinemi ica in Tajtoltzin de Dios. <sup>10</sup> Pero ne tonal cuac nochi ticajsaicaxmatisque in tamachilis de Dios, ijcuacón nochi in tejtepititzin ten ticmatinemiáj nochi nojón pojpolihuis san. <sup>11</sup> Huan cuac nejua nipilioc nicatca, ijcuacón nitajtojtinemiá queme se pili. Huan no nitanemiliaya sayó queme se pili. Huan no nitaixejejoaya sayó queme se pili. Pero cuac niyolmajsic ya queme se cuatamatcatagat, ijcuacón nicauiyá nochi ne tamachilisme den cuac nipili oc nicchiutinemiá. <sup>12</sup> Ica ya nojón axcan tepitzin san ticyeajsaicaxmatij in tamachilisme de Dios, ijcón queme se tagat ten amo moyequixitac ica ne tescat ten ixtzitziquiltic. Pero tech ne tonal ten ejcos, ijcuacón timoixitasque ihuan Totajtzin Dios. Huan axcan sayó tejtepititzin san nicajsicamati in Tajtoltzin de Dios. Pero tech ne tonal ten ejcotoc, ijcuacón nicyeajsaicaxmatis nochi itamachilis de Dios ijcón queme Totajtzin Dios nechyecajsaicaxmatinemi nejua. <sup>13</sup> Huan axcan namechilía que ma titacuautamatiyacan huan ma ticyolicachiacan huan ma titetasojtatiyacan. Huan nijín eyi taman tamachilis amo queman tajtamitiu. Pero in tamachilis ten cachi hueyi, yejua nijín in tetasojtalis.

#### Nican Pablo tajtoa de in huelilis para se tajtoltinemis ica ocsé taman tajtolis

**14** Nocnihuan, melau namejuan ya ma xicpixtiyacan ne tetasojtalis huan no cachi oc xicontajtanilican Totajtzin Dios para ma Yejuatzin namechmactilis de tataman huelilisme den Yecticatzin Espíritu. Pero no cachi oc xicontajtanilican ne huelilis para queniú huelis nantanojnotztinemisque ica tanahuatilme ten Dios namechualmacatoc mosta mosta. <sup>2</sup> Porín ne tocníu taneltocacque cuac tajtojtos ica ocsé taman tajtolis, ijcuacón yejua ne monojnotzto ihuan Totajtzin Dios huan amo ihuan in tagayot. Huan amo aquen cajsicamatilisque ne tocníu porín yejua tajtojtoc ica ne ichtacatamachilisme de Dios ica ihuelilis ten Yecticatzin Espíritu. <sup>3</sup> Huan ne tocníu taneltocacque ten tanojnotza ica ne tanahuatilme ten Dios quihualmactilijtoc, yejua nojón cachi oc quinyolmajxitis in taneltocani huan no quinmachililtis in taneltocani que monequi ma tatacamatican huan no quinyolsehuijtinemis in taneltocani. <sup>4</sup> Huan ne tocníu taneltocacque ten tajtojtos ica ocsé taman tajtolis, yejua ne cachi oc moyolmajxitijtoc yejua san. Pero ne naquen tanojnotza ica ne tanahuatilme ten Dios cualmactilijtoc, yejua ne cachi oc quinyolmajxitijtiú in tocnihuan taneltocani cuac yejuan mosepansentiláj para quimohuistilisque Dios.

<sup>5</sup> Huan nejua ni Pablo nicnequía majcán nochi namejuan nanquipiasque ne huelilis para nantajtosque ica ocsé taman tajtolis. Pero cachi oc nicnequisquía xicipacan huelilis para queniú cachi oc nantanojnotztinemisque ica ne tanahuatilme ten Dios namechualmactilijtoc mosta mosta. Huan ne naquen tanojnotza ica tanahuatil de Dios, yejua ne cachi quipía huelilis huan que ne tocníu ten tajtoa ica ocsé tajtolis. Pero cuali se quichihuas se tajtojtos ica ocsé taman tajtolis como yetoc se tocníu naquen no quipía huelilis para queniú quinmejmelaहुilis in ocsequin taneltocani de toni quijtosnequi ne ocsé taman tajtolis. Huan como ijcón se quichihuas, ijcuacón cachi oc moyolmajxitisque nochi in tocnihuan taneltocani.

<sup>6</sup>Notasojcnihuan, tacán nejua niyás namechcalpanotiu, huan ma namechnojnotza ica ne ocsé taman tajtolis, ijcuacón amo teyi tapalehuilis nanquiselisque namejuan tech namotacuaumatilis. Pero melau nanquipiasque hueyi tapalehuilis como nejua namechnojnotza ica tensá ichtacatamachilis ten sayó Dios quipixtica. Huan no hueyi tapalehuilis nanquipiasque como nejua namechnojnotza ica ne ichtacatamachilisme de Dios. Huan no hueyi tapalehuilis nanquipiasque como namechnojnotza ica ne tanahuatilme ten Dios nechualmactilijtoc. Huan no hueyi tapalehuilis nanquipiasque como namechnojnotza ica nochi tamachilis ten Dios nechnextilij ya.

<sup>7</sup>Huan namejuan cuali nanquixmatij nojón tapitzme huan nojón arpatatzotzon que yejuan amo yoltinemij queme taca. Huan cuac se quintzotzona huan amo se quipatilía ca nejmach in caquistilis den tatzotzon, ijcuacón amo se quimatis de toni mochihuati. <sup>8</sup>Huan in tapitz ten quilíaj trompeta como amo quiyecpitzaj, ijcuacón amo aquen huelis moyectatalisque para motehuisque tech nojón ne tehuilis de guerra. <sup>9</sup>Huan no ijcón mochihua cuac namejuan nanmosentilíaj para nanquimohuistilisque Dios. Huan cuac acsá namechnojnotza ica ne ocsé tataman tajtolis, huan amo namechnojnotza ica tajtolme ten nancajsicamatisque, ijcuacón ¿aconi huelis cajsicamatis? Pues amo aquen cajsicamatis porín majyá tanojnotzotoc ejecaixco san. <sup>10</sup>Porín hueyi melau que ongac míac tataman tajtolme intzalan in talticpacuani. Huan no hueyi melau que cada se tataman tajtolis cuica tamachilisme. <sup>11</sup>Porín tacán nejua amo nicajsicamati cuac pehua nechnojnotza ica ocsé taman tajtolisme, ijcuacón nejua nipohuiqui iixpantzinco ne tanojnotzque queme yesquía nejua nianaltecacoyot. Huan yejua no mochihuaqui noixpan queme yesquía no se analtecacoyot. <sup>12</sup>Ica ya nojón cuali queme nanquiyolnemilijtinemij porín nanquiyolnjectinemij de nanquipiasque nojón tataman huelilisme den Yecticatzin Espíritu. Pero cachi oc namechilía monequi xictemocan nojón huelilisme tenica huelis nanquiyolmajxitijtiyasque in ocsequin tocnihuan taneltocani.

<sup>13</sup>Cuac se tocnui taneltocacque tajtoa ica ocsé taman tajtolis, ijcuacón yejua monequi ma quitajtaniliti Totajtzin Dios que Yejuatzin ma quimactili se acsá tocnui in huelilis para quinmejmela huilis in tacaquini toni quijtosnequi ne ocsé taman tajtolis. <sup>14</sup>Huan cuac nejua nimotatautilía ica ocsé taman tajtolis, ijcuacón nimotatautilijtoc ica notalnamiqulil san. Pero amo nicajsicamati tonica nitajtojtoc ica notamachilis. <sup>15</sup>Huan, ¿toni monequi ma nicchihuati? Pues monequi que cuac nimotatautilis, ijcuacón ma nimotatautili ica notalnamiqulil huan no monequi ma nimotatautili ica notamachilis para ijcón huelis nicajsicamatis. Huan no cuac nejua nicantaros, ijcuacón monequi nicantaros ica no talnamiqulil. Huan no monequi nicantaros ica notamachilis para ijcón huelis nicajsicamatis.

<sup>16</sup>Huan cuac tejua titajtojtos ica ocsé taman tajtolis, ijcuacón tictasojcamachilijtoc Totajtzin Dios sayó ica motalnamiqulil. Huan tacán mitzactoc se taneltocacque ten amo yec yolmajsitoc, ijcuacón yejua ne amo huelis mohuan mosentatautilis de motasojcamachilis porín ne tocnui amo cajsicamatis. <sup>17</sup>Huan cuac tejua titajtojtos ica ne ocsé taman tajtolis, ijcuacón cuali huelis tictasojcamachilijtos Totajtzin Dios. Pero amo teyica tiqinvolmajxitía den nintacuaumatilis ne tocnihuan taneltocani ten amo cajsicamatij ne ocsé taman tajtolis. <sup>18</sup>Huan nejua nicueyitasojcamachilijtoc Notajtzin Dios porín hueli nitajtoa ica ne ocsé taman tajtolis. Huan nijín nicchiutinemi cachi oc huan que nochi namejuan. <sup>19</sup>Pero cuac mosentilíaj in tocnihuan tanelto-

cani, ijcuación nejua cachi oc nicuelita niquinnojnnotzas sayó ica macuil tajtolme ten melau yejuan quiyecajscamatisque para ma cachi oc yejuan huelis quinmachti-jtinemisque ocsequin tacaquini. Huan nejua cachi oc nicuelita niquinnojnnotzas in taneltocani ica nijín macuil tajtolme huan que niquinnojnnotzasquía ica májtacti mil tajtolme de ne ocsé taman ten amo cajscamatij in tacaquini. <sup>20</sup> Nocnihuantz-itzin, amo nicnequi xiyoltanemilijtinemican queme yesquía nanconeme de namo-tamachilis. Ta, nicnequi xiyoltanemilijtinemican ca cuali huan xiyolmajsitocan de namotacuautamatilis. Sayó nicnequi xinentinemican queme ne coneme porín yejuan amo yoltanemilijtinemij ten amocuali chihualis. <sup>21</sup> Porín tech Tajcuiloltanahuatil de ne tanahuatiani de Dios ijcuiliutoc ijcuín: “In Totecotzin quijtoa ijcuín: Niquinnojnnotzas nijín nopueblojcahuan ica tajtolme ten amo huelis cajscamatisque. Huan no niquinnojnnotzas nijín nopueblojcahuan ica tajtolme ica ne ten tempan huetziz de analtecocayome. Pero nopueblojcahuan amo nechcaquilisque”. <sup>22</sup> Huan ijcón cuac acsá tocníu tajtoa ica ne ocsé taman tajtolis, ijcuación Dios quinnojnnotzac huan quinnejmachtía neques ten amo tacuautamatij ihuan Cristo. Huan Dios amo technojnnotztoc tejuan de tiitaneltocacahuan. Pero cuac acsá tocníu technojnnotztoc ica ne tanahuatilme ten Dios quihualmactilij ya, ijcuación Dios technojnnotztoc tejuan huan technejmachtía de tiitaneltocacahuan. Huan Dios amo quinojnnotztoc neques ten amo tacuautamatij ihuan Cristo. <sup>23</sup> Ica ya nojón cuac nochi namejuan nanmosentilíaj ya para nanquimohuistilisque Dios, ijcuación amo cualtías como nannochin nanpehuaj nantajtoaj ica ne ocsé taman tajtolis. Porín tacán calaquij neques ten amo yec yolmajsitocque de nintacuautamatilis huan no calaquij sequin ten amo tacuautamatij ihuan Dios, yejuan nojonques quiyolnemilisque huan quijtosque que namejuan xa nanyolpoliutinemij san. <sup>24</sup> Pero semi cachi cualtía como nannochin nanpehuaj nantajtosque ica ne tanahuatilme ten Dios namechualmactilía ya. Ica ya nojón masqui calaquis se tagat ten amo taneltocque oso calaquis ocsé tagat ten amo yec yolmajsitinemi de nintacuautamatilis, yejuan nojonques Dios quintaneltoctis ya que yejuan tajtacolejque. Huan ijcón yejuan moyoltatemolisque de nintajtacoluan. Huan ijcón mochihuaj porín yejuan cajscamatisque ya de tonica nanquinnojnnotztocque ica por ne tanahuatilme ten Dios namechualmactilijtoc. <sup>25</sup> Huan ica ne tanahuatilme ten Dios namechualmactilij, Yejuatzin quintenextis senteixteno ne ninichtacatacama-chilisuan de tajtacol ten motaajtoc tech ninyolijtic den tacaquini. Huan cuac cajscamatisque ya ninichtacatamachilisuan de tajtacol, ijcuación yejuan moixacatentoctihuetzisque huan quinmohuistilisque Totajtzin Dios. Huan quijtosque ijcuín: “Hueyi melau que Totajtzin Dios namohuan yetinemi”.

**Nican Pablo tajtoa de queniu nochi xicchihuacan  
namocultos ica nejmach huan ica cuali**

<sup>26</sup> Huan nocnihuan, nanquichiutinemij ijcuín: Cuac nanmosentilijtinemij para nanquimohuistilisque Dios, ijcuación senme de namejuan nantanojnnotzaj ica salmos. Huan ocsequin nanquinyolmajxitíaj in tacaquini. Huan ocsequin nantajtoaj ica ne ocsé taman tajtolis. Huan ocsequin nantamachtijtinemij ica tensá tanextililis ten Dios quinonmonextilij ya. Huan ocsequin nanquinmejmelaquilí de toni quijtosnequi ne ocsé taman tajtolis. Huan nochi nijín cuali ten nanquichiutinemij. Pero sayó xicchihuacan nochi para ojcachi oc nanquinyolmajxitijtiyasque in tocnihuan taneltocani de nintacuautamatilis. <sup>27</sup> Huan cuac se tocníu pehuas tajtos ica ne ocsé

taman tajtolis, ijcuación cualtías como tajtosque ome oso eyin tocnihuan; pero amo cachi oc. Huan ma mopapatatiyacan de tajtosque. Huan no monequi acsá se tocnui ma quinmejmela huili de toni quijosnequi ne ocsé taman tajtolis. <sup>28</sup> Pero tacán amo aquen se tocnui yetos para quinmejmela huilis nijín ocsé taman tajtolis, ijcuación cachi cuali ma amo tajtocan ica ocsé taman tajtolis intzalan in taneltocani. Ta, cachi cuali ma monojnotzto yejua san ica ne ocsé taman tajtolis oso ma monojnotzto san ihuan Dios. <sup>29</sup> Huan ijcón cuac se tocnui pehuas tajtos ica ne tanahuatilme ten Dios quinmactilij ya, ijcuación cualtías como tajtosque ome oso eyin tocnihuan. Pero ma mopapatatiyacan de tajtosque. Huan in ocsequin tocnihuan, yejua ma cuali quixejecocan nojón tanahuatilme cox melau hualeutoc de Dios. <sup>30</sup> Huan como se tocnui tocotzyetoc ompa huan Totajtzin Dios quinextilía se iichtacatamachilis de Yejuatzin, ijcuación yejua ma niman pehua quinnojnortza in tocnihuan. Huan in ocsé ten achtopa tanojnortztoya, yejua nojonques ma motentamatilican san. <sup>31</sup> Huan ijcón namejua ten nanquipíaj huelilis para nanquiselíaj tanahuatilme ten Dios namechualmactilía, namejua xiquinnojnortzacan in ocsequin tocnihuan huan sejsé ximopapatatiyacan para ma ijcón in tocnihuan taneltocani ma momachtican huan ma moyolmajxitijtiyacan tech nintacuautamatilis. <sup>32</sup> Huan neques ten quiselíaj tanahuatilme ten Dios quinualmactilía, yejua nojonques monequi ma moyoltacahualtican yejua san cuac monequis. <sup>33</sup> Huan ijcón xicchihuacan porín Totajtzin Dios amo se Dios ten quinmanelohuilía tataman tanahuatil para ica quincupapololtis in tocnihuan. Ta, Yejuatzin ten cuali quinyectejtecpantiu nochi itanahuatiluan para ma onca sayó yec yetolis. Huan xicchihuacan namejua ijcón queme quichiutinemij nochi in tocnihuan taneltocani campa mosentilíaj para quimohuistilisque Dios. <sup>34</sup> Huan nejua ni Pablo amo nitecahuilía que ma tajtocan namosihuahuan taneltocani campa mosentilíaj in taneltocani para quimohuistilisque Dios, porín nochi nijín ijcón quimonequiltía Totajtzin Dios. Pero sihuatzintzin taneltocani ma quitacamatiyacan nijín tanahuatil porín technahuatilía in Tajtoltzin de Dios. <sup>35</sup> Huan como in sihuatzintzin taneltocani quinequij quimatisque tensá tamachtilis, yejua nojonques monequi ma quintajtolitican nioyquichuan ompa ninchan. Huan ijcón namechilía porín mopinaucatalíaj in tacaquini cuac se sihuat taneltocacque tajtoa ica tanahuatilme campa mosentilíaj in ocsequin taneltocani para quimohuistilisque Dios. <sup>36</sup> Huan namejua, ¿xe hualehuac namotechcacopaca in Tajtoltzin de Dios? Pero amo melau. Huan, ¿xe sayó namejua san nanquiselijque nijín Tajtoltzin de Dios? Pues, amo melau.

<sup>37</sup> Huan como se acsá tocnui momachilía que yejua cachi quipía huelilis para quiselis tanahuatilme ten Dios quihualmactilij, yejua nojón cuali yetoc. Huan no como se acsá tocnui moyolmachilía que yejua quipixtinemi huelilis den Yecticatzin Espíritu, yejua nojón no cuali yetoc. Huan yejua nojonques ten moyolmachilíaj que cachi huelij, monequi ma cajsicamatican que nijín tanahuatilme ten namechijcuilohuilijtoc, nochi nijín cualcui chichahualis de Totecotzin Cristo. <sup>38</sup> Pero como se acsá quinequi amo cajsicamatis que nijín notanahuatiluan cuica ne chichahualis de Cristo, ijcuación namejua monequi xicpohuacan yejua queme se tanojnortzque ten amo teyi quimati.

<sup>39</sup> Ica ya nojón, nocnihuan, monequi xictajtanilican Dios ne huelilis para nanquiselisque tanahuatilme ten Dios namechualmactilía. Huan amo xitatacuhualtican de que ma amo tajtocan in taneltocani ica ocsé taman tajtolisme. <sup>40</sup> Ta, namechilía



que nochi xicchihuacan ica nejmach huan ca cuali cuac nanmosentiláj para nanquimohuistiláj Dios.

**Cuac mohualuicas Totecotzin, ijcuación Totajtzin Dios quinpanquixtis yoltocque in taneltocani intzalan in ocsequin ánimajme**

**15** Huan axcan nocnihuan, nicnequi de yancuic namechajsicamatiltis den Tajtoltzin de Dios ten cualcui ne nemaquixtilis. Huan nijín tamachtilis ipa namechtapohuijca ya huan no namejuan nanquiselijcaj ya huan no namejuan nanquitacamatinemij ya. <sup>2</sup> Huan ica nijín Tajtoltzin de Dios namejuan nanquixtinemij ya ne nemaquixtilis. Huan como nanquitacamatiyohue nochi ten namechtapohuijca ya, ijcuación melau nanquixtiyasque ne nemaquixtilis. Huan cuac nanyecajsicat-acuautamatisque ya, ijcuación namehualcuilis ne nemaquixtilis huan amo nencajtis san ne namotacuautamatis.

<sup>3</sup> Huan ne achtopa ya namechmactilij ya nijín tamachilis ten nejua nicselijca ya. Huan ijcón namechmactiaya ijcuín, que Jesucristo momiquilico huan ijcón quixtahuac totajtacoluan ijcón queme ticajsij tech in Tajcuilolamatzin de Dios. <sup>4</sup> Huan no namechnextiliaya que Yejuatzin quitalpachotoj huan ipan eyi tonal panquisac yoltoc intzalan in ánimajme, ijcón queme ticajsij tech in Tajcuilolamatzin de Dios. <sup>5</sup> Huan no namechmactiaya que Yejuatzin monextij iixpan in Pedro huan nimampa no monexti inxpan itatitaniluan de Cristo. <sup>6</sup> Huan no namechnextiliaya que Yejuatzin cachi satepan monextito inxpan queme macuil ciento tocnihuan taneltocani. Huan miacque de nojón tocnihuan taneltocani yoltinemij oc, masqui miacque de yejuan axcan momiquilijque ya. <sup>7</sup> Huan cachi satepan Yejuatzin no monextij iixpan in Jacobo. Huan nimanpa no Yejuatzin monextico inxpan nochi itatitaniluan de Cristo.

<sup>8</sup> Huan cuac Yejuatzin motaminextijtjinemic ya ihuan ne ocsequin itatitaniluan, ijcuación no monextico noixpan satepan de nochin. Huan ijcuac nejua niyancuicayolico cuac amo aquen quichixtoyaj que ijcón mochihuaquiu nopan. <sup>9</sup> Huan nejua ya nitatitanil de Cristo de cachi amo nihueyichiuque queme in ocsequin itatitaniluan de Cristo. Huan no hasta amo nechnamiqui ma nechpohuacan queme itatitanil de Cristo porín nejua niquintajyohuiltiaya in taneltocani ten tacuautamatinemíaj inahuactzinco Dios. <sup>10</sup> Huan ica ne iteicnelilis de Dios axcan nichipaucanentinemi ya queme nanquitztocque. Huan ne hueyi teicnelilis de Dios amo nencajtic san tech noyolo. Ta, necholyemanico huan nechvolchiphahuaco ne teicnelilis de Dios. Ica ya nojón nitequititinemi cachi oc huan que ne ocsequin itatitaniluan de Cristo. Pero nijín nicchiutinemic amo sayó ica nochicahualis. Ta, Yejuatzin nechylicnelijtjinemi huan nechvolchicautinemi campa yesqui nitequiti ica Yejuatzin nitequiu. <sup>11</sup> Huan masqui nejua namechnojnotzac ica in Tajtoltzin de Dios, oso masqui ne ocsequin itatitaniluan namechnojnotzque, pero nochi nijín tanojnotzalis sansé san. Huan nochi nijín tanojnotzalis namejuan nanquineltoctatinemij ya axcan.

**Pablo tajtoa de ne tonal cuac Dios quinpanquixtis yoltocque in ánimajme**

<sup>12</sup> Huan ipa tamechtapohuijcaj ya que Totajtzin Dios quipanquixtij yoltoc in Cristo Temaquixtijque intzalan in ánimajme. Pero sequin de namejuan nanquijtoaj que Totajtzin Dios amo quinpanquixtis yoltocque in ánimajme. <sup>13</sup> Huan como amo melau que Totajtzin Dios se tonal quinpanquixtis yoltocque in ánimajme, ijcuación amo

no melau que Totajtzin Dios quipanquixtij ya yoltoc in Cristo Temaquixtijque intzalan in ánimajme. <sup>14</sup>Huan tacán Totajtzin Dios amo melau quipanquixtij ya yoltoc in Cristo, ijcuación nijín totanojnotzalis ten ticchiutinemij namotzalan amo no teyi cualtiasquía. Huan no nencajtisquía san namotacuautamatilis ten nanquipíaj. <sup>15</sup>Huan como nencajtisquía san namotacuautamatilis, ijcuación tejuan amo melau tamechyectapohuíaj nijín Tajtoltzin, ijcón queme Dios technahuatili. Ta, tejuan timochihuacoj tixolopijme san. Porín tejuan tamechnojnotzque que Totajtzin Dios quipanquixtij ya yoltoc in Cristo intzalan in ánimajme. Pero tacán amo melau que Dios se tonal quinpanquixtis yoltocque in ánimajme, ijcuación amo no melau yesqui que Dios quipanquixtij ya yoltoc Cristo Temaquixtijque itzalan in ánimajme.

<sup>16</sup>Huan tacán amo melau que se tonal panquisasque yoltocque in ánimajme, ijcuación amo no melau que Cristo Temaquixtijque panquisac ya yoltoc intzalan in ánimajme. <sup>17</sup>Huan tacán amo melau que Totajtzin Dios quipanquixtij ya yoltoc Cristo Temaquixtijque, ijcuación namotacuautamatilis nencajtisquía san. Huan ijcón namejuan nanyolmictosquía oc tech namotajtacoluan huan ayamo Dios namechtapojpoluilisquía de namotajtacol. <sup>18</sup>Huan tacán amo melau que Totajtzin Dios quipanquixtij ya yoltoc Cristo Temaquixtijque, ijcuación nochi ne taneltocani de Cristo ten momiquilijque ya, yejuan nojonques sayó xpoliuque ya sen nachipa. <sup>19</sup>Huan tacán totacuautamatilis ihuan Cristo cualtías sayó para nijín tonemilispán de nican talticpac, ijcuación monequi tejuan ma techyolicnelican cachi oc huan que nochi in ocsequin talticpacuani. Porín totacuautamatilis ihuan Cristo cualtías para nijín tonemilis de nican talticpac. Huan no cualtías satepan de tomiquilis, queman tinentinemisquie ihuan Cristo sen nachipa.

<sup>20</sup>Pero namechilía que hueyi melau que in Cristo Temaquixtijque, Yejuatzin panquisac ya yoltoc in intzalan in ánimajme. Huan Dios quitenextij ya Cristo Temaquixtijque queme in tayecanque de nochi itaneltocacahuan. Porín ijcón queme Cristo panquisac yoltoc intzalan in ánimajme, no ijcón nochi in taneltocani ten momiquilijque, yejuan nojonques no panquisasque yoltocque. <sup>21</sup>Porín cuac ne achto tagat Adán motajtacolmacacac, ijcuación in miquilis pehuac quinqutzquía in talticpacuani. Huan no ijcón cuac Cristo panquisac yoltoc intzalan in ánimajme, ijcuación Dios quitzinpehualtij nitequiu de quinpanquixtis yoltocque itaneltocacahuan. <sup>22</sup>Huan nochi tejuan titalticpacuani timomiquilisque porín ne tagat Adán desde ne tonal ya motajtacolmacac. Pero nochi tejuan como tipoutinemij ihuan Cristo, ijcuación se tonal Totajtzin Dios techpanquixtis tiyoltocque. <sup>23</sup>Huan nochi nijín mochihuac ca cuali nejmach. Porín achto Cristo panquisac yoltoc, queme yesquía se tayecancataquilot. Huan satepan tech ne tonal cuac mohualuicas Cristo, ijcuación nochi tejuan ten tipoutinemij ihuan Cristo, nochi tejuan Totajtzin Dios techpanquixtis tiyoltocque. Huan tejuan queme tyesquíaj titacuitapan taquilome ya de Dios. <sup>24</sup>Ijcuación nochi tajtamis ten tiqiztinemij nican talticpac. Huan Cristo quihuejuelos ya nochi tanahuatil huan nochi chicahualis huan nochi huelilis campa taquitzquitoc in amocuali Satanás. Huan de ompa Cristo quimactilis Totajtzin Dios nochi ihuelilis tenica Cristo momasoutoc. <sup>25</sup>Porín Cristo semi monequi ma tayecantinemi queme rey nican talticpac hasta in tonal cuac Totajtzin Dios quintamitanilis ya nochi neques ten quixnamictinemij Cristo. Huan no tayecantinemis Cristo hasta ne tonal queman Dios quintamicuilis ya nochi ninuelilis de ne amocuali ejecame. <sup>26</sup>Huan cuac Totajtzin Dios quintamitanilis ya nochi neques ten quixnamictinemij

Cristo, ijcuación Yejuatzin quitamitanilis ya in miqulils huan amo teyi chicahualis quipía oc in miqulils. Huan ijcón mochihuas porín Cristo amo quimonequiltijca que ma in miqulils taquitzquijtinemi nican talticpac. <sup>27</sup> Porín Totajtzin Dios quihueyipantalij Cristo inpan nochi tayecanani. Pero in Tajcuilolamatzin de Dios quijtoa ijcuín: “Yejuatzin quichihualtij que nochin ma quitacamatican Cristo”. Huan amo quijtosnequi que Cristo Yejuatzin quiyecantinemis Itajtzin Dios. Amo huelis ijcón mochihuas porín Totajtzin Dios Yejuatzin ne ten quimactilij ya imaco Cristo Temaquixtijque nochi huelilis. <sup>28</sup> Huan in tonal cuac Totajtzin Dios quichihualtis que nochi ma quitacamatican Cristo, ijcuación Cristo, Yejuatzin Iconetzin Dios, motemacis inahuactzinco Itajtzin Dios huan quimactilis nochi in huelilis ten quimactilijca ya. Huan ijcón mochihuati porín Itajtzin Yejuatzin ten quimactilij ya imaco Cristo nochi huelilis. Huan ijcón mochihuas para que Totajtzin Dios Yejuatzin quisenpixinemis nochi huelilis ten ongac huan no Yejuatzin tayecantinemis ipan nochi ten ongac.

<sup>29</sup> Huan no namechilía nocnihuan cuali nanquimatij que sequin namotaneltoacainhuan moteahuiltíaj iixpatca sequin ánimajcnihuan ten semi quintasojtayaj ten momiquilijque ya. Huan yejuan ijcón quichihuaj porín quimatij que Totajtzin Dios se tonal quinpanquixtis yoltocque in ánimajme. Ica ya nojón sequin taneltocani moteahuiltíaj ica por neques ten ipa momiquilijque ya. <sup>30</sup> Huan queme melau Totajtzin Dios quinpanquixtis yoltocque in ánimajme, ica ya nojón nechtajyohuiltijtinemi in amocuali Satanás huan quinequi nechtajtamis cada tonal. <sup>31</sup> Huan mosta nicmachilía que ejcotoc nomiquilils. Huan nochi nijín hueyi melau ten nicmachilijtinemi ijcón queme no nicmachilijtinemi de hueyi yolseucanemilis, porín namejuan nantacautamatinemij ihuan Totecotzin Cristo Jesús. <sup>32</sup> Huan no ma namechili que cuac niyetoya ne Efesojcopaca, ijcuación nimotehuijtinemía ihuan sequin taca tahuelme queme yesquía tecuanime. Pues amo teyi nimotanolisquía como amo melau que Totajtzin Dios quinpanquixtis yoltocque in ánimajme. Ta, cachi cuali ma ticchihuacan queme quijtoa ne tetapohuil ijcuín: “Ma titatacuacan san huan ma timohuintican san porín mosta timiquisque”.

<sup>33</sup> Pero nocnihuan, amo ximotecahuilican que ma namechajcayahuacan. Porín hueyi melau queme namechilíaj ijcuín ica ne tetapohuil: “Tejuan ten tiyolchipaucanemij, tacán timohuicatinemij ihuan neques ten amo yolchipauque, ijcuación nojonques techmajmahuasque ica tajtacolme”. <sup>34</sup> Xiixpetantocan, nocnihuan, huan xichipaucanentinemican huan amo ximotajtacolmacatinemican oc. Porín nicmati que yetinemij oc namotzalan sequin ten amo quixmatij Dios huan sequin ten amo no tacautamatinemij inahuatzinco Yejuatzin. Huan nochi nijín namechilía para ica namechpinaucatalis.

### **Nican Pablo tajtoa de queniu Dios quinpanquixtis yoltocque nochi in ánimajme**

<sup>35</sup> Huan achá acsá se tagat quinequis techtajtoltis ijcuín: “¿Queniu tamatinemis que in ánimajme cuac Totajtzin Dios quinpanquixtis yoltocque?” Huan no techtajtoltis ijcuín: “¿Queniu motztinemis nitacayo neques ánimajme ten Dios quinpanquixtis yoltocque?” <sup>36</sup> Pero nijín matájtanti amo teyi cualtía. Xicmatican que cuac se quitocas se xinachtet, ijcuación yejua ne monequi palanis nicacahuiyo para huelis xictoponis. <sup>37</sup> Huan nojón xinachtet ten se quitotoca, yejua ne amo semi quinejnehuilía ne

itatzmol ten panquisas ya. Ta, se quitotocas sayó ne xinachtet san, masqui se trigojtet oso ocsequin taman xinachtet. <sup>38</sup> Huan cachi satepan cuac ixua ya nojón xinachtet, ijcuación Totajtzin Dios quichihualtía ma tamati ne tatoc ijcón queme Yejuatzin quimonequiltía. Huan no Totajtzin Dios quichihualtía cada taman xinachtet ma quipía itachichualoni ijcón queme quinamiqui.

<sup>39</sup> Ongacque míac tataman tacayome nican talticpac; amo sansé san monejnehuilía. Porín ongac se taman tacayot para in tagayot. Huan no ongac ocsequin taman tacayot para oculilime. Huan ocsé taman tacayot para in tototzitzin huan ocsé taman tacayot para in peces. <sup>40</sup> Huan no ijcón mochiutoc ne ejecaixco que ongacque míac tataman tacayome. Huan nican talticpac no ongacque míac tataman tacayome huan amo monejnehuilijtinemij. Huan nojón tacayome de nentinemij ejecaixco, yejuan nojonques nincualtziyo amo quinejnehuilía nincualtziyo neques ten nentinemij nican talticpac. <sup>41</sup> Huan no xicmatican que icualtziyo den imeyoyo in tonaltzin amo quinejnehuilía imeyoyo den metzti. Huan no ijcón in sitalinme semi tataman cacahuacaj ica nicualtziyo. Huan sequin sitalinme cachi oc cacahuacaj huan que ocsequin, huan icualtziyo amo monejnehuilía den ocsequin sitalinme. <sup>42</sup> Huan ijcón no mochihuati que oncati tataman cualtziyome cuac Totajtzin Dios quinpanquixtis yoltocque in ánimajme. Tejuan tictalpachotij se tacayo ten sayó palani. Pero Totajtzin Dios se tonal quipanquixtis yoltoc se tacayo ten amo queman xpolihuis. <sup>43</sup> Huan no ijcón tejuan tictaltocaj se tacayo ten techpinaucatalía. Pero Totajtzin Dios se tonal quipanquixtis yoltoc ne tacayo huan quihueyicualnextis ica icualtziyo. Huan no tejuan tictalpachotij se tacayo ten cuetautinemi porín tajtamic ichichualis. Pero Totajtzin Dios se tonal quipanquixtiti yoltoc ne tacayo huan quimactis hueyi chichualis para sen nachipa. <sup>44</sup> Huan no ijcón tictaltocaj totacayo de sayó nacat san. Pero Totajtzin Dios se tonal quipanquixtis yoltoc ne tacayo ten quipías huelilis den Yecticatzin Espiritu. Como ongac tacayo ten sayó nacat san, no ongati tacayot ten quipías huelilis den Yecticatzin Espiritu.

<sup>45</sup> Huan in Tajcuilolamatzin den Yecticatzin Espiritu quijtoa ijcuín: “Ne tayecanecatagat Adán, yejua ne Dios quichijchihuac ma quipixtinemi se talnamiquilis ten yoltoc”. Pero cachi satepan hualas Cristo, Yejuatzin queme yesquía ocsé Adán. Huan ne Adán techmacac se nemilis ten sayó tajtamis. Pero in Cristo ica in chichualis den Yecticatzin Espiritu, Yejuatzin techmacatinemi se nemilis ten amo queman tamis. <sup>46</sup> Huan ne tacayot ten cuica chichualis den Yecticatzin Espiritu, yejua ne amo achto mochihuas. Ta, mochihuas achto ne ten sayó nacat san. Huan cachi satepan mochihuas ne tacayot ten cuicas in chichualis den Yecticatzin Espiritu. <sup>47</sup> Huan ne tayecanecatagat Adán, Dios quichijchihuac ica tal san. Ica ya nojón mocahuas nican talticpac. Huan ne tagat Cristo ten satepan hualas, Yejuatzin ne poutinemi ne eluiyactzinco porín Yejuatzin cuicatinemi in chichualis den ne eluiyactzinco. <sup>48</sup> Huan tejuan totacayo de nican talticpac, yejua ne quinejnehuilía nitacayo de ne tagat Adán ten Dios quichijchihuac ica tal san. Huan neques ejecame ten poutinemij ne eluiyactzinco, yejuan nojonques nintacayo quinejnehuilía itacayo Cristo ten no poutinemi ne eluiyactzinco. <sup>49</sup> Huan ijcón queme tejuan tiixtamatiq queme ne tagat Adán ten Dios quichijchihuac ica tal san, no ijcón tejuan se tonal tiixtamatisque queme ne Cristo ixtamatinemi porín Yejuatzin poutinemi ne eluiyactzinco.

<sup>50</sup> Huan nocnihan, nicnequi namechilía que totacayo ten cuica nacat huan esti, yejua ne amo huelis pohuitiu huan amo huelis majsitinemi ihuan ne ichichualis

tenica Dios techyolyecantinemi. Huan no ijcón totacayo ten palanis san, yejua ne amo huelis yetos ne campa in tacayome ten sen nachipa yoltinemisque. <sup>51</sup> Pero axcan xicmatican nijín ichtacatamachilisme de Dios. Amo nochi tejuan timomiquilisque. Ta, Totajtzin Dios techtacayojpatas. <sup>52</sup> Huan Dios techtacayojpatas ica ne ijsiucayot ijcón queme cuac se tetzilijcopi. Huan Dios techijsiucapatas cuac mocaquis ne ten sayó tapitzalis den trompeta. Huan ijcón cuac mocaquis tapitzasque ica nojón trompeta, ijcuación Dios quinpanquixtis yoltocque in ánimajme den taneltocani. Huan nojonques ten panquisasque yoltocque, yejuan nojonques amo queman momiquilisque oc. Ta, ijcón queme namechilijtoc, Totajtzin Dios techtacayojpatas. <sup>53</sup> Huan totacayo ten sayó palanis, yejua ne monequi motaquentis ica ne chichualis de Dios tenica amo queman palanis. Huan no totacayo ten sayó miquis san, yejua ne monequi motaquentis ica ne chichualis de Dios para amo queman quipías miquilis oc. <sup>54</sup> Huan totacayo ten palanis san, yejua melau motaquentis ica ne chichualis de Dios tenica amo queman palanis oc. Huan no totacayo ten miquis san, yejua ne melau motaquentis ica ne huelilis de Dios tenica amo queman miquis oc. Huan cuac nochi nijín motamipapatas ya, ijcuación motamichihuas ne tenilil de Dios ijcón queme ijcuiliutoc ya tech in Tajcuilolamatzin ijcuín:

Totajtzin Dios quitamitanilis ya ne chichualis de miquilis.

<sup>55</sup> Huan ijcón amo huelis techtanilis oc ne chichualis de miquilis.

Huan in miquilis quimictiaya totacayo ijcón queme se cohuat quitepinía huan quimictía se itacayo.

Pero Cristo quitamitanilij ya ne miquilis para ma amo huelis oc quimictis totacayo.

<sup>56</sup> Huan in tanahuatil de Moisés, yejua ne quimaca chichualis in tajtacol. Huan in tajtacol, yejua ne ten quimaca chichualis in miquilis para quimictis totacayo. Ica ya nojón como amo tictacamatinemisque in tanahuatilme de Dios, ijcuación monequi timiquisque. <sup>57</sup> Pero tictasojcamachilíaj Totajtzin Dios porín ica ne tequit ten Totecotzin Jesucristo quitamichihuaco ya, tejuan tictanilijtinemij in chichualis den tajtacol ica por ihuelilis de Cristo. <sup>58</sup> Ica ya nojón notasojcnihuan, namechontatautía que nachipa ximoyolchichahuacan ica nijín tamachtilis. Huan amo xicue-tautiyacan tech namotacuatamatis. Ta, xicsentocacan xitequititiyacan cachi oc tech ne tequitzin ten Totecotzin Cristo technahuatilij ya. Huan ijcón namechilíaj porín cuali nanquimatij ya que amo nencajtis nochi namotequiu ten nanquichu-tinemisque ica ichichualis de Totecotzin Cristo.

### **Nican tajtoa de queniu xinechicocan sequin tomin para xiquinpalehuican ocsequin tocnihuan taneltocani**

**16** Huan xinechicocan ne namotomin para ica nanquinpalehuisque ocsequin tocnihuan taneltocani. Huan xicchihuatij ijcón queme niqinnajnahuatilij ya in tocnihuan taneltocani ten calyetocque ne Galaciajcopaca. <sup>2</sup> Huan niqinilijca ijcuín: Cada chicueyi tech ne tayecanatonal domingo nicnequi que cada senme de namejuan xixelocan sequin namotomin ijcón queme cada senme nanmotanilíaj tech namotequiu. Huan xicchiutiyaan cada chicueyi tonal para amo ocsepa monequis nanquinechicosque tomin cuac nejua niyetos namohuan. <sup>3</sup> Huan cuac nejua niasis ya namopueblojcopaca, ijcuación niqintitanis sequin tocnihuan taneltocani ten namejuan nanquinijitacque ya para ma yacan ne Jerusaléncopaca. Huan no niqinmactilis sequin amame ne namotaneltoaicnihuan campa ixnestiyás que yejuan

cuicaj tanahuatil de namejuan para cuicasque huan quitemactitihue namotapalehuilis ihuan in tocnihuan taneltocani de Jerusalén. <sup>4</sup>Huan como monequis ma no niyó ne Jerusaléncopaca, ijcuación yejuan nohuan yasque.

### **Nican tajtoa de ne Pablo quinemilijtoc quichihuati**

<sup>5</sup>Huan cuac niyás namechitatu, ijcuación monequis nipanotihuetzis ne campa Macedoniajcopaca. Huan cuac nipanotiquisas ya ne Macedoniajcopaca, ijcuación ni-ajsis campa namejuan tech in pueblo de Corinto. <sup>6</sup>Huan achá namohuan nimocahuati sequin tonalme. Oso achá no ompa namohuan nicpanotiu nojón tapoalme cuac taseseyalista. Huan de ompa namejuan cuali huelis nannechpalehuisque huan nannechojquetzatihue ne campa monequi niyás. <sup>7</sup>Porín amo nicnequi sayó namechitziquisas san. Ta, nejua notanejnequilis niyetotiu namohuan sequin tapoalme, como quimonequiltía Totecotzin.

<sup>8</sup>Pero nican Efeso nimocahuas hasta nican nicpanos oc ne iluitonal ten quilíaj Pentecostés. <sup>9</sup>Huan nimocahuas nican Efeso porín monextijtoc míac tequit ten huelis nicchihuas ma niquintaneltoctis de Cristo miacque tagayot ten quinejnehuilíaj yancuic taquilome para Totecotzin. Huan no nican Efeso nimocahuati masqui ongacque miacque taca ten nechixtopeutinemij. <sup>10</sup>Huan cuac ajsis Timoteo nepa namohuan, ijcuación namejuan xicchihuacan que yejua ma yolpaqui huan ma amo teyi quipía yolcujmololis. Huan ijcón xicchihuacan porín Timoteo tequititinemi ica in tequitzin de Totecotzin ijcón queme nejuatzin nicchiutinemi. <sup>11</sup>Ica ya nojón namechilía que amo xicmohuispolocan ne Timoteo. Ta, cachi oc xicpalehuican ma quipía nochi ten monequis para ixpanos tech in ojti, huan ijcón yejua yolseucayás. Huan nijín Timoteo yejua hualajtoc para nechitaqui porín nejua nicchixtos nican Efeso ihuan ocsequin tocnihuan. <sup>12</sup>Huan in tocnihuan Apolos nictatautiaya que ma yani ihuan sequi tocnihuan para ma namechonitani, pero yejua amo quineyic yas axcan. Ta, yas namechitatu cuac yejua quemantis.

### **Nican tajtoa que Pablo quintajpaloa sequin tocnihuan de Corinto**

<sup>13</sup>Nocnihuan, xicuatamatocan ijcón queme taca ten ixnenentocque. Huan xicsentocacan xitacautamatiyacan ihuan Dios. Huan xinentinemican queme taca ten yec yolmajsitinemij. Huan no xinentinemican queme taca ten quipixtinemij ne yolchicahualis de Dios. <sup>14</sup>Huan nochi ten nanquichihuasque, xicchihuacan sayó ica ne tetasojtalis.

<sup>15</sup>Huan axcan, nocnihuan, namejuan cuali nanquimatinemij que ne Estéfanos ihuan nichancahuan, yejuan nojonques achtopa tacuautamatque ihuan Cristo de nochi in ocsequin taneltocani ten calyetocque ne Acayajcopaca. Huan yejuan motequitiltitjinemij para quinpalehuisque nochi in ocsequin tasoicnihuan taneltocani. <sup>16</sup>Huan nejua nicnequi que namejuan xiquinmohuisapoutinemican neques de Acaya huan no xiquinmohuisapoutinemican nochi ocsequin tayecanani taneltocani ten techpalehuijtinemij huan tequititinemij queme ne taneltocani de ne Acaya. <sup>17</sup>Huan semi niyolpaqui porín hualajca nican Efesojcopaca in Estéfanos huan in Fortunato huan in Acaico. Huan nijín tocnihuan quichiuque ya ne ten namejuan amo nanuelíaj nanquichihuasque porín amo nohuan nanyetocque. <sup>18</sup>Huan nijín eyi tocnihuan, yejuan nojonques nechyoltalijque. Huan no namechyolsehuijque no

namejuan. Ica ya nojón namejuan monequi xiquinmohuiscapoutinemican nijín eyi tocnihuan.

<sup>19</sup> Huan nochi in tocnihuan taneltocani ten calyetocque ne Asiajcopaca, yejuan nojonques namechualtajpaloaj. Huan ne Aquila huan Priscila huan nochi neques ten mosentilíaj ichan Aquila para quimohuistilíaj Dios, yejuan nojonques no namechualtajpaloaj ica itocaytzin de Totecotzin Cristo Jesús. <sup>20</sup> Huan no nochi in tocnihuan taneltocani nican Efeso namechonualtajpaloaj. Huan namejuan cuac nanmotatajpalosque se huan ocsé, ijcuacón ximonanahuajtequican ica ne yolchipahualis de Totecotzin Cristo.

<sup>21</sup> Huan nejuatzin ni Pablo niquinijcuilojtoc nijín tajtoltzitzin ca nomay tenica namechontajpaloa. <sup>22</sup> Huan tacán acsame amo quitasojtatinemij Totecotzin Cristo, yejuan nojonques ma Dios quintelchihua. Huan tejuan tiquijtoaj ijcuín: “Totecotzin, niman ximohualuiqui”.

<sup>23</sup> Huan ma sayó Totecotzin Jesucristo ma Yejuatzin namechyolicnelijtiu. <sup>24</sup> Huan ica nijín amat namechontitanilijtoc nochi notetasojtalis ten hualeutoc tech Cristo Jesús. Ma ijcón mochiutiu. Amén.

## ICA OME TAJCUILOLAMATZIN TEN QUIJCUILOJ IN TATITANIL SAN PABLO PARA IN TANELTOCANI TEN CALYETOCQUE CAMPA PUEBLO CORINTO

### Nican tajtoa de queniu in tatitanil Pablo quintajpaloa in tocnihuan taneltocani campa pueblo Corinto

**1** Nejuatzin ni Pablo niitatitanil de Jesucristo porín ijcón quimonequiltij Tota-  
jtzin Dios. Huan nican iixpan in tocníu Timoteo namechtajpaloa de namejuan  
ten nantaneltocani de Dios ten nancalyetocque campa pueblo Corinto. Huan no  
niquintajpaloa nochi in taneltocani yolchipauque ten poutinemij ihuan Dios ten ca-  
lyetocque tech in itatilanal de Acayajcopaca. <sup>2</sup>Huan axcan nicnequi xicselijtiyacan  
ne teyolicnelilis huan ne yolsehulis imaco Totajtzin Dios huan imaco Totecotzin  
Jesucristo.

### Nican tajtoa de ne queniu Pablo tajyohuijtinemic

<sup>3</sup>Ma ticmohuistilijtiyacan Totajtzin Dios ne de Itajtzin de Totecotzin Jesucristo  
porín Totajtzin Dios nachipa techyolicnelijtinemi huan Yejuatzin nachipa techyoltal-  
ijtinemi ica ihuelilis. <sup>4</sup>Huan Totajtzin Dios nachipa techyolpoxautinemi mientras  
tejuan titajyohuijtinemij ica míac tataman toneucayot. Huan Dios ijcón quichiu-  
tinemi para que ma tejuan no tiquinyolpoxautinemican ne ocsequin taneltocani ten  
yoltajyohuijtinemij ica míac tataman toneucayot. Huan ijcón tejuan huelis tiquiny-  
olpoxautinemis que ne tajyohuiani ica mismo yolpoxahuilis tenica Totajtzin Dios  
techyolsehuijtinemi tejuan. <sup>5</sup>Huan tejuan ticpanotiyohue tajyohuilis ijcón queme  
Cristo quipanoco. Huan ijcón queme titajyohuijtiyohue, no ijcón Cristo cachi oc  
techyolpoxautinemis ica iteicnelilistzin. <sup>6</sup>Huan queme tejuan no titajyohuijtine-  
mij, ica ya nojón namejuan nanquiselijtiyasque ne hueyi yolpoxahuilis huan ne ne-  
maquixtilis imaco Cristo Jesús. Huan queme Dios no techyecyolpoxautinemi tejuan,  
ica ya nojón ma namejuan no cachi oc nanquiselisque ne hueyi yolpoxahuilis huan  
ne nemaquixtilis ten hualeutoc imaco Cristo Jesús. Huan ijcón namejuan nanquiyoli-  
caxicojtiyasque ne tajyohuilisme ijcón queme tejuan ticyolicaxicojtiyohue ne toneu-  
cayot. <sup>7</sup>Huan tejuan ticpixinemij hueyi tacuautamatilis namopan. Porín ticmatij  
que ijcón queme namejuan nantajyohuijtinemij ica míac tataman toneucayot, no  
ijcón cachi oc Totajtzin Dios namechycyoltalijtinemi namejuan, ijcón queme tic-  
panocque tejuan.

<sup>8</sup>Huan nochi namejuan tocnihuan ticnequij xicmatican de queniu techueyitajy-  
ohuiltijtihualajque cuac tinentinemíaj campa itatilanal de Asia. Huan semi techuey-  
imachililtijque ne tajyohuilis hasta amo huelía oc tictaxicosque oc. Huan ijcón  
techueyitajyohuiltijtoyaj hasta ticyolnemilijtoyaj ya que xa amo timaquisasque.  
<sup>9</sup>Huan ica por ne tajyohuilis tejuan ticyolmachiliayaj ijcón queme neques taca  
quiyolmachilíaj cuac in tequihua quintelchihuas para quinmictis. Huan nochi nijín  
mochihuac sayó para que Dios techyecajsicamatiltis de que ma tictacuautamatiya-  
can ihuan Yejuatzin huan amo tejuan san ma timoyecantiyacan san. Porín Yejuatzin  
quipixtinemi hueyi chichualis para quinpanquixtis yoltocque neques ten momiquil-  
ijque. <sup>10</sup>Huan Totajtzin Dios techmaquixtij ya de ne hueyi tetzaucatajyohuilis. Huan



Yejuatzin quisentocatoc de techmaquixtijtiu. Huan ticpixinemij hueyi tacuautamatilis ihuan Yejuatzin que Yejuatzin techmaquixtijtiyás oc inmaco neques ten quinctinemij oc techixpolosque. <sup>11</sup> Huan ijcón mochiutiyás topan como namejuan nanquisentocaj nantechpalehuijtiyohue ica ne namotatautilis. Huan como mías tocnihuan motatatautilíaj ica por tejuan, ijcuacón cachi oc in tocnihuan quitasojca-machilisque Dios ica por ne itecnelilis tenica Totajtzin Dios techicnelijtinemi.

**Nican Pablo tajtoa de queyé huejcahuac ya de amo hueli yaya  
quincalpanotiu in tocnihuan ten calyetocque Corinto**

<sup>12</sup> Pero se taman semi techyolpactía porín totamachilis techyolmachililtía de que melau tiyolchipaucanentinemij huan timelaucanemij intzlan in talticpacuani. Pero no cachi oc tichipaucanentineneque namotzalan namejuan. Huan Totajtzin Dios sayó Yejuatzin techpalehuij ica iteyolicnelilis para ijcón tejuan tihuelque tiyolchipaucanentineneque. Huan tejuan amo timelaucanentinemíaj ica por tejuan totamachilis san. Ta, ica por itapalehuilis de Dios tiyolchipaucanentineneque namotzalan. <sup>13-14</sup> Huan nochi nijín tajtolme ten tamechijcuilohuilijtocque, nochi nijín cuali huelis nanquileerojtinemisque huan nanmoajsicamatiltijtihue. Huan nejua nitacuautamati oc que namejuan cachi oc nanmoyecajsicamatiltijtihue nijín tamachtilis, ijcón queme namejuan nanmoajsicamatiltijque ya cansaica tech notanojnotzalis. Huan notamachilis yejua nijín: Tech ne tonal cuac mohualuicas Totecotzin Jesús, ijcuacón namejuan nanmohueyiyolpactisque ica por tejuan totequiu ten tichiuque namotzalan. Huan no ijcón tejuan no timohueyiyolpactisque ica por namejuan porín namejuan nantacuautamatque ihuan Totecotzin Jesús. <sup>15</sup> Huan queme nitacuautamatoc que namejuan nanquipixtinemij ne yolpaquilis, ica ya nojón ne achtopa nejua nicyolnemiliaya que niyás namechcalpanotiu para ijcón namejuan nanmoyolpaquiltisque porín ica ojpa namechcalpanotiu. <sup>16</sup> Huan nejua nicyolnemilijtoya de que namechcalpanotiquisas cuac niyás Macedoniajcopaca. Huan no nicyolnemiliaya que cuac nimocuepas ya de Macedoniajcopaca, ijcuacón ocsepa namechualcalpanotiquisas para ijcón namejuan nannechpalehuisque ica namotapalehuilis huan nannechojquetzatihue para niyás tech ne ojti para Judeajcopaca. <sup>17</sup> Huan cuac nejua nicnemilijtoya de namechcalpanotiu, ijcuacón nicchihuac ca cuali taixejecolis, huan amo ica ijsiucayot. Amo xicnemilican namejuan que xa nejua nitanemilijtinemi queme neques talticpacuani ten amo taneltocaj. Porín yejuan moyectencahuaj sepa san huan quijtoa que achá yas huan achá amo yas. <sup>18</sup> Pero nejua nimoyectencahuac ijcón queme Totajtzin Dios moyectencahuac de quichihuas neitenilil. Huan amo namechilij sepan san de que niyás, huan amo niyás. <sup>19</sup> Porín Cristo Jesús Yejuatzin Iconetzin Dios huan Yejuatzin amo aquen quisepanijtoa “quema”, huan “amo”. Ta, Yejuatzin nachipa quiajsicachihua ne tenica moyectencahuac. Huan xicmatican que nejuatzin huan in Silvano huan Timoteo, tejuan tisentamachtijtineneque namotzalan ica in Tajtoltzin de Cristo ten cuica sayó ten melau. <sup>20</sup> Pero xicmatican cachi oc que nochi ne tenilil tenica Totajtzin Dios moyectencahuac, nochi Yejuatzin quiyectamichihuati ica por Cristo Jesús. Ica ya nojón cuac tejuan ticmohuistilíaj Totajtzin Dios, ijcuacón tiquijtoaj “Amén”, que ma ijcón mochihua ten Yejuatzin quimonequiltía porín Cristo quiyecchiutiu nochi nitenilil de Dios. <sup>21</sup> Huan Totajtzin Dios techyolchicahua huan techtacuautamatcatalis ihuan Cristo. Huan no Totajtzin Dios techtequimactij ya cuac techyolpepexocaltij

ica ichicahualis de Yecticatzin Espíritu. <sup>22</sup>Huan Totajtzin Dios no technescayotij ya huan techtepohualtij ya ihuantzin. Huan Yejuatzin techyolpexontij huan techyolpexocaltij ica in chicahualis den Yecticatzin Espíritu. Huan in Yecticatzin Espíritu, Yejuatzin itenilil de Dios tech toyolijtic tenica Dios quinextijtoc que tejuan se tonal ticajsicaselitihue nochi itatiochihualisuan de Totajtzin Dios.

<sup>23</sup>Huan namejuan de nantaneltocani de Corinto, ayamo niyajtoc namechoncalpanojtiu ijcón queme nicyolnemiliaya nicchihuas. Pero namechyequilía que amo niyajtoc porín amo nicnequía ocsepa namechyolxocolituu. Huan Dios cuali quimatic que namechilijtoc ica sayó ten melau. Huan como nejua sayó namechilijtoc ica xolopijyot san, ijcuación ma nihuetzi san tech in ixpolihuilis. <sup>24</sup>Huan tejuan cuac tamechcalpanotihue, ijcuación amo ticnequij tamechmachililtisque totanahuatil que monequis xicneltogacan totamachtilis. Porín tejuan ticmatij ya que namejuan cuali momajxitij ya namotacuautamatis. Huan cuac tejuan tamechcalpanotihue, ijcuación sayó ticnequij tamechpalehuisque para queniu cachi oc nanmoyolpaquiltijtiyasque.

**2** Ica ya nojón nimoyectencahuac de que amo namechyolxocolituu cuac ocsepa namechcalpanotiu. <sup>2</sup>Porín tacán nejua namechyolxocoliti, ijcuación amo aquen oncas oc ten huelis nechyolpactis. Ta, sayó namejuan huelis nannechyolpactisque. Pero nejua ipa nannochin namechyoltayocoltijca ya. <sup>3</sup>Ica ya nojón ica ne achto amatzin namechijcuilohujca ya ica ten melau para namechmejmelahuas. Porín cuac nejua niyasquía ompa Corinto, ijcuación amo nicnequía nannechyoltayocoltisque. Ta, namejuan monequis cachi oc xinechyolpactican. Porín nejua nicyecmatic como nejua nicpía hueyi yolpaquilis, ijcuación namejuan no cachi oc nanquipiasque hueyi yolpaquilis. <sup>4</sup>Porín cuac namechtamijcuilohuilij ya ne tayecanque noamatajcuilol, ijcuación niyoltajyohuiaya huan nimoyoltequipachoaya hasta no nimochojchoctiaya. Huan ne achtopa amat amo namechonijcuilohuilij sayó para namechtayocolmacas. Ta, namechonijcuilohuilij porín nicnequía ximatican de queniu namechueyitasojtatoc.

### **Nican tajtoa de queniu Pablo quitapojpoluía ne tagat ten motajtacolmagac ya**

<sup>5</sup>Pero tacán ne tajtacole teyoltayocoltij ya, ijcuación amo nejua san nechyoltayocoltía. Ta, hasta nochi namejuan namechyoltayocoltía. Pero nejua amo nicnequi semi nicpanoltis ica nijín tajtolme ten namechnojnotzac. <sup>6</sup>Huan nejua niquixejecoa que ma yejua san ne tatzacuiltilis tenica namejuan nanquisentacahualtijque ya ne tagat ten tajtacole. <sup>7</sup>Pero namechilía que axcan cachi cuali xictapojpoluican huan xicyojyoltalican ya ne tagat para ma yejua ma mosencahua ya tech ne tayocoyalis huan ma amo mohueyiyoltayocoltijto oc. <sup>8</sup>Ica ya nojón namechontatautía que ocsepa xicnextilican ne tagat que nanquitasojtaj oc ijcón queme ne achtopa nanquitasojtatiuhualayaj. <sup>9</sup>Huan ijcón namechijcuilohuilijca ne achtopa amatzin para niqitasquía ne namotamachilis que cox melau nanquinequíaj nannechtacamatinemis que ijcón queme namechnahuatilijca ya. <sup>10</sup>Huan axcan como namejuan nanquitapojpoluía se acsá, ijcuación ximatican que nejua no nictapojpoluía. Huan como nejua nictapojpoluuj ya se acsá, ijcuación nicchihuas para ijcón ixnesi ya que namechpalehuijtoc ya iixpantzinco Cristo porín Yejuatzin techitilijtinemi. Huan tacán melau monequía acsá nictapojpoluis, ijcuación nicchihuaac ya. <sup>11</sup>Pero tejuan

titetapojpoluáaj para ma amo in amocuali Satanás techichtacahuis huan techtanilis. Porín tejuan cuali ticmatinemij de queniu in Satanás tecajcayautinemi ica itequiu.

**Nican tajtoa de queniu Pablo tanemilijtinemía  
cuac yetoya campa pueblo Troas**

<sup>12</sup> Huan nejua cuac niajsic tech ne pueblo Troas para ompa titanojnotztinemisque ica Itajtoltzin de Cristo ten cualcui ne nemaquixtilis, ijcuación Dios nechonmonex-tilijtihuetzic se tequit que ma nimotequitiltiti por Yejuatzin. <sup>13</sup> Pero tech noyolo semi niyoltanemilijtinemía porín amo huel nicajsía totequiticaicniu Tito. Ica ya no-jón nejua niquinnahuatijtehuac in ocsequin notequiticaicnihuan huan niyajqui ne Macedoniajcopaca.

**Nican tajtoa Pablo de queniu tictamitanilijque in  
amocuali Satanás ica ichichualis de Cristo**

<sup>14</sup> Huan tictasojcamachiláaj Totajtzin Dios porín Yejuatzin techchihualtía ma tic-tamitanilican in amocuali Satanás ica ichichualis de Cristo Jesús. Huan Totajtzin Dios quinextilijtinemi in talticpacuani de queniu yejuan huelis quixmatiyasque in Tajtoltzin de Dios ica por tejuan totanojnotzalis. Huan ne totanojnotzalis de Cristo, yejua ne quinejnehuilía queme yesquía se cualtzin ahuiyacayot ten nochi taajuialía nohuiyampa. <sup>15</sup> Huan tejuan tiitaneltocacahuan de Cristo huan ticnejnehuiláaj ne ajuiyacayot de hualehua de copal ten Cristo quicuic para quimohuistilía Itajtzin Dios. Huan ne ajuiyacayot ten Cristo quicuic para quimohuistilis Dios, yejua ne mosensohua inpan nochi neques ten maquisque ya huan inpan nochi neques ten ayamo maquisaj. <sup>16</sup> Huan ne ajuiyacayot ten Cristo quicui para quimohuistilis Dios, yejua ne mochihua queme se ajuiyacayot ten cualcui in miquilis para nochi neques ten ixpolihisque. Pero para tejuan ten timaquisque, ne ajuiyacayot de Cristo techquemiloqui huan techmacac ne nemilis sen nachipa. Huan ijcón senme de tejuan tiitatitaniluan de Cristo amo tihuelisque tictamichiutiyasque nijín tequit ica por tejuan tochichualis san. <sup>17</sup> Huan tejuan amo ay ticnamacatinemij in Tajtoltzin de Dios ten cualcui ne nemaquixtilis. Huan nión no tictamachilispatiláaj in Tajtoltzin de Dios ijcón queme ne ocsequin tacajcayahuan quichiutinemij. Ta, tejuan titanojnotztinemij ica in Tajtoltzin de Dios ica yolchipahualis porín Dios technahuatiliy ya ma ijcón titequititinemican. Huan tejuan titanojnotztinemij ijcón queme yesquía toixpan ijcatosquía Totajtzin Dios. Huan no titanojnotztinemij ica yolchipahualis porín tejuan tipoutinemij ihuan Cristo.

**Nican Pablo tajtoa de queniu tejuan titanojnotztinemij ica ne tenilil  
tenica Dios moyancuicayectencahuac de quichihuas**

**3** Huan cuac ijcón tamechnojnotzaj, ijcuación amo xicyolnemilican que xa tejuan san timohueymatinemij san ica totajtluan. Porín tejuan amo monequi ma tamechnextilican amame campa ixnesis que ocsequin chihuanime techcualtagaitaj. Huan nión no monequi ma tamechtajtanicam amame tenica ixnesis que namejuan nantechcualtagaitaj, ijcón queme ocsequin tamachtiani quichiutinemij. <sup>2</sup> Huan melau amo ijcón ticchiutinemij porín namejuan nanquinejnehuiláaj queme yesquía se amat campa ixnesis que tejuan nantechcualtagaitaj. Huan namejuan nanquinejnehuiláaj queme se tajcuilolamat. Pero nijín amat yejua ne ijcuiliutoc ya tech toyolo-

juan campa nochi in tagayot cuali huelis quixmatisque huan quileerosque. <sup>3</sup>Huan namejuan no nanquinejnehuilíaj queme yesquía se amatajcuilol ten Dios mismo quijcuilol. Huan Cristo techpanoltilij nijín amat para tejuan ma ticleerojtinemican. Huan cuac in tagayot namechitilijtinemij, ijcuacón yejuan queme yesquía quileerojtinemij se carta ten Cristo quinaltitanilij ya. Huan nijín carta amo ijcuiliutoc ca tinta san. Ta, ijcuiliutoc ica ne chichahualis den Yecticatzin Espíritu ten hualehuac imaco Totajtzn Dios ten yoltinemi sen nachipa. Huan nijín carta amo no ijcuiliutoc sayó tech patahuac teme san. Ta, nijín carta ijcuiliutoc itech nintalnamiquliusan de tejuan tiitaneltocacahuan de Cristo. <sup>4</sup>Huan nochi nijín ten tamechilíaj, ticyecajscamatij porín titacautamatinemij ihuan Dios ica ne ichichahualitzn de Cristo. <sup>5</sup>Huan amo tejuan san timomacatinemij huelilis para totequiu de tiitatitaniluan de Dios. Ta, nochi in tequit ten tihuelij ticchiutinemij, nochi Dios techpalehuijtju huan techpanoltilijtiu nichichahualis. <sup>6</sup>Tamechilíaj que sayó Totajtzn Dios techpanoltilijtoc nochi ichichahualis para tihuelij tictequitilijtinemisque Yejuatzin. Huan nijín ihuelilis Dios techpanoltilijtoc porín Yejuatzin ica se yancuic tenilil moyancuicayectencahuac ya de techpalehuis ica ne yec nemilis ten techpanoltilijtoc in Yecticatzin Espíritu. Ica ya nojón amo monequis tictacamatisque ne tanahuatilme de Moisés ten sayó ijcuiliutoc tech amat san. Porín ne tanahuatilme ten Moisés quijcuilol tech ne patahuac tet, yejua ne techtelchihuac ma tiixpolihuican. Pero in Yecticatzin Espíritu techpanoltilijtoc ne yec nemilis sen nachipa.

<sup>7</sup>Huan ne tanahuatil Moisés ijcuiliutoc ica letras tech patahuactet. Huan ne tanahuatil cualcuitihualaya se chicaucacualtziyo hasta in pueblojuani de Israel amo huelíaj quixitasque Moisés porín iixco de Moisés chicaucapetacaya. Pero ne chicaucacualtziyot cuetautiya huan ixmictiyá. Huan cualcuitihualaya se chicaucacualtziyot ne tanahuatil de Moisés ten techtelchihuas ma tiixpolihuican. <sup>8</sup>Pero cachi oc chicaucacualtziyot cualcuis ne tanojnotzalis ten in Yecticatzn Espíritu techmachtijtinemi. <sup>9</sup>Huan ocsepa namechilía que ne tanahuatil de Moisés cualcuitihualaya se chicaucacualtziyot, masqui techtelchihuas ma tiixpolihuican. Pero cachi oc cuica se chicaucacualtziyot ne tanojnotzalis de Cristo de que Totajtzn Dios techtajtamiltij ya totajtacoluan huan axcan Yejuatzin techpohua que tiyolchipauque porín titacautamatque ihuan Cristo. <sup>10</sup>Huan masqui ne tanahuatil de Moisés cualcuitihualaya se chicaucacualtziyot, pero axcan amo quipía ne mismo chicaucacualtziyot. Huan amo semi quinejnehuilía oc queme ne cachi hueyi chicaucacualtziyot ten cuica in tanojnotzalis de Cristo. <sup>11</sup>Huan ne tanahuatil de Moisés cualcuitihualaya se chicaucacualtziyot pero huejcahuasquía sayó se ome eyi tonal san. Pero ne tanojnotzalis de Cristo cuica semi hueyi chicaucacualtziyot, pero huejcahuati para sen nachipa huan amo queman tajtamis icualtziyo.

<sup>12</sup>Huan tejuan ticyecmatij que cachi hueyi in chicaucacualtziyot de Cristo. Ica ya nojón tamechyecnojnotzatinemij de Cristo ica míac yolchichahualis. <sup>13</sup>Huan tejuan amo ticchiutinemij queme ne Moisés ten moixtactinemía ica se tilma para ma amo huelisquía in pueblojuani de Israel ma quitani ne chicaucacualtziyo, porín ne chicaucacualtziyot quipíac de ixmiquis. Huan ixmiquic ya ne cualtziyot den tanahuatil de Moisés porín ipa amo cualcuitihualaya chichahualis para huejcahuasquía. <sup>14</sup>Pero ne pueblojuani de Israel amo huelíaj cajsicamatisque porín yejuan quixnamictinenque itanojnotzalis de Dios. Huan ne achtopa contrato Dios moyectencahuac que quichihuas ihuan Moisés. Huan hasta axcan cuac ne pueblojuani de Israel quileeroaj

ne achtopa contrato, ijcuación ayamo cajsicamatij porín tensá quintzajtzacuilía, queme yesquía ica se tilma ixtzactosquía. Ica ya nojón amo cajsicamatisque porín ne tilma ayamo quinixquixtilíaj. Huan nijín sayó huelis quichihuas Cristo quinixquixtilis huan quintamachilistapos. <sup>15</sup> Huan hasta axcan cuac ne pueblojuani de Israel quileeroaj ne tanahuatil de Moisés, ijcuación tensá quintzajtzacuilía nitamachilis para amo huelis cajsicamatisque. <sup>16</sup> Pero cuac se tagat tacuautamati huan moteaxcatilía ihuan Totecotzin Cristo, ijcuación Cristo quiquixtilis ne ten quitamachilistazajtzacuiliaya para ijcón huelis cajsicamatis in Tajtoltzin de Dios. <sup>17</sup> Huan Totecotzin, Yejuatzin ne Yecticatzin Espíritu. Huan campa tequititoc in Yecticatzin Espíritu ten hualehuac imaco Totecotzin, ompa in Yecticatzin Espíritu quitojtomilijtoc de nojón quinixztacuiltijtoc itaneltocacahuan de Dios. <sup>18</sup> Ica ya nojón tejuan amo teyi quitzazajtzacuilía oc totamachilis ne tilma tenica amo huelfa se cajsicamatis in tanahuatil de Moisés. Pero axcan tejuan ticnejneuifaj queme se tescat ten tanaltontía ica ne chiscaucualtziyot de Cristo. Huan ijcón tejuan cachi oc titamatiyohue queme Cristo porín ajachichi ticseljiohue ne chiscaucualtziyot de Cristo. Huan nochi nijín sayó quichiutinemi Totecotzin. Huan Totecotzin Yejuatzin in Yecticatzin Espíritu.

**4** Ica ya nojón tejuan ma amo queman timoyolquejuepacan tech totequiu porín Totajtzin Dios techyolicnelij huan techtequimactij ya ma titequititinemican. <sup>2</sup> Huan ticmajpeutinemican nochi tataman amocuali chihualis ten moichtacachiutinemi huan ten tepinautía. Huan amo no ticchiutinemij totequiu ica tacajcayahualis. Huan amo no tictamachilispatilíaj in Tajtoltzin de Dios. Ta, tejuan titanojnotztinemij ica sayó ten melau. Huan ijcón titequititinemij iixpantzinco Dios huan no senteixteno para que nochi in talticpacuani huelisque quitasque totequiu cox melau chipahuac. <sup>3</sup> Huan tejuan titanojnotztinemij ica ne Tajtoltzin de Dios ten cualcui ne nemaquixtilis. Pero como totanojnotzalis amo moyecnextijtiu inpan in talticpacuani, ijcuación totanojnotzalis amo monextía sayó inpan neques ten yajtocque ya tech in ixpolihuilis. <sup>4</sup> Huan neques ten yajtocque tech in ixpolihuilis, yejuan nojonques amo tacuautamatinemij ihuan Cristo. Porín in hueyi chiuque in amocuali ten tayecantinemi nican talticpac, yejua ne quinixpojopoyocuiltijtoc den nintamachilis para ma yejuan amo huelij quiselisque in Tajtoltzin de Cristo ten tatanextía queme se chiscaucatanex. Huan cuac tiquitaj Totecotzin Cristo, ijcuación melau tiqiztocque Totajtzin Dios. <sup>5</sup> Huan cuac titanojnotztinemij ica in Tajtoltzin de Dios, ijcuación amo timotematiltijtinemij de tejuan san. Ta, tictenextijtinemij de Jesucristo de que Yejuatzin Totecotzin. Huan cuac tejuan titanojnotztinemij, ijcuación timotematiltijtinemij de que tejuan tamechtequitilijtinemij sayó porín techtasojta Cristo Jesús. <sup>6</sup> Huan Totajtzin Dios tanahuatij ma mochihua tanex huan ma pepetaca campa ne tayohuayanijtic. Huan no Yejuatzin mismo Totajtzin Dios quimonequiltij ma tatanextijto in tanextzin de ni Tajtoltzin tech toyolojuan. Huan ica ne tanextzin tejuan cuali huelis tiquixmatisque ne chiscaucualtziyot de Dios ten monextijtinemi campa Cristo tequititinemini.

**Nican Pablo quijtoa de que ma tinentinemican  
sayó ica por totacuautamatis ihuan Cristo**

<sup>7</sup> Huan ne chiscaucualtziyot tenica Dios techyoltahuilijtinemi, yejua ne quinejnehuilía se tensá ten tel patío. Pero ne chiscaucualtziyot yetinemi tech tejuan totacayo ten quinejnehuilía queme se soquicomit san. Huan Dios ijcón quichiu-

tiu para ma nestiu senteixteno que ne chicaucahuelilis hualeutoc imaco Dios huan amo hualehua tech tejuan san. <sup>8</sup>Huan masqui ejcotoc míac tataman ohuijcyot, pero amo queman techtamicuetahuiltía. Huan masqui ticyolmachilijtocque míac tataman tajyohuilis, pero amo queman titasematij. <sup>9</sup>Huan masqui no techican-tocatinemij para techmictisque, pero amo no queman titasencahualme de Dios. Huan masqui no techtaluijuitecque pero amo queman techijitacosque para tiixpolihuisque. <sup>10</sup>Huan campa yesqui tiyohue, ijcuacán ticchixtinemij que timomiquilisque ijcón queme Cristo quichixtinemía que momiquilis. Huan ijcón ixnestinemi senteixteno de que Cristo techpanoltijtoc nichicahualis tech tejuan tonemilispán. <sup>11</sup>Porín tejuan mientras tinentinemij oc, ijcón mosta mosta ticchixtinemij que techmictisque porín titacautamatinemij ihuan Jesús. Huan ijcón no ixnestinemi senteixteno de que Cristo Jesús techtayocolijtiu nichicahualis tech tejuan totacayohuan ten tajtamiti san. <sup>12</sup>Huan ijcón masqui in chicahualis den miqulilis motequitiltijtinemij de queniu techmictisque, pero in Tajtoltzin de Dios no tequititoc namoyolijtic para ma mochiutiu ne yec nemilis sen nachipa.

<sup>13</sup>Pero tejuan titacautamatinemij ihuan Cristo ica nochi tochicahualis. Ica ya nojón tejuan ticsentocatinemij titacautamatinemij huan titanojnotztinemij ijcón queme ne quijtoa in Tajtoltzin de Dios campa ijcuiliutoc ijcuín: “Nitacautamatic ihuan Dios; ica ya nojón nitanojnotztinemij itencopaca Dios”. <sup>14</sup>Huan tejuan cuali ticmatinemij que Totajtzin Dios quipanquixtij yoltoc intzalan in ánimajme Tote-cotzin Jesús. Ica ya nojón no cuali tiyecajsicamatij que Totajtzin Dios no techpanquixtis tejuan tiyoltocque intzalan in ánimajme porín tipoutinemij ihuan Jesús. Huan no ticyecmatij que Totajtzin Dios techuicas namohuan para tisenyetinemesque iixpantzinco Yejuatzin sen nachipa. <sup>15</sup>Huan nochi nijín tataman tajyohuilisme topan panoc ya sayó para namechpalehuis namejuan. Huan ijcón miacque de namejuan nanquiselijtiyasque míac tataman teicnelilis de Dios. Huan ijcón cachi oc nanmotasojcamatiyasque ihuan Dios huan cachi oc nanquihueyipanchihuasque Totajtzin Dios. <sup>16</sup>Ica ya nojón tejuan amo queman timoyolquejuepaj tech totequiu. Huan masqui totacayo cuetautiu mosta mosta, pero tech totalnamiquilis Dios cachi oc techchicahualismacatiu mosta mosta. <sup>17</sup>Huan amo semi ticueymatij in tajyohuilis ten tipanotocque tech nijín tonemilispán porín nijín tajyohuilis niman panotiquisas san. Huan no nijín tayohuilis techualcuilijtoc ne chicaucacualtziyot de Dios. Huan cada tonal cuac titajyohuíaj, ijcuacán cachi oc mohueyiltía ne chicaucacualtziyot de Dios huan quisentoca momiaquiltijtiu huan momajxitijtiu ne chicaucacualtziyot de Dios huan amo huelis se cajsicamatis hasta can ajsiti. <sup>18</sup>Pos tejuan amo ticueyipo-huaj que tensá semi hueyi ipatiu tech nochi ten tiqiztzinemij. Ta, tejuan ticueyipo-huaj ne tamachilis de Dios ten amo tiqiztzinemij ica toixtololohuan. Porín nochi ne ten tiqiztzinemij, yejuan ne nochi tajtamis san. Pero nochi ten amo tiqiztzinemij, yejuan ne huejcahuasque sen nachipa yetos.

**5** Huan tejuan cuali ticmatij que masqui totacayo ipa ijtacahuis ijcón queme se tochan huejuelihui, pero ipa Totajtzin Dios techchijchihuilij ya se tochan nepa eluiyactzinco ten amo queman tajtamis. Huan tochan nepa eluiyactzinco amo tamachijchiu de se tagat san. <sup>2</sup>Huan mientras tiyoltinemij tech nijín tonalme ica nijín totacayo ten tamati queme se tochan, ijcuacán tiyolnejsiucatenaj ijcón queme cuac timoyoltequipachoj. Huan tiyolnejsiucatenaj nican talticpac porín ticyolne-nequij tiquixpatasque tochan para timochantitihue nepa eluiyactzinco. <sup>3</sup>Huan ijcón

cuac tiyetotihue nepa eluiyactzinco, ijcuación techquemilojtos ica se yancuic totacayo queme yesquía se yancuic cali. Huan ijcón cualtzin timotaquentijtinemis que ne tonalme. <sup>4</sup>Huan mientras tiyoltinemij tech nijín tonalme ica nijín totacayo ten tamati queme se tochan, ijcuación tiyolnejsiucatenaj huan tiyoltajyohuía ijcón queme in cocoyani. Huan tiyolnejsiucatenaj amo sayó porín ticyolnejnequij que ma Dios techajchihuili tosoltictacayo. Ta, cachi oc tiyolnejsiucatenaj porín semi ticyolnejnequij que ma Dios techyancuicataquenti ica ne toyancuicatacayo. Huan ijcón ma ixpolohui totacayo ten ipa quipía de tamis para ijcón timotaquentisque ica ne yancuic nemilis ten amo queman tamis. <sup>5</sup>Huan Totajtzin Dios, Yejuatzin tequititoc tech toyolojuan para huelis ticselitihue nochi nijín tatiochihualis. Huan Totajtzin Dios no techyolpepexocaltij ica in chichualis den Yecticatzin Espíritu. Huan in Yecticatzin Espíritu Yejuatzin in tetayocolil de Dios tenica axcan Dios quinextijtinemi que tejuan se tonal ticajsicaselitihue nochi ajsitoc itatiochihualisuan de Dios.

<sup>6</sup>Ica ya nojón tejuan tinentinemij ica hueyi tacuautamatilis ihuan Dios. Huan cuali ticmatij que mientras tiyoltinemij oc ca nijín totacayo, ijcuación ayamo ticajsitij ne toyancuicatacayo ten tamati queme se yancuic tochan nepa eluiyactzinco campa iixpantzinco Totecotzin Jesús. <sup>7</sup>Huan tejuan tinentinemij sayó ica ne hueyi tacuautamatilis que se tonal nochi nijín ticselitihue. Huan ticsentocaj titacuautamatiyohue nican talticpac masqui ayamo tiquitaj ne toyancuicatacayo. <sup>8</sup>Huan tejuan tinentinemij sayó ica ne hueyi tacuautamatilis ihuan Dios. Pero no cachi oc ticyolnejnequij ticautehuasque ya nijín tosoltictacayo para ijcón huelis tiyetotihue nepa iixpantzinco Totecotzin Jesús. <sup>9</sup>Ica ya nojón tejuan timofuerzajuijtiohue de queniu ticyolpactijtiyasque Totecotzin Jesús. Huan ijcón ticchiutinemij masqui ticautehuasque ya tosoltictacayo oso ayamo ticautehuaj. <sup>10</sup>Huan quipía de timonextitihue iixpantzinco Cristo ihuelilipan campa Yejuatzin techixcomacas. Huan ompa Cristo techixcomacas cada tisenme ijcón queme ticchiutinemis que ten cuali oso ten amocuali chihualis cuac tinentinemíaj nican talticpac. Ijcuación Cristo techmactilis ne tatiochihualis ten quinamiqui ticselisque.

### **Tejuan titanojnotztinemij de que Dios moyoltalij ya ihuan in talticpacuani huan quimonequiltía techmactilis ne yolseucanemilis**

<sup>11</sup>Huan tejuan cuali ticajsicamatij que monequi ticmohuiscapoutinemij Totecotzin, porín ne chiscaucatatzacuiltis ten hualajtoc. Ica ya nojón tejuan timofuerzajuijtinemij de tiquintaneltoctijtinemis que in tagayot de que hualajtoc ya de cualanyot de Dios. Huan Totajtzin Dios cuali quimati de toni tichihuanime tejuan. Huan nicnequi que ma Dios namechmactiliti ya tech namotalnamiquilis de toni tichihuanime tejuan. <sup>12</sup>Huan cuac ijcón tamechnojnotzaj, ijcuación amo xicyolnemilican que ocsepa ma tejuan tamechtajtanican que xitechcualtagaitacan. Ta, cuac tamechnojnotzaj de tejuan, ijcuación ticnequij tamechnextilis que de queniu huelis nanmoyolpactijtinemis que ica por totequi ten ticchiutocque namohuan. Huan como nancajsicamatij totequi ten ticchiutinemij namotzalan, ijcuación namejuan huelis nanquintajtoltilis que neques ten techijitoaj huan mohueyimatinemij san. Huan yejuan nojonques mohueyimatinemij porín tacuautamatinemij sayó ica ne ten yejuan quitztinemij. Huan yejuan amo yoltanemilijtinemij de queniu Dios quinitilijtinemi in tamachilis de ninyolojuan. <sup>13</sup>Huan masqui techijitaj huan techpohuaj que tejuan amo ticuatamatcanemij, pero tejuan amo tiquincaquilijtinemij. Porín tejuan

tictequitilijtinemij Dios. Huan masqui ocsequin techpohuaj que melau ticuatamatcanemij, pero tejuan amo tiquincaquilijtinemij, porín tejuan timotequitiltijtinemij sayó para ijcón tamechpalehuijtinemisque de nochi namejuan.

<sup>14</sup> Porín tejuan techmachililtía ne tetasojtalis de Cristo que monequi ma titequititinemican namotzalan. Huan ticchiutinemij nijín tequit porín cuali ticyecajsicamatij ya nijín tamachilis que nochi in talticpacuani yolmictinemij tech nintajtacoluan. Ica ya nojón Totecotzin Cristo momiquilij ninixpatca in talticpacuani huan quinixtahuilij nintajtacoluan. <sup>15</sup> Huan Cristo momiquilij para quinixpacayotis nochi in talticpacuani huan ijcón quixtahuac nintajtacoluan. Huan nochi nijín mochihuac inpan neques ten yoltinemij ica ichichualis de Dios para que yejuan ma amo moyolpactijtinemican oc. Ta, para que yejuan ma sayó Cristo quitequitilijtinemican. Porín sayó Yejuatzin momiquilij huan ocsepa panquisac yoltoc para quinmaquixtis nochi yejuan. <sup>16</sup> Ica ya nojón tejuan amo tiquinpohuaj acsame ijcón queme yejuan motequitiltijtinemij nican talticpac. Ne achtopa ya, quema, ticpouque Cristo ijcón queme se tagat san ten motequitiltijtinemic nican talticpac. Pero axcan amo ijcón ticpoutinemij oc Cristo. Ta, ticpoutinemij Cristo que Totecotzin ya. <sup>17</sup> Porín ne naquen poutoc ya ihuan Cristo, yejua ya nojón mochihuaco ya se tagat ca yancuicatomachilis. Huan nochi ne tamachilis tenica moyecantihualaya, yejuan nojónques nochi tantiyajque ya. Huan axcan xiquitacan san nochi yancuicayetinemi ya itamachilis.

<sup>18</sup> Huan nochi nijín huelic quichihuac sayó Totajtzin Dios. Huan Dios mochihualtij que ma moyoltali ya tohuan para ma ijcón timotoquican ya ihuantzin. Huan nochi nijín motamichihuaco ya porín momiquilij Cristo tech in cruztzin. Ica ya nojón techtequimactij Dios que ma tiquinilijtinemican in talticpacuani que Totajtzin Dios moyoltalij ya tohuan huan axcan huelis ya timotoquisque ihuantzin. <sup>19</sup> Huan nochi nijín quijtosnequi que cuac Cristo motemactij ma quimictican, ijcuacón Dios mochihualtij que ma moyoltali ya ihuan in talticpacuani para ma ijcón huelis timotoquican ya iixpantzinco ya. Huan axcan Totajtzin Dios amo semi techtechtía oc ne totajtacoluan porín Cristo quitamiixtahuac ya. Ica ya nojón Dios techmactilij in tequit que ma tiquintapohuijtinemican nochi in talticpacuani que Totajtzin Dios moyoltalij ya inuan nochi in talticpacuani huan axcan huelis tiajsitihue iixpantzinco Yejuatzin. <sup>20</sup> Ica ya nojón titequitijtihuitze ica in chichualis de tocaytzin de Cristo, porín titanojnotzcahuan de Cristo. Huan tejuan tamechtatautijtinemij queme yesquía Totajtzin Dios namechtatautijtos. Huan tejuan ica in chichualis den tocaytzin de Cristo tamechtatautíaj ijcuín: Xicselican nijín tamachilis que Totajtzin Dios moyoltalij ya namohuan huan huelis ya ximotoquican ihuantzin. <sup>21</sup> Huan xicmatican que Totecotzin Cristo amo motajtacolmacac nión ica teyi tajtacol. Pero Totajtzin Dios quipohuac Cristo que Yejuatzin tajtacole huan quitechtij nochi totajtacoluan. Huan ijcón cuac tipoutinemisque ya ihuan Cristo, ijcuacón Dios techtajtamiltis ya totajtacoluan huan techpohuas tiyolchিপauque ya.

**6** Huan tejuan tisentequititinemij ihuan Dios. Ica ya nojón tamechontatautíaj xicselijtiyacan in teicnelilis de Dios huan ma amo nencajtitiu san namopan. <sup>2</sup> Porín Totajtzin Dios techilía tech ni Tajcuilolamatzin ijcuín: Tech ne tonal cuac niconmonequiltij, ijcuacón nimitzcaquilij. Huan no namechonmaquixtij cuac Nejuatzin namechpalehuico.



Huan xiquitacan san nejua ni Pablo namechilía que axcan ya melau in tonal cuac Dios quimonequiltía namechyolicnelis. Huan cachi oc axcan ya melau in tonal ya cuac Dios namechmaquixtis.

<sup>3</sup> Huan tejuan amo teyi tictalíaj tenica huelis tiquintzatzacuiliytiasque ocsequin tamachtiani. Ica ya nojón amo aquen huelis techtejteneutinemisque que tejuan tinentinemij tech in tajtacol. <sup>4</sup> Ta, tejuan timofuerzajuíaj de titanextilijtyiasque que tejuan tiitequiticahuan de Dios. Huan titenextijtjinemij que tejuan tiitequiticahuan de Dios cuac ticxicojtyohue ca nejmach tataman toneucayome huan tataman tajyohuilisme. Huan no titenextijtjinemij que tejuan tiitequiticahuan de Dios cuac tiqiniyjohuijtjinemij tataman xocolilisme huan tataman yolcuejmololisme. <sup>5</sup> Huan no tictenextijtjinemij que tejuan tiitequiticahuan de Dios cuac tiqiniyjohuijtjihuallaque de techuijutequíaj huan de techtzacuayaj tech in cárcel. Huan no tech-tajyohuiltijque ica míac tataman cuejmololis. Huan timosioutiayaj ica míac ohuiccatequime. Huan no timocochisoloyaj huan timayancanentinemíaj tech totequiu. <sup>6</sup> Huan no tictenextijtjinemij que tejuan tiitequiticahuan de Dios cuac tichipaucanentinemij huan cuac tejuan ticajsicamatinemij in Tajtoltzin de Dios ten melau. Huan no tictenextijtjinemij que tiitequiticahuan de Dios porín ticyolicataxicojtyohue in tajyohuilis huan porín titeicnelijtyohue. Huan no tictenextijtjinemij que tiitequiticahuan de Dios porín in Yecticatzin Espíritu yetinemij tech toyolojtic huan porín titetasojtatinemij ica nochi toyolo. <sup>7</sup> Huan no tictenextijtjinemij que tejuan tiitequiticahuan de Dios porín titanojnotztjinemij ica ne Tajtoltzin ten cualcui sayó ten melau, huan no porín Totajtzin Dios quinextijtjinemij topan ihueyichicahualis. Huan tejuan tictatequiutíaj in melahuac Tajtoltzin de Dios ica toyecmacopaca para tiquixtzacuilisque ne amocuali. Huan no ica in Tajtoltzin de Dios timopalehuisque ica toopochcopaca ijcón queme mopalehuijtjinemij se soldado. <sup>8</sup> Huan queman san in tagayot techmohuisca pohuaj huan icsá techmohuispoloaj. Huan queman san in tagayot techcualtagaitaj huan icsá techijitoaj. Huan queman san in tagayot techpohuaj que tejuan sayó tixolopijtjinemij san huan icsá quijtoaj que tejuan titanojnotztjinemij ica ten melau. <sup>9</sup> Huan no queman san in tagayot techmoucaitaj huan icsá yejuan quijtoaj que techyequixmatij. Huan masqui queman san in tagayot quinequij techmictisque, pero tejuan ticsentocaj tyoltjinemij. Huan masqui queman san techuijuitectinemij, pero ayamo techmictijque. <sup>10</sup> Huan masqui in tagayot techyoltayocoltjique, pero tejuan nachipa timopaquiltijtjinemij. Huan masqui in tagayot techitaj que semi tipobres, pero tejuan tiquinmactilijtjinemij in Tajtoltzin de Dios huan ijcón tiquinricojcultijtyohue in tacaquini ica ne Tajtoltzin de Dios. Huan masqui tejuan mota que amo teyi ticpíaj ten toaxcacopa, pero tejuan ticmatij que nochi ten ongac timopialíaj ya. <sup>11</sup> Huan namejuan nantocnihuan de Corinto, tamechyecnojnotzque ya huan amo teyi tamechtaatilijque de queniu tejuan tictanemilijtjinemij. Ta, tamechyecnextilijque que tamechueyiyoltasojtaj. <sup>12</sup> Huan tejuan amo teyi tamechztajtzacuiliijque de que amo oc xitechtasojtacan. Ta, namejuan san nanmotzajtzacuiliijque para ma amo xitechtasojtanij oc. <sup>13</sup> Huan ijcón queme se tetat quintatautía iconahuan, no ijcón nejua namechtatautía xitechnextilican que nantechueyiyoltasojtaj huan ijcón xitechyecnojnotzacan huan amo teyi xitechtaatilican.

### Nican Pablo tajtoa de que tejuan tiichancahuan de Totajtzin Dios ten yoltica

<sup>14</sup>Huan namechilía amo ximoyecantinemican ica ne amocuali tamachilis tenica moyecantinemij neques de amo taneltocani. Porín como ijcón nanquichiutinemij, ijcuación nanquinejnehuilfaj queme se yunta de quinsenilpía ihuan se cuacuohue huan se burro. Porín amo hueli tichipaucanemij como tochipaucanemilis ihuan yetinemis ne pitzotic nemilis. Huan in tanextzin amo huelis yetos como no ongac tayohuayanilot. <sup>15</sup>Huan amo no huelis sen yetinemisque Totecotzin Cristo ihuan Satanás ten no quilfaj Belial. Huan amo no huelis senpoutinemij se taneltocacque de Cristo ihuan se tagat ten amo taneltoaca. <sup>16</sup>Huan Totajtzin Dios yetica tech nichantzin. Huan Dios amo huelis moyectencautinemis ihuan ne tatadiosme ten tamachijchiuime san. Huan namejuan nanmochihuacoj queme se ichantzin de Dios ten yoltica. Huan nochi nijín ticmatij porín Totajtzin Dios quijtoa tech Itajcuiloltzin ijcuín:

Nejuatzin ihuan nopueblojcahuan nicalyetinemis huan ihuan ninentinemis.

Huan Nejuatzin niyesqui niin Dios.

Huan yejuan yesque nopueblojcahuan.

<sup>17</sup>Ica ya nojón ocseco quijtoa ijcuín:

In Totecotzin quilía ijcuín: “Xiquisacan huan ximosecakahuan de neques ten amo taneltocani.

Huan amo ximocalaquijtinemican oc tech ninpitzoticnemilis.

Huan como ijcón nanquichiutiyohue, ijcuación Nejuatzin namechchihua que nan-noaxcahuan ya.

<sup>18</sup>Huan Nejuatzin niyesqui ninamotat huan namejuan nanmochihuasque nan-notelpocahuan huan nannochpochuan”.

Huan nochi nijín quijtoa Totecotzin ten quipixtinemi nochi chicahualis.

**7** Huan notasojicnihuan, xiquitacan de queniu Totajtzin Dios moyectencahuac tohuan de techpalehuisque. Ica por nijín tajtolme monequi ma ticsentocacan tichipaucanentinemican huan amo teyica ma timocalaquijtinemican tech in tajtacolnemilis. Porín ne tajtacolnemilis techmautinemij ica tajtacol tech totacayo huan tech totalnamiquilis. Huan monequi ma timoyecyolchipautiyacan porín ticmohuistilijtinemij Totajtzin Dios.

### Nican Pablo tajtoa de queniu in tocnihuan taneltocani de Corinto moyolnemilijque de nintajtacoluan.

<sup>2</sup>Huan tamechtatautilfaj xitechselican ca tetasojtalis huan amo xitechmajpehuacan. Porín tejuan amo aquen ticojcoojque huan amo no aquen tiquijtacojque huan amo aquen ticyolcajayauque. <sup>3</sup>Huan amo namechilía nijín por nicnequi namechtechtis in tajtacol. Ta, namechilijtihualaya ya que semi namechueyiyolta-sojta porín timosepanmomiquilisque ihuan Cristo huan tisenpanyoltinemisque ya ihuan Yejuatzin. <sup>4</sup>Huan namechnojnotzotoc ica hueyi yolchicahualis porín timosentasojtatinemij. Huan nimohueyiyolpactía ica por namejuan namotetasojtalis. Huan masqui titajyohuijtinemij ica mías tataman toneucayome, pero Dios nechueyiyoltalijtinemi huan no Dios nechueyiyolpactijtinemi.

<sup>5</sup>Desde ne tonalme cuac tiyajque titequititoj ne Macedoniajcopaca, ijcuación amo se momento timosehuijque tech totequiu. Ta, cachi oc nohuiyampa techtajyohuilti-

jtiaque ne taixnamiquini. Pero tejuan tiquinxicojtineneque ne taixnamiquini masqui tiyoltanemilijtinemíaj ica por míac yolcuejmololis. <sup>6</sup> Pero Totajtzin Dios nachipa quinyoltalía neques ten moyolcocojtinemij. Huan ijcón Totajtzin Dios techyecyoltalij ya tejuan cuac ejcoc in totequiticaicni Tito. <sup>7</sup> Huan ne neyoltalilis de Dios ticmachilijque amo sayó porín in Tito ejcoc. Ta, cachi oc timoyoltalijque porín Tito quiapiaya hueyi yolchicahualis porín namechitilito namotatacamatilis. Huan nijín totequiticaicniu Tito yejua techtapohuic de que namejuan semi nanquiyolnejnequij nantechitasque. Huan no techtapohuic de que nanmoyolcocojtinemij porín ne tajtacol ten mochiutoc namotzalan. Huan no techtapohuic de queniu namejuan semi nanquiyolnejnequij nannechtacamatisque. Ica ya nojón cachi oc nimohueyiyolpacti-aya cuac nicaquía nochi nijín. <sup>8</sup> Huan ne carta ten namehijcuilohuilijca, masqui ica namechyoltayocoltij, pero axcan amo nechylolcuejmolojtinemi oc. Ne achtopa melau semi nechylolcuejmoloaya. Pero axcan nicajscamatic que nocarta namechyolxocolij sayó ipan sequi tonalme. <sup>9</sup> Pero axcan niyolpactinemi amo porín ne achtopa nanmoyoltayocoltijcaj. Ta, niyolpactinemi cuac nicaquic que nanmoyolcocojtinemij ya huan nanquimachilijque namotajtacoluan huan ijcón nanmoyolnemilijque de namotajtacoluan. Huan nochi nijín amo tejuan tamechmachililtijque. Ta, Totajtzin Dios namechyoltayocoltij para que ma amo xicpoloani ne namotetayocolil iixpantzin Dios. Ica ya nojón tejuan amo teyi tamechchihuilijque tensá mal. <sup>10</sup> Huan cuac Dios ijcón quimonequiltij ma namechyoltayocoltis ica por totajtacoluan, ijcuacón ticypolpactíaj Dios como timoyolnemilíaj de totajtacoluan. Porín nojón yolnemililis techualcuilía ne nemaquixtilis. Huan amo aquen motayocoltis porín quiselij ya ne nemaquixtilis. Pero namechilía que cuac se tagat moyoltayocoltía por ne momento san ica por nitajtacol huan amo moyolnemilía iixpantzinco Dios, ijcuacón ne tagat amo quiselis ne nemaquixtilis. Ta, yejua quisentoca yohui campa ne ixpolihuilis. <sup>11</sup> Huan namejuan ica nejmach nanquiyohuijtiasque ne yoltayocoyalis ten Dios namechmachililtij. Huan axcan xiquitacan san ten mochihuac que Dios namechmachililtij que semi hueyi namotajtacoluan. Huan nanmoyolchipauque de namotajtacoluan. Huan semi nanmoyolcuejmolojque, huan no nanquiyolmachilijque mohuilis ica por ne tajtacol. Huan semi nanquiyolnejnequij huan nanquiyec- tatemolijque de queniu nanmoyolchipahuasque hasta melau nanquitatzacuiltijque ne tagat tajtacole ten yetinemía namotzalan. Huan ica nochi nijín nanquitenextijtinemij ya que amo aquen huelis namechtajtacoltis oc. <sup>12</sup> Ica ya nojón cuac namehijcuilohuilijca ne nocarta, ijcuacón nichihuac para que namejuan ximomacacan cuenta que namejuan semi nantechyoltasojtatinemij iixpantzinco Dios. Ica ya nojón namehijcuilohuilijca ne nocarta amo porín nicnequía nictectis ne tagat ne itajtacol. Huan amo no nicnequía ica nocarta sayó nictajtohuis huan nicpalehuis ne tetat ten tajyohuic ica ne tajtacol de niconeu quichiutinemic. Ta, namehijcuilohuilijca ne carta para que namejuan nancajscamatij de quenin nanquinequij nantech- tacamatisque. <sup>13</sup> Huan ica por nochi namotatacamatilis Dios techyoltalij ya. Huan cachi oc yolsehuilis ticselijque porín tiquitacque que Tito semi yolpactihuala porín namejuan nanyectatacamatinemij ya. Ica ya nojón cachi oc timohueyiyolpactijtinemij ya porín nochin namejuan nanquisenpanpalehuicque in Tito para que yejua ma quimachili ne yoltalilis. <sup>14</sup> Huan amo nimopinautis ica tajtol ne tenica nictapohuic in Tito de que nejua nimohueyiyolpactijtinemi ica por namejuan namotacuatamatilis. Ta, nochi tenica tamechnojnotztinenque, yejua ne yec tamelautoc. Huan nochi ten

tictapohuijque in Tito de namejuan, nochi melau quisaco. Porín tejuan tiquilijcaj Tito que tejuan semi timohueyiyolpactijtinemij de namejuan. <sup>15</sup> Huan ne Tito cachi oc namechyoltasojta cuac yejua quiyolelnamiqui de queniu namejuan nanquitacamatque ten yejua namechnajnahuatia. Huan no Tito namechyolicnelía cuac quielnamiqui de queniu namejuan nanquiselijque ca mohuisyot huan nanquiyolmachilijque itanahuatil de Tito. <sup>16</sup> Huan ica ya nojón axcan cachi oc nimohueyiyolpactía porín nitacuaumatiniemi que namejuan nannechtacamatiniemis que ica nochi ten namechnejmachtijca ya.

### **Nican Pablo tajtoa de que ma tiquinpalehuijtiyacan ica paquilis neques ten monequis tapalehuilis**

**8** Notasojcnihuan, axcan ticnequij tamechtapohuisque de queniu in tocnihuan taneltocani de ne Macedonijcopaca quitenxtilijtinemij iteicnelilis de Totajtzin Dios. <sup>2</sup> Huan ne tocnihuan masqui tajyohuijque ica míac tataman toneucayome, pero yejuan ipa moyolpactijtinemij. Huan masqui semi pobres, pero yejuan tapalehuijtineneque ica míac tataman tapalehuilis queme yesquía semi ricojme. <sup>3</sup> Huan nejuan ni Pablo nicyectenextij que ne tocnihuan de Macedonijcopaca melau tapalehuijtineneque ica míac paquilis ica nochi ten huelíaj tapalehuisque. Huan no nicyectenextij que yejuan quitemactijtineneque cachi oc hasta quipanoltiayaj ne ten ticnequíaj ma quichihuacan. <sup>4</sup> Huan yejuan techueyitatautijque de que ma tiquintacahuilican que ma yejuan no quinpalehuisque in ocsequin tocnihuan ten quinpoloaj. <sup>5</sup> Huan nijín tocnihuan taneltocani tapalehuijque cachi oc hasta quipanoltijque ten tejuan ticchiayaj que quichihuasque. Pos yejuan achto de nochi moteaxcatilijque imaco Totecotzin huan de ompa techpalehuijque ijcón queme quimonequiltía Totajtzin Dios. <sup>6</sup> Ica ya nojón tejuan tictatautijque totequiticaicniu Tito ma quitaminechico ompa namotzalan ne teicneliliscatequit tapalehuilis ica tomin ijcón queme in Tito pehuac quichiutinemía ne achtopa. <sup>7</sup> Huan namejuan nanquihueyipixtinemij namotacuaumatilis; cuali nanuelij ya nantamachtijtinemij ica in Tajtoltzin de Dios. Huan nanquihueyipixtinemij ya míac tataman tamachilis de Dios. Huan nanquihueyiyolnejnequij de nanquitequitilisque Dios, huan no nantechueyiyoltasojtaj. Ica ya nojón nicnequi xictamichihuacan nijín teicneliliscatequit de tapalehuilis ica tomin. Huan xicpanoltijtiyacan cachi oc huan que tejuan ticcháaj xicchihuacan.

<sup>8</sup> Huan nochi nijín namechnojnotzot, amo nicnequi namechnahuatis xicchihuacan. Ta, nicnequi namechnextilis de queniu mofuerzajuijtihuitze in tocnihuan taneltocani de Macedonijcopaca. Huan cuac namejuan nanquitztinemis que ya in neninteicnelilis de ne Macedonijjuani, ijcuacán namejuan no nannechnextilis que ya que namejuan no nanquintasojtaj in pobres huan nantapelehuijtinemij ica namotomin. <sup>9</sup> Huan namejuan cuali nanquixmatij ya de queniu techueyiyolicnelij ya Totecotzin Jesucristo. Porín Yejuatzin semi hueyi rico catca nepa eluiyactzinco, pero cualcautehuac nochi niricojyo. Huan mochihuaco pobre nican talticpac porín namechueyiyoltasojtac. Huan ijcón namejuan nanmochihuacoj ya nanricojme iixpantzinco Dios ica por itequiu ten Cristo Jesús quichihuac cuac Yejuatzin mochihuaco pobre nican talticpac. <sup>10</sup> Huan namechyolmajxitía para namechpalehuis tech nijín teicneliliscatequit. Huan niquixejcoa que monequi xictamichihuacan nijín tequit porín namejuan nanquipíaj se xihuit ya de que nanquipehualtijque de nanquinechicojtinemij nijín tapalehuilis de tomin. Huan nanquichiutineneque amo sayó porín totanahuatil.

Ta, nantequititinenque sayó ica namoueyiyoltanejnequilis. <sup>11</sup> Huan axcan xicsentocacan ya namotequi nanquitamitihue ica ne mismo hueyi yoltanejnequilis ten nanquipiacque cuac yequinica nanpeuque. Huan xitapalehuijtiyacan ijcón queme nanueltiyasque. <sup>12</sup> Porín como se tocníu quiyolnejnequi tapalehuijtinemis, ijcuacán Totajtzin Dios quihueyipohuas itapalehuilis de ne tocníu ijcón queme ne tocníu hueli tapalehuía. Porín Totajtzin amo quitajtanía tapalehuilis como se tocníu amo quipía tenica tapalehuis.

<sup>13</sup> Huan nejua axcan namechnojnotztoc que xiquinpalehuijtiyacan in ocsequin taneltocani. Pero cuac namechtequimacas de xitapalehuijtiyacan ocsequin tocníu huan, ijcuacán amo niquinsecocautiyás ne ocsequin tocníu huan ma amo tapalehuijtinemican. <sup>14</sup> Ta, nejua namechnojnotzac para que namejuan de Corinto ma xitapalehuijtiyacan ijcón queme ne taneltocani de Macedoniajcopaca ipa quichiu-tihuitze. Huan axcan namejuan nanquipixtinemij ya in tapalehuilis tenica huelis nanquimajxitisque ne tapalehuilis ten quinpoloa ne taneltocani de Macedoniajcopaca. Huan ijcón tech ocsequin tonalme yejuan ne de Macedoniajcopaca quipixtinemisque tapalehuilis tenica quimajxitisque ne tapalehuilis ten namejuan namechpolotiu. Huan como ijcón nanquichiutinemij, ijcuacán oncas sansé san tapalehuilis. <sup>15</sup> Ijcón queme ijcuiliutoc tech in Tajtoltzin de Dios ijcuín: “Ne tagat ten quihueyipixtinemis, yejua ne quipía sayó ten yejua monectiu. Huan ne ocsé tagat ten amo quihueyipixtinemi, yejua nojón amo queman semi quipoloa”.

### Nican Pablo tajtoa de Tito ihuan itequiticaicnihan

<sup>16</sup> Semi nictasojcamachilía Totajtzin Dios porín Yejuatzin quiyoltanemililtij in Tito ma namechpalehui ijcón queme Dios techtanemililtij tejuan ma tamechpalehuisque. <sup>17</sup> Huan ijcón ne Tito quitacamatic notanahuatil cuac nictequimactij. Pero cachi oc in Tito quiyolnejnequic namechitatu porín melau yejua itanejnequilis. <sup>18</sup> Huan tictitanij in Tito ihuan ocsé totequiticaicni ten nochi in tocníu huan taneltocani quicualtagaitaj. Porín ne ocsé tocníu motequitiltijtinemi de tanojnotztinemi ica in Tajtoltzin de Dios ten cualcuí ne nemaquixtilis. <sup>19</sup> Huan amo sayó quimohuiscapouque ne tocníu. Ta, nochi in tocníu huan taneltocani quijitacque ya ne tocníu para ma tohuan nentnemis huan para ma techpalehuijtinemis tech nijín teicneliliscatequit. Huan nochi nijín ticchiutinemij para ica ticueyipanchihuasque Totajtzin Dios, huan no para ica tictenextilijtinemisque que namejuan semi nanquiyolnejnequij nantapalehuijtinemisque. <sup>20</sup> Huan tictitanij in Tito ihuan ne ocsé totequiticaicni para ma amo aquen huelis techtejteneutinemis tech nijín teicneliliscatequit de ticnechicosque in tapalehuilis de tomin. <sup>21</sup> Porín tejuan timofuerzajuijtiyohue de amo ticchijcohuicasque totequi. Ta, tejuan ticnequij titequititinemisque ica ne yolmelaucaoyot iixpantzínco Totecotzin Cristo huan inixpan in tagayot. <sup>22</sup> Huan ihuan in Tito huan ne ica ome tocníu, no ticontitanisque ma quisehuiyacan ica eyi tocníu ten yejua no technextilijtinemi miacpa de queni yec tequititinemis ica míac tataman tayolnejnequilis. Huan nijín ica eyi tocníu cachi oc quinequi motequitiltijtinemis ica por namejuan porín semi namohuan tacuautamatij. <sup>23</sup> Huan tacán acsá namechtajoltis de toni chiquique nijín Tito, ijcuacán xiquilican que Tito notequiticaicni huan tequititinemis nohuan para tamechpalehuisque namejuan. Huan tacán acsá namechtajoltis de toni chihuanime in ocsequin tocníu huan tatitanilme ten nican quisasque, ijcuacán xiquilican que in tocníu huan taneltocani nican quinquemactijque ya nijín ome

tatitanilme huan quinontitanque ma yacan ma namehpalehuitij. Huan nijín omen tatitanilme quichiutinemij que ma quihueyipanchiutiyacan Totecotzin Jesucristo. <sup>24</sup>Ica ya nojón namejuan monequi xiquinyectasojtacan nijín notatitaniluan para que ijcón nochi in tocnihuan taneltocani de Corinto ma quinixmatican que melau hualeuque nomaco. Huan como ijcón nanquichihuaaj, ijcuacán tejuan technamiqui timoyolpactisque ica por namejuan.

**Nican Pablo tajtoa de queniu quinechijcoque ne tapalehuilis de tomin para in tocnihuan taneltocani ten pobres**

**9** Huan axcan nicnequi namechnojnotza de namotapalehuilis ten nanquinechicojque para in taneltocani yolchipauque, masqui amo semi monequía namechtajcuilohuilis que xicchihuacan nijín taman tapalehuilis. <sup>2</sup>Huan nejua cuali niqixmatihuitz ya de nijín namocualitanejnequilis de tapalehuilis. Porín nejua nicuelitztinemi de niquintapohuijtinemis ne taneltocani den calyetocque Macedonijcopaca de queniu namejuan ten nancalyetocque de Acaya quipía se xihuit ya nanyecyectocque ya para nanquitaminechicosque ne namotapalehuilis de tomin. Huan cuac neques de Macedonijcopaca quicacque de queniu namejuan nanquiyolnejnequij nantapalehuijtinemisque, ijcuacán yejuan no cachi oc quiyolnejnequij tapalehuisque. <sup>3</sup>Ica ya nojón axcan niqinontitantoc nijín eyi tocnihuan para quitaminechicosque namotapalehuilis para ijcón ma amo nencajtini san ne nonehuelitalis san tenica nimohuelitztinemi de namejuan. Quijtosnequi niqinontitantoc ne eyi tocnihuan para ma ixnesi que namejuan nanyecyectocque ya para nanquintemactisque namotapalehuilis ijcón queme nejua niqijtojtihuitz que nanyecyectocque. <sup>4</sup>Huan como yasquíaj namechcalpanosquía sequi taneltocani de Macedonijcopaca, ijcuacán ma amo namechajsitij de namejuan ayamo nanquinechicoaj namotapalehuilis. Porín como ijcón mochihuaaj, ijcuacán timopinaucatalisquía san porín achtopa titacuautamatiáj de que namejuan nanquinechicojque ya namotapalehuilis. Huan amo tejuan san timopinaucatalisquía. Ta, namejuan nanmopinacamatisquía como amo achto nanquinechicoaj namotapalehuilis huan namechajsiquihue ne tominnechicoani. <sup>5</sup>Ica ya nojón niquixejecoa que monequi ma niqintatauti ne eyi tocnihuan ma achto yejuan ma namechcalpanotij para ijcón namechpalehuisque xictaminechicocan ne namotapalehuilis ijcón queme namejuan nanmoyectencauque ya ne achtopa que nanquichihuasque. Huan como ijcón mochihuas, ijcuacán namejuan nanquitenextíaj ya de namoteicnelilis ica por ne tapalehuilis ten nanquinechicosque ya. Huan no nanquitenextíaj ya que amo porín tejuan tamechfuerzajuía que xicnechicocan nojón namotapalehuilis. Ta, namejuan nanquichihuaaj porín nanquinejneque.

<sup>6</sup>Xiquelnamiquican nijín tapohuil que ne tagat ten tatoca ica tepitzin san, yejuan nojón cajocuis tepitzin san. Huan ne tagat ten tatocas ica míac xinachtet, yejua nojón cajocuis míac taquilot. Huan no ijcón ma ticchihuacan cuac ticnequij tiquinpalehuisque neques ten amo teyi quipíaj. <sup>7</sup>Huan cada senme taneltocani ma quitemaca itapalehuilis ijcón queme yejua quinemilij ya que quitemacas. Huan cada tocnui, ma amo quitemaca itapalehuilis ica ne yolcocolis. Huan amo no ma quitemaca tapalehuilis porín quimachilía que Dios quifuerzajuía ma quitemaca. Porín Totajtzin Dios quitasojta se tagat ten quitemaca itapalehuilis ica yolpaquilis. <sup>8</sup>Huan Totajtzin Dios quipixtinemi nochi huelililis para namechueyixelohuilijtiyás nochi tataman

teicnelilis. Huan ijcón namechajsitiyás nochi ten namejuan monequi para ica nanmoixpanoltisque. Pero no cachi oc Dios namechmactilijtiyás para que namejuan cachi huelis nanquicuitiyasque de nochi tataman tapalehuilisme. <sup>9</sup>Ica ya nojón in Tajcuilolamatzin de Dios quijtoa ijcuín:

Nochi neques ten quinxejxeloahuilijtinemij huan quinpalehuijtinemi in pobres ca itapalehuilis,

yejuan nojonques nincualichihualisuan ixnestinemis sen nachipa iixpantzinco Dios. <sup>10</sup>Huan Totajtzin Dios sayó Yejuatzin namechmactilis in xinach tenica nantatocaj. Huan no Totajtzin namechmacatiyás tacualis para nantamasehuasque. Huan no Totajtzin Dios namechtayocolis nochi ten monequi nanmotatoquisque. Huan Totajtzin Dios quihueyiiscaltis namotatocuan para ijcón nanquixpitiyasque huel míac taquilot. Huan no ijcón ma mochiuto namotech huan ma Dios quihueyiiscaltijto namocualitachihualisuan. <sup>11</sup>Huan ijcón namejuan nanquihueyipixtinemisque nochi tataman ixpanolis tenica nanuelisque nanueyitapalehuisque. Huan ica ne namotapalehuilis ten namejuan nanquinontitanilíaj huan nantechtoctíaj, ijcuacón ne tocnihuan taneltocani quihueyitasojcamachilisque Dios cuac quiselisque namotapalehuilis ten tejuan tiquinmactilisque. <sup>12</sup>Huan cuac tiquinmactilíaj in tocnihuan taneltocani namotapalehuilis, ijcuacón tiquintequitilijtocque ica por namotapalehuilis pero amo sayó de ninixpanolis ten semi monequi. Ta, no tiquinchihualtíaj que ma yejuan quihueyitasojcamachilican Totajtzin Dios. <sup>13</sup>Huan neques ten quiselisque namotapalehuilis, yejuan nojonques quihueyimohuistilisque Dios ica por namotapalehuilis. Porín ica por namoteicnelilis ixnesitiu que namejuan nanquitacamatinemij in Tajtoltzin de Dios ten cualcui ne nemaquixtilis. Huan no ne tocnihuan ten quiselisque namoteicnelilis, yejuan nojonques quihueyimohuiscapanchihuasque Dios ica por ne de namoaxcacopaca ten namejuan nanquintayocolijque tapalehuilis para yejuan huan para nochi ocsequin taneltocani. <sup>14</sup>Yejuan nojonques motatautalisque ica por namejuan iixpantzinco Dios. Huan ijcón yejuan semi namechyoltasojtasque porín cajsicamatisque que Totajtzin Dios semi quinueyiyolicnelij ya ica por namejuan namotapalehuilis. <sup>15</sup>Huan ma ticueyitasojcamachilijtiyacan Totajtzin Dios ica por ne hueyi tetayocolil ten Yejuatzin techualtitanilij cuac Cristo momiquilico toixpatca tech cruztzin. Huan amo ticpíaj tajtolme tenica huelis titajtoaj de que niu Yejuatzin techueyiyolicnelij.

### **Nican tajtoa de que Pablo cuicatinemi tanahuatil porín yejua itatitanil de Cristo**

**10** Huan nejua ni Pablo namechontatautía ica yolyemanalis huan ica neiteicnelilis de Cristo de que xinechoncaquilian oc de namechonnojnnotzati. Porín sequin quijtoaj que nejua cuac namohuan niyetoc, ijcuacón amo nicuica neyolchicahualis. Pero cuac niyetoc huejca de namejuan, ijcuacón semi nicpía yolchicahualis para namechonnotzas. <sup>2</sup>Cuali yetoc pero namechontatautía que cuac niyás namechitiatu, ijcuacón amo xinechpehualtican que ma nejua niquinixnamiqui neques ten axcan techtejteneutinemij san. Porín sequin teilijtinemij que tejuan titequitijtine-mij sayó de nintamachilis den talticpacuani. Pos nejua nicnequi niquinixnamiquis neques ten ijcón techijitoaj san. <sup>3</sup>Huan hueyi melau que tejuan titalticpactaca san, pero amo timotehuijtinemij ihuan in amocuali Satanás ica in chicahualis den talticpactaca san. <sup>4</sup>Huan tejuan timotehuijtinemij amo ica ne amocuali tataman chic-

ahualisme ten quicuitinemi in taca de nican talticpac. Ta, tejuan ticuitinemij tatanman chichahualisme ten cualcui in huelilil de Totajtzin Dios. Huan ica ne tatanman chichahualisme de Dios, tejuan tiquintamiixpolojtiasque nochi chichahualisme den amocuali Satanás. <sup>5</sup> Pos tejuan ica ne chichahualisme de Dios ticuejuelojtiyohue nochi tatanman tajtoltehuilis ten in amo taneltocani quicuij para quitajtoltehuisque Dios. Huan tiquinijtacojtinemij nochi tatanman tamachilis tenica moixehuijtinemi in amotaneltocani de techztajtzacuilijtinemis para ma amo tiquixmatican Dios. Huan tictacahualtijtityohue nochi tatanman tamachilis ten quixnamiqui Cristo. Huan no tiquinchihualtijtityohue ma quintacamacani Cristo nochi tatanman tamachilis de nican talticpac. <sup>6</sup> Huan tejuan no timoyecyolnemilijque ya de tiquintatzacuiltisque nochi neques ten amo quitacamatinemij Cristo. Huan ijcón ticchiutiyaque hasta que namejuan nanquiyectacamatinemij Cristo.

<sup>7</sup> Huan namejuan nanquixejecojtinemij in tamachilisme sayó ijcón queme nanquitztinemij nican talticpac. Huan tacán acsá quiyolnemilía huan motaneltoctía que yejua poutinemi de Cristo ya, ijcuacán niquilía ne tagat que ma cajsicamati que tejuan no tipoutinemij de Cristo, ijcón queme yejua poutinemi de Cristo. <sup>8</sup> Huan nejua nimohuelita porín nicuica tanahuatil de niitatitanil de Cristo huan nejua amo nipinautinemi de nijín notanahuatil. Porín Totecotzin nechmactilij notanahuatil amo para niqijtacos namotacautamatilis ten nanquipáj. Ta, Yejuatzin nechmactilij nijín notanahuatil para namechyolmajxitis de namotacautamatilis ica in Tajtoltzin de Dios. <sup>9</sup> Huan amo nejua notamachilis nicnequi namechmouacalakis ica nocarta. <sup>10</sup> Porín sequin quijtoaj que nocarta semi chichahuac tajtoa huan yejuan semi quimachililtáj itanahuatil de Pablo. Pero no quijtoaj que nejua san amo teyi nicuicatinemi huelilil huan no nechtejtenehuaj de queniu nitanojnotztinemi. <sup>11</sup> Huan nejua niquinyequixilía ne teijitoani que ma yejuan ma momacacan cuenta de nijín que hueyi melau que semi chichahuac nitajtoa tech nocarta tenica niquinontajcuilohuilía cuac huejca niyetoc san. Huan ijcón queme namechmachililtía notanahuatil tech nocarta, no ijcón namechmachililtiti notanahuatil cuac niajsitiu campa namejuan nanyetocque. <sup>12</sup> Huan tejuan amo timoixehuáj de timopohuasque tihuejueyichihuanime. Huan amo no timoixehuáj de timonejnehuiltisque queme neques tamachtiani ten mohueyimatinemij de yejuan san. Ne tamachtiani quichiu-tinemij mijmiquiloyot san porín motenejnehuiltía se huan ocsé de yejuan san. Huan no ne tamachtiani sayó motatamachiutiyohue se huan ocsé ihuan in tamachticaic-nihuan ica in tamachilis de yejuan san. <sup>13</sup> Pero tejuan amo timoixehuáj de tictelpanoltisque cachi oc huelilil huan que ne ten Totajtzin Dios techmactilij ya. Porín Totajtzin Dios Yejuatzin technextilij ya hasta can ajsitiu tohuelilil. Huan ica ne ihuelilil ten Dios techmactilij, ijcón Yejuatzin techcahuac ma tiajsican huan ma titequitican namohuan campa pueblo Corinto. <sup>14</sup> Ica ya nojón amo tictelpanoltijtine-mij de campa Dios techcahuac ma titequitican queme yesquía amo queman titequititosquáj namohuan. Pos tejuan titayecanatoj de tamechnojnotzatoj ica in Tajtoltzin de Cristo ten cualcui ne nemaquixtilis. <sup>15</sup> Huan tejuan amo timohuelitztinemij huan amo no timohueyimatinemij ipan ne chihualisme ten ocsequin quichihuacoj queme yesquía in tequit den tejuan san. Pero tejuan ticchixtocque que como mohueyiltijtityás namotacautamatilis, ijcuacán no cachi oc huelilil titequititinemisque namohuan ijcón queme Dios techcahuilijtinemi ma titequititinemican namotzalan. <sup>16</sup> Huan satepan de tamechtaminojnotzasque ya, ijcuacán tejuan ticnequij titano-



jnotztinemisque ica in Tajtoltzin de Dios ten cualcui ne nemaquixtilis campa ne calyetoní ten yetocque cachi huejca huan que namejuan. Pero tejuan amo ticnequij ticalaquitihue campa tequititocque ya ocsequin tanojnotzani de Cristo. Porín amo ticnequij timocalaquitinemisqui ica por in tequit de ocsequin tamachtiani para ica timohuelitztinemisque.<sup>17</sup> Porín como acsá quinequi mohuelitztinemis, ijcuacón ma mohuelitztinemi sayó porín Totecotzin quiyolicnelía.<sup>18</sup> Porín Totajtzin Dios amo quihueyipohua ne tagat ten mocualtagamatinemi. Ta, Dios quicualtagamatinemis ne tagat ten Yejuatzin quixejcoa quinamiqui quihueyipohuas.

**Nican tajtoa de queniu quitenejmachtía  
Pablo de ne tacajcayahuani tamachtiani**

**11** Huan nejua nicnequi que xinechontacahuilican ma namechnojnotza ica tepitzin ne mijmiquiloyot tajtol. Huan ocsepa namechilía que xinechxicohuilican.<sup>2</sup> Porín nejua semi nicnectoc namechpalehuis ica ne tayolnejnequilis ten Dios nechmactilij ya. Huan nejua nitayecanaco ya de namechchihualtij que xipoutinemican ihuan Cristo, ijcón queme se tesihuau ma quipía sayó se iyoquich. Huan no nicnequi namechtenextis iixpantzinco namotecotzin Cristo que namejuan nanyolchipauque, ijcón queme se chipahuac sihuapiltzin ten ayamo poutinemi ihuan se tagat.<sup>3</sup> Huan namejuan nanquimatij que ne huejcau amocuali cohuat quicajcayahuac in achto sihuat in Eva ica tataman tacajcayahuac. Huan axcan nejua nicyolmohuilijtoc que namejuan nanquitacahuilijque ya in amocuali Satanás ma namechajcayahuas. Huan no nicyolmohuilijtoc que namejuan nanquinemilijtinemij ya de nanmosecakahuasque de nantacuaautamatinemisque ihuan Cristo. Huan ne namotacuaautamatilis yejua ne cualtzin chipactzin.<sup>4</sup> Huan namejuan nanquitacahuilíaj ma ocsé tamachtijque ma namechmachtiqui de ocsé Jesús ne ten tejuan amo tamechmachtijque. Huan no namejuan nanquitacahuilijque ma ocsé tamachtijque ma namechselilti ocsé taman ejecatzin, ne ten tejuan amo tamechmactilijque. Huan no namejuan nanmotecahuilijtinemij ma namechmachtican ica ocsé taman Tajtoltzin ten cualcuisquía ne temaquixtilis, ne ten namejuan amo queman nanquiselijque de tejuan.<sup>5</sup> Huan nejua niquixejcoa que nicuicatinemi tanahuatil ten no quipía huelilis ijcón queme ne ocsequin tanojnotzani ten mohueyipoutinemij.<sup>6</sup> Huan masqui nejua amo semi niyectajtoa queme se cuali tetajtohuijque, pero niquixejcoa que semi cachi hueyi nicpixinemi tataman tamachilis de Dios. Huan tejuan tamechnextilijtihualajque nochi nijín tamachilis de Dios tech nochi totequiu ten tejuan tamechmachtijtinenque.

<sup>7</sup> Huan nejua amo nimotajtacolmaca cuac namechnojnotztinemic ica in Tajtoltzin de Dios ten cualcui ne nemaquixtilis huan amo teyi ica namechtopaluij. Huan namechilij amo nimotajtacolmacac. Ta, nejua nimoyolyemancatalij huan amo namechtopaluij para ijcón namechquixtis de namotajtacoluan huan namechueyipanchihuas iixpantzinco Dios.<sup>8</sup> Huan nejua niquinquixtilijtiyá tomin ocsequin tocnihuan taneltocani queme yesquía niquinichtequiliij cuac nicselijtiyá nintomin queme taxtahuil para ica nimoixpanoltijtiyá huan para nitequititinemic namotzalan.<sup>9</sup> Huan cuac nejua nitequititinemía namohuan, ijcuacón ne tocnihuan taneltocani ten hualajque de Macedonijcopaca, yejuan nojonques miacpa nechmactilijque sequi tapalehuilis ten nechpoloaya tech noixpanolis. Ica ya nojón amo aquen de namejuan semi nitechcahuiliaya ma nechpalehui cuac nechpoloaya tensá. Huan ijcón nicchihuac

para ma amo aquen nitechcahuilijtiyás senme de namejuan. Huan axcan nicchiuti-yás ijcón queme nicchiutinemic namohuan. <sup>10</sup>Huan ijcón queme nicyecmatinemi que nicpixinemi in tamelahuac Tajtoltzin de Cristo, no ijcón nicyecmatinemi que amo aquen huelis nechtzajtzacuilis que ma amo nimohuelitztinemi. Porín nicsentocas nimohuelitztinemis de que amo aquen nitechcahuiliaya campa nochi Acayajcopaca. <sup>11</sup>Huan namechiliti queyé namechnojnotzoc ica nijín taman tamachilis. Pos namechnojnotza ica nijín tanejmachtilis porín namechueyitasojta. Huan Dios cuali quimatoc ya de queniu namechyoltasojtatinemi.

<sup>12</sup>Huan ijcón queme nicchiutihuitz, no ijcón nicsentoca nitequititinemi. Porín sequi tamachtiani mopohuaj que yejuan tequititinemij ijcón queme nejua nitequititinemi. Ica ya nojón yejuan mohuelitztinemij huan mopoutinemij huejueyi chihuanime. Pero nejua nicnequi niquinuetziltis nemohueyimatine para ijcón amo huelis mohuelitztinemis que oc ica ten amo melau. <sup>13</sup>Porín nochi ne taman tamachtiani, yejuan nojonques amo melau tanojnotzani de Cristo. Ta, yejuan sayó tequitini taixcajyahuan, masqui monextijtinemij huan motequitiltijtinemij queme yesquía itatitaniluan de Cristo. <sup>14</sup>Huan amo xictetzaucatacan cuac ijcón nanquitasque porín no ne amocuali Satanás monextijtinemi huan motequitiltijtinemi ijcón queme yesquía se ángel taquehual de Dios ten cualcui tanextzin de Dios. <sup>15</sup>Ica ya nojón no ijcón monextíaj huan tequititinemij ne itaquehualuan de Satanás queme yesquía tanojnotzani de Dios ten cualcuisquía ne melahuac Tajtoltzin de Dios. Huan nojonques tamachtiani Dios quintamixpolos ijcón queme quinamiqui nintachihualisuan ten quichiutinenque.

### **Nican tajtoa de queniu Pablo tajyohujtinemic porín yejua se itatitanil de Cristo**

<sup>16</sup>Huan ocsepa namechilía ijcuín: Ma amo aquen quiyolnemilijtinemi que nejua nimocuatapololtijtinemi. Huan como ijcón quiyolnemilitocque, ijcuacón xinechtacahuilican ma namechnojnotza ijcón queme yesquía se tagat ten mocuatapololtijtoc para ijcón huelis nejua no nimohuelitztinemis de nitequititinemis ijcón queme nejua nicnequi. <sup>17</sup>Huan nochi nijín ten niqijtojtoc amo hualeutoc de Totecotzin Jesús. Ta, nijín namechnojnotzoc ijcón queme yesquía se tagat ten mocuatapololtij ya. Ica ya nojón nimohuelitztinemis de notequiui ten nicchiutinemi. <sup>18</sup>Huan queme miacque mohueyimatineij ica nintamachilisuan ten pohui nican talticpac, ica ya nojón nejua no nimohueyimatineis ica por notequiui ten nicchiutinemi. <sup>19</sup>Huan queme namejuan nanmopoutinemij nanueyitamatinemij, ica ya nojón cuali nanuelisque nannechxicohuilijtiyasque como nejua nimocuatapololtijtinemis. <sup>20</sup>Huan namejuan cuali nanquixicohuilijtocque neques tamachtiani ten namechfuerzajuáaj xiquintequitiltijtinemican. Huan no nanquixicohuilijtocque neques ten moaxcatilijtocque de namoaxca. Huan no nanquixicohuilijtocque neques ten mochiutinemij que ma yejuan namotacayecancahuan. Huan no nanquiniyohuilijtiyohue neques ten mohueyicualnextijtinemij namejuan namopan. Huan no nanquixicohuilijtocque hasta neques ten namechmatatziníaj. <sup>21</sup>Huan tamechyequixilía que tejuan tipinahuaj porín amo timoixehuijque de ma tamechchihuanij ijcón queme ne tacajcayahuani namechchiutinemij. Pero como neques tacajcayahuani moixehuáaj ica míac tataman namechtajyohuilitíaj, ica ya nojón nejua no nimoixehuía de namechtajyohuiltis masqui nitajtoa queme yesquía se tagat ten mocuatapololtij ya. <sup>22</sup>Huan

ne tamachtiani tacajcayahuani quijtojtinemij que yejuan yolicoj queme tagayot hebreos. Pues nejua no ijcón niqijtoa que niyolico queme se tagat hebreo. Huan yejuan no quijtojtinemij que yejuan pueblojuani de Israel. Pues nejua no ijcón niqijtoa que nipueblojcat de Israel. Huan yejuan no quijtojtinemij que yejuan teconehuan de tohuejcautat Abraham. Pues nejua no nitelía que niteconeu de tohuejcautat Abraham. <sup>23</sup> Huan yejuan no quijtojtinemij que yejuan itequiticahuan de Cristo. Pues nejua melau cachi oc niitequiticau de Cristo huan que yejuan, masqui nitajtoa queme yesquía tagat ten mocuatapololtij ya. Pues nejua cachi oc nitequititinemij huan que yejuan. Huan nejua cachi miacpa nechuitectinenque ya huan que yejuan. Huan nejua cachi miacpa ya nechztactinenque queme preso huan que yejuan. Huan miacpa quinequáj nechmictisque. <sup>24</sup> Huan ne tayecanani judíos nechuitectiyajque ica tacot hasta cajxitijque sempoal huan caxtolonnahui tacot, ijcón queme in tanahuatil de Moisés tenahuatílía. Huan ijcón nechchihuilijque nechuitecque macuilcan. <sup>25</sup> Huan expa nechcuoutenque. Huan se viaje nechtepoxonicque. Huan no expa pancalayic in barco ten itech niyaya. Huan se viaje nimocahuac apanían niajcuitinemía se yohual huan se tonal. <sup>26</sup> Huan nejua huejca ninentinemía huan miacpa quinequía nechucas in hueyíat. Huan no miacpa quinequáj nechachtequilisque ten noaxca. Huan miacpa quinequáj nechmictisque nopueblojcahuan judíos. Huan no miacpa quinequáj nechmictisque ne tagayot ten amo judíos. Huan no quinequáj nechmictisque campa pueblo huan campa taiucan huan cuac niyaya tech barco. Huan quinequáj nechmictisque neques ten amo melau tocnihuan taneltocani. <sup>27</sup> Huan semi nimotequitilijtiaya hasta nimosioutiaya. Huan miacpa nimocochisoloya huan miacpa nimayanaya huan niamiquía. Huan miacpa nimosahuaya huan no nimosectijtinemía huan nitajyohuiaya porín amo nicpiaya cuali nocoton. <sup>28</sup> Huan cachi oc mosta mosta nicyolmachilijtinemi in tequit de queniú niquinpalehujitijyás nochi in tocnihuan taneltocani. Huan nijín tequit cachi nechylmachililtía huan que nochi ne ten nipanoc ya. <sup>29</sup> Huan como se tocníu taneltocacque mococojtinemi, ijcuacón nejua no nicyolmachilijtinemi ne cocolisti. Huan tacán acsame quitepotamíaj se tocníu ma huetzi tech tajtacol, ijcuacón nejua nimopinaucatalía huan niyolcualani. <sup>30</sup> Huan como semi monequi nimohuelitztinemis ica por notequiú, ijcuacón nimohuelitztinemis porín nicyolmachilijtinemi yolcuetahuilis de notacayo. <sup>31</sup> Huan Totajtzin Dios Yejuatzin Itajtzin de Totecotzin Jesucristo. Huan Yejuatzin nochi quimatica que nejua nitajtojtoc ica ten melau san. Huan quinamiqui que ma ticmohuistilijtiyacan Yejuatzin sen nachipa huan sen nachipa. <sup>32</sup> Huan campa pueblo Damascojcopaca, ompa in hueyi chiuque tayecantinemía itencopaca in rey Aretas. Huan ne tequihua tanahuatij ma tajpiacan campa nochi ne caltenme de ne tepanyehualol ten quiyehualojtoc ya ne pueblo Damasco. Huan ijcón quichihuaya ne tequihuani porín quinequáj nechquitzquisque preso. <sup>33</sup> Pero mochihuac que sequi tocnihuan nechcalaquijque tech se hueyi chiquihuit. Huan ijcón nechnalquixtijque tech se ventana huan nechpantemoltijque tepanquespan san. Huan ijcón nejua nimochololtij huan nimaquisac inmaco ne tayecanani.

**Nican tajtoa de queniú Pablo tajyohuía ica  
por ne tajtachialis ten Dios quimonextili**

**12** Huan nechnamiqui de nimohuelitztinemis de nejua notequihuan. Ta, cachi cuali namechtopohuiti de queniú nitajtachíac queme cuac nitacochitz-

tosquía. Huan no namechtopohuiti de queniu Totecotzin nechonmonextilij nita-machilisuan. <sup>2</sup>Huan nejua niquixmati se tagat ten poutinemi ihuan Cristo. Huan quipía majtactionnahui xihuit ya que Dios cajocuc ne tagat huan quiajxitito hasta ne ica eyi eluiyactzinco. Huan amo nicmati que cox yajqui itacayan oso yajqui sayó italnamiqulils. Pues nijín sayó Totajtzin Dios quimati ne tagat ten yajqui hasta ne ica eyi eluiyactzinco. <sup>3</sup>Huan cuali nicmatinemia que ne tagat yajqui hasta ica eyi eluiyactzinco. Pero amo nicmati cox yajqui itacayan oso yajqui italnamiqulils. Pero Totajtzin Dios cuali quimatos. <sup>4</sup>Huan cajocque huan cuiyacque ne tagat hasta ne lugar campa senyetocque taneltocani ten momiquilijque ya, hasta ne lugar ten quilía paraíso. Huan ompa quicayic ne tagat sequi ichtacatajtolme ten amo quitecahuilfaj ma quijtojtinematic acsame. <sup>5</sup>Huan nejua cuali nihuelisquía nimohuelitztinemisquía como nipanosquía queme ne tagat quipanoto. Pero amo nicnequi nimohuelitztinemis ica por ne ten nicpanoto. Ta, cachi cuali nimoyolpactijtinemi ica por ne ten nejua niquijyohuijtinemi. <sup>6</sup>Huan como nicnequisquía nimoixcualnequisquía, ijcuacón amo yesquía sayó nitajtosquía ica mijmiquilotajtol. Ta, niquijtosquía ten melau san. Pero nochi nijín ijcón nicahua huan amo ica nimoixcualnectinemis para ma amo aquen quiyolnemilijtinemi que nejua cachi nihueyichiuque huan que ne ten yejuan nechtilijtinemij. Huan amo no nimohuelitztinemis ica ne ten nechpanolthihuala para ma amo aquen nechpohuasque ya cachi nihueyimatatque inixpan neques ten nechcaquilijtinemij. <sup>7</sup>Huan semi cuajcualtitzin ne tamachilis de Dios nechonnextili cuac nitajtachíac. Ica ya nojón Dios nechtalilij se tajyohuilis de toneucayot tech nonacayo ijcón queme yesquía se huitzti calaquisquía tech nonacayo. Huan ijcón Dios quichihuac para ma amo nimoyolmachiliani que cachi nihueyichiuque. Huan ne toneucayot in amocuali Satanás quitatequiutijtinemi queme yesquía imanamic para ica nechtajyohuiltis. <sup>8</sup>Huan expa ya nimotatautilij ya iixpantzinco Totecotzin ma nechajchihuili ne toneucayot. <sup>9</sup>Pero Totecotzin nechilij ijcuín: “Cuali ajsis ya noteicnelilis para nimitzpalehuis. Porín mohueyinxetía nochicahualis cuac in tagat quiyolmachilía yolcuetahuilis”. Huan ica por ne Tajtoltzin de Yejuatzin nimoyolpactijtinemi san cuac nicyolmachilía ne cuetahuilis para ijcón cachi oc motenextijtiu nopan ichicahualis de Cristo. <sup>10</sup>Ica ya nojón nimohuelitztinemis san cuac niyoltajyohuijtinemi oso cuac nechijitojtinemij. Huan no nimoyolpactijtinemis san cuac amo nicpías noixpanolis, oso cuac nechicantocatinemij oso cuac nechtajyohuiltijtinemij acsame. Huan nochi nijín niquijyohuijtinemis sayó porín nitacautamatinemi ihuan Cristo. Ica ya nojón cuac cachi nicyolmachilía in cuetahuilis, ijcuacón cachi oc Dios nechmachililtía ichicahualitzin.

**Nican tajtoa de queniu Pablo semi voltanemilijtinemi ica  
por ne tocnihuan taneltocani de Corinto**

<sup>11</sup>Nimomachiliaya queme yesquía se tagat ten mocuatapololtij ya porín nejua nimohueyimatinemia de nejua san. Pero nochi nijín nicchihua porín namejuan nannechfuerzajuijtinemij ma nicchihua ijcón. Huan monequía que namejuan ma nechueyimatinemij. Huan nejua niquixejecoa que nicuicatinemi tanahuatil ten no quipía huelilis ijcón queme ne tamachtiani tacajcayahuani ten mohueyipoutinemij. Pero nejua melau nimopohua que amo teyi nichiuque. <sup>12</sup>Huan cuac nitequititinemía namotzalan, ijcuacón niquijyohuijtinemic ica nejmach in tajyohuilis. Ica ya nojón Dios quichiutinemic nomaco míac nescayome de mohuiscatequime ten quimou-

caitztinenque in tagayot. Huan nochi nijín huejueyi chihualisme ten nicchihua, yejua ica quinextijtihuala que nejuatzin melau niitatitanil de Cristo. <sup>13</sup> Huan nejua nitequitinemic namotzalan huan nimonextijtjinemic que niitatitanil de Cristo ijcón queme nicchiutinemic intzalan in ocsequin tocnihuan taneltocani ten calyetocque tech ocsequin puebloyme. Pero se taman nicchiutinemic namotzalan namejuan que amo namechtechcahuilijtjinemic que xinechixpanoltijtjinemican. Huan achá namejuan huelis nannechtapojpoluisque de nijín notajtacol de amo namechtopaluij.

<sup>14</sup> Xiquitacan que axcan ocsepa nimoyectatalij ya para niyás ica expa namechcalpanotiu. Huan cuac niajsitiu ya, ijcuación amo namechtechcahuilis xinechixpanoltijtjiyacan. Porín nejua amo sayó namechtemolijtjihuitz de namoixpanolis. Ta, namechontemolijtjiu de queniu namechpalehuitiyás de namotacuautamatilis. Huan amo monequi que in coneme ma quinechicojtiyás tomin para ica quinixpanoltijtjiyás intatuan. Ta, xicmatican que in tetatme monequi quinechicojtiyasque tomin para ica quinixpanoltijtjiyasque niconehuan. <sup>15</sup> Huan nejua ica hueyi yolpaquilis nictatequitijtjiyás nochi notomin ten nimopixtolijtoc. Huan amo sayó notomin. Ta, hasta no cachi oc nimotatequitijtjiyás huan nimotajyohuiltijtjiyás de nejua nochicahualis sayó porín semi namechueyitasojtatinemi. Huan nesi que como cachi oc namechtasojtatinemi, ijcuación namejuan cachi menos xinechtasojtatan. <sup>16</sup> Huan sequin de namejuan cuali cajsicamatij que amo namechtechtechahuilij que xinechixpanoltijtjiyacan. Pero sequin ipa quijtoaj que nejua sayó majyá namechtrampajuijtoc ica ten taixcajyahualis huan ijcón namechtanilij. <sup>17</sup> Huan no namechilía que amo melau namechcajyahuauc ica por senme de ne tequitini ten namechontitaniliaya. <sup>18</sup> Porín nejua nictatautij Tito que ma yejua namechcalpanoti. Huan yejua nictitanic ihuan ocsé tocnui. Huan ne Tito yejua amo namechcajyahuauc san. Huan nejua ihuan Tito titequititinenque ca sansé tequit huan ca sansé tamachilis san.

<sup>19</sup> Huan namejuan achá nanquiyolnemilíaj que tejuan san timotajtoltenpalehuíaj ica nijín tajtolme. Pero namechilía que amo ijcón xicyolnemilican. Ta, tejuan titaajtjinemij iixpantzinco Dios huan titajtojtjinemij ica ichicahualis den Tocaytzin de Cristo. Huan nochi nijín namechilijtoc para ica cachi oc ximoyolmajxitijtjiyacan de namotaneltocalis. Porín nicmati que namejuan nannotasojicnihuan ya. <sup>20</sup> Huan semi nicyolnemilía cuac niajsis ya de namechitatiu, ijcuación namechitilijtajsis que amo nanyectacuautamatinemij ihuan Cristo ijcón queme nejua nicnectinemi. Huan achá no cuac niajsis ya de namechitatiu, ijcuación namejuan nannechitilisque que amo nicchiutinemi ijcón queme namejuan nanquinequij. Huan semi niyoltanemilijtjinemi porín senme de namejuan nanmotajtoltehuijtinemij huan nannexijcoltijtjinemij, huan nanmocualantijtjinemij huan nanmohueyimatinemij huan nanxolopijtjinemij, huan nantatejteneutinemij huan nanmohueyipoutinemij huan nanelihuititinemij. <sup>21</sup> Huan no semi nicyolnemilijtjinemi que cuac namechitatiu, ijcuación Notajtzin Dios achá nechpinaucataliti ica por namejuan namochihualisuan. Huan no semi nicyolnemilijtjinemi que quipía de namechchoquilis nansenme ten nanmotajtacolmacatihuitze desde ne achtopa ya. Porín melau nansenme amo nanmoyolnemilijque de namotajtacoluan. Ta, nanquisentocaj nanquichiutiyohue ne pitzotic nemilis huan ne ahuilnemilis huan míac tataman ten amo cuali chihualisme ten ipa nanquichiutihuitze.

### Nican tajtoa de ne itanejmachtilis de Pablo huan neinetajpalolis

**13** Huan axcan ocsepa niyás ica expa namechcalpanotiu. Huan como ongas tensá tateuililis, ijcuacón nicmejmelahuas. Pero monequis ma ixnesiquiu ome oso eyi taca ten inixteno mochihua in tajtacol. <sup>2</sup>Huan axcan ica nijín amat niquinnejmachtijtoc neques ten ne achtopa tonalme motajtacolmacaque. Huan no nochi namejuan namechnejmachtíaj ijcón queme namechnejmachtijca ya cuac ica ojpa namohuan niyetoya. Huan namechilía que queme niyás ocsepa namechcalpanotiu, ijcuacón amo teyica namechyolicnelis oc. <sup>3</sup>Ijcuacón nanquitasque ya que melau Cristo tajtojtinemi notechcacopaca, ijcón queme namejuan nanquiyoltemoayaj que cox melau Cristo nohuan tequititoc. Huan Cristo tequititinemi namohuan amo sayó tepitzin chicahualis. Ta, tequititinemi Cristo ica hueyi chicahualis huan motenextijtjinemi namotzalan. <sup>4</sup>Huan hueyi melau que Cristo quicuoupampilojque ijcón queme yesquía amo teyi chicahualis quiapiaya. Pero axcan ocsepa yoltinemi Cristo ica por ne ichicahualis de Totajtzin Dios. Huan no ijcón in tagayot techpohua tejuan queme yesquía amo teyi chicahualis ticpiasquíaj porín tipoutinemij ihuan Cristo. Pero no xicmatican ica nichicahualis de Dios tejuan tiyoltinemisque sen nachipa. Huan ica ne ichicahualis ticsentocasque tamechmejmelauiyasque namotzalan.

<sup>5</sup>Huan namejuan ximoyoltatemolican ica nejmach para nanquitasque cox melau nanquipíaj oc tacuautamatilis ihuan Cristo. Ocsepa namechilía ximoyecyoltatemolican namejuan san. Pero cuali xicmatican que Jesucristo yetinemi namohuan como melau nantacuautamatij ihuantzin huan como amo nanmosecocauque ya de namotacuautamatilis. <sup>6</sup>Huan nitacuautamati namohuan que nanmomacaj cuenta ya que tejuan tiitamelaucatatitaniluan de Cristo. Huan tejuan amo tamechcajcauautocque. <sup>7</sup>Huan no tejuan no timotatautilíaj inahuactzinco Dios que ma Yejuatzin namechpalehuijtiu para ma amo xicchiutiyacan ten amocuali chihualisme. Huan ijcón ticchihuaj amo sayó para ma ixnesis que tejuan tiitamelaucatatitaniluan de Cristo. Ta, ijcón timotatautilíaj ihuan Dios que namejuan xicchihuacan sayó ten cuali, masqui namejuan nantechilijtinemij queme yesquía amo tiitamelaucatatitaniluan de Cristo. <sup>8</sup>Porín tejuan amo tihuelisque tiquijtacojtinemisque in tamelahuac Tajtoltzin de Dios. Ta, tejuan sayó titajtojtinemij ma momoyahua in tamelahuac Tajtoltzin de Dios. <sup>9</sup>Ica ya nojón tejuan timoyolpactíaj cuac ticvolmachilíaj yolcuetahuilis. Porín titajyohuíaj para que namejuan xiyolchicaautocan. Huan ijcón tejuan timotatautilijtosque ica por namejuan para ma cachi oc ximoyolmajxitijtiyacan tech nanmotacuautamatilis. <sup>10</sup>Huan axcan namechijcuilohuilía nijín notajcuilolamau achtopa que niyás namechcalpanotiu, para que cuac niyetos namohuan, ijcuacón amo quipía de namechmachilitis notanahuatil ten Totecotzin nechmactilij. Porín Totecotzin nechmactilij ya nijín notanahuatil sayó para ma namechyolmajxitijtiyás huan amo para ica nicuejelos ne namotacuautamatilis.

<sup>11</sup>Huan axcan notasojicnihuan, sayó ma mocahua hueyi yolpaquilis namohuan porín niyajtoc ya. Huan ximoyojoyolmajxitijtiyacan se huan ocsé huan ximoyojoyoltalijtiyacan se huan ocsé. Huan xitanemilijtiyacan ca sansé san tamachilis. Huan no xicsepanyolseutinemican. Huan como ijcón nanquichiutinemisque, ijcuacón Totajtzin Dios yetinemis namohuan porín sayó Yejuatzin teyolsehuía huan teyoltasojta. <sup>12</sup>Xiquinmatajpalocan in tocnihuan se huan ocsé ica mohuisyot. <sup>13</sup>Huan nochi

in yolchipauque taneltocani nican, namechontajpaloaj de namejuan de Corinto.  
<sup>14</sup>Huan xicselijtiyacan in teicnelilis de Totecotzin Jesucristo huan no ma xicselijtiyacan ne tetasojtalis de Totajtzin Dios huan ma no ximachilijtiyacan in Yecticatzin Espiritu que namohuan yetica. Ma ijcón mochiutiu. Amén.

**IN TAJCUILOLAMATZIN TEN QUITAJCUILOHUILIJ IN TATITANIL  
SAN PABLO PARA IN TANELTOCANI DE CRISTO  
TEN CALYETOCQUE CAMPA PUEBLO GÁLATAS**

**Nican Pablo quintajcuilohuilía in tocnihuan  
taneltocani campa pueblo Gálatas**

**1** Nejua ni Pablo niitatitanil de Jesucristo. Pero amo nechijitacque tagayot san huan amo no nechualtitanque tagayot san ma nitequititinemi. Ta, nechualtitanic Yejuatzin ne Jesucristo, huan no nechualtitanic Totajtzin Dios ten quipanquixtij yoltoc Jesucristo ne iyojtzin Iconetzin de Dios intzalan in ánimajme. <sup>2</sup>Huan nejua ihuan nochi in tocnihuan ten nohuan yetocque, nochi tejuan tamechtajcuilohuilíaj nantocnihuan nantaneltocani ten nancalyetocque campa talme de Galacia.

<sup>3</sup>Huan nochi tejuan ticyolnejnequij que xicipacan namejuan ne teicnelilis huan ne yolsehuilis ten hualeutoc inahuac Totajtzin Dios huan inahuac Totecotzin Jesucristo. <sup>4</sup>Huan Jesucristo motemactij ma quimictican para ijcón quixtahuas to-tajtacoluan. Huan ijcón Jesucristo techtojtontiu tech ichicahualis de ne amocuali Satanás ten quinyecantinemi in talticpacuani ten axcan nentinemij oc. Huan nochi nijín nemaquixtilis quichihuac Jesús porín ijcón quimonequiltij Totajtzin Dios. <sup>5</sup>Ica ya nojón ma ticmohuistilijtinemican Totajtzin Dios sen nachipa huan sen nachipa. Ma ijcón mochiutiu. Amén.

**Pablo quinmachtij in taneltocani que ongac sayó se  
Tajtoltzin de Dios ten cualcui ne nemaquixtilis**

<sup>6</sup>Semi nicmoucaita, nocnihuan, que namejuan nanmosecocautiyohue ya imaco Dios naquen namechyolnotzca ya que xicneltoquilican que Cristo namechueyiyolic-nelía. Huan no nicmoucaita que axcan namejuan nanquineltocacocque huan nanquintoclijtocque ocsé taman tanextililis ten namejuan nanquixejcoaj que cualcui ne nemaquixtilis. <sup>7</sup>Pero nicnequi namechilis que amo teyi ongac ocsé tanextililisme oc ten huelis cualcuis ne nemaquixtilis. Huan cachi oc namechilía que sequi tamachtiani namehcuejmolojtinemij huan namehcuatapololtijtinemij ica nintaneltocalis de yejuan. Porín yejuan quinequij quixpatasque in yec melau tanextililis ten cualcui ne nemaquixtilis ne ten Cristo namehmactilij ya. <sup>8</sup>Tejuan tamechmachtijque ya ne melahuac tanextililis ten cualcui ne nemaquixtilis de Cristo. Huan tacán tejuan ocsepa ticnequij tamechmachtisque ica ocsé taman tanextililis ten amo quinejnehuilía oc ne ten achtopa tamechmachtijque, ijcuacán ma Dios techtelchihua. Huan tacán se ángel hualtemos den eluiyac para namechmachtis ica ocsé taman tanextililis ten amo quinejnehuilía oc ne ten achtopa tamechmachtijque, ijcuacán ma Dios quitelchihua ne ángel. <sup>9</sup>Huan namechilijca ne achtopa ya huan axcan ocsepa namechilijtoc ijcuín: Tacán acsá no quinequi namechmachtis ica ocsé taman tanextililis de ne nemaquixtilis, huan amo quinejnehuilía ne tanextililis ten namejuan nanquiselijque ya, ijcuacán ma Dios quintelchihua ne tamachtiani. <sup>10</sup>Huan nochi nijín namechilía amo porín nicnequi que in tagayot ma nechcualtagaitacan. Ta, nicnequi que ma Dios nechcualtagaita san. Porín yec melau nejua amo nictemo-



jinemi de queniu niqinyolpactis in tagayot. Tacán nicnequi niqinyolpactis sayó tagayot, ijcuación nejua amo melau niitequitica de Cristo.

**Nican tajtoa de queniu Pablo quipehualtij  
nitequi queme se tatatitanil de Cristo Jesús**

<sup>11</sup> Pero xicmatican, namejuan nocnihuan, que namechmachtijtinemic ica ne tanextililis ten cualcui ne nemaquixtilis. Huan nijín notanextililis amo hualeutoc tech in tamachilis de se tagat san. <sup>12</sup> Porín nejua amo nicselij nijín notanextililis de se tagat san. Huan amo no acsá tagat nechmachtij san. Ta, namechilía que Yejuatzin ne Jesucristo nechmatiltij huan nechajscamatiltij nijín tanextililis ten cualcui ne nemaquixtilis.

<sup>13</sup> Huan namejuan cuali nancactinemij de queniu ninentinemía tech nojón tonalme cuac nejua nitaneltocatinemía oc queme in judíos taneltočaj. Huan namejuan no cuali nanquimatihuitze de queniu niqintajyohuultiaya ne taneltocani de Cristo. Huan no nanquimatihuitze ya de toni nicchihuaya para nictajtamis ne taneltotalis de Cristo. <sup>14</sup> Huan namejuan no nanquimatihuitze ya de queniu cachi oc nitayecantinemía tech ne taneltotalis de judíos huan que ocequin notaneltoaicnihuan judíos ten inuan nimomachtiaaya. Porín nejua cachi oc niqintacamatinemía huan nicajscachiutinemía ne tanahuatilme de tohuejcautatuan quichiutihualayaj.

<sup>15</sup> Pero ijcón quimonequiltij Totajtzin Dios de nechijitac para ma nejua niixcati achtopa que nechylotis nonantzin. Huan Yejuatzin nechnotzac ma niixca yesqui sayó porín nechyoltasojtac. <sup>16</sup> Huan Totajtzin Dios nechixmatiltij Itasojconetzin para ma nejua nitanojnotztinemi ica ne Tajtoltzin de Dios ten cualcui ne nemaquixtilis intzalan neques ten amo poutinemij queme judíos. Huan cuac nochi nijín nopan mochihuaco ya, ijcuación amo acsá tagat niqinixpantilito ma nechmachtij nijín notanextililis. <sup>17</sup> Huan amo no niyajqui Jerusalén para niqinixpantilitiu neques ten ipa tatitanilme de Cristo achtopa que nejua nimochihuasquía niitatitanil de Cristo. Ta, namechilía que niman nejua nijsiucayajqui ne Arabiajcopaca. Huan de ompa nimohualcuepato campa pueblo Damasco.

<sup>18</sup> Huan satepan ipan eyi xiutica ya, ijcuación nejua niyá nitejcoto Jerusaléncopaca para ompa niqixpantilito in Pedro huan ompa ihuan niyetoya caxtol tonal. <sup>19</sup> Huan ompa Jerusalén amo aquen ocequin tatitanilme de Cristo niqunitac. Ta, sayó niqunitac ne Jacobo ten iicniu Totecotzin Jesús. <sup>20</sup> Huan nochi nijín ten namechijcuilohuilijtoc, Dios cuali quimatoc que amo namechylcajayahua. <sup>21</sup> Huan cachi satepan niyajqui ya ne campa talme de Siria huan de Cilicia. <sup>22</sup> Huan itaneltocacahuan de Cristo ten calyetoyaj campa Judeajcopaca, yejuan nojonques amo nechixmatíaj. <sup>23</sup> Ta, yejuan sayó quitecaquiliayaj de nejua ijcuín: “Ne Pablo ten achtopa techtajyohuultiaya, axcan yejua ya ay tanojnotztinemi de queniu se tacuautamatis ihuan Cristo. Huan ne Pablo ipa yejua ya ten quinequía quitajtamis nijín totaneltotalis”. <sup>24</sup> Ica ya nojón in taneltocani quihueyimohuistiliayaj Totajtzin Dios porín axcan nejua niitequitica ya de Cristo.

**Nican tajtoa de queniu in ocequin tanojnotzani de  
Cristo quipohuaj Pablo que melau tatitanil de Cristo**

**2** Huan satepan ipan majtactionnahui xiutica ya, ijcuación ocsepa niyajqui Jerusalén ihuan Bernabé huan no nicuiyac in Tito. <sup>2</sup> Huan ompa niyajqui porín

Dios nechmatiltij que monequi niyás. Huan ompa Jerusalén mosentilijque neques tanojnotzani de Cristo ten in tocnihuan taneltocani quinpohuaj queme nintayecancahuan. Huan yejuan niquinyecmejmela huilij in tanextililis ten cualcui ne nemaquixtilis ten nejua ay nictetapohuijtinemi intzalan ne tagayot ten amo poutinemij queme judíos. Huan nijín nicchihuac pero amo inixpan míac tagayot. Huan niquinyecnextilij ne tayecanani notequiu para ma notequiu ten nicchihuac huan ten nicchiu-toc ma amo nencajtiti san. <sup>3</sup>Huan ne tayecanani amo quitanahuatilijque que ma quinescayotican tech ninacayo in Tito ten nohuan yaya, masqui yejua poutinemij queme griego. <sup>4</sup>Huan sequi tacajcayaucataneltocani ichtacacalacque tohuan. Huan yejuan quinequíaj ma in Tito monescayoti tech ninacayo. Huan nochí neques tacajcayaucataneltocani calacque tohuan sayó para quitasque de queniu Cristo techtzin-quixtijtju den chichualis den tanahuatil de Moisés. Huan yejuan quinequíaj techajchihuillisque ne iteicnelilis de Cristo para que ocsepa ne tanahuatil de Moisés ma techquitziquijquitinemi oc. <sup>5</sup>Pero tejuan nión se momento timotecahuilijque ihuan ne tacajcayahuani. Porín tejuan ticyolnejnequíaj que namejuan xicsentocacan xicpixtiyacan ne yec melau tanextililis de Cristo ten cualcui ne nemaquixtilis, huan ma amo aquen namechajchihuili namotacuautamatis de Cristo.

<sup>6</sup>Pero neques itatitaniluan de Cristo ten in taneltocani quinpohuaj que tiopan-tayecanani, yejuan nojonques amo teyica nechylmajxitijque den tanextililis de Cristo. Huan amo no nechcujmoloayaj ne tatitanilme naquen mopohuayaj queme tayecanani ica por nintequihuan ten quichiutihualayaj. Porín Totajtzin Dios amo quinchichicotasoja in tagayot. <sup>7</sup>Huan ne tayecanani amo teyica nechylmajxitijque den tanextililis de Cristo. Porín yejuan ipa cajsicamatcaj ya que Totajtzin Dios quitequimactij ya in Pedro ma tanojnotztinemi ica in Tajtoltzin de Dios ten cualcui ne nemaquixtilis intzalan neques ten melau poutinemij queme judíos. Huan no ijcón yejuan cajsicamaticoj que Totajtzin Dios nechtequimactij ya ma nejua nitanojnotztinemi ica in Tajtoltzin de Dios ten cualcui ne nemaquixtilis intzalan neques tagayot ten amo poutinemi queme judíos. <sup>8</sup>Huan Totajtzin Dios ipa quititanic ya Pedro queme niitatitanil ma yejua quinnojnotztinemiti neques ten melau mopoutinemij queme judíos. Huan no ijcón Totajtzin Dios nechtitanic nejua queme niitatitanil ma niquinnojnotztinemiti neques ten amo judíos. <sup>9</sup>Ica ya nojón ne Jacobo huan ne Pedro huan ne Juan ten in taneltocani quinpohuaj queme tayecanani, yejuan nojonques cajsicamatque que Totajtzin Dios nechmactilij ya ichichualis para notequiu. Ica ya nojón yejuan nechmatajpalojque huan no quimatajpalojque ne Bernabé para ijcón quinextijque que timosenpantasojtaj ya huan porín tisentequiticainime. Huan no ijcón quinextijque que yejuan no nintanejnequilis que ma tejuan tiquinnojnotztinemican neques ten amo judíos. Huan yejuan ma quinnojnotztinemican neques ten melau poutinemi queme judíos. <sup>10</sup>Huan ne tayecanani techtatautijque sayó que monequi ma tiquinelnamiquican huan ma tiquinpalehuican ne pobres ten amo teyi quipíaj. Huan nejuatzin ipa ijcón notanejnequilis de nicchiutinemis, ma niqinpalehuijtinemi ne pobres.

**Pablo quiequixilij Pedro que amo cualtía ten  
yejua quichihuaya campa Antioquía de Siria**

<sup>11</sup>Pero se tonal cuac ejcoc Pedro campa ne pueblo de Antioquía, ijcuacán nejua nicyequixilij que amo cualtía ten yejua quichihuaya. Porín yejua tamachtijtinemía

ica taixcayahualis. <sup>12</sup> Porín achtopa in Pedro tamasehuaya ihuan in taneltocani ten amo poutinemij queme judíos. Pero satepan in Jacobo quinaltitanilij sequin judíos ten taneltocani de Jesús campa pueblo Antioquía. Huan cuac yejuan ejcocque ya, ijcuacán in Pedro pehuac mosecakahua ya de amo tacuas ihuan oc ne taneltocani ten amo judíos. Huan ijcón quichihuac Pedro porín yejua quinyolmohuiliaya neques judíos taneltocani ten tanescayotilme ya de Cristo tech ninnacayo, que tajcón yejuan quitechtíaj Pedro tensá ca tajtacol porín yejua tacuajtinemi ihuan taca ten amo judíos. <sup>13</sup> Huan miacque ocsequin taneltocani judíos peuque quichiutinemij ne tacajcayahualis ten Pedro quichiutinemic. Hasta no in Bernabé motecahuilij que ma no tecajcayautinemis ica ninemilis.

<sup>14</sup> Huan niquitac que ne Pedro ihuan itaneltoaicnihuan ten judíos, yejuan nojonques amo quitacamatinenque oc ijcón queme techmachtía in tamelahuac Tajtoltzin de Dios ten cualcui ne nemaquixtilis. Ica ya nojón nejua niquixilij Pedro inixteno nochí in taneltocani ten ompa mosentilijque. Huan niquilij ijcuín: “Tejua Pedro, tijudío huan tinentinemic ihuan in taneltocani ten amo judíos queme yesquía amo tijudío. Cualí yetoc. Pero axcan, ¿queyé tiquinnequilía in taneltocani ten amo judíos ma nentinemican queme judíos huan ma quitacamatican in tanahuatil de Moisés, como tejua amo no tictacamatinemi in tanahuatil de Moisés?”

### **Dios techmaquixtis tinochin porín titacuatamatij ihuan Cristo masqui tijudíos oso masqui amo tijudíos**

<sup>15</sup> Huan no ni Pablo niquijtoaya que tejuan tijudíos porín ijcón tiyolque. Huan tejuan amo timotajtacolmacatinemij ijcón queme neques pueblojuani ten amo judíos. <sup>16</sup> Pero cualí ticmatij que Dios quipohuas yolchipahuac se tagat huan amo quitajtacolcuiltis oc ne tagat como yejua tacuautamati ihuan Cristo. Huan Dios amo queman quipohuas que yolchipauque neques ten sayó quinequij quitacamatinemij in tanahuatilme de Moisés. Ica ya nojón tejuan titacuatamatque ya ihuan Cristo. Huan ijcón Dios techpohuac ya que tiyolchipauque huan amo techtajtacolcuiltis oc porín titacuatamatij ihuan Cristo. Huan amo aquen huelis quiyecajsicacamatinemi ne ten tanajnahuatía in tanahuatil de Moisés. Ica ya nojón Dios amo queman quipohuas que yolchipahuac se acsá ten mofuerzajuis para quiyecajsicacamatis in tanahuatil de Moisés. Ta, Yejuatzin quitajtacolcuiltis oc. Huan cualí ticmatij que Dios amo queman quipohuas que yolchipauque neques ten sayó quinequís quichiutinemij ijcón queme tenahuatíla in tanahuatil de Moisés. Ta, Yejuatzin quintajtacolcuiltis oc.

<sup>17</sup> Huan cuac tejuan ticyolnejnequíaj que Dios ma amo techtajtacolcuiltis oc huan ma techpohua tiyolchipauque ya porín titacuatamatij ihuan Cristo, ijcuacán tejuan ticajsicamaticoj huan ticyolmachilicoj ya que titajtacolejque. ¿Xe nijín quijsosnequi que Cristo Yejuatzin techtopehuac ya tech in tajtacol? Ma amo ijcón xicnemilican namejuan. <sup>18</sup> Porín como tejuan ticsecotalijcay ya in tanahuatil de Moisés, huan satepan ocsepa pehua tictacamatinemis que ne tanahuatil de Moisés, ijcuacán tejuan timochihuacoj titajtacolejque ya porín motas senteixteno que timoyoyjyolcucueptinemij. <sup>19</sup> Huan queme amo huelis ticyectacamatinenque ne tanahuatil de Moisés, ica ya nojón timosecocaque ya den tanahuatil de Moisés queme yesquía timomiquilijque ya. Huan ne tanahuatil de Moisés nechchihualtij ma nimosecakahua ya de yejua, para que nejua ma nihueli niyoltinemis huan nictacamatinemis

Totajtzin Dios.<sup>20</sup> Huan Totajtzin Dios quixejecoa que ihuan Cristo techcuoupampilojque ma timiquitij. Ica ya nojón amo tejuan oc totanejnequilis oc tenica tiyoltinemij axcan. Ta, Cristo yoltinemi toyolijtic. Huan nijín tonemilis ten ticpixinemij nican talticpac, yejua nijín ica tinentinemij porín titacuautamatij ihuan Cristo, Yejuatzin Iconetzin Dios. Huan Cristo techueyitasojtac huan motemactij ma quimictican para ijcón quixtahuas totajtacoluan.<sup>21</sup> Huan tejuan amo ticsecocauque den teicnelilis de Dios. Pero amo aquen huelis mochihuati yolchipahuac como quiyecajsicacacamatí in tanahuatil de Moisés. Porín tacán Dios quipohuasquía que yolchipahuac se acsá cuac yejua sayó quitacamatínemi in tanahuatil de Moisés, ijcuacón quijtosnequi que nencajtíc san ne imiquilís de Cristo.

### **Ticseláaj in Yecticatzin Espíritu amo porín tictacamatij in tanahuatil de Moisés. Ta, sayó porín titacuautamatij ihuan Cristo Jesús**

**3** Namejuan nantaca de Gálatas, semi nanyolmijmiquilome san. ¿Aconi namechcájcayauque para ma amo xictacamatican totanextililis ten melahuac? Huan cuac namechmachtijtoya ya, ijcuacón namechyecnextiliaya namoixpan de queniú quicuoupampilojque Totecotzin Jesucristo.<sup>2</sup> Huan axcan nicnequi xinechnanquilican nijín majtájtanti. ¿Xe namejuan nanquiselijque ya in Yecticatzin Espíritu porín nanquiyectacamatque ya in tanahuatil de Moisés? Pues amo. Oso, ¿xe nanquiselijque in Yecticatzin Espíritu porín nanquineltocacque se tanojnotzalis ten tejuan tamechmatiltijque? Pues, quema.<sup>3</sup> Semi nanxoxojme porín amo nancajsicamatij que Dios quipehualtij se yancuic nemilis namoyolijtic ica in chicahualis den Yecticatzin Espíritu. Ica ya nojón amo xicnemilican que namejuan ica namochicahualisuan san huelis nanquimajxitijtiyasque ne yancuic nemilis.<sup>4</sup> Nesi que semi nencajtíc san nochi ne ohuijcyot ten nanquijyohuijque huan nanquipanocque ya. Pero nicmati ya que amo nencajtíc nochi namotajyohuilis.<sup>5</sup> Huan Totajtzin Dios Yejuatzin namechmactilía in Yecticatzin Espíritu. Huan Yejuatzin quichiutinemi mohuiscatequime namotzalan. Huan, ¿queniú Dios quichiutoc nochi nijín? Namechilía que Dios nochi nijín quichiutoc amo porín namejuan nanquitacamatínemij in tanahuatil de Moisés. Ta, Yejuatzin quichiutinemij nochi nijín porín namejuan nantacuautamatque ya ihuan Cristo cuac nanquicacque de Yejuatzin Itajtoltzin. Porín amo aquen huelis quiyecajsicacacamatí nochi in tanahuatil de Moisés.

### **Dios moyectencahuac ya ihuan in Abraham de quitiochiutiayás**

<sup>6</sup>Huan ijcón tohuejcautat Abraham tacuautamatic ihuan Dios. Ica ya nojón Dios quipohuac que yejua yolchipahuac ya huan amo quitajtacolcuiltij oc.<sup>7</sup> Porín cuali xicmatican que nochi neques ten tacuautamatij ihuan Cristo, yejuan nojonques poutihuitze teconehuan de ne tohuejcautat Abraham.<sup>8</sup> Huan tech in Tajtoltzin de Dios ipa ixnestoc ya achtopa que mochihuas que Dios amo quintajtacolcuiltis oc neques ten tacuautamatínemij ihuan Dios. Ta, Yejuatzin quinpohuas que yolchipauque neques ten tacuautamatij ihuan Dios, masqui yejuan amo poutinemij queme judíos. Ica ya nojón Dios quilij Abraham ne achtopa ya ica nijín cualtzin tanemachtilis ijcuín: “Nejuatzin niquintiochihuas nochi in talticpacuani ica por ne motacuautamatilis, tejuá Abraham”.<sup>9</sup> Ica ya nojón nochi neques ten tacuautamatij ihuan Cristo, yejuan nojonques tatiochihualme de Dios, ijcón queme Dios quitiochihuac Abraham ne queman ya, porín yejua tacuautamatic ihuan Cristo.

<sup>10</sup> Huan xicmatican que sequin taca tacuautamatij que yejuan momaquixtisque de nintajtacoluan como quiajdicatacamatij in tanahuatil de Moisés. Pero yejuan nojonques sayó tatechihualme. Porín amo aquen huelis quiyecajdicatacamatis in tanahuatil de Moisés. Huan ijcón namechilía porín in Tajtoltzin de Dios quijtoa ijcuín: “Nochi neques ten amo quiajdicatacamatinemij huan amo no cajsicachiutinemij nochi in tanahuatilme ten ijcuiliutoc tech itanahuatil de Moisés, yejuan nojonques tatechihualme ya”. <sup>11</sup> Huan hueyi melau nijín tajtolme que Dios amo quipohuas que yolchipahuac se acsá porín yejua cajdicatacamati in tanahuatil de Moisés. Ta, Yejuatzin quitajtacolcultis oc. Porín in Tajtoltzin de Dios quijtoa ijcuín: “Ne tagat ten Dios quipohuas yolchipahuac, yejua ne yoltinemis sen nachipa porín tacuautamati ihuan Cristo”. <sup>12</sup> Huan ne tanahuatilme de Moisés amo technojnotza de tacuautamatilis ihuan Cristo. Ta, ne tanahuatil sayó quijtoa ijcuín: “Nochi neques ten quiajdicachiutinemisque nochi nijín tanahuatilme, yejuan nojonques yoltinemisque porín tatacamatinemij”.

<sup>13</sup> Huan queme tejuan amo tihuelque oc ticajdicatacamatisque oc in tanahuatil de Moisés, ica ya nojón timochihuacoj titatechihualme ya. Pero Cristo techcohuaco huan techquixtico itech ne tatechihualis. Huan Totajtzin Dios quipohuac Cristo que Yejuatzin tatechihual ica por tejuan topanpatica. Porín in Tajtoltzin de Dios quijtoa ijcuín: “Tatechihualme ya nochi neques ten miqij porín quinpiloyque tech se cuohuit ica por yejuan nintajtacoluan”. <sup>14</sup> Huan nochi nijín mochihuac ipan Cristo para que Dios huelis cajsicachihuas ya ne tenilil tenica moyectencauca ya ihuan Abraham. Huan ijcón Dios quinajdic huan no quintiochihuac ya neques ten amo judíos ica por imiquilis de Cristo Jesús. Huan ijcón Dios huelic ya techtayocolij in Yecticatzin Espiritu ijcón queme Dios moyectencauca ya, porín tejuan titacuautamatij ya ihuan Cristo.

### **Pablo tajtoa den chicahualis den tanahuatil de Moisés huan den chicahualis de ne tenilil de Dios**

<sup>15</sup> Tocnihuan, namechnojnotzati ica ne nexcuil de axcan tonemilipan. Cuac se tagat quichijchihuas se contrato huan ica moyectencahuas de quichihuas tensá tequit, ijcuacón amo aquen huelis quiquixtilis oc nión no quitamajmaxtilis de ne contrato. Porín como ijcón se quichihuas, ijcuacón amo teyi cualtiaquiuc oc ne contrato. <sup>16</sup> Huan ne quemanián ya Dios moyectencahuac ya ihuan in Abraham huan ihuan iconahuan de Abraham de quintiochihuas in talticpacuani ica por yejua. Pero in Tajtoltzin de Dios amo tajtoa de teconahuan de Abraham, ijcón queme yesquía miacque teconeme. Ta, in Tajtoltzin de Dios tajtoa de sayó se teconeu de Abraham. Huan nojón teconeu de Abraham, yejua ne in Cristo Temaquixtijque. <sup>17</sup> Ica ya nojón nicnequi namechyequilía que Dios quichijchihuac se contrato huan moyectencahuac ihuan in Abraham de quitiochiutiás. Huan Dios quitaminextico que hueyi melau ne contrato tenica moyectencauca ya ihuan Abraham. Ica ya nojón in tanahuatil de Moisés amo huelis quihuejuelos huan amo no huelis quinencajtilis san ne contrato tenica Dios moyectencahuac ihuan Abraham. Porín in tanahuatil de Moisés mochihuaco satepan que Dios moyectencauca ihuan Abraham ipan nahui ciento huan sempoal huan májtacti xiutica ya. <sup>18</sup> Huan tacán ticselijtiyasque ne tatiochihualis de Dios porín tictacamatinemij in tanahuatil de Moisés, ijcuacón huelis tejuan san timotanilisque ne tatiochihualis ica por tejuan totequiuc. Ica ya nojón ne tenilil de

Dios nencajtisquía san. Pero namechilía que Dios quitamimactilij ya Abraham de nochi ne tatiochihualis tenica moyectencauca ya que quitayocolis.

<sup>19</sup> Huan axcan namechtajtánilía ijcuín: ¿para toni cualtíac in tanahuatil de Moisés? Pues, Dios techmactilij ya in tanahuatil de Moisés para ica technextilijtihuala que titajtacolejque. Pero in tanahuatil de Moisés cualtíac sayó hasta in tonalme cuac huala ne teconeu de Abraham, yejua in Cristo Temaquixtijque ten Dios moyectencauca ya ihuan Abraham de cualtitanis. Huan ne tanahuatil de Moisés, Dios quite-nahuatilij ya ma quitacamatican ipueblojcahuan de Israel ica itencopaca in ángeles ten taquehualme de Dios. Huan in ángeles quimactiliayaj Moisés ne tanahuatilme, huan Moisés queme se tetajtohuijque quinpanoltiliaya in pueblojuani de Israel ne tanahuatilme. <sup>20</sup> Pero amo monequi se tetajtohuijque cuac sayó Dios iselti tequititoc, ijcón queme quichihuac Dios cuac quitenilij Abraham ne tenilil de quiochihuas.

### **Pablo quinmactij in taneltocani para toni cualtíac in tanahuatil de Moisés**

<sup>21</sup> Huan no namechtajtánilía ijcuín: ¿xe in tanahuatil de Moisés quitzajtzacuilía ne netenilil tenica Dios moyectencauca ihuan Abraham? Ma amo ijcón xicnemilican. Porín tacán se acsá huelis quitacamati in tanahuatilme de Moisés para ijcón yoltinemis nachipa, ijcuación quijtosnequi que Dios amo quintajtacolcuiltis oc nochi neques ten quiajsitacamatinemij in tanahuatil de Moisés. Ta, Yejuatzin quinpo-huasquía yolchipauque. Pero amo melau ijcón mochihua. <sup>22</sup> Porín in Tajtoltzin de Dios tenextilía que nochi tejuan tiilpitocque queme presos ica in tajtacol. Huan ijcón quitalij Dios para que nochi tejuan ten titacautamatij ihuan Cristo, ma ticselican ya ne netenilil tenica Dios moyectencauca ya ihuan Abraham que techtayocolis ne nemaquixtilis.

<sup>23</sup> Pero achtopa que titacautamatisquía ihuan Cristo, ijcuación Dios techpixtihualaya queme tipresos ica por ne tanahuatil de Moisés. Huan ijcón Dios techmatan-pahuijtiuhualaya hasta ne tonalme cuac Yejuatzin techajscamatiltico de ne tacuautamatilis ihuan Cristo. <sup>24</sup> Huan ijcón in tanahuatil de Moisés mochiutihualaya queme yesquía se acsá tapixque ten techpixinemi para ijcón techuicas huan techajxitis imaco in Cristo Temaquixtijque. Huan ijcón mochiutihuala para ma Dios ma amo techtajtacolcuiltis oc. Ta, ma techpohua que tiyolchipauque cuac tejuan titacautamatij ihuan Cristo. <sup>25</sup> Huan queme ejcoc ya in tonalme cuac titacautamatij ihuan Cristo, ica ya nojón amo monequis oc ne tanahuatil de Moisés para ma techpixtinemis queme se tapixque. <sup>26</sup> Porín nochi tejuan Dios techpohua tiiconehuan ya porín titacautamatij ihuan Jesucristo in Temaquixtijque. <sup>27</sup> Huan Dios techtepohualtij imacotzinco Cristo porín nochi tejuan titaahuilme ya ica in chicahualis de Cristo. Huan ijcón Cristo techyancuicataquentij ica ichicahualistzin de inemilis de Yejuatzin. <sup>28</sup> Huan axcan ma amo tiyolmachilijtinemican que tejuan titaca judíos, oso titaca griegos, oso titaquehualme titanamacme, oso titaquehualme ten amo titanamacme, oso titaca, oso tisihuame. Porín Totajtzin Dios amo techpohua que tejuan nochi tataman. Ta, Yejuatzin techpohua que tejuan tisenatamanme san tinesij iix-pantzinco Dios. Porín tejuan tisepanpoutinemij ihuan Cristo Jesús. <sup>29</sup> Huan queme tejuan tipoutinemij ihuan Cristo, ijcuación tejuan no titeconeuhuan ya de Abraham ica por totacautamatilis tech Cristo. Ica ya nojón ticselijtijyasque nochi ne netenilil tenica Dios moyectencahuac ihuan Abraham de quitayocolis.

**4** Nicnequi namechnojnotzas ica ne nexcuitil de axcan tonemilispán de se teconeu ten quiseliltía ixolal den itatcopaca. Huan cuac ne teconeu moiscaltijtóc oc, ijcuacón yejua quititanij nican huan nepa queme yesquía se taquehual ten tacohual ya, masqui ipa iaxca ya yesqui nochi ten itatcopaca pohui. <sup>2</sup> Huan ocsequin taquehualme quimachtíaj ne teconeu huan quipalehuitiyasque hasta in tonal cuac itat quiaxcatilis in xolal. <sup>3</sup> Huan no ijcón mochihuaco topan tejuan ten tinentinemíaj queme coneme huan ayamo tiyecyolmasíaj den Tajtoltzin de Dios. Ica ya nojón in tamachilisme den tayecanani ejecame de nican talticpac techmapachotoyaj ica ninchicahualis. <sup>4</sup> Pero ejcóc in tonal cuac nochi motamichihuaco ya nojón ten Dios quimonequiltij ma mochihua. Ica ya nojón Totajtzin Dios cualtitanic iyotzin Conetzin. Huan se sihuat quiyolitij Yejuatzin, huan Yejuatzin quitacamatico in tanahuatil de Moisés ijcón queme se tagat judío quitacamatinemi. <sup>5</sup> Huan Totajtzin Dios cualtitanic iyotjzin Conetzin para ma techcohuaqui huan techquixtiqúi tech in chicahualis den tanahuatil de Moisés para ijcón Dios techpohua que tiitacpapiluan ya. Huan amo huelisquía timochihuaniij tiitacpapiluan porín amo huelic tictacayecajsicamatque in tanahuatil de Moisés. <sup>6</sup> Pero axcan tejuan tiiconehuan de Dios. Ica ya nojón Totajtzin Dios techualtitanilij in Yecticatzin Espíritu ten hualehuac imaco Cristo para ijcón yetinemis toyolijtíc para que ma ixnesis que nochi tejuan titeconeuhuan de Dios. Huan ne Yecticatzin Espíritu tech toyolijtíc quitenehua Dios ijcuín: “Notasojtajtzin”. <sup>7</sup> Ica ya nojón nimitzilía que axcan tejua amo titaquehual ten tacohual. Ta, nimitzilía que axcan tejua tipohui titeconeu de Dios. Ica ya nojón Dios mitzmactiliti nochi ten niaxca porín tipoutinemi ihuan Cristo.

**Pablo quinnejmachtij in taneltocani ma amo ocsepa  
motecahuilican ma quinmapachojto in tanahuatil de Moisés**

<sup>8</sup> Huan ne achtopa ya cuac ayamo nanquixmatíaj Totajtzin Dios, ijcuacón namechmapachojtinemíaj huan namechtequitiltijtihualaya ne tatadiosme ten amo melau yoltocque. <sup>9</sup> Pero axcan namejuan nanquixmatij ya Totajtzin Dios. Oso cachi cuali ma niqijto que Totajtzin Dios namechixmatico ya. Huan queme nanquixmatij ya Totajtzin Dios, ¿queyé nanquitoctilisque ocsepa ne tayecanani ejecame de pohuij nican talticpac ten amo cualcui chicahualis para namechmaquixtisque? Huan queme ne tayecanani ejecame de nican talticpac nencajti san ninhuelilis, ¿queyé nanmotecahuilisque inuan que ma yejuan ocsepa namechmapachojto queme yesquía nannintaquehualuan innahuac? <sup>10</sup> Huan namejuan naniluititinemij tech sequin tonalme oso tech sequi metzme oso tech sequi tapoalme oso tech sequi xiume. Huan ijcón nanquinemilíaj que xa ca nojón iluichihualis huelis nanmomaquixtisque de nanotajtacoluan. <sup>11</sup> Ica ya nojón nimoyolcuejmolojtinemi que xa nencajtíc san nochi ne tanextililil ten namechmachtijca ya.

<sup>12</sup> Nocnihuán, namechontatautía que namejuan xicchihuacan ijcón queme nejua nicchihuac. Porín nejua nimosecocaahuac ya de ne tanahuatil de Moisés queme yesquía amo nijudío cuac namotzalan nitequititinemic. Huan ijcón nejua nimochihuaco queme namejuan ten amo nanjudíos. Pero amo por nojón xicnemilican que nannehyolxocolijque. <sup>13</sup> Porín namejuan cuali nanquimatinemij ya que cuac ne achtopa ya namechnojnotzato ica ne Tajtoltzin de Dios ten cualcui ne nemaquixtilis, ijcuacón nimoajsic namohuan huan namechmachtij porín nimococoaya de nonacayo. <sup>14</sup> Huan nannechitiliayaj de queniu nimotztinemía de cocolis huan yejua

ne namechtajyohuiltiaya. Pero namejuan amo nannechtahuelitacque huan amo no nannechmajpeuque porín neocolisti ten nicpiaya. Ta, cachi oc namejuan nannechselijque queme yesquía nejua niángel nitaquehual de Dios huan no nannechselijque queme yesquía nejua ni Cristo Jesús. <sup>15</sup> Huan axcan, ¿can yajqui nojón yolpaquilis ten nanquiyolmachiliyay cuac namohuan niyetoya? Porín cuali nicmatoc que ne tonalme semi nannechyoltasojtacque hasta huelis nannechtayocolisquíaj namoixtololohuan como nanuelisquíaj nanmoquixtilisquíaj. <sup>16</sup> Huan axcan nesi que namejuan nannechtahuelitztinemij ya sayó porín namechyecajsicamachtía ica ten melau in Tajtoltzin de Dios. <sup>17</sup> Pero namechilía que ne tamachtiani tacajcayahuani semi no namechylolnejnequij pero amo para namechpalehuisque ica ten cuali. Ta, yejuan namechylolnejnequij porín quinequij namechsecotalisque de tejuan para ijcón namejuan cachi oc xiquintasojtacan ne tamachtiani tacajcayahuani. <sup>18</sup> Semi cuali cuac se quinyolnejnequis in tocnihuan pero ma mochihua sayó ica ten melahuac huan amo sayó ica tacajcayahualis. Huan nejua namechylolnejnequi, amo sayó cuac namohuan niyetinemi. Ta, masqui huejca niyetinemi pero ipa namechylolnejnectoc. <sup>19</sup> Noconetzitzin, namechilía que axcan ocsepa nitajyohuijtoc ica hueyi toneucayot ica por namejuan, ijcón queme cuac se sihuat tayolititi huan quimachilía hueyi tajyohuilis. Huan nicsentoca nitajyohuitiyás hasta in tonal cuac in inemilis de Cristo moajsi-cachihuas tech namoyolijtic. <sup>20</sup> Semi nicnequisquía que namohuan niyetotiu para nicpatas de queniu namechnojnotzas. Pero axcan amo nicajsicamati de queniu nanquinemilijtocque namejuan.

### **Pablo tamachtij ica se nexcuutil den ome isihuahuan de Abraham ten monetzayaj Sara huan Agar**

<sup>21</sup> Huan namechilía namejuan ten nanquinequij nanquitacamatinesque oc in tanahuatil de Moisés para ijcón nanmomaquixtisquíaj. Niquixejcoa que namejuan amo nancajsicamatij toni quijtosnequi in tanahuatil de Moisés. <sup>22</sup> In Tajtoltzin de Dios techilía que tohuejcautat Abraham quinpíac ome itelpocahuan. Se sihuat taquehual ten tanamac, yejua ne quiyolitij se itelpocau de Abraham. Pero isihuau de Abraham, yejua ne amo taquehual tacohual; huan yejua no quiyolitij in ocsé itelpocau de Abraham. <sup>23</sup> Huan ne itelpocau de Abraham ten quiyolitij ne sihuat taquehual ten tacohual, yejua ne yolico ijcón queme nochi talticpacuani coneme yoliquij. Pero ocsé itelpocau de Abraham ten quiyolitij ne isihuau ten amo taquehual, yejua nojón yolico porín motamichihuaco ya ne tenilil tenica Dios moyectencauca ya ihuan Abraham. <sup>24</sup> Huan ica por nijín ome sihuame Dios technextilía ica se nexcuutil. In ome sihuame quinejnehuilíaj ome contratos. Huan se contrato mochihuaco campa ne tepet Sinaí. Huan Agar quinejnehuilía ne contrato. Huan nochi neques ten poutinemij tech ne contrato de Sinaí, yejuan nojonques nentinemij queme taquehualme tanamacme ten quipíaj de quiyecajsicatacamatisque ne tanahuatil de Moisés. <sup>25</sup> Huan Agar quinejnehuilía ne tepet Sinaí campa talme de Arabia. Huan axcan ne Agar no quinejnehuilía ne pueblojuani judíos ten axcan quitacamatinesmij oc ne tanahuatil de Moisés ijcón queme tanahuatía desde de pueblo Jerusalén. <sup>26</sup> Huan ne isihuau de Abraham ten amo taquehual tanamac, yejua ne quinejnehuilía in pueblojuani de Jerusalén ten pohui ne eluiyactzinco campa amo ongacque taquehualme tanamacme. Ica ya nojón tejuan titeconehuan den eluiyactzinco huan ompa tipoutinemij. <sup>27</sup> Huan in Tajtoltzin de Dios techilía ijcuín:



Ximoyolpacti, tejua sihuat, ten amo queman tiquinpiác coneme.

Xitzajtzi ica yolpaquilis porín ayamo ticmachilij ne tonecaucayot cuac se tayolitía. Huan nimitzilía ximoyolpacti, tejua, porín tiquinpiati cachi oc coneme huan que ne sihuat ten quipiác iconeu ihuan motacau.

<sup>28</sup> Huan axcan, tocnihuan, tejuan ticnejnehuilíaj queme ne teconeu Isaac. Porín in Isaac yolic porín ipa ijcón Dios moyectencahuac ihuan Abraham. Huan tejuan no timochihuacoj titeconeuhan de Dios porín ipa ijcón Dios quitenilij in Abraham que mochihuas. <sup>29</sup> Huan tech nojón tonalme ne iconeu de Agar yolico porín in yoltanejnequilis de tagat san. Huan ne tayecancateconeu ten quitocaytijque Ismael, yejua ne quitahuelitztinemía ne ocsé teconeu Isaac ten yolico ica in chicahualis den Yecticatzin Espíritu. Huan tech nijín tonalme no ijcón mochiutinemi que neques ten quitacamatinemij in tanahuatil de Moisés, yejuan nojonques techtahuelitztinemij tejuan ten tiyancuicayolque ya ica in chicahualis den Yecticatzin Espíritu. <sup>30</sup> Huan xicaquican toni quijsa in Tajtoltzin de Dios ijcuín: “Xicalanquixtican ne sihuat taquehual ten tanamac ihuan niconeu, porín ne teconeu den sihuat tanamac amo huelis quiselis ne iaxcacopaca. Ta, namechilía que quiselis ne iaxcacopaca ne teconeu ten quiyolitij ne isihuau Abraham ten amo tanamac”. <sup>31</sup> Ica ya nojón, nocnihuan, xicmatican que tejuan amo tiiconeuhan de ne sihuat ten taquehual tanamac. Porín amo techmapachojtinemi oc ne tanahuatil de Moisés. Ta, namechilía que tejuan tiiconeuhan de ne isihuau de Abraham ten amo sihuat tanamac, porín tejuan timochihuacoj ya tiipiluan de Dios.

### **Xichipaucanemican huan ma amo namechmapachojto oc ne tanahuatilde de Moisés**

**5** Huan ne Totecotzin Cristo techtojtomac ya para ma amo titziytzicautocan oc ica in chicahualis den tanahuatil den Moisés. Ica ya nojón namechilía xicsentocacan xicautiyacan ne tanahuatil de Moisés. Huan amo ximotecahuilican oc que ma ne tanahuatil de Moisés ma namechyecana, ijcón queme se yugo quinyecantinemi in cuacuejme. <sup>2</sup> Huan nejua ni Pablo xinechcaquilian ca cuali. Tacán namejuan namotecahuilíaj ma namechnescayotican tech namonacayo, ijcuacán ne namotacuautamatilis ten nanquipíaj ihuan Cristo nencajtiti san. <sup>3</sup> Huan ocsepa nicnequi namechyequilis que aquen yesqui tagat quinequis motecahuilis ma quinescayotican tech inacayo, yejua nojón quipía que quiajsicatacamatinemis in tanahuatil de Moisés nochi ten tanahuatilía. <sup>4</sup> Huan nanmosecocaque ya de Cristo namejuan ten nanquinemilíaj que Dios namechpohuas nanyolchipauque como nanquitacamatinemij in tanahuatil de Moisés. Como ijcón nanquichihuaj, ijcuacán nanmosecocaque ya den teicnelilis de Cristo. <sup>5</sup> In Yecticatzin Espíritu techchicahualtijtoc que ma ticyolicachixtocan ica hueyi yoltacuautamatilis ne tonal cuac Dios quitamichihuas ya itequiu de techajsicamatilis ne yolchiphualis. <sup>6</sup> Huan como tejuan tipoutinemij ya ihuan Cristo Jesús, ijcuacán amo teyica cualtía oc como technescayotisque tech tonacayo oso amo technescayotisque tech tonacayo. Ta, namechilía ne ten cualtía yejua nijín: Monequi ma tiepiacan tacuautamatilis ihuan Cristo huan ica ne toacuautamatilis ma timosepantasojtatinemican se huan ocsé.

<sup>7</sup> Huan namejuan ten cuali nantacuautamatinemij ihuan Cristo, nimoucaita que nanmotecahuilíaj que acsá namechtzajtzacuilíaj huan namechtajtolmacaj para amo xictacamatinemican den melahuac Tajtoltzin de Dios. <sup>8</sup> Huan Totajtzin Dios namech-

nojnotzac ya xictocilican Yejuatzin. Huan Yejuatzin amo namechtzajtzacuilijtoc de amo xictacamatican Itajtolztzin. <sup>9</sup> Amo xiquelcahuacan ne tajtolis ten quijtoa que ica in tepitzin san levadura quimajmahua nochi pantixti. Huan no ijcón tepitzin tacajcauacatanextililis quinmajmahuifla nintacuaautamatilis den ne taneltocani. <sup>10</sup> Nejua nitacuaautamati inahuac Totecotzin de que Yejuatzin namehpalehuis namejuan para xitaneltocacan ijcón queme namehnextilij ya. Huan ma amo xitaneltocacan de ocsé taman tanextililis. Huan aquen yesqui tagat ten namechcuatapololtijtinemis, yejua ne ma quijyohuis in tatzacuilitis ten Dios quimactilis.

<sup>11</sup> Huan, tocnihuan, tacán ay nitamachtijtinemisquía que monequi ma namechnescayotican tech namonacayo, ijcuacón in tayecanani judíos amo nechtajyohuiltijtinemisquíaj oc. Pero queme nejua nitamachtijtinemi de que Cristo momiquilij toixpatca tech in cruztzin, ica ya nojón, quema, niquinyolxocolijtoc oc ne tayecanani judíos. Porín monequi que yejuan ma tacuaautaminemican ihuan Cristo. <sup>12</sup> Huan neques ten namechcuatapololtijtinemij de que monequi ximonescayotican tech namonacayo, yejuan nojonques nicnequisquía que yejuan melau ma motetequican para ma amo namechcujmolocan oc de namejuan nantaneltocani de Cristo.

<sup>13</sup> Huan notasojicnihuan, Cristo namechnotzac ya que amo xipoutinemican oc tech in chichualis den tanahuatil de Moisés. Huan como nantatojtomalme ya den tanahuatil de Moisés, ica ya nojón amo xicyolnemilican que cuali huelis nanquichiutinemisque nochi in tajtacolnemilis de namejuan namotanejnequilis. Ta, namechilía ximotequitilijtinemican se huan ocsé ica ne tetasojtalis tenica nanmosepantasojtaj. <sup>14</sup> Huan nochi in tanahuatil de Moisés quitamisenijtoaya ijcuín: “Xictasojta mocnihuan ijcón queme tejua timotasojta”. <sup>15</sup> Huan tacán namejuan namotehuíaj huan namotahuelitztinemij queme yesquía itzcuinme ten moquejquetzomaj, ijcuacón ximoyectachilican para amo namejuan san nanmohuejuelosque de namotacuaautamatilis.

### **Nican ixnesi ten quichiutinemi totalnamiquilis de tajtacol huan no ixnesi in taquilot ten quichihualtía ma onca in Yecticatzin Espíritu**

<sup>16</sup> Huan nejua in Pablo namechilía ijcuín: xinentinemican ica in chichualis den Yecticatzin Espíritu huan ijcón amo cachi oc nanquichiutinemisque queme quinejnequi namotanejnequilis de tajtacol. <sup>17</sup> Huan namotanejnequilis ten cuica tajtacol, yejua nojón quitehujtinemi in Yecticatzin Espíritu. Huan no in Yecticatzin Espíritu quitehujtinemi ne namotanejnequilis ten cuica tajtacol. Huan ne omen moixnamictinemij. Huan namejuan nanquiyolnejnequij nanquichihuasque ten cuali. Pero namejuan amo huelis nanquichihuasque ten cuali chihualisme como namechyecana ne namotanejnequilis ten cuica tajtacol. <sup>18</sup> Pero como in Yecticatzin Espíritu namechyecantinemis, ijcuacón ne tanahuatil de Moisés amo namechmapachojtos oc.

<sup>19</sup> Huan totanejnequilis ten cuica tajtacol, yejua nojón quichihualtía ma onca nijín tajtacolme: neques namicuani ten tasihuapapata oso tagapapata, huan neques ten amo namicuani ten tasihuapapata oso tagapapata, huan se quichiutinemi ten amo chipahuac, huan se elihuistitinemi tech in pitzotic nemilis. <sup>20</sup> Huan se motajtacolmaca cuac se quimohuistilijtinemis ne tatadiosme, huan cuac se monahualuijtinemi, huan cuac se tetahuelitztinemi, huan cuac se tetajtoltehuijtinemi, huan cuac se tanejcolijtinemi, huan cuac se tecualanuijtinemi, huan cuac se yoltanemilijtinemi para

sayó yejua san, huan cuac se tecualancaxejxelojtinemi, huan no cuac se tetahuelxejxelojtinemi. <sup>21</sup> Huan no se motajtacolmaca cuac se tensá moaxcatilisnequi, huan cuac se temictijtinemis, huan cuac se mohuintitinemis, huan cuac se elihuis tatacuajtine-mis, huan cuac se quichiutinemis m'ac tataman tajtacol de nochi ten quinejnehuilá nochi nijín chihualis. Huan axcan namechnejmachtía ijcón queme namechilijca ne achtopa que neques ten quichiutinemij nijín tataman de tajtacol, yejuan nojonques Dios amo queman quinyolyecantinemis ninyolijtic ica ichicahualistzin.

<sup>22</sup> Pero in Yecticatzin Esp'ritu quichihualtijtoc ma onca tech toyolo nijín taman taquilome: ma se tetasojtatinemi; huan ma se yolpactinemi; huan ma se yolseucanentinemi; huan ma se quipixtinemi paciencia; huan ma se teyolicnelijtinemi; huan ma se quichiutinemi ten cuali; huan ma se tacuautamacatagat; <sup>23</sup> huan ma se yolyemancanemi; huan ma se moyecantinemi ica nejmach. Huan namechilía que amo teyi ongac tanahuatil ten huelis techtachualtía que ma amo ticpiacan nijín taquilot. <sup>24</sup> Huan nochi tejuan ten tipoutinemij ihuan Cristo, amo timotecahuiláj ma techyecana oc nochi totanejnequilis ten cualcui tajtacol, ijcón queme yesquía ticmictijque ya ne totalnamiquilis ten cualcui tajtacol. <sup>25</sup> Huan como tejuan tiyancuicayoltinemij ya ica in chichualis den Yecticatzin Esp'ritu, ica ya nojón ma sayó techyecantinemi in Yecticatzin Esp'ritu. <sup>26</sup> Huan no ma amo timohueyimatinecan; huan ma amo timopehualtijtinemican ica cualanyot; huan ma amo timonejxicolijtinemican se huan ocsé de tejuan san.

### Nican tajtoa de quenin ma timosepanpalehuijtinemican

**6** Huan nochihuan, tacán acsá se tocníu taneltocacque huetztihuetzic tech in tajtacol, ijcuacón namejuan ten namechyecantinemi in Yecticatzin Esp'ritu, monequi xicpalehuican ne tocníu ma quicahua ne tajtacol. Pero xicyolmajxitan ne tocníu ica ne yolyemanalis. Huan no ximotachilican namejuan san para ma amo no santajma in amocuali Satanás ma namechyoltanemililtis ica tajtacol. <sup>2</sup> Ximosepanpalehuijtiyacan se huan ocsé namejuan namocnihuan tech nochi nintajyohuilis, huan ijcón nanquicajscatacamatiyasque in tanahuatil de Cristo, de monequi ximosepantasojtasque.

<sup>3</sup> Huan tacán se acsá quiyolmachilía que semi hueyi chiuque masqui amo melau teyi chiuque, ijcuacón yejua san moyolcajcautoc. <sup>4</sup> Huan cada se tocníu monequi ma moixejecoltijtiu de inemilspan. Huan como quiyolmachilía que yejua chipaucanentinemi, ijcuacón huelis moyolpactijtiyás ya. Porín yejua quimactoc ya que quichiutinemi sayó ten cuali. Huan ma amo mopohua yolchipahuac porín monejnehuilá ihuan ocsé tocníu taneltocacque. <sup>5</sup> Porín cada se tocníu monequi quichiutinemis in tequit ijcón queme Dios quimactilij ya. <sup>6</sup> Huan nochi neques ten quiselijtiyohue ne tanextililis de Tajtoltzin Dios, yejuan nojón monequi xicpalehuijtiyacan ne tamachtijque ica nochi tataman tapalehuilis.

<sup>7</sup> Amo ximoyolcajcahuacan namejuan san, porín amo aquen huelis quiquejque-los Dios. Porín cuali ticmatij que nochi tatocme ten in tagat motoquilis, yejua nojón taquilot quiselis in tagat. <sup>8</sup> Huan no ijcón mochihuas tech tonemilspan, que tacán se tagat motequitiltía ica tataman tachihualisme ten cualcui tajtacol, ijcuacón ne tagat quiselis taxtahuil ten cualcui in miquilis. Pero ne aquen motequitiltía sayó tenica quipactijtinemis in Yecticatzin Esp'ritu, cuali ticmatij que ne tagat cajocui taquilot ijcón queme yejua motoquilijca ya. Huan yejua nojón quiselis in nemilis ten

amo queman tamis ica in chicahualis den Yecticatzin Espíritu. <sup>9</sup> Huan ma amo queman tisiöhuitij de ticchiutinemisque ten cuali. Porín como amo timoyojoyolcuepatij de totacuautamatilis, ijcuacón tiselijtiyasque in taxtahuil ne tonal cuac Dios qui-monequiltis. <sup>10</sup> Ica ya nojón namechilía nachipa cuac tihuelisque ma tiquinpale-huijtiyacan nochi tagayot. Pero no cachi oc ma tiquinpalehuijtiyacan in tocnihuan taneltocani.

### **Nican Pablo quinnejmachtía huan quintajpaloa in taneltocani**

<sup>11</sup> Xiquitacan, namejuan nannocnihuan, axcan nipehuac namechtajcuilohuilijtoc ca huejueyi letras tech nijín amat tajcuilol huan nochi nijín ica nomay san nicchi-hua. <sup>12</sup> Huan nochi neques ten namechnequilía ximonescayotican tech namonacayo, yejuan nojonques ijcón quichiutinemij para sayó quinpactisque in tayecanani judfos. Huan yejuan no ijcón quichihuj porín amo quinequij quiyohuisque ne tajy-ohuilis ten mochiutoc cuac titacuautamatij que in Cristo Temaquixtijque momiquilij toixpatca para quixtahuac totajtacoluan. <sup>13</sup> Huan namechilía que nochi neques tamachtiani ten monescayotijque ya tech ninnacayo, yejuan nojonques hasta amo no quiajsicatacamatij nochi in tanahuatil de Moisés. Pero yejuan namechnequilíaj ma namechnescayotican tech namonacayo para ijcón mohueyimatisque porín namech-fuerzajuijque de ijcón xicchihuacan tech namonacayo.

<sup>14</sup> Pero nejua amo nicnequi nimohueyimatine mis. Ta, sayó nicnequi nimoyolpacti-jtinemi porín Totecotzin Jesucristo momiquilij ya tech in cruztzin huan quixtahuac totajtacoluan. Huan axcan nitacuautamatinemi ihuan Cristo; ica ya nojón nicpo-hua ne tanejnequilis ten cualcui tajtacol de nican talticpac que amo teyi ipatui oc, queme yesquía miquet ya. Huan no in talticpacuani amo no nechueyipohuj oc, queme yesquia nimomiquilij ya. <sup>15</sup> Huan queme tejuan tipoutinemij ya ihuan Cristo Temaquixtijque, ica ya nojón amo teyi techpalehuis oc como timonescay-otisque tech tonacayo oso amo ticchihuasque. Ta, tejuan ticyolpactijtinemij Tota-jtzin Dios como tiyancuicayoltinemij ica por ichicahualis den Yecticatzin Espíritu. <sup>16</sup> Huan ma Dios quinyolsehui huan quinyolicneli nochi neques ten quitacamatine-misque nijín totanextililisuan, porín melau yejuan poutinemij ihuantzin huan yejuan melau ipueblojcahuan de Israel ten Yejuatzin moinaxcatilij. <sup>17</sup> De axcan para taix-pan ma amo aquen nechcuejmolocan oc, porín monextijtihuitz ya tech nonacayo que nechuitecque porín nejua niitequiticau de Totecotzin Jesucristo.

<sup>18</sup> Huan tocnihuan, Totecotzin Jesucristo ma namechyolicnelijtiu tech namotal-namiquilis. Ma ijcón mochiutui. Amén.

## IN TAJCUILOLAMATZIN TEN QUITAJCUILOHUILIJ IN TATITANIL SAN PABLO PARA IN TANELTOCANI DE CRISTO TEN CALYETOCQUE CAMPA PUEBLO DE EFESO

### Nican Pablo quintajcuilohuilía in tocnihuan taneltocani campa pueblo Efeso desde ne Roma campá yetoc preso

**1** Nejuatzin ni Pablo niitatitanil de Jesucristo porín ijcón quimonequiltij Totajtzin Dios. Huan ijcón tamechtajpaloaj nochi nantocnihuan nantaneltocani ten nanyolchipauque huan ten nantacuataminemij ihuan Totecotzin Cristo Jesús, namejuantzitzin ten nancalyetocque ne Efeso copaca. <sup>2</sup>Huan xicpixtiyacan namejuan ne teyolicnelilis huan ne yolsehuilis ten hualeutoc inahuac Totajtzin Dios huan inahuac Totecotzin Jesucristo.

### Nican tajtoa de ne tatiochihualisme ten techmaca Jesucristo ica in chichualis den Yecticatzin Espíritu

<sup>3</sup>Huan ma ticmohuistilican Totajtzin Dios, huan ma tictasojcamachilican Yejuatzin Itajtzin de Totecotzin Jesucristo. Huan Totajtzin Dios techtatiochihuilij ya ica nochi tataman tatiochihualisme ten hualehuaj tech nochi in lugares de ne eluiyactzinco. Huan ijcón Dios quichiutinemi topan porín timajsitinemij ihuan Cristo Jesús. <sup>4</sup>Huan achtopa que tzinehuac in talticpac, ijcuac Totajtzin Dios techijitac ma tipoutinemican ihuan Cristo. Huan no Totajtzin Dios techijitac que ma tinentinemican inahuactzinco Yejuatzin tiyolchipauque huan ma amo titayolmajmahualme ica tajtacol. <sup>5</sup>Huan Totajtzin Dios semi techtasojtac. Ica ya nojón Yejuatzin techijitac desde ne achtopa ya que ma tejuan timochihuaquij tiiconehuan de Totajtzin Dios queme yesquía tiitacpaconehuan. Huan nochi nijín quichihuac in Totajtzin Dios ica ihuelilis de Iconetzin Yejuatzin in Jesucristo, porín Totajtzin Dios quimonequiltij ma mochi-hua ijcón queme Yejuatzin itanejnequilis. <sup>6</sup>Ica ya nojón tejuan monequi ticueyimo-huistilican in Totajtzin Dios porín Yejuatzin telsenca techueyiyolicnelijtinemi. Huan ijcón ne ihueyiteicnelilis de Totajtzin Dios, Yejuatzin techtayocolijtoc huan techualpanmacatoc mosta mosta porín tejuan tipoutinemij ihuan Itasojconetzin, Yejuatzin in Cristo Jesús. <sup>7</sup>Huan Totajtzin Dios techueyiyolicnelij huan techueyitasojtac. Ica ya nojón Yejuatzin quichihuac que ma techmaquixtis Iconetzin cuac Yejuatzin quimimiloy iesyotzin tech in cruz huan ijcón quixtahuac totajtacoluan. Huan ica ne imiquilis de Cristo, Totajtzin Dios techtapojpoluij ya de nochi totajtacoluan.

<sup>8</sup>Huan Totajtzin Dios quihueyinextij ya ne iteicnelilis tohuan. Ica ya nojón Yejuatzin techtayocolij ne huelilis para ma tiyectanemilijtinemican huan ma tiyolmajsitinemican. <sup>9</sup>Huan Totajtzin Dios techajsicamatiltij ya ne de Yejuatzin iichtacata-machilisuan ten ichtacayetihualayaj. Huan no techajsicamatiltij ya ne de Yejuatzin itanejnequilis ten quimonequiltía ma mochiuto ica por Cristo Jesús. <sup>10</sup>Huan nijín itaixejecol de Dios, ma mochihuaqui ca nejmach ijcón queme quimonequiltis Dios. Huan no motamichihuaqui itanejnequilis de Dios tech ne tonal ten Dios quitallij ya. Huan tech ne tonal Totajtzin Dios quisentilis nochi tanahuatil imaco Cristo para ma Cristo tayecantinemi ca chichualis ipan nochi tanahuatilme ten ongac nepa

eluiyactzinco. Huan no ma tayecantinemi Cristo ipan nochi tanahuatilme ten ongan nican talticpac.

<sup>11</sup> Huan Totajtzin Dios techijitac desde ne achtopa ya para ma tipoutinemican ihuantzin Cristo. Huan Yejuatzin techtemactij imaco Cristo para ijcón timochihuaco tiiherencias de Cristo. Huan nochi nijín mochiutiu porín ijcón quimonequiltij Totajtzin Dios ten quichiutinemi queme Yejuatzin iyolpaquilis huan itanejnequilis. <sup>12</sup> Huan tejuan ne achtopa ya timochiuque titacuautamatini ihuan Cristo para ma tejuan ma ticmohuistilijtinemican Yejuatzin ihuan icualtziyo ten quipixtinemi Yejuatzin. <sup>13</sup> Huan namejuan no nanquicacque ya ne yec melau tanojnotzalis de Cristo, huan no nanquicacque ne yancuic Tajtoltzin ten cualcui ne nemaquixtilis. Huan queme namejuan nantacuautamatque ya ihuan Cristo, ica ya nojón Totajtzin Dios namechteaxcatilico para xiaxcatian que nemaniconahuan. Huan nochi nijín Totajtzin Dios quichiutica ica porín in Yecticatzin Espíritu ten Yejuatzin ipa moyectencauca ya de techualtitanilis. <sup>14</sup> Huan Totajtzin Dios techmactilijtinemi in Yecticatzin Espíritu para ma ticyeajscamatican que ticselithue se cualtzin ajsicaherencia imaco Totajtzin Dios. Huan ticselisque ne nemactil tech ne tonal cuac Totajtzin Dios quintamimaquixtis ya huan mointamiauxcatilis ya nochi itaneltocacahuan. Ica ya nojón ticsenhueyimohuistilisque Totajtzin Dios ica por ichicaucahuelilis tenica techueyiyolicnelij.

### **Pablo quitajtanilía Dios que ma Yejuatzin quinmaca ne yolmajxtilis ne itaneltocacahuan**

<sup>15</sup> Huan nejua nicactinem de queniu namejuan nantacuautamatij ihuan Totecotzin Jesús. Huan no nicactinem de queniu nanquintasojtatinemij nochi in taneltocani yolchipauque. <sup>16</sup> Ica ya nojón nejua nachipa nictasojcamachilijtinemi Totajtzin Dios ica por namejuan, cuac namechelnamiqui tech ne notatatautilis inahuactzinco Dios. <sup>17</sup> Huan Dios Yejuatzin ne Tayecancatzin de Totecotzin Jesucristo. Huan no Totajtzin Dios quipía nochi ne chicaucahuelilis huan cualtziyo. Ica ya nojón nictajtanilía Totajtzin Dios que ma Yejuatzin ma namechtayocolitui ne hueyi tamachilisme ten cuicatinemi in Yecticatzin Espíritu, para ijcón nancajsicamatiasque in Tajtoltzin de Dios huan para nanquixmatisque cachi oc Totajtzin Dios. <sup>18</sup> Huan no nictajtanilijtoc Totajtzin Dios que ma Yejuatzin ma namechtahuilijtinemi namotamachilisan huan namoyolojuan para ma namejuan cachi oc xicajscamatiyacan huan xicyolicachixtiyacan ne hueyi yecajscanemaquixtilis tenica Yejuatzin namechnotzac ya. Huan no ma Yejuatzin namechyoltahuili para ma namejuan cachi oc xicajscamatican in chicaucacualtziyo de ne herencia ten Totajtzin Dios techmactilis porín tejuan tipoutinemij ihuantzin. <sup>19</sup> Huan no ma Dios namechyoltahuili para ma namejuan xicajscamatican que semi hueyi ichicahualis de Dios ten amo teyi quinejnehuilía. Huan ne chicahualis de Dios, yejua ne tequititoc tech toyolijtic, nochi tejuan ten titacuautamatij ihuan Cristo. Huan ne chicahualis de Dios, yejua ne quipía huelilis. <sup>20</sup> Huan Totajtzin Dios quinextij ne ichicaucahuelilis nican talticpac cuac Yejuatzin quipanquixtij yoltoc in Cristo Temaquixtijque intzalan ánimajme. Huan no Yejuatzin quinextij ne ichicaucahuelilis cuac Totajtzin Dios quitailito que Cristo ma yetinemij iyecmacopaca Yejuatzin campa ichicaucahuelilis tech nochi in lugares de eluiyactzinco. <sup>21</sup> Huan no Totajtzin Dios quinextij ne ichicaucahuelilis cuac Yejuatzin quitailij que Cristo ma quinyecantinemi nochi tataman

ejecame tayecanani. Huan no ma quipía Cristo tanahuatil inpan nochi ejecame tequihuani huan inpan nochi ejecame chihuanime huan inpan nochi ejecame ten tanahuatiani. Huan Cristo Temaquixtijque Yejuatzin ne cachi hueyi chiuque. Ica ya nojón Yejuatzin tayecantinemi ipan nochi ocsequin chihuanime ten yesqui nintocayuan ten axcan tequitinemi oso ocsequin chihuanime ten hualasque oc. <sup>22</sup> Huan no Totajtzin Dios quimactilij ya Cristo Temaquixtijque nochi tanahuatil para ma nochi tequihuani ten ongacque ma quitacamatican Cristo Jesús. Huan no Totajtzin Dios quitalij ya que Cristo Jesús ma yesqui in tayecanque ipan nochi ten ongac huan no ma tayecantinemi ipan nochi itaneltocacahuan. Huan ijcón Cristo Temaquixtijque Yejuatzin quinyecantinemi nochi itaneltocacahuan ijcón queme se totzontecón quiyecantinemi toomiyohuan den totacayo. <sup>23</sup> Huan tejuan tipoutinemij ihuan Cristo queme se toomiyohuan senmajsitinemi tech nochi totacayo. Huan Cristo Temaquixtijque Yejuatzin ne techyolpexontijtinemi tejuan tiitaneltocacahuan ica nochi tataman ten tejuan techpoloaj. Huan no Cristo quipexontijtinemi ica inemilis nochi ten ongac.

### Nican tajtoa de queniu Totajtzin Dios techmaquixtía ica por ne iteicnelilis

**2** Huan Totajtzin Dios Yejuatzin namechmactilij ya ne yancuicanemilis cuac Yejuatzin quipanquixtij ya yoltoc intzalan in ánimajme in Cristo Temaquixtijque. Huan ijcón quichihuac Totajtzin Dios cuac namejuan nanyolmiqueme de namotalnamiquilis ica por namotajtacol tenica nanmotajtacolmactihualajque. <sup>2</sup> Cuac nojón tonalme, ijcuacón nannentinemíaj tech in tajtacol. Huan no nanmo-huicatinemíaj ica tajtacol ijcón queme in talticpacuani quichiutinemi. Huan no nanquitacamatinemíaj ne tayecanque amocuali ejecat, ten monotza Satanás, ten axcan taquitzquijtoc ne ejecaixco huan nican talticpac. Huan ijcón ne Satanás cachi oc quinyoltequitilijtoc nochi neques ten axcan quixnamictinemij Totajtzin Dios. <sup>3</sup> Huan no ijcón tejuan tinochin tinentinemíaj ica tajtacol cuac nojón tonalme tejuan timoyolpactijtinemíaj, ijcón queme totanejnequilis de tajtacol techuicaya. Ijcuacón timohuicayaj ijcón queme tejuan totanejnequilis techtequitiltiaya. Huan no tinentinemíaj ijcón queme tejuan totamachilisuan san techyoltanemililtiayaj. Ica ya nojón technamiquía ma ticselican ne hueyi tatzacuilitis de Dios, ijcón queme monequi quiselisque nochi in talticpacuani.

<sup>4</sup> Huan Totajtzin Dios tel hueyi techyolicnelij huan no semi techyoltasojtac. <sup>5</sup> Huan masqui tejuan tiyolmictinemíaj de totalnamiquilis ica totajtacoluan tenica timotajtacolmacaque ya, pero Totajtzin Dios techpohua que techsenmactilij ya ne yancuicanemilis ihuan Cristo cuac Yejuatzin quipanquixtij Cristo yoltoc intzalan in ánimajme. Ica ya nojón ximatican que Totajtzin Dios namechmaquixtij ya sayó ica ne iteicnelilis. <sup>6</sup> Huan Totajtzin Dios techpohua que techpanquixtij tiyoltocque intzalan in ánimajme tech ne tonal cuac Yejuatzin quipanquixtij yoltoc in Cristo Temaquixtijque. Huan no Totajtzin Dios techpohua que techtalito ihuan Cristo tech in lugares de eluiyactzinco porín ihuantzin tipoutinemij ya. <sup>7</sup> Huan Totajtzin Dios quichihuac nochi nijín por tejuan para ijcón tech ne tonalme ten hualasque oc, ma tictenextilijtinemican de queniu Yejuatzin techueyitasojtac. Huan ma titenextijtinemisque de queniu Yejuatzin techyolicnelij porín tipoutinemij ihuan Cristo. <sup>8</sup> Huan ica por ne iteicnelilistzin Totajtzin Dios namechmaquixtij ya porín namejuan nantacuautamatinemij inahuactzinco Cristo. Huan namejuan amo teyica huelic nanmomaquixti-

jqe. Ta, Totajtzin Dios namechmactilij ya nijín nemaquixtilis. <sup>9</sup> Huan Totajtzin Dios amo namechmaquixtij ya ica por tensá chihualis ten namejuan nanquichiuque. Ta, Dios namechmaquixtij ya sayó porín Yejuatzin namechyolicnelij. Ica ya nojón amo aquen huelis mohueyimatis huan quiyolmachilis que yejua san huelis momaquixtis. <sup>10</sup> Huan nochi tejuan tiitachijchihualuan de Totajtzin Dios. Huan Totajtzin Dios techchijchihuac ya para ma tipoutinemican ihuan Cristo huan para ma ticchiutinemican ne cuali tatacamatilis de Dios. Huan achtopa que tiyancuicayolque ya, Totajtzin Dios ipa quitilij ya que ma ticchiutinemican nochi nijín cuali chihualisme huan tatacamatilis.

### **Totajtzin Dios moyoltalij tohuan porín Cristo quixtahuac ya totajtacoluan**

<sup>11</sup> Huan ijcón xiquelnamictiyacan namejuan de queniu nanmohuicatinemíaj ne achtopa ya, namejuan ten amo nanopoutinemij queme pueblojuani judíos. Huan namejuan amo namechnescayotijque tech namonacayo queme ne judíos quichiutinemij. Pero tejuan ten tipueblojuani judíos, tejuan technescayotijque tech tonacayo. Ica ya nojón tejuan tamechtocaytiayaj nantaca ten amo tanescayotilme ten quijtosnequi tagayot ten amo judíos. <sup>12</sup> Huan xiquelnamictiyacan que tech nojón tonalme namejuan amo nanopoutinemíaj ihuan Cristo huan amo no nanmajsitinemíaj queme nanopueblojuani de Israel. Huan namejuan amo no nanquimatíaj ne tenilil tenica Totajtzin Dios moyectencahuac ya de quichihuati, de que se tonal Totajtzin Dios cualtitanis Cristo Temaquixtijque nican talticpac. Huan namejuan nantinemíaj nican talticpac huan amo nanquichiayaj cox hualas Cristo Temaquixtijque para namechmaquixtis. Huan amo no nanquixmatía in Totajtzin Dios ten yoltica. <sup>13</sup> Pero axcan nanmajsitinemij ya ihuan Cristo Jesús, masqui namejuan ne tonalme ya nannemíaj huejca de Dios. Pero axcan Totajtzin Dios namechualtoquito ya para xipoutinemican ihuan Cristo. Huan nochi nijín quichihuac Totajtzin Dios ica por Cristo Jesús ten momiquilij huan quimimiloj niesyotzin para ijcón quixtahuas totajtacoluan.

<sup>14</sup> Huan cuac Cristo momiquilico, ijcuacán Yejuatzin quichihualtij que ma amo ongac oc ne tehuilis tenica motehuijtihualajque in taca judíos ihuan in taca ten amo judíos. Huan Cristo quinsentilij ya sansé san in pueblojuani de neques ten mopoutinemíaj judíos huan neques ten quipoutinemíaj amo judíos. Porín Cristo quihuejueloj ya ne hueyi voltahuelitalis tenica moxejxelijtinemíaj in tagayot judíos huan in tagayot ten amo judíos. <sup>15</sup> Huan cuac Cristo momiquilij tech in cruz, ijcuacán Yejuatzin quitamiltij ya ne tanahuatil de Moisés ten cualcuía míac tataman tanahuatilme huan tamachtilisme. Huan no cuac Cristo momiquilij tech in cruz, ijcuacán Yejuatzin quinsentilij ne ome pueblojme, ne ten judíos huan neques ten amo judíos. Huan ijcón Yejuatzin quichihuaco se yancuic pueblo. Ica ya nojón nochi ne ome pueblojme poutinemij sayó sansé san ihuan Cristo. Huan ijcón Yejuatzin quinyoltalico nochi ne pueblojuani ma amo moyolcualantijtinemican oc se huan ocsé. <sup>16</sup> Huan cuac momiquilij Cristo tech in cruz, ijcuacán Yejuatzin quitamiltij ne netehuilis tenica in pueblojuani judíos motahuelitztinemíaj ihuan in tagayot ten amo judíos. Huan ijcón Cristo quinsentilij ne ome taman pueblojuani ma mochihuacan sansé san pueblojuani. Huan no Cristo quichihuac que Totajtzin Dios ma moyoltali ihuan in talticpacuani, masqui yejuan tagayot judíos oso masqui tagayot ten amo judíos.



Huan Cristo Jesús quichihuac ma Totajtzin Dios ma moyoltali ihuan in talticpacuani cuac Yejuatzin momiquilij tech in cruztzin huan quinixtahuilij nochi nintajtacoluan.

<sup>17</sup> Huan cuac Cristo Temaquixtijque hualajca nican talticpac, ijcuación Yejuatzin pehuac quitetapohujitinemíaj de ne yancuic Tajtoltzin de Dios ne ten cualcui yolsehuilis. Huan ijcón Cristo techtapohuico tejuan tijudíos ten amo huejca tinentinemíaj de Dios. Huan no ica por tejuan Cristo namechtapohuito namejuan ten amo tagayot judíos huan namejuan melau huejca nannentinemíaj de Dios. <sup>18</sup> Huan ica por ne imiquilis de Cristo nochi tejuan huelis timotoquisque ihuantzin Totajtzin Dios, masqui tejuan tijudíos oso masqui namejuan amo nantagayot judíos. Huan in Yecticatzin Espíritu, Yejuatzin ne ten tequititinemi que tejuan ma timotoquitij ihuan Totajtzin Dios.

<sup>19</sup> Ica ya nojón namejuan amo nananaltecocayome oc tech se pueblo ten amo namotaaxcayan oc. Ta, axcan namejuan no nanpoutinemij ya ihuan Dios ijcón queme nochi in ocsequin itaneltocacahuan poutinemij ihuan Dios. Huan ijcón timochihuacoj tiipueblojcahuan de Dios, nochi tejuan ten tiitaneltocacahuan de Dios.

<sup>20</sup> Huan namejuan nantamatij queme yesquía se nepancl. Huan ijcón queme in tepan tzinehuac se cuali tatzinehualoni, no ijcón namejuan tzineutoc namotacuautamatilis tech ne tamachtilis ten namechnextilijque ya ne itatitaniluan de Cristo huan ne tanahuatiani de Dios. Huan Cristo Jesús Yejuatzin ne queme yesquía se tet tachicahualtijtoc ojcampa. <sup>21</sup> Huan ijcón ne tet ten tachicahualtijtoc ojcampa, yejua ne ipan quinejnepanotij ca nejmach nochi in ocsequin teme para ijcón nochi cuali ajactos. Huan tejuan como totacuautamatilis tzineutoc itech Cristo, ijcuación Yejuatzin techatequiutijtiu queme tejuan titeme para ijcón quichihuati se tamelahuac nepancl ten cualtzin chipahuac campa Totajtzin Dios yetinemis. Huan nochi tejuan tiitaneltocacahuan de Dios timochihuacoj ya se tamelahuac nepancl porín timajsitinemij ihuan Cristo Jesús. <sup>22</sup> Huan no ijcón namejuan nanmajsitinemij ihuan Cristo. Huan no ijcón namejuan nanmosentilíaj sansé san ihuan ocsequin itaneltocacahuan de Dios. Huan ijcón tinochin ticmajxitijtiyohue se tamelahuac nepancl campa Totajtzin Dios calyetoc ica ihuelilis den Yecticatzin Espíritu.

### **Totajtzin Dios quitequimactilij Pablo para ma yejua quinnojnotztinemi in tagayot ten amo judíos ica in Tajtoltzin de Dios**

**3** Huan nejua ni Pablo nechtzacque queme preso porín nitequititinemi ica por Cristo huan porín namechtaneltoctijtinemi namejuan ten amo nanjudíos. Ica ya nojón nimotatautilijtoc iixpantzinco Dios ica por namejuan. <sup>2</sup> Huan namejuan cuali nanquimatque ya que Totajtzin Dios ica iteicnelilis nechtequimactilij ya que ma nitanojnotztinemi ica in Tajtoltzin de Dios ten cualcui ne nemaquixtilis. Huan ma nitequititinemi namejuan namotzalan ten amo nanpoutinemij queme judíos. <sup>3</sup> Huan cuali nanquimatij que sayó Totajtzin Dios nechnextilij ya huan cuali nechajsicamatilij ya nijín tamachilis ten ne achtopa ya motaatijthualaya, ijcón queme namechijcuilohuilijca ya tepitzin ya. <sup>4</sup> Huan cuac namejuan nanquileeroaj nijín amat, ijcuación nancajsicamatisque que nejua cuali nicmatoc ya nijín tamachilis den tequit ten Cristo quitamichihuac ya, masqui nijín tamachtilis motaatijthuala. <sup>5</sup> Huan ne nojón ocsequin tonalme amo aquen tagat cajsicamatque de ne tequit ten Cristo quitamichihuati. Pero axcan Totajtzin Dios nochi techonmonnextilij ya ne itequiu de Cristo toixpan tejuan in yolchipauque tiitatitaniluan de Cristo; huan no quinon-

monextilij inixpan in tanahuatiani de Dios. Huan nijín quinonmonextilij sayó ica ichicahualis den Yecticatzin Espíritu. <sup>6</sup>Huan ne tamachilis de Dios yejua nijín ten motaatijihualaya, ne Tajtoltzin de Dios technextilía que in tagayot ten amo pou-tinemij queme judíos, yejuan nojonques quiselisque nemactil de nemaquixtilis ijcón queme in tagayot judíos quiselisque. Huan ica por ne Tajtoltzin de Dios, in judíos huan in tagayot ten amo judíos, nochi yejuan senpoutinemisique ihuan Cristo. Huan nochi yejuan no quiselijtiyasque ne nemactil, ijcón queme Totajtzin Dios moyectenc-ahuac ya de que Cristo cualcuis nojón nemactil. Nochi nijín mochihuaco ica por ne Tajtoltzin de Dios ten cualcui ne nemaquixtilis.

<sup>7</sup>Huan ijcón Totajtzin Dios nechtequimactij ya ma nitanojnotztinemi ica ne Tajtoltzin ten cualcuic ya Cristo. Huan ijcón quichihuac Totajtzin Dios porín nech-yolicnelij huan nechtayocolij ihuelilis para nicchiutinemis nijín tequit. <sup>8</sup>Huan ijcón Dios nechtequimactij ya ica nijín tequit, masqui nejua amo teyi nichiuque huan amo nicpixinemi chicahualis queme ne ocsequin itaneltocahuan yolchipauque de Cristo. Pero Totajtzin Dios ica ne iteicnelilis nechtequimactij ya ica nijín tequit de que nejua niqinnojnotztinemi ne tagayot ten amo judíos ica ne Tajtoltzin ten cualcui huel míc tatiochihualisme de Cristo. Huan ne tatiochihualisme de Cristo amo huelis se quinajsicapohuas. <sup>9</sup>Huan no Totajtzin Dios nechtequimactij ya que nejua ma niquinyecajscamatilti nochi tagayot de ne tamachilis de Dios ten ipa motaatijihualaya desde ne tonal ya. Huan nochi nijín mochiutoc porín sayó Yeju-atzin quichijchihuac nochi ten ongac. <sup>10</sup>Huan Totajtzin Dios quimonequiltijtoc ma ixnestiu que tinochin timochihuacoj sansé san tiipueblojcahuan de Dios. Huan no Dios quimonequiltijtoc que ma moyecajscamatican de queniu tataman mochiutoc itamachilisan de Dios nochi neques tayecanani ten tayecantinemij huan ten quipixtinemi huelilis tech in lugares de ne eluiyactzinco.

<sup>11</sup>Huan nochi nijín quichihuac Totajtzin Dios ijcón queme Yejuatzin quimonequiltij desde achtopa que tzinehuac in talticpac. Huan Yejuatzin quitalijihuitz que ma nochi nijín ma mochiutiu tech inemilipan de Cristo Jesús ten Totecotzin. <sup>12</sup>Huan tejuan titacuaumatatque ya ihuan Cristo. Ica ya nojón ticpíaj hueyi yolchic-ahualis para ijcón timotoquisque inahuactzinco Totajtzin Dios ica ne totacuaumatatilis ten ticpíaj tech Cristo. <sup>13</sup>Huan nejua axcan nitajyohuijtoc ica míc tataman tajyohuilisme porín nejua namechonnojnotztinemic ica in Tajtoltzin de Dios. Ica ya nojón, masqui nitajyohuijtoc, pero nejua namechontatautía oc que amo ximoyolc-uejuepacan tech namotacuaumatatilis. Porín nochi nijín notajyohuilisan quichihua que ma onca se hueyi cuali para namejuan.

### **Nican tajtoa de ne hueyi tetasojtalis de Cristo Temaquixtijque**

<sup>14</sup>Huan queme cualtzin Dios techtatiochihuilijtoc, ica ya nojón nimotancuaque-tzac inahuactzinco Totajtzin Dios, de Yejuatzin Itajtzin de Totecotzin Jesucristo. <sup>15</sup>Huan como ongac se naquen Tohueyitajtzin, ica ya nojón tejuan ticuij ne to-cayit de Totajtzin Dios para tiqintocaytíaj totatuan nican talticpac ijcón queme quichiuutinemi nepa eluiyactzinco. <sup>16</sup>Ica ya nojón nictajtanilía Totajtzin Dios ma namechmaca huelilis huan chicahualis tech namoyolijtic ica por ne itequiu den Yecticatzin Espíritu. Huan ne huelilis huan ne chicahualis hualeutoc de ne campa imohuiscahuelilipan de Dios campa itacualtziyojcan de Yejuatzin. <sup>17</sup>Huan ma Tota-jtzin Dios ma quichihualti que in Totecotzin Jesucristo ma calyetinemi namoyolijtic

ica por namotacuautamatilis de Cristo. Huan no Totajtzin Dios ma quichihua que namotacuautamatilis ma tzineuto tech in tetasojtalis huan ma huejcatan naluayoto tech in tetasotalis, ijcón queme se cuoutactzon monaluayocuitiu huejcatan. <sup>18</sup> Huan no nictajtanilía Totajtzin Dios que ma namechmacatiu ne ajsicahuelilis para xicyecajscamatican ne hueyi tetasojtalis de Cristo, para nancajsicamatisque de queniu mohueyisoutoc ne tetasojtalis huan de queniu mohueyiltijtoc huan de queniu huejcatan ajsis huan de queniu huejcapan ajsis ne itetasojtalis de Cristo. <sup>19</sup> Huan no namechteixpantijtoc inahuactzinco Totajtzin Dios que ma xicyecajscamatican huan xicyolmachilijtiyacan ne tetasojtalis de Cristo masqui melau amo queman huelis ticyecmatisque hasta can tantoc ne tetasojtalis de Cristo. Huan cachi oc ma namoyolijtic ma pexonto hasta ma mimilauto ica ichicahualis de Yejuatzin ten Totajtzin Dios namechmacatoc.

<sup>20-21</sup> Huan axcan ticueyimohuistilíaj Totajtzin Dios, porín Yejuatzin quipixtinemi ne chicaoahuelilis para ica quichihuas nochi ten tejuan ticontajtanilisque. Huan Yejuatzin no quipía huelis para ica quichihuas cachi oc ne ten tejuan ayamo ticnemilíaj ticontajtanilisque. Huan Totajtzin Dios quichihuati nochi ten ticontajtanilíaj ica ne ichicaoahuelilis ten axcan tequititinemi tech toyolojuan. Huan monequi ma ticueyimohuistilican Totajtzin Dios. Huan nochi in tocnihuan taneltocani ma quihueyimohuistilican Totajtzin Dios ica por ne tequit ten inpan Yejuatzin quichihuac. Huan monequi tinochin ma ticueyimohuistilican Totajtzin Dios ica por ne tequit ten Yejuatzin quichihuaco ica por Cristo Jesús. Huan ijcón ma ticchiutinemican sen nachipa huan sen nachipa. Huan ma ijcón mochihua. Amén.

#### **In Yecticatzin Espíritu techsentilijtinemi sansé san nochi tiitaneltocacahuan de Cristo**

**4** Huan nejua ni Pablo nechtzacque ya queme preso porín nitanojnotztinemi ica in Tajtoltzin de Totecotzin. Huan no namechtatautía nochi namejuan que xichipaucanemican ijcón queme quinnamiqui ma chipaucanemican neques ten Totajtzin Dios quinnotzac ya ma quitocilican Yejuatzin. <sup>2</sup> Huan melau Totajtzin Dios namechnotzac ya que xinentinemican ica ne yolyemanalis huan amo ximohueyinctinemican. Huan xiquinpialijtiu paciencia in tocnihuan taneltocani. Huan ica por ne tetasojtalis ten Yejuatzin namechmacatoc, ximoxicohuilijtiyacan ne yolxocolilis ten namechihuilíaj ocsequin. <sup>3</sup> Huan ximofuerzajuican de que nachipa ximohuicatinemican se huan ocsé ica sansé san yoltamachilis. Huan no in Yecticatzin Espíritu namechpalehuijtiu para nachipa xicpixinemican ne yolsehulis se huan ocsé. <sup>4</sup> Huan nochi tejuan ten tiitaneltocacahuan de Cristo, tisenpoutinemij sansé san. Huan no ongac sayó se Yecticatzin Espíritu. Huan no ongac sayó se Temaquixtijque ten ticyolicachixtocque ma mohualucas. Huan Totajtzin Dios techijitac ya huan technotzac ya para ma ticyolicachixtocan ne Temaquixtijque ma mohualcuepas. <sup>5</sup> Huan ongac sayó se Totecotzin; huan no ongac sayó se tacuautamatilis ten yec melahuac. Huan no ongac sayó se taahuilis. <sup>6</sup> Huan no ongac sayó se Dios huan nijín Yejuatzin in Totajtzin de nochi in taneltocani. Huan Totajtzin Dios momasoutoc topan tinochinme. Huan Totajtzin Dios tequititinemi totzalan tinochin. Huan no Totajtzin Dios yetinemi tech toyolijtic tinochin tiitaneltocacahuan.

<sup>7</sup> Huan masqui tisenpohuij, pero Totajtzin Dios techmajmactilijtoc cada senme de tejuan sejsé huelilis ijcón queme Totecotzin Jesús quixejeco ma ticpixinemican nijín huelilis. <sup>8</sup> Ica ya nojón quijsa in Tajcuilolamatzin ijsuín:

Cristo tejcoc ya ne eluiyactzinco huan quinuiyac nochi neques taneltocani ánimajme ten olochetoyaj quichixtoyaj Cristo.

Huan ijcón Cristo quinmajmactilij huelilisme ne tagayot taneltocani de nican talticpac.

<sup>9</sup> Huan nijín tajtol de que Cristo tejcoc ya hasta ne eluiyactzinco, yejua nojón quijsonequi que Cristo ocho temoc ya hasta ne huejcatan de nican talticpac campa tzactocque in ánimajme. <sup>10</sup> Huan in Cristo ten temoc, Yejuatzin ne in mismo Cristo ten ocsepa tejcoc hasta nepa campa cachi huejcapan de nijín eluiyac. Huan ijcón quisohuaco Cristo nichicaucahuelilis nohuiyan nican talticpac huan nohuiyan nepa eluiyactzinco.

<sup>11</sup> Huan Cristo techmajmactilij huelilis cada senme de tejuan. Huan ijcón sequin taneltocani quiselijque ya huelilis para tequitinemi queme tatitanilme de Cristo. Huan Cristo quinmactilij ocsequin tocnihuan in huelilis para quiselijtyasque tanahuatilme ten hualeutoc imacotzinco Dios. Huan ocsequin taneltocani quiselijtyasque huelilis para tanojnotztinemisque ica ne tajtolis ten cualcui ne nemaquixtilis. Huan ocsequin taneltocani quiselijtyasque huelilisme para quinyecantinemi huan quinmactiltinemi in taneltocani. <sup>12</sup> Huan Totajtzin Dios quinmajmactilij nijín huelilisme para ijcón huelis moyolmajxitisque cachi oc nochi itequitichuan de Cristo. Huan cuac yejuan moyolmajxitojtosque ya, ijsuacón yejuan ma quinyolmajxitijtyacan cachi oc ocsequin taneltocani. Huan ijcón nochi in taneltocani ten poutinemij ihuan Cristo, yejuan nojonques ma ajsicatacuaautomatican ihuan Cristo. <sup>13</sup> Huan Totajtzin Dios quimonequiltía que cachi tejuan ma timoyolmajxitican para ijcón ma tisenntinemican, huan no para ma tisentacuaautomatican ihuan Cristo, huan ijcón ticonyecajsicaixmatisque Iconetzin. Huan como ijcón timochihuatij, ijsuacón timoyolmajxititij huan ticyecmatitihue ya in chipaucanemilis de Cristo ijcón queme Yejuatzin quichiutinemic nican talticpac. <sup>14</sup> Huan ma amo tinentinemican queme se yancuic taneltocacque ten ayamo yec yolmajsitinemi ica itacuautomatican. Porín neques ten ayamo yolmajsj, yejuan nojonques motecahuilfaj que ma quinuiyacan tech miac tataman tamachilisme de tacajcayahualis, ijcón queme in ixihuiyo den cuohuit cuitiquisa huan quipatanaltía in eجات. Huan ijcón in yancuic taneltocani mohuetziltía tech nintacajcayahualis de ne tamachtiani ten tanextilijtinemij ica hueyi tacajcayahualis sayó para quinucasque in tacaquini tech in tajtacolojpan ten tecuatapololtía. <sup>15</sup> Ta, namechiltía cachi cuali ma titanojnotztinemican ica ne melahuac Tajtoltzin de Dios. Pero nochi nijín ma ticchiutiyacan ica ne yoltetasojtalis. Huan ijcón timoyolmajxitisque huan tiyecmajsitinemisque ihuan Cristo Jesús porín Yejuatzin totayecancau huan techyecantinemi ijcón queme techyecantinemi totzontecon. <sup>16</sup> Huan tejuan tiitaneltocacahuan de Cristo huan tipoutinemij ihuan Cristo ijcón queme nochi toomiyohuan poutinemij ihuan totacayo. Huan nochi toomiyohuan cuali sasaliutoc huan ijcón cuali sentequititinemij huan mosenpajpalehuijtinemij tech tonacayo. Huan no ijcón mochiutinemi totech nochi tejuan ten titaneltocani. Huan tisenpoutinemij huan tisenquititinemij huan ma timospaenpalehuijtinemican ihuan Cristo. Huan cada senme de tejuan

timotequitiltijtinemij ijcón queme Dios techmactilij ya huelilis. Ica ya nojón nochi tejuan timoyolmajxititihue ica totacuautamatilis huan timosenpantasojtatiyohue.

**Nican tajtoa de que tejuan ticpixinemij se yancuic  
nemilis porín tipoutinemij ihuan Cristo**

<sup>17</sup> Huan namechilía huan namechtequimactilía ica ichicahualis den itocaytzin de Totecotzin Cristo ijcuín: Ma amo cachi oc xinentinemican queme neques ten amo quixmatij Totajtzin Dios, porín yejuan sayó nentinemij tech nintanejnequilis ten sayó nencajtí san. <sup>18</sup> Porín yejuan amo quipixtinemij ne chipaucanemilis ten hualeutoc de Dios. Ta, yejuan nintamachilis cachi oc tequititoc oc tech ne tayohuayanilot ten cuica tajtacol. Huan yejuan amo quixmatij quenin tamati Dios porín moyolchicautinemij cachi oc tech in tajtacol. <sup>19</sup> Huan neques ten amo quixmatij Dios, yejuan nojonques amo quimachilíaj oc in pinahualis den motajtacolmacatinemij. Ica ya nojón yejuan motemactijque ca nochi nintanejnequilis ma mocalaquican tech míac tataman ten amocuali tachihualisme. Huan yejuan sayó quiyolnejnequij de mopit-zotilijtinemisque tech nintacayo ica ne ahuilnemilis. <sup>20</sup> Pero Totecotzin Jesucristo Yejuatzin amo ijcón namechmachtico que xinentinemican tech in tajtacol. <sup>21</sup> Huan cuali nicmati que melau namejuan nanquicaquilijque ya itamachtilisuan de Cristo. Huan no cuali nicmati que melau namejuan namechmactijque ya in melahuac Tajtoltzin de Dios ijcón queme tamachtijtinemic in Cristo Temaquixtijque. <sup>22</sup> Huan axcan ximoquixtilijtiyacan ne namosoltictalnamiqulil de tajtacol huan xicsecocautiyacan ne pitzotic nemilis ten nancualcuitihualayaj ne achtopa ya. Porín ne soltic talnamiqulil, yejua ne quichicahualtía ne namotanejnequilis ten quimajmautihuitz ya ica tajtacol. Huan namejuan ipa nannentinemíaj tech in tajtacol porín nanmoca-jcayautihuitze ica namotanejnequilis ten amocuali. <sup>23</sup> Huan namejuan monequi ximoyancuicatalijtiyacan ica cuali tech namoyolojuan huan tech namotanemililisan. <sup>24</sup> Huan ximotaquentijtiyacan ica ne yancuicatalnamiqulil ten Dios quitalij moyolitit cuac namechyancuicayolitij ya. Porín ne yancuic talnamiqulil quinejnehuilía Dios iyolchihualis. Huan ica ne yancuic talnamiqulil xicnextijtiyacan ne chipaucanemilis ica nochi ne yolchihualis.

<sup>25</sup> Ica ya nojón xicsecocautiyacan nochi tataman xolopijyot. Huan axcan mon-equi xitajtojtinemican sayó ica ten melau ihuan nochi namochanchuan porín nochi tejuan tisenpoutinemij huan tisenmajsitinemij ihuan Cristo Jesús. <sup>26</sup> Huan como nanyolcualanij, ijcuacón amo ximotajtacolmacacan. Huan namocualanyo ma amo xicpixinemican nochi se tonal hasta pancalaquis in tonaltzin. <sup>27</sup> Huan no namechilía que amo xictacahuilican in amocuali Satanás ma tequititinemi ica por namocualanyo. <sup>28</sup> Huan naquen tachtectinemía, yejua ne ma quicautiu ya nitachte-quilis. Huan cachi cuali ma motequitilti ca imahuan tech se cuali tequit para ijcón huelis quinpalehuis ocsequin ten quipolojtinemij ten cuasque.

<sup>29</sup> Huan ma amo xicxenpanhuetztocan se tajtol ten pitzotic huan ten nencajtí san. Ta, xictequitiltican namonenepil ica sayó ten cuali para ijcón cachi oc nanquinyol-majxitisque in tacaquini huan para no nanquintiochihuasque ne naquen namech-caquilijtinemisque. <sup>30</sup> Huan amo xictayocoltican in Yecticatzin Espíritu ten Dios namechmactilij ya ma yetica namoyolitit. Porín Totajtzin Dios namechtayocolij in Yecticatzin Espíritu huan ijcón namechnescayotij ya para ixnestinemi ya que name-

juan nanpoutinemij ihuan Dios hasta in tonal cuac Dios namechtamimaquixtiquiu ya.

<sup>31</sup> Huan no namechilía que ximosecocautiyacan de nochi ne yolchichicayot huan ne yolcualanilis huan ne tahuelot. Huan no ximosecocautiyacan de ne mohuispololis huan ne huijuicaltilis huan nochi ten míac tataman tajtolme ten teyolxocolía. <sup>32</sup> Ta, namechilía que ximopalehuican ica tetasojtalis se huan ocsé. Huan xiquinicnelican se huan ocsé. Huan no ximotapojpoluican se huan ocsé ijcón queme Totajtzin Dios namechtapojpoluilij ya namotajtoluan porín nanpoutinemij ihuan Cristo.

### Monequi xichipaucanemican porín namejuan nanteconejuan de Dios

**5** Huan Totajtzin Dios semi namechyoltasojta porín naniconejuan ya. Ica ya nojón monequi xiyolchipauque ijcón queme Yejuatzin yolchipahuac. <sup>2</sup> Huan ma timoyoltasojtatinemican se huan ocsé ijcón queme Cristo Jesús techyoltasojtatinemi. Porín Yejuatzin quitenextij itetasojtalis cuac motemactij ma quimictican por tejuan totajtacoluan. Huan momiquilij Cristo ijcón queme miquic se ichcatzin cuac quimictijque para quimohuistilisque Dios. Huan cuac Cristo Jesús momiquilij huan quixtahuac totajtacoluan, ijcuacón Yejuatzin mochihuaco queme se temactil ten quiyolpactij Dios.

<sup>3</sup> Huan queme namejuan nanpoutinemij ihuan Dios, amo namechnamiqui oc de nanmonojnotzasque de nojón ahuilnemilis huan de ne nemilis ten temajmahua ica tajtacol. Huan amo no xiquelnamictinemican de ne xixxicuinyot. <sup>4</sup> Huan amo xitajtojtinemican ca nojón tajtolme ten tepinautíaj. Huan amo no xielihuistajtojtinemican huan amo no xicamanalojtinemican ica in pitzotic tajtolme. Porín nochi nijín tatanman tajtolis amo namechnamiqui namejuan de xicchiutinemican. Ta, cachi cuali xictasojamachilijtiyacan Totajtzin Dios ica nochi namotajtoluan. <sup>5</sup> Huan namejuan cuali xicmatocan ya nijín: nochi neques ten cuicatinemij se nemilis ten momautoc ica tajtacol, yejuan nojonques amo no calaquitihue tech ne chipaucanemilis de que Dios quinyolyecantinemi ica ichicahualis. Huan no namechilía como acsá namicuani ya huan ocsepa mocalaquijtinemij ihuan ocsé namicuani, ijcuacón yejuan amo huelis pohuitihue tech ne yancuicanemilis de que Totajtzin Dios huan Totecotzin Cristo quinyolyecantinemi ica ihueyihuelilis. Huan neques ten quinejnectinemij san den teaxca san, yejuan nojonques amo no calaquitihue tech ne tatacamatanemilis de que Dios quinyolyecantinemi. Porín nijín ne xixxicuinyot, yejua ne quinejnehuilía ijcón queme cuac se quinmohuistilía tatadiosme.

<sup>6</sup> Huan ma amo aquen namechylcajyahua ica tajtolme ten nencajtíc san. Porín xicmatican que ne chichahuac tatzacuultilis de Dios huetziquiu ipan nochi tagayot ten amo quitacamatinemij Totajtzin Dios, porín yejuan sayó mohuelitztinemij tech nochi tatanman pitzotic nemilis. <sup>7</sup> Ica ya nojón namechnajnahuatía que amo ximohuicatinemican inuan neques ten sayó quichiutinemij tajtacol. <sup>8</sup> Huan namejuan ne achtopa ya nannentinemíaj tech ne tayohuayanilot ten cuica in tajtacol. Pero axcan namejuan nanmajsitinemij ihuan Totecotzin Cristo huan nannentinemij ica ne Tajtoltzin de Dios ten tatanextía. Ica ya nojón namejuan xiyechipaucanemican porín nanpoutinemij ya tech in Tajtoltzin de Dios ten sayó tatanextía. <sup>9</sup> Huan ica por ne tanextzin de Dios in Yecticatzin Espíritu quichiutinemi namoyolijtic ma onca sayó ten cuali, huan ma onca sayó ten melahuac, huan ma onca sayó ne chipaucanemilis.

<sup>10</sup>Huan ximofuerzajuican de ximomachtican de ne chipaucanemilis tenica ticy-olpactíaj Totecotzin Cristo. <sup>11</sup>Huan amo ihuan xicmanelojtinemican ne chihualisme ten sayó nencajti san, ten quichiutinemij neques ten nentinemij tech ne tay-ohuayanilot de tajtacol. Ta, cachi cuali namejuan xiquintenexilican ica in tanextzin de Tajtoltzin de Dios que amo teyi cualtíaj ne chihualisme ten cuicaj tajtacol. <sup>12</sup>Porín tepinautía cuac tejuan ticteneutinemisque chihualisme ten cuicaj tajtacol ten quich-tacachiutinemij neques ten amo taneltocani de Dios. <sup>13</sup>Pero cuac Totajtzin Dios quintenextía ica Itajtoltzin nochi ne chihualisme ten cualcuij tajtacol, ijcuacón nojón chihualisme moyecnexitiquij que semi temajmahuaj ica tajtacol. Porín in tanextzin de Tajtoltzin de Dios quiyectenextía ya que nochi hualeutoc imaco in amocuali Satanás.

<sup>14</sup>Ica ya nojón tiquijtoaj ijcuín:

Tejua queme yesquía ticochtinemi, nimitzilía que xiixpetani, tejua, huan niman ximoajocui intzalan neques ten yolmictinemij tech in tajtacol.

Huan ijcón Cristo mitzyoltahuilis ica Itajtoltzin.

<sup>15</sup>Ica ya nojón namechilía que monequi ximoyoltatemolican ca nejmach de namochipaucanemilis. Huan amo xinentinemican queme neques yolmijmiquilome ten amo moyolnemilijtinemij de ne ninyalis. Ta, namejuan xinentinemican queme nancuatamatcanemini ica Itajtoltzin de Dios. <sup>16</sup>Huan no namechilía que amo xicahuilojtiyacan san in tonalme. Ta, xitequititiyacan cada tonal ca nejmach. Porín nijín tonalme campa tinentinemij, yejuan nojonques cachi oc momajxitijtiu ica taj-tacol. <sup>17</sup>Huan amo ximomijmiquilojquetztinemican san. Ta, ximomachtijtinemican de queniu cachi oc huelis nancajsicatacamatisque ne chipaucanemilis ten Totecotzin Cristo quimonequiltía que xicchihuacan. <sup>18</sup>Huan no namechilía que amo ximohuini-tijtinemican porín nijín tahananalis namechuicas sayó tech in ne xipolihuilis. Ta, cachi cuali monequi xiyolpexontinemican ica in Yecticatzin Espíritu. <sup>19</sup>Huan ximonojnotztinemican se huan ocsé ica salmos huan ica himnos huan ica cantos ten namechmactilía in Yecticatzin Espíritu. Huan ica namocanto ximohuistilijtiyacan in Totecotzin Cristo ica nochi namotalnamiquilis. <sup>20</sup>Huan no cachi oc xictasojca-machilijtiyacan in Totajtzin Dios ica por nochi ten Yejuatzin namechseliltijtiu ica in chichualis den tocatzín Totecotzin Jesucristo.

### **Nican tajtoa de queniu ximopialijtiyacan mohuisyot se huan ocsé de namochancahuan**

<sup>21</sup>Huan no namechilía que ximohuiscapohuacan se huan ocsé de namejuan nanchanyetoni, porín namejuan nanquimohuistilijtinemij Totecotzin Jesucristo. <sup>22</sup>Huan namejuan, tesihuahuan, monequi ximotecahuilican ma namechyecanacan namoyoquichuan, ijcón queme namotecahuilíaj ma namechyecana Totecotzin Cristo. <sup>23</sup>Porín teyoquich ma quiyecantinemi isihuau ijcón queme Cristo quinyecantinemi itaneltocacahuan. Huan nochi tejuan tiitaneltocacahuan de Cristo tisepanpoutinemij ihuan Yejuatzin porín Yejuatzin Totemaquixitijcatzin ijcón queme nochi toomiyohuan sepan majsitinemij tech tonacayo. <sup>24</sup>Huan cuali ticmatij que nochi itaneltocacahuan de Cristo, yejuan nojonques motecahuilijtinemij ma quinyecana Totecotzin Cristo. No ijcón monequi que in tesihuahuan ma motecahuilican ma quinyecanacan ninyoquichuan tech nochi ninnemilipan. <sup>25</sup>Huan namejuan nanteyoquichuan, monequi xiquintasojtatiyacan namosihuahuan ijcón queme

Totecotzin Cristo quinyoltasojta itaneltocacahuan. Huan Cristo Jesús quintelta-sojtac nochi itaneltocacahuan hasta motemactij ma quimictican para quixtahuas den nintajtacoluan itaneltocacahuan. <sup>26</sup> Huan ijcón quichihuac Cristo para quintamiyolchijchipahuilij itaneltocacahuan de nochi nintajtacoluan. Huan Cristo techyolchipahuac ya ica in Itajtoltzin de Dios. Huan tejuan titenextijtjinemij que tiyolchipauque ya cuac timotecahuilíaj ma techahuican ca at. <sup>27</sup> Huan Cristo techyeyolchipahuac para ijcón techtenextito iixpantzinco Totajtzin Dios que tejuan titaneltocacahuan ma timocualnextican queme Cristo. Huan ma amo ticpixtiyacan nojón tzojcuiloltilis den tajtacol. Ta, ma timochihuacan tiyolchipauque queme se istac tilma ten amo tzojcuilic huan nión ma taquejquelopachol elihuis. Huan ijcón tiyectamatosque queme Cristo huan amo teyi techpolojtiyás oc de ne yolchipahualis.

<sup>28</sup> Huan no ijcón monequi que in teyoquichuan ma quintasojtatinemican ninsihuahuan ica ne tetasojtalis tenica cada se teyoquich mopialitinemi huan motasojtatinemi. Porín ne teyoquich ten quitasojtatinemi isihuatzin, yejua nojón no mopialitinemi huan motasojtatinemi yejua san mismo. <sup>29</sup> Huan amo aquen quitahuelitztinemi de yejua itacayo san. Ta, cada se tagat motasojtatinemi cuac motequipanoa huan moyecpía. Huan no ijcón Totecotzin Cristo quichiutinemi porín Yejuatzin techtasojtatinemi huan techyecpixinemi nochi tejuan tiitaneltocacahuan. <sup>30</sup> Huan Cristo ijcón quichiutinemi totech porín nochi tejuan tiitaneltocacahuan de Cristo tipoutinemij ihuatzin ijcón queme nochi toomiyohuan poutinemij ihuan tonacayo. <sup>31</sup> Ica ya nojón in Tajtoltzin de Dios quijtoa ijcuín: “Que in tagat ma quincahuas nitat huan ninan para ijcón mosentilis ihuan isihuau huan ijcón yejuan in ome mochihuaquij sansé ya iixpantzinco Totajtzin Dios”. <sup>32</sup> Huan nijín tajtolis de se namicuani semi hueyi tamachilis ten ne achtopa motaatijtihualaya. Porín amo aquen moajsicamatiltij que se namicuani yejua ne se nexcuitil de Cristo ihuan itaneltocacahuan. Huan amo no aquen moajsicamatilij de queniu itaneltocacahuan de Cristo poutinemij ihuan Totecotzin Jesucristo. <sup>33</sup> Pero ocsepa namechilía que cada se teyoquich monequi quitasojtas isihuau ijcón queme in teyoquich mopialitinemi yejua mismo ica ne yec tetasojtalis. Ica ya nojón cada se tesihuau monequi ma momohuiscahuica ihuan iyoquich.

**6** Namejuan ten nanconetzitzin, monequi xiquintacamatiyacan namotatuan para ma ijcón ixnestiyás que nantacautamatij ihuan Totecotzin porín ijcón namech-namiqui xicchiutinemican. <sup>2-3</sup> Huan in tanahuatil de Dios quijtoa ijcuín: “Xicmo-huistilijti motajtzin huan monantzin, para ijcón tiyolpactinemis huan ijcón tinentinemis míac xihuit nican talticpac”. Huan nijín ocho tanahuatil techyequilía que ticselijtiyasque itatocihualis de Dios, como tictacamatinemisque.

<sup>4</sup> Huan namejuan nantetatme, amo xiquinyolcualantican namoconehuan cuac nanquinequij nanquinmejmelaahuasque. Ta, cachi cuali xiquinmachtijtiyacan huan xiquinmelautiyacan ica mohuisyot. Huan como ijcón nanquichihuasque, ijcuacán nanquitacamatiyasque namoconehuan ma tacautamatiyacan de Totecotzin Jesucristo.

<sup>5</sup> Namejuan nantaquehualme, xiquintacamatinemican ica nejmach namopatrones de nican talticpac. Huan xiquinpialijtiyacan mohuisyot. Huan ximotequitiltijtjinemican por yejuan ica nochi namoyolojuan queme yesquía nanmotequitiltijtjinemij para Cristo. <sup>6</sup> Huan namejuan xiquintequitilican namopatrones amo sayó cuac yejuan namechitztocque para cachi oc nanquiyolpactíaj. Ta, cachi cuali xiquintequitili-



can namopatrones ica nochi namotalnamiquilis porín nanitequiticahuan de Cristo. Huan ijcón melau nanquichiutinemisque ten Dios quimonequiltía. <sup>7</sup>Xiquintequitilican namopatrones ica cuali tanejnequilis. Huan xiquintequitilican namopatrones queme yesquía nanquitequitilíaj Cristo, huan amo sayó talticpactaca san. <sup>8</sup>Porín namejuan cuali nanquimatinemij que se tocníu taneltocacque de Cristo quiselis tetayocolil imacotzínco Totecotzín Cristo, ijcón queme yejua motequitiltij ica ten cuali. Huan cada se taneltocacque ten cuali tequitique, yejua ne quiselis ne tetayocolil masqui yejua taquehual tanamac oso masqui taquehual ten amo tanamac.

<sup>9</sup>Huan namejuan ten nanpatrones, monequí xiquinpialican mohuisyot ne noma-taquehualuan. Huan amo xiquinmoutican para nanquinchihualtisque ma cachi oc motequitiltican. Porín cuali xiquelnamiquican namejuan que nochi namejuan nanpatrones huan nantaquehualme, nochi namejuan nanquixixicotijasque nochi ne Namotecotzín. Huan nijín Yejuatzín in Cristo ten yetica ne eluiyactzínco. Huan namejuan no cuali nanquimatij que Yejuatzín amo quinchichicotasojtatiu in talticpacuani cuac quinxcomacas. Ta, Yejuatzín quinsentasojta nochi in talticpacuani masqui patrones oso taquehualme.

### **Nican tajtoa de manamicme ten in Yecticatztin Espíritu techmactilía tejuan titaneltocani de Cristo**

<sup>10</sup>Huan axcan namechilía, nannotasojcnihuan, ximoyolchicahuacan huan ximoyolpexontican ica ne chicaucahuelilis den Totecotzín porín namejuan ihuantzín Cristo nanpoutinemij. <sup>11</sup>Huan ximotaquentican ica ne taquen ten Dios namechmactilía. Huan ximomaaquican nochi ne manamicme ten Dios namechmactilía para ijcón huelis nanquixixicotijasque nochi ne tacajcayahualis ten namechchihuiljtinemi in amocuali Satanás. <sup>12</sup>Porín tejuan titaneltocani amo timotehuijtinemij ihuan talticpacuani san. Ta, tejuan timotehuijtinemij ihuan ne amocuali tayecanani huan ihuan ne amocuali chihuanime. Huan no timotehuijtinemij ihuan ne amocuali tanahuatiani den taquitziqijtocque nican talticpac campa sayó ongac tayohuayanilot, porín momautoc de tajtacol. Huan no tejuan titaneltocani timotehuijtinemij ihuan nochi amocuali chicaucaejecame ten taquitziqijtocque tech nochi in lugares de eluiyactzínco.

<sup>13</sup>Ica ya nojón monequí ximoaxcatilican nochi ne manamicme ten Dios techmaca para ijcón huelis nanquixixicosque cuac in tonal namechtajyohuiltis in amocuali Satanás. Huan cuac nanquitamixixicosque ya den amocuali Satanás, ijcuacón nanmochaasque ya nantatanini ya, porín nanquixitopeque ya in amocuali Satanás. <sup>14</sup>Amo xiccholohuilican in amocuali Satanás. Ta, xicyecyetocan. Huan nicnequí namechmachtis ica se nexcuitil ijcuín: Ma timoquemiloltican ica in melahuac Tajtoltzín de Dios ijcón queme se soldado cuac yequin motajcoilpía ica ne cuetax tenica para mopalehuis tech ne netehuilis. Huan no ma timoquemiloltican ne yolchipahualis de Cristo, ijcón queme se soldado cuac yequin motaquentía ica se tepos camisa ten monotza coraza, tenica mopalehuía campa nielpa tech ne netehuilis. <sup>15</sup>Huan no ma timoquemiloltican ne cuali Tajtoltzín de Dios ten cualcui ne yolsehuilis ihuan Dios. Porín cuac ijcón ticchihuj, ijcuacón queme yesquía timotalilíaj tegacme tenica in soldado mopalehuijtinemi tech ne netehuilis. <sup>16</sup>Huan ma timoquemiloltican ne hueyi tacuautamatilis de Cristo. Huan ijcón cuali huelis ticxixicojtijasque nochi tataman cuejmololis tenica in Satanás quinequí techyolxocolis. Porín yejua ne to-

tacuautamatis que me yesquía se tepos yohualtic ten monotza escudo, tenica in soldado mopalehuía tech ne netehuilis. <sup>17</sup> Huan no ma timoquemiloltican ica in Tajtoltzin de Dios de que Cristo Jesús techtamimaquixtis. Huan cuac ijcón ticchihua, ijcuacón timocuatalilí se tepos sombrero tenica in soldado mopalehuía tech netehuilis. Huan no ma timoquemiloltican huan ma timoaxcatilican nochi in Tajtoltzin de Dios. Porín ne Tajtoltzin que me yesquía se machete ten techmactilía in Yecticatzin Espíritu para ica timopalehuijtinemis que tech netehuilis ihuan in amocuali Satanás. <sup>18</sup> Huan no ximotatautilican ihuan Dios yohualitonal huan xictajtanican Dios huan no ximoteixpantican inahuactzinco Totajtzin Dios ica ne ichichualis ten namehmactilijti in Yecticatzin Espíritu. Huan xiixpetantocan tech namotamachilisuan huan amo ximoyojyolcuepacan para ijcón huelis nanmotatautilisque ihuan Dios. Huan no xictajtanilican Dios ne tapalehuilis para nochi ne taneltocani ten poutinemij ihuan Totajtzin Dios. <sup>19</sup> Huan no namechonilía ximotatautilican ihuan Totajtzin Dios ica por nejuatzin in Pablo para ma Dios nechmacatiu tajtolme cuac nejua nitanojnotztinemi ica in Tajtoltzin de Dios. Huan no ma Dios nechmacatiu ne yolchichualis para cachi niquinmejmela huilis in tacaquini ica in cuali Tajtoltzin de Dios ten cualcui ne nemaquixtilis, ne Tajtoltzin ten achtopa ya motaati-jtihualaya tech in tanahuatilme den ne huejcautanahuatiani. <sup>20</sup> Huan Totajtzin Dios nechijitac para nitanojnotztinemi itencopaca Yejuatzin ica nijín Itajtoltzin ten cualcui ne nemaquixtilis. Huan ica por notanojnotzalis axcan nechtzacuacque que me nipreso. Ica ya nojón ximotatautilican por nejua para ma nitetapohuijtinemi ica yolchichualis de nijín Tajtoltzin de Dios ijcón que me Dios quimonequiltía ma nicchihua.

### **Nican Pablo quintajpaloa sequin tocnihuan taneltocani**

<sup>21</sup> Huan in Tíquico, yejua ne totasojicniztin huan se cuali tequitique ten motequitilijtinemi ica por Totecotzin Cristo. Huan ne Tíquico namechtapohuiti de nejua huan no namechmatiltiti de nochi notequi ten nicchiutinemi. <sup>22</sup> Ica ya nojón ne Tíquico namechtitanilía para ma yejua namechyequili de queni titequitinemi para ijcón cachi oc namechyolmajxitis. <sup>23</sup> Huan namejuan nantocnihuan, xicselican ne yolsehuilis. Huan no xicselican ne yoltetasojtalis ten cualcui tacuautamatis. Nochi nijín xicselijtiyacan imaco Totajtzin Dios huan imaco Totecotzin Jesucristo. <sup>24</sup> Huan Dios ma namechyolicnelijti nochi namejuan ten nanquitasojtatinemij Totecotzin Jesucristo ica ne yoltetasojtalis ten amo queman cuetahuís. Amén.

## IN TAJCUILOLAMATZIN TEN QUITAJCUILOHUILIJ IN TATITANIL SAN PABLO PARA IN TANELTOCANI DE CRISTO TEN CALYETOCQUE CAMPA PUEBLO DE FILIPOS

### Nican Pablo quintajcuilohuilía in tocnihuan taneltocani campa pueblo Filipos desde Roma campá yetoc preso

**1** Nejua ni Pablo huan Timoteo tiitequiticahuan de Jesucristo. Ica ya nojón tamej chontajpaloaj namejuan nanyolchipauque nantaneltocani ten nanpoutinemij ihuan Cristo Jesús ten nancalyetocque campá pueblo Filipos. Huan no tiquintajpaloaj in tiopantayecanani obispos huan in tiopantapalehuiani diáconos ten namohuan tequititinemij. <sup>2</sup>Huan xicpixtiyacan namejuan ne teicnelilis huan ne yolsehuilis ten hualeutoc inahuac Totajtzin Dios huan inahuac Totecotzin Jesucristo.

### Pablo motatautilía ica por ne taneltocani de Filipos

<sup>3</sup>Huan nachipa cuac namechelnamiqui de namejuan namotacuautamatilis, ijcuacón nictasojcamachilía Notajtzin Dios. <sup>4</sup>Huan nachipa cuac nimotatautilía ihuan Dios, ijcuacón namechonteixpantía inahuactzinco Totajtzin Dios ica hueyi yolpaquilis. <sup>5</sup>Huan niyolpaqui porín desde ne achtopa ya huan hasta axcan tisentequititinemij huan tisentanotztinেমij ica in Tajtoltzin de Dios ten cualcui ne nemaquixtilis. <sup>6</sup>Huan nicyecmati que Totajtzin Dios quipehualtij ya namotech nitequiu de namechmaquixtis. Huan no nicmati que Yejuatzin quisentocatos huan namechtamiyolmajxitijtiyás de namotacuautamatilis hasta ne tonal cuac hual mocuepas ya Totecotzin Jesucristo nican talticpac.

<sup>7</sup>Huan ijcón semi quinamiqui que nejua ma nicyolmachilijtoc de namejuan porín semi namechyoltasojta. Huan no namechyoltasojta porín namejuan nanquiselijtocque ne tatiochihualis de Dios, ijcón queme nejua nicselijtoc. Huan nannechpalehuijtocque masqui nican niyetoc nipreso. Huan no nannechpalehuijtinemij masqui niyetoc inixpan in tequihuani campá niquintajtoltehuiaya huan niquinnextilía huan niquintaneltoctía den Tajtoltzin de Dios ten cualcui ne nemaquixtilis. <sup>8</sup>Porín Totajtzin Dios cuali nechyoliztoc de queniu nejua namechyoltasojta ica ne tetasojtalis de Cristo Jesús ten cuica teicnelilis.

<sup>9</sup>Huan ica ne notatautilis namechteixpantía inahuactzinco Totajtzin Dios que ne namotetasojtalis ma ojcahi oc ma mohueyiltijtiu. Huan ne chipahuac tetasojtalis, ma cualcui yoltanemililis de Dios para nanquiselijtiyasque cuali taixejecolis. <sup>10</sup>Huan ica por ne tetasojtalis de Dios xicpiacan ne cuali taixejecolis para huelis nanquijitasque sayó nochi tamachilis ten cuali. Huan no ica por ne tetasojtalis namejuan nanchipaucanemisque huan amo aquen huelis namechteluilisque ica tajtacol tech ne tonal cuac mohualuicas Cristo. <sup>11</sup>Huan no nictajtanilijtoc Dios que ma namejuan xicpixtinemican ne cuali chipaucanemilis ica por Jesucristo naquen namechpalehuijtiyás. Huan ica namochipaucanemilis nanquihueyicualnextíaj huan no nanquihueyimohuistilíaj Totajtzin Dios.

### Nican tajtoa de queniu inemilis de Pablo poutoc imaco Cristo

<sup>12</sup> Huan nicnequi, nocnihuan, xicmatican que masqui nopan mochiutoc m'ac ohuicayot, pero ica nij'n tajyohuilis cachi oc nicp'á huelilis para niquinnojnnotzas tagayot de ne Tajtoltzin de Dios ten cualcui ne nemaquixtilis. Huan ij'cón in Tajtoltzin de Dios cachi oc momoyahuas nohuiyampa. <sup>13</sup> Huan ica por nij'n notajyohuilis nochi in soldados ten calyetocque nican huan nochi in ocsequin tagayot de nicahuín, nochi yejuan cuali quimatocque que nechtzacuacque ya porín nitaneltocatinemi de Cristo. <sup>14</sup> Huan miacque tocnihuan taneltocani nechitztinemij que nitajyohuijtoc queme preso. Ica ya nojón yejuan moyolchicahualtijque ica por Cristo ihuelilis. Huan yejuan peuque cachi oc tanojnotztinemis que ica in Tajtoltzin de Dios. Huan yejuan tamachtijtinemij senteixteno, pero amo ica moucayot.

<sup>15</sup> Huan hueyi melau que sequin taneltocani tanextilijtinemij de Cristo porín nechylolnexcil'aj huan porín quinequij nechtajtoltatanisque san. Pero ocsequin taneltocani tamachtijtinemij de Cristo ica ne chipahuac tanejnequilis. <sup>16</sup> Huan nijinques taneltocani tanojnotztinemij ica in Tajtoltzin de Dios porín yejuan quip'aj ne yec tetasojtalis. Huan yejuan cuali quimatinemij que nican nitzactoc queme nipreso para cachi oc niquintaneltoctijtiyás tagayot de nican Roma den Tajtoltzin de Dios ten cualcui ne nemaquixtilis. <sup>17</sup> Pero sequin taneltocani tanextilijtinemij de Cristo ica ne yolnejxicolot, porín quinequij nechtajtoltatanisque. Huan yejuan tamachtijtinemij ica tacajcayahualis porín quiyolnemil'aj que cachi oc nechttazacuiltisque nican campa nitzactoc queme nipreso. <sup>18</sup> Pero nejua amo nicchihua cuenta den ocsequin tamachtiani masqui yejuan tanojnotztinemij ica ne yolnejxicolot. Ta, nejua niyolpaqui porín nitecaquil'á que nochi yejuan tetapohuijtinemij de Cristo masqui ica ne yolnejxicolot oso masqui ica ne yec tetasojtalis. Huan ij'cón sayó nimoyolpact'ía.

<sup>19</sup> Huan cachi oc nimohuelitztinemi porín nicmatoc que namejuan nanmotatatautilijtocque ica por nejua. Huan no nicmatoc que nechmacatoc chicaucahuelilis namotatatautilis ihuan Yecticatzin Esp'iritu ten Jesucristo cualtitanic. Huan ica nij'n tapalehuilis de Cristo, nicmati que nochi cuali mochiutiyás nopan. <sup>20</sup> Huan semi nicylolnejnequi de amo nipinahuas de Cristo. Huan no nitacuautamati ihuan Dios que amo queman nicpinautis Cristo. Ta, m'ac yolchicahualis nicylolnejnequi que axcan ma nicueyipanchiutiyás Totecotzin Cristo ica ne nochipaucanemilis, ij'cón queme nicchiutihualaya. Huan nochi nij'n ma mochiutiu masqui nejua niyoltinemis oso nechmictisque. <sup>21</sup> Porín para nejua queme niyoltos oc, ica ya nojón niyoltinemis sayó para Cristo. Huan como nimiquis ya, ij'cuacón cachi cuali para nejua porín niq'uitati Cristo Jesús. <sup>22</sup> Huan como nejua niyoltinemis oc tech nij'n nonacayo nican talticpac, ij'cuacón huelis nicmajxitijtiu oc nij'n tequit de Totecotzin. Ica ya nojón amo nicmati catiyejua taman monequi niq'ijitas, cox para nimiquis oso cox para nitequitinemis oc.

<sup>23</sup> Huan nejua semi nicohuijita de nij'n ome taman. Pues, nejua nicnequisqu'ía ma nimomiquilis ya para niyetotiu ihuan Cristo. Porín para nejua se hueyi cuali ya yesqu'ía niyás niyetotiu ihuan Cristo. <sup>24</sup> Pero se taman cachi monequi de que niyoltinemis oc nican talticpac para namehpalehuijtiyás oc namejuan. <sup>25</sup> Huan como nicmati que semi monequi namehpalehuis oc, ica ya nojón nicmatoc que ayamo nimiquis. Ta, nicmati que niyetinemis oc namohuan para namehpalehuis oc huan namechylomajxitijtiyás para nanquipiasque cachi oc yolpaquilis tech namotacuau-

tamatilis ihuan Cristo. <sup>26</sup> Huan como ocsepa namotzalan niyetotiu, ijcuacón namejuan cachi oc nanmoyolpactisque huan nanquihueyichihuasque Cristo Jesús porín nannechitasque que nechcajcauque ya libre.

<sup>27</sup> Pero nicnequi xicchihuacan ijcuín: Xichipaucanemican ijcón queme quinamiqui chipaucanemij nochi neques ten taneltocatinemij ica in Tajtoltzin de Cristo ten cualcui ne nemaquixtilis. Huan masqui niyás namechitatu oso masqui niyetotiu huejca de namejuan, pero nicnequi ma nechtapohuican de namejuan ma nechilican de queniu namejuan nanquisentocaj nantacuautamatinemij huan nansentequititinemij ica se tamachilis san huan ica se tanejnequilis san. Huan no ma nechtapohuican de queniu nanmoyecuicatinemij de nansentequititiyohue para nantetapohuijtinemij de namotacuautamatis, porín namotacuautamatis hualeutoc tech in Tajtoltzin de Dios ten cualcui ne nemaquixtilis. <sup>28</sup> Huan nicnequi ma nechcaquiltican que namejuan amo nanquinyolmohuilfaj neques ten namechixnamiquij. Huan queme amo nanmoyolmoutfaj, ijcuacón nochi neques ten namechtajyohuiltfaj, yejuan nojonques cajsicamatisque ya que ninpan yejuan ejcotoc ne xpolihuilis ten Dios cualtitanis. Huan no queme amo nanmoyolmoutfaj, ijcuacón ixnesitiu que namejuan Dios namechmaquixtij ya.

<sup>29</sup> Huan Totajtzin Dios namechmactilijtoc ya nijín omen taman, que namejuan xitacuautamatican ya ihuan Cristo. Huan no namejuan xitaxicojtiyacan ya tech in tajyohuilis porín nantacuautamatinemij ihuan Cristo. <sup>30</sup> Huan tinochin tejuan huan namejuan no timotequitiltfaj ica sansé nijín tajyohuilistequit san. Porín namejuan cuali nannechitilijque ya de queniu nimotequitiltijhuala namotzalan. Huan axcan nantecaquilijtocque de queniu nicsentoca nimotequitiltfaj para Cristo.

### **Nican tajtoa de queniu Cristo quihueyipinautijque tech in cruz huan ijcón Totajtzin quihueyipancualnextij Cristo ica huelilil**

**2** Huan Totecotzin Cristo Yejuatzin namechylchicautihuitz ya huan namechyoltalijtihuitz ya ica ne itetasojtalis. Huan in Yecticatzin Espíritu namechmachililtijtihuitz que nansenpoutinemij ihuan Cristo huan no namechmachililtijtihuitz ne teyolicnelilil huan ne tetasojtalis de Cristo. <sup>2</sup> Ica ya nojón nicnequi xinechueyiyolpactican ijcuín: Ximosenuicatinemican ica sansé san tamachilis. Huan no xicsenpixinemican sansé san tetasojtalis. Huan no xisenpantanemilijtinemican ica sansé san tanemilil. Huan no ximosentequitiltican ica sansé san tequit para Cristo. <sup>3</sup> Huan amo ximoaxcatilijtiyacan de namejuan namopanolis san. Huan amo no teyi xicchihuacan tech namonemilis tenica nanmohueyichihuasque san. Ta, nicnequi que cada senme de namejuan xinentinemican ica ne yolyemanalis. Huan no nicnequi ma xicpohuacan in ocsequin tocnihuan taneltocani que yejuan cachi hueyi chihuanime huan que namejuan. <sup>4</sup> Huan no nicnequi cada senme de namejuan que amo xictemojtinemican de queniu nanmopalehuijtinemisque namejuan san. Ta, cachi oc xictemojtinemican de queniu xiquinpalehuijtiyacan ocsequin tocnihuan taneltocani.

<sup>5</sup> Huan namejuan xicpixtinemican ne cuali tamachilis tenica Cristo Jesús tanemilijtinemía cuac nemico nican talticpac. <sup>6</sup> Porín ne Cristo Jesús quipixtinemic in mismo nemilis ten quipixtinemi Totajtzin Dios. Ica ya nojón Cristo Jesús, Yejuatzin ipa Dios. Huan queme Cristo ipa quimatía que yejua Dios, ica ya nojón amo monequía moaxcatilis san huan monehuilis de ne nemilis de Dios. <sup>7</sup> Ta, Cristo quisecohua

lo que ten pohuía ihuan, yejua ne inemilis ihuan Dios. Huan ijcón Yejuatzin mochi-huaco queme se tequitique nican talticpac, cuac yolico queme se talticpac tagat. <sup>8</sup>Huan Cristo nentinemía talticpac queme ipa talticpac tagat. Huan no motemactijtiaya imaco Itajtzin Dios ica nochi yolyemanalis para ijcón huelis quitacamatinemís Itajtzin. Huan ijcón Cristo Jesús quitacamatinemía Totajtzin Dios hasta ijcuac quimictijque. Huan ijcón quihueyipinautijque Cristo cuac quicouupampilojque tech in cruz.

<sup>9</sup>Huan queme Cristo momiquilij tech in cruz, ica ya nojón Totajtzin Dios quihueyipantalij Cristo ma tayecana inpan nochi tayecanani. Huan no Totajtzin Dios quimohuiscatocaytij Cristo ica se tocay ten cachi hueyi chiuque inpan nochi osequin chihuanime. <sup>10</sup>Huan no Dios quihueyipantalij Cristo para ma motancuaquetzacan huan ma quimohuistilican Cristo Jesús nochi tayecanani huan nemini ten nentinemij ne eluiyactzinco huan ten nentinemij nican talticpac. Huan no ma quimohuistilican Cristo nochi ánimajme huan tayecanani ten yetoque talticpactampa. <sup>11</sup>Huan ijcón ma nochi ten yoltinemij ma quixmatican huan ma quiytocan que Cristo Jesús, Yejuatzin Totecotzin. Huan ijcón nochi ten yoltinemij, yejuan nojonques no quihueyicualnextisque Totajtzin Dios.

### **Nican tajtoa de queniu in taneltocani quinyoltahuilíaj in talticpacuani ica in Tajtoltzin de Dios**

<sup>12</sup>Ica ya nojón, notasojicnihuan, namejuan cuali ninechtacamatinemíaj cuac namohuan nannentinemíaj. Pero axcan nicnequi xinechtacamatican, masqui huejca niyetoc de namejuan. Huan cachi oc xicsentocacan ximomajxitijtiyacan namejuan san den namotacuaumatilis para ma amo teyi namechpolo oc. Huan no xinentinemican ica yolyemanalis huan xicmohuistilijtiyacan Dios. <sup>13</sup>Porín Totajtzin Dios Yejuatzin namechyoltanemililtía que xicnequican xicchihuacan sayó ica ten cuali san. Huan no Totajtzin Dios namechchicahualismacatiu para xicyecchiutiycan ijcón queme Yejuatzin quimonequiltía.

<sup>14</sup>Huan nochi nijín tatacamatilis nicnequi xicchiutiycan namejuan, pero amo ica ne neyolcuejmololis. Huan amo no ximotajtoltenheucan. <sup>15</sup>Huan como nantatacamatij, ijcuacón amo aquen huelis namechteluilisque huan amo no huelis namechpajpantijtinemisque tajtacol tech namonemilispán. Ta, nanchipaucanemisque porín namejuan naniconehuan de Dios. Huan amo nanquipixtiyacan tensá tamachilis ten namechyolmajmahua ica tajtacol. Porín namejuan nannentinemij intzalan in talticpacuani ten semi amo yolcualime, porín yejuan quixtopeutinemij in Tajtoltzin de Dios. Huan ijcón namejuan nantanextijtinemij ica in Tajtoltzin de Dios den talticpacuani, porín yejuan nentinemij tech ne tayohuayanilot ten cualcui in tajtacol. Huan nanquichiutinemij ijcón queme se tanex tatanextía campa tayohuayanilot. <sup>16</sup>Huan xiquinonyoltahuilican in talticpacuani ica in Tajtoltzin de Dios ten cualcui nemilis. Huan como namejuan nanquichiutinemij nijín tequit de Dios, ica ya nojón tech ne tonal cuac mohualuicas Cristo, ijcuacón nicyolmachilis se hueyi yolpaquilis. Porín ijcuac nicmatis que amo nencajtíc san notequiu namohuan de namechmachtijtinemía in Tajtoltzin de Dios. Huan ijcuac nicmatis que amo sayó pajpanoc san notequiu ten nicchiutinemía namotzalan. <sup>17</sup>Huan nantaneltocatinemij ya ica Tajtoltzin de Dios. Huan no namejuan nanmotemactijque ya imaco Dios. Huan como nechmictisque, ijcuacón nomiquilis mochihuaquiu queme se cualtzin nemactil para

Totajtzin Dios. Huan ica por nomiquilis huan ica por namotajyohuilis momajxitis ne namonemactil ten namejuan nanquitemactíaj iixpantzinco Dios. Huan como nechmictisque, ijcuacón nimoyolpactis huan namechpanoltilis nijín noyolpaquilis, para ma namejuan cachi oc no ximohuelitztinemican. <sup>18</sup>Huan namejuan no ximoyolpactican huan ma timosenpanuelitacan nochi tejuan.

### Nican tajtoa de Timoteo huan Epafrodito nintequihuan

<sup>19</sup>Huan como Totecotzin Jesús quimonequiltía, nicnequi namechontitanilis nimanpan in Timoteo para namechitas. Huan cuac Timoteo hual mocuepatiu ya, ijcuacón yejua nechtapohuis ya de namejuan para ijcón nejua nimoyolpactis. <sup>20</sup>Huan amo nicpía oc ocsé tequitique ijcón queme nijín Timoteo ten tanemilijtinemi queme nejua. Porín ne Timoteo yec melau moyolcuejmolojtinemi por namejuan huan quinequi namechpalehuis. <sup>21</sup>Porín nochi in ocsequin tequitini quitemojtinemij de yejuan san nintanejnequilis san. Huan yejuan amo quitemojtinemij de queniu quitacamatisque Cristo Jesús. <sup>22</sup>Porín namejuan cuali nanquixmatinemij in Timoteo ihuelilisuan. Huan no nanquimatij de queniu in Timoteo nechpalehuijtinemi tech nijín tequit de titanojnotztinemij ica in Tajtoltzin de Dios. Huan Timoteo nechpalehuijtinemi ijcón queme se telpocat quipalehuijtinemi tech nitequit de itat. <sup>23</sup>Ica ya nojón nicnequi namechontitanilis Timoteo ma namechitati. Pero ayamo yati. Ta, ma quichía hasta ne tonal cuac niqutas queniu nopan huetziquiu ocsequin notequitzin. <sup>24</sup>Pero nejua nitacuaumatoc ihuan Totecotzin que nechquixtis que queme preso para ijcón huelis niman niyás namechitatiu.

<sup>25</sup>Huan no niquixejcoa que monequi no namechtitanilis in tocnui Epafrodito. Yejua in totequiticaicniztin axcan huan totapalehuijcau tech nijín totajyohuilis. Porín namejuan ne achtopa ya nannechualtitanilijque nijín Epafrodito para nechtequitilijtinemis huan nechpalehuijtinemis ten nechpoloaya. <sup>26</sup>Huan Epafrodito semi quiyolnejnectoc namechitas nochi namejuan nantocnihuan. Huan yejua semi moyolcuejmolojtinemi porín namejuan nantecaquilijque que yejua semi mococoaya. <sup>27</sup>Huan hueyi melau que Epafrodito semi mohueyicocoaya hasta yetoya imiquilistempan. Pero Totajtzin Dios quihueyiyolicnelij ya huan quipajtij ne Epafrodito. Huan amo sayó yejua Totajtzin Dios quiyolicnelij. Ta, nejua no Dios nechyolicnelij. Huan Dios quipajtij Epafrodito para ma amo nimoyolcocojtinemisquía cachi oc huan que in tayocol que axcan nejua nicpixinemi. <sup>28</sup>Ica ya nojón cachi oc nicyolnemilía namechtitanilis nijín Epafrodito para ijcón namejuan no ximoyolpactican cuac ocsepa nanquitasque. Huan ijcón nejua amo semi nimoyolcocojtinemis oc. <sup>29</sup>Ica ya nojón nicnequi que xicselican ne Epafrodito ica míac yolpaquilis porín yejua se tocnui taneltocacque de Totecotzin Cristo. Huan no xiquinmohuisca pohuacan nochi neques ten tequititinemij queme nijín Epafrodito. <sup>30</sup>Porín ne Epafrodito yetoya ya para momiquilis porín yejua semi motequitilijtinemía por Cristo. Huan yejua motajyohuiltijtoya tech tequit hasta imiquilistempan para ijcón huelis nechpalehuis ten nechpoloaya, ne ten namejuan amo huelic nannechixpanoltijque.

### Nican tajtoa de ne chipaucanemilis ten tamelahuac

**3** Huan axcan, notasojicnihuan, ximoyolpactijtinemican porín nanmajsitinemij ihuan Totecotzin Cristo. Huan xicmatican que nejua amo nechyolcuejmoloa de ocsepa namechijcuilohuilis ica ne tamachilis ten ipa namechijcuilohuilijca ya.

Porín nicmati que nijín tamachtilis se cuali para namejuan. <sup>2</sup>Ximoyecpiacan de ne tacajcayahuani ten nentinemij queme yesquía itzcuinme ten nanalcatinemij. Huan no ximoyectachilijtiyacan de ne tacajcayahuani ten sayó tachiutinemij ica sayó ten amo cuali. Huan no ximoyecpiacan de ne tamachtiani porín yejuan quinequij ma namechnescayotisque huan ijcón namechtequilisque namonacayo. Pero nochi nojón nencajtíc porín amo ijcón huelis nanmomaquixtisque de namotajtacoluan. <sup>3</sup>Huan tejuan melau tiitaneltocacahuan de Cristo huan Totajtzin Dios techpohua melau titanescayotilme ya huan timoajchihuillijque ya totajtacoluan. Porín tejuan ticmohuistilijtinemij Totajtzin Dios ica in chichualis den Yecticatzin Espíritu. Huan tejuan no timoyolpactijtinemij porín tipoutinemij ihuan Cristo Jesús. Huan tejuan amo timotachicahuilijtinemij sayó tech ne totanejnequilis huan tonemilspan de nican talticpac.

<sup>4</sup>Huan nejua cuali huelisquía nimotachicahualisquía tech nejua nonemilis de achtopa san. Pero amo ijcón nimotachicahuilis ten ne notanejnequilis huan nonemilspan de nican talticpac. Huan masqui ocsequin taca quixejecoaj que huelis mohueyimatisque ica por ninnemilis de nican talticpac, pero nejua cachi oc nihuelisquía nimohueyinequisquía ica por ne nonemilis de ne achtopa ya. <sup>5</sup>Porín nejua nechnescayotijque tech nonacayo ipan chicueyi tonal cuac niyolic. Huan nejua nihualehuac campa tetatme ten israelitas. Huan no nipoutinemi ihuan ichancahuan de ne hueyi tetat Benjamín. Huan no nochi notatuan huan nohueyitatuan, nochi yejuan pouthualayaj ihuan hebreos. Huan no nicatca nihueyimatatque nifariseo porín nictacamatihualaya in tanahuatilme de Moisés ijcón queme quichiutinemij ne tamatinime fariseos. <sup>6</sup>Huan semi nimotequitiltijtihualaya para ma onca sayó se taneltoalis den judíos. Ica ya nojón nejua niquintahuelitaya huan niquintajyohuiltiaya nochi ne taneltocani de Cristo. Huan queme nejua niyectacamatinemía ica in tanahuatil de Moisés, ica ya nojón amo aquen huelisquía nechteluilisquía ica tajtacol. <sup>7</sup>Huan nochi nijín tacamatilis ten nicuicatinemía, yejua ne nicyolnemilijtinemía que hueyi tetayocolil nicselisquía inahuactzinco Dios. Pero axcan nochi nojón tacamatilis den tanahuatilme de Moisés, yejuan ne nicpouthuitz ya que amo teyi ipatiu oc para ijcón huelis nitacuautamatis de Cristo.

<sup>8</sup>Huan cachi oc namechilía que nochi ten ongac ten huelis nimoaxcatilisquía, nochi nojón nicpohua que amo teyi cualtía. Porín axcan niquixmatinemi ya Notecotzin Cristo Jesús, huan Yejuatzin cachi hueyi tapalehuilis nechmacati huan que nochi ten nicpiaya. Huan nictasojtatinemi Cristo Jesús. Ica ya nojón nicsecocahuac ya huan nicpojpoloj ya nochi nojón totacamatilis ten nicualcuitihualaya. Huan cachi oc nicpoutinemi nochi ne tacamatilis den tanahuatil de Moisés amo teyi ipatiu, huan no nicpohua ne tacamatilis queme yesquía tajsol san. Huan ijcón nicyolnemilijtinemi porín nicnequi sepa san nimoteaxcatilijtiyás ihuan Cristo. <sup>9</sup>Huan no nicnequi sepa san ma nijsicamajsitinemi ihuan Cristo. Pero nochi nijín nicnequi ma mochihuati ya amo porín nejua niyecajsicayolchiphahuac ya, huan amo no porín niyectacamatinemi in tanahuatil de Moisés. Ta, axcan nimajsitinemi ihuan Cristo porín nejua nitacuautamatic ya ihuan Cristo. Ica ya nojón Totajtzin Dios nechylolchipaupohuac ya sayó ica por ne notacuautamatilis ihuan Cristo. <sup>10</sup>Huan axcan nicnequi cachi oc nicyecajsicaxmatis Cristo. Huan no nicnequi nicpixinemis ne chicaucahuililis de Cristo ten monextij ya cuac Dios quipanquixtij yoltoc in Cristo intzalan in ánimajme. Huan no nicnequi nitajyohuijtinemis nican talticpac hasta



nimiquis, como monequi, ijcón queme Cristo momiquilij. <sup>11</sup> Huan ijcón huelis niy-oltinemis hasta ne tonal cuac mohualuicas Cristo, huan Yejuatzin quinpanquixtis yoltocque nochi in taneltocani ánimajme.

**Nican tajtoa de queniu timotequitiltijtinemij para  
ticajsisque ne cualtzin nemactil de Dios**

<sup>12</sup> Pero amo nicnequi namechilis que niyecajsicayolchipahuac ya. Huan amo no nicnequi namechilis que niyecajsicachipaucatagat ya. Ta, nicnequi namechilis que tataman oc nicsentocas nimotequitiltijtiu para huelis nimoaxcatilijtiu cachi oc ne yec chipaucanemilis. Huan ijcón nimofuerzajuijtinemi porín Cristo Yejuatzin ne achtopa ya nechnotzac ma ihuantzin nipohui huan ma niaxcati. <sup>13</sup> Huan namejuan, nocnihuan, amo nimopoutinemi que nejua nicyecajsic ya ne chipaucanemilis. Pero nicchiutinemi ijcuín de niquelcautiu nochi ten nopan mochihuac ya ne achtopa ya. Huan nimotequitiltijtiu para ijcón huelis nicajsitiyás ne nemactil ten Dios nechmacatihualas oc. <sup>14</sup> Huan ijcón nimotequitiltijtiu para nictamichihuas notequiu ten Dios nechmactilij. Huan ijcón nicselis cualtzin tetayocolil ten Totajtzin Dios techmactilis. Huan Totajtzin Dios den eluiyactzinco moyectencahuac de techmactilis ne tetayocolil porín Yejuatzin techijitac huan technotzac ma tipoutinemican ihuan Cristo sen nachipa nepa eluiyactzinco. <sup>15</sup> Huan ma ijcón ticyolnemilican nochi tejuan ten tiyecyolmajsitocque ya tech totacuautamatis. Huan tacán nanquiyolnemilijtinemij de ocsé taman tamachilis, ijcuación Totajtzin Dios namechajscamatiltis ten tamelahua. <sup>16</sup> Pero namechilía ica nijín tamachilis que monequi ma titacuaumatcanemican huan ma tiyolchipaucanemican ijcón queme ticselijcaj ya in tamachilis de Dios.

<sup>17</sup> Huan namejuan nocnihuan, nicnequi xichipaucanemican ijcón queme nejua nichipaucanemi. Huan no cuali xiquinitztiyacan ne taneltocani ten chipaucanemij ijcón queme tejuan tamechnejtisque ya. <sup>18</sup> Huan melau miacpa namechilijca que nentinemij míac tamachtiani ten sayó taixnamiquini. Pero ocsepa axcan namechilía hasta ca choquilis que neques sayó quixnamictinemij ne tajyohuilis huan ne tequit ten quichihuaco Cristo cuac momiquilij tech in cruztzin. <sup>19</sup> Huan ijcón Dios quitallij ya que neques tacajcayahuani ma yacan tech in ixpolihuilis. Porín yejuan quipoutinemij nintanejnequilis de ninnacayo queme yesquía nindios ten ma quinyecana. Huan yejuan mohueyimatinemij huan mohueyiyolpactijtinemij ne tenica monequisquía ma mopinahuiliani. Porín yejuan sayó tanemilijtinemij ica ne tamachilisme ten poutoc nican talticpac san. <sup>20</sup> Pero tejuan titaneltocani de Cristo tipoutinemij ne eluiyactzinco. Huan no tiyolicachixtocque ne tonal cuac mohualuicas den eluiyactzinco Totemaquixtjcatzin, Yejuatzin ne Totecotzin Jesucristo. <sup>21</sup> Huan no Jesucristo techyancuicatalisique nijín tonacayo ten axcan momautoc ica tajtacol. Huan ijcón ne ocsé yancuic tonacayo ten cuica míac cualtziyot huan ten tamatis ijcón queme Cristo tamatinemi. Huan Cristo techpatilis de queniu titamatij ica por ne ichicaucahuelilis. Porín Cristo ica por ne mismo ichicaucahuelilis quinyecantinemis huan momasoutos inpan nochi ten agac.

**Nican tajtoa de que ma ximoyolpactijtiyacan  
nachipa porín nanpoutinemij ihuan Totecotzin**

**4** Ica ya nojón, notasojcnihuan, semi namechtasoja. Huan namejuan semi nan-  
nechyolpactíaj. Huan cuac niquta namotacuautamatilis, ijcuacón nicmatis que  
namejuan nanmochihuaquij queme se tetayocolil ten nicmactilis Cristo Jesús tenica  
ixnestinemi que nejua namechtaneltoctij ihuan Cristo. Huan no, notasojcnihuan,  
nicnequi xicsentocacan xitacuautamatiyacan ihuan Totecotzin. <sup>2</sup>Huan niqinon-  
tatautía in Evodia huan no in Síntique ma amo moyolcualantijtinemican oc. Ta,  
yejuan ma moyoltalican se huan ocsé porín yejuan poutinemij ihuan Totecotzin.  
<sup>3</sup>Huan tejua tinotacuautamatcaicniu huan tinopalehuijcau, nimitzontatautía que  
xiqinpalehui nojón ome sihuame taneltocani ma moyoltalican. Porín yejuan mote-  
quitiltijtineneque nohuan cuac titanojnotztinemíaj ica ne Tajtoltzin ten cualcui ne ne-  
maquixtilis. Huan nijín sihuame taneltocani no tequititinemíaj ihuan Clemente huan  
ihuan ne ocsequin notapalehuijcahuan. Huan nochi yejuan nintocayuan ijcuiliutoc  
ya tech ne libro de Dios campa ixnesi nochi in tocaytitzin de taneltocani ten quipíaj  
ne yec nemilis sen nachipa. <sup>4</sup>Nachipa ximoyolpactijtinemican porín nanpoutinemij  
ihuan Totecotzin Jesús. Huan ocsepa namechonojpacailía que ximoyolpactijtinem-  
ican. <sup>5</sup>Huan ma quimatican nochi in tagayot que namejuan nanquipixtinemij teic-  
nelilis para nochi. Porín Totecotzin Jesucristo amo huejcahua oc para mohualuicas  
nican talticpac.

<sup>6</sup>Huan nocnihuan, amo teyica ximoyolcuejmolocan. Ta, nachipa ximoteixpanti-  
can iixpantzinco Totajtzin Dios ica namonetatatautilis huan xictasojcamachilican  
Dios. Huan no xictajtaniclan Dios nochi ten namechpoloa. <sup>7</sup>Huan ica por na-  
monetatatautilis Dios namechtayocolijtiyás ne yolsehuilis ten cachi cuica huelilis  
hasta amo huelis se cajsicamatis oc de queniu. Huan nijín mohuisca yolsehuilis, ma  
yejua quinyecantinemis namoyolojuan huan namotamachilisuan porín Cristo Jesús  
yetinemi namohuan.

**Nican tajtoa de ma xicnemilijtinemican sayó ten cuali**

<sup>8</sup>Huan nicnequi namechilis, nocnihuan, que xitanemilijtinemican sayó ica ten  
tamelahua huan sayó ica ten cuica mohuisyot. Huan xicuatamatatinemican sayó  
ica ne yec nemilis huan sayó ica ten chipahuac. Huan no xicnemilijtinemican  
sayó ten quinamiqui ma xictasojtacan. Huan no xicuican ne taman tamachilis ten  
quinamiqui ma ticpialican mohuisyot. Huan no xitanemilijtinemican sayó ica nochi  
ten cuali ten cualcui chipaucanemilis. Huan xicnemilijtiyacan sayó de ne chihual-  
isme ten quinamiqui ma tiqinmohuisca pohuacan. Huan ocsepa namechilía xitane-  
milijtinemican ica sayó nijín chipauque huelilisme ten monequi tiqinmohuisca-  
jtenehuaj. <sup>9</sup>Huan no namechilía que xicsentocacan xicchiutiyacan nochi tamachilis  
ten namechmachtijca ya huan nochi ten namechnextilijca ya. Huan no xictaca-  
matiyacan nochi ten nannechitiltijtineneque ya huan nannechcaquilijtineneque ya.  
Huan nochi nijín xicchiutiyacan huan Totajtzin Dios yetinemis namohuan huan  
namechyolsehuijtinemis.

### Nican ne taneltocani de Filipos contitanilía Pablo se tetayocolil

<sup>10</sup> Nocnihuan, semi nimohueyiyolpactía ica ne huelilis de Totecotzin porín axcan namejuan ocsepa nannechylenamiquij ica namotapalehuilis. Huan cuali nicmati que ipa nannechelnamictijtihualayaj de queniu nannechpalehuisque. Pero tech nijín tonalme ten yequin panocque, namejuan amo nanquemantíaj de nannechpalehuisque. <sup>11</sup> Pero yequintzin amo namechnojnotztoc de tensá nechpoloa. Porín ximactican que nejua nimomachtij ya de queniu nachipa niyolpactinemi ica ten nicpixinemi. <sup>12</sup> Huan no cuali nicmati queniu niyoltinemis masqui amo teyi nicpixinemi. Huan no nicmati queniu niyoltinemis masqui huel m'fac nicpixinemis tenica nimoixpanoltis. Huan nimomachtijtinemic ya de queniu niyolpactinemis masqui ma huiqui ten hualas. Huan no nimomachtijtinemic ya que niyolpactinemi masqui ni-xhuitinemi oso nimayantinemi. Huan no niyolpactinemi masqui huel m'fac nicpixinemi oso amo teyi nicpía. <sup>13</sup> Huan nochi huelis nicchiutinemis ica por Cristo ten nechmactilijtiu ichicahualis. <sup>14</sup> Pero namejuan no cuali ximactican que semi cuali ten nanquichiuque cuac namejuan nannechualtitanilijque ne tapalehuilis cuac nicpíaya ne ohuijcaoyot. <sup>15</sup> Huan namejuan de nanpueblojuani de Filipos, cuali nanquimatocque ya que ne achtopa ya nejua ya nipehuac nitanojnotztinemic ica in Tajtoltzin de Dios ten cualcui ne nemaquixtilis. Huan cuac nejua nihualquisac ya de ne Macedoniajcopaca, ijcuacón amo aquen nechpalehuij. Ta, sayó namejuan nannechontitanilijque tapalehuilis. Huan ijcón nanquichiuque porín nanquinequíaj nanmotasojcamatisque nohuan tenica nejua namechpalehuijca ya den Tajtoltzin de Dios. <sup>16</sup> Huan cuac niyetinemia oc ne pueblo de Tesalónicajcopaca, ijcuacón namejuan miacpa nannechtitanilijcaj oc tapalehuilis para ica nimoixpanoltis. <sup>17</sup> Pero nejua amo ijcón namechnojnotztoc yequintzin porín cachi nictemotinemi de queniu xinechpalehuican. Ta, nijín namechilijtoc sayó porín nicnequi que namejuan cachi nanquipiatihue cuali chihualisme ne iixpantzinco Totajtzin Dios. <sup>18</sup> Pero axcan nic-selij ya nochi ten nannechualtitanilijque ya huan ica por nojón namotapalehuilis, nicpixinemi nochi ten monequi. Porín in Epafrodito nechualcuilij ya nochi ten nannechualtemaquilijque. Ica ya nojón axcan nicpía nochi ten monequi. Huan nojón tapalehuilis, yejua ne queme yesquía se nemactil ten cualtzin ajuiyac iixpantzinco Dios. Huan ne namotapalehuilis, yejua ne se nemactil ten namejuan nanquimactilijque Dios. Huan ne namotapalehuilis, yejua ne se nemactil ten quiyolpactía Dios. <sup>19</sup> Huan Totajtzin Dios cachi oc ma namechtayocolijtiyás nochi ten namejuan namechpolos porín nanpoutinemij ihuan Cristo Jesús. Huan Totajtzin Dios namechtayocolijtiyás de niricojoyo ijcón queme Yejuatzin quipixtinemi hueyi chiscauhuelilis nepa eluiyactzinco campa itacualtzinyojcan. <sup>20</sup> Ma ticcueyimohuistil-ijtiyacan Totajtzin Dios sen nachipa huan sen nachipa. Ma ijcón mochiutiu. Amén.

### Pablo quintajpaloa in taneltocani

<sup>21</sup> Xiquinontajpalocan nochi in tocnihuan taneltocani ten poutinemij ihuan Cristo Jesús. Huan nochi in tocnihuan taneltocani ten nican nohuan yetocque, nochi yejuan no namechontajpaloaj. <sup>22</sup> Huan nochi in tocnihuan taneltocani nicahuín namechontajpaloaj. Huan ojcahi oc no namechontajpaloaj nochi in taneltocani ten tequititinemij campa ichan in hueyi chiuque ten monotza César. <sup>23</sup> Huan Totecotzin Jesucristo ma namechyolicnelijtiu sen nachipa. Amén.

## IN TAJCUILOLAMATZIN TEN QUITAJCUILOHUILIJ IN TATITANIL SAN PABLO PARA IN TANELTOCANI DE CRISTO TEN CALYETOCQUE CAMPA PUEBLO DE COLOSAS

### Desde ne pueblo Roma campa preso Pablo quintajcuilohuilía in tocnihuan taneltocani campa pueblo Colosas

**1** <sup>1-2</sup> Nejuatzin ni Pablo niitatatitanil de Jesucristo porín ijcón quimonequiltij Totajtzin Dios. Huan nican iixpan in tocníu Timoteo namechtajcuilohuilía namejuan ten nancalyetocque campa pueblo Colosas, porín namejuan nanpoutinemij ihuan Totajtzin Dios huan nantacuaautamatinemij ihuan Totecotzin Cristo. Huan xicpixinemican ne teicnelilis huan ne yolsehulis ten hualeutoc inahuac Totajtzin Dios.

### Pablo quitajtanilía Totajtzin Dios que ma quinmaca in taneltocani den ne tamachilis den Yecticatzin Espíritu

<sup>3</sup> Huan tejuan timotatautilíaj ihuan Dios ica por namejuan huan nachipa tictasojcamachilíaj Dios ica por namejuan. Huan Totajtzin Dios Yejuatzin ne Itajtzin de Totecotzin Jesucristo. <sup>4</sup> Huan tejuan tictasojcamachilíaj Dios porín tictecaquilíaj de queniú hueyixtoc namotacuaautamatis tech in Cristo Jesús. Huan no tictecaquilíaj de queniú nanquintasojtatinemij nochi ne yolchipauque taneltocani ten poutinemij ihuan Totajtzin Dios. <sup>5</sup> Huan nantetasojtatinemij porín nanquiyolicachixtocque ica hueyi tacuaautamatis que nanquipiasque ne tetayocolil ten Dios namechpixtolijtoc ya nepa eluiyactzinco para ica namechtamajxtilis. Huan namejuan nanquiyolicachixtocque que nanquipiasque ne nemactil inahuactzinco Dios porín nanquiacque ya huan nanmoaxcatilijque ne melahuac Tajtoltzin de Dios ten cualcui ne nemaquixtilis.

<sup>6</sup> Huan nijín Tajtoltzin de Dios namechnojnotzque ya ijcón queme quinnojnnotzihuitze tech nochi in senmanahuac. Huan miacque quineltocacque in Tajtoltzin de Dios. Huan nohuyampa in Tajtoltzin de Dios quintaneltoctía huan quinmiactilía in taneltocani. Huan ijcón mochiutoc campa namejuan desde ne tonal cuac namechcaquiltijque den teicnelilis de Dios. Huan namejuan nanquiselijque ne teicnelilis de Dios huan ijcón nanmoajsicamatiltijque que melau yejua iteicnelilis de Dios. <sup>7</sup> Huan nijín teicnelilis de Dios namechmachtijca ya tosasojcniú Epafra ten yejua no tohuan sen tequititinemi. Huan ne Epafra yejua se yec tequitique de Cristo para namechpalehuís namejuan. <sup>8</sup> Huan ne Epafra techtapohuico de namejuan de queniú nantetasojtatinemij ica ne chicahualis den Yecticatzin Espíritu.

<sup>9</sup> Ica ya nojón tejuan desde ne tonal cuac tictecaquilijque de namotetasojtalis huan de namotacuaautamatis, desde ijcuac amo queman ticahuaj de amo timotatautilisque ica por namejuan. Huan tictajtanilíaj Dios que ma Yejuatzin namechmatiltij de nochi Yejuatzin quimonequiltía xicchihuacan tech namonemilispán. Huan no tictajtanilíaj Dios que ma Yejuatzin namechtayocoli de míac tataman tamachilis huan no ma Yejuatzin namechajsicamatilti de Itajtoltzin ica ne chicahualis de Yecticatzin Espíritu. <sup>10</sup> Huan no timoteixpantijtocque inahuactzinco Totajtzin Dios que ma Yejuatzin namechpalehuitiu para queniú huelis xichipaucanentinemican ijcón queme

quinnamiqui ma xichipaucanemican nochi neques ten poutinemij ihuan Totecotzin Cristo. Huan no ma Yejuatzin namehpalehuitiu para que namejuan xicchiutinemican sayó ten Yejuatzin quiyolpactía. Huan no tictajtaniñaj Dios que ma Yejuatzin namechtiochiuto para ijcón mochiutiyás sayó cuajcuali chihualisme campa yesqui nantequitijtinemisque. Huan no ijcón ticnequij ximoyolmajxitijtiyacan tech namotacuautamatilis para ijcón cachi oc nanquixmatiyasque Totajtzin Dios.

<sup>11</sup> Huan no timotatautilijtocque iixpan Totajtzin Dios que ma Yejuatzin namechyolchicahualti ica ne imohuiscahuelilis para ijcón huelis nanquixicjtiyasque ica hueyi paquilis nochi tataman tajyohuilis tenica nantajyohuijtocque. Pero no ticnequij xicpixinemican ne hueyi yolpaquilis. <sup>12</sup> Huan no ma tictasojcama-chilijtiyacan Totajtzin Dios porñ Yejuatzin techyancuicayolitij ya huan ijcón technamiqui ticselitihue ne nemactil ten Dios quintayocolitiu nochi itaneltocacahuan ten nentinemij ica in tanextzin ten cualcui in Tajtoltzin de Dios. <sup>13</sup> Porñ Totajtzin Dios techquixtij ya den imaco in amocuali Satanás campa ne sayó mochiutoc chicahualis den tajtacol ten cualcui tayohuayanilot. Huan no Yejuatzin techpanoltij ya campa ihuelilspan de Itasoconetzin para ma techyecantinemi in Cristo Jesús. <sup>14</sup> Huan Cristo techmaquixtij cuac Yejuatzin momiquilij huan quixtahuac to-tajtacoluan ne tonal cuac mimilahuic iesyotzin. Ica ya nojón Totajtzin Dios tech-tapojpoluij de nochi totajtacoluan.

### **Totajtzin Dios axcan moyoltalijtinemi oc tohuan porñ Cristo quixtahuac ya nochi totajtacoluan**

<sup>15</sup> Huan Totajtzin Dios Yejuatzin amo huelis se quitztinemis. Pero Cristo, quema, tiquitztinenque porñ Yejuatzin Dios monextico queme tagat nican talticpac. Huan Cristo Yejuatzin ipa yetinemi ya huan tayecantinemi ya achtopa que mochihuasquía nochi ten ongac axcan. <sup>16</sup> Huan Totajtzin Dios quichijchihuac nochi ten ongac nican talticpac huan eluiyac ica in chicahualis de Iconetzin, Yejuatzin in Cristo Jesús. Huan Cristo Jesús quichijchihuac nochi ten tiquitaj huan nochi tataman ten amo tiquitaj. Huan Cristo quichijchihuac nochi neques ten tayecantinemij huan neques ten taquitziqijtinemij ica ninchicahualis. Huan no Cristo quichijchihuac ne tayecancajecame ten cuali huan ten amocuali. Huan ijcón Totajtzin Dios quichijchihuac nochi ten ongac ica in chicahualis de Cristo para ijcón Cristo quinyecantinemi nochi ten ongac. <sup>17</sup> Huan Cristo ipa yetinemi ya achtopa que mochihuasquía nochi ten ongac. Huan no Cristo momasoutoc ica ichicaucahuelilis ipan nochi ten ongac. <sup>18</sup> Huan Cristo no Yejuatzin in tayecanque de nochi tejuan tiitaneltocacahuan, ijcón queme totzontecon quinyecantinemi toomiyohuan. Huan Cristo Yejuatzin quichihualtij que ma onca huan ma tzinpehua ne yancuicanemilis. Huan Cristo Yejuatzin in tayecancatagat ten moajocuic yoltoc intzalan in ánimajme. Huan ijcón Totajtzin quimonequiltía que Cristo Yejuatzin ma yesqui in cachi hueyi tayecanque ipan nochi ten ongac. <sup>19</sup> Huan Totajtzin Dios no quimonequiltía que nochi inemilis de Dios ma yeto imaco Cristo. <sup>20</sup> Huan Cristo ica ihuelilis quichihuac que Totajtzin Dios ma tayecantinemi ica nochi tagayot. Huan Cristo quichihualtij ma quimohuiscatamatican Dios nochi ten ongac nican talticpac huan nochi ten ongac ne eluiyactzinco. Huan ijcón Cristo quichiutica ya, cuac Yejuatzin momiquilij tech in cruz huan mimilahuic niesyotzin huan quixtahuac totajtacoluan.

<sup>21</sup> Huan namejuan ne achtopa nancatcaj queme analtecocayome ten amo quixmatíaj Dios. Huan no nanquixnamictinemíaj Totajtzin Dios ica namotamachilis huan ica namoyalis, porín ijcuac nannentinemíaj tech in tajtacolnemilis. <sup>22</sup> Huan Cristo quichihuac ma Dios moyoltalij namohuan cuac Yejuatzin quicojcocojque inacayao tech in cruz huan quimictijque. Huan nochi nijín Cristo quichihuac para huelis namechtenextis inahuactzinco Itajtzin Dios, que namejuan amo nancuicatinemij oc tajtacol, huan que namejuan ma amo aquen huelis namechteluilisque oc ica tajtacol, huan que namejuan nanyolchipauque ya. <sup>23</sup> Pero monequi xicsentocacuan xitacuaumatamatiyacan. Huan amo ximotzinquixtican huan amo ximoyolcucuejuepacan de ne tacuaumatamilis ten nanquixpixinemij ya. Huan amo no ximosecocaahuacan de ne Tajtoltzin de Dios ten cualcui ne nemaquixtilis ten namechcaquiltijque ya. Huan nijín Tajtoltzin de Dios yejua ne ten motetapohuijtinemij intzalan nochi talticpacuani tech nochi in senmanahuac. Huan nejua ni Pablo huan Dios nechijitac para ma no nitanojnotztinemi ica Itajtoltzin de Yejuatzin.

### **Dios quitequimactilij Pablo ma quinnojnotztinemi in tagayot ten amo judíos**

<sup>24</sup> Huan axcan niyolpaqui masqui nitajyohuijtoc tech in ohuijgayot ica por namejuan namotacuaumatamilis. Huan ica nijín tajyohuilis de nonacayo, nicchiutinemi ijcón queme Cristo tajyohuico. Huan queme tejuan tiitaneltocacahuan de Cristo, ica ya nojón titajyohuíaj ijcón queme Cristo tajyohuiaya. Huan ijcón tiquixtalitihue nochi in tajyohuilis ten quipoloa Cristo huan ten monequi quijyohuis ica por itaneltocacahuan. <sup>25</sup> Huan Totajtzin Dios quimonequiltij nechijitac que ma nejua nimotequitiltijtinemi ica por namejuan de nanitaneltocacahuan de Cristo. Huan no Totajtzin Dios nechtequimactilij ma namechpalehuijtinemis namejuan huan no para namechyecajsicatapohuis de toni quijtosnequi nijín Tajtoltzin de Dios. <sup>26</sup> Huan no Dios nechtequimactilij que nejua ma namechajsicamatiltijti ne ichtacatamachilis de Dios ten motaatihtihualaya desde ne tonalme ya cuac ayamo hualaya Cristo. Pero axcan Totajtzin Dios namechyolicnelij nochi namejuan nanyolchipauque nanitaneltocacahuan de Dios, huan namechyecajsicamatiltij de ne ichtacatamachilis. <sup>27</sup> Huan Totajtzin quimonequiltij ya de niqinmatiltis nochi in yolchipauque taneltocani de queniu hueyi ne cualtziyot ten cualcui ne ichtacatamachilis de Dios. Huan ne ichtacatamachilis de Dios techmachtía nijín: Ma yetica Cristo tech namoyolijtic namejuan ten amo nanpohuij queme judíos. Huan como yetinemi Cristo namoyolijtic ya, ijcuacón nancajsicamatiyohue que nanquipatihue ihueyicualtziyo de Cristo namejuan ten nanyetinemis que ihuantzin sen nachipa. <sup>28</sup> Huan tejua tiquinnojnotztinemi in tagayot que nijín Cristo, Yejuatzin Totemaquixtijcatzin ten hual mocuepas. Huan no tiquinnejmachtijtinemij nochi in tagayot huan no tiquinnextilijtinemij in tagayot que ma cajsicamatican nijín Tajtoltzin de Dios. Huan ticnequij tiquinixpantilis que cada se tocnui taneltocani iixpantzinco Dios, pero ma cuali majsitocan ya intacuaumatamilis ihuan Cristo. <sup>29</sup> Huan yejica nijín nitequititinemi huan nimo fuerzajuijtinemi tech nijín tequit ica nochi nochicahualis huan huelilis ten Cristo quichihualitjoc ma yeto noyolijtic.

**2** Huan nicnequi xicmatican de queniu nimotequitiltijtoc ya ica por namejuan huan no ica por neques ten calyetocque campa Laodiceajcopaca cuac namechnojnotztinemi ica in Tajtoltzin de Dios. Huan no nimotequitiltijtinemi ica por nochi neques ten ayamo nechixmati. <sup>2</sup> Huan nicnequi que nochi neques ma yolmajsitine-

mican ica nintacautamatilis. Huan no nicnequi que yejuan ma xisenntinemican ica ne tetasojtalis de Cristo. Huan no nicnequi que yejuan ma cajsicamatican in Tajtoltzin de Dios para ijcón quipixtinemis que se cualtzin yolchicahualis ten cualcui se tapalehuilis de Dios. Huan no nicnequi que ma quiyecajsicaixmatican Cristo, porín Cristo Yejuatzin ne ichtacatamachilis de Totajtzin Dios ten motaminextijtihuialaya ya.<sup>3</sup> Huan sayó Cristo quipixtoc imaco nochi in tamachilis huan nochi tanemililis ten ongac, queme yesquía iricojyo de Dios.<sup>4</sup> Huan nochi nijín namechilijtoc axcan para ma amo aquen namechylolcayahua ica tajtolme ten sayó namechcuatapololtía san.<sup>5</sup> Porín masqui amo namohuan niyetinemi, pero ipa nitanemilijtinemi de namejuan porín namohuan niyetinemi de notamachilis. Ica ya nojón nimoyolpactijtinemi porín majyá namechitzosquía ica notamachilis que namejuan nanquitacamatinemij notamachtilis huan nanquisentocaj nantacautamatiyohue ihuan Cristo.<sup>6</sup> Huan namejuan nantacautamatque ihuan Totecotzin Cristo ne tonal ya cuac namechcaquiltijque in Tajtoltzin de Dios. Huan axcan nicnequi ximotachicahuilijtiyacan sayó ihuan Yejuatzin porín nanmajsitinemij ihuan Cristo Jesús.<sup>7</sup> Huan nochi namonemilipan ma hualeuto itech Cristo, ijcón queme se cuoutactzon monaluayoocui huejcatan. Huan no namonemilipan ma tzineutoc itech Cristo, ijcón queme in tepamit tzinijcatoc tech se cuali tatzinehualoni. Huan namotacautamatilis ma mohueyiltijti ijcón queme tamechnextilijque ya para ma amo aquen huelis namechylololinis de namotacautamatilis. Huan no nachipa xictasocamachilijtinemican Totajtzin Dios ica por iteicnelilis.

### **Nican tajtoa de ne yancuic nemilis ten Cristo techmactilijtoc**

<sup>8</sup>Ximoyecpiacan tech namotamachilis. Huan cuali xiquitacan ma amo aquen namechcaycayahua ica tamachilis ten amo teyi namechylolmajxitis. Huan no ma amo aquen namechcaycayahuas ica ne tajtoltehuilis ten amo teyi ica namechpalehuis. Porín ne tacajcayahuani amo motachicahuilijtinemij tech Cristo. Ta, yejuan moyolchicautinemij sayó tech míac tataman taneltocalis den huejcaucayome huan tech míac tataman tamachilisme ten axcan quiyolnemilijtinemij in amocuali ejecame ten tayecantinemij nonohuiyan.

<sup>9</sup>Huan nochi inemilis de Totajtzin Dios monextijtinemi imaco Cristo.<sup>10</sup> Huan namejuan no nanquipixtinemicoj ya nochi nojón inemilis de Totajtzin Dios porín namejuan nanpoutinemij ihuan Cristo. Huan Cristo quinyecantinemi nochi in ejecame tayecanani ten ongac.<sup>11</sup> Huan queme nanpoutinemij ihuan Cristo, ica ya nojón Cristo namechnescayotij tech namotalnamiquilis. Pero Yejuatzin amo namechtalilij ne nescayotzin tech namonacayo ica imahuan. Ta, Cristo Jesús namechajchihuilij in chicahualis de namosoltictalnamiquilis para ijcón ma amo taquitzquitinemi ica ne chicahualis de namosoltictalnamiquilis. Ica ya nojón Cristo namechquixtilij ne chicahualis de tajtacol.

<sup>12</sup>Huan tech ne tonal cuac namechahuijque, ijcuacón in Yecticatzin Espíritu namechteaxcatilij ihuan Cristo. Huan queme nanpoutinemij ya ihuan Cristo, ica ya nojón cuac Yejuatzin quitalpachojque, ijcuacón Dios namechpohua que namejuan no namechtalpachojque ihuan Cristo. Huan no cuac Yejuatzin panquisac yoltoc intzalan in ánimajme, ijcuacón iixpantzincó Dios namejuan no nanpanquisque nanyoltocque ihuan Cristo. Huan nochi nijín mochihuac porín nantacautamatque tech ne huelilis de Dios ten Yejuatzin quitenextij senteixteno cuac Yejuatzin quipanquix-

tij Iconetzin yoltoc intzalan in ánimajme. <sup>13</sup>Huan namejuan ne tonalme ya nany-olmictinemíaj ica namotajtacoluan porín Cristo ayamo namechcuetahuilitij in chic-ahualis ne namosoltictalnamiquilis. Pero axcan Totajtzin Dios namechtapojpoluij ya nochi namotajtacoluan. Huan no Dios namechaxcatilij ya ne yancuic nemilis, ijcón queme Dios quiaxcatilij Cristo se yancuic nemilis cuac Yejuatzin panquisac yoltoc intzalan in ánimajme.

<sup>14</sup>Huan ica por totajtacoluan Totajtzin Dios quipía de techixcomacas. Huan in tanahuatilme de Dios techtelchihuayaj porín amo tiquintacamatiijque. Pero Totajtzin Dios quipojpoloj ya nochi nojón taixcomacalis huan tatelchihualis ten topan huetzisquía. Huan nochi nijín motamichihuaco tech ne tonal cuac quicuoupampilojque Cristo, porín ne tatelchihualis quiyohuij ya Cristo. <sup>15</sup>Huan cuac Cristo momiquilij tech in cruz, ijcuacán Yejuatzin quintamitanilij ya nochi amocuali ejecame tayecananime. Huan no Cristo quintamiquixtilij ya nochi ninchicahualis de nochi ne hueyi chihuanime den amocuali Satanás. Huan no Cristo quintamipinautij nojonques tayecanani den amocuali Satanás. Huan no Cristo quintamitanilij hasta quintitilatztinemic nojón amocuali chihuanime queme presos. Huan ijcón quichiu-tica Cristo inixpan in tayecanani ejecame tech ne eluiyac huan talticpac.

**Ma timoyolpactijtinemican porín ticyolnemilijtinemij  
sayó ica ne tamachilis ten hualeutoc tech eluiyatzinco**

<sup>16</sup>Huan no namechilía, nocnihan, que amo xicchihuacan cuenta tacán acsame judíos namechtejteneutinemij ica por ne tacualis tenica namejuan nanquimajsehuaj oso nantayij. Huan amo no xiquincaquilican como sequin judíos namechixcomacaj porín amo nantaluichiutinemij queme yejuan oso porín amo nanquichihuaj iluit cuac ne metzti momajxitij ya oso porín amo nanmosehuáj tech sequi iluitonalme. <sup>17</sup>Porín nochi nijín tataman iluitonalme den judíos technextilijtihualayaj que Cristo hualasquía. Pero queme Cristo huala ya, ica ya nojón amo monequi ne tanextililis ten in iluitonalme quinequi technextilisque. <sup>18</sup>Huan ne tamachtiani tacajcayahuani mopoutinemij que semi amo huejueyi chihuanime, pero de tacajcayahualis san. Huan no quinmohuistilijtinemij ne ejecame ángeles. Xiquitacan que amo ximotec-ahuilican que neques tamachtiani ma amo namechquixtilis ne namopremio ten nanquiselisque ica por namonemilipan. Porín ne tacajcayahuani motachicahuilijtinemij tech in tamachilis ten yejuan tajtachíaj cuac majyá nintacochitalis cualcui. Ica ya nojón yejuan mohueyimatiij ica ne inmohueyinecayo huan momohuiscapohuaj ica ne nintamachilis de yejuan san ten mijmiquiloyot san.

<sup>19</sup>Huan ne tamachtiani tacajcayahuani mosecocaahuaj de Cristo. Huan sayó Cristo quipía huelilis para quinchicahualtía itaneltocacahuan ijcón queme toztontecon quinyecana huan quiniscaltía toomiyohuan. Huan ijcón tejuan tonacayo cuali sajsaliutoc ica por toomiyohuan para huelis moiscaltis huan momajxitis nochi tonacayo. No ijcón Cristo quichiutinemi tohuan. Huan Yejuatzin techmajmaxitijtiu huan techchicahualtijtiu nochi tejuan tiitaneltocacahuan para ma tipohuiquij sansé san ijcón queme Totajtzin quimonequiltía. <sup>20</sup>Huan namotalnamiquilis ten cualcui taj-tacol, yejua ne Dios quipohua miquic ya cuac Cristo momiquilij. Ica ya nojón namejuan ximajchihuilican de nochi tataman tamachilis tenica moyecantinemij in tayecanani ten amo cualime. Huan amo xinentinemican oc queme yesquía nantoputinemisquíaj oc ihuan in talticpacuani ten amo taneltocani. Huan amo no xi-



motecahuilican ma namechyecana nojón tamachilisme tenica moyecanaj in talticpacuani ten amo taneltocani. <sup>21</sup> Huan ne talticpacuani quinemilijtinemij ijcuín: Ma amo xicmatocacan ne tensá, huan amo xicuacan ne taman tacualis, huan nión no ximaquitzquican ica ne tamachilis.

Huan yejuan ijcón quichiutinemij porín quiyolnemilíaj que xa cachi oc Dios quinmaquixtis de nintajtacoluan. <sup>22</sup> Huan nochi nojón tanahuatilme tajtoaj den tamachilis huan den tacualis huan de manamicme ten sayó ixpolihuitij san. Huan nojón tanahuatilme huan tanexutililisme sayó hualeutoc ten tagat san. <sup>23</sup> Huan nochi nojón tanahuatilme ixnesij que majyá cuicaj hueyi tamachilis. Pero ne tanahuatilme tenahuatilíaj ma se motemacti tech nintaneltocalis; huan ma mopohuacan queme yesquía amo teyi chihuanime; huan no ma se motatzacuiliti ica nejmach de ne inacayo. Pero nochi nojón tanahuatilme amo teyi tepalehuíaj para quitamatilis ne chichualis ten cuica totalnamiquilis den soltic.

**3** Huan Totajtzin Dios namechpohua que namejuan nanpanquisque ya nanyoltoque ihuan Cristo intzalan in ánimajme. Ica ya nojón monequi ximoaxcatilijtiyacan huan xiquintacamatican in tamachilisme ten hualeutoc ne eluiyactzinco campa Totecotzin Cristo yetinemi iyecmacopaca Itajtzin Dios campa ichichualispan. <sup>2</sup> Xiquitztiyacan huan xicnemilijtiyacan ica ne tamachilisme ten hualeutoc ne eluiyactzinco. Huan amo xiquintacamatican ne tamachilisme ten poutinemij nican talticpac san. <sup>3</sup> Porín namejuan Dios namechpohua que nanmomiquilijque ya ihuan Cristo, quijtosnequi namosoltictalnamiquilis ten cualcui tajtacol, yejua ne miquet ya. Ica ya nojón axcan namonemilis sen majsitinemi ihuan ne inemilis de Cristo, huan no ijcón namonemilis sen majsitinemi ihuan inemilis de Totajtzin Dios. <sup>4</sup> Huan ne inemilis de Cristo monextijtinemi totech porín Yejuatzin techmacatoc inemilistzin. Huan cuac Cristo monextiquiu, ijcuacón namejuan nanixnesiquihue ihuan Yejuatzin huan ijcón Cristo namechmactilitiu icualtziyo.

### **Nican tajtoa de ne totajtacolnemilis ten ticsecocauque ya huan ne tochipaucanemilis ten eutoc itech Cristo**

<sup>5</sup> Huan queme nanquipiatihue nochi nijín cualtzin tatiochihualis, ica ya nojón namejuan xictajtamitiyacan ya ma miqui ya nochi namosoltictalnamiquilis ten poutinemij nican talticpac. Quijtosnequi xictajtamican nijinques tataman chihualisme: Ma amo xiahuilnentinemican ihuan ocsequin sihuame oso taca ten amo namohuan pohuij queme namicuani. Huan no amo xitanemilican ica tamachilisme ten cualcui tajtacol. Huan amo ximotemactican ma namechyecana ne tanejnequilis ten sayó mijmiquiloyot san. Huan amo xictacamatican ne tamachilisme ten momoyautoc ya ica tajtacol. Huan amo xicnejnectinemican ten teaxca san, porín ne chihualis quinejnehuilía queme cuac se quinmohuistilía tiopantatadiosme. <sup>6</sup> Huan queme in talticpacuani quichiutinemij nochi nijín tataman tajtacolme, ica ya nojón ne hueyi tatzacuilitis de Dios hualajtoc ica cualanyot inpan yejuan porín amo quitacamatinemij Dios. <sup>7</sup> Huan nochi nijín tajtacolme namejuan nanquichiutihualayaj tech namonemilis ten panoc ya.

<sup>8</sup> Pero axcan nicnequi que cachi oc xicyecahuacan ya nochi nijín tajtacolme queme nijinques: Ne tahuelot huan ne cualanyot. Huan amo xicchiutinemican ne pitzotic chihualis ten texocolía san. Huan amo xitahujuicaltijtinemican huan amo no xitamohuispolojtinemican. Huan ma amo quisa oc namoteno ne tataman tajtolme ten

cualcui tajtacol. <sup>9</sup>Huan amo no xixolopijitjinemican oc se huan ocsé, porín namejuan nanmoajchihuilijque ya ne soltic namotalnamiquilis ten cualcui tajtacol. Huan no nanmoajchihuilijque ya nochi ne tachihualisme ten hualeutoc ya tech namotalnamiquilis de tajtacol ten nanquichiutihualayaj ya.

<sup>10</sup>Huan axcan nanmoyancuicataquentijque ya ica ne chipahuac talnamiquilis de Totajtzin Dios. Huan mosta mosta Yejuatzin techyectalitiu huan techcualnextijtiu hasta titamatitihue queme Cristo ichipaucanemilis huan no hasta tiyecajsicaixmatitihue Cristo. <sup>11</sup>Huan ijcón inahuactzinco Totecotzin Cristo, Yejuatzin amo quichihua cuenta cox se tagat yesqui griego oso taca judío. Huan Yejuatzin amo no quitilía cox in tagat quinescayotijque tech inacayo oso amo quinescayotijque. Huan Dios amo no quihueyipohua como amo se taixmatinemi oso poutinemi campa pueblo escita campa nochi tamatinemij. Huan Yejuatzin amo no quichihua cuenta cox in tagat yesqui taquehual tanamac oso ten amo tanamac. Ta, nochi tejuan tiitaneltocacahuan de Cristo, masqui míac tataman timohuicaj. Huan Yejuatzin ne techyecantinemi, porín Cristo yetinemi tech tonemilipan de cada se tiitaneltocacahuan.

<sup>12</sup>Huan Totajtzin Dios namechyoltasojtac huan namechijitac para ihuantzin xipoutinemican huan no namechyolchipahuac. Ica ya nojón ximoyancuicatalilican ne tecicnelilis huan ne tetasojtalis. Huan amo no ximohueyinctinemican. Ta, xicpixtiyacan ne yolyemanilis huan no xiquijyohuican nochi tataman ohuijcyot. <sup>13</sup>Huan no ximoiyyohuilijtiyacan se huan ocsé in tataman de namotamachilisuan. Huan no ximotapojpoluijtiyacan se huan ocsé, ijcón queme cuac se acsá quiyolxocolía. Huan ijcón queme Cristo namechtapojpoluij ya, namejuan no ximotapojpoluijtiyacan se huan ocsé. <sup>14</sup>Huan no ocsepa namechilía que ximotaquentican ica ne tetasojtalis cachi oc. Porín ne tetasojtalis techsepanpohualtía se huan ocsé. Huan no ne tetasojtalis techyolmajxitía para ma amo timoyolcualanuican. <sup>15</sup>Huan Cristo Jesús ma Yejuatzin namechyolyecantiu ica ne iyolsehuilis. Ica ya nojón Dios namechijitac huan namechnotzac para nansenpoutinemisque sansé san ihuan Cristo. Huan no namechilía xictasojcamachilijtiyacan Totajtzin Dios.

<sup>16</sup>Huan in Tajtoltzin de Cristo, yejua ne ma cachi oc ma namechyolquemilolti. Huan ximomachtijtiyacan se huan ocsé huan no ximoyolmajxitijtiyacan se huan ocsé ica ne chipahuac tamachilis den Tajtoltzin de Dios. Huan xicantarocan ca salmos huan ca himnos huan ca ne cantos ten namechmachtijtinemi in Yecticatzin Espíritu. Huan ma tictasojcamachilijtiyacan Totajtzin Dios ica ne tetasojtalis ten hualeutoc tech namotalnamiquilis. <sup>17</sup>Huan nochi ten nanquichiutinemisque, huan nochi ten yesqui nanquijtojtinemisque, nochi nijín xicchihuacan sayó ica ne chicahualis den tocaytzin de Totecotzin Jesús. Huan no xictasojcamachilijtiyacan Totajtzin Dios ica por ne chicahualis de Cristo.

### **Nican tajtoa de tejuan ten tipohuij ihuan Cristo ma titatacamatinemican**

<sup>18</sup>Huan namejuan nantesihuahuan den nantaneltocani, monequi ximotecahuilican ma namechyecanacan namoyoquichuan. Huan nochi nijín quimonequiltía Totecotzin Cristo, porín namejuan nantacuaautamatinemij ihuantzin. <sup>19</sup>Huan namejuan, nanteyoquichuan den nantaneltocani, monequi xiquintasojtatiyacan namosihuahuan huan xiquinmohuiscanojnotzacan huan amo xiquinyolxocolican. <sup>20</sup>Huan namejuan, nanteconeahuan de nantaneltocani, monequi xiquintacamatinemican namoteiscaltijcahuan tech nochi namonemilipan porín ica nijín namotataca-

matilis nanquiyolpactíaj Totecotzin Cristo. <sup>21</sup> Huan namejuan nantetatme den nantaneltocani, monequi amo xiquincualancacalaquican namoconehuan cuac nanquinequij nanquinmejmela huasque, para ma yejuan ma amo moyolajsican de namotamachtilis.

<sup>22</sup> Huan namejuan nantaquehualme ten tanamacme, monequi xiquintacamatine-mican namopatrones de nican talticpac. Huan amo sayó ximotequitiltican cuac yejuan namechitztocque para ijcón cachi oc nanquinyolpactíaj. Ta, cachi cuali namechilía xiquintequitiltican namopatrones ica nochi namotalnamiquilis. Huan ijcón xicchi huacan porín namejuan nanquimohuistilijtinemij Totajtzin Dios.

<sup>23</sup> Nochi ten yesqui tequit nanquichihuasque, namechilíaj que xicchi huacan ica nejmach huan ica yolpaquilis, ijcón queme nanquitequitilijtosquíaj Totecotzin Jesús. Huan amo xitequitican sayó para nanquinyolpactisque namopatrones de nican talticpac san. <sup>24</sup> Huan namejuan cuali nanquimatinemij ya que in Totecotzin Cristo, Yejuatzin namechtayocolis se nemactil, yejua ne namoxolal de Cristo. Huan ijcón mochihuaquiu porín namejuan nanquitequitilijtinemij Cristo nican talticpac. Huan Cristo Jesús Yejuatzin de melau namoyec Tecotzin. <sup>25</sup> Huan no xicmatican que aquen quichiutinemis sayó ten amocuali chihualis nican talticpac, yejua ne Dios quix-tahuilis ijcón queme quichiutinemía tajtacol. Porín Totajtzin Dios amo quinchichicotasoja in talticpacuani. Ica ya nojón Yejuatzin quinixcomacas in amocuali chihuanime masqui yejuan huejueyi chihuanime oso amo.

**4** Huan namejuan nanpatrones ten nantaneltocani, monequi amo xiquincaj-cayahuacan namotaquehualuan. Ta, namechilía xiquintequitiltican ca sansé san tamelahuac tamachilis san. Huan ijcón xicchi huacan namejuan nanpatrones porín cuali nanquimatocque ya que nanquixixtinemij nepa eluiyactzinco se yec Tecotzin, huan Yejuatzin in Cristo.

<sup>2</sup> Nachipa xicsentocacan ximofuerzajuijtiyacan cuac nanmotatatautilíaj ihuan Cristo. Huan amo ximoyolcucuepacan tech namotatautilis. Ta, xiixpetantocan huan ximotachilican cachi huan no ximotasojamachilijtiyacan ihuan Dios. <sup>3</sup> Huan namechilía ximoteixpantican inahuactzinco Totajtzin Dios ica por tejuan para ma Yejuatzin techtatapohuilis campa huelis titenextilisque Itajtoltzin. Huan ijcón huelis niquinmatiltis in tagayot ne ichtacatamachilisme de Dios de que axcan Cristo cuali huelis namechmaquixtis namejuan ten amo nanjudfos. Huan nican nechtzacuacque ya que queme preso porín nitanojnotztinemic ica in Tajtoltzin de Dios. <sup>4</sup> Huan no ximotatautilican ihuan Dios ica por nejua para huelis cachi oc niquinyecmejmela huilis in tagayot den Tajtoltzin de Cristo, ijcón queme monequi ma nichihua.

<sup>5</sup> Huan xichipaucanemican ica ne cuali tamachilis ihuan neques ten amo taneltocani de Cristo. Huan xictatequiutijtiu in tonalme ca cuali para xitanojnotztinemi ica in Tajtoltzin de Dios. <sup>6</sup> Huan namotajtolis nachipa ma monextijtiu ica ne iteicnelilis, huan amo aquen xiquinyolxocolijtiyacan. Huan ijcón nanquimatiyasque de queniu huelis nanquinanquiliijtiyasque cada se tagat ten quinequi momachtisque de Cristo.

### Nican Pablo quintajpaloa míac taneltocani

<sup>7</sup> Huan Tíquico yejua in totasojicnitzin huan se tacuautamatcatequitique huan no totequiticaicniu tech in tequit de Totecotzin Cristo. Huan ne Tíquico namechtapohuiti de nejua. Huan yejua no namechmatiltiti de nochi notequihuan ten nicchiutinemi nican. <sup>8</sup> Huan nijín Tíquico namechontitanilij ya para namechtapo-

huis de queniu tiyetocque huan de toni ticchiutinemij. Huan ijcón Tíquico cachi oc namechyolsehuis. <sup>9</sup>Huan Tíquico yohui ihuan Onésimo namechitatij. Huan ne Onésimo totasojcinitzin huan se tacuautamatcaicniyu taneltocacque ten no poutinemi namochancopaca. Huan nijín ome nochi namechmatilitij de toni mochiutoc nican Roma.

<sup>10</sup>Huan nijín Aristarco no nican nohuan tzactoc queme preso, huan yejua namechontajpaloa. Huan in Marcos yejua in iprimojicniyu de Bernabé, yejua ne no namechontajpaloa ya. Huan ipa namechontapohuijca ya de nochi ne Marcos. Huan cuac yejua namechcalpanoti, ijcuacón xicselican ca tetasojtalis. <sup>11</sup>Huan no namechontajpaloa ne tocníu ten monotza Jesús ten cojpacatocaytíaj Justo. Huan de nochi in judíos ten taneltocani de Cristo sayó nijinques nechpalehuijtinemij nican. Huan sayó yejuan tequititinemij nohuan para titanojnotztinemij de queniu Totajtzin Dios quinyolyecantiniyu itaneltocahuan ica ichichualis. Huan nochi nijinques notequiticaicnihuan nechyolsehuijtinemij.

<sup>12</sup>Huan no namechontajpaloa ne tocníu Epafras, yejua no se tequitique de Cristo Jesús huan yejua poutinemi namochancopaca. Huan Epafras nachipa motatataulijtoch ihuan Dios ica por namejuan, hasta motajyohuiltijtinemi, para ma xiyecyetcancan tech namotacuautamatilis huan para ma xiyolmajsitocan huan para ma amo teyi namechpolo oc ten nochi ten Dios quimonequiltía que xicpixinemican. <sup>13</sup>Porín nejua cuali niqiztinemi de queniu Epafras moyolcuejmolojtinemij por namejuan. Huan yejua no yoltanemilijtinemij ica por neques taneltocani ten calyetocque campa Laodiceajcopaca huan campa Hierápolisocopaca. <sup>14</sup>Huan in Lucas, in totasojtepatijcau, yejua no namechontajpaloa. Huan no namechontajpaloa in tocníu Demas.

<sup>15</sup>Huan nicnequi que no namejuan xiquintajpalocan in tocníu huan taneltocani ten yetocque ne Laodiceajcopaca. Huan no xictajpalocan in tocníu sihuat ten monotza Ninfas. Huan xiquintajpalocan nochi in taneltocani ten mosentilíaj ompa ichan para quimohuistilisque Totajtzin Dios. <sup>16</sup>Huan namejuan cuac nanquitamileerosque ya nijín noamatajcuilol, ijcuacón xiquintitanilican nijín amatzin hasta in taneltocani ten yetocque Laodiceajcopaca. Huan no cuali xicleerocan namejuan ne amat ten nictitanic ompa. <sup>17</sup>Huan xiquilican in tocníu Arquipo ijcuín: “Tejua Arquipo, nimitznejmachtía xicchihuati ica nejmach nojón tequit ten Totecotzín mitzmactilij ya”.

<sup>18</sup>Huan nejua in Pablo niqijcuilola ica nomay nijín ne tajpalolis. Xiquelnamictiyacancan que nejua nechzacuacque ya queme preso. Huan ma Dios namechyolicnelijtiu. Amén.

## IN TAYECANA TAJCUILOLAMATZIN TEN QUITAJCUILOHUILIJ IN TATITANIL SAN PABLO PARA IN TANELTOCANI TEN CALYETOCQUE TECH PUEBLO DE TESALONICA

### Pablo quintajcuilohuilij in taneltocani campa Tesalónica

**1** Nejuan ni Pablo huan inixpan in Silvano huan in Timoteo namechijcuilohuilía nijín amat de namejuan nantocnihuan nantaneltocani ten nancalyetocque tech ne pueblo Tesalónica. Huan namejuan nansenpoutocque ihuan Totajtzin Dios huan ihuan Totecotzin Jesucristo. Huan nicnequi que xicselijtiyacan ne teicnelilis huan de ne yolsehulis ten hualeutoc inahuac Totajtzin Dios huan inahuac Totecotzin Jesucristo.

### Pablo tajtoa de quenín tacuautamatinemíaj in tocnihuan de Tesalónica

<sup>2</sup>Huan tejuan nachipa tictasojcamachilíaj Dios ica por nochi namejuan. Huan cuac tejuan timotatautilíaj ihuan Dios, ijcuacón tamechelnamiqij nannochin.

<sup>3</sup>Huan tamechelnamictiyohue inahuactzinco Totajtzin Dios de quenín namejuan nanmotequitiltijtiyohue para Dios porín nanyectacuautamatiyohue ihuantzin. Huan no tamechelnamiqij iixpantzinco Dios de quenín namejuan nanmosiohuiltijtiyohue porín nanquipáj ne tetasojtalis de Dios. Huan no tamechelnamiqij inahuactzinco Dios de quenín nanquiyolicachixtiyohue, masqui icsá ca tajyohuilis, ne tonal cuac mohualuicas in Totecotzin Jesucristo. <sup>4</sup>Pues, tocnihuan, ticmatocque ya que Dios namechijitac ya para ximocahuacan xiixcahuan. <sup>5</sup>Porín cuac tamechnojnotzque ica in yancuic Tajtoltzin de Dios, ijcuacón amo tamechnojnotzque ica in chicahualis de tejuan san. Ta, ne totajtoluan cuicaya ne chicahualis ten cualcui in Yecticatzin Espíritu, huan no cuicaya ne yolchicahualis ten yec melau tenica tamechnojnotztzinemíaj. Huan namejuan cuali nanquimatocque ya de quenín tichipaucanemíaj namohuan para tamechpalehuisse.

<sup>6</sup>Huan mochihuaco que namejuan melau nanchipaucanenque ijcón queme nantechitilijtineneque que tejuan timohuicatinemíaj ihuan Totecotzin. Huan namejuan no nanchipaucanentinenque ijcón queme Yejuatzin chipaucanemico. Huan namejuan melau nanmoaxcatilijque Dios Itajtoltzin. Huan in Yecticatzin Espíritu namechylpactijtiyaya, masqui namejuan namechtajyohuiltijtinemíaj in talticpacuani. <sup>7</sup>Huan cuac namechitacque nojón pueblojuani ten calyetocque campa Macedonia huan Acaya, ijcuacón yejuan no peuque taneltocej de Cristo, ijcón queme namejuan nantacuautamatque. <sup>8</sup>Huan namejuan nancalyetoni de Tesalónica, namotech hualehuac huan momoyahuac nochi nijín Tajtoltzin de Totecotzin Jesucristo. Huan nijín Tajtoltzin momoyahuac amo sayó campa Macedonia huan Acaya. Ta, no nohuiyampa quimaticoj ya que namejuan nantacuautamatinemij ihuan Dios. Ica ya nojón tejuan amo monequi oc que ma ay titanojnotztzinemican oc. <sup>9</sup>Ta, cachi oc in tagayot de Macedonia campa nancalyetocque, yejuan teilijtinemíaj de queniu tamechcalpanotoj, huan no de quenín nantechselijque ca tetasojtalis. Huan no yejuan teilijtinemíaj de quenín namejuan nanquicauque in tatadiosme tamachijchiume para nanquitacamatisque Totajtzin Dios. Huan no namejuan nanmotemactijque imaco Dios para ijcón nanquitequitiltiyohue ne Dios ten nachipa yoltica huan nachipa

yolmelahuactzin. <sup>10</sup> Huan no teilijtinemij que namejuan nanquiyolicachixtocque ne tonal cuac mohualucas Jesús de ne eluiyactzinco, Yejuatzin ten Iconetzin Dios. Porín Totajtzin Dios quipanquixtij in Jesucristo yoltoc intzalan in ánimajme. Ica ya nojón in Cristo techmaquixtijtiu para ma amo tihuetziti tech ne hueyi tatzacuiltis ten hualajtoc.

### In tequit ten quichiutinemic in tatitanil San Pablo campa pueblo de Tesalónica

**2** Huan namejuan, nantocnihuan, cuali nanquimatocque ya que amo nencajtí san cuac titequititoyaj namohuan. <sup>2</sup> Huan no nanquimatocque ya que cuac titequititinemíaj campa ne pueblo de Filipos, ijcuacón ne pueblojuani techuijuicaltiyaj huan techtajyohuiltiyaj. Pero cuac tamechajstoj namejuan de nanopueblojuani de Tesalónica, ijcuacón Totajtzin Dios techyolchicahuac para tamechnojnotzasque ica in Tajtoltzin de Dios ten cualcui ne nemaquixtilis, masqui no techtajyohuiltiyaj huan techtejtelchihuayaj sequin pueblojuani de Tesalónica. <sup>3</sup> Huan cuac tamechnojnotzayaj ica in Tajtoltzin de Dios, ijcuacón tejuan amo titanojnotztinenque ica ne xolopijyot san nión no ica pitzotic tamachilis. Huan amo no tamechnojnotzayaj ica in Tajtoltzin de Dios para tamechyolcajcayahuasque san. <sup>4</sup> Huan Totajtzin Dios tacuautamatic tohuan. Ica ya nojón Yejuatzin techmactilij ya nijín tequit de que ma tejuan ay titanojnotzacan ica in Tajtoltzin ten cualcui ne nemaquixtilis. Huan ijcón melau ticchiutinemíaj tejuan. Huan tejuan ticchiutinemíaj nijín tequit amo sayó para tiquinyolpactijtinemisquíaj in tagayot san. Ta, para ticyolpactijtinemisque Totajtzin Dios, ten melau techyecyoltemolía totamachilisuan. <sup>5</sup> Huan namejuan cuali nanquimatocque ya que amo queman tamechnojnotzque sayó para tamechueyichihuasquíaj. Huan Dios conmatica que amo queman tamechnojnotzque ica tajtolme den tecajcayahuaj san para ijcón timotatanilisquíaj ca tomin san. <sup>6</sup> Huan tejuan amo queman tictemojtineneque que ma acsame ma techmohuistilican. Porín amo ticnequíaj ma namejuan huan nión ocsequin taca ma techmohuistilican. Huan cuali xicmatican que masqui tejuan cuali tihuelisquíaj tamechmachililtisquíaj ica ne huelilis ten ticalcuíaj queme titatitanilme de Cristo, pero tejuan amo ticneque ijcón ticchihuasque. <sup>7</sup> Ta, cuali nanquimatocque ya que timochiuque tiyolyemanque namohuan ijcón queme se tenan ten quinyectasojpía ipiluan. <sup>8</sup> Huan tejuan semi tamechyoltasojtayaj. Ica ya nojón ticnequíaj tamechmactisque amo sayó in Tajtoltzin de Dios ten cualcui ne maquixtilis. Ta,, no ticnequíaj tamechmactilisque tonemilis, masqui ma topan huetzisquía namotajyohuilis. Huan ijcón ticchiuque porín namejuan nanmochiuque semi nantotasojicnihuan. <sup>9</sup> Huan namejuan, nantocnihuan, cuali nanquielnamiquij de quenín titequititoyaj huan timosioutiyaj para timotequipanosque. Huan melau ijcón ticchiuque yohualitonal timotequitiltiyaj para ma amo tamechtechcahuilisque xitechpalehuican. Ica ya nojón tejuan timotequipanoayaj nochi in tonalme cuac tamechnojnotztinemíaj ica in Tajtoltzin de Dios ten cualcui ne nemaquixtilis.

<sup>10</sup> Huan namejuan nanquitacque huan no Totajtzin Dios conmatica de quenu tichipaucanemíaj, huan de quenu timelaucanemíaj cuac namohuan titequititinemíaj. Huan ijcón tejuan timoyecuicayaj namohuan para ma amo aquen huelis techteluiliani ica tajtacol. <sup>11</sup> Huan no cuali nanquimatij de quenu tamechyolmajxitijtiyaj huan tamechyoltalijtinemíaj cada senme de namejuan den nantaneltocani, ijcón queme se tetat quinyojyoltalía ipiluan. <sup>12</sup> Huan no tamechnahuatili-

ayaj de que xichipaucanemican ijcón queme Totajtzin Dios quimonequiltía. Porín Yejuatzin namechnotzac ya que ximotecahuilican ma Dios namechyolyecana ica ihueyichicahualis huan ma tatanextijtoc namoyolijtic ica icualtziyo.

<sup>13</sup> Ica ya nojón tejuan nachipa tictasojcamachilijtiyohue Totajtzin Dios ica por namejuan. Porín cuac namejuan nanquiselijque ya in Tajtoltzin de Dios tenica tamechnojnotzque, ijcuacán namejuan nanquiselijque totajtoluan amo queme cuac tagayot tamechnojnotztinemiáj san. Ta, nanquiselijque totanojnotzalis queme cuac Dios namechnojnotzoc. Huan totanojnotzalis, yejua ya ne in melahuac Tajtoltzin de Dios, huan ne Tajtoltzin tequititoc namoyolijtic de namejuan den nantaneltocani. <sup>14</sup> Huan namejuan, nantocnihuan, namopan mochihuaco ijcón queme nipan mochihuac in tocnihuan taneltocani de Dios ten calyetoyaj campá Judeajcopaca. Porín namopueblojcahuan namechtajyohuiltijque ijcón queme in pueblojuani judíos quintajyohuiltijque in taneltocani de ompa Judeajcopaca, porín yejuan no poutinenque ihuan Cristo Jesús. <sup>15</sup> Huan yejuan ne pueblojuani judíos quimictijque Totecotzin Jesucristo, ijcón queme quinmictijtihualayaj ne huejcautanahuatiani de Dios. Ica ya nojón yejuan no techcalanquixtijque de ne pueblo de Tesalónica. Huan ipa in taca judíos amo quiyolpactijtinemij Dios. Huan no yejuan quincualanuáj aquen nesi tagat ten amo poutinemij inpueblojcopaca. <sup>16</sup> Huan cuac tejuan ticnequíaj tiquinnojnotzasque in pueblojuani de Tesalónica ica in Tajtoltzin de Dios, ijcuacán in judíos yejuan techtacahualtiayaj ma amo tiquinnojnotztinemican para ma amo maquisacan in tagayot ten amo judíos. Ica nijín ten quichihuaj in judíos, yejuan momiactilíaj cachi oc nintajtacoluan. Ica ya nojón axcan inpan huetzic ya in taca judíos ne hueyi tatzacuilitis de Dios.

### **Pablo cuac huejca yetoya ocsepa quinequíaj quincalpanotiu in taneltocani de Tesalónica**

<sup>17</sup> Huan namejuan, tocnihuan, timoxexeloque se huan ocsé quipía tonalme ya. Pero mosta mosta nachipa tamechelnamictinemij masqui tejuan amo timosenitzinemij oc. Huan queme amo timoitztinemij oc, ica ya nojón cachi oc ticyolnejnequij tamechitasque. <sup>18</sup> Nachipa ticnequíaj tiyasque tamechitatihue. Nejuatzin ya ni Pablo miacpa nicnequíaj namechitatu pero in amocuali Satanás techzajtza-cuiliaya. <sup>19</sup> Huan melau ticyolnejnequij tamechitasque porín ica por namotacuautamatilis ticpiasque ne yolchicahualis huan ticpiasque ne yolpaquilis. Huan no ica por namotacuautamatilis timohuelitatihue huan timoyolpactitihue iixpantzincó Totecotzin Jesucristo tech ne tonal cuac Yejuatzin mohualuicas. <sup>20</sup> Huan ocsepa namehilía que ica por namotacuautamatilis timohuelitatihue huan timoyolpactitihue tech ne tonal cuac mohualuicas Totecotzin Cristo, porín namejuan ya nantechyolsehuíaj huan nantechyoltalíaj.

**3** Huan queme tejuan amo hueli oc tiqijyohuíaj de amo tamechitasque, ica ya nojón timotencauque de que timocahuasque toselti tech in pueblo de Atenas. <sup>2</sup> Huan no timotencauque de que tamechontitanilisque in Timoteo; yejua no se tocníu den tequitique de Dios. Porín yejua sen tequititinemi tohuan ica nijín tequit de titanojnotztinemij ica in Tajtoltzin de Dios ten cualcui ne nemaquixtilis. Huan in Timoteo yejua namechyolchicahuac huan namechyolmajxitij para cachi oc nantacuautamatisque ihuan Totajtzin Dios. <sup>3</sup> Ica ya nojón in Timoteo tamechontitanilíaj ya para ma amo aquen moyolcuejmolocan cuac ongac tajyohuilis. Porín namejuan

cuali nanquimatocque ya que Dios quimonequiltía ma tiquijyohuican nijín tajyohuilisme. <sup>4</sup> Porín xiquelnamiquican de que cuac namohuan tiyetinemíaj oc, ijcuacán tejuan ipa tamechnejmachtijque ya que ticpiaquihue tajyohuilisme. Huan melau ijcón mochihuaco queme tamechilijque. <sup>5</sup> Huan queme amo huelía oc niquijyohuis de amo namechitas, ica ya nojón namechontitanilij in tocníu Timoteo para ma yejua namechitati de queniu hueyixtoc namotacuautamatilis, para ijcón yejua nechiliquiu. Porín nejua nicyolmohuiliaya de que in amocuali Satanás namechuetziltisquía tech in tajtacol. Huan como ijcón mochihuasquía, ijcuacán nochi totequiu ten ticchiuque namohuan nencajtisquía san.

<sup>6</sup> Pero cuac Timoteo mohualcuetato ya de ompa Tesalónica huan ejcoc campa tiyetocque, ijcuacán yejua techyectapohuij huan techyolpactij de queniu namejuan nanquisentocaj nantacuautamatiyohue huan nantetasojtatinemij. Huan no techilij que namejuan no semi nantechelnamiquij ca ne tetasojtalis. Huan no techilij que namejuan no nanquinequij nantechitasque ijcón queme tejuan ticnequij tamechitasque. <sup>7</sup> Ica ya nojón namejuan, nantocnihuan, masqui nican tejuan tiyoltasematoyaj ya huan tiyoltajyohuiayaj, pero cuac ticmatque de queniu hueyixtoc namotacuautamatilis, ijcuacán nantechyolsehuijque porín ticmatque que namejuan cuali nanyetocque. <sup>8</sup> Porín namejuan nantechyancuicayolpactíaj cuac ticmatque que namotacuautamatilis yec tzineutoc ya tech in chicahualis den Totecotzin Jesucristo. <sup>9</sup> ¡Hasta amo ticmatij oc de queniu ticueyitasojcamachilisque Totajtzin Dios ica por namejuan, huan ica por ne yolpaquilis ten techmactilij Timoteo iixpantzinco Totajtzin Dios! <sup>10</sup> Huan yohualitonal senca timotatautilíaj ihuan Dios que ma Yejuatzin techcahua de que ma timoixitacan oc se huan ocsé para ijcón cachi huelis tamechmajxtilisque namotacuautamatilis ten namechpoloa oc. <sup>11</sup> Huan axcan ticnequij que Totajtzin Dios huan Totecotzin Jesucristo ma Yejuatzin techyecanati para ma hueli tamechcalapanotij. <sup>12</sup> Huan in Totecotzin ma namechiscaltijti huan cachi oc ma namechmiacquilititiu namotetasojtalis para ma ijcón cachi oc ximotasojtacan se huan ocsé. Huan amo sayó xiquintasojtacan in tocnihuan taneltocani. Ta, xiquintasojtatiyacan nochi tagayot ijcón queme tejuan tamechyoltasojtaj. <sup>13</sup> Huan ma Totajtzin Dios namechyolchicauti para queniu nanchipaucanemisque, huan para ma amo aquen huelis namechteluilisque ca tajtacol iixpantzinco Totajtzin Dios tech ne tonal cuac Totecotzin Jesucristo mohualuicas nican talticpac ihuan nochi ne yolchipauque taneltocani.

### In chipaucanemilis yejua ne quiyolpactía Dios

**4** Huan tejuan tamechnextilijtinemíaj de queniu monequi xichipaucanemican para ijcón nanquiylolpactijtiyasque Dios. Huan ijcón nanquichiutinemij. Pero axcan, tocnihuan, tamechtatautíaj huan tamechyolmajxitíaj ica in chicahualis den Totecotzin Jesucristo que cachi oc xichipaucanentinemican. Huan tamechtatautíaj huan tamechyolmajxitíaj ica in chicahualis den Totecotzin Jesucristo ijcuín: ijcón queme tejuan tamechnextilijtinemíaj que xichipaucanemican para nanquiylolpactijtiyasque Dios, ijcón cachi oc namejuan xicchiutinemican. <sup>2</sup> Huan namejuan cuali nanquimatocque ya de queniu tamechnajnahuatijque que xichipaucanemican itencopaca Totecotzin Jesús. <sup>3</sup> Huan yejua nijín ten Totajtzin Dios quimonequiltía que namejuan xicchihuacan: Ximotemactijtinemican sayó imacotzinco Dios para ijcón xichipaucanemisque. Huan no Dios quimonequiltía que ne naquen namicuani ya



ma amo ahuilnentinemican ihuan ocsequin sihuame oso taca. <sup>4</sup>Huan no Dios qui-monequiltía que cada se tocníu ma quimati queniú ihuan yetos isihuatzin ca ne yolchihualis huan ica ne mohuisyot. <sup>5</sup>Huan no Dios quimonequiltía que in nam-icuaní ma amo quínixnejnectinemican oc ocsequin sihuame oso taca, porín nochi ní-jín quichiutinemij neques ten amo quixmatij Totajtzin Dios. <sup>6</sup>Huan íjcón namechye-quiltía que ma amo aquen senme de namejuan que ma moixehuí quicajcayahuas se icníu ica ne ahuilnemilis porín Totecotzin tetatzacuiltía chicahuac, íjcón queme ne achtopa ya tamechilijque huan tamechnejmachtijcaj ya que ma amo íjcón xicchihua-can. <sup>7</sup>Porín Totajtzin Dios techijitac huan technotzac para ma tiyolchihauca-nemican. Huan Yejuatzin techijitac para ma amo tinentinemican tech ne pitzotic nemilis. <sup>8</sup>Huan íjcón ne naquen quimajpehuasque níjn tanextililisme, yejuan nojonques quixnamiquij Totajtzin Dios, huan amo quixnamiquij sayó se tagat san. Huan cuali nanquimatij que Totajtzin Dios techyolpexontía ica in Yecticatzin Espíritu. <sup>9</sup>Huan axcan tamechonnojnotzaquí de queniú nanmohuicaj tohuan ica ne tetasojtalis. Pero amo semi monequí ma tamechijcuilohuilican de ne tetasojtalis, porín Tota-jtzin Dios namechyecajsicanextilijtiu ya de queniú monequí ximosepantasojtacan se huan ocsé. <sup>10</sup>Huan melau no íjcón nanquichiutinemij de que nanquintasojtatinemij nochi in tocnihuan ten calyetocque ne Macedoniajcopaca. Pero cachi oc tamechon-tatautíaj, tocnihuan, de que cachi oc ma mohueyiltijtiu namotetasojtalis se huan ocsé. <sup>11</sup>Huan no tamechilíaj que semi xicyolnejnequican de queniú nantamatcane-misque tech nochi namonemilispán. Huan amo ximocalaquijtinemican campa amo namotequíu. Huan xitequitijtinemican ca namomahuan íjcón queme Dios namech-mactilij ya namotequíu cada senme. Porín íjcón no tejuan tamechnajnahuatijcaj ya que xicchihuacan. <sup>12</sup>Huan xichihauca-nemican íjcón queme tamechiluijque ya. Huan como nanchihauca-nemisque, íjcuacón in tagayot ten amo taneltocaní, yejuan nojonques namechyequitztinemisque. Huan íjcón amo teyí namechpoloquíu tenica nanixpanosque.

### Nican tajtoa de ne tonal cuac mohualuicas Totecotzin

<sup>13</sup>Huan no, tocnihuan, ticnequí xicmatican toni mochihuas ica neques tanelto-caní ten cochtocque tech in miqulís ya, para ma amo ximoyolcococan íjcón queme moyolcocojtinemij ne ocsequin tagayot ten amo quiyolicachixtocque que ma mo-hualuicas de ne eluiyactzinco in Totecotzin. <sup>14</sup>Huan tejuan ticneltocaj que Jesús momiquilijca ya huan ocsepa panquisac yoltoc intzalan in ánimajme. Huan no íjcón ticneltocaj que Dios quínualcuis ihuan Jesús neques taneltocaní ten cochtocque tech in miqulís ya. <sup>15</sup>Ica ya nojón tamechnextilíaj ica itencopaca Totecotzin íjcuín: Tejuan ten tiyoltinemij oc huan ten timocahuaj oc nican talticpac hasta cuac mo-hualuicas Totecotzin, tejuan amo tiquinyecanatihue huan amo no tiyasque ne eluiy-actzinco achtopa huan que ne taneltocaní ten cochtocque tech in miqulís ya. <sup>16</sup>Ta, cuac Totecotzin mohualuicas de ne eluiyactzinco, íjcuacón Yejuatzin tachicau-canahuatis ica ne tanahuatil den tayecanque ángel. Huan cuac mocaquis tapitzasque queme ica se trompeta de Dios, íjcuacón mohualuicas Yejuatzin. Huan nochi neques ten tacuautamatque ihuan Cristo huan momiquilijque ya, yejuan nojonques Dios achtopa quinpanquixtis yoltocque intzalan in ánimajme. <sup>17</sup>De ompa tejuan ten tiy-oltinemij oc huan timocahuaj oc, íjcuacón techsenolochajocuisque huan techuicas-que ne ejecaixco campa ticnamiquisque Totecotzin. Huan íjcón nachipa tisenyetoti-

hue ihuan Yejuatzin. <sup>18</sup>Huan ica nijín tajtolme ximosepanyolmajxitican huan ximosepanyolchicahuacan se huan ocsé.

**5** Pero, tocnihuan, tamechiláj que amo monequi oc tamechtajcuilohuilisque oc de ne tonal queman mohualuicas in Totecotzin oso quenín mochihuaquiu nochi nojón. <sup>2</sup>Porín namejuan cuali nanquimatij ya que ejcotihuetziqiu ne tonal cuac mohualuicas in Totecotzin cuac tejuan amo ticchixtocque, ijcón queme mochihua cuac se tachtecque quistihuetziqui de yohual. <sup>3</sup>Huan cuac in tagayot quiqtojosque que xitamcayetocan san huan xiyecyetocan san, ijcuacán yejuan quinquemiloquiu se hueyi tahuejuelolis sepan san, ijcón queme se sihuat ijsiucapehua ca ne tonehuilis cuac tayolítiti. No ijcón in tagayot quinquemiloquiu ne tayohuilis ca se ijsiucayot, huan yejuan amo maquisasque. <sup>4</sup>Pero namejuan, nantocnihuan, amo xinentinemican tech ne tayohuayanilot den tajtacol para ma namechichtacacuis ne tonal cuac mohualuicas in Totecotzin, ijcón queme ne tachtecque teichtacahuía ica ne ijsiucayot. <sup>5</sup>Porín nochi namejuan nanpoutinemij ihuan ne Tajtoltzin de Dios queme se tanextzin ten tatanextía queme in tonaltzin. Huan amo tipohuj oc campa ongac tajtacol queme ne tayohuayanilot den yohual. <sup>6</sup>Ica ya nojón monequi ma amo ticsentocacan oc tech totajtacoluan queme ne ocsequin tagayot. Ta, monequi ma tijsatocan huan ma ticuatamatcanentinemican. <sup>7</sup>Huan neques ten cochisnequij, yejuan cochij de yohual. Huan ocsequin taca ten quinequij mohuintisque, yejuan nojonques mohuintijtinemij de yohual. <sup>8</sup>Pero tejuan tipoutinemij campa ne tanextzin de Dios. Ica ya nojón monequi ma ticuatamatcanentinemican. Huan tejuan ma ticpalehuijtiyacan toyolojuan ica totacuautamatilis huan ica yoltetasojtalis, ijcón queme in soldados mopalehuijtinemij nielpampa ca ne tepos yohualtic ten quiláj coraza. Huan tejuan no ma ticyolicachixtiyacan ne nemaquixtilis de Cristo. Huan ica nijín cuali tamachilis timopalehuijtinemisique ca cuali, ijcón queme in soldado queman cuaactinemi ne teposcuatzacuiloni ten quiláj yelmo. <sup>9</sup>Porín amo techtalij Totajtzin Dios para techtatzacuilitis. Ta, para ma ticyeajscan ne nemaquixtilis imacotzincototecotzin Jesucristo. <sup>10</sup>Huan Jesucristo momiquilijtzinoco toixpatca huan quixtahuac totajtacoluan. Huan ijcón masqui tiixpetantosque oso masqui timomiquilisque, pero Yejuatzin quimonequiltía que ma timoajscan iixpantzinco Yejuatzin, huan ma tintinemisique ihuantzin sen nachipa. <sup>11</sup>Ica ya nojón namejuan ica nijín tajtolme ximoyolmajxitican huan ximoyolchicahuacan se huan ocsé para ma hueyixto namotacuautamatilis ijcón queme nanquichiutocque ya.

### Pablo quinyolmajxitía in tocnihuan

<sup>12</sup>No tamechtatautáj namejuan, tocnihuan, que xiquinpialican mohuisyot neques ten tequititinemij namohuan porín yejuan namechycantinemij ihuan Dios huan namechyolmajxitijtinemij de queniu Dios quinequi xinemican. <sup>13</sup>Huan namejuan monequi xiquintacachihuacan huan xiquintasojtacan namotayecancacahuan por ica ne tequit ten yejuan quichiutinemij ica por namejuan. Huan ximohuicatinemican ca ne yolsehuilis se huan ocsé.

<sup>14</sup>Huan no tamechtatautáj, tocnihuan, xiquinyolmajxitican neques ten sayó tatzucanentinemij. Huan xiquinyolchicahuacan neques ten yolcuetautinemij ica ohuijgayot. Huan xiquinpalehuijtiyacan neques ten amo quipíaj hueyi tacuautamatilis. Huan no xiquinijyohuilijtiyacan nochi in ohuijgayot ten ne tocnihuan quichihuj.

<sup>15</sup> Huan no ticnequij que xiquinyequitacan in tocnihuan ijcuín: Cuac acsá namechchihuilis tensá ica ten amo cuali, ijcuacón ma amo aquen no ijcón ma quichihualti. Ta, cachi cuali xictemocan queniu para nanmopalehuijtinemisque se huan ocsé ihuan nochi in talticpacuani. <sup>16</sup> Huan namejuan nachipa ximoyolpactijtiyacan. <sup>17</sup> Huan ximotatautilican ihuan Dios yohualitonal. <sup>18</sup> Huan xictasojcamachilijtiyacan Dios ica nochi ne ten namopan mochiutiu. Huan nijín tasojeamachilis ijcón quimonequiltía Dios xicchiutiyacan namejuan ten nanoputinemij ihuan Cristo Jesús. <sup>19</sup> Huan amo xictzajtzacuilican in tequit de Yecticatzin Espíritu tech namoyolijtic. <sup>20</sup> Huan amo xiquinixtopeutiyacan neques tamachtiani ten namechnextilijtiyohue in tanahuatil ten quiselijque de Dios. <sup>21</sup> Huan cuali ximoyequixejecoltijtiyacan ica in tanextililisme ten namechmacaj ne namotamachtijcahuan; huan sayó xicselijtiyacan ten cuali san. <sup>22</sup> Huan ximosecocahuacan de nochi tachihualis ten tamatisnequi queme tajtacol.

<sup>23</sup> Huan sayó Totajtzin Dios techyolsehuía. Huan ticnequij que Yejuatzin ma namechyectamiyolchipahua ya. Huan no ticnequij que Yejuatzin ma namechyecpixinemi nanchipauque tech namotalnamiquilis, huan no tech namotamachilis huan tech no namonacayo; para ma amo aquen huelis namechpajpantis ica tajtacol tech ne tonal cuac mohualucas Totecotzin Jesucristo. <sup>24</sup> Huan Totajtzin Dios namechijitac huan namechnotzac ya porín Yejuatzin yolmelahuactzin huan quichihuati nochi ten namechtenilijca ya.

### **Pablo quintajpaloa huan quintiochihua nochi in tocnihuan**

<sup>25</sup> Huan, tocnihuan, ximotatautilican ica por tejuan. <sup>26</sup> Huan xiquintajpalocan huan xiquincamacpipitzocan nochi in tocnihuan ica mohuisyot huan ica chipahualis. <sup>27</sup> Huan namechnahuatilía ica itencopa Totecotzin ten namejuan nantayecanani que xiquinleerohuilican nijín amat nochi in tocnihuan taneltocani. <sup>28</sup> Huan ticnequij que Totecotzin Jesucristo ma namechyolicnelijtiu sen nachipa. Ma ijcón mochihua. Amén.

## ICA OME TAJCUILOLAMATZIN TEN QUITAJCUILOHUILIJ IN TATITANIL SAN PABLO PARA IN TANELTOCANI TEN CALYETOCQUE TECH PUEBLO DE TESALONICA

### Pablo quintajcuilohuilij in taneltocani campa Tesalónica

**1** Nejuan ni Pablo huan inixpan in Silvano huan in Timoteo namechijcuilohuilía nijín amat de namejuan nantocnihuan nantaneltocani ten nancalyetocque tech ne pueblo Tesalónica, porín namejuan nansenpoutocque ihuan Totajtzin Dios huan ihuan in Totecotzin Jesucristo. <sup>2</sup> Huan nicnequi xicselijtiyacan ne teicnelilis huan ne yolsehuilis ten hualehua inahuac Totajtzin Dios huan inahuac Totecotzin Jesucristo.

### Totajtzin Dios quintatzacuiltis nochi in tajtacolejque cuac mohualucas nican talticpac Totecotzin Jesucristo

<sup>3</sup> Huan, tocnihuan, nachipa monequi tictasojcamachilisque Dios ica por namejuan, porín ijcón quimonequiltía Dios. Huan no tictasojcamachilíaj Dios porín ticmatij que namotacuatamatilis mohueyiltijtoc, huan no ijcón namotetasojtalis hueyixtoc tenica nanmotasojtatinemij se huan ocsé. <sup>4</sup> Ica ya nojón cuac tejuan tiyetocque ihuan in ocsequin taneltocani de Dios, ijcuacón tejuan semi timoyolpaccatapohuíaj de queniu namejuan nanquixijxicotiyohue in tajyohuilis. Huan no tiyolpaquij porín nantacuatamatiyohue ihuan Cristo huan nanyolchicautiyohue masqui namechtajyohuiltijtiyohue huan namechixnamictiyohue miacque tagayot. <sup>5</sup> Huan Dios quicuis nijín namotajyohuilis para quitenextis senteixteno que Yejuatzin yolmelahuactzin cuac quinixcomacatiu in tagayot. Huan ica nijín namotajyohuilis Dios namechphua que namechnamiqui ma Dios namechyolyecanatiu ica ihueyichicahualistzin.

<sup>6</sup> Porín Totajtzin Dios quixejcoa que ijcón quinamiqui que quintaxtahuis ica tajyohuilis neques ten namechtajyohuiltijtinemij axcan. <sup>7</sup> Huan nochi namejuan ten axcan nantajyohuíaj, Totajtzin Dios namechtaxtahuis ica ne yolsehuilis, ijcón queme tejuan techmactilis no ne yolsehuilis. Huan Dios techsenmactilitiu ne yolsehuilis cuac Yejuatzin monextijtihualas den ne eluiyac in Totecotzin Jesucristo ihuan ne itaquehualuan ángeles ten huejueyin tayecanani chicauque. <sup>8</sup> Ijcuacón Yejuatzin hualas quemiliutihualas queme tit ica ne nicualtziyo para quintatzacuiltis nochi neques ten amo moteixmatiltijque ihuan Dios. Yejuan nojonques amo quitacamatque in yancuic Tajtoltzin de Cristo ten cualcui ne nemaquixtilis. <sup>9</sup> Huan neques ten amo taneltocani senca tajyohuisque ica ne hueyi tatzacuiltis ten amo queman tamis. Huan ijcón Dios quincalantamotas huejca de Yejuatzin. Huan yejuan amo queman quitasque ne ihueyichicahualis de nicualtziyo. <sup>10</sup> Huan nochi nijín mochihuas tech ne tonal cuac mohualucas Totecotzin. Huan tech ne tonal nochi iaxcahuan quinueyichihuasque Cristo, huan ijcón nochi nitaneltocacahuan quihueyitalisque Yejuatzin. Huan nochi nijín mochihuas porín nanquineltocacque ya ica ne totanojnotzalis ten tamechiluijque ya.

<sup>11</sup> Ica ya nojón tejuan nachipa timotatautilíaj ihuan Dios ica por namejuan; huan tictajtanilíaj ma Yejuatzin namechycyolchipahua. Huan ica por ne namoyolchipahualis quinamiqui que xiixcahuan ya Yejuatzin, porín Yejuatzin namechijitac ya. Huan no tictajtanilíaj ma Yejuatzin namechmaca chicahualis para nan-

quitamichiuasque nochi ten cuali ten namejuan nanquiyolnejnequij. Huan no ma Yejuatzin ica ihueyichicahualis ma quitiochiutiu nochi namotequiu ten nanquichiu-tinemij sayó ica ne namotacuaautamatilis. <sup>12</sup> Huan ica nijín namotacuaautamatilis, namejuan nanquipialíaj mohuisyot de itocaytzin Jesucristo. Huan no ica ne namotacuaautamatilis Cristo namechueyichihuas. Huan nochi nijín ma mochiutiu sayó ica ne hueyi teicnelilis de Totajtzin Dios huan de Totecotzin Jesucristo.

### Monextis ne hueyi tamajcahual tagat, ne hueyi tajtacole

**2** Huan namejuan, tocnihuan, ipa tamechmachtijca ya de ne tonal cuac mohualuicas in Totecotzin Jesucristo, huan cuac Yejuatzin techsentiliquiu para ticnamiquisque in Cristo. <sup>2</sup> Huan axcan tamechontatautíaj que amo ximotecahuilican que ma acsá elihuis namechtamachilispapata de que ejcoc ya ne tonal cuac mohualuicas in Totecotzin. Huan ma amo acsá namechyolmojmouti ica se tajtolis queme yesquía itencopa in Yecticatzin Espíritu. Porín sequin tamachtiani quinnex-tilijtinemij in tacaquini que huala ya in Totecotzin Jesucristo; pero amo melau. Ica ya nojón queme nanquicaquij ya nijín taman tanojnotzalis, amo ximoyolcuejmolo-can. Huan no tacán nanquiselíaj se amatzin ten cuica ne tanojnotzalis de que huala ya Cristo, ijcuacón amo no xicneltocacan masqui nanquitasquíaj que tamati que tejuan ijcón tamechtajcuilohuilijque. <sup>3</sup> Huan ocsepa tamechilíaj que amo ximotecahuilican que ma acsá ma namechcajcahuacan nión ica teyi taman tamachilis. Porín Yejuatzin amo mohualuicas como amo achtopa monextiqui senteixteno que in talticpacuani pehuasque quimajpeutinemisque in Tajtoltzin de Dios. Huan no monextiquiu ne hueyi tamajcahual tagat ten monotza hueyi tajtacole. Huan nijín hueyi tajtacole, yejua ne Dios quixtalij ya tech ne tatelchihualis. <sup>4</sup> Huan ne hueyi tajtacole quixnamictinemis in Tajtoltzin de Dios. Huan yejua mohueyichiutinemis inpan nochi ten cuica in chicahualis den itocaytzin de Dios. Huan ne hueyi tajtacole no mohueyinectinemis inpan nochi ten mocuij para quimohuistilisque Dios. Huan no ne hueyi tajtacole motalis campa in hueyi tiopan de Dios ijcón queme yesquía melau Dios. Huan yejua ya mopohuas queme yesquía Dios.

<sup>5</sup> ¿Xe namejuan amo nanquelnamiquij que cuac nejua niyetoya namohuan, ijcuacón namechiliaya nijín tanextililis? <sup>6</sup> Huan axcan cuali nanquimatocque ya que in Yejuatzin quixtzacuilijtoc oc ne hueyi tajtacole para ma yejua ayamo huelis monextiqui achtopa que ne tonal ten Dios quixtalij ya. <sup>7</sup> Pero axcan ichtacatequititoc ya ne pitzotic chicahualis den amocuali Satanás. Pero queme yetoc oc Yejuatzin, ica ya nojón Yejuatzin quixtzacuilijtoc oc ne hueyi tamajcahual tagat hasta ejcoquiu in tonal queman Yejuatzin moajchihuas ya intzalan in talticpacuani. <sup>8</sup> Huan cuac monextiquiu ne hueyi tamajcahual tagat, ijcuacón Totecotzin Jesús quimictiquiu sayó ica in chicahualis de niijyoyotzin. Huan cuac monextijtztinojquiu Cristo, ijcuacón Yejuatzin quicuis ne hueyi chicahualis de nicualtziyo para quitamihuejelos ya ne tamajcahual tagat.

<sup>9</sup> Huan in amocuali Satanás quichihuas ma monextiqui ne tamajcahual tagat ten tequititinemis ica hueyi chicahualis, huan ica hueyi nescayome, huan no ca mohuiscatequime ten sayó ica teixcajcahuas san. <sup>10</sup> Huan ne tamajcahual tagat cualcuis míac tataman de tajtacol, huan yejua quintamicajcahuas nochi neques ten yajtocque ya campa ne xpolihuilis. Huan yejuan nojonques quimajpeuque ya Dios Itajtoltzin huan amo quinecque quitasojtasque ne melahuac Tajtoltzin de Dios. Huan

ijcón nochi yejuan amo huelis maquisasque. <sup>11</sup> Ica ya nojón Totajtzin Dios quinu-altitanilis ne taixnamiquini de Dios se chicahuac tacajcayahualis tenica motanel-toctisque ica ne hueyi xolopijyot. <sup>12</sup> Huan ijcón yejuan ne ten yajtocque ya campa in ixpolihuilis, Dios quintelchihuas porín yejuan amo quineltocasque ne melahuac Tajtoltzin de Dios. Ta, yejuan cachi oc moyolpactijtjinemisque ica tachihualisme ten cualcui tajtacol.

### Dios techijitac para techmaquixtis

<sup>13</sup> Huan nachipa monequi tictasojcamachilisque Dios ica por namejuan, tocnihuan, namejuan ten namechtasohta Totecotzin. Porín Totajtzin Dios namechijitac ya achtopa que tzinpehuasquía in talticpac, para que namejuan ximaquisacan de namotajtacoluan. Huan namejuan nanmaquisasque porín in Yecticatzin Espiritu namechylchipautiu huan porín namejuan nantaneltocatinemij ica ne melahuac Tajtoltzin de Dios. <sup>14</sup> Huan Totajtzin Dios namechylnotzac para que namejuan ximaquisacan ica por ne Tajtoltzin de Dios ten cualcui ne nemaquixtilis tenica tejuan titanojnotztinemij. Huan no Dios namechnotzac para que namejuan ximoaxcatilitij ne chipaucanemilis de Cristo ne campa hueyi itacualtzinyojcan.

<sup>15</sup> Huan ijcón, tocnihuan, ticnequij que xicsentocacan xitacautamatiyacan ihuan Cristo huan xitacamatiyacan ne tanahuatilme ten tamechnextilijque ya ica totajtoluan oso ica totajcuilolamahuan. <sup>16</sup> Huan Totajtzin Dios, Yejuatzin techneltasohtac huan techmacac ne yolsehuilis ten amo queman tamis. Huan no Yejuatzin techmacatilitij ya se cuali tacuautamatilis sayó porín Yejuatzin techyolicnelij. <sup>17</sup> Huan ticnequij que Totecotzin Jesucristo huan Totajtzin Dios que ma Yejuatzin namechylchicautiu huan ma namechmaca chicahualis para que namejuan xiquijtojtjinemican huan xicchiutinemican nochi ten cuali.

### Ma ticueyipanchihuacan Dios Itajtoltzin

**3** Huan no, tocnihuan, tamechiláj ijcuín: Ximotatautilican ihuan Dios por tejuan, para que ma moijsiucamoyahua in Tajtoltzin de Totecotzin, huan para ma quitacachihuacan nijín Tajtoltzin nochi in tagayot, ijcón queme namejuan nanquitacachiuque. <sup>2</sup> Huan no ximotatautilican ihuan Dios para timaquisasque inmaco ne tagayot ten yolchichicque huan amo yolcualime. Huan yejuan techtajyohuiliayaj porín yejuan amo quiplayaj ne tacuautamatilis ihuan Cristo. <sup>3</sup> Huan Totecotzin Yejuatzin Yolmelahuactzin, huan Yejuatzin namechylchicautiyás huan namechyecpixtiyás para ma amo xihuetzican imaco in amocuali Satanás. <sup>4</sup> Huan tejuan cuali titacautamatij ihuan in Totecotzin que namejuan nanquichiutocque huan no nanquichihuasque oc nochi in tanextililisme ten tamechnahuatijque ya xicchihuacan. <sup>5</sup> Huan no ticnequij que Totecotzin ma namechylolyecantiu para xitetasojtacan ijcón queme Dios tetasohta; huan para xicxicojtjiyacan in tajyohuilis ijcón queme Cristo quixijxicoco.

### Pablo quijtoa de monequi nantequitisque

<sup>6</sup> Huan namejuan, tocnihuan, tamechnajnahuatáj ica itencopa Totecotzin Jesucristo que ximosecakahuacan de ne taneltocani ten quinequij sayó tatzuicanemisque san, porín yejuan amo quitacamatinemij ijcón queme tejuan tamechnextilijque ya. <sup>7</sup> Huan namejuan cuali nanquimatocque ya de queniu monequi xicchihuacan para

xicnejnehuililtiyacan de ne tochipaucanemilis. Porín tejuan cuac tiyetoyaj namohuan, ijcuación tejuan amo sayó titatziucanemíaj san. <sup>8</sup> Huan amo no queman ticnencacuajque san in tacualis de acsá. Ta, tejuan timotequitiltijque huan timotajyohuilitiyaj yohualitonal para timotequipanosque. Huan ijcón ticchiuque para ma amo senme de namejuan ma tamehcuejmoloani ica tensá. <sup>9</sup> Huan tejuan masqui ticpíaj tanahuatil queme tatitanil de Cristo para tamechtajtanisquíaj tapalehuilis, pero amo ticneque ijcón ticchihuasque. Ta, tejuan timotequitiltijque para que namejuan no xicnejnehuililtiquij totequiu. <sup>10</sup> Huan cuac tiyetoyaj ompa Tesalónica namohuan, ijcuación tejuan tamechnajnahuatíaj ijcuín: Nochi neques ten amo quinequisque tequitisque, ma amo no tacuacan. <sup>11</sup> Porín tictecaquilíaj que senme de namejuan que ay motatziucaquetztinemij san huan amo tequititinemij. Ta, sayó moteaxcatilijtine-mij huan motepaltalijtine-mij san. <sup>12</sup> Huan itencopa in Totecotzin Jesucristo tejuan tiquinchicaucanahuatíaj huan tiquinyolmajxitíaj ne tatzihuini de que monequi ma mosiohuilican huan ma yolseucatequitican para ijcón motequipanosque yejuan.

<sup>13</sup> Huan ijcón tamechilíaj namejuan, tocnihuan, amo queman xisiohuitij de nanquichihuasque ten cuali. <sup>14</sup> Huan tacán acsá amo quitacamati ten tamechnajnahuatíaj ica nijín tajcuilolamat, ijcuación cuali xiquitacan aconi nojón motatziucaquetztinemi san. Huan de ompa amo ihuan ximohuicatinemican para ijcón yejua ma quiyolmachililtican ne tatziu para que yejua ma mopinahui. <sup>15</sup> Pero no tamechilíaj que amo xictahuelitzinemican ne tatziu. Ta, xicyolmajxitican porín yejua no se namocniu.

### **Pablo quintiochihua in taneltocani**

<sup>16</sup> Huan sayó Yejuatzin Totecotzin teyolsehuía. Ma namechyolsehuijtinemi yohualitonal campa yesqui nanmoajsitinemisque. Huan ijcón in Tecotzin ma yetica namohuan. <sup>17</sup> Huan nejua ni Pablo namechijcuilohuilía nijín tajpalolis ica nijín amat ten nejua ya nicchihuac. Huan ijcón niquijcuiloa huan ijcón ixnesi notocay tech nochi nomatajcuilolahuan. <sup>18</sup> Huan ticnequij que Totecotzin Jesucristo ma namechyolicnelijtiu sen nachipa. Ma ijcón mochihua. Amén.

## IN TAYECANA TAJCUILOLAMATZIN TEN QUIJCUILOHUILIJ IN TATITANIL SAN PABLO PARA IN TAPIXQUE TIMOTEO

### In Pablo quitajcuilohuilij Timoteo

**1** Nejuatzin ya ni Pablo ten nitatitanil de Jesucristo, huan de Totajtzin Dios Yejuatzin Totemaquixtijcau. Huan Yejuatzin nechualtitanic ma nicchiutinemi itequiu de Yejuatzin queme se nitatitanil. Huan Totecotzin Jesucristo, Yejuatzin ticchixtocque ma mohualuicas ocsepa nican talticpac. <sup>2</sup> Tejua Timoteo, nimitztajpaloa ica nijín amatzin. Porín nicmatoc que tejua queme yesquía tinoconetzin porín nimitztaneltoctij ya ihuan Cristo. Huan semi nicnequi xicpixtiu ne tetatiochihualis huan ne teicnelilis huan ne yolsehuilis ten hualehua imaco Totajtzin Dios huan Totecotzin Jesucristo.

### In Pablo quinejmachtij Timoteo que ongasque tacajcayahuani ten tanextilijtinemisque

<sup>3</sup> Huan cuac nejua niquisac ya para ne Macedoniajcopaca, ijcuacán ticmati que ipa nimitztatautiteu que tejua ximocahua tech ne pueblo ten monotza Efeso. Huan no nimitzyequilijtehuac que tejua xiquinyecnahuati sequin taneltocani de Efeso ma amo tamachtijtinemican ica tataman tanextililis de tacajcayahualis. <sup>4</sup> Huan ne taneltocani ma amo taneltocacan de ne tetapohuilis san de ne huejcaucayome. Huan no nimitzilijtehuac que xiquinili ne taneltocani de Efeso que ma amo tanemilijtinemican sayó den ninueyitatuan quenín mohuicayaj. Porín nochi nijín tetapohuilis den huejcaucayome sayó tecuatapololtijtinemi san, huan amo tepalehuía para ticchiutinemisque ten Totajtzin Dios technahuatilij ya ma ticchihuacan. Porín Totajtzin Dios techyolmajxititij sayó ica por ne tacuautamatis de Dios.

<sup>5</sup> Huan in tamachilis de nijín totanahuatil ten nimitzjicuilohuilía yejua nijín: Monequi ximosepantasojtacan ica ne yec tetasojtalis ten hualehua de yolchipahualis, porín namechylolchipahuac ya Totajtzin Dios. Huan xitatacamatiyacan nochi tenica Dios namechylolnojtza, huan xitacuautamatiyacan ihuan Dios ica nochi namoyolo. <sup>6</sup> Porín ximatican que sequin tamachtiani melau mosecocaque ya de nijín chipaucanemilis. Ica ya nojón yejuan mocuatapololtijque ya ica ne tajtoltehuilis de sayó nencajtí san. <sup>7</sup> Porín nojón tamachtiani no quinequij mochihuasque tanahuatiani de tanahuatil de Moisés. Pero yejuan hasta amo no cajsicamatij nintajtoluan. Huan yejuan amo no cajsicamatij ne nintanextililisuan masqui melau mota que yejuan ay tanextilijtinemij ica míac yolchicahualis.

<sup>8</sup> Huan cuali ticmatij que in tanahuatil de Moisés melau chipahuac, pero sayó monequi ma se quiyectapohui ijcón queme Dios quimonequiltía. <sup>9</sup> Huan ximatican que nijín tanahuatil de Moisés amo quinmachililtía neques ten quichiutinemij ten cuali. Ta, nijín tanahuatil de Moisés quinmachililtía ne naquen elihuistijtinemij huan neques ten amo tatabacatinemij ihuan Dios, huan no para neques ten tamajcahuanemij huan tajtacolejque, huan no para neques ten amo quineltocaj Dios huan no ten sayó quimohuispoloaj Dios. Huan in tanahuatil de Moisés quinmachililtía neques ten quinmictíaj nintat huan ya ninnan, huan nochi naquen yesqui temictiani. <sup>10</sup> Huan in tanahuatil de Moisés quinmachililtía yejuan ne taca huan sihuame ten ahuilnen-



tinemij, huan yejuan ne taca ten ahuilnencanentinemij ihuan itagaicnihuan. Huan no in tanahuatil de Moisés quinmachililtía yejuan neques ten tachtectinemij ica taca, huan neques ten xolopijitinemij san, huan no neques ten quitejtenehuaj Dios ica xolopijyot san. Huan in tanahuatil de Moisés quinmachililtía yejuan neques ten quisecocautinemij in cuali tanextililis den Tajtoltzin de Dios. <sup>11</sup> Huan nijín cuali tanextililis, yejua ne in yancuic Tajtoltzin de Dios ten cualcui ne cualtzin nemaquixtilis de Totajtzin Dios ten sayó tetatiochiutinemi. Huan Totajtzin Dios techmactilij ya nijín tequit tenica nitamachtijtinemij.

### **Dios quimactilij Pablo nijín tequit**

<sup>12</sup> Huan nicueyitasojcamachilía Totecotzin Jesucristo porín Yejuatzin nechmacac in chicahualis para notequiu. Huan Yejuatzin yec tacuautamatic nohuan que nejua nihuelis nicchihuas nijín tequit. Huan no nictasojcamachilía que Yejuatzin nechtalij ya queme niitatitanil. <sup>13</sup> Huan Yejuatzin nechtequimacac masqui nejua nicmohuispoloaya Jesucristo huan no masqui nejua nictajyohuilitiaya huan niqihuijuicaltiaya Yejuatzin. Pero Totajtzin Dios nechyolicnelij porín ayamo niyectaneltocaya in Tajtoltzin de Dios huan nochi nijín nicchiutinemía sayó de mijmiquiloyot san. <sup>14</sup> Ica ya nojón Totecotzin nechueyipanicnelij huan nechtaquautamatiltij huan nechtasojtac. Huan nochi nijín mochihuac ijcón porín nipoutinemi ihuan Cristo Jesús. <sup>15</sup> Huan nijín Tajtoltzin ten nimitzililiti, yejua yec melahuactzin. Huan nijín monequi ma nochi talticpacuani quineltocacan: Cristo Jesús huala nican talticpac para quinmaquixtiquiu in tagayot ten tajtacolejque. Pero nejua in cachi nihueyitajtacole nicatca. <sup>16</sup> Pero nechyolicnelij Totajtzin Dios porín Jesús quinequía quinextis nopan iteicnelilis. Porín Yejuatzin ica iteicnelilis nechyolicaxicohuilijtihuala notachihualisuan ten cualcuitoya tajtacol. Huan in Totecotzin nechtapojpoluij de nochi notajtacoluan masqui nejua nicatca cachi nihueyitajtacole. Huan no in Totecotzin quinequic quinnextilis iteicnelilis para ne naquen taneltocasque oc ma yejuan no ma quipiacan ne yec nemilis nachipa.

<sup>17</sup> Ica ya nojón ma ticmohuistilican huan ma ticueyipancualnextican in Totayecan-cau porín Yejuatzin mohueyipancasoutoc ica ichicahualis sen nachipa. Yejuatzin nachipa yoltinemis huan amo aquen huelis quitas. Huan sayó Yejuatzin in hueyi Tamatque huan amo teyi ocsé oc. Amén.

<sup>18</sup> Huan tejua Timoteo, notasojconetzin, nimitztequimactía ijcuín: Xicchiutinemi ica nochi moyolo huan ica hueyi tacuautamatilis nochi ten nimitzilijtoc. Huan xiquelnamiqúi san nochi ne tanahuatilme ten mitzilijteuque ne achtopa ya ne tocnihuan ica itencopaca ne tocaytzin den Totajtzin Dios. Huan xiyó xictacamatiu nochi ne tanahuatilme ijcón queme in soldado quichiutinemi ica ne yolchicahualis nochi ten quinajnahuatilijque. <sup>19</sup> Huan xiquelnamiqúi san que sequin taca quixtopeuque ya in chipaucanemilis huan ne tacuautamatilis ihuan Cristo. Huan nojonques xpoli-que ya ijcón queme se barco xpolihui cuac pancalaqui tech in at. <sup>20</sup> Huan ijcón inpan mochihuac ne omen taneltocani ten monotza Himeneo huan ne Alejandro. Yejuan quisecocauque nintacuautamatilis ihuan Cristo. Ica ya nojón yejuan niquinmactilij ya imaco in amocuali Satanás, huan para ma yejuan ma moyecajsicamatilican ten melau huan amo ocsepa quihuijuicaltijtinemisque itocaytzin de Totajtzin Dios.

### Pablo quinnextilij in taneltocani de Efeso quenín motatatautilisque ihuan Dios

**2** Huan achtopa de nochi, nejua ni Pablo namechnejmachtía xicchiuacan ijcuín: Ximotatautilican huan ximotatajtaniclan huan ximoteixpantican huan ximotasojamachilican ihuan Totajtzin Dios ica por nochi in talticpacuani. <sup>2</sup>Huan no ximotatautilican ica por neques reyes ten taquitzquijtocque nican talticpac, huan no ica por nochin neques tequiuhani de nican talticpac para ijcón tejuan no tiy-olseucanemisque huan tiyecyetinemisque ica yolsehuilis huan para ijcón no tictacamatine misque Dios huan huelis tichipaucanemisque. <sup>3</sup>Huan nijín yec nemilis, yejua ya ne ten cualtzin huan quiyolpactía Totajtzin Dios ten Totemaquixtijcau. <sup>4</sup>Porín Totajtzin Dios Yejuatzin quimonequiltía que nochi in talticpacuani ma maquisacan de nintajtacoluan para ma ijcón cajscamatiquij in melahuac Tajtoltzin de Dios. <sup>5</sup>Porín sayó ongac se san Dios huan no sayó ongac se san in Tetajtohuijque naquen quintajtohuía in talticpacuani iixpantzinco Totajtzin Dios. Huan ne Tetajtohuijque Yejuatzin in Jesucristo ten mochihuaco tagat. <sup>6</sup>Huan ijcón in Totecotzin Jesucristo motemactij ma quimictican para quixtahuas ipatiu den totajtacoluan. Huan ijcón Yejuatzin quinmacac ne nemaquixtilis nochi ne talticpacuani. Huan in Totajtzin Dios techonmonextilij nijín tanextililisme de ne nemaquixtilis cuac Yejuatzin ijcón quimonequiltij. <sup>7</sup>Ica ya nojón nejua nechijitac Totajtzin Dios huan nechpohuac queme niitanojnotzcau huan niitatitanil. Huan no Dios nechpohuac que nitamachtijque para ma ijcón nejua niquinnextili in taca den amo pohuij queme judíos, ma niquinnextili den tacuautamatilis huan den melahuac Tajtoltzin de Dios. Nitajtoa ica nochi ten melau porín nipoutoc ihuan Cristo ijcón queme namejuan, huan amo namecholuilía san.

<sup>8</sup>Huan nejua ni Pablo nicnequi que nohuiyampa ximotatautilican nochi namejuan den nantaneltocani. Huan cuac namejuan nanmomaajocuisque ica ne natatautilis, ijcuacán no monequi ma hualeuto tech namoyolchipahualis. Huan ma amo xiyolcualantinemican, huan ma amo no xitetajtoltehuijtinemican. <sup>9</sup>Huan nejua ni Pablo no nicnequi que in sihuame taneltocani ma motaquentican ica taixejecolis san ten cuali san. Huan ma amo sayó ica intaquenuan ma mohueyinctinemican. Ta, cuac motaquentijtinemisque, ijcuacán ma cuali cuatamatinemican. Huan cuac mocuaxilisque, ijcuacán ma amo semi quitelpantolican. Huan cuac motalilisque oro huan ne tetzitzin ten semi patío ten quilfaj perlas, ijcuacán ma amo sayó ica mohueyimatine mican. Huan nión no ma motaquentican ca ne taquemit ten semi patío para ma sayó ica quinnexicolijtinemican in tagayot. <sup>10</sup>Huan nejua namechilía que se sihuat amo ica itaquen san ma mocualnexti. Ta, se sihuat ma mocualnexti ica ne ichipaucanemilis huan itatacamatilis. Huan in sihuame ma quitacamatinemican in Tajtoltzin de Dios ijcón queme quinamiqui neques ten motemactijque ya imacotzinco Dios. <sup>11</sup>Huan ijcón in sihuatzitzin monequi caquisque in tamachtilis den Tajtoltzin de Dios ica ne tamatcayetolis, huan no ma motemactican ya ihuan Dios para quitacamatisque. <sup>12</sup>Huan amo niquintacahuilía in sihuame ma tamachtican ica in Tajtoltzin de Dios campa mosentilijtinemij in taneltocani. Huan amo no niquintacahuilía in sihuame ma quinyecanacan in taca. Ta, yejuan in sihuame monequi ma tamatcanemican huan ma tatacamatican. <sup>13</sup>Huan ijcón namechnahuatía porín Totajtzin Dios quichijchihuac achtopa in Adán huan satepan quichihuac in Eva. <sup>14</sup>Porín xicmatican que amo yejua in Adán ten motecahuilij ma quicajcayahuac in

amocuali. Ta, in amocuali Satanás quicajcayahuac yejua in sihuat. Huan ica por ne tacajcayahualis in sihuat motajtacolmacac. <sup>15</sup> Huan in sihuame taneltocani quinnex-tilijtinemis que acsame que yejuan maquisque ya de nintajticoluan ica por nintequiu de quiniscaltíaj ninconehuan. Huan in sihuame taneltocani ma tacuautamatiyacan itech Cristo huan ma tetasojtatiyacan huan ma chipaucanentinemican ica ne cuali taixejcolisme de Dios.

### In tocníu tayecanque ten quilíá obispo

**3** Nijín tajtol ten namechiliti, yejua nijín tamelautoc. Porín tacán acsá tocníu quinequí mochihuas queme tayecanque obispo para quinyecantiyás in ocsequin taneltocani, como ijcón quinemilíá, nojón semi cuali tequit. <sup>2</sup> Ica ya nojón ne tayecanque obispo ten tayecantinemi ihuan in taneltocani, yejua ne monequi ma chipaucanemi para ma amo aquen quiyolnemilijtiu que tajtcole ne tayecanque. Huan ne tayecanque obispo ma quipía sayó se sihuat san, huan ma yec yolme-laucanemi san, huan ma cuatamatcanemi san, huan ma yec yolmajsitinemi. Huan ne tayecanque monequi ma nachipa quipía tanejnequilis de quinselis aquen yesqui hualas quicalpanoquihue. Huan no ne tayecanque obispo ma quipixto se huelilis para quenín tamachtis ica in Tajtoltzin de Dios. <sup>3</sup> Huan no ne tayecanque obispo ma amo mocalaquitinemi tech in tahuanalis; ma amo yolcualancaelihuisti. Ta, ma yolyemancanemi; huan ma amo motajtoltehujtinemi; huan ma amo sayó quinectinemi tomin san. Ta, ne tayecanque obispo, yejua ne monequi ma teicnelijtinemi, huan ma quinyolsehujtinemi ocsequin tagayot, huan ma amo xixicuinectinemi san ca tomin. <sup>4</sup> Huan ijcón in tayecanque obispo monequi quinyecyecanas ca cuali ichancahuan; huan no ipiluan monequi ma motecahuilican ma quinyecana nintat huan ma quimohuiscapiacan nintat. <sup>5</sup> Porín in tayecanque como amo hueli quinyeccuica nichancahuan, ¿quenín huelis quinyecantiyás in taneltocani ten pohuij ihuan Totajtzin Dios? Pues amo huelis. <sup>6</sup> Huan ne naquen yequin yancuicatanel-toca itech Cristo, yejua ne ma amo quitalican queme tayecanque obispo. Porín tajcón quitalíaj queme tayecanque, ijcón ne tagat semi mohueyinequis san, huan ijcón ica imohueyinequilis Dios quitatzacuiltis, ijcón queme Dios quitatzacuiltij ya in amocuali Satanás cuac yejua mohueyinequic. <sup>7</sup> Huan no ne tayecanque monequi ma quipixtinemi se cuali chipaucanemilis intzalan neques ten ayamo taneltocaj para ma yejuan ma quimohuiscapohuacan ne tayecanque. Porín como in tayecanque amo chipaucanentinemi intzalan in tagayot, ijcón ne tagayot quitejtenehuasque san huan ijcón cachi niman huetzitiu imaco in Satanás.

### In tocnihuan tapalehuiani ten quinilíaj diáconos

<sup>8</sup> Huan no ijcón ne tapalehuiani ten quinilíaj diáconos, monequi ma yec cuatamatcanemican, huan monequi ma amo no tajtolerojtinemican san ica intajtoluan san. Huan ma amo no mohuintijtinemican huan ma amo no sayó quinectinemican tomin san. <sup>9</sup> Ta, ne tapalehuiani monequi ma cuali cajsicamatiyacan ne ichtacatamachtis de Tajtoltzin de Dios ten Yejuatzin techtaminextilij ya. Huan no monequi ma in tapalehuiani ma tatabamatiyacan ijcón queme Dios quinyolnojnotztíu. <sup>10</sup> Huan nijín tapalehuiani monequi achto ma se quinitztinemi cox melau yejuan chipaucanemij ya. Huan como melau amo mopolojtinemij oc den Tajtoltzin de Dios, ijcuacón huelis ya tiquinpohuasque queme tapalehuiani diáconos.

<sup>11</sup> Huan no ijcón ne sihuame taneltocani ten quinilíaj diáconisas, no ijcón yejuan monequi ma yec cuatamatcanemican. Huan ma amo sayó tahujuicaltijtinemican san ihuan acsame, huan ma amo no elihuistitinemican san. Ta, nijín tapalehuiani diáconisas monequi quiyecchiutiyasque nochi nintachihualisuan ica nejmach san.

<sup>12</sup> Huan ne tapalehuiani diáconos monequi ma quipiacan sejsé ninsihuau san. Huan ijcón no monequi ma quinyeccuicaj ca cuali inchanchahuan huan inpiluan. <sup>13</sup> Porín ne tapalehuiani cuac yejuan quichiutinemij ya ca cuali nintequihuan, ijcuacón yejuan quiselíaj hueyi mohuisyot intzalan in tagayot, huan no cachi oc quiselíaj ne yolchicahualis. Huan ijcón yejuan cachi yec tacuautamatij para quitenxtíaj in Tajtoltzin de Cristo Jesús.

### Ne ichtacatamachilisme ten Dios technextilij ya

<sup>14-15</sup> Huan nimitzilía tejua, Timoteo, nejua nicnequi niyás para nimitzitatiu. Huan masqui nimitzilía que niyás, pero ipa nimitzijcuilohuilía nijín tajtolme para ica hueli ticmatiyás quenín tiquinyecantiyás in taneltocani. Huan nijín taneltocani senpohuij ihuan Totajtzin Dios ten nachipa voltica. Huan yejuan in taneltocani quiyecpixinemij huan quityecmatiltinemij in Tajtoltzin de Dios. Huan ijcón queme in calicxime quimamajtoc in cali, no ijcón tejuan titaneltocani ticajoctocque in Tajtoltzin de Dios huan titenextilijtinemij. <sup>16</sup> Huan amo huelis oc se quitepotztocas cachi oc in Tajtoltzin de Dios ten ne achtopa motaatijtoya ya, porín yejua ya ne huala monextilijtinoco ya. Huan in Tajtoltzin de Dios yejua nijín:

Dios mochihuaco nican talticpac queme se tagat.

Huan in Yecticatzin Espíritu Yejuatzin quiyectenextij que in Cristo amo tajtacole.

Huan in ángeles taquehualme de Dios quitacque in Cristo.

In taneltocani quitetapohuijque de Cristo nohuiyampa masqui campa amo judíos catca.

Miacque talticpacuani tacuautamatque ihuan Cristo.

Huan in Cristo yajqui nepa eluiyactzinco campa ihuelilipan.

### Pablo technejmachtía de neques ten moxexelosque den tacuautamatilis ihuan Dios

**4** Huan in Yecticatzin Espíritu yec melahuac techilía que cuac ne tacuitapan tonalme den tamlis ya, ijcuacón sequin taneltocani mosecocahuasque de in tacuautamatilis ihuan ne Cristo. Huan ijcón yejuan quintoctilisque ne tamachtiani ten teyolcaycayahuaj ica ne tanextililisme den hualeutoc imaco ne amocuali Satanás. <sup>2</sup> Huan ijcón ne taneltocani, yejuan quinquacuilisque ne tamachtiani tacaycayahuani ten sayó tajtolerojtjinemisque. Huan masqui ne tamachtiani Dios quinyolnojnotztui, pero amo quitacamatisque. Huan hasta amo no quimachilíaj que cox Dios quinyolnojnotztoc oc. <sup>3</sup> Huan nijín tamachtiani no tatacahualtíaj que ma amo monamictican acsame, huan no quintacahualtíaj que ma amo quicuacan sequin tacualis, masqui ipa in Totajtzin Dios quitelij ya ma se quicuas. Huan Totajtzin Dios quimonequiltía ma tictasojcamachilijtiyacan cuac tensá timocualtíaj, porín tejuan titaneltocani, huan porín tejuan tiquixmatij ya in melahuac Tajtoltzin de Dios. <sup>4</sup> Huan ijcón nochi ten ongac tacualis ten Dios quichihuac, yejua ne nochi cuali para se quicuas. Ica ya nojón ma amo tiquixtopehuacan teyi tacualis. Ta, ma ticselican, huan de ompa ma tictasojcamachilican Totajtzin Dios. <sup>5</sup> Huan ijcón ma ticchiutiyaican

porín in Tajtoltzin de Dios ihuan tonetatatautilis, yejua ne quichihualtía chipahuac ya ten yesqui tacualis xipantzinco Dios.

### **Pablo tajtoa de se cuali taquehual de Jesucristo**

<sup>6</sup> Huan como tejua Timoteo, tiquinnextilía in tocnihuan taneltocani nijín notajtoluan, ijcón tejua timochiutiu se cuali taquehual de Jesucristo. Huan como tejua tiquinmachtijtiu in taneltocani de Tajtoltzin de Dios, ijcuacón timoyolmajxitijtiu tejua san ica ne Tajtoltzin ten cualcui tacuautamatilis. Huan in Tajtoltzin de Dios ma cachi oc mitznextilijtiu ijcón queme mitznextilijtihuala ya. <sup>7</sup> Xisecocahua ne tetapohuilis san den nanitajme ten nencajti san huan ten sayó tecuatapololtijtinemi san. Ta, sayó ximomachtijtinemi queníu tictacamatiyás Totajtzin Dios. <sup>8</sup> Techpalehuía tensá cuac ticmactía que totacayo ma molini huan ma techacamati ica cuali ijcón queme tejuan ticequij. Pero cachi oc techpalehuía cuac ticmachtijtiyohue toyoljuan quenín para tictacamatisque Totajtzin Dios. Porín ne taticamatilis iixpantzinco Totecotzin, yejua ne techpalehuía axcan tech nijín tonemilis, huan no techpalehuía tech tonemilis ten hualas oc. <sup>9</sup> Huan nijín notanahuatil, yejua ya cachi tamelautoc. Ica ya nojón monequi que in taneltocani ma quiyecneltocacan. <sup>10</sup> Huan tejuan timotequitiltíaj por nijín tetapohuilis den Tajtoltzin de Dios. Ica ya nojón tiquijyohuíaj cuac techmohuispolojtinemij, porín tejuan titacuautamatij sayó tech ne Dios ten yoltica. Huan Yejuatzin ne in Temaquixtijque de nochi in talticpacuani, quijosnequi que Dios quinmaquixtis ne naquen ten yec tacuautamatij ihuantzin.

<sup>11</sup> Nimitzilía, tejua Timoteo, que nijín notajtoluan xiquinnahuatilitijtiu huan no xiquinmachtijtiu nochi in taneltocani. <sup>12</sup> Amo ximotecahuili que ma senme mitzmohuispolocan porín quitasque que tejua titelpoch oc. Ta, tejua nicnequi que xiyechipaucanemi para ma no ijcón chipaucanemican no in ocsequin taneltocani ijcón queme tejua tichipaucanemi. Xiquinnextili in taneltocani ne yec chipaucanemilis ica motajtolis ten ticpixtoc ya, huan ica motatacamatilis, huan ica motetasojtalis, huan ica moteicnelilis huan ica motacuautamatilis huan ica nochi moyolchipahualis. <sup>13</sup> Ximotequitilti ijcón hasta in tonal cuac nejua nijsis. Huan xiquinleerohuilij in tocnihuan senteixteno in Tajtoltzin de Dios; huan xiquinyojoyolmajxitijtiu huan xiquinmachtijtiu in tocnihuan taneltocani. <sup>14</sup> Huan amo xicsecocahua in huelilis ten Dios mitzmactilij ya. Xiquelnamiqú san que Dios mitzmactilij ya ne huelilis ne tonal cuac in huehuentzitzin taneltocani mitzcuatalilijque ninmahuan. Huan ijcón yejuan quichiuque porín Dios quinmactilij in tanahuatil ma ijcón quichihuacan. <sup>15</sup> Huan tejua, Timoteo, xicsentoca xicchiutinemi nijín tanahuatilme. Xicsencui ximomachtijtiu nijín tamachtilme para ma quitacan in taneltocani que motacuautamatilis cachi momajxitijtiu. <sup>16</sup> Huan no nimitzilía que xicyecpixinemi moyolo para ma amo timotajtacolmacas. Xictacamati de motanextililisuan tenica tejua titamachtijtinemi para ma amo tiquinyolcayahuas in tocnihuan. Huan xicsentoca xicchiutiu nochi ten nimitzilía. Porín como ticchiuati nijín ten nimitznajnahuatijtjoc, ijcón timomaquixtis tejua huan no tiquinmaquixtis nochi naquen mitzcaquilijtinemisque.

### **Pablo quilía Timoteo de quenín monequi mohuicas ihuan in taneltocani**

**5** Huan no nimitzilía, tejua Timoteo, que amo se taneltocque huehuentzin xiquixajua. Ta, xicyolmajxiti ijcón queme yesquía timonojnotztoc ihuan motat. Huan no xiquinyecyolmajxiti in taneltocani telpocame, ijcón queme yesquía timonojnotz-

tosquía ihuan mocnihuan taca. <sup>2</sup>Huan no xiquinyecyolmajxiti in taneltocani sihuame den cachi xihuejque ya, ijcón queme yesquía timonojnotztosquía ihuan mo-nantzin. Huan no ijcón xiquinyecyolmajxiti ica ne yolchiphualis in taneltocani ich-pocame, ijcón queme yesquía timonojnotztosquía ihuan mocnihuan sihuame.

<sup>3</sup>Huan no nimitzilía que xiquinmohuiscapohua huan xiquinpalehuijti in sihuacahualme neques ten melau amo teyi quipía tenica moixpanoltisque. <sup>4</sup>Pero tacán ne sihuacahual quipía oc ipiluan oso ixuihuan, yejuan nojonques monequi ma mo-chachtijtiyacan ten Dios quimonequiltía, huan ma quinpalehuican nintatuan tenica quipiasque yejuan. Huan nijñ tatabamatilis yejua ya cachi cuali huan quiyolpactía Totajtzn Dios. <sup>5</sup>Huan ne sihuame ten melau sihuacahualme huan melau ninselti mo-cauque ya, yejuan nojonques ma tacuautamatican sayó ihuan Totajtzn Dios, huan ma moteixpantican ihuan Totajtzn Dios ica ne tatatautilis yohualitonal. <sup>6</sup>Huan ne sihuacahualme ten sayó quichiutinemij ijcón queme yejuan quinejnequij san, yejuan nojonques miccanentinemij ya tech in tajtacol masqui yoltinemij oc. <sup>7</sup>Huan nimitzilía que nijñ notajtoluan xiquinnajnahuatili nochi in taneltocani para ma ijcón amo aquen huelis acsá ma quinteteluilijtinemi ica tajtacol in taneltocani. <sup>8</sup>Porín no xicmati que acsá taneltocacque ten amo quinixpanoltijtiu ichancahuan oso iparientes, yejua ne quisecohahuac ya ne tacuautamatilis den hualeutoc de Dios. Huan cachi oc yejua quimajpehuasquía in Tajtoltzn de Dios, como amo quinixpanoltijtiu ne ichancahuan. Huan ne naquen ijcón quichihuas, yejua ne cachi oc amo quipía teicnelilis, huan nentinemi oc ijcón queme neques ten amo taneltocani.

<sup>9</sup>Huan no nimitzilía, tejua Timoteo, xiquintocayijcuilo tech se amat nochi in sihuacahualme. Pero xiquintocayijcuilo yejuan san den cachi xihuejque ya ten quipíaj ejeyipoal xihuit ya para ajco. Pero no xiquintocayijcuilo sayó yejuan san ne sihuacahualme ten quipiacque sayó sejsé ninyoquichuan. <sup>10</sup>Huan no xiquintocayijcuilo sayó ne sihuacahualme ten moixmatij que chipaucanemíaj huan que quichiutinemíaj cuali tatabamatilis queme nijinques: de quiniscaltía iconehuan tech in chipaucanemilis. Huan cuali tatabamatilis se quichihua cuac se quipía tanejnequilis den quiselía aquen yesqui icalpanojcahuan. Huan no cuali tatabamatilis se quichihua cuac se quinpalehuía in tocnihuan taneltocani pero amo ica ne mohueyinecayot. Huan no cuali tatabamatilis se quichihuas cuac se motequitiltía para naquen tajyohuí. Huan no cuali tatabamatilis se quichihuas cuac se quichiutiu sayó ten chipahuac.

<sup>11</sup>Pero amo xiquintocayijcuilo neques sihuacahualme ten ayamo quipíaj eyipoal xihuit. Porín yejuan mismos ica por nintanejnequilis mosecocaahuasque de Cristo. Huan ijcón sayó quinequij ocsepa monamictisque. <sup>12</sup>Huan como mosecocaahuaj de ne tatabamatilis de Cristo, ijcuacón motajtacolmacaj. Huan cuac ocsepa quinemilíaj monamictisque, ijcuacón amo huelis oc tequitisque para Cristo ijcón queme montencaucaj ya. <sup>13</sup>Porín como ijcón quichihua ne sihuacahualme, ijcuacón sayó ay tecalpanotinemij san huan ijcón mochihuaquij tatzihuini. Huan amo sayó mochihuaquij tatzihuini san. Ta, no mochihuaquij tajtoleros huan motencalaquijtinemij campa amo intequiu; huan tajtojtinemij san ica ten amo cuali. <sup>14</sup>Ica ya nojón nejua nicnequi que in sihuacahualme ten ayamo semi xihuejque monequi ma ocsepa monamictican huan ma quiniscaltican inconeahuan. Huan no nicnequi que melau ma poutocan queme tesihuau de se cali. Huan ma amo teyi quichiutinemij ten amo cuali, para ma amo huelis acsame techteteluilijtinemisique ica tensá tajtacol. <sup>15</sup>Porín nimitzilía que ocsequin sihuacahualme melau mosecocaunque ya de Cristo, huan axcan

cachi quitoclijtocque in amocuali Satanás. <sup>16</sup>Huan no nimitzilía que tacán acsá se taneltocque tagat oso se sihuat quinpía ne ichancahuan sequi sihuacahualme, yejua ne monequi ma quinixpanoltijtiu ne sihuacahualme para ma amo sayó yejuan in taneltocani den templo ma quinipalehuijtocan san. Porín tacán ijcón quichihua, ijcuacán in taneltocani de templo cachi huelis quinipalehuisque ne sihuacahualme ten melau amo quipíaj aquen quinixpanoltisque.

<sup>17</sup>Huan no nimitzilía que in tiopanuehuentzitzin ten quinyecantiyohue ca cuali in tocnihuan taneltocani, namejuan monequi xiquinmactilican ne huehuentzitzin ajsitoc nintaxtahuil ome achichi queme quitanij. Huan ne naquen ay tanojnotztinemij huan tamachtijtinemij ica in Tajtoltzin de Dios, yejuan nojonques cachi monequi ma quiselican ajsitoc nintaxtahuil. <sup>18</sup>Huan in Tajtoltzin de Dios techilía ijcuín: “Huan cuac ticnequij in cuacuohue ma quitzojtzonicsa in trigo, ijcuacán amo xictenpiqui ica tensá; porín como tequititoc ne cuacuohue, no monequi ma tacua”. Huan no in Tajtoltzin de Dios techilía ijcuín: “Ijcón queme quimonequiltía Totajtzin Dios, ne tagat ten tequiti, ma quiseli in taxtahuil ajsitoc”.

<sup>19</sup>Huan no nimitzilía, tejua Timoteo, que amo xiquinyecaquili acsame tacán quiteluilíaj se huehuentzin den tayecanque, como amo ixnesiqui ome oso eyi testigos. <sup>20</sup>Huan no nimitzilía que tacán senme den taneltocani quisentocaj motajtacolmacatiasque, ijcuacán tejua, Timoteo, monequi xiquintacahualti den nintajtacol senteixpan den ocsequin tocnihuan tacaquini para ma no moyolmoutican in taneltocani para ma amo no motajtacolmacacan. <sup>21</sup>Tejua Timoteo, nimitzcahuilía nijín tequit ica in chicahualis den Totajtzin Dios huan ica in chicahualis den Totecotzin Jesucristo huan ica in chicahualis in ángeles taquehualme den ne itajitaluan de Dios, porín yejuan mitzitztocque. Ica ya nojón nimitznahuatilía que xicsentoca xictacamati nijín tanahuatilme huan amo xiquinchichicotasojta in tocnihuan taneltocani. Huan amo no xiquinyolicneli sayó neques ten mohuan moyoltasojtatine-mij san. <sup>22</sup>Huan no nimitzilía que amo niman ca ijsiucayot xictali se tocnieu taneltocacque queme se tiopanhuehuentzin. Porín como ticpohuas queme se tiopanhuehuentzin ca ijsiucayot huan amo ticmati toni tajtacol cualcuitihuitz ne tagat, ijcuacán tejua no timotajtacolmacas ica por ne itajtacol ten cualcuitihuitz de ne tagat ten tictalij queme tiopanhuehuentzin. Huan no nimitzilía ximoyecpixinemi ica ne yolchipahualis.

<sup>23</sup>Huan tejua Timoteo, nimitzilía ijcuín: Como timococojtinemi de mopox tatan de cocolisti, ijcuacán amo xitayí at san. Ta, cachi cuali xitayí tzictzin vino. <sup>24</sup>Huan no nimitzilía que achtopa que ticchihuas cuali ximotachili cuac ticnequi ticpohuas queme tiopanhuehuentzitzin porín sequi taca monextijtiu senteixteno nitajtacoluan achtopa que Dios quinixcomacas huan quintelchihuas. Pero sequin taca amo niman motenextijtiu nintajtacoluan como amo hasta cuac Dios quinixcomacas huan quintatzacuilitis. <sup>25</sup>Huan xicmati que no ijcón motenextijtiu ne cuali taca-matilis den sequin taneltocani. Huan xicmati que ongac ocsequin taneltocani ten quichiutinemij ten cuali pero ne taca-matilis ten quichiutinemi, yejua ne amo monextitijtinemis senteixteno. Ta, hasta satepan quipía que monextis.

**6** Huan no nimitzilía de que ne taca taneltocani den taquehualme tacohualme, yejuan monequi ma quinpiacan míac mohuisyot ihuan ninpatrones. Porín como amo quipíaj mohuisyot para ninpatrones, ijcón yejuan quihuijuicaltíaj in chicahualis den tocaytzin den Totajtzin Dios huan no yejuan quitejtenehuaq totanexutilisuan.

<sup>2</sup>Huan ne taneltocani ten taquehualme tacohualme, como yejuan quipíaj ninpatrónes ten no taneltocani, ma amo quiyolnemilican que amo monequi quinpiasque mohuisyot ihuan ne ninpatrones porín ninpatrones no yejuan taneltocani. Ta, yejuan taquehualme tacohualme monequi cachi oc ma quinqtequitilican ne patrones taneltocani porín ne patrones taneltocani huan sentasojme ya huan quiselisque ne yec tequit den taneltocani tacohualme. Huan nochi nijín ten nimitzilía monequi xiquin-machtijtjinemi huan xiquinnojtztinemi in taneltocani.

### Ne tacuautamatilis ihuan Cristo huan ne yolsehuilis

<sup>3</sup>Huan no nimitzilía, tejua Timoteo, xictali cuidado de ne tamachtiani ten ay tanextilijtjinemij ica semi taman tamachtilis ten amo quisenijtoa queme ne tamachtilis ten hualeutoc tech ne yec tajtolme de Totecotzin Jesucristo. Porín ne nintacajcayahualis amo tzineutoc itech ne tamachtilis ten cualcui ne yec chipaucanemilis. <sup>4</sup>Huan neques taca ten tacajcayautinemij ica nintanextililisan, yejuan nojonques mohueyinectinemij san huan hasta amo no teyi quimatij. Huan ne tacajcayahuani mococoaj de nintamachilis huan mocuatapololtijque ya porín cuelitztocque ne tajtoltehuilis san de nencajtic san, huan no cuelitztocque motatajtoltehuijtjinemisque san. Huan ica nijín ne tajtoltehuilis hualehua ne nexijcolot huan ne teteluililisan huan ya ne tahuijuicaltilis huan ya ne tahuelitalis. <sup>5</sup>Huan no ica nijín ne tajtoltehuilis hualehua ne cualanyot se huan ocsé tagat. Huan nijín taca tacajcayahuani, yejuan nojonques nintanemililisan cuencueptoc san. Ica ya nojón amo huelis yec tanemilisque ica ten cuali huan hasta nión no quixmatij in Tajtoltzin de Dios ten melahuac. Huan yejuan nojonques quiyolnemilíaj que se tamachtijtjinemi ica in Tajtoltzin de Dios que xa yejua ica se mohueyixpanoltía. Huan cuac tiq-uítas que ijcón mochiutoc ya, ijcuacán ximosecakahua de yejuan. <sup>6</sup>Nojón hueyi melau que ica tochipaucataneltocalis mochihuaquiu queme yesquía se hueyi ricojyot. Pero ijcón mochihuas sayó inpan yejuan neques ten yolpactocque tenica Dios quinqmactilía para moixpanoltijtiyohue. <sup>7</sup>Porín xicmati que cuac tiyolicoj nican talticpac, ijcuacán ne tonal amo teyi ticualicque. Huan no ijcón cuac timomiquilisque, ijcuacán amo no teyi huelis tiquixtijtehuasque. <sup>8</sup>Tajcón ticpíaj ya totacualisan huan totaquenuan, ijcuacán ma tiyolpactiyacan ya ica ten ticpíaj ya. <sup>9</sup>Huan nochi naquen quinejnequij cachi oc moricojttilisque, yejuan nojonques amo quimatij queniu quitequitiltijtiyasque ninricojyo. Ica ya nojón yejuan niman motajtacolmacaj porín ay quichiutinemij tensá den yejuan intanejnequilis san de ne mijmiquiloyot san. Huan no ay quichiutinemij tensá tenica quijtacojtjinemij nintacuautamatilis. Ica ya nojón yejuan no quinqjtacojtjinemij san den nintacuautamatilis den ocsequín taca huan no quinqteputiyohue ocsequin taca ne campa ixpolihuilis. <sup>10</sup>Cuac acsá quinequi sayó moaxcatilis míac ricojyot, ijcuacán xicmati que itanejnequilis de tomin quichihua ma onca míac tataman ten amo cuali tachihualisme. Huan melau ijcón mochihuac que sequin taneltocani moixtanectiyaj ica míac ricojyot. Ica ya nojón sequin quipolajque nintacuautamatilis huan motajyohuilticoj ica míac tataman ohuijcajome.



**Ximoyolchijchicahua ica motacuautamatis para  
ma amo mitztanili in ohuijcyot**

<sup>11</sup> Pero tejua Timoteo, titequitique de Dios, nimitzilía ximochololti de nijín tajtacolme ten nimitzilijtoc ya. Huan nicnequi que tejua xicsentoca tech in chipaucanemilis. Huan no xicsentoca xicmohuistilijtiu Dios huan no xicyectacuaautamatiu ihuan Cristo; huan no xiteyoltasojtatiu. Huan no xiquiniyjohuijtiu nochi in tajyohuilisme pero ica ne yolyemanalis. <sup>12</sup> Huan ijcón queme in soldado motehuijtinemi ica nochi nichicahualis, no ijcón tejua ica nochi motalnamiqulis xicchiutinemi in tequit de Dios de xiquantaneltoctijtinemi acsame ihuan Cristo. Huan ximoyecaxcatili de ne nemilis ten amo queman tamis, porín yejica ya Dios mitznotzac que xicipati. Huan ixnesic ya motacuautamatis cuac tictenextilijtinemic ya ninixpan miacque aquen mitzcaquilijtinenque ya. <sup>13</sup> Huan axcan nimitznojnotztoc iixpantzinco Totajtzin Dios ten quichiutica nochi ten ongac. Huan no nimitznojnotztoc iixpantzinco Jesucristo ne ten quitenextilijtinemic de que Yejuatzin Cristo Temaquixtijque. Huan no Yejuatzin quitetapohuito de Totajtzin Dios hasta inahuac in tayecanque Poncio Pilato. <sup>14</sup> Huan nimitznahuatilía que xicyectacamatinemi nochi ten nimitzilía. Huan no nimitzilía que amo xicsecocahua nión se tajtol de nimitzilía, para ma ijcón amo aquen huelis mitzpajpantijtiyacan ica tajtacol. Huan no ijcón nimitzilía, xicsentoca xitacuaautamatiu hasta in tonal cuac mohualuicas in Totecotzin Jesucristo. <sup>15</sup> Huan cuac ejcos ya in tonal ten Dios quitalij, ijcuación Jesucristo mohualuicas nican talticpac. Huan Totajtzin Dios, sayó Yejuatzin quipía nochi in chichahualisme; huan sayó Yejuatzin techtatiochihuilía; huan sayó Yejuatzin in hueyi Tayecancatzin inpan nochi tayecanani. Huan no sayó Yejuatzin in Hueyichiucatzin inpan nochi in tequihuani. <sup>16</sup> Huan sayó Yejuatzin ten amo queman miqui. Huan no sayó Yejuatzin yetica campa tatanesyen campaña amo aquen huelis motoquis. Huan Yejuatzin amo aquen acsame queman quitacque nión no huelis quitasque oc ica ne inixtololohuan san. Huan sayó Yejuatzin ma ticmohuistilijtiyacan porín sayó Yejuatzin nachipa quipixtinemi in chicaucahuelilis. Ma ijcón mochihua. Amén.

<sup>17</sup> Huan no nimitzilía, tejua Timoteo, xiquinyequili nochi ne taneltocani ricojme nican talticpac que ma amo mohueyinectinemican; huan no xiquinili sayó ma amo motachicahuilican tech ninricojo, porín nochi ne ninricojo huelis tajtamis san. Ta, cachi cuali tejua xiquinyequili que ma quitalican nintacuaautamatis sayó tech in Totajtzin Dios, porín Yejuatzin nachipa yoltica huan Yejuatzin no technecajtatiochihuilía san ica de miac tataman para ma ijcón timoyolpactijtiyacan ica nojón tatiochihualisme de Dios. <sup>18</sup> Huan no nimitzilía que xiquinili ne taneltocani ricojme que ma quichihuacan nochi ten cuali san, pero ma moricojtilitiyacan sayó ica ne cuali tatacamatis. Huan no xiquinili yejuan que nachipa ma teyolicnelijtiyacan huan ma tapalehuijtiyacan ica ne tomin ten quipíaj ya. <sup>19</sup> Huan nojón ricojme como ijcón quichiutinemisque, yejuan nojonques se tonal moaxcatilijtihue ne ricojyot ten melau cualtías nachipa. Huan ne ricojyot de cuali tachihualisme, yejua ne cualcui yolchicahualis para ne tonal cuac tiyetinemisque iixpantzinco Totecotzin Jesucristo. Huan ica nijín tachihualisme ten ticchiutiyasque, tejuan timoaxcatilisque ne ten melau nemilis ten amo queman tamis.

**Tanejmachtilis tenica tamis nijín amatzin**

<sup>20</sup> Huan no nimitzilía, tejua Timoteo, xictacamatiu nochi nijín tanahuatilme ten nimitzcahuilijtehuac ya. Ximosecakahua den ne tetapohuilis tenica in tamachtiani sayó mohuelitztinemij porín nochi nojón nencajtíc san. Huan no ximosecakahua de ne tatajtoltehuilis ten no monejnehuilía queme in yec tamachilis pero sayó tecajcayautinemij san. <sup>21</sup> Huan melau sequin tamachtiani quipolojque nintacautamatilis porín yejuan quineltoctiyajque ne tatajtoltehuilis ten sayó tecajcayahua huan ijcón amo cajsicque ne yec tacautamatilis de Cristo. Huan tech nijín ma sayó Dios mitzy-olicnelijtiu. Ma ijcón mochihua. Amén.

## ICA OME TAJCUILOLAMATZIN TEN QUIJCUILOHUILIJ IN TATITANIL SAN PABLO PARA IN TAPIXQUE TIMOTEO

### In Pablo quitajcuilohuilij Timoteo

**1** Nejuatzin ya ni Pablo de nitatitanil de Jesucristo ijcón queme Totajtzin Dios quimonequiltij huan porín Totajtzin Dios motencahuaco de que techmactilis ne nemilis nachipa como tipoutinemij ihuan Cristo Jesús. <sup>2</sup>Nimitzjcuilohuilía nijín amat para tejava Timoteo, porín tejuatzin tinotasojconetzin porín nimitztaneltoctij ihuan Cristo. Huan nicnequi que xicpixtiu ne tatiocihualis huan ne teyolicnelilis huan ne yolsehuilis ten hualehua inahuac Totajtzin Dios huan inahuac de Totecotzin Jesucristo.

### Ma xitetapohuijtinemi de Cristo

<sup>3</sup>Huan ijcón cuac nimitzelnamiqui tech nonetatatautulis ihuan Dios, ijcuacán yohualitonal nictasojcamachilía Totajtzin Dios por tejuatzin. Porín nejua nictequiltijtoc Totajtzin Dios ica ne yolchiphualis ijcón queme quichiutihualajque nohuejcautatuan. <sup>4</sup>Huan ijcón nejua nachipa niquelnamiqui de mochoquilis cuac nimitzcautehuac tech ne pueblo de Efeso. Huan axcan yohualitonal ocsepa nicnecotoc nimitzitas para ijcón nimohueyiyolpactis. <sup>5</sup>Porín nejua nachipa niquelnamiqui de quenin tiyecajscatacuautamatic ya ihuan Dios. Huan ijcón queme mohueyinan Loida tacuautamatic ihuan Dios huan ya monantzin Eunice tacuautamatía ihuan Dios no ijcón tejava, nicmati que titacuautamatiu ihuan Dios.

<sup>6</sup>Ica ya nojón nimitzelnamictía que ocsepa xicyectequiltijti nojón huelilis ten Dios mitzmactilij ya cuac nejua nimitzcuamapachoj ca nomahuan. <sup>7</sup>Porín Totajtzin Dios amo techmactilij se ejecat de moucapinahualis. Ta, techmactilij ya se yolchicahualis huan ya ne tetasojtalis para ijcón huelis timoyecantiasque ica yolchiphualis. <sup>8</sup>Ica ya nojón amo ximopinaucamati cuac tejava titetapohuijtinemis de Totecotzin Jesucristo. Huan no nimitzilía que amo xipinaucamati de nejua porín nejua nechpixtocque queme preso sayó porín nitetapohuijtinemic de Cristo. Ta, cachi cuali tejava no xitajyohuijtinemi cuac mitzajsitiyás ne ohuijcyot cuac titetapohuijtinemis de que Cristo quinequi techmaquixtis. Huan nochí nijín tequime huan tajyohuilisme sayó Totajtzin Dios mitzchicahualismacatiyás para tiquijyohuijtiyás. <sup>9</sup>Huan in Totajtzin Dios Yejuatzin techmaquixtij ya huan techijitac ya huan technotzac ya que tejuan ma tichipaucanemican. Huan in Totajtzin Dios Yejuatzin amo techmaquixtij sayó ica por toqualitachihualisuan san. Ta, techmaquixtij porín Yejuatzin ijcón quimonequiltij san, huan no porín techonyolicnelij. Huan Totajtzin Dios techyolicnelij ijcón porín tipouque ya ihuan Cristo achtopa que tzinehuasquía in talticpac. <sup>10</sup>Pero axcan Dios quitenextij ne hueyi nitetasojtalis para tejuan cuac monextijtzinoco Totecotzin Jesucristo nican talticpac. Huan Cristo quixijxicoco in chicahualis de miqulilis tenica in amocuali momasoutoya topan. Huan Cristo technextilico ne nemilis ten amo queman tamis, cuac Yejuatzin tetapohuijtinemía ica Tajtoltzin de Dios ten cualcui ne nemaquixtilis. <sup>11</sup>Huan Totajtzin Dios nechijitac que monequi nejua ma nictetapohuijtinemi nijín Tajtoltzin de Dios ten cualcui ne nemaquixtilis. Huan no Totajtzin Dios nechualtitanic queme niitatitanil para ma

ijcón nejua niquinmachtijtjinemi in tagayot ten amo poutinemij queme judíos ten Tajtoltzin de Dios. <sup>12</sup> Huan sayó porín nictetapohuijtinemía den Tajtoltzin de Dios, niquiyohuijtoc nican nijín ohuijgayot queme preso. Pero nejua amo nimopinahuilía niyetoc nican queme preso, porín nejua cuali nicmatoc aconi ihuan nitacuautamatinemi. Huan no cuali nicmatoc que Yejuatzin in Cristo quipía nochi in chicahualis para nechyecpixtiyás hasta cuac ne tacuitapan tonalme ya yesqui, porín sayó Yejuatzin ihuantzin nitacuautamati. <sup>13</sup> Huan ne cuali tanextililis ten nimitzinctactilij ya, tejua xicsentoca xictacamatui huan no xicsentoca xichipaucanentinemí ica ne yec tacuautamatilis huan ica ne tetasojtalis. Yejuan nijinques techyecantinemisque porín no tipoutinemij ihuan Cristo. <sup>14</sup> Huan xicyecpixtinemi ica nejmach ne chipahuac Tajtoltzin ten Totajtzin Dios mitzmactilij ya. Huan xicmati que Dios mitzmactilij ya nijín Tajtoltzin ica por ne ichichahualis den Yecticatztin Espiritu ten yetinemi toyolijtic.

<sup>15</sup> Huan queme ticmatoc ya, nochi in taneltocani de ne país ten monotza Asia, yejuan nojonques mosecocaque ya de nejua. Huan ne Figelo huan ya ne Hermógenes, yejuan nojonques omen no nechsecocaque ya. <sup>16</sup> Huan ma Totajtzin Dios quiyolicnelijtiu ne taneltocque ten monotza Onesíforo ihuan ichancahuan. Ijcón niquijtoa porín yejua miacpa huahualaya nechyoltalico huan nechylchichahuaco, huan yejua amo quemán pinahuac de nechitaquiui cuac nejua nitzactoya huan niilpitoya ica cadenas queme nipreso. <sup>17</sup> Huan ne Onesíforo cuac ejcoc tech nijín pueblo Roma, ijcuacán amo yolajsic de nechtemojtinemis. Ta, yejua nechtemoaya ica nejmach hasta campa nechajsis. <sup>18</sup> Huan tech ne tonal cuac Dios quinixcomacas in talticpacuani, ijcuacán ne Onesíforo ma no quiseliti ne teyolicnelilis imacotzinco Totajtzin Dios. Porín tejua cuali ticmatoc ya que ne Onesíforo cuali techpalehuijtinemic cuac tisenyetoyaj tech ne pueblo Efeso.

### Xinentinemi ijcón queme se cuali soldado de Jesucristo

**2** Huan tejua Timoteo, tinotasojconetzin porín tisenpoutocque ihuan Cristo. Huan nimitzilía que ximoyecyojvolchicautiu ica ne teicnelilis ne ten Dios techmactilijtoc porín ihuan Yejuatzin tisenpoutinemij. <sup>2</sup> Huan tejua Timoteo, ticactinemic ya notanextililis inixpan míac tacaquini, cuac nitamachtijtjinemía ica in Tajtoltzin de Dios. Huan ne notanextililis xicui huan xiquinmacti ne taneltocani ten tiquitas que melau quinequij motequitiltisque para Cristo. Huan yejuan nojonques no ma quinextilijtinemican ocsequin tagayot ica in Tajtoltzin de Dios.

<sup>3</sup> Ica ya nojón, tejua Timoteo, nimitzilía que xicxiucojti ne tajyohuilisme ten cualcui totacuautamatilis ihuan Cristo Jesús, ijcón queme se soldado quiyohuijtinemi ne netehuilis de guerra. <sup>4</sup> Porín in soldado amo mocalaquitinemi tech míac tataman tequime. Ta, in soldado quinequi quichiutinemis sayó ne tequit ten quinajnahuatía ne tayecancasoldado. Huan no tejua no ijcón sayó xicchiutinemi ten technahuatía in Totecotzin Jesucristo. <sup>5</sup> Huan nojón tagat ten mahuiltijtjinemi ica ne deporte ten míac tataman, yejua ne quinequi quitanis ne hueyi tetayocolil. Pero amo huelis quitanis como sayó elihuistitinemis san huan como amo quitacamati in tanahuatilme den tayecanque. <sup>6</sup> Huan ne naquen milajtequitijtjinemi quinamiqui ma quiseli achtopa ne nisiohuilis den mochihuac ya. <sup>7</sup> Huan tejua, Timoteo, nimitzilía xicnemilijtiu de nijín notanextililisuan ten nimitzilijtoc. Huan no ijcón in Totecotzin Jesucristo mitzajscamatiltijtiu de toni quijtosnequi nijín tajtolme.

<sup>8</sup>Huan no nimitzilía que ximotalnamictijtiu de Jesucristo ijcuín: Yejuatzin moajocuc yoltoc intzalan in ánimajme. Huan Yejuatzin no catca teconeu de ne huejcau rey David. Huan yejua ya nijín in notanojnotzalis ten cualcui ne maquixtilis tenica nitamachtijtinemi. <sup>9</sup>Huan nijín ne notanojnotzalis ten cualcui ne nemaquixtilis. Ica por nijín nicxijxicojtoc nochi in tajyohuilisme ten nopan huetztoc cuac nechztijzicojque ica cadenas huan nechztacuacque queme se amocuali tagat. Pero nimitzyequilía que masqui nejua nitzactoc queme preso, pero in Tajtoltzin de Dios amo huelis quitzacuasque queme preso. <sup>10</sup>Huan ica nijín notanojnotzalis nicxijxicojtoc nochi in tajyohuilisme ten nopan huetztoc porín nicnequi niquinpalehuis in ocsequin taneltocani ten Dios quinijitac ya ma quiapiacan ne nemaquixtilis. Huan niquinxijcohuilijtiu nochi ohuijca yome para ma yejuan quicactiyasque in Tajtoltzin de Dios para ma no quiselican ne nemaquixtilis. Huan ticselitihue ne cualtzin nemaquixtilis ten amo queman tamis porín tipoutinemij ihuan Cristo Jesús.

<sup>11</sup>Huan nijín tajtol ten namechiliti yejua tamelautoc:

Huan como tejuan timicque ya ihuan Cristo, no ijcón tiyoltinemisque ihuan Yejuatzin sen nachipa.

<sup>12</sup>Huan como tejuan tiquijyohuijtiyohue in ohuijca yome queme Yejuatzin quijyohuico, ijcuacán se tonal titayecanatihue ihuan in hueyi tayecanque Cristo. Pero como tejuan axcan tictaatíaj totanelto calis, no ijcón Yejuatzin se tonal teilis que amo ihuantzin tipohuij.

<sup>13</sup>Huan como tejuan amo ticsentocaj titacua autamatinemij ihuan Dios, pero Yejuatzin, quema, nachipa quisentocas yolmelahuactzin huan quichihuati ijcón queme moyectencahuac ya, porín Yejuatzin amo huelis motajtolcuepas oc.

### **Pablo tajtoa de se cuali tequitique**

<sup>14</sup>Nejua nicnequi xiquinelnamicti ocsepa in taneltocani den nochi nijín tanextililis ten nimitzilijca ya. Xiquinnahuati itencopa Totecotzin Jesucristo ma amo quisentocacan motajtoltehujtinemican. Porín nochi ne tajtoltehuilis amo teyi techchiuilía ten cuali. Ta, cachi oc quinuejuelohuilía in tacua autamatilis den tacaquini.

<sup>15</sup>Ximoyojoyolchicahua xitequititinemí ca cuali para cuac tiyetotiu iixpantzinco Totajtzin Dios, ijcuacán Yejuatzin mitzhueyichihuati porín ticuali titequitique. Huan ijcón amo teyi oncas tenica para timopinautis. Ica ya nojón no nimitzilijtoc xictequitilti in Tajtoltzin de Dios ica tamelahua. <sup>16</sup>Ximosecocahua de ne tetapohuilis huan tamachtilis de namohueyitatuan ten nencajtic san. Porín xicmati que naquen tanextilíaj ica ne taman tetapohuilis san, yejuan nojonques cachi oc mohueyitajtacolmacatíyohue ya. <sup>17</sup>Nochi ne tetapohuilis quinmajmautinemí ica tajtacol ne tacaquini ijcón queme se cocolisti temajmahua. Huan ijcón quichiuque ne omen tamachtiani ten monozayaj Himeneo huan ya ne Fileto. <sup>18</sup>Porín yejuan mosecocaque den melahuac Tajtoltzin de Dios. Huan yejuan tamachtijtinemij de que nochi in taneltocani yejuan panquisque ya yoltocque intzalan in ánimajme. Ica ya nojón yejuan quitatamilijque nintacua autamatilis den sequin taneltocani. <sup>19</sup>Huan Totajtzin Dios quichihuac ya tech toyolijtic se yec tachicahualoni den tacua autamatilis huan ijcón titecaquiliayaj ijcuín: “In Totecotzin cuali quinixmati naquen pohuij ihuantzin”. Huan no in Tajtoltzin de Dios techyequilía ijcuín: “Nochi ne ten mo-

tatautilijtinemij ica in chichualis den nitocaytzin de Jesucristo, yejuan nojonques monequi ma mosecocauiyacan de nochi míac tataman tajtacolme”.

<sup>20</sup> Huan tejuan titaneltocani queme yesquía se hueyi cali. Huan tech se hueyi cali ongac míac tataman manamicme. Huan sequin manamicme semi cualtíaj para cualnescayot san queme ne ten tachijchiu de oro oso plata. Huan sequin manamicme semi cualtíaj para ohui tequit queme in cuohuit oso soquit. <sup>21</sup> Huan ijcón no tejuan titaneltocani queme yesquía timanamicme de Dios. Huan monequi ma timoyolchijchipahuacan de nochi den tajtacolme para ma tyesque timanamicme de Dios ten semi cualtíaj. Huan ijcón Totecotzin huelis techtequitiltijtiyás ica ten yesqui tequit ten Totecotzin Yejuatzin quimonequiltía ma ticchiuacan.

<sup>22</sup> Huan no nimitzilía que ximochololti de ne tajtacolme de ahuilnemilis tenica motecahuilfaj telpochme ma quinuiyacan tech in tajtacol. Ta, nicnequi xichipaucanentinemi, huan xitacautamatinemi ica tetasojtalis huan ica ne yolsehuilis. Huan ijcón xichipaucanentinemi ijcón queme nentinemij in ocsequin taneltocani yolchipauque ten motatautilijtinemij sayó ihuan Totecotzin Jesucristo ica yec yolchipahualis. <sup>23</sup> Huan no nimitzilía xicsecocahua ne tajtoltehuilis san ten sayó mijmiquiloyot san, huan sayó nencajtic san. Porín cuali ticmatic ya que nochi nojón tajtoltehuilis quichiutinemi que cachi ma onca tajtoltehuilis.

<sup>24</sup> Huan se cuali tequitique ten quiyolpactía Dios, yejua nijín ma amo quinchihuilitinemi ocsequin que ma no motajtoltehujtinemican. Ta, ne cuali tequitique de Dios, yejua ne cachi oc monequi oc ma yolyemancanemi huan ma quipixtinemi ne huelilis de quenín tamachtijtinemis ica in Tajtoltzin de Dios. Huan ne cuali tequitique de Dios ma quijyohujtinemi in ohuijcaiyot ca nejmach. <sup>25</sup> Huan no ma quintaneltoc-tijtiu ca ne yolyemanalís naquen quixtopehuaj in tanextililís de Tajtoltzin de Dios. Huan ne cuali tequitique de Dios ma sayó quincahuili imacotzinco Dios ne taixnamiquini, para ma yejuan ma moyolnemilitij achto de nintajtacoluan. Huan cuac moyolnemilisque ya, ijcuacón quiyecajsicaixmatisque in Tajtoltzin de Dios. <sup>26</sup> Huan como melau moyolnemilisque de nintajtacoluan, ijcón ocsepa talnamiquisque huan huelis mochololtisque imaco den amocuali Satanás. Porín Satanás quinequi quincupapololtis in tagayot para ma yejuan quitacamatiyacan ijcón queme yejua quinequi in amocuali Satanás.

### **Pablo tajoa de quenín nentinemis que in tagayot tech ne tacuitapan tonalme**

**3** Huan tejua Timoteo, monequi xicmati que tech ne tacuitapan tonalme topan huetziquiu ne hueyi tajyohuilis. <sup>2</sup> Huan nemisque in tagayot ijcuín: Motasojtatinemisque yejuan san, huan yejuan ixjxicuintinemisque ica tomin san, huan mohueyichiutinemisque huan mohueyinectinemisque. Huan ijcón yejuan quitelchiutinemisque Totajtzin Dios, huan amo quintacamatisque oc nintatuan. Huan amo no teyi ica motasojcamachilisque oc ihuan intatuan, huan hasta amo no quimohuiscapohuasque totacautamatilis ihuan Dios. <sup>3</sup> Huan ijcón nochi nojonques amo quipíaj oc tetasojtalis nión no teicnelijtinemij. Huan yejuan sayó tepajpantinemisque san tensá ten sayó nencajti san, huan amo hueli motzacuilfaj oc den nintanejnequilis ten cualcui tajtacol. Huan nojonques no cuelitaj san quintajyohuiltisque acsame ica toneucayot, huan no quitahuelitztinemij nochi ten cuali. <sup>4</sup> Huan yejuan nojonques amo huelis se tacuautamatis inuan porín sayó tacajcayahuj. Huan yejuan nojonques elihuistijtinemij san; huan mopoutinemij que semi hueyi chihuanime.

Huan yejuan sayó quitemojtinemij quenín moyolpactijtinemisque pero amo quite-mojtinemij quenín para quiyolpactijtinemisque Dios. <sup>5</sup>Yejuan nojonques mopou-tinemisque no queme taneltocani huan quinejnehuililtisque queme in tacuautamatilis ten melau, pero yejuan quimajpeutiyohue ne yec chicahualis den techmactil-ijtinemi ya in Yecticatzin Espíritu. Huan nochi nijín taman tagayot nimitznejmachtía teja, Timoteo, que ximosecocahua de nijín tacajcayahuani.

<sup>6</sup>Huan nijín tacajcayahuani yejuan ichtacatzin ay tecalijticalaquij para quincaj-cayahuasque ne sihuame ten amo yec quinemilijtinemij de nintacuaautamatilis porín amo yec tapojpoluime de Dios. Huan nijín sihuame motecahuilfaj ma quinuica nintanejnequilis san de yejuan san. <sup>7</sup>Huan nijín tacajcayahuani nachipa quieyeye-coaj para momachtijtinemisque nochi tataman tamachilis ten ongac. Huan masqui ijcón quichihuaj pero amo queman huelis quiyecajscamatisque in melahuac Taj-toltzin de Dios. <sup>8</sup>Huan ijcón queme ne nahualme Janes huan Jambres quichiuque cuac quixnamicque Moisés, no ijcón quichiutinemij axcan nijín tacajcayahuani cuac quimajpeutiyohue in yec melau Tajtoltzin de Dios. Huan nijín tacajcayahuani nin-tamachilisuan quinmamauto ica tajtacol. Ica ya nojón yejuan amo huelis quipi-atihue se yec tacuautamatilis ten majsitoc. <sup>9</sup>Huan nijín tacajcayahuani amo teyi huelis quichiutinemisque den nintacajcayahualis, porín hasta ne talticpacuani ten amo taneltocani, yejuan no quintilijtiyohue de nintachihualisuan que nochi mi-jmiquiloyot san. Huan no mochihuasque ihuan ne tacajcayahuani ijcón queme mochihuac cuac ne ome nahualme no moixehuijque que quixnamiquisque in Moisés.

### **Pablo quicahuilijtehuac Timoteo nijín tequime**

<sup>10</sup>Huan quema, teja Timoteo, tinechitilijtinemic huan tictacamatinemic notanex-tililisuan. Porín teja tiquitac ya de quenín nichipaucanentinemíc. Huan no tiquitac ya de quenín nitequititinemic. Huan no tiquitac ya notacuautamatilis huan de quenín nicxijxicoa in ohuijcajot. Huan no tiquitac ya notetasojtalis huan queniu nic-sentocaya tech notequiu masqui nechtajyohuiltiyaj. <sup>11</sup>Huan no tiquitac ya de que-niu nechtemojtinenque para nechtatzacuiltisque huan nechtajyohuiltisque. Huan teja cuali ticmatoc nochi toni nopan mochihuac campa ne pueblojme ten monotza Antioquía huan tech ne pueblo de Iconio huan tech Listra. Huan ticmatoc ya nochi in tajyohuilis ten nopan mochihuac tech ne pueblojme, pero Notecotzin Jesucristo nechmaquixtij tech nochi nojón tajyohuilis. <sup>12</sup>Huan yec melau que nochi naquen quinequisque yec chipaucanemisque ica ne chicahualis de Cristo Jesús, yejuan no-jonques tajyohuijtiyasque. <sup>13</sup>Huan nochi nojón taca ten amo yolcualime, huan nochi nojón tacajcayahuani, yejuan nojonques cueyiltijtinemisque ica ne amocuali nin-tachihualisuan. Huan yejuan nojonques quisentocasque tacajcayautinemisque huan masqui yejuan san moyolcajcautininemisque san.

<sup>14</sup>Pero teja Timoteo, nimitzilía que xictacamatiu nochi tanexutililisme ten timo-machtij ya huan ten ticyecneltocac ya, porín teja cuali ticmatoc ya aconi mitznex-tilijque nijín tajtolme. <sup>15</sup>Huan teja ipa cuali ticmatoc que cuac tipili oc ticatca, ijcuacón peuque mitznexutiliyaj no nijín Tajcuilolamatzin de Dios. Huan sayó nijín Tajtoltzin de Dios huelis mitznexutilis huan mitzyecantiyás para ticajsis ne nemaquix-tilis, como teja ticpixtinemi se ajscatacuaautamatilis ihuan Cristo Jesús. <sup>16</sup>Huan nochi in Tajcuilolamatzitzin nochi yejuan Dios quichihuac ica ichicahualisuan. Ica ya nojón in Tajtoltzin de Dios huelis se cuitinemis para ica se tamachtijtinemis huan

no para ica se quintaneltoctijtinemis in tagayot ma quicautiyacan nintajtacoluan. Huan no in Tajtoltzin de Dios huelis se cuitiyás para ica quinyolmelautiyás huan para ica se quinmachtijtiyás in taneltocani de queniu chipaucanemisque.<sup>17</sup> Huan ica nijín Tajtoltzin in tequitique de Dios mochihuaqui yec yolmajsitoc huan no mochihuaqui cuali cuatamatoc, huan ijcón huelis quichiutiyás míac tataman den cuali tequit.

### Tejua Timoteo, xitanojnotza ica in Tajtoltzin de Dios

**4** Huan nimitzilía nijín tajtolme iixpantzincó Totajtzin Dios huan iixpantzincó Totecotzin Jesucristo ne ten hualas para quinixcomacaqui huan quintatza-cuiltiquiu nochi naquen axcan yoltinemi oc huan nochi naquen momiquilijque ya. Huan Totecotzin hualas monextijtzinoqui nican talticpac para tayecanas ica ihueyichichualis.<sup>2</sup> Ica ya nojón nimitzcahuilijtehuac nijín tequit, ma xitanojnotza ica in Tajtoltzin de Dios. Xitetapohuijtinemi ica ne hueyi yolchichualis yohualitonal campa timoajsis. Huan in taneltocani xiquintaneltoctijti ma quicautiyacan nintajtacoluan huan no xiquinyolmejmelaui huan no xiquinyecyolmajxitijti ica ne nejmach cuac tiqunnextilijtiyás in Tajtoltzin de Dios.<sup>3</sup> Porín ejcos in tonal cuac in tagayot amo quiyecaquisque oc in cuali tamachtis ten Tajtoltzin de Dios. Ijcuacán in tagayot sayó taixnamictinemisque. Huan no quitemojtinemisque ocsequin taman tamachtiani para ma yejuan quinquaquilisque sayó queme yejuan cueltztinemisque quinquaquilisque.<sup>4</sup> Ijcuacán in tagayot quiseccautiyasque huan amo quinequisque quicaquisque ten melau Tajtoltzin de Dios. Huan ijcón yejuan cachi oc ocsepa yasque motemolijtihue ne tetapohuilis den inueyitatuan ten sayó nencajti san.<sup>5</sup> Pero tejua ximoyecpixinemi nachipa ica ne taixejejolisme ten tamelahua; huan no xiquijyohuijti nochi ohuijyayome. Huan sayó ximotequitiltijti para xitanojnotztinemi ica in Tajtoltzin de Dios ten cualcui ne nemaquixtilis. Huan nochi nijín motequi xicyecchiuati ijcón queme Totajtzin Dios mitztequimactij ya.

<sup>6</sup> Huan nejua ni Pablo axcan nimotemactiaya ihuan Dios porín cuali nicmatoc ya que ejcotoc ya in tonal cuac nechmictisque huan ijcón nicautehuas ya nijín talticpac.<sup>7</sup> Huan ijcón queme in soldado motehuijtinemi ica nochi nichichualis, no ijcón nejua ica nochi notalnamiquilis nichiuinemic huan niquntaneltoctijtinemic acsame ihuan Cristo. Huan in tequit ten Cristo nechmactilij ya, nictamichihua ya. Huan nejua nachipa nitatacamatinemic ica tacuautamatilis.<sup>8</sup> Huan axcan Totajtzin Dios nechchixtoc para nechmactilis se cualtzin nemactil eluiyactzincó porín nichipaucaquitijtinemía nican talticpac. Huan Yejuatzin nechmactilijti ne cualtzin nemactil tech ne tonal cuac mochihuas ne hueyi neixcomacalis, porín Yejuatzin se Taixejejojque ten melau yolmelahuactzin. Pero amo sayó nejua san nicseletiu nijín nemactil. Ta, nochi naquen quichixtosque ica tetasojtalis ma mohualuicas Totecotzin Jesucristo, yejuan nojonques no quiselisque nijín nemactil.

### Pablo quilijtoc Timoteo ton tequit ma quichihua

<sup>9</sup> Huan nejua no nimitzilía amo cachi oc xinejnemati de tinechitaqui nican campa niyetoc.<sup>10</sup> Porín ne tagat ten monotza Demas, yejua ne nechcautehuac ya porín cachi quiyolnejneyic quichiutinemis tamachilisme de nican talticpac san. Huan ne Demas yajqui campa pueblo Tesalónica. Huan ne notequitijcaicniu Crescente, yejua no nictitanic ma tequititi campa ititalanal de Galacia. Huan no in Tito, yejua no



yajqui tequitito campa itatilanal de Dalmacia. <sup>11</sup> Huan sayó in Lucas nohuan yetoc. Huan ne Marcos xictemoti huan xicualcui ma huiqui mohuan porín nicmati que ne Marcos cuali huelis techpalehuis ca nijín tequit. <sup>12</sup> Huan ne tocníu ten monotza Tíquico, yejua ne no nictitanic ma tequititi tech ne pueblo Efeso. <sup>13</sup> Huan cuac tejua tihualas ya, ijcuación nechualcuili nocochtaquen ne ten nicahuac ichan ne Carpo tech in pueblo ten monotza Troas huan no xinechinualcuili nolibros huan noamahuan de notequiu. <sup>14</sup> Huan ne Alejandro in tepostequitique, yejua ne nechchihuilijtine-míac ten amocuali chihualisme. Pero Totecotzin Jesucristo quixtahuilis ne tagat ijcón queme nechchihuilijtehuac ya. <sup>15</sup> Ximoyecpía de ne Alejandro porín yejua no semi moyolcualantijtinemi huan porín yejua semi quixnamictinemi in Tajtoltzin de Dios tenica titanotztinemi. <sup>16</sup> Porín cuac nechteluilijque ne achtopa ya ninixpan in tequihuani, ijcuación nión aquen se ma nechpalehuiqui. Ta, cachi oc nechcacau-teuque pero nimotatautiliaya ihuan Dios que nijín ten yejuan nechchiluilijque ma amo Dios quinelnamiquiliti cuac Yejuatzin quinixcomacas. <sup>17</sup> Pero Totecotzin Yejuatzin yetoya nohuan. Ica ya nojón nechpalehuij huan nechmacac ne yolchicahualis tenica nejua nihuelic nitanojnotztinemic ica in Tajtoltzin de Dios ten cualcui ne nemaquixtilis. Huan no nechyolchicahuac para ma niquintapohuijtinemi den Tajtoltzin de Dios in taca ten amo pohuij queme judíos. Huan melau Dios nechpalehuij huan nechmaquixtij inmaco nojón tequihuani, porín yejuan queme yesquía tecuanime. <sup>18</sup> Huan no Totecotzin quisentocas nechmaquixtijiyás tech ten amo cuali, huan nechyecpixtijiyás imacotzinco para ijcón huelis nicalaquitiu nepa eluiy-actzinco campa Yejuatzin momasoutoc ica ihueyichicahualis. Huan ijcón sayó Yejuatzin ma ticmohuistilican nachipa huan sen nachipa. Ma ijcón mochihua. Amén.

### **Pablo quintatajpaloa huan quintiochihua nijín taneltocani**

<sup>19</sup> Huan no nimitzilía que niquinontajpaloa in taneltocani Prisca huan Aquila, huan ya nichancahuan de Onesíforo. <sup>20</sup> Huan in tocníu Erasto, yejua mocahuac tech ne pueblo de Corinto. Huan in tocníu Trófimo, yejua nicahuac nepa campa pueblo Mileto porín yejua mococoaya. <sup>21</sup> Huan no nimitzilía que amo xinejnemati de tihualas nican achtopa que ejcosque ne tapoalme cuac taseseyas. Huan no nimitzilía que mitzontajpaloaj in Eubulo, huan in Pudente, huan in Lino, huan no Claudia. Huan amo yejuan san. Ta, nochin in taneltocani de nican mitzontajpaloaj. <sup>22</sup> Huan nicchía que Totecotzin Jesucristo ma Yejuatzin yetica tech moyolijtic. Huan ma sayó Totajtzin Dios namechicnelijti. Ma ijcón mochihua. Amén.

## IN TAJCUILOLAMATZIN TEN QUIJCUILOHUILIJ IN TATITANIL SAN PABLO PARA IN TAPIXQUE TITO

### In Pablo quitajcuilohuilía Tito

**1** Nejuatzin ya ni Pablo nitequitique de Dios huan no nitatitanil de Jesucristo. Huan Cristo nechualtitanic para niqinualcuilis ne tacuautamatilis para naquen Dios quiniitac ya ma pohuican ihuantzin. Huan no Cristo nechualtitanic para niqinyecajsicamatiltis in taneltocani de ne yec Tajtoltzin ten cualcui chipaucanemilis. Huan no Cristo nechualtitanic para niqintaneltoctis in taneltocani de ne yec nemilis ten amo queman tamis. <sup>2</sup> Huan Totajtzin Dios amo tecajcayahua, huan Yejuatzin moyectencahuac ya desde ne achtopa que tzinpehuas in talticpac de que techmacas ne nemilis nachipa. <sup>3</sup> Huan tech nijín tonalme Totajtzin Dios quimonequiltía namechmatiltis Itajtoltzin ica por ne notanojnotzalis. Porín Totemaquixtjicatzin Dios tacuautamatic nohuan. Ica ya nojón nechmactilij nijín tequit huan Yejuatzin nechnajnahuatilij ma nicchiutinemi. <sup>4</sup> Huan tejua Tito, nimitztajpaloa ica nijín amatzin. Huan nicmatoc que tejua queme yesquía tinoconetzin porín nimitztaneltoctij ya huan axcan tise pantacuautamatij ihuan Cristo. Huan nicnequi que xicpixtiu ne teicnelilis huan ne yolsehuilis huan ne tetasotalis ten hualehua imaco de Totajtzin Dios huan imaco de Totecotzin Cristo Jesús.

### Pablo tajtoa de ne tocnihuan tayecanani ten monotza tiopanhuehuentzitzin huan ten monotza obispos

<sup>5</sup> Cual iquelnamiqui que nejua nimitztequimactijtehuac tech ne país ten monotza Creta. Ijcuacón nimitznahuatilijtehuac que xicmejmela huati nochi ohuicayot ten mocautoc. Huan no nimitzilijca que que xiquintequimacti huan xiquintocayti queme tiopanhuehuentzitzin sequi taneltocani tech cada se pueblo campa ongac taneltocani. <sup>6</sup> Huan tacán acsá tocníu quinequi mochihuas queme tiopanhuehuentzin, yejua nojón monequi ma nemi ijcuín: Monequi ma chipaucanentinemi. Huan ne tiopanhuehuentzin monequi ma quipía sayó se isihuau san; huan ijcón nípiluan monequi ma taneltocacan para ma amo aquen huelis quinteluilijtinemis que ica ne pitzotic nemilis huan para amo quinteluilijtinemis que ay elihuistijtinemij san. <sup>7</sup> Huan no ijcón in tayecanani obispos monequi ma chipaucanemican porín yejuan quinyecan tinemij ocsequin tocnihuan ica itencopaca Totajtzin Dios. Ica ya nojón monequi ne tayecanque obispo ma amo mohueyinectinemi; huan ma amo no mocualantijtinemi; huan ma amo no ma mocalaquitinemi campa tahuanani; huan ma amo quitemojtinemi san de queniu quinixnamictinemis ocsequin; huan nión no ma quinectinemi tomin san. <sup>8</sup> Ta, ne tayecanque obispo nachipa ma quipixtinemi tanejnequilis de quinselis icalpanocahuan. Huan no sayó ma quipía tanejnequilis de que ma quichiu tinemi san ten cuali. Huan ma amo elihuistijtinemi san; huan no sayó ma cuali melahuac itaxejocolisuan; huan ma chipaucanentinemi; huan no monequi quimatis quenín motzacuilijtiyás ica ohuicayome. <sup>9</sup> Huan ne tayecanque obispo monequi ma amo quinsecocahua ne tamelahuá Tajtoltzin ijcón queme quinextilijque ya. Huan ijcón no ma hueli yejua quinyolmajxitijtinemis tagayot ma quitacamatinecan ne

chipaucatanextililis, huan no ma hueli quintaneltoctis ne naquen cuelitaj motataj-toltehuisque san.

<sup>10</sup> Pero xiquelnamiqui que ongacque miacque ten elihuistitinemij san, huan sayó quiquinacatinemij, huan no sayó quinyolcajcauyautinemij san ocsequin tagayot. Miacque ne ten ijcón quichihua, yejuan nojonques poutocque oc ihuan in tanelto-calís den judíos. <sup>11</sup> Huan yejuan nojonques ma se quintentamatilis porín yejuan quicuecuelijtinemij in tanelto-calís de se ichancahuan ten quinequij chipaucanen-tinemisque. Huan nojonques judíos no tamachtijtinemij hasta amo no Dios quimonequiltía oc ma quichiutinemican ijcón. Porín yejuan tamachtijtinemij ica taca-jcayahualis, huan sayó quinequij para motanilijtinemisque san ca tomin.

<sup>12</sup> Ne huejcau se tagat tamachile, se de no pohuía campá pueblo Creta, huan yejua quiniñto ipueblojcahuan ijcuín: “In pueblojuani de Creta, yejuan ipa xolopijme san huan no majyá tecuanime pitzoticque ten amo yolcualime; huan no yejuan sayó campetzme san huan tatzihuini san”. <sup>13</sup> Huan ne huejcautagat ten tamachile catca, yec melau ten quijtoco. Ica ya nojón nimitzilía, tejua Tito, xiquinchicaucanejmachtí in taneltocani ma quicautiyacan nintajtacoluan para ma ijcón yejuan quipixtiyacan se yec tacuautamatilis. <sup>14</sup> Nicnequi que xiquinyecnojnotza in taneltocani para ma yejuan ma amo quineltocacan oc ne netetapohuilis ten hualeutoc ihuan ne tagayot judíos. Huan no nimitzilía ijcuín que ma amo no in taneltocani quinneltoquilican oc in tanahuatilme ten hualeutoc itech ne taca san, porín ne tagayot motamisecocauque ya den melahuac Tajtoltzin de Dios. <sup>15</sup> Nochi ten ongac nican talticpac chipahuac ya para nochi neques ten Dios quinyolchipahuac ya. Pero nochi naquen ten amo yolcualime huan nochi ten amo tacuautamatinemij ihuan Dios, yejuan nojonques amo quimatij ten chipahuac, huan amo no quimatij ten pitzotic porín nintamachilis huan nintalnamiqulís momautoc ica tajtacol. <sup>16</sup> Huan nojón taca ten amo yolcualime, yejuan quijtohuaj que no quixmatij Dios, pero ica nijín pitzotic chihualisme niman mota que amo melau que yejuan quineltocaj Dios. Huan yejuan semi tamajcahualme ya, huan semi elihuistitinemij san. Huan yejuan amo huelij quichiutinemij tachihualisme ten cuali.

### **Pablo quiyecajsicamatiltij Tito den tanextililis ten tamelaucoc**

**2** Huan tejua Tito, nimitzilía ijcuín que cuac tiquinnojonnotzas in taneltocani, ijcuacón monequi xiquinnextili ijcón queme tenextilía in tamelaucoc Tajtoltzin de Dios. <sup>2</sup> Huan xiquinnejmachtí ne huehuentzitzin monequi ma yec cuatamaticanemican huan ma yec yolmajsitinemican huan ma cuicatinemican se cuali taixejecolis san. Huan ne huehuentzitzin ma no yec tacuautamatican huan ma yec tetasojtatinemican huan ma nochi tequititinemican ica nejmach.

<sup>3</sup> Huan no ijcón xiquinnejmachtí ne taneltocani ten chicaucasihuame ya, que ma mohuiscauentinemican tech ninemilis huan ma amo ay tajtolerojtatinemican san, huan ma amo no motahuantijtinemican. Ta, yejuan monequi ma quitenextilijtinemican den ninchipaucanemilis. <sup>4</sup> Huan ne chicaucasihuame ma quinnextilijtinemican ocsequin taneltocani sihuame ten ichpochme oc de queniú quintasojtatinemisque ninyoquichuan huan no de queniú quintasojtatiyasque ninconetzitzin. <sup>5</sup> Huan ne chicaucasihuame no ma quinnextilijtinemican taneltocani ichpochme de queniú monequi ma yolmajsitinemican huan ma quipiacan ne yolchipahualis. Huan no monequi ma cuali motequiltican tech nincalyetolis, huan ma no quipiacan teicnelilis. Huan

no monequi ma quintacamatican ninyoquichuan. Huan ijcón monequi ma quichiutinemican in taneltocani ichpochme para ma amo aquen huelis quihuijuicaltis in Tajtoltzin de Dios ica por yejuan.

<sup>6</sup>Huan tejua Tito, nimitzilía que xiquinyecnojnotza in telpocame ten taneltocani que yejuan no ma yec yolmajsitinemican para huelis moyecanasque ica yolchihualis. <sup>7</sup>Pero monequi achtopa tejua xiyecchipaucanentinemi para ma ijcón ocsequin taneltocani ma quinejnehuililtican ne mochipaucanemilis. Huan cuac tejua ijcón tiquinnexlijtinemis ya, ijcuacón xiquinmactijtiu ica ne moyolchihualis huan ica ne moneyolmajxitilis. <sup>8</sup>Huan xiquinnojnotza in tocnihuan ica ne Tajtoltzin ten tamelautoc para ma ijcón amo aquen huelis mitzeluilis ica ten amocuali. Huan ijcón como acsame quinequij mitztajtoli xnamiquisque, yejuan nojónques mopinautisque san porín amo quipiasque tenica mitzeluilisque.

<sup>9</sup>Huan no nimitzilía que xiquinyecnojnotza in taneltocani taquehualme ten tachehualme que ma quintacamatinemican huan ma quinyolpactijtinemican ninpatrónes tech nochi nintequiu huan ma amo sayó ay tanajnanquili tinemican san. <sup>10</sup>Huan ne taquehualme taneltocani monequi ma amo mochihuacan tachicotaliani. Ta, ma quinnexican que yejuan cuicaj se cuali tatacamatilis huan que yejuan tacuautamatecatequitini. Huan como ijcón quichiutinemij nojón taca tachohualme, yejuan nojónques quicualnextijtiyohue in tanextililisme de Totajtzin Dios Totemaquixtijcatzin.

<sup>11</sup>Huan Totajtzin Dios quinnexilico ya nochi in talticpacuani de nihueyiteicnelilis, huan ica nijín teicnelilis huelis quinmaquixtis nochi in talticpacuani. <sup>12</sup>Huan ne teicnelilis de Dios techmactijtinemi de que ma tejuan ticsecocautiyacan ne amocuali nemilis huan ma ticmajpeutiyacan ne tanejnequilisme ten hualeutoc ihuan in talticpacuani san. Huan no ne teicnelilis de Dios technexlijtinemi ma tiyecchipaucanemican ica ne cuali taixejecolis, huan ma ticpiacan ne yolmelaucanemilis huan ma ticmohuistilijtiyacan Totajtzin Dios nican talticpac. <sup>13</sup>Huan no Dios techmactijtinemi que ma ticchixtinemican ica nejmach hasta ne tonal cuac ticsenpiasque ne hueyi yolpaquilis cuac Yejuatzin mohualuicas nican talticpac ica ne hueyi chichualis de nicualtziyo, Yejuatzin ne ten hualajtoc ne hueyi Dios Totemaquixtijcatzin Jesucristo. <sup>14</sup>Huan ijcón Cristo motemactij ma quimictican para ijcón quixtahuas totajtacoluan huan para techmaquixtis tech in pitzotic nemilis. Huan ijcón in Cristo techyecyolchihuaco porín quineyic Yejuatzin que ma sayó ihuantzin ma tipoutinemican. Huan no quimonequiltij Yejuatzin que ma tejuan no ticyolnejnectinemican de ticchiutinemis que sayó ica ten cuali tachihualisme. <sup>15</sup>Yejuata ya nijín ten monequi tejua, Tito, xiquinnexlijtinemi in taneltocani huan xiquinmejmelahua ninnemilis huan xiquinyecyolmajxitijtiu ica nochi ne yolchihualis que ma quicautiyacan nintajtacoluan. Huan amo ximocahua que ma acsame mitzmohuispolocan.

### Dios ica iteicnelilis techtenextía que amo titajtacolejque

**3** Huan no nimitzilía, tejua Tito, que xiquintalnamicijtiyacan in taneltocani que ma motemactijtiyacan huan ma quintacamatiyacan ne huejueyi tayecanani huan tequihuani. Huan no xiquintalnamicijtiyacan in tocnihuan de que yejuan ma nachipa quipiacan yoltanejnequilis para quichiutinemis que ten cuali chihualisme. <sup>2</sup>Huan no xiquinili in tocnihuan de que ma amo ay tetejteneutinemican huan ma

amo motajtoltehujtinemican. Ta, cachi cuali xiquinili que ma yolyemancanemican ihuan nochi in tagayot huan ma quinmohuiscapohuacan nochin pueblojuani.

<sup>3</sup> Porín tejuan ne tonal cuac ayamo ticpiayaj in Tajtoltzin de Dios, ijcuacón tejuan ticuatapolojtinemíaj huan amo tictacamatque Dios huan sayó timocajcayautinemíaj san, porín tejuan tiyoltziztcicautoyaj ica míac tataman tanejnequilis den amocuali. Huan tejuan sayó timoyolpaquiltijtinemíaj tejuan san. Huan no ticchiutinemíaj míac ten amo cuali, huan no tixijxicuintinemíaj san. Huan nochi techtahuelitztinemíaj. Ica ya nojón no tejuan tiquintahuelitztinemíaj se huan ocsé. <sup>4</sup> Pero Dios Totemaquix-tijcau quinnexilij in talticpacuani iteicnelilis huan itetasojtalistzin. <sup>5</sup> Huan ijcón Yejuatzin techmaquixtico. Huan Yejuatzin huala techmaquixtico amo porín tejuan ticchiuque tensá den cuali chihualis. Ta, Yejuatzin techmaquixtico sayó porín techonylicnelico. Huan no Yejuatzin techyancuicayolitico huan techyolchiphahuaco huan in Yecticatzin Espíritu techmacac se yancuicanemilis. <sup>6</sup> Huan Totajtzin Dios techtoyahuilij huan techueyiyolpexontij ica in Yecticatzin Espíritu ica ne chichualis de itocaytzin de Jesucristo Totemaquixtijcau. <sup>7</sup> Huan Dios ica ne hueyi teicnelilis techpohuac que amo titajtacolejque oc. Ica ya nojón tejuan huelis ticselesique ne nemilis sen nachipa ten axcan ticchixtocque que tictamiselijtihue.

<sup>8</sup> Nochi nijín tajtolme ten nimitzilía hueyi melau, huan nicnequi que xiquinyequili in taneltocani ca yolchichualis para ma yejuan quinejnectiyacan de quichiutiyasque sayó ten cuali chihualisme. Huan nochi in tanahuatilme den Tajtoltzin de Dios, yejuan nojón sayó cualcuij ten cuali huan quinpalehuíaj in talticpacuani. <sup>9</sup> Huan no nimitzilía, tejuia Tito, ximosecakahua de tajtoltehuilis ten nenca san, huan de ne tetapohuilis den huejcaucayome. Huan no ximosecakahua de ne tajtolixnamiquilis huan amo ximoyoltehujtinemi de toni quijsosnequi ne tanahuatilme de Moisés. Porín nochi nijín ne tehuilis amo tepalehuía. Ta, nencajti san.

<sup>10</sup> Huan ta acsá tagat quinxelojtinemis taneltocani, ijcuacón tejuia xicnahuati que ma amo ijcón quichihua. Huan cuac ticnahuatis ica ojpa ya huan amo mitzcacuílía, ijcuacón xicalantoca. <sup>11</sup> Huan cuac se tagat ijcón quinxexelojtinemis san in taneltocani, ijcuacón xicmati que ne tagat yejuia san moajchihuílía den Tajtoltzin de Dios. Huan no xicmati que ne tagat motajtacolmaca ica por ne amo cuali inemilis. Ica ya nojón yejuia san motelchiutiu.

### **Pablo quilijtoc Tito ton tequit ma quichihua**

<sup>12</sup> Huan cuac nejua niquintitanis ya ne omen tocnihuan ten monotza Artemas huan Tíquico campa tejuia tiyetoc, ijcuacón ximoijsihuili de tihualas nican tech nijín pueblo Nicópolis porín tech nijín pueblo nicnemilijtoc que nicpanotiu in tonalme de taseseyalistan. <sup>13</sup> Huan no nimitzilía, Tito, que xicpalehui ne tocniu totetajtohuijcau ten monotza Zenas, huan no xicpalehui ne tocniu Apolos. Xiquinojquetzati ne omen huan xiquinmactili nochi ten monequi para ma ijcón amo teyi quinpolotiu. <sup>14</sup> Huan nicnequi que ne tocnihuan taneltocani monequi ma momachtijtiyacan de quichiutiyasque ten cuali chihualisme, huan no ma momachtican queniu para quinpalehuisque ocsequin ten amo teyi quipíaj. Huan como ijcón quichiutiyohue nojón tocnihuan taneltocani, ijcuacón cualquistiyasque nintachihualisuan huan ijcón quipaquiltijtinemisque Dios.

**Pablo quintajpaloa huan quintiochihua in taneltocani**

<sup>15</sup> Huan nochi taneltocani ten nican nohuan yetoque yejuan mitzontajpaloaj. Huan tejua no xiquintajpalo ne tocnihuan ten techyoltasojtaj porín ticpíaj sansé san tacuautamatilis. Huan ne teicnelilis de Dios ma yetinemi namoyolijtic sen nachipa. Amén.

## IN TAJCUILOLAMATZIN TEN QUIJCUILOHUILIJ IN TATITANIL SAN PABLO PARA IN TANELTOCQUE FILEMON

### **Pablo quitajcuilohuilij in tequitique Filemón desde Roma campa yetoc preso**

**1** Huan nejuatzin ni Pablo ten nechtzacuacque ya queme preso porín nejua nítacuaumatanimi ihuan Cristo Jesús. Huan tejua Filemón, nimitzijcuilohuilíá nijín amat. Huan amo nejua san. Ta, no nimitzijcuilohuilijtoc iixteno in tocníu Timoteo. Huan timitztajpaloaj tejua Filemón, titotasojicnítzin huan titotequiticaicnítzin. <sup>2</sup>Huan ica nijín amat no níquintajpaloa nochi in taneltocani ten mosentilíaj tech mochan para quimohuistilisque Totajtzin Dios. Huan no tictajpaloaj in sihuat taneltocacque ten monotza Apia, yejua isihuau de Filemón. Huan no tictajpaloa in tocníu Arquipo, yejua iconeu de Filemón ten techpalehuijtinemi de tictehuijtinemisque nochi tataman chihualis ten amo cuali. <sup>3</sup>Huan nochi namejuan xicpixtiyacan ne teyolicnelilis huan no ne yolsehuilis ten hualeutoc inahuac Totajtzin Dios huan inahuac Totecotzin Jesucristo.

### **Pablo tajtoa de in tetasojtalis huan in tacuaumatilis ten quipixtinemi in Filemón**

<sup>4</sup>Huan nejua ni Pablo nicueyitasojcamachilía Totajtzin Dios por tejua, Filemón, cuac nimitzelnamiqui tech nonetatatautilis ihuan Dios. <sup>5</sup>Huan ijcón nicchiutinemi porín nejua nictecaquilijtinemic ya de ne hueyi motetasojtalis huan de ne hueyi motacuaumatilis ten tictenextilijtinemi ihuan Totecotzin Jesús. Huan no ticnextijtinemi motetasojtalis ihuan nochi ne taneltocani yolchipauque de Cristo Jesús. <sup>6</sup>Huan tejua Filemón, tiqinaxcatilij ya miacque de motacuaumatilis de Cristo. Huan no tiqintaneltoctij ya miacque de Cristo. Huan nejua nimotatautilía iixpan Dios ica por ne yancuic taneltocani. Huan nimotatautilía ihuan Dios que ma Yejuatzin quinyecajsicamatiltijti ne yancuic taneltocani de nochi ne tatiochihualisme ten ticselijque porín tisenpoutocque ihuan Cristo Jesús. <sup>7</sup>Huan no nimohuelita de nicselij se cualtzin yolsehuilis porín tejua tiqinyoltasojtatinemi in taneltocani, huan no tiqinyoltalijtinemi ne yolchipauque taneltocani.

### **Pablo quitatautía Filemón que ma quichihuili Pablo se cualtagayot de quiselis ne tanamactequitique ten monotza Onésimo**

<sup>8</sup>Huan nejua ni Pablo niitatitanil de Cristo, huan ica nijín tanahuatil nicpía huelilis para nimitznahuatis toni monequi xicchiutiu. <sup>9</sup>Huan masqui nejua cuali nihuelisquía nimitzchicaucanahuatisquía, pero amo ijcón nicchihuas. Ta, nicnequi nimitztatautis san ica ne tetasojtalis de Cristo. Xiconita san, nejua ni Pablo nihuehuentzin ya, huan nechtzacuacque ya porín nitanojnotztinemi ica in Tajtoltzin de Cristo Jesús. <sup>10</sup>Ica ya nojón nimitzonueyitatautía por ne taneltocacque Onésimo ten mochihuaco queme yesquía noconeu, porín nictaneltoctij ya ihuan Cristo nican campa nitzactoc.

<sup>11</sup>Ne tonalme ten panocque ya, in Onésimo yejua motaquehual tacohual catca, huan nencajtíc san nitequi para tejuatzin porín mitzcholohuilij. Pero axcan cuali nechtequitilía nejua. Huan no cuali mitztequitiliti oc, tejua Filemón. <sup>12</sup>Ica ya

nojón ocsepa nimitzontitaniliti Onésimo ijcón queme nimitzontitanilisquía notalnamiquilis, porín ihuan Onésimo semi nimoyoltasojtatinemi axcan. <sup>13</sup> Huan nejua nicnequisquía que ma mocahuani oc nohuan in Onésimo, para ma yejua mitzixpatcayotijto, huan ma nechtequitilijto nican campa nejua nitzactoc. Huan nechtzacuacque porín nejua nitanojnotztinemia ica ne yancuic Tajtoltzin de Dios ten cualcui ne nemaquixtilis. <sup>14</sup> Pero nochi nijín amo nicnequi nicchihuas como amo tejua motahuelital que ma mocahua nohuan ocsepa in Onésimo. Huan como mocahuas Onésimo, ijcuacón nicnequi ma mocahua sayó por tejua moyolpaquilis huan amo porín nimitztequihuía. <sup>15-16</sup> Huan melau in Onésimo mitzcholohuilijtehuac ya huan amo mohuan yetoya sequi tonalme. Huan achá Dios quichihuac ijcón para ma axcan huelis ticseles Onésimo ocsepa queme se motaneltoaicniu huan para ma xisenyetinemi mohuan sen nachipa. Ica ya nojón nimitzilía que ne Onésimo, yejua ne mocuepati ya, yas mochan amo queme se taquehual ten tanamac. Ta, moejcoltis campa mochan queme se motasojcinitzin taneltocacque. Huan nejua semi nicyoltasojta ne Onésimo. Pero tejua cachi oc ticyoltasojtatiyás, amo queme se tanamac tequijtijque. Ta, tictasojtatiyás porín yejua se tocnitzin ten poutinemi ihuan Totecotzin.

<sup>17</sup> Huan como melau tejuan tisentequitini ihuan Cristo, ijcón nicnequi xicseliti ca cuali in Onésimo queme yesquía nejua tinechselisquía. <sup>18</sup> Huan no nimitzilía como tensá chihualis ten amo cuali mitzualchihuilijtehuac in Onésimo oso como tensá mitztahuiquilía ca tomin, pues nejua xinechtopalui nochi ten monequis. <sup>19</sup> Huan nejua ni Pablo nimitzijcuilohuilía nijín amat ca nomahuan. Huan ica nijín notajcuilol, xicmati que nejua niquixtahuas nochi ten Onésimo mitztahuiquilisquía. Huan no xicmati que huelis nimitzelnamictis que tejua majyá tinechtahuiquilía hasta mortalnamiquilis porín nejua nimitztaneltoctij ya ihuan Cristo. Pero nejua amo ijcón nimitzililiti. <sup>20</sup> Ta, nejua nicnequi nicseles se cualtagayot de tejua, porín tisenpohuij ihuan Cristo. Ica ya nojón nimitzontatautijtoc que xicseli in Onésimo para que nejua ma no nicsele ne yolsehuilis tech Cristo huan ijcón nejua hasta niyolcaxanis.

<sup>21</sup> Nimitztajcuilohuilía ijcuín, tejua Filemón, porín nicyecmati que tinechtacamatis. Huan no nicmati que tejua ticchihuas cachi oc huan que nijín ten nimitzilijtoc. <sup>22</sup> Huan no nimitzilía que xinechyectaliliti ya campa nimosehuis ompa mochan, porín nejua nicchá que Totajtzin Dios ma namechnanquili namonetatatautilis huan no ma nechcahua ma namechitati.

### **Pablo quintajpaloa huan quintiochihua in taneltocani ihuan ichancahuan de Filemón**

<sup>23</sup> Huan mitztajpaloa ca nijín amatzin in tocnium ten monotza Epafras, ten tzactoc nohuan queme preso, porín titanojnotztineneque ica in Tajtoltzin de Cristo Jesús. <sup>24</sup> Huan no mitzontajpaloaj in Marcos huan Aristarco huan in Demas huan in Lucas. Nijín tocnihuan nochi nechpalehuijtocque tech in tequit de Cristo. <sup>25</sup> Huan Totecotzin Jesucristo ma namechyolicnelijtiu nochi namejuantzitzin. Ma ijcón mochiutiu. Amén.



## IN TAJCUILOLAMATZIN DE DIOS TEN QUINILIAJ HEBREOS PARA IN TOCNIHUAN JUDÍOS TEN TANELTOCANI DE CRISTO

### Nican Totajtzin Dios tajtoa itencopaca Iconetzin, Yejuatzin in Jesucristo

**1** Huan ne huejcau ya Totajtzin Dios miacpa quinnojnnotztihualaya tohuejcautatuan ica míac tataman tamachilis, huan Yejuatzin no quinnojnnotztihualaya tohuejcautatuan ica itencopaca itanahuatijcahuan. <sup>2</sup>Huan axcan tech nijín tacuitapantonalme ya, Totajtzin Dios technojnotztinemic ya ica itencopaca de Iconetzin, Yejuatzin in Jesucristo. Huan Totajtzin Dios quimactilij Iconetzin nochi chicahualis para ijcón Iconetzin huelis quichijchihuas nochi ten ongac nican talticpac huan nepa eluiyac. Huan no Totajtzin Dios quiaxcatilij Iconetzin nochi ten ongac. <sup>3</sup>Huan Jesucristo Iconetzin Dios, Yejuatzin quipixtinemi ichicaucacualtziyo de Totajtzin Dios, ijcón queme in tanex quipía icualtziyo den tonaltzin. Huan Iconetzin Dios, Yejuatzin monextijtjinemi huan tamati ijcón queme Totajtzin Dios tamati. Huan Iconetzin Dios, Yejuatzin ica por ichicaucatajtolan quinmatzacuilijtoc huan quinyecana nochi ten ongac. Huan Jesucristo Iconetzin Dios, Yejuatzin quichihualtico de que ma timocahuacan tiyolchipauque de nochi totajtacoluan ica por Yejuatzin itequiu. Huan cuac techtamichipahuaco ya den tejuan titalticpacuani de nochi totajtacoluan, ijcuacón Yejuatzin yajqui eluiyactzinco huan motalito iyecmacopaca Itajtzin Dios ten quipixtinemi nochi chicahualis campa ichicaucahuelilipan.

### Nican tajtoa de Iconetzin Dios, Yejuatzin cachi hueyichiuque huan que nochi in ángeles taquehualme de Dios

<sup>4</sup>Huan Iconetzin Dios, Yejuatzin Cristo Jesús ten mochihuaco cachi hueyi tayecanque huan que in ángeles. Huan Yejuatzin mochihuaco cachi hueyichiuque porín quiselij ya imaco Itajtzin Dios cachi hueyi itocaytzin. Huan ne tocay cualcui cachi hueyi tanahuatil huan que ne tocay ten quiselijque in ángeles. <sup>5</sup>Huan hueyi melau nochi nijín ten namechilijtoc porín Totajtzin Dios amo queman quinnojnnotzac iángeles ijcón queme quiluij Iconetzin. Pero Totajtzin Dios quilij Iconetzin ijcuín: Tejuatzin tinoconetzin,

huan axcan nimitzmacatilij ya nochi chicahualis porín Nejuatzin nimotajtzin.

Huan ocsepa Totajtzin Dios quilij Iconetzin ijcuín:  
Nejuatzin nachipa nicsentocas nimotajtzin niyesqui,  
huan Tejuatzin nachipa tinoconetzin tiyesqui.

<sup>6</sup>Huan cuac Totajtzin Dios cualtitanic Iyojtzin Conetzin nican talticpac, ijcuacón Yejuatzin quijtoj ijcuín:

Xicmohuistilican Noconetzin, nochi de namejuan nannoángeluan.

<sup>7</sup>Pero no Totajtzin Dios tajtoa de iángeles ijcuín:

Nejuatzin niquinchihuac noángeles ma tamatican queme chipactitzin ejecame.  
Huan noángeles,

yejuan nojonques notequiticahuan.

Huan yejuan tequititinemij nican huan nepa, ijcón queme in tit cuac momejmelahua nican huan nepa.

<sup>8</sup>Huan ocsepa Totajtzin Dios tajtoa de Iconetzin ijcuín:

Tejuatzin tion Dios, huan Tejuatzin titayecantinemis sen nachipa huan sen nachipa. Huan tionmaactinemi sen nachipa se tacotzin tenica quitenextijtjinemi que timoma-soutinemi nohuyampa ica sayó ten melahuac huan ten yectic.

<sup>9</sup>Tejuatzin ticyolnejnequi sayó ten yectic huan amo timoyolpactijtjinemi ica ten amocuali.

Ica ya nojón Nejuatzin ni Dios, huan nimo Dios huan nimitzmactilij ya hueyi yol-paquilis de xiyetinemi sen nachipa tionhueyitayecancatzin.

Huan yec melau amo niqinmactilij neques ten mohuantzin tequitijtjinemij de nijín tanahuatil.

<sup>10</sup>Huan ocsepa Totajtzin Dios tajtoa de Iconetzin ijcuín:

Tejuatzin tion Teconetzin, ne achtopa ya ticontzinehualtij huan ticonchijchihuac nochi ten ongac nican talticpac,

huan no ticonmachijchihuac nochi ten ongac nepa eluiyactzin de ejecaixco.

<sup>11</sup>Huan nochi ne motachijchihual se tonal ixpolihisque.

Pero Tejuatzin amo queman tionixpolihuis.

Huan ne motachijchihualuan, se tonal ijtacahisque ijcón queme ijtacahuis se tilma.

<sup>12</sup>Huan nochi ne motachijchihual ticonpatilis ijcón queme se tilma ten tamojmotzol.

Huan nochi motachijchihualuan tajtamis queme se tilma ten amo cualtía oc.

Pero Tejuatzin nachipa tiyetinemis huan amo queman timopapatatinemis, huan amo queman tamis monemilis.

<sup>13</sup>Huan Totajtzin Dios amo queman quinnojnnotzac iángeluan ijcón queme mono-jnotzac Yejuatzin ihuan Iconetzin cuac quilij ijcuín:

Tejuatzin tinoconetzin, ximosehuijtzino noyecmacopaca porín nochi ticpía ya chicahualis.

Huan Nejuatzin niqintatacamatiltis monahuactzinco nochi neques ten mitztahuelitztinemij.

Huan no niqintaliti momatampa neques ten mitztahuelitztinemij ijcón queme cuac se mometzajtalía tech se icpal.

<sup>14</sup>Huan nochi iángeles de Dios yejuan nojonques tanahuatiani ejecatztzin ten chipauque ten sayó motequitiltijtjinemij para Dios. Huan Dios quinqualtitantoc iángeluan para quinpalehuijtinemis que nochi neques ten motemactijtiyohue itech ne nemaquixtilis.

### **Nican tajtoa de ma timoyecpixtiyacan para ticyecajsicapiatihue ne nemaquixtilis**

**2** Ica ya nojón ma ticyecaquican huan ma ticyectacamatiyacan nochi ten ticacque ya den Tajtoltzin de Dios para ma amo timosecocahuatij den ojtzin de Dios.

<sup>2</sup>Huan ne achtopa ya Dios techmactilij ya Itajtoltzin intencopaca in ángeles huan nochi motaminextico ya ijcón queme Yejuatzin quitalij ma mochihuaqui. Huan no Dios quintatzacuiltij nochi neques ten amo tatacamatihualajque ica ne Itanahuatiltzin. <sup>3</sup>Pero cachi oc tejuan amo timaquisasque de ne tatzacuiltis como amo tictacamatinemij nijín cachi hueyi temaquixtilis ten Yejuatzin techtenilijtoc. Huan nijín cachi hueyi temaquixtilis ten Totecotzin Jesús quitetapohuijtinemico ya. Huan neques ten quicactinenque in tanojnotzalis de Jesús, yejuan nojonques techmatiltitinenque huan techpanoltilijtihualajque. <sup>4</sup>Huan Totajtzin Dios quiyectenextijtjinemi que hueyi melau nijín temaquixtilis ica por nescayome de Dios huan tataman mo-

huiscatequime. Huan no Totajtzin Dios techxexelohuilijtihuitz tataman huelilisme ica in chichualis den Yecticatzin Espíritu ijcón queme Yejuatzin quimonequiltij ya.

**Nican tajtoa de que Jesucristo mochihuaco  
tagat ijcón queme itequiticaicnihuan**

<sup>5</sup> Huan Totajtzin Dios amo queman quinmactilijca iángeles tanahuatil ma yejuan tayecantinemisque satepan tech ne tonalme ten motoquijtihuitze oc. Huan namech-nojnotztoc de ne tonalme ten huitze oc.

<sup>6</sup> Sayó nicnequi namechtopohui den Tajtoltzin de Dios campa secan tajtoa den taltic-pactaca ijcuín:

Totajtzin Dios, amo ticajsicamatij queyé Tejuatzin tiquinelnamictinemi oc den tejuan talticpacuani.

Huan amo no ticajsicamatij queyé semi timoyolcuejmolojtinemi den talticpacyetoni porín yejuan sayó tajtamisque san.

<sup>7</sup> Huan Tejuatzin ticchihualtij que in talticpacuani ma amo semi hueyichihuanime ipan sequin tonalme.

Huan no tiquinonchihualtij que ma cachi hueyi chihuanime in ángeles.

Pero cachi satepan Tejuatzin ticonueyipantalij in talticpacuani huan tiquinonmohuiscapohuac.

Huan Tejuatzin tiquntayecancatalij in talticpactaca que ma yejuan tayecantinemican ipan nochi ten Tejuatzin ticonmachijchihuac ya.

<sup>8</sup> Huan Tejuatzin tiquinontayecancaquetzac ya in talticpactaca que ma yejuan momasoutinemican ipan nochi ten ongac.

Huan amo teyi ongac taman oc que ma amo quiyecantinemican in talticpactaca.

Huan masqui ijcón Dios quijtoj ya, pero ayamo ijcón mochiutoc porín tiquitztinemij que ayamo quitacamatinemij in talticpactaca ipan nochi ten Dios itamachijchiu ya.

<sup>9</sup> Pero hueyi melau axcan tiquitztinemij que in Totajtzin Dios quihueyipanchihuac ya Cristo Jesús, masqui Yejuatzin amo semi hueyichiuque catca ipan sequi tonalme. Porín Totajtzin Dios quichihualtij que ma cachi hueyi chihuanime in ángeles ipan sequin tonalme.

Pero mochihuac cachi satepan Dios conueyipantalij huan conmohuiscapohuac Cristo Jesús porín ne tajyohuilis ten quipanoco Yejuatzin cuac momiquilico tech in colotzin.

Huan Totajtzin Dios techyolicnelij huan quimonequiltij ma momiquili Cristo Jesús huan ma techixpatcayotiqui ica por totajta-coluan de nochi tejuan talticpacuani.

<sup>10</sup> Huan Totajtzin Dios quichijchihuac nochi ten ongac, huan nochi ten ongac Dios quichihuac para ica quiselis ne nemohuistililis den talticpacuani.

Huan Totajtzin Dios quimonequiltij quinajocuis huan quinuicas míac conetzitzin para ma yetotij ihuantzin ne eluiyactzinco campa itacualtziyojcan.

Ica ya nojón Totajtzin Dios quipíac de quitamiyolmajxitis in Jesucristo ica ne tajyohuilis ten Yejuatzin quipanoco ya. Huan ica ne tajyohuilis Jesucristo mochihuaco

Temaquixtijque inpan nochi iconetzitzin de Dios.

<sup>11</sup> Huan nochi neques ten yolchipauque ya de nintajtacoluan, yejuan nojonques poutinemij ihuan Totajtzin Dios. Huan Jesucristo no poutinemi ihuan Totajtzin Dios huan quinyolchipautinememi nochi iconetzitzin de Dios.

Ica ya nojón Jesucristo amo mopinaucamati de quinpohuas iconetzitzin de Dios queme iicnihuan.

<sup>12</sup> Huan in Tajtoltzin de Dios tajtoa de ne Cristo Jesús campa Yejuatzin quinojnotztoc Itajtzin Dios ijcuín:

Notajtzin Dios, niquintapohuiti nochi noicnihuan de aconi Tejuatzin.

Huan nimitzonueyimohuistilijtos Tejuatzin campa mosenpansentilía moconetzitzin para ijcón mitzonueyimohuistilisque.

<sup>13</sup> Huan ocsecan in Tajtoltzin de Dios tajtoa de ne Cristo Jesús campa Yejuatzin monojnotzoc ihuan Itajtzin Dios ijcuín:

Notajtzin Dios, nopal nitacuautamati, Tejuatzin.

Huan ocsepa in Tajtoltzin de Dios tajtoa de Yejuatzin ijcuín:

Nejuatzin nican niyetoc ihuan nochi iconetzitzin de Dios ten Yejuatzin nechoninmactilij.

<sup>14</sup> Huan Cristo Jesús monacayotico nican talticpac huan mochihuaco se talticpactagat ijcón queme nochi iconehuan de Dios den talticpacnemij. Huan ijcón quichihuaco Jesucristo para quitahuejuelohuilis in amocuali Satanás ica ne tajyohuilis ten quipanoco Yejuatzin cuac momiquilico. Huan ijcón Cristo momiquilico para quijtacohuilij Satanás ten quiplaya huelilis para techijtaojtoya tech in miqulilis. <sup>15</sup> Huan ica imiqulilis de Cristo, Yejuatzin quintacajcahualtico in talticpacuani imaco in amocuali Satanás porín nochi neques in Satanás quinqutzquijtoya queme yesquia iiaxahuan. Huan yejuan nojonques poutoyaj imaco in amocuali Satanás porín yejua quinmouacalaquijtoya de que se tonal momiquilitihue sen nachipa.

<sup>16</sup> Huan hueyi melau que Jesucristo huala amo para quinpalehuijtinemis in ángeles de Dios. Ta, Cristo huala para quinmaquixtis nochi neques ten tacuautamatij ihuan Dios ijcón queme tohujcautat Abraham tacuautamatic inahuac Totajtzin Dios. <sup>17</sup> Huan para techmaquixtis, monequic que Cristo ma mochihua huan ma tamati queme se tagat tamatinemi. Huan no monequi que Cristo ma mochihua se tayecancatiopixcat ten teyolicnelijtinemi huan ten quitequitilijtinemi Totajtzin Dios ica melaucayot. Ica ya nojón cuac Cristo Jesús momiquilij ya, ijcuacón Yejuatzin huelic quixtahuac ya in tajtacolme de nochi talticpacuani. <sup>18</sup> Huan ijcón Cristo Jesús quixijxicoco nochi tataman tajyohuilis cuac ne amocuali Satanás quiyolelihuisuij Cristo ica tajtacol. Ica ya nojón cachi oc Cristo huelis techpalehuijtinemis para ma tejuan no ticxijxicojtinemis que tataman tajyohuillisme cuac in amocuali Satanás techyolelihuisuíca ica tajtacol.

### **Nican tajtoa de Cristo Jesús, Yejuatzin cachi hueyichiuque huan que ne Moisés**

**3** Ica ya nojón, notasojicnihuan ten nanyolchipauque, Totajtzin Dios namechijitac ya huan namechnotzac que xipoutinemican ihuantzin. Huan cuali xiyequitilicancan Cristo Jesús. Porín Yejuatzin Cristo itanojnotzcau de Dios huan Yejuatzin no in tayecancatiopixcat para tejuan techyolmajxitijtinemis ica totacuautamatilis ihuan Dios. <sup>2</sup> Huan Totajtzin Dios quitequimactij Cristo ica tataman tequit. Huan Cristo Jesús quiajsicacihuaco ica nejmach nochi ten Totajtzin Dios quinahuatiliz ya. Huan no ijcón Moisés quiyectamichihuac nochi tataman tequit ten Totajtzin Dios quinahuatilizca ma quichihua intzalan ipueblojcahuan de Dios. <sup>3</sup> Huan Totajtzin Dios quihueyipohuac Moisés. Pero Dios cachi oc quihueyipanchihuac in Jesús, ijcón queme se calchijchiuque quinamiqui cachi mohuisyot huan que in cali. <sup>4</sup> Huan ipa yetoc se acsá nican talticpac ten quichijchihuac cada cali. Pero Totajtzin Dios Yejuatzin quichijchihuac nochi ten ongac. Ica ya nojón cachi oc ticmohuistilíaj Dios ten quichijchihuac nochi ten ongac. <sup>5</sup> Huan hueyi melau que in Moisés cuali tequitique porín

quiyecajsicachihuaco nitequiu, nochi ten Dios quinahuatiliy ma quichihua intzalan ipueblojcahuan de Dios. Huan in Moisés cuali tequititinemic porín quinyectenextil-iytinemic ipueblojcahuan de Dios nochi tanextililisme de Dios ten quipía de motepohuiquiu satepan. <sup>6</sup> Huan Cristo Jesús quiyecajsicachihuaco nitequiu porín Yejuatzin Totecotzin de Dios. Huan Yejuatzin tequititinemij intzalan ipueblojcahuan de Dios. Huan nijín tejuan ya tiipueblojcahuan de Dios cuac tejuan ticsentocaj titacuautamatiyohue ihuan Dios hasta ne tonal cuac mohualuicas Cristo. Huan no ma timoy-olpactiytinemican ica por ne nemaquixtilis majsitoc ten ticselitihue imaco Totajtzin Dios.

### **Nican tajtoa de queniu Dios quinmactilijtinemi ipueblojcahuan se cualtzin yolsehuilis**

<sup>7</sup> Ica ya nojón ma ticaquican ne ten techilijtoc in Yecticatzin Espíritu tech in Tajcuilolamatzin de Dios ijcuín:

Axcan xicaquilican ten Totajtzin Dios namechilijtoc ijcuín:

<sup>8</sup> “Nejuatzin namechilía que amo xicmajpehuacan in Tajtoltzin de Dios ijcón queme quichiutihualajque ne ipueblojcahuan de Dios tech ne tonalme cuac nentinemíaj campa tayiucan.

Ijcuacán yejuan quixnamicque Dios cuac amo quineltocacque de que cox Dios inuan yetinemic.

<sup>9</sup> Tech ne tayiucan namohuejcautatuan quinequíaj quitasque cox Nejuatzin nicchi-huati ijcón queme nimoyectencauca ya.

Huan yejuan quitelpanoltijtihualajque de nechtejtenehuaj.

Huan amo yec tacuautamatiyohue Nohuantzin, masqui nochi yejuan quitztinenque nochi míc tataman nomohuiscatequiuhuan ten nicchiutinemic ipan omepoal xiutica.

<sup>10</sup> Ica ya nojón nimohueyiyolcualantij ihuan nojón tagayot,

huan niquitoj que nachipa nijín pueblojuani mocuatapololtijtinemij ica por nintamachilis ten hualehua de ninyolojuan.

Huan yejuan amo motecahuilíaj ma quixmatican notanahuatil huan amo no quinecque nentiyasque tech noojpan.

<sup>11</sup> Ica ya nojón nimohueyiyolxocolij ica ne iamocualitachihualisuan.

Huan nimocualancayectencahuac ihuan ne pueblojuani

que yejuan amo queman quiselitiyasque ne yolsehuilis ten Nejuatzin nicnequía niquinmactilis”.

<sup>12</sup> Notasojicnihuan, ximoyecpiacan de ne tataman amocuali tamachilisme, para ma amo senme de namejuan ma mosecakahua den Tajtoltzin de Dios porín amo quiyecneltocatinemi in Dios ten yoltica sen nachipa. <sup>13</sup> Huan para amo nanmosec-ocahuasque de Dios, namechilía cachi cuali mosta mosta ximoyolmajxitijtiyacan ica in Tajtoltzin de Dios se huan ocsé mientras Dios techyolicnelijtinemi oc axcan.

Huan ximoyolmajxitijtiyacan para ma amo ximoyolcayautinemican ica in tajtacol huan no para ma amo ximochihuacan nantaixnamiquini de Dios. <sup>14</sup> Huan ticsentocaj titacuautamatiyohue ihuan Cristo hasta ne tonal cuac Yejuatzin mohualuicas ijcón queme titacuautamatiyohue desde ne achtopa ya. Huan como ijcón ticchiutihue, ijcuacán ticsentocasque tipoutiyasque ihuan Cristo Jesús.

<sup>15</sup> Huan ocsepa namechilía ijcón queme namechilijca que in Tajtoltzin de Dios quijtoa ijcuín:

Xiyecaquilican nochi ten Dios namechilijtoc, huan amo xicmajpeutiyacan Dios, ijcón queme quichiutihualajque neques ten quixnamicque Dios.

<sup>16</sup> ¿Huan aconi catca neques ten quicaquilijque in Tajtoltzin de Dios huan de ompa quixnamicque Dios? Yejuan neques ipueblojcahuan de Dios ten Moisés quinalquixtito campa ne país Egipto. Yejuan nojonques quicaquilijque in Tajtoltzin de Dios huan de ompa yejuan quimajpeuque Dios. <sup>17</sup> Ica ya nojón Totajtzin Dios cualantinemic ipan omepoal xiutica ica por ne ipueblojcahuan porín yejuan quisentocayaj motajtacolmacatinemíaj. Ica ya nojón nochi yejuan momiquilijque campa ne tayiucan. <sup>18</sup> Huan nochi neques ten amo tatacamatinenque, yejuan nojonques Dios inuan mocualancayectencahuac que yejuan amo queman quiselitihue ne yolsehuilis. <sup>19</sup> Huan ijcón tiquitaj que ne ipueblojcahuan de Dios amo huelic quipiasque ne yolsehuilis ten Dios quinequía quinmactilis porín yejuan amo motecahuilijque de quiyecneltocasque Dios.

**4** Ica ya nojón axcan Totajtzin Dios techtenilijtoc oc de que ma ticselican ne yolsehuilis de Dios. Pero monequi que ma timoyecpixinemican para ma amo mochi-hua que acsame de namejuan ma amo nanquiselitij ne yolsehuilis ihuan Dios. <sup>2</sup> Huan ijcón queme quicaquilijtihualaya in Tajtoltzin de Dios ne huejcau ipueblojcahuan de Dios, no ijcón tejuan technojnotzacoj ica in Tajtoltzin de Dios ten cualcui ne nemaquixtilis. Pero ne huejcau ipueblojcahuan de Dios amo teyica quinpalehuij cuac quincaquiltijque ne tanojnotzalis de Dios. Porín yejuan quicacque ne tanojnotzalis ica ne inacasuan san. Pero amo quiyecneltocacque tech ninyolojuan. <sup>3</sup> Pero, quema, tejuan ticyecneltocaj ya ne itanojnotzalis de Dios. Ica ya nojón tejuan cuali ticselityohue ne yolsehuilis ihuan Dios. Huan tech in Itajcuilolamatzin de Totajtzin Dios, Yejuatzin technojnotzac de ne yolsehuilis ijcuín:

Ica ya nojón nimocualancayectencahuac ya que yejuan amo queman quiselityasque ne yolsehuilis ten Nejuatzin niquinmactilisquía.

Huan desde ne tonal cuac Yejuatzin quitamichijchihuac ya in talticpac huan eluiyac, ijcuacán Dios amo monequi oc quichihuas ocsé tensá tequit. <sup>4</sup> Huan nochi nijín ticmatij porín secan tech in Tajtoltzin de Dios techiluía de ne ica chicome tonal ijcuín: Huan Totajtzin Dios ipan chicome tonal mosehuij huan amo tequitic oc.

<sup>5</sup> Huan no ocsecan quijtoa tech in Tajcuilolamatzin de Dios ijcuín:

Yejuan nojonques amo quiselijtyasque ne yolsehuilis ten Nejuatzin niquinmactilisquía porín amo tacuautamatque nohuantzin.

<sup>6</sup> Pero axcan sequin ipueblojcahuan de Dios ongacque oc ten huelis quiselijtyasque ne yolsehuilis ten Dios quinequi quinmactilijtiu. Huan ne huejcau ipueblojcahuan de Dios achtopa ya quincaquiltijca ya ne Tajtoltzin de Dios ten cualcui ne nemaquixtilis. Pero yejuan amo quiselijque ne nemaquixtilis porín yejuan amo tatacamatque. <sup>7</sup> Ica ya nojón axcan Dios ocsepa qitalij ocsé tonal cuac ipueblojcahuan huelis quiselijtyasque nijín yolsehuilis. Huan nijín tonal, yejua de axcan ya. Huan nochi nijín ticmatij porín in Totajtzin Dios technojnotza ica itencopaca ne huejcau rey David huan secan in Tajcuilolamatzin techilía ijcuín:

Xiyecaquilican nochi ten Dios namechilijtoc, huan amo xicmajpeutiyacan Dios Itajtoltzin.

<sup>8</sup> Huan tacán ne huejcautayecanque Josúe quinseliltiani ne yolsehuilis den ipueblojcahuan de Dios, ijcuacón Totajtzin Dios amo technojnotztoquía oc de ne tonal cuac techmactilisquía ne yolsehuilis. <sup>9</sup> Ica ya nojón namechilía que oncatiyás oc tonalme cuac Dios techmactilijtiyás ne yolsehuilis nochi tejuan tiipueblojcahuan de Dios. Huan ne yolsehuilis tamati queme cuac se mosehuía de nitequiu tech ne tonal de nesehuilis. <sup>10</sup> Huan nochi neques ten axcan quiselijtiyasque ne yolsehuilis ihuan Dios, yejuan nojonques amo motequitiltijyasque oc de moseliltisque ne yolsehuilis. Ta, yejuan mosehuijtinemisque ihuan Dios ijcón queme Dios ipan chicome tonal mosehuij huan amo tequitic oc. <sup>11</sup> Ica ya nojón monequi ma timofuerzahuijtiyacan para ticselijtiyasque ne yolsehuilis ihuan Dios, para ma amo aquen oc ma quichiutinemi ijcón queme quichiutinenque ne huejcau ipueblojcahuan de Dios cuac yejuan amo quiyecneltoacque itanahuatil de Moisés.

<sup>12</sup> In Tajtoltzin de Dios quipía huelilis huan quitemaca nemilis. Huan in Tajtoltzin de Dios quinejnehuilía queme se machete ten ojcan tene. Ica ya nojón in Tajtoltzin de Dios calaquí tech totamachilis huan quitatemoliti ne totamachilis tech toyolo huan totalnamiquilis, huan ajsis hasta campa hualeutoc nochi totamachilisan. Huan in Tajtoltzin de Dios techtaminextilía cox cuali oso amo cuali nochi ten ticnemilijtinemij huan nochi ten ticyoluelitaj ticchihuasque. <sup>13</sup> Huan Totajtzin Dios quichijchi-huac nochi ten ongac. Ica ya nojón amo teyi ongac tamachilis oso tagayot ten huelis motaatijtinemis ihuan Dios. Porín nochi ten ongac nestinemi ya iixpantzinco Dios huan amo huelis motaatis ihuan Dios. Huan nochi tejuan monequi timonextijtihue iixpantzin Dios para ticmacatihue cuenta Dios de nochi ten ticchiutinenque nican talticpac.

### Nican tajtoa de Cristo Jesús, Yejuatzin in cachi hueyi tiopixcatzin

<sup>14</sup> Jesús Yejuatzin Teconetzin de Dios huan axcan Yejuatzin tohueyitiopixcatzin ten yajqui calaquito campa yetica Totajtzin Dios. Ica ya nojón monequi ma ticsentocacan ma titacuautamatiyacan ihuan Cristo Jesús. <sup>15</sup> Huan Jesús tohueyitiopixcatzin, Yejuatzin techyolicnelijtiyás porín Yejuatzin moajsicamatiltijtiyás que tejuan cuali huelis ticuetautihuetzisque de totacuaumatilis. Huan Jesús techmatilijtiyás porín Yejuatzin quixixcojti huala ya nochi tataman tajyohuilisme cuac in amocuali Satanás quiyolelihuisui ica tajtacol, ijcón queme tejuan techyolelihuisui ica tajtacol in amocuali Satanás. Huan Yejuatzin masqui tajyohuiaya, pero amo queman motajtacolmacac. <sup>16</sup> Ica ya nojón, monequi ma timotoquijtiyacan ica hueyi yolchicahualis campa Totajtzin Dios ichicaucahuelilispán porín ompa ya Dios techaxcatilía ne itetasojtalis. Huan no ompa ticajsi ne itecnelilis huan ne itapalehuilis para timopalehuisque tech ne momento cuac monequi.

**5** Huan cada se hueyi tiopixcat, yejua ne in tagayot quijitacque huan quitelijque ma quinixpatcayotis ica por yejuan in tagayot iixpantzinco Totajtzin Dios. Huan yejua ne tiopixcat ten quitálaj, yejua ne quimactilía Dios tetayocolilme huan ocuilinme ten quimictilíaj para ijcón Dios quintapojpoluis in tagayot de nintajtacoluan ica por nojón tetayocolilme. <sup>2</sup> Huan ne hueyi tiopixcat no quimachilijtinemi que motajtacolmaca yejua san ijcón queme aquen yesqui tagat motajtacolmaca. Huan queme ijcón ne tiopixcat tajyohuijtinemi porín tajtacle, ica ya nojón yejua cuali hueli quinmatilía huan quinxicohuilía nochi neques ten amo cajsicamatij in Tajtoltzin de Dios. Huan ne tiopixcat no quinxicohuilía neques ten sayó motajtacolmacatinemij.

<sup>3</sup> Huan ne hueyi tiopixcat, queme yejua tajyohuijtinemi ica tajtacol, ica ya nojón no monequi quimactilis Dios tetayocolilme para ijcón quixtahuas yejua mismo itajtacol. Huan no ijcón huelis quimactilis Dios tetayocolilme para ica quinixtahuilis nintajtacoluan neques ten ipueblojcahuan de Dios. <sup>4</sup> Huan amo aquen mocuilía ne mohuisyot de mochihualtis se hueyi tiopixcat. Ta, sayó Totajtzin Dios quijitas se tagat huan quitalis ma tequititinemi queme hueyi tiopixcat. Huan no Dios quichihualtij ma tequititinemi ne huejcautetat Aarón queme hueyi tiopixcat. <sup>5</sup> Huan ijcón no mochihuac que Cristo amo mochihualtij iselti san ma tequititinemi queme hueyi tiopixcat. Ta, sayó Dios quimactilij Cristo ne tequit huan ijcón Yejuatzin quihueyipantalij Cristo queme se hueyi tiopixcat. Huan nochi nijín ticmatij porín in Tajtoltzin de Dios techilía que Totajtzin Dios quiluij Iconetzin ijcuín:

Tejuatzin tionnoconetzin,

huan axcan nimitzmactilij ya nochi chicahualis porín Nejuatzin nimo Tajtzin.

<sup>6</sup> Huan no ocsecan tech in Tajtoltzin de Dios Totajtzin Dios quiluij Iconetzin ijcuín: Tejuatzin, titequititinemis queme tiopixcatzin sen nachipa.

Huan Tejuatzin titequititinemis ijcón queme tequititinemi ne huejcautiopixcat ten monotza Melquisedec.

<sup>7</sup> Huan cuac Cristo Jesús nentinemía nican talticpac, ijcuación Yejuatzin motatatautiliaya huan motexpantiaya ihuan Dios. Huan Cristo quitzajtziliaya Itajtzin ica ne itatautilis huan hasta no ca choquilis. Porín sayó Totajtzin Dios quipixtinemic huelilis para quitacajcahualtis Cristo Jesús de ne chicahualispan campa in miqulilis momasoutoc. Huan ica por ne itatautilis de Cristo, Totajtzin Dios quicaquilij huan quipalehuij Iconetzin, Yejuatzin Cristo Jesús, porín Cristo Jesús yec tacuautamatine mic ihuan Totajtzin Dios. <sup>8</sup> Huan Cristo Jesús masqui Yejuatzin Teconetzin de Dios, pero Yejuatzin motecahuilij de momachtijtinemis queniu quitacamatis Totajtzin Dios ica por ne míac tataman tajyohuilis ten quipanoaya. <sup>9</sup> Huan ica por ne itajyohuilisuan de Cristo, Yejuatzin moajsicayolmajxitico ca nitatacamatilis. Huan nochi neques ten quitacamatine mic Cristo, yejuan nojonques quiselijtiyasque imaco Cristo ne nemaquixtilis ten amo queman tamis. Huan Cristo mochihuaco inteiscaltijcau de nochi nitaneltocacahuan porín Yejuatzin moajsicayolmajxitico ica nitatacamatilis.

<sup>10</sup> Ica ya nojón Totajtzin Dios quinoztac Cristo Jesús huan quitelij ma tequititinemi queme se hueyi tiopixcat, ijcón queme motequitiltijtinemic ne huejcautiopixcat Melquisedec.

### **Nican tajtoa de quinnejmachtía in taneltocani que ma amo quipolotij nintacuautamatilis**

<sup>11</sup> Huan ticpíaj míac tensá de ticnequij tamechilisque de namotacuautamatilis. Pero semi ohui para tamechmejmela hualisque porín namejuan semi nantanejnematini huan amo nanquiyolnequij de nanmomachtisque oc. <sup>12</sup> Namejuan nanquipíaj míac tonalme de nantacuautamatihuitze huan axcan monequía que namejuan ximochihuani nantamachtiani den Tajtoltzin de Dios. Pero amo ijcón mochiutoc. Ta, namejuan monequis oc ma ocsepa namechtojtomilijtiyacan huan ma namechmachtijtiyacan in Tajtoltzin de Dios ica in tamachtilis den cachi amo ohui de se cajscamatis. Huan namejuan amo nanyecyolmajsitocque ica namotacuautamatilis. Ta, namejuan majyá nanyancuicque oc namotacuautamatilis queme yesquía yequin ya nantaneltocacque. Huan monequi ma tamechmachtican ica tamachilis ten amo ohui



nanquimatisque queme cuac se quitayiltía se conet leche porín ayamo hueli quicuas in tapalol. <sup>13</sup> Huan neques ten motayiltía sayó leche san, yejuan nojonques pilime oc huan quinejnehuilfaj in taneltocani ten amo yec yolmajsitocque ica nintacuaautamatilis. Ica ya nojón yejuan amo moajsicamatiltíaj queniu chipaucanemis que ijcón queme in Tajtoltzin de Dios technextilía. <sup>14</sup> Huan in tapaloltzin quipalehuía in taca huan sihuame ten majsicque ya. Huan yejuan quinejnehuilfaj in taneltocani ten yec yolmajsitocque ya ica nintacuaautamatilis. Huan yejuan cuali hueli ya quixejecojtiyasque de toni cuali tamachilis huan de toni amocuali tamachilis.

**6** Ica ya nojón ma ticpanahuican ne tamachtilis de queniu yequinica ticalacque tech in tamachtilis de Cristo. Huan ma ticyecatatemolican cachi oc den Tajtoltzin de Dios para ijcón timochihuasque tiyecyolmajcini ya de totacuaautamatilis. Huan ma amo titamachtijtiyacan sayó ica ne tamachtilis de queniu se moyolnemilis de se itajtacoluan, oso queniu se quicautiyás itajtacoluan, oso de queniu pehuas se tacuautamatiyás ihuan Dios. Ta, monequía ma ximomachtiani ya nochi nijín tanextililisme. <sup>2</sup> Huan ma ticpanahuican ne tamachtilis de queniu se mocuaahui huan de queniu se quincuaapachoa in taneltocani. Huan ma ticpanahuican ne tamachtilis de queniu panquisasque yoltocque nochi ne ánimajme ten momiquilijque ya. Huan ma ticpanahuican ne tamachtilis ne queniu Dios quinixcomacas huan quitatzacuultis in tajtaclejque para sen nachipa. Ta, monequía ximomachtiani ya nochi nojón tanextililisme. <sup>3</sup> Pero ma ijcón ma ticchiutiycan de que ma timoyolmajxitijtiyacan cachi oc ica totacuaautamatilis ijcón queme Totajtzin Dios quimonequiltía. <sup>4</sup> Huan sequin taca Dios quinyoltahuilijca ica Itajtoltzin huan yejuan quiselijque ya ne chichualis ten Dios techtayocolía. Huan no yejuan moaxcatilijque ya in huelilis ten in Yecticatzin Espíritu techmactilía. <sup>5</sup> Huan yejuan no momatiltijque ya den cuali Tajtoltzin de Dios huan no quitztinenque ne mohuisatequit ten cualcui chichualis den eluiyactzinco ne chichualis ten se tonal momasoutinemis nican talticpac. <sup>6</sup> Huan tacán ne taca mosecocaualtíaj de nintacuaautamatilis ihuan Cristo, ijcuacón amo huelisque oc moyolnemilisque de nintajtacoluan porín yejuan senteixteno quimohuispolojtinemis que Cristo huan ocsepa quitajyohuiltijtinemis que Cristo, queme yesquía ocsepa quicuoupampilosque Cristo huan yejuan no quiquejquelojtinemis que Cristo senteixteno. <sup>7-8</sup> Huan in talticpacuani, yejuan nojónques quinejnehuilfaj queme yesquía se tal. Huan Totajtzin Dios quitiochihua ne tal ten cuali chichinac in quioutzin ten micapa huetzico ya ipan. Porín ica por ne tal motachihua ica míc taquilome tenica moixpanoltíaj in tequitini. Pero tacán itech ne tal ixua sayó huitzti huan xihuit san ten amo teyi quitemaca taquilot, ijcuacón ne tal amo teyica cualtía huan huelis ya ipan huetzis itatelchihualis de Dios tenica quitamichijchinos ne xihuit. Huan no mochiutihuitz inpan in tacaquini den Tajtoltzin de Dios.

**Nican tajtoa de queniu totacuaautamatilis techyecpalehuijtiu  
para ma amo timosecocaahuacan de Cristo**

<sup>9</sup> Notasojicnihuan, masqui tamechnojnotzaj de neques ten mosecocauiyohue de Cristo, pero tejuan ticyecmatij que namejuan amo no ijcón nanmochihuatihue queme neques ten mosecocaunque ya de Cristo, porín namejuan nanquiselijtiyohue ya ne cachi hueyi tatiochihualisme de Dios porín Yejuatzin namechmaquixtij ya. <sup>10</sup> Huan Totajtzin Dios Yejuatzin Yolmelahuactzin. Ica ya nojón Yejuatzin amo queman quelcahuatiu de queniu namejuan nanmotequitiltijque para Dios. Huan no

Yejuatzin amo queman quelcahuatiu de queniu nanquitasojtjatinemij Dios cuac namejuan nanquinpalehuijtihualayaj in taneltocani yolchিপauque. Huan namejuan nanquinpalehuijtiyohue oc in taneltocani hasta axcan. <sup>11</sup> Pero cachi oc ticnequij que cada senme de namejuan xicsentocacan ximofuerzajuijtiyacan de xiquinpalehuijtiyacan in taneltocani. Huan xicpixtiyacan hueyi yolchichualis huan xicsentocacan xitacautamatiyacan para cuali huelis nanquiyecajsicaselitihue ne namonemaquixtilis. <sup>12</sup> Huan no tamechilfaj amo ximochihuacan xitatzihuini de namotacautamatilis. Ta, xiquinnejnehuiltilican de queniu ne ocsequin taneltocani chipaucanentinemij. Porín yejuan tacautamatinemij huan quiyolicaxicojtinemij nochi tataman tajyohuilis para ijcón quiselijtiyohue nochi tatiochihualisme tenica Dios moyectencauca ya de techtayocolis.

<sup>13</sup> Huan ne huejcau ya Totajtzin Dios moyectencahuac ihuan Abraham de quiti-ochihuas. Huan Totajtzin Dios moyectencahuac ica in chichualis den yejua Itajtoltzin san, porín amo oncaya ocsé teco ten cachi hueyichiuque huan que Totajtzin Dios. <sup>14</sup> Ica ya nojón Totajtzin Dios quiliy Abraham ijcuín: “Hueyi melau de nimitzueyitiochihuatiu huan nimitzinaxcatilis huel míac moconejuan”. <sup>15</sup> Huan ijcón ne Abraham quiyolicachixtoya ne tatiochihualisme huan ijcón melau quiselito nochi ten Dios ihuan moyectencauca de quimactilis. <sup>16</sup> Huan cuac in talticpactaca quinejnequij moyectencahuasque de quichihuasque tensá, ijcuacón yejuan moyectencahuaj de quichihuasque tensá inahuac se tagat ten quipía cachi hueyi tanahuatil. Huan cuac yejuan ijcón quichihuaj ya, ijcuacón nochin quiixejecoaj que yeyetoc ya ne tajtol huan amo monequis oc motajtoltehujtosque oc. <sup>17</sup> Ica ya nojón Totajtzin Dios moyectencahuac ica in chichualis den Itajtoltzin porín quimonequiltij quinyecnextilis itaneltocacahuan de que yejuan quiselijtiyasque nochi in tatiochihualisme ten Dios inuan moyectencahuac de quinmactilis. Huan ijcón Dios quinyecnextilis itaneltocacahuan que Yejuatzin amo tajtolcuejcueptoc san. <sup>18</sup> Huan ijcón ixnesi ome taman tamachilis ten amo huelis mopapatas. Achto Totajtzin Dios amo motamachilispapatas nión no motajtolpapatatinemi. Huan amo no Totajtzin Dios amo huelis quiyoluis. Ica ya nojón tejuan ticpixinemij se hueyi yolsehuilis porín timotoquijque ihuan Totajtzin Dios para que Yejuatzin ma techyolpoxautinemi. Huan no titacautamatinemij ihuan Dios que se tonal ticselisque ne nemaquixtilis yec majsitoc ya, ne nemaquixtilis ten Dios moyectencauca de techmactilis. <sup>19</sup> Huan ticsentocaj titacautamatinemij que ticselisque yec majsitoc ne nemaquixtilis porín totacautamatilis momasoutoc huan taquitzquijtoc ya tech totalnamiquilis, ijcón queme se tepos ancla quitzajtzacuilijtoc in barco para ma amo elihuis yetinemi. <sup>20</sup> Huan ne totacautamatilis hualeutoc desde nepa eluiyactzinco tajjtíc de ne Tamohuisyojcan de Dios campa Cristo Jesús calayic ya huan techtatapohuilij ya para huelis ticalaquisque. Huan ijcón Cristo Jesús mochihuaco ya in cachi hueyi tiopixcatzin para sen nachipa ijcón queme ne huejcautiopixcat Melquisedec.

**Nican tajtoa de Cristo Jesús tohueyitiopixcatzin ten tequititinemi ijcón queme tequititinemico ne huejcautiopixcat Melquisedec**

**7** Huan ne Melquisedec, yejua se tayecanque rey campa pueblo Salem huan no tequititinemic queme tiopixcat itencopaca Totajtzin Dios ten cachi hueyichiuque. Huan cuac Abraham quintamitanilito ya ne tayecanani reyes ten ipa motehuijtinemíaj ihuan Abraham, ijcuacón Abraham mocuepac ya para yas ichan.

Huan de ompa in huejcautiopixcat Melquisedec quinamiquito Abraham huan quitiochihuac. <sup>2</sup>Huan Abraham quincuilijca ya ne reyes nochi den ninaxcacopaca cuac quintamitanilij tech in guerra. Ijcuacón in Abraham quimactilij Melquisedec nochi nidiezmo ten quitecuilijca ya. Huan ne tiopixcat Melquisedec, nitocay quiptosnequi “Tayecanque ten yolmelahuac”. Huan yejua no catca tayecanque rey campa pueblo Salem. Huan ne pueblo de Salem quiptosnequi “yolsehuilis”. Ica ya nojón Melquisedec yejua in tayecanque ten cualcui yolsehuilis. <sup>3</sup>Huan Melquisedec masqui ixnestinemía nican taltipac pero amo cana tajtoa de nitat huan nión no inan huan nión no nihueyitatuan. Huan amo no teyi techilía quemañan yejua yolico ne Melquisedec, huan nión no techilía quemañan yejua momiquilij. Sayó quipto que ne Melquisedec tequititinemic queme tiopixcat. Ica ya nojón tiquijtoaj que ne Melquisedec quinejnehuilía Jesús Teconetzin de Dios porín Cristo Jesús tequititinemic queme tiopixcatzin sen nachipa.

<sup>4</sup>Huan axcan xiquitacan semi hueyichiuque ne tiopixcat Melquisedec. Porín ne Abraham masqui ticpohuaj tohuejcautat, pero yejua quimactilij Melquisedec nidiezmo, ne diezmo ten Abraham quincuilijca ya ne tayecanani reyes cuac quintamitanilij tech in guerra. <sup>5</sup>Huan in tanahuatil de Moisés tanahuatilía que in tiopixcame ten pohuij ihuan ichanchahuan de tohuejcautat Leví, que yejuan quinnamiqui ma quintopalucan in pueblojuani judíos ica ne diezmo ten itech quisa de nochi ninaxchahuan. Huan ne tiopixcame cualcuij tanahuatil para quintopaluisque ninchanchahuan. Huan nochi yejuan teconehuan de tohuejcautat Abraham. <sup>6</sup>Huan ne tiopixcat Melquisedec, yejua ne amo poutihuitz ihuan ninchanchahuan de ne tiopixcame de Leví. Huan Melquisedec quitopaluij Abraham ma quimactili nidiezmo. Huan no yejua quitiochihuac Abraham masqui motaya que in Abraham cualcuitihualaya nochi in tatiochihualisme ten Dios ihuan moyectencahuac de quimactilis. <sup>7</sup>Huan hueyi melau que ne naquen cachi hueyichiuque, yejua ne quinamiqui ma quitiochihua ne ocsé ten amo cachi hueyichiuque. <sup>8</sup>Huan tejuan tjudíos tinentinemij ijcuín: Totiopixchahuan ten tiquinmactilijtinemij todiezmo, yejuan nojonques quipíaj que motamilisque. Pero ne Melquisedec, yejua ne ixnestinemic tech in Tajcuilolamatzin de Dios que yejua nachipa yoltinemi. <sup>9</sup>Ica ya nojón cuali tiquijtosque que Leví ihuan ichanchahuan de tiopixcame, nochi yejuan queme yesquía quimactilijque Melquisedec nidiezmo masqui yejuan nintequiu de quintopalufaj inpueblojchahuan judíos de nidiezmo. Huan ne ichanchahuan de Leví queme yesquía quimactilijque Melquisedec nidiezmo tech ne momento cuac Abraham quitemactij idiezmo, porín nochi yejuan senpoutihuitze de Abraham. <sup>10</sup>Huan cuac ne Melquisedec quinamiquito ya Abraham, ijcuacón quimactilij idiezmo Melquisedec inixpatca iconehuan. Huan ijcón Abraham quinixpatcayotij ne iconehuan porín yejuan ayamo yolíaj.

<sup>11</sup>Huan in pueblojuani de Israel, yejuan nojonques Dios quimactilij itanahuatiluan intencopaca in tiopixcame ten ichanchahuan Leví. Huan nochi yejuan teconehuan de tohuejcautat Aarón. Huan tacán ne tiopixcame huelisquíaj quinyolajsi-cachipahuasquía in pueblojuani de Israel ica ne tanahuatil de Moisés, ijcuacón amo monequisquía ma ixnesisquía ocsé taman tiopixcat ten amo pohui ihuan inchanchahuan de Aarón. Pero tiquitacque ya que ixnesic ne ocsé taman tiopixcat Jesucristo ten tequititinemic ijcón queme tequititinemic ne huejcautiopixcat Melquisedec. <sup>12</sup>Huan queme mopatacque ya de aconic huelis tequititinemis queme tiopixcame, ica ya nojón monequi ma no mopata in tanahuatil ten quintalía aconic huelis tequitit

queme tiopixcat. <sup>13</sup> Huan tiquitacque que in Tajcuilolamatzin de Dios technextilía que Totecotzin Jesús, Yejuatzin pouthualaya ihuan ocsé panti de tohuejcautatuan. Huan de ne ocsé panti amo queman aquen tequititinemic queme tiopixcat. <sup>14</sup> Huan ne panti de tohuejcautatuan tenica Totecotzin Jesús pouthuala, yejuan nojonques ne ichancahuan de tohuejcautat Judá. Huan no cuali ticmatocque que in huejcautanahuatijque Moisés amo teyi techilijca de ne ichancahuan de Judá, cuac Moisés technoynotzaya de queni tequititinemij tiopixcame.

<sup>15</sup> Huan nochí nijín cachi oc ticajicamatij cuac tiquitaj que Totecotzin Jesús, Yejuatzin mochihuaco se yancuic taman tiopixcat ten tequititinemi, ijcón queme tequititinemic ne huejcautiopixcat Melquisedec. <sup>16</sup> Huan Totecotzin Jesús mochihuaco tiopixcat porín Yejuatzin quipixtinemi chichualis huan cualcui se nemilis ten amo queman tamis. Pero Jesús amo mochihuaco tiopixcat sayó porín tensá tanahuatil quitenextía ma tequiti queme tiopixcat. Huan Cristo amo no mochihuaco tiopixcat porín poutinemi ihuan se panti calyetoní. <sup>17</sup> Ta, Totajtzin Dios tajtoa de Totecotzin Jesús tech Itajtoltzin ijcuín:

Tejuatzin, titequititinemis queme tiopixcatzin sen nachipa, ijcón queme tequititinemico ne huejcautiopixcat Melquisedec.

<sup>18</sup> Huan ne huejcautanahuatil de Moisés, yejua ne tiquitaj que Totajtzin Dios quitajtamiltij ya porín amo cualcui chichualis. <sup>19</sup> Huan ne tanahuatil de Moisés amo teyi cualtíac, porín amo aquen huelic ica moyecyolchipahuas iixpantzinco Dios. Ica ya nojón titacuatamatij ihuan Jesús porín Yejuatzin huala ya quiixpatcayotico ne tanahuatil de Moisés. Ica ya nojón axcan cuali huéli timotoquáf ya ihuan Dios ica ne ichichualis de Cristo huan amo ica ne ichichualis den tanahuatil de Moisés.

<sup>20</sup> Huan Totajtzin Dios moyectencahuac ica Itajtoltzin san que Cristo ma tequitiqui queme se tiopixcat. <sup>21</sup> Huan Dios amo ica itenilil moyectencahuac cuac quintalij ma tequititinemican ne ocsé taman tiopixcame. Pero cuac Dios quitelij que ma tequitiqui Jesús queme tiopixcat, ijcuacán Yejuatzin moyectencahuac ya ca yejua mismo itajtoluan que ijcón quichihuas. Huan nochí nijín ticajisij tech in Tajcuilolamatzin de Dios campa Totajtzin Dios quinoynotza Iconetzin ijcuín:

Nejuatzin, nimoyectencahuac ya huan amo queman nimotajtolcuepas oc.

Tejuatzin, titequititinemis queme tiopixcatzin sen nachipa ijcón queme tequititinemico ne huejcautiopixcat Melquisedec.

<sup>22</sup> Huan como Totajtzin Dios quitelij que ma tequiti Jesús queme tiopixcat, ica ya nojón tiquitaj que nijín itenilil ten Dios moyectencahuac que quichihuas, yejua ne semi cachi cuali tenilil huan que ne tenilil de Moisés.

<sup>23</sup> Huan ne panti tiopixcame de Aarón, yejuan nojonques huel miacque porín nochí yejuan sejsé momiquilijtiyajque huan amo huelíaj quisentocasque sejsé tech nintequiu. <sup>24</sup> Ica ya nojón ninconehuan calacque para quinixpatcayotijtihualajque. Pero Totecotzin Jesús, Yejuatzin ne nachipa yoltinemis. Ica ya nojón Yejuatzin Jesús tequititinemis sen nachipa queme tiopixcatzin huan amo queman quisecohauatiu itequiu. <sup>25</sup> Ica ya nojón Totecotzin Jesús cuali quinmaquixtis para sen nachipa nochí neques ten motoquisque ihuan Dios ica ichichualistzin de Jesús. Huan nochí nijín Cristo quichiutinemi porín Yejuatzin yoltinemis sen nachipa huan tatatautijtoc iixpantzinco Dios ica porín tejuan tiitaneltocacahuan.

<sup>26</sup> Huan ijcón tiquitaj que Totecotzin Jesús, Yejuatzin tohueyitiopixcatzin ten semi monequía ma huiqui. Porín Jesús Yolchipahuactzin huan amo momautoc ica ten amocuali huan nión no motajtacolmacac. Huan Cristo amo motamachilisentilij ihuan ne tajtaclejque talticpacuani de nintajtacoluan. Ica ya nojón Dios quiajocuic Cristo Jesús ma motaliti nepa campa cachi ajco den eluiyactzinco.

<sup>27</sup> Huan Totecotzin Jesús amo tequititinemi ijcón queme tequititinenque ne panti de tiopixcame de Aarón. Porín yejuan mosta mosta quinmictijtineneque de ne tapialme de ne tetayocolilme tenica quimohuistiliayaj Dios. Huan ica ne tetayocolilme, ne in tiopixcame quixtahuayaj nintajtacoluan huan no quinixtahuiliayaj in tajtacoluan den pueblojuani judíos. Pero Totecotzin Jesús, Yejuatzin sepa san quitamiixtahuaco in tajtacol de nochi in talticpacuani, cuac Yejuatzin motemactij ma quimictican para ijcón quitamiixtahuas nochi tataman tajtacolme. <sup>28</sup> Huan no ticmatij que in tanahuatil de Moisés quinquimactij taca tajtaclejque san ma tequititinemican queme tiopixcame. Huan nimampa de ne tanahuatil de Moisés, ijcuacón Totajtzin Dios moyectencahuac ica ichicahualis de itanahuatil de quijitas huan quitalis Niconetzin, Yejuatzin Cristo Jesús, ma tequititinemi queme hueyi tiopixcatzin porín Iconetzin de Dios Yejuatzin ica por itatacamatilis moyolmajxitico para sen nachipa.

### **Nican tajtoa de Jesús Yejuatzin in Tetajtohuijque tenica Totajtzin Dios moyectencahuac ya de techmaquixtis**

**8** Huan axcan xiquitacan que in cachi hueyi tamachtilis de nochi tenica tamechno-njotztoque yejua ya nijín, que tohueyitiopixcatzin Cristo Jesús, Yejuatzin yajqui motalito nepa eluiyactzinco iyecmacopa Totajtzin Dios campa ichicaucahuelilispán. <sup>2</sup> Huan Totecotzin Jesús ompa tequititinemi queme tiopixcat campa ichantzín Dios. Huan ne caltzin melau Totajtzin Dios quichijchihuac huan amo sayó taca san nintamachijchiu. <sup>3</sup> Huan Totajtzin Dios quinijitac huan quintalij ma tequititinemican in hueyi tiopixcame nican talticpac huan ma quitayocolican Dios míac tataman tetayocolil, huan no ma yejuan quinmictican sequin tapialme tenica quimohuistilisque Totajtzin Dios. Huan como ijcón tequititinemij ne hueyi tiopixcame, ica ya nojón no cachi monequi que Jesucristo ma quipía tensá tetayocolil tenica quitayocolis Totajtzin Dios. <sup>4</sup> Huan tacán yetosquía oc Jesucristo nican talticpac, ijcuacón Yejuatzin amo tequitisquía queme tiopixcat, porín yetinemij oc míac tiopixcame ten quitayocolijtinemij Totajtzin Dios ica míac tataman tetayocolilme ijcón queme in tanahuatil de Moisés quitenahuatílía. <sup>5</sup> Huan nochi tiopixcame nintequiu cualtía sayó para nexcuitil san. Huan nochi nintequiu huan nintetayocoliluan quinejnehuililtía san ne ten melau tequit nepa eluiyactzinco. Huan ticmatij que nochi nintequihuan cualtía sayó para nexcuitilme san. Porín cuac Moisés pehuac quichijchihuac imantiadajcaltiopantzín de Dios nepa campa tayiucan, ijcuacón Dios quilij Moisés ijcuín: “Xictali cuidado huan xicchijchihuati nochantzín nepa talticpac ijcón queme nimitznexutilij ya cuac ticonitac tech ne tepet Sinai”.

<sup>6</sup> Pero axcan Totayecancatiopixcatzin Cristo Jesús motequitiltijtinemi ica cachi cuali tequit, porín Yejuatzin in Tetajtohuijque tenica Totajtzin Dios moyancuicayectencahuac ya de techmaquixtis. Huan cuac Totajtzin Dios moyancuicayectencahuac de techmaquixtis, ijcuacón ne itenilil cualcui cachi huejueyi tati-ochihualis huan que ne tenilil cuac Dios yequinica moyectencahuac ne achtopa ya ihuan Moisés.

<sup>7</sup>Huan tacán ne achtopa netencahualis de Dios techcualcuilisquía ajsitoc in totemaquiixtilis, ijcuacán amo monequisquía oc que ma ocsepa ca ojpa ma moyancuicayectencahua Totajtzin Dios. <sup>8</sup>Huan nochi nijín ticmatij porín Totajtzin Dios quintechcayotij ipueblojcahuan cuac Yejuatzin quinilij tech Itajtolztzin ijcuín: Totecotzin quijsa ijcuín: Ejcotoc tonalme cuac ocsepa nimoyancuicayectencahuas inuan nopueblojcahuan de Israel huan de Judá.

<sup>9</sup>Huan amo nicchiutica ne yancuic netencahualis ijcón queme nicchiuca ya cuac nimoyectencahuac ne achtopa ya ihuan namohuejcautatuan.

Porín tech ne tonalme niquinmaquitzquij ica nochicahualis

huan niquinualquixtij de ne país de Egipto.

Huan cuac yejuan hualquisque ya, ijcuacán amo quinecque quiyectacamatinenque oc notanahuatilan.

Ica ya nojón niquinsecocahuac.

Huan nochi nijín sayó quijsa Totecotzin.

<sup>10</sup>Ica ya nojón ocsepa quijsa Totecotzin ijcuín:

Huan satepan cuac panoc ya in tonalme de ne achtopa nonetenilil,

ijcuacán ocsepa nimoyancuicayectencahuas oc ihuan nopueblojcahuan de Israel.

Ijcuacán niquintalilis notanahuatilan tech nintamachilisan.

Huan no niquinmatiltis nopueblojcahuan notanahuatilan tech nintalnamiqulisan.

Huan Nejuatzin niyesqui niin Dios,

huan yejuan yesque nopueblojcahuan.

<sup>11</sup>Ijcuacán amo monequi oc ma acsá quinmachtijtinemi iicnihuan de notanahuatilan.

Huan amo no monequi ma ocsé quinnexlijtinemi oc ichancahuan de queniu quixmatische Totecotzin Dios.

Huan amo ijcón monequi quichiutinemisque porín nochi nopueblojcahuan nechixmatinemisque ya,

masqui huejueyi chihuanime huan masqui amo hueyichihuanime.

<sup>12</sup>Huan ijcón tech nojón tonalme niquintapojpoluis nintajtacoluan de nopueblojcahuan,

huan amo queman oc niqinelnamiqulis nintajtacoluan.

<sup>13</sup>Huan cuac Dios quijsa que ocsepa moyancuicayectencahuas, ijcuacán quijosnequi que Yejuatzin quitelij ya que ne achtopa ne itenilil soltic ya huan amo quipía chicahualis oc. Huan ne achtopa ne itenilil, yejua ya nojón mochihuaco ya soltic huan amo cualtías oc huan niman polihuis ya.

### **Nican tajtoa de in nexcuutil de ichantzín de Dios nepa eluiyactzinco huan ichantzín Dios de nican talticpac**

**9** Huan ne achtopa tanahuatil ten Dios quitenahuatiliz, yejua ya ne cualcuía de queniu monequi se quimohuistilis Dios tech nichantzín nican talticpac. <sup>2</sup>Huan ne itiopantzín Dios, yejua ne tohuejcautatuan quichijchiuque tatzatzalan tzacual tech ne mantiadajcal tiopan. Huan ne cuarto campa se achto calaqú, yejua quito-caytijque Tamahuisyojcan, campa ne mesa campa quitaliyaj pantzitzín iixpantzínco Dios huan no ijcatoya se velajquetzaloni. <sup>3</sup>Huan no cachi taixpan de ne Tamo-

huisyojcan pilcatoya se tilma ten quitajcotzactoc ocsé cuarto campa quitocaytijque, “in Cachi Hueyi Tamohuisyojcan”.<sup>4</sup> Huan ne Cachi Hueyi Tamohuisyojcan ompa yetoya se mohuiscaaltar de oro campa quichichinoaya copal para Dios. Huan no ompa yetoya se cuoucajon ten nochi naucampa tapanpepechol ica oro huan no inajnacastan tapanpepechol ica oro. Huan tech nojón cuoucajon yetoya se contzin de oro campa yetoya in tacualis ten quilíaj maná. Huan tech nojón cuoucajon no ompa yetoya ne itacou in Aarón ten motatzmoltijca ya. Huan no ompa yetoya ne patahuac teme campa ijcuiliutoc itanahuatiluan de Dios.<sup>5</sup> Huan panían de nojón cuoucajon quichijchiutoyaj ome ángeles ten quilíaj querubines ten quixpatcayotiyaj Dios. Huan yejuan quitampahuijtoyaj ica ninajtapaluan ne cuoucajon. Huan ipan ne cuoucajon in hueyi tiopixcat quimohuistiliaya Dios ica ne esti ten quinquixtilijque ya de ne tapijalme ten quimictijque ya para ijcón quixtahuas tajtacol. Pero amo technamiqui que ma cachi oc tamechnojnotzacan de nojón imantiadajcal de Dios.<sup>6</sup> Huan cuac yec tamitachijchiu nochi nijín, ijcuacón in tiopixcame mosta mosta calactinemij campa ne achtopa cuarto ten quilíaj Tamohuisyojcan, para ijcón quitamichiu-tiyasque in tanahuatil de queniu quimohuistilisque Dios.<sup>7</sup> Huan campa ne ica ome cuarto, huelis calaquis sayó in tayecanque tiopixcat sepa san tech se xihuit. Huan cuac calaquis in tayecanque tiopixcat tech ne ica ome cuarto, ijcuacón monequi ma cuica inesyó de ne tapijalme ten quimictijque. Huan ijcón ne tayecanque tiopixcat quitayocolía Dios ne esti para ica quixtahuas de yejua mismo itajtacoluan. Huan satepan no cuica esti para quinxtahuilis nintajtacoluan den ne pueblojuani de Israel.<sup>8</sup> Huan in Yecticatzin Espíritu techajsicamatiltía queniu nochi nijín tamachilis ijcuín: Mientras in tiopixcame motequitiltijtocque para quimohuistilisque Dios campa ne achto cuarto ten quilíaj Tamohuisyojcan, ijcuacón amo aquen huelis calaquis campa ne ica ome cuarto ten quilía Cachi Hueyi Tamohuisyojcan, porín ayamo quitapohuaj.<sup>9</sup> Huan nochi nijín cualtía queme nexcuitil para tejuan de axcan tinentinemij. Huan tech ne Tamohuisyojcan, ompa in tiopixcame quimohuistiliayaj Dios ica tetayocolilme huan nemactilme ten tapijalme tamictilme ya. Pero nochi nijín amo huelis ica quinyecyolchipahuas de nintajtacol nochi neques ten quimohuistiliayaj Dios tech ne Tamahuisyojcan.<sup>10</sup> Huan amo no huelis moyecyolchipahuasque in tamohuistiliani porín ne tanahuatilme cualcui sayó chicahualis de tacualis huan den tayilis huan de tataman majtequilis tenica se mochipahuas de itajtacol. Nochi nijín tanahuatilme cualtía sayó para se quichipahuas inacayo san. Huan nochi nijín tanahuatilme Dios quintalij ya ma techyecana sayó hasta ne tonal cuac Yejuatzin quintamipatilis ya nochi ne achtopa tanahuatilme.

<sup>11</sup> Pero axcan huala ya Cristo huan Yejuatzin Totayecancatiopixcau ten techaxcatilijtoc ya ne cachi cuali tatiochihualisme tenica Dios moyancuicayectencahuac ya de techmactilis. Huan ne itiopantzin de Dios campa tequititinemi Cristo queme hueyi tiopixcatzin, ompa ya ne semi cachi cuali porín cachi yeyectoc ya. Huan nojón itiopantzin de Dios amo matachijchiu de se tagat san nión no pohui nican talticpac.<sup>12</sup> Huan Totecotzin Cristo calaquic ya campa ne Cachi Hueyi Tamohuisyojcan. Huan Yejuatzin amo cuiyac esti de chivitos oso esti de cuacuejme tenica quixtahuas tajtacolme. Ta, Yejuatzin calayic ya sepa san tech ne Cachi Hueyi Tamohuisyojcan. Huan ompa Cristo Jesús, cuiyac yejua ya mismo iesyotzin huan quitemactilij iixpantzincó Dios para quixtahuas in tajtacolme de nochi talticpacuani. Huan ijcón Totecotzin Jesús techaxcatilij ya ne nemaquixtilis para sen nachipa.<sup>13</sup> Huan in tanahuatil de

Moisés technextilía que in taca tajtacolejque cuali huelij mochiphahuaj panían san, ijcón queme in tiopixcat momaajtzeluía ica esti de chivito oso ca esti de cuacuejme. Huan no in tiopixcat quinpotonilía incuounexyo de ne cuacuejme ten quinchijchinojque ya campa altar tech ne Tamohuisyojcan. <sup>14</sup> Huan como ijcón mochipautinemij panían san, semi cachi hueyi chicahualis cualcui iesyotzin de Cristo para techyecyolchipahuas. Porín ica in chicahualis den Yecticatzin Espíritu ten amo queman tamis, Totecotzin Jesús motetayocolij ya imaco Totajtzin Dios para ijcón quixtahuas totajtacoluan. Porín Yejuatzin yec yolchipahuactzin huan Yejuatzin quinejnehuilij queme in chipactzin tapialtzin ten quimictíaj para ica quixtahuasque tajtacolme. Huan ica iesyotzin de Cristo Yejuatzin techchijchiphauilía totamachilis huan totalnamiquilis de nochi tataman amocuali tanemililis ten techuica tech in ixpolihuilis. Huan como tiyolchipauque ya, ijcuacón cuali tihuelisque ya timotequitiltisque ihuan Totajtzin Dios ten yoltica sen nachipa. <sup>15</sup> Ica ya nojón Totecotzin Jesucristo, Yejuatzin in Totetajtohuijcatzin ten cualcuitihuala de ne yancuic ne tencahualis de Dios. Huan cuac momiquilij Cristo, ijcuacón Dios quintapojpoluilij nintajtacoluan de nochi ne tagayot ten motajtacolmacatihualajque, neques ten amo quitacamatihualayaj ne tanahuatilme de Moisés. Huan no Cristo momiquilij para que nochi itaijitaluan de Dios huelisque quiselitihue ne nemaquixtilis queme se herencia ten amo queman tamis. Huan nochi nijín motamichihuaco ya ijcón queme Totajtzin Dios moyecyancuicatencauca ya de quichihuas. <sup>16</sup> Huan cuac se acsá quichijchihuac ya itestamento, ijcuacón monequi sequi taca ma quitetajtohuiltican que melau miyic ya para ijcón nojón testamento huelis ya motatequiutis ya. <sup>17</sup> Huan nojón testamento ayamo huelis cualtías como yoltinemis oc ne naquen quichijchihuac. Ta, cualtías ne testamento sayó cuac momiquilis ne tagat. <sup>18</sup> Huan ne achtopa tanahuatil tenica Dios moyectencahuac ihuan Moisés, yejua ya ne ticmatij que quipiaco chicahualis porín quimimilojque esti para ijcón huelis quitatequiutisque ne achtopa tanahuatil. <sup>19</sup> Huan Moisés quitatequiutij ne tanahuatil ijcuín, achto Moisés quintapohuij nochi in pueblojuani de Israel de nochi itanahuatilan de Dios. Huan de ompa Moisés quicuic sequi chichiltic tojmit huan se xiutzin taquechpostec ten quilfaj hisopo. Ijcuacón Moisés quinajaquilij ne xiutzin tech at huan tech esti ten quiquixtilijque ya de ne cuacuejme huan chivitos ten quimictijque ya. Huan de ompa Moisés quiajtzeluij ne Tacuilolamatzin de Dios campa ixnesi nochi itanahuatilan de Dios. Huan no Moisés quinajtzeluij ica esti nochi in pueblojuani de Israel. <sup>20</sup> Huan cuac Moisés quitamichihuac ne itequiu, ijcuacón yejua quinilij in pueblojuani ijcuín: “Ica por nijín esti tictenextíaj senteixteno que tictatequiutijque nijín tanahuatil ten Dios technahuatiliz ya”. <sup>21</sup> Huan Moisés no quiajtzeluij ne mantiadajtiopantzin ica ne esti huan no quinajtzeluij nochi tataman manamicme ten quitatequiutijtinemij tech nojón mantiadajtiopantzin. <sup>22</sup> Huan ijcón technextilía in tanahuatil de Moisés que campa monequis tachiphualis, ijcuacón quipía de quichiphahuasque ica esti. Huan no technextilía in tanahuatil de Moisés de que como amo quinmictiaya tapijalme para ma mimilahui esti, ijcuacón Dios amo huelis quintapojpoluilis nintajtacoluan den ipueblojcahuan.



**Nican tajtoa de cuac momiquilij Cristo, ijcuación Yejuatzin  
huelis quinajchihuilis nintajtacoluan de talticpacuani**

<sup>23</sup> Ica ya nojón semi monequía ma quinchipahuacan nochi ne manamicme ten yetoc tech mantiadajtiopantzin porín ne manamicme sayó quinnejnehuilía ne ten yetocque in eluiyactzinco. Pero ichantzin Dios yejua ya ne monequi ma mochipahuas pero ica tetayocolilme ten cualcui cachi hueyi chicahualis. <sup>24</sup> Huan ticmatij que Cristo amo calaquito tech ne mantiadajtiopantzin tamachijchiu de tasa san. Porín ne mantiadajtiopantzin sayó quinejnehuilía san ne melau ichantzin de Dios. Ta, Totecotzin Cristo calaquito nepa eluiyactzinco iixpantzinco Totajtzin Dios para ompa quitematilito por tejuan. <sup>25</sup> Pero Cristo amo quichihuac queme in tiopixcame quichiutihualajque, porín ne tayecanque tiopixcat judío, yejua ne calaquía sepa san se xihuit campa ne Cachi Hueyi Tamohuisyojcan. Huan ompa quimactiliaya Dios sequi esti de teesy para ijcón quixtahuas tajtacolme. Pero Cristo motemactij sepa san para quixtahuas tajtacolme. <sup>26</sup> Huan tacán Cristo quichihuasquía ijcón queme quichiutihualaya ne tayecanque tiopixcame, ijcuación monequía que Yejuatzin sepa momiquilisquía de cada se xihuit, desde ne tonal cuac hual tzinehuac in talticpac. Pero amo ijcón quichihuaco Cristo porín ejcóc in tonal cuac Dios quimonequiltij que ma huiqui Cristo nican talticpac. Ica ya nojón Cristo monextico sepa san nican talticpac huan motemactij yejua san, huan motecahuilij ma quimictican para ijcón quixtahuas huan quixpolos totajtacoluan. <sup>27</sup> Huan cuali ticmatij que Dios quitalij para in talticpacuani que quipía de momiquilis sepa san huan de ompa Yejuatzin quinixcomacas. <sup>28</sup> Ica ya nojón Totecotzin Cristo motemactij sepa san huan motecahuilij ma quimictican para ijcón quixtahuas huan quixpolos nochi nintajtacoluan den huel míac talticpacuani. Huan cachi satapan Cristo monextiquiu ica ojpa. Ijcuación Yejuatzin mohualuicas amo para quixpoloquiu in tajtacol. Ta, Yejuatzin hualas para quinsentamimaquixtis ya nochi neques ten quichixcayetocque ma mohualuica.

**10** Huan ne tanahuatil de Moisés yejua ne sayó quinejnehuilía ne tatiochihualisme de Dios ten quipía de hualasque. Huan ne tanahuatil de Moisés amo melau cualcui yec ajsitoc ne tatiochihualisme. Ica ya nojón ne tanahuatil de Moisés amo quemán huelic sepan san quinyecolchiphautihuala ne tamohuistiliani ten quinequáj motoquisque inahuactzin Dios. Ta, monequi yejuan quitacamatinemisque ne tanahuatil huan quitemactilijtinemij Dios de míac tataman cada xihuit ijcón queme quinenahuatílía in tanahuatil de Moisés. <sup>2</sup> Huan nochi nijín ticmatij porín como huelisquáj moyecolchiphahuasquáj ne tamohuistiliani ica ne tanahuatil de Moisés, ijcuación in pueblojuani de Israel amo quitemactisquáj oc ica ne tetayocolilme para quixtahuasque tajtacolme. Huan tacán mocahuasquáj yec yolchipauque ne pueblojuani ten quimactiliayaj Dios ne in tetayocolilme, ijcuación yejuan amo quiyolmachilisquáj oc que cox yejuan tajtaclejque oc. <sup>3</sup> Pero Dios quitalij ma quitemactijtiyacan tetayocolilme para ica quixtautiyasque nintajtacoluan de nipueblojcahuan. Huan masqui ijcón quichiutihualajque de quitemactijtihualajque de nintetayocoliluan, yejuan nojón cada xihuit quinelnamictihualayaj in pueblojuani que yejuan tajtaclejque. <sup>4</sup> Huan ijcón Dios quitalij ma quichiutihualajque cada xihuit porín amo quemán huelisquía quixpolos tajtacol sayó ica ne inesyo de cuacuejme huan chivitos.

<sup>5</sup>Ica ya nojón cuac Totecotzin Cristo huala nican talticpac, ijcuación Yejuatzin quilij Itajtzin Dios ijcuín:

Tejuatzin, amo ticonmonequiltía que ma mopueblojcahuan ma mitzmactilican tatanman tetayocolilme

huan amo no ma mitzonmictilican tapialme san para ica quintaxtahuilisque in tajtacol de mopueblojcahuan.

Ta, Tejuatzin ticontalij ma nimonacayoti queme se tagat

huan nonacayo mochihuato se tetayocolil para ica quixtahuas tajtacol.

<sup>6</sup>Huan axcan amo huelis oc mitzyolpactisque mopueblojcahuan

cuac yejuan mitzonchichinohuilisque tapialme

huan cuac mitzontayocolisque míac tatanman para ijcón quixpolosque intajtacoluan.

<sup>7</sup>Ica ya nojón Nejuatzin ni Cristo nimitzonilfa ijcuín:

“Xiquita, Notajtzin Dios, nihuala ya nican talticpac para nicchihuas sayó ten Tejuatzin ticonmonequiltíaj ma nicchihua,

ijcón queme ijcuiliutoc notechcacopaca tech in Tajcuilolamatzin de Dios”.

<sup>8</sup>Acho Cristo quijtoa que Totajtzin Dios amo quimonequiltía oc que ma ticmactilijtiyacan tetayocolilme. Huan amo no ica moyolpactía Dios cuac se acsá quimohuistilía Dios ica míac tatanman nemactilme de tapialme. Huan amo no mohuelita Dios cuac se quichichinohuilía tatanman tapialme para ijcón quixpolosque tajtacol. Huan nochi nijín amo quimonequiltía oc Dios, masqui in tanahuatil de Moisés technahuatílfa ma ijcón ticchiutiyacan. <sup>9</sup>Huan satepan no Cristo quijtoa ijcuín: “Xiconita san, Notajtzin Dios, nican nihuala sayó para nicchihuas ijcón queme Tejuatzin ticonmonequiltía ma nicchihua”. Ica nijín tajtolme Yejuatzin quiseotalij ya nochi ne achtopa tatanman tetayocolilme. Huan Yejuatzin quiixpatcayotito ne achtopa tetayocolilme ica in tetayocolil de inacayo de Cristo. <sup>10</sup>Ica ya nojón Totajtzin Dios techyeyolchipahuac porín Jesucristo quiyecchihuaco ijcón queme quimonequiltij Itajtzin. Huan Cristo motemactij yejua mismo huan motecahuilij ma quimictican sepa san para ijcón quisentamixtahua ya intajtacoluan de talticpacuani.

<sup>11</sup>Huan cuali ticmatij que mosta mosta in tiopixcame judíos tequitinemij huan quitemactijtocque miacpa ica ne tetayocolilme ten amo queman huelis quixpolos tajtacolme. <sup>12</sup>Pero Totecotzin Jesucristo motemactij sayó sepa san, huan amo miacpa, ma quimictican para ijcón quisentamiixtahuas tajtacol. Ta, Yejuatzin quixpoloco in tajtacol para sen nachipa ya. Huan cuac Jesucristo tamitaxtahuac ya den tajtacol, ijcuación Yejuatzin yajqui eluiyactzinco huan motalito iyecmacopaca Itajtzin campa ichicaucahuelilipan. <sup>13</sup>Huan ompa Cristo mochialijtoc hasta ne tonal cuac Itajtzin Dios quintamitanilis huan quitatacamatiltis ya nochi ne naquen quitahuelitzinemij Cristo. <sup>14</sup>Huan ijcón mochihuas nochi nijín porín Cristo sepa san motemactij ma quimictican para quisentamiixtahuas ya tajtacol. Huan ica ne imiquilis de Cristo, Totajtzin Dios quipohua que Yejuatzin quinsentamiyolchipahuac ya para sen nachipa nochi itaneltocacahuan ten Yejuatzin quinijitac ma poutinemican ihuantzin. <sup>15</sup>Huan in Yecticatzin Espíritu quitetajtohuiltía que melau nochi ten namechilijtoc. Porín achtopa ya Yejuatzin ica por Itajtoltzin quijtoja ijcuín:

<sup>16</sup>Huan quijtoa Totecotzin que satepan cuac panos ne tonalme de ne achtopa ne notenilil,

ijcuación ocsepa nimoyancuicayectencahuas ya ihuan nopueblojcahuan.

Ijcuación niquintalilis notanahuatilan tech nintamechilusuan

huan niqinmatiltis notanahuatiluan tech intalnamiqulisuan de nopueblojcahuan.

<sup>17</sup> Huan satepan no quijtoa Totecotzin ijcuín:

Amo queman oc niqinelnamiqulis oc de intajtacoluan de notaneltocacahuan huan nión no de ninamocualitachihualisuan.

<sup>18</sup> Huan como Totajtzin Dios quitamitapojpoluij ya nochi tataman tajtacol, ica ya nojón amo monequis ma acsá quitayocolis Dios ocsequin tataman nemactil para ica quixtahuas itajtacoluan.

### **Nican tajtoa de semi monequi ma timotoquijtiyacan ihuan Dios**

<sup>19</sup> Ica ya nojón, notasojicnihuan, axcan cuali ticpixinemij hueyi yolchicahualis campa ne cuarto ten quilíaj Cachi Hueyi Tamohuisyojcan ten quinejnehuilía itiopantzin de Dios. Huan ijcón cuali tihuelisque timotoquijtinemis que ihuan Dios porín Cristo quimimiloj iesyotzin cuac momiquilij. <sup>20</sup> Huan Cristo techtapohuilij se yancuic ojti tenica ticalaquisque ne eluiyactzinco itencopaca Cristo porín Yejuatzin techpanoltij ya huan techuiyac campa ichantzín Dios ten quinejnehuilía ne cuarto ten quilíaj Cachi Hueyi Tamohuisyojcan. Huan nochi nijín motamichihuaco porín Cristo Jesús motemactij ma quimictican para ijcón huelis techtapohuilij ne ojtzin de yajtoc para ne eluiyactzinco. <sup>21</sup> Huan Jesús Yejuatzin Totayecancatiopixcau huan tequitinemi para techpalehuis nochi tiitaneltocacahuan de Dios. <sup>22</sup> Ica ya nojón monequi ma timotoquican inahuactzinco Dios huan ma amo ticuiyacan ne yoltacajcayahualis. Ta, ma ticpixtiyacan se tacuautamatilis ten yec ajsitoc. Huan ijcón ma ticchiutiyaican porín Totajtzin Dios techyolchipahuac ya para ma amo ticymachilijtiyacan que tejuan ticuicatinemij oc tajtacol. Huan no Totajtzin Dios techyolchipahuac ica in chichualis den Yecticatzin Espíritu, queme yesquía Dios quipacac tonacayo ica chipahuacat. <sup>23</sup> Huan ma ticsentocacan titacuautamatiyacan que se tonal ticyecajcaselitihue ne nemaquixtilis yec majsitoc ya ten hualehua tech in Tajtoltzin de Dios. Huan ma amo ticpatatiyacan totacuautamatilis porín Totajtzin Dios quitamichihuas nochi tenica moyectencahuac ya que quichihuas. <sup>24</sup> Monequi ma tictemolijtiyacan de queniu timopalehuijtiyasque se huan ocsé huan de queniu timotasojtatiyasque se huan ocsé huan de queniu ticchiutiyaican in cuali tachihualisme. <sup>25</sup> Huan sequin tocnihuan amo mosentilijtinemij para quimohuistilisque Dios pero ma amo ijcón ma ticchiutinemican tejuan. Ta, ma timosenpanyolmajxitiyacan se huan ocsé huan cachi oc ma timopalehuijtiyacan se huan ocsé ica ne yolmajxitilis porín tiquitaj que cachi motoquijtihuitz ya ne tonal cuac mohualuicas Totecotzin Jesús.

<sup>26</sup> Huan tejuan ten ticselijque ya huan ticmatij ya in Tajtoltzin de Dios, como tisenme ticnejnequij ocsepa timotajtacolmacatinemis que, ijcuacón amo teyi oc ongac se nemactil tenica tihuelisque tictayocolisque Dios para tiquixpolosque totajtacoluan. <sup>27</sup> Huan como senme de tejuan ijcón ticchiutinemij, ijcuacón ma ticmatican que sayó techchixtoc ne temoucaixcomacalis ten Dios techchihuilis cuac Yejuatzin hualas para quinmapachoqui ica tit huan quinixpoloqui ica tatzacuutilis nochi neques ten quitahuelitzinemij Dios. <sup>28</sup> Huan namejuan cuali nanquimatij que cuac ome oso eyi taca quitetajtohuiltíaj que acsá amo quiyectacamati in tanahuatil de Moisés, ijcuacón in pueblojuani amo quiyolicneliayaj oc ne ten amo yec tatacamati. Ta, quimictíaj sepa san. <sup>29</sup> Huan como ijcón mochihuaco ica ne tanahuatil de Moisés, ijcuacón ximatican que semi cachi hueyi tatzacuutilis quinnamiqui

quiselisque neques ten quixnamiquij in Teconetzin de Dios, neques ten quihuijucaltíaj ne iesyotzin de Cristo ten quimimiloco ica por yejuan. Huan no ninpan huetziquiu hueyi tatzacuilitis, porín quimajpeuque ya in Yecticatzin Espíritu ten quinyolicnelía. Huan ica ne iesyotzin de Cristo Totajtzin Dios quitatequiutij ya ne itenilil de quinmaquixtis nochi itajjitaluan ten Yejuatzin quinyolchipautinemij. <sup>30</sup> Pues cuali ticmatij que Totecotzin qijitoco ijcuín: “Nejuatzin notequiu de nite-tatzacuilitía huan no sayó Nejuatzin san niquinixtahualtis neques ten tajtacolejque ica tatzacuilitis”. Huan no ocsepa Totecotzin quijtoa ijcuín: “Totecotzin Dios, Yejuatzin quinxcomacas huan quintatzacuilitis ipueblojcahuan”. <sup>31</sup> Ica ya nojón semi hueyi temoutil como acsá huetzitiu imaco Totajtzin Dios ten sen nachipa yoltica para quimachililitis tatzacuilitis.

<sup>32</sup> Pero namejuan ijcón xiquelnamictiyacan ya ne tonalme ten panocque ya cuac yequinica Dios namechyoltahuilico ica Itajtoltzin. Ijcuacán namejuan nanquiyolicaxijicojtiayaj mífac tataman tajyohuilisme. <sup>33</sup> Huan senme de namejuan namech-pinaucatalitiayaj senteixteno huan namechtejtelchihuayaj huan namechtajyohuiltiayaj. Huan cuac quintajyohuiltijque ocsequin de namotaneltoaicnihuan, ijcuacán namejuan amo nanmotzinquixtijque de nanmopoutinemij ihuantzin Dios. <sup>34</sup> Huan namejuan nanquinyolicneliayaj ne presos ten no tzactoyaj namohuan tech in cárcel. Huan cuac namechajchiuilijque ten namoaxca, ijcuacán namejuan nanquixijx-icojtihualayaj ne tajyohuilis hasta ica yolpaquilis. Huan ijcón nanquichiuque porín namejuan nanquimatinemij ya que nanquipíaj ya nepa eluiyactzinco se nemactil ten semi cachi cualtzin huan ten quisentocas sen nachipa huan ten amo queman tamis.

<sup>35</sup> Ica ya nojón amo xicsecocahuatij huan xicpolutij ne yolchicahualis de namotacuautamatilis. Porín ica ne namotacuautamatilis nanquiselisque se cualtzin tetayocolil. <sup>36</sup> Huan namejuan monequi xicyolicaxijicojtiyacan tajyohuilisme para ijcón nanquichiutinemis que ten Dios quimonequiltía. Huan no ijcón nanquiselityasque nochi tatiochihualis ten Dios moyectencahuac ya de namechmacatiyás. <sup>37</sup> Huan in Tajcuilolamatzin quijtoa ijcuín:

Huan nimantzin ya hualas Yejuatzin ten ipa quipía de hualas.

Huan Yejuatzin amo huejcahuas de mohualuicas.

<sup>38</sup> Huan ne tagat ten Dios quipohuas ya yolchiphahuac, yejua ne yoltinemis porín tacuautamati ihuan Cristo.

Pero tacán ne tagat motzinquixtis de nitacuautamatilis nohuantzin,

ijcuacán ne tagat amo nechyolpactis oc porín nechtapatahuilij ya.

<sup>39</sup> Pero tejuan amo tipoutinemij ihuan neques ten quinequij motzinquixtis que de nintacuautamatilis para ijcón ixpolihuisque. Ta, tejuan tipoutinemij ihuan neques ten tacuautamatinemij ihuan Dios huan ijcón Yejuatzin techsepanmaquixtis.

### Nican tajtoa de ne tacuautamatilis ihuan Dios

**11** Huan cuac titacuautamatij ihuan Dios, ijcuacán timoyecmatiltíaj ya que se tonal ticselijtihue nochi ne ten axcan ticyolicachixtocque. Huan no cuac titacuautamatinemij ihuan Dios, ijcuacán timoyecmatiltíaj ya que yec melau motamichihuaqui nochi ne ten ayamo tiqiztznemij. <sup>2</sup> Huan cuali ticmatij que ne to-huejcautatuan tacuautamatinenque ihuan Dios. Ica ya nojón Dios quincualtagaitac.

<sup>3</sup> Huan cuac titacuautamatij ihuan Dios, ijcuacán ticajscamatij que Totajtzin Dios quichijchihuac in talticpac huan in eluiyac sayó ica in chichahualis de Itajtoltzin.

Huan no ticajscamatinemij que Dios quichijchihuac nochi ten tiqitztinemij ica ne ichicahualis, nochi ne ten achtopa ayamo oncaya.

<sup>4</sup>Huan tohuejcautat Abel, yejua no tacuautamatinemic ihuan Dios huan quimactilij Dios se nemactil tenica quimohuistilij Yejuatzin. Huan ne inemactil de Abel cachi cuali huan que ne inemactil de icniu Caín. Ica ya nojón Dios quihueyipohuac huan quiselij ne inemactil de Abel ca paquilis. Huan masqui ne Abel momiquilij ya, pero motetapohúa oc de ne ichicahualisuan ten hualeutoc ya tech itacuautamatilis.

<sup>5</sup>Huan no tohuejcautat Enoc tacuautamatinemic ihuan Dios. Ica ya nojón Yejuatzin quiajocuic in Enoc huan cuiyac eluiyactzinco. Huan ijcón in Enoc amo quimachilij in miquilis. Huan in talticpacuani amo quitacque oc in Enoc porín Dios quiajocuic eluiyactzinco. Huan in Tajcuilolamatzin de Dios techilía que achtopa que Dios quiajocuic Enoc, ijcuación yejua quiyolpactijtinemico Dios. <sup>6</sup>Huan como se acsó amo tacuautamatinemis ihuan Dios, ijcuación amo huelis quiyolpactijtinemis Dios. Porín como se yejua quinequi se motoquitiu ihuan Dios, ijcuación monequi ma quiyecneltoqa que ongac se Dios huan no ma quiyecneltoqa que Dios quinpalehuis neques ten quiyoltemosque Dios para quixmatisque Yejuatzin.

<sup>7</sup>Huan no tohuejcautat Noé tacuautamatinemic ihuan Dios. Huan cuac Dios quinejmachtij Noé que mochihuati míac tataman tajyohuilis que ayamo huelis quitasque, ijcuación yejua quitacamatic Dios huan quichijchihuac se hueyi barco tenica huelis quinmaquixtis ichancahuan. Huan Noé tacuautamatic ihuan Dios huan quijchijchihuac in barco. Ica ya nojón Noé quinmatiltij in talticpacuani que yejuan tajtacolejque huan tatelchihualme ya porín yejuan amo tacuautamatque ihuan Dios. Huan ica itatacamatilis de Noé, ica ya nojón Dios quipohuac Noé que yolchipahuac porín yejua tacuautamatinemic ihuan Dios.

<sup>8</sup>Huan ne tohuejcautat Abraham tacuautamatic ihuan Dios. Huan cuac Yejuatzin quinotzac Abraham, ijcuación yejua quitacamatic Totajtzin Dios huan quistehuac campa ipapajuan huan yajque ajsito campa talme ten Dios moyectencahuac que quimactilis. Huan ne Abraham cuac quistehuac de ne ichancopaca, ijcuación amo quimatic can yohui huan can yajtoc. <sup>9</sup>Huan Abraham tacuautamatinemic ihuan Dios. Ica ya nojón Abraham calyetinemic campa ne tal ten Dios moyectencahuac de quitayocolis. Huan ijcón in Abraham ompa tepalyetoya. Huan calyetinemía itech mantiadajcalme. Huan no calyetinemíaj in Isaac huan Jacob itech mantiadajcalme. Huan nochi yejuan ayamo quiselijque in tatiochihualis ten Dios moyectencauca de quintayocolis. <sup>10</sup>Huan Abraham ijcón calyetinemic tech nojón mantiadajcal, porín yejua quichixtoya que se tonal calyetinemis tech ne hueyi pueblo tech eluiyactzin ten Dios quiyecchijchihuac ya, ten quipía cuajcuali tatzinehualonime ten amo que-man ijtcachuis.

<sup>11</sup>Huan no tohuejcaunan Sara tacuautamatinemic ihuan Dios. Huan yejua semi xihue ya catca huan amo huelía oc mopilcuís. Pero Totajtzin Dios quimactilij chichahualis para tayolitis. Ica ya nojón Sara quipíac se oquichpil porín yejua ne Sara tacuautamatic ihuan Dios que Yejuatzin quichihuati ijcón queme Yejuatzin moyectencahuac ya. <sup>12</sup>Ica ya nojón in Abraham masqui yejua se tagat san ten semi xihue ya, pero momiactilitijiyajque iconehuan huan mochiutihualajque huel míac ijcón queme se quinita huel miacque sitalinme, huan ijcón queme se quinita in tetzitzin de atexal. Huan mochiuque huel míac iconehuan de Abraham hasta amo hueli oc se quipohuas.

<sup>13</sup>Huan nochi nijín tohuejcautatuan tacuautamatinenque ihuan Dios. Huan yejuan momiquilijque masqui amo quiselicoj in tatiochihualis ten Dios moyectencauca ya de quintayocolis. Huan queme tacuautamatinenque ihuan Dios, ica ya nojón yejuan conchixtoyaj huan taneltocatoyaj que se tonal quiselisque ne tatiochihualis. Huan yejuan mopohualtiayaj que ninaxca ya ne tatiochihualis ten Dios moyectencauca ya de quinmactilis. Huan queme yejuan conchixtoyaj oc tatiochihualis de Dios, ica ya nojón yejuan mopohuayaj senteixteno de que yejuan sayó se rato san tepalyetinemij nican talticpac. <sup>14</sup>Huan queme yejuan ijcón quitetapohuijtinemíaj, ica ya nojón quinmatiltijtinemíaj senteixteno que yejuan quitemojtinemij oc ica nejmach ocsé yancuic pueblo tech eluiyactzinco campa calyetinemisque sen nachipa. <sup>15</sup>Huan tacán tohuejcautatuan sayó tanemilijtinemisquíaj de ne inchan-copaca campa hualeuque, ijcuación cuali horajtisquía oc mocuepasque ne inchan-copaca. <sup>16</sup>Pero yejuan quiyolnejnctinemíaj calyetinemisque campa se cachi cuali mohuisca pueblo, ne ten yetoc eluiyactzinco. Ica ya nojón Dios amo mopinaucamatis cuac yejuan quipohuasque Yejuatzin ya nin Dios. Porín Yejuatzin quinchijchihuilij ya ne mohuisca pueblo campa calyetinemisque sen nachipa.

<sup>17</sup>Huan tohuejcautat Abraham tacuautamatinemic ihuan Dios. Huan Yejuatzin quinequía quitas cox majsitoc itacuautamatis Abraham. Ica ya nojón Dios quinahuatiliz Abraham ma cuica iconeu Isaac huan ma quimicti para ijcón quimohuistilis Dios. Huan melau ne Abraham yec yetoya ya para quitemactis ne iyojtzin conetzin, masqui Dios ipa moyectencauca ya de quitiochihuas Abraham ica por ne iyojtzin conetzin. <sup>18</sup>Huan nijín tiquitaj ten Tajtoltzin de Dios campa quijtoa ijcuín: “Ica itechcacopaca de Isaac, tejua Abraham, tiquinpiati huel míac moconehuan”. <sup>19</sup>Huan Abraham quitacamatic Dios porín yejua cajsicamatic que Yejuatzin quipixtinemi nochi chicahualis hasta no huelis quinpanquixtis yoltocque in ánimajme. Huan in Isaac masqui amo momiquilij, pero Abraham quipohuac que ne iyojtzin conetzin momiquilijca ya huan Abraham quiselij ocsepa yoltoc, queme yesquía Dios quipanquixtisquía yoltoc intzalan in ánimajme.

<sup>20</sup>Huan tohuejcautat Isaac tacuautamatinemic ihuan Dios. Ica ya nojón Isaac quitatautij Dios ma quintiochihuac in iconehuan in Jacob huan in Esaú para ma que yejuan ma quiselitij in tatiochihualis de Dios tech in tonalme ten hualasque oc. <sup>21</sup>Huan no tohuejcautat Jacob tacuautamatinemic ihuan Dios. Ica ya nojón cuac Jacob imiquilistempan yetoya, ijcuación yejua quitatautij Dios ma quintiochihuac sejsenme iconehuan de José. Huan ijcón in Jacob mocuaixpiloy tech nitopil tenica motachicahuilitinemía huan de ompa quimohuistiliz Dios.

<sup>22</sup>Huan no tohuejcautat José tacuautamatinemic ihuan Dios. Ica ya nojón achtopa que momiquilisquía, José quincaquistiltij in pueblojuani de Israel de que cachi satepan yejuan quisasque huan quicautehuasque nojón país de Egipto campa calyetinemíaj. Huan no in José tanahuatij de queniye yejuan monequij cuicasque niomiyohuan tech ne tonal cuac yejuan quisasque ya de Egipto.

<sup>23</sup>Huan itatuan de Moisés tacuautamatinenque ihuan Dios. Huan no itatuan de Moisés quitaatijtinenque ninoquichpil, yejua in Moisés porín amo quiyolmohuiliayaj ne itanahuatil den rey que ma quimictican nochi coneme den pueblojuani Israel. Ica ya nojón itatuan de Moisés, cuac yolico inoquichpil Moisés, ijcuación yejuan quitaatijtinenque in Moisés eyi metztica porín yejuan quitacque ne inoquichpil que semi cualtzin. <sup>24</sup>Huan no tohuejcautat Moisés tacuautamatinemic ihuan Dios. Ica

ya nojón yejua, cuac tagamajsic ya, ijcuación amo quineyic oc ma in tagayot ma quipohuacan Moisés que yejua teconeu den isuapil den rey Faraón. <sup>25</sup> Ta, Moisés cachi quiyolnejnequic ma no tajyohujtineni ijcón queme tajyohuitinemij ipueblo-jcahuan de Dios. Huan Moisés amo no quiyolnejnequic mopaquiltitinemis tech in tajtacolnemilis ten huejcahuas sayó para sequi tonalme san. <sup>26</sup> Huan ijcón quichi-huac Moisés. Porín yejua quiixejecoj que cachi cuali ma quipanotiu ne tajyohuilis ten cualcui itacuautamatilis ihuan Cristo. Huan no quiixejecoj que amo teyi cualtía nochi ne ricojyot ten ongayá campá país de Egipto. Huan Moisés no quixixicojtij ne tajyohuilis porín yejua quipohuac cachi hueyi ipatiu ne tatióchihualis ten Dios moyectencauca ya de quimactilis.

<sup>27</sup> Huan Moisés tacuautamatinemic ihuan Dios. Ica ya nojón quicautehuac ne país de Egipto huan amo quiyolmohuilij que in rey yolcualanisquía. Huan Moisés quisentocaya tacuautamatic porín Dios quiyolchicahuaya masqui Moisés amo quitztinemic Totajtzin Dios. <sup>28</sup> Huan Moisés tacuautamatinemic ihuan Dios. Ica ya nojón yejua quitacamatic Dios itanahuatil que ma cada se calyetoní de judíos ma quinmictican sejsé inichcatzin para ica quichihuasque niniluihuan de ne tajyohuilis iluit. Huan Moisés tanahuatij ma quiajtzeluican in caltenme de nochi pueblojuani de Israel ica esti den ichcatzitzin. Huan como ijcón quichihuaj, ijcuación in ángel de Dios quitas in esti huan panotiquisas san para amo quinmictis in tayecanque oquichpil den ne calyetoní. Huan como amo quitas ne esti, ijcuación, quema, ne ángel quinmictis in tayecanque oquichpil de cada se calyetoní.

<sup>29</sup> Huan in pueblojuani de Israel tacuautamatinenque ihuan Dios. Ica ya nojón yejuan panocque tatajco tech in ne hueyíat ten quilíaj chichilat. Huan cuac panocque ya, ijcuación quitelicsajtiyajque ya taluac. Pero cuac ne pueblojuani egipcios no ijcón quinequíaj quichihuasque, ijcuación nochi yejuan moalsimijque. <sup>30</sup> Huan in pueblojuani de Israel tacuautamatinenque ihuan Dios. Huan cuac yejuan tamitayehualojtinenque ya ne pueblo Jericó ica chicome tonal ya, ica ya nojón moixcuepac huan tamihuetzic ne hueyi tepanyehualol de Jericó.

<sup>31</sup> Huan ne Rahab, yejua se sihuahuilnenque ten tacuautamatinemic ihuan Dios. Ica ya nojón yejua amo ixpolihuic cuac quintamimictijque nochi pueblojuani de Jericó ten amo quitacamaticque Dios. Huan ne Rahab amo ixpolihuic porín yejua quinpalehuj ne soldados de Israel ten quinpjixtinemíaj in pueblojuani de Jericó.

<sup>32</sup> ¿Huan toni oc cachi oc namechtapohuiti de tacuautamatilis? Porín amo horajtis de namechtapohuis de queniú tacuautamatinenque tohuejcautatuan ne Gedeón, huan ne Barac, huan ne Sansón, huan ne Jefé, huan ne rey David, huan ne Samuel, huan ocsequin itanahuatijcahuan de Dios. <sup>33</sup> Huan nochi yejuan nojón pantinime de tohuejcautatuan tacuautamatinenque ihuan Dios. Ica ya nojón sequin de yejuan taquitzquijtinenque tech ocsequin paísme huan yejuan tayecantinenque inpan ne pueblojuani huan tayecantinenque ica tamelahualis. Huan ijcón yejuan moaxcatilitoj ne tatióchihualisme tenica Dios moyectencauque de quinmactilis. Huan ijcón Dios quintenzacuac in tecuanime para ma amo quincuani sequin de tohuejcautatuan. <sup>34</sup> Huan sequin de tohuejcautatuan quisejsehujque in chichualis den huejueyin time ica por nintacuautamatilis. Huan no mochololti-que huan maquisque cuac sequin pueblojuani quinequíaj quinmictisque. Huan Dios quinmactilij chichualis sequin de tohuejcautatuan ten yolcuetautihualayaj. Huan ijcón sequin de tohuejcautatuan mochihuacoj in cachi chijchicauque cuac

motehuijque tech in guerra. Huan ijcón yejuan quintamitanilijque in soldados de neques ten quintahuelitztinenque. Huan nochi nijín quichiutinenque tohiejcautatuan porín tacuautamatinenque ihuan Dios.<sup>35</sup> Huan sequi tohiejcaunanuan nincone-huan momiquilijcaj pero Dios quinpanquixtij yoltocque intzalan in ánimajme. Huan ocsequin tohiejcautatuan quixijxicoayaj ne hueyi toneucayot cuac in tayecanani quintajyohuiltijtihualayaj huan amo quisecocauque nintacuautamatilis para ijcón huelisquía maquisasque. Huan nochi yejuan ijcón quichiuque porín quiyolnejnecque moaxcatilisque de ne yec nemilis ten amo queman tamis.<sup>36</sup> Huan ocsequin no in tayecanani quinquejqueloayaj tohiejcautatuan huan no quinuitequífayaj huan quinilipiyaj ca cadenas huan quincárceltaliayaj.<sup>37</sup> Huan no in tayecanani ocsequin quintepoxonijque tohiejcautatuan huan ocsequin quintajcotejtecque ica serrote huan ocsequin quichihualtiayaj ma motajtacolmagacan. Huan ocsequin quinmictijque ica machete. Huan ocsequin tohiejcautatuan nentinemíaj nican huan nepa motaquentijtinemíaj ica ichcat cuetaxme huan chivo cuetaxme. Huan ijcón yejuan nemíaj semi pobres huan tajyohuiayaj semi huan quintatamotayaj.<sup>38</sup> Huan nochi nojonques tohiejcautatuan semi quipiyaj hueyi inpatiu huan in ocsequin tagayot amo teyica cualtiyaj. Huan tohiejcautatuan ijcón nentinemíaj campa tayiucan san huan campa tepapan huan campa tecalme huan campa huejueyi ostocme. Huan ijcón quichiutinenque porín amo quipíayaj ninchan campa pohuiayaj.<sup>39</sup> Huan nochi nojonques tohiejcautatuan tacuautamatinenque ihuan Dios. Ica ya nojón Dios quincualtagaitac. Pero yejuan ipa amo quiyecajsicaselijque nican talticpac ne tatiochihualis den yec majsitoc ten Dios moyectencauca ya de quinmactilis.<sup>40</sup> Huan nochi nijín ijcón mochihuac porín Dios itanejnequilis de quichijchihua se cachi hueyi tatiochihualis. Huan Totajtzin Dios quimonequiltij de que tohiejcautatuan ma ayamo quiselican nochi majsitoc ya netenilil de Dios. Ta, ma yejuan tohiejcautatuan ma quichixtocan oc para ticsepanselitihue ya nochi in tatiochihualis de Dios tejuan huan yejuan.

### Nican tajtoa de que ma tiquitilijtiyacan Jesús de queniu tacuautamatinemi

**12** Huan tiquinyecquitacque ya huel miacque taneltocani de ne huejcau ya ten tetapohuijtineneque de nintacuautamatilis ihuan Dios. Ica ya nojón ma ticsecocautiyacan nochi tataman tajtacol ten techzajtzacuiliijtinemi huan ne tajtacol ten techmecanía. Huan monequi ma timofuerzajuijtiyacan ica nejmach para ticyecchuitiyasque ne tequit ten Jesús technextilico.<sup>2</sup> Huan ma tiquitilijtiyacan sayó Jesús de queniu tacuautamatinemí. Porín imaco hualeutoc totacuautamatilis huan Jesús techyecyolmajxitijti ica totacuautamatilis. Huan Jesús tajyohuico tech in cruztzin. Huan masqui hueyi tepinautía como se quicuoupampilosque, pero Yejuatzin quipohuac que amo teyi pinahualis cuac quicuoupampilojque. Ta, Yejuatzin quiyecmatoya ya que satepan cuac quitamitajyohuiltisque ya, ijcuación Yejuatzin quipía hueyi yolpaquilis huan no moyoluelitas. Huan cuac tami tajyohuij ya, ijcuación Jesús yajqui eluiyactzinco huan motalito iyecmacopaca Totajtzin Dios campa ichicaucahuelilispán.<sup>3</sup> Huan monequi xicnemilijtiyacan de queniu Jesús tajyohuico ica miac tataman tajyohuilis ten quichihuilijque ne tagayot ten amo yolcualime. Huan como nanmomacatocque cuenta ya de ne tajyohuilis, ica ya nojón monequi amo xisiohuitij huan nión no xiyolcuetahuijti tech namotacuautamatilis.<sup>4</sup> Huan namejuan cuali nanmofuerzajuijque ya huan nanquixnamictinenque ya in tajtacol. Pero ayamo nan-



mopanohuilfaj in miqulils, masqui nanquixixicojtinene ya in tajtacol. <sup>5</sup> Huan amo xiquelcahuatij de queniu Dios namechyolmajxitij porín namejuan nanpohuij ihuan Dios huan naniconehuan de Dios. Huan tech in Tajcuilolamatzin de Dios namechilfá ijcuín:

Notasojconetzin, amo xicyolmachili ne yolxocolilis  
cuac Totecotzin mitzmejmela huas.

Huan amo no semi xicyolmachili ne yolcuetahuilis cuac Yejuatzin mitztacahualtis.

<sup>6</sup> Porín Totecotzin quinmejmela utinemi nochi neques ten Yejuatzin quintasojtatinemi.

Huan Yejuatzin quinmejmela utinemi nochi neques ten Yejuatzin quinpohua iconetzitzin.

<sup>7</sup> Ica ya nojón monequi nochi namejuan xixixicojtiyacan nojón tamejmelahualis de namotacuautamatilis cuac Dios namechmejmela utinemis. Porín Yejuatzin namechpohua huan namechpixtica que naniconehuan. Huan namejuan cuali nanquimatij que amo ongac se tetat que amo quinmejmela utinemi iconehuan.

<sup>8</sup> Huan cuali ticmatij que Totajtzin Dios quinmejmela utinemij nochi iconehuan itaneltocacahuan. Pero tacán Dios amo namechmejmela utinemis namejuan tech namonemilis, ijcuacán amo melau nanmotepohualfaj ihuan Dios. Ta, nanmochihuaj amo melau naniconehuan de Dios.

<sup>9</sup> Huan no cuali ticmatij que ne achtopa cuac ticatcaj ticoneme oc, ijcuacán totatuan de nican talticpac techmejmela utinene huan tiquinmohuisca pouque. Pues no cachi oc monequi ma timotemactijtiyacan imaco Totajtzin Dios den eluiyactzinco. Huan como ijcón timotemactijtinemij ihuan Dios, ijcuacán ticpiatihue ne nemilis ten amo queman tamis. <sup>10</sup> Huan totalticpactatuan yejuan nojón techmejmela utinene ipan sequi tonalme san, ijcón queme yejuan quixejecoayaj que technamiquía. Pero Totajtzin Dios techmejmela utinemi ijcón queme Yejuatzin quiixejeco que technamiqui para ijcón ticpiatihue ne yec yolchipahualis ijcón queme Yejuatzin Yolchipahuactzin. <sup>11</sup> Huan yec melau que tech ne tonal cuac Yejuatzin techmejmela utoc, ijcuacán amo semi ticmachilfaj yolpaquilis. Ta, ticmachilfá ne yolxocolis. Pero cachi satepan, cuac cuali timomachtijque ya ne tenica techmejmela utinene, ijcuacán techualcuilfá ne chipaucanemilis huan ne yolsehuilis.

### **Nican tajtoa de cuac ticmajpehuaj ne iteicnelilis de Dios, ijcuacán ticselisque tatzacuiltis**

<sup>12</sup> Ica ya nojón namechilfá que ximopalehuijtiyacan se huan ocsé namejuan ten nanmoyolcuejcueptinemij huan nanyolcueta utinemij ica nintacuautamatilis.

<sup>13</sup> Huan namejuan monequi xicyectacamatiyacan Totajtzin Dios tech ne melahuacan para ma pajti huan ma moquetza. <sup>14</sup> Huan namechilfá que ximofuerzajuijtiyacan de amo xiquincualantijtinemican ocsequin tagayot. Ta, xiyeyectinemican inuan. Huan xicyeyolchipaucanemican. Huan como amo tichipaucanemij, ijcuacán amo huelis tiajsisque tiqitatihue campa Totecotzin yetica. <sup>15</sup> Huan ximoyecpixtiyacan ca cuali para ma amo senme de namejuan ma quimajpehuacan ne iteicnelilis ten Dios quimonequiltfá quimactilis. Huan no ximoyecpixtiyacan ca cuali para ma amo senme de namejuan ma amo motecahuilican que in tajtacol ma quiyolchichili. Porín como ijcón mochihuas, ijcuacán ne tajtacol quinejnehuilfá queme

yesquía se amo cuali naluat ten quichichilía in tatoc huan no quinpajuía neques ten quicuasque. <sup>16</sup> Huan no ximoyecpixtiyacan para ma amo xiahuilnentinemican. Huan no ximoyecpixtiyacan para ma amo xiquixmajpeutiayacan ne mohuistic tati-ochihualis de Dios, ijcón queme quichihuaco tohuejcautat Esaú. Porín yejua quina-macac ya itanahuatil ten yejua cualcui queme tayecanque oquichpil. Huan para ma mocualtía sayó se tacualis, yejua ne quinamacac nitanahuatil de quiselis ne iaxca-copaca de itajtzin. <sup>17</sup> Huan cuali nanquimatij toni mochihuaco satepan. Porín cuac Esaú quinequía quiselis ne itatiochihualis de itat, ijcuacón yejua nitat cualmajpe-huac. Huan masqui Esaú motelchoctij, pero amo huelic oc quipatas ne itatiochihualis ten nitat quitemacac ya ocseco ya.

<sup>18</sup> Huan namejuan amo nanyajque nanmotoquitoj campa ne tepetzin de Sinaí para nanquiselisquía ne achtopa ya contrato de Dios ijcón queme motoquitoj in pueblo-juani de Israel. Huan cuac yejuan ajsicque campa ne tepetzin de Sinaí, ijcuacón amo huelía motoquisque porín ne xotatoya ne tepetzin huan no oncaya tiltic mixti huan no tayohuayantitoya huan no tetzaucatajeycaya. <sup>19</sup> Huan in pueblojuani de Israel amo quinequía quicaquisque cuac tapitzque ica itrompeta de Dios porín mo-hueyiyolmoutiyaj. Huan amo no quinequía quicaquisque in tanojnotzalis tenica Dios quinnojnotztoya. Huan neques ten peuque quicaquisque itanojnotalis de Dios, yejuan nojonques quitatautijque Moisés que ma amo cachi oc quinquacuiltican ica por ne tetzaucataticuinilot. <sup>20</sup> Huan ijcón mochihuac porín in pueblojuani de Israel quimachilijque que amo huelía oc quitacamatisque ne tanahuatil de Dios tenica quinnajnahuatiaiyaj ijcuín: “Tacán se tapialtzin quitelicasquía nojón tepetzin de Sinaí, ijcuacón no monequi xictepoxonican oso xicmictican ica machete”. <sup>21</sup> Huan nojón ten quitztoyaj tech ne tepetzin de Sinaí semi hueyi temoutij hasta no in Moisés quijtoa ijcuín: “Neyua no nimoucamoutijtoc”. <sup>22</sup> Huan masqui amo nanmotoquitoj campa ne tepetzin de Sinaí, pero quema, nanmotoquitoj ya campa ne tepetzin ten quilía Sión campa ipueblojcahuan den Dios ten yoltica para nanquiselisque ne yan-cuic contrato de Dios. Huan ne Sión, yejua ne pueblo de Jerusalén ten yetoc ne eluiyactzinco. Huan namejuan nanmoajxitijque ya campa yetinemij huel miacque iángeluan de Dios ten quimohuistilijtinemij Totajtzin Dios. <sup>23</sup> Huan no namejuan nanmoajxitijque ya campa mosentilijque ya ica hueyi paquilis nochi neques ten tanextilme ya que iconehuan de Dios porín nintocayuan ijcuiliutocque ya tech se libro ten yetoc ne eluiyactzinco. Huan no nanmotoquitoj ya ihuan Totajtzin Dios ten Yejuatzin in Taixcomacacque de nochi talticpacuani. Huan nanmotoquitoj ya ihuan nochi ne yolchipauque taneltocani ten Dios quintamiyecyolchipahuac ya tech nintalnamiquilis. <sup>24</sup> Huan nanmotoquitoj ya ihuan Jesús ne ten Yejuatzin Totecotzin Totetajtohuijcau ten quitatequitiyaj ya netenilil ne tenica Dios moyectencauca de techiochihuas. Huan ijcón Yejuatzin quitatequitiyaj cuac momiquilij huan mijmi-lahuic iesyotzin para quixtahuas totajtacoluan. Huan ne iesyotzin de Cristo cualcui cachi hueyi teyolicnelilil huan que ne iesyotzin de Abel. Porín ne iesyotzin de Abel quichihualtij ma quixcomaca ne tagat ten quimictij Abel. <sup>25</sup> Ica ya nojón namechilía que ximoyecpixtiyacan que ma amo xicmajpeutiayacan Dios ten namechnojnotztoc. Huan ne pueblojuani de Israel cuac Dios quinejmachtijtoya nican talticpac, ijcuacón yejuan quimajpeuque Dios Itajtoltzin huan ijcón ixpoliuque. Huan no cachi oc tejuan tiixpolihuisque como ticmajpehuaj ne tanojnotzalis de Dios cuac technejmachtijtoc desde ne eluiyactzinco. <sup>26</sup> Huan ne huejcau ya Totajtzin Dios ica Itajtoltzin quihui-

juixoj in talticpac, cuac Yejuatzin quinnojnatzaya ipueblojcahuan campa ne tepetzin de Sinaí. Pero axcan in Tajtoltzin de Dios techilía ijcuín: “Huan ocsepa nicuijuixoti amo sayó in talticpac. Ta, hasta no in eluiyactzinco nicuijuixoti”.<sup>27</sup> Huan nijín tajtol “ocsepa”, yejua ne techmatiltía que Totajtzin Dios quiolinis huan quinajchihuas nochi tataman itachijchihualuan ten huelis ijtacahuis nican talticpac. Huan nochi ne ten amo huelis ijtacahuis, yejua ya ne amo queman moolinis huan nión no majchihuas. Ta, quisentocas yetos sen nachipa.<sup>28</sup> Huan ma tictasojcamachilijtiyacan Dios porín Yejuatzin techcalaquito campa tiyetinemisque ihuantzin sen nachipa, campa amo teyi moolinis huan ijtacahuis. Ica ya nojón monequi ma ticmohuistilijtiyacan huan ticmohuiscapoutiyacan Yejuatzin ijcón queme quimonequiltía ma ticyolpactijtiyacan.<sup>29</sup> Huan ijcón technamiqui ma ijcón ticchiutiyaican, porín Totajtzin Dios quinejnehuilía se hueyi tit ten quitajtamía nochi ten cajsí.

### Nican tajtoa de queniu monequi tichipaucanemisque para ticyolpactijtiyasque Dios

**13** Xicsentocacan ximotasojtatiyacan se huan ocsé porín nansenpoutinemij ihuan Cristo queme nochi nanicnime.<sup>2</sup> Huan cuali xiquelnamiquican que monequi namejuan xiquinselican neques namocalpanocahuan masqui amo nanquinixmatij. Porín cuac sequin tocnihuan taneltocani quiselijcaj tacalpanoani, ijcuación yejuan quinselijque iángeluan de Dios, masqui yejuan amo momacacque cuenta.<sup>3</sup> Cuali xiquelnamictiyacan que xiquinpalehuican neques ten tzactocque presos, queme yesquía no nanyetosquía nanpresos ninuan. Huan amo xiquinelcahuacan neques ten tajyohuijtocque. Ta, xiquelnamictiyacan queme yesqui namejuan no namechtajyohuiltijtocque.<sup>4</sup> Huan xicmohuiscapohuacan ne nemilis ne ten senyetinemij in namicuani. Huan xicchipaucaitacan ne nemilis de namicuani den sencochtinemij huan ma amo xiahuilnentinemican. Huan ijcón tamechilíaj porín Totajtzin Dios quintatzacuultis nochi neques ten ahuilnencanentinemij de namicuani ya, oso de ayamo namicuani ya.<sup>5</sup> Huan namejuan san amo ximotecahuilican de xictasojtatinemican cachi oc intomin. Ta, ximoyolpactijtinemican sayó ica ten nanquípíaj ya. Porín Totajtzin Dios techilía ijcuín: “Amo queman nimitzsecocahuas huan nión no nimitzsencahuas moselti”.

<sup>6</sup> Ica ya nojón tiquijtojtinemij ca yolchicahualis ijcuín:

Totecotzin Yejuatzin nechpalehuijtinemi.

Ica ya nojón amo nimoyolmoutis

tenica tensá huelis nechchihuilis in tagayot.

<sup>7</sup> Huan namejuan cuali xiquelnamictiyacan neques tocnihuan taneltocani ten namechycantinemij tech namotiopanuan. Huan amo xiquinelcahuacan de xiquinpalehuican in tanojnatzani ten namechtapohuíaj in Tajtoltzin de Dios. Huan cuali xiquelnamictiyacan den chipaucanemilis den quichiutihuitze namotzalan de ne namotanojnotzahuan. Huan namejuan no ijcón xicchipaucanemican huan xitacuautamatiyacan ihuan Cristo, ijcón queme namotanojnotzahuan tacuautamatinenque.

<sup>8</sup> Huan Totecotzin Jesucristo amo queman mopapatatinemi de queniu yesqui. Ta, Yejuatzin ica se taman san tequititihuitz desde ne tonalme. Huan no Yejuatzin axcan ica se taman san tequititine. Huan no Yejuatzin san ica se taman san tequititine mis sen nachipa.<sup>9</sup> Huan amo ximotecahuilican que ma namechtaneltoctican ca míc tataman tamachtilis ne ten amo sentajtoa ihuan in Tajtoltzin de Dios. Huan cachi

monequi ma Dios namechylchicautiu ica iteicnelilis. Huan ma amo ximochiali-  
jtiyacan que nanmoyolmajxitijtiyasque ica tataman tanahuatilme ten quinyecana in  
tacualis. Porín amo aquen huelis mopalehuis de queniu moyolmajxitis den itacuau-  
tamatilis ica por ne tanahuatilme ten quinyecana in tacualis.

<sup>10</sup> Huan axcan tejuan queme yesquía ticpixinemij se altar campa ticmohuistilíaj  
Dios ica se hueyi nemactil, Yejuatzin Cristo ten momiquilij toixpatca. Huan tech nijín  
toaltar amo quintacahuilíaj ne huejcautiopixcame ma tacuaquij huan ma quimohuis-  
tiliquij. <sup>11</sup> Huan ne huejcautiopixcame quinmictijtihualayaj sequi tapialme. Huan  
de ompa inesy de ne tapialme cuicaya in tayecanque tiopixcat campa in Cachi  
Hueyi Tamohuisyojcan para ica quixpoloti tajtacol. Huan de ompa cuiyacque ne  
nacat den tapial tamictil ne pueblojteni huan ompa quitamichichinotoj. <sup>12</sup> Huan no  
ijcón Totecotzin Jesús quipanoca ne miqulils cuac quicuoupampilojque ne campa  
pueblojteni de Jerusalén. Huan ijcón mochihuaco para que Jesús huelis quinye-  
chylchihuas itaneltocahuan ica ne iesyotzin ten mimilahuic cuac quimictijque.  
<sup>13</sup> Huan ma ticxijxicojtiyacan tajyohuilis ijcón queme Jesús tajyohuij cuac cuiyacque  
campa pueblojteni huan quiquejqueloayaj huan ompa quimictijque. Huan ma no  
ijcón tejuan ticxijxicojtiyacan nochi tataman pinahualis ijcón queme Yejuatzin quip-  
inaucatalijque. <sup>14</sup> Huan cuac ticmatij ya que nican talticpac amo teyi ongac se pueblo  
campa huelis ticalyetinemisque sen nachipa, porín ticmatij que nochi pueblojme  
tajtamisque san. Ica ya nojón ticchixtiyohue de que ticalyetotihue tech ne pueblo  
ten hualajtoc oc. <sup>15</sup> Ica ya nojón monequi ma ticmohuistilijtiyacan Dios ica ichic-  
ahualis de Jesucristo. Huan ma tictasojcamachilijtiyacan Dios. Huan ma ticueyi-  
panchiutiyacan Totajtzin Dios ica toten ijcón queme tohuejcautatuan quimohuistil-  
ijtihualaj ya Dios ica ne tataman intetayocoliluan. <sup>16</sup> Huan amo ximoelcahualtican  
de nanquichiutinemisque ten cuali, huan amo no xiquelcahuatij de amo ximopale-  
huijtiyacan se huan ocsé ica ten namoaxca. Porín nochi nijín namotapalehuilils  
mochihua queme se tetayocolil ten nanquimactilíaj Dios huan tenica nanquiyol-  
pactíaj Dios. <sup>17</sup> Huan xiquintacamatiyacan namotayecancahuan tech namotiopan-  
uan huan ximotecahuilican ma namechyecanacan, porín yejuan namechylchecan-  
tinemij huan quiyecpixinemij namotalnamiquilils. Huan yejuan cuali quimatij que  
se tonal quipíaj de quitemacatitihue cuenta ihuan Dios. Huan xiquinpalehuijtiya-  
can namotayecancahuan para que yejuan huelis tequititinemisque ca yolpaquilils  
huan amo ca ne yolcuejmololis. Porín como namejuan nanquinyolcuejmolojtine-  
mij namotayecancahuan, ijcuacón namejuan amo teyi nanmoseliltíaj ten cuali.  
<sup>18</sup> Huan xictatautilican Dios ica por tejuan. Huan cuali ticmatinemij amo teyi  
ongac tenica techteluilíaj toyolo ica tajtacol, pero cachi oc tejuan ticyolnejnectine-  
mij ma tichipaucanentinemisque. <sup>19</sup> Huan namechtatautía que xictatautilican Dios  
ica por nejua para que Dios ma nechcajcahua oc para ma ocsepa niajsiti huan ma  
niyetoti namohuan.

### **Nican tajtoa de ne tatiochihualis huan tajpalolis tenica tamis nijín amatzin**

<sup>20</sup> Huan Totajtzin Dios sayó Yejuatzin quitemaca yolsehulils. Huan Totajtzin Dios  
quipanquixtij yoltoc Totecotzin Jesucristo intzalan in ánimajme. Huan Jesucristo  
Yejuatzin in Tayecancatapixque ten quinyecpixinemi nochi itaneltocahuan. Huan  
cuac Cristo Jesús momiquilij huan mimilahuic iesyotzin, ijcuacón Yejuatzin qui-  
tatequiutij ya ne yancauc contrato tenica Dios moyectencauca de techtiochihuas.

<sup>21</sup> Huan Totajtzin Dios ma namechyolmajxitijto para huelis nanquichiutinemisque nochi ten cuali ijcón queme Yejuatzin quimonequiltía. Huan Totajtzin Dios ma quichiutiu tech tejuan nochi tenica Yejuatzin mopaquiltía ica ne chicahualis de Cristo Jesús. Huan ma ticueyipanchiutiyacan Cristo Jesús sen nachipa huan sen nachipa. Huan ma mochihua. Amén. <sup>22</sup> Notasojicnihuan, namechtatautía que xicyecaquilian ca paquilis nijín tanojnotzalis tenica namechyolmajxitijtoc porín namechontajcuilohuilía semi tepitzin san. <sup>23</sup> Huan xicmatican que totasojicniu Timoteo quisac ya den cárcel. Huan tacán Timoteo niman nechajsiquiu, ijcuacón nicsehuicas cuac niyás namechitatu. <sup>24</sup> Xiquintajpalocan nochi namotayecancahuan tech namotiopanuan huan no xiquintajpalocan nochi tocnihuan taneltocani ten yolchipauque. Huan in tocnihuan taneltocani ten nican calyetocque Italiajcopaca, nochi yejuan no namechontajpaloaj. <sup>25</sup> Huan Totajtzin Dios ma namechyolicnelijtiu nochi namejuan. Huan ijcón ma mochiutiu. Amén.

## IN TACUILOLAMATZIN DEN QUIJCUILOJ IN TATITANIL SANTIAGO PARA IN TANELTOCANI DE NOCHI SENMANAHUAC

### In tatitanil Santiago quintajcuilohuilía in taneltocani den moyautocque tech nochi senmanahuac

**1** Nejua ni Santiago, huan nitequitique de Dios huan nitequitique de Totecotzin Jesucristo. Huan nejuatzin namechtajpaloa nochi namejuan nanjudíos ten naneltocani. Huan namechtajpaloa ica nijín amatzin campa nanmoajsij namejuan ten nanmoyautocque nohuiyampa tech in talticpac.

### In tamachilis ten huitza itech Dios

<sup>2</sup>Notasojicnihuan, xicpiacan hueyi paquilis cuac namopan huetzis míac tataman tajyohuilis ten namechtanemililtis de que xicahuacan namotacuautamatilis ihuan Dios. <sup>3</sup>Huan xicmatican que cuac Dios quiejecoa namotacuautamatilis ica míac tataman tajyohuilis, ijcuacán namejuan nanmomachtijtiyohue de queniu cachi oc nanquixicojtiasque in tajyohuilis ne ten cualcui namotacuautamatilis ihuan Cristo. <sup>4</sup>Pero de yecmelau ximotecahuilican ma Dios quiyecajsicaejeco namotacuautamatilis para que ijcón nanyesque nanyecyoltanemiliani huan no para que nanyesque nanyolmajsitosque huan para que ijcón ma amo teyi tacuautamatilis namechpolo oc.

<sup>5</sup>Huan como acsame tocnihuan taneltocani quipoloaj in cuali taixejecolis, ijcuacán ma quitajtanilican Totajtzin Dios huan Yejuatzin quinmacas ne tamachilis ten quinpoloaj. Porín Yejuatzin nachipa quitetayocolijtica huan amo aquen quinixitopehua cuac yejuan motatatautilíaj ihuantzin. <sup>6</sup>Pero ma titajtanican Dios ica ne yec tacuautamatilis, huan ma amo ticquejqueltajtanican san. Porín nochi neques ten quiquejqueltajtanij san, yejuan nojonques motamachiliscueptinemij san. Ica ya nojón neques ten motamachiliscueptinemij, yejuan nojonques tamatij queme yesquía in at den mar cuac in eجات quiajocui ne at huan quitatamota seco huan seco. <sup>7</sup>Ne tagat ten amo tajtanis ca tacuautamatilis, yejua nojón ma amo quinemili que quiselis tensá queme quitajtanilis Dios. <sup>8</sup>Porín yec melau motamachiliscueptinemij ne tagat ten axcan quinequi se taman huan mosta ocsé taman. Yejua ne eliuistitinemi huan amo huelis quitoctilis se taixejecolis san ten cuali.

<sup>9</sup>Huan in taneltocque ten amo teyi quipía de ricojyot, yejua ne ma mohuelita porín tacuautamati ihuan Dios huan Dios quihueyichihuas. <sup>10</sup>Pero in taneltocque rico ma mohuelita porín Dios quitapantalía niricojyo. Porín nochi ne ricojyot panos san queme xochitzin san. Porín in xochit cueponi, huan xochiyohua, huan de ompa huaqui. <sup>11</sup>Huan cuac quisaqui in tonaltzin huan tacahuantía, ijcuacán in xihuit huaquis huan nixochiyo huetzis huan ijcón nochi tajtamis nicualnescayo. Pues no ijcón in rico huan niricojyo, nochi tantiyás san hasta tamis nochi nitequihuan.

### Dios techcahuilía ma ticmachilican tajyohuilis pero Dios amo techyoltilana ma timotajtacolmacacan

<sup>12</sup>Míac paquilis quipía ne tocnihuan taneltocque queman quixicos ya in tajyohuilis ten cualcui nitacuautamatilis ihuan Cristo. Huan cuac yejua quitamixicos ya ne tajyohuilis, ijcuacán yejua ne quiselis ne tetayocolil de Dios queme yesquía se corona.

Huan ne tetayocolil yejua in yecnemilis ten Totajtzin Dios moyectencahuac ya de quintayocolis nochi neques ten quitasojtaj Dios. <sup>13</sup> Huan cuac acsame taneltocani quimachilíaj que quinyoltilana in tajtacol, ma amo quijtocan que Totajtzin Dios quinyoltilana ma motajtacolmacacan. Namechilía ma amo ijcón ticnemilican porín Dios amo quimachilía de que moyoltilana ica in tajtacol. Huan Yejuatzin amo no acsame quinyoltilana ma motajtacolmacacan. <sup>14</sup> Pero cuac in pitzotic tanejnequilis de yejua san quiyoltilana in tocníu taneltocque huan quicajcayahua, ijcuacán yejua san iselti huetzis tech in tajtacol, porín ne pitzotic tanejnequilis hualeutoc de yejua san. <sup>15</sup> Huan tech ne pitzotic tanejnequilis mochihuas in tajtacol. Huan cuac in tajtacol cuali motamichihuac ya, ijcuacán ompa eutehua ya ne miqulilis ten amo queman tamis.

<sup>16</sup> Notasojcnihuan, amo ximocajcayahuacan namejuan san. <sup>17</sup> Nochi in tetayocolil ten cuali huan ten chipahuac, yejua ne Dios techtayocolía. Huan nochi ne tetayocolil hualeutoc de ne ajco campa yetica Totajtzin Dios ten quinchijchihuac in tanexmeden ne eluiyac. Huan Totajtzin Dios amo motamachilispapatatinemi. Huan Dios amo no mopapatatinemi de quenín tequiti ijcón queme mopapatatinemi in yecahuil cuac mohuicatinemi in tonaltzin. <sup>18</sup> Yejuatzin ijcón quimonequiltij de que techyancuicayolitij ya ica Nitajoltzin ten yec melau para ma ijcón tejuan tiyesque titayecanani de nochi ten Yejuatzin quinyancuicayolitis oc.

### In yecmelau taneltochalis

<sup>19</sup> Ica ya nojón, notasojcnihuan, sejsé de namejuan ximojsihuilican para xicaquican in Tajtoltzin de Dios. Pero xiyolicachiacan para xitajtocan huan no xiyolicachiacan para xicualanican. <sup>20</sup> Porín ne tagat ten cualantinemi, yejua ne amo hueli quichihuas ne chipahuac tachihualisme ten quipactía Dios. <sup>21</sup> Ica ya nojón nochi namejuan xicmajpeutiyacan nochi in pitzotic nemilis huan amo xicautiyacan que ma momiactili nochi tataman tachihualis den amocuali. Huan ica ne yolyem-analis ximoaxcatilican in Tajtoltzin ten Dios quitocac ya tech namoyolijtic. Porín nojón Tajtoltzin quipía chicahualis para cuali namechmaquixtis.

<sup>22</sup> Huan xictacamatinemican nochi ten namechnextilía in Tajtoltzin de Dios; huan amo sayó xicaquican. Porín como sayó nanquicaquij san in Tajtoltzin de Dios huan amo nanquitacamatinemij, ijcuacán nanmocajcayahuj san namejuan. <sup>23</sup> Huan cuac acsá quicaqui san in Tajtoltzin de Dios huan amo quitacamatinemi, ijcuacán yejua ne tamatinemi queme se tagat ten moixita tech se tescat. <sup>24</sup> Huan ne tagat quita quenín tamati, huan satepan queman yohui ya ocseco, ijcuacán niman quelcahuati de quenu moixitac. <sup>25</sup> Pero cuac in tocníu taneltocque momachitijtinemi ica in Tajtoltzin de Dios, ijcuacán monequis ma amo quelcahua ne Tajtoltzin ten quicaquic. Ta, ma quitacamatinemi de ne chipactzin tanahuatil de Dios. Porín ne chipactzin Tajtoltzin de Dios cuali techtojtontinemi den tajtacol. Huan como in tocníu taneltocque quitacamatinemi in Tajtoltzin de Dios, ijcuacán Totajtzin Dios quitiochiutinemis ne tocníu ica hueyi paquilis tech nochi nitequiu.

<sup>26</sup> Huan como senme de namejuan quipialía taneltochalis de Dios pero amo quimati quenín moyecnenepilijmatis, ijcuacán yejua nojón sayó moyolcayahua san, huan nochi ne nitaneltochalis amo teyi cualtía. <sup>27</sup> Ma se quipía de ne taneltochalis ten chipahuac huan ne taneltochalis ten amo teyi ma tzojcuilic iixpantzinco Totajtzin Dios. Huan se quipía ne chipahuac taneltochalis cuac se quinpalehuijtinemi in mic-

cacahualme huan cuac se quinpalehuijtinemi in sihuacahualme ijcón queme yejuan tajyohuíaj. Huan no namechilía que ximoyecpiacan nanyolchipauque huan ma amo ihuan ximonelocan tech in pitzotic chihualisme de nican talticpac.

### Ma amo xitechichicotasojtacan

**2** Nocnihuan, namejuan ten nantacuaumatamij ya ihuan Totecotzin Jesucristo den ne eluiyactzinco, monequi ma amo xitechichicotasojtacan. <sup>2</sup> Huan ma tiquixeje-cocan de nijín taman tamachilis ijcuín: Ma tiquijtocan que se tonal calaquís campá nanmosentilíaj se tocníu taneltocque ten cuica anillo de oro huan cuali taquentihuitz. Huan no calaquíqui ocsé tagat ten amo cualtzin taquentihuitz ten semi cojtoltic ica ne itilmatzin. <sup>3</sup> Huan como namejuan sayó nanquípialíaj mohuisyot ne naquen cachi cualtzin taquentoc, ijcuacán amo xicnemilican que semi cualtzin ya ten nanquichihuaj. Porín amo cuali nanquichihuaj cuac namejuan cachi nanquitasojtaj in rico huan amo nanquitasojtaj se pobre. Namejuan nanquílíaj ne rico ijcuín: “Ximosehuitzino, tejuatzin, nican campá cachi tacualtzincan”. Huan de ompa nanquílíaj in tagat ten semi pobre ten amo quipía cuali itaquen ijcuín: “Tejua napón xijcato”, oso, “tejua, ximotali nican talpan san”. ¿Xe nanmolíaj que semi cualtía ya como ijcón nanquichihuaj? Pues amo. <sup>4</sup> Namejuan nantechichicotasojtaj namejuan san. Ijcuacán nanmochihuaj ya de que no nantaxejeocoani ya huan nanquípíaj nanmoyolijtc ne amocuali taixejecolis.

<sup>5</sup> Notasojicnihuan, xicaquican nijín: Totajtzin Dios quiniijtac ya que in taneltocani pobres den nican talticpac ma no quiapiacan semi hueyi intacuaumatatilis. Huan Dios no quinaxcatilij in taneltocani pobres ne yec nemilis nachipa ten Yejuatzin moyectencahuac ya de quinmactilis nochi neques ten quitasojtaj. <sup>6</sup> Huan como Dios ijcón quichihuac ya, ¿queyé namejuan nanquinpinautíaj ne taneltocani pobres? Huan, ¿cox amo hueyi melau que ne ricojme namechcajyahuaj san huan namechtajyohuilitíaj san? Pues quema. Huan, ¿cox amo no hueyi melau que ne ricojme namechtitilatzej inixpan in hueyichihuani para namechteluilisque? Pues quema. <sup>7</sup> Huan, ¿cox amo no melau que ne ricojme yejuan cuijuicaltíaj ne chipactzin to-caytzin de Cristo? Pues, quema. Huan ica ne itocaytzin de Cristo in talticpacuani namechnotzej queme nanitaneltocacahuan de Cristo.

<sup>8</sup> Huan como melau nanquitacamatinemij ya in melahuac tanahuatil de Dios, ijcuacán xicchihuacan ijcón queme ijcuiliutoc tech in Tajcuilolamatzin ijcuín: “Xic-tasojta mocniú ijcón queme tejua timotasojta”. Huan como ijcón nanquichitinemij, ijcuacán cuali yetoc. <sup>9</sup> Pero como nanquinchichicotasojtaj acsame, ijcuacán sayó nanmotajtacolmacaj san. Huan in tanahuatil de Dios yejua ne namechtenextía que namejuan nantajtacolejque. <sup>10</sup> Huan como acsame quiyolnemilíaj que quitacamatinemij ya nochi in tanahuatil de Dios, pero como amo quitacamatij senme san de ne tanahuatilme, ijcuacán yejuan nojonques motajtacolmacacque ya ica nochi in tanahuatilme de Dios. <sup>11</sup> Porín Dios quijtoa ijcuín: “Amo xitasuapapatacan, huan amo no xitagapapatacan san”. Huan Dios no quijtoa ijcuín: “Amo xitemictican”. Huan como amo nanahuilnemij oc pero nantemictíaj, ijcuacán nanmotajtacolmacaj oc ica in tanahuatil de Dios. <sup>12</sup> Huan namejuan nannocnihuan, monequi ma xitajtocan huan ximohuyiacan queme cuali nantaneltocani porín Dios namechixco-macatiyás ica ne chipactzin tanahuatil. Huan ne tanahuatil cualcui huelilis para techtojoma den totajtacol. <sup>13</sup> Huan neques ten amo teicnelíaj, yejuan nojonques



Dios quinixcomacas pero amo ica teicnelilis oc. Huan neques ten teyolicnelíaj, yejuan nojonques ixnesitihue que yejuan yolchipauque ya itech ne tonal queman Dios quinixcomacas huan quintatzacuilitis in talticpacuani.

### Nican tajtoa de ne tacuautamatilis huan in tachihualisme

<sup>14</sup> Huan ma namechtajtolti ijcuín: Nocnihuan, ¿quenín huelis mopalehuis in taneltocque cuac sayó tacuautamati ihuan Dios tech niyolijtic huan amo teyi quichihuas ten cuali? Pues amo huelis. ¿Mangán huelis nitacuautamatilis quimaquixtis como amo yec tatacamati? Pues amo. <sup>15</sup> Ta, namejuan xiquixejecocan nijín tamachilis de se tocníu taneltocacque ten quipoloa itaquen oso in tacualis. <sup>16</sup> Huan tacán senme de namejuan nanquilsique ne pobre ijcuín: “Xiyó ca cuali, tocníu, huan ximototoniti huan xiixuitíu”. ¿Para toni cualtía nojón tajtolme tenica nanquinojnotzque ne pobre, como amo nanquimactilíaj ne pobre tonica motaquentis? <sup>17</sup> Pues ximatican que no ijcón mochihua ica totacuautamatilis. Como amo monextía in totacuautamatilis ica ne tapalehuilis ten ticchihua, ijcuación totacuautamatilis mocahua majyá se tensá ten amo teyi ipatiu.

<sup>18</sup> Pero cuali huelis se tocníu nechtajtolcucupilis ijcuín: “Tejua, ticpía in tacuautamatilis, pero nejua nicchiutinemi ne tapalehuilis ten Dios quimonequiltía. Cualí yetoc. Pero tejua ten sayó ticpía tacuautamatilis, ¿quenín tihuelis xinechnextilis que ticpía moyolijtic ne hueyi tacuautamatilis ihuan Cristo, como amo teyi ticchiutinemi ten cuali? Pues amo tihuelis. Pero nejua cuali nimitznnextilis notacuautamatilis ica por in cuali chihualis ten nicchiutinemi”. <sup>19</sup> ¿Xe tejua ticpía se tacuautamatilis ten majsitoc ya tenica huelis ticneltocas de que ongac sayó se Dios? Pues cuali ticchihua. Pero no ijcón in amocuali ejecame quineltocaj de que ongac sayó se Dios. Ica ya nojón yejuan moucahuihuiyocaj porín tatzacuilitis inpan huetziquiu.

<sup>20</sup> ¡Huan tejua tagat, ten amo tiyolmajsitoc, semi titeicneltij! Xicajsicamati que cuac se tacuautamati ihuan Dios huan amo quichihua ten cuali, ijcuación ne itacuautamatilis nenca san, majyá tensá ten amo teyi ipatiu. <sup>21</sup> Huan cuali nanquimatij que Totajtzin Dios quipohuac yolchipahuac Abraham, ne tohuejcautat huan amo quitajta-colcuiltij oc porín, yejua quitemactij hasta ca miqullis ne niconetzin Isaac. <sup>22</sup> Huan ica por itatacamatilis ten quichihuac Abraham, namejuan nanquitztocque que ne itacuautamatilis Abraham monextijtinemic ica ne tatacamatilis ten quichihuac. Pues no ijcón ne itacuautamatilis Abraham momajxitij ica ne cuali tatacamatilis ten yejua quichihuaco. <sup>23</sup> Huan melau ijcón mochihuac queme ijcuiliutoc tech in Tajcuilolamatzin de Dios ijcuín: “Abraham tacuautamatic ihuan Dios; ica ya nojón Yejuatzin quipohuac Abraham yolchipahuac ica por ne itacuautamatilis huan amo quitajta-colcuiltij oc”. Huan no Yejuatzin quitenehuac que in Abraham catca nitasojtzin de Dios.

<sup>24</sup> Huan no xiquitacan san namejuan: Dios cuali quinpohuac yolchipauque in tocnihuan taneltocani huan amo quintajta-colcuiltij oc porín ne tatacamatilis ten yejuan quichiutinemij. Huan Dios amo quinyolchipaucapohuac taneltocani sayó porín yejuan tacuautamatij huan amo teyi ica tatacamatinemij. <sup>25</sup> Huan no ijcón mochihuac ihuan in Rahab, yejua se sihuat ahuilnenque. Huan Rahab quinselij para quinpalehuij nochi in tanojnotzani de Israel. Huan yejua quintitanic tech ocsé ojti campa maquisque. Huan ijcón Dios quipohuac in Rahab yolchipahuac huan amo quitajta-colcuiltij oc, porín yejua tacuautamatic ihuan Dios huan no quitacamatic.

<sup>26</sup> Ica ya nojón namechilía que ijcón queme se inacayo miquet san cuac amo quipía oc niijiyo, no ijcón se itacuautamatilis amo teyi ipatiu como amo quinextijtnemi itacuautamatilis ica ne cuali tatacamatilis.

### Nican tajtoa de tonenepil

**3** Nocnihuan, ma amo miacque de namejuan ximoijsihuilican de nanmochihuasque nantamachtiani den Tajtoltzin de Dios. Porín xicmatican que tejuan ten titamachtíaj, tejuan ticselesque cachi chichahuac in taixcomacalis nepa iixpantzinco Dios. <sup>2</sup> Porín tinochin timotajtacolmacaj ica míac tataman. Huan como acsá amo motajtacolmaca ica itajtolis, ijcuacán ne tagat yec yolmajsitoc ya, huan ne tagat no cuali quimati quenín para motzacuilis ica nochi ne tanejnequilis den ninacayo.

<sup>3</sup> Xiquitacan, tejuan tiquintentalilíaj in caballojme ne tatlanaloni para ma ijcón yejuan techtacamatican, huan ijcón cuali ica ticuicaj campá tejuan ticnequisque ne tapialme. <sup>4</sup> Huan no ijcón xiquitacan ne hueyi barco, masqui huejueyi ne barcos huan hueli nejnemij aixco ica chichahuac ejecat. Pero ne tayecanani ten quihuicacotocque in barco, yejuan nojonques cuali hueli quicuecujepaj campá yejuan quinequij ica se tzictzin cuoutzin ten quilía timón.

<sup>5</sup> Huan no ijcón quichihua in tonenepil ten ticpíaj. Masqui tonenepil tziquitzin san nacat tech nochi tonacayo, pero ica tonenepil timohueyichihua ica tensá huejueyi tataman tacajcayacatajtol. Xiquitacan, tocnihuan, ica se tzictzin tit, cuali huelis se quixotaltía se hueyi cuouyo. <sup>6</sup> Huan in tonenepil queme yesquía se tit ten taxotaltía. Huan no ijcón in tonenepil queme yesquía se cocolis de tajtacol ten tequititnemi tech tonacayo. Huan no ijcón tonenepil quimajmahua ica tajtacol nochi tonacayo. Huan no ijcón in tonenepil cualxotaltiti de ne mictan. Ica ya nojón tonejnepil quixotaltía ica pitzotic chihualisme nochi ten Dios quichihuac nican talticpac.

<sup>7</sup> Huan ijcón in tagat cuali hueli quinmaxojcuiltía den míac tataman oculinme, queme in tecuanime huan in tototzitzin, huan in cohuame, huan in aocuilinme. Huan nochi nijinques in tagat cuali hueli quinmaxojcuiltía. <sup>8</sup> Pero amo ongac nión se tagat ten cuali hueli quinmaxojcuiltía ninenepil. Porín tonenepil semi pitzotic huan amo motemaca de que ma quitzacuilican. Nijín tonenepil temitoc ya de míac tataman pajuilis tenica temictía.

<sup>9</sup> Huan ica ne mismo tonenepil no ica ticueyichihua 7 Totajtzin Dios huan ica yejua no tiquintejtelhichihua in taca. Huan Dios quinchijchihua in taca que ma yejuan tamati ijcón queme Yejuatzin. <sup>10</sup> Huan tech iten quisaj ne nemohuisyot huan no ne tatelechihualis. Nocnihuan, amo ijcón technamiqui ma titajtocan oc. <sup>11</sup> Huan campá mextoc at, ¿mangán no ompa quistoc in chipahuac at huan in chichic at? Pues amo huelis. <sup>12</sup> Nocnihuan, ¿mangán no in higoscuohuit no cuali quitemaca in nochme? oso, ¿mangán no in uvascuohuit no cuali quitemaca higos? Pues amo huelis. Huan no ijcón ne campá mextoc in at, amo no hueli ma quistos seco san in istachichicat huan in yec at.

### Nican tajtoa de ne yecmelau tamachilis

<sup>13</sup> ¿Catiyejua de namejuan yesqui cuatamatoc huan no yolmajsitoc? Yejua ne ten cuatamatoc huan yolmajsitoc, yejua ne monequi ma quinexti ne icalitamachilis ica ichipaucanemilis. Huan no monequi ma quinexti ne yolyemanalis ten cualcui in cuali taixejecolis. <sup>14</sup> Pero como namejuan no nanquipíaj in nejxicolot tenica

namechylpexontía, ijcuación nanquimohuispoloaj in Tajtoltzin de Dios. Huan como nanquichiutinemij sayó ten cuali para ica nanmotatanilisque san, ijcuación sayó nanmohueyichihuaaj san ica míac tataman tamachilisme. Huan ijcón sayó nanxolopijitinemij huan ijcón nanquitaatfaj in cuali Tajtoltzin de Dios.<sup>15</sup> Huan ijcón ne taman taixejecolis tenica se mohueyinctinemis, yejua ne amo hualeutoc de Dios. Ta, yejua ne se taixejecolis de pohui nican talticpac san. Yejua ne taixejecolis hualehua imaco den talticpacuani san, huan yejua ne se taixejecolis den amocuali Satanás.

<sup>16</sup> Huan ijcón campa ongac ne nejxicolot no ompa ongac ne mohueyinecayot, huan no ompa taphualtjtinemij huan quichiutinemij ca míac tataman pitzotic chihualisme.<sup>17</sup> Pero neques ten quipiáj in tamachilis ten hualeutoc de Dios, yejuan nojonques achtu teyecnajnotzaj porín yejuan yolcualime ya. Huan yejuan yolyemanque ya huan quichihuaaj ten cuali. Huan yejuan tajtoaj sayó ica ten melau huan amo teca-jcayahuaj.<sup>18</sup> Huan nochi neques ten tequititinemij para ma ongac ne neyolsehuilis ihuan Dios, yejuan nojonques yoltinemij tech ne yolsehuilis ihuan Totajtzin Dios. Huan no quichiutinemij ma in talticpacuani ma quipiacan se yolchihualis.

### Ma amo tictasojtacan in talticpacnemilis

**4** Huan, ¿can hualehua in tanemililis ten namechchihualtía que nanmotehuáfaj huan nanmopohualtjtinemij? Ne tehuilis hualeutoc tech namotanejnequilis ten amo cuali ne ten namechcujmolojtoc itech namoyolijtic.<sup>2</sup> Huan namejuan tensá nanquixelehuáfaj, pero como amo huel nanquipiasque, ijcón nantemictfaj. Huan namejuan majyá nanxotatocque tech namoyolijtic ica ne nejxicolot. Pero como amo hueli nancajsij ten nanquitemoaj, ijcuación nanpehuaj ya nanmotajtoltehuáfaj namejuan san hasta nanmotehuijtinemij se huan ocsé. Huan ijcón namejuan amo quemana nanquipiasque ten nanquinctocque porín amo nanquiyectajtanilfaj Dios.<sup>3</sup> Huan cuac namejuan nanquitajtanilfaj Dios tensá, ijcuación amo teyi huelis nanquiselisque porín sayó nanquitajtanilfaj ica tacajcayahualis. Huan amo nanquiselisque ne ten nanquitajtanilisque Dios porín sayó nanquinequij tensá para nanquitajtamisque san tech in ahuilnemilis.

<sup>4</sup> Xicaquican, namejuan ten amo nantacuatamatcataca. Nicnequi cuali xicmatican que neques ten quitasojtaj in tajtacolnemilis den nican talticpac, pues yejuan nojonques motacualantalilfaj ihuan Dios. Ica ya nojón nochi neques ten quinequisque quitasojtasque in tajtacolnemilis den nican talticpac, yejuan nojonques san ninselti san motacualantalilfaj ihuan Dios.<sup>5</sup> Huan xicmatican, namejuan, que in Tajcuilolamatzin de Dios amo nenca san tajtoa ijcuín: “In Yecticatzin Espíritu ten Dios qitalij tech toyolijtic, Yejuatzin ne quiyolnejnequi ica ne hueyi ichicaucayo que ma tictasojtacan Totajtzin Dios”.<sup>6</sup> Huan Yejuatzin cachi techpalehuía ica ne hueyi iteicnelilis. Ica ya nojón quijtoa in Tajcuilolamatzin ijcuín: “Dios quinixtza-cuilis nochi neques ten mohuejueyichihuasnequij. Huan Dios quinipalehuía nochi neques ten yolyemancanemij”.

<sup>7</sup> Ica ya nojón ximotemactican ihuan Dios. Huan no xixixtopehuacan in amocuali Satanás huan ijcón yejua namechtapatahuilis.<sup>8</sup> Ximotoquican ihuan Dios huan Yejuatzin no motoquis namohuan. Huan ijcón queme nochi namejuan nantajtacolejque, no ijcón monequi xicchipahuacan nanmomahuan de namotajtacol. Huan no ximoyolchijchihahuacan namejuan. Porín amo huelis nanquisenchihuasque nijín

omen tamachilis de que nanquitasojtasque Dios huan no nanquitasojtatinemis que in tajtacolnemilis de nican talticpac. <sup>9</sup>Ximoyolcococan huan xichocacan huan ximoyoltequipachocan porín nantajtacolejque. Huan namohuetzquis ma mocuepa choquilis; huan namopaquilis ma mocuepa ne tequipacholis. <sup>10</sup>Ximoyolyemani-can huan ximoixpilocan iixpantzinco Totecotzin huan Yejuatzin namechueyichihuas senteixteno.

### Ma amo tiquinixcomacacan in tocnihuan taneltocani

<sup>11</sup>Nocnihuan, amo ximoijitojtinemican se huan ocsé porín nochi neques ten qui-jitojtinemij ninicniu huan no quinxcomacatinemij ninicniu, yejuan nojonques qui-jitoaj huan quixcomacaj in tanahuatil de Dios. Huan como tejuan tiquixcomacaj in tanahuatil de Dios, ijcuación tejuan timochihuaj ya titaixejecoani huan ijcón amo tic-tacamatij oc in tanahuatil de Dios. <sup>12</sup>Porín sayó setzin san ongac Dios ten techtemac-tilía in Tajtoltzin de Dios huan no Yejuatzin in Taixejejojque. Huan ne Taixejejojque Yejuatzin ne in Totajtzin Dios ten cuali temaquixtía huan no quipía huelilis para teix-polos. Pero tejuja, ¿aconi tejuja para ma no tiquixcomacas ocsé tocnü taneltocacque?

### Amo ximohueyichihuacan ica ten nanquichihuasque tech namoyalis

<sup>13</sup>Huan xicaquican namejuan ten nanquijtoa ijcuín: “Que axcan oso mosta tejuan tityasque nepa xolalpan huan ompa tiyetosque nochi se xihuit, huan ompa titana-macasque huan titacohuasque para ijcón timotatanilisque”. <sup>14</sup>Pero namejuan amo nanquimatij toni mochihuas mosta. ¿Huan toni ipatiu namonemilis? Pues namone-milis yejuja se sayó queme yesquía se mixuac san ten monextía se tepitzin san huan ocsepa niman polihui. <sup>15</sup>Pero namejuan monequi nanquijtosque ijcuín: “Como in Totecotzin quimonequiltía, ijcuación tinemis que oc huan ticchihuasque oc ni-jín chihualis oso yejuja ne”. <sup>16</sup>Pero namejuan elihuis san nantajtoaj huan nan-mohueyinectinemij. Huan nochi ne mohueyinequilis, yejuja nojón hualehua den amocuali Satanás. <sup>17</sup>Huan tejuja como ticmati queniu ticchihuas tensá ten cuali huan como amo ticchihua, ijcuación tejuja timotajtacolmaca ojcachi oc.

### Nican tajtoa de queniu Dios quinnejmachtilía in ricojme

**5** ¡Axcan xicaquican, namejuan den nanricojme! Xichocacan huan ximoucatzajtz-ican porín tajyohuilis de Dios namopan ejcotoc ya. <sup>2</sup>Huan namejuan namori-cojyo ten nanquipíaj, yejuja ne palantoc ya; huan namotaquenuan oculmimalotoc ya. <sup>3</sup>Huan namoóro huan namoplata istacapalantoc ya. Huan ijcón in poxcahuilis de namoricoyjo, yejuja ne namechtenextis que nantajtacolejque iixtenojtzinco Dios. Huan ne poxcahuilis den namotomin, yejuja ne quicuacujtiyás namonacayo queme yesquía tit. Huan semi míac tomin nanquinechicojque ya tenica nanmolíaj que nan-mopalehuijtinemis que tech nojón tonalme queman tantiyás ya namotalticpacnemilis. Pero namotech huetziqiu ne ixcomacalis de Dios.

<sup>4</sup>Porín namejuan nanricojme nanquincajcayauque namotequiticahuan. Huan amo nanquinmactilíaj nintaxtahuil in tequitini ten namechtapixquilijque ya. Huan ne taxtahuil ten amo nanquintemactilijque, yejuja ne namechtepotztoquilisque huan namechixcomacasque ica. Huan ijcón in Tayecanque den in ángeles quicactoc ne neteluililis den namotequiticahuan porín nanquincajcayauque ya. <sup>5</sup>Huan nican talticpac namejuan nanricojme nanquichiutinemij nochi ten nanquinequij huan

no nanquichiutinemij sayó queme nancuelitaj. Huan no nanmotomauque queme yesquía tapialme, huan axcan ejcojtoc ya tonal de tamictilis. <sup>6</sup> Huan namejuan nanquintatzacuiltijque huan nanquinmictijque ne taneltocani ten yolchipauque huan Yejuatzin amo namechtzajtzacuilía.

### **Taxicolis huan ne tatatautilis**

<sup>7</sup> Ica ya nojón, nocnihuan, namechilía xitaxicocan ica ne míac tataman tajyohuilis huan xiyclicachiacan ne tonal quemán mohualuicas in Totecotzin Jesucristo. In taca den tayuntajufaj, yejuan no quipíaj paciencia para quiyolicachíaj in tonalme hasta quemán ejcos in quiohuit ten achtopa hualas huan no quiyolicachíaj ma ejco in quiohuit ten satepan hualas. Huan ijción yejuan cuali quiselisque ne tasojaquilot. <sup>8</sup> No ijción namejuan no xicpiacan hueyi paciencia ica in Tajtoltzin de Dios, huan xiyclicachiyacan. Huan amo ximoyolquequepacan de namotacuautamatilis porín Totajtzin amo huejcahuas oc huan mohualuicas nican talticpac. <sup>9</sup> Nocnihuan, amo ximoteteluiljtinemican se huan ocsé para ma amo Dios namechtatzacuulti. Xiquitacan san que to Dios Yejuatzin in Taixejecocque huan Yejuatzin yetica ya calteno ya namechchixtoc.

<sup>10</sup> Nocnihuan, xicchiuacan ijción queme quichiuque ne huejcautanojnotzani. Yejuan tajyohuiayaj huan taxicoaya ica in tajyohuilis porín yejuan tanojnotzque itencopa in Totecotzin. <sup>11</sup> Xiquitacan san porín tejuan tiquinpohuaj queme tatiochihualme de Dios neques ten taxicoaj ica in tajyohuilis. ¿Xe namejuan amo quemán nancquinij quenín in Job taxicoj huan amo quemán tasematic? Huan ijción nanquitacque ya de quenín quimonequiltij Dios para quipalehuij Job porín Yejuatzin semi teyolicnelía huan teyoltasoja.

<sup>12</sup> Pero ojcachi oc namechilía namejuan, notasojicnihuan, ma amo xitajtocan ijcuín: “Quitztica Dios”, huan amo no xiquijtocan: “Quitztoc ica ocsé taman oc”. Ta, cuac namejuan nanquinequij nanquijtosque: “Quema”, sayó xiquijtocan: “Quema”. Huan cuac nanquinequij nanquijtosque: “Amo”, sayó xiquijtocan: “Amo”.

### **Ijción xicchiuacan para ma amo Dios namechixcomaca**

<sup>13</sup> ¿Xe acsame tocníu tajyohuijtoc? Pues, como acsá tajyohuijtoc, ijcuacán sayó xicchiuacan ne tatatautilis ihuan Dios. Huan, ¿xe no acsá de namejuan yolpactoc? Pues como acsá yolpactoc, ijcuacán ma quimohuistiliti Dios ica himnos. <sup>14</sup> Huan, ¿xe no acsá de namejuan mococoa? Pues como acsá mococoa, ijcuacán ma quinnotzacan in huehuentzitzin den taneltocani huan ma yejuan quitatatautilican Dios, huan ma quiojxilican in cocoxque in aceite ica in chicahualis ten itocaytzin den Totecotzin Jesucristo. <sup>15</sup> Huan ximatican que cuac acsá quitatatautilía Dios ica ne yec tacuautamatilis, ijcuacán ne cocoxque nenquentis huan quiajocuis in Totecotzin. Huan tacán ne cocoxque motajtacolmacac tech niyalis, ijcuacán Yejuatzin quitapopoluis. <sup>16</sup> Ica ya nojón, ximotapohuican de namotajtacoluan se huan ocsé ne taneltocani huan ximotatautilican se huan ocsé para ijción nanpajtsisque. Se tagat ten yolcuali, yejua ne cuali huéli quichihuas míac ica por ne nitatatautilis ihuan Dios. <sup>17</sup> In Elías se huejcautanahuatijque de Dios huan no catca se tagat ten quipiaya nemilis queme tejuan. Huan yejua ne Elías semi motatatautiliaya ihuan Dios para ma amo quiohuisquía; huan melau ijción mochihuac. Amo quiohuic nican talticpac eyi xihuit huan chicuasen metzti. <sup>18</sup> Huan ijción ocsepa Elías motatatautilij ihuan Dios.

Huan ijcón Totajtzin Dios cualtitanic in quiohuit huan ocsepa motachihuac nican talticpac.

<sup>19</sup>Nocnihuan, tacán acsame de namoicnihuan taneltocani mochicocahua tech in Tajtoltzin de Dios, monequi acsá de namejuan xiquinili ne tocnihuan de que ma mocuepacan oc, ma quicahuacan nintajtacoluan. <sup>20</sup>Huan xicmatican que ne naquen quinalcuepas in tajtaclejque itech ne nintajtacoljpan, yejua ne quinquixtía in tajtaclejque den miqulils, huan ijcón Dios quintapojpoluis nochi den nintajtacoluan.

## IN ACHTO TAJCUILOLAMATZIN TEN QUIJCUILOJ IN TATITANIL SAN PEDRO PARA IN TANELTOCANI DE NOCHI SENMANAHUAC

### In tatitanil Pedro quintajcuilohuilía in taneltocani ten moyautocque nohuiyampa

**1** Nejua ni Pedro, nitatitanil de Jesucristo. Huan niquintajcuilohuilía nochi in tocnihuan taneltocani judíos ne ten huejca nentinemij de ninpueblojuan, nojonques ten moyautocque huan calyetocque tech in talme de Ponto huan de talme de Galacia huan de Capadocia huan de Asia huan de Bitinia. <sup>2</sup>Huan Totajtzin Dios ipa quimatic ya de toni mochihuati achtopa que mochihuasquía. Huan ijcón ipa Dios quiniitac ya nijín taneltocani ma poutinemican ihuantzin. Huan in Yecticatzin Espíritu quinyolchipautinemi ica iesyotzin de Cristo nijín taneltocani para ma huelican quitacamatiyacan Jesucristo. Huan ma momiactilijtiu namoyolijtic ne teicnelilis huan ne yolsehuilis ten hualeutoc de Dios.

### Totacautamatilis ma yec majsito

<sup>3</sup>Ma ticmohuistilican Totajtzin Dios de ne Itajtzin den Totecotzin Jesucristo. Huan Totajtzin Dios ica ne ihueyiteicnelilis techyancuicayolitij ya para ma ticpixtinemican se tacuautamatilis ten yec majsitoc, que se tonal tiyetotihue ihuan Dios. Huan tejuan ticpixtinemij ne hueyi tacuautamatilis porín tiquitacque ya que melau Totajtzin Dios quipanquixtij yoltoc in Jesucristo intzalan in ánimajme. <sup>4</sup>Ica ya nojón tejuan ticpiatihue se hueyi tetayocolil de herencia nepa eluiyactzinco ten amo queman palanis huan amo queman tzojcuiltiyás huan amo queman ijta cahuis. Huan nepa eluiyactzinco Totajtzin Dios techehuilijtoc ya ne tetayocolil de herencia. <sup>5</sup>Huan ica ihueyichicahualis Totajtzin Dios techyecpixtinemi porín tejuan titacuautamatinemij ihuan Cristo. Huan ijcón ticajscaselitihue ya ne nemaquixtilis ten Totajtzin Dios techchijchiuilij ya que ma ticselican tech ne tacuitapan tonalme cuac mohualuicas Cristo.

<sup>6</sup>Huan ica por ne namotacuautamatilis namejuan nanquihueyipixtinemij paquilis, masqui quémansan nanmoyolcojcotinemij porín Dios quimonequiltía que namejuan nantajyohuijtinemisque ica mfac tataman tajyohuilis ica por namotacuautamatilis ihuan Cristo. <sup>7</sup>Pero ximatican, nocnihuan, que namotacuautamatilis queme yesquía se oro. Huan ijcón queme in oro quichichinoaj para ma mochiphua, no ijcón namejuan nantajyohuijtiyasque ica tataman tajyohuilis para ma Dios quichipautiu namotacuautamatilis. Huan namotacuautamatilis semi cachi quípa ipatiu, huan in oro ten ixpolihuis san amo teyi ipatiu. Huan axcan titajyohuijtinemij para ma momajxitijtiyasque totacuautamatilis. Ica ya nojón cuac mohualuicas Cristo para monextitzinoquiu, ijcuacón tejuan cachi huelis ya ticmohuistilisque huan ticueyipanchihuasque huan ticueyimatistique Totecotzin Cristo.

<sup>8</sup>Huan namejuan nanquitasojtatinemij Jesucristo masqui ayamo queman nanquitacque. Huan namejuan masqui axcan amo nanquitziyohue Cristo pero nantacuautamatij ihuan Yejuatzin. Huan ijcón nanmoyolpactijtiyohue ica ne hueyi yolpaquilis ten cualcuitoc Dios icualtziyo. Huan ne yolpaquilis amo queman huelis se quitamimejmelahuilis ica itamachilis desde can hualeutoc. <sup>9</sup>Huan ica

por namotacuautamatis namejuan nancajsicaselityohue ne nemaquixtilis de namotalnamiquilis.

<sup>10</sup> Huan ne huejcautanahuatiani de Dios tanojnotztinenque itencopa Totajtzin Dios de ne nemaquixtilis ten Dios namechmactilijtiyás ica por iteicnelilis san. Huan ne tanahuatiani quiyecleeroayaj nintajcuilolamahuan ica míac nejmach huan ompa quitemoliayaj ne nemaquixtilis. <sup>11</sup> Huan ne tanahuatiani quiyecajscatatemoliayaj nintajcuilolamahuan de aconi yesqui in Cristo Temaquixtijque huan queman mohualuicas. Huan in Yecticatzin Espíritu de Cristo quinqualmactilijtoya huan quinnejmactiaya in tanahuatiani achtopa ya que mochihuasquía de que Cristo monequía de tajyohuis. Huan no Yejuatzin quinnextiliaya de queniu quihueyipanchiutiyasque in Cristo. <sup>12</sup> Huan in Yecticatzin Espíritu quinnextiliaya ne tanahuatiani que amo yejuan ninixpan mochihuati in nemilis de Cristo Temaquixtijque. Ta, nijín mochihuaco namejuan namoixpan. Ica ya nojón ne tanahuatiani tanojnotztinenque para namechmejmelahuilisque ten tejuan tamechnojnotztocque axcan. Huan axcan tamechmactijtinemij den ne Tajtoltzin de Dios ten cualcuí ne nemaquixtilis ica in chichahualis den Yecticatzin Espíritu ten Totajtzin Dios cualtitanic den eluiyactzinco. Huan nijín tanexutilisme de queniu Cristo tajyohuij, hasta no ángeles de Dios quinequij cajsicamatisque.

### **Notajtzin Dios technotzac para ma tichipaucanemican**

<sup>13</sup> Ica ya nojón namechilfa cuali xicnemilican toni nanquichihuatij huan xicuatamatcanemican. Huan xitacuautamatican ica nochi namotanejnequilis que Dios ica iteicnelilis namechajsicaaxcatilis ne nemaquixtilis tech ne tonal cuac mohualuicas Jesucristo. <sup>14</sup> Ica ya nojón xichipaucanemican ijcón queme coneme ten quintacamatinemij nintatuan. Huan amo xinentinemican ica ne tanejnequilis den tajtacol ten ne achtopa namejuan nancualcuitoyaj cuac ayamo nanquixmatíaj Totajtzin Dios. <sup>15</sup> Ta, nicnequi que namejuan xinentinemican ica ne yolchipahualis tech nochi namonemilipan. Huan ijcón xichipaucanemican porín Totajtzin Dios ten namechnotzac ya, Yejuatzin ne Yolchipahuactzin. <sup>16</sup> Huan in Totajtzin Dios techiluitoc tech Itajcuilolamatzin ijcuín: “Xiyolchipauque namejuan porín Nejuatzin no Niyolchipahuactzin”.

<sup>17</sup> Huan namejuan nanquitenehuaj Dios queme namo Tajtzin. Huan xicmatican que Totajtzin Dios quinixcomacas cada se tagat ijcón queme yejua tachiutinemij. Huan Dios amo quinixchichicotasojta in talticpacuani. Ica ya nojón namejuan monequi xicmoucatoclijtiyacan Dios tech nijín tonalme de namonemilis, ya que namejuan nanyajtocque para eluiyactzinco. <sup>18</sup> Huan nanquimatij ya que Totajtzin Dios namechquixtij ya tech ne namonemilipan ten nencajtitihualayaj san ten namechmactijtihualayaj namohuejcautatuan. Huan no cuali nanquimatij ya que Dios namechcohuac huan namechmaquixtij amo ica tensá ten ijtachahuis san, queme ne oro huan plata. <sup>19</sup> Ta, Dios namechcohuac ica ipatiu ne itasojmohuiscaesyotzin de Cristo. Huan ne tohuejcautatuan quimictiliayaj Dios ne ichcame ten yec chipahuac huan ten amo tzojcuilic para ica quixtahuayaj nintajtacoluan. Huan no ijcón Cristo Temaquixtijque, Yejuatzin yec Yolchipahuac, huan momiquilij para quixtahuas to-tajtacoluan. <sup>20</sup> Huan Dios ipa quijitac ya Cristo achtopa que tzinehuas in talticpac que Yejuatzin momiquiliquiu nican talticpac. Ica ya nojón Cristo hualajca ya monextico nican talticpac tech nijín tacuitapan tonalme para namechmaquixtis. <sup>21</sup> Huan



ica ichicahualis de Cristo namejuan nantacuautamati ihuan Dios. Huan nanquimatij ya que Dios quipanquixtij yoltoc Cristo intzalan in ánimajme huan Dios no quihueyi-pantalij Cristo ne iyecmacopaca ne eluiyactzinco. Ica ya nojón nancajsicamatij ya huan nantacuautamati ya que Dios namechmaquixtis.

<sup>22</sup> Huan axcan namejuan nanmoyolchিপauque ya ica por in chicahualis den Yecticatzin Espíritu, porín nanquitacamatinemij in Tajtoltzin de Dios ten cualcui ne nemaquixtilis. Ica ya nojón namejuan nanquintasojtatinemij in tocnihuan tanelto-cani huan amo ica tacajcayahualis san. Huan cachi oc nicnequi ximosepantasojtatiyacan se huan ocsé ica yolchípahualis huan ica nochi namotanejnequilis. <sup>23</sup> Huan Dios amo namechyancuicayolitij ya ica in chicahualis den taca ten momiquilájan. Ta, Dios namechyancuicayolitij ya ica ne huelilis ten amo quemam tamis. Huan ne huelilis, yejua ne in Tajtoltzin de Dios ten amo quemam ijtacahuis. Ta, yoltinemis sen nachipa. <sup>24</sup> Huan in Tajtoltzin de Dios techilía ijcúin:

Nochi in talticpacuani queme yesquía xiutzitzin san.

Huan nochi icualtziyo den tagat tamati queme yesquía ixochiyo de ne xihuit.

Pero ne xihuit huaquis huan ixochiyo huetzis.

Huan no ijcón mochihuas que ne tagat huan ne icualtziyo tajtamis san.

<sup>25</sup> Pero xicmatican que in Tajtoltzin de Totecotzin, yejua ne amo quemam ijtacahuis.

Ta, yetinemis sen nachipa.

Huan ne Tajtoltzin de Totecotzin yejua ne totanexutilis ten cualcui ne nemaquixtilis ten axcan ica tamechnojnotzaj.

**2** Ica ya nojón namechilía xicautiyacan ya nochi tataman chihualisme ten pit-zotic. Huan amo ximocajcayautinemican huan amo ximotajtolcucueptinemican. Huan amo ximonexijxicolijtinemican huan amo xitajtolerojtijnemican. <sup>2</sup> Ta, monequi xicchiutinemican queme se pili ten yequin yolic. Porín ne pili sayó chichi para huelis moscaltis. Huan no ijcón namejuan monequi xicyecleerojtinemican in Tajtoltzin de Dios ten quinejnehuilía ne yectic tacualis ten namechmactilía in Yecticatzin Espíritu para ijcón namejuan nanmoscaltijtiyasque huan nancajsicaselitihue ne nemaquixtilis. <sup>3</sup> Huan ijcón monequi nanquichiutiyasque porín melau nanquiyolmatocque huan nanquiyolmachilijque ya que Totecotzin Yejuatzin teyolicnelía.

### **Cristo Temaquixtijque queme se tet ten yoltoc**

<sup>4</sup> Ica ya nojón namechilía ximotoquican inahuactzin Totecotzin ten yoltica sen nachipa. Huan Yejuatzin monejnehuililtía queme se tet ten tepalehuía, pero ne tet in talticpacuani quimapeuque ya. Pero xicmatican que ne tet Totajtzin Dios quijitac ya, porín Yejuatzin quipohuac que semi quipía ipatiu. <sup>5</sup> Huan namejuan no nanquinejnehuilíjan queme teme ten yoltocque. Ica ya nojón ximotecahuilican ihuan Dios que ma Yejuatzin namechtatequiutijtiu ijcón queme in tepantequitini quinsajsaloaj ne teme. Huan ijcón namejuan nanmochihuatiq queme yesquía se cali ica in chicahualis den Yecticatzin Espíritu. Huan namejuan nantequititinemij queme tiopixcame yolchípauque. Huan nanquimactilíjan Dios namotatacamatilisuan queme yesquía se mohuisanemactil. Huan ijcón huelis nanquichiutinemisne ten quipactis Dios ica por itapalehuis de Cristo. <sup>6</sup> Ica ya nojón in Tajtoltzin de Dios techilía ijcúin:

Xiquitacan, Nejuatzin nictayecancaquetztoc campa pueblo Sión in Yejuatzin ten quinejnehuilía se tet den tepanchicahualoni.

Huan ne tet Dios quijitac ya huan quipohuac ya que semi quipía ipatiu. Huan nochi naquen tacuautamatisque ihuan in Yejuatzin, yejuan nojonques amo queman mopinaucamatisque porín Cristo amo queman quinmajpehuasquía.

<sup>7</sup>Huan nochi namejuan nantacuautamatinemij ihuan Cristo. Ica ya nojón namejuan nanquipohuaj ne Cristo que semi quipía ipatiu. Pero in Tajtoltzin de Dios tajtoa de neques ten amo tacuautamatij ijcuín:

Ne tet ten quimajpeuque ne tepanchihuani, yejua ya ne mochihuaco in tepanchicahualoni.

Huan nijín tet, yejua ya in Cristo Temaquixtijque.

<sup>8</sup>Huan no in Tajtoltzin de Dios tajtoa de neques de ten amo taneltocaj huan techilfa ijcuín:

Cristo quinejnehuilía se tet ten tetepotamía huan no Yejuatzin quinejnehuilía se tet ten tehuetziltía.

Huan nochi neques ten amo taneltocaj, yejuan nojonques motepotamijtinemij porín amo quitacamatatinemij in Tajtoltzin de Dios. Huan Dios ipa quintalij ya ma motepotamican porín amo quitacamatatinemij Cristo; huan yejuan nojonques yasque tech in tatzacuultilis.

### **Nican tajtoa de Dios ipueblojcahuan**

<sup>9</sup>Pero namejuan Dios namechijitac ya xipoutinemican ihuantzin queme naniueblojcahuan de Dios. Huan Yejuatzin qitalij ya que namejuan nantiopixcame ten nanquitequitilijtinemij se rey. Huan no namejuan nanpueblojuani nanyolchipauque ten Dios quichihuac ya que naniacahuan ya. Huan ijcón Dios namechchihuac para ijcón huelis nanquitenextilijtinemisque in huelilisme de Totajtzin Dios. Porín Yejuatzin namechnotzac ya xihualquisacan ya ne campa tayohuayanijtic huan xicalaquican campa hueyi tacualtzincan campa cualtzin tanaltonoc. <sup>10</sup>Huan namejuan ne achtopa ya amo cana nanpoutinemíaj tech se pueblo, pero axcan nanmochihuacoj ya nanipueblojcahuan de Dios. Huan ne achtopa ya amo aquen namechylicneliaya, pero axcan Totajtzin Dios namechylicnelij ya.

### **Xitequititinemican ihuan Dios tech namonemilipan**

<sup>11</sup>Notasojicnihuan, namejuan nananaltecocayome ten nancalyetinemij secan de namopueblo. Huan namechtatautía que amo ximotecahuilican que ma namechyecana namotanejnequilis ten cuica tajtacol. Porín nojón tanejnequilis ten tajtacol motehuijtinemi ihuan ne nenamochipaucatalnamiquilis. <sup>12</sup>Xicsentocacan xichipau-canentiyacan intzalan neques ten amo quixmatij Dios. Huan masqui yejuan icsá namechijitoaj que namejuan nantachihuanime ten amo cuali, pero cuac quitzotisque ya namocualitachihualisuan, ijcuacón yejuan quihueyimatistique Dios tech ne tonal cuac mohualuicas Cristo Jesús.

<sup>13</sup>Huan queme nantacuautamatij ihuan Totecotzin, ica ya nojón ximotecahuilican ma namechyecanacan nochi taman talticpactequihuani masqui se rey oso masqui se cachi hueyi tayecanque. <sup>14</sup>Huan xiquintacamatiyacan tequihuani porín Dios ijcón quintalij ya nojón tequihuani para yejuan quitatzacuultisque neques ten tachiutinemij ica ten amo cuali. Pero no ne tequihuani quincualtagaitasque neques ten tachiutinemij ica ten cuali. <sup>15</sup>Huan Totajtzin Dios quimonequiltía ma ticchiutiyacan ijcuín:

Ma ticchiutinemican ica ten cuali huan ijcón tiquintamatisque ne taca ten ne yolmijmiquilome san ten amo quimatij toni quijtojtocque.

<sup>16</sup> Huan namejuan amo namechtzizicoutoc oc Satanás ica nichicahualis. Ica ya nojón xictequitilijtinemican Dios. Huan amo xicquemilojtiyacan namotajacoluan ica ne namotacuaumatilis ten nanquipáj ihuan Dios. Ta, xichipaucanentinemican queme nanitequiticahuan de Dios. <sup>17</sup> Monequi xiquinmohuiscapohuacan nochi tagayot. Huan xiquintasojtacan nochi in tocnihuan taneltocani. Huan xicmoucatoc-tilican Totajtzin Dios. Huan xicmohuiscapohuacan nochi hueyichihuanime.

### **Cristo technextilij de queniu monequi titajyohuisque**

<sup>18</sup> Namejuan nantaquehualme, ximotecahuilican ma namechyecanacan namopatrones ica mías mohuisyot. Huan amo sayó xiquintacamatinemican neques patrones ten cachi yolcualitaca huan namecmohuiscapáj. Ta, monequi no xiquintacamatican ne patrones ten namechtajyohuiltíaj tech namotequiu. <sup>19</sup> Huan tacán se taneltocacque quijyohuía in tajyohuilis porín tacuautamati ihuan Dios, masqui amo quinamiqui que ma se quijyohuis, ijcuacón Dios se quiyolpaquiltía. <sup>20</sup> Huan tacán namejuan nantachiutinemij ica ten amo cuali, ijcuacón quinamiqui ma namechtatzacuilitican. Pero amo xicyolnemilican que hueyi tequit nanquichiuque ya iixpantzinco Dios como nanquijyohuía ne tatzacuilitis ica nejmach ne ten namechnamiqui. Pero tacán nantajyohuijtinemij porín nantachiutinemij ica ten cuali, huan no tacán no nanquijyohuijtiyohue ne tajyohuilis ica nejmach, ijcuacón iixpantzinco Dios ixnesitiu que cuali tequit nanquichiuque. <sup>21</sup> Huan Totajtzin Dios namechnotzac ya para xiquijyohuijtiyacan in tajyohuilis porín ne Cristo no tajyohuico por tejuan totajacoluan. Huan Yejuatzin technextilijtehuac de queniu no tejuan tiquijyohuijtiyasque ijcón queme no Yejuatzin tajyohuico.

<sup>22</sup> Huan Cristo amo teyica motajacolmacac huan amo no queman tecajcayahuac. <sup>23</sup> Huan cuac quiquejqueloayaj Cristo, ijcuacón Yejuatzin amo teyica quinnanquiliaya ica taquejquelolis. Huan cuac quitajyohuiltiayaj Cristo, ijcuacón Yejuatzin amo quinilij que satepan no momacuepas. Ta, Cristo sayó quimactilij Dios nitajyohuilis porín quimatic que Totajtzin Dios teixcomacas sayó ica yolchipahualis. <sup>24</sup> Huan Cristo quixtahuac ya totajacoluan cuac quicuoupampilojque tech in cruz para ijcón ma miqui totanejnequilis de tajtacol huan para tejuan ma tiyoltinemican ica yolchipahualis. Huan quicojcocojque Cristo para que namejuan xipajtican de namococolisuan. <sup>25</sup> Huan namejuan ne achtopa nannentinemíaj queme yesquía nanichcame ten ixmoyautinemíaj. Pero axcan nancajsicque ya Cristo huan nantacuautamatij ihuan ne Tapixque Cristo ten namechyecpixinemi huan namechyecantinemi tech namotalnamiquilis.

### **Nican tajtoa de queniu monequi nentinemisque neques ten namicuani**

**3** Huan namejuan, nantesihuahuan, ximotecahuilican ma namechyecanacan namoyoquichuan. Porín tacán sequin namoyoquichuan amo quitacamati in Tajtoltzin de Dios, ijcuacón namejuan nantesihuahuan nanquintaneltoctisque namoyoquichuan ica namochipaucanemilis huan amo monequis xiquinnojtztocan. <sup>2</sup> Huan cuac namoyoquichuan ten amo taneltocani quitasque que namejuan nanchipaucanemij huan que nantatacamatinemij, ijcuacón yejuan quineltocasque in Tajtoltzin de Dios.

<sup>3</sup>Huan amo semi ximochijchihuacan ica ne cualnescayot ten nestinemi panían san ijcón queme in oro. Huan amo ximotachicahuilican tech ne cualnescayot san ten hualeutoc tech se itaquen san oso ne cualnescayot ten mochihua cuac se quitelpañoltis de se mocuatzcicahuasuis. <sup>4</sup>Ta, monequi nantesihuahuan, ximocualnextican tech namoyolijtic ica ne cualnescayot ten amo queman ijtachuis. Huan se tesihuau mocualnextijtinemis iixpantzinco Dios cuac yejua yolyemancanentinemi huan yolseutinemi. Huan nijín taman de cualnescayot de namotalnamiquis, Dios quipo-hua semi cachi quipía ipatiu. <sup>5</sup>Huan ne huejcausihuame ten yolchipauque taneltocani no ijcón mocualnextijtinemíaj. Yejuan tacuautamatinemíaj ihuan Dios huan motecahuilique ma quinyecanacan ninyoquichuan. <sup>6</sup>Huan ne tohuejcaunan Sara no quitacamatinemic Abraham huan quimohuiscailliaya Abraham ijcuín: “Notecotzín”.

Huan tacán namejuan nantesihuahuan nanquintacamatinemij namoyoquichuan, ijcuacán nanmochihuatihue queme yesquía naniichpochuan de Sara como nantachiutinemij ica ten cuali. Huan amo no ximotecahuilican que acsame ma namechmoutican para ijcón nanquicahuasque in Tajtoltzín de Dios.

<sup>7</sup>Huan no ijcón, namejuan nanteyoquichuan, monequi xinentinemican ihuan namosihuahuan ica chipaucatamachilis. Huan monequi xiquinmohuiscapiacan namosihuahuan porín yejuan cachi amo quipíaj chicahualis. Huan namejuan, nanteyoquichuan huan nantesihuahuan, ximohuiscapiacan se huan ocsé porín nochi namejuan nanquinselijque ya ne teicnelilis de Dios cuac namechsepsantelij Dios queme namicuani. Huan como ijcón nanquichiutinemisque, ijcuacán amo teyi namechtzajtzacuilá cuac namejuan nanmotatatautilfaj ihuan Totajtzín Dios ica por ne ten amo nanquipíaj.

### **Nantajyohuijtinemisque masqui nantachiutinemij ica ten cuali**

<sup>8</sup>Huan axcan nicnequi que nochi namejuan xicipiaca se tanemilil san huan ximoyoltalijtiyacan se huan ocsé huan ximosepantasojtatiyacan. Huan no ximoyolicnelijtiyacan huan xiyolyemacanentinemican. <sup>9</sup>Huan como namechchihuifaj tensá ten amo cuali, ijcuacán namejuan amo no ijcón xiquinixilican. Huan como namechquejqueloaj, ijcuacán namejuan amo no xiquinquejquelocan. Ta, cachi oc xictajtanican Dios que ma Yejuatzín ma quintiochihua neques ten namechquejqueloaj. Porín xicmatican que Totajtzín Dios namechnotzac xicselijtiyacan tatiochihualis de Yejuatzín. <sup>10</sup>Porín in Tajtoltzín de Dios techilfá ijcuín:

Tacán acsáme quinequij mopaquiltijtinemisque oc tech ne nemilipan, huan tacán acsáme quinequij ixpanotinemisque ica paquilis, yejuan nojonques monequi ma quitzacuilican ninnenepil huan ma amo tajtojtinemican elihuis.

Huan no monequi ma amo tacajcayautinemican ica intenxipal.

<sup>11</sup>Huan no monequi ximosecahuacan den tajtacolnemilis huan monequi xicchiutinemican sayó ten cuali.

Huan no monequi xictemocan de queniu nanyolseucanemisque huan sayó xictoctilican ne yolsehuilis.

<sup>12</sup>Porín Totecotzín techualitztoc huan techyecpixtoc porín tejuan tiyolchipauque ya de tiitaneltocahuan.

Huan Totecotzín no cuali techcaquilijtinemi tonetatatautilis.

Pero Totecotzín quinixnamictinemi neques ten tachiutinemij ica ten amocuali.

<sup>13</sup> Porín amo aquen huelis namechchihuilis ten amocuali, como namejuan nanmofuerzahuijtinemij de nanquichiutinemij ten cuali. <sup>14</sup> Pero como namejuan nanquijyohuijtinemis que nijín tajyohuilis ica por namochipaucanemilis, ijcuacán Dios namechmaca ne hueyi yolpaquilis. Huan amo xiquinmohuilican neques ten semi quinequij namechymoutisque, huan amo no ximoyolcuejmolocan ica por yejuan. <sup>15</sup> Ta, xicueyimohuistilican tech namoyolojuan Cristo Temaquixtijque queme Namotecotzin. Huan no xicnemilijtinemican de queniu nanquinanquilisque ne tagat ten namechtajtanilía de queyé nantacautamatij ihuan Cristo. Pero xicnanquilican ica yolyemanalis huan ica mohuisyot.

<sup>16</sup> Huan xichipaucanemican ijcón queme Dios quimonequiltía para ma amo mitzteluilis ica tajtacol de namotamachilis. Huan neques ten amo taneltocani, yejuan nojonques namechijitoaj que namejuan nantachihuanime ica ten amocuali, porín nantacautamatij ihuan Cristo. Pero cuac yejuan namechitilisque ya namochipaucanemilis ihuan Cristo, ijcuacán yejuan mopinaucatalisque san ica por ne nintajitolis. <sup>17</sup> Cachi cuali xiquijyohuijtiyacan tajyohuilis como nantachiutinemij ica ten cuali porín ijcón itanejnequilis Dios. Huan ma amo namechtajyohuiltijtinemis que porín nantachiutinemij ica ten amocuali.

<sup>18</sup> Porín Cristo momiquilij toixpatca huan sepa san quinsenixtahuc totajtacoluan. Huan Cristo yolchiphuactzin pero Yejuatzin techixpatcayoti tech in miquilis tejuan ten amo tiyolcualime. Huan Yejuatzin ijcón quichihuac para techtoquitiu tejuan campa Totajtzin Dios. Huan Cristo melau quimictijque inacayo pero Dios ocsepa quiyolitij italnamiquilis. <sup>19</sup> Huan italnamiquilis de Cristo yajqui quinnojnnotzato ne ánimajme campa tzactoyaj queme presos. <sup>20</sup> Huan ne ánimajme ipa amo cajsicatacamatque in Tajtoltzin de Dios tech ne achtopa tonalme cuac Noé nemico. Ijcuacán Totajtzin Dios quiyolicachixtoya que Noé ma quichijchihua ne hueyi barco ten quilía arca. Huan melau tech nojón tonalme amo miacque maquisque. Ta, sayó chicueyi taca masquisque cuac ne tetzauhueyiat quiajocuic ninbarco. <sup>21</sup> Huan cuac techahuij, ijcuacán tiquelnamiquij ne tonal de queniu maquisque nojón chicueyin. Huan cuac techahuij, ijcuacán ixnesi ya que tiyolchipauque ya huan techmaquixtij ya porín tejuan titacautamatij ya que Cristo panquisac yoltoc intzalan in ánimajme. Huan ica ne taahuilis amo techtacayojchijchipahua. Ta, ica ne taahuilis timonemilisque de totajtacoluan para que Dios techtapojpoluis. <sup>22</sup> Huan Cristo cuac paquisac yoltoc intzalan in ánimajme, ijcuacán Yejuatzin yajqui eluiyactzinco huan motalito iyecmacopaca Itajtzin Dios campa ne ichicauhuelilispán. Huan nochi in ángeles, huan in tequihuani huan tayecanani de nentinemij ejecaixco, nochi yejuan monequi quitacamatisque Cristo.

### **Tictequitilijtinemij Dios ijcón queme Yejuatzin techmajmactilij ya ihuelilisan**

**4** Huan queme Cristo quijyohuico tajyohuilis cuac nican talticpac nentinemía, ica ya nojón namejuan monequi nantajyohuijtiyasque ijcón queme Dios namechchahuilij ya. Huan ne tocníu ten quijyohuijtiu tajyohuilisme, yejua nojón melau mosecocauiu de tajtacolojpan. <sup>2</sup> Huan queme in tocníu taneltocque mosecocauiu ya tech itajtacolojpan, ica ya nojón yejua motequitilijtinemi ijcón queme Dios quimonequiltía. Huan amo nentinemi oc tech nochi inemilispán de itanejnequilis de tajtacol queme cuicatinemij in talticpacuani. <sup>3</sup> Huan amo xicchiutinemican oc ijcón

queme nanquichiutihualajque cuac nannentinemíaj tech in tajtacolojpan queme neques ten amo quixmatij Dios. Huan tech nojón tonalme nanquichiutinemíaj ijcuín: Nanahuilnentinemíaj huan nanquichiutinemíaj ijcón queme namotanejnequilis ten cuica tajtacol. Huan nanmohuintijtihualayaj huan nantatacuajtihualayaj ica elihuisyot huan nanmosenuintijtihualayaj. Huan nanquinmohuistilijtihualayaj míac tataman tatadíosme ten Dios ipa namechtacahualtijca ya.

<sup>4</sup> Huan neques ten amo taneltocaj ihuan Cristo, yejuan nojonques namechmoucaitaj cuac namejuan amo nanquichiutinemij oc ijcón queme yejuan cuelitaj. Porín yejuan motajtacolmacatinemij ijcón queme cada tanejnequilis de tajtacol quinyoltilana. Huan no yejuan namechquejqueloaaj porín namejuan amo inuan nannentinemij oc. <sup>5</sup> Pero se tonal nochi ne ten tamajcahualneminí, yejuan nojonques quimacilitihue nincuentas Dios de nochi ten quichiuque. Porín Yejuatzin ipa quinchixtoc ya para quinxcomacas neques ten voltinemij oc axcan huan neques ten no ipa momiquilijque ya. <sup>6</sup> Huan cuac voltinemíaj oc nican talticpac nochi ne difuntitos, ijcuación nochi yejuan in tanahuatiani de Dios quinnojnnotztihualayaj ica in Tajtoltzin de Dios ten cualcui ne nemaquixtilis. Huan ne difuntitos como yejuan quiselijque in Tajtoltzin de Dios, ijcuación yejuan voltinemisque iixpantzinco Dios sayó ica nintalanamiquilis ijcón queme Dios voltinemi. Huan ninnacayo ipa miquic ya queme nochi in ocsequin talticpacuani.

<sup>7</sup> Huan axcan cachi motoquijtoc ya ne tonal cuac tamis in nemilis de nican talticpac. Ica ya nojón namechilía monequi xicuatamatcanentinemican huan xicsentocacan ximotatautilican ihuan Dios. <sup>8</sup> Huan achtopa de nochi ximosepantasojtacan se huan ocsé ica nochi namotanejnequilis porín ica ne tetasojtalis namejuan cachi huelis nanquintapojpoluisque acsame. <sup>9</sup> Huan xiquinselican tech namochan ma motepalcahuacan aquen yesqui hualasque huan xiquinselican ica ne teyolicnelilis.

<sup>10</sup> Huan monequi que cada senme de namejuan nantaneltocani, ma xiquintequitilican in ocsequin taneltocani ijcón queme Dios namechmajmactilij ya ne huelilisme. Pero namechilía ximotequitiltijtiyacan ica nochi namotanejnequilis para xiquinpalehuijtiyacan in taneltocani ica nochi tataman huelilis ten Dios namechtayocolij ya. <sup>11</sup> Huan como se tocníu tanojnnotztinemi ica in Tajtoltzin de Dios, ijcuación ma quichiutinemi queme yesquía Dios quinnojnnotztoquía. Huan como se tocníu tapalehuijtinemi, ijcuación ma quichiutinemi sayó ica in chichualis de Dios quitayocolij ya. Huan namejuan xicchiutinemican nochi namotequihuan para ijcón nanquihueyipanchiutiyasque Totajtzin Dios ica in chichualis de Jesucristo. Huan sayó Yejuatzin quipixtinemi sen nachipa ne hueyi cualtziyo huan ne chicaucahuelilis.

### **Nican tajtoa de queniú tejuan tiitaneltocacahuan de Cristo titajyohuijtinemij**

<sup>12</sup> Notasojicnihuan, amo xicmoucaitacan ne tajyohuilis ten Dios namechcahuili ne ten namechyolxocolis queme tit. Huan amo xictetzaucaitacan cuac Yejuatzin quiejejos namotacuautamatilis ica tajyohuilis. <sup>13</sup> Tac cachi oc ximoyolpactijtiyacan cuac nantajyohuíaj porín xicmatican que namejuan nantajyohuijtiyohue ijcón queme Cristo tajyohuico. Huan ijcón tech ne tonal cuac mohualucas Cristo ica ichicaucacualtziyo, ijcuación namejuan nanmohuelitasque huan nanmohueyiyolpactisque.

<sup>14</sup> Huan namejuan xicpiacan hueyi yolpaquilis cuac acsame namechquejquelosque huan namechtejtelchihuasque ica por namotacuautamatilis tech itocaytzin de Cristo. Cuac ijcón mochihuas, ijcuación namejuan no ximohueyiyolpactican porín

in Yecticatzin Espíritu de Dios yetinemi namoyolijtc huan namechualcuilijtoc icualtziyo de Cristo. Huan melau que neques ten amo taneltocani, yejuan nojonques quitejteneutinemij Cristo, pero namejuan nanquihueyipanchiutiyohue Cristo.

<sup>15</sup> Huan amo teyi xicchihuacan tenica huelis namechpinaucatalisque queme nantemictiani, oso nantachtequini, oso nantachihuanime ica ten amocuali, oso nancocalaquijtinemis que campa amo namotequiu. <sup>16</sup> Pero tacán namechtajyohuiltíaj porín nanpoutinemij ihuan Cristo, ijcuacán amo ximopinaucamatican. Tac cachi oc xicueyimohuistilican Dios porín namejuan namechtocaytíaj nanitaneltocacahuan de Cristo.

<sup>17</sup> Huan axcan ejcoc ya in tonal cuac monequis moixcomacasque cada se itaneltocacau de Dios. Huan como Dios quimonequiltía que ma pehua ne ixcomacalis totechcacopaca tejuan, ijcuacán cachi oc Dios quinchicaucaixcomacati neques ten amo quitacamatinemij in Tajtoltzin de Dios ten cualcui ne nemaquixtilis. <sup>18</sup> Porín quijtoa in Tajtoltzin de Dios ijcuín: Huan tejuan tiyolchipauque ya huan ica hueyi ohuijgayot timoixcomacasque para timaquisasque. Pero, ¿toni inpan mochihuas neques ten amo yolcualime huan ten motajtacolmacatinemij oc? Pues inpan huetzis se hueyi tatzacuultilis.

<sup>19</sup> Huan como namejuan nantajyohuijtinemij porín ijcón Dios quimonequiltía, ijcuacán monequi xicchiutinemican sayó ica ten cuali. Huan no xictemactijtiyacan namotalnamiquilis imaco Dios, porín Yejuatzin namechchijchihuac ya huan Yejuatzin quitamichihuati ne nemaquixtilis ijcón queme motencahuac ya que namechpalehuis.

### **Xiquinyolmajxitijtiyacan nochi itaneltocacahuan de Cristo**

**5** Huan nicnequi niquinnejmachtis in tiopan huehuentzitzin ten namotzalan tequititinemij porín nejuatzin no nitiopanhuehuentzin. Huan no niquitztinemic de queniu Cristo tajyohuiaya. Huan no nipoutos ninuan neques ten quitasque ne tonal cuac Cristo mohualuicas nican talticpac ica ihueyicualtziyo. <sup>2</sup> Huan niquintatautía ne tiopan huehuentzitzin que monequi xiquinyolmajxitijtinemican nochi itaneltocacahuan de Dios neques ten namejuan nanquinyecantocque, ijcón queme in tapixque quinyecantinemi iichcahuan. Huan nochi nijín xicchiutiyacan ica sayó ten cuali tanejnequilis huan amo ica ne tequihuil. Huan amo no xiquinyolmajxitijtinemican in taneltocani porín nanquinctinemij nintomin san. Ta, xitequititinemican ica nochi namotanejnequilis. <sup>3</sup> Huan namejuan nantiopanhuehuentzitzin, amo xiquinmachililtican neques taneltocani ten nanquinyecantinemij de que namejuan nanueyitayecanani. Ta, cachi cuali xichipaucanentinemican ijcón queme namejuan nanquinequij que in taneltocani ma chipaucanentinemican. <sup>4</sup> Huan cuac monextiquiu ne Tayecancatapixque de nochi in tapiani, ijcuacán namejuan nanquiselisque ne se cualtzin tetayocolil queme yesquiá se corona tamaijquutil de xihuit san ten amo queman ixmiquis.

<sup>5</sup> Huan namejuan, nantelpocame, xiquintacamatiyacan ijcón queme namechnajnahuatíaj in tiopanhuehuentzitzin. Huan, nochi namejuan nantaneltocani, ximosepanmohuiscapoutiyacan se huan ocsé ica ne yolyemanalis. Porín in Tajtoltzin de Dios techilía ijcuín:

Dios quinxnamiqui neques ten mohueyimatinemij.

Huan Dios quinpalehuijtinemis ica ne iteicnelilis neques ten moyolyemancamatinemij.

<sup>6</sup>Ica ya nojón ximoyolyemancatalijtiyacan huan ximotemactijtiyacan imaco Dios porín Yejuatzin nochi quipixtoc chicahualis. Huan ijcón Dios namechueyipantalis cuac ne tonal monequi quichihuas. <sup>7</sup>Huan xicpanoltilijtiyacan Dios nochi namoyolcuejmololisuan porín Yejuatzin semi namechylolnejnequi de namechyecpixinemis tech namonemilipan.

<sup>8</sup>Xicuamatcanemican huan ximoyectachilijtocan porín ne amocuali Satanás namechtahuelitztinemi, huan yejua ne tzajztzinemi huan namechyeualojtinemi queme yesquía se cuoutajtecuan ten quitemotinemí aconí quixixicos. <sup>9</sup>Ica ya nojón xicmajpeutiyacan ne amocuali Satanás huan xicsentocacan xitacuautamatiyacan ihuan Dios. Porín xicmatican que nochi namotaneltoaicnihuan de nochi senmanahuac no ijcón monequi ma tajyohuijtinemican ijcón queme namejuan nantajyohuíaj. <sup>10</sup>Huan Totajtzin Dios quipixtinemi nochi teicnelilis. Ica ya nojón cuac namejuan nantamitajyohuisque ya sequin tonalme tech namonemilipan, ijcuacón Yejuatzin namechchihuas que nanyecyolmelauque ya huan que nanyecajscayecyetoní ya huan que nanyecyolchicauque ya huan que amo aquen huelis namechajchihuas de namotacuautamatilis. Huan Yejuatzin ipa technotzac ya ma ticselican ne iherencia sen nachipa porín titacuautamatij ihuan Jesucristo. <sup>11</sup>Huan ma ticmohuistilijtiyacan Totajtzin Dios ten quipixtinemi ne hueyi cualtziyo huan ten quipixtinemi ne de sen nachipa chicaucahuelilis.

### **Pedro quintajpaloa in taneltocani**

<sup>12</sup>Huan nejuatzin nicpohua in Silvano se tacuautamatcatocniu taneltocque. Huan Silvano namechuiquilía nijín tzictzin amatzin ten namechijcuilohuilía para ica namechylomajxitis huan ica namechyequiliti que nijín notanextililis cuica ten melau teicnelilis de Dios. Huan nicnequi xicsentocacan xitacuautamatiyacan tech ne teicnelilis de Dios. <sup>13</sup>Huan Totajtzin Dios quinijitac in taneltocani ten calyetocque nican campa pueblo Babilonia ijcón queme namechijitac ya namejuan. Huan nochi yejuan namechontajpaloaj. Huan namechtajpaloa in Marcos de notacuautamatcaneu. <sup>14</sup>Ximomatajpalocan se huan ocsé ica hueyi tetasojtalis. Huan xicpixtiyacan nochi namejuan se hueyi yolsehuilis nochi namejuan ten nanoputinemij ihuan Cristo. Amén.



## ICA OME TAJCUILOLAMATZIN TEN QUIJCUILOJ IN TATITANIL SAN PEDRO PARA IN TANELTOCANI DE NOCHI SENMANAHUAC

### In tatitanil Pedro quintajpaloa in taneltocani

**1** Nejuatzin ni Simón Pedro, huan niitequiticau de Jesucristo huan no niitatitanil de Jesucristo. Huan namechijcuilohuilá nijín amatzin namejuan ten nanquipixtinemij nojón cualtzin tacuautamatilis ihuan Cristo ijcón queme tejuan titacuautamatij ihuan Cristo. Huan namejuan nancajsicque ne tacuautamatilis ihuan Cristo porín Totajtzin Dios Yolmelahuactzin huan no porín Totemaquixtijcau Jesucristo Yolmelahuactzin. <sup>2</sup>Huan ma mohueyichiutiu namoyolijt ne teicnelilis huan ne yolsehulilis ten hualeutoc imaco Dios para cachi oc ijcón nanquixmatiyohue Totajtzin Dios huan Totecotzin Jesús.

### Intequihuan den taneltocani

<sup>3</sup>Huan Totajtzin Dios techaxcatilij ya ica por ihueyichicahualis nochi ten techpola tech tonemilispán huan no nochi ten monequi para ticmohuistilijtiyasque Totajtzin Dios. Huan Dios techaxcatilij ichicahualis cuac techixmatilij Cristo ten axcan technotzac ya ma tictoctilijtiyacan. Huan Cristo technotzac no ma tiqiztinemican ichicaucacualtziyo huan ihuelilisan. <sup>4</sup>Huan Totajtzin Dios ica ne ichicaucahuelililis techaxcatilij ya huejueyi tatiochihualisme ten semi cualtzin ten ipa Dios moyectencauca ya de techmacas. Huan Totajtzin Dios ica por nojón huejueyi tatiochihualisme techaxcatilijti ne chipaucatalnamiquilis de Dios. Huan no ica por nojón huejueyi tatiochihualisme, Dios techajchihuac ya tech nojón tajtacolnemilis ten mohueyimauc nohuiyampa den talticpac ica por totanejnequilis ten cuica tajtacol.

<sup>5</sup>Ica ya nojón namejuan monequi ximofuerzajuican tech namochipaucanemilis. Huan xicmajxitijtiyacan namotacuautamatilis ica namochipaucanemilis. Huan amo sayó xichipaucanentinemican. Ta, no cachi oc ximoixmatiltijtiyacan in Tajtoltzin de Dios. <sup>6</sup>Huan amo sayó ximoixmatiltijtiyacan in Tajtoltzin de Dios. Ta, cachi oc ximomachtican de queniu nanquitzajtzacuillisque namotanejnequilis de namonacayo. Huan amo no sayó xictajtzacuillijtiyasque namotanejnequilis. Ta, cachi oc xicipacan ne yolyemanalis. Huan amo sayó xicipacan ne yolyemanalis. Ta, no cachi oc ximomachtican de queniu xicmohuistilijtiyacan Dios. <sup>7</sup>Huan no amo sayó xicmohuistilijtiyacan Dios. Ta, cachi oc xiquinmohuiscaitzantiyacan in tocnihuan taneltocani. Huan no amo sayó in tocnihuan taneltocani. Ta, cachi oc xicipacan tetasojtalis ihuan nochi talticpacuani.

<sup>8</sup>Huan tacán namejuan nochi nijín taman tatiochihualisme nanquipixtinemij ya, huan tacán cachi oc nanquintequitiltijtiyohue nijín tatiochihualisme, ijcuacón namonemilispán ihuan Cristo amo nencajti san ten nanquichiutiyohue. Ta, cachi oc nanquiyolpactijtiyohue Dios ica namotatacamatilis huan cachi oc nanmoteixmatiltijtiyohue ihuan Totecotzin Jesús. <sup>9</sup>Huan tacán se tocnihuan taneltocque amo quipixtinemi nochi nijín tatiochihualisme, ijcuacón yehua ne mochihuati queme yesquía amo huejca tachixtinemi huan no queme yesquía ixpojpyot. Porín yehua quelcahuac ya de queniu Dios quiyolchipauca ya de nitajtacoluan cuac ne achtopa ya nentinemía tech in tajtacolnemilis.

<sup>10</sup>Ica ya nojón, tocnihuan, nicnequi ximofuerzajuican de xicyecmatican de que Dios namechnotzac ya huan namechijitac ya que xipoutinemican ihuan Cristo. Porín como nanmofuerzajuijtiyohue, ijcuacón amo queman nanmoyojoyolcueptiyohue tech namotacuautamatilis. <sup>11</sup>Huan como amo nanmoyojoyolcueptiyohue tech namotacuautamatilis, ijcuacón Totajtzin Dios ica m'ac paquilis namechcalaquitiu nipa campa Totecotzin Jesucristo Totemaquixtjicatzin tayecantinemis sen nachipa.

<sup>12</sup>Ica ya nojón nicsentoca namechelnamictijtiyás nochi nijín tanextililisme masqui namejuan ipa nanquimatihuitze ya huan no masqui namejuan cuali tzineutoc ya namotacuautamatilis tech in tamelahuac Tajtoltzin de Dios ten axcan nanquip'aj ya. <sup>13</sup>Huan queme niyoltinemi oc, ijcuacón niquixejecoa que nechnamiqui ma namechyolmajxitijtiu oc huan namechelnamictijtiu oc ica nijín notanejmachtilisuan. <sup>14</sup>Porín Notecotzin Jesucristo nechmatiltij ya que amo huejcahuas oc huan nicahuas nijín nonacayo porín nimomiquilis ya. <sup>15</sup>Huan no cachi oc nimofuerzajuis de namechpalehuis axcan para que ma amo xiquelcahuacan nijín notanextililisuan. Huan cuac nimomiquilis ya, ijcuacón namejuan ijcón nanquelnamictine-misque nochi nijín notamachilisuan.

### **Tejuan tiquitacque cuac Cristo mocualnescayotij ica ichicaucacualtziyo**

<sup>16</sup>Huan tamechmachtijtocque den chicahualis de Totecotzin Jesucristo huan den queniu Yejuatzin tequititinem'ia. Huan nijín amo tamechmacht'ia ica tensá tetapohuilis den cuica tacajcayahualis. Ta, tejuan melau tiquitacque ya ica toixtololohuan de in ichicaucacualtziyo de Jesucristo huan yejica ya tamechyecnextil'iaj. <sup>17</sup>Huan tejuan tiquitacque ya cuac Totajtzin Dios quicualnextij Jesucristo ica ichicaucahuelilis. Huan no ticacque cuac Totayecancatajtzin Dios quijtoj ica ne mohuiscatajtolme ijcuín: "Nijín Jesús yejua ne Notasojconetzin huan ica por Yejuatzin axcan semi niyolpaqui".

<sup>18</sup>Huan tejuan ticacque ne tajtolme ten hualehuac ne eluiyactzinco porín tejuan ihuan tiyetoyaj Jesucristo campa ne mohuiscatalomojtzin.

<sup>19</sup>Huan ticmatij ya que nijín totanextililis yec tamelahuac porín ticpixtinemij de ne tanahuatilme ten in tanahuatiani de Dios quiselijtinenque imaco Dios. Huan namejuan monequi xictacamatiyacan nijín tanahuatilme porín nijín tanahuatilme quinejnehuil'ia se hueyi tahuil ten tahu'ia nochi campa tayohuayanilot. Huan nijín tanahuatilme namechyoltahuilijtos hasta cuac tanesiquiu huan mohualuicas Jesucristo. Huan Yejuatzin quinejnehuil'ia hueyi sitalin. Huan cuac panquisas ne hueyi sitalin, ijcuacón quijtosnequi que niman tanesis ya huan amo monequis oc tahuil. Huan no ijcón cuac mohualuicas Jesucristo, ijcuacón amo monequis ne tanahuatilme den tanahuatiani san. <sup>20</sup>Pero monequis achtopa xicyecajsicamican nijín: Ne huejcautanahuatiani de Dios quiselijtinenque tanahuatilme imaco Dios huan quini-jcuiloque. Huan ma amo aquen quinemili que yejua huelis iselti quinnejmelahuilis nijín tanahuatilme ica por itamachilis de yejua san. <sup>21</sup>Huan amo aquen huelis cajsi-camatis in tanahuatilme de Dios ica por itamachilis de yejua san. Porín ne huejcau tanahuatiani amo queman tanojnotztinenque ica yejuan nintanejnequilis san. Ta, ne tanahuatiani yolchipaunque huan tanojnotztinenque itencopaca Totajtzin Dios porín in Yecticatzin Esp'iritu quintenycantinemic huan quintanemililtij.

## Ne tanahuatiani tacajcayahuani huan tamachtiani tacajcayahuani

(Judas 4-13)

**2** Huan tech ne tonalme no nentinemíaj sequin tanahuatiani ten tacajcayahuani san intzalan in pueblojuani de Israel. Huan no ijcón nentinemisque sequin tamachtiani tacajcayahuani namotzalan namejuan. Huan ne tacajcayahuani tamachtijtinemij para yolicaquichtacacalaquijtiyasque nintanextililisuan ten sayó huelis cuejuelos namotacuautamatilis. Huan ajachichi namechilijtiyasque que amo yec melau que Totecotzin namechcohuac ya huan namechmaquixtij ya. Huan ne nintanextililisuan santajma cualcuitihuitz se ne hueyi tatzacuultilis de Dios. <sup>2</sup>Huan miacque talticpacuani quisentocatinemisque oc tech nintajtocolojpan de nojón ne tacajcayahuani. Huan ijcón in tagayot quijtojtinemisque in yec melau ojtzin de Dios ten techuica campa ne nemaquixtilis sayó porín yejuan cuelitaj quisentocasque tech in pitzotic tacajcayahualis de ne tacajcayahuani. <sup>3</sup>Huan ne tamachtiani tacajcayahuani sayó quiyolnemilisque motanilijtinemisque ca tomin san. Ica ya nojón yejuan namechnextilijtinemisque ica tacajcayahualis para namechquixtilijtinemisque tomin san. Pero ne hueyi tatzacuultilis de Dios quinchixtoc ya ne tacajcayahuani para inpan huetziquiu. Huan yejuan amo huelis mopalehuisque oc, porín Dios ipa quintelchihuac ya desde ne achtopa.

<sup>4</sup>Huan no nanquimatij ya que Totajtzin Dios amo teyica quintapojpoluij ne ángeles de catca itaquehualuan cuac yejuan motajtacolmacacque iixpantzinco Yejuatzin. Ta, Yejuatzin quinpantamotac ne ángeles campa ne ixpolihuilis de mictan. Huan ompa Dios quincahuaco campa teostocyo huan tayohuayanilot ma ompa tzicautocan ica teposcadenas. Huan ompa Dios quinchialtijtoc hasta ne tonal cuac mochihuaquiu ne hueyi ixcomacalis. <sup>5</sup>Huan no nanquimatij ya que Totajtzin Dios amo quintapojpoluij ne huejcautalticpacuani. Tac Dios quinqualtitanilij ne hueyi tetzaucaquiohuit inpan nochi in talticpacuani ten tajtacoledje. Pero Yejuatzin quimaquixtij in Noé ten tanojnotztinemia ica ten melahuac tajtoltzin. Huan no Dios quinmaquixtij ocsé chicome taca.

<sup>6</sup>Huan no nanquimatij ya que Totajtzin Dios quintelchihuac nojón pueblojuani de Sodoma huan Gomorra huan tanahuatij ma quintajtamican ne omen pueblojme. Huan Dios quintatijque ne ome pueblojme hasta no nochi yejuan mochiuque cuounexme san. Huan nijín ijcón mochihuac para Dios quinnejmachtis nochi in talticpacuani ten nemiquihue oc huan nentinemisque oc tech in tajtacol para ma amo ijcón quichihuacan. <sup>7</sup>Pero Totajtzin quimaquixtij ne tagat ten monotza Lot porín yejua se yolchipaucatagat huan yejua moyolxocolijtinemia ica neques ten tachiutinemia ica ten amocuali chihualisme. <sup>8</sup>Huan mosta mosta ne yolchipaucatagat Lot calyetoya intzalan ne pueblojuani de Sodoma huan Gomorra. Huan yejua semi yoltajyohuiaya mosta mosta cuac quinitiliaya huan quinquaquiliaya neques amocuali pueblojuani ten elihuisnentinemia tech in ahuilnemilis. <sup>9</sup>Huan Totecotzin Jesús cristo cuali quimati queniu quinpalehuijtiyás neques ten motemactijtinemij imacotzinco, cuac in amocuali Satanás quinyoltanemililtijtinemi ma motajtacolmacacan. Huan no Totecotzin cuali quimati queniu quintalilijtiyás ne taca tajtacoledje tech in tatzacuultilis hasta in tonal cuac mochihuaquiu ne hueyi ixcomacalis. <sup>10</sup>Huan no Dios quintatzacuultis neques ten quichiutinemij queme yejuan nintane-

jnequilis de tajtacol quintanemililtía. Huan yejuan nentinemij huan momautinemij tech in pitzotic nemilis huan sayó quixnamictinemij in tanahuatil de Totecotzin.

<sup>11</sup> Huan ne tamachtiani tacajcayahuani amo mopinaucamatij huan amo moyolyemaníaj. Ta, moixehuáj quintejtenehuaj ne tayecanani ejecame ten nentine-mij ejecaixco. Huan in ángeles yejuan quipixtinemij cachi hueyi chichualis huan tanahuatil. Pero yejuan in tamachtiani amo moixehuáj de quintejtelchihuasque ne tayecanani ejecame ten nentinemij ejecaixco.

<sup>12</sup> Huan ne tamachtiani tacajcayahuani, yejuan tamajcahuálnemij huan nentine-mij queme in tapialme ten amo quipíaj tamachilis. Huan nochi nojón tamachtiani tacajcayahuani yolque sayó para ma quinquitzquican huan ma quinmictican porín yejuan sayó quintejteneutinemij san in melaucatamachilisme ten yejuan amo no cajsicamatij. Ica ya nojón yejuan momiquilisque queme yesquía tapialme ten amo quipíaj talnamiquilis. <sup>13</sup> Huan ne tamachtiani tacajcayahuani Dios quinixtahualtis huan quintajyohuiltis ijcón queme yejuan quintajyohuiltijtinemíaj in taneltocani. Huan yejuan moyolpactijtinemisque ica nintanejnequilis ten cuica tajtacol masqui tech in tonayan. Huan yejuan namechpinaucatalíaj san huan namechyolxocoliltalíaj san cuac namohuan tatacuatij tech namoiluihuan den taneltocani. Huan yejuan mohuelitztinemij ica ne tajtacolpaquilis ten sayó tecajcayahua.

<sup>14</sup> Huan ne tamachtiani tacajcayahuani amo huelij sayó quitasque san se sihuat como amo quinequij ihuan cochisque. Huan yejuan amo queman yolajsisque de motajtacolmacatinemisque. Huan yejuan quinyolcuepaj in tocnihuan taneltocani ten ayamo semi yolmajsitinemij tech nintacuaumatilis. Huan ne tacajcayahuani yoltanemilijtinemij sayó ica ne nejxicolot. Huan yejuan Dios ipa quintelchihuac ya. <sup>15</sup> Huan ne tamachtiani tacajcayahuani mocuatapololtijtinemij ya porín yejuan mosecocaque ya tech nojón tamelahuac ojtzin de Dios. Huan yejuan quisentocaj quichiutinemij ijcón queme ne huejcautanahuatijque Balaam, ten iconeu Beor. Ne ten motatanilijtinemía ca tomin san ica ne itajtocoljpan. <sup>16</sup> Pero ne iburrito de Balaam ten amo huelfa tajtoa, yejua ne tajtoj ica tajtolis de se tagat. Huan ne burrito quixnamiquic Balaam de nitajtacol. Huan no quixilij in Balaam ma amo quichihuani ne mijmiquiloyot ten quichihuasquía.

<sup>17</sup> Huan ne tamachtiani tacajcayahuani queme yesquía amelme ten huacque ya huan queme yesquía mixuac san ten elihuis cuica in ejecat. Huan Totajtzin Dios ipa quintelchihuac ya que ma yetotihue tzactotij sen nachipa campa ne cachi tilahuac in tayohuayanilot. <sup>18</sup> Huan ne tamachtiani tacajcayahuani ica hueyi tzajtzilis mohuey-imatinemij san ica ninmijmiquilotajtoluan ten nencajti san. Huan yejuan quinyolcuepaj in taneltocani huan quintanemililtíaj ica tanejnequilis ten cuica tajtacol san, masqui ne taneltocani yequin ya mochicoquixtijque ya de ne tajtacolnemilis huan mosecocaque ya de intzalan neques ten nentinemij oc tech tajtacolnemilis. <sup>19</sup> Huan ne tamachtiani tacajcayahuani masqui yejuan no nintajtacolnemilis quinyecantoc, pero yejuan no quinyequilíaj in taneltocani de tacán yejuan mohuicatinemisque in uan, ijcuacón nochi huelis ya quichiutinemisque queme yejuan quinequij. Pero cuac in tajtacol quixixcojtinemi in tagat, ijuacón tzicautinemi in tagat huan momajpa-chojtoc ya in tajtacol ten yejua quichiutinemi.

<sup>20</sup> Huan nochi ne tamachtiani tacajcayahuani ten quixmatque ya Totecotzin ten Totemaquixtjcatzin Jesucristo, yejuan nojonques Dios quinchololtijca ya tech nojón tajtacolnemilis de nican talticpac. Pero tacán yejuan ocsepa motecahuilíaj que in

tajtacol ma quinmajpachoto huan ma quinyecanto, ijcuacán yejuan mochihuaquiu ya cachi hueyi tajtacolejque huan que ne achtopa. <sup>21</sup> Huan tacán ne tamachtiani tacajcayahuani quixmatcaj ya in Tajtoltzin de Dios, huan tacán mosecocahuatij den ne chipactzin tanahuatil de Dios ten quinmachtijque ya, ijcuacán cachi cuali yesquía que ma amo quiselianij in Tajtoltzin de Dios huan ma amo calaquinij tech in tamelahuac ojtzin de Dios. <sup>22</sup> Huan tech nintanemilispán de ne tamachtiani tacajcayahuani mochiutiú ijcón queme tamelahuac Tajtoltzin ten quijtoa ijcuín: “In itzcuinti ocsepa yohui quicuati iixochti; huan in sihuapitzot ten caltijque ya, yejua ne ocsepa yohui mosoquineloti”.

### Ne tonal cuac mohualuicas Totecotzin Jesucristo

**3** Notasojcnihuan, yejua ya nijín ica ome notajcuilolamau de namechijcuilohuilfa. Huan ica nijín ome notajcuilolamau nicnequi namechtanemililtia huan namechelnamictia de namochipaucatacuautamatilis. <sup>2</sup> Huan nejua no ijcón nicnequi namechelnamictis den tanextililisme ten namechinmachticoj ne yolchipauque tanahuatiani. Huan no namechelnamictia ten namechnahuatilijque in tatitanilme de Totecotzin Totemaquixtjcatzin.

<sup>3</sup> Huan cuali xiquelnamictiyacan nijín: Tech ne tacuitapan tonalme monextiquihue sequi tamohuiscapoloani ten quiquejqueloaj in Tajtoltzin de Dios. Huan yejuan nentinemij ijcón queme nintanejnequilis de tajtacol quinyecantoc. <sup>4</sup> Huan ne taca tamohuiscapoloani matajtansique ijcuín: “¿Queyé amo mochihua ya ijcón queme Cristo motencahuac tohuan de que ocsepa mohualuicas?” Huan no quijtosque ijcuín: “Tohuejcautatuan momiquilijque ya huan desde ne tonal hasta axcan amo teyi tiq-uitaj ten yancuic. Huan cachi no ijcón san desde ne tonalme cuac tzinpehuac in talticpac”.

<sup>5</sup> Huan ne tamohuiscapoloani amo quinequij moyecajsicamatiltisque que tech ne huejcauxiume Totajtzin Dios quichijchihuac in eluiyac huan in talticpac. Huan ica ichicaucatanahuatil Totajtzin Dios quichijchihuac in talticpac. Huan Yejuatzin tanahuatij ma mochijchihua in talticpac itzalan in at huan axcan ica in at Dios quitequitiltijtoc nijín talticpac. <sup>6</sup> Huan no tech ne huejcauxiume Totajtzin Dios quinquemiloco huan quinixpoloj nochi in talticpacuani ica ne tetzaucaquiohuit. <sup>7</sup> Huan Totajtzin Dios ica ichicaucatanahuatil quinchialtijtoc in talticpac huan eluiyac para ne tonal cuac quintamichichinos ya. Huan no tech ne tonal de hueyi tatzacuilitis, ijcuacán Dios quinixpolos nochi ne taca tamohuiscapoloani.

<sup>8</sup> Huan notasojcnihuan, monequi xiquelnamictiyacan que Totecotzin quipohua se mil xihuit queme yesquía sayó se tonal san; huan no se tonal quipohua queme se mil xihuit. <sup>9</sup> Huan amo melau queme sequin quijtoaj que Totecotzin huejcahuac ya huan amo hualas oc ijcón queme Yejuatzin tohuan moyectencahuac ya de hualasquía. Pero namechilía que ayamo mohualuicas Totecotzin porín techyolicnelijtoc oc. Huan Yejuatzin amo quinequi ma senme xpolihuican. Ta, Yejuatzin quimonequiltia que tinochin ma timoyolnemilican de totajtacoluan para ticpiasque ne nemaquixtilis.

<sup>10</sup> Porín xicmatican que ne tonal cuac mohualuicas Totecotzin namechichtacahuiquiu ijcón queme ne tachtecque ichtacahuitza de yohual cuac tejuan amo ticchixtocque. Ijcuacán tech ne eluiyac chicaucapetanis huan tajtamis san. Huan de ompa nochi ten tiqiztinemij tamichichinahuic ca ne hueyi tit. Huan no ijcón

mochihuas que in talticpac huan nochi ten ongac ipan in talticpac tami patis ica ne tit. <sup>11</sup> Huan queme nochi ten ongac ipan in talticpac tami patis ya, ica ya nojón namejuan semi monequi xichipaucanemican huan xicmohuistilijtiyacan Dios. <sup>12</sup> Huan xicyolicachixtocan ne tonal cuac mohualuicas Totecotzin. Pero no ica namotacamatis xicchiutiyacan para ma cachi niman mohualuicas. Huan tech ne tonal cuac mohualuicas Cristo, ijcuacán in eluiyac tami chichinahuis ica hueyi tit huan nochi ten tiquitztinemij nican talticpac tami patis tech ne tiejecat. <sup>13</sup> Pero tejuan tiitaneltocacahuan huan ticchixtocque ne tonal cuac Dios quichijchihuas se yancuic eluiyac huan ne yancuic talticpac, campa mochiutos sayó ten cualtzin chipaucanemilis ijcón queme Yejuatzin motencahuac ya de quichichihuas.

<sup>14</sup> Ica ya nojón, notasojicnihuan, xicyolicachixtiyacan nochi nijín tanahuatilme de Dios. Huan ximofuerzajuijtiyacan de xichipaucanemican para cuac mohualuicas Dios, ijcuacán Yejuatzin namechajsiqui nanyolseucanentinemij huan amo nanmoutocque ica tajtacol huan ma amo no teyi mochiuto tajtacol namopan. <sup>15</sup> Huan xiquelnamictiyacan que Totecotzin no techyolicnelijtoc huan ayamo mohualuicas porín quinequi techmaquixtis oc. Huan totasojicniu Pablo namechijcuilohuilij ya nochi nijín taman tanextililisme, ijcón queme Dios quimactilij tamachilis. <sup>16</sup> Huan ne totasojicniu Pablo namechmachtij ya de nochi nijín taman tanextililis tech nita-jcuilolamahuan, masqui ohui para se cajsicamatis de nojón imatajcuiloluan. Huan sequi taca ten amo yec yolmajsitocque huan ten yolcucuepme den nintacuautamatilis, yejuan nojonques quixpatilíaj nitanextililis de Pablo ijcón queme yejuan quixpatilijque ya in tamachilis den ocsé tamachtilis de Dios. Ica ya nojón yejuan moixpolohuaj ya.

<sup>17</sup> Huan notasojicnihuan, ya que nanquimatij ya toni mochihuati achtopa den monequi mochihuas, ica ya nojón ximoyectachilijtiyacan para ma amo namechuicayacan de ne tamohuiscapoloani tech in tacajcayahualis. Porín como ijcón mochihuas, ijcuacán nanquipoloaj ya namotacuautamatilis. <sup>18</sup> Ta, nicnequi ximoyolmajxitijtiyacan ica iteicnelilis de Totecotzin Jesucristo huan cachi oc xiquixmatiyacan Totemaquixtjicatzin Jesucristo. Huan ma sayó Jesucristo quiselijtiu nochi in mohuiscacualtziyo desde axcan huan sen nachipa. Huan ma ijcón mochihua. Amén.

## IN ACHTO TAJCUILOLAMATZIN TEN QUINIJCUILOHUILIJ IN TATITANIL SAN JUAN PARA IN TANELTOCANI DE NOCHI SENMANAHUAC

### In Tajtoltzin ten quitemaca nemilis

**1** Namechtajcuilohuilía de Yejuatzin ten technextilico de aconi Totajtzin Dios, huan Yejuatzin yejua in Cristo ten ipa yetinemía achtopa que nochi hualtzinehuac. Pero Yejuatzin nican talticpac ticacque huan ticyequitztoyaj ica toixtololohuan. Huan ticyequitilijque huan ticmatocacque ya ica tomahuan. Yejuatzin Cristo in Tajtoltzin ten quitemaca ne yec nemilis. <sup>2</sup> Porín ne inemilistzin de Cristo monextijtzinoco nican talticpac huan tejuan tiquitacque huan tictetapohuijque de nojón chipahuac nemilistzin de Cristo. Huan no tamechmatiltíaj namejuan de nijín chipahuac nemilistzin ten amo queman tamis. Ne nemilistzin de Cristo yetinemi ihuan Totajtzin Dios huan techmonextilijtzinoco ya nican talticpac. <sup>3</sup> Huan tamechtapohuíaj nochi de Cristo ten tiquitacque huan tamechtapohuíaj nochi de Cristo ten ticacque ya para que ijcón no namejuan xisepanpohuican tohuanme, ijcón queme tejuan yec melau tisepanpohuij ihuan Totajtzin Dios huan tisepanpohuij ihuan in Jesucristo Yejuatzin Iconetzin Dios. <sup>4</sup> Huan ijcón nochi nijín tamechtajcuilohuilíaj para que ma ijcón cachi oc momajxitijtiu namoyolpaquilis.

### Dios Yejuatzin in tanextzin

<sup>5</sup> Huan yejua nijín in tanojnotzalis ten Jesucristo techmachtij huan tamechmatiltía tejuan que to Dios Yejuatzin yec melau chipactzin tanextzin huan iixpantzinco Yejuatzin amo teyi ongac tajtacol queme yesquía tayohuayanilot. <sup>6</sup> Huan como tejuan tiqijtoaj que tisepanpohuij ihuan Yejuatzin huan tinemij oc tech in tajtacol den tayohuayanilot, ijcuacán sayó tixolopijitinemij san huan amo teyi ticchihuaj ten melau. <sup>7</sup> Pero como tejuan tinemij ica in chipactzin tanextzin de Dios ijcón queme Yejuatzin yetinemi tech ne chipactzin tanextzin, ijcuacán melau tisepanpohuij ya se huan ocsé, huan iesyotzin de Jesucristo Iconetzin Dios, yejua ne techchipautinemi de nochi totajtacol. <sup>8</sup> Pero como tejuan tiqijtoaj que amo ticpíaj tajtacol, ijcuacán timocajcayahuaj tejuan san, huan amo teyi ongac ten melau tech toyolijtic.

<sup>9</sup> Huan Yejuatzin Yolmelahuactzin huan ipa quichihuas tenica moyectencahuac. Ica ya nojón como timoteluilíaj ica ne totajtacoluan ihuan Dios, ijcuacán Yejuatzin techtapojpoluis den totajtacoluan huan techchipautinemis de nochi pitzotic ten ticpíaj. <sup>10</sup> Huan como tejuan tiqijtoaj que amo timotajtacolmacacque ya, ijcuacán ticchihuaj que Yejuatzin queme yesquía tacajcayauque, huan ijcón amo ticselíaj ne yec Tajtoltzin de Dios tech toyolijtic.

### Cristo totetajtohuijcatzin

**2** Noconetzitzin, yejua nijín ten namechijcuilohuilía tech nijín amatzin para que ma amo ximotajtacolmacacan. Pero tacán acsá motajtacolmaca, ijcuacán xicmatican que ticpíaj se naquen Totetajtohuijcau nepa iixpantzinco Totajtzin Dios, huan Yejuatzin ne in Jesucristo in Yolmelahuactzin. <sup>2</sup> Huan in Cristo technequix-

tiltico ica in miquilis den totajtacoluan. Huan amo sayó de tejuan totajtacoluan. Ta, no Cristo quixtahuac in tajtacol den nochi in talticpacuani.

<sup>3</sup> Huan tacán tiquintacamatinemij in tanahuatilme de Dios, ijcuacón ticmatocque que tejuan ticajsicaixmatque ya Dios. <sup>4</sup> Huan tacán acsá quijtoa ijcuín: “Nejua niquixmatoc ya Dios”, huan yejua ne amo quintacamatinemi in tanahuatilme de Dios, ijcuacón yejua ne sayó xolopijti san, huan amo teyi ongac ten melau tech iyolijtic. <sup>5</sup> Huan naquen quitacamatinemi ten Dios quimonequiltía, yejua ne hueyi melau que quiajsicatasojta Dios ca nochi niyolo. Huan cuac titatacamatinemij ihuan Dios, ijcuacón cuali ticmatocque ya que tipohuij ihuan Yejuatzin. <sup>6</sup> Huan como acsá quijtoa que yejua pohui huan quitacamatinemi Dios, ijcuacón monequi ma yejua ma chipaucanemi ijcón queme Cristo chipaucanemic nican talticpac.

### In yancuic tanahuatil

<sup>7</sup> Nocnihuan, amo namechijcuilohuilía se yancuic tanahuatil. Ta, namechijcuilohuilía de ne tanahuatil ten ipa achtopa ya nanquiplayaj ya cuac namejuan nanquineltocatihualajque. Huan ne tanahuatil yejua in mismo Tajtoltzin de Dios ten achtopa nanquiacaque. <sup>8</sup> Huan axcan namechtajcuilohuilía ica nijín tanahuatil de tetasojtalis, queme yesquía yancuic tanahuatil. Huan ne tetasojtalis ipa yec mochiutoc itech Cristo; huan no axcan mochiutoc namotech. Huan in tajtacol den tayohuayanilot panotoc ya huan in yec melau tanextzin de Dios techthauilijtoc ya.

<sup>9</sup> Huan como acsame quijtoaj que yejuan yetinemij tech in tanextzin de Dios huan no quitahuelitzinemij ninicniu, yejuan nojonques yetinemij oc tech in tajtacol den tayohuayanilot. <sup>10</sup> Pero como acsame quitasojtatinemij ninicniu, yejuan nojonques nemij ya ica in tanextzin de Dios, huan amo quitojtpehuaj ocsequin tech in tajtacol oc. <sup>11</sup> Huan como acsame quitahuelitzinemij oc ninicniu, yejuan nojonques pohuij oc tech in tajtacol, huan no yetinemij oc tech ne tajtacolnemilis den tayohuayanilot. Huan yejuan amo no quimatij can yohue porín in tajtacol den tayohuayanilot quinixpojyocuiltitoc.

<sup>12</sup> Namejuan noconetzitzin, namechtajcuilohuilía porín Dios namechtapojpoluij ya de namotajtacoluan, ica in chichualis den tocaytzin de Cristo. <sup>13</sup> Huan namejuan tetatme, namechtajcuilohuilía porín nancajsicaixmatque ya in Cristo ten ipa achtopa yetinemía ya desde cuac nochi hualtzinehuac. Huan namejuan, telpocame, no namechtajcuilohuilía porín nanquitanilijque ya in amocuali Satanás. Huan namejuan, coneme, no namechtajcuilohuilía porín nancajsicaixmatque ya in Totajtzin Dios.

<sup>14</sup> Huan namejuan tetatme, no namechtajcuilohuilía porín nancajsicaixmatque ya in Cristo ten ipa achtopa yetinemía ya desde cuac ne tzinpehuac nochi. Namejuan, telpocame, no namechtajcuilohuilía porín no nanyolmajsitocque ya huan nanquiselijque ya in Tajtoltzin de Dios tech namoyolijtic huan no nanquitanilijque ya in amocuali Satanás.

<sup>15</sup> Huan no namechilía ijcuín: Amo xictasojtacan in tajtacolnemilis de nican talticpac nión teyi ten ehua itech ne tajtacolnemilis. Porín como nanquitasojtaj ne tajtacolnemilis de nican talticpac, ijcuacón amo nanquitasojtaj in Totajtzin Dios. <sup>16</sup> Amo teyi ongac tajtacolnemilis ten hualehua de Totajtzin Dios. Ta, sayó hualehua itech ne amocuali Satanás. Huan in tajtacolnemilis techmactilisnequi nochi nijín; yejua ne tanejnequilis den pitzotic ten ehua itech in tonacayo; huan yejua ne taixnejnequi-



lis cuac quiyocolitaj in toixtololohuan; huan yejua ne mohueyinequilis ten ehua itech míac tataman de se quipixtoc. Nochi nijín hualehua itech ne tajtacolnemilis. <sup>17</sup> Huan nochi in tajtacolnemilis tantiu ya ihuan nochi nijín tanejnequilis de pitzotic ten itech pohui. Pero ne naquen quichiutinemi ten quimonequiltía Dios, yejua ne nachipa yetotiu iixtenojtzinco Totajtzin Dios.

### **In tajtolme ten yec melau huan in tajtolme ten xolopijyot san**

<sup>18</sup> Noconetzitzin, axcan tantiyohue ya in tonalme. Huan namejuan nanquicacque ya que hualasque acsame ten quixnamiquisque in Cristo Jesús. Huan axcan namechyequilía que monextijque ya miacque ten quixnamictinemij in Cristo. Ica ya nojón cuali ticmatocque ya que tantiyohue ya in tonalme. <sup>19</sup> Huan ne ten quixnamictinemij in Cristo, yejuan nojonques tohuan pohuáj que taneltocani, pero quisque huan mosecocaque de tejuan ten titaneltocanij porín amo yec melau tohuan pohuáj. Tajcón ne taixnamiquini ma yec pohuinij tohuanme, ijcuacán yejuan de yec melau ijcón quisentocasquáj tohuanme. Pero yejuan quisque huan mosecocaque de tejuan den titaneltocani. Huan ijcón mochihuac para ma yec mota que yejuan amo queman yec poutinemíaj tohuanme.

<sup>20</sup> Huan in Cristo namechtayocolij ya in Yecticatzin Espíritu de Dios itech namoyolijtic. Ica ya nojón namejuan nanquimatij nochi in tamachilis de Dios. <sup>21</sup> Huan axcan namechtajcuilohuilía porín nanquimatij ya in melahuac Tajtoltzin de Dios. Amo namechtajcuilohuilía porín amo nanquipíaj in melahuac Tajtoltzin de Dios. Ta, cuali nanquimatij ya que amo teyi ongac tacajcayahualis ten itech ehua in yec melahuac Tajtoltzin de Dios.

<sup>22</sup> Huan, ¿aconi yejua ne tecajcayaucatagat? Yejua ne se tecajcayaucatagat ten quijtoa que Jesús amo Yejuatzin in Cristo Temaquixtijque. Yejua ne tacajcayaucatagat ten quixnamiqui in Cristo huan no quisenmajpehua in Totajtzin Dios huan no quisenmajpehua Jesucristo, Yejuatzin Iconetzin Dios. <sup>23</sup> Huan nochi neques ten quimajpehuaj Iconetzin Dios, yejuan nojonques amo no pohuij ihuan Totajtzin Dios. Huan nochi neques ten quiequijtoaj que in Cristo Yejuatzin Iconetzin Dios, yejuan nojonques yec poutinemij ihuan Totajtzin Dios.

<sup>24</sup> Ica ya nojón xicyecpiacan tech namoyolijtic in melahuac Tajtoltzin de Dios, huan xictacamatiyacan nochi nijín tajtolme ten nanquicacque ya desde ne queman ya cuac yequinica namechtapohuijque. Huan como mocahua tech namoyolijtic nochi nijín tajtolme, ijcuacán namejuan cuali nanpoutinemij ihuan in Cristo de Iconetzin Dios, huan ijcón no nanpoutinemij ihuan Totajtzin Dios. <sup>25</sup> Huan Jesucristo techyequilijtehuac nijín tajtol de que Yejuatzin moyectencahuac ya de techaxcatilis in yec nemilis ten amo queman tamis.

<sup>26</sup> Huan namehijcuilohuilía nochi nijín tajtolme huan ijcón namechmatiltía para que xiquixmatican neques ten quinequisque namechcayahuasque. <sup>27</sup> Huan namejuan nanquipíaj ya tech namoyolijtic in Yecticatzin Espíritu ten namechaxcatilij ya Jesucristo. Ica ya nojón amo monequi aca ma namechmachtis oc de Yecticatzin Espíritu, porín in Yecticatzin namechmachtía nochi tensá tataman. Huan Yejuatzin namechmachtía nochi ten melahuac huan amo tecajcayahua. Ica ya nojón xicsentocacan xictacamatinemican nochi ten namechmachtía in Yecticatzin Espíritu.

<sup>28</sup> Huan axcan, nopiluantzitzin, xictacamatinemican huan ximajsitinemican ihuan in Cristo para que ijcón nanquipiasque ne yolchicahualis cuac Yejuatzin monexti-

jtzinoquiu nican talticpac. Huan para ma amo nanmopinautisque queman ocsepa mohualucas Yejuatzin in Jesucristo. <sup>29</sup>Huan nanquimatocque ya que in Jesucristo Yolmelahuactzin. Huan no ximatocan que nochi neques ten quichiutinemij ten Dios quimonequiltía, yejuan nojonques teconehuan de Dios.

### Teconehuan de Dios

**3** Xiquitacan san de queniu tel techtasojta in Totajtzin Dios. Ica ya nojón Yejuatzin techtocaytía tiiconehuan de Dios. Huan melau tejuan tiiconehuan de Dios. Ica ya nojón in talticpactaca ten amo taneltocaj, yejuan nojonques amo techixmatij que tejuan tiiconehuan de Dios porín amo no quixmatij Totajtzin Dios. <sup>2</sup>Notasojicnihuan, axcan ya tiiconehuan de Dios, huan ayamo monextía quenín tiyesque. Pero ticmatocque ya que cuac Cristo monextijtztinoquiu, ijcuacón tejuan titamatisque queme Yejuatzin tamati porín tiqitasque in Cristo queme Yejuatzin cualnesi. <sup>3</sup>Huan nochi ne taneltocani ten quiyeccháj que no cualnesisque queme Cristo, yejuan nojonques mochipautiyohue ninnemilis ijcón queme Jesucristo chipactzin.

<sup>4</sup>Huan nochi neques ten quichiutinemij in tajtacol, yejuan nojonques Dios quintechía que elihuiscataca. Huan cuac se elihuistitinemi, ijcuacón se motajtacolmaca.

<sup>5</sup>Huan nanquimatocque ya que in Cristo monextijtztinoco nican talticpac para techajchihuilis totajtacoluan. Huan no nanquimatocque ya que amo teyi ongac tajtacol itech Yejuatzin. <sup>6</sup>Ijcón nochi ne taneltocani ten quitacamatinemij huan majsitinemij ihuan Cristo, yejuan nojonques amo quichiutinemij oc in tajtacol. Pero nochi neques ten motajtacolmacatinemij, yejuan nojonques amo queman quitilijque itanextililisan de Cristo nión no quixmatque in Cristo Temaquixtijque. <sup>7</sup>Nononetztzin, ma amo aca namechcajayahua. Porín neques ten quichiutinemij ten Dios quimonequiltía, yejuan ne yec yolmelauque ya ijcón queme Yejuatzin Yolmelahuactzin. <sup>8</sup>Huan nochi neques ten quichiutinemij in tajtacol, yejuan nojonques pohuij oc ihuan in amocuali Satanás. Porín in amocuali, yejua ne ipa tajtacle desde cuac ayamo hualtzinehuac in talticpac. Ica ya nojón monextijtztinoco in Teconetzin de Dios para quinuejuelos in chicahualisme den amocuali Satanás.

<sup>9</sup>Huan amo aca quichiutinemij in tajtacol como yancuicayolij de Dios, porín ne iijyoyo de Dios yec yetoc ya itech ninyolijtic. Huan yejuan amo huelij oc quichiutinemisque tajtacol porín yancuicayolque ya de Dios. <sup>10</sup>Huan moixmatij neques den melau iconetzitzin de Dios ijcuín: nochi neques ten pohuij ihuan Dios, yejuan nojonques quitacamatinemij ten Dios quimonequiltía huan quintasojtatinemij nintasojicnihuan. Huan no moixmatij ne den iconehuan den amocuali Satanás porín yejuan nojónques amo ijcón quichiutinemij.

### Ma timosepantasojtacan se huan ocsé

<sup>11</sup>Huan yejua nijín in tanojnotzalis ten achtopa ya namechcaquiltijca de que ma timosenpantasojtacan se huan ocsé. <sup>12</sup>Huan ma amo xicchihuacan queme ne tagat Caín quichihuac. Yejua pohuiaya ihuan in amocuali Satanás; ica ya nojón quimictij iicniu. Huan, ¿queyé ne Caín quimictij iicniu? Pues ne Caín quimictij iicniu porín ne Caín quichiutinemic chihualisme ten pitzotic, huan porín ne iicniu quichihuaya ten yec melahuac.

<sup>13</sup>Nocnihuan, amo xicmoucaitacan cuac in talticpactaca namechtahuelitasque.

<sup>14</sup>Porín tejuan ticmatocque ya que tiquisque ya den chicahualis den miqulilis huan

tipanocque ya para tiyecyetsosque ya itech ne nachipa nemilis. Huan cuali ticmatij que ijcón mochihuac porín tiquintasojtaj in tocnihuan. Huan nochi neques ten amo quitasojtaj ninicniu, yejuan nojonques nejnentocque oc huan tzijtzicautocque oc tech in chicahualis den miqulil. <sup>15</sup> Huan nochi neques ten quitahuelitaj ninicniu, yejuan nojonques temictiani ya. Huan ijcón namejuan cuali nanquimatocque ya que in temictiani amo huelis quipiasque tech ninyolijtic ne nemilis ten amo queman tamis.

<sup>16</sup> Huan tiqixmatque toni quijsosnequi in tetasojtalis ijcuín: Yejuatzin Cristo quitemacac ninemilis huan Yejuatzin momiquilij toixpatca. Huan no ijcón tejuan monequi ma tictemacasque tonemilis para que ijcón tiqinpalehujitinemisque in tocnihuan. <sup>17</sup> Huan sequin tocnihuan quipíaj míc tenica motequipanosque nican talticpac. Huan tacán yejuan quitasque se tocniu ten amo teyi quipía, huan como amo quipalehuáj, yejuan nojonques amo quipiasque tech ninyolijtic ne tetasojtalis de Dios como amo teyi ica quipalehuáj. <sup>18</sup> Noconetzitzin, ma amo titetasojtacan sayó ica totajtoluan san nión sayó ica ten tiqijtoaj ica tonenepil. Ta, de yec melau ma titetasojtacan ica nochi ten ticchiutinemij.

### Ma ticpiacan ne yolchicahualis iixpantzinco Dios

<sup>19</sup> Huan como ticpiáj ne tetasojtalis, ijcuacán cuali ticmatocque ya de que tipohuij ihuan ne yec melahuac Tajtoltzin de Dios. Huan ne tetasojtalis yejua ne techyolsehuis ya iixpantzinco Dios, como toyolo amo techteluilía ica tensá tajtacol. <sup>20</sup> Porín Totajtzin Dios ojcahi oc hueyi huan que ne teluililis den toyolo porín Yejuatzin nochi quimati ten ticchiutinemij. <sup>21</sup> Huan ijcón, notasojicnihuan, como toyolo amo techteluilía ica tensá tajtacol, pues ijcón ticpiáj ne yolsehulis iixpantzinco Dios. <sup>22</sup> Huan como toyolo amo techteluilía oc ica tensá tajtacol, ijcuacán Yejuatzin techmactilis nochi ten tictajtanisque, porín tiquintacamatinemij nintanahuatilan huan porín ticchiutinemij nochi ten Yejuatzin quimonequiltía. <sup>23</sup> Huan ne tanahuatil de Dios yejuan nijín: Ma titacuautamatican ihuan ne tocaytzin den Iconetzin Dios, huan nijín Yejuatzin in Jesucristo. Huan no ma timosepantasojtacan se huan ocsé ijcón queme Yejuatzin technahuatiliz ya. <sup>24</sup> Huan nochi neques ten quitacamatinemij in tanahuatil de Dios, yejuan nojonques majsitinemij ya ihuan Yejuatzin huan Dios no inuan majsitinemi. Huan ticmatocque ya que Yejuatzin yetica tech toyolijtic porín Yejuatzin techtayocolij ya in Yecticatzin Espíritu.

### In Yecticatzin Espíritu huan in amocuali ejecame ten quixnamiquij Cristo

**4** Notasojicnihuan, amo xiquinnetoquilian nochi ne tamachtiani ten quijtoaj que yejuan quipíaj in chicahualis de Dios. Ta, achto xiquinyectemolican nintamachilisuan de que cox melau quipíaj in chicahualis de Dios oso amo. Porín miacque tamachtiani tacajcayahuan nentinemij nican talticpac huan yejuan quijtoaj que no tajtoaj itencopa Totajtzin Dios. <sup>2</sup> Huan cuali huelis nanquinixmatisque neques tamachtiani ten quipíaj in Yecticatzin Espíritu tech ninyolijtic. Nochi neques ten quiyecquijtoaj que in Jesucristo monacayotijtzinoco nican talticpac queme yec melau tagat, yejuan nojonques quipíaj in chicahualis de Dios. <sup>3</sup> Huan nochi ne tamachtiani ten amo quiyecquijtoaj que Jesucristo monacayotijtzinoco nican talticpac, yejuan nojonques amo quipíaj in Yecticatzin Espíritu. Ta, yejuan quipíaj tech ninyolijtic ne amocuali ejecame ten quixnamiquij in Cristo. Namejuan nanquicacque

ya que hualasque sequi amocuali ejecame taixnamiquini de Cristo; huan melau axcan nentocque ya nican.

<sup>4</sup>Nocone huan, namejuan nanopohuij ya ihuan Totajtzin Dios. Ica ya nojón nanquintanilijque ya ne tamachtiani tacajcayahuani, porín Totajtzin Dios yetica tech namoyolijtic huan Yejuatzin cachi chicahuac huan ne amocuali ejecame amo quipíaj chicahualis. <sup>5</sup>Huan yejuan ne tacajcayahuani tamachtiani pohuij nican talticpac. Ica ya ya nojón yejuan tajtoaj de tajtacolnemilis de nican talticpac huan in talticpacuani quinquacuilíaj. <sup>6</sup>Pero tejuan tipohuij ihuan Dios. Ica ya nojón nochi neques ten quixmatij Totajtzin Dios, yejuan nojonques no techcaquilíaj. Huan nochi neques ten amo pohuij ihuan Dios, yejuan nojonques amo techcaquilíaj. Huan ijcón cuali tiquixmatocque ya aconi quipíaj in chicahualis ten melau huan aconi quipíaj in chicahualis den amocuali ejecame ten sayó tecajcayahuaj.

### **Totajtzin Dios Yejuatzin ne tetasojtalis**

<sup>7</sup>Notasojicnihuan, monequi ma timosepantasojtacan se huan ocsé porín ne tetasojtalis hualeutoc de Totajtzin Dios. Nochi neques ten tetasojtatinemij, yejuan nojonques tanextijtinemij que yancuicayolque ya de Dios huan tanextijtinemij que quixmatocque ya Totajtzin Dios. <sup>8</sup>Huan nochi neques ten amo tetasojtatinemij, yejuan nojonques tanextijtinemij que amo quixmatque Totajtzin Dios, porín to Dios Yejuatzin tetasojtatinemi. <sup>9</sup>Huan Dios technextilij ya ne itetasojtalistzin ijcuín: Dios techualtitanilij ya ne iyojtzin Conetzin nican talticpac para ma tejuan ticpiacan ne nachipa nemilis ica ne chicahualis de Cristo. <sup>10</sup>In tetasojtalis de Dios monextijtinemi ijcuín, que amo tejuan achtopa tictasojtacque Totajtzin Dios. Ta, achto Yejuatzin techtasojtac tejuan. Huan Yejuatzin techualtitanilij Niconetzin yojtzin para ma Yejuatzin technequixtiltiqi ca in miquilis den totajtacoluan.

<sup>11</sup>Notasojicnihuan, como Dios ijcón techtasojtac, ijcuacón monequi tejuan no ma timosepantasojtacan se huan ocsé. <sup>12</sup>Amo queman acsame quitacque Totajtzin Dios. Pero como tejuan timosenpantasojtaj se huan ocsé, ijcuacón Totajtzin Dios yecyetoc ya tech toyolijtic. Huan no ne tetasojtalis de Dios momajxitijtiu huan momoyauti tech toyolijtic.

<sup>13</sup>Huan Totajtzin Dios techtayocolij ya in Yecticatzin Espíritu. Ica ya nojón ticmatocque ya que tipohuij ihuan Cristo huan no ticmatocque que in Cristo pohui tohuan. <sup>14</sup>Huan tejuan tiquitacque ya in Cristo huan tamechmatiltíaj que in Totajtzin Dios cualtitanic Niconetzin para ma Yejuatzin quinmaquixtiqi in talticpacuani. <sup>15</sup>Huan nochi neques ten quiyecquijtoaj que Jesús Yejuatzin Niconetzin Dios, pues yejuan nojonques pohuij ya ihuan Dios huan itech ninyolijtic yecyetica Totajtzin Dios.

<sup>16</sup>Ica ya nojón tejuan ticajscimatque ya huan titacuautamatque ya de que Dios techtasojta. Huan Totajtzin Dios tetasojta. Huan nochi neques ten nentinemij ica ne tetasojtalis, yejuan nojonques no majsitinemij ihuan Dios huan Dios no ninuan majsitinemi. <sup>17</sup>Huan ijcón momajxititiu ne tetasojtalis para ma amo teyi ticpolocan tech toyolijtic. Huan ijcón ticpiasque ne yolchichahualis cuac techajsis ne tonal den hueyi tatzacuilitis. Huan tejuan monequi ma tinemican nican talticpac ica ne tetasojtalis de Dios, ijcón queme Cristo chipaucanemic ica tetasojtalis. <sup>18</sup>Porín campa ongac tetasotalis, ompa amo ongac teyi moucayot. Huan ne tetasojtalis ten momajxitij ya, yejua ne quicalantamota ne moucayot. Huan in moucayot cuica in tajyohuilis

itech yejua san. Ica ya nojón nochi neques ten quipíaj moucayot, yejuan nojonques yec melau ayamo teyecajsicatasojtaj.

<sup>19</sup>Tejuan tictasojtaj Dios porín Yejuatzin achto techtasojtac. <sup>20</sup>Huan como acsá quijtoa ijcuín: “Njua nictasojta Dios”, huan yejua no quintahuelita oc niicnihuan taneltocani, ijcuacán yejua ne sayó xolopijti san. Huan como tejuan amo tiquinyec-tasojtaj in tocnihuan taneltocani ten tiquinyequitztocque ya, pues ijcón tejuan amo no huelis tictasojtasque Totajtzin Dios porín Yejuatzin amo huelis tiquitztinemij. <sup>21</sup>Yejuatzin techmacac itanahuatil ijcuín: Nochi neques ten quitasojtaj Dios, yejuan nojonques no monequi ma quintasojtacan ninicnihuan.

### Tejuan tictanilisque in tajtacolnemilis

**5** Huan nochi neques ten tacuautamatinemij de que Jesús Yejuatzin in Cristo Temaquixtijque, yejuan nojonques yancuicayolque ya de Dios. Huan nochi neques ten quitasojtaj Totajtzin Dios ne Teiscaltijcatzin, yejuan nojónques no quintasojtaj nochi itaneltocacahuan nochi ten Dios quiniscaltij huan ten quinyancuicay-olijti ya. <sup>2</sup>Huan cuac tictasojtaj Dios huan ticchiutinemij ten Dios technahuatílía, ijcuacán ticyematocque ya que no tiquintasojtaj ne den niconehuan Dios. <sup>3</sup>Huan nestinemi que melau ticpíaj ne tetasojtalis de Dios, cuac no tictacamatiy ya in tanahu-atil ten Dios technahuatílía ma ticchiutinemican. Huan in tanahuatilme de Dios amo techmachililtía que cox semi ohui para se quintacamatinemis. <sup>4</sup>Pero nochi neques ten yancuicayolque ya de Dios, yejuan nojonques quitanilijtiyohue ya ne tajtacol-nemilis de nican talticpac. Huan ijcón ica totacuautamatis tictanilijtiyohue ya ne tajtacolnemilis. <sup>5</sup>Huan nochi neques ten yec tacuautamatinemij que Jesucristo Yeju-atzin ne Niconetzin Dios, yejuan nojonques quitanilijtiyohue ya ne tajtacolnemilis de nican talticpac.

### Techmatiltía de aconi Iconetzin Dios

<sup>6</sup>Yejuatzin Jesucristo huala monextijtzinoco nican talticpac huan moahuij ica at; huan no quitemacac niesyotzin cuac momiquili tech in cruztzin. Huan Jesu-cristo amo huala sayó para moahuis san. Ta, no para quimimilos niesyotzin tech in cruztzin. Huan in Yecticatzin Espíritu techajsicamatiltía nijín ten mochihuac ya. Porín in Yecticatzin Espíritu tajtoa sayó ica ten melau. <sup>7</sup>Ne eluiyactzinco yetocque eyi ten techajsicamatiltíaj: In Totajtzin Dios, huan Niconetzin Dios yejua in Taj-toltzin, huan in Yecticatzin Espíritu; huan nijín eyi mosenijtoaj sansé san. <sup>8</sup>Huan nican talticpac no yetocque eyin ten techajsicamatiltíaj: in Yecticatzin Espíritu, huan in atzin, huan in esti; huan nijín eyin mosenijtoaj sansé san.

<sup>9</sup>Huan amo ticneltocaj ne ten techajsicamatiltíaj den taca san. Pero ne ten Dios techajsicamatiltía, yejua ne semi cachi hueyi, porín Dios techilía sayó ne ten Yeju-atzin quitac ya. Huan Totajtzin Dios techmatiltía de ne Niconetzin. <sup>10</sup>Huan nochi neques ten yec tacuautamatinemij ihuan Niconetzin Dios, yejuan nojonques quipíaj ya tech ninyolijtic in Tajtoltzin tenica Dios quinajsicamatiltía. Huan nochi neques ten amo yec tacuautamatiy ihuan Dios, yejuan nojonques quichihuaj que in Yejuatzin queme yesquía se tacajcayauque san. Porín yejuan amo quineltoaj ne ten Tota-jtzin Dios quitetajtohuiltij huan techilijtoc de Niconetzin. <sup>11</sup>Huan yejua nijín in Taj-toltzin ten Dios techajsicamatiltía: Dios techtayocolij ya in yec nemilis ten amo que-man tamis huan ne nemilis hualeutoc de Cristo den Niconetzin Dios. <sup>12</sup>Huan nochi

neques ten moaxcatilíaj Niconetzin Dios tech ninyolijtic, yejuan nojonques moaxcatilíaj ne yec nemilis nachipa. Huan nochi neques ten amo moaxcatilíaj Niconetzin Dios tech ninyolijtic, yejuan nojonques amo no moaxcatilíaj ne yec nemilis ten amo queman tamis.

### **Tanemililisme tenica tamis nijín tajcuilolamatzin**

<sup>13</sup>Nochi nijín namechijcuilohuilía namejuan ten nantacuautamatiij ihuan Niconetzin Dios para ijcón xicyecmatian que nanquípíaj ya in yec nemilis ten amo queman tamis, porín nantacuautamatinemij ica ne chicahualis den nitocaytzin de Cristo. <sup>14</sup>Huan no ticpíaj ya se hueyi voltacuautamatis ihuan Dios porín ticmatij ya que como tictajtanilíaj Dios tensá ijcón queme yejua in itanejnequilis de Yejuatzin, ijcuación Totajtzin Dios techcaquilía. <sup>15</sup>Huan como ticyecmatocque ya que Dios techcaquilis den tonetatautilis, ijcuación no ijcón ticyecmatocque ya de que Dios techtayocolis nochi ten tictajtanilisque.

<sup>16</sup>Huan tacán namejuan nanquitaj se namocniu de que motajtacolmacatoc ica ne tajtacol ten amo ica se ixpolihuis, ijcuación monequi ma xictataautilican in-ahuactzin Yejuatzin huan ijcón Dios quimactilis oc ne tocnui in nemilis de nican talticpac como amo quichihuac ya se tajtacol tenica se ixpolihuis. Pero ongac tajtacol ten melau ica se ixpolihuis, huan ne taman tajtacol amo namechyoltanemililtía ma xictatautican Dios para ma Yejuatzin quitapojpolui. <sup>17</sup>Huan nochi in amocuali chicahualisme nochi yejuan cualcuij tajtacol; pero ongac tajtacol ten amo ica se ixpolihuis. <sup>18</sup>Ticyecmatocque ya que nochi neques ten yancuicayolque ya de Dios, yejuan nojonques amo motajtacolmacatinemij oc, porín Cristo in Teconetzin de Dios quinyecpixtoc ya; huan in amocuali Satanás amo teyi hueli ica quincococoa. <sup>19</sup>Tejuan ticyecmatocque ya que tipohuij ihuan Dios, pero nochi in talticpacuani quinyecana oc yejua in amocuali Satanás.

<sup>20</sup>Huan ticyecmatocque ya que huala ya Niconetzin Dios, huan Cristo techajscamatiltico ya huan techixmatiltico ya de Totajtzin Dios, Yejuatzin in Yolmelahuactzin. Huan tipoutocque ya ihuan in yec melau Dios; huan no tipoutocque ya ihuan Jesucristo de Niconetzin Yejuatzin Dios. Cristo in yec melau Dios huan no quipixtinemi ne yecnemilis ten amo queman tamis. <sup>21</sup>Noconetzitzin, cuali ximotachilican den ne tatadiosme tamachiuchime. Ma ijcón mochihua. Amén.

## ICA OME TAJCUILOLAMATZIN TEN QUINIJCUILOHUILIJ IN TATITANIL SAN JUAN PARA NOCHI IN TANELTOCANI DE NOCHI SENMANAHUAC

### In melahuac Tajtoltzin huan ne tetasojtalis

**1** Nejua ya ni Juan nitiopanhuehuentzin huan nitayecanque den taneltocani. Huan nimitzijcuilohuilía tejuatzin den tinocnitzin sihuat, ten tejuatzin titaijital de Dios, ijcón queme niqiniijcuilohuilía moconeahuan. Huan nejuatzin namechyectasojta nochi namejuan. Huan amo sayó nejua namechyectasojta. Ta, nochi neques ten quixmatocque ya in melahuac Tajtoltzin de Dios, yejuan nojonques no namechyectasojtaj. <sup>2</sup> Huan no tamechyectasojtaj porín ticpiáj ya tech toyolijtic in yec melau Tajtoltzin. Huan nijín Tajtoltzin yejua ne tohuan yetos sen nachipa. <sup>3</sup> Huan Totajtzin Dios huan Totecotzin Jesucristo, Yejuatzin Iconetzin Dios, ma Yejuatzin namechti-ochiuto huan ma namechtoyocoli ne teicnelilis huan ne yolsehuilis, ijcón queme namejuan nanmelaucanemij huan nantetasojtatinemij.

<sup>4</sup> Huan semi niyolpaqui porín nejua niqinajsic sequi de moconeahuan taneltocani. Huan yejuan yec chipaucanemij, ijcón queme techmachtía in melahuac Tajtoltzin, huan ijcón queme Dios technahuatiliz ma ticchiutiyacan. <sup>5</sup> Huan axcan, nocnitzin sihuatzin, tel senca nimitzontatautía de que ma timosepantasojtacan se huan ocsé. Huan nochi nijín ten nimitzijcuilohuilía amo se yancuic tanahuatil. Ta, ipa ne tanahuatil ten nanquiplayaj ya desde ne cuac yequinica namejuan nanquineltocacque. <sup>6</sup> Huan ne tetasojtalis de Dios yejua nijín: Ma tictacamatican ica ne tanahuatil de Dios. Huan in tanahuatil de Dios yejua nijín: Ma xinentinemican ica ne tetasojtalis ijcón queme ipa achtopa nanquicacque.

### In tacajcayahuani

<sup>7</sup> Huan miacque tacajcayahuani tacalpanojtinemij axcan nican talticpac. Huan nojonques quiyectenehuaj que in Jesucristo amo monacayotico nican talticpac queme yec melau se tagat. Huan nochi neques ten ijcón tamachtijtinemij, yejuan nojonques tacajcayahuani san huan taixnamiquini de Cristo. <sup>8</sup> Huan namejuan cuali ximotachilican de nojón tacajcayahuani para ma amo ximopolohuilican in taquilot den namotequiui ihuan in taneltocani. Ta, nicnequi ma xicselican ne tetayocolil den cuali ajsitoc.

<sup>9</sup> Huan nochi neques ten tamachtijtinemij huan quipanahuáj in tamachtilis de Cristo, yejuan nojonques amo quichiutinemij in tamachtilis ten Cristo technextilía, huan yejuan amo no quipíaj tech ninyolijtic in chicahualis de to Dios. Huan nochi neques ten quitacamatinemij ne tamachtilis ten Cristo technextilía, yejuan nojonques quipíaj tech ninyolijtic in Totajtzin Dios huan no Iconetzin Dios. <sup>10</sup> Huan como acsame namehcalpanoquij huan amo cualcuij in tamachtilis de Cristo, ijcuacán namejuan amo xiquinselican tech namocalijtic campa nanmosentilíaj para nanquimohuistilisque Dios, huan nión no xiquintajpalocan. <sup>11</sup> Porín ne ten quintajpaloaj in tacajcayahuani, yejua ne ninuan poutoc ya in amocuali chihualisme ten ne tacajcayahuani cualcuij.

**Tajtolme tenica tamis nijín tajcuilolamatzin**

<sup>12</sup> Míac tensá nicpía oc para namechilis, pero amo nicnequi nicchihuas sayó ica amat huan ica tinta. Pues nejua nicnequi niyás namechitatu huan namechsepannojnotzatiu para que ijcón in topaquilis ma moyecmajxiti. <sup>13</sup> Mitztajpaloaj iconehuan de mosihuaicniu, yejua no taijital de Dios. Ma ijcón mochihua. Amén.



## ICA EXPATICA TAJCUILOLAMATZIN TEN QUINIJCUILOHUILIJ IN TATITANIL SAN JUAN PARA IN TANELTOCANI DE NOCHI SENMANAHUAC

### In tatitanil San Juan quicualtagapohua in Gayo

**1** Nejua ya ni Juan nitiopanhuehuentzin huan nitayecanque den taneltocani; nimitzjcuilohuilí tejuatzin ten tinotasojicniu Gayo, ten nimitzjvectasojta.

<sup>2</sup>Notasojicniztin, nimotatautilía ihuan Dios ma Yejuatzin mitzpalehuijtiu tech monemilis huan no ma cuali xionpacto, ijcón no queme motacuatamatilis ma moscaltijtiu tech motalnamiquilis. <sup>3</sup>Huan semi niyolpaquic cuac hualajque sequi tocnihuan nechcalpanocoj huan nechmatiltijque de tejuatzin de que tejua se titacuatamatcatagat huan tiyecchipaucanemi itech in melahuac Tajtoltzin. <sup>4</sup>Huan amo teyi ongac ocsé paquilis ten cachi nechpactía cuac nicaqui que noconehuan taneltocani de que chipaucanentinemij itech in yec melahuac Tajtoltzin de Dios.

<sup>5</sup>Notasojicniztin, cuali ticchihua queme se tacuatamatcatagat cuac tiquinpalehuía in taneltocani. Huan cachi cualtzin ne tapalehuilis cuac tiquinpalehuía in taneltocani ten ocseco cayome. <sup>6</sup>Nojón tocnihuan techtapohuijque nican taixpan den taneltocani queniu tejua tiquintasojtac. Huan cachi oc xitechonchihuili se cualtagayot de que no xiquinpalehuijtiu ne taneltocani ten quinpolea tech ninojtocalis, ijcón queme Dios quimonequiltía. <sup>7</sup>Huan nojón tocnihuan moquetzteuque huan motequitiltijque sayó porín quitasojtaj Jesucristo. Huan amo teyi quiseliteuque tapalehuilis de neques ten amo quixmatij Dios. <sup>8</sup>Ica ya nojón tejuan technamiqui tiquinselisque huan tiquinpalehuisque nojón tocnihuan, porín yejuan no totequiti-caicnihuan tech in tamachtilis den melahuac Tajtoltzin de Dios.

### Diótfrefes techixnamiqui

<sup>9</sup>Niquinjcuilohuilía se amat in taneltocani campa tejuatzin tionyetoc. Huan Diótfrefes quiselij noamau pero amo quitacamati totanahuatil, porín yejua quinequi mopohuas tayecanque ninuan. <sup>10</sup>Ica ya nojón tacán niyás namechcalpanotiu nejua nicyequixilis ne Diótfrefes de queniu yejua techtajtolchihuilijtinemi huan no de queniu toca xolopijtijtinemi. Huan amo sayó yejua nojón quichiutoc in Diótfrefes. Ta, no amo quinselía in tocnihuan ten ajsij ompa. Huan quintacahualtía in taneltocani ma amo quinselican ne ojyani. Huan no quincalanquixtía in taneltocani ten quinequij quinselisque ne tocnihuan ojyani.

<sup>11</sup>Notasojicniu, amo xicchiutinemi ijcón queme ne ocsequin ten quichiutinemij ten amo cuali. Ta, xicchihua ten cuali. Nochi neques ten quichihuj ten cuali, yejuan nojonques ne pohuij ihuan Dios; huan neques ten quichihuj ten amo cuali, yejuan nojonques Dios amo quinxmati.

### In chipaucanemilis de Demetrio

<sup>12</sup>Nochi in tocnihuan techyectapohuáj que Demetrio chipaucanemi. Huan no in Tajtoltzin de Dios quiyecnextía que Demetrio chipaucanemi. Huan nejua no ijcón nicyectenehua que Demetrio chipaucanemi; huan namejuan nanquimatocque ya que yec melau ten tamechilía.

**Tajtolme tenica tamis in tajcuilolamatzin**

<sup>13</sup> Míac tensá nicpía oc para nimitzilis, pero amo nicnequi nimitztajcuilohuilis ica tinta huan ica pluma san. <sup>14</sup> Porín nejua nicnequi nimantzin nimitzitas. Huan cuac niajsis ya, ijcuacón timosepannojnotzasque.

<sup>15</sup> Huan xicpía yolsehuilis. Huan in totasojicnihuan de nican mitzontajpaloaj. No nicnequi xiquinontocaytajpalo nochi in totasojicnihuan ten mohuan yetocque.

## IN TAJCUILOLAMATZIN TEN QUINIJCUILOHUILIJ IN TATITANIL SAN JUDAS PARA IN TANELTOCANI DE NOCHI SENMANAHUAC

### Judas quinijcuilohuilía de nochi neques ten Dios quinijitac ya ma ihuantzin poutinemican

**1** Nejua ya ni Judas nitequitique de Jesucristo huan niicniu de Jacobo. Huan niquintajcuilohuilía nochi neques ten Totajtzin Dios quinnotzac ya ma ihuantzin poutinemican, ijcón queme Yejuatzin no quintasojtac ya huan quinyolchiphahuac ya. Yejuan nojonques quinyecpixtoc Jesucristo porín ihuantzin poutocque. <sup>2</sup>Huan tech namotalnamiquilis ma momiactilijtiu ne teicnelilis huan ne yolsehuilis huan ne teta-sojtalis ten Totajtzin Dios techmactilía.

### Neques tamachtiani ten tanextilijtinemij ica tacajcayahualis san

<sup>3</sup>Notasojcnihuan, semi nicyolnequiaya namechtajcuilohuilis de totemaquixtilis ten namejuan nanquipíaj ijcón queme tejuan no ticpíaj ya. Pero axcan semi monequi ma namechtatautía que ximotajtoltenpalehuijtiyacan ica in Tajtoltzin de Dios para ma amo namechcuetahuiltilisque namotacuautamatilis. Porín ne tacuautamatilis Dios sepa san techaxcatilij ya para nochi tejuan tiitaneltocacahuan ten tipoutinemij ihuantzin Totajtzin Dios. <sup>4</sup>Huan sequi taca ica ne tacajcayahualis ichtacatzin calacque campa namejuan nanmosentilíaj. Huan yejuan nojonques desde ne achtopa ya Dios quinixtalij ya ica nitajtoltzin para ma yejuan huetzican tech ne tatelchihualis ten quinnamiqui. Ne taca tamohuispoloani san, huan in teicnelilis de Dios yejuan quiahuiltenehuaj. Huan ica ne teicnelilis mopalehuíaj ojcatchi oc yejuan ma nentinemican tech in tajtacolnemilis. Yejuan quimajpehuaj Jesucristo, naquen To-tayecancatzin huan Totecotzin.

<sup>5</sup>Masqui namejuan cuali nanquimatocque ya, pero nejua nicnequi namechelnamictis que in Totecotzin quinmaquixtij ipueblojcahuan de Israel cuac Yejuatzin quinquixtij itech ne país Egipto. Pero niman Dios quinixpolojtiyaya nochi neques ten amo ihuantzin yec tacuautamatque. <sup>6</sup>Huan xiquelnamiquican de ne ángeles ten amo yolcualime, yejuan nojonques amo quinequíaj tequitisque oc tech nintayecanalís ijcón queme Dios quinnahuatilij. Ta, yejuan quiseccocauque ninchantzin tech ne eluiyac. Ica ya nojón Dios quinyecsecotalijtoc ya queme presos ne ángeles tech ne tayohuayanilot campa ilpitocque ca cadenas sen nachipa hasta queman in tonal cuac quinajsiquiu ne hueyi tatelchihualis. <sup>7</sup>Huan no xiquelnamictiyacan de ne pueblojuani de Sodoma huan Gomorra huan ocsequin pueblos ten quinyehualojtoyaj. No ijcón yejuan ahuilnenque queme ne ángeles. Huan ne pueblojuani motemactijque tech in ahuilnemilis huan sayó mopitzonelojque ica in tajtacol de ahuilnemilis hasta tachiutinenque queme tapialme huan amo nemíaj oc queme taca. Huan yejuan nojonques Dios quinpojjolaj ya huan quinixtalij ya queme nescayot para nochi in talticpacuani. Huan ijcón Dios quintajyohuiltijtoc oc itech ne tatzacuilitis campa ne tit ten amo queman sehuis.

<sup>8</sup>Huan masqui ijcón Dios quichihuac ne achtopa ya pero ne tacajcayahuani axcan moyecantinemij tenica tacochitaj huan quisenpitzoticnelojque ya ninnacayo ca in tajtacolnemilis. Huan yejuan no quimajpehuaj in tanahuatil de Dios, huan quinte-

jtclchihuaj in huejueyi tayecanani de Dios. <sup>9</sup> Huan ne ángel Miguel tayecanque den ángeles, yejua ne amo ijcón quichihuac, cuac motajtoltehuiaya ihuan in amocuali Satanás. Ta, cuac ne Miguel motentajtolixnamictoya ihuan in amocuali Satanás ica ne inacayo de Moisés, ijcuacón ne Miguel amo moixehuij de quihuijuicaltis in amocuali Satanás. Ta, sayó quilij ijcuín: “Ma Dios mitztacahualti”. <sup>10</sup> Pero nojón tacajcayahuani, yejuan sayó taquejqueloaj ica míac tataman tanemililis ten yejuan mismo amo quimatij. Huan ne tacajcayahuani motajtacolmacatinemij queme yesquíaj ocuillime ten amo quimatilíaj quenín nesque. Huan ijcón yejuan quichiutinemij sayó queme nintanejnequilis san para ica mopolosque san.

<sup>11</sup> ¡Huan semi teicneltiani ne tacajcayahuani porín nentocque tech nintajtacolojan ijcón queme in Caín nemico! Huan yejuan sayó motemactijque itech ne tacajcayaucaojti de Balaam para motatanilíaj ca tomin. Huan yejuan ijcón no xpolihuisque ijcón queme xpolihuic in pueblojuani de Coré cuac yejuan quixnamicque Dios. <sup>12</sup> Huan queman namejuan nansepaniluitíaj ca ne tetasotalis, ijcuacón ne tacajcayahuani no huitze tamasehuaquij huan ijcón namechpinaucatalíaj ya. Porín yejuan san motacualíaj huan tahuanaaj ca paquilis huan ijcón quimohuispoloaj Dios huan in taneltocani. Yejuan quichihuaj queme ne tapiani ten sayó moyectapialíaj yejuan san. Nojón tacajcayahuani tamatij queme mixuac ten amo cualcui at, huan in ejecat cualcui huan cuica san. Nojonques tamati queme in cuoume ten amo teyi quitemacaj cuac monequi quitemacasquíaj. Huan ne tacajcayahuani queme yesquíaj cuoume ten ojpacahuaquij, porín achto huaquij cuac amo teyi taquij, huan niman huaquij queman quinuijuitasque. <sup>13</sup> Nojonques tacajcayahuani tamatij queme amixtepeme tamahuililme den mar ten quipijpisuáaj in posocti. No ijcón yejuan quipijpisuáaj in pitzotic chihualisme ten tepinautíaj. Huan ne tacajcayahuani tamatij queme yesquía in sitalinme ten quipolojque ya ninojpan. Huan para nojonques tacajcayahuani ejcotoc ya ne tonal queman in Totajtzin Dios quintatzacuultis ma yetotij para sen nachipa tech in tayohuayanilot ten cachi tilahuac.

<sup>14</sup> Huan Enoc nemía míac xihuit nicampatica de Adán huan yejua tajtoj ica Iijyotzin de Dios huan techyequilij de nijín tacajcayahuani ijcuín: “Niquitac hualajtoc ya in Totecotzin ihuan tel miacque itequiticahuan ten yolchipauque, <sup>15</sup> para ijcón nochí quinixcomacas huan quintelchihuas ne talticpacuani ten quimohuispoloaj Yejuatzin. Huan no Yejuatzin quintatzacuultijquiu nochí nojón tajtcolejque ten amo quixmatij Dios ica por ninahuilnemilis huan ninpitzoticnemilis. Huan Yejuatzin quintatzacuultis no porín ne tajtcolejque ten quihuijuicaltiyaj Dios huan quimohuispoloayaj Dios”. <sup>16</sup> Huan ijcón neques tacajcayahuani, yejuan moteteluiljtinemij san huan teijitotjinemij san huan sayó quichiutinemij queme yejuan monejnequiltíaj. Huan mohueyichiutinemij huan tzajtzitinemij ica mijmiquilo tajtol. Huan yejuan sayó tamohuiscanojnotzaj san para ijcón tensá motanilisque san.

### Tanejmachtilis para taneltocani

<sup>17</sup> Pero namejuan, notasoajicnihuan, xiquelnamictiyacan huan xicchihuacan cuenta de ne tanextililisme ten in tatitaniluan de Cristo namechnextilijque ya. Porín yejuan itequiticahuan den Totecotzin Jesucristo huan nijín in tajtol ten namechilijque ijcuín: <sup>18</sup> “Huan nepacatica cuac tantiyasque ya in tonalme, ijcuacón hualasque neques ten quiquejquelosque in chipahuac Tajtoltzin de Dios huan quichiutine-misque ten yejuan monejnequiltíaj tech in pitzotic nemilis”. <sup>19</sup> Yejuan nojonques

tequititinemij para ma mocualancaxeixelocan in taneltocani. Huan yejuan quichihuasque ijcón porín mopaquiltijtinemij san tech in tajtacolnemilis de nican talticpac huan porín amo quipfaj tech in ninyolijtic in Yecticatzin Espíritu.

<sup>20</sup> Pero namejuan notasojcinihuan, ximoyolmajxitijtiyacan ica ne chipahuac tacuautamatilis de Cristo. Huan ijcón nanquichihuasque cuac ximotatautilijtiyacan ica in chicahualis den Yecticatzin Espíritu. <sup>21</sup> Huan ximoyecpixtocan ica tetasojtalis de Dios huan xicyolicachiacan ne teicnelilis hasta ne tonal queman mohualuicas Totecotzin Jesucristo. Porín ijcuacán Yejuatzin techaxcatiliquiu in yec nachipanelilis. <sup>22</sup> Huan xiquintaneltoctican neques ten ixquequeptinemij san ica nintacuautamatilis. <sup>23</sup> Huan ne ocsequin ten amo chipaucanemij, yejuan nojonques xiquinmaquixtican huan xiquintecuilican de ne tit porín yejuan majyá queme yesquía motoquijque ya tech in mictan. Huan ne ocsequin ten amo chipaucanemij, yejuan nojonques xiquinicnelican. Pero no monequi xicmo huilican ninnemilis, huan xic-tahuelitacan nochi ten nintech pohui, para ma amo namejuan nanmomahuasque ica ne hueyi tajtacol.

### **Tatiochihualis tenica tamis nijín tajcuilolamatzin**

<sup>24-25</sup> Huan Yejuatzin setzin san Dios, in hueyi tamatque huan Totemaquixtijcatzin. Huan sayó Yejuatzin conpía huelilis para techyecpixtos nachipa para ma amo tihuetzican tech in tajtacol. Huan sayó Yejuatzin conpía huelilis para que ijcón ma techtenextis ica ne hueyi paquilis que tiyolchipauque ya iixpantzinco Dios de ne eluiyactzinco. Huan no conpixinemi Yejuatzin nochi ne chipahuac mohuisyot, huan ne cualnescayot huan ne hueyipan chicahualis huan ne yec tanahuatil. Huan ma nochi nijín ma ihuantzin pouto desde ne cuac ayamo teyi hualtzinehuaya in talticpac hasta axcan huan hasta sen nachipa. Ma ijcón mochihua. Amén.

## IN TAJCUILOLAMATZIN TEN TOTAJTZIN DIOS QUIMONEXTILIJ IN ITATITANIL, YEJUA IN SAN JUAN

### Nican tajtoa de queniu Jesucristo quimonextilij in San Juan nijín tajtolme

**1** Huan Totajtzin Dios quimonextilij Jesucristo nijín tanextililisme para que in Totecotzin Jesús ma quinmachtis ne itequitica huan de queniu mochihuaqui nochi ten niman monequi mochihuas. Huan Totecotzin Jesucristo quiyecajscanextilij se ángel taquehual de Dios nochi nijín tanextililisme. Huan de ompa Jesús quititanic in ángel ma nechmatiliti nejua ni Juan de niitequitica de Jesucristo. <sup>2</sup> Huan ijcón ni Juan nitetapohuijtinemic nochi in tajtolme ten Totajtzin Dios nechonnnextilij ya, huan nochi ne tajtolme ten Jesucristo nechonmachtij ya. Huan no ni Juan nitetapohuijtinemic nochi ten nejua nicyecajscaitac ya.

<sup>3</sup> Huan semi tatiochihualme de Dios huan yolpactocque nochi neques ten quileerojtinemisque nijín tajtolme. Huan no tatiochihualme nochi neques ten quicactinemisque cuac quinleerohuilíaj nijín tanahuatilme ten Dios nechmactilij nejua ni Juan. Huan no tatiochihualme nochi neques ten quitacaminemisque nochi tanextililisme ten nican ixnesi tech nijín tajcuilolamatzin. Porín ejcotoc ya in tonal de motamichiu-tihuitz ya nochi nijín tanextililis ten nican ijcuiliutoc.

### Nican tajtoa de queniu in tanojnotzque Juan quintajcuilohuilía ne chicome pantime de taneltocani ten calyetocque campa Asiajcopaca

<sup>4</sup> Nejua ni Juantzin huan niquintajcuilohuilía ne chicome pantime de taneltocani ten calyetocque ne Asiajcopaca. Huan, namejuantzitzin de Asiajcopaca, xicselican ne teicnelilis huan ne yolsehuilis de hualeutoc imaco Totajtzin Dios. Porín Yejuatzin ya axcan yoltinemi huan Yejuatzin ipa yoltinemía ya huan no Yejuatzin ipa yoltinemis sen nachipa. Huan no xicselican nochi nijín tatiochihualis imaco ne Yecticatzin Espíritu de Dios ten tequititinemi ica chicome taman de ejecatzitzin chipauque ten yetocque ixtenojtzinco Yejuatzin campa ihuelilispán. <sup>5</sup> Huan no xicselijtiyacan ne teyolicnelilis huan ne yolsehuilis imaco Jesucristo. Porín sayó Yejuatzin quitetapohuijtinemi ica ten yec melau tamachilis. Huan ne Jesucristo Yejuatzin ya in Tayecan-cateconetzin de Dios ten achtopa ya panquisac yoltoc intzalan in ánimajme. Huan ne Jesucristo, Yejuatzin quinyecantinemi nochi huejueyi chihuanime de nican talticpac. Huan ne Jesucristo Yejuatzin techueyitasojtatinemi. Huan no techtacajcahualtij de nochi totajtacoluan. Huan no techyolchipahuac ica iesyotzin. <sup>6</sup> Huan ne Jesucristo, Yejuatzin techtalico queme titayecananime huan no queme titiopixcame para ijcón tictequitilijtinemisque Totajtzin Dios. Huan sayó Yejuatzin quinamiqui ma ticmohuistilican sen nachipa porín sayó Yejuatzin quipixtinemi ne cualtziyot huan ne hueyi chicaucahuelilis sen nachipa. Nochi nijín ma ijcón mochiuti. Amén.

<sup>7</sup> Xiquitacan, Cristo hualajtoc ya ne mixtzalan huan nochi in talticpacuani quitasque huan hasta no quitasque neques ten quicojcocojque Cristo. Huan no nochi in pueblajme den senmanahuac momoucachoquilisque cuac quitasque Jesús. Quema, nochi nijín ijcón mochihuaqui. <sup>8</sup> Huan Yejuatzin Totecotzin quipía nochi chicaucahuelilis huan techilía ijcuín: “Nejuatzin niyoltinemi cuac nochi hualtzinpehuac. Huan Nejuatzin niyoltinemis tech ne tonalme cuac nochi ten nanquijtaj que

tatajtamis. Ica ya nojón Nejuatzin nimonejnehuililtía queme ne letra A, huan ne letra Z". Huan Yejuatzin axcan yoltinemi; huan Yejuatzin ipa yoltinemía ya; huan Yejuatzin ipa yoltinemis sen nachipa.

**Nican tajtoa de queniu in Juan tajtachíac  
huan quitac in Yectagatzin que Yejuatzin in Cristo**

<sup>9</sup>Huan nejuatzin ni Juan ninamoicniztin. Huan nitajyohuijtihuala ijcón queme namejuan nantajyohuijtocque axcan. Huan titajyohuijtocque porín nochi tejuan titacautamatinemij ihuan Jesucristo. Huan nejuatzin ijcón queme namejuan tisenyetinemij ica ihueyichichualis de Dios tenica Yejuatzin techolyecantinemi. Huan nochi tejuan ticyolicataxicojtiyohue ica chichualis nochi nijín tajyohuilis. Huan nejua ni Juan niyetoya campa ne taltzin ten monotza Patmos ten quiyehualojtoc in at den mar. Huan nican Patmos nechualtitanque queme preso porín nitanojnotztinemic ica in Tajtoltzin Dios, huan no porín nitetapohuijtinemic nochi ten Cristo Jesús quichiutinemía. <sup>10</sup>Huan nejua nechquemiloco in chichualis de Yecticatzin Espíritu huan nochi nijín mochihuac tech se tonal domingo cuac se quimohuistíla Totecotzin. Huan de ompa nicayic nejua noicampa se chicaucatajtolis queme yesquía cuac chicaucatapitza ica se trompeta. <sup>11</sup>Huan ne tajtolis nechiliaya ijcuín:

—Nejuatzin ya niyoltinemi cuac nochi hualtzinehuac, huan no niyoltinemis tech ne tonalme cuac nochi ten nanquitaj que tatajtamis ya. Ica nojón Nejuatzin nimonejnehuililtía queme ne letra A huan ne letra Z.

Huan ne tajtolis no nechiliaya ijcuín:

—Xiquijcuiloti tech se libro nochi nijín ten tiquitztoc. Huan de ompa xiquinontitanili nijín libro ne chicome pantime de taneltocani ten mosentilijtinemij campa tech in pueblojme de Efeso huan de Esmirna huan de Pérgamo huan de Tiatira huan de Sardis huan de Filadelfia huan de Laodicea.

<sup>12</sup>Huan nimoicancuepac para niqitas aconi nechnojnotztoc. Huan cuac nejua nimoicancuepac ya, ijcuacón niconitac chicome teposme de oro campa quinquejquetzaj velas. <sup>13</sup>Huan intzalan ne chicome velajquetzalonime de oro monextij se acsá ten quinejnehuilía in Yectagatzin de Dios. Huan Yejuatzin Cristo taquentoc ica se tilma ten sentanequistoc hasta tani. Huan no niqitac que quelpancuitoc ica se tajcoilpiloni de oro. <sup>14</sup>Huan no niqitac ne itzontecon huan nitzontzin nochi istac queme ichcatojmit huan ne itzon istac queme in secti. Huan niixtololohuan motayaj queme yesquía tit momejmelahuaya. <sup>15</sup>Huan niqitac que nimetzuan motaya queme in tepos bronce cuac ticoijtic mochipautoc. Huan nimetzuan mimilicaya queme yesquía tepos cuac yetoc ticoijtic tech hueyi horno. Huan nitajtolis mocaquía huan tacomonía queme huel míac ame cuac mocuentectihuitz. <sup>16</sup>Huan niqitac que Yejuatzin niyecmacopaca maactoc chicome sitalinme. Huan no niqitac que hualquisa ya iteno se machete de ojcan tencanahuac. Huan no niqitac niixco queme in tonaltzin cuac mimilica ica nochi ichichualis.

<sup>17</sup>Huan cuac nictamiitac ya nochi nijín, ijcuacón nihuetzito queme nimiquet imetzixitantzinco. Ijcuacón Yejuatzin nechpantalilij niyecmay nopan huan nechiliaya ijcuín:

—Amo ximomouti, porín Nejuatzin niyoltinemi cuac nochi hualtzinehuac, huan no ipa niyoltinemis oc cuac nochi ten nanquitaj nochi tatajtamis ya. <sup>18</sup>Huan Neju-

atzin axcan niyoltinemi. Huan masqui nimomiquilijca ya, pero axcan ocsepa niyoltinemis sen nachipa. Huan Nejuatzin nicpixinemi tanahuatil ipan nochi neques ten momiquilijque ya para niquinmaquixtis oso niquintelchihuas. Huan no nicpixinemi tanahuatil ipan ne lugar campa tajyohuijtocque in ánimajme. <sup>19</sup> Huan axcan xiquijcuilo tech molibro nochi ten tiquitac ya. Huan no xiquijcuilo nochi ne ten mochiutoc ya axcan huan no nochi ne ten mochihuaqui oc. <sup>20</sup> Huan nimitzajsicamatiltis de toni quijtosnequi ne ichtacatamachilis de nijín chicome sitalinme ten tiquinitac ya tech noyecmay. Huan no nimitzajsicamatiltiti de toni quijtosnequi ne chicome velajquetzalónime de oro. Huan ne chicome sitalinme, yejuan nojonques in chicome tanahuatiani ten tequititinemij campa in chicome pantime de tocnihuan taneltocani. Huan ne chicome velajquetzalónime de oro ten tiquinitac ya, yejuan nojonques in chicome pantime de tocnihuan taneltocani.

### **Nican tajtoa de ne tanojnotzalis para in tocnihuan taneltocani ten calyetocque campa pueblo Efeso**

**2** Huan Yejuatzin nechilij ijcuín:  
—Tejua, Juan, xictajcuilohuili ne notanahuatijcau ten tequititinemi campa calyetocque in tocnihuan taneltocani tech in pueblo de Efeso.

Huan xiquili notanahuatijcau que Yejuatzin quipixinemi iyecmacopaca de ne chicome sitalinme. Huan Yejuatzin nentinemi intzalan ne chicome velajquetzalónime de oro. <sup>2</sup> Huan tejua tanahuatijque, Yejuatzin mitzualilía ijcuín: “Cuali nicmati nochi ten tejua ticchiutinemi; huan no niquixmati de mosiohuilis; huan no niquixmati de que tejua ticyolicaxicojtiui nijín tajyohuilis. Huan no nicmati que tejua tiquinyecquitzinemi neques ten quichiutinemij sayó ten amo cuali chihualisme. Huan no nicmati que tejua tiquinyectatemolía neques ten mopohuaj no queme tatitanilme de Jesucristo. Huan amo melau que yejuan tatitanilme de Jesucristo. Huan tejua ticajsicamatic ya que yejuan sayó xolopijme san. <sup>3</sup> Huan Nejuatzin no cuali nicmati que tejua titajyohuijtihuitz ya huan ticyolicaxicojtiuhuitz ya nijín tajyohuilis. Huan no Nejuatzin nicmati que tejua semi timosioutijtihuitz ya porín tinechtasojsa Nejuatzin de notocaytzin huan amo queman tiyolcuetautinemi de motacuautamatis. <sup>4</sup> Pero tepitzin niyolcualantoc ica por ne ten ticchiutoc, porín axcan amo tinechtasojsinemi oc, queme ne achtopa tinechyoltasojsaya. <sup>5</sup> Huan nimitzilía que xiquelnamiqui queniui ticchiutinemía ne achtopa ya. Pero ximoyolnemili de axcan motajtacoluan huan ocsepa xichipaucanemi queme ne achtopa tichipaucanentine-mic. Porín tacán amo tinechtacamatis, ijcuacón xicmati niman nihualas nimitzitaquiui huan nicajchihuaquiui ne velajquetzalóni huan amo yetos oc Notajtolztin campa mosentilfaj in tocnihuan taneltocani. Huan ijecón mochihuati, como tejua amo timoyolnemilía de motajtacoluan. <sup>6</sup> Pero se taman nimitzilía que cuali ticchiutoc, porín tictahuelitztinemi ne chihualis ten quichiutinemij ne taca ten quinilfaj nicolaí-tas ten mopohuaj notaneltocacahuan, pero yejuan motajtacolmacatinemij san. Huan melau Nejuatzin no niqintahuelitztinemi ne ninchihualisuan de ne taca nicolaí-tas. <sup>7</sup> Huan namechilía que nochi neques ten huelis tacaquisque, yejuan nojonques ma quiyecaquilian ne tanojnotzalis tenica in Yecticatzin Espíritu quinnojsotzoc in tocnihuan taneltocani. Huan nochi neques ten quitanilijtiyasque in amocuali, yejuan nojonques niqincahuilis ma quicuacan in taquilot de ne cuohuit. Huan ne taquilot,



yejua ne quitemaca in nemilis sen nachipa. Huan ne cuoutzin ijcatoc tatajco de ne tacualtzinyojcan campa yetica Totajtzin Dios”.

**Nican tajtoa de ne tanojnotzalis para in tocnihuan  
taneltocani ten calyetocque campa pueblo Esmirna**

<sup>8</sup> Huan Yejuatzin nechilij ijcuín:

—Tejua Juan, xictajcuilohuili ne notanahuatijcau ten tequititinemi campa calyetocque in tocnihuan taneltocani tech in pueblo de Esmirna. Huan xiquili notanahuatijcau que Yejuatzin ipa yoltinemi cuac nochi hualtzinehuac huan Yejuatzin yoltinemis oc ne tonalme cuac nochi tajtajtamis ya. Huan Yejuatzin momiquilijca ya pero axcan ocsepa yoltinemi.

<sup>9</sup> Huan tejua tanahuatijque, Yejuatzin mitzualilía ijcuín: “Nejuatzin nicyecmati nochi ten tejua ticchiutinemi huan no niquixmati motajyohuilisuan. Huan no cuali niquixmati que tejua tipobre. Pero amo melau tipobre. Ta, tejua ticueyipía nochi ten monequi iixpantzinco Dios. Huan no cuali nicmati que mitzjtejtenehuaj neques judíos ten mopoutinemij que yejuan taneltocani de Cristo. Pero yejuan amo melau taneltocani de Cristo. Ta, yejuan nojonques poutinemij ihuan in amocuali Satanás.

<sup>10</sup> Huan no nimitzilía que amo teyica ximoyolmouti de nochi ne tajyohuilis ten ticpanoti. Xicaquican ca cuali porín in amocuali Satanás quichihualtis ma namechtzacuacan tech in cárcel senme de namejuan para ijcón motas que cox namejuan amo nanchahuasque namotacuatamatis ihuan Dios. Huan namechtajyohuiltisque para májtacti tonal. Pero namejuan namechilía xicsentocacan xitacuatamatiyacan ihuan Dios hasta cuac nanmomiquilisque. Huan como ijcón nanquichihuaj, ijcuacán Nejuatzin namechmactiliti se tetayocolil queme yesquía se corona. Huan ne tetayocolil, yejua ne in yec nemilis ten amo queman tamis. <sup>11</sup> Huan nochi neques ten huelis tacaquisque, yejuan nojonques ma quiyecaquilican ne tanojnotzalis tenica in Yecaticatzin Espíritu quinnojnotztoc in tocnihuan taneltocani. Huan nochi neques ten quitanilitihue in amocuali, yejuan nojonques amo teyica tajyohuisque oc tech ne tonalme cuac in tagayot momiquilisque ica ojpa”.

**Nican tajtoa de ne tanojnotzalis para in tocnihuan  
taneltocani ten calyetocque campa pueblo Pérgamo**

<sup>12</sup> Huan Yejuatzin nechilij ijcuín:

—Tejua Juan, xictajcuilohuili ne notanahuatijcau ten tequititinemi campa calyetocque in tocnihuan taneltocani tech in pueblo de Pérgamo. Huan xiquili notanahuatijcau que Yejuatzin quipixtinemi se machete de ojcan tencanahuac. Huan tejua tanahuatijque, Yejuatzin mitzualilía ijcuín: <sup>13</sup> “Huan Nejuatzin cuali nicmatoc nochi ten tejua ticchiutinemi. Huan no nicmatoc que ticalyetoc campa in Satanás quipía ihuelilispán. Huan tejua ticsentoca titacuatamatinemi notechcaco-paca ica notocaytzin. Huan amo no queman ticahua de amo titacuatamatis nohuanzin. Huan titacuatamatihuitz masqui quimictijque ya namotzalan ne notaneltocacau Antipas. Yejua ne nechtetajtohuiltijtinemic de Nejuatzin ne namopueblojcopaca campa semi tamapachojtinemi in Satanás. <sup>14</sup> Huan tepitzin niyolcualantoc mohuan ica por ne mochihualisuan ten ticchiutinemi axcan. Porín sequi de namejuan ten nancalyetocque Pérgamo nanquitacamatinemij oc ne tamachtilis ten cualcuihualaya ne huejcautetat Balaam. Huan ne Balaam, yejua ya quitajtolmacac in Balac

para que in Balac yejua no ma quintepotamis ne nopueblojcahuan de Israel que ma yejuan no ma motajtacolmacacan. Ica ya nojón in pueblojuani de Israel peuque quicuaq tacualis tenica quimohuistilijque in tatadiosme huan no peuque ay ahuilnencanemij. <sup>15</sup> Huan no tepitzin niyolcualantoc mohuan porín sequi de namejuan ayamo nanquicahuaj ne tanextililis ten cualcuitihuitze ne taca ten quinilíaj nicolaíatas, ne tanextililis ten Nejuatzin semi nictahuelita. Porín yejuan quiytoaj que cuali huelis se nentinemis tech in tajtacol masqui se itaneltocacau de Cristo. <sup>16</sup> Ica ya nojón nimitzyequilía que monequi ximoyolnemili de motajtacoluan. Porín tacán amo tinechtacamatis, ijcuación niman nihualas nimitzitaqui huan niquintehuis neques ten amo yet tatacamatinemij. Huan no niquintehuis ica ne machete ten hualquisa tech noten. <sup>17</sup> Huan nochi neques ten huelis tacaquisque, yejuan nojonques ma quiyecaquilican ne tanojnotzalis tenica in Yecticatzin Espiritu quinnojnotztoc in tocnihuan taneltocani. Huan nochi neques ten quitanilijtihue ya in amocuali, yejuan nojonques niquintamacas ica ne tacualis ten quilíaj maná ten axcan ichtaca yetoc. Huan no niquinmactilis sejsé istac tet. Huan tech nojón istac tet ijcuiliutoc huan ixnestos se yancuic tocaytzin ten ayamo aquen quixmati. Ta, sayó quixmatische neques ten quiselisque ne istac tet”.

### **Nican tajtoa de ne tanojnotzalis para in tocnihuan taneltocani ten calyetocque campa pueblo Tiatira**

<sup>18</sup> Huan Yejuatzin no nechilij ijcuín:

—Tejua Juan, xictajcuilohuili ne notanahuatijcau ten tequitinemi campa calyetocque in tocnihuan taneltocani tech in pueblo Tiatira. Huan xiquili notanahuatijcau que Yejuatzin Iconetzin de Dios huan ne iixtololohuan mota queme tit ten momemelahua. Huan imetzuan mimilica queme tepos bronce cuac ticoijtic mochipautoc. <sup>19</sup> Huan tejua tanahuatijque, Yejuatzin mitzualilía ijcuín: “Huan Nejuatzin cuali nicmatoc nochi ten tejua ticchiutinemi. Huan no niquixmati queniu titetasojtatinemi huan queniu titacuaautomatinemi nohuantzin. Huan no nicmatoc queniu timotequitiltijtinemi huan queniu tiyolicataxicojtiu ica tajyohuilis. Huan no nicmati que axcan cachi ticchiutoc motequiu huan que ne achtopa ticchiutihuitz. <sup>20</sup> Pero tepitzin niyolcualantoc mohuan ica por ne ten ticchiutinemi axcan. Porín ticautoc que ma yetinemi namotzalan ne sihuat Jezabel ten mopohua que yejua no tajtojtinemi notencopaca. Pero yejua amo melau tanextilijtinemi notencopaca. Ta, yejua ay quinnextilijtinemi notequiticahuan ma ahuilcanentinemican huan ma quicuacan ne tacualis tenica quimohuistilijque tatadiosme. <sup>21</sup> Huan nicahuilijca ya ne Jezabel sequi tonalme para horajtsiquía oc ma moyolnemili de nitajtacoluan. Pero yejua amo quinequic moyolnemilis de niahuilnemilis. <sup>22</sup> Ica ya nojón xiquitacan ne Jezabel, nictatzacuilitis ica cocolisti para ma yejua huetzi tech nicama. Huan no niquinueyitatzacuilitis ica tajyohuilis nochi naquen ihuan ahuilcanentinemisque, como yejuan amo quinequij moyolnemisque den nintajtacoluan huan cahuasque nojón ahuilnemilis. <sup>23</sup> Huan niquinmictilitiu nochi iconehuan de Jezabel ten ihuan mohuicatinemij. Huan ijcón nochi notaneltocacahuan cajsicamatische que Nejuatzin ya niqinyectemolía de nintamachilisuan huan de nintalnamiquilisuan. Huan no namechtaxtahuis cada senme de namejuan ijcón queme nantachiutinenque ya.

<sup>24</sup> Huan namechnojnotzas oc namejuan ten nancalyetocque campa Tiatira, namejuan ten amo nanquitacamatinemij ne tanextililisme de Jezabel. Porín namejuan

amo queman nanmomachtijque ne tanextililis ten quilfaj ichtaca tamachilisme de hualeutoc imaco in Satanás. Ica ya nojón namechilía ijcuín: Amo nicpía oc ocsé tanahuatil ten namechilisquía xictacamatinemican oc. <sup>25</sup> Ta, sayó namechilía que xictacamatiyacan ne tanahuatil ten nanquipixtocque ya, huan xicsentocacan xicchiutinemican nochi notanahuatilan hasta ne tonal cuac nimohualucas. <sup>26</sup> Huan nochi neques ten quitanilitihue ya in amocuali Satanás, huan no quitamitacamatiuhue ya notanahuatilan hasta cuac ne momiquilisque, yejuan nojonques niquinaxcatilis tanahuatil para ma yejuan quiyecantinemican nochi in talticpacuani. <sup>27</sup> Huan ijcón queme Notajtzin Dios nechmactilij ya tanahuatil para nitayecantinemis, no ijcón ne-jeua niquinmactiliti notaneltocacahuan tanahuatil para yejuan ma tayecantinemican ica hueyi chichualis. Huan ijcón nochi neques ten amo taticamatinemij, yejuan nojonques tajtamis ninchichualis ijcón queme se contzin papayacas cuac huetzis. <sup>28</sup> Huan nochi neques ten quitanilitihue in amocuali, yejuan nojonques niquinmactilis ne chicaucacualtziyot de Nejuatzin, ne ten quinejnehuilía ihueyicualtziyo de ne hueyi sitalin ten paquisa nepa cualcan. <sup>29</sup> Huan nochi neques ten huelis tacaquisque, yejuan nojonques ma quiyecaquilican ne tanojnotzalis tenica in Yecticatzin Espíritu quinnojnotztoc in tocnihuan taneltocani”.

### **Nican tajtoa de ne in tanojnotzalis para in tocnihuan taneltocani ten calyetocque campa pueblo Sardis**

**3** Huan Yejuatzin no nechilij ijcuín:

—Tejua Juan, xitajcuilohuili ne notanahuatijcau ten tequititinemi campa calyetocque in tocnihuan taneltocani tech in pueblo de Sardis. Huan xiquili notanahuatijcau que Yejuatzin maactoc in Yecticatzin Espíritu de Dios ten tequititinemi ica chicome tataman Yecticatzin Ejecatzitzin de Dios. Huan no maactoc in chicome sitalinme. Huan tejua tanahuatijque, Yejuatzin mitzualilía ijcuín: “Nejuatzin cuali nicmatoc nochi ten tejua ticchiutinemi. Huan nicmatoc que ocsequin mitzueyipohuaj que tiyoltinemi iixpantzinco Dios. Pero amo melau, porín tiyolmictoc tech in tajtacol. <sup>2</sup> Xicuatamatcanemi huan ocsepa xicchichualti motachihualisuan ten cuetautihualaya ya para tajtamisquía. Huan ijcón nimitzilía porín amo teyi nicajsic motachihualisuan ten cualtía nepa iixpantzinco Dios. <sup>3</sup> Cuali xiquelnamiqui de nochi ne tanextililis ten ticselijca ya huan ten ticacca ya. Huan xictacamati ne tanextililis huan ximoyolnemili de motajtacoluan. Porín como amo ticuatamatcanemi queme monequi, ijcuacón santajma nihualas nimitzitaquiu ijcón queme ne tachtecque santajma ejcotihuetzi. Huan tejua amo ticmatis toni hora nihualas nimitzitaquiu.

<sup>4</sup> Pero nicmatoc que tech mopueblo de Sardis ompa yetocque motzalan sequin taneltocani ten amo momahuaj ica in tajtacol tech ninyolojuan. Huan queme yejuan amo quitzojcuilotijque nintilmajuan ica tajtacol, ica ya nojón yejuan nojonques nohuan nentinemisque ica ne taquemit ten cualtzin istac porín yejuan ijcón quinamiqui. <sup>5</sup> Huan nochi neques ten quitanilitihue ya in amocuali, yejuan nojonques niquintaquentis ica ne cualtzin istac tilma. Huan amo niquinpojpolohuilis oc de nintocayuan tech ne nolibro campa ijcuiliutoc nochi neques ten nachipa yoltinemisque. Huan nochi neques ten quitanilitihue ya in amocuali, yejuan nojonques no Nejuatzin niquinteixmatiliti iixpan Notajtzin Dios huan inixpan iángeles de Dios. <sup>6</sup> Huan nochi neques ten huelis tacaquisque, yejuan nojonques ma quiyecaquilican ne tanojnotzalis tenica in Yecticatzin Espíritu quinnojnotztoc in tocnihuan taneltocani”.

**Nican tajtoa de ne tanojnotzalis para in tocnihuan  
taneltocani ten calyetocque campa pueblo Filadelfia**

<sup>7</sup> Huan Yejuatzin no nechilij ijcuín:

—Tejua Juan, xictajcuilohuili ne notanahuatijcau ten tequititinemi campa calyetocque in tocnihuan taneltocani tech in pueblo de Filadelfia. Huan xiquili notanahuatijcau que Yejuatzin in Yolchipahuactzin ten quijtoa sayó ten melau. Huan Yejuatzin quipixtinemi in tanahuatil ijcón queme quipixtinemía tanahuatil ne huejcau rey David. Huan Yejuatzin tatapos huan amo aquen huelis tatpacos. Huan Yejuatzin cuac tatzacuas, amo no aquen huelis tatapos oc. <sup>8</sup> Huan tejua tanahuatijque, Yejuatzin mitzualilía ijcuín: “Nejuatzin cuali nicmatoc nochi ten tejua ticchiutinemi. Xiquita, nejua nimitztapohuilij ya para xicalaqui huan xitanojnotztinemi de Nejuatzin huan amo aquen huelis mitzixtzacuulis. Huan nicmatoc que masqui tepitzin san ticpía san huelilis, pero tejua tictacamatinemi Notajtoluan huan amo queman tiqijtotihuitz que amo titacuautamati nohuan. <sup>9</sup> Huan axcan xiquitacan que nichihualtiti ma quisacan namotzalan nochi nojonques ten poutinemij ihuan Satanás. Porín yejuan sayó xolopijitinemij san huan mohueyipohuaj queme judíos ten taneltocani de Cristo, pero amo melau taneltocani de Cristo. Ica ya nojón niquinchi-hualtiti ne tacajcayahuani ma hualacan moixpan huan motemactisque momaco para ijcón yejuan cajsicamatisque que Nejuatzin nimitztasojtatinemi. <sup>10</sup> Huan tejua tictacamatihuitz notanahuatilan de que ticyolicataxicojtoc nochi tajyohuilis. Ica ya nojón nimitzyeepixtinemis tech ne hora cuac ninpan in talticpacuani huetziquiu ne hueyi tajyohuilis. Porín ica ne tajyohuilis ixnesiquiu que cox melau in talticpacyetoni tacuaumatatque ihuan Dios oso amo. <sup>11</sup> Xiquita, Nejuatzin niman nimo-hualucas nican talticpac. Ica ya nojón xicsentoca xictacamatinemi nojón tanahuatilme ten ticpixtoc ya, para amo aquen huelis mitzcuilis ne tetayocolil ten Dios mitzmactiliti cuac Yejuatzin mitzueyipanchihuas. <sup>12</sup> Huan nochi naquen quitanilitihue ya in amocuali, yejuan nojonques niquintalis hueyi tayecananime campa ne tiopantzin de Notajtzin Dios huan ompa amo queman quisasque oc. Huan nochi neques ten quitanilitihue ya in amocuali, yejuan nojonques niquinnescajotis ica ne Tocaytzin de Notajtzin Dios. Huan no niquinnescajotis ica ne tocaytzin de ipueblojtzin de Notajtzin Dios. Huan ne pueblojtzin yejua ten quilíaj in yancuic pueblo de Jerusalén. Huan ne pueblojtzin hualtemos den eluiyactzinco campa yetica Notajtzin Dios. Huan nochi neques ten quitanilitihue ya in amocuali, yejuan nojonques niquinnescajotis ica ne noyancuictocaytzin. <sup>13</sup> Huan nochi neques ten huelis tacaquisque, yejuan nojonques ma quiyecaquilican ne tanojnotzalis tenica in Yecticatzin Espíritu quínojnnotztoc in tocnihuan taneltocani”.

**Nican tajtoa de ne tanojnotzalis para in tocnihuan  
taneltocani ten calyetocque campa pueblo Laodicea**

<sup>14</sup> Huan Yejuatzin no nechilij ijcuín:

—Tejua Juan, xictajcuilohuili ne notanahuatijcau ten tequititinemi ne campa calyetocque in tocnihuan taneltocani tech in pueblo de Laodicea. Huan xiquili notanahuatijcau que Yejuatzin quichiutica nochi tenica moyectencauca de quichihuas. Huan Yejuatzin quitetajtoluiltía sayó ica ten melau. Huan Yejuatzin tanextilijtinemi sayó ica ten melau san. Huan ica por Cristo nochi mochihuac ten Dios ne achtopa

ya quichijchihuac. Huan tejava tanahuatijque, Yejuatzin mitzualilía ijcuín: <sup>15</sup>“Nejuatzin cuali niquixmatinemi nochi ten tejava ticchiutinemi. Huan no nicmati que tejava amo semi tinechyoltahuelita huan nión no semi tinechyoltasojta. Ta, sayó tepitzin san tinechyoltasojta. Huan nicnequisquía que melau xinechyoltahuelita oso melau xinechyoltasojta. <sup>16</sup>Huan tejava amo semi tinechyoltahuelita huan nión no semi tinechyoltasojta. Huan queme sayó tepitzin san tinechyoltasojta, ica ya nojón nimitzcalantamotas ijcón queme se quiquixtía iteno tensá ten quiyolixcocoa. <sup>17</sup>Huan Nejuatzin ijcón nicchiuati porín tejava tiqijtojtinemi que tirico porín cuali titacuautamati nohuan. Huan no timohueyimati ica motacuautamatilis. Huan no tiqijtoa que amo teyi mitzpoloa oc de cuali mochihualisuan ten ticchiutihuitz. Huan ijcón tiqijtojtinemi porín amo timomaca cuenta que tinstinemi noixpan Nejuatzin que tejava ticojcotolcanemi huan titeicnelti huan tipobre huan tiixpojpooyot huan amo teyi ticpía tenica timotaquentis. Huan ijcón tinstinemi noixpan porín mochihualisuan amo teyi nicajxilá den chipahuac. <sup>18</sup>Ica ya nojón Nejuatzin nimitzyolmajxitía que xicohua de Nejuatzin sequi oro ten nicnamacatoc, ne oro ten mochipahuac ya tech in tit ten melau quipía ipatiu para ijcón melau ixnesis que tejava tirico. Huan como tinechtajtánilis, ijcuacón Nejuatzin nimitzmactilis ne taquemit ten semi istac para ica ximotaquenti. Huan ijcón amo timopinautijtinemis oc de que amo teyi ticpía tenica timotaquentis. Huan como tinechtajtánilis, ijcuacón nimitzixtaliliti pajti ten quilíaj colirio para ijcón cuali tiyectachías. <sup>19</sup>Huan nochi neques ten niqintasojta, yejuan nojonques niquinyequixilía cuac amo chipaucanemij. Huan no niquinyecmejmelahua nochi neques ten niquinyoltasojta. Huan monequi xicyolnejnequi de tichipaucanemis huan ximoyolnemili de motajtacoluan. <sup>20</sup>Porín xiquita san, niyetoc mocaltenteno ya huan amo no huejca niyetos de moyolo. Huan Nejuatzin nimitzyolnojnnotzoc para nimitzpalehuis. Huan como acsá quicaquilis notajnojnnotzalis huan nechtapohuilis iyolo, ijcuacón Nejuatzin nioncalaquis tech nichan huan itech niyolo. Huan ijcón ihuan niyetinemis huan ihuan nitacuajtinemis. Huan no yejava nohuan yetinemis huan no tacuajtinemis nohuan. <sup>21</sup>Huan nochi naquen quitanilitihue ya in amocuali, yejuan nojonques niquinmactilis tanahuatil para motalisque nohuan campa nohuelilispán. Porín Nejuatzin no nictamitanilij ya in amocuali huan nimotalito ihuan Notajtzin Dios campa ichicaucahuelilispán. <sup>22</sup>Huan nochi neques ten huelis tacaquisque, yejuan nojonques ma quiyecaquilican in tanojnnotzalis tenica in Yecticatzin Espíritu quinnojnnotzoc in tocnihuan taneltocani”.

### Nican tajtoa de queniu quimohuistilíaj Totajtzin Dios nepa eluiyactzinco

**4** Huan cuac tamic ya nochi nojón tanojnnotzalis, ijcuacón niqitac que tapotoc ne calten den eluiyactzinco. Huan ompa achto nicayic se chicahuac tanojnnotzalis ten mocayic queme se trompeta. Huan ne tanojnnotzalis nechnojnnotzac huan nechilij ijcuín:

—Tejava, xihualtejco nican huan nimitznextiliti nochi ten mochihuati satepan.

<sup>2</sup>Huan santajma nechquemiloco in chicahualis den Yecticatzin Espíritu. Huan niqitac se silla ten quilíaj trono campa ichicaucahuelilispán de Totajtzin Dios yecyetoc ya ne eluiyactzinco. Huan no niqitac itech nojón trono que Yejuatzin tocotzyetica. <sup>3</sup>Huan ne naquen tocotzyetoc tech ne silla, Yejuatzin ixtamatía huan mimilínía queme pepetaca ne tetzitzin ten quilíaj jasje huan cornalina, ten mota chichilcaistac. Huan no niqitac se cosamalot que mimilínía queme pepetaca ne tetzitzin ten quilíaj

esmeralda, ten mota quiltic. Huan ne cosamalot quiyehualojtoc ne trono campa ichicaucahuelilispán de Dios. <sup>4</sup> Huan no niqunitac ocsequin sempoal huan nahui tronojme ten quiyehualojtocque ne trono de chicaucahuelilispán. Huan niqunitac que tocotzyetocque tech ne tronojme sempoal huan nahui huehuentzitzin huan taquentocque ica nochí istac taquemít. Huan no cuaactoyaj sejsé corona de oro. <sup>5</sup> Huan tech ne hueyi tayecancatrono de chicaucahuelilispán, ompa tapetantihualaya huan taticuintihualaya huan taijcoyocaya. Huan no iixpan ne hueyi tayecancatrono niqunitac que xotatocque chicome tanexme. Huan ne chicome tanexme, yejua nojón in Yecticatzin Espíritu de Totajtzin Dios ten tequititinemi ica chicome tataman de Chipactzitzin Ejecatzitzin. <sup>6</sup> Huan no nepa taixpan ne hueyi tayecancatrono niqunitac queme yesquía se hueyi at sensoutoc ten tamati tescat naltoni.

Huan no niqunitac nahui oculinme yoltocque ten inajnacastan ne hueyi tayecancatrono. Huan yejuan quiyehualojtoyaj ne hueyi tayecancatrono den chicaucahuelilispán de Dios. Huan ne nahui oculinme yoltocque quiplayaj miacque ninixtololohuan ijcón queme inixpampa huan inicampa. <sup>7</sup> Ica achto yoltoc ocuiltzin quinejnehuilía queme se tecuani ten quiláj león. Huan ica ome yoltoc ocuiltzin quinejnehuilía queme se cuacuouconet. Huan ica eyi yoltoc ocuiltzin ixtamati queme se tagat. Huan ica nahui ocuiltzin quinejnehuilía se águila ten pantantinemi. <sup>8</sup> Huan ne nahui yoltocque ocuiltzitzin quinpiayaj cada se chijchicuasen inejtapaluan. Huan no quinpiayaj míac inixtololohuan tatampa huan panían. Huan yohualitonal yejuan amo quemán motencahuaj de amo quiqtosque ijcuín:

Tejuatzin tion Yolchipahuactzin.

Huan ocsepa yejuan quiqtosque:

Tejuatzin tion Yolchipahuactzin.

Huan ocsepa quiqtosque:

Tejuatzin tion Yolchipahuactzin. Tejuatzin ti Totecotzin, tion to Dios ten ticonpíxtica nochí huelilís.

Porín Tejuatzin ya axcan tiyoltinemi huan ipa tiyoltinemic huan tiyoltinemis sen nachipa.

<sup>9</sup> Huan nojón yoltocque oculinme ipa quimohuistilijtocque Yejuatzin; huan no quihueyipanchiutocque Yejuatzin; huan no quitasoicamachilijtocque Yejuatzin ten tocotzyetica tech ne tayecancatrono de ichicaucahuelilispán. Porín Yejuatzin yoltinemis sen nachipa huan sen nachipa. <sup>10</sup> Huan ne sempoal huan nahui huehuentzitzin, yejuan nojonques quisentocatoyaj motancuaquetzttoyaj iixpantzinco Yejuatzin ten tocotzyetica tech ne tayecancatrono de chicaucahuelilispán. Huan yejuan quimohuistilijtoyaj Yejuatzin ten nachipa yoltinemi sen nachipa. Huan yejuan quitaililijtocque nincoronas iixpantzinco Yejuatzin para ica quimohuistilisque Yejuatzin. Huan yejuan quiqtoqtosque ijcuín:

<sup>11</sup> Totecotzin Dios, Tejuatzin mitzonnamiqú xicselijto nochí ne mohuistililís huan ne hueyipanchihualís huan ne chicaucacualtziyo.

Porín sayó Tejuatzin ticonchijchihuac nochí ten ongac.

Huan Tejuatzin ticonmonequiltij ma taonca nochí ten tiquitaj huan ma mochihua nochí ten motachijchiu ya.

## Nican tajtoa de queniu Juan quitac se libro huan no quitac ne ichcatzin de Dios

**5** Huan niquitac se libro iyecmacopaca Yejuatzin ten tocotzyetica tech ne tayecancatrono de ichicaucahuelilispán. Huan ne libro ijcuiliutoc tajtic huan panían huan yec tzactoc para amo aquen huelis quitapos. Huan no tasellarol ica chicome taman sellos. <sup>2</sup>Huan no niquitac se ángel ten quipixtoc hueyi tanahuatil. Huan yejua matajtantinemía ca chicaucatajtolis ijcuín:

—¿Pos aconi huelis quitapos nijín libro? ¿Aconi huelis quitzajtzayanas nijín sellos?

<sup>3</sup>Huan amo aquen ixnesico ten huelía quitapos ne libro. Huan amo no aquen ixnesico ten yetinemi ne eluiyactzinco nión nican talticpac nión no talticpactampa. Huan hasta amo aquen ixnesico ten huelisquía conixitas ne libro. <sup>4</sup>Ica ya nojón nejua semi nichocaya porín amo cajsicque aconi ten quinamiqui ma quitapos nojón libro. Huan amo no cajsicque aconi huelisquía quileeros. <sup>5</sup>Huan senme de ne huehuentzitzin nechilij ijcuín:

—Amo semi xichoca. Porín xiquita san, ne yetica ne hueyi Tayecanque ten quipía chichahualis queme in león. Huan Yejuatzin hualehuac den ichancahuan de ne huejcautat Judá. Huan ne tayecanque, Yejuatzin iixuiu den huejcau rey David. Huan Yejuatzin quitamitanilij in amocuali. Ica ya nojón Yejuatzin cuali huelis quitapos ne libro huan quintzajtzayanas ne chicome sellos.

<sup>6</sup>Huan no niquitac ijcatoc se ichcatzin tajtacoyan campa ne tayecancatrono; Yejuatzin in Cristo Jesús. Huan quiyehualojtoyaj ne ichcatzin in nahui ocuiltzitzin huan ne sempoal huan nahui huehuentzitzin. Huan niquitac que ne ichcatzin tamatic queme se ichcatzin ten quimictijque ya. Huan ne ichcatzin quiplaya chicome icuacuau huan no quiplaya chicome iixtololohuan. Huan ne chicome iixtololohuan, yejuan nojón in Yecticatzin Espíritu ten Dios quintitantoc ma tequititinemican ica chicome tataman tech nochi senmanahuac. <sup>7</sup>Huan ne ichcatzin, Yejuatzin yajqui quicuito ne libro ten maactoya iyecmacopaca ne Totajtzin Dios ten tocotzyetica tech ne tayecancatrono. <sup>8</sup>Huan cuac Yejuatzin quicuic ya ne libro, ijcuacón motancuaquetzque ne nahui ocuiltzitzin huan ne sempoal huan nahui huehuentzitzin iixpantzinco Yejuatzin ten tamati queme ichcatzin para quimohuistilisque Yejuatzin. Huan nochi nojonques quiplayaj tatzotzon ten quilfaj arpas. Huan no quiplayaj vasos de oro huan pexontoyaj ica copal. Huan ne copal, yejua ne in tatatautilisme de quichitinemij nochi in yolchipauque taneltocani de Dios. <sup>9</sup>Huan no niquitac que nochi neques ten motancuaquetzque ya, yejuan nojonques peuque cantaroayaj ica se yancuic himno huan quiytoayaj ijcuín:

Tejuatzin ten tion Yolchipahuactzin, mitzonnamiqui xicui nojón libro huan xiquintzayanili ne sellos para huelis tiquixtapos ne libro.

Tejuatzin tionuelis ticonchihuas porín mitzonmictijca ya.

Huan Tejuatzin titechoncohuac ya ica moesyotzin para ma titeaxcahuan ya de Dios. Huan titechoncohuac tejuan ten tihualeuque de nochi tataman tagayot, huan titajtoaj nochi tataman tajtolisme, huan no tihualeuque de nochi tataman pueblójme huan paísme.

<sup>10</sup>Huan Tejuatzin ticonchihuac que ma timotequitiltijtinemican ihuan Totajtzin Dios queme tayecanani reyes huan queme tiopixcame.

Huan no titechontalij ma tiquinyecantinemican in talticpacuani.

<sup>11</sup> Huan no niquitac huan niman nicayic in tajtolis de ne tel míac ángeles huan de ne ocuiltzitzin huan de ne huehuentzitzin ten quiyehualojtoyaj ne tayecancatrono. Huan huel míac sen yetoyaj hasta amo huelíaj se quinpohuas. <sup>12</sup> Huan yejuan quichicauijtoyaj ijcuín:

Tejuatzin ten tontamati queme ichcatzin, ten mitzonmictijcaj ya, Tejuatzin tion Yolchipahuactzin.

Huan mitzonnamiqui ximoaxcatili nochi huelilisme huan ricojyot. Huan no mitzonnamiqui ximoaxcatili nochi tamachilis huan cualtziyo.

Huan no xiconseli nochi ne mohuistililis huan nochi ne hueyipanchihualis.

Huan no xiconseli nochi ne mohuiscachihualis.

<sup>13</sup> Huan no nicayic que tajtoyaj nochi ne ten Dios itachijchihual, nochi yetoni ten moajsíaj nican eluiyactzinco huan nochi calyeton den talticpac huan nochi yetoni talticpactampa huan nochi yetoni ten moajsíaj aixconemíaj. Huan nicayic que tajtoyaj nochi nijinques huan yejuan quiytoayaj ijcuín:

Timitzonmohuistilíaj Tejuatzin ten tiontocotzyetica tech ne tayecancatrono.

Huan no timitzonmohuistilíaj Tejuatzin ten tontamati queme ichcatzin.

Timitzonmohuiscachihuaaj huan timitzonhueyimohuistilíaj huan timitzonhueyipanchihuaaj huan timitzonaxcatilíaj nochi chicahualis sen nachipa huan sen nachipa.

<sup>14</sup> Huan ne nahui ocuiltzitzin quiytoayaj ijcuín:

—Ma ijcón quichiutica.

Huan ne sempoal huan nahui huehuentzitzin nochi yejuan motancuaquetzque huan motentocatoj para ijcón quimohuistilisque Yejuatzin ten voltinemi sen nachipa huan sen nachipa.

### Nican tajtoa de queniu Cristo Jesús quintzayanac in chicome sellos

**6** Huan nejua ni Juan niquitac Yejuatzin ten tamati queme ichcatzin. Huan Yejuatzin cualixtapoj senme de ne sellos. Huan de ompa sepa san senme de ne nahui ocuiltzitzin nicayic que yejua tajtoaya ica se chicaucatajtolis queme cuac taticuini. Huan yejua nechilíaj ijcuín:

—Xihuiqui huan xiquitaqui.

<sup>2</sup> Huan nejua niquitac que hualquisac se istac caballo. Huan ne naquen ipan motaliaya, yejuatzin ne maactoya se tatamotaloni de cuohuit de quilíaj arco. Huan no quicuatalilijque se cualtzin corona porín yejuatzin tayecancatatanque. Huan yejuatzin quisato huan qitanito in amocuali talticpacyetoni, huan quisentoca cachi oc tatantiu.

<sup>3</sup> Huan nejua ni Juan niquitac Yejuatzin ten tamati queme ichcatzin. Huan Yejuatzin cualixtapoj ica ome sello. Ijcuacán nicayic que ne ica ome ocuiltzin nechiliaya ijcuín:

—Xihuiqui huan xiquitaqui.

<sup>4</sup> Huan niquitac que hualquisac ocsé caballo ten chichiltic. Huan ne naquen ipan mopantalijtoya, yejuatzin ne quimactilijque chicahualis para ma quinajchihuilis in talticpacyetoni ne yolsekcanemilis para ma yejuan ma momictijtinemican se huan ocsé yejuan san. Huan yejuatzin quimactilijque se hueyi machete.



<sup>5</sup>Huan nejua ni Juan niquitac Yejuatzin ten tamati queme ichcatzin. Huan Yejuatzin cualixtapoj ica eyi sello. Ijcuacón nicayic que ne ica eyi ocuiltzin nechiliaya ijcuín:

—Xihuiqui huan xiquitaqui.

Huan melau nejua niquitac que hualquisac ocsé caballo ten tiltic. Huan ne naquen ipan mopantalijtoyaj, yejuatzin ne maactoya se balanza tenica se tatamachihua.

<sup>6</sup>Huan no nicayic se tajtolis ten hualehuac intzalan ne nahui ocuiltzitzin ten quiytoaya ijcuín:

—Se kilo de trigo valeros se tonaltaxtahuil. Huan eyi kilo de cebada valeros se tonaltaxtahuil.

Huan no ne tajtolis quiytoaya ijcuín:

—Amo xitectahuili ma sayó quiahuilocan in aceite huan in vino.

<sup>7</sup>Huan nejua ni Juan niquitac Yejuatzin ten tamati queme ichcatzin. Huan Yejuatzin cualixtapoj ica nahui sello. Ijcuacón nicayic que ne ica nahui ocuiltzin nechiliaya ijcuín:

—Xihuiqui huan xiquitaqui.

<sup>8</sup>Huan melau niquitac que hualquisac ocsé caballo ten costic. Huan ne naquen ipan mopantalijtoya, yejuatzin ne itocay in miqulilis ten quiplaya tanahuatil para temictijtinemis. Huan ne ocsé ten quitociliaya in miqulilis, yejua ne itocay in mictan ten quiplaya tanahuatil para quintatzacuiltijtinemis in tagayot para ma nochi ten quimictisque, ma yejuan ma yacan tech in mictan. Huan Dios quixejxeloj in talticpac para ma nahui quisto. Huan Dios quinmactilij ne miqulilis huan ne mictan chicahualis para ma yejuan quintajyohuiltijtinemican in talticpacuani ica ne tehuilis huan ica ne máyanti huan ica neocolisme. Huan ne miqulilis huan mictan quichihuaque in tecuanime de nican talticpac ma quimictijtinemican in tagayot.

<sup>9</sup>Huan nejua ni Juan niquitac Yejuatzin ten tamati queme ichcatzin. Huan Yejuatzin cualixtapoj in ica macuil sello. Ijcuacón niquitac ne altar tech eluiyactzinco campa quimohuistiliayaj Dios. Huan tatampa ne altar yetoyaj nochi ánimajtzitzin ten quinmictijque porín tacuautamatque ica in Tajtoltzin de Dios; huan no porín yejuan ay tanojnotztinenque de Cristo. <sup>10</sup>Huan nochi ne ánimajtzitzin quichicaucaztajziliayaj Dios huan quiliayaj ijcuín:

—Tejuatzin tion Totecotzin, tion Yolchipahuactzin huan tion Yolmelahuactzin. Niman xiquinonixcomacati huan xiquintatzacuiliti neques ten calyetocque nepa talticpac porín yejuan techmictijque ya.

<sup>11</sup>Huan ijcón Yejuatzin quinmajmactilij ne ánimajtzitzin sejsé istac taquemit huan quinilij que ma mosehuican oc sequi tonalme. Huan ma quiyolicachixtocan para ma motamisentilican oc nintequitaicnihuan huan nintasoicnihuan de Cristo ten polihuij oc. Porín huitze ocsequin taneltocani ten quipía de quipanosque in temictilis.

<sup>12</sup>Huan nejua ni Juan niquitac Yejuatzin ten tamati queme ichcatzin. Huan Yejuatzin cualixtapoj ica chicuasen sello. Ijcuacón niquitac que semi chicahuac talolinic tech in talticpac. Huan no niquitac que in tonaltzin tamitilehuic queme tiltic tilma. Huan no niquitac que in metzti semi chichilehuic queme esti. <sup>13</sup>Huan no niquitac que in sitalinme den eluiyactzinco tami tepeuque tech in talticpac. Huan ne sitalinme huetzque queme tepehui ne higostaquilot ten selic cuac quitzetzelo se chicaucaejecat. <sup>14</sup>Huan niquitac que in eluiyactzinco sepan san ixpolihuiic queme cuac se quiteteuino se patahuac amat. Huan no niquitac que nochi tepeme peuque molini-

ayaj huan nochi talme ten atzalan no peuque moliniayaj. Huan nochi yejuan majchiuque de campa ijcatoyaj. <sup>15</sup> Huan no niqitac que motalijque tech tepecoyocme huan tepejitic nochi in tayecanani reyes de nican talticpac. Huan inhuan motaati-  
jqe in hueyichihuanime huan in taca ricojme huan in tayecancasoldados huan in  
huelejueyi tamatinime. Huan no motaatijque nochi taquehualme tanamacme huan in  
taquehualme ten amo tanamacme. Nochi yejuan nojonques mosentaatitoj. <sup>16</sup> Huan  
yejuan quintzajtziilayaj in tepeme huan in tepejxime huan quiniliayaj ijcuín:

—Xipanhuetziqui topan huan xitechixtaati para ma amo techixitzto ne Yejuatzin  
ten tocotzyetica campa ne hueyi tayecancatrono. Huan no xitechixtaati para ma  
amo ticmachilican in chicaucatzacuultilis ten hualeutoc imaco Yejuatzin ten tamati  
ichcatzin.

<sup>17</sup> Huan ijcón quijtoayaj porín ejcoc ya ne hueyi tonal cuac Yejuatzin quin-  
cualancatzacuultis in talticpacuani. Huan nojón tatzacuultis amo aquen huelis  
quixtzacuillisque.

### **Huan nican tajtoa de ne se ciento huan omepoal huan nahui mil tocnihuan taneltocani**

**7** Huan niman niqitac nahui ángeles de Dios ijcatocque naucampa tech in taltic-  
pac. Huan yejuan nojonques ángeles quintzajcuilijtoyaj nochi in nahuin tataman  
ejecame para ma amo taejecani tech in talticpac huan nión tech in mar huan nión  
tech in cuohuiyo. <sup>2</sup> Huan no niqitac que ocsé ángel tejcoto ne campa panquisac  
in tonaltzin. Huan ne ángel maactoya in sello den tanahuatil de Totajtzin Dios ten  
yoltinemi sen nachipa. Huan ne ángel quinontzajtzilij in ocsequin nahui ángeles,  
neques ten quinmactilijque chichualis para huelis quijtacosque in talticpac huan  
in mar.

<sup>3</sup> Huan ne chichahuac ángel quinilij in ocsequin nahui ijcuín:

—Amo xiquijtacocan in talticpac huan nión in mar huan nión in cuoume. Ta,  
ximochiacan oc hasta ne tonal cuac quinixcuanescayotisque ya nochi nijín itequit-  
icahuan de Dios.

<sup>4</sup> Huan nicayic canachinme ne itequiticahuan de Dios ten taixcuanescayotilme ya.  
Huan nojonques ajsfaj se ciento huan omepoal huan nahui mil ten tasellarolme ya.  
Huan yejuan nojonques nopueblojcahuan de Israel, ten yec melau tacuautamatque  
de Dios huan yec melau poutinemij ihuan ne huejcautatuan den pueblojuani de Is-  
rael. <sup>5</sup> Huan ongayaj majtactionome mil tasellarolme ica in chichualis de Dios ten  
poutihualajque ihuan ichancahuan de Judá. Huan no ongayaj majtactionome mil  
tasellarolme ica in chichualis de Dios ten poutihualajque ihuan ichancahuan de  
Rubén. Huan no ongayaj majtactionome mil tasellarolme ica in chichualis de Dios  
ten poutihualajque ihuan ichancahuan de Gad. <sup>6</sup> Huan no ongayaj majtactionome  
mil tasellarolme ica in chichualis de Dios ten poutihualajque ihuan ichancahuan  
de Aser. Huan no ongayaj majtactionome mil den tasellarolme ica in chichualis  
de Dios ten poutihualajque ihuan ichancahuan de Neftalí. Huan no ongayaj ma-  
jtactionome mil tasellarolme ten poutihualajque ihuan ichancahuan de Manasés.  
<sup>7</sup> Huan no ongayaj majtactionome mil tasellarolme ica in chichualis de Dios ten  
poutihualajque ihuan ichancahuan de Simeón. Huan no ongayaj majtactionome  
mil tasellarolme ica in chichualis de Dios ten poutihualajque ihuan ichancahuan  
de Leví. Huan no ongayaj majtactionome mil tasellarolme ica in chichualis de Dios

ten poutihualajque ihuan ichancahuan de Isacar. <sup>8</sup> Huan no ongayaj majtactionome mil tasellarolme ica in chicahualis de Dios ten poutihualajque ihuan ichancahuan de Zabulón. Huan no ongayaj majtactionome mil tasellarolme ica in chicahualis de Dios ten poutihualajque ihuan ichancahuan de José. Huan no ongayaj majtactionome mil tasellarolme ica in chicahualis de Dios ten poutihualajque ihuan ichancahuan de Benjamín.

### Nican tajtoa de míac tagayot taquentoyaj ica istac taquemit

<sup>9</sup> Huan cuac nitamitajtachíac ya, ijcuacón ocsepa niqitac ompa ijcatocque huel míac tagayot ten amo aquen huelis quinpoahuas, ten hualeuque de nochi tataman paísme huan de nochi tataman tagayot, huan hualeuque de nochi tataman pueblojme huan tajtoayaj nochi tataman tajtolisme. Huan nochi yejuan yetoyaj iixpantzinco ne tayecancatrono huan iixpantzinco Yejuatzin ten tamati queme ichcatzin de Dios. Huan nochi yejuan taquentocque ica istac tilma huan maactocque cuouxihuit.

<sup>10</sup> Huan ne yejuan quichicaucatzajtziayaj Dios huan quiliayaj ijcuín:

Totajtzin Dios ten tontocotzyetica tech ne tayecancatrono, Tejuatzin tontechmaquixtía, huan no tion to Temaquixtijcatzin Tejuatzin ten tontamati queme ichcatzin de Dios.

<sup>11</sup> Huan no niqitac que nochi in ángeles quiyehualojtoyaj ne tayecancatrono campa yetoyaj ne huehuentzitzin huan ne nahui yoltica ocuiltzitzin. Huan nochi yejuan motancaquetzque huan motentocatoj iixpantzinco ne tayecancatrono huan de ompa quimohuistilijque Totajtzin Dios. <sup>12</sup> Huan nochi yejuan quiolochijtoaj ijcuín:

Ijcón ticnequij ma mochihua. Ma timitzonhueyipanchihuacan huan ma timitzonmohuistilican tion to Dios, porín sayó Tejuatzin ticonpía nochi tamachilisme.

Huan ma timitzontasojcamachilican huan ma timitzonmohuiscapohuacan porín sayó Tejuatzin ticonpía nochi chicahualis huan huelilis.

Huan ijcón ma timitzonmohuistilijtiyacan Tejuatzin tion to Dios sen nachipa huan sen nachipa. Ma ijcón mochiutiu.

<sup>13</sup> Huan de ompa senme de ne huehuentzitzin nechualnotzac huan nechtajoltij ijcuín:

—¿Aconi nijinques ten taquentocque ica istac taquemit? ¿Huan can hualeutoc?

<sup>14</sup> Huan nejua nicanquilij ijcuín:

—Tejuatzin, cuali ticmatoc ya.

Ijcuacón yejua nechilij ijcuín:

—Yejuan nojonques ten tajyohuijque ya cuac mopanohuilijque ya ne hueyi tatzaucuiltis tech talticpac. Huan nochi yejuan moyolchিপauque ica esyotzin de Yejuatzin ten tamati queme ichcatzin, ijcón queme cuac se quipaca tilma huan pochinía.

<sup>15</sup> Huan no nechilij ne huehuentzin ijcuín:

—Nochi yejuan yetocque iixpan ne tayecancatrono campa tocotzyetica Totajtzin Dios. Huan nochi nojonques quitequitilijtocque Totajtzin Dios yohualitonal campa ichantzin de Dios. Huan Yejuatzin ten tocotzyetica tech ne tayecancatrono, Yejuatzin momasoutoc inpan nochi nojonques para quinpalehuijti. <sup>16</sup> Huan nochi neques itequiticahuan de Dios, yejuan nojonques amo queman mayantinemisque oc, nión no queman amictinemisque oc. Huan nión no queman tonalmictinemisque oc huan nión no queman quimachilisque totoncayot den tonaltzin. <sup>17</sup> Huan Yeju-

atzin ten tamati queme ichcatzin, Yejuatzin ne inacastan yetica ne netayecancatrono. Huan Yejuatzin quinixpanoltijtiyás nochi itequiticahuan huan quinyecanas ma tayitij atzin ten quitemaca in yec nemilis, ijcón queme se ichcapiaque quinuica huan quinatlítia iichcahuan. Huan Totajtzin Dios quinelcahualtis de ninchoquilis huan quinixuajuatzas ica nichicahualis.

### Nican tajtoa de queniu Yejuatzin cualixtapoj ne ica chicome sellos

**8** Huan nejua ni Juan niqitac Yejuatzin ten tamati queme ichcatzin, huan Yejuatzin cualixtapoj ne ica chicome sello. Ijcuacán sepa san nochi motatamatilij ipan tajco hora nepa eluiyactzinco. <sup>2</sup>Huan niqunitac chicome ángeles ten ijcatocque iixpantzinco Totajtzin Dios huan Yejuatzin quinmajmactij sejsé trompeta. <sup>3</sup>Huan nimampa hualmotoquij ocsé ángel iixpantzinco ne altar campa quimohuistilía Dios. Huan ne ángel maactoya se vaso de oro queme se popochcaxit. Huan quimactilijque ne ángel míac ocsequi copal. Huan de ompa yejua quimaneloj ne copal ihuan nochi in netatatautilis ten hualehuac intzalan yolchipauque taneltocani de Dios. Huan de ompa in ángel tapopochuij ipan ne mesa de oro campa quimohuistilíaj Dios, ne altar ne ten ijcatoc iixpantzinco ne tayecancatrono de Dios. <sup>4</sup>Huan ne ipoquiyo den copal, yejua ne momanelo ihuan ne tatatautilisme den yolchipauque taneltocani de Dios. Huan nochi nijín pocti huan ne tatatautilis tejcoc quistehuac imaco in ángel huan ajsito iixpantzinco de Totajtzin Dios. <sup>5</sup>Huan de ompa ne ángel quicuic ne vaso de oro queme popochcaxit huan quipexontij ica tit ten quicuic de ne altar campa quimohuistilíaj Dios. Huan de ompa ne ángel quipantoyahuac ne tit tech in talticpac. Ijcuacán tapetantihualaya huan tajcoyocaya huan taticuintihualaya huan talolintihualaya porín Dios hueyi chiuque.

### Nican tajtoa de queniu ne chicome ángeles peuque tapitzaj ica nintrompeta

<sup>6</sup>Huan ne chicome ángeles ten maactoyaj sejsé itrompeta, yejuan nojonques moyectatalijque para tapitzasque.

<sup>7</sup>Huan ne ica se ángel tapitzac ica itrompeta. Huan de ompa quipantoyahuac nican talticpac tejsihuit huan tit ten tamanelol ica esti. Huan cuac huetzic nican talticpac, ijcuacán tamitatac se hueyi panti de cuoume huan no tamitatac nochi in sacat ten maxoxohuixtoya.

<sup>8</sup>Huan ne ica ome ángel tapitzac ica itrompeta. Huan de ompa majchihuac se tensá ten tamati queme se hueyi tepet ten tatic huan motamotato marijtíc. Ica ya nojón mochihuaco esti se hueyi panti den at den mar. <sup>9</sup>Huan no tamimicque se hueyi panti de oculinme den aijtíc nemíaj. Huan no tamihuejueliuque se hueyi panti de barcos ten nentinemía aixco.

<sup>10</sup>Huan ne ica eyi ángel tapitzac ica itrompeta. Huan de ompa huetzic se hueyi sitalin den eluiyactzinco ten xotatihuala queme se hueyi ocopil. Huan ne sitalin huetzico ipan se hueyi panti den huejueyi ame huan no huetzico ipan se hueyi panti de amelme. <sup>11</sup>Huan ne sitalin nitocay catca Ajenjo. Huan cuac huetzic ne sitalin, ijcuacán chichiyac se hueyi panti de nochi ame. Huan ijcón miacque tagayot momiquilijque cuac tayayaj ne at ten semi chichic. Porín in at chichiyac.

<sup>12</sup>Huan ne ica nahui ángel tapitzac ica itrompeta. Huan de ompa ijtaahuic secan hueyicacopaca den tonaltzin huan ijtaahuic secan hueyicacopaca de metzti. Huan no ijtaahuic se hueyi panti den sitalinme para ma amo tahuican oc se hueyi panti de

yejuan. Ica ya nojón amo yec tahuiaya oc den tonayan huan nión no cuali tahuiaya oc de yohual. <sup>13</sup> Huan de ompa nejua ni Juan niquitac se ángel patantinemía nepa ejecaixco huan nicayic que yejua chicaucatzajtzia ijcuín:

—Semi teicneltiani nochi neques ten calyetinemij nepa tech talticpac porín ne ocsequin eyi ángeles moyectatalijque ya para tapitzasque ica itrompeta.

**9** Huan ne ica macuil ángel tapitzac ica itrompeta. Huan de ompa niquitac se ángel ten tamati queme sitalin ten huetic de eluiyactzinco hasta nican talticpac. Huan cuac huetic ya, ijcuación Yejuatzin maactihuala se llave para huelis quitapos ne hueyi taltecoch ten semi huejcatan campa tzactoyaj in amo taneltocani. <sup>2</sup> Huan ne tagat ten tamati queme sitalin, yejua ne quitapoj ne hueyi taltecoch ten semi huejcatan. Huan tech nojón hueyi taltecoch hualpanquisaya huel mías pocti ijcón queme popoca se hueyi horno. Huan ica ne pocti ten hualpanquisac itech hueyi taltecoch, yejua ne quitayohuayantiltij in tonal huan tel tapoquihuac nochi ejecaixco. <sup>3</sup> Huan itech ne pocti hualquisque huel mías chapolinme ten patantinemitoj tech nochi in talticpac. Huan quimactilijque ne chapolinme huelilis para quinpa-jisque in talticpacuani ijcón queme alacranes tepajuáj. <sup>4</sup> Huan no quinnahuatijque ne chapolinme ma amo quijtacohuani tataman xutzitzin selic huan nión no ma amo quijtacohuani tensá ten maxoxohuixtoc huan nión no ma amo quijtacohuani nión se cuohuit. Ta, quinnahuatijque ma quintajyohuiltican sayó ne tagayot ten amo taixcuanescayotilme de Dios. <sup>5</sup> Huan ne chapolinme quinmactilijque huelilis amo para quinmictisque in tagayot. Ta, quinmactilijque huelilis sayó ma quintajyohuiltican ipan macuil metztica. Huan ne chapolinme quintoneutosque in tagayot ijcón queme in alacrán quintonehua cuac quintepinía. <sup>6</sup> Huan tech nojón tonalme de tajyohuilis, ijcuación in tagayot quiyolnequisque ma miquican pero amo huelisque. Huan no quitemojtinemisque de queniu miquisque pero amo huelis cajsisque de queniu momiquisque.

<sup>7</sup> Huan ne chapolinme quinejnehuiláj ne huejueyi caballojme ten quinyectatalijque ya para huelis motehisque tech in guerra. Huan ne chapolinme cuaactinemíaj se corona de oro huan inixco ixtamatáj queme in tagayot. <sup>8</sup> Huan ne chapolinme no tzonueyacque catcaj queme sihuame; huan nintanuan tenejque queme tecuanime ten quiláj león. <sup>9</sup> Huan ne chapolinme motaquentiayaj ica tepostaquen, queme ne tepostaquen ten quiláj coraza. Huan cuac patantinemíaj ne chapolinme, ijcuación chicaucacijcayocayaj in ejtapaluan, ijcón queme chicaucacacalayaj huel mías cuocarros cuac motaloaj quitilantiyohue caballojme tech in guerra. <sup>10</sup> Huan ne chapolinme nincuitapil quiapiayaj queme ne alacranes ten cuitapil tehuitztic. Huan ne chapolinme quiapiayaj chicahualis itech nincuitapil para ica quintonehualtisque nochi in tagayot ipan macuil metztica. <sup>11</sup> Huan ne chapolinme quiapiayaj se in-tayecancau. Huan in tayecancarey ten quinyectantinemi chapolinme, yejua ne in tayecanque ten poutoc tech hueyi taltecoch campa tzactocque in amo taneltocani. Huan ne tayecanque itocay se quijtoa tech in hebreojtajtol Abadón. Huan tech in griegojtajtol se quijtoa Apolión, ten quijtosnequi tahuejuelojque huan taijtaojque, ten quijtosnequi in amocuali Satanás. <sup>12</sup> Huan nijín tajyohuilis ten panoc ya, yejua ne in ocho tajyohuilis. Huan xiquitacan que hualajtoc ocsé ome tajyohuilisme.

<sup>13</sup> Huan ne ica chicuasen ángel tapitzac ica itrompeta. Huan de ompa nicayic se tajtolis ten hualeutoc tatzalan de ne nahui cuacuau nochi naucampa de ne altar de

oro ten yetoc iixpantzinco Totajtzin Dios. <sup>14</sup>Huan ne tajtolis quinojnotzac ica ne chicuasen ángel ten maactoya itrompeta huan quilij ijcuín:

—Xiquintojtoma ne nahui ángeles ten ilpitocque atenteno den hueyíat ten quilíaj Eufrates.

<sup>15</sup>Huan ijcón quintojtonque ne nahui ángeles ten quichixtocque ne xihuit huan in metzti huan ne tonal huan ne hora cuac yejuan huelis quisasque para quinmic-tisque se hueyi panti den talticpac taca. <sup>16</sup>Huan nicayic canachinme ne soldados ten mopantaliyaj tech caballojme, yejuan nojonques tapohualme ome ciento millones de soldados.

<sup>17</sup>Huan niquitac tech ne tajtachialis ne caballojme huan in taca ten inpan motali-ayaj. Huan ne taca quinelpancuitoyaj tepos ten tamati chichiltic huan nextiltic huan costic. Huan ne caballojme nintzontecon tamati queme tecuanime ten quilíaj León huan tech ninteno hualquiquisa tit huan pocti huan azufre ten semi tzojyac. <sup>18</sup>Huan queme hualquiquisaya ninteno ne caballojme nijín eyi chiahisque den tit huan den pocti huan den azufre, ica ya nojón nejua niquitac que momiquilijque se hueyi pan-time den tagayot. <sup>19</sup>Huan ne caballojme quiplayaj huelilis para quintajyohuiltisque in tagayot ica por ninchicahualis ten quisaya ninteno huan ica por ninchicahualis ten quiplayaj nincuitapilco. Porín nincuitapiluan quinejnehuiliayaj queme cohuame nintzontecohuan. Huan ica por ne nincuitapiluan, ne caballojme quincococojtine-mij in tagayot. <sup>20</sup>Huan ne ocsequin taca ten amo momiquilijque ica por nojón eyi taman chiahuis, yejuan nojonques amo moyolnemilijque de amo quinmohuistilisque oc míac tataman tatadiosme ten yejuan quichiutinenque ica ninmahuan, ne tatadiosme de tamachijchihualme ica oro huan ica plata huan ica in tepos bronce huan ica in tet huan ica cuohuit. Huan ne tatadiosme amo huelij tachíaj, nión no huel tacaquij, huan amo no huel nenemij. Huan in tagayot amo no quicauque de amo quinmohuistilisque ne amocuali ejecame. <sup>21</sup>Huan ne ocsequin taca ten amo momiquilijque ica por nojón eyi taman chiahuis, yejuan nojonques amo moyolnemilijque que ma amo temictijtinemican nión no ma amo quinnahualuijtinemican oc. Huan yejuan amo no quicauque de amo ahuilcanentinemisque, huan nión no quicauque in tachtequilis.

### Nican tajtoa de queniu se ángel maactoya se librojtzin

**10** Huan nejua ni Juan niquitac que hualpantemoc den eluiyactzinco ocsé ángel ten cualcui hueyi tanahuatil. Huan ne ángel quiyehualojtihualaya mixti huan no quicuayehualojtihualaya se cosamalot. Huan ne ángel ixcacahuacaya queme in tonaltzin huan nimetzuan nestihualaya queme ome time ten momemelahuayaj. <sup>2</sup>Huan ne ángel maactoya se librojtzin ten ixtapotoc. Huan ne ángel ica iyecmetz quitelicsatoya in mar huan iopochmetz quitelicsatoya in tal. <sup>3</sup>Huan ne ángel chicaucaztajtzic ijcón queme in tecuani León cuac cualancatzajtzic. Huan ne ángel cuac chicaucaztajtzic ya, ijcuacón pehuac taticuini chicojcampa. <sup>4</sup>Huan cuac tamitaticuinic ya chicojpa ya, ijcuacón nejua nimoyectatalito para nitajcuiloa. Pero nimitzilía tepitzin nicayic que nechualilij se tajtolis den ne eluiyactzinco huan nechilij ijcuín:

—Xictaati oc ne tamachilis ten hualehuac campa ne taticuinic chicojpa huan mon-equi ayamo xitajcuilo.

<sup>5</sup>Huan ne ángel ten niquitac metzijcatoc ipan in mar huan ipan tal, yejua ne momaajacuic eluiyactzinco. <sup>6</sup>Huan ne ángel quiyequijtoa ya ica in chicahualis de

Totajtzin Dios ten yoltica sen nachipa huan sen nachipa, huan quiyequijtoaya que tanque ya in tonalme. Huan nochi nijín ne ángel quiyequijtoaya ica in chichualis de Yejuatzin ten quichijchihuac in eluiyactzinco huan nochi ten ihuan pohui. Huan Yejuatzin quichijchihuac in talticpac huan nochi ten ihuan pohui. Huan Yejuatzin quichijchihuac in at den mar huan nochi ten ihuan pohui. Huan ne ángel ica in chichualis de Yejuatzin quiyequijtoa ya que tanque ya in tonalme huan amo monequi que ticchiasque oc. <sup>7</sup> Huan quiyequijtoa ya que Dios itanejnequilis motamichihuas ya, ijcón queme Yejuatzin quinyequilijca ya itequiticahuan ne huejcautanahuatiani. Huan quiyequijtoaya que nochi motamichihuas tech ne tonalme cuac ne ica chicome ángel pehuas tajtoquiu huan pehuas tapitzaquiu ica itrompeta.

<sup>8</sup> Huan no nicayic que ocsepa nechnojnnotzac ne tajtolis den eluiyactzinco huan nechilij ijcuín:

—Xiyó huan ximomaaquiti ne librojtzin, ne ten ixtapotoc imaco ne tayecancaángel ten metzijcatoc ipan in mar huan ipan in tal.

<sup>9</sup> Huan de ompa nejua niyajqui niquitato ne tayecanque ángel huan nictajtanilito ma nechmactili ne librojtzin. Huan ne ángel nechilij ijcuín:

—Ximomaaqui huan xicua. Huan ijcón ticyecos que tzopec tech moten queme cuoutajnecti. Pero ticmachilitiu que chichic de moijticpa ya.

<sup>10</sup> Ijcuacán nejua nicuic ne librojtzin imaco in ángel huan nimocualtij. Huan melau nicyecoj que tzopec tech noten. Pero cuac nictamicuaj ya, ijcuacán melau nicmachilij que nitoscachichiyac porín nochi tami chichiyac ya noijticpa.

<sup>11</sup> Huan ne ángel ocsepa nechilij ijcuín:

—Semi monequi xicsentoca xitanojnnotztinemi oc itencopaca Totajtzin Dios huan xitanojnnotztinemi de toni tajyohuilis mochihuati ipan tataman pueblojme huan ipan tataman paísme huan ipan neques ten tajtoaj ica tataman tajtolme huan ipan tataman tayecananime reyes.

### Nican tajtoa den ome taca ten quitetajtohuiltijtinemij Dios

**11** Huan de ompa nechmactilijque se cuohuit ten tamati queme se vara tenica se tatamachihua huan nechilijque ijcuín:

—Ximoquetza huan xiyó tech in pueblo de Jerusalén huan xictamachihuati itiopantzin de Dios huan no xictamachihua ne altar campa quimohuistilíaj Dios. Huan no xiquinpohua canachinme quimohuistilijtocque Totajtzin Dios. <sup>2</sup> Pero amo xictamachihua ne ten caltenojpa den tiopan de Dios. Amo xictamachihua ne calten de tiopan porín ompa quinmactilijque ya ma ompa nentinemijcan ne tagayot ten amo taca judíos. Huan yejuan tajtacsatinemisque huan quipitzotilijtinemisque ne mohuistic pueblo de Jerusalén ipan omepoal huan ome tapoalme oc, ten quijtosnequi eyi xihuit huan tajco. <sup>3</sup> Huan Nejuatzin niquinmactilis ne ome notetajtohuiltijcahuan in tanahuatil para yejuan tanojnnotztinemisque notencopaca ipan se mil huan ome ciento huan eyipoal tonalme, ten quijtosnequi eyi xihuit huan tajco. Huan notetajtohuiltijcahuan taquentinemisque ica tiltic taquemit.

<sup>4</sup> Huan ijcón ome notetajtohuiltijcahuan quinejnehuilíaj queme ome olivoscuohuit. Huan no quinejnehuilíaj queme ne ome velajquetzalónime ten ijcatocque iixpantzinco Totecotzin Dios ten tequititinemi tech nochi in senmanahuac. <sup>5</sup> Huan tacán acsame quinequij quincococosque ne tetajtohuiltiani, ijcuacán hualquiquisas tit ninteno huan ijcón quintajtamitiasque neques ten quinixnamiquisque. Huan

naquen quinequij quintajohuiltisque ne tetajtohuiltiani, ijcuacón miquisque ica mismo tit. <sup>6</sup> Huan ne ome tetajtohuiltiani quipixtinemij tanahuatil para quixtzacuillisque ne mixti para ma amo quiohuis tech nojón tonalme cuac yejuan tanojnotztine-misque itencopaca Totajtzin Dios. Huan no ne ome tetajtohuiltiani quipixtinemij tanahuatil para quichihuasque ma in at ma mocuepa esti. Huan no quipixtinemij tanahuatil para quijtacosque in talticpac ica tataman chiahuis. Huan nochi nijín cuali huelis quichihuasque cuac yejuan quinequisque. <sup>7</sup> Huan cuac tamitanojnotztinenque ya itencopaca Dios nojón ome tetajtohuiltiani, ijcuacón hualpanquisas in amocuali Satanás, yejua ne tayecancatecuani de ne hueyi taltecoch campá tzacotque in ánimajme ten amo taneltocani. Huan de ompa ne tayecancatecuani pehuas quintehuis ne ome tetajtohuiltiani huan ijcón yejua quintamitanilis huan quinmictis. <sup>8</sup> Huan mochihuas que innacayo ne ome tetajtohuiltiani huetztosque tech in plaza de ne pueblo campá ipa quicuoupampilojcaj Totecotzin Jesucristo, yejua in Jerusalén. Huan no quitocaytáj ne pueblo ica nexcuitil in Sodoma huan Egipto. <sup>9</sup> Huan huetztosque eyi huan tajco tonalica innacayo ne ome tetajtohuiltiani para ijcón quinitztosque nochi tataman pueblojme huan nochi tataman tagayot huan nochi tataman paísme huan nochi tagayot ten tajtoaj ica tataman nochi tajtolis. Huan amo quitecahuillisque ma quintalpachotij ne ome ánimajme. <sup>10</sup> Huan nochi in talticpacuani moyoluelitasque huan mopaquiltisque porín quinmictijque ne ome tetajtohuiltiani. Huan ica por ninyolpaquilis motayocolisque míac tataman tetayocolilme se huan ocsé. Huan ijcón yejuan quichihuasque porín ne ome tetajtohuiltiani quintajohuiltijtinenque in calyetoní de nican talticpac. <sup>11</sup> Pero cuac panoc ya eyi tonal huan tajco, ijcuacón Totajtzin Dios quinqualtitanilij se chichahualis ten cualcui nemilis. Huan ne chichahualis calaquic itech ne ome ánimajme den tetajtohuiltiani. Huan ijcón nojón ome tetajtohuiltiani moquetzque. Ijcuacón quinquemiloquiu se hueyi moucayot nochi ne pueblojuani ten quinitztoyaj. <sup>12</sup> Huan mocayic se chicaucatzajtzilis ten hualehuac eluiyactzinco ten quiniliaya ne ome tetajtohuiltiani ijcuín: —Xihualtejcocan nican.

Huan ijcón yejuan tejcocque ne eluiyactzinco huan ijcón yejuan quiquemilojtijaque ica se mixti. Huan no neques ten quintahuelitayaj ne ome tetajtohuiltiani, yejuan nojonques quinitacque cuac yajque.

<sup>13</sup> Huan niman tech nojón momento chicaucatalolinic. Huan se panti de caliyo tech in pueblo huejuelluque huan xixitínque. Huan momiquilijque chicome mil tagayot porín chicaucatalolinic. Huan ocsequin tagayot ten mocauque, yejuan nojonques mohueyiyolmoutijque. Huan yejuan peuque quimohuistilijque Dios. <sup>14</sup> Huan nochi nijín ten mochihuac ya, yejua ica ome tajyohuilis. Pero xiquitacan que niman hualajtoc ya ica eyi tajyohuilis.

### **Nican tajtoa de queniu in ica chicome ángel tapitzac ica itrompeta**

<sup>15</sup> Huan nejua ni Juan niquitac que ica chicome ángel tapitzac ica itrompeta. Huan mocayic se chicaucatajtolisme nepa eluiyactzinco ten quijtoaya ijcuín:

Nochi in pueblojme huan nochi senmanahuac moimaxcatilij ya Totecotzin Dios huan Jesucristo.

Huan Yejuatzin pehuac tayecantinemi huan quinxpatcayotijque nochi in tayecanani de nican talticpac.

Ica ya nojón Yejuatzin tayecantinemis sen nachipa huan sen nachipa.



<sup>16</sup>Huan ne sempoal huan nahui huehuentzitzin tocotzyetoyaj tech ninsillajuan campa iixpantzinco Totajtzin Dios. Huan nochi yejuan motancuaquetzque huan momentocatoj huan peuque quimohuistilijque Totajtzin Dios. <sup>17</sup>Huan yejuan quiliayaj Dios ijcuín:

Timitzonueyitasojcamachilíaj Tejuatzin, tion Totecotzin, tion Dios ten ticonpixinemi nochi chichualis.

Porín Tejuatzin ya axcan tionyoltica huan ipa tionyoltinemic ya huan tionyoltinemis sen nachipa.

Porín Tejuatzin ya tionmoaxcatilij ya mohueyichichualis huan ticpehualtij ya de tiontayecantinemis.

<sup>18</sup>Huan nochi in talticpacuani mitzueyitahuelitacque ya pero no ejcoc ya in tonal cuac Tejuatzin tiquinatzacuultis ica mohueyicualanyot.

Huan no ejcoc ya in tonal cuac Tejuatzin tiquinacomacas nochi in ánimajme.

Huan no ejcoc in tonal cuac Tejuatzin tiquinonmajmactilis nochi motequiticahuan ten tanojnotztinenque motencopaca.

Huan no ejcoc in tonal cuac Tejuatzin tiquintaxtahuis ica cuali nochi yolchipauque motaneltocacahuan, huan nochi neques ten mitzonmohuistilijtinemij masqui yejuan hueyi chihuanime oso masqui amo hueyi chihuanime.

Huan no ejcoc in tonal cuac Tejuatzin tiquintajtamis neques ten tajtacojtinene nican talticpac.

<sup>19</sup>Huan de ompa tatapohuic campa itiopantzin de Dios nepa eluiyactzinco. Huan ompa tiopanijtic monextiaya ne hueyi cajón ten quilía arca campa quineutoyaj neitanahuatiluan ne ten Totajtzin Dios quimactilijca itanahuatijcahuan. Huan ne campa tiopantzin de Dios sepa san tapetantihualaya huan taticuintihualaya huan tajcoyocaya huan talolinía huan huetzico míac tejsihuit porín Totajtzin Dios hueyi chiuque.

### Nican tajtoa de ne sihuatzin huan ne amocuali tecuani

**12** Huan monextico ne ejcaixco se nescayot tenica se quimoucaita. Huan niq-uitac se sihuatzin ten taquentoya ica in tonaltzin huan quipantelicatoya in metzti. Huan yejua cuaactoc se corona ten quiapiaya majtactiomome sitalinme. <sup>2</sup>Huan yejua cocoxcayeto ica ipili huan pehuaya tzajtzía ica ne toneucayot porín tayolititi ya.

<sup>3</sup>Huan no monextico ne ejcaixco ocsé nescayot tenica se quimoucaita. Huan niq-uitac se hueyi amocuali tecuani ten quilíaj dragón ten chichiltic. Huan quiapiaya chicome itzontecohuan huan no quiapiaya májtacti icuacuau. Huan cada se tzontecomat cuaatocya se corona. <sup>4</sup>Huan ica nicuitapil ne amocuali tecuani quinmajmagac se hueyi pantime de sitalinme ne ejcaixco huan quintepehuac tech in talticpac. Huan moquetza ne hueyi tecuani iixpan in sihuatzin ten tayolititi ya para mocualtis ne pili niman cuac yolis. <sup>5</sup>Huan de ompa ne sihuatzin quiyolitij se oquichpilconet. Huan ne oquichpiltzin quinycantinemis nochi paísme nican talticpac ica ichicaucahuelilis. Huan niman ne conetzin Dios cajoctehuac huan cuiyac eluiyactzinco campa yet-ica Dios huan campa ne tayecancatrono de Dios ihuelilispán. <sup>6</sup>Huan de ompa mocholtij in sihuat huan yajqui campa taiucan. Huan mocahuato ompa campa Dios ipa quiyectalilijca ya ma mocahuas. Huan ompa Dios quixpanoltijtoya ipan se mil huan ome ciento huan eyi tonalme, quijtosnequi eyi xihuit huan tajco.

<sup>7</sup> Huan de ompa mochihuac que pehuac ne tehuilis ne eluiyactzinco. Huan Miguel, yejua in tayecanque ángel, yejua ihuan íángelicnihuan quitehuiayaj ne amocuali tecuani. Huan ne amocuali tecuani ihuan itequiticaicnihuan no motehuiayaj ihuan ne ángelme de Dios. <sup>8</sup> Pero in amocuali tecuani amo huelía quintanilis in ángel Miguel huan íángelicnihuan. Ica ya nojón ne amocuali tecuani amo huelic oc mocahuas oc nepa eluiyactzinco. <sup>9</sup> Huan ijcón quicalantamotque ne hueyi amocuali tecuani, yejua ne in cohuat ten ne achtopa ipa nentihuitz. Huan ne cohuat quitocaytijque in amocuali, huan no quitocaytijque Satanás, ne ten quincajcayautinemi nochi in talticpacuani. Huan quicalantamotque ne amocuali Satanás den eluiyactzinco, huan no quincalantamotque nochi ne itequiticaicnihuan de Satanás. Huan nochi huetzicoj nican talticpac. <sup>10</sup> Ijcuacón nicayic se chcaucatajtolis nepa eluiyactzinco ten quiytoaya ijcuín:

—Totajtzin Dios quitamichihuaco ya ne nemaquixtilis huan quinextico ihueyichichualis. Huan axcan Totajtzin Dios tayecantinemi nohuyampa porín quiaxcatilij ya Cristo nochi huelilis para ica tayecantinemis. Huan Totajtzin Dios quitamicalantamotac ya ne Satanás ten quinteluilijtinemic in tocnihuan taneltocani. Huan no ne Satanás quinteluilijtinemía tocnihuan taneltocani yohualitonal iixpantzinco Totajtzin Dios. <sup>11</sup> Huan in tocnihuan taneltocani quitamitanilijque ya ne amocuali Satanás ica in chichualis den iesyotzin de Yejuatzin ten tamati queme ichcatzin. Huan yejuan no quitamitanilijque in amocuali Satanás ica in tajtolme tenica tanojnotztinemij itencopaca Cristo. Huan yejuan amo quiyolmohuiliayaj de momiquilisque tech nintequiu. <sup>12</sup> Ica ya nojón nochi namejuan ten nancalyetoni de eluiyactzinco, ximohueyiyolpactijtinemican. Pero semi nanteicneltiani namejuan ten nancalyetocque tech in talticpac huan apanían, porín ne amocuali Satanás hualpantemoc ya para tequititinemis namotzalan ica hueyi yolcualanyot. Huan mocualantijtinemi in amocuali Satanás porín cuali quimati que amo quipía oc mías tonalme para tequititinemis.

<sup>13</sup> Huan cuac ne amocuali tecuani quitac ya que mocalantamotac ya huan huetzico ya nican talticpac, ijcuacón yejua pehuac quicantoca ne sihuatzin ten quiyolitij ya ne se oquichpilconet. <sup>14</sup> Pero Dios quimactilij ne sihuatzin ome iejtapaluan queme in ejtapalme de hueyi águila. Huan ne sihuatzin mochololtij campa tayiucan huan ijcón maquisas de ne cohuat ten quicantocaya. Huan ompa yetoya ne sihuat campa ne tayiucan. Huan Dios quixpanoltijtoya ne sihuat eyi xihuit huan tajco. <sup>15</sup> Huan ne amocuali tecuani cualcampeyacahuac at, ten motaya queme se hueyi at icampa ne sihuatzin para ijcón quixcuetpiquequisas huan quimictis ne sihuatzin. <sup>16</sup> Pero mochihuac que in talticpac quipalehuij ne sihuatzin porín motapoj in tal queme se hueyi talcomit huan ijcón ompa pancalayic in at ten in amocuali tecuani cualcampeyahuilij in sihuatzin. <sup>17</sup> Ica ya nojón ne hueyi tecuani mohueyiyolcualantij ihuan ne sihuatzin. Huan in tecuani yajqui quintehuito nochi in ocsequin tagayot ten iconehuan de ne sihuatzin. Huan ipiluan de ne sihuatzin, yejuan nojonques ten quintacamatinemij itanahuatiluan de Dios huan yejuan tanojnotztinemij de aconi nojón Jesucristo.

### Nican tajtoa de ne ome tecuanime

**13** Huan niquitac que ne amocuali tecuani, yejua ne in dragón. Huan yejua moquezac ne atexalpanían den mar. Huan nejua ni Juan niquitac que hualajco-

panquisac se ocuilin ten quipiaya chicome itzontecohuan huan no quiapiaya májtacti icuacuau. Huan cada se icuacuau cuaactoya se corona. Huan ijcuiliutoc tech nitzontecohuan sejsé tocyit tenica quihuijuicaltía Dios. <sup>2</sup>Huan ne ocuilin ten niqitac, yejua ne quinejnehuilía in cuoutajmiston ten exixiltic ten quilíaj leopardo. Huan ne ocuilin nimetzuan queme in tecuani ten quilíaj oso. Huan ne ocuilin iteno quinejnehuilía in cuoutajmiston ten quilíaj león. Huan in amocuali tecuani ten quilía dragón, yejua ne quimactilij ne ocuilin nochi nichicahualis huan nochi itanahuatil huan ichicauchuelilis.

<sup>3</sup>Huan niqitac ne ocuilin senme de nojón chicome tzontecomat que tajojocol huan nesía que amo nenquentis oc. Pero melau nenquentic ne campa tajojocol. Ica ya nojón nochi in talticpacuani quihueyimoucaítacque ne ocuilin que nenquentic ya. Huan yejuan quimoucatociltijque ne ocuilin. <sup>4</sup>Huan in tagayot quimohuistilijque ne amocuali tecuani ten quipanoltijca ya ihuelilis tech ne hueyi ocuilin. Huan yejuan no quimohuistilijque ne hueyi ocuilin huan quiliayaj ijcuín:

—Amo aquen quinejnehuilía nijín ocuilin huan amo no aquen huelis quitanilis nijín ocuilin.

<sup>5</sup>Huan ne hueyi ocuilin quicahuilijque ma mohueyinectinemi ica elihuis tajtolme para ijcón quimohuispolojtinemi Dios. Huan no quimactilijque ne hueyi ocuilin in tanahuatil para tayecantinemis para omepoal huan ome metztica, quijtosnequi eyi xihuit huan tajco. <sup>6</sup>Huan ijcón mochihuac que ne hueyi ocuilin mopajtic huan pehuac quihuijuicaltíaya Dios. Huan no quimohuispoloaya itocaytzin de Dios. Huan no ne ocuilin quitejtenehuaya ne ichantzín de Dios nepa eluiyactzinco. Huan no quini-jitoaya nochi neques ten calyetocque nepa eluiyactzinco. <sup>7</sup>Huan no quicahuilijque ne hueyi ocuilin se tanahuatil para ma quintehuijtinemi in tocnihuan yolchipauque ica cualanyot para ijcón quintanilis. Huan no quimactilijque ne hueyi ocuilin se tanahuatil para tayecantinemis ipan nochi tataman tagayot huan ipan tataman pueblojme huan ipan nochi tataman paísme huan ipan nochi tataman tagayot ten tajtoaj ica tataman tajtolme. <sup>8</sup>Huan nochi in talticpacuani quimohuistilíayaj ne hueyi ocuilin ten amo ixnesí nintocay tech ne hueyi libro de Dios. Huan desde cuac ayamo tzinehuac in talticpac, ipa ixnestihuitz ya tech ne hueyi libro de Dios nochi nintocayuan de nitaneltocacahuan de Cristo ten nentinemis que sen nachipa. Huan Cristo tamati queme se ichcatzín ten ipa quimictijcaj ya. <sup>9</sup>Huan nochi neques ten quinequij quicaquisque, yejuan nojonques ma quiyecaquilian nijín tanojnotzalis ijcuín: <sup>10</sup>Huan ne tehuiani ten quinqitzquisque ocsequin queme presos, yejuan nojonques no mocahuasque queme presos. Huan nochi neques ten temictía ica machete, yejuan nojonques no quimictisque ica machete. Ica ya nojón nochi itaneltocacahuan de Dios, monequi ma quisentocacan quiyolicachixtiyacan itapalehuilis de Dios huan no ma tacuautamatíyacan sen nachipa.

<sup>11</sup>Huan satapan de nochi nijín, niqitac que hual ajcopanquisac den tal ne ica ome ocuilin. Huan ne ica ome ocuilin quiapiaya ome icuacuau queme quipía in oquich ichcat. Pero ne ica ome ocuilin tajtojtinemia pitzotic queme ne hueyi tecuani ten quilíaj dragón. <sup>12</sup>Huan ne ica ome ocuilin tayecantinemi iixpan ne ocsé ocuilin ica hueyi tanahuatil ijcón queme ne ocsé hueyi ocuilin tayecantinemi. Huan ne ica ome ocuilin quichiutinemi que ma nochi talticpacyetoni ma quimohuistilican ne achto ocuilin. Huan ne achto ocuilin yejua ne pajtic ya. <sup>13</sup>Huan ne ica ome ocuilin quichi-huac ya hueyi mohuiscatequime hasta ma hual panuetzi tit desde ne eluiyactzinco

para ma quitacan nochi in talticpacyetoni que yejua quipía chicahualis. <sup>14</sup>Huan ica nijín nescayome quincajcayahua in talticpacyetoni ne ica ome oculin. Porín yejua quiaxcatilijque ya chicahualis para huelis quichiutinemis tataman mohuiscatequime iixpan ne achto oculin. Huan ne ica ome oculin quinahuatij nochi talticpacuani que ma quichijchihuacan se tatadios ten ixtamati queme ne achto oculin, ne ten cuatacojocol ica machete catca huan ocsepa nenquentic. <sup>15</sup>Huan ica ome oculin quicahuilijque ma quimaca ijyot ne tatadios ten ixtamati queme ne achto oculin, para ma nojón tatadios ma tajto. Huan ne ica ome oculin quimactilijque tanahuatil para ma quinmicti nochi neques ten amo quimohuistilisque ne tatadios ten tamati queme ne achto oculin. <sup>16</sup>Huan ne ica ome oculin quintalilij se nescayot intech nochi in talticpacyetoni, masqui yejuan hueyi chihuanime oso amo, masqui yejuan ricojme oso pobres, masqui yejuan taquehualme tanamacme oso masqui amo tanamacme. Huan ne ica ome oculin quintalilij ne nescayot inyecmacopaca oso inixcuaco de nochi in talticpacuani. <sup>17</sup>Huan amo aquen huelisquía tacohuas huan nión no huelisquía tanamacas, como amo quipía nojón nescayot. Huan ne nescayot, yejua ne itocay den oculin oso inúmero den oculin. <sup>18</sup>Huan nochi nijín monequi hueyi tamachilis de Dios para huelis ticajsicamatisque. Huan ne tagat ten taixmatinemi, yejua ne ma quixejeco cuali inúmero de ne oculin. Porín inúmero den oculin, yejua ne no inúmero den ne amocuali tagat. Huan ne número yejua ne chicusasen ciento huan eyipoal huan chicusasen.

**Nican tajtoa de queniu quicantarohuilíaj Dios ne se ciento  
huan omepoal huan nahui mil taneltocani**

**14** Huan satepan de nochi nijín, niqitac ya Yejuatzin ten tamati queme ichcatzin. Ijcuacón niqitac que Yejuatzin metzijcatoc ipan ne tepetzin ten quilíaj Sión. Huan ompa ihuan Yejuatzin yetoyaj se ciento huan omepoal huan nahui mil taneltocani de Dios. Huan nochi yejuan ijcuiliutoc tech inixcuaco in tocayit de Cristo huan in tocaytzin de Dios, Yejuatzin Itajtzin de Cristo. <sup>2</sup>Huan nicayic se chicahuac tajtolis den eluiyactzinco queme cuac comontocque huejueyi ame, huan no mocayic queme cuac chicaucaticuini. Huan ne tajtolis ten nicayic, yejua no mocayic queme ne tatzotzonani ten tatzotzontinemij ica harpas. <sup>3</sup>Huan nochi yejuan quicantarohuiliayaj Dios ica se yancuic himno ne iixpantzinco ne tayecancatrono de Dios. Huan no cantaroayaj nepa inixpan de nojón nahui ocuiltitzin huan inixpan nojón huehuentitzin. Huan amo aquen huelía momachtis de ne yancuic himno. Ta, sayó huelis momachtis ne se ciento huan omepoal huan nahui mil taneltocani ten tacohualme ya ica iesyotzin de Cristo, ne ten Dios quinmaquixtij ya intzalan nochi in ocsequin talticpacuani. <sup>4</sup>Huan ne taneltocani ten tacohualme de Cristo, yejuan nojónques yolchipauque porín amo mohuicatinenque ihuan ne sihuahuilnemi. Huan ne taneltocani yolchipauque, yejuan nojonques quitoctiliayaj Cristo ten tamati queme ichcatzin huan quisehuicayaj campa yesqui yaya Cristo. Huan nojón taneltocani yolchipauque, yejuan nojonques Dios quincohuac ica iesyotzin de Cristo huan quinmaquixtij intzalan in talticpacuani. Huan ne taneltocani yolchipauque, yejuan nojonques mochihuaco queme ne taquilot ten achtopa motaquitij, quijosnequi yejuan in tayecancaconejuan de Totajtzin Dios huan den Cristo ten tamati queme ichcatzin. <sup>5</sup>Huan ne taneltocani yolchipauque, yejuan nojonques amo xolop-

ijtitinenque ica nintajtoluan. Huan nochi yejuan, amo aquen huelis quinteluilis ica tajtacol iixpantzinco Dios campa itayecancatrono de ihuelilipan.

### Nican tajtoa de ne tanojnotzalis de eyi ángeles itequiticahuan de Dios

<sup>6</sup> Huan nejua ni Juan niquitac ocsé ángel patantinemi ne ejeaixco. Huan nojón ángel quipixtinemic ne Tajtoltzin de Dios ten cualcui ne nemaquixtilis huan ne Tajtoltzin amo queman ixpolihuis. Huan nojón ángel tanojnotztinemía intzalan nochi in talticpacyetoni huan intzalan nochi paísme huan intzalan nochi tataman tagayot huan intzalan nochi tataman pueblojuani huan intzalan nochi tataman tagayot ten tajtoaj ica tataman tajtolis. <sup>7</sup> Huan nojón ángel quinchicaucailiaya ijcuín:

—Ximohuistilican Totajtzin Dios huan ximohuiscapohuacan Yejuatzin porín ejcoc ya in tonal cuac Yejuatzin namechixcomacas namejuan nantalticpacuani. Huan ximohuistilican Yejuatzin ten quichijchihuac in eluiyactzinco huan in talticpac huan nochi at den mar huan nochi in amelme. Porín Yejuatzin quichijchihuac nochi ten nanquitaj.

<sup>8</sup> Huan niquitac ica ome ángel ten quitoctiliaya ne achto ángel. Huan ne ica ome ángel quiytoaya ijcuín:

—Ne hueyi pueblo ten quilía Babilonia, yejua ne mohuejueloj ya huan moijtacoj ya. Porín in pueblojuani de ne Babilonia, yejuan nojonques quinijtacojque nochi ocsequin talticpacuani huan quinyolpitzotilizque ijcón queme yejuan yolpitzoticque catcaj.

<sup>9</sup> Huan niquitac ica eyi ángel quitoctiliaya in ocsé ome ángelme. Huan yejua quichicaucaiytoayaj ijcuín:

—Tacán acsá quimohuistilía se hueyi oculin oso tacán quimohuistilía ne itatadios, ijcuación Dios quitatzacuultis.

Huan no quiytoaya in ángel ijcuín:

—Tacán acsá motecahuilis que ma quitallilican nojón nescayot tech imaco oso in-ixcuaco, ijcuación Dios quitatzacuultis. <sup>10</sup> Huan melau Dios quinchicaucatzacuultis huan quincualancatajyohuultis nochi neques ten poutinemij ihuan ne hueyi oculin. Huan yejuan tajyohuijosque campa tatatoc ca azufre. Huan ne tajyohuiani quinon-itzosque ne ángeles de Dios huan conitzosque Cristo ten tamati queme ichcatzin.

<sup>11</sup> Huan hual ajcopanquistos pocti sen nachipa huan sen nachipa campa yejuan semi tajyohuijosque ica tit. Huan amo queman nión se tonal huan nión se yohual mosehuisse de amo tajyohuijosque nochi neques ten quimohuistilizque ne hueyi oculin ihuan ne itatadios. Huan amo no queman seucayetosque de amo tajyohuisse neques ten motecahuilizque ma quintalilican ne nescayot ten cuica itocay de ne hueyi oculin.

<sup>12</sup> Huan ijcón ma quiyolicaxicojtiyacan tajyohuulis nochi taneltocani yolchipauque huan ma quitacamatiyacan itanahuatilme de Dios huan ma tacuautamatiyacan ihuan Jesús.

<sup>13</sup> Huan no nejua ni Juan nicayic se tajtolis de ne eluiyactzinco ten nechilía ijcuín:

—Xiqijcuilo ijcuín: “Axcán para taixpan semi tatiochihualme de Dios nochi in ánimajme ten momiquilizque ya huan tacuautamatque ihuan Totecotzin”.

Huan hueyi melau queme quijtoa in Yecticatzin Espíritu ijcuín:

—Yejuan mosehuisque huan amo tequitisque oc. Porín yejuan quichiutinenque míac chihualisme ten cuali nican talticpac, ne ninchihualisuan ixnestinemis oc nepa eluiyactzinco.

**In ángel de Dios quinsecotalía itaneltocacahuan de Cristo huan  
no quinsecotalía neques ten amo taneltocani ijcón  
queme se tequitique quinsecotalía in tataman tatocme**

<sup>14</sup> Huan nejua ni Juan no niquitac se cualtzin istac mixti. Huan tech nojón mixti niquitac que tocotzyetica Yejuatzin ten tamati queme in Yectagatzin de Dios. Huan no niquitac que Yejuatzin cuaactoc se corona de oro. Huan no maactoc se tepostatequiloni semi tene ten quilía hoz. <sup>15</sup> Huan no niquitac que hualquisac tech nichantzín Dios se ángel ten quichicaucatzajtziliaya ne ocsé ten tocotzyetica mixtzalan. Huan quiliaya ijcuín:

—Xitequitilti motatequiloni huan xicololo in taquilot porín ejcoc ya in tonal cuac monequi xictetequi huan xicololo in taquilot. Pos xiquitacan que nochi in taquilot nican talticpac nochi chicahuayac ya.

<sup>16</sup> Ica ya nojón ne ángel ten tocotzyetoc tech ne mixti, yejuatzin niman pehuac quitequitiltía ne itatequiloni. Huan ica nojón itatequiloni quitequitiltijtinemía huan cololojtinemía in taquilot nochi senmanahuac. Huan nijín taquilot yejua ne in itaneltocacahuan de Cristo.

<sup>17</sup> Huan no niquitac que ica ome ángel hual quisac ichan Dios nepa eluiyactzinco huan no niquitac maactoya se itatequiloni ten semi tene. <sup>18</sup> Huan no niquitac que ica eyi ángel hualquisac ne altartzalan campa quimohuistilíaj Dios. Huan ne ica eyi ángel quipixtinemía tanahuatil ipan in tit de tatzacuilitis. Huan no nicayic que ne ica eyi ángel quinotzac ica hueyi tajtolis ne ica ome ángel ten momaactoya itatequiloni ten semi tene huan quiliaya ijcuín:

—Xictequitilti motatequiloni huan xicmatequi huan xicololo de ne olochpilatoc in uvas tech nochi in talticpac porín ne uvas cuali yocsic ya.

<sup>19</sup> Ijcuacón ne ica ome ángel pehuac quitequitiltía ne itatequiloni huan quimatequic huan cololoj in uvas de nican talticpac. Huan de ompa quintamotac nochi in uvas tech se lugar campa quinpatzcaj. Huan nijín campa quipatzcaj in uvas, yejua ne quinejnehuilfa ne lugar campa Dios quintatzacuilitis in amo taneltocani ica hueyi cualanyot. <sup>20</sup> Huan ne uvastapatzcaloni yetoc pueblojtenti campa ne uvaspatzcaj. Huan cuac quipatzque in uvas ica ninmetzuan, ijcuacón Dios pehuac quintatzacuilitis in amo taneltocani huan hualquisac esti porín oncaya hueyi ne teluilis de guerra. Huan ne esti hual quisaya huan toyahuic hasta eyi ciento kilómetros. Huan huejcatan de esti queme se metro huan tajco, queme yesquía ajsito campa se yetos iten tatilanaloni den caballo.

**Nican tajtoa de ne chicome ángelme ten  
maactoyaj vasos pexontocque ica chiahuis**

**15** Huan nejua ni Juan huan niquitac nepa ejcaixco se hueyi nescayot tenica se quihueyimoucaita. NiQuitac chicome ángelme ten maactocque sejsé tataman chiahuisme ten huetziquiu satepan. Cuac huetzis chicome chiahuis, ijcuacón Dios quintamitatacuiliti ica hueyi cualanyot in talticpacyetoni.

<sup>2</sup>Huan no niquitac que soutoc tensá ten tamati queme in at ten mar ten petani queme vidrio, huan ne at majyá tamanelol ica tit. Huan no niquitac ne taneltocani metzijcatocque ipan ne mar ten petani. Huan yejuan maactoyaj tatzotzon de Dios ten quilíaj harpas. Huan nochi yejuan ten metzijcatocque ipan ne mar ten petani, yejuan nojonques quitamitanilijque ne hueyi oculin ihuan itatadios. Huan yejuan amo quimohuistilijque ne hueyi oculin; huan amo no quiselijque ya in número den tocayit den oculin. <sup>3</sup>Huan ne taneltocani quicantarohuilijtocque Dios ica ne himno de Moisés ten itequitcau de Dios. Huan no quicantarohuilíaj Dios ica ne himno de Yejuatzin ten tamati queme ichcatzin. Huan yejuan cantaroayaj ijcuín:

Totecotzin Dios ticompía nochi huelilis.

Huan timitzonueyichihuaj huan timitzonmohuiscapohuaj nochi motachihualisuan.

Porín Tejuatzin tion Yolmelahuactzin huan tiontachiutinemi sayó ica ten melau.

Huan Tejuatzin tiquinyecantinemi nochi in taneltocani yolchipauque.

<sup>4</sup>Huan amo aquen ongac ten amo monequi mitzonmohuistilía Tejuatzin Totecotzin.

Huan amo aquen ongac ten amo monequi mitzonmohuiscapohuas.

Porín sayó Tejuatzin tion Yolchipahuactzin.

Ica ya nojón nochi in pueblojuani hualasque para mitzonmohuistilijquihue porín yejuan quitacque ya ticonchiutica nochi ten yec melau san.

<sup>5</sup>Huan satepan de nochi nijín niquitac ne eluiyactzinco que tapohuic campa ne ichantzin Dios campa quieutocque ne patahuac teme ten itech ijcuiliutoc in tanahuatilme de Dios. <sup>6</sup>Huan niquitac que hualquisque chicome ángelme ne campa ichantzin Dios huan maactoyaj sejsé taman chiahuis. Huan ne chicome ángelme taquentoyaj ica cualtzin taquemit ten pepetacaya ten quilíaj lino. Huan no quinelpancuitoyaj ica se tajcoilpiloni de oro. <sup>7</sup>Huan senme de nojón nahui ocuiltitzin yoltocque, Yejuatzin ne quinmajmactilijca ne chicome ángelme sejsé vaso de oro ten pexontocque ica ne tatzacuilitis ten Dios quinalpantoyahuilis in talticpacuani. Huan Totajtzin Dios yoltinemis sen nachipa huan sen nachipa. <sup>8</sup>Huan ne ichantzin Dios mosensohuac ica pocti ten mochiutoc porín Totajtzin Dios quipía hueyi cualtziyot, huan porín Yejuatzin quipía hueyi chichualis. Huan amo aquen huellá calaquis tech ichantzin Dios como amo achto quitamipantoyahuas ne chicome chiahuisme ten maactoyaj ne chicome ángelme.

**Nican tajtoaya de ne chicome vasos ten pexontocque ica tatzacuilitis de Dios**

**16** Huan nejua ni Juan nicayic se hueyi tajtolis ten hualehuac campa ichantzin Dios campa ne chicome ángelme. Huan ne chichahuac tajtolis quinilij ne chicome ángelme ijcuín:

—Xiyacan huan xiquinpantoyahuilican in talticpacuani ne chicome vasos ten pexontocque ica itatzacuilitis de Dios.

<sup>2</sup>Huan ijcón yajqui ne achto ángel huan quinpantoyahuilij in talticpacuani ne ivaso ten quipíaya itatzacuilitis de Dios. Huan ijcón mochiuque ajuyocasahuame ten pitzoticque huan ten semi tecoco ipan nochi talticpacuani. Huan mochiuque inpan neques ten tanescayotilme de hueyi oculin huan no inpan neques ten quimohuistilijque ne tatadios den hueyi oculin.

<sup>3</sup>Huan de ompa ne ica ome ángel quipantoyahuato ivaso ten quipiaya itatzacuilitis de Dios inpan nochi in at de mar. Huan ijcón ne at den mar mocuepac esti

queme in esti de se miquet. Huan ijcón nochi ten aijtic nentinemíaj, nochi mique ya.

<sup>4</sup> Huan de ompa yajqui ne ica eyi ángel huan quipantoyahuato ivaso ten quiapiaya tatzacuilitis de Dios ipan nochi in ame huan ipan nochi amelme. Huan ijcón nochi in at mocuepac esti. <sup>5</sup> Huan no nicayic ne ángel ten quipía tanahuatil ipan nochi in ame cuac yejua quijtoaya ijcuín:

—Tejuatzin Totecotzin, tion Yolmelahuactzin. Tejuatzin tiyoltinemi huan tiyoltinemia desde nochi cuac hualtzinehuac. Tejuatzin tion Yolchipahuactzin porín Tejuatzin tiquinonixcomacac ya in talticpacuani ica tamachilis ten melahuac. <sup>6</sup> Huan queme in talticpacuani quimictijque ya in taneltocani yolchipauque huan no quimictijque ne motanahuatijcahuan, ica ya nojón Tejuatzin tiquintayiltij ya esat ne talticpacuani, porín yejuan ijcón quinnamiqui.

<sup>7</sup> Huan no nicayic ocsé ángel ne altartzalan campa quimohuistilíaj Dios huan quijtoaya ijcuín:

—Tejuatzin, tion Dios, ticonpixtica nochi chicahualis. Huan melau Tejuatzin tion Yolmelahuactzin huan tiquinixcomaca sayó ica tamachilis ten melahuac.

<sup>8</sup> Huan de ompa yajqui ne ica nahui ángel huan quipantoyahuato ivaso ten quiapiaya tatzacuilitis de Dios ipan in tonaltzin. Huan mochihuac que in tonaltzin pehuac cachi oc quinchichinos in talticpacuani ica tit. <sup>9</sup> Huan ijcón in talticpacuani pehuac chichinahuij ica ne hueyi tatotoncayot de tonaltzin. Huan nojón talticpacuani quihuijuicaltijque in tocaytzin de Dios porín Yejuatzin quipixtinemi chicahualis para quinpantoyahuilis ne chiahuisme. Huan nojón talticpacuani amo moyolnemilijque de nintajtacoluan para ijcón quimohuiscapohuasque Dios.

<sup>10</sup> Huan de ompa yajqui ne ica macuil ángel huan quipantoyahuilito ivaso ne tatzacuilitis de Dios ipan in hueyi oculin ten tocotzyetoc campa ne ihuelilispán. Huan ne campa ichicaucahuelilispán den hueyi oculin, ompa mosensohuac tayohuayanilot. Ijcuacán in talticpacuani se huan se monejnepilquejquetzomayaj porín amo taxicoayaj oc ica ne toneucayot. <sup>11</sup> Huan nojón talticpacuani quihuijuicaltijque Dios porín Yejuatzin quinpantoyahuilijtoc ne tajyohuilis huan ne tonecaucasahuame. Pero yejuan amo moyolnemilijque de nintajtacoluan ten quichiutinenque.

<sup>12</sup> Huan de ompa yajqui ne ica chिकासen ángel huan quipantoyahuato ivaso ten quiapiaya ne tatzacuilitis de Dios ipan ne hueyíat ten quilíaj Eufrates. Huan ijcón nochi huayic ya ne hueyíat para ijcón huelis mopanoltisque tech ne hueyi ojti nochi ne tayecanani reyes ten hualajtocque de ne iquisayampa tonal.

<sup>13</sup> Huan nejua ni Juan no niquitac eyi amocuali ejecame ten tamatij queme calame. Huan se amocuali ejecat hualquisac iteno ne hueyi tecuani. Huan ocsé hualquisac iteno ne hueyi oculin. Huan ocsé hualquisac iteno ne tacajcayaucatanahuatijque.

<sup>14</sup> Huan ne amocuali ejecame ten hualquisque ya, yejuan nojonques in amocualime ten quichiutinemij nican talticpac huejueyi mohuiscatequime. Huan ne amocuali ejecame yohue quinsentilitij nochi tataman tayecanani ten quinyecantinemij in talticpacuani nochi senmanahuac. Huan nochi yejuan mosentilíaj para motehuisque ica guerra ihuan Dios tech ne hueyi tonal cuac Dios quintamisentajyohuiltis in talticpacuani. Porín sayó Yejuatzin quipixtinemi nochi chicahualis.

<sup>15</sup> Huan Cristo Jesús quinilía itaneltocacahuan nican talticpac ijcuín:

—Xiquitacan, Nejuatzin niejcotihuetziquiui ijcón queme se tachtecque ica ijsiucayot ejcotihuetzis. Huan tatiochihualme de Dios neques ten nechchixcayetocque.



Huan no tatiochihualme neques ten semi moijmatinemij para amo moyoltzojcuilojtitique ica tajtacol. Huan ijcón tech ne tonal cuac nimohualuicas ni namo Tecotzin, ijcuacón niqunitilis ne inyolojuan chipauque huan amo tzojcuilticque huan nión no momahuaj ca tajtacol. Huan notaneltocacahuan ijcón amo mopinahualisque cuac mohualuicas nin Tecotzin. <sup>16</sup> Huan ne amocualime quinsentilijque nochi tayecanani tech se hueyi ixtahuat ten quitocaytía ica hebreojtajtol Armagedón.

<sup>17</sup> Huan de ompa yajqui ne ica chicome ángel huan quipantoyahuato ejecaixco ivaso ten quiapiaya ne tatzacuilitis de Dios. Huan de ompa nicayic se chicaucatajtolis ten hual quisac ne eluiyactzinco campa ichantzín Dios huan campa ichicaucahuililispán de Dios. Huan ne tajtolis quiptoaya ijcuín:

—Motamichihuac ya nochi nijín.

<sup>18</sup> Huan de ompa tapetantihualaya huan tajcoyocaya huan taticuintihualaya huan no chicaucatalolinía. Huan nijín tel senca talolinic ijcón queme amo aquen quimachiliaya desde ne tonal cuac peuque nemij in taca nican talticpac. <sup>19</sup> Huan cuac talolinic, ijcuacón ne hueyi pueblo de Jerusalén majcahuic excampa. Huan nochi in huejueyin calme de nochi pueblome huetzque campa yesqui páisme de nican talticpac. Ijcuacón Totajtzín Dios quielnamiqulij in tajtacol den pueblouani campa in hueyi pueblo Babilonia. Huan ijcón Dios quinchicaucataztacuilitij ica hueyi cualanyot. <sup>20</sup> Huan cuac talolinic, ijcuacón nochi in talme ten atzalan ixpoliuque huan no ixpoliuque nochi tepeme ten motaya. <sup>21</sup> Huan no huetzic den eluiyactzinco se hueyi tetzaucatejsihuit ipan in talticpacuani. Huan ne tejsihuit semi etic hasta ajsía omepoal kilos de etic de cada se tejsihuit. Ijcuacón in talticpacuani quihuijucaltijque Dios porín Yejuatzín quinpantepehuilij in chiahuis de tejsihuit. Huan ica ne chicome chiahuis de tatejsihuilis, tel senca tajyohuiyaj in talticpacuani.

### Nican tajtoa de queniu Dios quihueyitatzacuilitij ne sihuaahuilnenque

**17** Huan mochihuac que huala senme de ne chicome ángeles ten maactoya se chiahuisti. Huan yejua ne nechnojnotzac huan nechlij ijcuín:

—Xihuiqui nican huan nimitznexiliti de queniu Dios quitatzacuiliti ne sihuaahuilnenque, ne ten tayecantoc campa mocajcautoc míac ame. <sup>2</sup> Huan in tayecanani reyes, yejuan nojónques motajtacolmacatinenque ihuan ne sihuaahuilnenque. Huan no nochi in talticpacyetoni no ihuan ne sihuat no motajtacolmacatinenque tech in ahuilnemilis ijcón queme yejua quinnextilijtiyaya.

<sup>3</sup> Huan santajma nechquemiloco in chichualis den Yeticatzín Espíritu huan nechuiyacque campa tayiucan. Huan ompa niquitac se sihuat tocotzyetoc ipan se chichiltic ocuilin. Huan ne ocuilin quiapiaya chicome itzontecohuan huan ne ocuilin no quinpiaya májtacti icuacuau. Huan ijcuiliutoc tech ne chichiltic ocuilin míac to-cayme tenica quihuijucaltíaj Dios. <sup>4</sup> Huan ne sihuat taquentoya ica moradoj tilma huan ica chichiltic tilma. Huan mocualnextijtoya ica collares ten tachijchiu ica oro huan ica sequi tetzitzín ten semi patiojque huan ica sequi tetzitzín ten quilíaj perlas. Huan ne sihuatzín maactoya se vaso de oro ten tamati queme popochcaxit ten pexontoc ica nochi tataman pitzotic itachihualisuan ten yejua quichiutinemic cuac ahuilnentinemía. <sup>5</sup> Huan ne sihuaahuilnenque campa ixcuaco ijcuiliutoc se hueyi to-cay ten amo aquen cajsicamati. Huan ne to-cay quiptoaya ijcuín: “Nijín sihuaahuilnenque yejua in hueyi pueblo Babilonia. Yejua quinixyecantinemi nochi ne sihuaahuilnenmini. Huan yejua quinyecantinemi nochi neques ten quichiutinemij ten amocuali

chihualisme nican talticpac". <sup>6</sup>Huan niquitac que huintitoc ne sihuat porín yejua tayic ninesyo den taneltocani yolchipauque ten yejua quinmictij. Huan ne sihuat quinmictij neques ten tanojnotztinémaj itencopa Jesús huan quitoyahuac inesyó. Huan cuac nictamiitac ya nochi nijín, ijcuacán nisentatetzauacatachíac san.

<sup>7</sup>Huan se ángel nechtajtoltij ijcuín:

—¿Queyé tictetzauacaita ne sihuat? Porín nejua nimitzajsicamatiliti de toni quiptosnequi ne sihuat ten amo aquen quimatía. Huan no nimitzajsicamatiliti de toni quiptosnequi ne hueyi oculin ten ipan yajtoc ne sihuaahuilnenque, ne oculin ten quipía chicome itzontecohuan huan májtacti icuacuau. <sup>8</sup>Huan tejua Juan, ne hueyi oculin ten tiquitac, yejua ne yoltinémaj pero axcan amo yoltinemis oc. Huan ne hueyi oculin yetoc ya para hual ajcopanquisas tech ne hueyi taltecoch campa tzactocque in taca ten amo taneltocani. Huan ne hueyi oculin yati tech in ixpolihuilis. Huan in talticpacuani quimoucaitasque cuac quitasque ne hueyi oculin ten achtopa yoltinémaj huan axcan amo yoltinemis oc. Pero ne hueyi oculin ocsepa yoltinemis. Ica ya nojón quimoucaitasque ne hueyi oculin nochi in talticpacuani ten nintocay amo ixnesij tech ne libro de Dios. Pero desde cuac ayamo tzinehuac in talticpac ipa ixnestihuitz ya tech ne hueyi libro de Dios nochi nintocayuan de nitaneltocacahuan de Dios ten nentinemij sen nachipa. Huan yejuan amo quimoucaitacque ne hueyi oculin.

<sup>9</sup>Huan nijín ten nimitzilijtoc cajsicamatisque sayó neques ten melau taixmatinemij. Ne chicome tzonteconme de hueyi oculin, yejua ne quiptosnequi chicome tepeme campa calyetinemi ne sihuaahuilnenque ten tayecantinemi. <sup>10</sup>Huan ne chicome tepeme, yejuan ne quiptosnequi chicome tayecanani reyes. Pero macuil de ne chicome tayecanani ipa ixpoliuque ya. Pero se rey tayecantinemi oc. Huan ocsé tayecanque ayamo monextij. Pero cuac yejua monextiquiu ya, ijcuacán Dios quimonequiltis que ma amo huejcahuas oc tayecantinemis. <sup>11</sup>Huan ne hueyi oculin ten yoltinemis pero axcan amo yoltinemi oc, yejua ne in ica chicueyi tayecanque rey. Huan masqui inuan pohui ne ocsequin chicome tayecanani, pero satepan yejua ixpolihuiquiu.

<sup>12</sup>Huan ne májtacti cuacuau ten tiquinitac ya, yejuan nojonques in májtacti tayecanani reyes ten ayamo quinmactilijque tanahuatil para tayecantinemisque. Pero ejcos in tonal cuac quinmacasque tanahuatil para ma tayecantinemican se horaipan ihuan ne hueyi oculin. <sup>13</sup>Huan ne májtacti tayecanani mosenyolmajxitijque de quimactilisque ne hueyi oculin nochi inchicahualis huan nochi inuelilis de yejuan san. <sup>14</sup>Huan nochi neques quitehuisque Yejuatzin ten tamati queme ichcatzin. Pero Yejuatzin quintamitanilis porín Cristo Yejuatzin in Tecotzin ten tayecantinemi ipan nochi ocsequi tecome. Huan Cristo Yejuatzin in hueyi Tayecanque inpan nochi ocsequin tayecanani. Huan quinsehuicaya Cristo nochi neques ten Totajtzin Dios quini-jitac huan quinnotzac ma tacuautamatinemican ihuan Yejuatzin ten tamati queme ichcatzin.

<sup>15</sup>Huan ne ángel no nechilij ijcuín:

—Tiquitac ya ne sihuaahuilnenque ten tayecantoc campa mocajcautoc míac ame. Huan ne ame, yejuan nojonques in tataman puebloyme huan in tataman tagayot huan tataman paísme huan tataman tagayot ten tajtoaj ica tataman tajtolis.

<sup>16</sup>Huan no ne ángel nechilij ijcuín:

—Tiquitac ya ne májtacti cuacuau tech ne hueyi ocuilin, yejuan nojonques in májtacti tayecanani reyes ten quitahuelitasque ne sihuaahuilnenque, yejua ne in hueyi pueblo de Babilonia. Huan ne májtacti tayecanani ihuan ne hueyi ocuilin, yejuan nojonques quiajchihuilijque nochi ten niaxca de ne sihuaahuilnenque para ma mocahua xitatztic. Huan no quijtacohuilisque yejua ninacayo, huan no quitamichichinohuilisque ne sihuaahuilnenque. <sup>17</sup> Huan ijcón ne tayecanani quichihuasque porín Totajtzin Dios quinyoltanemililtij ya ma quichihuacan ijcón queme Yejuatzin quimonequiltij. Ica ya nojón ne tayecanani moyectencahuasque de quimactilisque ne hueyi ocuilin nochi in tanahuatil den yejuan san. Huan nochi nijín mochihuas para ijcón ma motamichihuas ya in Tajoltzin de Dios ten Yejuatzin moyectencahuac ya que ma mochihua.

<sup>18</sup> Huan no nechilij ne ángel ijcuín:

—Tiquitac ne sihuaahuilnenque, yejua ne in hueyi pueblo Babilonia ten quinyecantini nochi in tayecanani reyes de nochi in talticpac.

### Nican tajtoa de queniu Dios quitamihuejuelos ne hueyi pueblo de Babilonia

**18** Huan satepan de nochi nijín, ijcuacán niqitac ocsepa se ángel hualpantemoc den eluiyactzinco huan cualcuía hueyi tanahuatil huan chicahualis huan ica ne icualtziyo tanextico tech nochi in talticpac. <sup>2</sup> Huan yejua chicaucatzajtzic ica hueyi tajtolis huan quijtoayaj ijcuín:

—Ne hueyi pueblo Babilonia, yejua ne moihtacoti ya. Huan ne Babilonia mochihuati se pueblo campa calyetocque sayó amocuali ejecame huan ompa nentinemij sayó ten pitzotic ejecame. Huan ompa motapajsoltitocque sayó tataman tototzitzin ten pitzoticque huan amo chipaque queme in chichti huan in tololo huan in cuouxaxaca ne ten in talticpacuani quitahuelitztinemij. <sup>3</sup> Huan ijcón mochihuati ne tech pueblo de Babilonia porín ne pueblojuani de Babilonia, yejuan quinnextilitineneque in talticpacuani ma motajtacolmacatinemican ica ne ahuilnemilis ijcón queme yejuan quichiutinenque. Huan no nochi in tayecanani reyes de nican talticpac motajtacolmacatineneque tech in ahuilnemilis ihuan ne calyetoni de Babilonia. Huan nochi in comerciantes de nican talticpac mochiucaj huejueyi ricojme ica ne chicahualis den nintajtacolnemilis ten hualeutoc Babilonia. Huan nochi nijín quijtoaya ne ángel.

<sup>4</sup> Huan satepan nicayic ocsé tajtolis ten hualeutoc ne eluiyactzinco huan quijtoaya ijcuín:

—Namejuan nannopueblojcahuan ten nantaneltocaj nohuantzin, namechilía xiquisacan de ne pueblo Babilonia para amo ximotajtacolmacatinemican ijcón queme yejuan motajtacolmacacque ya, para amo no namopan huetzis nochi ne chiahuis ten Dios quinquinalpantoyahuilis. <sup>5</sup> Huan nijín namechilía porín hueyi ixnestoc ya míac panti nintajtacoluan ten ajsis hasta campa Totajtzin Dios tech eluiyactzinco. Huan Yejuatzin cuali quinelnamiquilijtoc ya huan no quinyecquiltijtoc ya nochi nintajtacoluan. <sup>6</sup> Huan namejuan nantahuejueloani, namechilía xiquinixtahualtican ne pueblojuani de Babilonia ijcón queme yejuan namechchihuilijque. Huan no cachi oc quinxtahualtican ica ojpa, ijcón queme yejuan tachiutinenque. Huan no xiquintajyohuiltican ica ojpatica ica ne tatzacuultilis ijcón queme ne pueblojuani de Babilonia namechtajyohuiltijhualajque namejuan. <sup>7</sup> Huan namechiliti que xiquintajyohuiltican huan xiquinchoctican ijcón queme yejuan quinnamiquí. Porín yejuan

mohueyimatinenque huan moyolpactijtinenque sayó tech in tajtacolnemilis. Huan ijcón xiquinchihuilican porín yejuan quiyolnemilíaj ijcuín: “Tejuan semi tihueyitamatinime queme reyes, huan tejuan tihueyichihuanime huan amo tinentinemij queme se sihuacahual, huan tejuan amo queman timoyolcocojtinemij”.

<sup>8</sup>Huan como quiyolnemilijtinemij ne pueblojuani de Babilonia, ica ya nojón tech ne tonal san huetziquiu huan quiselisque chiahuis ten quinnamiqui huetzis inpan. Huan yejuan tajyohuisque huan chocasque huan mayanasque huan chichinahuisque ica tit huan miquisque. Huan nochi nijín mochiutoc, porín Totajtzin Dios Yejuatzin in Totecotzin ten quipixtinemi nochi chicahualis. Huan Yejuatzin quintatzacuultijtoc ne pueblojuani de Babilonia.

<sup>9</sup>Huan nochi in tayecanani de nican talticpac motajtacolmacatinemíaj ihuan ne pueblojuani de Babilonia huan inuan mohuicatinenque tech in tajtacolnemilis. Ica ya nojón ne tayecanani quinchoquilisque ne pueblojuani de Babilonia huan no motequipachosque cuac quitasque que pehuac ya moxotaltía ica hueyi tit huan elihuis popoca. <sup>10</sup>Huan ne tayecanani mohualquetzasque de huejca san porín conmohuilistosque ne hueyi tetzaucaatajyohuilis de Babilonia. Huan yejuan quijtojosque ijcuín:

—Semi teicneltiani ne pueblojuani tech hueyi pueblo de Babilonia ten no poutinemij hueyi chihuanime. Porín sepa san Dios quintamitatzacuultij huan ninpan huetzico ya ne chicaucatazacuultilis ten Dios quinalpantoyahuilij.

<sup>11</sup>Huan nojón comerciantes de nochi talticpacuani, yejuan nojonques quinchoquilisque ne pueblojuani de Babilonia huan no motequipachosque porín amo huelis quinnamaquiltisque oc ten cualcuj. <sup>12</sup>Huan ne comerciantes cualcuíaj míac tataman queme in oro, huan in plata, huan sequi tetzitzin ten semi patío, huan ne tetzitzin ten quilíaj perlas. Huan no cualcuíaj sequin tasal ten tachijchui ica lino huan de seda, de míac tataman colores queme morado huan chichiltic. Huan no quinalcuiliayaj nochi tataman cuohuit ten cuica ajuiyacayot. Huan no cualcuíaj míac tataman tachichui de tanti den elefante. Huan no cualcuíaj míac tataman cuohuit ten semi patío huan sequin teposme queme quilíaj bronce. Huan no quinalcuiliayaj tet ten quilíaj mármol ten semi patío. <sup>13</sup>Huan no cualcuíaj canela, huan tataman ajuiyacaxohuit, huan copal, huan sequi ajuiyacaxihuit ten quilíaj mirra, huan sequin choquilot den ajuiyacaxihuit. Huan no quinalcuiliayaj vino, huan aceite, huan harina, huan trigo. Huan no cualcuíaj tapialme ten cuicaj tamamal, huan ichcame, huan caballos, huan cuocarros. Huan no quinalcuiliayaj sequin taquehualme para quinnamaquiltisquíaj, hasta no quinnamacasque taca ten yoltocque. Nochi nijín in comerciantes quinalcuiliayaj ne pueblojuani de Babilonia. <sup>14</sup>Huan no quijtoayaj ne comerciantes ijcuín:

—Huan axcan namejuan nanopueblojuani de Babilonia, nochi ne cualtzitzin ricojme ten semi nanquiyolnejnectinenque, yejuan ne amo nanquipiasque oc. Huan nanquipolojque nochi ne ricojyot huan ne tenica nanmoyoltanejnequiltiayaj. Huan nijín amo queman nancajsisque oc.

<sup>15</sup>Huan ne comerciantes ten tanamacatinemij ica nochi nijín tataman tanamac, yejuan nojonques mohueyiricojcuiltijque ica por ne pueblojuani de Babilonia. Huan ne comerciantes mohualquetztihue huejca den pueblo Babilonia porín quimohuisojtosque ne tatzacuultilis ten inpan huetzots. Huan in comerciantes quinonchoquilistosque ne pueblojuani de Babilonia huan no moontequipachosque.

<sup>16</sup>Huan no quijtoayaj ne comerciantes ijcuín:

—Semi teicneltiani ne pueblojuani den hueyi pueblo Babilonia, porín namejuan nantaquentinemíaj ica cuajcuali tilma ten quilíaj lino. Huan no nantaquentinemíaj ica moradojtilma oso chichiltic. Huan nanmocualnextijtinemíaj ica oro, huan tata-man tetzitzin ten semi patiojque, huan ica ne tetzitzin ten quilíaj perlas. <sup>17</sup> Huan axcan nantajyohuijtocque ya porín sepa san ixpolihuic ya nochi namoricojyo.

Huan mohualquetzque huejca de ne pueblo Babilonia nochi tayecanani den barcos huan in tequitini huan in paxaloani huan nochi ne comerciantes ten ay motatanil-ijtinemij tech in barcos. <sup>18</sup> Huan yejuan mohualquetzque huejca de Babilonia cuac quitacque in pocti campá tatatoc ya ne hueyi pueblo Babilonia. Ijcuacón yejuan quichicaucaijtoayaj ijcuín:

—Amo queman oncaya se cualtzin pueblo queme nijín pueblo de Babilonia.

<sup>19</sup> Huan queme semi moyolcocoayaj, ica ya nojón hasta mocuatemiliayaj talnex huan chicaucatzajtziáj ica choquilis huan moyoltequipachoayaj huan quijtoayaj ijcuín:

—Semi teicneltiani in pueblojuani de hueyi pueblo Babilonia, porín ica in ricojyot de Babilonia moricojcuiltijque nochi in tequitini ten quitequitiltijtinemij in barcos tech in mar. Huan axcan sepa san ne hueyi pueblo Babilonia tajtamic ya.

<sup>20</sup> Nochi namejuan ten nanyetinemij ne eluiyactzinco, nantaneltocani yolchipauque, huan nantatitanilme de Cristo, huan nantanahuatiani de Dios, nochi namejuan ximohueyiyolpactican porín Totajtzin Dios quitamitatzacuiltij ya ne pueblojme de Babilonia ica ne tajyohuilis porín yejuan namechtajyohuiltijque.

<sup>21</sup> Huan nejua ni Juan niquitac se ángel ten cualcui hueyi tanahuatil huan ne ángel cajcocuic se hueyi tet queme se hueyi molinojtet huan quitamotac aijtic huan quijtoaya ijcuín:

—Ijcón queme nicatamotac ne hueyi tet, no ijcón Dios cuetziltis ne hueyi pueblo Babilonia huan ijcón amo quemán oc ixnesiquiu. <sup>22</sup> Huan axcan amo quemán mocaquis oc de tatzotzontinemisque ne tatzotzonani ten quitzotzonaj arpa huan acatapitz huan trompeta. Huan amo quemán moajsisque oc tech Babilonia tataman taca ten quipíaj tataman nintequiu. Huan amo no quemán mocaquis oc ijcoyocalis cuac tequiti se molino. <sup>23</sup> Huan tech in Babilonia amo quemán oncas oc tanexme huan amo quemán mocaquis oc ne paquilistajtol cuac monamictisque se teyoquich ihuan isihuatzin. Huan ne comerciantes de Babilonia, yejuan nojonques catca in cachi huejueyi comerciantes de nochi in talticpac. Huan ica ne ninricojyot ne pueblojuani de Babilonia yejuan quinnahualuijque nochi in talticpacuani ica ninnahualo. Pero axcan amo teyi chiuquejme oc.

<sup>24</sup> Huan ne pueblojuani de Babilonia, yejuan nojonques quinmictijtihualayaj tech ninpueblo nochi in tanahuatiani de Dios huan nochi taneltocani yolchipauque de Dios. Huan no yejuan quinmictijtihualayaj itaneltocahuan de Dios campá yesqui tech nochi in talticpac.

### Nican tajtoa de queniu in taneltocani quinmohuistilijtocque Dios ne eluiyactzinco

**19** Huan satepan de nochi nijín, ijcuacón nicayic que chicaucatzajtziáj huel míac tagayot ne eluiyactzinco huan quijtoayaj ijcuín:

Ticmohuistilíaj Totajtzin Dios porín Yejuatzin techmaquixtij ya.

Huan ticueyipanchihuaj huan ticmohuiscapohuaj Totecotzin to Dios,

<sup>2</sup> Porín Tejuatzin ticonixcomaca sayó ica tamachilis ten melahuac.

Huan Tejuatzin ticonixcomacac ya huan ticontatzacuilitij ya ne hueyi sihuaahuilnenque porín yejua ne quinpitzotilij ya nochi in talticpacuani ica ne itamachilis de ahuilnemilis.

Huan no Tejuatzin ticontamitzacuilitij ya ne sihuaahuilnenque porín yejua quinmictijtihualaya motequiticahuan.

<sup>3</sup> Huan de ompa ocsepa ne huel míac tagayot quiytoayaj ijcuín:

—Timitzonmohuistilíaj Totajtzin Dios porín Tejuatzin ticontamitzacuilitijtoc ne sihuaahuilnenque huan yejua tajyohuijtos campa sensoutoc nochi tit huan campa hual ajcopanquistos in pocti sen nachipa huan sen nachipa.

<sup>4</sup> Huan de ompa niquitac ne sempoal huan nahui huehuentzitzin motancuaquetzque huan motentocque ihuan ne nahui ocuilitzitzin. Huan ijcón nochi yejuan quimohuistiliayaj Dios ten tocotzyetica tech ne nitayecancatrono campa nichicaucahuelilíspan. Huan yejuan quiytoayaj ijcuín:

—Ma ijcón mochiuto de timitzonmohuistilijtosque sen nachipa.

<sup>5</sup> Huan de ompa nicayic se tajtolis hualehuac campa ne tayecancatrono de Dios huan quiytoayaj ijcuín:

Namejuan nanitequiticahuan de Dios, xictasojamachilican Totajtzin Dios.

Huan nochi namejuan ten nanueyichihuanime oso amo nanueyichihuanime, nochi namejuan ten nanquimohuiscapohuaj Dios, no xictasojamachilijtiyacan Dios.

<sup>6</sup> Huan nicayic se tajtolis den huel míac tagayot huan ne tajtolis mocaquía queme cuac míac at comontoc. Huan ne tajtolis mocaquía queme cuac chicahuac taticuinitihuitz. Huan ne tajtolis quiytoaya ijcuín:

Ma ticmohuistilícan Totajtzin Dios porín Yejuatzin Totecotzin huan Yejuatzin quipixtinemi nochi chicahualis huan axcan Yejuatzin pehuac ya tayecantinemi nochi senmanahuac.

<sup>7</sup> Huan ne tajtolis no quiytoaya ijcuín:

Ximoyolpactican huan ximohuelitacan huan xicueyipanchihuacan Totajtzin Dios.

Porín ne Yejuatzin ten tamati queme ichcatzin, Yejuatzin ne monamictiti ya.

Huan nochi itaneltocacahuan de Yejuatzin, yejuan nojonques quinejnehuilíaj queme se tesihuajtan.

<sup>8</sup> Huan Totajtzin Dios quintaquentij ya nochi itaneltocacahuan ca cualtzin tilma ten cualtzin chipactzin huan ten pepetaca,

ijcón queme se tesihuajtan ten monamictiti ya.

Huan ne cualtzin taquen, yejua ne in cuali tachihualisme ten quichiutinenque itaneltocacahuan de Dios nican talticpac.

### **Nican tajtoa de ne iluitonal cuac monamictiti Yejuatzin ten tamati queme ichcatzin**

<sup>9</sup> Ijcuacón ne ángel nechilij ijcuín:

—Xiquijcuilo nijín: “Tatiochihualme de Dios nochi neques ten Dios quinnotzac ya ma tatacuacuij tech ne iluit cuac monamictiti Yejuatzin ten tamati queme ichcatzin”.

Huan no ne ángel nechilij ijcuín:

—Nochi nijín tajtolis ten Dios mitzilijtoc, nochi yejua yec melahuac.

<sup>10</sup> Ijcuacón nejua ni Juan nimotancuaquetzac huan nimotentocac iixpan ne ángel para nicmohuistilis. Pero niman yejua nechilij ijcuín:

—Xiquita, amo ijcón xicchihua porín nejua niitequitica de Dios ijcón queme tejua tiitequitijcau huan queme motequiticaicnihuan ten quitequitilijtocque Dios. Huan namejuan xicsentocacan xitacuaumatiyacan inahuactzinco Jesús. Huan ximohuistilijtiyacan Totajtzin Dios.

Huan Cristo Jesús techonnextilij ya nitajoltzin ten melau. Huan ne itajtolis quinmacatinemi tamachilis nochi neques ten tanojnotztinemi jca tanahuatil ten quiseláj de Cristo Jesús.

### **Nican tajtoa de Yejuatzin ten mopantalijtinemij tech in istac caballo**

<sup>11</sup> Huan de ompa nejua ni Juan niquitac que hualtatapotoc ne eluiyactzinco huan ompa hualcalanquisac se istac caballo. Huan Cristo Jesús Yejuatzin panyetihuitz huan yejua nijín itocaytzin: In Yolmelahuactzin porín Yejuatzin quichihuas ijcón queme moyectenahuac ya. Huan Yejuatzin taixcomacatinemi huan quichiutinemi ne tehuilis de guerra sayó ica ten melau. <sup>12</sup> Huan Yejuatzin iixtololohuan motaya queme tit ten momejmelahuaya. Huan Yejuatzin cuaactoya ica miacque coronas. Huan Yejuatzin no cualcuitihualaya se itocaytzin ten ijcuiliutoc itech Yejuatzin ten amo aquen huelía quixmatis. Ta, sayó Yejuatzin quixmati ne itocaytzin. <sup>13</sup> Huan Yejuatzin taquentoya ica se tilma ten tachichiloltil ica esti. Huan Yejuatzin itocay, yejua nijín, in Tajtoltzin de Dios, porín Yejuatzin technextilí aconi Dios. <sup>14</sup> Huan Yejuatzin quitoctiliyaj huel míac soldados taquehualme de Dios ne eluiyactzinco. Huan nochi yejuan taquentoyaj ica cuajcuali istactzin tilma ten yec chipahuac ten quilía lino. Huan nochi yejuan panyetihualayaj tech istac caballojme. <sup>15</sup> Huan iteno Yejuatzin hual quisac se machete ten semi tencanahuac, tenica quincococos huan quintajyohuiltis nochi in talticpacuani. Huan Yejuatzin quinyecatinemis ica hueyi chicaucahuelilis nochi in talticpacuani. Huan Yejuatzin quinixcomacas nochi in talticpacuani ica hueyi chicaucahuelilis. Huan ijcón Yejuatzin quinueyitajyohuiltis in talticpacuani ica ne cualanyot tatzacuultilis ten hualehuac imaco Totajtzin Dios ten quipixtinemi nochi chicahualis. <sup>16</sup> Huan Yejuatzin itocaytzin ijcuiliutoc tech itaquen huan tech iqesixpan huan itocaytzin yejua nijín: “Yejuatzin in cachi hueyi Tayecanque inpan nochi in ocsequin tayecanani. Huan Yejuatzin in cachi hueyi Tecotzin ipan nochi in tecome”.

<sup>17</sup> Huan satepan nejua ni Juan niquitac se ángel ten ijcatoc iixpan in tonaltzin. Huan yejua quinchicaucatzajtzilij nochi in tototztzin huan tzojpime huan cuixinme ten patantinemij ejecaixco. Huan yejua quinilij ijcuín:

—Xihualacan huan ximonechicocan nican campa Dios namechmaca hueyi tatualis. <sup>18</sup> Huan nanquicuasque ninnacayo de ne tayecanani reyes huan ninnacayo de soldados. Huan nanquicuasque ninnacayo de taca ten semi yolchicauque catca. Huan no nanquicuasque ninnacayo de caballojme ihuan in taca ten inpan yetinemíaj. Huan no nanquicuasque ninnacayo nochi tataman taca miqueme masqui yejuan catcaj taquehualme tanamacme oso taquehualme ten amo tanamacme. Huan no nanquicuasque ninnacayo de taca huejueyi chihuanime oso masqui taca amo huejueyi chihuanime.

<sup>19</sup> Huan nejua ni Juan niquitac que mosentilijque ne hueyi oculin ihuan nochi in tayecanani de nican talticpac ihuan nochi ninsoldados. Huan yejuan mosentilijque para quitehuisque Yejuatzin ten inpan se caballo panyetihuitz huan no quinte-huisque nochi nisoldados taquehualme de Yejuatzin, yejua in Cristo Jesús. <sup>20</sup> Pero

nojón hueyi oculin quiquitzi que huan quitzacuato ihuan ne tanahuatijque tacajcayauque ne ten quichuca huejueyi mohuiscatequime iixpan in hueyi oculin. Huan ica ne mohuiscatequime ne tanahuatijque tacajcayauque quincajcayahuac in talticpacuani para que yejuan ma quiselican ne nescayot tenica ixnesis que yejuan poutinemij ihuan ne hueyi oculin. Huan no ne tanahuatijque tacajcayauque quincajcayahuac talticpacuani para que yejuan ma quimohuistilican ne hueyi oculin. Huan ne hueyi oculin ihuan in tacajcayauque tanahuatijque, nojón ome Dios quinticotamotac masqui yoltocque huan huejuetzitot tech ne tahueyican campa nochi xotatoc tit huan ca azufre. <sup>21</sup> Huan nochi in ocsequin itaquehualuan den amocuali Satanás, yejuan nojonques Yejuatzin quintamimictij ica ne machete ten hual quisac iteno. Huan Yejuatzin tocotzyetica itech se istac caballo. Huan ijón nochi in totome huan tzojpime huan cuixinme tamiixuicque ca nochi nacat de miqueme.

### Nican tajtoa de se mil xihuit cuac Cristo Jesús tayecantinemi nican talticpac

**20** Huan nejua ni Juan niquitac que se ángel hualpantemoaya ne eluiyactzinco. Huan yejua maactihuala se llave tenica tatapoa campa ne hueyi taltecoch campa tzactocque in ánimajme ten amo taneltocani. Huan no maactihuala se hueyac tepos cadena. <sup>2</sup> Huan ne ángel quiquitzi que ne hueyi tecuani huan quiilpij huan quitzacuato para se mil xihuit. Huan ne hueyi tecuani, yejua ne in achtopa cohuat ten nentihualaya. Huan no yejua itocay in amocuali Satanás. <sup>3</sup> Huan ijón in ángel quipantamotac in Satanás campa ne hueyi taltecoch huan quipantzacuac huan quipannescayotij ica nisello. Huan ijón in amocuali Satanás amo huelis oc quincajcayautinemis oc in talticpacuani hasta ma panocan nojón se mil xiume. Huan cuac tami panosque ya nojón se mil xiume, ijcuacón quitojtomasque huan quicajcahuasque in amocuali Satanás ma ocsepa tequitinemi ipan se ome eyi tonal san.

<sup>4</sup> Huan niman niquitac míac tayecancatronojme campa tocotzyetosque nochi neques ten Dios quinmactilij ya tanahuatil para quinixcomacasque in talticpacuani. Huan no niquitac ne ánimajme ten quinquechteccaj ya porín yejuan tanojnotztinemiáj itencopaca Jesús, huan no porín tamachtijtinemiáj ica in Tajtoltzin de Dios. Huan yejuan nojonques amo quimohuistilijcaj ne hueyi oculin huan nión no quimohuistilijcaj itatadios. Huan amo no quinixcuanescayotijque huan nión no quinmanescayotijque campa ixnestinemisquía que poutinemisque ihuan ne hueyi oculin. Huan nochi nojón taneltocani niqunitac que ocsepa yoltinemij huan tayecantinemij ihuan Cristo ipan se mil xiume. <sup>5</sup> Huan nijín itaneltocacahuan de Dios, yejuan nojonques in achtopa panti ten Dios quinpanquixtis para ma ocsepa yoltinemican. Huan ne ocsequin ánimajme ten amo taneltocani, yejuan nojonques amo ocsepa yoltinemisque hasta que amo panos ya ne se mil xiume. <sup>6</sup> Semi tati-ochihualme de Dios huan semi yolchipauque nochi ne achtopa panti ten Dios quinpanquixtis ma ocsepa yoltinemican. Huan yejuan nojonques tati-ochihualme de Dios porín amo quimachilisque ne tatzacuilitis ten quilíaj ica ojpa miqulilis. Huan nochi ne itaneltocacahuan de Dios, yejuan tequitinemisque queme tiopixcame itencopaca Totajtzin Dios huan itencopaca Cristo. Huan yejuan tayecantinemisque ihuan Cristo ipan se mil xiume.

<sup>7</sup> Huan cuac tami panosque ya nojón se mil xiume, ijcuacón in Satanás quitojtomasque huan quicajcahuasque de cárcel. <sup>8</sup> Huan ijón ne Satanás quisas para ocsepa quincajcayautinemis nochi in talticpacuani de nochi senmanahuac. Huan yejua



quincajyahuas nochi in pueblojuani de nochi senmanahuac ten quilfaj Gog huan Magog. Huan nochi nojonques Satanás quinsentilis para quintehisque itaneltocacahuan de Dios. Huan Satanás ihuan itequiticahuan, yejuan nojonques mosentilisque hasta amo huelis se quinpoahas porín huel miacque queme atexal yesquía. <sup>9</sup>Huan mosentilisque huel miacque itequiticahuan de Satanás campa hueyi ixtahuayo huan yejuan tentosque hasta ne campa se ixajsi de se ontachía. Huan yejuan quinyehualoquihue nochi in taneltocani de Dios campa ne imohuiscapueblo de Dios, yejua in pueblo de Jerusalén. Huan ijcón Dios quinalpantepehuilis tit den hualehuas ne eluiyactzinco huan ijcón Dios quinmictis sepa san nochi ne itequiticahuan de Satanás. <sup>10</sup>Huan in amocuali Satanás ten quincajyahua in talticpacuani, yejua nojón Dios quipantamotas campa ne momanisoutoc tit huan azufre, ne campa ipa quinpantamotca ya ne hueyi oculin ihuan ne tacajyahuaque tanahuatijque. Huan nochi yejuan Dios quintatzacuiltijos. Huan yejuan yolualitonal tajyohuitosque sen nachipa huan sen nachipa.

### **Nican tajtoa de queniu Dios quinixcomacas campa ne tayecancaistacrano de Dios ihuelilipan**

<sup>11</sup>Huan nejua ni Juan niquitac se hueyi tayecancaistacrano campa Dios ihuelilipan huan Yejuatzin tocotzyetica ompa. Huan mochololtijque huan ixpoliuhue ya in talticpac huan in eluiyactzinco de iixpantzinco Yejuatzin. Porín amo tacauto oc ma yetocan oc iixpan Yejuatzin. <sup>12</sup>Huan no niqunitac ijcatocque iixpantzinco Totajtzin Dios nochi neques ten momiquilijque ya, in hueyi chihuani huan neques ten amo chihuanime. Huan no niqunitac que Dios quinalixtapoj in librojme campa ixnesij in tachihualisme de nochi ten momiquilijque ya. Huan no niqunitac que Dios quihualixtapoj ocsé libro campa ijcuiliutoc in tocayme de nochi neques ten yolchipauque sen nachipa. Huan ijcón Totajtzin Dios quinixcomacac huan quintatzacuiltij sejsé nochi neques ten momiquilijque ya, ijcón queme yejuan tachiutinenque nican talticpac, porín nojón nintachihualisuan ijcuiliutoc ya tech ne libro. <sup>13</sup>Huan Dios quinmacac nemilis ocsepa nochi neques ten momiquilijque tech at. Huan Dios quinmacac nemilis ocsepa nochi neques ten momiquilijque ya, ten tzactocque ya campa ánima-jme ten amo taneltocani. Huan nochi nojonques Dios quinmacac ocsepa nemilis huan quinixcomacac huan quintatzacuiltij ijcón queme yejuan tachiutinenque nican talticpac. <sup>14</sup>Huan ijcón Dios quinpantamotac ne miqulil huan ne mictan campa ne momanisoutoc nochi tit. Huan in tagayot amo momiquilisque oc. Ta, sayó tajyohuitosque. Huan yejua ya nojón ten quilfaj ica ojpa miqulil. <sup>15</sup>Huan no Dios quinpantamotac campa ne momanisoutoc nochi tit nochi neques ten amo ixnesico nintocay tech ne libro campa ijcuiliutoc nochi taneltocani ten yoltinemisque sen nachipa.

### **Nican tajtoa de ne yancuic eluiyac huan in yancuic talticpac**

**21** Huan nejua ni Juan niqunitac se yancuic eluiyac huan se yancuic talticpac porín ne achtopa eluiyac huan ne achtopa talticpac tajtamic ya; huan no in mar no ixpolihuic ya. <sup>2</sup>Huan nejua ni Juan niqunitac ne mohuiscapueblo, yejua ya in yancuic pueblo de Jerusalén. Huan ne pueblo hualpantemoc de ne eluiyactzinco campa yetica Dios. Huan semi mocualnextijtihuialaya ijcón queme se tesihuajtan mocualnextía cuac yetoc ya para monamictis ihuan niyoquich. <sup>3</sup>Huan no nicayic se chicaucatzajtzilil de ne tayecancatrano ten quijtoayaj ijcuín:

—Totajtzin Dios mocaltaliquiu intzalan in ipueblojcahuan; huan Yejuatzin cayetos ihuan itaneltocacahuan. Huan nochi in tagayot yesque ipueblojcahuan de Dios. Huan Totajtzin Dios inuan yetinemis huan Yejuatzin mochiutiyás in Dios de nochi itaneltocacahuan. <sup>4</sup>Huan Totajtzin quinelcahualtis de ninchoquilisuan de nochi itaneltocacahuan. Huan amo aquen momiquilis oc; huan amo aquen mochoc-tis oc; huan amo aquen motequipachos oc; huan amo aquen voltajyohuis oc. Huan ijcón yesqui porín nochi tajtamica ya de ne achtopa oncaya.

<sup>5</sup>Huan Yejuatzin ten tocotzyetica tech ne nitayecancatrono quiytoaya ijcuín:

—Xiquitacan, Nejuatzin nicyancuicatalis nochi ten ongac.

Huan Yejuatzin nechilij ijcuín:

—Xiquijcuilo nochi ten nimitzilijtoc porín notajtoluan nochi cuica ten melau. Huan nochi namejuan cuali huelis nantacuaumatismosque nochi notajtoluan.

<sup>6</sup>Huan no Yejuatzin nechilij ijcuín:

—Motamichihuac ya nochi nijín. Huan Nejuatzin nimonejnehuililitía queme ne letra A huan ne letra Z. Porín Nejuatzin ipa niyoltinemi cuac nochi huartzinehuac ya huan Nejuatzin no niyoltinemis sen nachipa porín nictamichihuac nochin. Huan nochi neques yesque amiquisque, yejuan nojón Nejuatzin niquntayocoliti huan niqinatiltis de ne amel campa mextoc atzin ten quitemacas nemilis. Huan ijcón ne naquen tayis, yejuan nojonques yoltinemis que sen nachipa. <sup>7</sup>Huan nochi neques ten quitamitanilisque in amocuali, yejuan nojonques niquntayocolis nochi ten niqunte-nilijtoc. Huan ijcón Nejuatzin niyesqui nin Dios huan yejuan yesque noconetzitzin.

<sup>8</sup>Pero niqunpantamotac campa momanisoutoc tit huan azufre nochi neques ten moucame huan amo tacuaumatismosque nohuan huan sayó temictijtinemij huan ahuilcanentinenque san. Huan no ijcón mochihuas para aquen tenahualuijtinemij huan neques ten quinmohuistilijtinemij tatadiosme huan neques ten xolopijtinemij san. Nochi nijinques tajyohuistismosque sen nachipa campa xotatoc ica tit huan azufre, ten quilfaj ica ojpa miqulilis.

### Nican tajtoa de ne yancuic pueblo de Jerusalén

<sup>9</sup>Huan mochihuac que nechnojnotzaco senme de ne chicome ángeles ten maac-toya se vaso ten pexontoya ica ne chiahuis tenica Dios satepan quintatzacuiltij ya in talticpacuani. Huan ne ángel nechilij ijcuín:

—Xihuiqui huan nimitznexiliti ne tesihuajtanti ten monamictiti ihuan Yejuatzin ten tamati queme ichcatzin.

<sup>10</sup>Huan santajma nechquemiloco in chichualis den Yecticatzin Espíritu. Huan nechuiyac huan nechajxitij tech ne hueyi huejcapan tepet. Huan ompa nechualpan-nexilitij ne hueyi mohuistic pueblo de Jerusalén ne ten hualpantemoc de eluiyactz-inco campa yetica Totajtzin Dios. <sup>11</sup>Huan ne mohuistic pueblo tanaltoctijtihuala ica icualtziyo de Dios. Huan ne cualtziyot no quinejnehuilía se tet ten semi patío queme se tet ten quilfaj jaspe. Huan ne naltonilot quinejnehuilía cristal. <sup>12</sup>Huan ne mohuistic pueblo quiyehualojtoc se hueyi patahuac tepan ten semi huejcapan-tic. Huan tech ne tepanmit ten tepanyehualol, niqitac majtactionome caltenme. Huan cada se calten ijcatoya se ángel. Huan ixcuaco de cada calten ijcuiliutoc se-jsé tocay de ne majtactionome huejcautetatme tenica hualeuque in majtactionome pantime de pueblojuani de Israel. <sup>13</sup>Huan tech ne hueyi tepanyehualol no niqitac eyi caltenme campa iquisayampa tonal. Huan no niqitac ocsé eyi caltenme campa

taniycopaca. Huan no niqitac ocsé eyi caltenme campa ajcopaca, huan ocsé eyi caltenme campa ipoliuyampa in tonaltzin. <sup>14</sup> Huan tech ne hueyi tepanyehualol campa itzinehualoni, ompa niqitac majtactionome tataman teme ten nejnepaniutocque. Huan tech cada nepan de se tet niqitac que ompa ijcuiliutoc sejsé tocayme den nojón majtactionome itanojnotzcahuan de Yejuatzin ten tamati queme ichcatzin.

<sup>15</sup> Huan ne ángel ten nechnojnotzaya, yejua ne maactoya se tamachiu de oro queme se metro, tenica quitamachihuas de queniu ica hueyi in pueblo de Jerusalén. Huan no qintamachihuas in caltenme huan no quitamachihuas in tepanyehualol. <sup>16</sup> Huan ne pueblo de yancuic Jerusalén, yejua ne quipiaya nahui esquinas ijcón queme hueyac, no ijcón queme coyahuac. Huan ne ángel quitamachihuac ica itamachiu de queniu ica hueyi ne pueblo de Jerusalén, huan ajsic ome mil huan ome ciento kilómetros de huejca. Huan nochi ijcón quipiaya de naucampa de coyahuac huan den hueyac huan de huejcapan. <sup>17</sup> Huan de ompa quitamachihuac in ángel ne tepanyehualol huan ajsic eyipoal huan nahui metro de huejcapan. Huan ne ángel quitamachihuac ne tepanyehualol ica itamachiu ijcón queme tejuan titalticpacuani ica titatamachiutinemij.

<sup>18</sup> Huan de tepanyehualol tachijchiu ica se taman cualtzin tet ten quilfaj jaspe. Huan ne pueblo ne yancuic Jerusalén, yejua ne tachijchiu ica chipahuac oro ten quinejnehuilía queme in tescat ten cahuactic. <sup>19</sup> Huan no niqitac majtactionome teme nejnepaniutocque tenica quichijchiuque in tatzinehualoni den pueblo. Huan ne tatzinehualoni quicualnextijque ica sejsé tataman tetzitzin ten semi patiojque. Huan ica se tet tzinehualoni quicualnextijque ica in tet ten quilfaj jaspe. Huan ica ome tet tzinehualoni quicualnextijque ica se tet ten quilfaj zafiro. Huan ica eyi tet tzinehualoni quicualnextijque ica se tet ten quilfaj ágata. Huan ica nahui tet tzinehualoni quicualnextijque ica se tet ten quilfaj esmeralda. <sup>20</sup> Huan ica macuil tet tzinehualoni quicualnextijque ica se tet ten quilfaj ónice. Huan ica chicuasen tet tzinehualoni quicualnextijque ica se tet ten quilfaj cornalina. Huan ica chicome tet tzinehualoni quicualnextijque ica se tet ten quilfaj crisólito. Huan ica chicueyi tet tzinehualoni quicualnextijque ica se tet ten quilfaj berilo. Huan ica chicnahui tet tzinehualoni quicualnextijque ica se tet ten quilfaj topacio. Huan ica májtacti tet tzinehualoni quicualnextijque ica se tet ten quilfaj crisopraso. Huan ica majtactionsé tet tzinehualoni quicualnextijque ica se tet ten quilfaj jacinto. Huan ica majtactionome tet tzinehualoni quicualnextijque ica ten quilfaj amatista. <sup>21</sup> Huan ne majtactionome caltenme sejsé tachijchiu ica tet ten quilfaj perlas. Huan in patahuac ojti ten panao tatajco den pueblo, yejua nojón tachijchiu nochi yoca oro ten cualtzin naltocic queme tescat.

<sup>22</sup> Huan tech in pueblo de yancuic Jerusalén, amo cana niqitac se tiopan. Porín Totecotzin Dios ten quipixtinemi nochi chicaucahuellilis, Yejuatzin ya in tiopan de ne pueblo ijcón queme Yejuatzin ten tamati queme ichcatzin, Yejuatzin no in tiopan de ne pueblo. <sup>23</sup> Huan tech ne pueblo amo oncaya tonaltzin huan amo no oncaya metzti huan amo monequis ma tatanextican ica yejuan porín Totajtzin Dios chicaucatacacaahuactoc ica icualtziyo. Huan no Yejuatzin ten tamati queme ichcatzin, Yejuatzin tatanextijtoc ica icualtziyo. <sup>24</sup> Huan nochi ipueblojcahuan de Dios ten maquisque ya nican talticpac, yejuan nojonques nentinemisque tech ne pueblo ica ne mismo cualtziyo de Dios. Huan nochi in tayecanani de nican talticpac, yejuan nojonques

cualcuisque nochi de nincualtziyo huan ninuelilis huan quicahuaquihue tech ne yancuic Jerusalén para ica cualnextisque.

<sup>25</sup> Huan no niqitac que amo queman quitzacuasque de tonayan ne cualtzin caltenme. Huan ompa amo no queman oncas oc yohual. <sup>26</sup> Huan nochi in itaneltocacahuan de Dios den nentinemíaj nican talticpac, yejuan nojonques cualcuisque nochi nincualtziyo huan ninuelilis huan quicahuaquihue tech ne yancuic Jerusalén para ica cualnextisque. <sup>27</sup> Huan tech nojón yancuic Jerusalén amo teyi calaquís ten pitzotic. Huan amo no calaquisque nión aquen ten quichiutinemíaj chihualis ten amo cualtía. Huan no amo calaquisque neques ten sayó xolopijitjinemíaj. Ta, sayó calaquitihue tech ne yancuic Jerusalén neques ten nintocayuan ijcuiliutoc tech ne libro campa ixnesij nochi ten yoltinemisque sen nachipa. Huan ne libro, yejua ten poutoc ihuan Yejuatzin ten tamati queme ichcatzin.

**22** Huan satepan de nochi nijín nechnextilij in ángel se hueyíat ten cualtzin chipahuac huan naltocitic queme ne tet ten quilíaj cristal. Huan ne hueyíat cualcuía at ten quitemaca nemilis sen nachipa. Huan ne hueyíat hual pepexocatoya campa ne itayecancatrono de Totajtzin Dios. Huan no hualpepexocatoya de Yejuatzin ten tamati queme ichcatzin. <sup>2</sup> Huan tech ne yancuic Jerusalén campa patahuac ojti, ompa ijcatoc ne cuohuit ten itaquilo quitemaca ne nemilis sen nachipa. Huan anacastan ijcatoc ne cuohuit ten quitemaca nemilis huan ocsé cuohuit ijcatoc sentapalpa ocsé atennacastan. Huan ne cuohuit motaquiltía majtactionome viaje de se xiutica, quijtosnequi cada se metzti motaquiltía. Huan imaxiuyo de ne cuohuit cualtía para quinpajtitiu nochi in talticpacuani de nochi senmanahuac. <sup>3</sup> Huan amo teyi oncas oc tech ne yancuic Jerusalén tensá ten cualcuis in tatelechihualis de Dios. Huan ne pueblojijtic yetoc ne itayecancatrono de Totajtzin Dios ihuan itayecancatrono de Yejuatzin ten tamati queme Ichcatzin. Huan nochi itequiticahuan de Dios, yejuan nojonques quitequitilijtosque huan quimohuistilijtosque Totajtzin Dios. <sup>4</sup> Huan nochi itequiticahuan de Dios, yejuan nojonques moixitztosque ihuan Yejuatzin. Huan itocaytzin de Yejuatzin ixnestos inixcuaco de ne itaneltocacahuan. <sup>5</sup> Huan tech ne yancuic Jerusalén amo oncas oc yohual nión no monequis tanex oc huan nión no monequis oc ma tonato. Porín sayó Totecotzin Dios tatanexitjos tech ne pueblo. Huan nochi itaneltocacahuan de Yejuatzin, yejuan nojonques tayecantinemisque sen nachipa huan sen nachipa.

### **Nican tajtoa de queniu amo huejcahuas oc para mohualuicas Totecotzin Cristo**

<sup>6</sup> Huan ne ángel no nechilij ijcuín:

—Nochi nijín tajtolme cuica ten melau san huan namejuan cuali huelis xitacuau tamatiyacan ica nochi notajtolztiztin. Huan Totecotzin, Yejuatzin to Dios quinta machilismaca nitanahuatijcahuan, yejuan ten tanojnotztinemiaj itencopaca Dios. Huan Yejuatzin techualtitanilij niángel tanahuatijque para technextilis tejuan ten tiitequiticahuan nochi ten niman nican quípía de mochihuati.

<sup>7</sup> Huan techilía Totecotzin Cristo ijcuín:

—Xiquitacan, Nejuatzin niman nimohualuicas. Huan no namechilía que tatiochihualme de Dios nochi neques ten quitacamatinemij nochi in tajtolztiztin ten Dios quinmactilij ten ijcuiliutoc tech nijín libro.

<sup>8</sup> Huan nejua ni Juan niqitac huan nicayic nochi nijín ten namechilijtoc. Huan satepan cuac nictamicayic ya huan nictamiitac ya nochi nijín, ijcuacón nimotan-

cuaquetzac huan nimotentocato iicxitan ne ángel, para nicmohuistilis ne ángel ten nechnextilij ya nochi nijín tajtachialis. <sup>9</sup> Pero ne ángel nechilij ijcuín:

—Xiquita, amo ijcón xicchihua porín no niitequiticau de Dios ijcón queme tejua. Huan nejua no niitequiticaicniu de motasoicnihuan neques ten tanojnotztinemij itencopaca Totajtzin Dios. Huan no niitequiticaicniu de nochi neques ten quitacatinemij in tajtolme ten ijcuiliutoc tech nijín libro. Huan nimitzilía que xicmohuistilijtiu sayó Totajtzin Dios.

<sup>10</sup> Huan no nechilij ne ángel ijcuín:

—Ma amo itxacto nijín libro. Ta, xiquinnextilij in itaneltocacahuan de nochi tajtolme ten Dios techmactilij ya huan ijcuiliutoc ya tech nijín libro. Huan nimitzilía amo xiquintaatilij nijín tajtolme porín niman motamichihuati ya nochi ten ijcuiliutoc tech nijín libro. <sup>11</sup> Huan nochi neques ten tachiutinemij ica ten amocuali tachihualisme, yejuan nojonques ma quichiutiyaan sayó ten pitzotic nemilis. Huan nochi neques ten motajacolmacatinemij, yejuan nojonques ma quichiutiyaan sayó ten amocuali chihualis. Huan nochi neques ten yolcualime, yejuan nojonques ma quichiutinemican sayó ten cuali chihualis. Huan nochi neques ten yolchিপauque, yejuan nojonques ma cachi oc xiyolchিপaucanentinemican.

<sup>12</sup> Huan techilía Totecotzin Cristo ijcuín:

—Xiquitacan, Nejuatzin niman nimohualuicas. Huan cuac nihualas ya, ijcuacán nicualcuitihualas ya ne tetayocolil ten niquntayocolis sejsé notaneltocacahuan ijcón queme yejuan quichiutinenque nintequiu de nican talticpac. <sup>13</sup> Huan Nejuatzin niyoltinemi cuac nochi hual tzinehuac ya, huan niyoltinemis tech ne tonalme cuac nochi tatajtamis ya. Ica ya nojón Nejuatzin nimonejnehuililtía queme ne letra A huan queme ne letra Z.

<sup>14</sup> Huan no namechilía que tatiochihualme de Dios nochi neques ten moyolchিপautinemij den nintajtacoluan, ijcón queme cuac se quipactinemi tilma ten motzojcuiltía. Porín yejuan nojonques Dios quintacahuilis ma calaquican campa caltenme de ne yancuic Jerusalén para ompa quicuasque in taquilot de ne cuohuit ten quitemaca ne nemilis sen nachipa. <sup>15</sup> Huan nochi neques ten amo taneltocacque, yejuan nojónques amo huelis calaquisque. Ta, yejuan yetosque huejca de ne tepanyehualol campa yetosque neques ten amocuali taca ten monahualnectinemíaj huan neques ten ahuilnentinemique ihuan sihuame oso taca. Huan no yetosque ne calampa neques temictiani huan neques ten quimohuistilijtinemíaj tatadíosme. Huan no yetosque calampa nochi neques ten sayó cuelitzinemíaj huan quichiutinemis que in xolopijyot. <sup>16</sup> Huan Nejuatzin ni Jesús huan nicualtitanic noángel tanahuatijque ma yejua namechyequiliqui notajtoluan campa mosentilía notaneltocacahuan. Huan Nejuatzin niiteiscalticau de rey David huan no niiconeu de ne rey David. Huan Nejuatzin nimonejnehuililtía queme ne hueyi sitalin ten semi cacahuaca cuac panquisa cualcampa. Huan namechnextilijtoc nochi ten mochihuati. <sup>17</sup> Huan in Yecticatzin Espíritu quilijtoc Jesucristo ijcuín:

—Xionuiqui, Tejuatzin.

Huan nochi tejua tiitaneltocacahuan de Cristo queme yesquía tesihuajtan, nochi tejua no tiquilijtocque Jesucristo ijcuín:

—Xionuiqui, Tejuatzin.

Huan nochi neques ten tacactocque, yejuan nojónques no quilijtocque Jesucristo ijcuín:

—Xionuiqui, Tejuatzin.

Huan no nejua ni Juan namechilía ijcuín:

—Aquen ten yolamictinemi, huan quiyolnejnequi motoquisque ihuan Cristo, yejua ne ma huiqui. Huan Cristo catiltis ica ne atzin ten quitemaca nemilis. Huan in atzin sayó quitetayocolía Cristo.

<sup>18</sup> Huan nejua ni Juan niquinnojnötzac nochi neques ten quicaquij nijín tajtolme ten Dios nechmactilij ma niquijcuilo tech nijín libro. Huan nejua niquinnejmachtía ijcuín:

—Tacán acsá quimajxitilisquía cachi oc tajtolme oc de yejua san tech nijín libro, ijcuación Dios quipantoyahuiliquiu nochi chiahuis de tatzacuilitis ten ixnesi tech nijín tajcuilolamatzin. <sup>19</sup> Huan tacá acsá no quiquixtilis sequi tajtolme de nijín libro ten Dios nechmactilij, ijcuación Dios quiajchihuilis nitocay de ne libro campa ixnesi nochi neques ten quipíaj ne nemilis sen nachipa para ma amo calaquis tech ne mohuistic pueblo ten quilíaj yancuic Jerusalén. Huan no Dios cajchihuilis de ne tagat nochi in tatiochihualisme ten ijcuiliutoc tech nijín libro ten quiseliani.

<sup>20</sup> Huan Yejuatzin techmejmelahuilía nochi nijín tajtolme huan Yejuatzin quijtoa ijcuín:

—Yec melua Nejuatzin niman nimohualuicas.

Huan nejua ni Juan no niquijtoa ijcuín:

—Amén, ma ijcón mochihua. Quema, xionuiqui, Notecotzin Jesucristo.

<sup>21</sup> Huan axcan sayó xicselijtiyacan nannochi namejuan ne teyolicnelilis imaco Totecotzin Jesucristo. Amén, ma ijcón mochiutiu.